

梁溪集

李纲

文硕阁

wenshuoge.com

目录

关于我们	7
提要	9
原序	10
总目	11
卷一	30
卷二	34
卷三	38
卷四	42
卷五	45
卷六	55
卷七	65
卷八	74
卷九	82
卷十	92
卷十一	102
卷十二	109
卷十三	117
卷十四	124
卷十五	134
卷十六	142
卷十七	153
卷十八	162
卷十九	171
卷二十	178
卷二十一	185
卷二十二	193
卷二十三	202
卷二十四	211
卷二十五	220
卷二十六	229
卷二十七	236
卷二十八	244
卷二十九	253
卷三十	259
卷三十一	266
卷三十二	273

卷三十三		281
卷三十四		285
卷三十五		288
卷三十六		294
卷三十七		298
卷三十八		303
卷三十九		309
卷四十		312
卷四十一		317
卷四十二		322
卷四十三		326
卷四十四		330
卷四十五		334
卷四十六		338
卷四十七		343
卷四十八		350
卷四十九		356
卷五十		361
卷五十一		369
卷五十二		378
卷五十三		385
卷五十四		391
卷五十五		398
卷五十六		406
卷五十七		409
卷五十八		413
卷五十九		417
卷六十		420
卷六十一		424
卷六十二		430
卷六十三		435
卷六十四		440
卷六十五		445
卷六十六		450
卷六十七		455
卷六十八		461
卷六十九		467
卷七十		471

卷七十一	476
卷七十二	479
卷七十三	484
卷七十四	489
卷七十五	493
卷七十六	497
卷七十七	502
卷七十八	505
卷七十九	511
卷八十	514
卷八十一	518
卷八十二	523
卷八十三	527
卷八十四	531
卷八十五	536
卷八十六	540
卷八十七	544
卷八十八	549
集八十九	553
卷九十	557
卷九十一	561
卷九十二	566
卷九十三	571
卷九十四	575
卷九十五	580
卷九十六	584
卷九十七	588
卷九十八	592
卷九十九	596
卷一百	600
卷一百一	604
卷一百二	609
卷一百三	614
卷一百四	619
卷一百五	623
卷一百六	627
卷一百七	631
卷一百八	636

卷一百九	640
卷一百十	645
卷一百十一	650
卷一百十二	655
卷一百十三	660
卷一百十四	665
卷一百十五	672
卷一百十六	678
卷一百十七	684
卷一百十八	691
卷一百十九	699
卷一百二十	705
卷一百二十一	712
卷一百二十二	719
卷一百二十三	724
卷一百二十四	729
卷一百二十五	735
卷一百二十六	742
卷一百二十七	748
卷一百二十八	754
卷一百二十九	759
卷一百三十	764
卷一百三十一	770
卷一百三十二	776
卷一百三十三	781
卷一百三十四	786
卷一百三十五	791
卷一百三十六	794
卷一百三十七	798
卷一百三十八	802
卷一百三十九	806
卷一百四十	809
卷一百四十一	814
卷一百四十二	818
卷一百四十三	824
卷一百四十四	828
卷一百四十五	832
卷一百四十六	836

卷一百四十七	840
卷一百四十八	844
卷一百四十九	848
卷一百五十	852
卷一百五十一	856
卷一百五十二	860
卷一百五十三	864
卷一百五十四	868
卷一百五十五	871
卷一百五十六	874
卷一百五十七	877
卷一百五十八	880
卷一百五十九	884
卷一百六十	888
卷一百六十一	892
卷一百六十二	896
卷一百六十三	901
卷一百六十四	909
卷一百六十五	914
卷一百六十六	921
卷一百六十七	923
卷一百六十八	928
卷一百六十九	931
卷一百七十	934
卷一百七十一	939
卷一百七十二	944
卷一百七十三	948
卷一百七十四	954
卷一百七十五	959
卷一百七十六	963
卷一百七十七	969
卷一百七十八	974
卷一百七十九	979
卷一百八十	985
年谱	991
行状上	1.001
行状中	1.011
行状下	1.020

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部四

梁溪集 别集类三【宋】

提要

【臣】等谨案梁溪集一百八十卷附錄六卷宋李纲撰纲有建炎时政记已着錄是集首载宋少保观文殿大学士陈俊卿序谓纲少子秀之哀集其表章奏劄八十卷而诗文不与焉晁公武读书志则作一百五十卷陈振孙书錄解题则作一百二十卷盖後人续以诗文合编互有分并已非复秀之之旧本此本赋四卷诗二十八卷禠文一百三十八卷而以靖康传信錄三卷建炎进退志四卷建炎时政记三卷俱编入集中又以年谱行状之类六卷附焉与晁陈二家所錄均为不合又非宋本之旧矣纲人品经济炳然史册固不待言即以其诗文而言亦雄深雅健磊落光明非寻常文士所及徒以喜谈佛理故南宋诸儒不肯称之然如顏真卿精忠劲节与日月争光固不能以书西京多宝塔碑作抚州麻姑坛记遂减其文章之价也集中有补宋璟梅花赋自序谓璟赋已佚拟而作之其文甚明元刘崱隐居通议所载璟赋二篇皆属伪本明田艺蘅留青日札乃称得元鲜于枢手书璟赋急錄传之枢之真蹟旋毁核其文句大抵点窜纲赋十同七八其为依托显然然亦见纲之赋格置於唐人之中可以乱真矣乾隆四十六年五月?校上

总纂官【臣】纪昀【臣】陆錫熊【臣】孙士毅

总校官【臣】陆费墀

原序

梁谿集原序

国朝祖宗以仁覆天下而不右武事然垂二百年更外寇之变者三皆得人以任其事景德契丹之变寇莱公任之康定元昊之变范文正公韩忠献公任之靖康金人之祸比是二者尤鉅而丞相陇西李公亦慨然以身当其变盖天之佑宋不于其兵而于其人是数君子者之事君不于其躬而于其国其事之济否则有命与数存焉要之皆忠烈英特之士也予既敬服数公之行事因欲览观其遗文莱公它文不甚见于世独其诗传盖百有余篇辞健而格高旨深而思远真作之杰者也至于文正忠献则家集俱在其言之形於文字议奏之间者或简重而壮伟或详明而剴切盖与其谋谟勲业惟称李公近与予耳目接私以不得其文为恨淳熙丙申予帅三山其子秀之裒集其文以示予求序以冠其端盖表章奏劄至八十卷而诗文犹不与焉予读之而叹曰详哉其言之也世之有其学者常患乎无其材有其材者常患乎无其节三者备矣然使其辞之不达则不足以动人主之听言之不文则不足以永後世之传是以君子贵其全也公学本于经才见于用节着于论水灾赞禅议之日是其章较盖天下之所共知焉予窃怪方敌骑闯城之际在廷之臣争为讲解迁避之说公孑然孤忠未易以口舌争卒能感悟万乘以坚牢之策以何道而致然及观公之议奏明白条畅反覆曲折其叙成败利害灼然如在目前宜乎感悟明主之听而亟从之也使公之谋尽用则敌骑必无再下之祸而其勲业可以继寇莱韩范矣惜乎其夺於谗而不之竟也光尧中兴因天下之望而首相公十议所陈规摹弘远矣刘麟之役公虽在外且画三策六条以献王伦之使公复愤慨抗疏以争之与时论不合不顾也呜呼其可谓忠也矣然则公之勲业虽不克大就而其所奋立陈述足以暴于後世况又其言之文哉昔东坡先生谓诸葛孔明不以文章自名而开物成务之姿综练名实之意自见于言语出师之表简而尽直而不肆而郑亚谓李卫公蘊开物致君之才居丞弼上公之位建靖难平戎之策垂经天纬地之文呜呼若公者可谓兼之矣予既诺秀之之请夺于多事未暇缀思後三年归自金陵乃始书而归之某月某日陈俊卿序

总目

钦定四库全书 集部四

梁谿集总目 别集类三【宋】

卷一

赋

卷二

赋

卷三

赋

卷四

赋

卷五

诗

卷六

诗

卷七

诗

卷八

诗

卷九

诗

卷十

诗

卷十一

诗

卷十二

诗

卷十三

诗

卷十四

诗

卷十五

诗

卷十六

诗

卷十七

诗

卷十八

诗

卷十九

诗

卷二十

诗

卷二十一

诗

卷二十二

诗

卷二十三

诗

卷二十四

诗

卷二十五

诗

卷二十六

诗

卷二十七

诗

卷二十八

诗

卷二十九

诗

卷三十

诗

卷三十一

诗

卷三十二

诗

卷三十三

表本诏书

卷三十四

表本诏书

卷三十五

拟制诏

卷三十六

拟制诏

卷三十七

拟制诏

卷三十八

拟制诏

卷三十九

表劄奏议

卷四十

表劄奏议

卷四十一

表劄奏议

卷四十二

表劄奏议

卷四十三

表劄奏议

卷四十四

表劄奏议

卷四十五

表劄奏议

卷四十六

表劄奏议

卷四十七

表劄奏议

卷四十八

表劄奏议

卷四十九

表劄奏议

卷五十

表劄奏议

卷五十一

表劄奏议

卷五十二

表劄奏议

卷五十三

表劄奏议

卷五十四

表劄奏议

卷五十五

表劄奏议

卷五十六

表劄奏议

卷五十七

表劄奏议

卷五十八

表劄奏议

卷五十九

表劄奏议

卷六十

表劄奏议

卷六十一

表劄奏议

卷六十二

表劄奏议

卷六十三

表劄奏议

卷六十四

表劄奏议

卷六十五

表劄奏议

卷六十六

表劄奏议

卷六十七

表劄奏议

卷六十八

表劄奏议

卷六十九

表劄奏议

卷七十

表劄奏议

卷七十一

表劄奏议

卷七十二

表劄奏议

卷七十三

表劄奏议

卷七十四

表劄奏议

卷七十五

表劄奏议

卷七十六

表劄奏议

卷七十七

表劄奏议

卷七十八

表劄奏议

卷七十九

表劄奏议

卷八十

表劄奏议

卷八十一

表劄奏议

卷八十二

表劄奏议

卷八十三

表劄奏议

卷八十四

表劄奏议

卷八十五

表劄奏议

卷八十六

表劄奏议

卷八十七

表劄奏议

卷八十八

表劄奏议

卷八十九

表劄奏议

卷九十

表劄奏议

卷九十一

表劄奏议

卷九十二

表劄奏议

卷九十三

表劄奏议

卷九十四

表劄奏议

卷九十五

表劄奏议

卷九十六

表劄奏议

卷九十七

表劄奏议

卷九十八

表劄奏议

卷九十九

表劄奏议

卷一百

表劄奏议

卷一百一

表劄奏议

卷一百二

表劄奏议

卷一百三

劄子

卷一百四

劄子

卷一百五

状

卷一百六

状

卷一百七

状

卷一百八

书

卷一百九

书

卷一百十

书

卷一百十一

书

卷一百十二

书

卷一百十三

书

卷一百十四

书

卷一百十五

书

卷一百十六

书

卷一百十七

书

卷一百十八

书

卷一百十九

书

卷一百二十

书

卷一百二十一

书

卷一百二十二

书

卷一百二十三

书

卷一百二十四

书

卷一百二十五

书

卷一百二十六

书

卷一百二十七

书

卷一百二十八

书

卷一百二十九

书

卷一百三十

后

卷一百三十一

后

卷一百三十二

记

卷一百三十三

记

卷一百三十四

序

卷一百三十五

序

卷一百三十六

序

卷一百三十七

序

卷一百三十八

序

卷一百三十九

序

卷一百四十

赞

卷一百四十一

赞

卷一百四十二

颂箴铭辞

卷一百四十三

论

卷一百四十四

论

卷一百四十五

迂论

卷一百四十六

迂论

卷一百四十七

迂论

卷一百四十八

迂论

卷一百四十九

迂论

卷一百五十

迂论

卷一百五十一

迂论

卷一百五十二

迂论

卷一百五十三

迂论

卷一百五十四

迂论

卷一百五十五

杂着

卷一百五十六

杂着

卷一百五十七

杂着

卷一百五十八

杂着

卷一百五十九

杂着

卷一百六十

杂着

卷一百六十一

题跋

卷一百六十二

题跋

卷一百六十三

题跋

卷一百六十四

祭文辞疏

卷一百六十五

祭文辞疏

卷一百六十六

碑志

卷一百六十七

碑志

卷一百六十八

碑志

卷一百六十九

碑志

卷一百七十

碑志

卷一百七十一

靖康传信录

卷一百七十二

靖康传信录

卷一百七十三

靖康传信录

卷一百七十四

建炎进退志总序

卷一百七十五

建炎进退志总序

卷一百七十六

建炎进退志总序

卷一百七十七

建炎进退志总序

卷一百七十八

建炎时政记

卷一百七十九

建炎时政记

卷一百八十

建炎时政记

卷一

钦定四库全书

梁谿集卷一 宋 李纲 撰

赋一

武夷山赋 含笑花赋

幽兰赋 日者赋

荔支赋 莲花赋

武夷山赋【并序】

武夷山水之胜为七闽最图志载之详矣予闽人也游宦四方每以未至其下为恨宣和改元承乏螭头寓直左省昼寝梦游山间四顾峯峦玉色秀美瓌奇不可模状既觉欣然窃意所梦殆非尘世也已而都城积水奏疏论事谪官沙阳渡淮历浙道江南入闽境遂游武夷道士导予乘小舟泛九曲溪抵曦真馆奇峯怪石顾接不暇回舟雪作山色尽白恍如梦中怛然惊笑信乎好慕之极达乎精神而出处分定非人力之所能致也留山中赋诗几五十篇又广其意而为之赋予於武夷可谓无负亦足以偿平昔之愿矣其辞曰

太虚寥廓浮清凝浊融为川渌结为山岳山岳之奇萃于坤倪秀气磅礴实鍾武夷武夷之山蜿蜒郁蟠作镇南服千里奠安喷云泄雨噫风嗽雾蔽亏日月变移寒暑崖谷窈窕峯岫龍嵒雕鏤刻削孰尸其功一溪九曲演漾寒渌贯于山中凤翥虬蹙洞户杳然栖神宅仙蟬蛻羽化灵骨犹传云封雾锁玉润金坚稽于秘籍是为昇真化之天其瓌伟絶特之观则有幔亭之麓天柱之峯铁障延袤监池空蒙岩嘯雕虎潭藏老龙俨金仙之容睟粲游女之肌红储芝玉于二廩铸栾乳于三鍾耸层峯之叠翠落飞瀑之长虹千岩万壑竞秀争雄荡心骇目不可殫穷其仙圣游戏之地则有换骨之岩赌妇之石掌印掬踪膝存跪迹绘胎禽之缥缈插仙舟於罅隙留丹竈於层巔置鸡栖於峭壁组织就而杼轴空篇翰终而几案寂案图以求秘怪难测其植物则有翠栢毛竹绿李丹橘翳荟芬芳擢干垂实其动物则有舞鹤鸣鷗游羊戏鹿栖息飞翔分羣萃族其内则有琼楼珠殿玉圃芝田创见天地自开山川灵仙之所周旋也其外则有长松茂草异卉嘉葩枕流漱石朝烟夕霞幽邃之所考盘也合而观之山意深水容湍石色温润溪流屈盘地灵而木秀景寂而云闲信能腾誉今古垂光简编厠三十六洞而别为一天也惟昔仙君来晏曾孙彩梁虹亘幔屋云屯翠旒绛节紫褥芳裯虚座鼎设华筵翼分浆琼液玉羞凤脯麟鏘金石之间作奏古曲曰宾云歌人间之可哀叹光景之易曛纷鸾鹤以回驭但流水与空山怅真游之已远时笙箫之夜闻此又诡异恍惚叵得而具论也若夫岱宗太华之穹崇终南太行之险阻或峻极而降神或登临而小鲁四明天台衡岳庐阜度长絜大虽雄伟之

不侔而幽邃巧妙固不可同日而语也爰有狷介之士学陋识迂误入世网偶聯簪裾迹朝市而心山林究地志而閱仙书驰精神於梦寐覩幽眇於画图岁峥嵘以適尽因谪宦而假途步烟霞之岑寂仰神仙之有无览魏子之遗躅访刘公之旧庐嘉泉石之可乐寄吟哦以自娛倒冠落佩与世濶疎眷兹山而无斲将徇其愚而隱居者乎

含笑花賦【并序】

南方花木之美者莫若含笑綠叶素荣其香郁然是花也方蒙恩而入幸价重一时故感而为之賦其辭曰

夫何嘉木之姝嫿兮藹芬馥之芳容结孤根於暖地兮披素艳於幽丛炫丽景之迟迟兮浥零露之浓浓默凝情而不语兮独含笑於春空其笑伊何粲兮巧倩洞户初啓曲栏乍见惊邻女之窥墙疑宠姬之教战鄙妖姿之齟齬谢啼粧之半面态有余情忽焉改观国香无敌秀色可餐抱贞洁之雅志舒婉变之欢顏宁解颐而启齿方墮珥而欹冠苞温润以如玉吐芬芳其若兰俯者如羞仰者如喜向日嫣然临风莞尔岂褰帙而观跂将忘怀於射雉轻可买之千金重回眸之百媚拔类迈伦孰与为比泛潏酷烈绰约婵娟翠叶拥鬢綠萼承歡嗅之弥馨察之愈妍信色香之俱美何扈芷而握荃若夫萱草忘忧合欢蠲忿采杜若於洲中攀芙蓉於泽畔艺菊百畦滋蕙九畹絜长度美固不可一?而论也方将移自南国置之玉堂违霜霰之凄冷依日月之未光凭雕檻而凝彩度芝阁而飘香破顏一笑掩乎羣芳诚可以承天宠而植椒房者乎

幽兰賦【并序】

兰有二种华以春者似蕙华以秋者似菊楚辞曰秋兰兮青青綠叶兮紫茎又曰春兰兮秋菊长无絕兮终古今世人之所识者素葩丛本特春兰耳予尝得一种兰於亡友萧子寬家綠叶紫茎至秋始华如楚辞之所賦其华似菊而色微紫其香似春兰而加芳食之味尤辛甘可以调羹曹子建七启於肴饌之妙言紫兰丹椒施和必节滋味既殊遗芳射越乃知兹兰可食其为秋兰无疑也二兰皆喜生於高山深林閨寂无人之境则芬芳郁烈茂盛而远闻移而置於轩庭房室之间不过一再岁华益鲜而香益微盖其天性如此故古人又以幽兰目之与夫山林隱遯之士耿介高洁不求闻达於人而风流自着者亦何以异故感而賦之其辭曰

相百卉之芳菲兮待培植而乃成何兹兰之异禀兮处幽僻而方兴高山崔嵬而寵褻兮深林杳杳以冥冥下波涛之喷激兮上雪霰之飘零邈人迹之不到兮兰於焉而独馨言茁其芽载擢其英春与蕙兮偕秀秋与菊兮并荣或素葩而丛本或綠叶而紫茎虽春秋之异种岂殊德於幽贞耿介自许芬芳谁与久而不知其香晦而不改其度荣何谢於光风瘁何伤於白露配芝桂以为友奚萧艾之能侣类同心之契合比明德之欣附淑人君子爱而不忘蒸以为藉沐以为汤纫之为佩刈之为防实有取於雅操匪徒慕夫国香若夫出自故山同夫小草资耳目之嘉玩供园林之幽讨虽得托於孤根盖已违其所好譬犹高洁之士隱遯之人蹈山林而长往友麋鹿而同羣付功名於脱屣等富贵於浮云室虽迕而人则远可得闻而不可见有泉石之枕漱无猿鹤之惊怨晦其迹而弥芳怀其道而愈显子真谷口德公鹿门二子食薇於首阳

四皓采芝於商山名与实兮兼茂心与迹兮俱闲播清芬於今古亦何以异於幽兰

日者赋【并序】

世之术士托五行以售其说冒利贪进之徒争往问焉予疾之作日者赋以见意其辞曰

李子既抵沙阳有日者踵门而告之曰人所禀命不离五行更相更王相杀相生一僨一起代废代兴吾术以人之始生岁月日辰之支干推步斟酌而知其贵贱寿夭於未萌百不失一粲然着明今子奋身寒微早蒙识擢徊翔省寺缓步台阁载笔螭蚴方得所托朝游於清都钧天帝居之所夕贬於闽粤磻山僻远之郭翩若云鸿之铩翮脱若霜林之陨箨舍彼宠荣甘此落寞岂人力之能致盖亦命有所缚而已然而方泰而穷已否则通时有利钝各系其逢昔退之於潮阳遇逆旅之毛翁期以秩位後悉符同今我欲语子以未来子岂有意於相从乎李子笑而应之曰子来前万物林生盈乎载煮大化居中犹轮是蹈羽鳞毛介灌莽丛草一气甄陶衆形丑好茫乎天运窈尔神造忽焉为人赋情肖貌自少得壮自壮得老动静作止饮啄梦觉或当时而荣华或失势而枯槁有制之者幽深奥渺今子乃欲以生辰之支干区区寸计而铢较摘抉杳微期以执效譬犹海以蠡测钟以莛考虽或亿中竈焉知夫天道且夫人之所同者岁月我之所独者日辰四海之广生齿之繁一日一辰之间其孕育者几人或孪生而吉凶异或殊禀而祸福均谓宜盛而更衰谓方屈而还伸瞽乱彫杂颠倒纷纭汪洋渺漫千绪万端参错重出不可究陈稽之於古盖所未闻肇自隋唐是为贪位慕禄嗜进之本根吾方辟此何以语云昔者圣贤驰骛望道莫见墨突不黔孔席不暖或版筑而弼傅或束縛而相管吕八十而始遇甘十三而已显或奋身於奴仆或拔迹於亩畎或疏封而殖醢或徒步而鼎铉祸福倚伏吉凶展转消息盈虚晦明舒卷俄而可度天道亦浅且夫洛阳帝都多近臣南阳帝乡多近亲方襁褓而垂紫绂虽葭莩而拥朱轮冠盖车马烂其盈门盖亦幸耳岂咸值乎贵神长平之战士卒叠迹而阬覆甘露之事卿相骈颈而剿戮屠洗之冤不遗於噍类诛夷之惨连逮於三族或婴党錡之祸或罹罗织之狱亦云不幸岂尽临於杀局幸与不幸似夫偶然偶然之中有数存焉幹流而迁或推而还震荡回薄胡可胜言主张翕辟孰司其权命实制之必原於天未形有分且然无间何有夫岁月日辰之支干是以君子乐天而知居易以俟不戚戚於贫贱不汲汲於富贵静则安土而敦乎仁动则见险而止乎智不立岩墙以蹈危不为轩冕而肆志一晦一显与道宛转一止一行与道翱翔或出或处惟道是与或语或默惟道是适安时处顺知其不可柰何故无入而不自得也且夫取舍在人可否在时时或未然强进何为宁出入若无心之云将炫燿若干阳之霓乎宁昂昂如野鹤将逐逐如家鸡乎宁曳尾如涂中之龟将捐生如太庙之牺乎宁退而有考盘之乐将进而有履虎之危乎宁汨汨守抱瓮之拙将俯仰随桔槔之机乎宁执志以固守将逐物以转移乎昔者屈原放三湘而卜居禹锡谪九年而何卜予虽不才自信甚笃守此拙愚忘彼宠禄达非我荣穷非我辱从吾所好何有吉凶之於祸福日者俯而慙仰而叹不得所对逡巡而辞退

荔支赋【并序】

张曲江尝赋荔支美则美矣然未尽善也予来闽中始得食其生者因感而赋之其辞曰

伊天地之大美鍾火德於炎方結荔支之嘉實稟純氣於至陽含滋潤於雨露迺嚴凝於雪霜碧葉素榮縹蒂丹房狀如龍鱗顆如裹囊綵綃為殼白玉為瓢液貯甘露核藏丁香醞難言之妙味吐自然之清香此荔支之大略也全而觀之丸如丹鳳之方卵而未雛破而窺之瑩如老蚌之既剖而見珠掇而出之粲如姣姬褪紅裳而露玉膚咀而嚼之旨如琤醴吸沆瀣而羞醞酬談辨莫及丹青難圖百果退避孰敢爭腴至如厥包橘柚先荐含桃嶺表龍眼西域蒲萄色沮情慙遜美推高矧夫剥棗浮瓜來禽青李張公大谷之梨梁侯烏桕之柿曾何足以比萬分之一二哉秋夏之交蒸暑歊然畏景馳至薰風入弦着花結實耀日含烟一望萬株列於名園璀璨熒煌若繁星之麗天一食千顆置之華筵勻圓磊落若火齊之堆盤溢甘芳於齒頰實元氣於丹田宿醒可解沈疴可痊若夫色味與香變於三日曝之為乾漬之以蜜泛鯨海之巨航入金張之要室譬如神藥致佳人之尸千金市駿馬之骨氣格精神初不得其髣髴也昔者曲江嘗為之賦寓意卒章惜其不遇殊不知草木之性各安其土玩物喪志亦所不取開元之末妃子最憐萬里驛致來自蜀川死百馬於山谷望一騎而嫣然荔支則遇而天下病焉爰有狷介之士負罪遠謫適丁其時偶得而食不煩傳送之勞以資口腹之適快平生之素愿飽珍味而無斃正猶衛懿不可以好鶴而幽人得之適所以增其逸阮籍之徒得全於酒而羲和湮淫乃廢時而亂日且食荔支此非我力

蓮花賦【并序】

釋氏以蓮花喻性蓋以其植根淤泥而能不染發生清淨殊妙香色非他草木之華可比故以為喻宋之問歐陽永叔皆嘗賦之清便富艷然未嘗及此予暇日訪羅疇老修撰見其園池蓮華盛開因感而為賦極其美而卒歸之於正云其辭曰

偉哉造物之播氣也天地絪縕陰陽蕩摩植物得之發為奇葩葩之甚奇莫如蓮華擢修干於波瀾結芳根於泥沙氣馥芝蘭彩艷云霞相草木之芳菲孰色香之可加綠水如鏡紅裳影斜乍疑西子臨谿浣紗菡萏初開朱顏半 又如南威夜飲朝歌亭亭烟外凝立逶迤又如洛神羅袜凌波天風徐來妙响相磨又如湘妃瑟鼓云和嬌困無力摇摇纖柯又如戚姬楚舞婆娑風雨摧殘飄零紅多又如蔡女蕩舟抵河爾乃藕埋玉骨花炫新妝綠荷倚蓋翠的連房修莖聳碧嫩蘂搖黃貯盈盈之真色泛苒苒之天香斂若凝羞婉若含笑仰若吟風俯若窺沼波靜露寒風清月曉動嬉戲之游魚來翩翩之白鳥蕩江湖之秋思增園亭之幽渺則有高世之士味道之人悟色香之妙覺獲圓通於見聞深契無生不離根塵豈止玩其英華攬其芳芬而已哉言觀其本生於淤泥言觀其末出於清漪處污穢而不染體清淨而不移至理圓成熟能知之西方之人強名為佛以茲取喻其誰曰不是以毗盧之坐千葉齊敷華藏之海十方咸出惟植根之得地爰開華而結實功用既圓退藏於密返觀自性之蓮華又何資於造物

梁谿集卷一

卷二

钦定四库全书

梁谿集卷二 宋 李纲 撰

赋二

拟骚 秋色赋

续远游赋 迷楼赋

江上愁心赋 梅花赋

拟骚【并序】

昔屈原放逐作离骚经正洁耿介情见乎辞然而托物喻意未免有谲怪怨怼之言故识者谓体慢於三代而风雅於战国乃雅颂之博徒而词赋之英杰不其然欤予既以愚触罪久寓谪所因效其体摅思属文以达区区之志取其正洁耿介之义去其谲怪怨怼之言庶几不诡於圣人目之曰拟骚其辞曰

帝混元之苗裔兮历汉唐而扬英散枝叶於天壤兮遭五季而遯族於瓯闽皇祖隐德而弗耀兮逮吾亲而振名岁昭阳之渊献兮闰夏甲申吾以降幼倥侗而颡蒙兮非岐嶷之夙成长游学於四方兮爰观光於国宾服诗礼之严训兮传忠孝之家声揽百氏之所长兮味六经之纯精常恐不德以怨及朋友兮慕节义於古人岂富贵之足志兮冀斯文之可鸣带长铗而峩冠兮锵佩玉而琚琼纫兰荪之香洁兮服蕙茝之芳馨纷吾既袭此衆美兮胡敢自谓之修能误姓名之上达兮珥史笔於彤庭侍穆穆之清光兮闻玉音之丁宁入则陪国论於青琐兮出则扈属车之清尘惟丘山之恩厚兮何涓埃之报轻悼奸邪之乱政兮汨正理而不明窃怀愤而郁结兮每欲叩龙墀而力争惟本朝之寛大兮非有鼎鑊斧钺之刑何羣公之噤嘿兮咸卷舌而吞声因积水之告灾兮爰奏疏而上陈庶一言之悟主兮回天照之明明朝抗章而夕贬兮白日不谅予之精诚徒孤忠之耿耿兮任萍梗之飘零絶江淮而历浙兮割深爱於亲庭陟闽山之险阻兮予只影之伶俜泛吾舟兮建溪弭吾节兮劔浦会计当兮委吏偷燕闲兮筦库艺兰蕙兮九畹植松竹兮百亩餐秋菊兮落英饮木兰兮坠露朝吾游兮翰墨之林夕吾戏兮图书之府道既不可以行於今兮质圣贤於往古嘉溪山之秀絶兮聊逍遥以容与眺翠岭兮泛清流桂为楫兮兰为舟有觴咏兮自适乐天命兮何忧悼屈原之沈汨兮悲贾谊之不修笑退之之戚嗟兮悯德裕之穷愁惟君子之出处兮贵体道以周流自任以天下之重兮何一已之为谋用则行而舍则藏兮又何必杀身而怨尤惟盖棺兮事始定聊康强兮保天性岁寒不失其青青兮惟松柏之独正信吾道以优游兮始居易以俟命乱曰已矣乎莫我知也浮云蔽日兮虹蜺昼明霜露降此芳草兮百鸟寂而无声恐美人之迟暮兮岁遯尽而峥嵘侧身西望而

叹息兮心郁结而不平心郁结兮何为道既不可以散兮敛而归之惟静惟正兮其殆庶几吾方将与造物者为人兮又安能跼咸彭之所遗

秋色赋【并序】

潘岳赋秋兴刘禹锡欧阳永叔赋秋声玉局赋秋阳予来闽中七八月之交霖雨乍晴始见秋色因援毫以赋之以秋色名篇其辞曰

宿雨初霁大火西流凉生暑退物华始秋李子与客登凝翠之阁游泛碧之斋览谿山之胜槩嗟草木之变衰天高气清迥无纖埃月出夜凉孤光满怀李子慨然顾谓客曰此古之所谓秋色也客曰愿先生赋之李子曰唯唯少陰用事金王火囚天地始肃万物以收故其见於气者寂寞憭慄沆寥萧瑟薄寒中人怆怳凄惻托物赋象是为秋色悲哉秋之为色也漠兮无形肃兮无声非赤非白非黄非青爽气无朕潜来满盈窅窅悠悠夺人目精尔乃桂影扶疎冰轮皎洁澹然如水皓然如雪风露凄凉星河明灭冷浸空庭蛩蛩韵咽此秋色之在月也夜气既除清晴昼宣扫去氛祲静无云烟万里凝碧穹隆虚圆苍茫杳霭不可殫言此秋色之在天也蒲柳先衰梧桐早脱飘零委落色瘁香歇惟兰菊之芬芳与松筠之茂密露冷风高不改其节此秋色之在草木也水落石出境寂云闲清波如席远峯如鬢烟林映带浦屿回环优哉游哉吾方自适於其间此秋色之在溪山也客曰美则美矣愿先生少进之李子曰陰阳相摩日星争鹜孰主张是春与秋兮代序彼春之色一气藏兮下腾上降品物昌兮韶光骀荡百卉芳兮譬犹美女耀新粧兮被服纖丽绣襦裳兮温然可亲象姬姜兮彼秋之色一气清兮天地擎斂万宝成兮风霜高洁兆严凝兮譬犹烈女怀幽贞兮鉞华不御体端诚兮肃然可敬有典刑兮春之色近乎令而秋之色近乎介是以君子惟秋是贵或感其声或悲其气铺张比兴曲尽其态从而赋之於是乎在客曰美则美矣愿先生少进之李子曰秋金气也天地之所以肃杀也其犹介冑之士凜然有不可犯之色者耶秋义气也天地之所以闭固也其犹节槩之士毅然有不可夺之色者耶秋日烈烈其朝廷之士骨髄之臣正色以率下者耶秋霜言言其忠义之士社稷之臣厉色以赴难者耶洒然萧然犹山林高蹈之士恬澹寂寞有无求之色也睟然俨然犹盛德之士正容悟物有不可亲疎之色也若夫广大清明不言而令行无为而物成则若黼座当阳颙颙昂昂朝廷正而天下治刑政修而中国强所谓天子穆穆而凄然似秋者其几是欤客曰至矣尽矣不可以有加矣请辞而退

续远游赋【并序】

屈原作远游章句文采瓌丽於骚辞中最为有理致者予方以金仙氏之书洒濯其心慨然思往见之作续远游赋以寓意焉其辞曰

悲尘寰之喧卑兮愿远游以自适恍形止而心驰兮托梦魂而有得漠虚静以无为兮絕氛埃而奔逸登泰山以小天下兮望沧溟而笑河伯走苍梧於南荒兮过崆峒於西极忽神马而尻輿兮历万里而一息曾不足以慊吾之志兮将往游於广漠之国会万期於须臾兮步八紘於咫尺观天地之所以浮沈兮究日月之所以出入爰整吾御兮驾言西之左王良而右伯乐兮

服山子而骖盗骊陟阆苑於崑仑兮见王母於瑶池听白云黄竹之歌兮不胜其悲回车竭来兮巡海之涯闻海中之神山兮有方丈与蓬莱六鳌举首以迭戴兮仙圣飞腾而往来泛陵波之巨航兮操五种以自随风辄引舟而不可到兮怊惝怳而伤怀乘风御气兮造夫天关抵营室历阁道兮是为紫微之垣执招摇步瑶光兮瞻太一肃钩陈乎帝傍玉女投壶而笑兮雷电砮以腾奔虎豹守关而不可入兮虽欲自达而亡因怅吾将谁适从兮其惟西方之圣人严清静之佛土兮辟广大之法门目净修广如青莲兮舌相广长而无不闻以一音而演说兮普滋发於诸根宝树森以行列兮天华散而缤纷菩萨声闻环以围绕兮天龙八部俨以威神倏一念而往诣兮稽首礼足而钦承俾化人以导予兮游华藏於无垠从一佛国至一佛国兮若河沙与微尘咸广博而严净兮羌难得而备云回视五浊恶世之衆生兮若一器之聚蚊怳惊悟而永叹兮何所梦之明明览六合而游十方兮曾弗离乎一身惟兹方寸兮廓然无际含容大千兮山河大地用之以小兮始有分齐如以大海纳於蹄涔兮如以毒药置於宝器舍无价之宝珠兮竞锥刀之末利弃瀛渤之全潮兮认浮沤之微体蚩触国於蜗角兮时相与战而流血千里南柯梦於蚁穴兮黄粱未熟而荣华一世彼区区之利害兮亦与此而何异惟返观而照寂兮廓灵府於无外泯六凿於天游兮其孰能以芥蒂由发心以证道兮可一超而已至吾方从事於斯兮等浮生於一戏

迷楼赋【并序】

炀帝作迷楼於江都钟鼓嫔嫱不移而具迄今旧址存焉因读杜牧之阿房宫赋感其事作赋以吊之其辞曰

隋室方隆削平万国侈心一开弗安厥宅凿为汴渠导河之流曲折千里放於淮陂凤盖霓旌锦帆龙舟决意东幸江都是游穷奢肆欲乃建迷楼维楼之制衆巧所聚凌烟摘星飞云宿雾玉柱金楹千门万户复道连绵洞房回互翠华戾止杳不知其何所於是选夫燕赵之女吴越之姬明眸皓齿丰颊秀眉娥媞曼睩窈窕融怡被阿锡曳齐纨粉白黛绿鸣佩锵环者充牣乎其間列箏箴罗钟鼓吐清歌呈妙舞以乐之桃李妍芳耀新粧也蕙兰芬馥泛天香也云舒霞卷绣袿裳也燕语莺啼舌笙簧也振木飞尘歌声扬也回风流雪舞袖翔也雷霆间作金奏锵也日日荐玉食旦旦献玉衣随意所往恩幸则移昼夜寒暑高下东西漠然不分茫然不知矧羣臣之贤否庶政之是非生民之利病天下之安危盜賊斥乎寰宇鋒鏑及乎宮闈身死人手虽悔可追呜呼噫嘻方其虜陈後主戮张丽华诛三佞人以谢天下一何壯也及其师丧辽东祸肇玄感荒淫不返卒以弑殒又何急也芜城之側故址犹存狐兔之所窟穴鼯鼯之所吟呻霜露梗莽风凄日曛过而览者莫不踌躇而悲辛与夫琼室丧夏鹿台亡商吴之姑苏秦之阿房足以致乱於当年而垂戒於万世者盖同出於一轍也我作斯赋以吊千古之非而为後來者说也

江上愁心赋

我归自南兮涉千里之长江兰舟桂楫兮泛烟水之汤汤波平风软兮若枕席之徜徉忽长飈之暴作兮巨浪骇以腾骧声殷殷以雷动兮涛渺渺以云翔天地駭以回薄兮峯峦岌以低昂

舟人惴栗而不敢进兮依浦澈而深藏纷雨雪之交集兮知极陰之变阳俄云雾之廓清兮升杲日於东方望列岫之参差兮辨远树之微茫横中流而吊古兮凭此江以为阻不修德而恃险兮咸奔亡而系虏彼六朝之三百年兮竟江山之谁主历隋唐而混一兮迄五季而割据惟真人之龙翔兮削僭乱而奠区宇漠然但见山高而水清兮垂二百年不复识旗帜而闻金鼓巨盗乘间以窃发兮意欲窥东南而负固烦王师之出征兮戈甲照於江渚举太山以压卵兮何孤雏与腐鼠顾生灵之不幸兮一时困於豺虎吾家亦避寇而远适兮方旅泊於异土念亲年之已高兮嗟幼稚之谁抚幸归程之不远兮怅风涛之齟齬方吊往而伤今兮独抑郁其谁语惟江上之愁心兮结长悲於万古

梅花赋【并序】

皮日休称宋广平之为人疑其铁心石肠及观所着梅花赋清便富艳得南朝徐庾体然广平之赋今阙不传予谓梅花非特占百卉之先其标格清高殆非余花所及辞语形容尤难为工因极思以为之赋补广平之阙云其辞曰

固陰沍寒草木冻枯惟兹梅之异品得和气而早苏尔乃结根蟠据擢干横斜发青枝於宿栢未緑叶而先葩素英剪玉轻縠垂金绦蜡为萼紫檀为心藟方苞而露重梢半裊而云深凌霜霰於残腊带烟雨於疎林漏江南之春信折赠远於知音此梅花之大略也若夫含芳雪径擢秀烟邨亚竹篱而绚彩映柴扉而断魂暗香浮动虽远犹闻正如梅仙隐居吴门丰肌莹白娇额涂黄俯清谿而弄影耿寒月而飘香娇困无力嫣然欲狂又如梅妃临镜严粧吸风饮露绰约婵娟肌肤冰雪秀色可怜姑射神人御气登仙绦褙素裳步摇之冠璀璨的皪光彩燁然瑶台玉姬谪堕人间半开半合非默非言温伯雪子目击道存或俯或仰匪笑匪怒东郭顺子正容物悟惟标格之独高故衆美之咸具下视羣芳不足比数桃李逊嫫梨杏推妍玫瑰包羞芍药厚顔相彼百花孰敢争先莺语方蛰蜂蝶未喧独步早春自全其天至於功用已周斂华就质落英飘零结成青实鍾曲直之真味得东方之正色传说资之以和羹曹公望之以止渴用其材可以为栋梁采为药可以蠲烦热又非衆果之所能髣髴也爰有幽人卜居梁谿艺松菊於三径树兰蕙之百畦丹桂团团緑竹猗猗植兹梅於其间庶岁寒之相依嗅花嚼实侑此一卮颓然而醉不知天地之高卑岂特泉石膏肓烟霞痼疾殆所谓未能忘情如草木聊托物以娛嬉者乎

梁谿集卷二

卷三

钦定四库全书

梁谿集卷三 宋 李纲 撰

赋三

後乳泉赋 南征赋

椰子酒赋 药杵臼後赋

荔支後赋 榕木赋

後乳泉赋【并序】

玉局翁作乳泉赋妙语雄辩不可跂及然理有未安者梁谿翁作後赋以订之其辞曰

客谓李子曰苏子之赋乳泉也其言曰为气者水之生而有形者水之死也死者咸而生者甘甘者能往能来而咸者一出而不复反也其果是也耶其果非也耶李子曰苏子骋其辩说之雄词语之工而有是言也揆之以理盖似是而实不然也客曰愿先生赋之李子曰唯唯盈天地之间为万物五行最钜而水其先也散而为气者水之化聚而有形者水之体也其源必甘者水之本其委必咸者水之末也凝为霜雪嘘为云雾结为霰雹融为雨露凡水之气升於天者兹非其化耶发为井泉滙为沼沚流为川渎鍾为湖海凡水之形比於地者兹非其体耶江河淮济井谷之泉凡水之源未尝不甘者兹非其本耶沧溟之波斥卤之地凡水之委未尝不咸者兹非其末耶箕子之陈洪范论水之性水曰润下自其体言之也论水之味润下作咸自其末言之也因体兆化则形可以变而为气故水之升则为云而云之降则为雨是气形之初无二理也由末归本则咸可以复而为甘故海洲之泉必甘而海云之雨不咸是甘咸之初无二味也请观诸身水之在人为血血有形也流於荣观则为气血至咸也发於湏乳则为甘至於涕唾涎沫亦然漱而链之气灌五脏甘而不咸由是言之苏子以有形为水之死而以咸为死之味一出而不复反也岂不过欤夫木无味也其末为实味斯酸矣火无味也其末为焦味斯苦矣土无味也末为稼穡味斯甘矣物成然後有味而未者其所以成也五行之理莫不皆然何独於水而疑之也客曰咸者水之末而非其死则吾既得闻命矣敢问泉源若一而味有独甘者何哉李子曰五行相生以金生水物得所生其出乃美故甚甘之泉洞穴之下必有金锡以养之腐败之井欲变其味必资金锡以镇之物理之自然也我卜我居梁谿之滨陆子之泉天下所珍甘若牛乳锡山是隣烹茶则芳酿酒则醇可以佚老可以娱宾挈榼操杯酌冷尝新绕齿颊之清甘涤肺腑之埃尘析醒愈病益寿延年爰抚松而啸月遂拂石而眠云优哉游哉饮水曲肱而枕之可以养愚拙而全吾真

仲辅赋西郊见寄次韵作南征赋报之

承嘉惠以南征兮动去国之离愁远故园而回首兮惊岁华之再秋览庐阜之环秀兮俯大江之东流登黄鹤而遐矚兮发孤照之寸眸吞云梦於胷中兮怀浙河於醉里怅离羣而索居兮寄相思於一水佩兰芷之芬芳兮狎樵渔於汝尔终系羈而未释兮类蹇者之念起荷天恩之寬大兮犹坐靡於廩食驰精爽於淮濱兮飞梦魂於漠北怅曷日而归休兮遂东山之钓弋老冉冉而将至兮岂佳时之再得尝承教於君子兮窃希风於古人慨抚卷而击节兮如意气之相亲每终篇而自喜兮觉诗成之有神惟深藏而密寄兮惧夫妬者之瞋顾戎马之崩腾兮方四郊之多事临洞庭而伤怀兮望九疑而增思乱湘流而适澧兮灵均岂其前身续离骚而赋远游兮愿承芳於後尘与日月而争光兮庶此道之弥新

椰子酒赋

伊南方之硕果稟炎辉之正气实石致而晬文肤脂凝而膩理厥中枵然自含天醴酿陰阳之絪縕蓄雨露之清泚不假麴蘖作成芳美流糟粕之精英杂羔?之乳髓何烦九醞宛同五齐资达人之嗽吮有君子之多旨穆生对而欣然杜康尝而愕尔谢凉州之蒲萄笑渊明之秫米气盎盎而春和色温温而玉粹当炎荒之九秋寄美人於千里不费餅壘以介寿祉破紫殼之坚圆剖冰肌之柔脆酌彼洼樽荐兹妙味吸沆瀣而咀琼瑶可忘怀而一醉

药杵臼後赋【并序】

客有赋药杵臼以示梁谿翁者翁方饵药扶衰朝夕从事於其间欣然喜之拾遗意作後赋其辞曰

梁谿先生年甫始衰忧患之所薰蒸病疾之所摧颓苍顔华发百念已灰乃从方士之流考神农之书撷草木之精英采金石之神奇究心服饵以自扶持爰命小童置杵臼於斋房邃室之隈方牀曲几之侧捣和衆剂服之无斃俄而声出於两者之间合散作止自相撞击其始也投杵於中如谷之舂其声东珑其卒也摇杵於傍如翼之翔其声登当倏方鸣而乍辍歟已息而还锵韵和梦枕响落尘梁先生大欢乐之顾谓客曰此吾之无尽乐也客曰愿先生赋之先生曰唯唯厥初生民百谷是播断木掘地取诸小过铸金象物药石是资上动下止斯焉取斯如鼎多趾如壶阙耳匪贯之铉载中之矢两金相薄锵然有声荡心骇耳铁中铮铮作非祝敌设非箏篴疾徐应节疎数合度异钟磬之四悬谢鼓吹之两部含太和之宫徵信难言而有数蛭投霞举爵跃蜺旋指无私於上下声不系於中边得之心而应於手殆有合於天然吾方静考幽经博极仙方链九转之灵丹捣千粒之玄霜借蟾兔於月窟屏鸡犬於芝房戒喧言而默默发妙响之琅琅耳根灵圆心地清凉资一物而两得殆将乘冷风飈浮云而翱翔者耶

荔支後赋【并序】

宣和已亥岁余谪官沙阳次年夏始食荔支尝为之赋後十二年岁在辛亥寓居长乐於今又

四夏矣备尝佳品究见荔支本末作後赋以订之其辞曰

客谓梁谿病叟曰玉局翁以荔支比江瑶柱与河豚岂其然乎病叟曰否拟人必於其伦惟物亦尔彼河豚与瑶柱在海物而推美厥臭惟腥厥状惟诡藉姜桂之余滋荐樽罍之芳旨快一嚼而称珍非鼎俎之正味何足以得荔支之髣髴也惟此荔支产於炎方绿树团團丹实煌煌香吐芝兰液凝琼浆色味兼美自然芬芳宛如佳人丽服靓粧冰肌玉骨锦衣绣裳又如明珠包裹绦囊焕彩外耀皓质内光其品则有陈紫方红江绿宋香细若鸡舌脆如硫黄虎皮斓斑龙牙锐长蚶殼匾仄玳瑁文章皱玉丰肤星球照江千类万族不可殚详夫岂瑶柱河豚之所能比方也客曰然则何物可以拟之病叟曰建溪腊茗仙草之英采掇以时制作惟精苍璧忽破素尘乍惊瓯泛霏霏之乳花汤候飕飕之松声涤烦蠲渴愈病析醒此亦天下之至味也洛阳牡丹百卉之王鹤白鞞红魏紫姚黄嫣然国色郁乎天香艳玉栏之流霞列锦幄之明釭价重千金冠乎椒房此亦天下之至色也相彼二物标格高奇名虽一概种有多岐絜长度美可并荔支永叔君谟序而谱之如三国之鼎峙各擅据於一陲角力争胜未可以决其雄雌也客曰腊茗牡丹则吾既得闻命矣敢问百果之中孰与为比魏帝方之蒲萄唐人推於绿李亦有谓乎病叟曰荔支之生厥土惟三西则巴蜀连亘峽南肉薄浆多酸而不甘与闽粤之所产殆不可同日而谈也汉贡南海唐驿西川皆荔支之下驷乃并骖於中原当时所见得其羸焉宜乎品藻之失而议论之偏试使闽粤者进则二果慙慙将逊美以推先而况其凡乎若夫洞庭之柑瓢凝玉雪清香潤手累日不歇茗雪之芡实侔珠玑咀嚼不倦玉池生肥思其次焉亦皆荔支之亚匹也然柑可食而不可多芡疗饥而不疗渴惟食多之益办与饥渴之兼解微荔支吾谁与归方将休影息迹遗物离人倒冠落佩买山灌园植千种之陆离择万颗之匀圆上滋绦宫下灌丹田怡性养寿超然自得以尽吾之天年子能弃世事而从我游乎客默然慙逡巡而辞退

榕木赋【并序】

闽广之间多榕木其材大而无用然枝叶扶疎茈?数亩清陰人实赖之故得不为斧斤之所翦伐盖所谓无用之用也感而为之赋其辞曰

南有巨木其名曰榕下蟠据於厚地上荡摩於高穹雨露之所 润雷霆之所震耸日月之所照烛乾坤之所含容与衆木均夫何赋形稟气之独不同也尔其擢干敷条轮囷离奇结根植本拳曲拥肿口鼻百围之窍穴龙蛇千尺而飞动仰视俯察何规矩绳墨之不中也高明之丽非栋梁之资斲削之工非俎豆之奉以为舟楫则速沈以为棺槨则速腐以为门户则液以为楹柱则蠹薪之弗焰无爨鼎之功燎之弗明无爨火之用盖枵然之散木徒万牛之嗟重宜匠石之不顾同栢社而见梦然而修枝翼布密叶云浓茈结驷之千乘象青盖之童童夏日方永畏景驰空垂一方之美?来万里之清风靚如帷幄肃如房栊为行人之所依归咸休影乎其中故能不夭斧斤楮击是免虽不材而无用乃用大而效显异文木之必折类甘棠之勿翦立乎无何有之乡配灵椿而独远不然则雁以不鸣而烹漆以有用而割犀象以齿角而毙樗栌以恶木而伐处夫材与不材之间殆未易议其优劣也

梁谿集卷三

卷四

钦定四库全书

梁谿集卷四 宋 李纲 撰

赋四

乘桴浮于海赋 浊醪有妙理赋

三黜赋 折檻旌直臣赋

有文事必有武备赋

乘桴浮于海赋【凤也有时乘桴浮海】

凤鸟不至岛夷是图顾卒老於环辙遂决意而乘桴悼道不行已焉哉吾往矣好勇而义从我者其由乎盖以道大不容材高难送历聘而无所鈎说立言而徒焉折衷长沮问而知津接舆过而歌凤用於邹鲁犹舟车易地而行穷於商周踐刍狗已陈之梦曷若脱此世网适乎海涯进退去就之在我损益盈虚之有时凌重溟之浩荡阅万象之瓌奇廓尔无垠乍心凝而形释泛然不系乃神动而天随挹不可穷游无何有昼所适兮凭万里之长风夜何方兮瞻七星之维斗井蛙闻风而跂坎所以震惊河伯顺流而望洋宜其知丑岂不以虽险利涉惟虚可乘乐天命而无适非土仗忠信而其安如陵六合轩呈知乾坤之高厚八紘开露观日月之沈升实由停蓄无私含容善下渺无涯涘虽七旱而何伤来有渊源沛百川而皆渟夫子游焉吾道穷也盖抱德以行藏岂留情於用舍去圣既远余风未休鲁连感时而高蹈管宁避世而长浮风浪喧豗未若谗波之险鱼龙出没尚寛寇盗之忧爰有羈臣远投瘴海短发白而早衰寸心丹而不改荷三朝之眷知虽万死而何悔仰圣哲之风流庶兹诚之有在

浊醪有妙理赋【神圣功用无捷於酒】

次东坡韵

尽弃糟粕独留精醇导性理以通妙知麴蘖之有神融方寸於混茫处心合道齐天地於毫末遇境皆真厥初生民时维司命天有星以垂象周建官而设正泉香器洁既曲尽於人为气烈味甘乃资陶於天性盖百礼之所须宁五浆之可并荒耽失职当戒羲和之湎淫温克自将宜法文武之齐圣良辰美景明月清风沸新篴之蚁白滴小槽之珠红味流霞而细酌扫浮云之一空醇德可嘉颂觚瓢於刘子醉乡不远记风土於无功恍尔神游窈然心纵天光泰定而遗万物根尘解脱而忘六用藉之饮药能资疾疢之痊或使坠车岂觉死生之重嗟夫此异随珠寒可当襦此异和璧饥可代餽疗饥寒以饱暖化忧忿为懽娱信麴生之风味岂侍坐之可无

霞散冰肌谢仙人之石髓红潮玉颊殊北苑之云腴又曷贵盗醉瓮下见鄙州间得饮墦间归
骄妻妾三升起待诏之恋千首矜翰林之捷分田种秫未讶渊明之迂看剑引盃更觉少陵之
侠治则醒而乱则醉其智足称饮愈多而貌愈恭其贤可接是知察行观德莫酒之如自昔达
者必取之坎饮而粹者元鲁山之德也饮而拙者阳道州之政坎袒裼相从笑竹林之七逸供
帐出钱贤都门之二疏故我取足於心得全於酒内以此而怡弟昆外以此而燕宾友虽一盃
与一石同酣适之功又何必吸百川以长鲸之口

三黜赋【直道事人宜乎三黜】

贤若下惠官为士师以直道而从事乃屡黜之为宜忘已为人何爵禄之足惜舍生取义岂威
武之能移法古守官屈身徇道位虽卑而道何所辱义或失则位焉敢保宁尸禄以素餐将啜
菽以忘老君违必谏虽犯颜而何伤天听孔昭恐获罪之难祷何则忠以得罪分焉所甘以所
守之惟一故遭黜而至三用则行而舍则藏顾有进则有退仰不愧而俯不忤夫何惧而何慙
枉道事人奚必去父母之国直心行道焉往无潜愬之谈惟君与臣代天理事各尽其职非相
为赐谏行言听固同享於安荣道废身藏亦何心於怨怼惟知则止之节乃尽事君之义相彼
君子异乎小夫以容悦得君为至计以緘默固位为良图盖亦陋矣何足算乎老栢千年凡几
经於凝沍精金百鍊乃可试於洪炉惟此展禽雅安降逸虽不辞於小官亦弗免於三黜盖以
和制行者所以与人为徒以直事人者所以本天之质类夫子文之称忠喜怒不形於仕已有
若孟轲之不动荣辱岂存乎得失矧乃作士利用刑人上下其手而楚国以弊轻重其心而汉
法以沦徐有功之任司刑守法而代人以死张释之之为廷尉谳狱而举世推仁盖闻风而有
立虽愈久而弥新爰有畸人号为拙直荷三朝之眷遇辜负明恩虽九谪而终归敢忘大德惟
内省不疚於圣言顾用舍岂系於人力味前哲之遗风每抚篇而太息

折檻旌直臣赋【修述折檻深旌直臣】

士有敢谏君当体仁爱修饰於折檻以表旌於直臣收电回霜已寬斧钺之戮葺隳因阙更瞻
轩陛之新惟汉朱云希风汲黯偶赐枫宸之对因致龙鳞之犯指陈奸佞愿借尚方之刀退就
诛夷遂折便朝之檻辱师傅之贵虽曰敢言干雷霆之威自应可斩而天子能恕将军敢争因
免冠而致悟乃饰檻以为旌寬以纳忠岂独垂万世之训阙而当宁更以致三墀之荣易令名
以愧贤詎能比迹藏断罟以志谗庶可同声原此狂生素称义烈雅有意於汉室故屡陈於主
阙命驾径去不为薛宣而少留趣和药来更助萧公之引决惟直情而径行故太刚而必折成
帝渊默临朝靓深谓陈善闭邪者小臣之难事而尊贤从义者大君之用心难甘切直之言虽
加谴怒终懋矜容之德曲示承钦然而所求者名不务其实文虽足观质焉可述宠昭仪而絕
皇嗣大斲天伦恩元舅而杀王章遂倾帝室虽存折檻足为後世之规实废嘉言詎救当时之
失岂不以篡汉室者必王氏佞王氏者惟张侯以师臣而取信乃保身而自谋堤防祸机实为
国之至要拔去奸本期厥德之允修能充葺檻之心何施不可深味借刀之旨岂谓无由凡曰
司聪皆有言职欲致国家之治必尽箴规之益魏公献疏乃切论而危言贾生上书亦流涕而
太息遇文帝太宗之君必能褒崇於正直

有文事必有武备赋【文事武备全才必兼】

刑作教弼文资武全惟两器之兼用乃一道之当然欲柔顺之可行必须刚克致德礼之不易允赖威权原夫夹谷之盟真儒相事谓敌国素称於多诈而上策莫如於自治两君为好虽事多献酬交错之文具官以从必武有豫备不虞之志岂不以文待變友武惩奸回惟无忘於经略乃克致於怀来勇不惧而仁不忧固并推於达德文足昭而武足畏盖有俟於全才德以服人义存御侮有所济者以威之克爱无能达者以仁而不武雅歌吉甫宜为宪於万邦颂美僖公能昭格於烈祖下焉为臣上焉为君不能全文武之道何以致久大之勲冠履圆方载施佩玦之断黼黻辩义式彰火藻之文有国有家惟仁惟义虽诞敷於文德宜克修於武备所以六卿率属出分乡遂之兵三时务农隙讲蒐狩之利盖以治安之本在於文武之兼其相济若火之於水其相待若梅之与盐劝赏畏刑以阳舒而陰慘揆教奋卫遂西被而东渐大哉武之於文虽二而一藏於无用之用盖以不必而必方今外患侵而中国微安得文武全才以股肱於帝室

梁谿集卷四

卷五

钦定四库全书

梁谿集卷五 宋 李纲 撰古律诗一【宣和已亥已前四首已後作六十九首】

士特下第之衡湘 子房

读楚元王传

谒告迎奉闻亲闱有醴泉之除作诗寄二弟奉酬胡俊明见寄
用前韵留别诸弟同叔易季言游虎丘寺邂逅何得之

吴江五首 阻风游宁境寺

松江第四桥 操舟

杂兴四首 韩贾

田家四首 嘉禾道中遇夏侯子阳临平见山二首 小雨

将次钱塘 灵隐宫

望潮 自哂

北望

张南仲置酒心渊堂值雨

长至 渡浙江

桐江行赠江致一 觉度寺

严陵滩下作二首 兰陵访吴圣与不遇

陆行 水磴

戏为吴语 絶句

次退之蓝关韵 三衢道中

杂兴三首 戏成絕句三首

偶题 玉山道中五首

望龟峯 述怀

短歌 遣兴三首

江南六咏 宿禪月堂

岩石村店有石泉梅橘幽雅可爱

送士特兄下第之衡湘

都城三月春暮时通津两岸杨花飞送君结束适南楚使我叹息生长悲男儿功名致须早夫子声誉久已驰文章黼黻虽自许时运齟齬将安施霜蹄蹶蹶未为失云翮高举终非迟人生且求适意处天命会有不否期潇湘千里渺烟浪浮家早逐秋鸿归娥英事实素难考来时为读黄陵碑

子房

汉楚存亡谈笑中子房初不有其功闭门辟谷思轻举肯叹淮陰犬与弓

读楚元王传

设醴当年为穆生偶忘微礼便辞荣固知申白无先见衣赭髡钳始自惊

谒告迎奉闻亲闱有醴泉之除不胜庆拚作诗寄叔易季言二弟

薄宦便甘旨两载官南徐江山富佳致足以为亲娛昆弟尽在傍承顏懽有余寧知驿书召结束趋征途旅食寓京华梦想怀庭除宸恩赐清燕天语闻都俞兰省幸备员匪才慙冒居思亲动归兴谒告之东吴晓出通津门轻舠泛汴渠莺花已烂熳榆柳正扶?去去指苕霅行行远神都中途闻吉语动色观除书天子隆孝治朝廷优老儒犬马志欲养获此伸区区丘山恩施重蝼蚁轻捐躯寓书东飞鸿早早达吾庐季也在亲侧援琴方舞雩聆音想慰悵具驾无踟蹰会言亦近止期以薰风初

奉酬胡俊明博士见寄

载笔螭坳侍九天谪来山泽作臞仙鸣冈敢并喈喈凤感气聊同嘒嘒蝉引义每慙爰叔直着鞭常恐祖生先庭闱一去三千里自叹飘零曷日还

用前韵留别诸弟

久陪鸳鹭日朝天却爱江湖作散仙但有园林种松菊便胜冠冕着貂蝉棣华春早相辉映鴈序风高自後先慙此睽离休怅望为荒三径俟予还

同叔易季言游虎丘寺邂逅何得之

理櫂适闽粤虎丘聊舣航霜林正摇落翠栢森成行入门蹑磴道乔木间踈篁秦帝试劒石破瓜分路傍生公雨花台说法今不亡苍蘚衣峭壁枯荷响回塘遂游劒池上毛发森以张沈沈下无底疑有虬龙藏镌削露天巧胚胎劳混茫清奇俨图画秘怪叵测量薜荔叠秀色枇杷吐幽香行行造梵宇金碧相荧煌危脊耸古殿长腰曼修廊凭虚架云阁凿险通禅房开轩俯吴会蜂窠缭池隍风烟寄远目心逐征鸿翔列岫霭遥碧平湖湛孤光追寻殊未倦策杖登崇冈幽独诗句苦阖庐丘塚荒五圣瞻象设羽泉酌甘芳西庵何閴寂修竹自苍苍脱履足生茧解衣汗如浆却携二三子置酒白云堂念旧已凄惻感时增慨慷况我方远涉狷介怀刚肠一杯且相属世事都茫茫冠冕志已冷山林兴偏长逝将脱羈束超然傲羲皇斯游信清絕去去何时忘

吴江五首

重过松江忆旧游依然风景照行舟危桥跨水虹垂影高阁凭虚蜃吐楼渺渺衡烟归钓艇轻轻点浪舞沙鸥暮天横笛江村起激烈能令逐客愁

木落水寒天气清江湖合处一桥横波涛万顷琉璃滑栏槛千寻蟠螭明茶竈笔牀随陆子蓴羹鲈膾忆张生他时若我归来後定向江头事钓耕

返照澄波彻底明江边弭櫂若为情风烟漠漠无今古舟楫纷纷尽利名潮落片帆归浦屿云寒一鴈过江城孤臣放逐三千里此去龙津尚几程

系?江头日脚沈鲈肥酒美只孤斟长桥千步风涛稳横笛一声烟水深契濶离亲寧素愿迂愚报国祇丹心远游自是男儿事更把离骚细细寻

鲈乡宜旷望烟霭起层陰讴轧橹声急苍茫江色深归潮寒入浦宿鸟暝投林谁识登临意愁来遽不禁

过吴江阻风游寧境寺

扁舟渡松江惨淡天色恶胜游得禅房旷望倚虚阁轩楹俯巨浸云水互参错长风驾惊浪飞雪相喷薄未应神龙怒端有蛟鼉作片帆天际来飘忽如陨箨波涛浩无涯撑突殊不愕奈何操我舟惴栗纛添索蜚廉也世情逐客正落寞深夜始归眠蓬牕听鸣铎

松江第四桥【舟人云桥下有老蛟】

松江第四桥风雨不可过下有百尺蛟蜿蜒枕桥卧窟宅据要津口腹长饥饿每凭波涛势能作舟楫祸安得炊手坐使神奸破往来水无虞时鼓清江柂

操舟

吴儿便操舟衣服皆楚制出没波涛中端如履平地江湖渺千里鼓柂等游戏临深诟保身涉险惟射利天风难与期飘骤出非意倾覆瞬息间永为鱼鼈饵愿言戒畏涂巧手不可恃

杂兴四首

邑犬惊行客林乌啼晓霜山村云冉冉泽国水茫茫移櫂轻舟稳鉤帘野兴长谁知因谪宦得到云水乡肃肃岁华暮霏霏烟靄深轻水依浅渚寒日映?林故邑怀亲日扁舟去国心凝眸无限景愁絶不成吟片帆随鸟翼离恨满江乡风细云衣薄日斜波影光牧童寒哨笛渔艇静鸣榔景物正清絶桑榆还夕阳暮天来远色行客尚贪行櫂急浪花碎月高云缕轻巢乌栖更起渔火暗还明独寝不成梦夜寒闻鴈声

韩贾

退之守潮阳戚嗟见章表贾生傳长沙自广托鵬鸟拘达言虽殊均为未能了今我谪龙津筦库素所晓粗令职事办便觉溪山好燕坐一室间妄念悉除扫岂复计穷通端亦忘寿夭回观古人心颇叹二子小

田家四首

江村烟水远茅屋两三家断岸垂衰柳?簁隐细沙田畴賸秔稻网罟足鱼虾不识宦游味见人还叹嗟场圃事方毕稻粱成已勤儿童自逐逐鸡犬亦欣欣啼鸟霜林暮卧牛烟草昏田夫乐岁稔斗酒共醺醺柴门临小浦竹径遶幽庄雨剪葵韭滑夜舂秔稻香年丰饱妻子日夕下牛羊谁识田家乐拂衣归兴长谁谓田家苦田家乐甚真鷄豚燕同社箫鼓祭瘟神高廩方有岁西畴行复春但令租赋足终老得相亲

嘉禾道中遇夏侯子阳

京华契阔已再冬扁舟野岸欣相逢天寒水远飞霜风谈笑坐觉回春容年踰七十两颊红真

气上泝泥丸宫剖符南海窥祝融欲求丹砂访葛洪问予执笔侍九重胡为谪堕溪山中迂愚
久合亲耕农君恩未报徒忡忡飘零孤迹随断蓬他日相忆看云鸿

初到临平见山二首

我见青山若故人峯峦照眼自相亲只应今日爱山意便是他时傲世因点缀白云春缥渺萦
回绿水晚瀟沦君恩若许归田里定卜山间老此身

孤舟渺渺两山间终日钩帘只看山落日半衔霞未散?林远暝乌初还凄凉离恨谁能寄浩荡
诗愁自莫删赖有青山可人意与君相对且开颜

小雨

小雨晚初急暝云深不收霏霏暗烟树索索响篷舟山色增远翠渔蓑生暮愁凄凉苏季子寒
覓敝貂裘

将次钱塘

岁晚飘零日舟行杳霭间江乡多雾雨风物近湖山独鹤徊翔久飞云自在闲远游殊未已萧
飒鬓毛斑

灵隐宫

我昔曾游飞来峯白猿昼挂峯上松晬然灵光如彩虹钟磬自响金仙宫宦游漂泊西复东虽
欲再到无由从帝居钧天陋瀛蓬螭坳载笔侍重瞳逆鳞聊试摩神龙谪堕劔浦山重重征鞍
来此寻旧踪恍如梦落烟霞中朱楼宝殿飞玲珑寒泉幽石欣相逢门前池馆虚含风一洗尘
虑清心胸明朝南去随征鸿惆怅胜游回首空

望潮

樟亭一望浙江潮震地凌空气象骄十万军声来海峽三千银界混烟霄素车白马纵横骛翔
鹭飞鸥散漫飘好是波平风稳後一帆千里不崇朝

自哂

自哂何为者南游亦偶然未登离垢地端有散花天遇境聊为戏安心不离禅幽怀谁与共深
炷一炉烟

张南仲置酒心渊堂值雨

自别西湖日置怀却因谪宦得重来云深不见孤山寺风急难乘摇碧斋未放幽情穷水石且将离恨泥樽罍胜游须徧山南北何日晴天为一开

北望

迢迢休北望汨汨正南迁出处岂无意厄穷那问天销愁凭酒醺遣兴赖诗篇诗酒吾家事从今号谪仙

长至

黄鍾之宫萌一阳万彙滋发犹潜藏书云讵复别祥异揆景渐可知舒长闭关不行着易象客子倦游悲故乡周南太史长太息禋祀无因陪裸将

渡浙江

理櫂适桐江随潮过鱼浦山寒雪犹积江迴月初吐御气凌烟霄乘槎渡星渚空蒙老龙吟髣髴翠蛟舞境清人自愁夜静气尤古独坐不成眠霜晴听津鼓

桐江行赠江致一少府

放浪江湖乃吾乐羈束轩冕非所荣谪官去为劔浦吏鼓枹遂作桐江行舸舟浙岸候潮至百越微茫烟水外波横天际海倒流喷雪惊雷声震地须臾风软潮已平片帆去逐飞鸿轻櫂讴四起日西落暮天杳杳惟参横江山苍苍负残雪江水茫茫浸寒月谁云逐客苦凄凉今我斯游最奇絶清晨弭櫂桐君庐溪光山色世所无故人见我一笑粲杀鸡为黍聊相娛嗟予仕宦等游戏断梗飘蓬本无蒂但令景物供吟哦出处穷通何足计此行幽讨殊未阑满目叠叠皆云山鹭飞鱼跃石齿齿今夜且宿严陵滩

觉度寺

夕发富春渚朝次桐君庐桐君采药地今作僧家居石磴上窈窕林苒下扶?山根二江合清波见游鱼霜晴响钟磬日落归樵渔客从何方来弭櫂聊踟蹰清景难久驻怅然还问途

严陵滩下作二首

世祖龙飞万国朝故人依旧隐蓬蒿羊裘肯换貂冠贵钓石终齐凤阙高共宿客星亲帝座贻书直气压时豪东京臣子多名节皆自先生铸此曹

帝座高悬汉客星樵渔今亦想英声钓台直下三千尺谁谓先生只钓名

兰溪访吴圣与不遇

夕次兰溪县溪山照眼明云端双塔耸烟际一桥横久旅易凄感旧游如隔生故人寻不值飘泊若为情

陆行

水落石出溪难行舍舟束装趋路程徒御諠呶乌雀噪衣冠瓌伟儿童惊天寒野迥怯霜露日暮途远伤蓬萍我生胡为浪自苦浊酒且向灯前倾

水碓

凿木为机运不休溪边叠石馱溪流但知随水能旋转肯道舂粮不自由轮辐诎为君子器机关端与小人谋方知抱瓮汉陰老混沌何须是假修

戏为吴语

莫问侬家作底愁细思今古事悠悠只因读得数行字便觉分为一世忧问舍求田须更以济时泽物且能休梁谿幸有闲泉石正好归来作故侯

絕句

殷侯左降惟书字陆相南迁不着书今我新诗三百首坐令二子觉区区

次退之蓝关韵

奏疏螭坳上九天谪官劒浦路三千披陈肝胆成微志跋涉山川赖壮年緬邈寄书黄犬後凄凉陟岵白云前君恩欲报知无所清梦时时到日边

三衢道中

行色虚无里人声烟霭间浪纹来縠水地势逼柯山浅瀨通舟澁飞桥跨石弯风高云冉冉滩急水潺潺野迥松篁秀境幽鸡犬闲轻装因路险隐耳觉言蛮村酿酤来薄溪鳞买得怪浦晴鸣鴈浴林暝舞鷗还寺僻殿阁古堂虚苔蘚斑僧房清夜宿幽梦到乡关

杂兴三首

日出霜晴鸟雀呼束装还复戒征途黄牛傍岸将孤犊花鸭浮溪引衆雏桥断水寒寻野艇路迷山曲问田夫远游看尽溪山景待向龙津书作图

岁晚南迁殊未央
晓寒霜霰湿征裳
烟笼山彩远增翠
风皱溪澜细漾光
岭雪未销宫頰粉
野梅初发御鑪香
谁怜飘泊螭坳史
曾向钧天侍紫皇

尽日篮舆山水中
每逢佳处慰飘蓬
拂云古木陰陰日
夹岸修篁细细风
远岫长溪千里碧
断霞残照半天红
殊方景物随时好
却恨登临无与同

戏成絕句三首

山色黛眉远溪声玉佩珊
溪山怜逐客故为结清欢
粼粼溪底石五色粲坚圆
安得女娲手链之将补天
小艇渡行旅往来终日操
但令人利涉寧复计劬劳

偶题

日照溪光碧起鳞
溪头鴈鹭自成羣
可怜独鹤归何处
万里相随一片云

玉山道中五首

悠悠征骑渡溪岩
跋涉艰难分所甘
泉石几时归水北
风烟今夕过江南
日轮杳杳衔青嶂
天影茫茫浸碧潭
猿鸟不知迁客恨
云间啼叫满松栂

石路凝霜白山村落月纖
溪头一桥小烟外数峯尖
高亩层成级寒沙软胜盐
江南风景好无那旅愁添
乍入江南境登临慰所怀
山林自平远水石巧萦回
风暖鸟声媚日斜云影开
故人千里别欲寄一枝梅
石藓红依日岩松翠耐霜
入溪看岫色和月认梅香
岁暮旅情恶夜寒灯影光
劳生真一梦回首意茫茫
行李远縠水禅扉依玉山
烟岚数峯秀云水一溪弯
小市晚犹合疎钟寒自还
旧游如昨日屈指十年间

望龟峯

何日清江使来为碧落
跌凝眸望霄汉曳尾谢泥涂
霜晓疑曝甲云横如负图
前知傥可?吾欲问玄夫

述怀

早游文翰圃误齿缙绅涂
兰省为郎久霜台奋舌孤
荷知诚特达励志敢踌躇
屡赐枫宸对亲蒙御笔除
月卿论钜礼柱史进寒儒
黼座当阳日螭坳载笔初
明堂颁政事路寝集簪裾
绣案横雕檻天香夹御鑪
翠华来宝辇清跸警嵩呼
法驾临真馆芳尘从属车
重瞳瞻日月粹色仰琼瑜
侍立亲龙袞书言粲帝谟
视朝崇政罢劝讲迓英余
丽日明金殿轻风响佩琚
漏声寒淅沥槐影緑扶疎
紫橐陪时彦黄扉寓直庐
仙游疑阆苑清梦岂华胥
遇事肯怀禄衔恩寧惜躯
惟慙涉道浅岂恨与时迂
犬马知爱主龟蛇思报珠
未终青史志一奏皂囊书
谁谓爰丝直端

同汲黯愚谪官来劔浦襦被出神都感激心独苦飘零岁已徂凄凄念终养冉冉叹征途四海
尽蒙泽孤臣方向隅愿回天上照一起辙中枯

短歌

周家柱史本吾祖唐室谪仙尤所许垂世空余道德经傲时且以诗酒名我今去作龙津客学
道吟诗真自适也胜骑马听朝鸡晴压尘埃雨压泥

遣兴

游戏清都不记年谪来犹作地行仙龙墀叩额真率尔石马系门非偶然野寺山庄随意宿溪
鱼村酿不论钱男儿本有四方志出处安时休问天

冲涉修途仆已疲今宵聊复宿沙溪心怀浙右家无耗身在江南路欲迷孤鹜断霞晴杳杳暝
烟荒草晚凄凄登临谁会悠然意寒日无言又向西

风景正高洁岁律忽峥嵘岸竹森如束山田漫已耕溪寒幽石出岫远暮云横试问螭头吏谁
令向此行

江南六咏

江南山秀色晴光杳霭间一带平凝愁翠黛数峯孤絶耸烟鬟

江南云片片飞来湘水滨愁絶苍梧鼓瑟女怅望阳台行雨神

江南月依然照我伤离别故人千里共清光玉臂云鬟香未歇

江南竹霜霰岁寒依旧绿谁向溪边养箨龙滴露摇风一林玉

江南梅昨夜溪头玉雪开赠远欲传千里恨和烟为折一枝来

江南客鬓发苍浪不堪摘明时迁逐念前非一夜愁吟霜月白

宿信州景德寺禅月堂

野寺虚堂倚翠微云山极目望中疑溪寒连舰栏干直日暮高楼鼓角悲倒景星河光破碎乱
萤灯火影参差贯休髭髯英灵在应笑登临强赋诗

岩石邨店有石泉梅橘幽雅可爱

岩下鸣泉淅沥飞谁知山店亦幽奇已过野橘分金日未见寒梅喷雪时旋洗云杭炊白玉自挑霜蕈缕青丝殷懃赋咏留岩石他日重来覓旧诗

梁谿集卷五

卷六

钦定四库全书

梁谿集卷六 宋 李纲 撰古律诗二【上饶道中已後及游武夷作六十九首】

上饶道中杂咏三首

过鹅湖留赠昌长老二首

昌老询予来历以诗荅之

题石井慈济泉二首 铅山道中

小溪 过紫溪值雪

雪中过分水岭六首 次大安驿雪霁

山家 将次武夷

崇安宰见示武夷山图记

自入闽境值雪默祷武夷君游山日雪霁有感

趋真亭 游仙溪

武夷山 幔亭峯

天柱峯 洞天穴

三姑石 换骨岩

龙潭 狮子峯

观音岩 兜担石

三女石 学堂岩

船场岩 鸡窠岩

大小藏岩 仙迹石

大小二廩石 钟模石

鼓楼石 丹竈

仙掌 三层峯

画鹤 大隐屏

禅庵岩 仙机岩

魏王峯 虎啸岩

钓台石 试劒石

折笋岩 仙接石

柴岭 车钱峯

毛竹洞 晞真馆

仙橘 仙竹

泛舟至晞真馆遇雪二首

访李道士二首 纪旧梦

宿栖真馆夜雪大作诘旦遂行

题栖真馆三十六韵

上饶道中杂咏三首

半世区区何所求南来岂为稻粱谋烟岚远近浓还淡石瀨萦回咽更流云外鉤輶听处好溪头略约渡时幽何须更论他年事且把风光慰旅愁

鬓毛萧飒寸余冠蒙犯风霜却岁寒但使孤忠能感激岂辞远谪备艰难苍苍云木留深景渺渺深溪泻暮湍独坐苦吟山寺冷照人孤月正团栾

漠漠烟村一笛风溪山都在夕阳中遥看天色暮云碧渐见山头野烧红闽岭风烟知己近浙江书问恨难通暝投山寺凭虚阁隐耳犹听响暮钟

过鹅湖留赠昌长老二首

云山深处到鹅湖万木森森一径纡日落风高钟倍响烟寒林暝鸟相呼宗风振起人能继祖道流传德不孤须信山林真隐地纷纷朝市更何如

谪宦去为劔浦吏税驾且作鹅湖游沈沈梵宇殿阁古寂寂胜地林泉幽祖师道场谁继嗣妙峯德云真比丘夜寒灯下接软语却恨行客难淹留

昌老询予来历以诗荅之

休问西来意吾行日向南凄凄达磨馘历历善财参旧事已不忆新交寧易谈维摩本无语非是学三緘

题石井慈济泉二首

谁将石洞当泉池余溜溅溅落水陂山骨凿开苍玛瑙云腴凝贮碧琉璃龟浮水面寒光动竹舞岩端翠影垂泉石幽奇天下少秘藏休使北人知

岩石嵌空湛碧泉酌甘监静意萧然幽深端有神龙穴虚迴疑藏古洞天云影漾波光璀璨石渠飞溜响涓?会须掬取岩中水洒作膏霖徧八埏

铅山道中

行李踰江峽风烟接武夷地灵嘉木秀天阔暝云垂泉石日相乐雪霜寒自迟寄声山下士扫壁待题诗

小溪

脉脉寒溪彻底明临流聊复濯吾缨风微静爱琉璃色竹密遥闻环佩声漾月下摇金潋灩涵虚不动镜澄泓自怜逐客难淹泊不为溪山景太清

过紫溪值雪

明时报国敢怀安远谪方知行路难云隔江乡来鴈寂雪飞闽岭敞貂寒韩诗解道蓝关恨贾赋聊凭鵬鸟寛谁念紫皇香案吏飘零已觉鬓毛乾

雪中过分水岭六首

寒云漠漠雪霏霏正是行人度岭时密洒峯峦开玉府乱粧林木发琼枝步高渐入烟霄路望远都迷涧壑姿回首江乡何处是断蓬飘梗不胜悲

闽山高处却无风密雪飞云堕晓空去路似从银色界此身疑到广寒宫落梅飘絮来琼树涌浪崩云叠玉峯景色幽奇无似雪平生观雪此为雄

蔼蔼层阴送雪来乱山深处白皑皑积岩错认蓝田玉着树全疑庾岭梅光射九霄来夜月冷凝千嶂蛰春雷武夷路近须晴霁为卷风云一饷开

一夜同云凝不开晓寒整轡马虺隤千岩万壑紫纒处密雪回风散漫来愁里溪声琴的历望中山色玉崔嵬溪山得雪尤奇絶模写无工恨不才

瑶妃游戏水晶房故剪冰花试晓粧坐见初平岩畔石化为元放陇头羊培堆积玉寒光莹顷刻开梅冷艷香好是碧天云散後野蟾来助一轮光

玉龙耕种素芝田误入飞琼小洞天璧月珠星争璀璨瑶环瑜珥鬬婵娟水晶宫阙云腴滑白玉楼台雾彩鲜骨冷魂清难久驻恍然崑阆梦游仙

次大安驿雪霁

雪霁烟村风满林暮天垂影碧沉沉一轮明月光相射千里白云寒更深寂寞樽盈陶令酒飘零泪满仲宣襟灯残夜永不成寐庄舄凄然自越吟

山家

青山掩映野人家翠竹苍松一径斜夜对月鉤沉浅浦晓看鸟篆印平沙溪头驯畜多宜鹜园里灵苗可种茶占尽溪山幽胜处自将风物向人夸

将次武夷

行行路近武夷山秀气蜿蜒百里间苍石插天云缥缈碧溪通壑水弯环神仙恍惚谁能识洞府深沉自不关我向湖中如得路便应脱屣谢尘寰

崇安宰见示武夷山图记

征轩欲作武夷游先借图经次第求须信神仙真窟宅故令峯岫巧雕镂四时花木千岩秀一水波澜九曲流明日泛舟山下去按图细细问踪由

自入闽境值雪默祷武夷君游山日雪霁有感

鄙陋安能到古人寸心潜格武夷君誓辞叱散蛮溪雾诗句驱开衡岳云忠说自应慙吏部精诚何敢并将军氛霾卷尽留残雪粧点峯峦意更勤

趋真亭

烟霞深处一亭闲石磴萦纡紫翠间但觉峯峦劳顾揖不知身到武夷山

游仙溪

一溪九曲贯羣峯演漾轻舠浅碧中杳如误入武陵去落花流水山重重

武夷山

百里云山碧玉林雕鏤融结见天心幔亭会散笙箫远天柱风高烟雾深画鹤独留青嶂表林花常发紫岩陰梦魂清切先曾到故使飘零特特临

幔亭峯

燕罢虹桥絶世氛曾孙谁见武夷君更无裊幕空中举时有笙竽静处闻猿鸟夜啼千嶂月松篁寒鏤一溪云洞天杳杳知何处翠石苍崖日欲曛

天柱峯

巉巖千丈插烟空始见天南一柱峯絶顶雾开擎日月半岩云暝噫雷风俯临万壑林苒秀高压羣山气象雄谁道共工曾触折断鳌端是女娲功

洞天穴

沈沈幽穴閤云烟玉宇琼楼鏤洞天自向壶中飞日月更於物外起山川刘公隐後今谁继张湛仙来不记年紫府若容幽客到诛茅欲卜隐屏前

三姑石

风舞芳林鬓脚垂朝云行雨湿仙衣不知当日缘何事化石山头更不归

换骨岩

玄化升真十六天灵仙蝉脱翠岩前金坚玉润留余骨密鑱烟霞几百年
龙潭

百丈清潭合两溪澄波莹滑碧琉璃神龙端向潭中睡何事能容网罟垂
狮子峯

奇石腾拏竹树苍奋髯矫首据崇冈山深怪底无豺虎端畏溪头百兽王
观音岩

铍衣珠珞宝花冠宴坐翛然山水间应为武夷泉石好不殊海岸补陶山
兜坦石

仙人戏睹翠蛾眉空有花余照夕晖云月娟娟风嫋嫋尚疑玉质在帘帏
三女石

粲粲三英傍碧溪玉肌云鬓晓参差想因巫峡行云日记得湘江解佩时
学堂岩

仙官读彻蕊珠篇几案岩中自寂然崑阆图书藏策府谁言孤陋解成仙
船场岩

仙艇何年插翠微云篷烟櫂尚依依凌虚欲鼓天边柁唤取双龙背负飞
鸡窠岩

磔磔天鸡啼晓烟仙家风景镇芳妍自从彩翼飞仙後只有遗栖寄岭巔
大小藏岩

玉棺插徧两岩傍石罅开如小洞房链就阳魂归紫府空余灵骨此中藏
仙迹石

当年天姥戏溪边二石遗踪膝宛然却笑茂陵缙氏迹只凭方士口中传

大小二廩石

仙家何事亦赢粮廩石团团峙道傍应驾斑龙耕紫石深储芝玉廩中藏

锤模石

谁铸三钟爨乳形不须笋簴自能鸣仙君欲奏宾云曲只感清霜便发声

鼓楼岩

洞天击鼓集羣仙石作高楼鏤翠烟万籁不鸣霜月晓冬冬犹听鼓声传

丹竈

金鼎丹成透碧天尚留丹竈在层巅一丸五色光腾夜乞取从教作散仙

仙掌

玉指纖纖烟霭中挥云映日掌微红只疑华岳留踪後更向闽山映碧峯

三层峯

三层灵峯气象豪喷云泄雨不崇朝悬崖峭壁无人到只恐峯头是碧霄

画鹤

谁画千年老令威丹青今古照清辉玄裳朱顶苍崖畔岂忆冲天万里飞

大隐屏

高峯崛起翠微屏何事呼为大隐名自是市朝人不到非关洞户鏤峥嵘

禅庵岩

虎啸猿啼月满天山僧宴坐正安禅不知只履归何处尚有庵岩名字传

仙机岩

云去仙机杼轴空报章何日已成功天孙织就烟霞锦吹落溪山夕照中

魏王峯

危峯孤峭与天通犹有当时羽化踪仙驭自随鸾鹤远玉楼金鎖白云封

虎啸岩

昔年雕虎啸幽岩千里清风皱碧潭虎去岩空风自远一林花雨落 穆

钓台石

钓石峩峩枕碧溪仙人於此亦垂丝想当月白风清夜正是寒鱼食饵时

试劒石

链气为金铸劒成且将顽石试青萍光鋔郁郁冲牛斗斩尽妖魔若发鏹

折笋岩

玉府锵锵玉笋林谁将移种翠岩陰斓斑犹带当时箴照水笼烟几百寻

仙接石

天风吹折碧琅玕神化茫茫接岂难凤髓鸾胶天上有世人休作等闲看

柴岭

林花不逐岁寒凋半岭烟光媚远霄须信仙家风景好四时峯岫紫迢嶢

车钱峯

尘缘洗尽便神仙泉石幽奇即洞天我欲云崖结茅屋侍从天姥借车钱

毛竹洞

洞生毛竹绿猗猗枝干扶疎满洞垂传是羣仙游息地蔽藏不许世人知

晞真馆

小溪诘屈巧萦回行到晞真景更奇路转山回疑不见此中凝望却参差

仙橘

岩畔陰森橘树垂青青亦有岁寒姿我来恨在秋风後不见霜包结实时

仙竹

陰崖翠竹自檀栾瘦节踈枝特地寒虽未化龙归洞府正宜和月扫天坛

泛舟至晞真馆遇雪

云散天开一饷中依前飞雪落层空琼花巧缀岩端树玉屑飘随洞里风溪浅且游仙掌石云深不见幔亭峯斯游清絕平生少图画方知未是工

行到清溪六曲头森然峯岫照人幽雪花拂水轻轻舞石瀨依岩浅浅流不尽清光常在目未穷幽兴且回舟追寻欲徧神仙窟须向他时卜再游

访李道士

青山中有一道士独卧烟霞昼掩扉踏雪叩关知意重拥炉相与话真机

诛茅独占溪一曲时有白云来伴宿自言身在此山中暮暮朝朝看不足

纪旧梦

余今夏梦乘舟行乱石间四顾峯峦奇秀有如玉色者觉颇异之及谪官劔浦道武夷山小舟泝流水落石出徧览胜槩至曦真馆雪作岩石皆白恍如旧游然後信出处之分定而斯游清絕已先兆於梦寐虽欲不到不可得也作小诗以纪其事

清梦先曾到武夷玉峯积雪倍幽奇小舟游罢寻归路恰似翛然梦觉时

宿栖真馆夜雪大作诘旦遂行

一夜武夷三尺雪岩壑无声闻竹折云峯烟岫望都迷玉树瑶林寒更发山中道士毛骨奇劝我留宿山前斋轻装冒雪非得已仙赏更待他年来

题栖真馆三十六韵

武夷古洞天奇峯三十六一溪貫羣山清淺縈九曲溪邊列岩岫倒影浸寒綠翩如鸞鳳翔矯若虬龍蹙樓觀聳迢嶢屏帟互重複蛻仙骨遺金游女肌削玉鷄栖層岩巔船插斷崖腹學館存几案仙機余杼軸藍光瑩澄潭虹影挂飛瀑翠竹?天池蒼苔封石屋繪禽頂長丹遺迹指如掬峨峨天柱峯幔亭連翠麓傳聞武夷君嘗此會仙俗飛橋几千丈絕頂亘山足障以翠雲屏藉以紫霞褥瑤樽傾沆瀣玉豆脯麟鹿仙妃奏賓雲金鼓間絲竹酒酣歌夕暉嘆息光景促曾孫誰復在往事空遺躅至今風月夜笙簫响虛谷地靈饒泉石山潤秀草木坐使七閩人?此仙靈福嗟予真散材性愛山水酷仙經與地志名字久已熟薄宦方區區仙賞宜碌碌神游仙夢寐幽覬寄圖錄寧知因謫宦乃得厭所欲沿泝窮幽深應接勞耳目開襟豁懷抱壯觀慰幽獨却邀白雲歸伴此岩下宿夜寒夢魂清曉寒輕裝速仙游須再來何當謝羈束

梁谿集卷六

<集部,別集類,南宋建炎至德佑,梁谿集>

卷七

钦定四库全书

梁谿集卷七 宋 李纲 撰古律诗三【自入建阳及抵沙阳庚子岁已後作七十首】

赠舅氏吴子和 自建阳泛舟至建安建溪再得雪乡人以为宜茶

天宁老齐珏録庆余师开堂疏见示

梅花二首 劔浦道中二首

自建安陆行至劔浦 劔潭

双溪阁 沙阳

平津晚望 抵沙阳之夕民居延火

除夜 元日

立春日 春词二十首

用韵赋梅花三首 再赋一首

吴邓同游陈氏园

邓纯彦家兰盛开见借一本四首

次韵陈介然幽兰翠栢之作幽兰二首翠栢二

首 次韵邓志宏梅花

上元日二首 墨戏六首

偃风顶雨絶句 再用陈园韵示邓志宏惜花

乘兴游邓季明园池邀志宏同会再赋陈园韵招陈几叟小饮

志宏以墨戏见遗并赋古风次韵答之且归其

画再用奴字韵呈几叟

以墨戏归志宏复有诗来次韵

再次韵

志宏复有诗来再赋两篇为报

赠舅氏吴子和

契濶从来叹岁陰幸因谪宦欸清襟犯顏逆耳事已往问舍求田意转深岂有声名惊海?且忻山水共登临渭阳情重知何赠玉佩琼琚称我心

自建阳泛舟至建安

一叶轻舸漾碧流却怜舟子解操舟急滩乱石疑难渡短楫轻桡反自由去国飘零同泛梗凌波超忽逐飞鸥建溪百里才终日过尽千岩万壑幽

建溪再得雪乡人以为宜茶

闽岭今冬雪再华清寒芳润最宜茶泛瓯欲鬪千金价着树先开六出花圭璧自须呈瑞质旗枪未肯放灵芽传闻龙饼先春贡已到钧天玉帝家

天宁老齐珏録庆余师开堂疏见示

一别闽山三十年重来相见两依然烦师録示当时语犹喜曹溪一派传

梅花二首

寒梅昨夜泄春光标格依然压衆芳裊裊露枝团玉白轻轻烟蕊簇金黄瑶妃谪堕溪村寂雪片飘残月径香却笑汉宫争宠女竞将娇额学新粧

数枝玉雪小溪滨先得阳和一点春冷艳幽姿难与并暗香?影孰为邻广平不害心如铁和靖须知句有神亦对寒芳动诗兴却嫌标格太清真

劔浦道中二首

宿雾霏霏隐翠岚傍溪幽石自巉岩樵歌递响来危径渔网连舟集小潭野渡无人闲寂寂林花着雨落 谁知逐客凄凉意岁宴南迁劔浦南

此去平津路匪遥岭云溪雨自萧萧山深泻涧泉长响地暖凌寒草不凋放逐却教穷水石登临因得狎渔樵谁怜泽畔人憔悴更把骚辞赋大招

自建安陆行至劔浦

闻道延平黯淡滩舟行至此惨愁顔千金素佩垂堂戒九折宁辞去路艰涉险虽知凭信义藏幽须信足神奸劳生自取那惆恨只羡飞云自在闲

劔潭

当时神劔埋丰城郁郁光气冲斗星千年古狱斷幽局下得至宝双青萍雌雄不知谁与名拭以异土聊发鏐龙文星彩愈晶荧正昼无影魑魅惊雄飞霄汉随雷霆雌跃渊水归延平没人下瞰风涛生天矫化作虬龙形茂先博识非无凭神物终合信有徵沈沈潭影含虚明宝气久秘必复呈会当採取搜元精佩服坐能驱百灵奸谀膏血纷羶腥与尔相携游太清

双溪阁

凌虚高阁枕双溪四出飞檐鸟翼齐山鑱烟光青合匝水分丁字碧凄迷蟠虬旧化张公劔翥凤今留鲁国题放逐因能穷胜赏登临那惜醉如泥

沙阳

沙阳虽僻左风土冠闽城谁知乱山里有此膏壤平邑屋号华丽谿山倍澄明七峯转月色十里无滩声民俗素康阜士夫多俊英食饶鱼稻美?有松竹清筦库职易办尘劳念尤轻萧然飘泊迹忘此羁旅情忽忽岁改律欣欣木向荣何当脱拘缚春亩得躬耕

平津晚望

春入沙阳花满林七峯倒影碧沈沈饥鸢掠水盘旋久戏鸭浮溪演漾深风景只添流落恨烟光遥鑱别离心浙西三月无消息始信家书抵万金

余抵沙阳之夕民居延火几爇官局因念以论水得罪复以火惊殊可笑叹戏成此诗【余生辰己未火甲申水】

囊封论水谪天涯才到沙阳火复随本为玄冥遭放逐却因回禄更惊疑生辰端是穷申未学易何曾悟坎离烂额焦头那足惜只愁蓬迹久飘移

除夜

年来三百六十日忽忽过尽唯今宵天涯远谪罪未解家问久缺心无聊强倾浊酒慰愁独坐
对寒灯尤寂寥钟鸣漏尽不成寐世事又属明年朝

元日

去年元日朝明堂对立玉皇香案傍今年元日谪沙阳独在天涯家一方君恩未报已飘泊亲
老欲养徒旁徨东风回首帝乡远白云望断吴天长

立春日

春风吹到海南边气候浑如二月天幡胜戴来聊应节鼓箫鸣处已祈田花梢柳眼争明媚溪
色山光愈翠鲜生菜春盘谁与送玉人纖手自婵娟

春词二十首

余谪沙阳寓居兴国佛祠寝西小轩春至梨花盛开玉雪可怜修篁嘉木幽禽百啭每晨坐读
书午睡初醒把酒寓目慨然感怀因成春词二十篇以纪景物可以兴可以怨庶几乎诗人之
旨览者无诮焉

一树梨花傍小轩结根幽寂更芳妍东君有意怜流落故遣瑶姿堕目前

晚来急雨作轻寒只恐梨花落点残唤起小童窗外看玉妃何事泪栏干

花开好鸟晓关关惊觉幽牕小梦残宿酒未醒人早起透帘红日上三竿

萧萧檻外翠琅玕瘦节?枝特地寒谁谓幽居太寥閤此君长此结清欢

春光淡荡一番新花气氛氲恼杀人只恐花飞春又老须将酩酊对芳辰

清晨开卷坐幽牕深注炉烟一缕香汲水养花颜色好向人端似炫新粧

春日迟迟午睡浓梦魂飞过浙江东无端花底间关舌唤起搔头两鬓蓬

寂寂春林杜宇啼劝人只道不如归我今归思何须劝借尔翩翻两翅飞

春色困人浑似酒花枝照眼恰如人东君若解怜愁客莫使花飞减却春

漠漠轻烟度短墙春寒料峭怯罗裳惜春只怕多风雨云影披离漏日光

幽禽百啭舌如簧
院宇深深花木香
飘泊伤春惟泥酒
不知林外已斜阳
谁使鸣禽自在啼
感春端似惜芳时
一枝暂寄休饶舌
静处须防挟弹儿
春来南国蔼韶光
百卉嫣然竞早芳
语燕啼莺将婉变
游蜂舞蝶已颠狂
青鸟飞来动槛花
翠衿绀趾暝交加
向人自解传消息
疑是来从阿母家
微月笼云黯淡明
忽闻索索雨来声
可怜窗外梨花老
一夜飘残雪片轻
聒聒鸣鸠唤雨来
萧萧寒响滴空堦
不知逐客伤春恨
多少残英点翠苔
飘风骤雨饷时间
堕蕊飞花满地殷
自是羣芳将结实
非关风雨故摧残
桃花零落逐风飞
地上红多枝上稀
春色陡然归艳杏
梢头还欲衔芳菲
南方春早花亦早
烂熳开尽枝头红
记得上林当此际
游人殊未探芳丛
一年春事遽如许
千里旅愁何似生
浊酒饮余惟五合
残书读尽忽三更

用韵赋梅花三首

寒梅几树开前村
靚粧绰约归仙魂
横斜影落石溪浅
皓洁色洗烟岚昏
幽香暗动松竹径
清格自羞桃李园
穷冬万里霜雪积
独得一点阳和温
冰姿最宜夜月白
玉彩更炫朝霞暎
明妃失意去朔漠
阿娇无宠扃长门
芳容寂寂谁复顾
雅意耿耿今何言
天涯相对且相乐
为尔吸尽黄金樽

草木冻死山中村
惟有梅花能返魂
孤根不怕雪霜苦
冷艳似笑风云昏
披芳独占岁寒地
擢秀肯待春风园
溪边寒影自的的
月里皓色还温温
飘零雨夕烟暝厌
浥清露晨光
玉妃游戏隘崑阆
缟衣飞出瑶台门
幽姿耿介不可狎
欲问所以难为言
嗅花嚼蕊更奇绝
侑我一醉玻璃樽

云山缥缈烟水村
嫣然顾我惊离魂
凝情不语自脉脉
旅愁易感方昏昏
我家梁谿富泉石
雪里数株开北园
天涯相见一笑粲
玉色不减当时温
为君清夜不成寐
月落已见东方暎
会栽千树徧绿野
岂羡五柳垂衡门
临风三嗅长太息
欲辩此意还忘言
何当归去老三径
携幼入室酒盈樽

再赋一首

十年不踏江南村想像梅花劳梦魂岂惟捧心笑西子只恐举步迷东昏
繁英恍讶羣玉府墮蕊悄愁金谷园冰肌自饮晨露白粉质不浴骊汤温
我行闽岭喜入眼皓彩照耀咸池暎烟凝云惨更愁絕积雪欲堆袁安门
天香国艳世无匹何用苦死教能言吹残楼角真可惜莫厌秉烛临芳樽

吴慎微邓志宏同游陈氏园

我本惜春人常恐春色老沙阳渺天南春到一何早羣芳忽烂漫自觉被春恼
招邀适名园景物得幽讨灿灿桃李妍娟娟松竹好虚室自含风回塘已生草
酌酒对芳菲论文慰怀抱瓌奇窥李杜寒色笑郊岛软语既温温高谈方浩浩
二子若骅骝轻车驾长道而我正飘蓬摧残已枯槁家在天一涯情若风中翻
幸然得相从豁我忧心捣青春能几时落花看又扫宁辞金疊空坐使玉山倒
世事可两忘悠悠信苍昊

邓纯彦家兰盛开见借一本

谁道幽兰是国香山林僻处更芬芳从今借得佳人佩伴我春堂昼梦长

特地闻时却不香暗中芬馥度微芳寂然鼻观圆通处深院无人春昼长

喷了清香开了花却归盆檻付公家来春花发香尤好预借幽根茁露芽

纖纖碧叶浅黄花暗淡香飘物外家培壅莫教摧露下春风岁岁长灵芽

次韵陈介然幽兰翠栢之作

幽兰出深林得上君子堂置之顾盼地蔼蔼振余光春风茁其芽暗淡飘天香
刈防岂无用授梦方荐祥纫佩美屈子披风快襄王秋高白露下摧折增感伤
愿与菊同瘁羞随蕕并长收根归旧林肯改无人芳

温风茁幽兰采掇置中堂孤根亦何有借此轩墀光耿耿不自惜凄微泛余香
萧然山林姿詎是邦家祥譬犹美芹子乃以荐君王弃置固其宜零落谁复伤
赋诗慰寂寞念子故意长愿言同心人去去扬清芳

右幽兰

翠栢方岁寒独立羣木外不为衆所知此理实难会惜哉结根浅未使极高大
天风动虬枝萧瑟起清籁恍无斤斧残会拂千丈黛空余霄汉志不逐雪霜改
委弃老空山浩荡付玄宰

崇冈有翠栢擢干烟霭外托非不得地据此羣山会青青岁寒姿自许百围大
舞月散清影号

风振虚籁谁云根如石已见色参黛幽人挺高怀顾我颜不改知音自昔难多财为尔宰

右翠栢

次韵邓志宏梅花

空山极望皆黄苇欲挽天河聊一洗溪边的皜见梅花冷蕊?枝澹烟水安得健步移我堂清夜
桂魄来孤光人寰尘土飞不到鼻观寂寂闻天香吾衰文思久不起见子新诗端可喜落英坐
使笑天桃结实定知非苦李年来踪迹堕空蒙与子追随邈未穷琢磨妙句覩天巧为我一振
诗家风

上元日二首

去年玉辇侍端门灯满鳌山讶晓暾寂寞沙阳山水里也将膏火照黄昏

应为飘零有故侯竞将灯火簇谿楼田夫野妇盈衢巷怪我还能与共游

墨戏六首

邓志宏所蓄墨戏凡六曲尽其妙求予题跋各为赋小诗以见意

拳蠹

屈折金石瘦偃蹇虬龙怒萧然少生意端为根中蠹

枯折

岁晚风号寒琅玕半吹折虽残栖凤枝终抱凌霄节

宿枝

?筠轻带粉老叶饱经霜试问枝头实何年集凤凰

新叶

解箨能几日成阴不待春天然为谁笑风露一枝新

引根

土润引新萌虬鞭独处行此君人不厌何惜满林生

迸笋

养就箨龙儿斓斑角未齐斧斤休纵手会看拂云霓六竹外尚有偃风顶雨二本留故家志宏欲之而未得戏作絶句附卷末庶几异日悉归志宏也

六樣根茎妙入神两枝风雨更清新此君族类须收拾莫使飘零叹失身

再用陈园韵示邓志宏

青松更雪霜始见枝干老挺然节操士安用致身早吾衰习禅观颇觉得无恼每於文字间未免尚穷讨遇物空吟哦愧乏句语好有时肆狂言自晒太草草儒生舍翰墨无与寄幽抱富贵非所愿神仙渺云岛宁知万卷中养此一气浩子若汗血驹振辔千里道我如铍翮鸿毛羽半摧槁适然相值遇岂异宛丘翻新诗迭唱酬险韵类虚搗文章虽未技尘语贵除扫勉哉扛鼎力回此狂澜倒此外复何为穷通付旻昊

惜花

餅水养花花已老零落春风寒不扫从教几案积残红尚有余香慰衰槁

乘兴游邓季明园池邀志宏同会再赋陈园韵

幽人筑小圃自乐不知老闻名虽已熟相见苦不早忘怀倾盖间什我羈旅恼春风入芳林乘兴聊一讨嘉葩寒未开美木晴更好飘零桃与杏残红委烟草急令招小阮谈笑欸清抱披襟步方池散策穷远岛翛然适我情忘此归志浩人生暫寄身宠辱何足道舐痔得车多未可骄黄槁一杯且相属起舞不须翻文楸响玉子更试兵家搗羸形乍泉涨猛势惊电扫应怜客素痴屡劝罚觥倒扫待月华生清光满春昊

招陈几叟小饮

开樽欲约玉川子致鲤先遣长须奴春时海燕光涎涎风暖城乌尾毕逋幸有异书并古字可无白饭与青刍虚堂隐几共谈笑应信今吾非故吾

志宏以墨戏见遗并赋古风次韵答之且归其画

老坡墨戏吾最许雨叶风枝无点上幽怀寄此管城穎妙质森然会稽楮要须胷次竹先成故使落笔前无古披图但爱凌云姿作赞愧乏惊人语嗟予迂濶与世?酷嗜栽培如老圃筑园会与种千竿开国便胜封万户遗予此画意已勤夺人之好道所御封题依旧送书房得画何如

得竹愈

再用奴字韵呈几叟

平生志尚在丘壑肯学卫霍追匈奴縣上之田方欲隐草堂之灵休谢逋富贵於人何翹梦理
义悦我真如刍脱交夫子谈道【阙】应笑连叔惊肩吾

以墨戏归志宏复有诗来次韵答之

玉局老仙人共许秀骨于今已黄土人间无复见文章空余戏墨归囊楮子能藏蓄真好事便
可秘惜传千古试将短句赞幽姿却对此君难下语年来懒惰百事废欲把锄犁逐农圃会栽
修竹满园池为引清风到庭户子诗往复句益奇发我狂吟那可御超然对竹更吟诗此病未
知谁得愈

再次韵

落笔萧森遽如许墨为根茎纸为土眉山作此共言好譬犹字法称虞褚世人画竹不画意漫
舍丹青欲侔古曾中干叶本天成心手应时那可语此君於我定有缘每念移根栽小圃开图
忽见数株新却怪龙孙入吾户年来几欲断吟哦照眼还成自难御发緘又复读佳篇诗癖遥
知犹未愈

志宏复有诗来再赋两篇为报念其往复之无已也故寓意卒章以止之

平生爱竹端自许欲种千竿满吾土岂知好物不须多只费东坡数番楮酒酣弄笔写寒姿一
洗丹青空万古我今观画已萧然矧对吟风如共语渊明荒径便抛官仲子辞官归灌圃终年
端坐饱太仓更欲此君长傍户亦知两者固难兼无那幽怀终不御纵教富贵欲何为不若归
来栽竹愈

数君妙质来何许生气森森如得土依然对此未忘情亦欲怀之恨无楮宿枝新叶自清妍蠹
拳枯折尤奇古已将金玉照双眸更得珠玑编好语男儿学古贵根源余力游兹文翰圃沈思
六艺见同归纵览百家知异户浩然养气塞天渊沛若江河知孰御却怜雕斲愁肺肝但莫苦
吟当自愈

梁谿集卷七

卷八

钦定四库全书

梁谿集卷八 宋 李纲 撰古律诗四【在沙阳作四十五首】

读李白集戏用奴字韵

春雨 春意

平津合晚雨 春昼书怀

春雪 食笋蕨

学草书

次韵志宏见示春雪长句

雪霁

次韵陆敦礼留题皇华驿二首

溪涨 牡丹

酴醾 再次前韵二首

次韵招志宏见过 再赋酴醾赠志宏题陈氏隐圃佚老堂二十韵

再赋佚老堂 寒食五首

清明日 上巳日

晏起 戒酒

岩桂 志宏送岩桂并诗次韵春暮平津晚望 寄诸弟

寄内 夜坐三絶句

夜坐观斗

季明之子登第戏成小诗

志宏送千叶莺粟走笔代简

再赋

罗畴老同游栖云院瞻礼新藏

读李白集用奴字韵

谪仙英豪盖一世醉使力士如使奴当时左右悉谀佞惊怪恇怯应逃逋我生端在千载後祭公只用一束刍遗编凛凛有生气玩味无斁谁如吾

春雨

春晚雨声碎天深云影低萧萧度远岫脉脉涨前溪芳润归花蕾清寒作燕泥池塘梦生草碧色已凄迷

春意

春鸟窥绿窻踏落庭前花美人为之笑鬓脚风中斜不惜花踏残只愁鸟惊去姹娅背人飞林深无覓处

平津合晚雨

暮雨带风急春云乱眼低凄凉倚虚合湍激瞰回溪烟远桃花浪山寒锦障泥江乡何处是天濶望中迷

春昼书怀

春院沈沈昼掩关坐看云起面前山静中图史尤多味身外功名已厚颜匣砚细磨鸕鹚眼茶瓯深泛鷓鴣斑簿书粗了无余事更有何人似我闲

春雪

怪底春来煖太深忽惊雪片堕层阴廉纖带雨初犹薄散漫随风遽不禁光炫峯峦皆玉色寒侵花木欲灰心沙阳逐客家何在拥鼻凄凉但越吟

东君也解惜芳容故把冰花密封索索响寒窻外竹亭亭戴白岭头松只惊满眼飘风絮不

觉濒谿卧玉龙身在天涯归未得浇愁直欲倒千鍾

食笋蕨

太官饱食厌羶腥却喜沙阳有竹萌山蕨迩来尤脆美一杯聊试煮坡羹

学草书

平生行事见真书草圣空慙点画疎今日试临寒食帖却疑羲献不难如

次韵志宏见示春雪长句

百花烂漫如冶容颇讶陡然春色浓那知忽作三尺雪草木洗尽羣芳空六英飘舞片片好谁与刻削嗟神工谿山恍在玉壶里楼观飞出瑶台中却怜极目皆皓素不复零落伤残红幽人栩栩应梦蝶落絮漠漠方黏蜂虚堂兀坐清入骨欲期汗漫游鸿蒙剡谿访戴久寂寞安得一御冷然风年来端恐诗道穷幸予佳句时争锋客愁已剧更赋雪半夜吟苦天地白

雪霁

梦残钟鼓报新晴虚幌遥看晓日昇云外崔嵬犹负雪石间清浅欲销冰春归花草蜂寻侣巢寄檐楹燕语朋貂敝不禁寒料峭客愁惟藉酒凭陵

次韵陆敦礼留题皇华驿二首

貂裘端恐敝缁尘勇向明时乞得身却拥紫荷来握节遥知白鹿已随轮棣华辉映蕃宣地篇什流传放逐人只恐晋江难久驻为将直道福生民

宫漏初残唱晓鷄周庐同守禁城扉龙墀密箴鵷鸾羽玉殿先瞻日月衣青琐笑谈情已厚皂囊章奏意何稀拥旄昼绣方如意也念飘零未得归

溪涨

中宵骤雨驾惊雷逗晓盘涡穀浪来端恐谿神似河伯望洋向若始知哈

雨过浑流涨晓溪茫茫烟水拍春堤凄凉柱史凭虚阁犹忆都城水自西

志宏以牡丹醪醑见遗戏呼牡丹为道州长且许时餉醪醑作二诗以报之

我昔驱车游洛阳正值名圃开花王嫣然万本鬪妍媚雕檻绰约罗红粧风枝似响湘浦佩露

苞如浴骊山汤乍惊照眼国色好更觉扑鼻春风香鞞红檀点玉版白细叶次第舒幽房玉奴
纖指尚余捻鹤翎坐恐随风翔就中品格最奇特共许魏紫并姚黄千金不惜买一醉少年浑
欲花底狂归来试作牡丹谱未服秉笔惟欧阳自从游宦多感伤况此远谪闽山傍谛观世味
如嚼蜡惜花未免犹膏肓亦知春色到庭户不见此花如未尝子於何处得一本赠我意厚诚
难忘戏言劒浦此为最聊试呼作道州长化工雕刻无厚薄地气培植非其乡虽云单叶不入
品无那富艳踰羣芳愿言爱惜勿嘲诮且醉玉笋酬韶光

右牡丹

残陰未许春光泄喷作沙阳三尺雪摧伤花卉尽枯槎惟有酴醾寒更茁幽人早起傍园林独
喜枝头琼蘂缀应怜逐客正凄凉折赠殷勤慰愁絕清香馥郁坐中飘汲水养之殊未歇和烟
带露愈芬芳更许幽丛时为撷愁霖连日作轻寒寂寂禅扉方昼闭春风骀荡好幽寻安得连
拳挂雌霓

右酴醾

志宏见和再次前韵

半夜?钟来景阳美人梳洗随君王天然意态已倾国何用苦死催严粧朱顔半酡宁着酒玉肤
自滑非临汤铅华固美岂真色兰麝虽馥非天香我观牡丹正如此勾栏横檻为雕房乍惊神
女峡中见只恐弄玉云间翔檀心点点晕深紫金蘂簇簇摇金黄坐令杂花为婢妾解使蜂蝶
成颠狂临风嫋嫋更妍好浑如舞袖踏春阳芳根最是洛中盛安得千本栽砌傍惜花惟怕春
色老此癖谁与鍼其肓沙阳春晚始一见如有异味争先尝蜡封剪处持送我念子此意何时
忘禅关兀坐无与语迟迟昼景方舒长对花把酒不知醉醒後还复悲殊乡佳篇酬和慰落寞
清丽欲与花争芳吟哦愈苦诗愈好去去惜此牕前光

右牡丹

寒过春光还漏泄酴醾架上花如雪轻盈皓色讶梅开芬馥清香胜兰茁龙须初引翠蔓长玉
质全看素英缀结成幽洞自深沈?此芳醪更奇絕铜餅只浸两三枝香在根尘都不歇幽人赠
我意已勤却愧终朝烦采撷子美惟愁花欲飞渊明自爱门常闭寻芳须趁春未残更喜晴天
垂彩霓

右酴醾

次韵招志宏见过

盱起禅房只杜门忽思嘉客共论文连山雾雨密难解隐耳雷霆惊乍闻我向图书端作蠹子
今曾抱欲吞云春堂谈笑能相就为把沈烟细细焚

再赋酴醾赠志宏

春入酴醾如愤泄翻空万点枝头雪浓花嫩蘂满柔柯应笑蓬蒿春亦茁东君端的街工夫故把琼酥巧粧缀含风触处便氤氲带月看时更清絶幽香移入小斋中独比余花最难歇子应怜我惜春光刺手钩衣几番撷却嗟草木本无情亦解随时自开闭对花一醉更繙书醉里犹能读为霓

题陈氏隐圃佚老堂二十韵

处世如大梦悟者能有几钟鸣漏已尽耽着不知止贤哉颍川公才老即谢事悬车筑园池归作隐君子大块方逸我顺之聊复尔燕居二十年坐进端为此委形虽物化妙湛本无死我来恨不及犹喜识其嗣鬓眉皓已霜眸子炯如水头着白纶巾萧散真晋士传家有高风何必拾青紫衡门久不开荒径为我洗相携步方塘春绿涨清泚修篁间苍松新槐杂嘉卉断桥堆露箨危架引烟蘂庭桂团团叠涧石齿齿萧森无俗姿旷远含古意慰我放逐情翛然百忧弭缅怀前人风安得九原起相过不厌频追从从此始

余赋佚老堂志宏见和复用前韵成一篇呈兴宗

人生期百年得老亦无几超然高世士急流贵勇止挂冠神武门不与王侯事驱车返田庐出关随父子宁知千载後夫子亦云尔虚堂号佚老游息长在此心闲齐物我漏尽谢生死遗德蔼清芬承家有贤嗣行年踰六十遇物如止水岂惟诗家流端是林下士闭关园日涉不种红与紫满庭松桂香月露浩如洗风篁自萧萧池溜方泚泚知我却叩门锄榛出芳卉杞菊初长苗棠梨半含蘂清谈欵襟抱忘此德与齿境幽人复佳发我斐然意作诗挂楹间拙恶何时弭邓侯亦可人佳句实予起抱膝更长吟芜音慙四始

寒食五首

余谪沙阳地僻家远遇寒食如不知盖闽人亦不甚重其节也感而赋诗五首以杜子美无家对寒食五字为韵

往岁遇寒食亲宾相与娱飘零客异土对之浑若无岂不念佳节寸心愁欲枯花间有好鸟劝我提葫芦一醉聊自适醉梦归东吴

异县遇寒食怅然怀我家千里遥相望各在天一涯佳节无与同冉冉悲年华鸣禽花底聒舞燕风中斜物情各自遂羁束诚可嗟

天涯遇寒食佳节无与对独酌一盃酒慷慨使心瘁来者复可追既往那复悔翛然畎亩心敢忘犬马爱之推自欲隐去去何所忤

嘉节遇寒食春陰犹作寒
闽人不知重浑作等闲看
饧粥不复煮青枫谁与鑽
开牕延霁景修竹正团栾
翠眉双侍女对此一樽残

逐客已凄凉矧复值寒食
花深日迟迟院静春寂寂
雨余山吐青日落霞扫赤
浙江渺何在三月无消息
弃置勿复陈吾心乃如石

清明日

忆昔叨尘寓帝京春光淡荡
值清明赐来新火传红蜡
煮就香糜和白饧游女踏青
寻苑草戏童引线送风筝
沙阳寂寞都无此卧看山云
听水声

上巳日

暮春祓禊集簪裾锡燕昆明
咏乐胥宝马骝腾随鼓吹
彩舟曼衍戏龙鱼闽山放逐
家何在帝里风光乐自如
嘉节只添迁客恨宽恩何日
赋归欤

晏起

清明已过初短宵春气困人
如浊醪院深人静不知晓
虚堂一枕方陶陶觉来红日
高三丈竹影扶疎风叶响披
衣散发久逍遥髣髴犹颊上
却思昔簪鹄鹭班每听朝鸡
长惨顔戴星侵月未为苦冲
风冒雨长艰难何如谪堕溪
山里钟鼓不闻春睡美先生
梦觉本来齐更与睡乡重作
纪

戒酒

吾初不解饮涓滴莫下咽自
从游宦来稍稍颇称善譬犹
怯懦士习惯亦能战作气欲
吞敌贾勇乃求殿迂愚撓重
衅飘泊旅异县怀家路迢迢
惜春花片片浇愁欲千鍾燕
客卑九献浩如鲸吸川无那
壶浮箭欢然偶过量浅狭诚
易见噎呕九藏翻昏瞽两目
眩宿醒味尤恶累日不欲膳
吾生如浮沤急景若奔电学
道贵清虚为文欲精鍊胡为
事杯杓无乃废笔砚先生一
石醉待诏三升恋枕麴与藉
糟自污何足美从今梁谿翁
无复醉乡愿

岩桂

闽山气候真不常浪蘂浮花
浑欲狂团团岩桂着春雨擢
秀不待秋风凉微舒嫩叶玉
剪碧巧缀碎颗金排黄木如
犀理自坚致喷作十里旃檀
香沙阳满眼皆此树安得白
露零清商芳根端可伴真隐
他日移植梁谿傍志宏送岩
桂并惠长篇求予赋诗次韵
答之

我来闽岭值春月坐见园林
花竞茁殷红枝上破燕脂嫩
白梢头开玉雪平生苦吟缘
爱奇对花岂忍都无诗愧将
拙句写天巧但把浊酒酬春
晖适来岩桂花尤好乱缀黄
英向青昊非时

似欲鬪羣芳草木无情亦相恼
栢桐送花来覓句端恐梁谿得归去
谪官且作九年期家在天涯那复顾
何时万里吹秋风清香伴此金芙蓉
临风一醉百忧散看子挥毫如彩虹

春暮平津晚望

风回雨霁已春残景色苍茫杳霭间
芳草渡头看緑树白云飞处见青山
莺啼燕语愁肠断亲老家遥泪点斑
却笑腐儒何所用征商偷得半时闲

寄诸弟

自取飘零不复云索居终日念离羣
送书未见来黄耳陟岵惟知望白云
素发偏亲乌鸟急青春诸季棣华分
天涯只有思家切须使音声不辍闻

寄内

南迁道远不相携锦字还嗟雁到迟
玉臂云鬟同夜月绣屏金鸭独香帷
诸儿应解勤修习稚女遥怜弄喔咿
何日得归同隐志孟光举案定齐眉

夜坐三絶句

春夜沈沈气倍清残编读彻忽三更
金釭挑尽空搔首又听檐间雨滴声

平生最喜夜看书人静心闲乐有余
识尽古人兴废事何如一枕梦华胥

中宵风雨透窗纱独坐无聊却念家
三月浙江无信息寒灯何事结成花

夜坐观斗

帝车运转天沈沈杓携龙角魁枕参
斡旋造化岂终极斟酌元气分阳陰
物随南北自生死时系俯仰成古今
撮提大角顺所指其余万象徒森森
舜观玗衡齐七政致治不独薰风琴
後來方士诚幻怪罡步禳禳难究寻
闽山春月多雾雨夜霁天影高而深
七星错落挂北户芒寒色正方照临
我来瞻仰但再拜颇见天地照回心
酒浆不挹西柄揭讎敢更作诗人箴

志宏送千叶莺粟走笔代简【先是右文罗公示双林録予方閱经饮茶而花至故卒章及之】

世传莺粟如纸花品目不为人所嘉
那知亦解吐繁艳深红浅白凌朝霞
一窠千叶类芍药传种本自何人家
栢桐乞得不敢惜长须走送声呀呀
杜门宴坐观内典方丈寂寂如毗耶
散花侍女一笑粲居士默然惟啜茶
季明之子登第戏成小诗并纪岩桂之异

怪底春山桂开早仙籍浮香远相告固知鍾爱在贤郎谁谓笔根无显报亲宾来贺如云奔车
马煌煌于氏门七杯燕客吾未与应欲特开东阁樽

再赋志宏千叶莺粟

春深百草争开花天香国色世共嘉谁令莺粟亦妍好濯濯似举风中霞一畦同种偶千叶巧
思端属东君家年来居士已忘物对花聊复一笑呀色空本是不二法何用自生分别耶更思
崖蜜煮牛乳甘滑满瓿全盛茶

罗畴老同游栖云院瞻礼新藏

宝峯古丛林深寂云所栖中有大宝藏涌海蟠蛟螭庄严极精丽金碧光陆离诸天渺宫殿地
轴森铁围雷音出妙响震破羣生疑天人所瞻仰神物应护持吾闻金仙氏变化难思惟毫端
见宝刹芥子藏须弥能於一尘里法轮常转移谁将创物智设此妙圆机佛语菩萨语收拾靡
有遗八万四千偈转一弹指时功多用力少权实相因依伟哉象教力天造非人为无量大居
士精进心不疲夙植衆德本爰得真依归咄嗟檀施开成此一段奇相携结胜缘洗我既往非
获闻第一义刮眼资金篋超然脱尘垢清淨真摩尼

梁谿集卷八

卷九

<集部,别集类,南宋建炎至德佑,梁谿集>

钦定四库全书

梁谿集卷九 宋 李纲 撰诗五【在沙阳作五十一首】

闻七弟叔易登科

戏成短歌从志宏求芍药

志宏供芍药再赋前韵

次韵罗丈留宝峯长老之作

罗畴老所藏李伯时画马图二首

从志宏求芭蕉 松架

再赋芭蕉 次韵志宏赠丹霞师葺西轩毕工

次韵罗修撰赠丹霞三首

移花 菖阳

兴宗许借盆荷以诗索之

再赋西轩 次符读书城南韵志宏供笋以诗报之 早起

黄道夫惠纸

吴亲寄薨枕香炉二首

邓成彦供茉莉以诗答之

平津阁望雨

次韵题乐全庵赠邓季明

次韵题棣华堂 陈兴宗供茉莉

季明惠含笑花 萤火

泛碧斋【并序】 次韵志宏见赠拙轩

题吏隐轩 寄陆敦礼二首

闻仲辅弟自陈便亲得南康军逍遥观

重午 志宏遗枯梅产芝读四家诗选四首【并序】 夜坐观书

读李长吉诗 读孟郊诗

足成梦中作 纸笔墨尽戏成

梅雨 初见荷花

志宏以家所生新芝遗予并以诗来次韵报之

闻七弟叔易登科

吾家世儒业教子惟一经迩来四十载父子三成名【亲老元丰中登科後三十余年予尘忝今又舍弟了当】忆昔尘忝初非才厕羣英胪传被殊渥姓氏落宸瀛【予尘忝时蒙特旨政官与学官差遣皆优恩也】天子亲识擢屡对云龙庭玉音每褒谕必及吾亲宁同朝大明宫搢绅以为荣【予蒙擢用每赐对上必询及亲老其後备员宪台以职事进对时亲蒙恩提举醴泉观亦以是日朝见上顾予曰卿父子同日造朝搢绅荣事】君恩太山重欲报鸿毛轻迂愚得放逐不复叹飘零尔今又登第相去才九龄勤劳酬素志烜赫振家声箕裘端不坠义方益芬馨季弟亦乡选来年试春卿云鸿继高举桂苑同飞鸣子壮可起家予衰欲归耕勉哉修远业正值时休明

戏成短歌从志宏求芍药

东风不隔沙阳僻嫩蘂浓花自春色拼桐也是可怜人每送梁谿慰愁寂迩来芍药已盛开供花未到吾须覓赋梅岂害广平刚乞醯更觉微生直为将烂熳数枝红伴我淋漓一丸墨

志宏供芍药且以诗来再赋前韵

谁道心闲缘地僻梦里何尝有空色小牕一枕觉来时燕语莺啼春寂寂忽思春尽芍药开赋

诗试与幽人覓短篇才去花已来却愧诗词太狂直嫣然数朵玉楼春何似江南称落墨

次韵罗丈留宝峯长老之作

至行孤高金不坚犀颅鹤骨自巉然宝峯即是如如体何用归休更覓禅

罗畴老所藏李伯时画马图二首

边人牧马如牧羊羣族散置初无伤妙哉龙眠笔有眼作此冀北才而臧素纨盈尺十二匹骨相毛物皆非常青骢紫燕五色满驊骝骆駟骠黄旁行侧睨复回顾矫首奋鬣嘶风霜背驰正立尽变态意气磊落如腾骧想当盘礴初运思工与造物争毫芒此中念虑讵可熟至言发药诚难忘从此絶笔不画马但写妙相依圆光斯人于今又黄土斯画可宝宜珍藏【伯时留意画马每欲画必观羣马以尽变态有僧劝其不如画佛後遂絶笔】

右蕃马

房星之精下天驷产此骐驎奉天子龙媒徕自大宛城汗血生从渥洼水那知妙手居合淝笔端能出神俊姿顾视清高气深稳志意倏傥精权奇兰筋秀骨连钱直细毛萧梢丰颊臆金鞮络首牵奚官自中伏波铜马式一疋驻立一疋行坐看千载风云生鸾旗在前属车後虽有絶足何由呈

右御马

从志宏求芭蕉

小圃初宜夏灵蕉日日新轻风摇凤尾疎雨湿青巾结荫留嘉客移根许散人轩中拙居士默对欲观身

松架

予葺兴国西轩为阅藏教之所构松架以御西照感而赋诗

羈旅随缘即道场采松结架障斜阳摧残自带青青色森爽犹传细细香佛氏解将华作界骚人爱把药为房我游法藏酬初志宜得苍官助?凉

再赋芭蕉

带雨移根润惊雷展卷新清阴浸白氎碧色照乌巾戒酒盃翻叶挥风扇傍人幽姿随处好休问不坚身

次韵志宏赠丹霞师

倾盖相逢亦有缘那堪心契更同年六根净处三生现一点通时万法全莲社子能知旧侣香山我亦学癯仙丹霞妙悟思良覿千偈澜翻看涌泉

葺西轩已毕工奉呈志宏成彦

华藏千函得纵观庄严聊使道场安巧遮斜日青松架旋植新花红药栏弹指宝楼开处速游心法界到时宽含容万象犹余地须作毘卢丈室看

次韵畴老赠丹霞三篇并寄丹霞以代简书

太虚元湛寂妙用起云雷若解明如镜何须冷似灰不能汲水机圆自笑翻羹手捩愿从明眼高人为看三生宝地

右送次丹霞归瑞光岩韵

佛法如沧溟深广初无底欲以蠡测之望洋颡已泚我生乃虚幻瀛渤一泓起安得具眼人为发无生理丹霞古禅伯一派曹溪水出岫或云行遇坎亦渊止谛观古文诗相识佳句里闻风欲见之踊跃不能已丰岩距平津飞锡片时耳愿将雪澡心试听风生齿

右次自警示丹霞韵

移花

幽人怜我葺幽轩为植名花满槛前须信人穷天未厌炎晖变作养花天

志宏送石菖蒲乃菖阳也作此诗以戏之

石上菖蒲何所拟虬然连络龙蛇尾寸余九节瘦根茎能辅五臟坚髮齿清泉白石养案间璀璨芬芳诚可喜子於何处得此本叶大根羸恐非是乞隣岂误进菖阳遗我还将比芹子物虽非是意已勤且置盆中浸寒水

兴宗许借盆荷以诗索之

隐圃清和夏景初小盆荷芰已扶疎借公瓦沼开花种伴我松轩晏坐余断取当如妙喜国庄严且作化人居秋风幻出芙蕖後來去须观本一如

志宏见和西轩诗再赋前韵

休将内外别游观【列子务外游不如务内观】一处安时在处安画虎若成那类狗牧羊已熟不须栏芥瓶历历光明现华藏重重境界宽笑指庭前花树子为言欲作麼生看

次符读书城南韵

伏承宫使修撰丈颁示次退之符读书城南韵佳篇仰见义方之训不胜叹服特令属和尤难为言牵强吟成以塞严命幸望笑覽

騄驥有骏足调御始服輿天资已高迈淬砺资羣书敏学复好问端由方寸虚超然适正道克慎在厥初百家见异户六艺知同闾博观而妙束奥义将灿如織繳下云鹄沈钩出渊鱼精思理难遯笃志道匪疎溉根食其实浚源导成渠反已类学射求心犹放猪精英谢糟粕光景走蟾蜍寸阴宝尺璧旨味胜浮蛆是中苟得趣何适不可居问言何以然得之在学欤譬犹大农家丰年多蓄储人皆升斗窘已独仓箱余自饱以及衆博施诚乐且文章乃余事笔墨为耕锄当为丹山凤勿作黔中驴本末固有序未蓄那得畜致身霄汉上登降白玉除朱云既折檻辛毘亦牵裾爱君当以诚危言岂邀誉自古富贵者磨灭同丘墟何如任直道用舍随卷舒不能乃自弃君子其疾诸愿言力学人去去无踌躇

志宏供笋以诗报之

琅玕为竹铁为鞭长就新萌本类拳味旨不须甜说蜜肤腴更觉软胜绵绵?与脱重重缚玉版来参的的禅知子供予端有意欲教蔬食学神仙

早起

平时懒惰只随缘日照堂东尚栩栩然华藏欲游须勇猛總帷虽好莫留连收将枕上黄粱梦印取心中大觉仙从此寓轩须早作魔军未破可安眠

黄道夫惠纸

文房嘉楮制敲冰遗我千番得未曾敢比蛮牋修五凤愿将绮语赞三乘金花乍觉毫端滑玉版尤宜墨点凝只恐多言空费纸更将文帛剡谿藤

吴亲寄薤枕香鑪颇佳以诗答之

远投瓦枕比琼瑜方暑清凉愜慢肤莹滑色侵蕲竹簟玲珑光照博山鑪便便何必书为笥栩栩方将蝶梦吾枕上片时聊适志黄粱未熟到东吴

右薤枕

华藏初游愿力坚宝鑑已现佛陀前神通何似维摩诘熏习聊同白乐天沈水香焚烟缕细卷云花透月轮圆愧烦远示将何用聊伴虚堂晏坐禅

右釐鑑

邓成彦供茉莉以诗答之

芳花遗我比琼瑰慙愧幽人自?培名字曾於佛书见色香今入寓轩来旋妆雕檻修清供更促繁英使早开须信庄严资衆力道场化作雨华台

平津阁望雨

平津景物晚依依正是梅黄麦秀时云气遮山来骤雨水痕侵石涨湍谿蒹葭带渚披离叶松栢连山鼓舞枝迁客不堪流落恨凭高北望意凄淪

次韵题乐全庵赠邓季明

寓形天壤间自适乃其至放怀得山林肯逐市朝醉举世竞纷华谁识静中意澄清谢泥滓淘汰见精粹游心无何乡养此浩然气猗欤乐全翁於世寡所嗜筑庵以自居方丈含大地请问庵中人其乐何由全万物备我身不以人灭天南亩丰可饱北牕凉可眠尚友古之人圣贤存简编有时自种植百卉争芳妍宾来聊一醉醉中亦逃禅鷄鶩自扰扰独鹤方云骞嗟予幸相见一见即忘年但愧闻道晚敢怀着鞭先何当归梁谿耒耜买一廛卜居学夫子相望两萧然

次韵题棣华堂

沙阳地僻有幽人三乐高怀自壮辰雏凤已闻栖郄桂棣华更祝寿庄椿家余美釀时觴客手植名花日赏春借问市朝耽恋者何如云水自由身

陈兴宗供茉莉

幽人萧散省诸缘也解栽花满檻前羞把天姿争媚景故将清格占炎天毗耶遣化来香积隐圃移根入寓轩多谢庄严修妙供愿熏芬馥散无边

季明惠含笑花其香满室以诗报之

奇葩为我摘芳条一笑嫣然特地娇花露玉顔诚巧倩叶堆云鬓愈妖娆韬藏妙质踰三月喷泄清香在一朝更把彩丝纏绿萼肯教芳馥片时销

萤火

雨过禅房夜气清
湿萤无数自宵行
光穿竹树来还去
影照池塘灭复明
飞学流星疑有意
出因腐草本无情
暂时熠燿休凭夜
敢傍长空晓日征

泛碧斋诗序

闽谿类多湍濑小舟诘屈行乱石间稍大则胶独沙阳不然谿平缓无滩声者几十余里县故有舫焚於雷火因不复置迨今八年清流如席可泛可濯坐视莫为非阙典耶予谪官来此暇日为邑中同僚道其故不旬月而舫具华丽宏壮有浙舸之风名之曰泛碧斋相与置酒以落成移舟中流沿泝轻驶四顾溪山邑屋之美欣然忘归而去国流落之感得暂释焉因赋诗四韵以纪其实序而刻之使後人知是舟之设自吾徒始尚勿毁云时宣和二年孟夏武阳李某序

诗

画斋初泛碧谿浚十里津平叠翠岑
拍岸烟波梅雨细连天芳草岭云深
愧烦断取西湖景
慰倾思北阙心
好是清霄山吐月
水光天影共沈沈

次韵志宏见赠拙轩

梁谿之拙天下絶六年出入黄金阙
太官珍膳厌羶肥谪堕沙阳甘笋蕨
胷中空洞何所有羞逐缁尘事奔走
鷗鷖本是栖一枝鲋鱼何用求升斗
翻羹触讳拙谁如悻悻还慙浅丈夫
小轩燕处聊自榜方丈迴觉含空虚
簿书蠹了多暇日坐看日光摇霁隙
百年销没向此中金玉满堂何所益
不如便作逍遥人富贵於我如浮云
欲知内外孰轻重何翅鸿毛与万钧
平生习气未能已更续春秋修旧史
马迁忍耻托空文欲洗前非徒费水
虞卿归隐亦着书笔墨自可为欢娱
心闲意到时一扫何用寸寸参厘铢
扩然无事还面壁禅悦为牀法为食
月光照破客尘空那有丝毫挂欣戚
枿桐好学今所无返从拙者来问途
拙翁已拙更何说万里清风一轮月

题吏隐轩

纷纷吏事何时已随扫随生畏首尾
那知动静不相关安用杜门并洗耳
曾侯作轩治丞事鴈鹜成行亦衣紫
偷闲扫溉哦其间壁记当须倩韩子
榜之吏隐名者谁梁谿拙翁前柱史
萧然一室自可人况有明牕兼净几
隐中涵养得佳趣致远自应从兄起
王良伯乐世岂无騷褭骅骝日千里

寄陆敦礼二首

晋河太守况如何日对溪山醉绮罗
肯念旧僚今逐客强倾浊酒只悲歌

闻说长桥跨海涯碧天影浸白虹垂
自嗟羈束无因到乞取君谟大字碑

闻仲辅弟自陈便亲得南康军逍遥观

宦游方壮已抽身始验从来嬾是真未看昂霄摩远翮且将戏彩慰偏亲我当放逐离羣日尔作逍遥自在人恩贷何时听从便庐山同作远公宾

重午

谁将佳节号天中阳极阴生五自重角黍但能娱幼稚彩丝那得制蛟龙千年沉汨英灵在万里浮菖习俗同逐客有家归未得满怀离恨寄南风

志宏遗枯梅产芝

邓志宏家枯梅产芝大小凡六予为名轩作赞志宏因分其三以遗予赋诗以答其意

子家积庆芝自生紫云为叶金为茎世间美瑞子不有分以遗我鸿毛轻煌煌秀色照轩檻犹带雨露凄芳馨当留几案永为好他日煮食驱三彭

读四家诗选四首【并序】

介甫选四家之诗第其质文以为先後之序予谓子美诗閎深典丽集诸家之大成永叔诗温润藻艳有廊庙富贵之气退之诗雄厚雅健毅然不可屈太白诗豪迈清逸飘然有凌云之志皆诗杰也其先後固自有次第诵其诗者可以想见其为人乃知心声之发言志咏情得於自然不可勉强到也因各赋诗一篇以见意云

子美

杜陵老布衣饥走半天下作诗千万篇一一干教化是时唐室卑四海事戎马爱君忧国心愤发几悲咤孤忠无与施但以佳句写风骚到屈宋丽则凌鲍谢笔端笼万物天地入陶冶岂徒号诗史诚足继风雅使居孔氏门宁复称赐也残膏与賸馥沾足沾丐者呜呼诗人师万世谁为亚

永叔

庐陵间世才妙手归大匠文章振古风独立无与两诗篇尤藻丽句法含万象平夷谢雕镌醇厚如醞釀温温廊庙姿不作穷愁相平生蹈难危利口困谗谤终焉自光明学者共师仰每诗必言归耕钓箕颍上但欲风波息岂是事高尚收身及未老六一聊隐放九原如可作非公复谁向

退之

昌黎文章伯乃是圣人耦传道自孟轲渊源极师友雄词障百川伟论挂衆口余事付诗篇雅健古无有尤工用险韵妥贴等妍丑毅然倔强姿挥此摩天手立朝着大节去作潮阳守驱扫云雾开约束蛟鳄走位虽不称德妙誉垂不朽譬独观泰山羣岭皆培塿又如衆星中错落仰北斗籍湜何足云齐名岂其柳

太白

谪仙乃天人薄游人间世词章号俊逸迈往有英气明皇重其名召见如绮季万乘尚僚友公卿何介蒂脱靴使将军故自非因醉乞身归旧隐来去同一戏沈吟紫芝歌缅邈青霞志笑着宫锦袍江山聊傲睨肯从永王璘此事不须洗垂天赋大鹏端为真隐子神游八极表捉月初不死

夜坐观书

铜漏丁丁杂雨声夜凉兀坐已三更十年奔走成何事依旧韦编对短檠

读李长吉诗

长吉工乐府字字皆雕镂骑驴适野外五藏应为愁得句乃足成还有理致不呕心古锦囊絶笔白玉楼遗篇止如此叹息空搔头

读孟郊诗

我读东野诗因知东野心穷愁不出门戚戚较古今肠饥复号寒冻折西床琴寒苦吟亦苦天光为沈阴退之乃诗豪法度严已森雄健日千里光铍长万寻乃独喜东野譬犹冠待簪韩豪如春风百卉开芳林郊穷如秋露候虫寒自吟韩如镞金石中作韶濩音郊如击土鼓淡薄意亦深学韩如可乐学郊愁日侵因歌遂成谣聊以为诗箴

足成梦中

五月十六日夜梦中得两句云谁信曹谿一滴水流归法海作全潮既觉因足成一絶

本来佛法无多子正觉菩提弹指超谁信曹谿一滴水流归法海作全潮

纸笔墨尽戏成

沙阳地僻纸笔墨皆不佳予远来不能多携至是皆尽独一砚如故因戏成此诗

我生飘泊苦西东四子相逐半世中越楮如云随散灭绦玄终日困磨礲秃怜毛穎频遭斥静

爱陶泓解困穷一笑寓轩无所有本来文字相皆空

梅雨

小麦青青梅正黄连山雾雨湿溪乡轻丝嫋嫋摇空界重滴涓涓响暮廊结集郁蒸来海峤驱排愁恨到禅房寓轩居士心如铁默坐惟闻茉莉香

初见荷花

雨过芙蕖满曲塘端疑翠盖拥新粧风翻圆碧田田叶露浥深红苒苒香根出淤泥成妙净气侵虚阁愈清凉开花不待秋风起景物依然类浙乡

志宏以家所生新芝遗予并以诗来次韵报之

紫芝多产白玉峯服食益寿增明聪人间采茹未易得怅望古曲来悲风却知远谪见奇物子家端是庆所鍾煌煌三秀岂难并玉干云叶方成丛嘉祥美瑞不自惜掇以遗我诚由中甘芳胜菌滑胜乳能杀三尸驱九虫童顔了视驻可久堕髮落齿生应重嗟予迂疎与世濶得食此物谁之功商山傥可追四皓淮南安用寻八公骖鸾控鹤吾未暇千里白云聊与同【梁肃四皓赞云商山紫芝白云千里】

梁谿集卷九

卷十

钦定四库全书

梁谿集卷十 宋 李纲 撰诗六【在沙阳作五十五首】

华岳图 衡岳图

与邑官会凝翠阁 偶题二首

寄吴元中给事 寄顾子美提举

絶句 次韵罗修撰古风罗修撰宠示龙兴老碑刻

五月三日夜坐达旦谩成

季明送南中花木 苦热行

次韵志宏戏兴宗耳疾之作

夜坐闻笛 燕凝翠阁

会凝翠阁游泛碧斋 十六日泛舟

七峯七首【并序】 太史溪

次韵志宏泛碧斋会连饮三爵爵

次韵志宏见示二首 次韵湖阴曲【温庭筠词附】 次韵东坡四时词四首

将游栢榈二首 荔枝词集句

畴老见示荔枝絶句次韵

再次耳聋诗 尝新橄?二絶句种荔枝核有感 松架敞以新枝易之

偶作 晚虹

白鹭 以蜜渍荔枝寄远

石轮鱼 次韵丹霞见寄古风次韵丹霞录示罗畴老唱和诗四首

寄题丹霞宴坐轩 次韵江滋秀才见寄

畴老修撰所藏华岳图

往年跨马观羌戎道历太华西临雍伟哉造化巧凝结元气孕此金芙蓉平原陡起三万仞峻屏却略罗秋空巍然雄尊镇西极衆山班列如朝宗天池潏灏喷山顶泻作瀑布飞长虹亭亭僊掌摩碧落晓日照耀五指红巨灵鼯肩运神力导河擘华留其踪烟寒风远张超谷【音欲】霞駮雾开毛女峯希夷故隐今尚在白云依旧时东封回头一别二十载不意见之图画中生绡六幅挂清昼隐耳闻松风山中草木旧相识恍如梦到云台宫神游絶巘窥玉井欲取莲藕根株通好奇何必似韩子悬崖侧足悲途穷从公传此岳真相永结清好无时终

右华岳

五岳分奠如循环作镇南服惟衡山炎方荒絶亘沧海天付雄柄司神奸祝融腾掷倚霄汉羣峯迢迢犹堂坛赞襄一气泄云雨蟠千里来荆蛮屹然天地物最钜造化凝结良艰难恭闻兹岳魏夫人羽驾白日游山樊翛翛云气变异色笙竽声杂环佩珊神仙恍惚未易测落花流水空潺潺退之倔强古亦少故取窜谪窥孱颜精神默祷若有应驱扫氛翳开烟鬟乃知正直神所与露奇呈巧初不慳嗟予平生好山水欲以两足穷跻攀恨兹羈束未能往幽覲眇然图画间何当身逐鴈同到已觉心与云俱闲轩辕弥明傥未死相与游戏超尘寰

右衡岳

与邑官会凝翠阁

屹然高阁虚且通溪山增秀来薰风皆云闽境似此少岂但为最沙阳中栋楹显敞制度巧饰以黝白非青红七峯倒景蘸层碧十里平津流向东连山松桧郁葱蒨一溪烟雨寒冥蒙沈沈月彩照清夜漠漠云影摇苍穹眼光到处色皆翠凝结至今劳化工几年落寞顾眄地拈出始知观覧雄开筵置酒共临赏正暑景物生秋容画船笛吹助清咽津岸击鼓声逢逢世间万事非偶尔成此一段传无穷我归三子子归我毕竟假合谁之功人生会合自可乐且须吸尽玻璃鍾他时追忆如梦寐一笑胜游回首空

偶题二首

金僊实语教观空老氏微言戒知足生前能着几两屐安用胡椒八百斛此身犹自是蘧庐身外何须宝金玉一衣一食便有余从此梁谿须窒欲

又

退之呵佛乃知佛王莽崇儒岂信儒救弊自须烦诋毁即真安用假诗书

寄吴元中给事

千里同风一念间琳宫筦库等为闲高怀自遂全三乐懵学于今见一斑顾我望云惟陟岵
公戏彩日承颜何时恩许归终养因得扁舟事往还

寄顾子美提举

闻说年来亦失官高怀应作等闲看悦来本自非吾有既往何须更返观问舍梁谿欣共里寄
声闽岭慰南冠请公学取安心法一点安时在处安

絕句

断云飞雨过溪来檐溜萧萧泻暮堦一饷清凉驱热恼可怜襟抱向谁开

次韵罗修撰古风

某比以衡华二岳图归之书府因赋诗二篇以见意伏承宫使修撰宠示古风一首调高旨深
讽味之余不胜叹服谨次严韵拜呈伏幸笑覽

衡岳临清湘欲往吾无航侧身长太息心逐鴈南翔洪河擘太华欲往吾无马何当御风游挥
手与世谢公家藏二图尤物伴闲暇那知造化工寓此粉墨假一见慰我心试使画工写峥嵘
峻极姿惨澹生笔下旧游得窥寻真赏寄持把轻云出层峯飞瀑落高罅川原蔼林莽山崦露
台榭幽讨穷双眸驻立劳两髀图成挂虚堂秋色忽改夏清风扫凉朝明月吹深夜恍然疑断
取无乃资幻化作诗聊谢公更辱报章洒清新鄙元白风流追屈贾气象岳争雄讽玩手忘舍
观图更得诗端如饱脍炙什袭藏篋中光鋀照林野

罗修撰宠示龙兴老碑刻

闻龙兴老道价旧矣宫使修撰宠示碑刻且示龙兴以未曾相见故托送来殊不知已相见了
也因成一颂拜呈幸因使人达之

龙兴道与右文亲眼照沙阳肯许人师唱宗风非鼓?公谈实相托冠巾已曾见了何须再特地
拈来却未真公案分明在碑刻不烦师子更频呻【碑有公所作寄龙兴冠笏颂二首】

五月三日夜坐达旦谩成

凉风振野星河翻煌煌啓明夜将阑孤灯照我不成寝兀坐更将图史繙蠹穿编简眼昏瞀雕

琢肺肾声嘶酸胡为疲极浪自苦中有至乐难为言窥寻古意偶有得何翅九奏闻钧天拨书就枕还自笑聊此游戏终吾年

季明送南中花木

悟道方知色即空乐全深得种花功愿从真隐师为圃敢意芳根与乐丛陶令欲归三径老海神更借一帆风梁谿异日凭栏处把酒看花定忆公

苦热行

南方苦暑殊中州金遇火伏相拘囚飞鸢跼跼草木愁疑在鑪冶遭蒸煇六龙中天停厥輶火云突兀烧高丘炎风如焚汗翻油祝融嘘呵不肯休赤脚踏水邈难求返视絺綌犹狐裘行人病喝喘车牛虽处广厦非所麻我欲登彼白玉楼侧身西望心悠悠何当万里来清秋其帝少昊神蓐收飒然风露洗我忧凉生暑退火西流四时代谢如环周及兹又作徂年谋人生寒暑为寇讎何异疟疔脂髓瘳有力负走藏壑舟朱颜绿髮安可留以静胜躁聊优游何必远期汗漫游

次韵志宏戏兴宗耳疾之作

有病自当医无垢何须洗六解一亦亡动容皆中礼谛观新卷叶成此清浄耳悟道得圆通教体真在此虚含十方界遐迩初无里铿然助发机妙响非外充天人种种声和会归一已奈何物蔽之问药安可止通以智慧刀濯以功德水是病速须除慎勿听邓子

夜坐闻?

栴栴银云点太清一天风露月华明数声何处吹横?引起离家去国情

同罗畴老邓季明燕凝翠阁泛碧斋

法界惟心在处安胜游须信得时难云峯远并山峯碧天影深摇溪影寒去国不知流落恨亲仁且尽笑谈欢夜凉风露生舟楫皓月遥升白玉盘

六月十八日同陈兴宗邓成彦志宏早会凝翠阁晚游泛碧斋

高阁凝虚翠虚斋泛碧川七峯连秀色万户鎖晴烟风物悲游子登临集衆贤伊蒲修净供香物寮芳筵嗜酒陶元亮狂吟白乐天嫩菱披紫角新荔擘红圆文字真清饮溪山结胜缘画桥横蟠螭绣岭卧蜿蜒落日生气霭移舟信泝沿星河光耿耿风露气??山吐三更月人游半夜船乱萤行熠燿宿鹭立聯拳尽兴忘归櫂衔盃约倒莲乘槎疑犯汉御气欲登僊但有诗千首何妨谪九年深慙二三子陪我亦萧然

十六日泛舟

小雨破残暑移舟佳致多烟岚远增翠云水暮相和散绮霞依日摇金月委波胜游非易得不
饮欲如何

七峯诗序

昔年叔子爱岷山李太白目郎官湖而湖山之名垂於无穷微二子则峻峯清流湮灭而无闻
矣七闽於天下为远地而沙阳尤僻虽佳山水人罕知之予来此爱其溪流平缓清彻而濒溪
七峯 峯聯絡竹树郁然如屏障间前此未尝有名之者予尝莅职太史氏而窃爱是溪也表
兄翁挺适有诗来云梦随太史泛闽溪因目之曰太史溪其最东一峯曰朝阳峯其最西一峯
曰碧云峯朝阳之西一峯最高曰妙高峯妙高之西一峯之下有道士隐居曰真隐峯碧云之
东一峯上有岩桂秋至开花香满城中曰桂华峯桂华之东两峯相属与阁相对曰凝翠东峯
凝翠西峯各赋诗以识之予虽不足以望叔子太白而溪山之胜庶几不愧岷山郎官湖云时
宣和二年六月十九日序

朝阳峯

先得朝阳一段红何年鸣凤集梧桐归舟行到湾环处知是沙溪第一峯

碧云峯

落日衔山隐半轮桑榆残照起游氛佳人怅望何时见万里平凝合碧云

妙高峯

叠嶂层峦枕碧流七峯此地最奇幽登临若会妙高意便识德云真比丘

真隐峯

杳霭青松映白云地灵境寂好栖神结庐占尽溪山景安得超然真隐人

桂华峯

桂华岁岁吐秋风香满溪城十里中恁底士夫多折得移根初自广寒宫

凝翠东峯

两峯凝翠对飞檐缺处青岑出远尖暮雨朝云时点缀何须画栋与珠帘

凝翠西峯

翠峯高阁两相宜独倚阑干注目时休问江山非故国且将爽气慰梁谿

太史溪

平溪绿静见游鱼十里无声若画图但道曾经太史爱不须污染目为愚

次韵志宏泛碧斋会连饮三爵爵

占得溪山作散僊更欣佳客许邀延醉红岂解胜文字举白还能乐圣贤序饮我方追柳子赋
诗子已过刘颠乱云细细无情致不放银蟾上碧天

次韵志宏见示

胡马依风亦北嘶云鸿随候且南飞奏刀久爱庖丁善鼓瑟聊同曾点希举世浑如蚁穴梦何
人解契箭锋机我观法界皆真宅不必吾家始是归

谪从天上堕人寰惟有清风夜欵关皓月一轮窥笔砚白云千里映溪山我因拙误无方治子
以才鸣有意攀须信全齐千驷景未如陋巷一瓢颜

次韵湖阴曲

王敦举兵明帝微行视其营垒由是乐府有湖阴曲而亡其辞温庭筠制词以附之东坡书以
遗秦少游客有出以示予者因效其体次韵和之

祖龙黄须珊瑚鞭铁骢金面青连钱虎髯拔劔欲成梦日压贼营如血鲜海旗风急惊眠起甲
重光摇照湖水苍黄追骑从外归参索妖星阵前死五陵愁碧春凄凄灞川玉马空中嘶羽书
如电入青鎖雪腕如槌摧画鞞白裘天子金煌鉞高临帝座回龙章吴波不动楚山晚花压阑
干春昼长

右温庭筠调

绣鞍玉勒黄金鞭跃马直入无玉钱绕营三匝人不识天风翻动旌旗鲜贼臣昼寝苍黄起梦
里阳乌光照水追风铁骑去非迟真主那从贼中死宝鞭传玩日凄凄行远不闻天马嘶千金
安用试虎口将帅何如思鼓鞞西南大星寒有鉞画衣绣袞垂平章九重宫殿鎖春色岂如万
里秦城长

右和词

次韵东坡四时词四首

玉兰花发惟愁落风卷柳绵穿绣幕绕池烟草碧成茵夹竹露桃红破萼美人半醉软香肌不语凭栏知恨谁莫把春愁自销损且唱樽前金缕衣

深院沉沉清昼永画屏玉枕冰肌冷辘轳惊起宝钗横香篆浮烟帘幕静翠眉不为捧心颦鬓乱粧残约略匀情似杨花无定处可怜金谷堕楼人

梧桐叶脱苔滋绿绮窗寂寂风敲竹笑将红扇扑流萤戏剪碧荷装宝屋深沉玉宇夜长局风露凄凉可一庭步月清霄携手处谁家笛作断肠声

参横叶落阑干角夜气侵人觉衣薄香醪只怕玉樽空残灯旋剔金缸落梦回酒醒听啼鷓起看霜晴日衬霞笑道红梅夜来发临堦自摘一枝花

将游枰桐二首

去沙阳百里有山曰枰桐峻峰清流颇与武夷相似地尤僻远人罕知者予将游焉作是诗以识之

枰桐百里远沙溪水石称为小武夷千古碧潭涵夜月两涯翠巘拂朝霓猿猱饮涧联修臂榎木连云擢老枝天下幽奇多僻远只疑造物恶人知

枰桐闻说自枰桐【邓志宏自号枰桐子】且往观之盍问途我向烟霞已成癖子於水石更能娱古来胜地因人重他日清游载酒俱会把丹青传画取归来与对武夷图

荔枝词集句

开元天子万事足惟惜当年光景促昭阳殿里第一人十幅红绡围夜玉梦中同蹑凤凰翎归作霓裳羽衣曲沉香亭北倚阑干缓歌慢舞凝丝竹回眸一笑百媚生尽日君王看不足崩腾献荔枝百马死山谷一骑红尘妃子笑婕妤传诏才人索绦纱囊里水精丸不是人间香味色渔阳鼙鼓动地来血污游?归不得明眸皓齿今何在金盘玉筋无消息汉主山河锦绣中三十六宫土花碧不见玉颜空死处泪痕血点垂胷臆片段荔枝筐此心炯炯君应识

畴老见示荔枝絶句次韵

炎月南闽丹荔子绦绡微皱裹明珠金盘数颗已堪赏何况莆阳十万株

陈兴宗和示耳聋诗颇佳再次其韵

天公有眸子犹把明河洗况我聪与明听乐而视礼是心有天游神用寄双耳良哉观世音圆通端自此世人竭耳力所听不踰里闻性含虚空物蔽乃为冗区区假药医不若求诸已虚室既生白吉祥自止止潇洒隐圃翁灵台湛如水须识本来人莫认贼为子

尝新橄?二絶句

岂无崖蜜十分甜竞爱清严解变甘堪笑区区弃捐者半途回味始知慙

蠲痼毒药宁便舌逆耳忠言却利行世上但能珍橄?那知言药更甘清

种荔枝核有感

荔子欲传种他年养老饗试将千颗植已喜寸萌高岂耐雪霜苦空慙浇灌劳何殊茂陵客藏核种蟠桃

松架敞以新枝易之

日曛雨濯半飘零旋采虬枝荫广庭风动细香还泛泛露滋新叶更青青虽慙剪伐劳斤斧犹胜烧燃竞爇萤凉夜苍龙尚吟啸坐看明月入重局

偶作

休问梁谿何所为应缘日用且随时朝看藏典聊遮眼夜阅韦编未觉疲独酌飘零一杯酒狂吟敏捷百篇诗困来打睡饥来饭游戏神通谁得知

晚虹

小雨初收杳霭中日华照作美人虹五重绚彩紫层汉数幅轻绡扬远风饮润未应占美恶干阳何必问雌雄桑榆暮色苍然至隐隐犹拖半段红

白鹭

白鹭孤飞映碧峯皎如片雪落轻风徊翔意态虽容与心在清波寸鬣中

以蜜渍荔枝寄远

远谪南闽食荔枝始知图记不予欺欲将千颗封题去无那三朝色味移蜜渍仅能存典则日乾愈更失珍奇欲知妙质为何似甘露明珠绦縠皮

石轮鱼【形如虾蟆生闽溪谷中味尤美】

广寒宫阙夜不鎖蟾蜍飞下清溪涯?沙厥状虽可怪脆美一啻亦莫加颇笑退之嘲蛤蚧还同
子厚甘虾蟆晚凉雨霁小池满两部鼓吹空哇哇

次韵丹霞宗本长老见寄古风

帝居郁沉沉梧桐植朝阳愧将鷲雀翼参彼鹄鸾行含香待黼座秉笔立明光谁知汲黯戇忽
作朱云狂襆被出都门濯纓走沧浪饱闻瑞光岩道席久振芳识高行复苦皎月照严霜醍醐
有妙味薺卜无余香愿闻第一义洗我浩劫茫闭关不肯出未许窥高墙徒将非舌语远寄烦
宣扬秋风动樵水何日思褰裳

次韵丹霞录示罗畴老唱和诗四首

快哉善知识能以种种喻我今亦乐说渐修与顿悟顿如草木芽荑核已完具又如大明镜色
像悉陈露渐如鸡哺雏羽翼劳覆护又如苗成实非一朝夕故邈然孤峯顶邂逅适相遇历历
亲见之非是梦而寤却来共谈说妙契那复選精勤假修习即得无生趣清淨摩尼珠初无尘
垢污圆成一滴水岂殊千里霏妙药须对治【音持】能起膏肓痼欲观皎日轮当去漫天雾
铁轮顶上旋不复有惊怖却火洞燃时自有安身处了兹一大事余外复何顾庭前栢树子古
庙香炉去孤云与独鹤何往不可寓返观生死海便是涅槃路普化示全身达磨携只履证道
坐菩提降魔成露布乃知费千谈不若行一步丹霞真道人愿力极坚固眼从慧中得法乃佛
亲付正马与单枪纵横自驰骛愿见缘未合临风增景慕何以写予怀继此龙津句

右和古风

嘉卉多生佛氏宫一经鼻观便圆通妙香来处非和合岂在根尘吸染中

右和太华庵闻牡丹芍药花香

鳞鬣从容戏碧漪拈槌击拂更无疑闻经听法都休说自是鱼中有导师

右和舫斋观鱼

一缕铜鑪沉水烟庵中晏坐孰为禅灵山法会何曾散莲社高风尚宛然

右和小庵晏坐

题丹霞晏坐轩

白云深处开虚室晏坐非禅亦非律须观任四威仪中皆悉具六波罗密超然处处坐道场善哉步步能踏实我今此义亦妄言请师往问维摩诘

次韵江滋秀才见寄

拙直从知慕古风吾衰不复梦周公心如葵叶虽终日身逐溪流且向东华藏千函游佛界黄粱一枕悟仙翁何当放浪尘埃外回首沧洲兴未穷

梁谿集卷十

<集部,别集类,南宋建炎至德佑,梁谿集>

卷十一

钦定四库全书

梁谿集卷十一 宋 李纲 撰诗七【在沙阳作四十四首】

罗畴老录示和丹霞絶句五首次韵

次韵种果絶句 寄题丹霞雨花轩次韵志宏见示山居二首

七夕 又

戏次志宏获小偷韵 读项羽至垓下事

秋日 次韵李太白感秋

秋暑戏题 七月二十四日泛舟次韵志宏秋晓古风二首

秋雨

读韩偓诗并记有感【韩偓诗附】

又

志宏复示秋意五篇次韵

题寓轩 江月五首

戏次韵玉局眉子砚 次韵虢国夫人夜游图次韵俞祖仁寒翠亭翠字韵

次韵志宏寒翠亭 题陈公叙舫斋

邓成彦以寒字韵长句来次韵荅之

和志宏见示亭字韵 秋虫

中秋望月次玉局翁韵二首

又次韵中秋长句

罗畴老录示和丹霞絶句五首次韵

丹霞只在笑谈中明月清风万里同欲识德云真面目却须行到妙高峯
非佛非心须在我即心即佛亦从渠本来心佛都无有幻化聊将示四衢
扬眉下喝亦皆空此性初无瞽与聋若信见闻非耳目瞽聋却解振宗风
晃耀灵光真有体从横妙用本无踪须弥芥子非虚语事理从来本自融
片云出岫当何在独鹤摩空自识回若会去来无二相丹霞应肯下岩来
次韵种果絶句

分枝擢干倏花开长养初从寸许栽欲识菩提能结果灵根端自个中来

寄题丹霞雨花轩

小轩幽邃敞岩峦密雨飞来更可观瀑布千寻落峯顶喷珠万点散檐端休言幻化成空果且喜炎蒸作昼寒轩内生公常说法天花乱坠响珊珊

次韵志宏见示山居二首

千仞青山一草堂萧然远去利名场夜凉愈觉风月好雨过惟闻松桂香野寺春朝喧鸟雀田家日夕下牛羊因公录示山居作使我归休意转忙

知章本是四明狂珥笔聊依日月光谪宦未从南亩乐傲时自爱北窗凉溪山胜处陪诗社文字空中见法王何必更求难老术得闲身世自舒长

七夕

银河清浅界烟霄欲渡何须乌鹊桥今我去家千里远却怜牛女会今宵

又

云潢斜界耿秋空灵匹相过此夕中璀璨珠星连璧月凄凉玉露坠金风三秋景物随时好万里瓜花习俗同乞巧未能从柳子送穷聊欲效韩公

十三夜有小偷迨晓而获志宏戏以诗来次其韵

夜半偷儿亦可怜乘虚欲负壑中船银盃羽化方搜篋绣被风飘遽返毡妄意室中真有道夺从虎口岂徒然贪夫一笑心为咎举体空能发爱涎

垓下

读项羽传垓下事三复而悲之作歌以附乐府

鸿沟已画天下分汉王未肯空回军诸侯大会壁垓下戈甲耀日如屯云夜闻四面楚歌起天命人心知去已拔山盖世霸图空却叹当时雅不逝帐中美人身姓虞悲歌起饮聊踟蹰数行泪下竟别去仓皇不得同驰驱明眸皓齿为黄土草木含愁照今古依然听曲自低昂岂忆平生离别苦

秋日

人言一叶已知秋万叶凋零愈更愁蝉噪风林朝嘒嘒虫吟露草夜啾啾溪山信美非吾土诗酒多情解客忧极目江乡何处是月华依旧照西楼

次韵和李太白感秋

秋风从西来敲我庭下竹夜凉月窥樽清光如可掬风月岂故人万里慰愁独披衣从之游更欲邀共宿冷然洗我心耿耿安用卜三十八年非庶以不远复俯仰天地间平生皆可覆一醉梦还家黄粱犹未熟

秋暑戏题

少昊行秋尚炽然祝融何事苦侵权欲呼屏翳来清道却恨羲和懒着鞭盐米相仍无日了图书拨置且闲眠个中自有清凉地不在中间及两边

七月二十四日泛舟

秋暑殊未已泛舟成胜游日斜云影乱风迴水光浮鹭起暮山碧蝉吟高木幽销愁图一醉醉眼更多愁

次韵志宏秋晓见示古风二首

庭户晓萧骚寒声起疎苇凄然惊客梦秋色浩如水南方苦炎热羁旅困泥滓及兹风露凉又复悲宋子散策东篱下佳菊有新蘩美人渺何在明月共千里缁尘敝紫貂锦字寄黄耳欲赋秋风辞烟云愁落纸

苦热喜新凉萧萧响黄苇雨余山吐辉沙没溪涨水天高气澄明太清无秽滓冷然欲御风一
访赤城子笑读香霞篇时餐金蛾蘂逝将游蓬瀛弱水三万里咄嗟无羽翰相望徒劳耳不如
且赋诗虵蚓动盈纸

秋雨

飒然风雨作新凉卧听檐声气韵长驱扫炎蒸逐流火招邀秋月到虚堂日边梦断甘飘泊泽
国音稀堕渺茫犹喜北牕灯可近简编为释九回肠

读韩偓诗并记有感

韩偓唐昭宗时为翰林学士承旨颇与国论为崔胤朱全忠所不容谪濮州司马其後复官不
敢入朝挈其族依闽中王审知尝道沙阳寓居天王院者岁余与老僧蕴明相善以诗赠之至
後唐时邑令章僚为之记叙偓始末甚详且述唐末乱离之事颇与唐史合予来沙阳闻之窃
愿一观而其碑因寺中废为有力者取去秘不示人久之始得见其副本感而赋之且录偓诗
卷中传诸好事者云

偶访明公大德赠长句四韵

前翰林学士承旨户部侍郎知制诰韩偓

寸髮如霜袒右肩倚肩筇竹貌怡然悬灯深屋夜深坐移榻向阳斋後眠刮膜且扬三毒谕摄
心徐指二宗禅清凉药分能知味各自胷中有醴泉

诗

唐室昔不竞天网遂陵迟阍竖擅朝政奸雄肆觊窥天子遭迫胁翠盖蒙尘飞矢石集黄屋四
郊皆鼓鼙羣凶虽殄灭国命亦已移韩子司翰苑实被昭宗知忠言虽屡贡颠厦诚难支谪官
旅南土召复不敢归当时白马驿从横卿相尸投之浊流中至今耆旧悲夫子乃幸免祸福良
难期假道寓沙阳空门知所依虽踰二百载犹传赠僧诗邑令真好事作记刊丰碑文辞虽浅
陋事实颇可追读之三叹息吊古情凄沍寄声藏去者擅有将奚为

又

词臣谪去堕天南诗墨从来榜寺檐好事不须收拾去世间遗集有香奩

志宏复示秋意五篇次韵和之

秋风到枕前策策鸣窗苇起看山吐月残夜楼明水皎月与我心清静两无滓玉露滴烟霄飘

然杂桂子姮娥应笑人此离放红蕖乘风游广寒三十亿万里宫阙不胜寒九奏感人耳不如
且世间浩歌书着纸

秋色一夜改白露溥苍苇冠屨变凄清如濯沧浪水慢肤素多汗执热结成滓振衣得新凉俨
若侍君子起观庭中花露叶耿烟蕖景物但可人溪山即吾里浮生驹过隙百年一瞬耳惟有
古圣贤高名在毫纸

秋风振回溪宿鹭起汀苇孤飞一片雪寒影落烟水羽毛可为仪皓洁絶埃滓心迹两翛然邈
若佳公子却栖碧山岑瑶树发琼蕖岂知黄鹄心一举眇千里翔集太液池彼此皆戏耳丹青
虽善画为我拂水纸

秋风入虚堂凄微带烟苇堂中拙居士湛然如止水默坐观是心自觉无纖滓不知读何经但
说舍利子心清闻妙香天花散芳蕖含容河沙界方寸知几里神光常在目妙响不离耳处处
获圆通谁云钻故纸

秋兴殊未极秋溪可杭苇顺流欲东行一观沧溟水洗我万古愁胷中莹无滓又欲归梁谿候
门有稚子携幼酒盈樽泛此东篱蕖躬耕复着书茗饮追甫里听子场屋声入我山林耳文字
惊世人一日传万纸

题寓轩

秋到寓轩殊不恶满庭爽气有余清架松着雨须髯奋盆沼因风鳞甲生葵向日光金盞侧荷
翻露颗玉盘倾焚香默坐无人会自觉诸缘次第轻

江月五首

玉局称杜子美四更山吐月残夜水明楼之句为古今絶唱乃以为韵赋江月五首词旨清丽
殆不可及予尝秋夜登凝翠阁以望七峯乘泛碧斋顺流而东十余里山秀溪寒风清月白恍
如尘外意欣乐之因次其韵虽不足以继前作姑尽一时谿山风物之胜云

一更山吐月金篆繚轻澜清光满四海独向沙阳看桂魄缘空迴云峯醺影寒姮娥谩愁思相
对漏声残二更山吐月风露霭清夜待月泛兰舟停桡碧峯下樽罍兴未穷枕簟凉可藉言携
二三子吊古相与话三更山吐月羈客方独起起游溪上阁胜景乃如此露满七峯松烟笼一
川水奔走尘埃间顾未之知耳四更山吐月夜静月尤明玉梳挂碧落银汉自从横寥沕羣动
息溪中有舟行吾家渺何在极目望江城五更山吐月禅室正清幽星河光破碎钟鼓起高楼
展转不成梦冷落还悲秋五咏继苏子谁为商声讴玉局有眉子石砚歌予来沙阳独携一圆
砚乃眉子石也戏次其韵

美人多恨顰双眉眼波秋水增清奇天然此石巧相似儒生作砚声酸嘶横云惨淡远山碧犹

带深闺画时色金坚玉润月轮圆笑杀世间铜雀渴十年提挈随拙翁相携谪堕溪山中
几净日相对风露夜永灯光红毛颖陈玄用功处髮秃肌销留不住与君长此结幽欢
我自多言子无语

次韵虢国夫人夜游图

金鞍玉勒连钱骢车如流水马如龙遗簪堕珥碎珠翠蜜炬夜入蓬莱宫曲江宫殿春蒲柳
玉盘犀筋传纖手坐中绰约尽天人锦茵云幕清无尘赐名大国动光彩马嵬回首空啼痕
我欲题诗吊千古丧国亡家皆此路嫣然一笑倾人城皓齿明眸真女虎

次韵俞祖仁寒翠亭翠字韵

栖云道中有屋数椽跨涧水松竹森然景物幽甚而芜废不治予命寺僧辟之曰寒翠亭为
作大字榜楹间遂为胜地俞祖仁邓成彦志宏往游以亭名探韵赋诗俞得翠字先以诗来因
次其韵

爱奇走山林蜡屐穷幽閤萧然岩壑趣乃在经行内缅怀谪仙人名湖自张谓至今郎官湖邈
与岷山对我游古兰若殿阁烟霞外眷兹道傍亭胜境久翳昧洗开松竹林寒色霭苍翠戏题
榜间名笔墨聊自恣时方春雨余涧水正横溃泉声落亭前散作珠点碎景物岂殊昔因之不
遐弃佳哉二三子诗酒作文会留连不忍去吟哦薄昏晦我咏诗中言端有亭上味

次韵志宏见示寒翠亭之作

虚亭枕山麓万籁如笙箫佳哉松竹林飒然风露秋我题亭上名过客为少留所嗟结构小未
称山光浮缅怀琅琊亭醉翁昔曾游今我聊复尔一洗胷中愁数子真好事佳句相与搜会当
同胜会及此月如鉤

题陈公叙舫斋

一心寓百骸是身已虚舟寄形天壤间大块日夜浮矧兹数椽屋结构谿山幽假以舫为名谛
观有异不行藏本一体渊止同川流萧然斋中人悟此复何求但闻泉石美景物方清秋安得
造其上一与龟鱼游

邓成彦以寒字韵长句来次韵答之

蓬莱东隔沧溟寛我欲游之恨无翰崆峒西峙冰雪积崛起万仞良难攀不如随寓忻所愜放
逐爱此沙阳山苍松拂云雨溜溜古涧凿石泉潺潺远峯三叠碧玛瑙修竹个个青琅玕烟霞
缥缈巧粧缀极目秀色如可餐就中此亭更幽絶冷然爽气洗我肝命名题字聊一戏坐觉景
物增清寒子为胜游真得侣纖月正挂青云端诗篇雕琢愁肺肾笔力渐濶生波澜当观佳致

本来有拈出便作一倍看百壶何必事狂饮一?自足资幽欢夜乘小艇鼓归櫂平溪十里初不关更须风露稍凄冷相约同自亭中还

和志宏见示亭字韵

今日苦不乐驾言适林垧散策寻远寺披襟坐虚亭云木上窈窕涧泉泄清冷千山自岑寂一目皆葱青嗟我得数子不复叹飘零扫虑味禅悦茹蔬谢荤腥时为亭上游散髮缓我形駉骥行振足倦鸟思归翎何当返梁谿教子名添丁林泉益自得华髮从星星

秋虫

白霜降百草候虫寒自吟不知抱何恨唧唧无停音歔尔惊客梦凄然感离心羈臣肠欲断岂事雍门琴

中秋望月次玉局翁韵二首

明月如玉盘飞上青霄东徘徊斗牛间照我禅室中爽气霭亭户清光透帘栊我虽不解饮敢辞玉樽空举酒对明月起舞聊相从身世两翛然如游广寒宫夜久风露冷草根吟候虫咽咽不能已岂自鸣其穷天涯多雾雨好景诚难逢哦诗不成寝颇类鱼噉喁

皎皎月华白寥寥秋气清念我方远客步月亭中行风露感我心凄然入重扃谁家弄横笛巧作断肠声独酌一壶酒对此千里明人生但自适何必四者并醉眼视万物扰扰如浮萍得丧何须道譬犹阴与晴节义太山重富贵鸿毛轻我心与明月照见万古情

又次韵中秋长句

凉风吹空明月高清光万里见秋毫银云栉栉方解駁河汉掩映如波涛须臾扫尽无多子天影悠悠碧於水冰轮正午久停鞭羣动寂然声不起谛观此月真跳丸山河倒影犹蛇蟠桂华耿耿已澄洁秋气凜凜增清寒前年望月都城汴只恐中霄风雨变一杯相属有情亲侧耳歌楼闻鼓板今年望月沙阳山照我心如铁石坚美人千里共明月遥想闺中只独看空庭步月更幽好白露漙漙湿烟草开编况对古圣贤发愤忘忧不知老男儿本是甘贱贫富贵名传能几人题诗对月到日出锦囊何似麝眉客

梁谿集卷十一

卷十二

钦定四库全书

梁谿集卷十二 宋 李纲 撰诗八【在沙阳作六十六首】

和陶渊明归田园六首【并序】

和渊明饮酒诗二十首【并序】

桃源行【并序】 岩桂长篇

四花四首 从邓季明求菊花

灯花 秋日有感

秋思十首 答邓成彦治病诗再赋岩桂长篇 九日

菊花开日即重阳二首

和杜子美九日蓝田崔氏庄

和渊明采菊东篱下二首

竹牕隔 传画美人戏成

传画忠义图 四皓

高祖 淮南飞蝗渡江入浙九月十四夜月蚀 读刘向传

题李伯时老子出关图

题入定僧持法师画像二首

题富郑公画像 明妃曲

和陶渊明归田园六首【并序】

予家梁谿羸有田园可归方谋筑室惠山下娱意泉石忘怀世味谪官羈束未获遂心因读陶

渊明归田园诗嘉其辞旨平淡高远次韵和之以寓意焉

我家梁谿傍门对九龙山【惠山一名九龙山】山中有幽趣游息可忘年陆子泉最甘次之即龙渊【惠山有陆子及龙渊二泉】余波作梁谿可溉万顷田公垂读书堂古屋尚数间【惠山有李绅读书堂】我欲隐山下诛茅占其前疏泉凿池沼植竹来云烟纵目望震泽策杖登山巅神游八极表心迹两超然更结莲社侣远追竹林贤

秋风动梁谿何日理归鞅放逐正拘囚寤寐劳梦想新诗聊慰今旧事那追往缅怀故山居杞菊苗应长挂冠神武门便欲学疏广躬耕南亩云实报无卤莽

落叶不可数枝间绿将稀节物一如此感叹何时归庭闱眇千里篋藏老莱衣从兹就闲旷勿使吾心违寂灭乃可乐纷华何足娱百年会有尽富贵同邱墟不如早抽身卜此山林居手植松与桂青青三万株幅巾坐其下萧散谁如吾衣食麤饱暖身在即有余归依金仙氏妙契端不虚借问名利者还有此乐无

膝横五弦琴试鼓南风曲寄傲北牕下便觉此生足开怀酒一壶寓意棊一局既使风扫门还将月为烛贫者无置锥富者连阡陌嗟予亦何幸伏腊麤能适但使岁事丰便足给朝夕人生几何时倏如驹过隙惟当适我心安能供物役着书聊寄怀底之或可绩吾身虽不遇吾言期有益

次韵和渊明饮酒诗二十首【并序】

予少时絶不能饮既壮从宦四方稍稍习之谪官沙阳郡守间以酒饷予以燕宾客或悠然独酌数杯径醉颇得古人游醉乡意因和渊明饮酒诗二十篇千古相望庶无愧云

是心本纯白利害俶扰之陶然到醉乡还此未扰时古人重酒德妙意端在兹嗟予数杯量径醉不复疑既得醉中趣安用杯常持

醉中忘万物一视渊与山坠车神不惊庄周非寓言是乡岂华胥逸乐不记年谁能造其域勿为薄俗传世俗愈浇薄惟酒陶真情如何遯世士更以酒自名嗟我方远谪慷慨念平生酌此一壶酒宠辱那复惊醉中露天机往往以诗鸣

骏足有远步逸翮无卑飞羈縻因罗网惨澹终年悲得酒且欢喜醉乡真所依路稳良易到时可忘归不复梦周公甚矣吾其衰惟当饮醇酎此志慎勿违

独酌有真趣何须歌管喧既醉谢羈束不知冠屨偏扶挟烦侍女颓然倾玉山方游无何乡命驾殊未还醒来念前乐欲辩诚难言

异论相矛盾儒墨竟谁是仲尼虽大圣宁免叔孙毁得酒当痛饮忘形相汝尔采芝白云中愿

学园与绮风露飒秋色东篱菊有英泛此忘忧物寬我羈旅情故人饷佳醞樽空还自倾云外
鸿雁度堂中蟋蟀鸣忽忽岁将暮聊复乐此生

我本田野人萧然岩壑姿麋鹿喜丰草鷓鴣安一枝误学霸王略肯吐陈平奇世故乃如此拙
谋何所为宾至且饮酒吾身岂长羈

嘉葩含团香气至辄自开置之白玉堂可慰君子怀少有高世心壮年此志乖君门植梧桐参
彼鸾凤栖谋身一何拙墮此百尺泥却笑东方生取容事诙谐

四方有定位醉中初不迷立志既尔尔岂复中道回珥笔螭殿坳谪官鲸海隅庭闱在千里山
川阻修途梦中欣得还亦复劳驰驱觉後谋一醉三杯即有余何当听从便返我梁谿居

三径渊明居一区子云宅吾生诚易足处静期息迹负郭千亩田种秫当八百酿为瓮盎春悠
然举大白於世复何求安用长太息

饮酒资红裊其乐未为至欢然文字饮兴逸不知醉放怀谿山间雅饮亦其次裸裎岂是达温
克乃足贵醉乡谁不到未必能知味

樽俎为舟车游此醉乡境但愿未死前常醉不用醒醒来寓翰墨万事劳总领譬犹锥处囊脱
出终露颡虎豹岂犬羊文章自彪炳

吾年行四十意气非少时世故茫不识惟好古人词篇章自娱悦适意良在兹此外付之拙直
道不复疑黄卷千万言圣贤岂吾欺世事皆分定饮酒姑安之

萌心皆拙谋游世用直道乐天吾何忧发愤不知老惟有杯中物可以慰枯槁三杯颊生红便
觉顔色好麴生端可友金玉非吾宝醉中亦慨然志节还表表

少年学神仙日诵琼笈经交梨与火枣丹鼎期必成呼吸存夜气宴坐至五更岂知糟麴中醉
乡即黄庭玉池瀦生肥天鼓常自鸣酩酊欲仙去超然离世情

霜林陨寒叶淅淅随西风拙翁感节物颓然坐轩中独酌一樽酒不知穷与通栖鸟忽惊去子
岂曾伤弓人以谪而穷我因谪而得博考圣贤书独立愈不惑世道迭污隆时命有通塞驾言
游醉乡疑是华胥国漠然无是非於此可以默

结髮观国光壮年跻膺仕怀恩重泰山欲报轻小已幸立不讳朝緘默诚可耻晨趋玉陛前暮
谪闽山里飘零若萍梗此志谁复纪行藏岂异途川流与渊止不如饮美酒世态何足恃

举世人事伪惟酒存天真饮多不如少饮醺不如醇借问何以然每醉意每新笑指黄金罍是
中可逃秦糠粃铸尧舜万世同埃尘二豪侍坐侧议论徒殷懃我读古人书独与渊明亲北牕

傲羲皇桃源将问津膝横无弦琴头着漉酒巾我醉君且去为已非为人

桃源行【并序】

桃源之事世传以为神仙非也以渊明之记考之特秦人避世者子孙相传自成一区遂与世絕耳今闽中深山穷谷人迹所不到往往有民居田园水竹鸡犬之音相闻礼俗淳古虽斑白未尝识官府者此与桃源何以异感其事作诗以见其意

武陵溪水流潺潺渔舟鼓枻迷泝沿谿穷路尽恍何处桃花烂漫蒸川原花间邑屋自连接云外鸡犬声相喧衣裳不同俎豆古见客惊怪争来前杀鸡为黍持劝客借问世上今何年自从秦乱避徭役子孙居此因蝉聯不知汉祖以劒起况复魏晋称戈鋌殷懃留客不肯住落花流水空依然渊明作记真好事诗人粉饰言神仙我观闽境多如此峻谿絶岭难攀缘其间往往有居者自富水竹饶田园耄倪不复识官府岂憚黠吏催租钱养生送死良自得终岁饱食仍安眠何须更论神仙事只此便是桃花源

隐圃岩桂盛开兴宗屡以为贡赋长篇以谢其意并简志宏

沙阳岩桂虽云多不若隐圃为骈罗结根盘据极高大荫庭一亩才数科青葱翠盖俯轩檻夭矫苍虬交枝柯森森密叶碧如玉扑扑细蘂黄於鹅风传馥馥尚酷烈月散清影长婆娑幽香岂止到十里妙质端恐移金波不随春景鬪妍媚直与秋色争清和芳鲜似欲伴佳菊冷落更觉怜衰荷幽人爱此自培植林下不知双鬓皤为予折赠诚有意欲遣鼻观通禅那吾衰万事付之懒不饮柰此秋光何径须造诣谋一醉莫待花落沾庭莎妙香吸引入肺腑吐作佳句同吟哦

四花四首

【寓轩秋深芙蓉金灯红蕉鸡冠四种花开有足观者各成一絶纪之】

芙蓉

浥露披风浩莫收嫣然秀色照清秋佳人日暮来何处翠袖红粧相对愁

金灯

叶卷须虬朶朶圆化工如解刻雕然金灯玉柱归天上何事生来小檻前【浙中近岁多贡玉柱金灯】

红蕉

但见风来摇翠尾那知露下濯红英色空须信元同体谁把丹青与染成

鸡冠

花蘂成冠巧学鸡刻雕谁谓染胭脂晓来得雨犹鲜好却似昂然欲鬪时

从邓季明求菊花

乐全治幽圃种花如种田秋来菊有花亦复争芳妍璀璨碧玉蕾散作黄金钱风静香自远露寒色争鲜乃知万物性皆欲全其天九日忽已近渊明思悠然愿移东篱下植此西轩前我有一壶酒泛之可延年不嫌盘飧薄同作饮中仙

灯花

禅室方清夜寒灯自结花那知人有喜且慰客思家琐碎星毖密红圆玉粒斜为传千里信安稳到天涯

秋日有感

秋水澹澄澈秋山郁嵒峩我游谿山亭山空水增波感此物华暮风林摇落多惟有青青松独立不改柯乔然傲霜霰岁晏将如何

秋思十首

朝来秋色高西山有爽气开轩远相望自得静中意那知宋玉悲肯洒杨朱泪逍遥天地间俯仰可无愧夜永秋气凉泠然入牕牖照眼一编书开怀一壶酒念身幸何恨齿髮犹未朽富贵如浮云於我亦何有南方秋节晚九月始凄清草木忽摇落坐使客心惊橐籥无暂息机缄殊不停未能超物外慷慨念平生露下秋草衰蒹葭亦苍苍森然岩中桂十里飘天香深林静杳冥无人自芬芳采掇满禅室闲中气味长秋云澹无依晶晶映寒日卷舒谁使之聚散在倏忽出岫本无心行空宁有质功成归何方妙用藏於密秋风晚萧索凄然遂成林百谷欲成实见此造物心清凉入户牖天光为沈阴禅房有羈客抱膝正长吟秋风动禾黍泛泛凄芳馨散策步田野欣此百谷成林下父老醉云间鸡犬声丰年诚可乐安得遂吾生秋月照我心清光柰愁何回薄万古恨月愁应夏多独饮不成醉遡月空长歌安得一丸药高奔伴姮娥古后有明训霜降休百工草木日摇落蟋蟀鸣堂中岂不感时节念此岁复穷劳生真一梦飘泊随西东百卉秋具腓先陨惟梧桐岂无贞洁者独立青霜中艳艳篱下菊青青岭头松与君为德友相好永无穷邓成彦病以诗来问所以治病者作诗答之

四大假合初不真筋脉纏络相依因【阙】类芭蕉须叟变灭如浮云风寒暑湿起衆疾痛楚展转劳吟呻医工对治巧用药分别佐使甘酸辛须知病者谁受病其中必有不病人於斯荐

取自调伏沈痾消散如埃尘本来面目只一体安用更分精与神【来诗有精之又精神之又神之语】欲识其中不病者即是毗卢清净身

兴宗志宏见和岩桂长篇再赋前韵奉呈

月中有桂光更多扶疎一轮枝干罗天风飘下广寒子岂与凡种同其科四时不改碧玉叶满庭自擢青铜柯森然衆木共培植无异野鹤羣鸡鹅秋来隐圃风露冷喷花看蕊尤婆娑圃中自有隐君子心与世远恬无波对花度此九秋色不以物外伤天和西隣栟榈更好古妙年欲制芰与荷连墙请谒不知倦宜尔鬢髮忘其皤天生逸才当有用委弃寂寞理则那吾衰尚有惜花意零落奈此馨香何却思梁谿有小圃只恐松竹荒寒莎未能归去老三径且把诗句从公哦

九日

常年九日必题诗况此飘零海一涯黄菊未开青蓓蕾白醪聊吸碧玻璃登山但极孤云目整?还羞短髮篋弟妹奉亲倾寿斝茱萸偏插定吾思

菊花开日即重阳二首

玉局有云南方气候不常菊花开时即重阳凉天佳月即中秋不须以日月断也予来沙阳中秋前数夕月色皎然既望乃雨九日既近菊蕊如珠殊无开意乃知玉局之言诚有理也用其语赋诗二首

南方气候殊佳月即中秋昨者月既望萧萧风雨愁安得一轮玉清光满溪楼酌酒自起舞与之相献酬南方气候殊有菊即重阳九日今已近青蕊未可尝安得黄金花泛此白玉觴会当烂漫开为插满头香

次韵杜子美九日蓝田崔氏庄

远谪须知怀抱寛节逢九日亦追欢手按青蕊看浮醖蜡剪黄花戏插冠淅淅斜风飞败叶萧萧细雨作轻寒天涯只是思亲切更把家书再四看

和陶渊明采菊东篱下二首

九日但孤坐悄然无世喧菊花殊未开始知气候偏开轩寓远目相对惟青山昏鷗已接翅独鹤何时还且尽杯中物此外无足言

小雨湿丛菊何当喷金英嚼蕊亦可人萧然慰我情羁旅念家远浊酒还独倾云表雁初过草根虫自鸣岁晏将如何一醉豁平生

寓轩用竹为牕隔以御西风戏成小诗纪其事示志宏

昔我自帝所远谪来沙阳由春以涉夏及此秋气凉节物日凄紧白露结为霜行当入室处聊复葺我堂伐竹制牕牖朴素无青黄西风屏寒色短日来孤光草木已零落但闻菊蘼香超然适燕处便足傲羲皇释氏戒恋着一宿寄枯桑今日必葺於道无乃荒彼以着故戒无着何所妨譬犹梦中境离着可两忘傥能达此理随寓皆道场

传画美人戏成

美人顔色娇如花鬢髮光翳朝阳顰玉钗斜插翠眉蹙岂亦有恨来天涯画工善画无穷意故把双眸翳秋水丹青幻出亦动人况复嫣然能啓齿年来居士心如灰草户金鎚击不开纵教天女来相试虚烦云雨下阳台

传画忠义图

君臣以道合言出心莫逆膏泽下於民美化施无极中世此道衰言如水投石义士以死争直諫或有益折檻制留今断鞅事存昔当车血污轮伏蒲涕沾席昭然贯日诚屹尔回天力谁将丹青手图此忠义迹传之置坐隅能使懦夫激斯人不复见壮哉古遗直

四皓

皓髮龐眉四老翁商山采尽紫芝丛安刘毕竟成何事空堕留侯巧计中

高祖

落魄刘郎仗衆谋无心将将却成优谁言大度能容物旧怨还封羹颉侯

得家信报淮南飞蝗渡江入浙岁事殊可忧感而赋诗

闻说飞蝗起自淮势如风雨渡江来我家岁事何须虑只恐人言不是灾

九月十四夜月蚀

碧落遥升白玉盆云中夜黯然昏初疑半被微云掩浸恐全无巨吻吞惨淡乍看蟾魄出扶疎更喜桂华存妖蜚磔死犹余罪此外羣星尽可原

读刘向传

书观书传夜观星感愤陈辞出至诚梓柱指明王氏切优柔不断岂能行

题李伯时画老子出关图

请说常无衆妙门当时关尹意何勤青牛西去连沙漠紫气东来见瑞氛妙法不离三十辐至言都在五千文世人不解宗慈俭只欲长生蹶白云

题入定僧持法师画像

崇宁初蜀中得入定僧白云惠持法师庐山记惠远法师弟惠持游蜀而终盖不知其乃入定也予见其像於罗畴老修撰家因传之且为赋诗

形若龙蛇千岁蛰神如日月四时新岂知鸡足山中客【迦叶入定於鸡足山以待弥勒下生】元属莲华社里人岭上祖师提只履烟中普化露全身拘拘守定乾皮袋毕竟如何始是真

题富郑公画像

天骄自昔难羈縻凭陵中夏侵北垂秦城万里堑山谷汉女远嫁为阏氏赫然武帝事征伐天下骚动士马疲古来制御无上策本朝镇抚诚得宜祖宗守边有良将胡骑远遯不敢窥澶渊之役起仓卒当时衆议何其危莱公庭争乃亲讨貔虎百万从六飞弩机暗发虏酋殒震怖屈膝祈完归欢盟从此到今日生灵休息诚赖之中间桀骜邀岁赐悬河之辩亦莫支笃生郑公为民社一言剖决遂不疑莱郑之功实终始配入太庙铭鼎彝我生後公不及识再拜图像涕泗洩安得如公之人在廊庙坐使德泽渐烝黎

明妃曲

昭君自恃顔如花肯赂画史丹青加十年望幸不得见一日远嫁来天涯辞宫脉脉洒红泪出塞漠漠惊黄沙宁辞玉质配夷虏但恨拙谋羞汉家穹庐腥羶厌酥酪曲调幽怨传琵琶汉宫美女不知数骨委黄土纷如麻当时失意虽可恨犹得千古诗人夸

梁谿集卷十二

<集部,别集类,南宋建炎至德佑,梁谿集>

卷十三

钦定四库全书

梁谿集卷十三 宋 李纲 撰诗九【在沙阳及还至崇安作四十八首】

登凝翠阁观月

乘泛碧斋分韵得泛字

志宏得碧字以诗来次其韵

兴宗得斋字以诗来次其韵

凝翠晚望五絶 秋意二首

和唐人张为秋醉歌 读陆龟蒙散人歌

岩桂堕蘂 游栖云寺

自西津乘泛碧斋归邑小雨

御笔许牵复有感 画荔枝图

丛菊数日来颇有开意戏题

得了翁书寄石芝

和归去来集字十首【并序】

送罗惇诗赴举

从人於柳木得芝

将去沙阳留别邓季明诸公

叙别畴老

自沙阳乘泛碧斋至洛阳口

留题双溪阁书呈南劔守谢少卿

黄道夫约游无名庵 奉酬陈之元教授见赠谢德夫约游开平寺

谢守送别至黯淡寺

长滩驿次韵陆惇礼留题二絶

题黄亭驿 武夷行【并序】

泛游仙溪 别武夷途中偶成

寄题观云轩 崇安令送示武夷图

九月十五日夜同陈兴宗邓志宏登凝翠阁观月

溪阁临虚面势寬凉天佳月共追欢渔舟忽动水光碎桂魄未高山影寒色染林峦烟漠漠气侵笑语露漫漫须知此景人间少更泛兰桨远处看

是夜复乘泛碧斋至北溪口观新桥与兴宗志宏分题予得泛字

秋高气倍清夜静舟初泛露华浩如洗月色寒可鉴林峦与邑屋左右入轩檻晶荧星影摇
峯山光蘸风微烟冪冪溪远波湛湛端疑客乘槎坐使云河犯观梁且停桡恋月愁系缆景幽
费摹写思妙造古淡吾方久於此胜赏岂云慙愿同二三子险韵时得探

志宏得碧字以诗来次其韵

明月照清溪影落千寻碧轻风皱微澜荡漾摇金色相携理桂楫及此万籁寂天空露气寒栖
鸟正缩瑟何人起秋思数弄月中笛坐使迁客情凄然感去国清游得英俊胜赏饱泉石岂殊
在吾家亲戚欵於侧赋诗各言怀险韵对勅敌归来气未衰开匣看三尺

兴宗得斋字以诗来次其韵

佳月霭秋色翛然感予怀言携二三友泛此溪中斋风露生万里屋木凭两涯凄微烟雾合芬
馥天香来恍若度云汉奔月游瑶台灏气集肺腑洒濯无纖埃沉沉夜寥闐回舟兴悠哉澄波
静如练何异浮江淮但恨景物美实难赋咏才斯文当共勉天意属吾侪

凝翠晚望五絶句

白苹红蓼满汀洲淅淅西风古渡头寒日无情又西下清溪不语水东流

桂香泛泛满秋风十里沙溪一望中景物随时慰牢落羁臣那解感飘蓬

日轮隐隐落西山尚有残阳木杪间暮暮朝朝成底事可怜飞鸟自知还

林中轻素起寒烟两两飞鸥傍钓船心在江湖归未得晚来幽独更凄然

白云点破乱山青影落寒谿晚更明谁谓天涯无鴈到𪊑𪊑初听两声

秋意二首

萧萧南浦白云秋枫叶芦花相对愁何必更穷千里目乱山凝碧满溪楼

清霜夜落梧楸树脱叶惊风陨如雨一番扫尽一番新策杖闲将黄叶数

和唐人张为秋醉歌

秋色愈凄紧感此梁谿翁烟水出砂石风霜脱梧桐岁晏无与欢步履携苍筤俯视檻中菊仰瞻峯顶松有酒聊自适旋滴真珠红长鲸吸百川坐使玉樽空念古壮气激怀家归兴浓陶然不知醉如堕烟雾中醉魂眇安往梦渡江水东髣髴生六翮飘忽腾双龙醒来无所见溪冷山重重纱牕透残月瓦枕来疎钟起视夜将阑星河粲玲珑乘风欲轻举骨肉疑都融却思向来醉岂离方寸地长醉不用醒萧然谢名利

读陆龟蒙散人歌三复而悲之赋诗以卒其志

江湖散人气节奇布衣韦带霜鬓垂有田甫里多水潦阖门百指长号饥躬耕粗足输赋税时赴嘉客同襟期西风笠泽起秋色菰蒲初熟鲈鳊肥扁舟乘兴不知晚笔牀茶竈常相随着书丛杂自编録巧怪不择文与诗那能枉道窃爵禄但欲乱世全妻儿胷中岂无佐时略却笑诸郎殊不知当年富贵尽磨灭惟有夫子传於斯三高名配范与李散人虽散元非痴

岩桂再开尤盛汲水养之其香满室堕蘂几案间灿然可爱嗅玩因为赋小诗

桂华十里凌霜空再开愈觉秋光浓幽人赠我不知数芬馥飘满禅房中??风枝堕烟蘂璀璨金英沾案几不须扫去任飘零从使清香在毫纸

游栖云寺

清晓戒徒御出郊为胜游霜林半摇落肃穆天地秋散策陟峻岭凭高瞰清流禅居得兰若迴

觉林泉优露草凄更碧风松郁相繆山空钟磬响地胜池台幽竹色森不改桂香泱泱浮经行岂
莲社景物如虎流水人寂寂归云晚悠悠惜哉光景促妙赏难淹留却步出山径犹回恋山眸
登临兴未尽更理溪中舟

自西津乘泛碧斋归邑小雨

乱山深处翠光浮山寺归来泛彩舟十里峯峦凝翠靄一溪烟雨洒清秋渔灯照水明还暗野
桂飘香散不收只向画中求好景不知身在画中游

是日闻报御笔许牵复有感

闻有佳音自日边羈臣感极却凄然矜愚本自加三宥作赋休云谪九年戯膝但能紆彩服侍
香那复望青毡恩隆天地当何报击壤为厖老一鄮

画荔枝图

南闽荔枝名四方非因谪官那得尝丁香为核玉为叶绛绡为殼冰为瓢炯如明珠出老蚌灿
如艳女披红裳膜凝云母本来薄液贮甘露初不浆剖擎颇讶水晶滑咀嚼但觉琼瑶香贡余
虽幸得一饱无那品目多难详丹青巧为拂绢素数种磊落皆其良牛心最大蚶殼褊虎皮斑
駁龙牙长火山早依炎气熟中元晚待秋风凉色奇更变江家绿味旨尤称十八娘葡萄结实
极繁盛硫黄着子何芬芳若将牡丹与比并好把陈紫同姚黄虽云香味不可画悦目自足垂
虚堂饫餐更得画归去须信远谪元非狂

丛菊数日来颇有开意戏题

爱菊如渊明凭栏惜花晏朝来有开意嫩蘂肥欲绽愿承玉露漙一吐金英粲临风嗅馨香为
尔发三叹得了翁书并寄石芝云其味初淡中苦已而发甘鲜有此味者感而赋诗

海日气射苍崖根石上生枝乾蘚文构梯采掇资好事中有至味难为言岂惟食淡兼攻苦嚼
蜡茹荼多欲吐清甘徐发齿颊间漱以寒泉如饮乳幽人赠我意已深一掬可比千黄金世间
此味知者鲜往往既吐还追寻我欲持之献君子自古至言多逆耳愿於苦处辨忠良若待甘
真晚矣

次韵和归去来集字十首【并序】

予初抵沙阳常和陶渊明归去来辞然窃意归期未可以岁月计也近闻例许牵复真得归矣
偶读玉局翁归去来集字因次其韵简诸弟

少负丘壑志误婴轩冕荣刚肠难隐忍懒性倦将迎学佛欣自得谪官知物轻悠悠势利子千

古见交情壮志已衰落颓然成懦夫编须休虎穴曳尾且龟涂松菊犹可理田园将欲芜亲朋
悦情话浊酒在觞壶轩冕岂足恋田园诚可欢村村自花柳物物寄游观旧事不复忆吾生良
易安南牕审容膝归去学鲋桓闻说诏初下预知归有期趣装行去矣俟命且安之出处宛如
梦去来惟有诗为传千里信先报棣华知旷荡推新泽迂疎念昔非休为贾生赋且治老莱衣
报国抚长剑怀亲歌式微凭高望吴越千里白云飞寤寐在亲所得归欣载奔彩衣犹在笥素
髮已垂门遣兴诗千首忘忧酒一罇归欤理三径松菊故应存归去复归去溪山满眼前公垂
余旧馆鸿渐有甘泉结宇依青嶂开池浸碧天余波到山下更溉万家田薄责思已厚听归初
不留昔来聊坎止今去亦川流图史自可乐亲朋相与游罇中常有酒此外复何求旧隐北山
北结庐犹可寻曾传种松法当遂采芝心有酒且觞客无弦何用琴一生几量屐慎勿废登临
处世若大梦吾生感行休何须缚轩冕且复傲林丘云木千岩秀烟波万壑流忘机齐物我鱼
鸟与君游

送罗惇诗赴举

计偕西去不容迟翬聚还分与愿违丹桂一枝应俯拾青云万里看横飞我方谪宦陪鸠杖子
欲成名戲彩衣努力争先龙虎榜发挥家学慰庭闱

从人於柳木得芝一本面径尺余体圆而欹正类荷叶惜其生於僻远不得与奏牋为赋此诗

草木何为亦发祥灵芝三秀向沙阳成丛已茁枯梅上盈尺还生卧柳傍叶若圆荷方泻露色
如紫椹更飘香惜哉地去长安远不使公卿草贺章

将去沙阳留别邓季明诸公

一载沙阳信有缘寬恩许去却依然碧斋翠阁已如梦明月清风长自妍溪上客舟横一叶篋
中诗卷賸千篇诸公别後应思我茗饮时时到寓轩

畴老修撰见示七峯吟因成七言十韵律诗以叙别

谪堕闽山欵栋閤日亲高义慰平生忘年许结看经社乘兴时参在野旌三径高怀穷水石七
峯佳气入轩楹觴斋谈笑龟鱼惯翠阁吟哦卷轴成方幸游从陪杖屨敢将踪迹叹蓬萍寬恩
宥罪千钧重小艇浮溪一叶轻北阙未应容接武东臯从此遂躬耕寧亲幸愜区区志去德还
深恋恋情般若光中无聚散毗卢海里任从横愿公更展垂天翼拭目鹏抔九万程

自沙阳乘泛碧斋至洛阳口

罪大昔来谪恩寬今许归碧斋还泛泛翠阁已依依箫鼓转山曲旌旗摇夕晖余霞方散乱倦
鸟亦归飞颇悟邯郸梦还寻菜子衣耄倪嗟得去朋友惜相违讵有甘棠爱徒知蓬玉非劳生
成底事归老钓鱼矶

留题双溪阁书呈南劔守谢少卿

华构何年玉斧修规摹宏丽属贤侯治成不废登临乐望远宜穷水石幽千里烟云瞻北阙四时风景冠南州山如蟠踞成龙虎劔有雌雄射斗牛天倚笔峯排玉笋仙留篆石浸银鈎二川俯瞰丁为字万室傍连盛结楼罇俎幸容陪胜赏笙歌更觉助清游朝云暮雨滕王阁明月清风白鹭洲梦草惠连留句法游山安石继风流尚能执笔从公赋却恨归鞍不可留

黄道夫约游南山无名庵谒包法师

碧山盘屈白云凝竹径通幽水石清门对演仙千古在道人何事学无名

奉酬陈之元教授见赠次韵

谪官因得穷林泉陶写聊复资诗篇青岑叠叠山满眼碧波湛湛溪?天南连海峽饶雾雨北望吴越凄风烟感怀触目还得句但可娱戯那敢传譬犹候虫与时鸟自鸣自己真偶然岂知飘落广文耳饰以妙语烦雕镌与公平生未相识一见倾心谁与易沙阳百里阻游从注目寒空暮云碧竭来邂逅慰所思况得新诗飞霹雳我今归去隐梁谿远迹江湖养愚直看公白日上青霄九万扶摇不劳力

谢德夫约游开平寺

出郭山村僻寻真殿阁幽双溪余赏兴五马故来游钟梵含古思林泉销客愁归欤碧云合罗绮满兰舟

谢守送别至黯淡寺

送远劳为黯淡行西风斜日嫋双旌舟如一叶波涛舞滩作半天风雨声修竹拂云青蓊郁圆峯对阁翠峥嵘如公高义今人少行客空余恋德情

长滩驿次韵陆惇礼留题二絶句

文彩飘飏青琐郎朝班同望赭袍光岭云深处观题句使我幡然念帝乡

当年狂直叩龙墀谪堕闽山省旧非须信寛恩若天地才周岁律已容归

题黄亭驿

云山一带碧崔嵬迎我南迁又北回岁龠才周两经历此行端为武夷来

武夷行【并序】

宣和改元之夏予备员左史寓直东省昼寝梦游武夷山未几谪官闽中取道山下果符所梦因作赋一篇古律诗近五十首今冬蒙恩北归复寻旧游泛游仙谿登换骨岩致祀十三真君会食观妙堂因尽录前所作遗观妙法师且别赋一篇以述再游之意目之曰武夷行

忆昨退朝门下省槐影扶疎清昼永琐牕一枕梦仙山觉来毛骨犹清冷谪官道出武夷山风景翛然似梦间碧溪九曲山万叠况值密雪妆烟鬢寬恩今日容归去笑指洞天寻旧路霜晴日暖白云深遥望幔亭天一柱羽人导我游仙谿翠壁苍崖晚更奇浩歌快饮纵回櫂星月耿耿风凄凄晓来换骨岩中看玉润金坚余片片三姝骈立映彤霞二水交流萦素练征鞍欲去更从容仙境灵迹岂易逢他日追思不可到梦魂还过七闽中

泛游仙溪

到闽中而不游武夷山到武夷山而不泛游仙溪皆与不到同予去冬乘小舟抵晞真馆值雪今冬复游乘月而归景物清絕不可名状因赋诗以纪其实书遗观妙法师

去年游仙满溪雪今年游仙一船月武夷已擅天下奇雪月相辉更幽絕前生定在此山中缘熟重游六六峯慚愧真仙借光景恨无道骨与仙风

别武夷途中偶成寄观妙法师

道妙观来物物通武夷仙境幸相逢溪流玉雪三三曲山鑠云霞六六峯去路归鞍方眷恋淡烟疎雨正蒙茸羨师日在神仙窟?首岩峦紫翠重

寄题观妙师阁皂山旧隐观云轩

独构幽轩福地陰飞云对面起青岑但知映日能成色谁信崇朝解作霖冉冉行云宁有迹霏霏出岫本无心道人默坐观舒卷至理应符妙意深

崇安令朱邈公达送示武夷图因成絕句

秀气蜿蜒作武夷岩峦窈窕白云飞再游未尽平生兴六幅生绡画得归

梁谿集卷十三

卷十四

钦定四库全书

梁谿集卷十四 宋 李纲 撰诗十【自分水岭过江南及辛丑岁作七十五首】

自分水岭过江南

铅山约高无咎同游石井

自铅山迂路至吴园 吴园

留题月岩 宿黄藤驿

弋阳道中 望龟峯

鸣山驿次韵蔡君谟续梦作

宿安仁云锦堂 余干

晚行 题安仁寺翠玉亭题仁义驿范文正公所植六松

迂路由江南归二首 童子驿见梅花

偶题 又

题建德县开化寺 题紫岩驿

赠池守张闳道

同天宁聪老游齐山次杜牧之韵

题弄水亭 自池口登舟

江行十首 游五松山观李太白祠堂舟中读书有感 铜陵阻风

题护法寺瑛老默堂

次韵瑛老颂 舟泊散潭三首

春睡二首 夜泊繁昌

试九华朱觐墨 未至芜湖四十里阻风草率执书论方寇事戏成

上元舟中有感 夜坐二首

至芜湖闻贼陷钱塘复为官军所得有感自芜湖江行至采石

乘月泛禁江一夕至金陵

同李似之游蒋山 颂示勤老

次韵奉酬李似之见赠

金陵怀古四首 登锺山谒宝公塔题定林院 题八功德水

题偃秀轩 得家信报避寇海陵

自金陵江行未至长芦阻风

又 过长芦

游长芦寺见衆僧已披剃

自分水岭过江南

行尽闽山万屈盘江南形势陡然寛山平水远望不尽木落草枯霜始寒醉里讴吟聊自适梦中往复本非难谁言春信年年早笑指江梅试折看

铅山约高无咎同游石井

岩洞嵌空凿翠崖一泓云液贮琼瑰幽人须信耽泉石茗饮相招特特来

自铅山迂路至吴园

迂路入江南寒烟鎖翠岚清晨游石井薄暮宿了岩月冷不成梦鸡号还整骖吴园才数舍去去指龙潭

吴园

当时亲迎到吴园屈指重来十七年身世恍然如一梦从今归去老林泉

留题月岩【信州道中】

广寒宫殿寄幽岩忌满非缘玉斧戡皓魄半轮横道左清光千古照江南陰精凝结元无质神化胚胎岂易探好是月华生碧落扶疎桂影远相参

宿黄藤驿【时闻浙东方寇大作】

古驿号黄藤休鞍夜已灯溪寒水清浅山瘦石棱层豪客路方阻岁寒陰始凝开怀惟仗酒独酌醉瞢腾

弋阳道中

南去北来皆岁暮流年冉冉过光陰江南须信风烟好浙右方虞寇盗深云外山深横笔格月中滩响叠琴心卧龙三顾今寥落抱膝空为梁甫吟

望龟峯

饶阳景物犹武夷岩石崛起多瓌奇此峯厥状更诡异举首曳尾如灵龟穹隆曝甲正霜晓蹒跚引气当晴晖故知造化巧凝结欲问所以良难推我疑龙伯钓溟渤六鳌连引背负归中途遗一尚鼉负直欲赴海冠峩巍又疑清江使河伯波涛相失留於斯化为巨石峙千古虽欲钻灼无由施茫茫神怪不可诘但使风景增清辉我来闽岭厌山水见此还复伸双眉颇嗟行役不果到侧身西望生长悲

鸣山驿次韵蔡君谟续梦作

一梦神游紫府天觉来身寄驿亭眠何须怅望吹箫女独跨青鸾入翠烟【君谟诗云白玉楼台第一天琪花风静彩鸾眠谁人得似秦王女吹彻琼箫上紫烟】

宿安仁云锦堂

一宿溪边云锦堂烟村浮动野梅香沙平水澹近江浦天濶山遥多夕阳北陆寒凝风眇眇东吴音断意茫茫片言无补空来往赢得萧条两鬓霜

余干

岁寒迂路过江乡叹息飞蓬堕渺茫云锦洞深烟水远琵琶洲转暮滩长田园归去荒三径金鼓传闻震一方极目东吴何处是断霞轻霭落残阳

晚行

岁杪旅怀恶驱车残照中暮云千里碧落日半轮红掠水起行鴈隔林闻远钟休鞍僧舍閤皓月又东生

题安国寺翠玉亭呈平老【鄱阳】

兰若何年种碧瑜凌霄高节笑楸梧渭川谩说三千亩杜牧宜夸十万夫月舞清陰金影碎风敲幽韵玉音敷烦师长养休斤斧试问江南有此无

题仁义驿岁寒堂范文正公所植六松

江驿森森六本松蜿蜒枝干走虬龙烟滋鳞甲苍顏老云惹须髯美?浓独立雪霜君子操曾因风雨大夫封不栽桃李追时好叹息前贤意可宗

闻浙东方寇大作道路不通迂路由江南以归有感二首

理装适吴会避寇由江滨寧知治安世乃作途穷人风涛岂不险舟楫尚可因失身入畏涂难以理义陈平生笑子美逃乱走踳踳如今翻自笑亦须谋此身此身何足惜上有高年亲骨肉几百口干戈已相邻以我此日心知彼无辜伦安得济川舟载之适通津徙置安乐土不知战鬪尘已矣可奈何愿为太平民

东南久无备盗贼起不虞揭竿与荷锄皆是耕田夫谁为捕逐者得官缘苞苴不读一行字况复知孙吴厥初既轻敌屡北辄睢盱屯兵非不多一扫不复余虎兕出於柙是谁之过歟凶焰陵郡县良民遭戮屠坐令腹心地化为豺豕区除恶当务早滋蔓良难图王师何日出努力观庙谟

童子驿见梅花

天滑云腴凝不流岁寒迂骑过南洲黄昏孤馆沈吟处赖有江梅慰客愁

江南为客见江梅似为行人特特开数点枝头凝玉雪隔牕和月送香来

偶题

霜风响枯林旷野惨寒色川路阻且长客子方远适东吴眇何在仰羡归飞翼惟有溪边梅犹能慰愁寂

又

水落潮乾人取途西风索索响黄芦沙头惊起数行鴈恰似旧藏芦鴈图

题建德县开化寺

路遶江南烟水村梅花的皪正销魂峯峦影里过山邑鼙鼓声中念故园残腊未曾看雪舞劲风何事扫云屯拙翁自笑平生拙欲叩天阍更一言

题紫岩驿

稚年曾向此途行半世重来若泛萍山径车声欣路坦江村市合厌鱼腥连天霜草萧萧白蟠岭云松郁郁青久旅怀家归尚远暮烟残照宿邮亭

赠池守张闳道

绣衣执法出霜台邂逅还如特特来华省旧曾陪笑语清溪今复接罇罍喜公笔有江山气顾我心如世味灰天下苍生待经济坐看蟠蛰起春雷

同天宁聪老游齐山次杜牧之韵

东风初起白云飞禅客相邀步翠微童稚旧游如梦到江山今幸假途归岩峦窈窕笼轻霭鸱鹭翩翻舞夕晖归覲庭闱询往事篋中先整老莱衣【余童稚时侍亲池幕迨今几三十年矣齐山顶有紫微亭】

题弄水亭

萧条秋浦景如秋谁信猿声使客愁烟树森森连远峤水田漠漠集飞鸥高楼吹角增离恨古驿停骖忆旧游亦欲题诗江祖石谪仙遗迹取风流

自池口登舟

水落溪乾不可舟春潮理櫂浅沙头多风烟浪鳞鳞起欲雪江云冉冉浮涉险物情终共畏临流归兴浩难收波神借我风帆便鼓枻清江汗漫游

江行十首【自池阳至铜陵】

理櫂适江干初欣眼界宽日蒸江气白风约橹声寒蒋诩谋新径锺仪只旧冠浮云休蔽日直北是长安春江彻底清沙尾见潮生朝气嘘成雾南风战作晴岸移看树远船稳信波平览尽江山胜还悲万古情渺渺春江稳融融午睡腴梦回双橹急望极片帆孤皱水风还逆维舟日欲晡云中有行鴈冉冉下平芜春光摇画鷁江影浸长天浪势随潮急涡痕逐橹圆避风依岛

屿防寇问人烟深念还愁絶高歌且醉眠江濶水云暮风高舟楫停落帆归别浦宿鴈集回汀
霜苇萧萧白烟岚朵朵青夜来江色静寒浴一天星朝来问风信五两向南飞旅泊添春恨舟
行与愿违蒨梅空的的岸柳已依依寂寞江南路那知自此归春江望不极惨淡起层陰烟雨
蒙蒙湿云涛渺渺深怀家千里意报国一生心叹息知音少空为梁甫吟晚泊铜陵口烟村八
九家岸沙崩浪响江雨带风斜泛泛浮波鴈捎捎接翅鷗无情东注水对尔叹年华杳杳楚天
濶悠悠江浦清便风帆腹满顺水橹腰轻烟澹山逾碧云高雨易晴无心问渔父浊酒慰平生
春到江波綠潮来浦溆深晓风看五两家信抵千金笑读谪仙句病为庄舄吟世途游历徧归
去老山林

游五松山观李太白祠堂

大江东南流鼓枻江水上薄游五松山获见谪仙像呜呼天宝间治乱如反掌兵戈暗中原豪
杰多长往谪仙当此时逸气隘天壤脱身来江东缥渺青霞赏作诗几千篇醉笔笼万象迄今
有遗祠识者共瞻仰嗟予岂後裔愚拙谁复尚珥笔玉殿螭谪官闽岭瘴荷恩许生还冒险理
归桡於焉覩仙风足以慰遐想愿言继清芬何由揖英爽

舟中读书有感

渺渺波涛淅淅风此身忽在大江东浮家泛宅云烟里思古伤今图史中盗贼从来能伺衅治
安自昔戒除戎我今惟愿兵戈息归作梁谿老钓翁

铜陵阻风

春色到江渚梅花正断魂风波留远櫂烟雨湿寒村鴈过传遗响潮来没旧痕凄凉一樽酒愁
絶与谁论

题护法寺瑛老默堂

维摩丈室何年设满目江山自风月道中试露默中机千偈澜翻本无说

次韵和瑛老颂

默堂前对五松山敌面机锋一瞬间禅客相逢休拟议草鞋价直欲谁还

自铜陵行四十里风复作泊江北岸地名散潭属淮南

襟带江淮一望间夕阳舣櫂散潭湾波涛汹涌暮天濶鸥鹭飘飏渔艇闲风壮又还依北渚云
深不复见南山淞河千里何时到过去飞鸿不可攀

镜中渐觉鬓丝多半世劳生可奈何极望不来青足鸟满江更起白头波扬帆贾客风前笛撒网渔人月下歌自断此生甘寂寞毗耶归作老维摩

平生性酷爱江山今日江山满目前明月清风人寂寂淡烟轻霭露??波声撼岸连淮壤鴈阵惊寒入楚天慨念往来成底事一杯浊酒且安眠

春睡

半生游宦鬓毛霜依旧图书对晓牕卯酒一杯春日暖卧听鸣橹下清江

居士终朝只念归日行百里尚嫌迟小牕春梦分明到叹息啼鸟唤觉时

夜泊繁昌

系?繁昌口清江夜渺然寒星随浪闪孤月向人圆汉渚乘槎客云川控鲤仙何须论往事且泛碧波船

试九华朱覲墨

九华山顶老松烟名重初因玉局仙樣古法精珪并制胶清煤馥玉同坚试将毛穎轻轻染须遣陶泓细细研居士年来无恋着惟於三子欲逃禅

未至芜湖四十里阻风

一夜寒云凝不开北风吹雨带潮来涛翻天末银山涌浪打沙头霹雳摧心在浙西音断絶身留江左意徘徊无聊独酌开怀抱赖有牕间数点梅

草宰执书论方寇事戲成

江浙巨盗起东南皆震惊王师殊未出赤子若为情试赠绕朝策愿飞燕将城非因肉食鄙只欲庙谟成汲黯复妄发终军思请行怀亲寸心急报国一身轻曹刿亦问战申胥还乞兵羣公佐天子努力剪鯢鲸

上元舟中有感

前年扈清跸玉辇临端门鳌山彩构耸露台歌吹喧去年谪沙阳旅泊亦游观士女隘衢巷灯火满溪山今年过江南舫舟烟水湾风高不可进极目云涛翻蜜炬照独酌红炉凌夜寒感事心欲折强歌声无欢坐看江边月飞上青云端清光不改旧对我还团栾

夜坐

春夜沈沈灯影明卷书兀坐忽三更不知船外风多少但听满江波浪声
波涛漠漠雨纷纷夜泊江南烟水村慨念平生都不寝可怜心事向谁论
至芜湖闻贼陷钱塘复为官军所得有感
督府繁华一扫空须知狂寇计非庸庙堂若为苍生计早筑高坛拜卧龙
巨盗乘虚起浙东猖狂如在笑谈中钱塘犹喜官军复破贼须从此立功
自芜湖江行至采石

万顷春江彻底清天风不动镜泓澄画船安稳摇空翠疑在琉璃地上行
江水春来绿似蓝临流高石翠巉岩波恬舟稳已堪喜况是清风借一帆

阻风泊慈湖夹焚香默祷有长鱼跃波而江豚出没舟人大惊抵暮风便因命解舟乘月泛禁江一夕至金陵盖数百里作二绝以纪其事【江险而不可行者为禁江时夹江水落行禁江】

江豚出没白波中十丈神鱼跃晚空知是阳侯怜我拙故教来助一帆风
露气漫漫欲结霜扁舟夜下秣陵江烟波如席月如画快意倒尽黄金缸

同李似之游蒋山

北风阻行舟驾言游蒋山相携得良友谈笑穷跻攀松林静杳冥殿阁罗烟鬟宝公骨已冷白塔孤云间乘高望长空极目波涛翻东南正戎马戈甲照江干与子适相遇偷此半日闲怀古六朝远道旧一笑欢忆昨赐对初接武玉殿班螭坳珥史笔每惭追继难迂疎与世违谪官堕瓯蛮宽恩幸脱去假道来江关邂逅两萍梗飘泊惊风旛?首顾淝河不知涕泗潜着鞭愿努力世路方多艰

颂示勤老

平生闻说蒋山勤今日相逢过所闻还似泉公唤居士一声吹散满天云
次韵奉酬李似之见赠

吾宗才气世无双用与时行舍亦藏殿陛同瞻龙袞绣螭坳继染御炉香紫荷持橐将清禁贝叶繙经见宝坊仄席正思经济手伫观趣召侍颀昂

金陵怀古四首

六代兵戈王气销山围故国自周遭豪华散灭城池古人物摧残丘塚高阜转蟠龙翔宝塔洲分白鹭涌云涛悠悠世事都如梦且对金樽把蟹螯

六代繁华三百年我来吊古一凄然景阳钟断鸡空唱玉树歌沈月自圆潮没旧痕生晚浦柳摇新色媚晴天高楼上尽穷双目千里江山遶檻前

六代兴亡江上城倦游还向此中行龙蟠虎踞空形势并废台荒为战争云气霏霏春雨急烟波渺渺暮潮平商人不识前朝恨短笛还为激烈声

六代当年恨取长兵戈陵灭故城荒非关霸气多消歇自是人谋未允臧王谢风流今寂寞江山形胜亦凄凉我来正值兴戎马慨念东南更惨伤

登鍾山謁宝公塔

宝公真至人鸟爪金色身杖携刀尺拂语隐齐梁陈我登鍾山顶白塔高嶙峋再拜礼双足聊结香火因

题定林院

行过鍾山到定林青松一径白云深三间古屋昭文馆那有沉迷富贵心

题八功德水

石作方池紫翠崖湛然定水贮琼瑰何须功德标为八万行圆成自此来

题偃秀轩

青葱秀色一轩中俯瞰梁朝万本松顶蹙风云疑偃盖枝纆雨露若蟠龙四时郁郁宁雕叶千载亭亭不改容却笑宗人生岱岳佞秦先得大夫封

得家信报避寇海陵

怪底灯花夜夜红朝来家问始相通田园已在危疑际骨肉幸安飘泊中子美无家寻弟妹渊明有酒引儿童我今已胜少陵老稚子候门淮水东

自金陵江行未至长芦阻风

倏忽风云接地陰扁舟系?暮江潄波涛何必深为阻万里归来一寸心

又

七日风不止归心何似生烟添暮山色风撼满江声淮楚已非远波涛殊未平坐看云解駁犹喜晚来晴

过长芦

达磨当时一苇杭栖栖暗度白沙江不知双履归何处吸尽西江属老庞

游长芦见衆僧已披剃

圆顶方袍复旧仪欣欣便觉衆情熙可怜尽堕狙翁术暮四朝三元不知

梁谿集卷十四

<集部,别集类,南宋建炎至德佑,梁谿集>

卷十五

钦定四库全书

梁谿集卷十五 宋 李纲 撰诗十一【江南道中及归抵海陵作四十七首】

陶渊明尝设形影神问答赋诗三首读之有感因次其韵

次韵李似之秋居杂咏十首

阻风舟中有感 喜雨

双鳧 雪

江上值雪戏成短句 舟次仪真

次韵王尧明游北寺 次韵王尧明三絶次韵茂载海陵寓居有感三首

次韵王尧明喜雨古风

送虞季然赴八宝丞

次韵曾徽言登北禅寺塔

次韵徽言招饮絶句 读陈子直短歌次韵次韵和王尧明四旱诗四首

次韵虞公明察院赋所藏李成山水

再次前韵 次韵曾徽言桂浆读王尧明赠诸弟和陶诗次韵为别

虞公明出示序观音诗事并颂次韵

赠虞公明察院

读钱申伯与仲弟唱和次韵见意

往复诗多用佛语再次韵示仲辅

题李茂举拥书堂 次韵徽言见赠

尧明以五诗賸行次韵第五首为报

自海陵泛江归梁谿作

次韵和渊明形影神三首

形赠影

大块已载我何如未生时气变芒芴间七窍谁凿之百骸与九藏假合以成兹与子非故交从我如相期屈伸及动止契合初不思常恐随物化念此情凄而我生梦幻中变灭不复疑安得永相保听我悲来辞

影答

纡余非我妍濩落非我拙与子两相依生来无间絶俯仰随顾指岂是事容悦因光长周旋处陰翳睽别况复同物化子坏我亦灭冥冥长夜台念之五情热愿子卫生经无使精脑竭千载永相从彭殤孰优劣

神释

人生若大梦积微以成着少壮得老死一念即非故二子异金石松萝翳依附胡为羨久生切切儿女语有形会当灭是影无实处惟我谢客尘妙湛乃常住不入造化机岂堕陰阳数回光试反照凡圣悉皆具不灭亦不增谁毁复谁誉超然外死生卓尔无来去周行万物表独立初不惧二子非吾徒安用多忧虑

次韵李似之秋居杂咏十首【并引】

予素有高世之志家梁谿上田园足以结伏腊泉石足以供吟哦归自谪所藉此就闲而巨寇方起干戈相邻闻诸弟奉亲挈族旅泊淮甸田园泉石皆未可保慨然感怀过金陵邂逅李似之出秋居杂咏十篇因次韵和之摅情言志不必以秋为兴也

達人有大观曲士多自束忘真供物役终岁惟仆仆所以梁谿翁归来艺松菊寒泉友龟鱼丰草侣麋鹿清风为扫门明月相照烛世故悉弃捐吾方乐於独

亭亭南山松下?千里道结根既得地秀色亦何好岁寒霜霰苦独立君子操如何慷慨士百虑绕中抱寸心多感伤摇摇若旌纛逝将归江湖更拜散人号

乌鹄故巢心鸿鴈稻梁谋梁谿十亩园岁晚营菟裘自我去泉石岁律才一周安知巨盗起千里来蜂蠹老稚适淮东旅泊如寄邮已矣复何言吾生感行休

鼓鼙思将帅戡乱属豪杰吾儒贵全才冠履仍佩玦憬彼乘间盗萌蘖傲霜雪锄恶当务本使衆宜以悦一扫巢穴空毋俾蚁蛸结安得李临淮念此五情热

禅悦知道腴寂乐忘世喧自从游宦来常恐岁月捐愿从善知识超然同晤言心清闻妙香不必炉中烟竹实自鸾凤腐鼠从乌鸢典籍亦可弃鱼兔非蹄筌

取饭遣化人散花有天女维摩一方丈安用室百堵况我麋鹿姿本非冠冕伍脱身归梁谿蓑笠钓烟雨结交有风月扫念无寒暑巨盗倪削平此志良自许

两曜真跳丸百年如转轴富贵能几何飘若云过目惟有金仙书可以静中读冷暖初自知运用要当熟仲尼贵毋我老氏欲为腹悟真奚必多半偈亦云足

我行大江滨举头见锺山清风自南来长啸宇宙寛邂逅适相遇取友平生端恋恋故人意怜此范叔寒世路方多虞期子慎所安他时来访我陋巷一瓢颜

朝市不可留山林有佳趣结庐无人境散策时远步手携葛翁杖足蹑祖师屨一笑浮世空欸若草头露幻身粗饱煖此外复何虑休问东陵瓜且种梁谿芋

浮云不成雨晶晶行晴昼朝蔽扶桑暎夜掩长河宿回飈一扫除戢戢见远岫青天与白日四顾喜瞻构愿乘六气辩抚手磨宇宙冷然御风行平昔笑御寇

阻风舟中有感

扁舟泊枉渚邈在大江南风云鬬未息波涛战方酣闭关坐明牕开卷穷幽探气寒觉火冷志苦思蘖甘深炷一炉香默默聊自参半世徒扰扰忙如未茧蚕又若伏枥马未脱轡与衔逝将归山林鉶锡寄一岩愿从祖师六不学黄庭三得此无所得超然离圣凡

喜雨

北风吹云云不开蒙蒙细雨和烟来舟行虽阻亦可喜润泽及物诚佳哉我辞闽岭遵江渚百日皆晴未尝雨江淮旱暵已踰年牟麦焦枯但黄土漕渠千里不复通况复巨寇兴兵戎从兹一雨百事散愿化灾疹为康丰

双鳧

云涛万顷连天雨波上双鳧自容与风高江濶烟水寒日暮相将何处去

雪

小雨晚成雪冻云凝不开响牕初索索积岸渐皑皑色与涛头并寒资酒力排平生看图画今日画中来

江上值雪戏成短歌

我来自南今几月万里不曾看点雪舣舟江南烟水湾雪作春风更奇絶冻云漠漠愁鏤空初闻水霰响牕蓬蛟人泣下玉盘碎珠玑乱落层霄中须臾雪片大如指密洒江干浩无际白帝从以万玉妃婀娜旗常堕雪水回风飘舞转交加坐看汀洲铺玉沙已惊绿柳早飞絮更讶黄芦还带花沙头鳬鴈自俦侣天暝云寒去何处渔翁独立钓清江披得一蓑非好句梁谿居士初归来对此超然慰所怀家在淮东阻行色晴天且为片时开

舟次仪真

昔年试吏得江城一纪重来若隔生惆怅旧游谁可语南园春色却多情

次韵王尧明游北寺

小雨湿残花回风振芳草胜游宜及时嘉此春物好萧然二三子散策穷杳眇招提枕郊头殿阁出林表中有王屋泉一酌百虑澡踟蹰古城隅幽径通翠筱嗟予阻迫陪正坐尘事绕衣冠方北渡亲故幸非少客情终念归回首云缥缈遥怜松菊荒仰羨鸛鹤矫园田诚可乐鼙鼓尚惊扰何当终素心永叹忧用老

次韵王尧明三絶句

春风初入牡丹枝国色天香艳姣姬堪笑谪仙犹半醉清泉沃面与题诗

康时致主接英游姚宋开元第一流憔悴三间空泽畔离骚终日念灵修

郑卫曲终才雅奏词人赋咏本多夸未能句语全无類犹贵琼瑜不掩瑕

次韵茂载海陵寓居有感三首

羣盗休凭险天弧正指狼犬羊徒跋扈貔虎极精强寓目江山异伤心花草香淞河那得此回首一彷徨江城飘泊久幽径绿寒莎叹息青春暮悲伤白髮多苍生端若此狂寇竟如何更起乘桴兴沧洲万里波不谓繁华地还飞战鬪尘浇愁空泥酒极目更伤春怀古繙书帙论情托友人谁深医国术吾欲问甘辛

次韵王尧明喜雨古风

神化茫茫端莫测不雨踰时忽盈尺谁云幽默志难通一念周圆诚已格井枯河竭欲飞尘麦秀渐渐实半娠翠虬潜伏杳无处遗蝗出地方鳞鳞观音妙智悲慈主为洒杨枝作甘雨应怜
祷禳罄勤渠致遣神人梦中语雨阳之数虽有时迟速亦可精神移世间万法尽心造报若影响宁难期不知今夕复何夕千里风云来阵墨驱雷掣电雨建瓴似赴前期初不忒威神自在
谁复如嚶酒投醺术已疎有秋颇足慰民望可喜更须烦史书衣冠北渡连墙堵旅食经时念终窶已欣霖雨起蟠龙更庆天兵擒猛虎还来世事不挂心惟有忧国思犹深安得年丰羣盗
息归助击壤尧民音

送虞季然赴八宝丞

流落归来旅海涯相从几集凤凰池暫欣捉麈共谈笑还惜整骖言别离为禄未能忘斂板扫
厅应不废哦诗如公岂是徒劳者勉继前修结主知

次韵和曾徽言登北禅寺塔

佛教入中土贝多凡几翻摩腾导其流僧伽鼓其澜乃建窣堵波高标屹参天划如五彩虹上
与青霄干兹塔更奇古层檐俯通川江山递隐见万象森回环公子抱远韵登临眇风烟仰穿
龙蛇穴旁瞰日月悬茫茫悉细碎寓目疑无全归来吐妙句字字劳精甄嗟我方屏处胜游阻
清缘幸窥慈恩作如见衆宝山宗风久寂寞紆絮何其寒安得师子吼震此龙象筵关弓挟白
羽橐鞬相周旋当分宝塔坐一瞬三万年

次韵徽言招饮絕句

压架酴醾翠蔓柔经春芬馥未全收主人邀客醉花下共喜王师破蔡州【时间淮东捷报】

读陈子直短歌三复而悲之次其韵

君不见韩昌黎文章二百年又不见杜陵老风月三千首号寒啼饥四壁空漫有篇章在人口
书生生事良易足深林一枝河满腹但令藜苳可充腸便把离骚静中读儒冠误身诚可怜陈
侯半世身犹遭斗酒初乏青铜钱忍饥哦诗空可传富儿菽粟泥沙掷不必登朝家万石水陆
毕陈方丈食锦绣还将被墙壁但资口腹为身谋问以诗书初不识天公赋予真相百彼富吾
仁如黑白乡党宁无急义人谁哀王孙与进食尝思漂母饭淮陰何用区区论报德

次韵王尧明四旱诗

河运

漕渠如坦途泛此往来宅疏川谁之功乘木本诸益常疑侔沧溟巨钓可龙伯那知旱暵甚有
此困涸厄岂无车班班莫胜仓箱积譬犹一鶚飞孰与鸕累百汲江劳瓮盎祷雨费珪璧端为

鱼鼈忧无乃云雷歟安得千里波篙师发櫂歌愿借壮士手为乃挽天河

井汲

我居梁谿傍密迩陆子泉漂流旅海陵又欲买一廛愿言酌甘芳为涤腥与羶居然值岁旱此志无由全百井尽枯涸简编匪虚传夜汲费烛炬晓趋骈足肩一壶信千金一饮或万钱逝将向井拜飞泉为溅溅泓澄古镜色吸引星光圆洋洋疗衆渴不竭如巨川井收遂勿幕瓶盆送回旋饮水自可乐安用井底眠

酺祭

闵旱意不乐驾言游近垌田父纷在野祭酺方乞灵借问何以然东臯产蝗螟主张有神物薄礼羞微馨神歆庶灾熄敢爱酒满瓴导我试往观戢戢初插翎剪穗齐若刀抱秆牢如钉异哉天壤间孕此妖孽形羣族既蕃衍气类屯臊腥仲尼所不堪纪异垂麟经畧火见周雅捕瘞闻唐庭人力自足胜何须诘冥冥聪明实依人正直神所听区区觴豆间厥德安足铭谁能起云师霈雨驱疾霆一洗羽孽息寥落如晨星

雩祷

雩祭法已古东方见苍龙厥後兹礼废但祷释梵宫淮堧值岁旱川涸山欲童【已下阙】

次韵和虞公明察院赋所藏李成山水

画史古多有李生独宝传譬犹古人书墨妙称诚悬尤物世难蓄变化登云天流落人间者遗迹犹緜緜此本更奇絶高深自山渊想当盘礴时舐笔应如椽楼观抱空曲林苒霭层巔屹然岩石姿润比金玉坚倏忽变寒暑霏微起云烟高堂寓远目如堕嵩华前回观旧所藏一一可弃捐乃知盖代手笔力能旋乾衆工画山水意匠劳雕镌惟兹得简易大巧初天全鉴裁有精识丹青孰争先何须嫫姆丑始辨西施妍嗟我性迂拙漂流方隐鄜幸从长者游坐使伊郁宣啸咏图史间高台谢牵挛新诗与妙画更使穷钻研愧乏色丝句为续金声篇端思画中趣祗欲休林泉

再次前韵

妙手不可遇心匠良难传於中营丘生名若日月悬胷次有衡霍笔端合其天坐令衆画史缩手嗟材緜公於何处得藏此图书渊昼赏不知厌夜观烛如椽我昔游七?足踏羣山巔取爱演仙峯石色润且坚楼台与粧缀轻素拖晴烟竭来见兹画恍若复造前为技一至此丹青诚可捐譬犹绘神骏不必锦连钱阳岭郁葱蒨蔭崖极熔镌人禽与屋木种种法象全往者邈难追後来谁复先新诗为发挥与画争清研宝劔藏古岳贤士隐里鄜一朝遇鉴赏晬若五采宣顾我涉道浅游世困縈挛惟有古人心刻意思精研兹画不可取但诵瑶琼篇何须画中看吾方

老云泉

次韵曾徽言桂浆

金椀擎来碧玉浆端令袞暑吸飞霜何须社瓮麴蘖法自带广寒风露香清入肺肝殊有韵甘余齿颊固难忘七瓿已胜卢仝茗似得仙人石髓尝

读王尧明赠诸弟和陶诗次韵为别

鷓鴣巢安一枝鹏运图南溟巨细自有适坐见万物情昔别东都门我方堕蛮荆岂知复会合浊酒叙平生念子抱器业出值时清明騫腾发素蘊当使王化平而我志丘壑肃肃正遐征窃比渊明归逝同沮溺耕脱屣谢轩冕超然无所萦出处良异趣勉哉垂世名

虞公明出示序观音诗事并颂次韵

闻思大士真奇絕俱妙形神侔玉雪譬如水月自清凉能与世间除恼热自从证悟今几劫定慧慈威初不灭解脱曾因无尽宣圆通更假文殊说森然宝臂清净目八万四千犹一映依怙羣生愿力坚宴坐谛观尘世閱先生往时堕宪网泽雉在樊鹰在绁默相?诚赖觉慈灼知情实蒙圣哲踰年海上得归来冒险岂殊探虎穴精刚何翅金百链忠荇端同水万折观音在处皆现前不必图绘劳携挈此方教体在音闻悟入此门良不拙更将妙语赞悲心功德须知莫如舌

赠虞公明察院【并序】

寓居海陵初欲问道每见辄为棊战所困此殆曹参阳城醉客以醇耐意

迢嶢古城隅下为凤凰池凤去不复返池水空涟漪傍有幽人庐松竹森四围结构极爽垺借问居者谁先生闻道久昨自海上归食枣大如瓜定曾见安期不知修何术能夺造化机金鼎灿含葩玉池灑生肥颠倒出龙虎腾降分坎离行年五十余气貌如婴儿余暇付图史不废酒与诗高堂会宾友落笔风雨驰戏事聊复尔一笑初何为悬知广成子千岁形不衰顾我抱迂拙与世真相违徒欲睎骥騄曾未窥藩篱寓居迹函丈数造董公帷愿闻衆妙门成此一段奇胡为久闭拒客至辄围棊归隐志已定後会知何时铭心誓相学发药幸教之他年倘有得同驾云中螭

读钱申伯与仲弟唱和次韵见意

未忘世故似梅仙警欬那离狗马间肯信片言功若药坐使四海安如山从来疗疾应须艾宁有艾丸如许大扁鹊先知今岂无和缓高谈良有在钱郎志气絕可人不减风流温太真新诗欲嗣汲黯直陋巷更甘原宪贫我有故园依北阜松菊归来知好否着鞭愿子勉为先我已摧

頽瞠若後

往复诗多用佛语再次前韵示仲辅

远涉异域求金仙岂知不离方寸间此门悟入真捷径安用困苦栖穷山凭君试灼一炷艾能已千痼宁四大病根若悟本来空是则名为观自在平生见尽学道人舍妄求真不识真指端明月休错认衣里宝珠元不贫巍巍荡荡如山阜长与君俱君见否仁者自生分别心断际何尝有前後

题李茂举拥书堂

小堂深稳据西偏挿架牙籤灿属聯万卷新如手未触五经嘲解腹空便子同蒋诩开三径我学扬雄老一归去梁谿谋筑室隔江相望两翛然

次韵徽言见赠

白首穷一经此道何尝东陋质误识擢珥笔宸庭枫霄中何所见耿耿惟孤忠谪官乃自取宠辱久矣同竭来旅江城胜游幸从公欸昵讌笑欢顾忘身世穷十年倦游意一笑回首空尚余爱君心梦绕明光宫夫子抱高趣才气凜以雄挥毫写妙语燁若五彩虹宁淹江海上行箴鵷鹭中放怀且玉友不用酤郾筒

尧明以五诗賫行辞意激昂钦玩无已辄用第五首次韵为报聊发一笑

次台一罇酒平昔接英游棘闱澹墨榜曾见成名秋焉知江海上乃复同唱酬子如清庙器端俟识者收又如御厨珍可用三公羞高志凜冰雪妙语锵琳球三年未飞鸣一举宜无俦我已谢世网逝将老一丘愿子勉自爱食肉鄙虎头名节乃难立富贵良易求

自海陵泛江归梁谿作

清江湛湛波不兴澄江际天如镜平火云突兀耸峯岫倒影万丈摇空明扁舟归逐落潮急聒耳但闻双橹声乃知长江无六月水气自与风兼清去年狂寇起歙睦江浙惨澹妖气凝百年涵养极繁盛一日荡析屯臊腥衣冠北渡旅淮甸扶老携幼纷从横王师出讨盛貔虎凶渠授首封鯢鲸迨兹浙右稍安定鼓拖复作东南征家山在望已可喜僮仆候我应欢迎平畴戢戢稻秧绿峻岭霭霭松林青田园有趣良足乐轩冕无味非所荣苍生倘有安堵望笑傲自可终余龄只今余孽尚充斥努力庙筭宜哀矜裹包兵革不复用坐使四海还康宁

梁谿集卷十五

卷十六

钦定四库全书

梁谿集卷十六 宋 李纲

撰诗十二【癸卯至甲辰岁作四十四首乙巳春赴奉常召如京作八首】

序

次韵上元宰唱和古风

寄许振叔显谟 次韵仲弟古意

次韵李似表县丞出示游西湖古风二首似表复以诗来再次韵

寄池阳黄季岑士曹二首

冬日登阁有感呈子美提举二首

送邓志宏往试南省

次韵仲弟独游惠山古风

吴元中着诗义见示因成三篇赠之

题伯时明皇蜀道图

送韩茂遵解元赴试南省

邵平种瓜图

寄题外氏松绍祖亭

近以诗寄许振叔承林德祖见和复次前韵寄之

次韵顾子美见示题曲江画像

小阁晚望书怀一百韵

唐植甫左司许出示所藏红丝砚戏成短歌次韵子美提举许雪中见过之作

次韵邵子非见赠之作

次韵子美寄汪彦章同游惠山之作

蒋山佛果师为缘事来而此土方饥戏赋是诗次韵叶少蕴内翰丈雪川上买得弁山石林二首

近约周仲居同游阳羨以私故不果见寄笋蕨次韵顾子美见示久雨三首

寄毛达可内翰并録送魏公别録

蓴菜 送李泰发吏部赴官阳朔寄李泰发吏部 同翁士特小饮中隐堂士特见和复次前韵

同士特游惠山再次前韵

题周孝侯庙

余乙巳春赴奉常召如京师五月四日同似表叔易游北固甘露寺

雨中渡扬子江书怀呈似表叔易

同似表叔易置酒平山堂

过召伯埭游斗野亭次司谏孙公韵

途中书怀 新开河食鳊鱼戏成泗上瞻礼僧伽塔 汴上有感

序

余顷谪沙阳迨蒙恩得归往还几涉三岁触目散怀一寓於诗得古律数百首自罹艰棘絶不复作今秋既御祥琴适友人胡俊明寄示鍾山酬唱因次韵和之自此渐理笔砚畦径吟哦缀缉寄情烟霞泉石间以写闲居之适当浸成篇轴漫録之以贻同志者时宣和癸卯冬至後三日梁谿居士序

次韵上元宰胡俊明蒋山勤老唱和古风

竺教流传入中土以相求之无自可達磨西来直指心拟议之间已蹉过皮髓谁分深浅机祖

称翻贻子孙祸鍾山禅老真可人高唱宗风震江左学流云集欲何为佛祖要须自心作宰官
倥偬牒讼间偷暇相从还作麼也知襟抱素相亲更把篇章迭酬和词严义密读难晓字顺文
从识皆妥应怜孤陋方杜门亦欲追随良未果故将佳句寄幽人此意勤渠滋愧荷谈空摩诘
无一言听法文殊非两个若将情解议真如明眼人前应看破世间万法互低昂正若旋轮与
推磨随时俯仰乃善谋就中拙者无过我九折羊肠欲着鞭万里沧溟思纵施只今行年四十
余已觉衰颓多坐卧平生作具何所施尽以付之一弄火?光返照默自参妙湛本然无点涇公
方齿壮志气豪正可立功同魏颗胡为亦复味禅那坐视轩裳如縶鎖莲社庄严清净池丈室
含容高广座他时共结香火缘心期耿耿当非颇为余稽首问勤师如师材德诚磊砢钓龙罗
凤大江滨法器谁为语无堕庭前倘有立雪人我欲因风致三贺

寄许振叔显谟

我向江湖老此身公犹拘繫作羈臣兰宫笑语真一梦泽国过从今几人霜落洞庭橙橘熟泉
斟桑苧茗芽新相望百里如千里早晚归来共钓缗

次韵仲弟古意

棣萼相荣华鵠原同急难富贵何足美名节在所完吾家诸弟昆擢秀森琅玕虽无金朱乐顾
有道义欢故人岂不多谁念范叔寒卜筑九峯下庇此拙且顽山光入户牖溪水清不湍我屋
虽无华容膝审易安田畴半莧莠念兹岁方艰虚室味图史小圃孰?兰萧然寂寞滨庶保余龄
闲哲弟富才业壮志思昭奸勉哉振此道吾方闲处看

次韵李似表县丞出示游西湖古风二首

迂愚与世违深渺方自屏萧然岩壑心不与余事并澄湖武林西风物非尘境愿为境中人此
志久已定卜居梁谿滨日汲陆子井幽梦绕湖山妙趣神先领浮家苕霅间初不费驰骋招携
得佳友高咏笑匡鼎富贵如浮云功名真画饼且尽季鹰杯更饱卢仝茗李侯东南来曾次涵
万顷作诗纪幽寻句法言可永念子到山中天地正凄冷青鞋踏水霜共赏谁复肯胜游子先
之吾亦行买艇

李侯嗜学古余事皆远屏昂昂鸾鹄姿岂与凡禽并捧檄来南州初识浙江境寻盟歟吾庐不
待日中定从容叩所得响答如汲井时方罗俊乂宁久淹簿领清秋鵬鸞飞大道骅骝骋词章
尤激昂笔力可扛鼎虚堂纵谈笑霜月挂金饼夜阑言愈微至味嚼佳茗古来会合难岁月积
俄顷愿子谨所之万里路方永吾衰老闲旷轩冕志已冷栖迟丘壑间此兴良自肯他日来相
遇梁谿寻钓艇

似表复以诗来再次前韵并简似矩侍制似之舍人

吾宗抱逸韵试吏得南屏扫厅日哦诗俗士驾敢并双谿与叠嶂拄颊对佳境诸昆奉板舆晨

夕严省定仲氏近剖符链养窥丹井叔兮久燕闲禅要心独领何人絜骐驎逸足未高骋会当
归本朝宗社重九鼎衰疲老山林耕钓供饵饼叩门欣得朋草草具醪茗追思会金陵三载如
食顷契阔怀晤言川途阻修永临流送将归岁晏风霜冷寄声昆季间卜隣谁定肯天高烟雾
深且纵江湖艇

寄池阳黄季岑士曹

昔年多士萃南宫曾见雄文睥彩虹万里相期霄汉上一官犹在大江东新诗寄远句增丽旧
事追游梦已空努力要津张此志吾方寒钓五湖中

稚年嬉戏曾游地往岁飘零假道还溪水寒生江祖石洞云深接九华山锦苔绿字几多在石
鵞白鸥相与闲幕府诗人富家学定留秀句满岩间

冬日登小阁有感呈子美提举奉议

霜落风高万里枯孤鸿窅窅下平湖行藏谁会倚栏意啸咏聊为终老娱寒日溪山相掩蔼暮
云楼阁半虚无何人妙解丹青事画作 川烟霭图

遶舍松林寒不枯烟霞深处见澄湖紫青縹白知谁赏把酒裁诗可自娱剡曲幸非千里远同
云又复一冬无会当半夜溪山白乘兴真为访戴图

送邓志宏赴试南省

杜门忧患余戚戚常鲜欢故人千里来一笑解我颜念昔寓沙阳溪山郁?环游从得良友妙赏
穷跻攀别来几何时岁月惊飞飏索居无与游衰病两鬓斑子充观国宾假道叩我关草草具
盘饌把酒望西山道旧访陈迹相对如梦间顾子若鸿鹄整翮正高骞轩然四海心岂惮行路
难努力取殊第自致青云端春风得意後期子从兹还

次韵仲弟独游惠山古风

我家九峯下跬步临胜境循除环佩声满庭松桂影宦游阻幽寻每若龟引颈十年旅京华万
里走闽岭归怀寄清梦投檄期子请向来兵火作此地偶无警余生集百忧负郭耕二顷新交
浸已疎旧学谋重整功名一灰地毁誉两鼃黽抱拙与世违退缩甘远屏杜关絶外游但欲俗
缘省兹山乃故人雅契相与永登临富泉石采掇足芹苳下瓢酌甘芳日汲谢餠纓胡为久不
到有愧稚川井仲弟絶俗姿好勇先我骋新诗纪清赏得句颇彪炳艰难见鵞原岁月侵晚景
相期老丘壑不复叹土梗梁谿寒可渔蓑笠同舴艋宁如六一翁终日思汝颍方兹筑吾庐踰
伏念前眚面山开小阁制度閭深靓山气日夕佳爽致当共领夜久霜露寒星光冏冏冷然
欲御风岂惮广寒冷邻钟韵更幽皓鹤泪方微深炷一炉烟宴坐得三省

吴元中得书言近不作诗以所着幽七月诗义见示因成三篇赠之

盱起幽居尚闭关忽传尺素破愁颜迂疎似我宜深隐才术如公岂鬻闲雅意未曾忘北阙胜游今日且东山十年回首当时事叹息人生似梦间

底事年来不作诗应缘思苦少人知凌云健笔含毫日照眼花枝得句时陶冶性情端赖此咏嘲风月漫多为驿筒若许陪酬唱朱字青牋复寄谁

儒生乐事信同风端抱前言当鼓钟公正说诗笺七月我方学易纬羣龙艰难盛事原衣食忧患余生问吉凶去圣寥寥千载後何时挥麈得从容

题伯时明皇蜀道图

君不见开元天宝同一主治乱相翻如手举桴盈欲恶虽一人变易安危原近辅姚宋已死九龄黜谁使杨钊继林甫宫中太真专宠私塞外番酋成跋扈祸胎养就不自知漫向华清遗匕筯渔阳突骑破潼关百二山河震金鼓翠华杳杳幸西南赤县纷纷集夷虏伤心坡下失红颜堕泪铃中闻夜雨山青江碧蜀道难栈阁连空?相拄旌旗惨淡云物愁林木陰森猿鸟侣戎装宫女亦善骑皓齿明眸如笑语老髯奚官驱蹇驴负橐糴粮岂供御九重徼卫复谁勤万里艰危真自取至尊狼狽尚如此叹息苍生困豺虎千秋万岁不胜悲玉輦金舆尽黄土空令画手思入神一写丹青戒今古

送韩茂遵解元赴试南省

忧患余生日杜关幅巾青顾得开顔虚堂把酒延佳月小阁哦诗对远山子学鲲鹏将海运我同猿鹤且云闲都城故旧还相问为道衰颓鬓已斑

题邵平种瓜图

君不见伯成子高让侯爵在野终年自耕获下风趋问礼徒勤但但田间事无落又不見於陵仲子推相位为人灌园刈葵藿抱瓮区区同汉陰不糝藜羹有余乐古来贤达有如此志趣未可常情度力辞富贵居贱贫凜若风霜陨轻箨邵平本自侯东陵秦破国除休一壑当时汉祖疑鄼侯置卫增封意非薄衆宾皆贺平独吊一言转祸推先觉以兹智略佐风云复取故封何所作归来种瓜青门外灌溉耰耔甘寂寞长安之东壤尤美翠蔓离离照城郭秋阳正炽瓜正肥解衣摘实如俛鹤儿童随立形骨清挈笠携筐助操作遂令世美东陵瓜身後高名动寥廓屠贩曾闻封绛灌奴仆从来兴卫霍高鸟已尽良弓藏更有韩彭辱囚缚何如终老守瓜畦自饱饱他真不恶龙眠也是可怜人画此端令事如昨世间如画画如梦聊为作歌资一噱

寄题外氏松源绍祖亭

东劔艰危际结庐闲旷滨全家入青嶂避地为黄巾族系归图谱风流蔼荐绅云仍藉余泽勿替德维新外族云峯畔新亭烟水滨儿童旧游地感慨易沾巾竹里锵鸣佩山边縹素绅何当俯轩檻一览物华新近以诗寄许振叔承林德祖见和复次前韵寄之

甫里先生早乞身最怜流落汉庭臣也知雅有绋袍意故使同为莲社人佳句传来油素湿灵文繙处贝多新更烦为指趋真路旧国于今草木缙

次韵顾子美见示题曲江画像

天眷李唐能肖德异人间出生其国於中贞观开元间譬若丰年多黍稷曲江擢秀自妙龄国器早被燕公识文词赡蔚冠後來大册高文振鸿笔孤生徒步起荒陬职秉钧衡爵侯伯一时推挽尽正人谗议嘉谟咸可绩能於偏校识胡情此理未可常情亿哥奴岂是郎官材谁使岩廊久践历眉宇津津挟兔鵬醞藉居然困摧抑正衙造膝访相臣岂止伶官论安叱天意方将啓祿山帝心那解疑仙客房帷陰謀独上陈三子未冤繫巨力伟哉相业继姚宋允矣威声落夷貊千秋金监奉君王仁者之言古遗直咏燕论心詎免猜赋扇陈情竟何意黄鍾毁弃瓦釜鸣凤去鴉?集槐棘固知骨髓易嬰鳞坐使奸谀得乘隙一麾出守来荆蛮直道忘怀谢欣戚诗篇冥助得江山文史终年自怡怵渔阳鼙鼓震长安祸乱宁从一朝积翠华西幸蒙尘飞蜀道艰难会相忆至言逆耳弃不收遣祭徒劳长叹息古来忠谏尽如此端欲济时如谷帛空令万世沧海南岑兀高名配韶石於粲荔丹蕉叶黄庙貌屹然兹血食身亡道立复何求失策自与当时惜丹青谁为写清姿风度严凝见顔色顾侯好古如古人此本云自韶阳得笏囊无复使人持奕奕蝉冠照虚壁象设曾闻铁作胎英灵尚想心犹赤拜公遗像激懦衷怅望天南瘴江碧高辞险语极揄扬勉强追酬愧非敌

小阁晚望书怀一百韵示仲弟并简顾子美

岁晏羣陰积天高霰雪晴西山来爽致小阁湛虚明曲檻驰孤照微云点太清泛观周宇宙旷望出枝撑九陇龙蛇伏梁谿组练萦翠烟浮近市碧瓦丽高甍湖外千岩秀林端一带平松篁森荟蔚楼观郁峥嵘天末氛埃歛坤倪物象呈清风生户牖秀色入轩楹北辰星拱东臯雨露羸寸怀舒远目万感集孤情忆昨陪螭殿终年侍玉京含毫青琐闥通籍凤凰城獎擢知恩重临危觉死轻囊书朝入奏襆被夕徂征去历谿山险归虞盜贼惊西江足波浪南国满旌旆迂路良非策寻家不计程天戈戡猋猱庙略扫欃枪芜没田园在欢呼仆隶迎乱离才甫定患祸忽相婴风木悲摧感祥琴惨怆声誓终坟墓守望絶縉绅荣卜筑诚长计栖迟岂钓名当为千载蛰那作九臯鸣示舌羞张子轻身笑衺衡盘桓且丘壑腾踏自公卿未具函关驾聊从谷口耕岁功方险恶供给敢丰盈瘠陇饶稂莠彪池粃稻杭何心谋肉食充腹但藜羹孤笑弹长铗微吟就短檠开编聊自慰攻苦饱曾更卮酒和糟粕盘飧杂蚌蛭恐须食翠栢尚未斲黄精腊破冰渐解春回草木萌且休吟蟋蟀行复听鶺鴒献岁三朝始初阳一气亨小梅舒冻栢?柳茁枯茎帘幕还飞燕园林又转莺试编居士屨学种故侯?抱瓮浇芝术联畦蒔杜蘅摘甘聊共剖钓美得同烹烟艇筇筍稳云谿略约横行吟携古锦坐隐寄文枰据石从欹?临流可濯纓闲中端有趣身外更无营古寺回峦拥细泉幽窦倾带云斟晓杓和月贮春罍绕径摇金碎循除

响玉琤由来穿蜡屐未必美葱珩借问披衣惯何如结佩綰端知绶若若不假铁铮铮匠石宜
遗栝山川诂舍駢甘为书里蠹憚作庙中牲云鹄翰方铄风鸢羽正翮隐沦随绮皓蒞醢叹韩
彭坐逸真侥幸时康孰使令普天期一稔率土庆羣氓耒耜三农出仓箱万宝成余粮饱羸瘵
大屋茆嫠 稚耄皆含哺潢池不弄兵人咸安畎亩吾亦乐柴荆已与猿猱侣犹怀犬马诚忧
心虽悄悄执节信硜硜老去将忘世朋来且命觥嘉宾期座满陋巷或车轰幽鸟会心近良辰
乐事并黄粱蒞露薤白蟬笔霜橙何苦三升恋当为五斗醒澗蓴舒翠缕林笏脱文?池草铺新
緑亭花藉落英醉眠方栩栩儿泣任喤喤庭树朝嘲雀书帷夜话蜻心清香篆繚耳隐梵钟枪
游宦从诸季浮沉许拙兄棣华知晬晬伐木亦丁丁操履资磨琢论文贵讨评杖藜扶跛倚药
剂发聾盲絶倒心都醉奔驰视只瞠风流怀卫玠敏捷忆袁宏愿见摩天手真成掷地玳戈矛
万人敌脰炙五侯鯖意妙操干舞声希舍瑟铿味深饴醴酪调古奏諠?文社谁襟袖诗坛为主
盟中书仗毛颖发墨赖陶泓友直常希黯言刚酷鄙柵藏刀真善割胶柱未能箏数马须资策
驰车必式衡传家惟义训教子谢金籀婚嫁何时毕遨嬉莫我争浮家苕水去乘兴剡川行吴
殿悲游鹿秦宫吊拱鬣炉峯看瀑布緱岭听吹笙神岳登嵩华仙洲指沃瀛冲天思御鹤跨海
欲骑鲸浩荡愁千古翱翔抚八紘会当期若士高揖笑浮生

唐植甫左司许出示所藏红丝砚辄成短歌奉呈并简顾子美

羲和整御升阳谷赤云夹日如飞鹜晶光下射东方山石卵含丹孕岩腹谁令巧匠凿山骨截
此頰坚一肪玉琢为巨砚形制奇中有彤云烂盈目端溪美璞色马肝黦歛珍胚纹雾縠岂知
至宝出嵎夷散绮浮花彩尤縟凤咮空闻名字佳龙尾苦笑规模俗谩夸眉子鬪婁娟休认明
眸类鸛鹄顾盼幸蒙君子知拂拭自远尘埃辱火轮炫焜赤乌流墨海瀛沦玄兔浴千金象管
雕镂精百链松煤龙麝馥怒猊渴骥纵奔拏春蚓秋蛇相绾束楮生便觉肌理妍毛颖何尝免
冠秃公家三世擅直声此砚提携资简牒力侔天地掌中?胆落奸谀笔端戮固宜秘玩不轻示
神物护持无辄黷牕明几净斋阁深日暖风清霭松竹试将墨妙写新诗落笔烟云叹神速矧
公早年曾餌丹龟鹤精神鬓毛緑久卧商山茹紫芝行度天门骑白鹿猗兰玉树富堦庭黄卷
青緌賸编轴愿言什袭遗云仍大笔高文永相续

次韵顾子美提举许雪中见过之作

残腊苦寒情味恶万里风云欣雪作夜积端愁坤轴倾晓望却惊天界扩玉龙鳞甲卧羣山水
海波澜凝巨壑谢家儿女自多才笑咏飞花度罗幕金炉未觉兽炭温锦帐犹讶貂裘薄书生
饥甚况复寒坐听朱弦折临猗松孤竹老念山林甲冷戈寒悯沙漠岂思龙尾贺千官且叠琴
心舞双鹤瑶林玉树粲回环勿谓轩庭全冷落拥门但作袁安卧命驾谁思子猷乐溪山如画
真自知金玉满堂端不博烦公携具歛我门注目遥空登晚阁冻吟犹作号寒声此病欲医那
有药公家故自富香醪我亦安能辞巨杓醉看万事雪销凝妙观圆成不须学

次韵邵子非见赠之作

持竿相与钓鲸鱼叹息平生术已疎嬉戏尚能追旧事穷愁聊复着新书昂霄耸壑公行尔拂

石眠云我自如卜筑相望才一水未应岁晚恨离居

次韵子美寄彦章同游惠山之作

结庐寂无车马喧雀罗可设深扃门北牕一枕半成梦剥啄叩户惊心魂故人见过适我愿相与携手游山樊春风桃李已零落孟夏草木行滋繁下瓢共酌陆子井策杖更步公垂园山肴野?助清赏此心非子将谁论人生聚散如露电访旧叹息无多存区区得失何足较瑟僖但期终不谖嗟予夙昔志四海远游欲学飞鸿轩南征曾上帝子阁暮雨朝云相吐吞西山积翠多爽气大江萦练方东奔十年回首如梦到旧事今复闻公言迩来百念已灰冷但愿痛饮穷朝昏新交渐鲜俗缘久省要更觉情怀敦山中蕙帐不落寞无复怨鹤啼惊猿平生有意师老氏以退为进卑为尊致君泽物付公等我乃送老溪前村置之此事勿复道且须吸尽黄金罇蒋山佛果师为缘事来而此土方饥戏赋是诗以发一笑

鍾山禪老天骨奇丛林晏座如孤黑诸方宗仰第一义说法舌作霹雳飞年来为衆建广厦胷中结构良峩巍修梁巨栋资喜舍餅锡不憚东南驰飞腾道俗走檀越堆积金贝罗珠玑此方旱潦异常岁百里稚耄方流离析薪鬻子给朝夕闔境半作婴儿啼坐看缘事莫措手却欲反着僧伽黎未闻兰若泣龙象好把信施賙寒饥向来收拾大宝聚随手散尽真慈悲惟师具眼得空观糴载岂愁华橐归吾言可听勿惆怅无价宝珠元在衣次韵叶少蘊内翰丈雪川上买得弁山石林二首

翰林风度世间无烟若清水置玉壶颯向雪川谋小隐未应鲁国舍真儒平泉草木何须记杜曲桑麻幸可图我亦新沾散人号浮家正欲老江湖

视草金銮不记年却将心事付林泉归居盘谷真良策买得愚溪定夙缘隔竹闻声鸣佩玉挥毫落纸散云烟欲夸水石无穷趣故把新诗得得传

近约周仲居同游阳羨以私故不果见寄筇蕨因成此诗

胜游尚尔阻跻攀自愧闲中亦未闲多谢幽人分笋蕨宛同春日到云山洞天上下烟霞里溪水?环图画间颯过岂能穷妙赏结庐终欲老疎顽

次韵顾子美见示久雨三首

一春常苦雨入夏尚慳晴云物频舒卷轩牕乍晦明下田嗟涨溢高岸惜颓倾蔓草无情思芟除又发生朝来疑欲霁云气复如蒸泥潦疲驰骤晨昏错寝兴及时初可喜失节反堪憎安得西山出层楼共一登中夏犹袂衣泽国信殊候连陰不复开似欲无晴昼涓涓檐间滴馥馥渠中溜苍生环堵完遑恤吾庐漏

寄毛達可内翰并録送魏公别録

穀水柯山蘊秀奇精忠深结冕旒知玉堂视草久推重金椀书名犹恨迟廊庙未应忘泽物江山且复助题诗殷懃寄録韩公事好为斯民更筑基

迂愚聊复隐清时幽事相关只自知满地落花看鹤舞一轩春雨对僧棋闲中日月真销得物外烟霞渐可期坐致时康赖公等不须深遯采商芝

蓴菜

渺渺春湖水拍天紫蓴千里正联緜初抽荷蕖半含露旋摘龙须尚带涎盐?欲调难并美鲈鱼兼忆讎非贤自怜不是知机士饱食空能上钓船

送李泰发吏部赴官阳朔

意气相期会面前谪官邂逅两萧然谁怜兰省鵷鸾友去作桂林山水仙直道事人宁免黜拙谋於我欲争先寛恩下逮宜非久来买梁谿二顷田

阳朔谿山冠百蛮美君远宦得跻攀声名已落寰区内忠信自行夷貊间山作劒鋸攢峻拔水如罗带巧?环此生又作南征计好把轻绡寄一斑

寄李泰发吏部

我生稟赋愚且屯昔游帝所知何因狂言妄发取谴废屏迹分甘麋鹿羣公於何许知姓字迂趾访我梁谿滨平生倾盖意气合谈笑便觉襟怀亲如公材识迈伦等缓步自当居要津胡为亦复作此态出语辄已惊臣邻扁舟归探会稽穴单骑去指苍梧云岭南风土不全恶阳朔山水古所珍郎官出宰乃故事絶徼万里皆吾民布宣德泽被蛮邑犷俗可使风还淳古来节士志沟壑笑视生死同埃尘甘心刀锯蹈鼎镬狗国讎免危其身圣朝寛大幸无比窜谪未久多蒙恩轅驹仗马恋刍豆何用局促声长吞堂堂基业甚宏远岂使扶助无良臣勉?行矣伫旋旆乘兴且访山陰人

同翁士特小饮中隐堂

三伏炎蒸画舸?蓬门聊复为君开松篁?翳罇中绿杖履逍遥池上台小雨乍随云影散好风还逐月光来虚堂夜久羣鷗息枕簟相从亦快哉

士特见和复次前韵

丘园命驾未应?三径还同蒋诩开盘谷初能容蕙帐钧天无复梦瑶台稚年尚忆嬉游处老境相从归去来幸有西山供醉眼不妨吟望思悠哉

同士特游惠山再次前韵

九峯秀色照溪回古寺峥嵘殿阁开漱玉泉声锵石洞郁蓝天影抱琼台来宾情话真难得岩壑幽寻岂易来且复淹留同一醉未应遄櫂念归哉

题周孝侯庙

周侯高节冠千古志气刚明乃如许劒斩长桥戟尾蛟刺杀南山雪毛虎归来一听闻里言折节宁辞远游苦学成名立世共惊徇国忘身乃其所至今血食荆溪滨庙貌崇深日箫鼓我来再拜仰遗像思古伤今怅谁语君不见淮陰跨下已亡奇吟等何羞与为伍

余乙巳春赴奉常召如京师五月四日至京口同似表叔易游北固甘露寺

招提殿阁郁嵯峨占得江山气象多一水下临萦素练两山对峙叠青螺乍欣心目到空濶坐看风云相荡摩景物自新人自老旧游追忆奈愁何

雨中渡杨子江书怀呈似表叔易

波光澹澹橹声圆风软潮平利涉川浩渺云涛连海峤空蒙烟雨湿楼船江山雄伟冠天下景物瓌奇绕目前远蹟禹功须我辈感时怀古一凄然

同似表叔易置酒平山堂

暫停征櫂此从容叹息前贤结构雄心眼乍随天宇濶笑谈不觉酒罇空江光隐见轩楹里山色虚无烟雨中种柳仙翁何处去年年疎翠自春风

过召伯埭游斗野亭次司谏孙公韵

星斗照淮楚綠野如砥平兹亭结构小景物有余清我来值祥暑霁雾褰高薨登临得佳友坐使怀抱倾方塘杨柳合极望菰蒲生仰德思谢傅吊古伤芜城浊酒聊共酌小鱗鲜可烹抱拙卧江海胡为复此行区区萤爝光何补日月明稽古得车马平生笑桓荣

途中书怀

去国飘零伴一星误恩还许谒承明已甘松菊老三径岂有材猷厕九卿晚景故慙题柱客壮怀多谢弃繻生片帆自逐南风起遇坎乘流且麼行

新开河食鰕鱼戏成

平湖渺漫烟苍苍菰蒲擢秀新荷香渔舟演漾出深浦舟中鲜鰕肥而臧传呼就买不论价得钱留鱼鱼眼光细鳞哆口传髻鬣斓斑点黑微涂黄巨盆汲水养余息拨刺奋尾犹洋洋付庖荐酒择困者挥刀切玉芼桂姜麴生风味已醞藉得此更使不可忘松江之鲈不足忆银色詎数縣州鲂惜哉行役难驻櫂一饱未许杯盘常雨蓑烟笠乃吾事安得独钓青茫茫

泗上瞻礼僧伽塔

汤汤淮泗滨实为至人居至人骨已冷灵响初不渝巍然宰塔波金碧耀云衢突兀三百尺势欲凌霄虚乃知天人师宜有神明扶忆昔岁乙未奉亲由此途开关瞻睟容端相不可诬清秋日当午为现摩尼珠蝉联宝铎间悬缀如流苏万目共瞻覩稚耄驩惊呼重来念旧事感叹涕潜如再拜礼双足如师真丈夫

汴上有感

不踏隋池今几日重来空叹二毛侵黄流浑浑帆檣影綠岸森森榆柳陰雨霁鸢鸣呼妇急晓凉蝉噪感人深区区往返何为者谁识先贤用舍心

梁谿集卷十六

卷十七

钦定四库全书

梁谿集卷十七 宋 李纲 撰诗十三【自丁未秋罢相後作及戊申岁四十六首】

序 宝劒聯句

山药 煨芋

食蟹 对菊小饮简申伯叔易小饮即事呈申伯 玉华宫用杜子美韵九月八日渡淮
九日与申伯叔易小饮章华宫用张籍韵 次韵季弟阻雪

善权即事十首 投金瀬有感

题辋川雪图 次季弟韵赋梅花二首

宿黄柏村馆 宁国县圃杂花盛开【二首】

咏草 初见杨花

黟歙道中士人献牡丹有盈尺者为赋此诗自鄱阳泛江至星子 过彭蠡

游落星寺 望庐山

韩德全以小舟相迓於落星寺下

游庐山 过玉涧道人草堂

五老峯 罗汉寺

欲游寻真观不果 栖云庵

三峡桥 万杉寺散珠亭

诸刹以石渠道水有十余里者感之赋诗

序

诗以风刺为主故曰上以风化下下以风刺上主文而诤谏言之者无罪闻之者足以戒三百六篇变风变雅居其大半皆有箴规戒诲美刺伤悯哀思之言而其言则多出於当时仁人不遇忠臣不得志贤士大夫欲诱掖其君与夫伤谗思古吟咏情性止乎礼义有先王之泽故曰诗可以羣可以怨小弁之怨乃所以笃亲亲之恩鵩之贻乃所以明君臣之义谷风之刺乃所以隆夫妇朋友之情使遭变遇闵而泊然无心於其间则父子君臣朋友夫妇之道或几乎熄矣王者迹熄而诗亡诗亡而後离骚作九歌九章之属引类比义虽近乎悱然爱君之诚笃而嫉恶之志深君子许其忠焉汉唐间以诗鸣者多矣独杜子美得诗人比兴之旨虽困蹶流离而不忘君故其辞章慨然有志士仁人之大节非止模写物象风容色泽而已余旧喜赋诗自靖康谪官以避谤辍不复作及建炎改元之秋丐罢机政其冬谪居武昌明年移澧浦又明年迁海外自江湖涉岭海皆骚人放逐之乡与魑魅荒絕非人所居之地郁悒无聊则复赖诗句摅忧娱悲以自陶写每登临山川啸咏风月未尝不作诗而嫠不恤纬之诚间亦形於篇什遂成卷轴今蒙恩北归哀葺所作目为湖海集将以示诸季使知往反万里四年间所得盖如此云庚戌清明日梁谿病叟序

宝剑聯句

造化鑪锤巧山谿鑛璞良精金付欧冶妙手铸干将淬砺呈锋锷【伯纪】飞腾辨耿光青黄司火候【申伯】爪髮助祈禳桃氏几时献【叔正】龙文难久藏鳞皴识松理乙屈认鱼肠黯黯青蛇色【伯纪】炎炎赤帝祥提攜起三尺【申伯】驾驭牧羣狼弹铗悲冯子【叔正】夸鐔悟赵王神功归不试利用运无旁赠客千金直【伯纪】方人百链钢还须玉具饰何用蒯緌装詎使妖腰喜【申伯】当容节士狂纯卢非斌媚巨阙太坚刚郁勃冲牛斗蛇蜒接混茫畴能宝於越俱议刻觥觥擦拭资神土【叔正】珍藏閤宝房斩蛟诚壮勇剗象见鋸鋌韩信归高祖朱云赐尚方雄材元倚仗佞胆已飞扬浑脱公孙舞【伯纪】縵胡庶士伤吴鉤能曲折蜀汉有文章六赐恩何厚三名怨未偿先知吼蛟兕摩钝凜冰霜犬子尝思击【申伯】猿公莫敢当翁归备文武季路戒强梁疾视真何事【叔正】要盟或可臧鑕天隳彗孛适野走旁徨麾拂飞雷电【伯纪】轩昂变雨阳刺强同匕首定乱岂长枪叔向排当御昭王畏拙倡买牛今欲老【申伯】铸鐔岁方穰【叔正】徐国留吴札鸿门蔽顶庄挂颐真贵盛击柱妄披猖曜僭山妖见秦兴水怪彰万人犹可敌一映未应敷不动惊公胜为夸异伯阳断匪犹未妙穿屋始非常止水涵晶莹疎星点角芒聊须为武备何必事戎行要并宗臣履休同小盗裳冲星怜杜子斫地叹王郎【申伯】不假蒙须便真成刃手创新礪如可发故物未应忘【叔正】黠虏称兵急王师击鼓鎗氛埃期扫荡心胆为开张未斩楼兰级那销黔首疮几回开匣罢但欲引杯长聊复防身佩毋为跃水亡报君吾志毕以尔倚扶桑【伯纪】

山药

山家为我斲青冥养就仙芝指掌明风味自应殊紫芋功名初不减黄精藤盘欲荐水霜质石鼎先闻风雨声辟穀留侯正归去淡然悠久见交情

煨芋

今夕何夕夜未央天寒拥炉更漏长缩肩环坐有饥色呼童取芋灰为塘蹲?得火良易熟脱落皮毛如紫玉迭煨迭进争相先笑语颇喧知实腹锦里先生亦不贫家园收拾动千斤凶年自可活妻子美好不减岷江滨邛侯昔游衡岳左懒瓚食余貽半个我今归去隐家山岂复从人覓残颗臞儒奉养亦已微一饱便吟煨芋诗君不见齐公夜半意不噤易牙煎熬燔炙和调五味而进之

食蟹

秋风萧萧芦苇苍野岸郭索纷成行持矛被甲正雄健意气正欲行无旁朝魁执穗似有礼拥劒敌虎何其强野人篝火夜采拨束缚赴鼎如驱羊樽前风味若无敌芼以橙橘尤芬芳流膏斫雪快一饱咀嚼海错皆寻常丹枫夜落吴天霜?稴欲熟千畦黄梁谿白蟹正可钓雏鸡浊酒肥且香先生归去营口腹老饕未许他人当家山渐近意渐适思归岂独鲈鱼乡

九月五日对菊小饮简申伯叔易

渊明爱此九日名对菊无钱可留客杜陵烂醉作生涯青蘂空嗟未堪摘我今鼓枹适长淮坐见幽丛烂熳开自从多病久不饮又尔一洗黄金罍东南节物诚已早翠叶金花为谁好三径荒芜尔尚存未觉出山同小草世间万事皆可忘且须泛此酬秋光平生最爱老坡语菊花开日即重阳

小饮即事呈申伯

夜凉同咏古人诗新月娟娟照酒卮一醉且忻军寇退扁舟似与菊花期衔杯乐圣真吾事泛宅浮家漫尔为归去云山最深处隔江千里幸相思

玉华宫用杜子美韵

阿房但遗基铜爵亦飘瓦兹宫制何朝栋宇妙天下溪山最清絶画手不可写于今黍离离客过泪如洒迺知营宫殿徒以业力假起灭犹浮沕聚散齐一马如何世间土天运欲持把此理贯古今宜有知之者

九月八日渡淮

长淮渺渺烟苍苍扁舟初脱隋渠黄平生见此为开眼况复乞身还故乡嗟余涉世诚已拙径步不虞机奔设空余方寸炳如丹北望此时心欲折楚天清晓作轻寒黄芦着霜声正乾川回金碧隐窳堵风远锺磬闻龟山橹声呕轧归何处笑指江臯寻旧路松菊荒芜欲自鉏盗贼颠翻非所惧【时闻钱塘盗作故云】蟹螯菊蘂风味适且须为尽黄金舟世间种种如梦电此物能消万古愁

九日与申伯叔易小饮

上客相从称玉觞楚天杳杳湛清光紫茱黄菊有佳色白蟹鲙鳞聊共尝自哂三朝为逐客常於九日旅殊方十年往返成何事赢得萧萧满鬓霜

章华宫用张籍韵

楚王初建章华时修梁巨栋如云垂诸侯共落相长鬣示汰往往逃而归当年左史箴王阙祈招之诗为之发固宜便嬖意相当肯使俊乂居周行宫中门户如莲房锦茵绣幕春风香娥媢曼睩肌雪霜侍燕承娱夜未央金石间作侑玉觞兕觥不复称公堂志窥九鼎轻天王翠被豹舄垂琼璫乾谿之辱岂其壽峻宇雕墙涵于酒

次韵季弟善权阻雪古风

岁晏江南三尺雪奕奕漙漙遂连月意浓岂是天纲疎势重便疑坤轴折溪行小艇碎琼瑶自胜缟带随车辙暝投兰若寄僧房更觉千岩鸟飞絶忆昔宣和全盛年嘉瑞应期来自天千官朝贺未央里仰视龙尾垂蜿蜒珠树莹煌青琐闥玉花浮动苍龙阙但将歌舞赏清妍肯信山河会分裂自从国步多艰难寇骑长驱窥汉关陰风惨淡随杀气见雪翻使摧心颜古来治理初无别上国浸强夷浸灭坐令和气变阳春肉食于今未宜忽迂愚放逐恩已寬敢憚道远貂裘寒空余炯炯寸心赤中夜不寐忧千端素髮飘萧头已满百年光景行将半未知梦幻此生中几回看雪光凌乱会当扫动豺狼穴国耻乘时须一雪酒酣拔劔斫地歌心胆开张五情热中兴之运我期皇江汉更洒累臣血

善权即事十首

荆溪移櫂雪漫漫皓色连空眼界寬练带萦回迷罨画玉屏 峯失铜官风飘珠蘂来玄圃槎泛银潢到广寒安得丹青似摩诘生绡写作图画看

十日荆溪雪未晴敲冰聊作善权行最怜击碎琼瑶片欲爱长闻环佩声百仞岩端仙梵过千株松下老僧迎斯游自觉平生少颇怪淹留景太清

雪着谿山澹复浓行舟疑在玉壶中云藏半岭深难见水塞长川邈未通赖有僧房容假榻未应尘迹叹飘蓬劳生梦幻成何事万古闲愁一笑空

山崦溪湾三四家竹篱茅舍暮烟斜仙村自种田田玉梅径疑开处处花近渚水销迷浴鹭远村烟暝数栖鸦年年值雪长为客对此凄然感岁华

小童又报雪花飞深注鑪烟欲起时淅沥乍闻经竹叶飘萧初看着松枝南人共讶何曾见北顾深颦有所思牢落无言自搔首却惊华髮顿成丝

一夜凝寒雪意浓
禅房睡美不闻钟
起看银色三千界
更忆瑶台十二重
戴白苍官尤觉好
折腰青士若为容
暮晴透出寒蟾色
为照溪头羣玉峯

连日风云匝地陰
玉花飞舞满烟岑
竹牕夜色暮方适
书幌朝寒酒倍斟
幸有高人同胜赏
不妨佳处得幽寻
庭前暗积知多少
自策筇枝探浅深

山空鸟雀傍檐楹
景邃惟闻钟鼓声
懒瓚但知煨紫芋
少陵何处斲黄精
江南寇盗休无赖
塞北烟尘迄未平
太息浮生端值此
不如无念契无生

霁色初开雪未融
坐来风撼落长松
林苒藹捷缘饥鼠
洞壑深沉蛰老龙
致远未须金騶裹
凭高且看玉芙蓉
丰年最有田家乐
雪屋何妨入夜春

朝来鸟雀报新晴
乍喜牕间日影明
糝径杨花浑寂寞
倚檐冰柱漫峥嵘
早梅向暖垂垂发
好鸟知时得得鸣
从此阳光渐舒畅
放回春色满江城

投金灘有感

楚王听谗诛五卿
招呼二子同就烹
子胥弯弓见使者
义不戴天非惜生
操瓢乞食困江表
曷尝一日忘郢城
溧水之阳遇真识
壶浆箪食欣相迎
当时追捕尚尔急
杀身灭口意岂轻
霸吴何止服句践
破楚遂以鞭荆平
倒行逆施道虽远
复仇摠愤圣所称
却来访旧欲报德
叹息玉质随流萍
投金浅灘亦何有
聊以寓意通精诚
哀穷进食类漂母
解劒挂墓同延陵
古人已矣不可见
空有史笔垂声名

题成士?所藏輞川雪图

朔风飞雪何漫漫
羣山大半埋云端
蓝田丘壑不易得更
把云雪粧林峦
茅斋竹屋架岩巘
轩楹面势随所安
素华淅沥洒空翠
逼耳似闻声正乾
层崖冻沍石欲裂
飞瀑不碍双流湍
长松落落有生意
连臂下饮惟玄猿
椒园柳浪眇安在
髣髴犹认芙蓉泚
乘危跨蹇者谁子
竦肩缩?何其寒
祗应诗句独有得
不减灞桥风雪间
幽人一去久寂寞
寒藤滋蔓谁能删
生绡数幅写絶景
空有图画今人看

次季弟韵赋梅花二首

冷蘂疎枝烟水滨
江南此地又逢春
年年行路常为客的
的寒花解笑人
雪里暗香来鼻观
风前高格见天真
谁言对尔销愁得
一段清愁特地新

羣芳冻死未招魂
谁使梅花独占春
愿折繁华凭驿使
为传幽思恼诗人
心驰魏阙慙商鼎
路入章江忆子真
莫道广平心似铁
赋辞得得与清新

宿黄栌村館

客館可人意敢怀行路劳轩窗面苍翠棊酒助嬉遨雨过竹声碎风摇云影高人生随处适何必赋离骚寓宁国县圃中桃李杂花盛开感而赋诗

春光不为干戈薄花县纵观桃李开可惜繁华劳剪刻莫教风雨便残摧溪山有意相辉映蜂蝶多情自往来应笑逐臣心似铁客中扶病亦登台

乍雨乍晴三月节半开半合百花枝伤心春望不堪远感事泪痕长欲垂塞北但知随水草江南何事插旌麾上林无限鶯花老应怪来游凤辇迟

咏草

梦觉池塘碧草萋风摇烟湿已菲菲繇繇山色不知远惆怅王孙何日归微质亦知烦雨露寸心终欲报春晖芳根纵腐犹能化舞蝶流莺到处飞

休宁县驿舍初见杨花

山館风光随分好方塘碧长萋萋草杨花摇荡入疎帘又是一年春色老

黟歙道中士人献牡丹千叶面有盈尺者为赋此诗

平生爱花被花恼每见牡丹常絶倒自从丧乱减风情两年不识花枝好迺来谪堕烟雨中行色日与春光浓今夕何夕见粲者颇类壽安千叶红岂知黟歙深山里乃有此花端若此不论玉板与鹤鵒可亚姚黄并魏紫嫣然见我如感伤似诉处此非其乡吾衰多病不解饮对尔叹息空持觞人言老境花如梦献此殷懃情已重蜡封瓶贮可多时惆怅洛阳今不贡

自鄱阳泛江至星子

我行黟歙间山陇如黏蚝涧水互萦绕路石何境磬深谷四无景峻岭干云霄朝行岚气合暮宿怪禽号吾虽一险夷无乃徒御劳及兹夏潦涨弭节俯江皋试命具舟楫聊以释烦嚣巨浸与天永东流日滔滔来檣与去櫂倏忽驰千艘进舟枕席间舟子巧所操江山递隐见景物资游遨颇同谪仙人醉着宫锦袍长啸倚桹楼轩然咏离骚心随八极远身逐秋鸿高风帆擘巨浪大櫓驾云涛百里须臾间千里不崇朝快哉可以贺把酒持蟹螯

彭蠡

神禹治水江为最逶迤透蛇锤作滙泓澄不独阳鸟居浩荡端使羣川会羣川已会江不湍朝宗到海东南安烟收云歛望不尽眼界始知天宇寬世传扬澜并左蠡无风白浪如山起我今

谪官此中行何事恬然风浪止阳侯也自可怜生不学世人皆世情好风已借一帆便霁色更增双眼明晚来画舸鸣六櫓超忽千山如脱兔波心突兀见星宫云际峥嵘望庐阜世间此景良不多洞庭三峡真么麽共浮大白期一醉对此不饮当如何

游落星寺

一气升沉谁所肇陨星为石古不少羣川会处渺无涯坠此精坚镇江表坐令释子开梵宫栋宇规摹浮玉小窈窕楼台四面通汹涌波涛千柱?我来端是好幽奇一叶飘然陵潏渺初疑牛女在银潢更讶灵槎经毕昴星房月殿夜沉沉水色天容秋杳杳恍如清梦到天门欲驾颺轮憇蓬岛尘世喧囂那易得幻境去来何日了心闲境寂付幽人衲被蒙头任昏晓

望庐山

多山不省庐山面江上初从望中见秀骨苍顔五老人顾我欣然如素善香炉峯顶紫烟浮瀑布遥看银汉流云舒霞卷互明灭倏忽变态无停留却疑清梦寻丘壑风物何为宛如昨纵令真是梦中看梦未觉时良不恶平生所愿今乃偿寛着日日游山房青鞋布袜久已办百钱拄杖聊徜徉

韩德全以小舟相迓於落星寺下

故人一别两寒暑鴈断鱼沉杳何所那知迎我落星傍一叶凌波听掀舞胷中耿耿初自若身世悠悠乃如许且须酌酒浇肺肝慎勿开口论今古

晚出南康游庐山

舍舟星子渚遂作庐山游空蒙杳霭间十里松桂秋草木吐香润泉石交横流乃知山中物一一皆其尤岚逼空翠湿峯高紫烟浮心闲云出岭眼净龙还湫月壑夜窈窕风林晚飕飕稍闻钟磬声迴觉梵宇幽平昔念清赏孰云今乃酬似非人间境须向物外求顾揖虽不暇吟哦浩难收聊将诗纪行一洗他年愁

过玉涧道人草堂

道人妙弹琴能作醉翁操人亡琴亦亡颇为识者悼草堂玉涧边芜没已秋草總帟鹤惊空药杵香余搗竹光净如洗桂子寒不扫松风肃泠泠犹想琴声好

五老峯

五峯秀出如五老须髮苍然长美好问之不肯道姓字俨若子房从四皓商山采芝亦已久汉庭辟谷何其早优游相与定储皇携手江湖共幽讨化为峯石寄山巅下视尘寰真电扫衣冠

想像犹伟然容貌至今初不槁祇因明月见当时有白云来问道逝将筑室近峯前岁晚相依得相保

罗汉寺【寺有玉涧金池】

梵宫台殿古松桂碧参天玉涧碎寒石金池开小莲循渠穷水脉策杖到岩巔渐入庐山境从参五味禅自罗汉院欲游寻真观雨作不果遂次栖贤闻寻真景物尤美留为异日不穷之赏赋诗纪之

羽人之宫邻五老杖屨欣然事幽讨那知一夜雨翻盆山路难行愁滑倒世间违意常八九万事皆然宁自保山灵岂是秘幽奇欲结清欢故相恼传闻景物冠庐山小殿飞楼更精巧古潭摇荡明月光綠萝青松覆烟草屏风九叠云锦张古来诗句谪仙好山中道士不出门玉杵金丹手亲搗我方放浪谢冠裳未觉山林迹如扫真游恍有不尽缘容我他年来访道

栖云庵【罗汉长老为退居之地求子名之有大蛇其後】

禅老幽栖地云峯尺五天江湖縈縞带世界廓青莲说法三乘外藏身万象巔潜虬蟠不去应听祖师禅

三峡桥

我昔曾作云安行道逢除书还玉京至今遗恨不一到与听三峡流泉声此来又谪武昌去庐山当道欣所经栖贤寺前小三峡拭目便觉增双明黄牛明月坐中见瞿塘艳瀨森相迎山寒草木郁葱蒨逼耳似闻猿鸣悬崖乱石互回转震吼正坐不得平珠跳云沸巧濺射晴昼雨雹驱雷霆壮哉造化融结此故使水石相喧轰妙音流出无尽藏乃与衲子门庭争飞桥鼉肩跨虚碧面对五老峯崢嶸我来云物为开霁当暑万壑松风生提携更得二三子杖屨不辜丘壑情垂餠得水不敢漱老坡旧约今寻盟

万杉寺散珠亭

一派飞泉落坐隅跳波沸石散成珠道人谛看空蒙际颗颗圆明定有无

诸刹皆以石渠道水有至十余里者感之赋诗

庐阜秀江南凝结尽云母泉源乃云腴甘冽固其所悬为瀑布垂蹙作龙鸾舞交流涧谷中厥味皆鍾乳僧坊有能事致远劳汲取凿石为通渠计里不计步回环绕山麓高下映檐庑蜿蜒虹腰转溜溜螭头吐沛然饮濯余灌溉及园圃谁将造物智作此济衆祖慙劳逸则永心一力乃举岂惟小物然万事尽如许吾道何其衰寤寐慨思古

梁谿集卷十七

卷十八

钦定四库全书

梁谿集卷十八 宋 李纲 撰诗十四【在湖外作五十七首】

谷帘泉 再游庐山感怀

开先寺漱玉亭 瀑布

简寂观 归宗寺四咏四首

偶成 灵汤

庐山戏成 圆通寺与觉老步月 诸刹以水激磴磨殊可观

子弟游天池余以病不果往

戏赠东林珪老 西林寺

同许右丞游东西二林【许右丞诗附】

太平观植瑞香可爱恨不及其花时

白公草堂 琵琶亭

过渊明故居 德安食枇杷

云居勤老以书见邀不果往

憇潭田精舍【诗佚】 闻子规

云岩月林堂成古风【诗佚】

戏题墨梅 兜率寺

玉溪亭 过苦竹岭二首

通城送季言弟二首

季言送至湖外往无为挈姊旅衬

寄王周士絕句二首

寓居僧舍东轩池莲盛开珪老有意见过张子公以圆监见寄作诗答之

早起有感

小塘飞云

读留侯传东轩夜坐

浴罢和东坡韵次韵谪居三适

怀季言弟并简仲辅叔易

次韵张子公见寄二首

余久不饮酒雨後晚凉悠然独酌戏成

叶落无因再游道林岳麓

谷帘泉【世称谷帘第一惠山第二】

甘泉多自名山出世品谷帘为第一溜澠之水不易辨臆说詎敢评得失庐山深处为谷帘度岭穿云费时日道人裹饭时一到敲火烹茶资野逸坐令仆隶致餠鬻是非诚否良难诘世间知味定何人食蔗多谓甜於蜜居然真伪相混殽往往循名因去实何似家山陆子泉石缝迸出苍龙渊山中空洞乳满腹一派下作梁谿源清甘着舌久不散持以瀹茗增芳妍华堂石甃与覆护好事汲取肩相骈有时置酒饮其上醉涤肺腑尘烦蠲减题寄远无伪者贵贱均饮初不偏彼如幽人在空谷此若佳客临风前未须细较味优劣且问所处谁为贤余幼尝一到庐山再游已三十年矣感怀二首

梦想庐山三十秋却因谪宦得重游禅林处处逢清赏山路人人识故侯絕岭半将云幕覆飞泉长作玉虹流平生丘壑真吾志一洗胷中万斛愁

香炉峯顶紫烟凝三峡桥边雪浪惊不为迂疎成远谪岂能萧散个中行云霞映带松萝色殿阁深严钟磬声回首世缘真梦幻故应长此寄浮生

开先寺漱玉亭

未游漱玉亭先诵东坡诗手持芙蕖跳下清冷中疑非谪仙不能为此词後翁三十年我亦游於斯飞桥已堙没故迹多推移空余高岩与深谷落日惨淡松风吹白龙依旧出青峡散沫下作清涟漪古来陵谷会迁变况乃景物资人为云间灏灏吐寒月清光不减翁当时相望一世发孤笑坐使万古生长悲

瀑布

我昔游太华矫首望仙掌瀑布如悬河斗落五千丈空蒙雨雹飞湏洞岩壑响及观庐山瀑未觉快清赏飞泉出山腰半派隐层嶂沈吟谪仙词其或过所獎传闻山之巔峯岫列屏障银河落九天喷薄殊异状倒挂三石梁无乃在此上逝将随羽人裹足一同往怀哉不可得空积青霞想

简寂观【陆修静故居】

高士不可见云乡空旧居烟岚飞瀑外露石礼星余松老未归鹤沼深清见鱼何人得丹诀应有枕中书

归宗寺四咏【紫霄峯墨池】

孤峯秀拔翠崑迢峯顶虚无是紫霄从此上宾朝帝所直须稳跨玉龙腰

溪流宛转若翔鸾翠色涵虚特地寒底事舞余窥碧沼祇应误作镜中看

右军真是墨中仙到处成池岂尽然祇有此间疑可信白云书法至今传【羲之受书法於白云先生今庐山白云洞也】

光射苍岩石镜屏我来一现岂无情谁云显晦知时节长伴空山寒月明

偶成【东坡题漱玉亭石柱云玉局散吏来游而余领洞霄】

洞霄吏上紫霄峯漱玉亭游玉局翁人物风流何可并山林趣舍略相同是非论定千年後身世尘劳一梦中我是骑鲸谪仙裔赤鯶相逐御清风

灵汤

石甃灵汤列道周玉池金屋未相侔涤尘时有幽人到不与骊山共一流

客言庐山往年之盛今不逮远矣戏成此诗

福地禪林海內無盛衰亦與世緣俱祇應泉石不知老長伴烟雲得自娛
種杏仙家今寂寞獻花衲子亦乾枯我生頗恨來游晚也勝不來空看圖

圓通寺與覺老步月

石耳峯前松桧香月華天影夜茫茫道人試道依溪水何似曹溪一派長

諸刹以水激磴磨殊可觀爲賦此詩

疊石壅寒派湍流洄溪誰將方便智成此妙圓機輪輻互高下波濤郁翻飛
磨牙通旋斡磴杵紛昂低玉粒已粲粲琼花亦霏霏雖存機械巧利澤成博施
試語漢陰老使知渾沌非惟當善用心功與天地齊

子弟輩游天池余以病不果往

雲山積翠倚穹蒼仙聖靈踪寫上方瑞像世傳藏錦綉神光人說似清涼
心安是處皆歡喜眼正無時非吉祥我病未能尋勝境殷懃爲爇一爐香

戲贈東林珪老

我游廬阜南山北師住二林東院西試問遠公求作佛何如陶令醉如泥
苦邀名山同蓮社笑送幽人過虎溪千載風流久寥落更煩拈出與提撕

西林寺

東林大禪苑殿閣杰以雄西林乃律居僧房小玲瓏泉流庭庑間宛轉如鸞龍
花竹深窈窕松蘿郁青葱縱觀魯公書遠揖峭直風余碑雖崢嶸一掃凡馬空
安得數椽地介居二林中當有遠公流策杖時相從

翰方舍舟九江適會仆射相公道過二林得非所期相顧嘆息輒爲長句用志勝游且以叙別

公爲逐客向何州我亦求家賦遠游邂逅二林成晤賞寂寥千古想風流
玉鐙溪堰涼吹榻蓋偃松蘿翠滿樓明日分携重回首鑪峯空見紫烟浮

道出廬阜偶值崧老右丞同游東西二林蒙示佳篇輒次來韻

迂疎又復謫南州假道江山得勝游杖履欣逢長者轍笑談同訪遠公流
風搖杉桧驚寒夢烟鎖峯嵐繞翠樓回首中原意蕭瑟此生飄泊任雲浮

太平观道士植瑞香於檐庑间可爱颇恨不及其花时为赋小诗

道人心境闲种花白云乡交柯碧珊瑚薿薿衆叶光弱质资灌溉孤根怯清霜治畦檐庑间晏
温借朝阳我来恨太晚不见花吐房想像正开时淡子兼微黄濯濯炫秀色霏霏?天香空余风
露枝璀璨绕迴廊地灵草木润长与兰蕙芳明年花更好矫首遥相望

白公草堂

乐天平生不可及谪官乃作庐中集香炉峯下结草堂石屏纸帐随时给维摩丈室亦何有天
女散花空结习何须江上听琵琶泫然泪滴青衫湿

琵琶亭

去年假道浔阳城扁舟夜泊琵琶亭却忆当时醉司马送客江头秋月明今年谪官又重到扫
地乃缘蜂寇经轩楹回首已不见况欲更闻弦索鸣西风萧萧芦苇响月色下照江波清祗应
风月长不老坐閱尘世犹流萍我生多病苦忧患未能忘世那忘情移船相近夜悄悄侧听疑
有檀槽声

过渊明故居

舍櫓溢浦城税驾柴桑里缅怀靖节翁衡宇兹避世乞食虽甚贫折腰肯为米陶然傲羲皇独
得醉中意三径不愿余五斗聊自诤优游晋宋间俯仰无可愧若人骨已朽凜凜有生气斜川
尚环流层城亦秀峙如何高世士庙貌乃颓圯谁将一觴酒荐此菊与杞朗咏归来辞感叹成
坐起

德安食枇杷

故人饷卢橘烟雨江上村芳津流齿颊细肌丰温谁为黄金弹偏宜白玉樽返源旋味处寂
寞自无言云居勤老以书见邀不果往戏作此颂寄之

吾师脱浮玉振锡来云居江边波浪已远去山顶风雷应晏如我来问津师草草咫尺云岑怅
难到师既拘折拄杖不出山我亦把定纆绳不下道试将此意示丛林抚掌呵呵同絶倒

闻子规

江南四月五月时空山月夜啼子规劝我不如归去好我方远谪何时归中原杳杳暗锋鏑纵
使得归何所益不如且住碧山中为凭青鸟通消息

戏赋墨画梅花

道人画手真三昧力挽春风与游戏露枝烟蘂忽嫣然自得工夫畦径外由来黑白无定姿浓淡间错相参差炯如落月耿寒影翳若宿雾含疎枝羣芳种种徒繁縟脱略丹青尤拔俗妙质聊资陈氏煤幽姿好伴文生竹世呼墨竹为墨君此花宜称墨夫人鈿华不御有余态世间顔色皆非真年来妙观齐空色天花时露真消息试烦幻出数千枝不费梁谿一丸墨

兜率寺

随意寓禅房小轩风露凉山幽云傍户林迴月窥牀竹色晓增翠桂花秋欲香无人知此意天影碧茫茫

玉溪寺

玉溪何日寺古佛亦尘埃高阁云初卷小池莲半开竹风清枕簟松露滴莓苔寂寞溪边路幽人自往来

过苦竹岭二首

絶岭横鸟道江湖从此分沈吟洞庭野怅望具区云去住本非我别离空念羣子归啼苦竹肠断不堪闻今日江湖境双眸岭上明山光随地好秋气逼人清陇水初分处云鸿欲别情离羣古来有叹息未休兵

次通城送季言弟还锡山二首

半载相从作远游物华苒苒又新秋江南山水共清赏湖外风烟成独留家远为传安稳信时艰增重别离忧官渚此去无他地怅望自登黄鹤楼

陆离长佩切云冠泽畔行吟且纫兰我已安心为逐客子今何事亦抛官江湖鸿鴈初寥落风雪鵲鵲相急难归去家山见诸季为言努力且加餐

季言送湖外欲往无为挈其姊旅櫟归锡山悯其勤赠此一絶

送我谪官迁姊殡人生如汝亦劳哉他时寄骨西江上烦汝【阙】得得来

寄王周士絶句二首

偶然一病便休官万石岩中处已安底事书来犹剩语也知习气扫除难

年来百念冷於灰梦到江湖又一回从此故人音问近洞庭秋色鴈初来

寓居通城僧舍东轩池莲盛开竹庵珪老有意见过戏赠此篇

道人庵外万竿竹何似小池千叶莲月白风清谁共此心闲境寂两翛然好抛筠粉娟娟净来看荷珠的的圆飞锡傥能真过我直须趑取晚霜前

张子公以圆监见寄作诗报之

我观大圆监莹澈靡瑕垢清光溢寒蟾碧井窥古甃水池絕埃尘玉璧无肉好不知何年铸欸识杂篆籀冷然照肝胆况烛须眉秀英英张公子辍赠意独厚使我正衣冠更似别妍陋嗟予罹百忧半世困驰骤苍浪齿髮衰已觉成老丑幸兹置寬闲闭户念往咎冠欹与佩落颠倒散襟袖平生遭谤讟白黑坐分割逝将杜德机渐可塞智窠岂徒齐美恶端欲一昏昼监焉何所施无乃虚授受聊持戏凤匣藏此蟠螭纽精光秘不露犹使魑魅走詎逃鸚鵡形时作蛟龙吼君看方寸间此物谁蔽覆灵台湛虚明广博含宇宙纖毫莫凝结万象悉笼囿宁随古今移不逐面目皱人人各具足一一谢雕镂无尘安用拂表里自通透诸佛亦何为四智此为首祖师持出游法器久已就那将清淨眼更入烦恼薶随缘梦幻年坐閱蛩触鬪本来妙明心一念证无漏持此还寄君试问承当否

早起

秋晓凄然枕簟凉小牕残月尚临牀追寻梦境烟云散起傍荷花风露香慨念关河心黯黯谛观身世意茫茫樽中有酒聊须醉造物於人自叵量

有感

三年再谪堕江湖何啻经行万里余环绕真同循磨蚁羈穷更类局辕驹自怜许国心犹壮却笑谋身术已疎二圣未还民未靖尚思痛哭奏囊书

小塘

谁使精庐凿小塘坐令天女试新粧风摇翠盖珊珊响露裊红衣冉冉香棊罢雨声来絕巘梦回月影上修廊我生本自无根蒂触处为家殊未央

飞云

飞云游碧虚夭矫龙蛇势因风态无穷抱日色增丽飘然欲安归出岫非本意为霖竟何成跂望增叹喟

读留侯传有感

秦人失鹿解其纽羣雄竞逐死谁手天方注意隆准公故使留侯作宾友圯上老人亲授书言从志合真其偶捕取项籍如婴儿指麾诸将犹猎狗运筹决胜帷幄中楚汉存亡良已久谁言刘季田舍翁祇听人言本无有但能信用子房谋何妨抱持戚姬日饮酒

东轩夜坐

苒苒流年催白头此生那向此淹留天高露下物华肃月澹风清僧宇幽河底光芒萤照水草间悲怨蚓吟秋夜凉人閒家千里别是羈臣一段愁

浴罢追和东坡韵

华髮短且稀无事兰汤沐及兹秋暑阑头垢资一浴平生冠裳汗往咎不可复聊将清泠泉濯此空洞腹荒山薪易采巨斛水良足融融气通肤烂烂光溢目枵然勺用瓢何必池甃玉呼童为爬背自胜飞燕沃振衣絺綌凉曦汗风前竹却来就绳牀一枕睡初熟忘世安用愁抛书且休读梦中期汗漫万里归一瞩吾生真寄耳来者亦何卜沛然乘天游无心且缘督

次韵谪居三适

旦起理髮

未能运河车上泝泥丸宫鬢髮忽已华飒若冒雪松清晨起自理濯此万里风萧萧栉齿快淅淅气脉通呼儿助千徧缓手无忽忽我生本疎懒误堕轩冕中野马就羈勒何如雾生鬢握髮凉未能散髮聊与同金丹变鬢色缘合亦易逢逝将弄云海一访安期公

午牕坐睡

涉世几灭顶欲为多掣肘功名如浮云於我亦何有惟兹华胥国风土谙已久坐中可断取聊试维摩手昏昏一卷书兀兀三杯酒飘然到其乡自觉乐而壽嗟我蒲柳姿未老先已朽何尝慕管萧但欲师广受未能脱羈束洗濯愈瑕垢已矣姑两忘蘧蘧学庄叟

夜卧濯足

养生贵养足不假衾与裯温温斗水间可以解我忧月露夜寂寂风雨寒飈飈呼童具盆汤足若双蛭投老来嗜坐卧突兀鹰在韝有时起游行恍讶烟云浮自从饱涤濯此病良已瘳虚堂日千转轻捷如沐猴

怀季言弟并简仲辅叔易

我昔谪沙溪尔送至虎丘相?观劒池共坐苍崖陬霜寒草木衰肃肃天地秋慷慨论世故岂复

知离愁中间谪云安尔病家山留独与仲及叔分携浙江头潮声来海门风雨助飏飏银涛蹙天起泛此一叶舟及兹谪武昌尔复从我游回环溪壑间渺若双沙鸥长江快清旷庐阜探奇幽行尽江南山始次湖外州传闻浙郡兵盗用官库矛夜深赤白丸杀吏起相雠怀家动归心触热遽还輶作别今几时此情浩难收块处谁共语把酒无与酬凭高欲望远独上黄鹤楼吴越天杳杳风烟晚悠悠顾嗟祢处士坐困鸚鵡洲天骄气方横盗贼起如蠹中原暗锋镝江汉屯貔貅尔归议迁徙已有定论不黄屋尚飘泊吾敢怀燕休但愿复相见一解无穷忧泫然念苍生岂为吾身谋

次韵张子公见寄二首

处世何殊梦里人大千沙界几回巡万缘尽处方为我一念生时已是尘幻境是谁从出没舌根何物辨甘辛安心须到无心地始契如来清淨身

功名身外两悠悠有意功名已可羞与世浮沉非我意观时进退岂人谋不能为国辟百里祇欲归耕老一畴祸福死生皆默定初非舍去亦非求

余久不饮酒雨过晚凉悠然独酌戏成此篇

崎 历落真可笑飘泊流离初不羞苍髯华发老张鎬火色鸢肩穷马周身長九尺安所用命酒一斗聊销忧醉中起舞颇自得慷慨不知风雨秋

叶落

铿然一叶已惊秋况复纷纷巧见投振槁不禁风淅淅催寒长共雨飏飏洞庭波起初微脱云梦霜高浩不收舞砌穿帷不须扫萧骚从伴逐臣愁

去岁寓长沙游道林岳麓真天下絶景也今相去不远无因再游赋诗见意

衡山之陬湘水滨道林岳麓天下少蟠冈复岭相掩重石磴松门逶萦绕经行多在烟霭间台殿半开云木杪衲僧宴坐禅寂余朝磬暮钟清杳杳凭高旷望楚天濶志气已逐飞鸿矫橘洲枫浦指顾中俯视更觉长沙小风檣浪舶千艘屯丹楼粉堞百雉缭苍茫晓色散平川点缀残霞映疎蓼从来篇翰谁最优沈宋杜韩争表表古今尘迹散烟云独有斯文传不了隔年清赏回首空斯欲再游真潏渺苍梧九疑云漠漠青草洞庭风嫋嫋有时幽梦一到之觉来枕席清秋晓人间万事不由人安得忘情逐猿鸟

梁谿集卷十八

<集部,别集类,南宋建炎至德佑,梁谿集>

卷十九

钦定四库全书

梁谿集卷十九 宋 李纲 撰诗十五【在湖外作三十六首】

五哀【并序】 黄陵庙

望九疑 望洞庭十首

促织 秋风二首次子美韵次韵艾宣画四首 西风竹

画草虫八物 读二疏传

着迂论有感 建炎行【并序】

五哀诗【并序】

湖湘间多古骚人逐客才士之所居故其景物凄凉气俗感慨有古之遗风余来武昌慨然怀古作五诗以哀之

楚三闾大夫屈原

楚怀听秦诳身作咸阳鬼当时屈原争坐困椒兰毁襄王复不悟远作江南徙行吟沅湘间形槁颜色悴着书称离骚风雅齐厥理鸱鴞况小人鸾凤喻君子眷眷不忘君一篇三致意纫兰采杜若冠佩空自伟举世混浊中谁与同乐此忠臣会遇难千古共一轨人情疎馥亮物能使软美存亡反覆间悔及良晚矣嗟嗟屈子心芳洁畴与比日月可争光尘垢安能滓聊从太史卜肯逐渔父醉甘葬鱼腹中怀沙汨罗水千秋身後名芬馥同菹芷夫岂椒兰徒据势长不死

汉梁王太傅贾谊

贾生公辅器弱冠游汉廷高论帝王略妙极理乱情出意对诏令惊倒诸老生从容画筹策籍籍飞英声是时汉初定颇杂秦霸称力还治古制物物与正名改朔易服色庶几礼乐兴仪章悉草具舆议当公卿岂知绦灌徒潜毁如建瓴天子疎不用谪去长沙城翩然渡湘水投书吊屈平弃鼎宝康瓠鋠刀钝青萍微言岂悼屈聊复以自评长沙地卑湿安得壽且宁及观鵬鸟赋颇觉生死轻晚奉宣室对夜半前席?文帝岂易遇所言略施行虽不位卿相儒者良已荣梁王坠马死泣涕亦伤生受任乃如此孤忠本精诚奈何君臣义浇薄返不明缅怀古人心使我气拂膺

汉处士祢衡

祢生抱逸韵乃是古之狂负才颇傲物齿少气方刚怀刺游许下漫灭竟摧藏肯从屠沽儿借面与吊丧伟哉孔文举国宝借路傍上书荐一鹗欲使观翱翔振翼云汉间永垂虹蜺光飞兔与腰褭灭没不可望观其慰辞荐器识岂易量平生轻魏祖纵口成否臧召令为鼓吏阅试当改装蹀初散步掺挝作渔阳声节既悲壮容态随低昂岑牟与单绞裸袒易故裳却来坐军门画地声琅琅曹瞒点如飞嗜杀犹虎狼缩手不敢动送与刘及黄娱宾赋鹦鹉节奏陵笙簧援笔不加点粲然已成章高才竟为累兰麝空余香至今鹦鹉洲葭苇秋苍苍丑哉杀士名千古不可忘

唐中书令褚遂良

贞观萃羣英实为太平基褚公初侍书遂以颀亮知谏疏屡献纳对扬竭论思翩如丹山凤来为箫韶仪飞鸟自依人此言已堪嗤更云潜刘洎厥理尤足疑贤者虽已矣可以此心推薰莸难共器臬鸞不同栖故令敬宗辈污染成瑕疵我观永徽间武氏盗政机祸端始牀第几使国祚移当时河南公力谏伏丹墀顿首愿还笏正身田里归义气动人主回天初庶几鄙哉英公积一言遂成非坐令牝鷄晨啄丧靡有遗元勲顾命老远窜湘江湄茫然不复召讎忆抱颈时卑湿所不堪须髮尽成丝至今潭府帖志士生长悲

唐工部员外郎杜甫

子美以诗鸣今古无对手当时谪仙人长句颇先後精深律切处故自非其偶而况郊岛徒何敢窥户牖有如登岱宗衆山皆培塿又如观武库劒戟靡不有高辞媲丘坟古意篆蝌蚪苍苍雪中松濯濯风前柳云烟纷卷舒雷电划奔走澹然衆态俱沾丐随所取平生忠义心多向诗中剖忧国与爱君诵说不离口饥寒窘衣食容貌村野叟自以稷契期此理人胜不中兴作谏臣戎马方践蹂上疏救房琯亦足知素守一跌不复振造物意岂苟欲使穷吟哦专志如蒙叟辛苦盗贼中妻子或颠仆布衾冷似铁晨爨乏升斗冒雪斲黄精呼儿理鱼笱萧条秦陇间不废诗千首依严遂入蜀幕府备宾友草堂浣花溪颇复事南亩乱离又飘泊累若丧家狗云安麴米春巫峡风土陋扁舟下瞿唐留滞湖湘久家事竟何成丹诀空系肘凄凉耒阳县醉死竟坐酒虽烦微之铭不返鄂杜枢谁将樽中渌一酌泉下朽诗篇垂琳琅长作蛟龙吼

黄陵庙

湘妃庙貌枕江湄不见当年鼓瑟时玉佩风摇云冉冉翠帷烟湿草离离凄凉清泪留班竹寂寞深林叫子规断简遗编查难考无人为立退之碑

望九疑

洞庭渺漭芦苇秋九疑联绵烟靄浮重瞳一去不复返苍梧云物空疑愁两阶干羽久寂寞千

古夷夏相仇讎安得垂衣转琴轸薰风为解吾民忧

去岁道巴陵登岳阳楼以望洞庭真天下之壮观也因诵孟浩然气蒸云梦泽波撼岳阳城之句追古今絶唱用以为韵赋诗十篇

登楼窥洞庭沧波渺无际波间起飞龙惨澹带云气云雷倏变灭天水共澄霁矫首望君山镜面青螺髻地枕江湖阔秋来多鬱蒸山城少见日雾雨长冥冥今夕定何夕月华风露清於此兴不浅栏干聊复凭秋色到极浦层空霭行云长劒抚玉珥欲降云中君桂旗澹偃蹇风驭何缤纷淹留岂予愿沐浴空兰薰此身堕江湖恍若在清梦梦中亦何为思古亦长恻心驰关塞远目与飞鸿送贾客不知愁凄然笛三弄江湖渺无涯怅然怀震泽地分吴楚远天共云水白鲈鱼正堪脍蟹螯亦可擘何日归去来秋风思迁客西风木叶脱洞庭水层波苹芷满洲渚有怀忧思多眇眇帝子愁欲降山之阿兰蒸奠桂酒浩唱闻九歌湖光如镜平风雨一摇荡蜿蜒舞翠蛟汹涌叠银浪帆樯走阵马势出霄汉上吾生幸可惜何事鱼腹葬濯足洞庭波秋高翠增岳美人渺何在使我怀抱恶悠悠江湖深坐阻关山邈采兰亦寄之终朝不盈握重湖望不极秋色蔼残阳洲渚云沙白菰蒲霜叶黄飞帆适沅澧回鴈过潇湘楚客经行处依然兰芷香江湖秋日暮远客若为情宿舸沙边?征鸿云外声星河摇倒影鼓角起江城去国同王粲登临百感生

促织

促织哀吟不自劳草根牀下夜萧骚我为逐客宜无寐何事??至日高

秋风二首次子美韵

秋风淅淅吹南山胡骑凭陵窥汉关金舆玉辇幸沙漠两载于今犹未还中原道路尽豺虎择肉渐觉来荆蛮运筹帷幄策安在母事推注移文间

秋风淅淅吹客衣日光奄奄浸已微自我行吟楚泽畔三月不通家问稀清霜冷落岁将暮仆御借问何时归我今萍梗任飘泊怀土却悟从来非

次韵艾宣画四首

竹鹤

磊落胎仙谁最宜此君节操凜霜威琴心试与弹三叠从看婆娑舞羽衣

黄精鹿

黄精苗盛雪初融叠叠峯峦紫翠重岩前双鹿卧底事祇应眷日长新茸

杏花白鷗

春入羣芳此最妍露枝烟蘂裏成团不知闲客来何处独傍花枝仔细看

莲龟

红粧翠盖晓参差水面浮游有戏龟谁道千年解巢叶也知曳尾已多时

西风行

西风陨高梧秋暑退残热岂不欣微凉寤叹惊急节岁华聿云暮露气繁霜结干戈随凝陰敌骑壮胜铁边防久凋残河洛据戎羯中原无长城何以限逸越传闻今年春关辅已蹀血强兵健马区乘间肆陵蔑况兹柔脆乡岂复劳齷齪江汉非不深天险为人设要害无重兵一苇自可絶恬然不为备庙筭岂有说翠华果何从大计宜早决缅怀沙漠寒矫首望汉月杳无鸿鴈来宁不野鼠掘何时金凤辇复返苍龙阙羣生有安堵国耻稍一雪努力肉食谋傍观心已折

画草虫八物

蚊

所志惟一饱聚声如雷车秋来腹长饥扑扑喙作花

蝇

情态真可憎画成因误墨薨薨乱鸡鸣惨惨变白黑

蜂

杪忽腰如壶聯绵窠若屋母轻怀袖间防此蚤尾毒

蝶

粉翅摇春晖翩翾自来往勿贪花草香触此饥蛛网

螳螂

飘飘緑衣郎怒臂欲当辙君王求勇士嘉尔能仗节

蜻蜓

双睛碧珠莹四翅青罗薄但知逐飞蚊不复顾黄雀

螭蛄

戚戚鸣岁暮不知有春秋肯信鲲与鹏同作逍遥游

络纬

露下草根冷戛然长悲鸣谁知两股间能作无穷声

读二疏传

都门供张设祖道冠盖如云声浩浩送车百两知为谁太傅少傅同归老道傍观者为泣下贤哉大夫能自保酒酣礼毕辞决去脱若林泉放鱼鸟当时宣帝重法律视遇公卿同隶皂杨惲所坐抵语言赵韩之诛亦草草故令二傅动归心未必筋骸果衰稿父子相随出汉关归来自觉故乡好黄金散尽宴亲宾日治酒馔供洒扫肯将田宅遗子孙清白传家最堪宝寂寥千载想风流知止不辱何其早

着迂论有感

长笑梁谿翁平生有余拙於今欲行古无乃亦痴絶施之廊庙间放步足已跌下帷更潜思又复广陈说从来坐言语得谤今未歇曾不少创惩譊譊祇强聒惟堪覆酱瓿讵足议往辙掉头谓不然此理君未察立言与行事垂世初不别身穷言乃彰貽范有前哲周文拘羑里易象乃成列仲尼道不行褒贬代赏罚屈原困椒兰泽畔采薇蕨离骚体风雅光可争日月虞卿罢赵相梁魏颇屑屑世亦传春秋端为穷愁设圣贤垂简编往往因愤发避谤不着书陆子良已黠区区祸福间何足议宏逵泛览古人心一一可坐阅大略观规模微情析毫髮幽光发干将潜愿戮饕餮会有知我人玩味为击节安知千载後观乐无季札岂能继潜夫粗可仿荀悦子云方草玄解嘲何可缺

建炎行【并序】

余去岁夏初自长沙闻尹京之命率义旅入援王室次繁昌得元帅府檄审寇破都城二圣北迁号恸几绝至当涂见赦书上登宝位且喜且悲意欲一到行在覲新天子道胷中所欲言者即丐归田里此其志也行次淮楚间忽闻已告廷除拜荷特達之知感极而泣以六月朔抵南都有旨执政出迓赐燕於金果园具奏丐免即入城是晚召对内殿叙陈国家祸故上嗣位慰天人之望泣谢首被选用顾材力不堪弗敢当乞遴择足以副公议者上慰劳久之即遣御乐押赴都堂治事翌日再对复力辞三上章表皆优答不允是时伪楚张邦昌以太保同安郡王领三省事五日一会都堂即建言邦昌僭窃不宜与政臣不可与同列凡受伪命者皆宜正其罪以为臣子之戒具奏十事皆当时急务度能从乃敢受命有旨付三省施行又与执政廷辨

至泣拜以辞上感动始罢谪邦昌与受伪命者翌日乃受告因为上规画所以扞御金寇奉迎銮輿之策且谓河北河东国家之屏蔽虽颇为寇所?没然其兵民戴宋之心坚甚朝廷不议救援使人力屈而附贼为患非细於是荐张所招抚河北傅亮经制河东二人者皆有将帅材具甲兵钱粮而遣之又请车驾一至京师见宗庙慰都人之心度未可居则巡幸南阳驻蹕示不弃中原而西通关陕可起兵马东通江淮可运粮饷南通岭蜀可取货财北援三郡两河与贼争利天下形势莫便於此有旨遣使经画又劝上益募兵买马缮器仗修军政择将帅置帅府要郡以经略天下是时剧贼李昱扰山东杜用起淮南李孝忠乱襄皆遣将讨平之其余降者十余万皆分隶诸将使渡河讨贼才两月间威令稍振窃以奉令承教可幸无罪中兴之功庶几可成不意同列者害之陰以巡幸东南为安动上意八月五日告廷迁左仆射既命二相矣於是显沮张所而罢傅亮连数日争之不可得则丐罢政奏上以谓方朝廷艰难不敢充位备员以虚负天下之责章三上再押入一对後殿力求去上度不可留乃除观文殿大学士提举杭州洞霄宫泛舟东归已而言者交章诋在相位施設不当且诬以倾家赀犒叛卒闻者骇愕赖天子睿明有以察其不然姑褫职俾以宫祠居武昌闻命即上道适濒江盗贼扰攘间关道路踰半年始達湖外追思前事恍如梦寐而连年奔走繚络万里初不知其所以然夫出处去就大臣常事不足道也然金人今春果扰关辅蹂践京东西河北兵民叛为盗贼皆如所料銮輿远幸未有可还之期翠华飘泊未有定居之所生民未休息中国未乂安此臣子之所夙夜痛悼而寒心者也噫天实为之谓之何哉掇取出处去就大概赋诗百二十韵目之曰建炎行览者庶有感云

金人初犯阙太岁在丙午殊恩擢枢廷愧乏涓埃补两河未奠枕杖钺出宣抚乞身缘谤讟窜谪旅湘溆明年丁未夏被命尹天府颇闻环京畿四面尽豺虎金汤虽可恃忧在人不可御见危思致命入援哀义旅旌麾亘江湄畏景触隆暑忽传元帅檄果有城破语銮輿幸沙漠妃后辞禁籞皇孙与帝子取索及稚乳礼文包旗裳乐器载笋簏金缯罄公私技巧到机杼空余宗庙存无复荐簋簠凄凉苍龙阙寂寞玉华庑畴能供衙粟谁与献肥羜无从执羈勒安得生翅羽号恸絶复苏洒泪作翻雨继闻宣赦书宝位居九五神明有依归率土尽呼舞皆言汤武姿勇智天所与向来使贼营英气讐骄虏建牙出危城帝命纘鸿绪不然艰难中何以脱?繇兹雖不戴天兄弟及父母尝胆思报吴枕戈慙在莒齐侯何足称句践不须数周汉获再兴宣光定神武愿言覲行在玉色亲黻黼丹诚遂披陈秘策得宣吐谋身虽拙计许国心独苦片言傥有合丐骨归壠亩飞帆过金陵鼓枻适淮浦遥传告大廷命相比申甫顾兹斗筭器何以动尧禹深惟特達知感慨激肺腑如何日月光可以萤爝助舍舟行汴堤驱车赴延伫伤心兵火余民物亦凋瘦中使乘駟来茶药宠赐予拜恩丘山重坐使瘵疴愈行行近南都戈甲震金鼓将佐迎路傍往往多旧部冠盖如云屯赐燕金果圃谢免径造朝泪落湿殿础初称宗社危天地同愤怒次陈国多难实啓中兴主末言樗散材初不堪梁柱鼎颠将覆餗栋桡必倾宇况兹扶颠危正赖肱与股大舜举臯陶小白相仲父耕莘与钓渭端不乏伊吕惟当博询访考慎作心膂封章屡恳辞帝曰莫如女往作砺与舟不复容伛偻叩额宸扆前臣敢论伪楚易姓建大号厥罪在砧斧柰何坐庙堂乃与臣等伍更效老猎师十事听裁处天子亮精诚一一皆可许因陈御戎策用此敢予侮河外须救援屏蔽资扞拒问谁可驱策因荐亮与所京师当一到九庙陈鼎俎却为巡幸计不可去中?南阳光武兴形势亦险阻西通关陕区东与江淮距三巴及岭海宝货可运取据要争权衡黠敌谋必沮募兵益貔貅买马增牧圉号令新帜旗仗械饬干櫓军容

久不振整顿就规矩潢池盗弄兵羣恶相啸聚偏师命剪除快若猫捕鼠余寇悉欵降分隶归籍簿蒐裒将帅材赏罚颇有序经营年岁间庶可事大举灭敌还两宫雪耻示千古却隆太平基不愧宗与祖岂知肘腋间乃有椒兰妬含沙初射影聚毒陰中蛊规模欲破碎谋议渐齟齬固知骀峭姿自不敌媚妩恨无回天力剔此木中蠹安能破铜山但志燃郿坞时危敢尸禄抗疏愿引去涕泗对冕旒非不恋轩宁君臣以义合无使赭舂杵帝度不可留乃听上印组扁舟返东吴却理梁谿櫓多言更萋菲贝锦成罪罟尚荷皇天慈薄谴居鄂渚我来雪霏霏及此岁将暮崎岖山谷间避寇如避弩行尽江南山始踏湖北土风烟愁浩荡鸿鴈拆俦侣沉吟白云飞怅望黄鹤翥晴川俯汉阳葭菼满鸚鵡家山渺安在幽梦到别墅三年再谪官繚络万里路浮游幻境中尘迹叹仰俯翠华尚蒙尘吾敢念门户但嗟机会失事势契先误今年寇益横春夏蹂京辅万骑略秦关余毒被陈汝五陵气葱葱中原鬱膈膈弃置不复论弥望皆莽卤旌旆满江淮寇钞连齐鲁六飞竟何从秋晚尚江浒何时包干戈礼瑞奠璜璫斯民安田畴余谷栖廩庾四方道路通舟车走商贾吁嗟乎苍天乃尔艰国步譬犹大厦倾着力事撑柱居然听颓覆此身何所措又如抱羸瘵邪气久已痼不能亲药石乃复甘粃糲膏肓骨髓间性命若丝缕安得和缓徒举手为摩拊驯致海?康苍生有环堵

梁谿集卷十九

卷二十

钦定四库全书

梁谿集卷二十 宋 李纲 撰诗十六【在湖外作五十二首】

中秋望月有感

张子公再得湖倅因书寄之

闻翁士特携家居胶山

十六夜月二首 读诸葛武侯传

秋夜有怀二首 崇阳道中作四首宿岩头寺

寓崇阳西山定林院有感二首

岩桂二首 次韵郑教授见寄【郑诗附】 灌溪三咏三首
题青龙兴化禅院方丈闻山东盗破黄州

得诸季书报薛克寅范茂载胡仲俨皆物故感怆有作

山居四感四首 山居四景四首

山居四适四首 山居四卉四首

渊圣皇帝赐宝劔生铁花感而赋诗

和渊明贫士诗七首 次韵渊明九日闲居

初寒 蜜蜂

病牛

中秋望月有感寄叔易季言并简仲辅弟

前年河内中秋月玉帐初寒铁衣滑羽书狎至不成眠坐伴清光到明发是时季弟在幕中病
隔纱窗共谈说出师未捷身已危继被宸章召还阙去年中秋寓宋都金针篆字看除书夜同

叔弟坐月下仰望赤气环斗枢经营两河初就绪斥罢将帅良非图陵晨廷争不可得上还印
绶归东吴今年谪官旅湖外又值中秋有佳气纖云四卷天无河月色满庭如泼水缅怀诸季
会合难但与阿宗相劳慰举杯邀月应笑人处处相逢万余里我生端遇国步艰出入将相三
年间功名富贵亦何有慨念四海悲丸澜心驰沙漠关塞远身堕江湖风露寒不须更问世间
事但愿对月身常闲

张子公再得湖倅因书寄之

吴兴别去久飘蓬清梦时游苕霅中十里荷开生色画四围波泛水晶宫喜君再拥朱幡贰顾
我今成白髮翁侥幸寬恩听归去定须相访五湖东

胶山兰若幽胜予寓梁谿久而未之到闻翁士特携家居其间赋诗见意

闻道胶山寺幽深过惠山僧房穿窈窕石溜落孱顔地僻车马絶山空松桂环钟声清霭外刹
影白云间旅泊君得计飘流吾念还时危暫安适景胜且跻攀耿耿寸心赤萧萧双鬓斑抢攘
悯阨越寂寞堕荆蛮风月三千首轩裳五两纶戎车伤浩荡彩服美徧斓天地旌麾满江湖鸥
鹭闲何时共樽酒世路正多艰

十六夜月二首

清光殊未減碧落絶纖尘绛阙飞金镜银潢渡玉轮霏霏烟霭灭湛湛露华新倚幌人千里遥
知翠黛颦嫦娥长不老宫殿复新秋丹桂欲飘子素蟾相对愁林寒枝绕鹊江迴水明楼逐客
几弦望又看成玉钩

读诸葛武侯传

天下兵戈正云沸伏龙凤鷁那可致掉头自作梁甫吟壠上躬耕方得意将军汉裔真英雄惠
然三顾草庐中心期脗合论世故如鱼得水云从龙指麾顾眄定巴蜀抗魏连吴分鼎足受遗
乃在永安宫叹息君臣难继躅南征五月深渡泸上疏北伐遵遗谟连年动衆扰关辅数战未
必非良图大星夜坠惊营垒壮志雄谋嗟已矣至今鱼腹浅沙中八阵依然照江水

秋夜有怀二首

草木又摇落关河方阻深龙庭空入梦鴈足不传音黄伞游何处苍生思至今娟娟江汉月空
照逐臣心坐失金汤险摇摇翠盖飞空闻八骏御不见六龙归天地干戈满潇湘鸿鴈稀汉宫
秋夜月依旧照彤闱

崇阳道中作四首

我行江南春初见农事作及兹旅湖外秋稻半已获隔林闻晚春藁秸积篱落童稚亦熙熙田
家有余乐溪清石齿齿山远木苍苍落日烟景暮西风粳稻香茂林归鸟雀平隰下牛羊月露
浩如洗凄然欲结霜承平无事久万里尽农桑谁使干戈起坐令民物疮关河成阻絶京洛亦
凄凉尚喜江湖外斯民游乐康连年兵甲兴犹幸东南稔食足无叛民间里得安枕传闻江淮
间蝗旱今犹甚努力事變调未寒心已凜

宿岩头寺

天气沉陰迫季秋通城早发宿岩头催寒小雨松桂湿出岫孤云嵌洞幽餅锡真还行脚债鉗
鎚罕遇点胷俦夜深云散千峯月注目寒空独倚楼

寓崇阳西山定林院有感二首

踰年去天阙长是寓僧庐云水志方适轩裳情已?午风吹茗椀夜月照牀书忘我兼忘世此生
真有余清霜初入候落叶半辞柯岁晏遽如许时艰将若何关山空岁月江汉自风波【阙】

岩桂二首

汲水养岩桂最怜风露香黄花金琐碎碧叶玉光鋨却忆七闽路有怀中隐堂相看久不厌气
味自难忘【闽中多此木而余植於梁谿中隐堂凡数十本秋至开花香闻数里】

远地见佳木依然如故人难当禪客意为折数枝新自耐风霜早不慙兰蕙春殷懃置瓶水寂
寞伴闲身

教授郑昌龄诗

雅望三朝第一流端如砥柱屹清秋爱君炯炯无他志许国堂堂不自谋梦绕苍龙新阙角凉
生黄鹤旧楼头中兴真主须真相未雪双銮耻未休

次韵郑教授见寄

泛梗飘萍逐水流故人书到正霜秋扶颠拯溺多迂论问舍求田更拙谋犂道凄凉沙磧外钩
陈寂寞楚江头【阙】

灌溪三咏【智闲禅师道場】

灌溪

道人卓锡使泉飞一派清甘满石陂谁识灌溪真境界也知只见沕麻池

妙峯庵

结庵雄踞妙高峯孤秀巉然万境通不见德云空住处却须相遇别峯中

清凉境界

松萝?翳色苍苍盛夏南风草木香普愿衆生无热恼不应身独占清凉

题青龙兴化禅院方丈

廓然丈室湛虚明地僻山空万象清滴翠老杉清净色锵金流水妙圆声殷懃禅客邀迎厚寂寞宰官身世轻野鹤孤云无不可会须还作二龙行【院在青龙山去黄龙不远余皆未到故云】

闻山东盗所谓丁一箭者拥数万衆临江破黄州官吏皆保武昌江湖间骚然未知备御之策感而赋诗

时危贵权谋盗贼本王臣招徕驾馭之自足张吾军蠹蚕固有毒犀象亦可驯恩威悦得所摩拊还其淳光武制铜马曹公用黄巾资其战大敌且以苏良民去年议招抚乃以此义陈置司未閱月来者如屯云奈何力沮罢坐使复纷纷传闻中原寇铁马动成羣虎兕出於柙玉石同其焚京辅困抄掠遂及江湖滨东南久平定郡县无城闢天堑非不险谁与守要津古来重镇地控扼非其人小敌已震惧大者当何云人谋自阻適天意詎不仁安得回阳辉一令四海春

得诸季书报薛克寅范茂载胡仲俨皆物故感怆有作

新故继凋丧初非因荷戈波惊川阅水霜早叶辞柯世上故人少録中新鬼多浮生端若此伤感意如何

山居四感

鬪雀

翩翾啁噪绕高檐粒食枝栖安用贪怒鬪不知缘底事败毛轻毳落毳毵

战蚁

欲雨山云四面垂空庭蚁战久相持只应薄伐檀萝国正是槐安献捷时

噪蝉

修竹茂林山寺幽蝉声如沸满清秋吸风饮露无求世嘒嘒何为噪不休

吟蛩

月露凄清湿草根寒蛩偏向夜深闻随时感气成悲怨不是来销逐客魂

山居四景

松风

岁晚苍官鬓髮青回风披拂自悲鸣不容逐客多归梦故作江湖波浪声

竹露

森然绕槛翠琅玕瘦节疎枝特地寒底事叶垂浑不舞金风零露夜溥溥

岭云

玉洁烟轻一片深飘然出岫本无心孤飞远映碧天去也解重来为作霖

牕月

月出松林已半廊故开牕牖纳清光嫦娥应讶年来瘦千首新诗书满牀

山居四适

酌酒

山禽唤觉不成眠兴若长鲸吸百川满酌甃瓿当金盞陶然便作酒中仙

烹茶

安眠饱食更何求只欠云腴茗一瓿龙凤不须夸北苑枪旗且与试中州

读书

平生长作蠹书蟬老去犹资慰我心每到古人名节处慨然掩卷一沉吟

焚香

假榻禪房夜寂然瓦炉石餅熬龍涎霏微縹緲根尘际吸引方知鼻觀圓

山居四卉

拒霜

道人多种木芙蓉晓着清霜分外红万叶千花本何有因空成色色成空

鸡冠

昂然璀璨绕堦除端似羣雄領衆雒只有一冠无別德誰云魯國固多儒

菊

重阳旋覓菊花栽青蘂蕭疎殊未开我似陶潛正无酒休將冷艷笑空罍

槿

步履秋風見薜華疏籬灼灼繞田家朝开暮落君休笑纵使多時終委沙

淵聖皇帝賜寶劒生鉄花感而賦詩

靖康寇騎窺帝闈中原慘澹生烟塵帝謂細柳真將軍總兵欲使揮浮雲解賜寶劒御府珍魚腸盤屈松桧紋縷金錯翠舟瑤琨剗截犀象如羔豚驅逐狂寇出邊垠妖腰亂領徒紛紛龍吟蛟吼清夜聞乃知此物能通神迺來杜門空念恩旧事誰復可共論今晨开匣觀龍文鉄花綉澁蒼蘚?東南卑濕相蒸熏坐使三尺光鋸昏安得斨砥來峨岷淬鋒歛鐔礪發新霜寒氷滑无皴皴指麾尚可清妖氛愿提此劒平戎獯犬羊虽衆氣可吞手斬可汗羈可敦天旋日轉还兩君書銘却勒燕然勲摠憤刷耻志乃伸壯怀聊可垂乾坤緹綉什襲傳仍昆卫綰之賜何足云

讀東坡和淵明貧士詩寄諸子侄云重九俯迓樽俎蕭然今余亦有此叹因次其韵將録寄梁谿諸弟以發數千里一笑

迂?得遠謫漂泊將何依區區一寸心未報三春暉歲月不我与急景驚翻飛方看社鷺來又見霜鴻歸寬恩尚廩祿未迫寒与飢荒山俯佳节九月誠可悲

淒涼寓僧舍寂寞坐松軒虽辭万鍾祿尚未自灌園仲尼犹在陳我厨晨有烟藜羹得一飽滴露味自研寒窗寫周易更咏五千言儒生真可笑餓隱稱其賢

何以寫我意寄之朱絲琴鍾期久已死千古无知音弃置不复彈調家難絳尋東籬采青蘂渌

酒聊孤斟千驷所不顾一斗诚可钦陶然又复醉谁识渊明心

肮脏老张镐寂寞穷黔娄古人日已远此意谁复酬墨翟突不黔仲尼辙环周岂为一身计实怀四海忧沮溺但躬耕吾岂斯人俦有酒且径归无酒不必求

佳晨迫九日旅食寓江干颇同谪僊人漂泊来铜官樽俎可萧条菊蕊渐可餐回风吹青松惨惨岁将寒但有杯中物不愧簞瓢颜一觴复一咏明月窥禅关

自我去廊庙远举如飞蓬徇道敢怀禄谋身殊未工空余耿耿心不慚楚两龚幸然诸季贤意气与我同何当恩听归兵息道路通却寻惠山路杖策得相从

我家梁谿上梦堕江湖州块处无与语谁复为朋俦远怀作重阳置酒临清流插花独我少感物增离忧我亦事杯杓阿宗相献酬欲寄一枝菊川途方阻修

次韵渊明九日闲居

天地一逆旅於焉寓此生羣陰惨将暮共爱九日名气清霜露肃天朗山川明月户蔼夜色风林飒秋声东篱菊有华可以延我龄采采金琐碎泛此玉觴倾一醉遗万物况复轩裳荣渊明骨已朽千载同兹情时危丹砂远岁晏将何成

初寒

霜早风高寒气萌可堪独傍楚江行貂裘已敝苏季子葛屨更穿东郭生卯酒晕红朝玉颊夜炉燃鼎沸松声妻孥千里应思我怅望牛衣此日情

蜜蜂

秋风淅淅桂花香花底山蜂采掇忙但得蜜成功用足不辞辛苦与君尝

病牛

耕犁千亩实千箱力尽筋疲谁复伤但愿衆生皆得饱不辞羸病卧残阳

梁谿集卷二十

<集部,别集类,南宋建炎至德佑,梁谿集>

卷二十一

钦定四库全书

梁谿集卷二十一 宋 李纲 撰诗十七【在湖外作五十五首】

胡笳十八拍

重阳日醉中戏集子美句二首

夜寝梦游泗上观重建僧伽？

次韵渊明读山海经

和渊明时运诗念梁谿故居

梁谿八咏八首

和渊明归田园居六篇

小雨

客饷新橙有感

偶得双鲤付厨作鱠以荐一觞

和渊明拟古九首

和渊明停云篇

和渊明荣木篇

和归鸟篇

和劝农篇

和渊明游斜川

和渊明已酉岁九月九日之作

胡笳十八拍

昔蔡琰作胡笳十八拍後多仿之者至王介甫集古人诗句为之辞尤丽缛凄婉能道其情致过於创作然此特一女子之故耳靖康之事可为万世悲暇日效其体集句聊以写无穷之哀云

第一拍

四海十年不解兵朝降夕叛幽蓟城杀气南行动天轴犬戎也复临咸京铁马长鸣不知数寇骑凭陵杂风雨自是君王未备知一生长恨柰何许

第二拍

黑云压城城欲摧赤日照耀从西来强箭如沙射金甲甲光向日金鳞开昏昏闾阖闭氛祲六龙寒急光徘徊黄昏寇骑尘满城百年兴废吁可哀

第三拍

千乘万骑出咸阳百官跣足随天王翠华摇摇行复止黄尘暗天道路长金盘玉筋无消息色难腥腐馐风香晚将末契托年少遂令再往之计堕渺茫

第四拍

筋箠精坚更马骄猛蛟突兽纷腾逃春寒野陰风景暮尘埃不见咸阳桥中原格鬪且未归陇山萧瑟秋云高安得壮士兮守四方一豁明主正郁陶

第五拍

汉家离宫三十六缓歌慢舞凝丝竹铁骑突出刀枪鸣惊破霓裳羽衣曲明眸皓齿今何在细柳青蒲为谁緑桃花依旧笑春风风动落花红蔌蔌

第六拍

忆昔霓旌下南苑攀条弄芳畏日晚只今飘泊干戈际寒尽春生洛阳殿梨园弟子散如烟白马将军若雷电城上春云覆苑墙回首何时复来见

第七拍

星宫之君醉琼浆矫如羣帝骖龙翔龙池十日飞霹雳齐言此夕乐未央玄圃沧州莽空濶羽

人稀少不在傍深山穷谷不可处托身白云归故鄉

第八拍

黄尘散漫风萧索杀气森森到幽朔五十年间似反掌瑶池侍臣已冥寞千崖无人万壑静旌旗无光日色薄万事反覆何所无注目寒江倚山阁

第九拍

五陵佳气无时无龙种自与常人殊一去紫台连朔漠骨肉满眼身羁孤金鞭断折九马死遯遁岂即非良图人间俯仰成今古岂忆当殿羣臣趋

第十拍

人生失意无南北去住彼此无消息黄蒿古城云不开时复看云泪横臆猛将腰间大羽箭一箭正坠双飞翮汝休枉杀南飞鸿道路只今多拥隔

第十一拍

天子不在咸阳宫翠华拂天来向东江间波浪兼天涌中有云气随飞龙干戈兵革鬬未止无复射蛟江水中江边老人错料事时危惨澹来悲风

第十二拍

渔阳突骑猎青丘天马跋足随犁牛幕前生致九青兕苦寒赠我青羔裘万里飞蓬映天过岁云暮矣增离忧如今正南看北斗长安不见使人愁

第十三拍

圣朝尚飞战鬬尘椎鼓鸣钟天下闻岸上荒村尽豺虎衣冠南渡多崩犇何时铸戟作农器欲倾东海洗乾坤干戈未定失壮士旧事无人可共论

第十四拍

大麦乾枯小麦黄问谁腰鎌狄与羌汉家战士三十万此岂有意仍腾骧安得突骑只五千长驱敌人尽走藏近静潼关扫蝼蚁为留猛士守未央

第十五拍

我生之後汉祀衰经济实藉英雄姿遥拱北辰纒寇盜杳杳南国多旌旗伤心不忍问耆旧垂老恶闻战鼓悲中夜起坐万感集谁家捣练风淒淒

第十六拍

雨声飈飈催早寒岁暮穷陰耿未已燕山雪花大如席寒刮肌肤北风利战罢归来血洗箭阵前部曲终日死漫漫玄天叫不闻日夜更望官军至

第十七拍

时危始识不世材成王功大心转小豺狼塞路人断絶一門骨肉散百草江头宮殿鎖千門不知明月为谁好何时眼前突兀见此屋鷄鳴問寢龙楼晓

第十八拍

风尘瀕洞昏王室咫尺波涛永相失漂然时危一老翁洒血江汉长衰疾筋一会兮琴一拍青山落日江湖白身欲奋飞病在牀此心炯炯君应识

重阳日醉中戏集子美句遣兴

青山落日江湖白飘零已是沧浪客老去悲秋强自寬青蘂重阳不堪摘东流江水西飞鷺传语风光共流转急觴为缓忧心捣休语艰难尚酣战圣朝尚飞战鬪尘何用浮名绊此身时复看云泪横臆晚来幽独恐伤神篱边老却陶潜菊开花无数黄金钱且看欲尽花经眼饮如长鲸吸百川只今漂泊干戈际方外酒徒稀醉眠腐儒衰晚谬通籍杜曲幸有桑麻田故畦遗穗已荡尽中原君臣豺虎边安得务农息战鬪武陵欲问桃花源夜寢梦游泗上观重建僧伽塔才两层塔以今春同普照王寺焚荡殆尽岂大士有意再来此土乎觉而赋诗以纪之

至人於世何所求随缘应物初不留缘合则应散则休起灭幻境如浮沤僧伽塔踞淮泗流火焚水转岁几周国家崇奉德更优雍熙所建无与俦层层金碧巧雕 凿石作址蟠龙虬檐间宝铃韵琳璆势插霄汉神为谋瑞光焕发垂珠旒青天白日烂不收崔巍高殿耸飞楼千楹万柱烟云浮谁知兴废相绸缪铁马驰突横戈矛四方羣盜起如蝨付以一炬成荒丘慈航济物衆所麻舍我去矣真可忧昨宵梦到淮上洲宰堵再造工方鳩千章巨木回万牛此岂有意重来不塔成大士还旧游更扶休运三千秋

次韵渊明读山海经

清霜落乔木翠色飒以?而我正卧病萧然寓精庐起坐无与欢散帙聊观书心游千载间超诣非舟车更酌一杯酒荐此果与蔬缅怀陶渊明雅志与我俱还看枕间屏乃是归来图古人不予欺岁暮将何如

余筑室梁谿之上三年而後成手植花木甚衆遭值世故未尝得安居其间岁暮羈旅慨然念之因和渊明时运诗以见意

卜宅梁谿成非一朝面山枕冈远市近郊修竹茂林翠连烟霄松桂吐香杞菊长苗旁临清流尘纓可濯小阁 然九峯远矚岂无华宇於我自足兄弟埵簷於焉相乐春服既成如浴乎沂风乎舞雩咏啸而归自我离羣潜然涕挥拊心念咎电往莫追今夕何夕梦还我庐稚子候门两髮髭如携幼入室浊酒倾壶慨我寤叹谁复如余

梁谿八咏

中隐堂

不在山林不市朝且将图史当渔樵桂花想见秋来盛香满西风取次飘

棣华堂

兄弟埵簷人所推棣华堂里远相思艰难世路风霜急正是鵲鵲原上时

文会堂

亲宾情话欵衡门把酒挥毫气吐云何日寬思返三径一樽重与细论文

九峯阁

小阁峥嵘面九峯暮天秀出碧芙蓉孔明本有躬耕志却合归来看卧龙

舫斋

画舫临流四面通绿窗面面有清风年来始会虚舟意正在江湖波浪中

怡亭

缥缈危亭枕曲池红粧翠羽自参差晚凉小饮谁同醉定把圆荷当屈卮

心远亭

境寂心闲物物宜倚栏更看岭云飞晓猿夜鹤应思我正好归时犹未归

濯纓亭

画栋飞檐俯碧流何时归去舣扁舟不须更把尘缨濯直取冠裳裂即休

余既居梁谿有田园可乐又平生爱钱塘湖山之胜常欲治书室湖上买小舟浮家泛宅往来苕霅间以终其余年此素志也自乙巳岁为世网所婴此事便废而浙郡相继兵叛盗起景物佳处鞠为灰烬今余又羁旅湖外邈无归期乃知世间不如人意者十常八九岂不信然因和陶渊明归田园居六篇以自慰云

东吴信佳地碧溪绕青山我居枕溪傍卜筑亦有年山空乳满腹迸出苍龙渊余波滑无声下灌负郭田秋风粳稻香落照孤鸿间黄鷄与紫蟹日满樽俎前酌酒燕宾友挥毫散云烟常谓享此乐可以终华颠岂知縈世故扰扰不得闲侧身念吾庐怅望情依然

一为世网婴未遂税尘鞅驱驰途路间空积溪山想我居今若何岁月忽已往三径将荒芜松菊日应长泛舟苕霅间吾意诚已广时危方艰难长恐堕渺莽

人生不满百七十亦云稀吾年甫知命飘泊犹未归江湖岁将晏霜露沾人衣沧洲惠询约坐恐此志违平生爱武林湖山良可娱连年兵火作景物成丘墟常愿买一?筑室湖上居开轩苍翠间手植松千株浮家同志和来往得自如樽中酒不空乐死不愿余那知今乃尔此怀坐成虚已矣何所道万法皆本无

每爱贺知章勅赐监湖曲而我不须多数顷亦已足世故俛仰间反覆若碁局良辰逝莫留胜游当秉烛明月照芳樽坐待东方旭

我昔居梁谿梦断长安陌倒冠与落佩志气良自适花前饮春朝月下舞秋夕自从丧乱来光景驹过隙无复旧情怀扰扰为物役寤寐忧他人自麻初不绩长啸休去来劳生亦何益

小雨

小雨廉纖作晓寒绕檐?竹正檀栾穷愁着论墨长湿磊块浇胷杯未乾庄舄显时犹越语鍾仪縈处亦南冠百忧万感无时了更赋新诗强自寬

客饷新橙有感

湖外新橙也自黄故人相赠解包香捣蘂正鱠双鱼美荐酒聊持一瓣尝湛岷旧栽千树橘洞庭初落满林霜木奴供给何须道怅望东吴云水乡

偶得双鲤付厨作鱠以荐一觴

双鲤从来丙穴东霜刀缕切脍花红银丝藿叶自争巧玉筋金盘未觉空德饱姜侯情已重诗成杜老志应同秋风笠泽鲈尤美何日扁舟入手中

和渊明拟古九首

风霜已摇落天气犹清和聊持一樽酒自饮还自歌朝心愁不开暮髮白已多朱顏与綠鬢飒若霜萎荷流年不我与不饮如老何

惊心如伤禽衰质若凋柳百年能几时处世安得久寤寐若有失哀我泉下友平生不识面况复銜杯酒知心乃如斯此意岂可负管鲍贫时交於古亦云厚范张久已亡今人那复有

阶祸初甚微智者能要终被髮祭於野辛有知其戎时平足谏佞世乱多奸?坐令夷乱华诞謾本晋风重华不再作吾道何其穷已矣可奈何此生如梦中

弃置帝王宅乃欲保一隅一隅岂易保巨盗连荆舒眷言浙江西有我先人庠兵火偶不到聚族於焉居羈束未得归田园日将芜江边畏羣盗岁暮当何如

立国有常理恩威抚要荒胡为决藩篱坐使寇及堂凭高寓远目中原气苍茫昔时冠盖地今日争战場玉辇幸朔漠金椀出北邙腐儒献奇策碧衣坐称昂傥无济时略何以绥四方苍生未苏息慨叹情内伤

吾怜靖节翁食少衣不完弃禄缘束带贵身遂抛冠簞瓢有余乐不慙陋巷顏成趣园日涉息交户常关返观富与贵一尘集毫端素琴久无弦适意自可弹处心慕黔娄抗志同伯鸞斯人骨已朽霜霰时方寒【一作云松枝干老不惧风霜寒】

古今纷变态兹道长若兹处世或穷達否泰各有时岂无磨与涅贵在不磷淄達人乃大观曲士多致疑所以古圣贤立此垂世辞殷懃论出处欲使学者思周公尚居东仲尼岂余欺愈钝久乃利艱脆当安之我亦道穷者欲赋鴟鴞诗

结髮慕古人絕俗期远游如登太山顶志气小九州古今会迁变万壑无停流向来富贵者累累但荒丘汉唐已磨灭况复秦与周惟余节义士可向编简求

青松生高冈无意斧斤采岁寒霜霰深未觉柯叶改梁鸿既适吴管宁亦浮海二子得我心高举不相待士生不逢时命矣何所悔

余来湖外家问不通者累月因和渊明停云篇以遣怀

上天停云以陰以雨我之怀矣川路修阻田园将芜幼稚谁抚鴈信来迟鹤立以伫凄其以风零雨其蒙自去梁谿爰止西江一室萧然卧于北牕块独处此人谁我从岂无轩裳谁适为荣人之为人亦以有情乱离瘼矣弃家遐征知我如此不如无生今夕何夕鹄嫫庭柯栽植其尾迭相鸣和发书占之远问为多兆而未至怀哉若何

霜降木落独松柏苍然颜色愈好因和渊明荣木篇以见意

采采荣木春华于兹及尔素秋风霜瘁之寒暑代谢荣枯有时改柯易叶翩其陨而苍苍松柏
擢干蟠根风霜虽厉秀色长存君子进德以道为门岁寒时艰节义弥敦惟天於余赋此拙陋
材不趋新学惟求旧黽勉夙夜其何能富屡冒艰危内省不疚先公有训岂敢失坠敬慎威仪
圣言是畏鋤刀虽钝弩马希骥一割之功十驾而至

和归鸟篇

翼翼归鸟爰集于林近萃芳郊远依烟岑眷言顾之实获我心丛木茂止憇此繁陰翼翼归鸟
翩然翻飞风高天阔去将畴依云路翱翔倦翮思归矰缴孔多无使患遗翼翼归鸟抚翼徘徊
江湖缈茫有怀故栖顾俦啸侣鸣声和谐愿言不获怅然伤怀翼翼归鸟集于旧条一枝已多
岂俟高标歛翰息影好音交交愿言终此以休永劳

和劝农篇

天临下土是生烝民耕食凿饮乃含其真淳浇朴散巧伪相因谁其还之时惟圣人圣人立政
爰重黍稷设命官司职是播植春勤于耕秋乃有穡储其贏余荒岁足食瞻彼中原祁邳平陆
春日载阳和风肃穆夫耕妇饁俦类相逐少壮竭力逸此耆宿岂无他图惟兹永久利其耒耜
十千维耦带月荷锄侵星耘亩崇本抑末孰敢游手终年厌殍报则不贵千箱万仓以副汝冀
为酒为醴乐此分至仰奉俯畜夫复何愧四体不勤丈人所鄙带经而耕岂废冠履我思古人
希风往轨躬耕南阳无使专美

秋雨初霁天高气清独游山间意欣然乐之因和渊明游斜川诗以纪其事

岁律忽晚晚我生感行休雨余秋气清策杖成独游苍苍松桂合中有清浅流放怀侣樵者忘
机狎飞鸥顾我?散姿自合在一丘但恨尚羈束块处无朋俦独酌谁与共独歌谁与酬此独有
至乐当有知者不盗贼纷满眼世故端百忧置之且勿道独乐未易收

後重九半月菊始开因思东坡言菊花开日即重阳取酒为之一醉遂和渊明已酉岁九月九
日之作

地偏菊开晚乃在秋冬交霜中色艳艳肯逐蓬艾凋感此节物殊为尔再登高玉觴泛金英举
酒望层霄云气有佳色此岂瞪发劳世态互陵灭冰炭方凝焦不如醉後眠意味真陶陶何论
饮而壽且以乐此朝

梁谿集卷二十一

卷二十二

钦定四库全书

梁谿集卷二十二 宋 李纲 撰诗十八【在湖外作五十七首】

和渊明答庞参军

叔易得水晶笔格赋诗见意【叔易诗附】

次韵叔易四絶 山居四咏四首

山居遣兴四首

御画二轴一马一兔各一首

仲辅和寄送季弟诗复次韵寄之

王周士以幅素图万石岩见示

煨芋 蒸栗

摘鬓间白髮有感 初食金橘

灯花 铜鑪

客有馈玉面狸者 冬日闲居遣兴十首

食蟹 食橘

秀容菊

许崧老见和月林堂夜坐诗复次前韵

周元中赋御昼骢马次其韵

送周元中游黄龙山

题峡江萧氏游思贤堂

黄雀 默堂四絕

自鄂渚移居澧阳

翁士特见和山字韵诗两篇复次前韵寄之次韵翁士特试谷廉泉见怀之作

戊申冬至日有怀诸弟时赴澧阳

张氏二甥赋诗可喜

得梁谿家书报黄氏女生外孙

得梁谿家问足慰远怀因和渊明答庞参军之作

剥啄叩门梁谿有书发函读之远怀以娱长少童稚咸安其居森然满前如返我庐一书可宝万金非珍契阔寤叹乃兹相亲鹄不吾欺鸣以告人载询仆夫以及其邻嗟我诸季鷄鸣孜孜左图右书中心好之山川修阻贻我以诗三复佳句实慰所思翩翩鸿鴈暂聚亟分岂无他人非我所欣清宵步月白日看云无遐迩心好音数闻昔我之来鷄鵲将鸣今也岁晏霜露载零言念沙漠有怀玉京终夕不寐羣生未宁怅望东吴慨临西风愿化独鹤烟霄可冲敬慎威仪惟以令终黄髮为期其爱尔躬

叔易得水晶笔格赋诗见寄因次其韵顷与叔易奕而胜得其铜兽鑑制度甚古携行常置几案间今此格宜以赠远与炉为伴故卒章及之

武夫恶文士每见辄不喜排纷须大劒安用毛锥子岂知管城翁功阅着青史羲之笔阵图善战固其理贤哉小谪仙好古良有以独怜中书君飘泊无定止谁将素琅玕实此锦绣筐瑶山列羣峯玉笋连厥趾置君丘壑间未觉形神滓光聯玉蟾蜍含冻共斐几玲珑小九华一一名可指作诗寄远人为洗尘埃耳秀句与珍玩清絕那可拟灿然珠玉间尚许蒹葭倚我生墮江湖放浪谢簪紱尘泓久寂寞秃穎亦頽委当为千里赠勿念一枰耻配此古兽炉缥缈孤烟起【一作香云起】

叔易诗

我居岂无朋席上多可喜欣然秀而庄尚友管城子若人东廓裔策勲在图史勤劳则云多未省相料理提携间游息弃置或未以坐令大雅士反侧靡所止公乎独何为璆琳璫箱篚赠我羣玉峯联縣盖同趾清水出远壑炯不受纖滓佳哉中书君隐此冰玉几铜山岂不好严道或遭指枕石今枕流便可当洗耳我微思公癖玩物讎应拟所欣贤友生相与时徙倚煌煌明光宫簪珥逮冠紱何如山中高人高卧看云委勿嗟秦少恩当念默泄耻尽心竟奚为置此一笑起

次韵叔易四絕句

落日西风粳稻香
畦间散策月荒凉
谁知万顷黄云熟
行客初看插綠秧
笑续离骚赋远游
霜寒云梦杳然秋
何时把钓梁谿上
醉嚼蟹螯余罢休
身闲且作地行仙
谪堕江湖岂偶然
幸有惠连诗句好
不妨青纸寄新篇
初寒一醉万家春
尚有陶翁漉酒巾
五牧潘葑新酿熟
开樽应忆未归人

山居四咏

纸帐

洁如白叠软於氍毹
浪龟纹细结聯雅称
独欹班竹枕最宜深
炷紫沉烟斜风细雨
吴绫暖万草千花蜀
锦鲜何似禅房褚夫
子日高覆幬拥衾眠

竹枕

此君劲节傲风霜
高卧尤宜逐客牀
雅制颇同琴可荐
莹肤端与玉争凉
欲凭幻境成佳梦
故使通中贮秘方
富贵功名本何有
觉来犹未熟黄粱

地炉

小寒聊试地为炉
端为先生病更癯
炙背愿驰金驪裹
藉床初展锦氍毹
耸肩傍壁诗千字
爆栗烧毡酒一壶
便拟殷懃事丹竈
朝晡称火较鎔铄
【一作鎔铄称火候朝晡】

石铫

谁剝苍玉事煎烹
形制深寬洁且轻
鬻沸未看浮蟹眼
飏飏先听起松声
龙头豕腹徒譙诮
铁澁铜腥费挈擎
多病文园苦消渴
煮泉瀹茗正须卿

山居遣兴四首

偶向忙时乞得身
山居岑寂絕比邻
雀罗可设门无客
酒盞频倾句有神
隐背时烦木童子
伴眠犹有竹夫人
苍生未定郊多垒
敢向长沮与问津

三黜先生髮半华
但将笔墨作生涯
已知晏食能胜肉
更觉安行可当车
月好只愁无竹叶
风来自与扫岩花
江边盗贼休窥伺
不是宣和宰相家
【宣和以前宰执恩赐厚甚两年来鲜有

不罹盗贼者平日所蓄皆为巨盗积余靖康初在枢庭半年建炎初在相府两月既无泛恩俸禄亦减又多不请而再经远谪行橐窶甚然亦未尝遇盗而家独全故云】

秋杪幽居分外清
傍檐鸟雀自和鸣
过时黄菊浑无赖
入眼青山独有情
酒後晕红潮玉颊
吟余杖殷金声
前村野老能碁战
时与呼来对一枰

沉陰天色半含情
小院重门昼掩扃
一枕睡余香未散
三瓿茶後酒初醒
山云舒卷闲中看
竹雨萧萧静处听
愁寂最怜霜後菊
案头乾死有微馨

赵叔 运判见示宣和御画二轴其一马举足奋迅将起其一兔正面踞地啮草皆絶去笔墨畦径间意态如生精妙入神伏观叹息感慨因赋诗二篇以赞扬宸翰且叙小臣凄愤之情云

宣和天廐多清新
肉髯汗血皆翔麟
圉人牵来赤墀下
宸笔落纸亲传神
非行非立非驰逐
独写腾身前举足
展沙奋迅欲嘶风
骧首骖驔初喷玉
流云飞电五花骢
庭前榻上双真龙
始知韩干画多肉
坐使冀北羣皆空
銮舆远狩龙荒外
八骏瑶池杳何诣
空留此马落人间
感愤暗洒累臣涕

右马

草枯霜落秋风高
中山之兔初长毫
天姿狡健雅善走
韩卢宋鹊纷腾逃
帝居深沉九重里
何自得此山林意
枯荑咀嚼如有声
缺口长须耸双耳
宣和天子储聰明
天纵将圣尤多能
万机闲暇戏染翰
作此东郭髦鬣髯
黄尘漠漠暗沙碛
属车一去无消息
安得壮士东擒胡
鸡鸣问寝还龙德

右兔

仲辅和寄送季弟诗复次韵寄之

块处江城无与游
芦花枫叶楚天秋
萧然霜鬓伤迟暮
久矣灰心任去留
道阻每怀千里念
时危岂为一身忧
何年棣萼还相映
醉卧元龙百尺楼

新诗寄远慰南冠
坠露遥知饮木兰
素爱少游乘下泽
尚怜子美缚微官
遭罹贝锦如吾少
漂泊兵戈见汝难
华髮比年老兄弟
相思对案不能餐

王周士以幅素图万石岩见示

不须避世向桃源
自有岩中小洞天
漱石枕流尘境外
巢云卧月玉峯前
高怀肯顾三千石
福地真同十九泉
小隐羡君诚得计
我方忧惴老江边

煨芋

禅房夜坐腹半饥寒炉拨火煨蹲鴟冻肤傍煖渐舒畅展转更觉鸣声悲毳衣脱落丰肌滑玉软酥香不劳啮芳甘着颊自生津多病文园正消渴吾生老矣来荆蛮得汝聊助癯儒餐不学当年鬼谷子粪土堆头拜懒残

蒸栗

风霜开栗皱孕此頰虬卵嘉哉古所贍飮餽入筵匱累累紫腰菱烂烂火蚕茧甘腴能疗病炎帝所编纂幽人夜读书坐对铜槃短颺颺石鼎沸焰焰地炉暖式将瓦甑炊剖殼黄玉软乘飮进五六腹已果然满吾尝位将相日食万钱饌荒山啖芋栗自胜太官脔乃知一饱余万品徒过眼聊持荐杯酒不假玻璃盃忧慨不成眠夜寒空展转

摘鬓间白髮有感

吾生足忧患未老头已白鬓间垂素丝揽镜聊一?星星去虽欣种种鲜还戚颇愁日增多尽拔复何益追思少年时緑髮光且泽森然茂云松岂谓少堪惜自从多病後脱落露广额蒲柳姿易衰日与风霜迫萧萧不胜梳扰扰仅盈掬安能上指冠常恐吹堕幘年来涉艰虞更复非夙昔奔驰动万里漂泊继三谪从横蹈危机侈哆困烦啧交游莫援手仇怨惟下石素标宜满头斑髮未为逼何年运河车泝补泥丸宅华颠复变鬢去作烟霞客憔悴楚江滨岁晚将何获

初食金橘

江湖种橘侔洞庭於中小者如龙睛珊瑚枝干碧玉叶结实璀璨罗繁星客持赠我意已重貯以翠笼尤晶荧气含风露更高洁色着霜日微红青匀圆入手讶磊砢甘酸流颊凄芳馨金丸玉齿乍破碎中有沆瀣凝清水厥包忆昔贡宫阙潇湘远物来天局争新效美不论直万颗坐觉千金轻美人转赐入怀袖归来分饷同瑶琼只今八骏杳安在此物亦尔无光精天涯相见两寂寞敢以陋质伤飘零举觴为尔成一醉醉中不省居蛮荆

灯花

独坐对黄卷夜寒灯自花红深谁种蒔枝嫋忽萌芽酒渌正盈爵客愁方念家殷懃报远信赖尔慰年华光鋹长吐焰顷刻遽开花玉粒乍排粟金英初擢芽谪官那有喜旅食未还家对尔翻惆悵飘萧双鬓华余来湖外临行与叔易奕而胜得铜炉制作精古爱之常置几案间感物怀人为赋此诗

古制精巧後莫拟何年着此形模伟状为神兽践修虺蜿蜒脊肋奠厥趾犀兕一角昂其鼻胷腹空洞口哆侈关机开阖如投匱葭灰养火焚沈水霏微牙吻烟云起提携爱玩置燕几博山篆鼎讵可比一枰何日刷前耻满轩风月人千里清香一炷愁如洗

客有馈玉面狸者戏赋此诗

山林冬煖草未衰深岩穴处狸正肥丰茸斑毳面粧玉摇曳修尾髦如犁夜行昼伏彼何罪失身终堕网与机庖厨须尔充口腹几欲断尾同牺鸡蒸炊包裹付糟滓酥香玉软丰肤肌霜刀缕切膩且滑犀筋厌饫良珍奇猩唇熊白不足数披絮黄雀空多脂樽前风味乃如许为尔倒尽黄金卮

冬日闲居遣兴十首

岁暮碧山中清霜日自浓隐牀吟蟋蟀拂檻老芙蓉风月成三友家山梦九龙道人知睡美将晓小鸣钟飘泊向江城山居境过清霜深犹竹色风劲更松声且尽杯中物何须身後名拥炉孤笑处寒夜又三更兰若富云松吾生寄此中无心复弹劒有恨但书空白菊因霜紫青枫向日红晚来幽独甚卧聽竹间风萧飒鬢丝垂此怀谁与知惊心伤网缴老眼厌旌旗未遂庞公隐空余宋玉悲故园何处是搔首望天涯宿雨乍晴天初寒气暫暄梳头风满栢曝背日临轩小酌无所酿闲眠只□毡忘心亦忘法作个是安禅深炷一炉香孤吟夜正长山虚风落木云破月窥房老骥志千里越禽思故鄉羈栖两寂寞坐叹鬢毛霜投老见多难干戈日正深饮河胡马健破垒汉疆侵大将未燕首小臣空越吟龙荒两宫远感愤泪盈襟泽国杳何许鴈书初报安枝间鸟鹊喜原上鵲鵲难松菊荒三径轩裳厌一官黄粱何日熟客梦正邯鄲衰病寓僧房闲中气味长盘深饶芋栗地僻懒冠裳坐隐乌皮几行携古锦囊接篱颠倒着不是醉高阳僻处掩松门知非更念恩庭空从雀啁山暖觉蜂喧木叶静如扫茶花开正繁萧条岁云暮倚杖自忘言

食蟹

平生最爱梁谿居溪头紫蟹几尺余持矛被甲意颇横霜後直欲陵於菟端然秉炬可攻取束縛健者归庖厨双螯如臂自可饱满腹膏液凝红酥每倾新酿为一醉风味窃疑他所无那知謫堕荒山里乃有此物供臞儒客云来自九江郡分以饷我良勤渠轮囷初喜入盘饌郭索想见行泥涂西风江岸芦苇枯下田粳稻香且腴朝魁把榼屡蜕殼宜尔怪伟胷中都内黄疏封何足道左手相持真可娱流膏斫雪快一嚼不复怅望思东吴

食橘

洞庭一夜天雨霜橘林綠苞朝已黄远题书後三百颗入手便觉秋风香黄金为肤白玉瓢沆瀣深贮甘且芳雕盘初擘喂清露冰齿乍嚼流琼浆色香气味纷可喜下视衆果皆茫茫余平生爱种此木阨梁谿傍只今蒿艾已埋没岂敢向日争荧煌蓬菜云气久寂寞汉殿无复罗潇湘厥包纵有尽酸澁剖之蠹朽安足尝乃知汝病是天意坐使玉食无辉光荒山乃尔饫佳品安得驪裹置锦堂君不见杜陵野老歌病橘萧萧半死诚可伤

秀容菊

黄菊已槁余微馥白菊初开叠罗縠秀容丰淡却嫣然故伴幽人慰愁独吾闻此种南阳多千
花万蘂争骈罗郁葱佳气久萧瑟怅望菊潭今若何

许崧老见和月林堂夜坐诗复次前韵寄之

宇宙一逆旅安用归我庐解装寓僧房衲丈即有余三年走万里华髮照川途颇思少壮乐谈
笑轻簪裾醉挥铁如意击碎红珊瑚垂老见兵革济时愧才?及兹再飘零歛若霜中梧幸从山
林游时与释子俱超然意有会不必窥其书臞仙静退者久要不渝初和我月林篇此作久所
无徵言思会面岁晚苦离居

周中元赋御画驄马次其韵

蓬莱宫殿日月长广廷泛洒如无帚临轩亲貌玉花驄天驥自出天人手惊鸿欲起无羈皂如
闻朔风动秋草奋身骧首举双蹄意态天然始知巧时危反掌同永嘉边骑飒?陵中华当时宸
笔散烟雾往往流落羣臣家?姿倜傥精权奇此画惟应识者知怅望崆峒转仙仗忍传耆旧把
天衣

送周元中游黄龙山

此身飘泊堕荆蛮幸有幽人访我闲得句多从丘壑里知音端在笑谈间青鞋布襪平生事野
鹤孤云到处山好去黄龙露消息直须一箭透三关

题峡江萧氏思贤堂【堂为李先之设】

玉笥峯边萧史居拂云松竹散扶?妙年气节慕前辈故老风流空结庐幸有江山供一覽自应
图史足三余何时海内干戈息借我茅斋与着书

黄雀

秋杪江天小雨余毕飞端为网罗须祗应俛啄一粒粟故使常行万里途爱酒情怀多骨醉披
绵风度更肤腴苞苴宜入金张室分饷何为及老夫

陈几叟以了翁所作默堂箴见示且求余言拾其遗意作四絶句

维摩不二门中法周庙三缄膺上铭莫道寂然无所说须知渊默有雷霆

言默当时俱是智可言而默亦非真君看王导虽贤者不语犹能杀伯仁

言以多穷默取容不如体道守其中道非言默所能载毕竟两端皆是空

鍾鳴谷响孰为然因击缘声故有言若会虽言本无说从教千偈口澜翻

得报以谪降官不许同处一州自鄂渚移居澧阳有感

萍漂梗泛又迁居叹息谋身术已?愿访湘妃遗佩浦试追汉传吊累书干戈满眼伤羣盜松梓连云念故庐泽畔行吟觉憔悴前身疑是楚三间

翁士特见示山字韵诗两篇复次前韵寄之

未展垂天翼聊寻避地山宝坊资小隐彩服奉慈顏乡邑兵戈满轩窓紫翠环遥知排遣处祇在倡酬间离索嗟时久诗篇喜使还故情尤觉重佳句不容攀洒落吴牋湿稻藏古锦斑开絨惊璀璨逼耳听絲蛮陋质尘黄合高材困緑纶青衿同婉变华髮怅編斓顾我方遐弃如公岂久闲何须叹飘泊吾道属多艰

踏徧江南土来游湖外山地卑惊鵬鸟天远忆龙顏淮海屯貔虎戈矛杂佩环驰心万里外回首五云间?方多故飘零且未还桃源期可问铁鑰怅难攀霜重丹枫落江清锦石斑梦余惊蚁垤争极叹蜗蛮且隐重重几深藏若若纶江篱纷掩苒湘竹晕編斓水国鼃鼃横琳宫日月闲亲朋未相弃莫使鴈书艰

次韵士特试谷帘泉见怀之作

桑苎尝来第二泉翠松偃盖色相鲜谷帘竇乳争多少西子南威各自妍

片云摇曳不胜闲行尽江南处处山岂解为霖泽枯槁只思归隐碧岩间

戊申冬至日有怀诸弟时赴澧阳

綈室初回律管阳貂裘还是旅殊鄉可堪身向三湘远更觉愁随一线长棣萼相思劳梦寐郊禋成礼想旗裳羈臣与国同休戚老眼犹期见治康

张氏二甥寄诗可喜赋此篇以赠之

每见吾甥学不休信知积善有源流骅骝汗血为驹日松柏凌霜出地秋努力年华成宅相着鞭高跃破烟楼渭阳正续离骚赋频寄诗来慰客愁

得梁谿家书报黄氏女生外孙

恠底朝来鹊噪门家书远报女生孙须知鍾庆由先德故使遗芳衍後昆肌骨遥怜凝玉雪风光自与茁兰荪何时归去亲怀抱华髮褒衣更觉尊

梁谿集卷二十二

卷二十三

钦定四库全书卷

梁谿集卷二十三 宋 李纲

撰诗十九【赴澧阳二十三首赴南海道中及已酉岁作五十七首】

自蒲圻临湘趋岳阳道中作十首

再次韵崧老见和之作【许诗附】

岳阳楼三首 鼠须笔二首

渡江 章华台二首

次韵唐李华序云母泉

至澧阳寓天宁僧舍二首

深省轩 谪居海南五首

别夹山能老 药山三咏三首

梁山观音寺 自武陵舟行至德山

益阳白鹿寺 清修寺二絶

自湘乡趋邵阳以避谤不敢取道衡岳有感五

絶 邵阳道中云岩寺

清湘西山寺无量寿塔

桂林道中二首 山月驿闻子规次韵道阳朔山水尤奇絶 献花铺次壁间韵象州道中二首
饮修仁茶

自去冬不雨至今道傍井泉竭

次贵州 伏读三月六日内禅诏暮春雨中有感 含笑花五首

荔支五首 茉莉二首

得梁谿书寄诸弟 即事三首

移居南山寺寺有岩洞甚幽并葛稚川丹竈

自蒲圻临湘趋岳阳道中作十首

鄂渚何尝一日安澧阳犹喜远江干帝妃降矣空遗佩公子思兮欲采兰水带潇湘疑有鴈地连岭蜀苦无寒迂疎自笑谋身拙却荷朝廷德意寬

屈伸任道复何求去国翻成汗漫游处世久师齐物论攄怀聊赋畔牢愁霜清日薄寒光急云惨天高陰气浮嫋嫋西风洞庭濶可堪更上岳阳楼

岁寒又复事南征旌幟兰舟过洞庭水入重湖千里白山连平楚数峯青云鸿杳杳飞何远汀芷微微气自馨千古灵均英爽在固应笑我学余醒

三年奔走未容归敝尽东周季子衣断纁连冈平野濶扁舟短櫂寸心违凌晨白雾沾裳湿薄暮彤云夹日飞回首梁谿杳何处翠烟空鎖钓鱼矶

还驱征骑向三湘行尽骚人放逐乡綠叶素荣歌橘颂采衣姣服浴兰汤云中帝子旂旗降物外桃源日月长便欲翛然与高蹈故应脱屣谢轩裳

不解扬波与舖醑又还来放楚江湄椒兰气味何其烈蘅药芬芳空尔为宁赴湘流非我事托怀鹏鸟乃吾师醉醒清浊初难共渔父从来自不知

远谪三湘欲卜居试从詹尹拂占书昂昂愿作云间鹤泛泛宁为波底鱼咿喔突梯真得计洁廉正直却成疎益坚节操行吾志龟策从来自不如

更欲投书吊汨罗西风嫋嫋水增波江分梦泽於菟远地近芳洲杜若多野鸟终年从萃止木奴千树正婆娑卜居更作终焉计华髮萧萧奈老何

俎豆其如军旅何谁令瀚海起干戈休将直道论三黜且把微辞续九歌山鬼含颦乘赤豹湘灵解佩鼓云和蛮邦虽陋吾何恨厌见旌蕤相荡摩

龙驾翩翩帝子游我因谪宦亦淹留潇湘且傍鼃黿窟葭菼空怀鸚鵡洲专气愿师周柱史着书更笑陆忠州变心从俗吾何敢千古骚人共此愁

翰奉和大观文相公见寄古风

旃裘乱衣裳风雨飘屋庐南奔万里空脱死锋镝余翠华狩絕域黄尘翳修涂朝无嵇侍中溅血沾谁裾夷儿金束袍漉藪悬珊瑚骄气吞九州投饵术已疎公捐绕朝策观化聊据梧凤凰渺鸿乙紫氛谁与俱丘壑岁已晚鍾鼎功未书弃置委时运超摇游物初此忧自古有此乐絕世无邂逅拯横流功成吾不居

再次韵崧老见和之作时传春秋集传又欲借易说故篇中及之

黄尘暗中原河洛皆穹庐衣冠竞南渡故国靡复余襄陵大岳裔亦尔困征涂颠沛不忘道呻吟曳长裾如公巨川舟岂止清庙瑚愧我正羈束未能踵汉疎幸然声气同鸣凤栖必梧褰裳思琢磨道阻不得俱已从借麟经更欲窥羲书庶或晚闻道洗心复其初湘沅骚人乡兰芷今岂无回风摇蕙草叹息空幽居

岳阳楼三首

缥缈层楼俯洞庭湖光霁色两澄明气蒸云梦浮天白水合潇湘到底清去櫂来檣云共影断鸿孤鹜笛连声望中更觉君山小一点青螺镜面平

翛然多难偶存身又到苍茫楚泽滨鼓舞鱼龙张乐地佩纫兰茝独醒人涉江哀郢空回首极目伤心欲向春鼓枻寅缘傍枯苇故应渔父尚垂纶

常诵飞龙遭洞庭登楼况复把骚经琉璃万顷天同碧翠黛一螺山更青白鸟风高方倦翮苍鹰冬暖正舒翎客愁欲作长鲸吸却笑三间只独醒

鼠须笔

鼠能为虎亦何功用舍之间系所逢谁谓有皮为有礼翦须犹得管城封

中山毛穎久中书鼠辈胡为亦可俱寢庙穴居真得计畏人端恐擢其须

渡江

桂枻兰旌楚泽东碧空如水水如空江湖落日浮秋橘岛屿残霞拂断虹世事茫然烟霭里客愁都在橹声中沙头鳬鴈相俦侣笑我年年逐转蓬

章华台【华容县西三里】

断壠连冈云梦西楚王宫殿尚遗基桂花半落垂黄橘想见章华九月时

华容西二十许里有墨山即离骚所谓玄石也山有大云寺寺有云母泉甘芳洁清大旱不竭

唐李华有诗序之甚详其末云华贬杭州司公恩复左补阙次于岳阳江山延望思与高贤共
饮云母之泉躬耕墨山之下敢违朝命以询私欲秋风露寒洞庭微波一闻猿声不觉涕下况
支离多病年甫始衰愿饵药扶寿以?无生之学事乖志负火熬余心三复其言而悲之因次其
韵

霜风振古林肃肃有异声我登玄石山适此氛祲清散策步山巅僧庐窈而精石磴尽云母晶
荧璨瑶英??幽谷泉玉色凄芳馨饮者得难老沈痾体皆平乃知泉源美本自山川灵沈吟遐
叔诗此其浪得名肺腑久尘埃於焉吸清泠玉池艳生肥漱濯归黄庭却思陆子泉厥味可弟
兄白首困飘泊丹心竟何成鼓枻渡潇湘曳裾拂荆衡回头故山远怆恹若为情区区金石坚
正赖日月明卷舒随用舍未觉殊亏盈风高洞庭波云暝兰芷城饵药扶始衰?心学无生庶几
甫知命寸田不废耕

至澧阳寓天宁僧舍有感

常诵离骚澧有兰那知谪宦憇其间片云只鹤风方急只恐飘零过别山

此身又复寓精庐丈室萧然一物无每见招提心即喜前生真是老浮屠

深省轩在丈室之西余为名之

轩槛虚明丈室西丛筠佳木翠陰垂游观物物皆深省岂在闻钟欲觉时

见报以言者论六事其五皆靖康往故其一谓资囊士人上书以冀复用谪居海南震惧之余
斐然有作

力小安能胜万钧退藏深渺欲全身大恩不报有余责何必烦言浪指陈

非才自丐罢钧衡百念灰寒岂复萌刚道资囊上书者不知谁继颍川生

尼父乘桴居九夷管宁浮海亦多时古来圣贤犹如此我泛鲸波岂足悲

功似赞皇犹远涉智如鹤相亦来游世间万事非人力只有安心百不忧

苏子曾为海上仙羣龙三复絶韦编我今日对羲文语却恨公书取次传

别夹山能老

相逢千偈口澜翻已是亲曾到夹山猿鸟可能知祖意飞腾青嶂碧岩间

药山三咏

问道室

骨相崭岩心已安松林谈道不胜寒习之不会高人意便作天云鉶水看

伏牛庵

侍者何须召二空一元调伏自知风轩然栋宇翬飞处何似当年茅竹中

雷满地

英雄割据老渔师习气难忘凿此池尚想兴酣高会处投身下取酒杯时

梁山观音寺【东汉梁松驻军之地有庙】

大士当年白鹿驯宝坊千古閟松筠风流帝堦膏粱客也解来为护法神

自武陵舟行至德山

舍车泛兰舟摇荡武陵水憩装古丛林幽胜冠南纪当时霹雳手掣电机在捶铃鎚今得人宗旨振颓委何须大雄殿突兀踞巍址龙蛇相混杂衲子聚千指齐竽一一吹真贋见鑪锤青葱松竹陰积翠纷可喜春风一动摇萧瑟鸣不已却游德岷亭枉渚抱中沚襄阳今何如风物略如此空怀堕泪碑愧叹羊叔子坐令邹湛辈名字随骥尾夷人窥汉疆战哭多新鬼王室如缀旒寇盗结蜂蚁而我荷寬恩抱衅适万里回头望中原洒涕湿巾几海山渺安在瀕洞鲸波里飞仙时往来当学长不死

益阳白鹿寺

寺枕清江?碧梧萧然景物类东吴登临忽动思归兴不待秋风可鱣鲈

清修寺在益阳数十里间惠远之弟居之世谓之小庐山二首

盘纡石磴白云间风落岩花满路斑峯岭横斜自重掩个中真是小庐山

傍山修竹翠檀栾竦节疎枝碧玉寒安得诛茅此君侧世间浑作梦中看

自湘乡趋邵阳以避谤不敢取道衡岳有感五首

平生性僻爱溪山偶得经行祗为闲叹息迂程避烦啧坐令南岳阻跻攀
石廩巉天堆祝融遥看山色有无中寬恩异日容归老先到衡阳回鴈峯
恭闻南岳魏夫人绛节霓旌拥玉轮我欲他年受真诀先从碧海涤埃尘
邺侯奇谲世难知放浪衡湘亦避时懒瓚不知今在否无心更与覓蹲？

退之昔谪恶溪滨精意能开衡岳云我匪天穷坐人厄试从山外望氛氲

邵阳道中云岩寺

山空小寺依嵌窦日暖幽禽转好声万个琅玕一茅屋何当此处寄浮生

清湘西山寺无量寿塔

黄花翠竹真如性大地山河清淨身欲识今时无量寿不知瞻礼是何人

桂林道中二首

桂林山水久闻风身世茫然堕此中日暮碧云浓作朵春深稚笋翠成丛仙家多住朱明洞客
梦来游羣玉峯鴈荡武夷何足道千岩元是小玲珑

时危远谪堕南峦犹在乾坤覆载间瘴雨岚烟殊气候玉簪罗带巧溪山桃榔叶暗伤心碧蹊
躅花开满目斑惟有月华依旧好清辉应与照云鬟

山月驿闻子规次韵

春枕梦回孤馆悄世故萦心愁不了山深夜闌子规啼残月满牕天未晓

道阳朔山水尤奇絶旧传为天下第一非虚语也赋二絶句

溪山此地藹佳名雨洗烟岚分外青却恨征鞍太匆遽无因一上万云亭

赋诗曾送谪仙人垂老翻游到海滨梦幻去来何日了且将病眼看嶙峋【李泰发谪阳朔令
尝以诗送其行】

献花铺唐相李德裕谪海南道此有山女献花因以名之次壁间韵

我亦乘桴向海涯无人复献雨中花却愁春梦归吴越茗饮浓斟薄荷芽

象州道中二首

路入春山春日长穿林渡水意徜徉溪环石笋横舟小风落林花扑面香山鸟不知兴废恨岭云自觉去来忙炎荒景物随时好何必深悲瘴疠乡

竹屋茅檐三四家土风渐觉异中华碧榕枝弱还生柱红荔春深已着花社鷺不巢南候别塞鸿无信北音賒海山此去犹千里会见安期枣似瓜

饮修仁茶

北苑龙团久不尝修仁茗饮亦甘芳夸研鬪白工夫拙辟瘴消烦气味长江表露芽空絶品蜀中仙掌可同行从容饭罢何为者一椀还兼一炷香

自去冬不雨至今道傍井竭田多不耕有感

匝地风雷空震荡终宵云雨竟虚无媮闲农具田皆废喝死行人井半枯东海愆阳缘孝妇桑林渴祷本谗夫忠魂昭雪奸邪逐坐见为霖万物苏

次贵州二首

青枫夹道鹧鸪啼古郡荒凉接岛夷陆绩故城依石巘葛洪遗竈俯江湄光风苒苒吹香草烟雨蒙蒙湿荔枝欲作终焉卜居计自应痾痿不吾欺

怀泽为邦古郁林江边邑屋树森森山连八桂峯峦秀地近重溟雾雨淫岁久承平消瘴疠时危争战觉幽深试谋十亩膏腴地丹荔青蕉获我心

伏读三月六日内禅诏书及传将士牒慷慨王室之艰危悯生灵之涂炭悼前策之不从恨奸回之误国感愤有作聊以述怀四首

忆昔廷诤驻蹕时孤忠欲挽六龙飞莱公谩有亲征策亚父空求骸骨归灵武中兴形势便江都巡幸士心违累臣独荷三朝眷瘴海徒将血涕挥

铁骑长驱扰汉疆庙堂高枕失提防关河自昔称天府淮海于今作战場退避固知非得计威灵何以镇殊方中原夷狄相衰盛圣哲从来只自强

叹息奸臣术已疎谋身误国竟何如马嵬不进杨钊死关陕初临元振除王室威灵嗟索寞苍生环堵未安居荒陬不见中原事望断东吴一纸书

建炎虚席待经纶恩赐宸章宝墨新学际天人何敢尔忠开金石庶当仁孔明得主规模壮陆贽离朝谤讟频今日追思慙至意御书重执泪盈巾【学穷天人忠贯金石所赐御书语】

暮春雨中有感二首

雨细梅黄荔子丹殊方风物异江山客愁望极伤心处更听钩辀云木间

万物焦枯谁作霖片云成雨慰民心奸邪逐去精忠雪天意方知感格深

含笑花五首

一去闽山远玉颜故人相遇有余欢临风莞尔缘何事应笑先生又失官

玉质犹披翡翠裳温泉浴罢蔼天香回眸百媚嫣然处羞死三千红粉粧

窜逐流离老病身天涯相见意相亲粲然不用千金买应记当年作赋人【予在沙阳曾作含笑花赋】

素淡丰容不自持养成妙质亦多时不知巧倩东风里含蓄清香欲待谁

谓之曾诘笑何因只笑明时窜海滨晋以志穷莱以直定兼我拙作三人

荔枝五首

海山僊子绦罗襦雾縠中单白玉肤知我远来相劳苦故驰先使迓中途

绦纱囊里水晶丸偏得杨妃带笑看休道马嵬当日事只今何处是长安

玉人纖指擘轻红犹忆恩颁自汉宫翠笼藤盘异当日蛮烟瘴雨正蒙蒙

荔子蛮方也自丹不如闽岭为微酸玉盘磊珂三千颗犹忆甘芳绕齿寒

百马崩腾耆旧悲只今戈戟暗江湄自知疎拙蒙恩重犹得南来食荔枝

茉莉花二首

冷艳幽芳雪不如佳名初见贝多书南人浑作寻常看曾侍君王白玉除

风露扶疎蔓翠藤玉花剪刻见层层清香夜久偏闻处寂寞书生对一灯

得梁谿书寄诸弟二首

一纸书来抵万金天涯慰我念家心只今王室犹如此回首东吴涕作霖

荔子初丹色半青玉肤未满已芳馨欲题书後三千颗须待烟林灿若星

即事三首

宾江两岸水绵飞负郭家家熟荔枝瘴雨蛮烟已萧瑟可堪梅子欲黄时

荔枝红紫已交加龙眼新来又着花便欲谋君不须去咀冰嚼雪过年华

森森榕木碧参天夏日初闻第一蝉美?美君诚得计何须凄怨嘒风前

移居南山寺寺有岩洞甚幽并葛稚川丹竈

倚山高阁仰觚棱洞穴嵌空屐可登丹竈旧传留祕药仙岩今已属闲僧数峯削玉青如髻羣木参天翠作层小驻未妨幽兴发野禽嘲弄醉瞢腾

梁谿集卷二十三

卷二十四

钦定四库全书

梁谿集卷二十四 宋 李纲 撰诗二十【海南及归自琼管七十二首】

伏覩四月五日赦书銮輿反正二首

端午日次郁林州

恭闻诏书褒悼陈少阳四首

寓郁林着易传有感 次雷州

中秋月色佳甚与宗之对酌天宁寺宝华堂闍提花盛开三絶

得家书报长子仪之房下得孙男

九日怀梁谿诸季二首

赠峽南琮师 冬至

闻官军破黎贼作两絶

次地角場俾宗之设祭伏波庙

次东坡韵二首 次琼管二首

槟榔

次琼管後三日奉德音自便二首

郡城北日语海余易之日云海二首

北归昼渡风便波平尤觉奇絶成五絶句归次海康登平仙亭次莱公韵

雷庙读丁晋公所作碑

谒寇忠愍祠堂六首 初发雷阳二首

琮师追送至城月驿戏成两絶句以答其意立春日龙化道中得家问三首

和东坡醉题四首

假道容惠当游勾漏等洞天

海上得孔雀六鹦鹉十余携归遗童稚辈戏成立春後一日风雨殊有寒色

容南道中二首 再赋孔雀鹦鹉二首陆川道中偶成

古律两篇答郁林王守

过北流县八里游勾漏观留五絶

伏覩四月五日赦书銮輿反正中外大庆小臣有感斐然成章二首

天眷吾皇筑旧基未应炎德遂中微共欣宸极还天步赖有羣龙夹日飞霈泽及民寰海庆孤忠许国寸心违建炎首被钧衡选孤负明恩泪湿衣

误国奸邪已窜诛天扶黼座正宸居少康一旅时犹在高祖三章术未?必顺人心收俊杰自应天意助耘鋤累臣海上空回首愿浥沧溟洗谤书

端午日次郁林州

久谪沅湘习楚风灵均千载此心同岂知角黍萦丝日却堕蛮烟瘴雨中榕树间关鹦鹉语藤盘磊珂荔枝红殊方令节多凄感家在东吴东复东

恭闻诏书褒悼陈少阳赠官与一子恩泽赐緡钱五十万感涕四首

哀痛纶言洒帝章赐金赠秩事非常无心圣主如天地着意奸臣极虎狼忠血他年应化碧英魂今日已生光先生愤懣诚昭雪九死南迁岂自伤

祖宗德泽在斯民韦带精忠不乏人魏阙献言开帝听匭函争事触龙鳞血沾斧钁虽因我心在宗祊岂计身宿草已深难一恸临风空有涕沾巾

屡将黷议叩枫宸不为承恩始爱君谁使崔宁论卢杞恨无庆忌救朱云死生一快心应了忠义千年笔有芬一介草茅言世务从今不复数刘蕡

平昔初无半面交危言几辨盖寬饶幽冥我已慙良友忠愤君应念本朝故国遥看云杳杳新

阡何处草萧萧抚孤未遂山涛志谁继骚人赋大招

寓郁林着易传有感

谪来海峤远兵戈精义微言得切磋地入郁林怀陆绩桴浮沧海学东坡圣经广大随人取衆
说纷纶柰若何从此梁谿作诗少用心已向六龙多

義文作易仲尼传究极陰阳本自然妙理欲求须得象至言已契可忘筌絶编何啻须三过知
命从今加数年叹息时无邵康节数该今古与谁研

次雷州

华夷图上看雷州万里孤城?海陬萍迹飘流遽如许骚辞拟赋畔牢愁沧溟浩荡烟云晓鼓角
凄悲风露秋莫笑炎荒地遐僻万安更在海南头

中秋月色佳甚与宗之对酌天宁寺宝华堂

去年今夕寓通城犹有新诗寄弟兄一自裹囊来海上更无系帛付鸿征禪房酌酒夜方闌海
月窥人光更清起舞月中心尚壮乘槎便欲造蓬瀛

所寓天宁方丈後有闍提花数株连月盛开玉雪可爱怅然有怀成三絶句寄吴元中

未渡鲸波寇盗深中原回首涕成霖清愁万斛无消处赖有幽花慰客心

深院无人帘幕垂玉英翠羽灿芳枝世间顏色难相似晴雪初残未堕时

冰玉风姿照坐寒炎荒相遇且相宽縞衣紵带平生志正念幽人尚素冠

得家书报长子仪之房下得孙男殊慰老怀时在雷州着易传适至震卦因名之曰震孙以诗
寄仪之

天涯远报茁琼枝共说鵷雏骨相奇鼻祖从来种桃李耳孙自合产兰芝洵雷名震因观易他
日趋庭使学诗无复区区如尔父定须了了胜吾儿书来可想开怀抱老去何因与弄持素有
龐翁携隐志未应孤负鹿门期九日与宗之对酌怀梁谿诸季时菊花犹未结蕊於药菓中得
茱萸泛酒有馈山果海鲜者多素所不识赋诗见意二首

此身飘泊旅天涯九日凄然客念家且把红醪尝紫蟹何须白髮对黄花药囊赖有茱萸实茶
铫频频薄荷芽山果海鲜多不识却须传与北人夸

父子相随万里余途穷欲哭杨朱三年客里逢佳节九日罇前念友于海上及秋吟蟋蟀鬓边何日插茱萸吾生老矣谋身拙叹息乾坤一腐儒

峤南僧罕遵戒律况向上事独琮师隐居湖岩絕不至城市超然拔俗闻余来策杖见过与语可人知为饱参衲子也询其所见盖尝从长芦了游了居长芦聚徒至千五百衆道价籍甚江淮间余虽不之识然声气相合心期自亲尝辱贻问今见琮益知了之门风孤峻真楷老儿孙也退处天台琮将浮海访之因赋诗赠琮且简了公异时得归决须相随於石桥侧可以握手一笑梁谿居士云

万里谪官来海峤眼中衲子见絕少方袍圆顶动成羣与俗不同祇其表琮师乃是雷阳人徧历丛林参学饱归来卜筑瘴海滨十里湖光岩洞小深居不复踏城市宴坐惟知侶猿鸟惠然过我意良勤野鹤孤云自轻矫风姿已含蔬笋气语论更将藤葛绕黄茅深处见松筠使我困箱欲倾倒为亲聊复恋幽栖访旧终须乘漈渺烦师飞锡过天台为问了公何法了

冬至

殊方又复一阳芽荏苒流年叹物华土薄葭灰难测候气温桃树已开花云鸿不到音书断鲸海无程道里賒赖有清心为活计不须烂醉作生涯

海南黎人作过据临臯县惊劫傍近因小留海康十一月望闻官军破贼二十日戒行戏作两絕句

海上羣黎亦弄兵征车数月旅山城稽留谪命兢惶甚正坐绯巾惩沸羹

沈沈碧海絕津涯一叶凌波亦快哉假使黑风漂荡去不妨乘兴访蓬莱

次地角场以疮?不果谒伏波庙俾宗之摄祭期以二十五日渡海一卜即吉夜半乘潮解桴星月灿然风便波平诘旦已达琼管东坡谓斯游奇絕冠平生非虚语也作二诗纪之

威信昭然汉两公旧於青史揖英风戈船下濊歟猷壮马革裹尸心胆雄顾我迂?成远谪赖神正直鉴孤忠病躯阻造祠庭下幽显虽殊此意同

夜半乘潮云海中伏波肯借一帆风满天星月光鏖碎匝海波涛气象雄大舶凭陵真漈渺寸心感格在精忠老坡去後何人继奇絕斯游只我同

次东坡韵二首

地角潮来未五更陰云解駁作霜晴星河明润天容睟风浪喧豗海气清粗见鲲鹏潜化理岂无犬马恋轩声远游不作乘桴计虚号男儿过此生

海上传呼夜报更舟师欢喜得新晴风帆擘浪去时急海月笼云分外清天影合中观妙色潮波回处悟圆声从来渤海为全体试问一沕何处生

南渡次琼管江山风物与海北不殊民居皆在槟榔木间黎人入市交易蛮衣椎髻语音兜离不可晓也因询万安相去犹五百里僻陋尤甚黄茅中草屋二百余家资生之具一切无有道由生黎峒山往往剽劫行者必自文昌县泛海得便风三日可达艰难至此不胜慨然赋诗二首纪土风志怀抱也

巨舶浮于海长飏送短篷夜潮和月白晓日跳波红云影摇修浪澜光接远空喜过三河流愁远冠头峯雷化迷天际琼儋入望中地遥横一线山露点羣鸿偶脱鲸鲵患尤欣气俗同川原惊老眼稚耄看衰翁蛮市虾鱼合宾居栋宇雄人烟未寥落竹树自葱茏碧暗槟榔叶香移薄荷丛金花翔孔翠彩幕问黎童南极冬犹暖中原信不通管宁虽迹远阮籍已途穷瀕洞沧波里苍茫返照东客愁浑不寝鼓角五更风

又

四郡环黎母穷愁最万安峒氓能悯寇洸吏岂欺韩草屋丛篁里孤城瘴海端民居才百数道里尚艰难径陆忧生蜚乘桴畏怒澜 风能破胆疔气必摧肝去死垂垂近资生物物殫舶来方得米牢罄或无餐树芋充嘉饌麤羶荐浅盘萎藤茶更苦淡水酒仍酸黎户花縵服儒生椰子冠槟榔资一醉吉贝不知寒何必从詹尹无因咏考盘失图嗟罪大得此荷恩宽顾影同三友谈空不二观中州杳何在犹共月团圞

槟榔

踈林苍海上结实已累累烟湿纈虬卵风摇翠羽旗飞翔金鸞鸞掩映箨龙儿溲落哈椰子匀圆讶荔支当茶锁瘴速如酒醉人迟萎叶偏相称羸灰亦谩为乍餐颜愧渥频嚼齿愁疲饮啄随风土端忧化岛夷

次琼管後三日忽奉德音恩许自便感涕之余赋诗见志

此身飘堕到沧溟谁谓君王念贾生黄帟再蒙题姓字丹书特为削刑名山林老去何其幸萍梗追思却自惊天地恩宽难报德试从今日数归程

行年旧说似东坡鲸海于今亦再过儋耳三年时已久琼山十日幸尤多却收老眼来观国尚冀中原早戢戈病废不堪当世用感恩惟有涕霏

郡城南曰琼台北曰语海余易之曰云海登眺有感

孤城南面敞琼台千里川原指顾开试向緑云深处望海山浮动见蓬莱

古来云海浩茫茫北望凄然欲断腸不得中州近消息六龙何处驻东皇
北归昼渡海风便波平尤觉奇絕成五絕句

澄波不动琉璃滑一望应须万里余舟行冲激浪花碎如驭白云游碧虚
去得南风来北风神灵只在指呼中老坡有语旧曾记信我人厄非天穷
来时风浪夜喧惊归去潮波枕席平非是波神有分别故教清昼看寰瀛
纤云肆卷日方中海色天光上下同身在琉璃光合里碧空涵水水涵空
平生奔走畏江湖暮齿来乘海上桴自晒井蛙真见小望洋向若一卢胡
归次海康登平仙亭次莱公韵

碧海瞰危亭波光混大清旷怀知乐此夷险本来平

雷庙读丁晋公所作碑

巨卵曾因霹雳开海邦从此得名雷只知寇老曾迁此作记何缘丁令来
谒寇忠愍祠堂六首

亲征决策幸澶渊南北观盟有本原丞相莱公功第一犹将孤注作谗言
一幸江南一蜀中奋然廷议叱羣公挽回天步虽良策元是真皇听纳功
南阳庙坐致云云赖有嘉言为解纷叹息今人不如古久无庆忌救朱云
平生爱看柘枝舞宾燕多余密炬堆富贵在公真末事谁云缘此故南来
海邦去海只十里山路过山应万重诗?告人元已久未应马援坐梁松
凿井得泉今尚美挂钱插竹後成林精忠感动无情物不解潜销谗妬心
初发雷阳有感二首

梦中曾过鬼门关敢冀君恩听北还父子相随幸良厚仆奴半死涕空潜风烟萧瑟黄茅瘴山

路崎岖赤脚蛮归去梁谿见桑梓定抛冠佩老岩间

余生幸尔脱垂涎鸡肋安能拒老拳万里得归辞瘴海三年奔命厌征轩采薇散髮嵇中散开
竈烧丹葛稚川此去山林如脱兔这回且结好因缘

琮师送至城月驿戏成两絶句以荅其意

衲子来参去不辞何劳飞锡远相追赠师银布牢收取便是金襴付嘱时

好住湖岩摄此心有缘终会有知音梁谿老去孤峯顶月白风清难更寻

立春日龙化道中得家问诸季已挈家渡浙江如剑川又闻江西颇有羣盗啸聚遂决意由五
羊趋循惠潮阳假道闽中以归偶成三篇时十二月十九日

东君又换一年春迎我来从瘴海滨已觉山川有佳气更询道路得通津欲寻勾漏丹砂令与
访罗浮紫府人清梦相符缘契合便须脱屣谢埃尘

远信来时岭峤春浮家已在浙江滨更传瓯水方虞寇须向闽山与问津万里归来寻乐土千
岩好去作闲人干戈未息中原暗怅望关河戎马尘

川途奔走四回春海上经年与死滨子美自怜常作客长沮应笑是知津艰危至死无千古忧
患如吾岂两人往返循环真磨蚁已将大地等微尘

久不饮酒春日得家问喜甚与宗之对酌调马驿中速饮数觥径醉醉中和东坡醉题四首

海峤无佳酿经时不入唇巨觥今一醉远问到初春偶脱长鲸口来寻仲子邻醉中轻万里始
信浊醪神畏病不举盃延客祇烹茗浩然云海间不醉亦不醒偶蒙雨露恩渐脱瘴疠境麴生
粗可人相对聊酩酊久客殊念家归途渺江汉是身如浮云罹此无穷患今夕定何夕一酌千
忧散从兹日曛酣此意君莫间饮少辄大醉醉中识其真天地一秋毫况此渺然身归休岩穴
间坐阅万态新去去勿复道时清为幸民寓琼山远华馆一夕梦游山间小堂松竹环合有道
士坐堂上诵李太白送人游桃源序中有良田名池竹果森然三十六洞别为一天之语觉而
异之今假道容惠当游勾漏都峤白石罗浮皆洞天也岂神者先告将有所遇耶赋诗以纪之

神清遂仙游境寂恣遐躅羽人入我梦轩户霭松竹高吟谪仙文逸韵响金玉觉来残灯荧倘
恍犹在目归途历容惠问津非素卜将游四洞天就彼白云宿岂无葛稚川妙论资灌沃试求
龙虎丹一使鬓毛绿斯言傥可珍长揖谢浮俗却笑昌黎翁强项宁诘曲

海上得孔雀六鹦鹉十余携归遗童稚辈戏成二絶句

凤友鸾朋出海邦金花翠尾烂文章梁谿台绍今何似归伴胎僊取次翔

綠衣紺趾已能飞学语交交未转时不是蓬莱花鸟使携归聊与调羣儿

立春後一日风雨殊有寒色偶成

竟夕北风号春回雨已膏归程离海峤旧服理终袍宿瘴须寒压清愁欲醉逃何当入江浙雪片洒鷺毛

容南道中二首

路入容南境风烟自一方山空云冉冉春动水茫茫紫府丹砂秘幽村碧树芳肃然有佳致作个是炎荒闻说容南久安知客路经沉沉洞天近湛湛古湫渟日落峯峦翠春回草木青丹砂如可问当卜老岩扃

再赋孔雀鸚鵡二首

孔雀来从海上村参差修尾灿金文素知肃穆鸾凰侣不是喧卑鸡鹜羣玄圃赤霄虽有志碧梧翠竹正须君携持万里归吴越怅望海山深处云

学语鸚鵡羽渐成掌中取食絕猜惊笼寬得遂朋从志春晓初闻客到声赋就襴衡文不点杓随李白饮如鲸远携休叹殊方去我亦随缘得此生

陆川道中偶成

峤南江北本来同往返纷纷一梦中旧事销磨那复有新愁缭绕亦成空天边山色浮浓翠溪上云光拂淡红我把浮生如梦看云山元是小屏风

南迁道郁林郡守王君示古律诗一篇北归辄成两篇以荅其意

山围古郡碧周遭陆绩衣冠雅自褒海上来归怀麈尾鬓间空叹长霜毛易书顾我耽成癖诗笔怜君老更豪此去龙城幸非远不须巨石压云涛

垂老相逢海峤间盈编珠玉破愁颜清名岂籍郁林石雅志常存仙奕山丘壑采薇嗟我病弦歌为政羨君闲中原杳杳旌旗暗回首春风涕一潜

过北流县八里游勾漏观留五絶句

百里仙山气象雄参差峯岫翠成丛云骈鹤驭今何处丹竈依然洞穴中

葛翁求令为丹砂今我来从海上槎祗恐山灵嫌俗驾未容归客卧烟霞
羽人相导把霓旌窈窕松林露气清不用逢迎同贵客暫来花院听棊声
避谤多时不到山忽惊身在洞天内北归更觉君恩重得遂清游一解顏
洞户沉沉别有天玉楼珠殿鎖霏烟如何祠馆人间世破屋荒凉紫府前

梁谿集卷二十四

卷二十五

<集部,别集类,南宋建炎至德佑,梁谿集>

钦定四库全书

梁谿集卷二十五 宋 李纲 撰诗二十一【归途庚戌岁作五十七首】

道勾漏山灵宝观窃覩两朝御书谨成古风次山堂

闻长沙军变向伯恭能弹治

萧茂德自临江遣人致书

虞祖道相从湖海

除夜与宗之对酌怀家

庚戌正月一日游都峽留五絶

宿都峽山灵景寺

容南鼎新郡庠所建讲堂名之曰育材

浔守李侯以所蓄法书十轴相示题卷末清明日得家书四首

容南初食荔枝

恭闻驻蹕浙东王师屡捷

趋藤山古风

藤山路古松为取松明者所剝剔

譚津江阁 同曹使君登浮金堂月夜江阁次东坡韵

晚泊苍梧有感 封川赠李致远郎中泊晋康横翠亭二首

同陈使君登香寺谿亭

客有出示御制登中和堂诗小臣斐然仰次宸韵二首

江行即事八首 玉乳岩

五龙庙五絶 江上晚景二首

遣兴二首 次肇庆府有感

端石砚 蚊

出峡 灵洲寺次东坡韵次韵鉴空阁

道勾漏山灵宝观窃覩两朝御书谨成古风

抱疴卧云海夙夕负深恐宽恩听旋归何啻丘岳重问津勾漏山散策宝圭洞羣峯罗翠屏环合无缺空游仙契初心幽赏協清梦却来观宸章宝气腾蟠螭真行杂草隶笔势极翔动大小飞白书飘洒萦舞凤恭惟睿智姿多能本天纵妙蹟藏名山俾与万世共林峦增炳焕神物劳护拥惜无深岩屋?覆示崇奉何当鸠良材为葺倾压栋天弧不指狼中原戎马閤九庙未奠居臣子衔愤痛岂知炎荒中奎画得瞻讽至哉博大言粟麦因异种天常及诸佛一一资妙供【飞白有有罪有福种麦无粟闻善但行砂中有玉及供养诸天帝十方佛之语】窃於翰藻间窥见神心用源流此中来基本中兴宋稽首归琅函斐然成善颂

元结尝经略容管王守作次山堂以思其人为赋此诗

华堂高敞为思元善政相望数百年册府声名秀羣玉海邦岩洞有叁天漫郎去久风流在病客来临道里遭圣主中兴谁作颂愿观老手笔如椽

客有言长沙军变向伯恭能弹治规画甚伟适得伯恭书亦道其事作韵语以寄之

长沙舞袖仅可旋今作巨镇湖湘边骄兵夜探赤白丸乘间窃发将呼啸不知向子有老拳缚束健卒祗数言翩如鸟雀擒鹰鸚奸?凶领污龙泉弹压一境敢复喧稚耄鼓舞喜欲颠归哺其饴甘晏眠衆服壮略称无前我归自南得之传颇欣祖生先着鞭何不付与大将权旂旗缤纷指云燕一鼓士气如突烟寇羣破胆心少悛洒扫海内清戈鋌使我衰病安庐田

萧懋德秀才自临江遣人致书海上遇於归途赋诗寄之二首

三黜先生今得归更携稚子访慈帏病牛卧壠心衰矣脱兔投林天悯之万里往来环转蚁一生谤誉舌扬箕着书欲赴当时约须待江南事定时

踰年海上久安居多谢萧郎远寄书不向去来生一念已将天地作吾庐中洲杳杳旌旗暗暮景駸駸齿髮準拟峡江成小隐茅斋借我定何如

罪谪海上中州亲故罕通问独虞君祖道相从湖海踰年北归同途次容南赋诗识别

饱经忧患莫如吾暮景余生寄一桴独子相从来瘴海岂知还得共归途应观天下奇男子解笑人间浅丈夫老去山林养衰疾好音时与系飞鳧【计崧老闻虞君同泛海以书语人曰此天下奇男子也因全用其语浅丈夫聊取的对耳】

除夜与宗之对酌怀家

四年除夕旅殊方海上归来路更长暮景飞腾催老病余生留滞且炎荒传闻寇盗纷惊扰叹息江湖堕渺茫杳杳东吴家万里椒盘谁与颂馨香

庚戌正月一日游都峽山留五絶句栖真观中

元日寻真到洞天溪边春色已嫣然落花流水人间去谁道桃源不是仙

松岭云峯步步佳芒鞋竹杖极幽遐使君不得同清赏正恐山将翠幕遮

远目增明都峽山丹梯况得遂跻攀乃知猿鹤真心在乘服轩裳祗强颜

叠嶂高岩耸八峯云间紫翠郁相重故应洞穴通勾漏更爱林峦接大容

石磴盘纒木茑葱扪罗独上最高峯白云深处时回首千里江山指顾中

宿都峽山灵景寺

清晨游栖真薄暮宿灵景山空松桂香云细泉石冷高崖敞飞檐象纬逼参井惜无娟娟月散此林下影夜阑风露寒岩曲灯耿耿钟响嵌窰客枕发深省却随猿鸟起再上翠微顶道人山後来眸子颇清炯试询龙虎诀妙意默已领我生忧患余半世泛萍梗脱身鲸海中扫迹方自屏愿从稚川游薪水事丹鼎庶资刀圭力少使桑榆永黄尘暗中原静谧惟五岭渺然炎荒地自絶羽书警结茅定前缘幽梦先异境上下三洞间安得田二顷携家学龐公扪蝨笑王猛采薇与散髮此志久已肯嵇生非吾徒幽愤醉方醒

自学校之制废而戎马之患兴州县长民者不复以教育为意独容南鼎新郡庠招徠生徒弦诵之声不辍诚可嘉叹所建讲堂为名之曰育材辄成五言十韵

治世崇儒术胶庠属临自从驰羽檄谁复念青衿贤守来南纪宏规肇泮林飞翬开讲庠鼓

篋拂书蟬采藻绣江水仰高都峽岑潜消戎马气初习雅歌音洙泗道非远张姜贤至今【张九龄姜公辅贤相皆岭表人】栽培成楚梓追琢见南金常袞闽风变文翁蜀化深愿言游学耆勉副育材心

浔守李侯以所蓄法书十轴相示题卷末

承平文物何富哉宝章万笈藏蓬莱余篇散落士夫手名笔往往牙籤排连年戎马扰河洛锦标玉轴随飞埃李侯好事不忍弃万里荆棘携南来炎荒相遇一笑粲出以示我逾琼瑰欧虞顔柳邈已远兰亭况复昭陵埋空遗妙蹟刻琬琰不若古楮存烟煤君谟近世称第一笔力与古肩相挨醉翁工夫不在字名望自足尊輿台芙蓉僊人有典则沧浪逐客气不衰胷中磊落难屈折故使心画奇而巍东坡行书骋姿媚山谷草圣穷萦回二公文翰照千古俯视凡马皆弩骀米颠碌碌不足数运笔尚有从横才迺来非是无点画追时取好如俳谐陆书楷法虽小学古人用意何其能君看篆籀写韵语精巧岂易容追陪今人万事不如古矧以毫墨争雄魁嗟余病废卧都峽何上我马云虺虺感时抚事百忧集对案不复能持杯明牕展卷慰岑寂坐迂旧观双眸开梁谿书室插架处念远更觉增驰怀世间雅好无出此絶胜宝玩琴藏雷于今此物未易得愿言什袭传云来

清明日得家书四首

去国三年久离家万里余岂知戎马际仍得棣华书金鼓震南国松筠怀故庐寰区端若此天意竟何如南荒炎瘴地槐火又清明海峽无春色江湖有战声繫书来鴈足归思羨鹏程欲挽天河水滂沱洗甲兵欲归归未得留滞綉江滨感慨伤春望侨居多北人苍生未苏息黄屋尚蒙尘王室艰危极潜然泣老臣烟岚飞翠盖鲸海泛龙舟退避亦已远凭陵殊未休包胥思恸哭曹刿愿深谋叹息绕朝策何人知故侯

容南初食荔枝二首

海山荔子冠炎荒颇恨遄归不得尝犹喜容南三月里轻红初擘一枝香

买地城南种荔枝每留核付守园儿但祈四海兵戈息会见开花着子时

三月二十三日德音至容南恭闻驻蹕浙东王师屡捷寇骑远遁是日得诸季书挈家寓饶之德兴幸免惊扰忻忭之余辄成口号

紫泥黄耳到同时家国无虞慰所思饮马天骄归朔漠安巢越鸟返南枝休祥允協灵蓁卜喜事何因乾鹄知便可理装寻去路携家深赴鹿门期

三月朔旦卜灵蓁占国得恶销卦辞曰日出东隅炎炎赫赫虽有妖气反见熏炙羣贤破陰祸难解释占家得克强卦其辞曰去我宝珠乃在天衢不意盜者隐匿所居赖得玄鸟为我逐驱

风静波息还复我庐至是而验将得家书鹊声甚厉故云

四月六日离容南陆行趋藤山路崎岖然夹道皆松陰山俺田家景物类闽中殊可喜也赋古风一篇

孟夏草木长清陰散扶疎葱笼竹树间石磴蟠萦纡嗟我事行役弥年困征途及兹理归鞍敢复论崎岖深谷四无景高岩倚天衢稍从平川行遂得田家居篱落静窈窕桑麻郁纷敷新秧绿映水鷄犬鸣相呼中原暗锋镝边骑方长驱此岂桃花源幽深了如无逝将适闽岭买田自耕锄结庐乱山中聊以全妻孥

自容趋藤山路古松皆合抱百余尺枝叶扶?行人庇赖为取松明者所剝剔因而摧倾十已六七良可惜也

松林繚峻岭百尺森忽青不知何年种天矫乱龙形浓陰翳修途当暑有余清长风一披拂时作波涛声如何锥刀徒使争燭火明伤肤及肌骨风雨因摧倾颠倒委榛棘气象犹峥嵘行人失庇赖伫立空凝情缅想栽培初爱护如目睛合抱始毫末几经霜露零一日毁有余百年养不成忍使易凋丧此理真难评忆昔陶士行为政有善经擢禾与移柳一一纠以刑既往不及追将来犹可惩感动遂成章庶几知者听

鐔津江阁气象清旷有闽浙之风偶成长句

断云飞雨晚苍茫灵阁临流分外凉散髮披襟尝荔子?帘清簟看鱼航三年奔走环循蚁万里归来鬓满霜未到江湖先到此风流谁道在炎荒

同曹使君登浮金堂

绕堂松竹散扶?枕带江山美有余神物化龙同剑浦双溪成字类桐庐朝云夜月随时好栖鹭飞鸥迴自如茗饮相从得清赏坐令胜事踵苏徐

月夜江阁次东坡韵

江水如练带江石如马肝双流会合处蹙作蛟龙蟠我来暑气初骤雨成惊湍云收暮山出秀色屏中看缺月挂木末光辉溢清寒冷然适我心遇境随所安夜久转寥閴高松露华溥独坐念平生行路真漫漫危肠易感激不待闻哀弹犹欣碧川涨没尽风雷滩

晚泊苍梧有感

常诵苍梧云正愁岂知理櫂此间游火山水井旧传有桂水藤江相合流念远心如嘶北马踰年行徧峽南州重华一去不复返怅望九疑空白头

封川贈李致遠郎中

一別都門十載余相逢應笑尚迂愚
綈袍戀戀故人意風雨潇潇君子儒
顧我憂危宜白髮如公暇豫亦清癯
年來頗得義書旨試讀一篇還是無

泊晉康橫翠亭愛其山水秀麗斐然有作二首

上主疏封地中興啓帝圖江山連肇慶
雲物接蒼梧秀氣蟠南極神功本禹謨
邦人榮望意開府映番禺環抱大江流
層巒翠靄浮神明扶王氣文物冠南州
來值炎蒸日去翻風雨秋登高望不極
暮角起城樓

同陳使君登香山寺豁亭

渺渺烟波疊疊山玉簪羅帶自回還
雨余嵐翠濃如滴地險江流巧轉灣
蟠磴過臨飛鳥上岸巾聊與白雲閑
峽南有此佳山水盡在賢侯几案間

客有出示御制登中和堂詩小臣斐然仰次宸韻二首

黃屋狩吳越勾陳俯江津迢遙八駿御
時邁慰斯民漢祚歟再興周邦命惟新
誰令玃狁熾坐使宵旰勤宅洛既得卜
去幽亦惟仁宸章蹟禹功道繼胼胝身
期運有泰否鈍蟠利則伸君王自神武
安得熊羆臣

賤子志丘壑敢懷要路津偶乘風雲會
冀拯凋瘵民誤被聖主知坐期功業新
飄零繼三黜奔走亦已勤生還鯨海中
仰荷皇天仁不然銖金口何有鴻毛身
當從玄豹隱無復尺蠖伸感嘆魏公言
愿使為良臣

江行即事八首

千里江山圖畫中峽南浙右豈殊風
烟浮嵐彩重重碧日染波光洒洒紅
蚊釀蟹螯情不淺筆牀茶竈興相同
扁舟入手吾何事歸去梁谿作釣翁

五月炎方氣郁蒸安流鼓櫂水風清
江魚入饌有余美山果滿盤難強名
醉里謳吟聊自適夢中來往本無驚
廟堂早定安邊策遂我山林幽趣情

置散徒懷報國心還家欣得故園音
鉤輦曉岸雲林密欸乃暮江烟水深
壯志已同灰燼冷班毛從使雪霜侵
卧龍只合耕南亩抱膝空為梁甫吟

蒼梧雲物曉淒涼錦石江山一帶長
雨浥峯巒添黛翠風吹草木送天香
魚樵閑話無千古金鼓喧聲震萬方
我欲誅茅寄幽僻却愁烟水日茫茫

数郡崎岖山海间只今多事觉宽闲衣冠避地成侨寓风月留人长往还
蘸水藤花方烂熳生云锦石自斓斑平生有意五湖去谁谓扁舟行百蛮

合踏青山转碧川雨余风月更婵娟光铍影渡星河碎片段气蒸云物鲜
心系鹄原千里外梦回鼓角五更前翠华杳杳今何处怅望东吴空惘然

峡束沧江暮霭昏孤猿吟啸不堪闻寥寥夜閤波沉月漠漠晓晴山出云
钓艇得鱼犹拨刺纶巾漉酒任酣醺年来与物忘机甚自觉沙鸥不乱羣

自晋康顺流六十里有山巉然临江下有岩洞可容千人轩豁平坦景幽邃
石罅间滴泉厥味甘冽因之目曰玉乳岩赋诗以纪其事

鼓枻下端溪停桡登巖岬呀然岩洞开俨若栋宇设千夫可还揖放步靡凹凸
玲珑四壁间一一幢旆列谁令胚浑初凝结有罅缺当年补天手不顾山石裂
镌鑿余旧?琐碎委环玦五峯近龙渊无乃通贝阙试求玉函书何异探禹穴
涓涓乳泉滴灿灿冰玉洁清声落?窅自中琴筑节尝之味甘芳涤我肺腑热
琼浆笑裴航石髓谢王烈峽南瘴疠乡有此云腴冽青葱松桂陰景物助幽絕
岂无会心人来游共旌别题诗制佳名聊以纪岁月碧落遥相望千里未磨灭

端康之间地名越城五山秀峙有蜿蜒飞跃之状山有五龙庙当秦时神媪
临江五龙从之游没葬山上庙祀至今灵响甚着乡人以风雨候龙之归因作
送迎辞五絶句以遗之

风雨潇潇云气浮五龙归覲到灵湫星霜换易江山在尚忆当年水际游

五山秀峙若飞腾下有澄潭百丈清不用燃犀窥秘怪从来神理恶分明

万霰千霆霹雳飞潜藏神用济烝黎何须箫鼓祈膏泽肯为乡人有所私

贝阙珠宫不可寻时因风雨听清吟叶公好画真龙出却恨今无好画心

日染波光红洒洒风摇影里碧鳞鳞神灵来去初无迹多少江头求福人

江上晚景二首

清江一曲深翠岫千峯峙江村八九家茅舍修竹里沙头渔网悬林表烟素起
焉得惠崇师写此真山水风雨逐云急断霓明饮川江头日欲暮返照青林颠
鸥鹭自俦侣蒹葭相接连平生江海志对此却茫然

遣兴二首

繚络奔驰不记年脱身瘴海岂徒然昂藏鹤髮老道士烂熳醉吟狂谪仙剩把诗篇收景物何须鑪鼎煮山川平生出处吾无愧祸福死生皆付天

海上归来心绪多鬓边无那白标何诗情粗得江山助酒量自因风月多黄卷中间笼圣哲白云深处避干戈弟兄念我心应切故向梅花岭上过

次肇庆府有感

仁德如天覆万方谁知变故起非常祗因燕地开边隙故使中原作战場侯景南侵幽武帝禄山西犯走明皇运遭九六人徒尔险失山河事巨量一自銮輿游朔漠空余藩邸在炎荒微臣弭擢增悲感雪涕无因问彼苍

端石砚

端溪出砚材最贵下岩石珍物乃卵生孕此马肝色世传鸕鶿眼通透盖其脉颇同阮步兵见客作青白我来岩中游幽探偶有获温然一片玉秀润满书宅断成蛟龙池澁滑宜笔墨当观管城翁沐发散简策嗟余好陶红收拾积珪璧得此余可忘一生能几展

蚊

江风萧萧江水清飞蚊扑扑何处生驼肩豹脚嘴如铁天使啗食同蠅蟲先生暑困汗翻雨僮仆摇扇疲屡更乘虚投隙肆毒吻鼓翅鼓足何其轻须臾含桃变柳絮坐使饥腹成膨脝舍身施汝岂吾惜逼耳是恶声娇狞有时缘【阙】拊吾指罪虽应尔心则矜露华清泚自可饮戒汝慎勿贪芳腥

出峡

出峡日将暮绮霞连水明山遥欣野濶海近觉江平稍稍洲渚转霏霏烟靄生舟人喜风便时发櫂讴声

灵洲寺次东坡韵

回廊小殿枕崔嵬接武东坡我复来江色苍茫山耸秀蔚蓝天影抱琼台

次韵凿空阁

东坡谪仙人游此江海境赋诗凿空阁如以镜写影我来遥相望荏苒岁月永读翁阁上诗宛若相像镜平生忧患余曾次徒耿耿脱身鲸波间远迹方自屏泊舟值炎蒸风雨变清冷佳哉幽深地自絶锋镝警愿为剑藏神不作锥露穎携家隐山林属意在闽岭

梁谿集卷二十五

卷二十六

钦定四库全书

梁谿集卷二十六 宋 李纲 撰诗二十二【道中作三十九首】

谒南海神庙

罗浮山宝积延祥寺古风

冲虚观 乘月泛小舟归泊头家问自闽中转来走笔寄诸弟

次韵士特见怀古风

再赋一章寄诸季约同隐罗浮

惠州访东坡旧隐

白水山佛迹岩行速不果到次东坡韵

次东坡月夜理髮

望白水山次合江楼韵

六如亭

遵海归五絶

泛舟循惠间山水清絶谩成口号

东坡谪英州以书语所善衲子曰戒和尚又?脱矣读之有感

自鷺城乘舟至河源风雨日作江流湍激以寸步进感叹有作

五月晦寓河源馆舍雨凉新沐偶成一絶夜霁天象明润成百韵

自河源陆行如循梅

循州道中作 絶句二首

剪剔悬瀑翳荟二絕

闻蝉

新月二首

早行二首

通衢夜坐有感二首

谒南海神庙

黄木湾头潮欲平丛林深处欸祠堂岂知休咎能传戒但爱昌黎解勒铭海上波涛呈秘怪壁间图画杂红青应怜归客稽留久风破寒江集百灵【唐休咎禅师为神受戒】舣舟泊头镇风雨中乘小舟行十余里遵陆游罗浮山宝积延祥寺

神山失凭依漂泊西南州连峯蟠秀气作镇苍溟陬世传朱明洞深秘未易求夜半见赤日光若金鳌浮我来夏正中川涨通行舟弭櫂泊头渚遂作罗浮游山灵悯病暑风雨为变秋云开远岫出黛色散不收篮舆陟翠微颇得精庐幽雅志愜丘壑斯行岂人谋愧烦五色雀顾我鸣啁啾寓目天水永微茫见瀛洲中原正云扰盗贼屯蠹蝨而我卧云海归途亦淹留逝将憩真境秘诀追前修稚川不可见得见野人不

自延祥寺行五里至冲虚观月出林峦之表景物幽胜坐遗履轩望麻姑峯秉烛观稚川丹竈

葛翁令勾漏晚入罗浮山丹成尸解去遗迹犹班班当年薪水人亦得刀圭残至今有遇者緑髮长童顔嗟我慕遐躅冒暑穷跻攀叩门日已落月出青云间深院人寂寂飞泉涧潺潺松风入琴轸桂露零星坛坐观麻姑峯耸翠凝烟鬟更呼老道士月夜谈玄关清景难久驻忽忽恨言还却迷桃源路叹息空尘寰兵革未休息世故方艰难脱身事幽讨此志不可删未能骑长鲸聊复乘两班来寻岩间竈更链飞霞丹

乘月泛小舟归泊头二首

来时风雨作新凉归去还乘皎月光多谢山灵巧留意未穷仙赏意茫茫

纖云四卷列星稀重露如珠湿客衣竟日罗浮何所得满船空载月明归

家问自闽中转来走笔寄诸弟

江海相望万里余干戈阻絶久离居沉鱼断鴈杳何所一纸千金初得书身脱鲸波真偶尔家

邻兵火幸恬如弟兄老矣何为者相约罗浮同结庐

次韵士特见怀古风

遭遇登黄合平生志寝丘焦头无寸效失脚落遐陬一去苍龙阙三惊白露秋贾生时欲恸平子不胜愁鄂渚何曾到兰江未许留孤城踰地角絶岛在鳌头父子同双影簞瓢付一舟飘零已知幸奇絶敢言游望断归来鹤情孚不下鸥波涛从汹涌鼓角助清幽忽奉日边令容还峤北州天恩方肉骨厉鬼漫持矛力拯中兴业深防不戴髻当车虽怒臂见险莫扶輶往事追何及来功勉或收舍垣宜葺补风雨正飏飏离索何其久吟哦谁与酬管宁终着帽王粲且登楼阻絶江南信淹留海上洲归心良耿耿去路尚悠悠见说鲸奔网仍传盗聚蠹不知供羽卫今有几貔貅瓠越亦远矣江淮已定不视天真懵懵知命罢休休水有朝东性嫠非恤纬忧吾徒强餐饭肉食自深谋

再赋一章寄诸季约同隐罗浮

枕海仙山舞翠蛟葛洪丹竈尚余凹兵戈满眼归何地云木连天思结巢岂有声名同八士当令踪迹继三茅携家早作来游计玉户金关幸可敲

惠州访东坡旧隐

海上归来访老坡依然遗迹未销磨松风亭下梅花老鹤观峯头乔木多垂世文章灿星斗平生忧患足风波华堂满瓮题诗笔人事其如天定何

白水山佛迹岩行速不果到次东坡韵

罗山与浮山对峙蹲两股有如垂天鹏决起初振羽兹山乃东麓秀若芙蓉吐谿谿岩洞开地裂媧不补何人履石上修趾映玄乳当时巨灵氏擘华不用斧蹈躩意未已遗拇到南土连山乃浮来海若助掀舞强称金僊人谁见来接武坳洼踰镌鏤缕脉分踵拇何尝藉青莲长此濯白雨颇疑秦汉间方士恣飘鼓凿成巨人迹聊示神仙府祖龙茂林翁雄毅犹猛虎一为异端惑种种受欺侮我为江海行风雨齐万弩余生屡涉险何异孤注赌已从罗浮游胜境敢多取天公本无私尤物随意主濶视天壤中沧洲乃吾圃

次东坡月夜理髮

月明星稀乌鹊翻先生夜起临幽轩呼童具栲不停手一气泝流天地根自经忧患髮如葆欲论此心无与言不如緘默度余日怅望吴越空销魂

望白水山次合江楼韵

罗浮之麓何壮哉山灵为我烟云开忽忽行役不一到翠光百里随人来峽南鍾此山川美中有幽人呼不起月圓月缺豈人为潮落潮生自江水非人流水水流人世故人情日月新拨置千忧并百虑且醉一斛松醪春

六如亭

松林葬玉近禅扃便把伽陀当勒铭居士已亡三昧手侍人空有六如亭玉环约指无消息巫峽行云更杳冥万法本来皆梦幻春风又见草青青

北归将自英韶趋江表因游清远峽碧落洞謁六祖于曹溪望韶石渡庾岭皆峽南絶景也适江西道梗遵海而归此志不遂赋五絶见意

清远峽

凝碧湾头碧玉山林松古寺寄孱颜佳人得侣已长啸空使山僧藏白环

碧落洞

碧落嵌空羣玉峯烟霞深锁翠微重乳羊不作黄羊色放筇能回冰雪容

南华寺

久矣曹溪法雨流祗传一滴满中州南来不见祖师面长与祖师同此游

韶石

重华南狩到炎荒高会羣神广乐张岂独有情能率舞至今峯石亦低昂

庾岭

谁言庾岭极荒遐夹道青松释梵家喝暑北归遵海上无因一为折梅花

泛舟循惠间山水清絶口号四首

雨过溪流没旧滩舟行竟日画图间重重翠緑相环揖卧看王维着色山

烟雨霏霏溪上村白沙翠竹对柴门江湖战鬪波成血耕凿樵渔如不闻

青山碧水白鸥飞野岸临流有钓矶便欲诛茅老沧海于今江浙可忘归

山下清江匹练横山头红日半轮明渔人晚集知多少静听鸣榔撒网声

东坡谪英州以书语所善衲子曰戒和尚又?脱矣读之有感

东坡夙世乃戒老次律前身为永师一念参差成此错百忧锺萃使知非我生已约渡南海今日岂知还北归从今莫打这鼓笛必竟是事终由谁

先公太师尉秀州华亭日与僧灵照师相善尝下村视涝梦照师曰本欲渡南海与君有缘故来托化是夕卫国太夫人亦梦有僧开帐而寤归既相与语异之遣人候灵照则以见梦之夕入灭矣已而余生人皆以为灵照後身也故云

自鷺城乘舟至河源风雨日作江流湍激以寸步进感叹有作

榜舟泝回溪夏潦适川涨惊湍激怒澜怪石立异状嵩师巧为计巨细施石上噪呼集衆力进寸退寻丈峥嵘三数峯竟日不离望乃知势不便智力未足仗我行极江海幸免鱼腹葬书生妙言辞过谓神所相及兹困沟渎更觉水石壮翻思泛沧溟千里才一饷岂惟小中州端欲籛崑阆斯游不可忘临风默惆怅

五月晦寓河源馆舍雨凉新沐偶成一絶

风雨萧萧作晚凉山城松桂发天香兰汤沐罢尤清快一枕江南归梦长

夜霁天象明润仰观有感成一百韵时岁在斗荧惑在氐微甚辰镇陵犯於翼轸间夜半斗杓转占帝座未明台星尚拆云

昊穹运宸极示人文灿然万象森布列七曜纷回还体物具六扰面朝别三垣德隆乃循轨政错因失躔日月有薄蚀星辰或相挺晕适与佩玦精祲光属联灾祥本人致销弭术在焉譬犹五藏病察色推其原诂有使之者一气兆所先应病投药石厥疾尚可痊恬不加料理瞑眩知何缘愈病当以药弭灾当以言苦言逆人耳龟策穷根源甘言悦人意无乃有後艰虚心行正说天道咫尺间太戊正厥事桑穀反为妍宋景知爱民法星退亦遄精诚所感格应效犹衡权尧舜曰钦若七政齐玗璠周公戒成王敬德享历年奈何後世士导使不畏天为子傲厥考获罪安祷旃论议肇熙丰猷为终政宣皇天岂无意儆戒良拳拳长星踰万丈赤气夜缤纷是为兵革祥厥异古未闻台谏既钳舌太史亦讳论事始初破睦衅成继开燕至今为厉阶祸难相连延迫于靖康初储皇御乾坤金兵遽犯顺铁骑凌天阊虽含恭俭姿顾乏英伟臣邪正相杂揉盈庭事纷纭机会一朝失安危自兹分愚儒不远虑贼退已安眠岂无绕朝策谁着祖生鞭彗孛扫紫微急怒如戈鋌谀臣秘其事犹欲饰以文踰月始避殿何以应乎乾金人再称兵东都满旌旛金汤失险固豺虎肆噬吞八骏狩沙漠神州遂崩奔坐令鸱梟徒盗据黄屋尊上帝眷明德中兴属吾君建炎继大统威令赫以新四海望膏泽攘戎拯斯民光明日初出照烛穷天渊陰云忽蔽塞寰宇陡蒙昏迄今四寒暑天变何其繁日中有黑子翩若鷺雀翻赤氛环斗

枢黑祲如突烟三台日离拆帝座亦屡迁连年盛夏寒雨霖日联縣昨宵偶晴霁仰视青霄端
五纬失躔次荧惑仅如钱太白扬其辉入镇光相聯灾变不虚发天心尚周旋岌然国势蹙人
谋益回遄飘腾寇骄横搏逐踰鷹鷂前年蹂关陕杀气摩东川去年破山东轻骑犯淮壖今年
扰江湖深寇台与温东南几藩府接境遭刘?将帅望风遁巨贼摩其肩屠戮到稚乳焚烧无尺
椽翠华亦飘荡泛海御楼船士卒颇携貳谁与守四边内变不能弭何以御外患哀哉烝黎心
戴宋何其坚肝脑涂草野不忍负国恩乃知祖宗德渗漉深渊泉如何廊庙谋略不加矜怜堂
堂艺祖业挥斥极八埏谁陈退避策一一欲弃捐儿戏失两河甘心丧中原虽为东南行初不
治篱藩东晋有江左保守百余年问谁居腹心王导与谢安强藩摠重兵控扼摧凶奸坐待天
下定此理恐太漫胡不法光武奋起由空拳劳身马上治介冑被沾汗履危救民死国祚乃复
传正如大厦倾扶持极艰难一日葺一日旧业傥可全略不事撑拄摧压何由完厥今谁股肱
前轍或未悛尚容狐鼠辈寢庙恣穴穿但为一身谋真若蚁慕羶风雨正凌暴不顾栋宇颠宵
人用必危范子何其贤嗟我素愚拙三朝荷陶甄愧无徙薪策徒有焦头愆罪大幸不死归途
极洄沿废食念宗社伤心痛元元不知狂言发感愤成此篇何当采诗人为致冕旒前虽膺斧
钺诛瞋目无所冤史鰌以尸諫一语不敢烦君臣同修德庶可回苍圆

自河源陆行如循梅雨齐天气颇佳偶成古风

宿雨乍开霁新阳倏飞升峽南瘴毒地乃尔气候清束装遵陆途夹道松林青我家大江南及
此归有程山禽亦为喜林间啭新声况复抵衡宇童稚欢相迎入室酒盈樽聊以慰平生已矣
勿复道晚节师渊明

循州道中作

岭海经行涉两年篮輿触热道龙川只愁青草黄茅瘴敢意好风佳月天山顶蒙蒙遮薄雾江
心跼跼堕飞鸢劳生往返何为者归去躬耕负郭田

絕句二首

深入循梅瘴疔乡烟云浮动日苍凉踰年踏徧峽南土赖有仙翁肘後方

邪气岂能干正气妄心自不胜真心治心养气无多术一点能销瘴毒深

过黄石驿十许里严石间悬瀑淙射声隐然真小三峡也命仆夫剪剔翳荟为行者清心骇目
之观戏成两絕

玉溅珠跳雷雹声岩端飞瀑蔽林仍呼童取斧开蒙密一使行人心目清

终日崎岖山谷间雨余林下水潺潺炎方六月不知暑端为先生从此还

闻蝉

乔林蔽日沸蝉声美?超然风露清嘒嘒不休聊自乐岂因人故乃长鸣

新月二首

碧落银蟾吐知从何处来雕弓弦未上宝镜匣初开照水鉤沉影窥人光满怀微升已西没露坐兴悠哉初月明生小衆星寒吐鉞穿林未惊鹊傍户已窥床渐喜山川晓自令风露凉僊人贴片玉为我赐清光

早行二首

夙起戒徒御小村扉未开雾分山远近溪绕路萦回排遣凭诗句销除赖酒杯大恩何以报海上得归来宿雨破袷暑趣装期早还断塍泥滑滑幽谷水潺潺半世走长道暮年归故山蒙头有衲被送老白头间

通衢驿夜坐有感二首

永夜发孤笑起看河汉流羣山涌翠浪纖月挂琼鉤岂谓艰难日翻成汗漫游虚舟全不系暮景付沧洲酷暑事行役瘴云天一方晓登丞相岭夜宿翰林堂月落星河耿轩开风露香微凉生枕簟归梦到江乡地有丞相岭因常袞谪潮州刺史道此得名翰林堂见图经罗姓失其名亦唐人也

梁谿集卷二十六

卷二十七

钦定四库全书

梁谿集卷二十七 宋 李纲 撰诗二十三【道中作四十六首及抵家已後作三十二首】

循梅道中遣人如江南走笔寄诸季十首

古意四首 宿兴宁县驿二首 午暑憇夜明馆二首

宿金沙寺 放鲜鲫

自金沙至梅口宿农家

南安岩谒定光圆应禅师二首

钱申伯自海陵避地临汀闻余北归相迓於武平赋诗见意二首

次韵申伯见赠

次韵申伯上杭道中见示二首

宿道傍僧舍次蒋穎叔壁间韵

寄沙阳邓季明二首

钱申伯追送至宁化栖隐寺赋诗识别

申伯见和佛迹岩诗再次前韵

次韵翁士特相招居武夷

灵峯寺

入江西境寄诸季弟二首

游麻姑山二首

北归次盱江一览亭二首

次贵溪僊岩见兵火迹二首

龟峯长老见访成三絕句

归自海外与诸季会饮成长句兼简邹德久昆仲

中秋与诸季及德久昆仲望月同饮

送季弟还锡山省先壠四首

同诸季及邹德久昆仲游龙潭

九日登山亭会饮

九日示诸季

冬至後四日修供罗汉岩四首

叶梦授同游丹霞再次前韵

叶梦授送家园梅花且以絕句十五章见示次其韵

循梅道中遣人如江南走笔寄诸季十首

弟有青云志兄今白髮翁断鸿飞峤北归鹤自辽东鲸海扁舟过烟岚一笑空衰顏虽已老尚有渥丹红海外归来客天涯老病身卷开愁细字冠侧倩傍人久矣鸳鸯絕优哉麋鹿亲尤堪浇美酒醉里发天真人传吴会破寇向福山归松梓定安隱池台今是非伤心怀故老流泪落征衣目断沧波上龙舟翠盖飞契阔三年久惊忧一梦新江鄉漂寓客海峤得归人风雨对床夜诗书开帐晨速宜寻旧约一醉万家春寂默维摩病谁参不二门应缘聊遣化问疾欲忘言断取妙喜国同游祇树园甚深须独悟勿为衆人论寇骑滋南牧于今大将谁楼船泛溟渤哀诏问疮痍沙漠深銮輅江湖震鼓鼙远方惟岭峤耕凿自熙熙常笑晋南渡区区营一隅近传边骑扰未觉古人迂谈笑北支勒指麾西破苻凄凉王谢後继踵岂真无每讶杜陵老赋诗多旅愁只今萍梗迹自乏稻粱谋火气已徂暑金风将动秋相从攻苦淡一解万端忧触热冒氛疔怀家思弟昆早行青嶂月夜泊綠林村且喜江南近休将塞北论凭高望吴越黯黯更销魂江表难久客沙阳可暂安旧谙鱼稻美颇得士民欢骐驎已衰病鵲鵲方急难为携雏稚辈早下建溪滩

古意四首

鸾凤招不来鸱鸢麾不去君看酒肉败坐使醢鸡聚小人为身谋无复及远虑国敝身亦危何如木中蠹薰莸不同器梟鸾不接翼君看冰炭姿燥湿更相息消长本天行否泰非人力须知坦荡荡自胜长戚戚嘉木难封植恶木费剪除君看种榆柳横直皆扶?裊裊不自畏更欲陵天衢不知岁寒後松柏谁雕枯松柏寒更青蕙兰幽自芳君看绕指柔何似百鍊刚逐物成俯仰随时变炎凉悲哉小人态所得真毫铍

宿兴宁县驿二首

清夜风露冷月华牕半侵怀家千里梦许国一生心倦鸟投林急潜鱼泳泽深无人知此意抱膝自长吟六月欲徂暑又催流火辉竹间萤已乱檐侧鷺将归岂念弃纨扇永怀劳铁衣兵戈犹未息老尽故山薇午暑憇夜明馆道傍清流激湍可爱所乏者茂林修竹耳二首

火云千丈映溪山正是人间行路难赖有道傍飞瀑在喷霜翻雪作清寒

宝气何年夜发明至今邮舍得佳名我来不暇寻光景但爱锵金漱玉声

自梅趣汀行小路境埆危甚六月十一日宿金沙寺

触热过梅川境埆鸟道边林深晴有雾土旷昼稀烟略约横溪小篮舆碍石偏乱蝉鸣翳荟叠涧泻潺湲闽岭虽近止江乡犹渺然何曾愁瘴疠祇是怯危颠借问劳行役何如稳晏眠遭时正艰棘赋分自回邅已幸生还里宁辞险着鞭夜凉栖野寺相对月婵娟

客有馈鲜鲫月夜於宗之溪上放之

步月溪头放小鲜银梭掷水势飞翻清波真是悠然去不似洋洋祇听言

自金沙至梅口宿农家

夏夜宿山庄风吹禾稼香儿童窥户牖鸡犬讶冠裳戛戛竹摇翠辉辉萤弄光浊醪浇渴肺梦觉月侵牀

南安岩恭谒定光圆应禅师二首

白衣隐去碧岩空塔庙岿然海峤东分化何殊遽如许赠诗多写以之中青山緑水年年好明月清风处处同好住一方为庇?不须追逐泗滨翁

岭峤经行万屈盘北归今始到南安满山泉石有古意十里松筠生昼寒颇厌病身游梦境欲将余日付岩端定光古佛今犹在请问此光何处观

钱申伯自海陵避地临汀闻余北归相迓於武平赋诗见意二首

海峤经行偏还为闽岭游清泉涤余瘴小雨报新秋【峤南多饮溪流至武平始得井泉甘冽故云】多谢故人意来销羁客愁殷懃问淮楚兵革已宁不

我脱鲸波险君罹寇盗惊睽离四寒暑会遇两蓬萍访旧半为鬼问津多阻兵衣冠漂荡极风雨自鸡鸣

次韵申伯见赠

连年奔走厌艰难痛愤边骑入汉关万里自忘鲸海远一身今伴岭云闲孤忠耿耿空余志华髮萧萧已映颜慙愧故人相劳苦去时明月却同还

次韵申伯上杭道中见示二首

川途荏苒度年华命与时谋敢自嗟但使直方能养浩岂知权势解悲夸淮舟昔共茱萸酒闽馆今同薄荷茶往复纷纷成底事龐公只合访丹霞

相逢闽岭得同行秋早凄然风露清蝉曳残声吟翳荟泉飞小瀑落峥嵘浓云林表千峯立细路山腰一线横坎止川流任天运未应萍梗叹劳生

宿道傍僧舍次蒋穎叔壁间韵

竟日碧山中清宵憇宝宫客愁无那处一叶已秋风

寄沙阳邓季明二首

海上归来近七峯故人犹冀一樽同心忧世故存当日身履时危到此中玉带金鱼非素志碧斋翠阁自清风十年扰扰成何事依旧梁谿一拙翁

当年曾到碧云峯惟有溪山与昔同最爱幽人三径里尽收春色一壶中千年厄运非人力四海横流本土风烂额焦头何所补却输花圃乐全翁

钱申伯追送至宁化栖隐寺赋诗识别

连年淮海怅离居十日相从乐有余心向功名已灰冷老於诗酒未情?颇矜有客乃如许共话无生正是渠惜别不须追路远定期林下论羲书

申伯见和佛迹岩诗再次前韵

平生嗜读书每傲锥刺股晚窥羲文心射石遂饮羽子云方草玄白凤梦中吐区区不自量造化欲笔补当其得意时如渴味湏乳谁为摩天手愿借修月斧故人适我愿邂逅南土试将一隅授笑喜屡作舞嗟予值时危孱儒愧不武援世多掣肘放足已折拇片云空往来岂解作霖雨逝将归碧山不复打这鼓一气中夜存天光发灵府参同有真契神鼎转龙虎丹成赫朝霞魔事敢余侮世间成坏法张弛犹弓弩乾坤如许大方以一枰赌肉食谋自深菟腹何足取既非公家用且作猿鹤主相期岩穴中執此方寸圃

次韵翁士特相招居武夷

武夷山色翠崔嵬应笑梁谿又到来脱网弱鳞初纵逸伤弓倦翮尚惊猜闲中陶写资诗句愁里销除赖酒杯谁道川途废光景无根树子不妨栽

灵峯寺

古寺宿灵峯层峦倚碧空岩花开宿雨桂子落秋风地僻溪山险时危战伐同祗应输衲子蒙被白云中

八江西境先寄诸季二首

闽山行尽碧巉岩稍见川原云木参万里瘴岚来海外一溪烟水致江南故人邂逅端如梦世事纷纭未易谈铸印墩头家渐近秋风归骑亦骖驔

征途诘屈避兵戈叹息劳生可若何却把蘧庐作安宅每闻铙鼓辄悲歌【连年奔走巡尉将迎铙鼓之音不絶於前故云】候门稚子鹤立久浮海先生霜鬓多可惜光陰四寒暑只於来往与销磨

游麻姑山二首

鲁公辞翰勒山巔巘峭风姿亦喜僊假道来游非偶尔追寻遗迹更茫然野花幽草堪成梦老鹤乔松不记年谁谓瑶台无路到月明风露正涓涓

宝髻云鬟衣彩霞颺轮曾过蔡君家河滨织女不停织海上花姑长似花几见桑田变沧海犹将菽粟化丹砂此身漂泊干戈际妙指烦於痒处爬

北归次盱江?山宗瑞长老来迓且言山巔有亭俯视羣山犹培塿也求佳名大书以榜之取少陵句为目之曰一览亭成两絶句

居士新从海上回劳烦竹杖与芒鞋故人何用将迎远明月清风常往来

千里林峦紫翠环孤亭缥缈白云端登临一览衆峯小始见?山境界寛

往返踰万里首尾涉五年幸无惊忧归次贵溪仙岩新罹寇盗焚荡孑然始见兵火之迹感怆有作二首

梦里幽人独往来僊岩依旧碧崔嵬伤心二百载涵养极望皆成瓦砾堆

辽海归来丁令威山川虽是事多非衣冠南渡奔崩极始信六朝犹足依

靖康丙午冬道江南宿龟峯寺建炎庚戌秋北归再过行遽不果到长老智光见访成三絶句以遗之

散策曾游瑞相峯烟霞深处翠成丛清江使者今安否五换星霜一梦中

去国翻成汗漫游迢迢云海六鳌愁归来又踏江南土都在当年拄杖头

兰若松林物外居美师一柱十年余奔驰万里心灰冷借我峯前使结庐

自海外归间关万里经涉五载初抵家与诸季会饮成长句兼简邹德久昆仲

楚氛未静狼烽起翠华摇摇无定止谋臣猛将如云屯坐视金人渡江水我归自南时正艰繚络间关万余里问津处处皆战塲访旧往往成新鬼伤心不忍顾浙河故园已在荆棘底幸然家寓大江东窈窕精庐山谷里当时百口还满前况复添丁长童稚衣冠南渡多流离骨肉无虞能有几生还已荷皇天慈见汝更使清愁洗夜阑秉烛疑梦中破悲为笑且欢喜在原真赴鹄鵠难玉树还许蒹葭倚眷言兄弟同友生风雨鸡鸣未云已闽山深处是吾郷携幼扶衰又将徙安得庙社固根基一使寰区尽蒙祉

中秋与诸季及德久昆仲望月同饮

五年客里过中秋今夕安知无此愁共喜银云开碧落坐看蟾魄过西楼清光着物殊他夜好景於人散百忧人月皆圆那易得莫辞大白十分浮

送季言弟还锡山省先壠四首

四年谪去远桑梓万里归来纷甲兵却恨此身方抱病扫坟不与汝同行

北骑南牧浙河空多幸依然马鬣封劳汝遥传一掬泪霜前为洒万株松

每忧吴会太繁雄寇骑凭陵掌股中若到新经兵火地莫将有限悼无穷

连年瘴海鬓成丝多荷君恩特放归邂逅故人相问讯为言遽瑗久知非

同诸季及邹德久昆仲游龙潭

避地寓江左精庐极深幽驾言穷胜赏遂作龙潭游暑气歛以退轻云蔼而浮?林未摇落山色宜清秋萝磴穿窈窕松风散飏飏铁花秀石壁玉韵锵溪流谁将三峡桥断取来岩陬会心得佳趣浊酒相献酬嫩菊青可摘寒?郁堪羞乐哉山林间乃尔远世忧岂知江淮瀆杀气横戈矛幽讨未云已散策层冈头天绅施修瀑落此万丈湫空蒙杳霭中时有飞鱼游神物不可见下隐长黄虬百谷正焦枯胡为此淹留会乘风雷便一起泽九州我与二三子於世初无求萧然岩壑姿正可擅一丘愿言假吾居聊作潜珍谋玉函畀思邈贝阙归灵修何须挟白羽共逐青绡牛

九日登山亭会饮

渊明避世士酷爱九日名独酌东篱下悠然得此生我辈正羁旅佳节安可醒相携陟翠巘置酒松间亭菊蕊弄新黄橘苞破微声鬓边插茱萸未觉巾帻倾云山蔼佳色风林动?声慷慨念平昔醉舞属羣英国步方缀旒衣冠正漂萍山河举目异望远若为情方期汗漫游天池濯吾缨何必楚囚泣牛山良可轻

九日示诸季时会饮者八人

海外频年怀棣萼江南九日共茱萸莫愁羣盗惊邻壤且作新诗慰老夫坐上岂无吹帽客饮中况是谪僊徒不将酩酊酬佳节肯信黄花解笑无

冬至後四日修供罗汉岩因访丹霞木老成四絶句

道人眼静絶空花岩壑萧然物外家十载闻名今始到龐公真是访丹霞

篮輿清晓叩禅扉山路云深翠湿衣谁家峯头双练瀑空蒙散作玉花飞

碧山深处敞层岩中有幽人默自参休指天云与鉶水烦师试说後三三

岩峦鼎足繚回廊泉石幽奇草木香幸有峯前方丈地可能为筑读书堂

叶梦授龙图同游丹霞见和四絶句再次前韵

岩窦嵌空南宝花玲珑楼阁衲僧家兴来结客穷幽讨冲破晴山几段霞

渡水扪萝欵石扉杖藜同着旧緇衣犹嫌林下諠僮仆欲学孤云野鹤飞

烟霞绚彩染幽岩紫翠?茏云木参幸有幽人共清赏岂惟风月友成三
夜寒月影照虚廊境寂心清发妙香藜藿山林有余乐未应肉食念华堂
叶梦授送家园梅花且以絶句十五章见示次其韵
天欲春光一点回素英先识化工裁恼人不作铅华态愿下当年玉镜台
道人宴坐得圆通妙观年来等色空结习已销花不染何妨镶丽伴衰翁
枝头数点雪初残折置冰壶分外寒烟蘂轻盈未全拆国香暗淡已欺兰
殷懃剩作送梅诗捻断霜髭不为基只恐苦吟令太瘦个中风味有谁知
傍雨移梅趁小寒探春几度独凭栏不知冷淡缘何事偏得幽人带笑看
坐来寒谷变阳春雪里开花若有神多作新诗咏尤物知君最是爱花人
超然标格冠羣芳妙质天教彻骨香烂熳开时何足道最怜新蘂半涂黄
?篱烟雨数枝斜行路于今五见花又向闽山和月摘坐令流寓叹年华
山路相逢若有情折来书幌愈轻明何须更道能调鼎小啄微酸已解醒
天生丽质絶尘埃肯把胭脂漫污腮幸有清香过於雪对人何止白皑皑
萧?竹外袅烟梢清浅溪流映小桥不似僧房静中看月明风细夜寥寥
小轩幽槛最相宜对酒难禁绰约姿莫讶落英飘万点待看青子缀?枝
云裳缟带步摇冠谁遣瑶姬下广寒默侍先生浑不语风枝时听佩珊珊
广平援笔赋梅花富艳清便底死夸况有西湖隐君子句中能道影横斜
草木冻死山中村惟有梅花解返魂弱植孤根傲霜霰玉奴终不负东昏
梁谿集卷二十七

卷二十八

钦定四库全书

梁谿集卷二十八 宋 李纲 撰诗二十四【辛亥岁以後作六十四首】

上元日同王丰甫叶梦授会饮

闻建寇逼境携家将由乐沙县以如劔浦次沙阳留题寓轩
留题凝翠阁二絶过罗畴老故居有感二首

兴国璨老浴室新成以伽佗见示戏成三絶句宿开平寺二首

道延平适风雨大作土人谓之劔归

题王氏志嘉堂二首

追次东坡和郁林王守韵

游包道士山居 自劔浦乘舟至水口

温水二絶 次韵周元仲见寄二首许崧老三友篇赠珪老

周元仲来自湖外传示崧老赠东林珪三友篇读之慨然因次其韵

游贤沙凤池二首 次韵奉酬邓成材二首次韵陈中玉大卿二首

游鼓山灵源洞次周元仲韵

六言颂六首赠安国觉老

寄吕相元直 留题天宁明极堂

松风堂长篇 次韵刘倅寄荔支初秋访许子大於东山大乘寺

王丰甫待制会宴湖亭

秋日奉陪王丰甫许子大康平仲游贤沙宿凤池登昇山偶成二首

次王丰甫韵

次韵王丰甫同游西禅斗车堂

九日诸季散处长乐外邑怅然有怀二首次韵陈中玉大卿见赠二首

送周元仲访亲桐庐

郑梦锡教授送黄精以诗答其意

初见梅花三絶 奉寄吕丞相元直二首以旧赐战袍等赠韩少师二首【并序】

奉赠宣抚孟参政二首

题止戈堂二首

上元日同王丰甫叶梦授会饮

当年玉辇侍端门岂意风尘四海奔正恐溪山太寥落也将灯火照黄昏月华清切人千里曲调凄凉酒一樽多谢故人相煖热感时抚事祇销魂

闻建寇逼境攜家将由乐沙县以如劔浦

我来寓杉江客馆未煖席纷然羣盗起环境暗锋镝束装呼仆夫又复事远适峩峩章源岭峻峭初未识攀援仅能进十步九倾侧风吹雾雨水草木尽矛戟朝登暮始降落日半天赤儿童饥屡啼徒御疲已极薄游玉华洞庶可稍休息东郊遽不开蜂蚁迭吞食避寇如避弩吾敢惮行役驱车适沙阳颇喜田野辟虽经兵火余邑屋幸如昔旧游疑梦中一一有遗迹寓轩存佛宫修竹自春色峥嵘凝翠阁尚对七峯碧故人皆避地谁与道胸臆理舟劔浦行稍就寬旷域溪流正湍暴恶子亦充斥脱身险阻中協济藉衆力吟哦杜陵诗妙语皆中的丧乱古今同临风意如织

次沙阳留题寓轩

一纪重来一梦中寓轩修竹自春风故人散去因羣盗旧意相亲惟七峯溪上偶存凝翠阁園中安往乐全翁感时不用频惆悵万法从来本是空

留题凝翠阁二絶

重到沙阳十二春新罹兵火为伤神欲论旧事无知者只有青山是故人

山秀波平望不穷此身浑堕翠光中兵戈满眼栖何地注目溪头羣玉峯

过罗畴老故居有感二首

凤去梁摧忽十年空余文翰世间传池台春色仍依旧几杖遗音犹隐然把酒屡陪高阁醉挥毫几和白云篇追寻旧事如畴昔泪湿幽花曲槛前

一别那知生死分乱离重到德公门雷张莲社旧同约询惠沧洲徒有言江海凄凉人已远园林萧瑟剑空存我来痛恨忽忽去宿草无因奠一樽

兴国璨老浴室新成以伽佗见示戏成三絶句

湛然定水满新池试浴金毛狮子儿普愿衆生尽无垢此身何惜汗成泥

汤泉海涌气云蒸垢去心安身倍轻谁道圆通非外护却因妙触得宣明

池中已具八功德浴处还敷七浄华妙体本来尘不染何妨痒处与抓爬

宿开平寺去剑浦二十里有泉石之胜曩与郡守谢德夫同游今一纪矣溪山草木依然住持犹旧人也感叹有作二首

旧游浑似梦佳处每难忘地僻溪山秀春深草木香世途方梗棘老景自凄凉衲子那知此闲中气味长往年同谢老胜赏到开平步履山云细回舟溪月清光陰双转轂身世两浮萍愿卜幽栖地翛然得此生道延平适风雨雷电大作土人谓之劒归有感

干将未发埋酆城光气上腾干列星张雷博识各有得神物终合归延平没人下视不可取天矫已作虬龙形至今千载有肸鬐往往出入驱雷霆我来弭櫂双溪上正昼云雾忽晦暝金蛇掣电起潭底霹雳洊作声轰轰土人谓是剑归候连日风雨资芽萌嗟嗟尔剑诚有灵胡不奋飞辅助讨不庭羣凶塞路盗贼横夷狄外侮方骄狞佩之其人得所托蠹国害民奸腰佞领迺迺皆削平何为终日但长啸时出光怪惊动无知氓

题王氏志嘉堂二首

秀岭云屏拥湍流玉佩锵竹光深鎖翠兰气暗腾芳岂谓兵戈日来登君子堂美才方世用嘉遯自难忘茗饮过溪阁萧然泉石幽雨余空翠湿春老碧鲜浮行止随时运笑谈销客愁遯亨真我事暮景付沧洲

追次东坡和郁林王守韵

盖世文章妙语言谁令骨相似虞翻玉堂大手空遗迹海岛幽栖有断垣仙去公宁怀此土生还我亦荷宽恩龙虬满纸疑飞动尚想挥毫气象轩

游包道士山居

何日养铅丹幽居紫翠间架岩开户牖隐几俯溪山昔到浑如梦今游更觉闲兵戈知满地佳处且跻攀自剑浦乘舟至水口溪流方涨备见湍激奔猛之状赋诗以纪其事

避地适南土舍车登叶舟春溪浑带雨霁石出如牛诘曲知操妙飘腾觉去适烟笼岚翠滴滩激浪花浮廉利森排戟盘回巧转輶轻生真可戒快意且销忧灩澦过三峡蓬壶访十洲平生志江海暮景侣巢由易象观嘉遯骚经赋远游扁舟入吾手此外更何求

温泉二绝

温冷泉源各自流天教施浴雪峯陬衆生尘垢何时尽汨汨人间几度秋

玉池金屋浴兰芳千古华清第一汤何似此泉浇疾病不妨更入荔枝乡

次韵周元仲见寄二首

凌云健笔有神锋抵掌高谈久不同江上过从犹宿昔峽南游历徧西东山川多助新诗里花鸟愁添老眼中万里归来好同隐竹林今祇欠王戎

五年奔走敝征衣海上相亲半是黎望断故园无旅鴈心惊中夜听荒鷄岂知南渡能还北更笑东来又向西多谢故人寻访意千山万水不曾迷

许崧老三友篇赠珪老

平生我三友四海吴李孙抱能不时施戎马生中原孙既北随难落日黄尘昏吴亦南投荒蛮瘴愁朝暾李今又去我浮槎杂鼃鼃飞涛渺何极海天相吐吞蘧蘧遗此老死生信乾坤颠沛吴江渚投依楚山樊修水抱苍巖劒气埋云根翛然竹林下乃有幽人存神交迹两忘高风嫋孤旂慰我念友心方外得所敦空寂湛禅悦中有诗清温我亦忘世者早窥治乱源忠臣泣庙社志士伤丘园欲持一寸胶往澄九河浑晚知未得力繙经委空言迨此从君游始脱百忧繁五君与六逸岁久名方尊他日竹庵东更开支许轩

周元仲来自湖外传示崧老赠东林珪三友篇读之慨然因次其韵

粲粲襄陵翁大岳九世孙文章老益奇於道见本原我生植艰虞惨澹风霾昏挽翁共出力一廓扶桑暾芬馥芝兰芷神奸伐蛟鼃此志竟萧条相顾声为吞远游负深衅行偏西南坤忆昨

遇江上攜手廬山樊林間接軟語窮盡興衰根三年隔瘴海豈謂我尚存何嘗知
寒梨頗亦聞風旛讀翁三友篇雅契久彌敦江南盜云扰崛起巢与温翁今渺安在
犹滞修水源我病寄闽岭栖息僧家园百念悉灰冷窥见易象浑区区不自量信笔
笺微言逝将从翁游淬砺删其繁三圣邈已远万古同所尊何当进此道对坐虚明轩

三月二十五日邀吴民瞻郑梦锡李似之陈巽達周元仲游贤沙凤池二首

招提环拥碧崔嵬携客登临始此回寺比道林多掩抱峯如灵隐解飞来烟霞深处
钟磬响杉桂香中殿阁开莫道钓鱼人已寂至今说法尚如雷

右贤沙

凤去空余旧浴池竹梧交翠参差云随屐齿生松磴泉合琴心泻石陂幽讨平生
如此少清闲今日许谁知道人为筑紬书室杖履来游更卜期

右凤池

次韵奉酬邓成材判官二首

漂泊兵戈到越山不妨还整切云冠乾坤策里空真象龙虎炉中养旧丹静爱白
云归远岫时邀明月下层峦此生已作长闲计祇愿朝廷四海安

文場妙譽久推豪筮仕犹从州县劳野鹤未应羣鴈鶩幽兰初不掩蓬蒿千寻
挺节无霜霰万里抟风有羽毛好去江南吐奇策从来勲业属吾曹

次韵陈中玉大卿二首

初官托茝记当时晚误明恩入紫微天邑御戎同象弭海邦避地各緇衣能诗解
饮陶元亮去国还家丁令威漂泊不须伤客寓无何为室更安归

叨尘黄阁值明时推挽英髦愧力微海上相逢顔愈渥篋中谁谓出无衣救焚拯溺
非天数修政攘夷赖主威旧国故乡休怅望中兴恢复伫旋归

游鼓山灵源洞次周元仲韵

碧海吸长江清波逾练淨我为鼓山游潮落初放艇连峯翠崔嵬倒影涵玉镜舍舟
访招提木末寮危磴凌云开宝阁震谷韵幽磬乃知大丛林托栖必深窅灵源更瓌奇
岩壑相隐映森罗尽尤物无乃太兼并伟哉造化力至巧於此罄烟云互卷舒变态初
不定岂惟冠一方实最东南胜周行洞泱中泉石若奔竞飘萧毛髮清淅濯肺腑莹当年
喝水人端恐溷观听是心如虚

空动寂岂妨并兵戈正聯绵幽讨亦云幸相攜得佳侶散策谢軒乘媿安朝夕间未可笑赵孟淹留遂忘归怅望云海暝不负惠询期更起沧洲兴

六言颂六首赠安国觉老

大虚一点真气都卢半掬水中堪笑鍾离散汉付与安国秃翁

心似莲花疏通身如灵龟藏蛰三十年来住持不曾嚼破一粒

本来滴水滴冻岂碍彻风彻颠欲问东西祖意莫嫌吃饭参禅

不用读书读史自能说西说东若人欲了此法一源通处皆通

信口长吟短咏落笔春蚓秋蛇万法无心契合丝毫拟议即差

莫问是魔是佛休言学道学禅若能不作圣解便是人间散仙

寄吕相元直

许国精忠不计身据鞭矍铄迈前闻亲提貔虎三千士力破豺狼十万军江表已欣迎骑气淮壖行庆扫妖氛劳公力赞中兴业衰病安然卧白云

留题天宁明极堂

久客若飞蓬年年气味同犹欣容榻地更得化人宫鬱勃炎蒸极巍峩栋宇雄疎林碎摇月虚館迴含风万户軒檻外三山指顾中灵潮自朝夕大舶各西东怅望关河远苍茫云海空余生寄闲旷任运学庞翁

季夏之初自安国迁南台天宁寺依南山而面北暑气尤盛暇日望山顶松林郁然意必有异因穴垣凿磴以造其上形势坦平风日清美四顾山峦环合江潮往来景物不可模状月出林表清光更多夜久閨寂殆非尘世作古诗二十韵以纪其事奉呈巽達元仲

旅泊不求安小憇南台宫軒檻尽北乡盛暑堕甌中开垣追微凉山顶罗千松烦襟忽破散濯此万里风羣山递环遶云物增奇峯江潮信有期来去初不穷嘯咏得所托幽禽亦玲珑青霞蔽落日皎月生於东清光入疎林照我鬢髮松壮年几何时倏忽成衰翁愿餐日月华为驻冰雪容二子皆静者翛然此相从灵丹论秘诀妙理谈真空兵戈满寰瀛此乐岂易逢犹恨还城市时来车马踪逝将选幽僻诛茅寄蒙笼灌溉荔支园可敌万户封屋前修竹合屋後流溪通风月应更好清欢永相同稚川晚闻道尚冀刀圭功

次韵刘倅寄荔支

色味芬芳压衆包谁将橘颂入离骚非缘人力栽培至自是天资品格高璀璨万星真伟观崩
腾百马亦良劳南来坐享吾何幸更把苏禅与醉逃

次初访许子大龙图於东山大乘寺留饮观荔支

物外仙家长自春隐沦何必为逃秦祇应榴洞赠花者【东山榴花有误入者洞中人以榴花
一枝与之】便是桃源种树人丹荔枝头星灿烂白云峯顶玉嶙峋主公留客非无意端为出
山多世尘

王丰甫待制会宴湖亭

画栋翬飞暇曲塘主人情重啓华觞月摇波影鳞鳞碧风入荷花苒苒香散策幸陪终日适开
襟还喜十分凉天涯随分同清赏何必南园作醉郷

秋日奉陪王丰甫许子大康平仲游贤沙宿凤池登昇山偶成二首

飞来耸翠一峯孤凤沼幽深若画图钓艇谢亡难复契弹琴颢在且相娛心闲自与亲泉石车
稳何妨载酒壶万壑千岩争竞处不须惆怅忆东吴

追陪杖屨极幽寻共宿精庐上翠岑凤鸟不来空碧沼仙人已去得黄金月林散影琼瑶碎烟
水澄光组练深欲把诗篇与收拾登临谁会此时心

奉同王丰甫韵

年来华髮忽盈头欲驾云帆访十洲且向林泉穷胜赏更欣樽俎接英游江山醉眼浑如梦风
月疎帘与上鉤旧国旧都何处是不堪回首仲宣楼

次韵王丰甫同游西禅斗车堂

杰阁雄楼杳霭间佳辰良夜共跻攀斗回高柄临华栋月涌清光出远山急景行将悲晚晚此
身难得到寛闲世间百虑何时了且对金樽一解顔

九日诸季散处长乐外邑怅然有怀二首

去岁初从海上回重阳相与醉高台那因寇盗迁南土阻插茱萸共一杯老矣但思情话切遑
然更望足音来黄花也解知人意故向篱边未肯开

终朝兀坐但焚香身世翛然已两忘收拾江山归古锦招邀风月入虚堂鹄鵠散去波翻海鸿鴈归来天雨霜命驾莫辞佳节後菊花开日即重阳

次韵陈中玉大卿见赠

奔走连年厌庾尘每观前史愧良臣退藏愿学灵龟蛰进取宁希尺蠖伸黄?青鞋从素志苍颜华髮愧陈人功名老去浑无味麴蘖愁来觉有神且把江山聊寓目须将梦幻与观身羲书得象谁知者更抱遗经究获麟漂泊干戈行路尘端知奔命为巫臣德同蘧瑗知舒卷时在庄周有屈伸皂盖朱旛多旧爱石渠东观正当人未将老手司文翰且赋新诗泣鬼神淮浦追寻三改甲天涯相遇两闲身中兴作颂须元结瑞国当为一角麟

送周元仲访亲桐庐

西风嫋嫋水增波送远其如旅况何身寓瓯闽饶寇盗心驰关塞阻兵戈羨君有志寻华萼顾我无因到浙河若见交游问消息为言衰病鬓丝多

郑梦锡教授送黄精以诗答其意

太阳之草名黄精养性独冠神农经扫除白髮有奇效采食既久通仙灵年来衰病乃如许瘴疠忧患频相仍稍从方士学服饵桑榆庶以延颓龄鼎中九转未遽就聊假草木搴其英闽山无雪苗可识劳君为我锄青冥封题寄远意良厚不道山寒少茯苓蜜蒸日暴试新法入口便觉身倍轻只今兵革未衰息羣盗蜂蚁犹纵横何须运甍习筋力会当一举腾上烟云之翠屏

初见梅花三絶句奉呈王丰甫待制

江梅何处不先春海峤初逢若故人谁谓冰姿太清淡一回相见一回新

开花不许衆芳知冷艳幽芳特地奇霜霰不飞闽候暖更留緑叶伴青枝

每将香剂学江梅及嗅梅花始觉非月夜故园浮动处攀条嚼蘂几时归

奉寄吕丞相元直

出拥雕戈入袞衣江城重咏我公归手扶日月还黄道足履星辰上紫微已集羣英熙帝载好施长策复邦畿海滨病叟无他望侧耳天声畅国威

年来衰病不堪论华髮萧萧满鬓根药杵声中销晦朔羲书画里见天真山僧结社成初定野老扶筇过远村休运定知兴复近剩筛麴蘖入瓶盆

以旧赐战袍等赠韩少师二首【并序】

【某】靖康丙午春以尚书右丞充亲征行营使时少师韩公实隶麾下每嘉其有忠勇迈往之气建炎丁未夏蒙恩召除右仆射赴行在所少师迓于睢阳远郊戈甲旌旗辉映道左迨今六年【某】以罪戾忧患之余卧疾江海少师被命宣抚闽部相见有故人恋恋之意既而躬率将士克复建城讨荡羣寇一方宁谧奏功凯旋将复言别随行有旧赐紧丝战袍缕装松文劒镀金银纒笥枪金花团牌山林病夫无所用之辄以为赠愿持此为圣主折冲御侮讨叛敌忾建中兴之功使衰病者增气不其赓赋诗二章以识别且见意云绍兴壬子仲春晦具官【某】序

寇骑当年犯帝阍腐儒谬使护诸军尚方宝剑频膺赐御府戎衣幸见分丈八蛇矛金纒笥团栾兽盾绘成文山林衰病浑无用持赠君侯立大勲

旧钦忠勇贯三军每一相逢更絶伦铁马金戈睢水上碧油红旆海山滨气吞勅敌唐英卫力破羣凶汉禹恂圣主中兴赖良将好陪休运上麒麟

奉赠宣抚孟参政二首

赤子潢池学弄兵柄臣仗节到闽城布宣威德雷霆奋【克建城日雷初发声】慰抚烝黎雨泽倾【自去冬久旱王师来乃雨】鏖战指踪烦妙略凯旋铙鼓震驩声灵旗径向江湖去早定艰难底太平

睢阳一别五经春邂逅相逢瘴海滨华髮知公因国事苍顔顾我久埃尘绋袍念旧故人意药裹关心多病身入覲从容见知旧为言祇欲老垂纶

题止戈堂二首奉呈安抚程待制

会府繁雄冠列城恩颁符节付名卿貔貅战罢烽烟息豺虎消除氛祲清齐阁已闻铃索静提封更絶羽书惊止戈当自瓯闽始愿挽天河洗甲兵

武备森严燕寝东华堂高敞靓相通坐令戈甲韬藏地尽在樽罍谈笑中案上屈盘香篆袅庭前磊砢荔支红偃藩乐事今多有更咏周诗祝屡丰

梁谿集卷二十八

<集部,别集类,南宋建炎至德佑,梁谿集>

卷二十九

钦定四库全书

梁谿集卷二十九 宋 李纲 撰诗二十五【自士子岁宣抚荆广赴长沙以後作三十九首】

蒙恩除荆湖广南宣抚使知潭州具奏辞免二首

辞免不允蒙恩遣使降赐趣行不获已受命二首

五月六日率师离长乐乘舟如水口二首行次昭武展省祖茔焚黄因会宗族二首道临川按
閱兵将次钱巽叔韵三首

道庐陵游青原山谒保宁宗老一首

八月十一日次茶陵县入湖南界有感

次衡州二首

降步谅二万衆口号四首

不果到南岳二絶

宿岳麓寺 初入潭州二首

到长沙月余即上章复丐宫祠以诗陈情寄吕丞相元直

罢归二首 教习战舰五絶

初去长沙有感

自长沙至醴陵道中田皆垦辟道傍有筑室而居者

春暮江南道中有感

宿疎山戏成一絶道武夷冲佑观壁间读翁士特郎中留题追怀感怆二首

自水口泛舟如长乐

蒙恩除荆湖广南宣抚兼知潭州具奏辞免

得罪明时忽六年生还新自海南边分甘伏死巉岩下岂意犹还大将权老似廉颇徒喜饭才非祖逖敢先鞭一封沥血输诚恳深冀皇慈为惻然

昔年宣抚两河间行次覃怀已召还壮志久一身似叶巧言终使罪如山士风欺蔽犹前日君命牢辞祗厚颜回首追思七年事孤危易感涕空潜

辞免不允蒙恩遣中使降赐趣行不获已受命二首

圣主隆恩雨露颁特迁星使下天关自嗟犬马虽衰疾敢避朝廷正急难龚遂有心安渤海谢安无计恋东山中原恢复吾何敢且与君王镇百蛮

频年巨盗据荆湖自是廷臣计画迂虎兕傥令随指扰疮痍可使即时苏上流自昔多雄镇内静方能备外虞子贱只忧还掣肘文侯解信乐羊无

五月六日率师离长乐乘舟如水口二首

力疾驱驰为主恩敢辞炎暑道途勤五更鼓角催行色百里旌旗拂晓云闽粤乍开新幕府灞陵初起旧将军江山满目难留恋试拥雕戈静楚氛

画舸连樯泛碧波潇湘去路饱经过山川焕发旌麾色将士欢娱铙鼓歌旧学但曾闻俎豆暮年何意搃干戈据鞍马援平生志岂在骅骝白玉珂

次昭武省祖茔焚黄因会宗族二首

不到乡间二十秋幸因帝命得来游过家上塚怀先德酹酒挥金学故侯季子归来饶印绶魏舒起废拥貔貅自嗟慷慨鞍客不及当年马少游

兵火烧残井邑空谿山依旧夕阳中故乡自昔悲游子壮岁来归今老翁细认里闾寻树石怪看旌旆走儿童王师新定回源盗犹喜田家岁事丰

道临川按阅兵将钱巽叔侍郎赋诗次其韵三首

平生多难岂能贤恩许犹持阃外权貔虎幸蒙分壮士桑榆愧已迫衰年枕前鼓角元戎报帐下更筹契箭传多少豪英志恢复问谁先着祖生鞭

酷暑修途起戴星恨无鹏翼激鲲溟折冲未论攘无敌假道何妨小勒兵试使触铙齐作止敢言旗帜益精明三军酺醕皆呼舞赖有贤侯守郡城

经纶屯难正云雷误沐恩光玷上台报国有心同犬马和羹无补愧盐梅偶持汉节如荆楚幸

会羣英共酒盃更辱佳篇与褒饰珍藏他日诧田莱

道庐陵游青原山谒保宁宗老一首

老病维摩卧七闽欲邀瓶锡伴闲身愧无拂石眠云分来作轻裘缓带人小队入山风嫋嫋飞泉出寺石磷磷烦师更举西来意一点阳和万物春

八月十一日次茶陵县入湖南界有感

忆昔湖南全盛日郡邑乡村尽充实连年兵火人烟稀田野荆榛气萧瑟我初入境重伤怀空有山川照旌节试呼耆老细询问未语吞声已先咽自从北骑犯长沙巨寇如麻恣驰突杀人不异犬与羊至今涧谷犹流血盗贼纵横尚可避官吏贪残不可说挟威倚势甚豺狼刻削诛求到毫髮父子妻孥不相保何止肌肤困鞭撻上户逃移下户死人口凋零十无八九重深远那得知使者寛容失讥察今朝幸覩汉官仪愿使斯民再苏活我闻此语心如摧平生况有阳城拙行移州县遣官僚尽罢科须治奸猾巨蠹推穷付囹圄社鼠城狐扫巢穴削平羣盗拊疮痍报政何须待朞月祖宗德泽感人深周汉正赖宣光哲中兴之运期有在庶以涓微助溟渤少陵酷爱春陵行千古知心有元结

次衡州二首【重阳日曹成以七万人过城下赴本司公参】

摇落霜林一半红潇湘秋色有无中未寻岳麓抱黄洞先到衡阳回鴈峯茱菊有情迎九日旌旗无力舞西风年年佳节多行路玉帐樽罍幸不空

弄兵赤子满潢池渤海龚生真吏师欲使循良买牛犊会须哀痛问疮痍东南王气虽方振西北流民自可悲七万虎狼皆敛戢庙堂还有阿谁知

马友余党步谅等以万衆自江西寇湖南破醴陵攸县屯於衡山县界得报即自衡阳率师次衡山遣兵将夜渡江晨叩其垒贼出不意悉解以降放散驱虏老弱外得精兵七千人分隶诸将漫成口号四首

貔貅一夜渡湘江贼垒朝临尽出降自古成功在机会周郎赤壁岂难双

王师破贼凯歌还积甲高於熊耳山尽选精强付诸将威声已足镇荆蛮

赤眉铜马与黄巾汉魏收功岂异人驾馭抚绥要有术从来盗贼本王臣

祝融道上苍生雨万事须知总是天宣畅威灵聊塞责乞身从此老林泉【春初有术者推大衍数有诗云祝融道上为苍生雨及降步谅之衆正在衡山乃知万事皆非偶然也】

余两过湖湘皆以事阻不到南岳今自衡趋潭意谓决可一到又以新讨降步谅之衆不果往为之怅然成两絶句

衡岳峥嵘倚太清长时雾雨少晴明我来却恨缘征讨不得祝融峯上行

七年三到楚江边阻上衡山信鲜缘此去便为归老计不知重到是何年

宿岳麓寺

岳麓久不到兵戈浩联绵及兹再来游莲宇犹依然隔江望城郭瓦砾稀人烟十里无草木髡尽羣山颠老僧旧相识为语当时缘寇骑中宵来烈光照天杀人知几何浮屍蔽长川巨盗继凭?奸贪争弄权诛求到骨髓荆棘生荒田兹山二三刹危甚偶得全至今斋厨室不给粥与饴步上法华堂试酌白鹤泉泉味俨如昔松竹自碧鲜端如君子操不为治乱愆【阙】永空堂慷慨不成眠安得有志士王道还平平太平复旧观山林寄余年

初入潭州二首

长沙自昔号繁雄兵火连年一扫空犹有江湖资险固恨无方略畅威风旁通川陕关河远下视荆襄指掌中圣主中兴当自此无因借箸感尧聪

昔年假道过长沙烟雨蒙蒙十万家栋宇只今皆瓦砾生灵多少委泥沙寸心报国浑忘老四路宣风静不譁祗愿吾皇假年月直从襄汉定中华

到长沙月余即上章复丐宫祠以诗陈情寄丞相元直

衰病投闲不记年误恩暂到楚江边布宣威德销羣盗循抚疲癯理废田报国固将求尺寸乞身又欲老林泉归欤晚节知无悔赖有元台为保全

余行次衡阳弹压曹成七万余人出湖南境移师衡山降步谅二万衆既入长沙次日即遣师降王进三千人於湘乡县七星寨复破王俊三千余人於邵州其余羣盗以次讨定凡五万余选择精锐得万二千人分隶诸将境内遂安流移归业上章复丐宫祠未报间闻有旨废宣抚司及以言者罢去有感二首

起废无因许退藏报恩欲效短中长固知吉甫无张仲犹冀文侯知乐羊破贼功名嗟寂寞吞燕志气已凄凉春鸿秋鷺空来往昭氏成亏可两忘

大将呼来若小儿片言罢去复何疑才如颇牧犹遭谮功似韩彭未免危往事几番萋菲织孤忠惟赖圣明知归欤久得山林趣丹荔青蕉正是时

长沙有长江重湖之险而无战舰水军余得唐嗣曹王臯遗制创造战舰数十艘上下三层挟以车轮鼓蹈而前駛於阵马募水军三千人日夕教习以二月十八日临清湘门按閱旌旗戈甲一新观者如堵成五絕句以志之

车船新制得前规鼓蹈双轮势似飞创物从来因智者世间何事不由机

战舰初成閱水军旌旗戈甲照湘滨浑人未识舟师制叹息工夫若鬼神

长江巨浸虽天设控制堤防本在人暇日不为坚守计临危何以扼通津

曹瞒百万瞰江滨谁遣孙郎会解纷满眼旌旛风浪里景升方觉是鸡豚

刘裕当年西入关楼船浮渭取长安不施艖櫓争先进坐使秦人破胆看

初去长沙有感

恭承嘉惠半年余千里宣风愧术疎岂有恩威思将士漫劳稚耄拥轮輿鱼归江海身方适鸟出樊笼意已舒多谢吏民相眷恋使君此去欲悬车

自长沙至醴陵田皆垦辟有筑室而居者

年来盗贼若冰销襁负归民满四郊烟雨一犁初破土江村环堵且诛茅疮痍不扰生新肉燕雀无虞返旧巢安集勤斯徒自叹勿令虎兕更咆哮

春暮江南道中

江上风光烂不收一年春物又将休鸣鸠乳燕自相得飞絮落花如许愁目极关河天杳杳身归闽粤兴悠悠往来踏遍江南土已约幽人老一丘【临川遇东林珪相约同老林下故有是句】

宿?山戏成一絕

疎山缘熟岂无由暫到人人识故侯临别殷勤语禅子祇来托宿不来游

道武夷冲佑观壁间读翁士特郎中留题追怀感怆二首

昔年曾谒武夷君先遣瑶山入梦魂旧事追寻如电激此身来往任云奔羣峯缥缈凌空翠一水萦纒带雨浑愿向明时乞骸骨诛茅深隱洞中门

昔年曾约武夷孙仙赏心违莫共论地下修文君已远世间多难我犹存题诗屋壁事如昨洒
涕烟霞声为吞英爽故山应未泯试凭楚些与招魂

自水口泛舟如长乐

行尽青山泛碧溪湖平波稳画船移春鸿秋燕岂人力明月清风长我随万事纠纷何日了一
生襟抱有谁知落帆已到钓台侧恰似南柯梦觉时

梁谿集卷二十九

卷三十

钦定四库全书

梁谿集卷三十 宋 李纲 撰诗二十六【自癸丑岁归抵三山以後作三十六首】

自天宁迁居城东报国寺

风二絶句

西轩小池荷花盛开与宾客酌酒其上以荷为杯引满径醉

初食荔枝四絶 咏怀十六韵

月夜独坐二絶

仲辅叔易游黄蘗还以诗轴相示为赋二篇诸季游东山置酒赋诗余以病不果往次其韵送李似之舍人归连江二首

知宗端礼出示曾信斯展鉢之作次韵

题唐氏所藏崔白画雪中山水

题崔白画江天雪景 春晓闻衆禽声有感初见牡丹与诸季申伯小酌

小庭中作茶蘼架遂试新花与客对饮

与叔易弈不胜赋着色山水一篇

有诏举贤良作诗勉申伯使继世科

申伯见和有未肯承当之意次韵报之二首次韵勉申伯叔易仲辅作诗梗之再次韵复次韵辟之

端礼知宗宠示水石六轴戏作此诗归之千叶碧桃二絶 许右丞诗二篇

追和许崧老诗二篇

絶句约珪禅师同食荔枝二首

自天宁迁居城东报国寺

多病维摩祇一牀徙居又复借僧房荷花欲吐乍舒药荔子未丹先有香皓月解寻朱户入南风偏?北牕凉吾年半百行休矣万事悠悠皆可忘

风二絕句

自从岭海入闽中乃始今朝识 风南极只愁天柱折兰台休更论雌雄

云气飘扬万马驰占风先有土人知飞沙拔木浑闲事祇怕山园损荔枝

西轩小池荷花盛开与宾客酌酒其上以荷为杯引满径醉

池上荷花一夜开呼宾小酌共徘徊试将曲柄黄金杓注此虚心碧玉杯风露暗随香气入云山尽向坐隅来颓然径醉君知否不醉须为造物哈

初食荔枝四絕句【所居报国有十八娘荔枝】

烟雨蒙蒙半暑时轻红旋摘自提携不知谁是善知识断送归家食荔枝

平昔传闻十八娘丰肌秀骨有余香今朝亲到芳丛下应许幽人餍饫尝

堆盘盛喜珠玑满绕齿乍惊冰雪香病酒相如正消渴不妨时擘绦紬囊

南海何年贡荔枝知音千古有杨妃华清赐浴娇无力一骑红尘初到时

咏怀十六韵

衰年万事懒此志有谁知偶尔出何意泛然归不迟休为鵬鸟赋幸及荔枝时水石日在眼旌旻非所思携琴傍松径置酒俯莲池粲粲水花净萧萧风叶披忘言聊隐几得趣剩围碁天地惨将暮风云徒尔为物华去苒苒草色自离离密勿猿鹤侣迢遥丘壑姿亲朋有情话图书皆吾师扫室仅容膝说诗真解颐多慙鵷鹭羽且咏鵲鵲诗逸少誓独苦孔君休乃宜平生沧海约岁晚鹿门期喜近清秋节那为宋玉悲

夜月独坐二絕句

水轮杳杳碾层空独坐凄然秋色中深院无人共清景静闻金井落梧桐

广寒宫殿碧霄傍散下霏霏风露香斟酌姮娥怜我老故窥书幌照人牀

仲辅叔易招客同游黄蘗还以诗轴相示为赋二诗

招提古黄蘗环揖尽青山我病未能往子行真是闲猿声翠屏外虹影碧潭间好句聯珠璧清新詎可攀江外留禅老佳名借此山忘心宁恋着寓意为幽闲大士说法处片云生坐间他年筋骨健相约更跻攀诸季招客游东山置酒赋诗以病不果往次其韵

衰病年来百事阑禅居环绕尽青山登高选胜从君乐隐几忘言输我闲一枕清风销永日三杯浊酒发 颜雀罗可设从来事东阁常开不是慳

送李似之舍人归连江旧隐二首

羨君卜筑粤江滨去作林间适意人环揖溪山供胜赏賸栽桃李占芳春养生有主身长健与物无心道转亲一曲监湖归贺老可能分半乞比邻

衰病修然寂寞滨已将小隐约幽人眠云啸月有余乐问柳寻花无限春争席樵渔真得计会心鱼鸟自相亲醉乡况有闲田地应许东臯更卜邻

知宗端礼太尉出示曾信斯展鉢之作奉次元韵

忘情鼎食岂无因应悟从来梦幻身自愧毗耶多病客阻陪蒲塞淨缘人心源莹澈了空法舌本圆通透味尘信厚振振流泽远嶷然一角见天麟

题唐氏所藏崔白画雪中山水

我昔曾为阳羨游正值雪花大如掌开门恍讶天地白云涌羣山入书幌铜官远并玉峯寒罨画暗流水片响千岩万壑争出奇应接高低迷俯仰十年不到浙江西寤寐胜游劳梦想大梁崔白岂善幻断取山川移异壤当时眼界无尽观都在一幅生绡上南方炎热瘴疠地使我髡然毛骨爽天光惨淡陰气凝片片飞花来苍莽毫端造化出六出不比余工得其髣髴连峯合?波涛翻负雪崔嵬几千丈谷幽草木枝干老岩曲楼台檐角敞溪头水落正石出暮靄沉舟暗鱼网山墙野壁茅屋深风扬青帘如五两买鱼酌酒者谁子应有幽人坐同飧平生爱雪喜山水对此乍觉神情悦明窓静看久愈妍似倩麻姑为爬痒一时名手真絶艺妙处工夫谁与赏生前裘马颇萧条身後丹青空惆悵惠崇声价亦相先滕薛未知当孰长我家梁谿富溪山雪里寒光含万象每同子猷乘小艇不数王恭披素氅故山猿鹤会相思感物兴怀增勇往时平事定归去来安得飞翰出尘鞅

题崔白画江天雪景

朔风飞花落暮滩潇然幽致满江干天边白鹭轻轻下风里黄芦索索乾水淡沙平瀾 侶云深烟暝鵲鵠寒江南岁晚多风景崔氏齐驱入笔端

春晓闻衆禽声有感

春山苍莽天欲明枕上静听春禽鸣雏鷺初啖正调舌姹娅乍闻三两声不如归去意良切脱却泼袴何由行愁人最是断消息姑恶更觉声娇狞布谷催耕雨才足鵲鸠唤妇远将晴其余不复识名字雅音幽韵如簧笙天公怜我太寂寞故遣尤物怡吾情鸾歌凤舞未可见候虫时鸟聊嚶嚶我生半世困漂泊巧言谗谤饱所经杜门却扫与世絶欲窒两牖忘雷霆尔声虽好太饶舌逼耳颇似虚弦惊就中提壶可人意劝我沽酒花间倾心怀百忧只欲睡更愿常醉不用醒落花芳草正可藉玉山自倒知谁令乌啼鹊噪错昏昼燕雀啾唧环檐楹从教一一恣嘲弄吾方深入无何庭

初见牡丹与诸季申伯小酌

牡丹家中州尤者西邑洛姚黄妃魏紫余品皆落寞南方瘴疠地寒暑互参错浪蘂与浮花未春先已作安能萃和气孕此木芍药今朝眼忽开数朵到书阁郁然兰蕙芬烂若云霞烁虽非千叶繁香色亦不恶花王苗裔远气格尚宏廓羣芳类凡禽累百慙一鶚把酒共对之寄意良匪薄无辞倒金樽坐使花空落

小亭中作茶蘼架遂试新花与客对饮

旋装新架对庭除多谢春工与点酥云叶扶疎成翠幄玉花浮动满龙须招邀蜂蝶来书幌燕集宾朋共酒壶?酿欲教香入骨醉中芳馥任歌呼

与叔易弈不胜赋着色山水诗一首

将军思训久为土龙眠道人亦已亡谁将丹青写山水入我宴坐虚明窓峯峦回复吐云气林木窈窕笼烟光丹枫半落天雨霜渔舟招招静鸣榔野桥岩寺递隐见浦花汀草何微茫江边落日尚返照山头正作金色黄紫青皴白有余态却笑水墨无文章画工画意不画物咫尺应须千里长具区约略贯苕霅赤岸髯髯通潇湘安得僊翁一叶艇使我超忽穷江乡

有诏举贤良方正作诗勉钱申伯使继世科

中兴天子开贤科笼络英俊归网罗此科久废习者少应诏正恐人未多君家三世五制举名与嵩华争嵯峨玉堂金马皆故物高文大策垂不磨今君落笔妙天下该洽辩博如悬河胡不进卷对廷策清芬远绍扬其波勒兵小试见家法坐却勅敌挥雕戈君如有意作大将我愿荐信同萧何功名晚逵未为老志气方壮靡有他勉哉努力为门户慎勿自弃成蹉跎

申伯见和拙句且示七言律诗两章有未肯承当制科之意次韵报之

才性如君岂易窥断碑摸索已无遗百家小说都成诵一藏魔言摠记持东里多知工润色西

施虽病善顰眉制科便与承当取正是逢场作戏时

圣朝制举萃高门文采风流日益新功德在民尤表表子孙宜尔又诜诜策名当学富彦国避世休同梅子真响答诗筒逼皇祖说言惊世更何人

申伯和篇举叔易自代叔诗复推申伯要之二子皆当由此科取重名於世恨吾资妄高不得偕二子鸣跃其间复次前韵以兼勉之

古来豪杰收殊科眇然鸾凤亦可罗汉唐选举最为盛我宋得士良已多危言切论动天壤陆离劒佩冠巍峨至今凛凛有生气岂与草木同销磨自从罢举乐软美驯致戎马窥关河翠华两宫狩沙漠叠鼓万里翻鲸波睿明感愤复旧制欲起士气宁兵戈多材好学如二子辞此其奈制举何青钱万选当万中善射不复言公他勉将忠说助休运嗟我老矣真蹉跎

申伯叔易再和诗将有从吾言之意而仲辅作诗梗之以故未果复次前韵既助其决且戒勿与仲辅谋也

嗟予於世诚左科屏居门可设雀罗弟昆相从有良友静中所得亦复多微言造理极壺奥高论盖世惊嶭峨含章怀美待时发资质已妙犹镌磨明廷策士复古制使我意气如奔河作诗劝自此途进往驾巨舸凌长波成功相期一战霸大敌褫魄皆投戈篇章酬复未勇往谦退将若斯文何定从当以一语决幸勿傍顾而言他要须勿与少游议政恐此志成蹉跎

诗三复往而二子之意犹未决吾知之矣复次前韵以辟之

僊家佛氏各有科所举净土与大罗痴人妄想到其处坚守丹鼎翻贝多胸中有此一念故积虑便作层冰峨超然了達无阂者应物不磷谁忧磨叔兮爱仙事炉竈拟骖鸾鹤翔云河钱子贪佛为藏转欲以一月分千波乃将世故与陈说坐使谈笑寻干戈愿君舍远聊自近济世不曰如之何我方衰病卧江海骇俗颇似哀骀他骅骝见鞭行甚速期子自策勿蹉跎

端礼知宗宠示水石六轴戏作此诗归之

闽溪盘屈七百里贛水湍泻十八滩何人作此极变态使我当暑毛骨寒小山屹立奔猛里飞浪汹动巉岩间喧豗似有雷霆响固薄乍疑霜雪翻枯槎石上尽坚瘦苍波喷浸尺度慳画工不复画舟楫意谓絶险无敢干岂知操舟若神者出没涛瀨心甚闲崎岖世路更巉恶返视此画平而安

千叶碧桃二絶句

春光欲暮碧桃开烟露相和染玉腮仙苑何人移得种风光疑自茂陵来

每恨桃花抵死红年年穠艳笑春风谁知零落胭脂後浅碧微开烟雨中

翰舫舟大藤峡口武陵使至忽奉福唐珍牋附以古风招隱攬之欣竦有会初心而分閫之命下已久矣咏叹不已复次旧韵用寄惓惓冀一观省

避兵穷岭海我岂文休孙慨彼鸣凤郊化为逐鹿原北吹战尘腥南接瘴雾昏森然一彗孛敢近六龙瞰转舟大藤峡脱死鰐与鼃纛裊苍崖树落日衔未吞忽得素书尺若闚黄裳坤招我以隱沦雉泽遗尘樊游心太易初攬逐万化根耿光百世後乐此不亡存宁知虎符下拥公万旌旛英威祖豫州非心折王敦从容谢东山逆气沮桓温自昔国其国治忽信有源岂容社稷镇端老孤独园至人心淑清一为斯民浑胡骑却长啸晋史徒清言武侯挥白羽亦有军务繁要封鯨鯢观复睹宸极尊功成去冥冥与我俱鸿轩

辛亥三月系舟潇湘得邵武柳州二丞相正月初书抚事感怀寄此长句

回鴈峯南楚越分潇湘烟水思离羣林寒欲暗他江浦月出先明半岭云客子无归迷世路故人不见隔兵氛春风空寄相思字寇邓经纶早晚闻

许崧老赋三友篇以遗东林珪禅师余尝次韵和之未几余被命宣抚荆广崧老复以诗来曾未一岁间闻吴元中薨于柳崧老东归薨于?余方罢帅事屏居长乐珪禅师自江西见过閱篋中得崧老二诗相与读之怆然因复追和其韵

黄尘暗神州宝玦悲王孙六龙转淮海荆棘生中原时危赖耆俊引手开雾昏廓清天宇间复见咸池瞰跨海斩长鯨驱石驾鼉鼃悼心失良策至今声尚吞二公直以方象在六二坤英英鸾鹄姿超然脱笼樊才雄一世表学贯万象根皇天不憖遗三友独我存去岁适湖湘戈甲照旗旛龙城得吴书心契久益敦襄陵寓营道诗句来清温回头失良友谁能诘其源我老卧江海病鹤栖荒园娱心岭白云濯足溪流浑幽人幸见过握手得晤言从来心地法半偈已觉繁愿磨习气垢坐覲出世尊喟彼泉下人何由复轩轩

右次孙字韵古风

转头良友死生分独鹤如何不念羣慨想平生空洒涕追吟佳句只看云?鸡墓隧违徐志羣盜潢池尚楚氛赖有幽人慰岑寂此方教体在音闻

右次羣字韵长句

絕句奉约珪禅师相过同食荔枝

荔子新来已着花千林行见烂朝霞幽人莫恋雪峯境拄杖穿云过我家

荔子丹兮满翠岚能将法味发芳甘舌根幸有圆通在何惜南来与徧参

梁谿集卷三十

卷三十一

钦定四库全书

梁谿集卷三十一 宋 李纲 撰诗二十七【甲寅秋至乙卯已後作四十六首】

次韵刘仲高提刑喜雨

再赋两篇

全真复以诗来走笔答之

奉寄李泰发端明

汪廷俊见示喜雨和篇次韵答之

题刘仲高所藏文与可墨竹

诸公复以喜雨诗来勉强赋一篇

诸季邀德久申伯同游灵源

读庄子六絶

送刘仲高提刑赴行朝

送邹德久还大柘旧隐

送张柔直赴岳州

庭中酴醾盛开二甥以诗来和其韵

张甥赋碧桃次其韵 送钱申伯如邵武小圃初成秦楚材有诗次韵

桂老以拄杖旄牛拂见遗报以二絶

次韵李似宗见示小圃之作二首

十二咏十二首 吕元直退老堂两章送张子固大资政赴召命

送秦楚材还永嘉

陈国佐左司寄示天台山图以两絶报之丹霞本老见示拂子并颂次韵

刘仲高提刑见示喜雨佳作次韵和之奉呈全真安抚资政

精祷龙渊默感通寸诚端可格苍穹驱除旱暵千峯翠洒濯焦枯百谷丰可喜盍亲尊酒渌成霖未放海云红清凉更觉山川胜闭户空慙学寓公

七月六日通夕大雨闔境告足丰年之庆枕上用前韵再赋两篇呈全真诸公

绦阙清都一念通沛然甘泽泻层穹天心会与人心合国事尤须岁事丰秋水陡添江上碧朝阳却照栋间红精诚自可驱雷雨安用区区致八公

千里沟塍派脉通挽回乐岁赖高穹风雷借助不劳力粳稻有期成屡丰枕上醉魂清梦想枝头嘉果湿犹红旅居又喜逢穰熟地主端疑是郑公【东汉郑弘为淮陰太守随车致两白鹿挟穀】

张全真复以诗来走笔答之

良牧斋祈意辄通凄然似欲变秋穹凉生枕簟精神健爽致江山气象丰编简卷舒初有味丹炉进退渐看红蓴收又整清商御自晒何年拜木公【汉謡揖金母拜木公谓东王公也】

奉寄李泰发端明

一别东吴不记年饱经忧患各林泉知公置酒常高会顾我杜门惟熟眠无分去为汤饼客有缘来作荔枝仙越溪闽岭无多地步月看云只黯然

汪廷俊见示喜雨和篇次韵答之二首

一气潜升处处通诚心初不间穹穹乍欣草木回枯槁更喜粢盛备洁丰宿雾游云朝尚合断霞残照晚偏红阳舒陰惨无遐迹造物从来任至公

悯旱遥将精意通秋霖霪霈仰旻穹山川增焕家家好黍稷方华物物丰得句自应髭变白举觞何惜颊潮红他时倘会风云便肯倒长瓢学卫公【小说李卫公未遇时常代龙行两每下瓢中一滴水辄尺余过故乡悯其久旱倒瓢倾之遂成漂溺】

题刘仲高提刑所藏文与可墨竹

萧郎画竹称逼真与可所作尤絶伦不将丹青借粉饰直把宝墨传精神渭川万个在胷次援毫戏扫如烟云眼前先见欲画者兔起鹘落气益振稚枯偃仰尽变态笔力斡转风霆春平生知作几千幅得心应手老斲轮当时谁是识画者谪仙东坡盖其人老坡亦善作此画意虽已到法未亲是中妙处不传授但得木石枯鳞皴自从兵火丧乱後锦囊玉轴随埃尘公於何处得此本四枝墨色犹鲜新风梢雨叶间浓淡纷披屈折节脉匀置之座右涤炎暑飒飒更觉秋声闻子猷会见定絶倒安用日事栽培勤只今与可骨已朽妙蹟散落此幸存愿公秘惜勿轻示更筑小堂名墨君

与可每画竹不令东坡见恐得其法也坡尝问以已画何如与可曰公所画棘针法耳坡闻之辄大进

诸公复以喜雨诗来勉强再赋一篇见鄙意

圣君忧国物情通良牧精祈动上穹塞比干戈虽未定江南禾稼自多丰阿香推轂惊雷远玉女投壶笑电红幽赞中兴万灵集愿将人绩属羣公

诸季邀德久申伯同游鼓山灵源洞仆以病不果往赋诗见意

灵源毓秀异杰出闽粤间神功谢镌凿妙境森回环曲磴下窈窕高岩上孱颜松萝互翳正暑生清寒路转人寂寂泉飞涧潺潺乘高望云海天末波涛翻伟哉宇宙中有此气象寛诸子雅好游蜡屐履山樊佳客来自远复共一日欢而我抱衰疾屏居方杜关岂不乐山水宴坐心不阑神游八极表目寓无髦蛮块视衆岳小杯看五湖慳矧兹几案物安用劳跻攀登临务得隄无乃见一斑作诗调诸子醉语不可删秋风动林壑冻雨洗尘寰新凉至万里浓翠浮千山白云出何心飞鸟倦自还兴尽盍遄返胜游宜勿殫

读庄子六絶句

漆园仙吏已宾霄浩荡奇言久寂寥鹏鷃何须迭相笑斯游安往不逍遥

世间物论最难齐有万初从一气吹若会此心平等法天渊元自絶高卑

养生有主卫生经神守全时岂废形游刃有余刀不挫解牛须是学庖丁

濠上观鱼适意时从容鱼乐独心知何须更问鱼非我能见鱼游复是谁

宁作泥涂曳尾龟难堪刍豢庙中牺从来一臂重天下肯以此身轻用为

诋欺儒墨每云云刍狗诗书迹已陈泯絶是非归道妙扫除糠粃见天真

送刘仲高提刑受代赴行朝

绣衣将命七闽中，揽轡褰帏迈古风。怀抱坦然推厚德，平反多处阴功却。持汉节朝天陛，未许瓯民借寇公。簪笔行趋青琐闥，携家去指水晶宫。【将泊家吴兴郡故云】风吹烟浪蓴鲈熟，日照霜林橘柚红。若到东吴见知旧，为言多病一衰翁。

送邹德久还大柘旧隐三十韵

抱病卧云海，杜关谁与游。邹子惠过我，命驾无停輶。但思一会面，不愿万户侯。故人相许心，拔俗今焉俦。触热涉长道，始识瓯闽州。叩门泉石边，僮仆惊髭虬。怪我齿髮衰，志气非昔侔。岂知数年来，患难如戈矛。收悲且欢欣，身健余何求。情话豁怀抱，高辞绍轲丘。远寻云间寺，屡泛江上舟。同擘荔枝红，坐见菊花秋。告我欲遄返，归袖风飕飕。投老不禁别，聊兹小淹留。置酒古道场，大白相献酬。短日忽西匿，轻云霭而浮。露下松桂枝，月转西南楼。殷勤渭城唱，逌旦增离愁。念子韞器业，学博仕未优。至宝委路傍，谁能辨琳球。世事方多难，英俊宜旁搜。何人有高识，荐此穷马周。丈夫重气槩，出处非身谋。岿然栋梁材，回首须万牛。玄豹且深隐，驂驥将见收。嗟我蒲柳姿，雅称山林幽。平生七不堪，岂独三宜休。国恩竟未报，负此终身羞。行矣勉着鞭，俟时攄壮猷。他年钟鼎勲，在子吾何忧。

送张柔直赴岳州

荆楚通南国，巴陵据上游。江湖作襟带，民物会车舟。丧乱经多难，荒凉但一丘。高临洞庭野，无复岳阳楼。帝念苏疲俗，恩颁起故侯。光华剖符竹，辑睦拥貔貅。鲁肃规模在，陶公政绩优。远师前哲训，力赞中兴谋。羣盗何难缚，侵疆悦可收。往分千里寄，为解九重忧。我已甘衰病，君方茂壮猷。三年共幽讨，此日动离愁。世事经纶急，渊衷寤寐求。着鞭先祖逖，悟主继千秋。阃外资奇画，樽前失胜流。潇湘有回鴈，莫遣信沉浮。

庭中酴醾盛开二甥以诗来戏和其韵

栽培初不弃葑菲，桃李无言下自蹊。试营小圃供幽奇，野趣独与闲相宜。迺来落叶子，满枝新花璨。发归酴醾，蒙蒙烟雨湿水姿。汤泉乍洗，温柔肌玉人。胡为在轩墀，态浓意远。芬兰芝月华，万里来清辉。照耀光彩通屏帷，青云宛转蟠素螭。高架上与飞薨齐，客来花下同围碁。对花不怕输，吟诗帝乡富贵未可几。渊明之语真良规，一杯相属慎勿辞。我方餽糟啜其醪，醉中不省今何时。胷次洞達元无疵，山林正好相娱嬉。朝廷渐有中兴期，羲和鞭日不肯迟。海水清浅蓬莱池，飞花雪落白玉卮。起舞鹤氅风前披。

张甥赋碧桃次其韵

未许浓华独占春，故将浅碧鬪清新。水肌绰约疑姑射，玉质丰容似太真。不与天香缘底事，祗应国色已无伦。殷勤池上亲培植，从此芬芳冠七闽。

送钱申伯如邵武

钱郎与世苦不谐胷次徒抱经纶才行年五十犹未试蟠蛰虽久愆风雷扫除习气趣空寂华藏重重恣游历世间幻妄此道真未必亨通胜穷厄我方卧病南海滨喜君襟抱时相亲胡为乘兴有所适使我怅望归飞云兵戈格鬪何时息田园将芜归未得同是天涯流落人此心炯炯君应识闽山六月丹荔枝火齐堆盘侑一卮愿言及此复过我岁晚勿负沧海期醉乡我已成真隐君亦逃禅学苏晋乐天不醉即谈禅此外悠悠真须忍小圃初成秦楚材直阁有诗因次其韵二首

僧坊暂寓白云边古木荒溪湿暝烟试葺池台学愚谷不妨风物似斜川邀宾深愧裴公野淪茗空怀陆子泉尘世悠悠尽虚幻且将身健鬪尊前

屏迹山林得放怀槛花栏药手亲栽会心鱼鸟自相近乘兴朋游时自来半世乾忙嗟白髮四方多难使心哀岩隈水曲翛然处老木轮囷愧不才

茅斋成乾元珪老以拄杖旄牛拂见遗成二絶句以报之

横挑世界鸿毛举平打虚空水片消今日拈来居士手穿云渡水且逍遥

不取非廉取不贪玉装麈尾谩年来居士无言说立起从教作麼参

次韵李似宗见示小圃之作二首

山林自与性相宜卜筑何须物物奇旋剪荆榛开小径自移松菊趣佳时云生北岭难持寄月出东山有所思岁晚庞翁更多病攜家真赴鹿门期

竹影桐陰夏日长水花晚色淨林塘招邀风月成三友邂逅宾朋共一觴闲把琴书聊自乐静看蜂蝶为谁忙年来百念皆灰冷愿学螺川云水乡

十二咏

双莲阁

并蒂芙蓉出緑波靚粧鸾监照双娥风清月晓微开处无那幽人独见何

梦室

谁把人间比梦间本来梦觉两闲闲清风一枕北窗下游徧江南多少山

药圃

病翁饵药欲扶衰自斲霜根种种移端为出山成小草白云深处养青芝

橘亭

雪避繁华叶胜云野亭秋後露苞新橘中不减商山乐留与昂藏四老人

竹亭

槛外新篁玉笋抽和烟滴露碧先浮此君一日难相舍疑我前身是子猷

荔枝亭

平生最赏荔枝名手植芳根傍草亭嘉木亦知人意重着花不待一周星

桂亭

团团双桂拂茅斋虚幌疎棂尽日开会待秋高风露下清香飘泛月中来

兰室

尽道幽兰是国香沐汤纫佩慕芬芳何如邂逅同心士一吐胸中气味长

花坞

收拾羣英赖化工嫣然红紫自成丛四时不絶芳菲意谁谓春归阆苑中

圭沼

旋凿幽池象玉圭莲开红素两相辉年来居士心离垢天女从教试染衣

磬塘

乔木森森借緑陰曲塘波影漾疎林龟鱼不用愁清浅藻荇菰蒲隐映深

菖蒲涧

寸根九节结孤芳青劒凌波日日长幸有仙方辨真贋医师休更进菖阳

吕元直得书天台郭外治园林作退老堂求诗为赋两章

猎得飞熊自渭滨
钓璜赐履定前身
功高浴日千山晓
力拒回天万国春
鬻岩廊调鼎手
来为林壑采芝人
片帆云海无多地
叹息何缘厕末宾

周遭叠嶂俯清流
卜筑园林事事幽
春日鶯花随袞绣
秋来松菊照林丘
谢公终为苍生起
裴相聊成绿野谋
圣主思贤方仄席
未应长伴赤松游

送张子固大资政赴召命二首

海邦临抚忽频年
恺悌宜民德化宣
久恋阙庭心自往
乍归帷幄席应前
盐梅好去陪三事
风月还须记九仙
圣主从容问幽仄
为陈衰病老林泉

屏迹山林养病身
数迂旌旆访幽人
追酬雅韵篇章富
共醉芳醪意气亲
顾我老为沧海客
羡公去作紫霄宾
经纶蚤动中兴业
亦欲归居浙水滨

送秦楚材还永嘉

海上从容慰所思
相逢已恨十年迟
未登台省陪羣彦
且向江湖把一麾
顾我留为鸥鸟伴
羡君归赴鹄鵠期
樽前听彻阳关曲
明月依然照别离

陈国佐左司寄示天台图以絶句两章报之

往年曾读兴公赋
颇爱天台擅美名
数幅生绡传貌得
恍如陆地到蓬瀛

应真飞锡游行处
峭壁危峯跨石桥
便欲远寻方广寺
却疑图上有嘉招

丹霞本老见示拂子并颂次韵

钝根不会世间机
且作东山老住持
有个旃牛闲拂子
用时由我不由伊

梁谿集卷三十一

卷三十二

<集部,别集类,南宋建炎至德佑,梁谿集>

钦定四库全书

梁谿集卷三十二 宋 李纲 撰诗二十八【自丙辰岁至豫章及戊午岁归自豫章後作三十七首挽歌词及哭祭二十首】 赠罗伟政奉议

次韵李西美舍人见寄二首

次韵林茂南观閱水战之作

南昌楼秋望 冬至日雪

再和赵正之观水战三首

正之复次韵作六章报之

残臙雪再作二首 再次前韵二首

赵都漕出示鲁直少游所书梅诗次韵

吕元直移镇临安 次韵赵正之宠和送赵正之之官闽中

次韵郑顾道侍郎用师字韵见赠

次韵徐运使仲冬大閱

次韵折仲古食荔子感怀

游山拙句

次韵廷俊纪药圃小集见赠之作

冬日来观鼓山新阁

游大乘三首 舅甥会两章

次李泰发韵二首送仲辅提刑弟还浙东

挽歌词及哭祭诗【二十首】

杨夫人挽章二首 唐植甫左司挽词二首哭宗留守汝霖

致享张修撰墓下哭吴元中丞相二首 哭许崧老丞相二首许子大龙图挽诗二首

张次东中奉挽词三首

祭张柔直龙图四絶句

赠罗伟政奉议

契濶踰年若泛萍一樽还此共江城兰舟桂楫肯相访南浦西山无限情顾我已甘华髮老
君犹戏彩衣轻秋堂夜饮他年话莫忘棊声杂雨声

次韵李西美舍人见寄二首

铁骑长驱犯帝闱滥陪国论敢谋身十年不得关河信四海犹飞战伐尘
驾馭英雄归睿主扶持宗社赖元臣自慚老病无长策徒奉藩条牧细民

几年离索渴微言敢意高车过我门暂解轩中徐孺榻漫开坐上孔融樽
美君感慨犹能饮顾我衰迟已抱孙杞梓梗楠委崖谷上章端欲叩天阍

次韵林茂南参谋观閱水战之作

习战楼船章水滨机轮运转若无人旌麾耀日惊飞鹭金鼓翻波跃锦鳞
四坐纵观聊举白一阳潜动欲回春羽书正报淮淝捷想见牐传设九宾

南昌楼秋望

兵火凋残今几秋江山依旧绕层楼飞云卷雨不穷态明月清风无限愁
老子平生兴不浅昔人何在水空流落霞孤鹭齐飞处望断楚天天尽头

冬至日雪二首

银河谁挽落层空散作琼蕤六出同和气已随阳气至人心自与帝心通
鲁台不用书云物楚俗由来验岁功多幸丰年又相继从今卧治听衰翁

端木飞花片片匀天风不动玉成尘葭灰有意迎新律梅蘂多情漏早春更觉西山饶爽气不妨东阁会嘉宾十年不见浑如梦休怪儿童笑语频

再和赵正之都运观水战三首

戈船列阵楚江滨世事何尝不在人鷁首冲风开雪浪甲光向日动金鳞烟霄易觉壶中晚谈笑潜回席上春更辱佳篇与褒饰主人深有愧西宾

使节来从河水滨天心图旧慰斯人肃将宸指蠲民瘼力挽恩波活辙鳞北伐正须猷克壮中兴方与物为春外台岂久留英躅伫见观光利用宾

抱病深栖云海滨误恩起废愧陈人飞腾固乏抟风翮游泳长思纵壑鳞一局销磨垂老日三杯摇荡满怀春何当诏许归田野会有渔樵作上宾

正之复次前韵作四篇见示是日适登城楼以望江山且閱捷报因赋六章以报之

帝遣宗英使楚滨漕台元自得诗人从横锦绣花生舌飞动龙蛇墨起鳞心拱北辰恩露渥笑回南浦渌波春不须过作飞刍计早晚追陪紫府宾

黠寇狂谋犯泗滨胁从太半是吾人且将戈戟殲蛇豕会把衣裳易介鳞河洛至今思帝德云龙行见会王春汉官仪物都如旧混一车书万国宾

晋败苻秦淝水滨谢公祇用八千人飞腾貔虎生修翼屠剪鲸鲵脍硬鳞否运既倾终反泰寒威已振却成春吾皇盛德超千古接士端如见大宾

餘艎摇曳大江滨龟手从来笑越人会使风樯如阵马何妨鷁首着龙鳞已欣淮北兵戈捷且醉江南麴米春元直德翁忘尔汝孰为东道孰为宾

城楼缥缈俯漳滨景物依然念昔人云出西山天欲雪风来南浦水生鳞四围气象朝朝好一点阳和处处春日暮短篷轻桨急双鱼应已付溪宾

伊昔端居寂寞滨每於骚雅爱其人长篇賸得斓斑锦短句兼收细碎鳞指下粗能知越操郢中那敢和阳春愿藏大手无轻露寸胆于今已自宾

残腊雪再作二首

朔风三日散轻埃珠蘂琼花一夜开灝气远从云表下清声初自竹间来未论上瑞呈三白且助元功泽九垓向晚城楼聊寓目西山千叠玉崔嵬

縈回作舞下烟霄滿地光鋸混凸凹虛幌夜寒疑月彩疎林曉粲誤梅梢遠懷戴隱終須訪高
拥袁門未易敲好是碧天云散後銀蟾皎洁兩相交

再次前韵

太清真境絕氛埃十二瑤台面面开战退玉龙鳞甲冷导迎仙鹤羽仪来祥编已庆占盈尺和
气行欣浹九垓須信天公工幻戏晴山依旧翠崔嵬

霏霏玉屑洒层霄皓色轻盈已覆凹留客径須开綠蚁探春何处认青梢堦庭充积无庸扫松
竹欹摧尚惜敲深愧主人修具薄嘉賓徒使献酬交

赵都漕出示鲁直少游所书梅诗次韵

冰散凭陵羣木槁只有梅花欺不倒篱边野外忽嫣然暗香解作幽人恼化工着意为尤物故
遣孤芳得春早道人写照三昧手不假丹青更妍好诗家也是可怜人落笔云烟随意扫遂令
淡墨胜铅华纸上一枝长不老庭中几树正垂垂忍看飘零委烟草会須痛飲对繁华細把根
源问苍昊

吕元直移镇临安入覲行阙余方以衰病请门有卜居浙东之意愿为根老堂之游作诗寄之

诏起三湘老猎师和羹旧手帝深知戎车北伐资长策衮绣东归有去思謾作天台休老计正
当黄阁立贤时主人方为苍生急愿借新堂醉一卮

赵正之宠贖和篇褒与过厚适传新命念睽违之有日预深怅然辄次其韵

七言八法定谁师妙处工夫只自知南浦西山久同赏清风明月更相思瓌材卓犖承恩日衰
病侵寻念去时垂老相看重言别莫辞潏灩十分卮

送赵正之判宗宝学之官闽中

神明之胄庆所鍾稟毓不与常人同汉高子孙尽隆準唐室贤辅多华宗本朝功德追前古振
振宗姓敦儒风君家奕世擅英誉继持从橐声光崇向来仗节使关陕风绩不减褰帷公自从
国步暫艰危低眉信命随飘蓬十年流落困羈旅一日赐对明光宫御前奉命作大字挥毫落
纸蟠虬龙岂惟笔扛百斛鼎固已气吐千丈虹上流重地方用武貔貅十万屯元戎辍从禁近
付飞挽木牛流马慙无功国家敦睦急先务改授欲使归磨礪舍烦就简愜雅志祇恐漕运难
追踪闽山中夏荔枝熟火齐磊落堆盘红凭空跨壑千佛寺金碧照耀烟霞中登临多暇饫珍
品岂比朱墨相填丛帝心简在方仄席锋车迅召行登庸嗟予忧志苦多病齿摇髮脱真衰翁
误恩分阃愧无补岂有惠泽渐兵农乞身屡矣未蒙可坐使泽雉愁樊笼送君南浦惨长别此
心已逐归飞鸿会当柴车返故隐幅巾杖屨长相从

次韵郑顾道侍郎用师字韵见赠

昔年班列会京师邂逅相逢只旧知一纪此身浑似梦中原回首不堪思乍欣旌旆来临日共喜江山适意时感慨不须谕旧事且将强健对芳卮

中冬教閱兵将运使徐显谟惠佳什降叹之余因次其韵以答厚意且简同会诸公

伐鼓枹金闕五兵霜天清晓正峥嵘轻裘自愧叨儒帅一令安能探旧营猎猎旌麾摇有浪駢駢徒御肃无声满堂宾客皆英俊莫怪陈蕃倒屣迎

次韵折仲古安抚端明食荔子感怀书事之作

卧病闽山强自支尝珍似与故人期却嗟老眼伤心日又见轻红着子时万事从来皆默定一樽聊复赋新诗使君不作楞梨看他日逢人举似为

游山拙句奉呈珪老并简诸公

嘉客同游海上宫高僧问道得从容乍惊暑退灵源洞最爱庭开大顶峰【峯旧为阁所遮师徒阁而峯见气象雄伟】杰阁初成切星斗飞云时到绕杉松我来未尽登临兴更待秋高灏气浓

次韵廷俊纪药圃小集见赠之作

远邀车马出郊东高阁登临四顾雄雨饱共欣秧稻绿酒酣尤爱荔枝红漫同小隐开三径颇傲前贤时一中坐上衆贤皆降叹满浮大白莫如公

冬日来观鼓山新阁偶成古风三十韵

寻盟访鼓山风物宛如昨山中有开士弹指成杰阁应真飞锡来一一得所托翬飞骞栋莖绚烂丽丹雘峩峩大顶峰孤影入檐角乃知象教力建立必卓犖却为灵源游云木互参错岩深松桂香石古苔藓剥冬温日清美景短气萧索天然资野逸安用遮翠幕快哉缅登临及此小摇落乘高望瀛海南极露垠堦蓬壶在跬步谁谓仙山?苍茫杳霭中万象恣磅礴回头睇中原郡国半沙漠犬羊污宫殿蛇豕穴城郭畴能挽天河一洗氛祲恶我生多艰虞久矣衰病作君恩听言归养拙侣猿鹤忽忽岁遒尽平子殊不乐幸同二三子杖履徧丘壑跻攀力尚强谈笑心无忤野鹿饱丰甘冥鸿在寥廓翻思轩冕间何异遭束缚斯游信清絶妙赏寄寂寞晚来凄以风远色秀增岳泠泠钟磬声随月度林薄怒焉感时心未免如陨箨倘能驾云螭岂复忧世瘼会当期若士相与踞龟壳

还自鼓山过鰲溪游大乘榴花洞瞻礼文殊圣像漫成三首

一派寒流作小溪松篁深处有丛祠千年鱣骨专车在百丈灵湫瀑布垂粳稻丰穰欣岁乐笳箫清咽报神私更将小雨为滂润正是农夫播麦时

乞得明时多病身归来林下养天真芒鞋竹杖未全老药竈酒壶随分春山寺递传钟磬晚田家收拾稻粱新试穷溪上榴花洞恐有桃源避世人

布地金沙片片匀深沉院宇閤祇园清凉路半前三语摩诘城中不二门千种光明瞻瑞相六根清浄为还源狻猊坐上法王子稽首皈依衆所尊

冬至前六日奉陪舅氏燕集于张甥东斋泰孙侍坐舅甥四世同会岂易得也舅氏以诗见贶谨次韵成两章拜呈并简季弟二甥同赋

舅甥高会共称觴四世于今在一堂眉壽康宁由德厚庆流深远本源长但将直道师周孔岂有嘉猷助禹汤提海勤勤何以报愿言殊祉集新阳

人间此会信非常和气薰然自满堂竞酌芳樽同劝壽正当爱日欲迎长彩衣诵古如流水【是日泰孙诵诗书万余言无一误者】华髮衔杯若沃汤【坐间舅氏与仆皆为酒所困】乘马路车何以赠渭阳元自是王阳

次李泰发韵二首送仲辅提刑弟还浙东

朝路纷纷厌送迎乞归恩予绣衣荣稍知物外烟霞好便觉尘中富贵轻飞舄已能同叶令叱羊何必效初平坐忘我欲师前躅为过天台访赤城

谒告来归若骏奔友于真可裕衲屨共伤庭玉先埋土怅望鵠原增断魂白髮自嗟临药竈一餅端欲寄空门浙东耆旧如相问为道衰迟愧主恩

挽歌词及哭祭诗

杨夫人挽章二首

来嫔初卜凤和鸣谁谓今闻薤露声妇道宣传青史笔壺仪犹在锦官城承家早庆芝兰秀主馈空余苹藻诚念旧二卿情意厚可堪孤坐想平生

悼亡何事觉神伤端为音容不可忘举案素闻敦节操题桥今见共龙光锦囊屡庆宸恩重丹旆俄嗟蜀道长髣髴灵游元未远无人解致返魂香

唐植甫左司挽词二首

践历高华久巍然誉望崇典章谙故熟翰墨老弥工颀亮传家法清忠迈古风温温江玉砚同
閤九原中夙昔钦贤业何知共里闾忘年遇我厚谪宦识公初小岭亲高论灵斋见异书凄凉
真一梦追想涕涟洳

哭宗留守汝霖

宗泽字汝霖浙东人自为小官卓犖不羣能自立以故屡被罪靖康冬用为磁守值金寇再犯
阙上以康邸奉使道磁泽力挽留不得行再造之功泽为多同列者忌之谮毁百端斥外不用
余去夏抵行在泽得守襄阳未行与欸语忠义慷慨愤发至流涕力荐於上使进职留守京师
诛奸恶拊善良大得都人之心缮治城堑楼櫓复完壮屡出兵以挫贼锋以故能守数表请车
驾宜还阙媚嫉者愈切齿难其代者故得不罢今闻其疽发背而死殆忧愤使然殊可为天下
惜也诗云人之云亡邦国殄瘁方时危而失此一人其可哀也矣赋诗以哭之

时危念人杰济物须材雄寻常龌龊姿讵可收奇功英英宗夫子邈与古人同抱器实磊落秉
心郁精忠影纓仕州县山立不妄从青松虽未高已足凌蒿蓬涉世多齟齬失官久龙鍾擢居
河朔郡烟尘正昏蒙今上在藩邸持节使敌中力争不可往高牙建元戎王室遂再造廊庙当
畴庸同朝共排媚一麾江汉东见我论世故慷慨泪沾膺荐之守留钥付以节制隆惠政附疲
瘵威声慑奸凶金汤治城堑楼櫓欵以崇出师京洛间屡挫巨寇锋邦畿千里宁夸说百岁翁
抗疏请还阙北伐归两宫辞直志颀亮天子为动容奸谀更切齿恨未能关弓乃同归鄴人感
愤殒厥躬皇天不愍遗吾道何其穷骅骝竟委离冀北羣遂空梁摧大厦倾谁与扶穹窿安能
百身赎坐为四海恫人亡国殄瘁天意真懵懵中原气萧瑟洒涕临西风

致享张丈修撰墓下追惟平生不胜怆然辄成两章以叙怀感之意

秋原郁郁见佳城尚想音容涕泗横痛惜山颓与梁坏愧无玉润继水清丧贤初值龙蛇岁忧
国空余金石诚赖有堦庭兰玉在芬芳端不坠家声

勇退风流霭士林对扬丹扆极规箴高名雅出汉庭右遗爱空存南国深身後凄凉报恩子生
前轩豁济时心九原可作如公少独立西风泪满襟

哭吴丞相元中二首

妙年声誉霭文場壯岁飞腾青琐郎献纳承平欲尧舜扶持危难冀宣光贾生旷達仍伤鵬平
仲精忠亦殒荒自古青蝇能黑白玉华旧事已凄凉

宣和之季靖康初同力同心卫帝居扶穀共升新日月谪官难守旧田庐孔光温室不言树陆
贄忠州戒着书叹息端庄士君子岂随草木腐丘墟

哭许崧老右丞二首

夫子相知一纪前定交握手自忘年长松老鹤骨格古粹玉精金操守坚出入三朝昭大节漂
流万里正华颠皇天不憖遗元老空使苍生共黯然

多闻直谅复疏通近世交游少似公盖代才名同贾谊平生述作类扬雄笔踪高古今那有诗
调清新老更工知识年来凋丧尽不堪衰泪落秋风

许子大龙图挽词二首

芬芳登桂籍烜赫绍家声持橐恩辉渥分符政术明优优方膺仕郁郁遽佳城庭户多兰玉应
无可恨情接武鸳鸾列交承淮海州平生钦德望避地欸风流樽俎开幽抱江山共胜游那知
生死隔衰泪浩难收

张次东中奉挽词三首

贾父褰帷日于公驷马门十年持使节两郡拥朱幡无复功名会空余气槩存凄凉九原路楚
些与招魂寓意樽中渌陶然得此生孔融真好客阮籍自忘形议论千夫屈风流一坐倾伤心
将玉树寂寞閤佳城南国多奇士如公岂易求才高虽擅誉命厄未封侯故宅风烟惨新阡松
桂幽遥传一掬泪为洒暮江头致奠张柔直知郡龙图以诗四章哭之书置灵几以代祭文

一桮两浅【顷岁寓长乐与君过从必围棋酌酒荐以荔枝两浅盘君尝云此生但得奕一桮
荔枝两浅足矣】旧相期叹息君今愿已违却把荔枝三奠酒数行衰泪湿深衣

只鷄斗酒祭夫君尚想平生意气亲痛惜中原未恢复如何天乃丧斯人

去岁如今会豫章从容谈笑共衔觞岂期便作终天诀尺素开时神内伤

连夕频频梦见君依然野鹤【阙】浅世事浑如空际云

梁谿集卷三十二

卷三十三

钦定四库全书

梁谿集卷三十三 宋 李纲 撰表本诏书上

拟撰表本

起居道君太上皇帝表本

起居孝慈渊圣皇帝表本

靖康拟诏书

抚谕河北诏 獎谕徐处仁诏书起防秋兵诏 募兵出财诏

戒谕姚古诏书 赐夏国主诏书

与大金国书 与高丽王诏书

拟撰表本【建炎元年七月得旨拟撰】

起居道君太上皇帝表本

臣某言神京不守坐失金汤天旆啓行越在草莽凡为臣子之列均深痛愤之情臣某诚悲诚感顿首顿首?惟道君太上皇帝陛下游神穆清宅心昭旷法尧舜之逊禅济家国之艰难方交两宫之欢永享四海之养邻邦犯顺戈戟暗於中原帝座移居銮輿幸於朔野神人感愤华夏悲摧而臣濫总帅权莫陪执驭迫羣臣再三之恳请谓大宝不可以久虚勉狗輿情嗣守神器瞻行宫而靡及慕慈训以增怀辑睦师徒冀宗祏之可保抚宁方夏伫车驾之言归谨遣通直郎试太常少卿臣周望奉表起居以闻臣无任

起居孝慈渊圣皇帝表本

臣某言戎马荐兴环日畿而布列帝都不守致天步之艰难万国悼心三灵失色臣某诚悲诚感顿首顿首?惟孝慈渊圣皇帝陛下法禹汤之?俭体尧舜之聪明十载东宫令德闻於海?踰年南面仁政浹于寰区适当嗣位之初两致邻邦之寇割地增币以生灵屈己而讲和擐甲登埤为庙社忘身而固守金汤失险羽卫啓行致翠华之蒙尘瞻紫微而移座华夏失庇神人畴依而臣叨总师徒莫陪羈勒迫羣臣之恳请嗣大宝以抚临仰遵勤俭之风庶格中和之治伤心北望缅怀异域而增悲整驾南还尚冀敌人之悔祸谨遣通直郎试太常少卿臣傅雱奉表

起居以闻臣无任

靖康拟诏书

抚谕河北诏【阙】

獎谕徐处仁诏书【阙有进呈劄子并御批见第五十一卷】

起防秋兵诏【时敌骑出境朝廷恬然以为无事防边御寇之策置而不问公窃忧之与同知枢密院事许翰议於上前谓今秋敌必再至宜预诏天下起兵防秋为扞御之计上命草诏以谕诸路安抚总管钤辖司】

朕初嗣历服遭时艰难虎狼之羣敢肆陵侮侵犯边境达于都畿赖宗庙社稷之灵贤士大夫勤王将士之力以克扞御而仓卒之间辅臣失计割三镇以赂之天啓朕心斥去奸回决策坚守今者重兵尾袭贼骑遁逃朔部无虞与天下同庆然而敌情狡狴未有所惩秋高马肥虑复侵軼非以虎符起天下兵控扼边陲荡攘羣寇则何以震懾狂敌奋张国威以定中兴之业诏到仰诸路安抚总管钤辖司各下所管州军遴选将佐训练正兵招填阙额缮治器甲储蓄刍粮预备军须以听朕命夫一岁之间而再勤师旅良非获已共摅大愤兹惟其时故兹诏示想宜知悉

募民出财诏【时降诏诫谕诸路起防秋兵或者虑财不足公议於上前乞募民出财朝廷等第推恩以激劝之庶几可济上命草诏以谕中外】

朕嗣承丕绪夙夜兢惕思所以绥抚四海惠养元元以为无穷之计而寇戎弗靖未能偃兵故将起天下之师以振国威然而兴师十万日费千金方今积弊之後虽朕痛自刻励罔敢汰侈罢斥浮冗粗给经费其於师旅之用诚未有以贍之也昔汉帝募民入粟塞下而师赖以济今朕上为宗庙社稷之重将以定中兴之业下为亿兆苍生之衆将以图休息之期此忠臣义士协济艰难之秋也应天下士民上户有能推其财谷赢余以佐军兴者州县聽其自愿不得抑勒不以多寡别项储蓄专以为募兵养士之费具数申枢密院各以名闻朕将等第推恩以为忠义之劝故兹诏示想宜知悉

戒谕姚古诏书【姚古为河东路制置使久驻师威胜军不进上令草诏戒谕之】

勅姚古太原为河东根本右控关陕左通朔部在三镇尤为重地金人攻围殆百余日兵疲粮乏势危力殫羽书日闻夙夜忧念以卿素着忠勇为时名臣故命统帅诸将进兵应援近虽已复隆德威胜前扼南北关尚未闻踰团栢越徐沟以造太原之下致使贼马猖獗侵掠汾晋其何以解朕西顾之忧诏到其率励士卒戮力用命破坚却敌解围太原以复忻代高爵厚禄朕何爱焉故兹亲笔诏示想宜知悉夏热卿比平安好遣书指不多及

赐夏国主诏书【时金人犯阙夏人亦起兵以扰西垂鄜延路缴进夏人檄书上命草诏赐夏国主解其意以抚慰之】

诏夏国主朕居春宫十有余载弗敢怠逸四方所闻道君太上皇帝享国日久厌万机之繁爰议内禅朕辞不获命遂登大宝深惟祖宗建构之隆上皇付托之重夙夜兢惕惧不克任而金人不道乘郭药师背叛之故没燕山俶扰边境达于都畿肆为贪残劫质以往永念卿屏翰之旧信誓皎然义当戮力同济艰难以敌王忾而陕西奏报乃言卿国点集重兵五路深入攻城堡杀伤兵民朕惟卿明允笃诚世济忠孝主于西陲藩屏帝室多历年所英声流闻今至於兹殆朕德弗类嗣政之初未能绥抚之所致也西顾怅然良自伤悼及得鄜延路帅臣章疏缴到卿国檄书公牒省览再三乃知构兵起于误听檄书初言中国失德数事皆曩时大臣误国上皇已降诏书深自悔悼今朕克已求治以俭先天下凡淫巧奢丽之具一切屏去蠹国害民之臣咸已窜诛前日之事所不复论中言贺正人使之归所见京城整饬兵甲修治楼櫓疑有奸臣变乱此乃堤防金人之故岂有他哉终言与本朝信誓之久义须救援以此知卿忠义有素误听致此初无他心至於过差之辞朕初不之罪也公牒言国书之宝与旧不同此乃有司用宝差误已重窜责凡兹细故朕既释然卿亦宜亮夫金人以蕞尔海隅之国背天逆神灭绝契丹遂陵中国淫暴滋甚使其得志河有於卿哉孤军深入理当剿殄朕以皇弟肃王在其军中第命将士驱逐出境边城晏然前遣康随郑惟康道意必亮此诚诏到卿宜释去疑虑抚谕将士抽回甲兵修好如故高爵厚赐朕何爱焉今遣武功大夫王佑武功郎马持告谕故兹诏示想宜知悉夏热卿比平安好否遣书指不多及

与大金国书【干离不邀割三镇既退兵三镇之民为朝廷坚守誓不从敌上命草书与敌主道意】

靖康元年五月侄大宋皇帝致书于伯大金皇帝阙下菲德之居东宫十有余年矣迺者道君太上皇帝厌万几之烦遂议内禅肆及眇躬膺受大宝惟怀永图愿修邻好而兵革扰攘未遑致问其为怀企何可胜陈言念往日遣使海上通两国之欢信誓昭然金帛之输未尝有阙诚谓世守兹盟无有携贰而皇子郎君乃捃拾细故败弃旧约因叛将药师以兵内向刘边陲深入畿甸乘中国之不备遂肆凭陵诚非所望於善邻也城下之盟盖缘辅臣怯懦失计重镇宝货一切惟命皆出要盟神所不临岂复可用而况还师渡河劫质肃王已复渝约勤王之师百万集于城下将士愤怒咸欲邀撃徒以肃王在军之故深戒用兵使得全师以归而皇子郎君肆为淫暴屠戮良民系累妇女焚荡室庐不可胜计缘是之故三镇之民皆出死力为国坚守虽朝廷号令有所不从此乃军前失信之所致也重念顷者道君太上皇帝与大金皇帝欢盟相得之厚既灭大辽分燕山之故境以归中国累年于兹中国未尝得粒粟尺帛之助而漕运之劳金币之费不可胜计今燕山没既渝前约又欲并取三镇之地使敝邑无以为屏翰是岂大金皇帝之旨哉且皇子郎君虽贵人臣也坐受本朝宰臣亲王之拜败盟爽约妄起兵端黩货无厌求取不已有一於此岂人臣之所当为哉敝邑无辜横遭屈辱以大金皇帝之聪睿仁慈宁不谅此远恃英明敢以实告前日皇子郎君割地求赂广有要索敝邑不校悉皆听从彼此非诚人情不远谁不知之欲寻往日之盟以结两国之好使兵革不用生灵休息莫如度其所可行者重结盟誓以信守之昔我烈祖真宗皇帝与大辽盟于澶渊百有余年未尝少有变

故天祚失德不可振起乃至于兹大金皇帝倘垂英察使燕山归于大邦三镇安于敝邑各得其所保兹旧疆信使交通岁币修好传之永世为子孙无疆之休顾不韪与谨遣使人往布诚悃俛或见允愿示佳音所有黏罕国相军马见在河东亦冀召还以笃和好有少礼物具如别录中夏炎蒸远祈保毓

与高丽王诏书【金人退师朝廷遣使臣侯章等至高丽国上命草诏与之】

诏高丽国王朕居春宫十有余载虽德不类罔敢怠逸亦惟四方所闻道君太上皇帝享国日久厌於万几之烦爰议内禅朕辞不获命遂登大宝深惟祖宗基构之隆上皇付托之重夙夜警惕惧不克任而金人不道乘郭药师背叛之故陷没燕山俶扰边境达于都畿方朕即政之初遭此震惊以故未及与王相闻朕惟王世济忠孝膺受显册奄有三韩之地屏翰之旧久受国恩肆我烈祖神宗皇帝遣使修聘礼意备至情同骨肉义则君臣以至于我道君太上皇帝频年遣使锡赉不貲待遇加等朕惟中国与王远隔辽海壤断土绝而恩礼如此岂有他哉亦惟藩卫中国庶几艰难有以敌忾兹者金人乘我不备与叛人阶来深入内地王国与之邻相望无数百里之远而不能荡其巢穴以报中国岂累朝待遇殊绝之意邪彼金人者固尝臣属于王以蕞尔海隅之丑背天逆神绝灭契丹遂陵中国淫暴滋甚使其得志何有於王哉孤军深入理当剿殄朕以其劫质肃王而去第命将士驱逐出境边城晏然方将起天下之兵问罪小丑王其率励师众相为表里以行天诛夫纠逖王慝献俘本朝以报中国数世之恩大忠也取乱侮亡诛讨淫暴以伸威沙漠之外大义也拓地开境覆其巢穴以报骤骄不臣之罪大威也一举而三者皆得王何憚而不为哉高爵厚赐朕於王无所爱惜王其勉之今遣侯章等往谕至意夏热比平安好遣书指不多及

梁谿集卷三十三

卷三十四

钦定四库全书

梁谿集卷三十四 宋 李纲 撰表本诏书下

建炎拟诏

勅榜诏

戒谕武臣诏

抚谕河北河东路诏

勅榜独留中原诏

戒励士风诏

勅榜诏

朕以菲德获承宗祧以临士民之上属时多艰未知攸济栗栗危惧若将陨于深渊洪惟祖宗膺受天命覆育函夏百有七十余载德隆恩普振古所无道君太上皇帝以忧勤而内禅孝慈渊圣皇帝以?俭而纂图海内乂安苍生蒙福适金人之入寇挟诈谋以欸师待以不疑堕其奸计神都失金汤之险翠华有沙漠之行二圣既迁六宫皆从迨朕叔父弟昆宗室戚属悉被驱逼祸故之臻亦古未有是用夙夜震悼于朕心念父兄幽辱于敌廷悯生灵重罹於兵革饮泣尝胆不遑宁居惟尔四方士民抱负忠义其伊恤朕躬以共济於艰难以致安于宗社载念行在将士适当隆暑暴露之久尤轸朕怀当时加犒设州县民户募师勤王调发之烦诚可嘉悯当厚与抚循赋敛之厚当议蠲减法令之弊当议改更溃兵为盗因间虏掠残破郡邑虽已降赦令当遣使招集许令自新赃吏为奸乘时掊克重困吾民罪不可贷当遣使按治寘于典宪靖康之间忠义敢言之士或至窜逐当悉召还今日以往智谋奇画之人如能献陈当悉擢用旁招俊乂窜黜奸回协成治功以笃中兴之烈於虞天下之士大夫未忘我之祖宗当同心以相扶天下之军民不显沦于异域当协力以保守国势既昌天命益固庶几邻敌悔祸奉还銮輿则予一人以寧尔亦有无穷之闻不其韪欤故兹诏示想宜知悉

戒谕武臣诏

朕惟祖宗创业守成垂二百年涵养士大夫至矣靖康变故仕於中都者曾无伏节死难之士而偷生取容何其衆也甚者乘时为奸靡所不至实为中国羞公议弗容姑取迹状尤显着者量加窜黜以为臣子之戒夫节义正所以责学士大夫也至於武臣卒伍理当濶略以责後效

惟王宗澣首引卫兵逃遁致都城失守不可不责其余姑务含容一切不问咨尔有衆其体至怀故兹诏谕各宜知悉

抚谕河北河东诏

勅河北河东诸路州县守臣将帅忠义军民等朕惟祖宗德泽在民垂二百年天下乂安靡有变故而宣和靖康以来国家多难金人内侮道君太上皇帝下哀痛之诏讲揖逊之礼比德尧舜古今鲜伦孝慈渊圣皇帝以恭俭之德爰受内禅海内欣戴日俟治康而朞岁之间戎马再侵堕敌奸计但以讲和一事终至宗社阽危既尽取玉帛子女公私财力为之耗竭乃始劫迁二圣中宫泊皇族尊幼中外嫫戚以行侵陵之祸振古未有朕以介弟受命总师臣民推戴迫以大义入继大统重念父兄之辱饮泣尝胆疾首痛心愿与天下忠臣义士共济艰难而近者使臣来自朔郡审闻两路守臣义不爱生誓以死守彼虽凭恃甲兵之衆敢肆攻围而能率励士民屡摧其势其忠义军民等倡义结集动以万计邀击其後功绩茂着朕甚嘉之夫河北河东国之屏蔽也朝廷岂忍轻弃靖康之间特以金人凭陵不得已割地赂之将以保全宗社止兵息民而金人不道攻破都城易姓改号劫銮輿以北迁则河北河东之地又何割哉已命遣师以为应援尔两路州县守臣及忠义之士如能竭力扞御保有一方及纠集师徒力战破贼者至建炎二年当议畴其勲庸授以节钺其余官吏军兵第加优赏应税赋货财悉许移用官吏将佐悉许辟置朝廷更行量力应副为国藩屏以昭茂功庶几中原弭寧生灵休息天而悔祸二圣有可还之期则予一人膺受多福尔亦有无穷之闻不其韪与故兹诏示想宜知悉

勅榜独留中原诏

朕惟祖宗都汴垂二百年天下乂安重熙累洽未尝少有变故承平之久超轶汉唐比年以来图虑弗臧祸生所忽金人一岁之间再犯都城信其诈谋终堕诡计尽取金帛子女遂邀二圣銮輿六宫戚属悉拥以行非常之祸振古未有四海臣子孰不痛心肆朕纂承永念先烈眷怀旧京潜然出涕思欲整驾还京谒欸宗庙以慰士大夫军民之心而兵火之余民物如故朕之父母兄弟宗族靡有留者顾瞻宫室何以为怀是用权时之宜法古巡狩驻蹕近甸号召军马以防金人秋高气寒再来入寇朕将亲督六师以援京师及河北河东诸路与之决战已诏迎元佑太后逮遣六宫及卫士家属置之东南朕与羣臣将留中原以为尔京城及万民百姓请命于皇天庶几天意昭答中国之势浸强归宅故都迎还二圣以称朕夙夜忧勤之意应在京屯兵聚粮修治楼櫓器具并令留守司京城所户部疾速措置施行咨尔士大夫军民体朕至怀无有疑虑故兹诏示想宜知悉

戒励士风诏

朕观古之为士者何其分义之明而忠厚之至也承平之时靡好爵享丰禄相与同安荣多事之际不择地不苟免相与同患难故人之好我至於示我周行王事靡盬至於不遑啓处而鹿鸣四牡之诗作先王之泽可谓盛矣祖宗涵养士类垂二百年教以礼乐风以诗书班爵以贵之制禄以富之於士无负而士之所以图报国家者不能无愧於古人日者二圣播迁宗社几

至於顛覆而伏節死難者罕有所聞其故何哉肆朕纂承慨然思任羣材相與協濟修政事繕兵甲以奉迎銮輿而士大夫奉公者少營私者多徇國者稀謀身者衆乞去則必以疾病為辭沿檄以自便者相望於道途避寇而去官者日形於奏牒甚者至假托親疾不俟報而東下挈家而遠遁夫禮義廉恥正所以責士大夫也所守如此朕何望焉豈朕初嗣大位所以訓告者未至歟將士大夫狃於故習而未能遽革歟已詔甚失節者寘之極典其次投之遠方為多士萬世之戒矣其自今已往各?乃職一乃心助予一人克復大業底綏四方以匹休於隆古敢有弗率弗迪尚蹈前愆在內委御史台在外委監司彈劾以聞邦有常刑朕不敢赦故茲詔示想宜知悉

梁谿集卷三十四

<集部,別集類,南宋建炎至德佑,梁谿集>

卷三十五

钦定四库全书

梁谿集卷三十五 宋 李纲 撰拟制诏一

制二十一首

宰相除三少

极处中曰紫微之垣莫亲於辅相斗戴六曰文昌之府实本於政机眷予忠荅之臣茂膺考询之典诞宣显册敷告明庭具官某直谅而粹夷温?而博达学足以谋王体而断国论材足以亮邦采而熙天功顷被眷知擢陪机务履一德而不爽告辰猷而允臧民具尔瞻宜辅台德属兹袞职之阙延登揆路之华进秉钧衡正位槐鼎朕方宪天以临八极体道以照百官仰赞三光之明俯遂万物之理资尔燮调之助成予化育之功希冕篆车陟崇资於亚保金印紫绶膺峻任於元台申衍爰田倍敦真食式昭物采并示龙光於戏帝舜选於衆而举臯陶实惟股肱元首之一体商宗审厥象而得传说有若酒醴和羹之相须立非常之事必赖非常之才建无穷之基则有无穷之闻往佑乃辟永孚於休可特授少保太宰

宰相除三公

代天理物夙隆揆路之勲论道经邦宜补袞职之阙眷予硕辅为国荅臣泰山岩岩久副万邦之望赤舄几几往登三事之崇播告路朝诞敷显册具官某裕和而肃义敦厚而高明智周万务之微学洞六经之蕴蚤以令闻扬于禁涂臣作朕股肱擢预经纶之政帝赉予良弼遂膺考询之求劬相国家敕宁方夏燮谐四气之序参聽百官之成当轴处中材足以运动枢极赞元经体道足以和同天人礼乐兴於百年声教訖于四海俾予从欲以治时乃佐王之休畴其勲庸宜有褒宠备三公之典册爰隆帝傅之联秉上帝之钧衡遂正真相之任衍户租而倍食锡国邑以疏封并昭物采之多用侈台符之峻於戏塩梅正味久调制於鼎司袞绣命章往参华於槐位式是百辟毗予一人益敦燮理之功期底盈成之业无替朕命永孚於休可特授太傅

观文殿大学士中太一宫使除少保太宰

论相宅百揆以亮采而惠畴建官曰三孤俾二公而弘化眷予旧弼为时宗臣宜还官於台司以大熙於邦政式涓穀旦播告路朝具官某敦大而直方醇深而简重学博而守之以约该经术之渊源智周而用无不宜适事功之机会蚤膺眷遇繇历清华擢陪国钧实辅台德赞元经体道足以和同天人当轴处中材足以运动枢极中辞几务之要退即燕休之安佩玉长裾聯清班於秘殿珍台间馆领肤使於殊庭遽閱岁时休有誉处盍来归於揆路以寅亮於天功参华亚保之联进任中台之长倍敦井赋申衍户租式昭体貌之隆庸示宠光之茂於戏丞相之於汉盖将附百姓而抚四夷冢宰之于周所以统百官而均四海仰穆上天之綍下厚蒸民之

生朕方图任於旧人尔其永弼於彝宪式是百辟抚此万邦往既厥心同底于道可

观文殿大学士中太一宫使除少保左辅

朕骏惠先猷肇修官制允厘辅弼之任是正公孤之称祇若新书以大熙於邦采登延旧德宜还总於台司涓选刚辰诞杨休命具官某器涵庄重德稟粹和学通今古之渊源识际天人之精祲蚤持从橐有献纳论思之忠擢预政机得赞襄励翼之体遂膺梦卜之举进秉钧衡之权相业维优师论参穆中辞几务之要退即燕休之安兼秘殿之隆名领殊庭之肤使年德弥劭闻望益休盍还揆道之官茂底格天之业篆车希冕秩陞亚保之崇青琐黄扉职峻东台之长倍敦井赋申衍户租式昭体貌之隆庸示宠光之渥於戏用人惟已朕方图任於元勳以道事君尔其承弼於厥辟涣号聿资於审核非彝允赖於纠绳毗予一人式是百辟无替朕命往其钦哉

观文殿大学士中太一宫除节度使

曳裾鸣玉入聯旧弼之班推轂授师出总元戎之政列职虽异倚任惟均眷予心膺之臣克备爪牙之寄诞扬涣号播告大廷具官某庄肃而裕和体大而明允学际天人之蕴材兼文武之资自结眷知寢阶华近雍容从橐有献纳论思之忠密勿政机得赞襄励翼之体中辞钧轴之要退即祠宫之安裴度在朝卓尔股肱之旧方叔克壮凜然将帅之风辍秘殿之华资付斋旄之重柄蔽自朕志穆于师言淑旗绥章备多仪於大将珍台间馆仍肤使於殊庭衍食户租倍敦井赋式昭物采庸示宠光於戏吉甫之宪万邦实兼该於文武仲山之式百辟不吐茹於刚柔朕方宣明道德仁义之威尔其巩固藩垣屏翰之势对扬休命益茂壮猷

彰信军承宣使除武宁军节度使

推轂授师总将权於阃外出奇应变制敌命於轂中参稽勲烈之崇宜懋褒嘉之典我有明命扬于大廷具官某沈鸷好谋直刚不挠少有四方之志出逢千载之辰畅漠北之威名厉山西之劲气敦诗说礼有古将帅之风怀德畏威得吾士卒之用入宣劳于宿卫出着效於干城畴咨镇抚之材爰付边陲之寄赖尔经略纾予顾忧而能因势乘机运筹制胜披坚执锐亲居矢石之间斩将搴旗躬致馘俘之献日百里以辟国月三捷而奏功大震天声一清夷落是用旌其功伐畀以节旄领镇雄藩尽护诸将神旗豹尾备大将之威仪秘略龙韬新元戎之纪律敦陪井赋申衍户租并示恩荣式昭眷獎於戏高爵厚禄朕不吝於报功御侮折冲尔毋忘於敌忾勉罄爪牙之力益隆屏翰之强祇服训辞茂对光宠节度使中太一宫使兼侍讲移镇除检校三少开府仪同三司

侍幄帷而处朝廷盖密资於献纳易节旄而兼将相式宠报於勲劳眷予忠荃之臣茂举褒嘉之典诞敷涣号播告明庭具官某温厚而刚明粹夷而庄重擅儒宗之硕学躬王佐之宏材顷被明扬擢司几务谋王体而断国论备着猷为亮邦采而熙天工展尽底蘊中辞政柄之剧退即燕私之安大纛高牙备多仪於上将真祠间馆领肤使於殊庭日造治朝参陪讲席閱时滋

久登闻弥休惟尊道乐义之无穷岂崇德报功之敢後陞华亚傳易镇雄藩鼎铉公槐峻视岩廊之秩路车斋钺益隆方面之权衍食户租敦加井赋并昭物采式示宠光於戏文武兼资吉甫作周邦之宪将相并任裴度为唐臣之宗显膺体貌之崇茂着股肱之美往绥福履毋烦训辞

知枢密院除节度使醴泉观使

右府本兵久策勲於宥密斋坛授钺宜锡命于蕃宣眷惟心膂之良克任爪牙之寄诞扬纶綍敷告縉纁具官某敦厚而直方裕和而肃毅学贯古今之蘊才兼文武之资夙茂声华践扬要近擢由政辖进揔枢庭告辰猷而具臧秉一德而不爽运筹帷幄折冲樽俎之间制胜边陲行师枕席之上日百里以辟国月三捷而奏功独任指踪坐收成效方倚壮猷之略遽陈均逸之辞章屡却而复来诚有加而无已畴其勲烈付以节旄大纛高牙备多仪於上将真祠间馆领肤使於殊庭虽暫即於燕私初不離於王室敦陪井赋并示宠光於戏勛相我家朕敢忘于旧德承弼厥辟尔无遂於遐心往绥壽祉之多式副眷怀之渥

殿帅

汉置期门羽林之军以夹辅宫省唐开折冲果毅之府以镇卫京师惟我本朝若稽前代宿重兵於犖穀列屯戍于邦畿所以救宁寰区拱翊宸极俾统貔貅之旅必资心膂之良爰择刚辰诞敷显命具官某直方而不挠勇鸷而好谋擅玉帐之威名稟金行之劲气敦诗说礼有古贤将之遗风怀德畏威得吾士卒之乐用自共武服屡奏肤功折馘执俘敌忾御侮执干戈以严社稷之卫尔克着于勤劳闻鼓鼙则思将帅之臣朕敢忘于録用召自边圉付以节旄典司宿卫之兵总领营屯之政入则侍内朝之文陞出则扈属车之清尘淑旗绥章壮元戎之体貌路车斋钺备上将之威仪申衍户租敦陪井赋式昭物采并示宠光於戏予王爪牙诗刺圻父之失职克用常吉书美虎賁之得人尔其明纪律以训齐师徒辨次舍以肃清徼道式遏奸宄作固蕃垣得尽其心俾士气之增厉乃安斯寢致王心之载宁则予一人无疆惟休而尔亦有无穷之闻

观文殿学士诸路经略安抚使除节度使

学以即戎筹略必资於儒将斋而授钺节制以宠於元勲式隆方面之权克重藩垣之体我有涣号敷于大廷具官某敦大而直方刚明而肃义识洞几微之表材兼文武之全蚤践要途遂参机务谋王体而断国论肩辅弼之一心有常德以立武功蘊将帅之远略辍从廊庙坐镇边陲缓带轻裘盖折冲於樽俎敦诗说礼岂专意於韬铃训齐貔虎之师建筑金汤之险日百里以辟国月三捷以奏功奋扬天声震叠夷落畴其勲绩宜有褒陞是用解秘殿之华资付斋旄之重寄高牙大纛备上将之多仪渠门赤旗壮元戎之异数敦陪井赋衍食户租以隆阃外之威以廸师中之吉於戏有奔走御侮朕方极於倚毗无智名勇功尔宜务於持胜益励猷为之壮以绥福履之崇祗服茂恩无忘明训

吏部尚书除节度使

入践中台之职实首六卿出分外阍之权尽护诸将惟倚任之不异岂恩礼之或殊眷予心膂之臣克备爪牙之寄诞敷显命播告治朝具官某挺高明之资蕴浑厚之量文章典雅久居言语侍从之班问学深醇雅有献纳论思之益顷由人望擢长天官铨衡有方风绩弥劭维藩垣之重任资文武之全材辍自近臣委以方面顾边圉之方棘岂颇牧之可留推毂授师克壮元戎之势拥麾乘塞式宽西顾之忧宣国威灵赖尔经略即伫肤公之奏以严武服之共申衍户租敦陪井赋式昭物采并示宠光於戏郤縠之将中军是为说礼敦诗之帅亚夫之屯细柳诘同棘门霸上之师惟恩信足以得士卒之心惟威怀足以制羌戎之命往服朕训永观厥成彰化军节度使熙河路经略安抚使除检校少保雄威军节度使

拥斋旄而乘塞克隆元帅之勲易边镇以旌能仍峻贰公之秩眷时宿将茂举徽章播告路朝亶孚师聃具官某刚毅不挠沈鸷有谋擅虎帐之威名禀金行之劲气夙备爪牙之任出宣屏翰之风建安定之节旄尽护诸将当临洮之方面统御列城赖尔抚绥纾予忧顾而能料敌制胜御侮折冲运筹帷幄之中玩寇掌股之上宣明威信叛则讨而服则怀训齐甲兵战必胜而攻必取屡致馘俘之献日增垒堞之修声名隐然勲绩茂矣宜换秦川之节俾参亚保之联豹尾鸾旗备威仪於大将篆车希冕视服命於三孤申锡爰田敦陪真食并示龙光之宠益崇帅阍之权於戏聃鼓鼙则思将帅之臣朕敢忘於丕绩执干戈以严社稷之卫尔无替于前劳益励壮猷以永终誉

节度使殿前都指挥使除检校少保移镇充鄜延路经略安抚使

提七萃之旅入则拱卫於岩除建六纛之威出则抚临於边徼克备爪牙之寄聿资心膂之臣视秩台司增严帅阍我有明命扬于大庭具官某伟量沈雄英资果毅蚤膺勇爵备历戎行怀干城御侮之材着斩将搴旗之绩畴其勲烈付以节旄擢帅殿庑肃军容於壁垒摠监虎士严禁卫於钩陈忠义自将谨密不出得吾士卒之乐用有古将帅之遗风蠢彼夏戎干我王略顾边圉之方棘岂颇牧之可留勉为朕行用锡尔祉镇高奴之重地坐制黠羌易安定之雄藩尽护诸将篆车希冕视服命於三孤斋钺调戈备威仪於元帅敦陪井赋申衍户租并隆体貌之私益壮藩垣之势於戏中西域而立幕府定远振玉关之名整六师以讨先零营平上金城之略顾王者之师有征而无战惟良将之策不战而屈人往益励於壮猷庶永观于成绩

观文殿学士除节度使知大名府兼北京留守

拥斋旄於外阍式隆将帅之权分符竹於留都克壮藩垣之势眷予旧德为世宗臣方资保厘之功宜茂褒崇之典诞敷涣号播告治朝具官某敦静而刚方温?而博达富渊源之硕学蕴经纶之伟材屡陪国钧实亮邦采履一德而不爽告辰猷而具臧中辞几务之繁祈即燕休之逸冠隆名於秘殿领肤使於殊庭遽閱岁时休有誉处顾陪京之阙守非元老而奚居勉为朕行用锡尔祉元戎峻秩建南国之节旄全魏雄藩付北门之筦钥宣威棱於六纛摠节制於列城阜成兆民尽护诸将赖尔镇抚纾予顾忧敦陪邑户之多并示宠光之渥於戏申伯之闻四国

实总藩宣吉甫之宪万邦兼资文武固封圻以卫王室守典常以承天休往既厥心无替朕命

戚里承宣使除节度使

爵禄以驭富贵实为八柄之先藩屏以建亲贤盖本九经之重眷惟戚畹之懿茂举疏封之章播告大庭亶孚羣聽具官某秉心渊塞毓德粹和承世胄之华而无贵骄之习服诗礼之训而有儒雅之风蚤被眷知寢阶华近属橐鞬以奉御鸣佩玉以造朝夙夜惟寅靖共自好宜付节旄之宠益隆肺腑之亲鉄钺车旗备威仪於上将带裳幅舄昭命数於元侯申衍户租敦陪井赋式昭物采并示宠光於戏建官惟贤私恩岂废於公议保身以哲居宠必思于履危惟恭俭足以作德而日休惟忠孝足以致身而卫主往绥福履无烦训辞

皇弟除太傅山南东道节度使开府仪同三司进封越王

朕因心以友于天伦建侯以蕃于王室疏爵以贵韡如棠棣之华裂土而封屹若磐石之固诞敷涣号播告明庭具官某英粹凝姿温恭秉德允出神明之胄居多致思之文大雅不羣迈河间之伟量为善最乐有东平之格言曩稽立爱之经茂着维城之义疏封滋久誉望弥休畴其德业之崇宜举彝章之峻是用契龟而协吉按图而定名表为真王奄授乐国高牙大纛建一道之节旄赤舄桓圭备三公之典册胙山川于南土赐徒御於中军陪食爰田衍封真赋以固本根之重以隆屏翰之强於戏笃亲爱之恩朕敢私於爵禄长富贵之守尔其戒于侈骄惟明哲可以保身惟忠孝可以卫上往图庆誉益称龙光

皇伯节度使开府仪同三司除郡王

周家之建同姓以广亲亲之恩汉室之王诸侯以隆贵贵之义若古有训越予不忘载惟伯父之贤宜举彝章之峻式涓谷旦敷告明庭具官某资识纯明器量宏远允出神明之胄为时宗室之英东平好贤雅着忠孝之誉河间博古雍容礼乐之文曩稽立爱之经茂举建侯之典高牙大纛式彰帅阃之雄华袞命圭兼视台衡之贵岁时滋久闻望弥休夙夜惟寅以日趨於朝请温恭有恪克显相於烝尝畴其贤劳宜有褒陟是用契龟而协吉按图以定名表以王爵之崇胙以茅土之重大啓尔宇锡之山川时庸展亲分厥宝玉以益本支之固以增屏翰之强於戏笃亲爱之恩朕岂私於好爵持高满之戒尔宜保於令名茂对龙光往绥壽祉

皇子封节度使国公

朕握符御极仰承列圣之休荷天降康申锡多男之庆眷嗣贤之挺秀稽彝宪以疏封爰择刚辰诞敷涣号皇弟儿子天材毓粹帝武发祥函岐嶷之英姿稟中和之淑气温文日就聪智夙成甫临剪髮之期茂举建侯之典胙以乐土锡南国之山川授以全师俾中军之徒御封建厥福耆定乃家赤舄桓圭备上公之典册路车斋钺兼大将之威仪衍食户租敦陪井赋以崇庙社之祉以笃邦家之光於戏周建亲贤式固维城之义汉封子弟益隆磐石之宗惟作德罔不在初肆享国多历年所往绥壽嘏茂对龙光

皇子除检校少保节度使郡王

朝廷尊爵式昭贵贵之仪父子主恩必厚亲亲之典眷时贤嗣夙挺天材其疏茅土之封以笃邦家之庆饬宣典册敷告缙綬皇子具官某雅量渊澄英姿玉粹鍾五行之秀气备四序之纯和聪智夙成温文自得曩稽立爱之义茂举建侯之章拥元戎之节旄备上公之袞焉尊德乐道克循就傅之规立礼兴诗日懋通经之训载遵彝制宜有褒崇是用按图以定名拂龟而协吉奄授乐国易镇雄藩言观其旗锡中军之徒御大啓尔宇胙南土之山川越陪邑户之多兼畀国租之实併彰异数式慰慈怀於戏保佑自天并贶本支之茂封建厥福聿崇庙社之休惟忠孝可以报君亲之恩惟恭俭可以长富贵之守住服朕命益介壽康

皇子除太傅两镇节度使封韩王

朕荷天保佑锡庆蕃昌眷时次嗣之贤夙挺天材之秀异宫筑室将行就邸之仪胙土苴茅宜锡疏封之典诞敷涣号播告明庭皇子具官某德度粹温性姿庄重气稟中和之淑体函岐嶷之英流庆宗藩发祥帝室稽立爱之前训率建侯之旧章有鸾其旗任总元戎之贵载黼斯服秩视三公之崇尊德乐义而循就傅之规说礼敦诗而懋通经之训连紫宫而开第历告日以爰居考于典常宜有褒宠是用契龟而协卜按图而定名表为真王奄授乐国车旗斋钺兼两镇之节旄山川附庸抚十圻之民社敦陪并赋申衍户租以隆宗庙之休以壮藩垣之势於戏朝廷尊爵式昭贵贵之文父子主恩克笃亲亲之义惟恭俭可以长富贵之守惟忠孝可以尽臣子之心茂对龙光益绥壽嘏

皇侄节度使除郡王

爵禄以驭富贵允为八柄之先藩屏之建亲贤实本九经之重眷时犹子之懿锡以苴茅之荣涓选刚辰诞敷显册皇侄具官某性姿端亮识度粹夷胄出神明初靡贵骄之习训通诗礼雅有致思之文曩稽立爱之经茂着维城之义建元戎之旄钺视三公之服章夙夜惟寅会同见齐庄之色温恭有恪烝尝备显相之诚贤仪浸明师论参穆畴其闻望宜有宠褒是用按图而定名契龟而协吉啓其土宇疏以王封敦陪并赋之多衍畀国租之实增重翰垣之势益宏宗佑之休於戏擅威福之权私恩不废于公义长富贵之守居宠当思於履危茂对龙光往绥壽祉

梁谿集卷三十五

卷三十六

钦定四库全书

梁谿集卷三十六 宋 李纲 撰拟制诏二

制十三首

诚谕士大夫敦尚名节诏

朕嗣守基图托于士民之上夙兴夜寐罔敢怠遑思所以图回治功陶成风化者实赖士大夫砥节砺行作民孚先以善天下之俗今则不然背公营私附下罔上无宿道向化之志有締交死党之心 诟顽顿而廉耻之风衰冒没轻儻而忠厚之行熄方其平居高论阔议真若可信一旦遇利害仅如毛髮遽失其守责其立朝可观临大节而不可夺也难矣名节若此朕何望焉岂朕所以帅之者未至欤将徇于流俗而未易遽革欤昔先王之盛时在位皆节俭正直德如羔羊而风化之所行至於中林之兔置莫不好德汉上之游女无思犯礼何其盛哉朕甚慕之士大夫其思所以革心易虑称朕意者务敦实而去浮华止奔竞而崇静退使廉耻之风忠厚之行蔼然着明足以鼓动当世则爵禄之加何吝之有诗不云乎靖共尔位好是正直神之听之介尔景福易不云乎鸣鹤在阴其子和之我有好爵吾与尔靡之可不勉欤其或不悛邦有常刑朕不汝贷故兹诏谕想宜知悉

诚谕三省密院修举熙丰政事诏

朕惟神宗皇帝考道据德制法作宪新美百度允厘庶工若昔大猷肇造三省枢密院凡天下之政悉分统之曰中书省根本机务实专敷奏除授之任曰门下省出纳命令实掌论駁省读之职曰尚书省奉行政事所以总治曰枢密院典司枢要所以本兵由中以制外端本以御末纲纪法度灿然毕陈是以熙丰之治格于上下与古匹休何其盛哉肆朕纂承骏惠先烈继志述事罔敢怠遑熙丰之所施設而已然者遵制扬功而率由之熙丰之所有意而未备者增光润色而推广之制礼作乐兴事就功以大有为于当世法完令具布在方册施于四方实赖三省枢密院臣僚维持缉熙各扬厥职修举政事以绍隆神考之不绩惟尔六七大臣其尚同心一德协恭和衷可否相济于未然之前号令必行於已出之後夙夜匪懈勤劳王家永孚於休同底于道则予一人膺受多福尔亦有无穷之闻不其勉欤故兹诏谕想宜知悉

诚谕百官毋得越职犯分诏

朕惟先王设官分职以法为分小大详略各有等差犹之耳目股肱相待以成体罔或侵越故能总衆职修庶政而天下治惟我神考若昔大猷肇新官制内之省台寺监外之监司郡县之吏允厘厥职纖悉完具布在方册炳若丹青肆朕纂承祇遹先烈屡下诏书不匿厥旨俾官修其方毋得越职犯分以干邦宪庶几继志述事与三代同风而比日以来卿士大夫不安分守

非所当议倡为险朕非所当为公肆妄作无宿道向方之志有沽激侥幸之心岂朕所以告戒之未至欤将士狃於流俗而未易以遽革欤传曰侵官冒也离局奸也诗曰靖共尔位好是正直神之听之介尔景福古之君子明于义命而思不出位故能受靖共之福而无奸冒之刑朕甚嘉之子大夫其思所以安於分守者各共乃事齐乃位度乃口以听予一人之作猷其或不恭邦有常刑必罚无赦故兹诏谕想宜知悉

诚谕省台寺监修举职事诏

昔我神考若稽大猷董正治官允厘邦采省台寺监各有攸司本末维持大小承式纲纪号令百度鼎新肆熙丰之治格于上下虽三代之隆无以加也朕纂绍丕图祇遘先烈宵衣旰食励精为治思所以继志述事以昭先帝之休德者顾官制布在方册炳如丹青制而用之存乎法推而行之存乎人屡降诏书具宣德意庶几卿士大夫修举职事振起治功以追熙丰之盛而比日以来省台寺监安习因循偷惰苟简有丰禄营私之志无守法奉公之心慢令嫠官玩岁愒日尚书政事之本动多稽违御史风宪之司恬不纠察寺监失职百官废弛夫省台寺监所以推行朕之法令奉朝廷而倡郡县者也旷慢若此朕何望焉岂朕所以率之者未至欤将告教不足以感孚必待刑戮加焉而後革欤书不云乎功崇惟志业广惟勤卿士大夫其思所以克勤励志宿道向方以显白功业者务称朕意其或不恭邦有常刑朕不汝贷故兹诏示想宜知悉

诚谕监司按察州县诏

朕祇绍丕基抚有方夏励精求治兴事就功皆以利安元元为本深惧州县之吏不能承流宣化达于吾民建置监司分道按察或总漕计或司详刑或掌常平之政或专学校之法职虽不同而所以按察州县其任一也方其出使朕亲御便殿以临遣之及其还归复使进对以尽谘谋度询之义视遇之礼亦已重矣庶几德意志虑得以下达而吏之臧否民之利病不壅于上闻内自畿甸外薄岭海万里之远风流而令行德洋而恩普吏称其职民安其业以底太平之盛而监司未有卓然修举职事称朕意者其故何耶今州县之间贪吏依势以侵渔奸吏舞文而巧诋无宿道向方之志有背公营私之心法完令具布在方册而吏惰弗?荒失诏命使元元之民不被其泽良法美意殆为虚文而监司曾莫之恤惟以簿书期会为急务蔑视寒士摭摭细故以塞责而强御权势之吏赃污贪籍恬不谁何夫监司朕所以寄耳目之任也失职若此朕何望焉其自今以往各扬厥职按察所部凡奸贪惰慢之吏旷职失守违法害民徇流俗而无奉上之心者悉以名闻当议窜黜以为羣吏之戒其或附下庇奸畏避不举得於访闻罪不汝贷故兹诏谕想宜知悉

诚谕士大夫朋党诏

朕惟唐虞之世皋陶稷契之臣都兪吁咈於庙堂之上更相称誉而无比周之操百僚师师尽其智能以效官职庶政惟和万邦咸宁後世想望而不可跂及朕甚慕之肆朕纂绍丕图虚心以治陟降厥士法天地之无私庶几振起治功同底于道而执政大臣不能体朕之意有所荐

引任为已功士大夫不明於事君之义者因亦从而归之背公营私附下罔上人无贤否进非其门则极力以排事无是非建非其意则腾口而议兹风不息浸成朋党岂社稷之福哉比已简其尤者投之远方置之散地以为谗说殄行震惊朕师者之戒其自今以往大臣毋以荐引人材徇鬻而市私恩小臣毋以因其荐引阿附而忘公义靖共尔位坏植散羣以听予一人之作猷其或不悛邦有常刑必罚无赦故兹诏谕想宜知悉

诫谕帅臣修饬边备诏

朕抚有方夏敕宁万邦蛮夷向风稽首来享蠢兹西戎昏迷不恭敢讐大邦诱逋逃之臣率鲸鯢之旅搔扰疆场?刘边陲哀凶鞠顽旷诛积稔神怒人愤剿殄有期爰命虎臣往行天讨惟尔六七帅臣实分阃外之寄为予爪牙整我六师修饬边备奉指踪之略遵制胜之谋灵旗西指此诚壮士功名之会也尔其振励士气奋张军容缮甲兵具卒乘明号令信赏罚同士卒之甘苦习山川之形势玩寇掌上视寇目中使战必胜攻必取日百里以辟国月三捷以奏功肃清一方扫荡巢穴流沙瀚海归輿地之图元恶大憝正藁街之戮以摅宿愤大震天声时汝之绩不其韪欤其或不恭邦有大刑朕不汝赦故兹诏谕想宜知悉

劝农诏

农天下之本也民之所恃以生也民不务本而事末则其生不遂故先王之政以食为首商人以岁事来辟则戒以稼穡匪懈周人遣诸侯於庙则戒以新畲銍刈其务农重谷如此用能享丰年之报有积岁之储教化行习俗美而颂声兴朕甚慕之今朕开千亩之籍行三推之礼躬秉耒耜播種穆之种以给郊庙之粢盛率民敦本为天下先庶几四方风动与古匹休朕意厚矣夫承流宣化推朕德意而致之民者守令之职也其务劝农教之稼穡省其耕歛勿违其时勿夺其力非须系逮母辄追呼以妨农功使服田力穡享有秋之利衣食滋殖立太平之基称朕意焉故兹诏谕想宜知悉

恤刑诏

朕惟昔之治天下者主於德教而以刑弼之刑非所以先也虞舜好生而民不犯成康刑错而颂声兴下逮汉唐盛时亦皆断狱数百几致不用朕甚慕之爰自临御以来制礼以齐民本仁而出政屡降御笔惟刑之恤定笞法减杖数寛节辰原贷之恩严桁杨非法之禁庶几德化感孚刑罚清而民服以追治古之盛而四方典狱之吏未能称朕钦恤之意惰吏慢令而弗?奸吏舞文而巧诋讯鞠论报掠治傳爰皆有法式莫克遵承依势作威倚法肆暴公然违戾诏旨使吾民陷于罪罟而未臻刑措之风殆此曹致也自今应刑狱官司敢为暴酷不如法者在京委尚书刑部在外委提点刑狱按察以闻邦有常刑朕不汝贷故兹诏谕想宜知悉

诫谕守令推行御笔寛恤诏

朕惟祖宗创业守成以仁治天下重熙累洽与古匹休肆朕纂承祗遹先烈宵衣旰食励精为

治立政造事所以利安元元者一以寬恤为先屢降御笔手诏播告之修不匿厥旨庶几仁治克绍祖宗风动四方以成太平之化而比日以来监司守令奉命不?坐视诏书徒挂墙壁以为文具废法慢令恬不加恤夫承流宣化推朕德意志虑而达之民者监司守令之职也失职若此朕何望焉其自今以往各扬乃职应前後頒降寬恤事件竭力遵承毋致违戾使四方万里之远实德及民以称朕意其或不恭守令仰监司监司仰按察互相纠举以闻邦有常刑朕不汝贷故兹诏諭想宜知悉

诫諭礼官严奉祠祭诏

朕嗣有令绪夙夜严恭齐明祀事以承上下神示社稷宗庙罔不祇肃深惧有司不能奉承德意昭格神休屢降诏书不匿厥旨庶几恪慎精洁副朕明禋恤祀之意而比日以来执事不?玩习苟简恬弗加省牲币礼料取具临时摈赞跪兴不中仪式达于朕听良用怵然夫祀国之大事也职在礼官委任甚重废法慢令朕何望焉自今其务所以肃恭自尽称朕意者敢或不恭邦有常刑朕不汝贷故兹诏諭想宜知悉

诫諭学者辞尚体要诏

朕自临御以来建学校聯师儒一道德以教养天下之学者屢降诏书崇雅黜浮庶几文章之盛深醇典正炳然与三代同风而自两汉以来为不足议也朕之待士至矣比览贡士程文猥酿不纲气格卑弱刻意以为高者浮诞恢诡而不协于中骋辞以为辩者支离蔓衍而不根于理文之不振未有甚于此者朕甚羞之岂子大夫平日所以讲贯之者未至欤抑偷取临时务应有司之求而怵於得失欤夫文以意为主以气为辅以辞彩为之卫翼本之固者其发为英华必茂源之深者其流为波澜必远子大夫其思所以廓养意气涵养本源者博极古今根柢仁义六经之书诸子百家之说必深究而明辨之则见於文辞者体要兼备宜有可观者朕有好爵与尔靡之可不勉欤故兹诏諭想宜知悉

诫諭守令劝课农桑诏

朕惟生民衣食之原莫重於农桑故豳诗陈王业之艰难孟子言王道之本必以是为先今海内承平之久生齿日衆一夫不耕或受之饥一妇不蚕或受之寒饥寒切于肌肤求民兴於礼义廉耻而亡为非不可得也肆朕开千亩之籍行三推之礼躬耕以供粢盛后浴种猷亲蠶以为祭服率民敦本为天下先庶几四方风动与古匹休朕意厚矣夫承流宣化推朕德意而致之民者守令之职也其务劝课农桑毋违其时毋夺其力非事须系逮毋辄追呼以妨其功崇本抑末使末技游食之民转而缘南亩杼轴之女亲其蠶织四方万里之远男子亩妇人桑丝身谷腹衣食滋殖蓄积足以备灾害而无饥寒匱乏之患称朕意焉故兹诏示想宜知悉

梁谿集卷三十六

卷三十七

钦定四库全书

梁谿集卷三十七 宋 李纲 撰拟制诏三

制二十首

门下侍郎除特进知枢密院

东台出命久隆献替之风右府本兵实总枢机之任眷我近弼为时荅臣宜锡命书往膺盛选具官某醇深而庄重寬厚而刚方问学高明潜天人之极致材器宏远备文武而咸宜自结眷知荐历华要擢参陪於几务益茂着於忠勤告辰猷而具臧秉一德而不爽言可底绩知无不为以儒术之渊源达兵家之形势智谋深博可以运筹帷幄之中声名隐隆可以折冲庙堂之上朕心所属舆论攸归畴咨弼亮之材延登宥密之地峻陞文秩申衍户封庸示龙光式昭体貌方今边陲耸动西有跳踉之戎中夏抗衡北有强黠之敌赖尔经制纾予顾忧往惟既於厥心以对扬於休命

中书侍郎除门下侍郎

朕诞膺景命只绍先猷慎简左右执政之臣同底寅亮格天之业乃眷左省实本万几延登伟材协赞丕绩肆颁命綍敷告朝绅具官某函量粹夷稟气刚大学贯古今而懿文足以华国智周事物而厚德足以镇浮蚤被眷知徧历清近擢陪几务之要益殫夙夜之勤赞治内书茂着股肱之美出纳朕命备宣喉舌之劳畴其勲庸宜有褒陞进贰东台之峻式昭眷礼之优朕方体道以就功量材以授职出命尤资於审慎用人务极於公忠顾惟论駁省读之司宜有献替将明之益往服朕训永孚于休

尚书左丞除中书侍郎

朕嗣承丕绪祗遹先猷永惟几务之繁实赖股肱之助若时政本莫重西台非得同此一德之臣曷致协恭和衷之效肆颁明命登进宏材具官某敦厚而裕和高明而博达渊奥之学足以谋王体典丽之文足以为国华蚤以明扬践更膺仕擢总纲辖参陪政机屡陈辰告之猷益励匪躬之节率六官而合治致庶绩之咸凝輿情具瞻朕心简在畴其勲业宜有褒崇是用擢自兰台进贰凤阁惟命令出纳之地廼政事弛张之原率由宪章尔其念敷奏之审旁招俊乂尔其思进拟之公往尽乃心务称厥职惟予以恻汝亦有辞

尚书右丞除尚书左丞

文昌政事之原丞辖纪纲之任协赞庶务总齐百工必得同心一德之臣共济持盈守成之业

肆颁明命登进宏材具官某器度粹夷性资庄重富渊源之硕学有经纶之远猷自结眷知参陪几务谋王体而断国论亮邦采而熙天工厥职允修外则率六卿以倡九牧其德不爽内则贰三事以毗一人畴其勲绩之多宜有宠褒之数位以叙进擢陞左辖之司功以志崇更励匪躬之节往服朕命永观厥成

吏部尚书除尚书右丞

朕光绍丕基祗遵先烈惟执政大臣所以图回万几於庙堂之上者非瑰伟博达之材不以轻付膺此选者顾不重哉具官某器量凝远识虑敏明文章之懿足以为国华议论之纯足以谋王体蚤膺眷遇寢历禁严居言语侍从之班有献纳论思之益顷自翰苑擢任天官铨衡有方风绩弥劭休有誉处恬然靖共其由八座之聯进登二府之列蔽自朕志穆于师言夫文昌政事之原丞辖纪纲之任康济庶务总齐百工惟同寅协恭足以尽赞襄之美惟猷可替否足以起治功之隆往既乃心同底于道

翰林学士除吏部尚书

周建六卿天官掌羣吏之治汉分八座选部考百官之成必资清恪之材克称高华之选往践厥服我得其人具官某识度粹夷风猷敏劭蕴渊源之硕学富典丽之雄文蚤以明扬荐膺器使居言语侍从之列有献纳论思之忠自处禁林益摅素蕴议论该洽入告於燕闲号令温醇有古之风烈畴其闻望宜有褒陞是用擢由翰墨之司付以权衡之任综三铨之政令为六曹之表仪朕方体道以就功循名而责实一官阙则一事废尔其为官而择人庶事举则庶绩熙尔其量材而授职振肃纲纪俾猾吏有畏缩之心甄别贤能致寒士无滞淹之叹时为称职则予汝嘉

户部尚书

洪范八政实先食货之功周官六卿尤重版图之任惟国家经费之广与户口生齿之多典在民曹号为剧部欲称高华之选必资精敏之材爰锡赞书以光茂举具官某器量宏远识虑强明学足以通今古之原智足以周事物之变践扬膺仕寢历从班蔼然俊伟之声卓尔靖共之操论思忠说有尊君享上之诚筹画疏通有足国爱民之术擢由橐从进长版曹式资心计之优以总邦财之裕朕方理财以义尔无掊克以动民心制用适宜尔无削弱以伤国体惟察懋迁有无之理以行闔辟敛散之权取予有方公私与足克修厥职时乃之休

礼部尚书

昔舜命伯夷以典礼命夔以典乐教胄子而周官宗伯之职皆兼掌之朕纂绍丕图祗遵先烈乐在大晟礼在奉常教养之法在学校而尚书礼部实总其政令任职清重为六曹最分职率属尤难其人以尔具官某直谅多闻温恭有恪渊源之学足以谋王体典丽之文足以为国华居言语侍从之班有献纳论思之益秩宗之任莫如汝宜其自贰卿之聯擢陞八座之列朕方

制礼作乐起太平之弥文尊道崇儒善天下之风俗尔其往践厥服慎率乃僚使情文着明足以格神人之治而教法推广足以得誉髦之材夙夜惟寅无替朕命则予一人以恠尔亦永世有辞

兵部尚书

周建六卿司马掌九伐之法魏分八座尚书有五兵之曹惟是夏官实总军政克称高华之选必资俊伟之臣具官某器量恢宏性资庄重学博而守之以约材全而用无不宜蚤被眷知浸阶华近献纳励匪躬之节靖共怀难进之风其由从橐之聯往陟本兵之地蔽自朕志穆于师言朕方除戎器以戒不虞纘武功以讨有罪以号令之严统制诸将以符玺之信更戍重兵资尔推行副予注倚修车马备器械以奋张於军容平邦国统六师以折冲於外侮时汝之职其往欽哉

刑部尚书

舜命臯陶明五刑以作士周建司寇掌三典以佐王必资朕敏之臣以称教中之任历选在位我得其人具官某庄重而裕和简严而博达学贯古今之要智周事物之几蚤被束求践扬膺仕出受藩宣师帅之寄政事惟醇入居言语侍从之班声华弥劭有刚明之材足以诘奸慝有仁厚之德足以矜无辜惟其威恕之并行宜副钦恤之美意是用擢由橐从进长宪曹以承灵制之祥刑以谏攸司之疑狱朕方推好生之德致圉圉之屡空明约法之章若江河之难犯辟以止辟刑期无刑尔其慎率乃僚祇若予训不出轻而入重以公灭私不吐刚而茹柔惟明克允俾四方之风动使天下无冤民则予汝嘉时为称职

工部尚书

朕惟周建六卿冬官实掌邦事飭材辨器度土居民凡百工之职悉总之今工部其任也能称厥职实难其人具官某资识开明器量宏远渊源之学足以知治体朕敏之材足以起事功蚤被眷知浸阶华近居言语侍从之列有献纳论思之忠恬然靖共休有誉处其自貳卿之秩进登八座之聯分职事官率属起部若保定辟无废旧章稽功勒名厥有成宪昔帝舜畴若予工而垂之竹矢为後世所宝汉宣总核名实而百工技巧咸精其能往尽厥心无俾专美则朕以恠汝亦有辞

御史中丞除吏部尚书

宪台执法久推弹纠之风选部抡材擢领铨衡之任陞华要剧允属老成宜锡赞书以光茂举具官某温恭而颀亮敦厚而直方学有渊源博极古今之要行无表襮率循防范之中自结眷知践扬华近顷由橐从之列付以风宪之司纠正官邪推明国是知朝廷之大体竭耳目之攸司嘉乃忠纯宜有褒显是用擢从乌府进长天官为六曹之表仪综三铨之政令朕方循名而责实体道以就功尔其为官而择人量材而授职振肃纲纪俾猾吏有畏缩之心甄别贤能致

寒俊无滞淹之叹时为称职则予汝嘉

翰林学士除兵部尚书

周建六卿司马掌九牧之法魏分八座尚书有五兵之曹惟大事之在戎肆设官之尤重欲称兹选必得其人具官某博洽而敏明温恭而直谅蚤以儒术扬于禁林西掖代言蔼着论思之美北门视草雅资润色之功嘉谋闳议足以启沃朕心大册高文足以鼓动当世材无施而不可学有本而皆通其由翰墨之司往膺政事之任擢长武部率属秋官朕方除戒器以戒不虞纘武功以讨有罪以号令之严统制诸将以符玺之信更戍重兵资尔推行副予注倚修车马备器械以奋张於军容平邦国统六师以折冲於外侮时汝之职往其钦哉

开封尹除刑部尚书

舜命皋陶明五刑以作士周建司寇掌三典以佐王必资秉哲之材以称教中之任往践厥服我得其人具官某庄重而裕和简严而博达学贯古今之要智周事物之几蚤被眷知践扬膺仕擢总浩穰之政久推弹压之风有刚明之材以震服於豪右有仁厚之术以牧养於细民惟其威恕之并行宜副钦恤之美意是用擢从天邑进长宪曹以承灵制之祥刑以讞攸司之疑狱朕方推好生之德致圜圉之屡空明约法之章若江河之难犯辟以止辟刑期无刑尔其慎率乃僚祇若予训不出轻而入重以公灭私不吐刚而茹柔惟明克允俾四方之风动使天下无冤民则予汝嘉时乃称职

太常少卿除礼部侍郎

棘寺置卿雅重奉常之选兰台合治尤高宗伯之司肆畴俊伟之材以明因任之道往践厥服必惟其人具官某器质端庄文辞博敏扬历中外之久雅着靖共之称顷由郎曹擢贰寺政赞相礼仪之事雍容可观讨论郊庙之文渊源有据肆颁明陟之典往参春官之聯蔽自朕心穆于师论朕方制礼作乐起太平之弥文尊道崇儒善天下之习俗具有政令资尔推行惟率乃僚以佐厥长曲尽情文之致茂宣夙夜之勤勉修厥官无替朕命

给事中除户部侍郎

鸾台寓直久推论駁之风兰省陞华擢佐版图之政诞扬明陟之典登进端良之材爰锡赞书往践厥服具官某器资庄重识虑敏明学足以道古今之原智足以周事物之理蚤膺柬擢寢历从班蔼然俊美之声卓尔靖共之操论思忠谏有尊君享上之心筹画疏通有足国厚民之术辍从左省往贰民曹式资心计之优以总邦财之裕朕方理财以义尔无掊克以动民心制用适宜尔无削弱以伤国体惟察懋迁有无之理以行阖辟散敛之权取予有方公私与足时为称职嗣有宠褒

殿中监除工部侍郎

朕惟周建六卿冬官实掌邦事飭材辨器度土居民凡百工之职悉总治之今工部其任也宜得通材往贰厥政以尔具官某器度凝远智识敏明席世胄之高华蔼搢绅之誉望擢司盾省厥职允修肆畴尔劳陞华起部贰卿之列其任匪轻昔舜畴若予工而垂之竹矢为後世之所宝汉宣总核名实而百工技巧咸精其能朕甚慕之其率乃僚以佐厥长兴事就功无俾前人之专美是为称职嗣有宠褒

翰林学士除承旨

视草北门克着论思之益陞华东合式昭宠遇之优我有俊臣宜膺妙选具官某器度凝远资识敏明有经世之宏材有博古之奥学蚤蒙识擢寢历清华由言语侍从之班司翰墨文章之任入奉清间之燕每输献纳之忠嘉言闳议足以啓沃朕心大册高文足以鼓动当世休有誉处恬然靖共惟润色久留于禁林宜顾问独承於密旨爰举褒陞之典以明因任之方穆于师言蔽自朕志尔其摅发素蘊益宏远图使号令温醇无愧两汉之烈训辞灝噩有周三代之风则予汝嘉时为称职

中书舍人除翰林学士

西掖代言蔼士林之令望北门视草极儒者之至荣必资俊伟之材克称清华之选往践厥服我得其人具官某资识敏明器量浑厚夙富渊源之学发为典丽之文自策贤科寢阶膺仕被束求之眷礼聯侍从之清班恬然靖共休有誉处论思献纳秉一节以周旋号令文章有三代之风烈朕心所属舆论攸归是用擢自右台进司内制仰惟前代擅金銮之宠荣稽厥本朝有玉堂之故事惟周密足以尽赞襄之美惟体要足以昭润色之功其究乃心毋烦予训

吏部侍郎除工部尚书

叙正羣吏久登小宰之聯畴若予工以定司空之辟束自贰卿之列擢陞八座之崇必惟其人乃称兹选具官某性资纯茂智识敏明文足以为国华学足以谋王体蚤跻膺仕旋陟从班论思可观献纳惟允自总铨衡之政益殫夙夜之勤蔼然声华休有誉处其自天官之贰往率起部之僚蔽自朕心穆于师论朕方总核名实欲技巧咸精其能尔其训励百工使制作悉遵于法无替朕命往图厥成

梁谿集卷三十七

<集部,别集类,南宋建炎至德佑,梁谿集>

卷三十八

钦定四库全书

梁谿集卷三十八 宋 李纲 撰拟制诏四

制二十七首

大司成除翰林学士

禁林翰墨之司学士清华之任修饰润色实资视草於北门献纳论思自昔号称为内相极一时之妙选为儒者之至荣我有俊臣宜膺茂举具官某器度凝远资识敏明宏材懿行足以羽仪本朝大册高文足以鼓动当世践扬禁近被遇眷知由侍从之迹聯总师儒之要职推行教法茂宣夙夜之劳作成人材藹集誉髦之士朕心所属舆论攸归是用擢自学宫进司翰苑职清地近极金銮之宠荣礼渥眷优有玉堂之故实惟朝廷之政事咸得以与闻使号令文章有古人之风烈是惟称任往既厥心

给事中除大司成

朕乐育天下之材恢庠序於海?发明先圣之教合儒道於学宫必资雅望之臣以总成均之政历选在位爰得其人具官某直谅多闻靖共有守智足以知圣人之道文足以为学者之宗顷被明扬荐跻华要代言西掖训辞有灏噩之风列职东台议论极忠嘉之益方师儒之虚席非老成而曷居莫如汝宜其为朕往惟京师首善之地而学校贤士之关英俊并游道艺焉考法令完具皆朕制作之规贤能宾兴资尔推行之力务称图任嗣有宠褒

给事中

朝廷号令政事无有大小咸得与闻可则审读而推行否则封駁而论列给事中之职也其任顾不重哉苟非其人朕不轻付以尔具官某器度凝远操履端方智足以周事物之情学足以知国家之体蚤膺识擢寢历清华恬然靖共休有誉处论思之职莫如汝宜夕拜琐闥肆以命汝夫与闻国论而得行其所知此固汝之所学而欲行之者也无谗随以避事无激讎以沽名惟既厥心务称朕意

中书舍人除给事中

西掖代言蔚士林之雅望东台夕拜为儒者之至荣必资俊伟之材克称清华之选往践厥服我得其人具官某资识敏明器度宏远夙富渊源之学发为典丽之文自结眷知致身禁近论思献纳秉一节以周旋训诰文章有三代之风烈朕心所属舆论攸归是用擢秀紫微陞华青琐赏刑未允实资论駁之风号令具臧更赖审核之力惟周密足以尽赞襄之美惟公忠足以

杜邪枉之门往既乃心毋烦予训

中书舍人

官联右省职在代言非特取其文章资修饰润色之美实使与闻政事有献纳论思之功必得其人乃称兹选具官某器识凝远风度粹夷学足以知古人之心智足以周当世之务蚤膺柬拔寢历清华蔼然俊伟之声卓尔靖共之操比从给扎试以赞书嘉其典丽之文克备坦明之制擢参法从列职西台惟三代之训辞极灏噩之体而两汉之号令有温雅之风往既乃心无愧於古副朕眷倚嗣有宠褒

起居舍人除中书舍人

西台列属峻清居言语侍从之班有献纳论思之任欲称兹选必惟其人具官某直谅多闻靖共有守富渊源之硕学挺瑰伟之宏材兰省为郎久推雅望螭?载笔密侍清光寢历岁时休有誉处比从给扎试以赞书嘉其典丽之文克备坦明之制擢参橐从往代予言惟三代之文章极灏噩之体而两汉之号令有温雅之称当时服其训辞後世想其风烈朕甚慕此尔其勉之惟既厥心无愧于古

中书舍人除御史中丞

御史府不置大夫则中丞实为之长总率台属董正朝纲风宪之司耳目所寄厥任尤峻必惟其人具官某志操端方器度凝远有劲正之气而不畏强御有明敏之识而练达事机蚤以明扬荐跻华要居言语侍从之列有献纳论思之忠恬然靖共休有誉处蔽自朕志擢长南司事资搏击之材以肃纪纲之地朕方循名而责实体道以就功欲百吏之得人致四方之风动尔其推明国是纠正官邪使朋党坏植而散羣奸回心沮而胆落克称中执法之任不愧古司直之风则予一人以宁尔亦无穷之闻

侍御史除御史中丞

御史府不置大夫则中丞实为之长总率台属董正朝纲风宪之司耳目之寄厥任尤峻必惟其人具官某趣操端方器度凝远有劲正之气足以配昔人之贤有明敏之材足以周当世之务顷由卿寺擢贰台端屡陈忠谏之言助予视听之广议论颢亮朋党坏植而散羣弹劾公方奸邪心沮而胆落中立不倚直道无私不吐刚而茹柔期遏恶而扬善蔽自朕志进长南司以明因任之方以肃纪纲之地朕方循名而责实体道以就功欲庶官之得人俾四方之风动尔其推明国是纠正官邪进思尽忠无憚大吏克称中执法之任不愧古司直之风则予一人以宁尔亦有无穷之闻

开封尹

京邑所都雅有浩穰之目輶轂之下必以弹压为先肆求伟材总治剧务历选在位我得其人具官某资识端方器度闲远学洞古今之蕴智周事物之几繇历清华蔼着风绩有严重之威足以震服豪右有宽厚之政足以牧养细民蔽自朕心擢任天府夫四方之所聚会故多桀黠之民百货之所阜通故多争鬪之讼尔其摘发奸伏裁割剧烦使桴鼓设而稀鸣囹圄空而不犯首善之地为万邦之耸瞻奏最之优致三辅之取法是为称职则予汝嘉

工部尚书除延康殿学士知青州兼安抚使

中台率属参华八座之崇外屏分符宣风千里之远出处虽异倚任惟均眷予心膺之臣往奠股肱之郡宜推异数式宠其行具官某敦大裕和高明闲远学洞古今之蕴智周事物之几顷被柬求徧历华近居言语侍从之列有献纳论思之忠擢长冬官茂着风绩休有誉处恬然靖共遽陈均逸之章祈遂偃藩之志顾东土之都会宾海岳之奥区民物阜蕃风俗浑厚慎择厥守式图尔居兼秘殿之华资付全齐之重寄承流宣化聿资师帅之良报政第功伫闻课绩之最往摅素蕴无烦训辞户部侍郎除显谟阁直学士知扬州兼淮南东路钤辖

曳裾持橐入联侍从之班纡组分符出总蕃宣之寄中外虽异倚任惟均眷予心膺之臣往殿股肱之郡宜推宠数式遄其行具官某识度粹夷风猷敏劭学博而守之以约材全而用无不宣顷被明扬荐跻华要代言凤阁有献纳论思之忠贰政版曹得阖辟敛散之术有怀均逸力丐偃藩眷淮海之奥区实东南之都会慎择厥守式图尔居陞峻职於西清总重兵於一路承流宣化聿资师帅之良报政奏功伫闻课绩之最往服朕命惟既厥心

中书舍人除徽猷阁待制知庐州

入持从橐出剖郡章虽中外之或殊顾眷礼之无间式颁异数以宠其行具官某识度粹夷文辞敏妙顷由柬拔寢历清华处言语侍从之班有献纳论思之益抗章请外愿试牧民其次对於西清以分符於南服承流宣化往慎抚绥奏最第功伫观报效勉思予训益既乃心

殿中监

王者极崇高而临宝位作威福而享玉食备万物之奉极天下之养必有法式掌于有司故周建六卿列於天官之属唐分六尚综以殿中之官肆朕纂承若稽古训崇其班秩以示褒优必惟其人乃称兹选以尔具官某器度凝远才识敏明席世胄之高华蔚搢绅之誉望践历滋久绩效可观蔽自朕心擢司盾省凡乘輿服御膳羞酒醴次舍器用典于六局者咸总治之尔其慎率乃僚各共尔事夙夜匪懈事予一人尚有宠褒以为汝劝

太常卿

列寺置卿奉常尤为高选凡祠祭礼文之事悉总治之职要地清非他司比充是选者实难其人具官某资识敏明器度凝远博雅好古直谅多闻中外践更靖共自好蔚有誉望蔼于搢绅

蔽自朕心擢长寺事朕方观会通以行典礼罄齐洁以事神 资尔钦承副于明恤赞相礼仪之事讨论郊庙之文往率乃僚各修厥职以称朕所以命尔之意

宗正卿

朕纂绍丕图敦睦九族以属籍辨其世系以学校兴其贤能职在宗正厥任重矣膺是选者实难其人具官某资识敏明趣操端亮雅有誉望蔼于搢绅为郎省曹靖共有守擢贰卿寺风绩着闻蔽自朕心进长寺事夫职清事简而兼师儒之选亦汝之所欲也往既厥心务推朕所以教养之意使人自劝学底于有成则为称职尚有宠褒

明堂颁政

帝者之世天道致祥尧历象以授时舜玕衡以齐政万邦作乂庶绩咸凝朕纂绍丕图稽古有作建合台以观象御时堂以颁常庶几与帝者同风必惟其人克任斯职具官某性资端厚器度闳深学足以通古今之渊源识足以窥天人之精祲徊翔卿寺闻望弥休颁政之官肆以命汝夫提挈天地把握阴阳以御六气之辨此固出於精神心术之妙至於推而行之无或爽忒俾四方万里之远遵承而弗违此则汝之职也往既乃心图称朕命

秘书监

朕藏天下之图书以待讨论之用聚天下之英俊以备校讐之官总治监事非清德老儒孰任兹选具官某博雅好古直谅多闻文足以为国华材足以周世务蚤被识拔寢历清华恬然靖共休有誉处蔽自朕志擢长芸台夫左图右书而朝夕所与共处者皆英俊之游亦汝之所乐也往究乃心以称朕所以命汝之意

太仆卿

国容莫重於奉车军政必先于牧马太仆之职车马是司驂乘輿以周旋掌闲廐之政令厥任尤重匪材不居具官某资识详明风猷敏劭践扬滋久誉闻甚休蔽自朕心擢长寺事往率乃属其既厥心正于仆御之臣罔非吉士辨夫毛物之等使之阜蕃则予汝嘉是惟称职

光禄卿

汉置光禄勳以班爵诏功而後世列于诸卿实掌膳羞酒醴之政肇修官制因而不改克称厥职必惟其人具官某学问该明趋操端亮雅有誉望蔼于搢绅为郎省曹靖共有守擢贰卿列风绩着闻蔽自朕心进长寺事夫膳羞酒醴所以供上帝百神之祀待宾客百官饗飧之奉厥任重矣往尽乃心兹率厥常以副朕所以命汝之意

太府卿

周建九府而太府之职掌贡赋之贰受其货贿之入而以式法颁之稽古置卿委任甚重克称厥职必惟其人具官某资识敏明器度宏博更践外中风绩着闻蔽自朕心擢总寺事夫财用之所出纳物夥事丛则奸弊易乘以起往尽乃心必谨察而明辨之以称朕命汝之意

司农卿

国家转漕东南以给中都周知其数职在大农非材力敏强克辨大计曷任兹选具官某学问该洽智术自将为郎省曹休有誉处奉使外服风绩流闻蔽自朕心擢总寺事夫出纳敛散虽有常式均调盈虚亦惟其人往既乃心以裕邦计使仓廩充实而赋必以时则为称职尚有宠褒

大理卿

廷尉天下之平也邦宪是司民命所寄厥任甚重必惟其人具官某起自法家克着显誉有明敏之才足以折狱有审克之智足以决疑蔽自朕志命尔作士夫昔之所是疏为律今之所是着为令讯鞠论报掠治傅爱宪章具存资尔推举惟察惟法必慎必清体朕好生期於弼教昔张释之为廷尉而天下无冤民于定国为廷尉而民自以不冤往既乃心无俾专美则朕以忭尔亦有辞

鸿臚卿

朕正朝仪以凑羣辟厚宾礼以怀远人职在鸿臚掌其政令厥任甚重匪材不居具官某资识敏明问学该洽扬历滋久誉望弥休蔽自朕心擢长寺事夫四方之宾客与异域之蛮夷贡覲以时道里修远宜厚绥怀之意以旌来享之诚往率乃僚无替朕命

都水使者

王者体国之制水政为先邦计赖转输之功民事资灌溉之利固堤防以虞决溢濬畎浍以底疏通政令具存水衡是职厥任甚重匪材不居具官某资识详明风猷敏劭践历滋久誉望弥休蔽自朕心擢总监事流观物理水不异於趋卑远继禹功智必行於勿凿往率乃属明听朕言伫观厥成嗣有褒宠

军器监

王者除戎器以戒不虞甲冑干櫓扞患以完固为先弓矢戈矛讨敌以犀利为贵藏在武库有司时出而缮修之总是职者实难其人具官某资识强明材术肤敏更践中外风绩着闻蔽自朕心擢总监事夫材有美工有巧而器械之制咸有法式具存宪章往修厥官以称朕所以命尔之意

少府监

少府置监典治尚方备物制器以供御宸极厥任甚重匪材不居具官其资识详明夙敏劭雅有誉闻藹於搢绅蔽自朕心擢总监事夫汉宣总核名实而百工技巧咸精其能朕甚嘉之往既乃心物勒工名必考其成以副朕所以命尔之意

将作监

王者体国凡宫室门闾高下广狭之制皆有法式掌於有司大匠之职实总营造厥任甚重必惟其人具官某资识详明材术夙敏扬历寢久夙绩着闻蔽自朕心擢总监事夫国有六职百工居一焉审曲面势巧者述之往若予工使尽其巧而依於法是为称职嗣有宠褒

梁谿集卷三十八

卷三十九

钦定四库全书

梁谿集卷三十九 宋 李纲 撰表劄奏议一

辞免监察御史兼殿中侍御史奏状

比部员外郎轮对劄子五

理财以义劄子

用人材以激士风劄子

论官制财用不能悉视熙丰劄子

乞徽庙解易劄子

乞编宽恤手诏劄子

辞免监察御史兼殿中侍御史奏状

右臣今月十一日准合门告报已降告命除臣监察御史兼权殿中侍御史者闻命震惊罔知所措窃殿中侍御史实为天子耳目之官朝廷政事与夫百官之邪正皆得风闻而上言厥任重矣自非明习世务而有刚果不畏强御之材未易称此如臣者学述迂踈智能浅薄昨自学官召对大廷擢真郎省已为过分今兹又蒙误恩使备台属同除五人独臣兼任风宪自视缺然何以仰副陛下明目达聪之意伏望圣慈察臣区区收还成命以允公议

比部员外郎轮对劄子五

理财以义劄子

臣伏见朝廷讲求理财之术以足邦计议者纷然争献其说夫以天下之大承平之久万物盛多之时经画财用岂患不足贵於理之有其义而已易曰何以聚人曰财理财正辞禁民为非曰义财者民之所以相生养者也故人非财无以聚之义者利之本也故财非义无以理之溥天之下莫非王土率土之滨莫非王臣临之以法度之威何求不获而先王必以轻赋薄歛为贵者盖知予之为取者政之宝也方今国家用度之广官吏廩禄之多倍蓰於前则讲求理财之术诚为先务献议者亦不容无取然臣愿陛下必令庙堂之臣参议以闻蔽自渊衷揆之以义而行之使义然後取人不厌其取上以裕国下以裕民实宗社无穷之利也取进止

用人材以激士风劄子

臣闻人主所以共治天下者莫先於人材所以激励天下者莫先於士风人材贵於衆多故济济多士文王以之宁士风贵於淳厚故古者长民从容有常则民德以之归厚二者天下之大本不可不察也陛下广学校以作成之班爵禄以官使之天下之士云蒸而雾集人材可谓衆多矣至於士风犹有可议者在於朝廷有以劝沮之而已狃於私枉而务虚伪此士风所以未厚也欲士无虚伪之行莫若獎衷实以先之志於表襮而尚浮华此士风所以未厚也欲士无浮华之习莫若举惇朴以镇之急於进取而事奔竞此士风所以未厚也欲士无奔竞之躁莫若崇静退而率之夫衷实惇朴静退之士非内有所养而见善明用心刚者不能也内有所养而见善明用心刚者以类而进则立朝必有可观者临利害必有不可夺者又岂循情於流俗之间为哉臣愚伏望圣慈亲洒宸翰诏二三大臣进用人材必以激励士风为先务獎衷实而察虚伪举惇朴而黜浮华崇静退而抑奔竞则士风厚而天下之俗举归於忠厚之域矣此宗社无穷之计也取进止

论官制财用不能悉视熙丰劄子

臣伏觀陛下近降诏旨不系元丰官制事目增置官局等令大臣取索条画措置以闻此有以见陛下深惟政本而有裁省官局之意也又诏内外官司立旁通格目令各修具元丰绍圣崇宁政和年分财用之所出入见在侵支实数以闻此有以见陛下深惟邦计而有均节财用之意也恭惟陛下躬聪明睿智之资抚承平熙洽之运继神考之志述神考之事其所施設而已然者遵制扬功而率由之其所有意而未备者增光润色而推广之建立制作法度礼乐凡百王之所不敢睥睨者悉举而行之以大有为於当世然则增置官局不得不多支费财用不得不广实理之所当然也今绍述之道固不完具政立而法度已彰矣教行而礼乐已着矣陛下儲神穆清宅心昭旷日隆於清静无为之化则去其华而实之犹彼春夏歛为秋冬而岁功成省官局之冗员以严政本节财用之浮费以裕邦计亦理之所当然者是宜深軫渊衷命庙堂之臣议此以为先务也然臣窃谓一而不易者道也徙而不留者时也有天下者执道以御衆必有以体其常治天下者应时而造法必有以通其变陛下绍述神考之道措之德业固将传之无穷施之罔极以垂训於万世至於以熙丰之时而视今日则生齿之衆多事为之丛鉅岂特相倍徙而已哉然则裁省均节固不能悉视於熙丰盍亦揆之以道度之以时损益盈虚惟义之适立为中制使无太过不及之患则实有在於今日之举臣愚伏望圣慈亲诏二三大臣审图之熟虑之可否相济於未熟之前号令必行於已出之後斟酌调制适於厥中官局之可省者省之必务合於人心财用之可节者节之使无损於国体以道为公惟义理之为从成一代之宏规以昭陛下建用皇极之道天下不胜幸甚取进止

乞徽庙解易劄子

臣伏觀朝廷崇经以造士诗书周官自我神考命儒臣以训释之学士大夫有所取正而不愧於异说非小补也惟易之为书范围天地幽赞神明极深研几广大悉备而独汨於传注诸家之说训而释之曷可少哉然而易更三圣伏羲画其卦文王系其辞孔子为之彖象又为之大

传说卦序卦杂卦等篇以发明其道故易於羣经尤备圣人述作之旨非特若诗书周官载先王应世之迹而已羣经出於秦火之余类多缺文而易幸托於卜筮独得为完书自汉以来奇辞奥旨闇而不彰鬱而不发则推而明之发挥精义以承三圣之述作以折衆言之淆乱非圣人之独智其孰能当之道不虚行理若有待恭惟陛下天纵睿智辅之以缉熙光明之学体元用妙该极象数万几之暇训释老庄之书以开悟天下之学者辞旨高妙足以发难言之意而道德性命之理灿如也夫易无思也无为也寂然不动感而遂通天下之故实与老庄之书相为终始臣愚伏望圣慈断自渊衷为之训释以通神明之德以发乾坤之蘊使圣人之全经彰明较着学者得法象焉实万世无疆之休取进止

乞编寬恤手诏劄子

臣恭惟宋受天命艺祖翦业其得天下也以仁得之列圣守成其守天下也以仁守之重熙累洽百有五十余载承平之久跨汉轶唐虽尧舜三代之隆无以过也陛下光绍丕图祇遹先烈宵衣旰食励精为治立政造事所以利安元元者无所不至而一以仁慈为之本可谓深得祖宗翦业守成之道矣爰自临御以来屡下寬恤之诏宸翰昭回至诚惻怛之意见於辞者足以鼓天下之动是以薄海内外蒙被德泽天覆地载海涵春育无一物不得其所协气嘉生薰为太平以仁致治其效如此臣愚窃谓诏令之所布实赖官吏悉意推行不为文具则实德之及民者弥久而弥广然诏令之颁降有先後而官吏之去来为不常虽德意志虑具在方册後來者往往未尝深究而周知之朝廷之上所当以时举而行之者也陛下迺者幸以绍述熙丰政事颁於朝堂矣愿诏有司检会裒集前後所降御笔寬恤手诏事件如劝农桑恤刑狱戒搔扰賑贫乏恤鰥寡孤独之类通行於天下而非一时指挥附於绍述熙丰政事之後以时颁之申命以告四方庶几内外官吏深惟德意志虑之所在竭力遵奉罔敢怠废以副陛下以慈为宝仁民爱物之意天下幸甚取进止

梁谿集卷三十九

卷四十

钦定四库全书

梁谿集卷四十 宋 李纲 撰表劄奏议二

辞免除起居郎奏状

赴讲筵侍立後时待罪奏状

谢放罪表 论水灾事乞对奏状论水便宜六事奏状
论水事待罪奏状谢谪监沙县税务到任谢表

谢复官表 谢知秀州表

辞免除起居郎奏状

右臣今月十八日准合门告报已降告命除臣起居郎日下供职不许辞免者闻命震惊罔知所措窃以左右置史日侍清光以书言动接武侍从号为高华宜得天下英俊极一时之妙选以副公议如臣不材何以称此虽奉宸翰不敢稽留黽勉就职退量謏薄据非其所终不自安伏望圣慈察其忱诚收还误恩以安愚分所有告命未敢祇受

赴讲筵侍立後时待罪奏状

右臣今月十四日垂拱殿起居讫赴延和殿侍立退诣崇政殿门外计会讲读官同赴迓英阁讲筵是时讲读官已先入遂致趣赴侍立後时臣不胜惶惧待罪之至伏望圣慈特赐黜责施行

谢放罪表

臣某言今月二十一日延和殿侍立退赴迓英阁讲筵後时具奏待罪伏奉御笔放罪仍封还奏状者黼座临轩幸侍龙犀之表经筵劝讲独稽鹄鹭之班剡章方俟於严诛洒翰遽从於宽宥惊慙有腼感涕无从中谢伏念臣智不逮人材非适用骤从疎远躡取清华静言遭遇之因皆出圣神之造属便朝之听治叨载笔以记言以草茅之资奉威顔於咫尺以口耳之学闻训诰之渊微方兢兢以震惊宜规规而失措胥传放仗爰就列以言旋正席横经遂愆期於放进考情实虽由於过误严分守宜抵於谴诃辄陈自劾之章愿正慢朝之罪伏蒙皇帝陛下以乾坤之大度轸父母之至慈察臣趣造之心非敢後也悯臣委蛇之迹如或使之亟推宥过之私遂置黜幽之典特颁奎画仍却囊封禹致羣臣之朝甘从後至之戮汤去三面之网举知善贷之仁丘山之赐不赉蝼蚁之诚何报仰酬覆焘誓极靡捐

论水灾事乞对奏状

右臣伏覩陛下以积水暴集滄浸民居迫近都城累降御笔分遣官吏固护堤防拯济漂溺仰见陛下圣虑焦劳曲尽防患之理然臣窃谓国家都汴百有六十余载未尝少有变故今事起仓卒远迩惊惧诚大异也臣尝躬诣郊外窃见积水之来自都城以西漫为巨浸东距汴堤停蓄深广湍悍峻激东南而流其势未艾以宗庙社稷之灵雉堞防守之固万无他虑然或淹缓旬时因有风雨有不可不虑者此诚陛下寅威天戒博询衆谋之时而羣臣竭智効力捐躯报国之秋也累日以来倾耳以听缺然未闻臣窃怪之夫变异不虚发必有感召之因灾害未易御必有消弭之策周官於国危则有大询之礼祖宗每遇灾变亦降诏求言臣愚伏望陛下断自渊衷特诏在廷之臣各具所见以闻择其可采者非时赐对特加驱策施行其说因衆智协衆力济危图安上以答天地之戒下以慰亿兆之心天下不胜幸甚臣仰荷陛下天地父母之恩亲加识擢得侍清光常思奋不顾身以循国家之急辄有已见急切利害事须面奏伏望圣慈降旨合门许臣来日因侍立次直前奏事庶几得尽狂瞽仰裨圣虑之万一伏候勅旨

论水便宜六事奏状

右臣近尝奏请以水潦为患乞赐燕间敷陈利害今月十四日崇政殿侍立合门传旨令臣先退惶惧战栗居家待罪不敢供职圣恩宽厚未奉诛责日夕惴恐局蹐无他伏念臣愚戆諛闻孤立寡与惟知仰事陛下以国家为心比见积水暴集逼迩都城私忧过计辄贡狂瞽情迫意切言皆不伦触盛意犯隆旨自干雷霆之威死有余罪自非陛下恕其愚直天地父母矜而怜之谁复为臣言者臣窃以水旱之灾虽尧汤有所不免惟圣人为能遇灾而惧侧身修行博询衆谋以销去之故尧於洪水方割之时有畴咨之言汤於旱既太甚之日有六事之责皆能转灾以为福易浚以为和此古圣人之明验也今者水患之来起於仓卒人心惶惧远迩震惊幸赖宗社之灵陛下睿筭之审屡降御笔处分疏导通决势渐退落虽畿甸旁近皆罹其灾而都城无虞人意渐定然臣窃以谓水灾既退之後朝廷未可以谓无事正宜讲究利害增固堤防夤念天戒益以修省不可忽也臣愚蠢不揆辄妄发昧死上便宜六条一曰治其原二曰折其势三曰固河防四曰恤民隐五曰省烦费六曰广储蓄惟陛下留神幸察臣恭惟国家卜世定鼎眷都大梁平原沃野弥望千里非有高山峻岭为之阻而都城以西京索交流陂泽相接自西徂东地势倾下加以雨潦不能吞纳则决溢东注俯灌都城其势然也为今之计莫若相视陂塘疏导京索增卑培薄固以堤防节以斗门旱则水有所泄虽霖雨其势不得接连而下可以为万世之利此则治其源之策也臣窃观自昔善扞水患者必为长堤以济其冲其意以谓以数仞之城而拒方至之水风涛之所鼓薄亦已危矣限以长堤杀其怒势然後人力可施而城益坚今积水之来自都城之西浩如江湖东抵汴岸南阻新堤虽停蓄深广而卒不能至城下者有堤以为之阻也由堤而行散漫湍激至都城之南则径抵护龙河者无堤以为之阻也为今之计莫若距城数里之外因高地势缭以长堤使虽有积水决溢之患循堤四泻不能薄城可以御一时之急此则折其势之策也国家都汴处大河之下流其所恃以为固者扫岸坚而法制严也比年以来玩习苟简护卫之卒散於抽差备御之储耗於转易河齿堤防日朘月削恬不加恤如广武扫其距清汴才百余步去冬危殆屡矣其不决溢者特幸耳使夏秋之交乘霖雨湍暴之势果能保其无虞乎夫以陂泽积水暴集之患犹可惊骇况大河之势又可不

为之深虑哉臣愚愿择深知河事者相地形回清汴使与大河相远仍诏有司遵守法制存留兵革储积材料敢有抽差转易者必处以刑此则固河防之策也今兹积水之来冲白沙荡中牟迫都城散漫畿甸之邑淹浸屋庐漂溺民蓄损伤苗稼不可以数计今又决其南以注於陈蔡之郊决其北以注於相卫之境疏汴渠之下流於陈留则数千里之内悉被其患矣陛下惻怛忧劳降诏拯济德意甚厚臣犹窃虑州县监司未能悉意奉行也愿诏诸路应被灾伤地分今年秋租并与蠲免水过之後安集民居借贷赈济务令复业无使失所以副陛下之意此则恤民隐之策也臣窃惟去岁江淮泛溢东南之民悉皆流移赖陛下圣慈以六路上供米斛广加赈济民得无死德至渥也然州县萧条帑廩匱乏迨今未复今畿甸旁近又有积水之患矣何以堪之臣愚愿陛下断自宸衷凡营缮工役花石纲运有可省者权令减罢数年之间民力渐完国用以足然後惟陛下之所命耳裕民丰财莫是为大臣所谓罢不急之务者此也臣又惟古者九年必有三年之蓄二十七年必有九年之蓄然後无旱乾水溢之患教化行习俗美而颂声兴是为太平治之至也祖宗以来旧有封樁米斛以千万计所以为兵民之天宗社之本也比年来工役浸多仰食者衆岁以侵耗遂致殫竭今国计所仰者独东南六路转输岁额耳假使一方水旱岁额不登将胡以自给静以思之可为寒心臣愚愿陛下明诏有司裁蚕食者幸岁丰登朝廷多降粮本委强干官吏广行收采别项上供以充封樁之数岁岁如此及祖宗旧额而後止此朝廷之所优为何不留意而独为憺憺也养兵足国莫是为急臣所谓广国之储者此也凡此六者皆当今之要务顾臣智识浅陋文字荒疎言不足以达意惟陛下财幸下臣章宰执议其可否如可采録望赐施行臣比者尝献愚计伏蒙圣慈寛假未赐斧钺之诛辄复自竭冒昧天听庶几刍蕘之言有补万一仰报盛德

贴黄一

臣伏以水患暴至失於堤防凭陵都城久未退息厥异甚大诚不可忽伏望陛下畏天戒固民心收士用严守卫以弥宁灾害大慰天下之望避殿减膳告於天地宗庙社稷所以畏天戒也法禹汤之罪己以诏万方亲御六龙率羣臣负土石以先士卒所以固民心也诛水官之不胜任者以正典刑择材智而驱策之与共患难所以收士用也辍营缮花石之不急者并卒伍而部分之以备不虞所以严守卫也四者既具又在陛下修胥中之诚感动天心如此而灾害不弥和气不臻未闻之也臣不胜惓惓尽死节惟陛下裁察

贴黄二

臣区区之诚以谓暴雨之灾理不虚发在廷之臣瘖默取容无肯奏知陛下以克谨天地告戒之意者不胜愤懣尝罄狂愚冒渎圣聪今又不能自己辄复妄发伏望陛下察臣之意少赐寛假无使忠义之士钳口结舌视臣为戒天下不胜幸甚

论水事待罪奏状

右臣今月十二日曾具奏以暴雨为灾迫浸都城恐非细故欲望陛下寅念天戒招徠说言仍有已见急切利害乞因侍立直前奏事今月十三日崇政殿侍立宰执退传旨合门令臣先退

更不待立臣不胜惶惧战越之至见今居家待罪不敢供职伏望圣慈特赐黜责施行

谪监沙县税务到任谢表

臣某言昨任承事郎试起居郎兼国史编修官论都外积水不当准告授承务郎差监南剑州沙县税务已到任乞囊封奏御仰冒雷霆之威宸笔正刑尚宽斧钺之戮罪深谪薄感极涕零中谢臣闻明日达聪者君之经陈善责难者臣之义惟君圣而臣直则道交而志通故虽帝王极治之时必有骨鲠敢言之士臣独何者窃慕其风以疵贱朴鄙之资玷清切高华之选傥遇事而怀禄实处朝而腴颜一时堤防失虞水潦暴集方诏令之旁午见睿知之焦劳而臣仰荷眷知每怀补报思虑仓卒虽徇国而忘身学识迂?诚私忧而过计念戇愚之妄发知罪戾之难逃一再褫官苍黄去国螭?载笔梦想云龙之游剑浦征商分甘筦库之役夫何孤陋亦荷保全此盖伏遇皇帝陛下天度兼容至明旁烛怜臣狂狷自取颠跻察臣精诚本非沽激特屈宪章之峻俾沾廩食之优臣敢不铭佩隆恩誓坚素守忠孝难并立徒深将父之怀节义为大闲益励爱君之志

谢复官表

臣某言臣昨任承事郎试起居郎兼国史编修官论积水不当降授承务郎监南剑州沙县税务今月二十二日准告叙复承事郎差遣如故已望阙谢恩祇受乞海隅远屏方履薄而临深帝泽霁流爰赦过而宥罪致兹孤陋亦荷甄收拜赐惟优抚躬增厉中谢伏念臣奋身寒苦构时隆昌惟造道之弗优致信古之太过误蒙识擢躋处高华兰省为郎荐膺器使霜台举职亲被褒称奉常赞郊庙之仪左史珥螭?之笔叨逾若此报称谓何自以立有道之朝辄敢效危言之计虽思虑仓卒腸实无他然踪迹飘零孽乃自作姑从薄谪已荷宽恩岂期谪宦之乡忽拜复官之命负罪至重虽未削於丹书历岁才周已悉还於旧秩省循既往铭刻何言此盖伏遇皇帝陛下体天德而出宁执古道以御有念一夫之失职仁圣所矜施三赦以恤刑蠢愚为最俯怜孤迹曾侍清光还其寄禄之阶示以涤瑕之渐荷恩益腆矢死为轻再念臣一去彤墀屡经霈泽亲年踰於七十喜惧之怀交深庭闱远者三千甘旨之奉久阙方圣主隆孝治以善俗独孤臣婴罪戾而向隅兴言及兹追咎靡及非天地父母之德哀而怜之则犬马蝼蚁之诚谁复言者愿垂日月无私之照获伸乌鸟欲养之心则臣失东隅而收桑榆捐躯未晚先朝露而填沟壑结草为期谢知秀州表【宣和六年内除知秀州七年三月召除太常少卿此表不曾上】

珥笔记言久违於螭殿分符共理滥守於海邦初见吏民具宣德泽中谢伏念臣迂愚有素【一云区区有志】结约【一云碌碌】亡奇徒窃慕於古人曾弗通於世务亲蒙识擢躋处高华不能慎默以保身乃以狂狷而速戾一从斥逐七改星霜侍黼座之清光徒劳梦想躬米盐之俗务弥自省循迨奉宽恩遽罹艰棘终寝苦之制仅不泯於余生有负薪之忧未自归於铨部宁期甄録谬及辱庸假以绂章之荣付之民社之重惟嘉禾之小垒当浙江之要冲水旱相仍流移方甚牧养实资於恺悌推行宜适於变通岂容拙疎辄此叨据此盖伏遇皇帝陛下尧仁天覆汤圣日跻用人惟已而盖其前愆以道观能而收其後效起从谪籍俾守藩条臣敢不

仰体眷慈俯矜凋瘵虽抑强扶弱初无一日之长而宣政承流愿奏三年之最梁谿集卷四十

<集部,别集类,南宋建炎至德佑,梁谿集>

卷四十一

钦定四库全书

梁谿集卷四十一 宋 李纲 撰表劄奏议三

上道君太上皇帝封事

召赴文字库祗候引对劄子

上道君太上皇帝封事【宣和七年十二月诏求直言时任太常少卿上封事】

十二月二十一日宣教郎试太常少卿臣李纲谨昧死再拜上封事皇帝陛下臣闻忠臣不避诛以正谏故能济患难而图安明主不以人而废言故能协智力以自助臣愚忘生触死愿效区区之忠惟陛下留神幸察臣近以太常职事赞导郊禋窃见陛下裸献太庙十室圣心感动涕泗横流侍祠之臣仰助惻楚然臣以谓陛下念祖宗艰难之功必思所以持盈守成慕神考劬劳之德必思所以继志述事况於宗社之大本生民之大计得不深虑而熟察乎臣伏观陛下自临御以来追绍先烈所以持盈守成继志述事者无所不至远欲摅祖宗之宿愤近欲成神考之贻谋因契丹之衰亡复燕山之故境此诚不世之功甚盛之举也然而谋事之臣动失机会统兵之将多违指踪粮饷有飞挽之劳赂遗有贪婪之患金国败盟羽书狎至常胜失守存亡未期自燕地以南无高山深林险阻以为扞蔽自大河以北有频年盗贼郡县为之萧然设使虎狼之衆蝟结蚁聚侵边徼而摩封疆将何以御之此诚宗社危急之秋陛下侧席求言而忠臣义士奋不顾身以报国家之日也窃闻有旨召侍从之臣聚议各具所见以闻有以见陛下焦劳慨然有纳用羣策之意臣以庶僚疎贱不获与议论之末窃自伤悼久抱孤忠考古揆今参之天人之际日夜念此至熟仰荷陛下知遇宁忍緘默不言以图补万分之一敢忘越职犯分之罪冒进忱辞惟陛下赦其狂瞽而详择其中臣窃谓当今御戎之急务虽在於选将励兵多方扞敌然要须知其本原敌乃可制杜牧所谓上策莫如自治而以浪战为下策者诚为知言前者已不可悔後者犹可图也臣谓治其本原者其说有五一曰正己以收人心二曰听言以收士用三曰蓄财谷以足军储四曰审号令以尊国势五曰施惠泽以弥民怨臣所谓正己以收人心者比年以来搬运花石舳舻相衔营缮宫室斧斤不辍制造器用务极奢巧赐予之费靡有纪极燕游之娱倍於曩时此皆上累大德下失羣心蠹耗邦财斩刈民力积以岁时驯致今日之患非偶然也孔子曰一日克己复礼天下归仁焉又曰修己以安百姓尧舜其犹病诸凡此数事特皆陛下耳目玩好嬉戏之具於事为甚轻然而实害天下之大计於体为至重斥而罢之一念之顷断自圣心夫复何难此令朝行人心夕改所谓克己复礼而天下归仁修己安人而比隆尧舜者陛下岂不优为之臣愿陛下降明诏罢花石之运停营缮之工减制造之局省赐予之费节燕游之娱凡应奉之物一切禁絶如已诏停罢前项数事更愿以至诚惻怛之意加之深省前失无以事势稍缓即复施行要在使衆必信上以昭圣德下以收人心可乎臣所谓听言以收士用者比年以来忌讳衆多人材鲜少諂谀之说日进忠黷之言不闻譬犹一人之身衆病交攻不求瞑眩之药而望厥疾之瘳不可得也夫中材之士正须崇獎

乃敢展尽况复摧抑谁复纳忠是以大臣以将顺为任职而不肯谏小臣以畏缩为得计而不敢言侍从之列怀荣宠而谋身台谏之臣举细故以塞责习熟见闻致今日之患亦非偶然也书曰后从谏则圣传曰武王谔谔以昌以陛下之明而招徕羣言广谏益圣天下之事有不足为者况彼区区之国何足深畏孟子曰闻以七十里而有天下未闻以千里而畏人者也况以天下之大而畏小丑哉方今贤士大夫或伏於下僚或遯於山泽以陛下无至诚听用之意皆闭其言而弗出平日陛下所取谋而听用者不过左右近习之臣陛下以今日之事思之果能有济乎臣愿陛下降明诏求忠谏之言延草茅之士许侍从同荐或自荐达便殿赐对不拘以时使之展尽底蘊虚心以听之言而是举行其策而随加擢用言而非加慰劳而勿复谴责仍於诏中明着悼往年求言加罪之失凡百忌讳一切蠲除上以广圣聪下以收士用可乎臣所谓蓄财谷以足军储者臣闻人以财而聚兵以食为天虽有良将锐卒非财莫能使也虽有金城汤池非谷莫能守也财谷之蓄平日者犹不可缓况於用兵御敌为持久之计哉比年以来用度无节侵耗日多财匱而府库虚谷散而仓廩竭物力既耗人心惊疑如居风涛汹汹靡定今日所以给军费不知陛下於何所取而足乎取之内帑而内帑有尽取之封樁而封樁已无取之阖辟歛散之术而榷货之法已殫取之横赋暴敛之政而吾民之力已困正当苦节以为足用之计耳近者置司讲议失本末先後之序凡所裁减类皆毛举仅及百分之一二而真所谓无名之费不急之务初未尝裁减也况於权臣贵戚近幸之臣开端援例以沮坏之有裁减之名无裁减之实怨谤纷然何补於事今日之势迫矣屯兵数十万粮饷锡赉其费不貲又将取於吾民如前日之免夫钱则四方盗贼圜视而起岂不趣祸乱哉臣愿陛下深思熟计如臣前之所陈既罢花石营缮制造赐予燕游应奉等事明诏有司将常日逐项钱物尽归版曹别项樁管专给军费御前不复取索有司不进关子有不如诏重寘於法又诏宰执文武百官俸给米麦减半宰执及观察使待制以上官在京有物业者仍令各进家财以助国用事平旋行给还在京上户愿进者听优与官职又诏诸路漕臣以上供斛?及自御前拨降钱帛日下於淮浙沿流州军高价采谷多方措置人船星夜起发以实中都断而行之勿为浮议所沮财谷充牣军储有余则外患不难御也臣所谓审号令以尊国势者臣闻人主深居九重之中所以宰制万邦役使羣心者莫大於号令号令者国之纪纲也其在天如风雷在人如血脉风雷不失其序则万化成血脉不悖其理则四肢运故人主之於号令必审谛而不妄发则威信立而国势尊下之仰上如天惟其所命民之视君如心惟其所使此帝王御天下之常道也比年以来发号出令初莫之审朝令夕改初不必行密降旁出而三省密院不与知束以峻法而给舍不敢駁夫元丰厘正三省密院之制皆所以奉行天子之号令也二三大臣与夫给舍之官皆陛下亲择而信任之者也号令之出而二三大臣或不与议号令之行而给舍之官不得举职是朝廷为虚设而政事之出所以多门也首尾衡决先後错忤有司疑於趋赴四方无所适从陛下方以摠揽权纲为得计而不知国势已卑矣臣愿陛下深究神考设官之意每下号令必与二三大臣谋之无使非其人者得与其或未允听给舍得以审駁令出惟行而无反汗之讥信赏必罚减去私意则州县将吏兵民如身之使臂臂之使指外患不难御也臣所谓施惠泽以弥民怨者臣闻民之恃财以生犹鱼之恃水以活也王者之泽被於民深譬之江湖散漫悠远鱼於此而相忘岂有他哉用之有节取之有道不夺其所以相生养者而已比年以来用度既广取於民者常赋之外其目繁多絮帛则有和买预买有泛买有常平和买有应副燕山和买米穀则有和采有均采有补发上供和采有应副军粮和采有拨发辇运司和采名曰预买无钱可敷名曰和采其价每下又以官告度牒钞书准折衆户共分皆为虚名无用之物此外又

有茶盐敷配课额赃吏猾胥因缘侵渔一家之产随其高下所出如此欲其不饥寒转徙得乎东南之民耳目见闻水漕而陆辇者又皆花石应奉不急之物愚民无知以谓夺其父子兄弟夫妇所以相生养之具尽於锱铢而用之如泥沙以供浮费欲其不兴怨谤何可得哉是以顷岁江浙巨盗一呼从之者飏举而云集东北啸聚至今为梗职此之由方今边鄙震聳人心惊疑深虑穷民复起为盗则腹背受患何以支吾臣愿陛下明诏州县凡积岁欠负并与放免近降措置财利指挥如钞旁钱免行钱醋息钱之类一切停罢庶使民心安妥而奸猾不得以摇之此不可缓之策也臣前所陈五事如蒙陛下详察而施行之则所谓上策莫如自治者其大槩已举矣变危为安莫先於此至於选将励兵多方扞敌之策臣请试为陛下陈其梗槩扞敌之策其说有十遣大臣之有智谋权略素为天下之所信服者为大帅尽统诸将听其节度推毂授师不从中制使兵势不分一也选诸将之鸷勇有谋素为士卒之所信服者各将所部分据要害之地使缓急首尾相应可以抗敌将不足则募大小使臣武举及第或曾立边功者召问方略擢而用之二也遣畿甸禁兵不足则拣择杂役诸色厢兵之强壮者又不足则起河北及畿甸保甲又不足则募民之愿为兵者务令数多张大形势使人莫测又以羽檄起天下兵尽赴京畿使无外重内轻之患三也恃河以为固旁近州县屯宿重兵营垒相望以卫京师持重养威勿与之战待其粮竭势衰然後议之四也屯戍将兵粮饷钱帛皆自中都应副优加抚恤勿使阙乏别置将兵防护饷道五也并河州郡选择守臣素有风力可委任者易去疲懦许以便宜从事在朝无其人则召自外方起於闲废务在协力公心推选六也募文武小官有胆智辞辨者授以高爵奉使兵间卑辞重币复约和好以缓师期使吾事可办七也河北诸郡令坚壁清野人民入保使进无所获粮饷有时而穷敌人之衆难以持久八也按地图相形势命并塞诸道控制要冲扼其归路扰其饷道使退有所虞不敢深入九也夏戎窥伺中国久矣乘我之衅安知无跳踉之心今起西兵而召其将帅彼或谍知敢肆猖獗又生一患则陕西河东诸路不可不虞十也凡此十策虽腐儒之常谈然不可不察更愿陛下召宿将知兵者与庙堂深计之昔汉文帝时匈奴大入边乃命周亚夫等三将军军霸上棘门细柳以备胡文帝亲劳之礼成而去臣愿陛下命将帅统六师屯於近郊训练士卒陛下亲临以讲武振扬天声以励士气镇之以静临之以威兵固有先声而後实者亦一策也夫北人败盟侵犯边境自古有之唐太宗时突厥颉利饮马於渭水去长安不百里太宗兴六骑幸渭上逆折之颉利遂遁本朝景德中契丹犯澶渊去都城才数驿真宗渡河亲征契丹遂和何则师直为壮在我者理直而有备士心奋励气固足以吞之臣愿陛下先留意於自治者而以扞敌为余事自治之策尤以收人心为先不可以为非今日用兵之急务也昔者太王居邠狄人侵之事之以皮币珠玉犬马而不得免太王曰狄人之所欲者吾土地也去之岐山之下居焉从之者如归市非得人心则虽将避狄人谁与居况欲合衆智協衆力使将帅忘生卒伍用命士有死志民无离心以扞难制之敌为宗社苍生之计哉愿陛下无忽臣闻良药苦於口而利於病忠言逆於耳而利於行前事之验後事之元龟也臣昨於宣和元年任起居郎日因都城暴雨变故尝具状奏乞陛下寅畏天戒招徠谗言仍乞因侍立直前奏事区区之意实有所怀以谓陰气大则恐有盗贼猖獗外患频仍兵革之事不可不戒有其兆而事未见难於显言故欲面奏蒙谪降远小监当虽抱愚衷不能自达逮今七年而四方兵革之患如此乃知天人之际不可诬也惟先格王正厥事上以动天意下以感人心天意人心去就之际间不容发动天以实而不以文感人以行而不以言正在今日臣愿陛下万几之暇中夜以兴仰思祖宗勤劳积累基构畀付之重俯为子孙蕃衍衆多万世无穷之计留意於贱臣之言夫心之精微非书之所能尽也陛下清燕之

间何惜榻前咫尺之地不使臣进对得尽其心以报盛德伏望圣慈特降睿旨许臣不隔班先次上殿及与衆聚议庶几刍蕘之言或有涓埃之补臣虽死之日犹生之年非独臣之幸乃天下之幸也干冒天威无任战越惶惧之至

召赴文字库只候引对劄子【宣和七年十二月二十三日有旨赴都堂议事讫随宰执赴文字库只候引对具已见劄子】

臣伏覩陛下以金国败盟陷没燕山重兵压境邀求必不可从之事欲恢中原而取河北渊衷震悼深悔前非下哀痛之诏罢不急之务蠲繁苛之令除掊克之法招徕忠党之言讨论扞御之策命皇太子作牧开封以系天下之望诚意惻怛感动天地慰安人心虽尧舜修己以安百姓禹汤罪己以抚万方无以过也然臣以谓事势迫矣结衅已深遣使讲和必无可和之理长蛇封豕蓄鋭深谋待时而发其意不浅而自河以北守御萧然无藩篱之固不知何以御之今日之策所谋得则宗社安所谋失则宗社危安危之机间不容发臣愿陛下审料事势度以圣心之所能行者深计利害而明白行之无为苟且侥幸覆藏隐讳以趋祸乱庶几可以转危而为安则天下苍生无肝脑涂地之患宗庙社稷无沦胥以亡之虞皆在决於陛下方寸间耳臣愚以谓今日之策有三上策莫如亲征讲求真庙幸澶渊故事选将励兵躬临训练降诏问罪涓日啓行以櫜戎心以鼓士气驱逐丑类保完旧疆此上策也中策莫如坚守夫京师天下之根本也宗庙社稷朝廷宫室之所在百官之所聚密迩陵寝中四海而临万邦高城深池有金汤之险联营环卫有虎貔之师运漕东南以足财用控制西北以威四方天下无二舍此安归定坚守之计励士民之心效死为期无毫髮欲去之意既务镇静又施权谋遣帅出师分屯傍近要害之地翼卫帝室设使虎狼之衆敢肆凭陵当如周亚夫御七国之策坚壁勿战以挫其锋待其粮竭力衰邀其归路多设方略一鼓破之此中策也下策为避狄之计如太王去邠而居岐臣有所不忍言然道涂间巷之人户知之臣亦疑圣意或出於此何哉比者不议河北守臣而先议东南守臣一也遣使分起诸路兵而不起淮浙兵二也撙拦沿汴舟船三也建牧四也为此策者虽足以纾一时之急然知其利而不知其害也臣窃痛曾不深计而熟念之也委陵寝宗庙社稷朝廷宫室百官万民而去之远迹必溃是以中原界之豺狼也事势一去不可复振臣恐京师朝行而夕乱其祸故可胜言哉陛下虽命皇太子建牧以监之何补於事是不若偕行之愈也必不得已臣有愚计顾恐陛下不能行之臣今日言之悦不契圣意必死於斧钺不言之异日祸败必死於乱兵与其死於乱不若死於国臣敢冒万死为陛下试陈其说陛下欲行避狄之计而命皇太子留守以系人心以扞大敌以保陵寝宗庙社稷是也而建以为牧非也本朝及唐故事皇帝行幸郡国则皇太子监国此特国家闲暇之时典礼如此今大敌入寇天下震动安危存亡呼吸间而用平时典礼可乎名分不正而当大权稟命则不威专命则不孝何以号召天下率励豪杰与之以死抗敌期成功於万分之一哉唐明皇避安祿山之难而入蜀父老拥马乞留太子以讨贼而肃宗有灵武之立势不得不然当时之议曾不早定後世惜之陛下度今日人心已摇可以与之共患难而坚守则守而弗去可也度不能守则胡不假皇太子以位号使为陛下保守宗社收将士心以死扞敌臣窃观皇太子仁孝夙成恭俭好学四海属心如臣之计天下可保在此一举夫父子之间人所难言今日之事宁复有大於此者乎臣素愚直感戴大恩所以不避重诛为陛下言此者欲陛下深思而定之於早也交逊之际灿然明白而使宗庙社稷有所依归四海苍生有所系属陛下如释重负享安逸於无穷

而以死宗庙社稷之事责皇太子与天下之士大夫岂不美哉敌情难测卒然有急然後议之则无及矣易曰知进退存亡而不失其正者其惟圣人乎伏惟陛下圣德高妙臣固知黄屋不足以纓紱帝尧之心所以敢言者正恃陛下体道而轻外物也昔田千秋以一言而悟武帝而巫蛊之祸息臣顷以论水去国七年今日之事适在朝列以上封事朝奏暮召以蝼蚁之微敢言大计岂非祖宗神灵啓悟臣心使之如此其敢爱死不自比於田千秋哉谨刺血亲书干冒天威无任战越俟死之至取进止

梁谿集卷四十一

卷四十二

钦定四库全书

梁谿集卷四十二 宋 李纲 撰表劄奏议四

上渊圣皇帝实封言事奏状

乞尊崇道君太上皇帝尊号状

论御寇用兵劄子

上渊圣皇帝实封言事奏状【宣和七年十二月二十四日渊圣皇帝受内禅公二十六日上实封言事奏状】

右臣伏覩皇帝陛下诞膺天命抚临万邦天地神只永有依归华夏蛮貊永有承事神人交庆海?腾欢道君皇帝体道法古因天顺人不贰不疑传付大器授受之际灿然明白虽尧之禅舜何以加此下视汉唐无足比数此诚宗社之休而生灵之福也然臣窃谓陛下主鬯春宫兹踰十年孝友之美实形四方英伟之姿久动羣听道君皇帝眷佑一德方兹艰难付以宗社生灵之寄天之所归岂曰人力然而方今外患凭陵中国势弱奸邪充斥君子道消法度纲纪荡然无统陛下履位适当斯时得上应天心下顺人欲外攘四裔使中国之势尊内诛奸邪使君子之道长以副道君皇帝所以付托陛下之意哉迺者道君皇帝下罪已诏罢不急之务蠲烦苛之令除掊克之法招徠忠谏之言讨论扞御之策唱於前陛下不可不和於後造於始陛下不可不续於终正犹尧之禅舜论共鯀兜苗之罪皆在尧时而四罪之诛使天下咸服必居舜日然後元凯可进法度可修四目可明四聪可达庶政惟和万邦咸宁以成垂拱无为之治仰惟道君皇帝既已为宗社生灵之故亲御翰墨悔前日之非播告四方不匿厥旨矣则夫左右恩宠之臣造作边事养成祸胎屡覆王师貽患宗社有如童贯者招权怙势首为兵谋以佞幸之姿据师保之任有如王黼蔡攸者以穿窬之质挟奸雄之谋作奇技淫巧以荡上心运花石竹木以斂民怨有如朱勔者豪夺民田掊斂财贿剥下奉上依势作威有如李彦者恃宠眷之私擅威福之柄招兵自卫失禁旅之心有如高俅者罪实比於四凶诛宜行於两观陛下以其久在道君皇帝左右之故未欲诛殛亦宜流窜远方以正典刑而自即位以来今已累日寂然未闻决断之诏羣心忧疑其何以仰副道君皇帝畀付之意上应天心下顺人欲而使四方知中国之威逡巡而不敢进哉臣愚伏望陛下运以乾刚照以离明为宗社生灵大计断而行之天意昭答人心悦服则外侮不难御矣昔孔子为鲁司寇七日而诛少正卯今陛下即位累日而未行虞舜之政臣窃惑之至於宰相台谏之臣亦宜罢黜慎择其人以协惟新之政何则天下之事惟宰相可行而台谏可言坐乎庙堂之上与天子相可否者宰相也立乎殿陛之间与天子争是非者台谏也宰相得行其道台谏得行其言一失其职则为宰相者何以揆百官而抚四夷为台谏者何以纠官邪而谏王恶冒宠尸禄无补国家噤默不言致危宗社其罪岂浅浅哉臣窃观道君皇帝深悼前失欲收天下之心而降哀痛之诏罪已之言所不忍闻仰读之

人为之掩泣此诚禹汤之用心也抑畏之极至於感疾逊位退居旧宫人主如此而宰相台谏之臣偃然如故恬不为怪此何理也譬犹庸医之疗病已致人於危困犹且顾视财贿自为身谋不忍舍去而虑他人之轧已也求病之瘳岂可得哉为今之计正宜博采深访求人於闲废贱之间所谓擢卒为将拔士为相者正今日急务也惟陛下留神幸察臣愚戇无取惟好读书深考古人论议天人之际窃有所见往年任起居郎日因都城暴雨变异至大尝具状奏乞因侍立直前奏事区区之诚以谓陰气太盛恐有盗贼跳踉兵革之事有其兆而未见难於显言故欲面奏寻蒙谪降惓惓之忠无以自达去国七年而盗贼跳踉之患相仍如此乃知天人之际若合符节不可诬也请以比年以来天人之际及今日之事为陛下详言之崇宁之间蚩尤之旗见其长半天宣和之初赤气夜起自西北至於东南此皆兵象祸大而应迟今年冬日之至荧惑入南斗端诚殿称贺梟鸣於廷此皆不祥之兆惟正心修德大有变革乃能销弭祸故导迎福祥昔宋景有善言三而荧惑为之退三舍此必至之理不可忽也陛下传位之初前两日昏翳四塞日光不明陰慘之气无风而栗至暮日入赤光散溢此君道衰弱议论未决之兆也陛下即位之日日晕五色带黄赤珥两日相摩正同艺祖受命之应此天人协赞之符也然而御垂拱殿见羣臣之後蒙气四起暴风从西北来越翼日天气清润日华腾辉明而未融方中蒙气复作至暮乃散臣窃以法推之日者君象君以刚明为道君道明则日光盛而羣陰伏今如此者殆陛下即位之初退托谦损未揔权纲之所致也平时犹可如此今势迫急戎马寇边日有变故乃宗社安危之秋岂可平时比哉上天垂象所以警戒陛下者甚厚愿陛下察臣前之所言密诏亲信大臣条具过恶之甚者明正典刑过恶之轻者量加贬谪然後下寬大之诏一切不问其余以安反侧则主势强而天意得人心服矣推此以往虽致极治之太平可也臣素愚直为衆所知方陛下听政之初昧死上狂言惟陛下赦其罪而取其忠天下不胜幸甚取进止

乞尊崇道君太上皇帝尊号状

某伏觀道君皇帝断自渊衷传位皇帝交逊之际灿然明白虽尧之禅舜无以过此下视唐之诸帝夫何足言某窃以谓名号之称宜极尊崇以彰盛德伏请尊崇道君皇帝曰道君太上皇帝道君皇后曰道君太上皇后务合典礼以昭示四海而垂无穷伏乞朝廷详酌召百官赴尚书省集议施行

论御寇用兵劄子【宣和七年十二月二十八日有旨召对延和殿进呈】

臣伏见金国败盟大兵入寇郭药师以常胜军叛遂陷燕山人马两项决策深入一项自北方入者围安肃军犯中山府以窥河北一项自西北方入者破代州犯太原府以摇河东兵势迫急宗社可忧而庙堂大臣纷然惊扰初无御贼先定之计所布命令皆失事机使四方无所适从万民无所归仰而陛下初即大位退托谦损未奋乾刚威信未立号令未行贤材未登奸邪未去其何以御扞大敌保守宗社以副道君皇帝付托之意臣不敢远引前古多设蔓词以渎天听谨以管见具方今御敌用兵之急务画一条陈实皆至计伏望圣慈特赐亲览有可采者推而行之天下不胜幸甚今具画一下项一今来金国入寇合为固守之策遣帅命将召募兵夫广张声势联营接垒屯驻要害之地坚壁深堑勿与争锋待其粮竭气衰徐议攻战絕其饷

道扼其归路使之惊顾一鼓破之如汉用周亚夫破七国之策前汉亚夫列传可以为法

一今来金国遣使有所邀求臣虽不能知其所邀何事然以意料之不过五事欲求尊大之礼一也欲得归明之人二也欲厚邀岁币三也言我首败盟约过失四也欲求割河北之地五也臣愚窃以谓金国欲求尊大之礼当屈体事之如文王之事獯鬻以纾一时之急无不可者欲求归明之人当尽与之遣兵裹送以示大信我辞既直而可以无狼子野心之虞养济匮财之患一举而三策兼得无不可者欲厚邀岁币当答以旧约以燕云归中国故岁币所以加倍於大辽今既败盟尽取燕云之境岂可复增岁币为两朝赤子之故不敢爱惜且如旧约已为过厚至於欲求割地则祖宗领土为人子孙当固守之虽尺寸之境岂可割以遗人夫彼之贪婪无厌设使割地复有所求将何以赂之又河北燕山接境惟赖塘泊为固今悉以与之则险阻之地尽在彼何以立国当择辨士奉使以死争之

一今来御扞大敌当择大帅三人以朝廷大臣为之一人帅大河以北屯於真定一人帅大河以南屯於濬滑一人帅河东屯於泽潞许以便宜从事不从中制所统将兵各以十万为率据要坚守慎勿与战使其有所顾望不敢深入设使深入絶其粮道徐议攻战度为万全然後举师彼必退遁

一诸将统兵每将以五千人为率择有权略武勇为士卒信服者使为之人材不足则招募武举及第并曾立边功之人召问方略择相貌耆厯识见高远者随材録用责以功效

一诸路募兵全未辨集欲乞先会计畿甸禁兵及选诸色厢军可用者充及起保甲出内府钱帛招募畿甸之民刺手权充乡遂之兵优与赡给事毕放还归农以二十万为率与已起发兵通为三十万分隶三大帅诸路有招募到兵续次分拨及屯驻畿甸

一军前粮草钱帛各选差转运使副各一人专行管构计置并自中都应副不得搔扰逐路人民及乞降见钱委京东西淮南两浙转运司高价采买斛?应粟米大麦黑豆皆可充数多方和雇计置舟船京东自五丈河西京自蔡河淮浙入星夜疾速起发应副仍每路料定数目辨集优与推赏

一诸路兵器并招募人管押上京赴军器监纳优与酬奨

一畿甸并近京州县应官户马许留一疋其余并私户马并籍定拘收优给价直分给将士

一并河州郡具见今守臣姓名拣择内有疲懦癯老之人选差素有风力强干者换易许以便宜从事在朝无其人则召自外方起於废闲务在协力公心推选

一河北河东郡县令坚壁清野人民入保使虏掠无所获粮饷有时而穷深入之衆难以持久

一沿边并塞诸郡按地图相形势使各聚兵控制要冲扼其归路扰其饷道使有所顾望不敢

深入

一夏戎窥伺中国已久乘我之衅安知无跳踉之心当议备守

一国家四京惟西京城壁不备密迩陵寝理宜修备以严拱卫之势当诏守臣用见兵及募人修备责以近限乘此农隙可以集事此最不可缓之策

一京畿屯兵及见在禁旅宜於近郊讲武训习车驾临幸以赏劝之劳问将帅如汉文帝劳周亚夫故事

一措置将帅马如已辨集宜下亲征之诏以鼓士气以懾敌心如本朝真宗亲幸澶渊故事

一近降赦书麻制词臣不工叙述无法全不曾该载道君皇帝以忧勤感疾逊位陛下主鬯春宫膺受天命之意道君皇帝传位手诏行迟而赦书行速臣恐四方疑於观听欲乞别降手诏叙述详备指事明白依赦书例日行五百里以解四方之疑

一近降哀痛手诏集四方勤王之师许令知州县令募兵赴难窃恐天下搔动别致不虞欲乞降诏罢之起州郡见在禁兵及福建枪杖手湖南北峒丁仍仰安抚钤辖司选差武臣管押赴阙

一近遣密谕官事属搔扰欲乞并罢有所调发只直降诏旨委本路监司知通当职官应副施行

一今来探报贼兵入境祇是凭常日马递急脚递铺兵丁深虑不可凭仗探报失时欲乞逐州各置烽火卓望及差人兵别作一项作白旗子探报给降银字牌为号优与请给

一东南漕运馈饷京师控引江湖道里远涉全赖发运司措置应副宜选公忠强干素有风绩之人委以转输大计如唐韩滉以镇海军节度使兼领诸道盐铁转运等使事在唐韩滉本传可以为法

右件所陈画一扞御大寇二十事皆当今之急务宗社之大计伏望陛下降臣章与大臣议详择施行取进止

梁谿集卷四十二

卷四十三

钦定四库全书

梁谿集卷四十三 宋 李纲 撰表劄奏议五

辞免兵部侍郎奏状 论募兵劄子

论用兵劄子【御笔批答附】

辞免知枢密院事劄子

辞免知枢密院事表 乞议不可割三镇劄子

辞免兵部侍郎奏状【宣和七年十二月二十四日渊圣皇帝受内禅二十九日准尚书省劄子除兵部侍郎日下供职具奏辞免恩命】

右臣被受尚书省劄子十二月二十九日三省同奉圣旨除臣兵部侍郎日下供职闻命震惊莫知所措臣窃以周建六卿司马掌九伐之法魏分八座尚书有五兵之曹惟是贰卿实重其选况今强隣内侮边隅动摇方艰难多事之秋陛下克笃武志张皇六师以昭艺祖之丕烈宜有英俊来应昌期如臣孱庸何足采拔虽往年论事滥得於虚名然今日建官宜收夫实效宠遇过厚报称诚难寝误恩以安愚分

论募兵劄子【宣和七年十二月二十八日延和殿赐对得旨讲求募兵之策二十九日蒙恩除兵部侍郎日下供职三十日再对延和殿进呈乞委臣相度具画一施行】

臣近蒙恩赐对便殿面奉圣训讲求募兵之策臣窃谓今日募兵训练宜依仿周官伍两卒旅师军之制创作六军每军二万五千人合十五万人先会计在城畿甸禁兵数目若干诸色厢军拣选强壮者数目若干不足则召募应逃亡军不拘曾作盗贼有罪犯诸色人不足则起畿甸保甲不足则起近畿州县民兵即时团练为保仍於吏部右选召募大小使臣校尉曾应中武举及有边功及有方略人量材选充部辖将校近上将佐自朝廷选差其召募去处合分作四项一项招拣一项刺填一项团结一项给赐利物并即时相关了当候人数足日令於京城四壁园苑内先屯逐时训练其合用旌旗金鼓甲冑器仗帐幕什物并计定数目分委开封府将作少府军器监即时置造应副不旬月间可以集事如合圣意乞委臣相度具画一奏闻施行取进止

论用兵劄子

臣伏领御批降付臣僚所上奏劄不知何人所陈皆与臣意暗合乃知今日不为无人在陛下

采其言断而行之而已唐韩愈有言不赦不疑惟天子明凡此蔡功惟断乃成正谓此也易於谦之上六称利用行师征邑国於师之上六称大君有命开国承家小人勿用盖谦之极非利用行师不足以济功师之成非戒用小人不足以保治今陛下之於金人卑辞厚币靡不顺其谦极矣然金人骄悖愈甚其势非用师不能有济以臣料之不得已而用兵其功必成然功成之後在陛下以小人为戒而已臣愚伏望圣慈深考圣人之言断自渊衷无为浮议所动则大功一成中国数十年可以无凭陵之患不然忧未艾也所降奏劄更容臣来早将上面稟圣训谨録奏知

御笔

然不可轻若他先败盟可也慎之慎之

辞免知枢密院事劄子

臣伏奉圣旨知枢密院事日下供职闻命震惊罔知所措窃以枢麻之长兼统兵机宜得瑰奇之人以居其任然後可以将率三军之衆折冲万里之外臣本书生进由庠序以忠义自许妄意事功而性刚才拙动辄多忤宣和初道君太上皇帝识拔执笔螭?日侍清光属大水?至士庶争具舟楫无敢言其所以然者臣谓此非小变上疏指陈冀得直前论事当路挤排流落七载道君太上皇怜而收之使贰奉常永惟大度之私方图国土之报去冬因边吏弛备盗据全燕肆其凶虐来犯王略太上皇厌万几之烦欲授圣子意有未发臣与少宰吴敏力建大策赞成内禅岁首太上皇帝南幸江淞羣臣亦有劝陛下为避狄之计者臣又躬述利害回銮輿之幸为固守之策斯皆臣子常分初无涓埃可言陛下不以臣鄙骤加褒用擢自庶寮不五日而参大政仍委以亲征行营使事臣感陛下不世殊遇?殚犬马之力受任以来夙夜忧勤深恐勲绩不效以负陛下知人之明故策阅将士率励士卒躬冒矢石登城以御敌昼夜巡警戢奸以安衆间遣使移檄河北诸镇使预为堤防忘食不寐修战具严守备以俟援师援师既集欲因利乘便进营逼虜使进不得攻退无所掠势穷食尽渡河而遁击其半济胜可万全计虑已定而姚平仲引衆出城几败大事然平仲受节制於宣抚不闻命於行营二月一日夜半平仲之出种师道亦不知之在微臣实无所与其夜四鼓陛下闻其交锋诏臣应援顷刻之间使者三至臣适感寒伏枕力疾承命出景阳门至班荆馆亲督将士列在要冲分遣兵马解范琼王师古等围亲以中军扞御贼马射杀金人甚衆是夜臣宿城下明日复列阵与贼相望臣所统兵士气百倍然臣其晚求对不可已而赐醴恐惧自省莫测其原仰赖陛下至仁至圣灼见臣愚款实无他肠特赐宸翰许之保全与其空乏加赐缣金未逾三宿亟垂召命俾还旧物诏臣速为守御之事谕以怨仇嫌谤欲持平仲之罪中伤微臣伏惟陛下天地父母覆幬生成之恩不可为量瞻谢之际感涕交集德施罔极捐躯弗避惟是都城细民因间杀掠内侍理宜弹压臣躬稟圣旨即取其最不逞者斩数十人梟首通衢以靖羣衆重沐圣恩令臣知枢密院事窃惟和议既成金人拥重赏邀名镇不战而得所欲臣诚私心痛之既乖臣本志兼统军事岂其所宜祖宗旧法兵符出於密院而不得统其衆兵衆隶于三衙而不得专其制今臣既统行营之兵又制枢密之令考之旧法未见其可臣窃谓羯寇初退四方勤王之师未有所属中都畿邑团结保甲之兵未有所处欲於旬日之间犒赏条具以勤王之师尽附制置使姚古种师中使

司牧圉以团练保甲分还州县使各乐业内外人心既以救寧臣当抗章自陈请辟贤路以远谗谤全陛下始终之恩此心素定有如皦日昔张良作汉腹心高祖数罹困厄良常有力乃?从赤松子游李泌入议唐事肃宗复两京泌谋居多乃欲隐衡山此皆豪杰迈往之士乘时遇主以成功业久安显位何所不可而屏门以避患祸犹至於此况臣单立一身朝无亲党乏昔人之功业而有不赀之谗谤岂得安处宠荣不知戒惧今纵内外粗安未敢亟去若叨冒巍巍进长枢庭非所宜据固当恳辞得请而後已伏望圣慈察臣至诚出於至切非敢矫饰务为虚文特降睿旨追寢隆恩以安愚分不胜大?

辞免知枢密院事表

臣言伏奉制命除臣知枢密院事寻具劄子辞免蒙降诏不允者武有七德宜恢经远之?望临一时乃副由中之命岂材慙於柱石亦位长於枢衡辄恃至慈求安微分中谢伏念臣资性浅窳学术迂疎常自信其朴忠颇着闻於狂直思忘身而殉国慕以道而事君抗章隔左史之班折而焉挠趣召贰奉常之职知无弗为偶羯寇之负盟连叛臣以犯顺吞噬幽蓟蹈藉河山方国家有警之时正臣子竭诚之际上皇顺天心而授圣子克成尧舜之仁陛下因民欲以保神京更迈宣光之业岂系人力实赖天功而臣叨擢任於肃机仍倚充於元帅受恩至渥怀报靡遑选练六师每扬声於出战严飭百雉专悉力以登陴克张黑虎之雄昭示金汤之固火逼甘泉而不恐骑至渭水以何虞俟集援师式遵庙算猛将辐凑各喋血乘胜之有闻壮士云屯皆投石超距而可用欲连营而并进拟坚壁以相持使其形势衰疲粮食空乏指归路而弃甲视洪流以争舟斯奋击而无亡矢遗镞之劳爰邀截而絶疋马踦轮之返重币复得如荀息奉璧之奇贵质来归笑知罃寘楮之陋惜贪夫之妄作帐幽默而失图端赖英明亟加延见察兵端之动微臣初不预知宣独断之威衆谗真莫能蔽增领备御之政俾兼宥密之谋鉴照若兹捐糜罔避然孤危之迹仅免谤伤而狡狴之谋既从和议惊魂未定施表饵以何堪素志不伸览韬铃而有愧行即引去尚留须臾将分布勤王之人且区处复业之衆回道君清蹕於淮浙遂天子崇养於晨昏彗扫星流画久逸永寧之至计天开地辟应中兴重欢之美谈然後请辞宠荣务远权势学道轻举追辟谷之张良放意收身效看山之裴度庶全终始或解怨仇倪冒居右府之先虑莫保畏途之戒伏望皇帝陛下审易盈之量慎难进之风曲回涣文矜存确素恐至於惑譬若载鼔以车赏不敢当?复屠羊之肆

乞议不可割三镇劄子

臣契勘昨任太常少卿日於去年十二月二十八日上殿劄子论事内一项言金国遣使有所邀求其他可从唯求割河北之地虽尺寸不可许但当答以祖宗境土为人子孙当固守之且河北燕山接境有塘泊以为固今割以与之则险阻之地尽在彼疆何以立国当择使往以死争之其後金人犯阙遣使议和李昉郑望之等实任其事而金人所须欲以亲王宰相为质还归朝人割三镇地多索金银物帛之数臣与李邦彦廷争以为宰相当往而亲王不可往归朝官当与而三镇之地不可与金银物帛之数当量力与之不然後且有悔当时议论与羣臣不合因再拜丐罢蒙陛下厚恩抚慰再三俾专治兵方时艰难不敢力请至於誓书之类并不与闻然犹力留三镇之诏以待勤王之师俟其大集因欲以将帅之意檄军前以改誓书既而姚

平仲妄作小衄臣亦罢黜而三镇之诏遂行方今金人退师已远挟质以往必期於得地而後已如三镇果下则异时河北河东必不能守密迤畿甸宗社可忧万一三镇固守不下彼必挟亲王以行陛下手足之爱何以为怀由是观之当时计议奉使之臣得不深罪自金人渡河後数日方遣兵防屯不复尾击盖以亲王之故然而金人本约亲王至河而返今已爽约又沿路屠戮横屍满野则知议明约已不可守异时既得三镇别求衅端不旬日而至城下其患岂浅哉今虽遣姚古种师中渡河为三镇声援然相去金人二十余程缓不及事臣恐三镇人心动摇或不能守将来建置帅府与之对垒当於何郡控扼防托当以何兵蓄聚粮草当以何法遣将命帅当以何人此四者皆不可不预为之堤防臣昨已尝具劄子乞令遣计议之臣措画未蒙施行当今急务无大於此?下臣章令在廷之臣集议择其所长而行之天下不胜幸甚

梁谿集卷四十三

<集部,别集类,南宋建炎至德佑,梁谿集>

卷四十四

钦定四库全书

梁谿集卷四十四 宋 李纲 撰表劄奏议六

起居道君太上皇帝表

上道君太上皇帝劄子

具奏到陈留县接见道君太上皇后劄子进呈道君太上皇帝劄子

第二劄子

奏知朝见道君太上皇帝劄子

乞纳玉带劄子【御批答附後】

奏道君太上皇帝劄子

起居道君太上皇帝表

臣某言戎辂履险罔陪扈从之勤我师指期行致荡攘之效敢具陈其悃幅輒躬问於起居中谢伏念臣奋自单平骤膺獎擢属玃狁之入寇连叛将以俱来曾是微才猥当任责臣於正月四日自兵部侍郎蒙恩除尚书右丞奉圣旨差充亲征行营使既与闻於机政仍兼總於兵权窃慕谢安之靖氐羌欲追崔浩之破毛国练兵选将远扬出战之声登城守陴密为坚壁之说器械盛设楼櫓毕施金人於七日夜攻云泽门次攻通天安泰等门缚筏渡濠持弓张弩雨兵纷集难越高墉云梯以登悉皆摧裂遂敛衆以却退因遣使以请和主上重惜生灵深存国体已曲从於好约复更定於誓言捐帑藏之货财遣信使而历阵彼归待命兵戢有时然不备不虞昔贤之所戒受降受敌前史以为难臣谨张皇军容申饬守备提师深入知黠虏之无谋募兵鼎来喜王师之益衆士民生气宗社必安恭惟道君皇帝睿知如神高明合道下涣诏以恤民隐德已洽於衆心授圣子以固皇基意实通於穹昊臣伏承陛下储精渊默养志宴闲从容吴越之奥区观览江山之胜境俟四方之无侮表二圣之重欢誓竭弩軀少伸毫发鸣銮禹穴遥瞻方外之游问寝龙楼伫承天下之养

上道君太上皇帝劄子

臣闻南之与北相为盛衰非徒人为殆亦天数一昨金人缘药师叛既陷燕山寢窥河北城垒相望而无藩篱之固牧守相视而无封疆之臣老将持兵望风先溃大河解冻乘桴竞浮骏骑

长驱於中原劲兵直指於魏阙以正月初七日迫近都城刼掠士民焚荡庐舍以大火船铁骑攻水西门守卫之具办於仓卒臣奉皇帝旨率励将士誓以死守设械拒於汴流之中杀获数千人迨晓方息复以锐兵攻酸枣门一带骁勇之衆蜂屯蚁附渡壕临城梯长如云箭落如雨天地改色风沙昼昏人心震惊宗社危急臣奉皇帝旨将诸班直弓弩手救援躬冒矢石以摧其锋令敢死士焚云梯杀获首领一人攻破其党获级甚衆贼兵乘楫以强弩射之往往没溺障汴河水令归城壕水势涨溢自卯及午贼兵方退却知我城中有备始遣使人同李邲等计议臣等纠集将士欲以死战皇帝以宗社生灵之故务令持重始议通和使者旁午冠盖相望累日而後议成皇帝圣德格於旷古变鸱鸢为好音化虎狼为善类不爱金币务保要害之地遂遣康王张邦昌使军前悉如所请彼方退舍埃犒师之物以归然邀求数多殫竭帑藏空匮民力不足以给之敌情难窥尤当预防臣见修治守御之具训练出战之兵使彼蠲减所须之数果如期而退夫复何言万一有跋扈之凭陵欲危宗社臣等当陈师鞠旅以图进师神人共愤天必助之恭惟道君太上皇帝祗遘神考以文继武天下称其孝传位圣子法尧禅舜天下称其高翠华南幸臣拘以职守不敢负羈縻以从艰难之秋冒处政机誓将肃清畿甸奉迎銮舆矢心已明殒首何恨

具奏到陈留见道君太上皇帝劄子【靖康九年三月十六日得旨前去南京奉迎道君太上皇帝十七日行次陈留县遇道君太上皇后船登舟奏事以事节并所得语言具劄子奏知】

臣舟行离陈留县三十五里遇道君太上皇后船臣同黄经臣於岸上起居讫蒙传教旨劳问臣托内侍官李修等奏禀乞依赵野例至幄次前奏事奉教旨允臣即时登舟於帘前叙致讫拜具道陛下圣孝思慕之意及道君太上皇后平时保护之德蒙问朝廷欲使於何处居止臣对以见遵奉道君太上皇帝圣旨指挥建撝景园为寧德宫时暂居止他日须於龙德宫侧别建宫室方协典礼又蒙问时暂居禁中有何不可臣对以天下大义惟礼与情情欲其通而礼所以节文之以皇帝圣孝殿下圣慈母子之情岂复有间但有司议礼以为稽之三从之义道君太上皇帝居龙德宫未到阙间殿下欲以居禁中於礼未合恐非所以副天下之望蒙谕朝廷须是措置教是则得臣对以朝廷如此措置但欲协典礼顺人情以副天下之望两宫安则宗社天下安矣既退臣复召提举人船内侍官李修等三人委曲谕以前说及天下大义皆以为然又蒙太上皇后赐食赐茶及赐一行官吏钱五百贯文遣李修谕臣既居寧德宫後欲一到禁中瞻拜神御可否何如臣对以殿下既居寧德宫皇帝自当时往省问如欲暂到禁中有何不可既而解船臣步即前路奉辞讫依禀圣旨迤邐前去迎奉道君太上皇帝臣窃谓太上皇后已有许居寧德宫之意更望圣慈曲全孝道不须过有疑虑如不许使臣人从入皇城之类似不须如此乞与宰执问议使情无间阻别致生事为宗社生灵无疆之福臣不胜?祷之至

进呈道君太上皇帝劄子【靖康元年三月二十日到南京二十一日朝见道君太上皇帝赐对幄殿具劄子进呈】

臣伏念自为布衣诸生即荷陛下教养叨尘科第实被异恩荐历清华皆出来擢每思奋励少答殊恩去岁蒙恩召还适遭寇戎犯阙远迓震惊臣蒙今上皇帝委任於仓卒扰攘之际躬率将士以死扞贼所幸坚城可守援师渐集贼因悔祸而去此则上天垂佑宗庙社稷无疆之休

也顾臣绵力薄材沮于羣议不能荡馘丑虏以摅愤懣忝冒政府以惧以惭方今銮輿旋轸二圣重欢稽之古今诚为稀有臣之区区志愿粗毕已累具奏只候迎奉还阙乞身东归安养疲耗伏望道君太上皇帝圣慈怜念旧物曲赐保全使获退休里闾则终始仰荷天地大德非臣糜捐所能报称

第二劄子

臣伏以銮輿南幸未数日间贼遽犯阙闭守扞御者四十余日方围城之中今上皇帝瞻慕慈颜言辄涕下唯冀事定早获奉迎还宫今幸贼已远去中外寧谧翠华天旋将次畿甸宗室戚里父老民庶出宿跂望已逾旬日伏望圣慈早戒徒御言归都城上以副皇帝孝思欲养之心下以慰臣子夙夜祈向之意天下不胜幸甚奏知朝见道君太上皇帝劄子【靖康元年三月二十一日到南京朝见二十三日朝辞先以事节及所得圣语具劄子奏知】

臣舟行二十日晚至南京诣道君太上皇帝行宫得旨令来日见二十二日早赐对幄殿首问臣离阙日皇帝圣躬万福臣对以陛下圣孝思慕欲养之意数十言道君泪下称皇帝仁孝四海皆知凡数十言次问臣贼马到城下守御次第臣以实奏知道君宣谕此中一一具知臣进劄子二纸其一乞銮輿早还蒙道君宣谕本欲往亳州太清宫以道路阻水不果又欲居西洛以皇帝恳请之勤已降指挥更不戒行其一叙臣往蒙道君知遇及蒙陛下委任方艰难时得効犬马之力只候迎奉还宫二圣重欢臣得乞身之意蒙道君抚劳再四及称陛下书中褒獎之语面赐臣玉带一条并金鱼袋令臣即时系服又言行宫人皆喜公来且以此安慰其心臣拜谢讫退蒙遣使臣赐臣酒菓香药等是日欲诣天庆观鸿庆宫神霄宫烧香闻臣催促奉迎禁卫仪物等将到遂展一日仍有旨令臣扈从二十二日早道君令蔡攸郑详凡三次谕及称七宝輦皇帝未曾御礼数太过欲只乘簪子如何臣对以陛下出自圣意专以此奉迎道君愿乘御使南都士民耸观盛事是日臣同赵野宇文粹中蔡攸等扈从三处烧香观者如堵莫不感悦既归行宫召臣对便殿具道所以内禅之意并出亲书青词草令臣齎示宰执等及言前日措置未当数事臣逐一解释道君宣谕此等皆末事但勿为形迹使四海观看不好即得臣对以陛下圣孝欲极四海之奉以养道君皇帝仓卒扰攘之中朝廷有司措置施行或有未至愿以保全宗社大计为念细故不足深责陛下惟恐少有不当道君意者日夕忧虑至於全不进膳愿有以慰安之以副天下之望道君谕臣言寻常只为性快有些小事只欲说破便无事公尽见此中底里来早辞毕先归達此意慰安皇帝因袖中出书付臣仍谓臣曰公辅助皇帝扞贼守宗社有大功若能调和父子间使无疑阻当书名青史垂之万世臣感泣再拜受命又出小字书数事令臣奏知皆微末易从之事容臣到阙日面奏今具合奏知事如右

乞纳玉带劄子

臣比者奉迎蒙道君太上皇帝以陛下过有褒獎之语形於书问特赐臣玉带古简恩礼隆厚实非微臣所可克当但以上皇宣谕再三而臣之此行正欲调和两宫使无疑阻不敢不受昨日奏对已尝具劄子乞行缴进并赐银绢等不曾请受乞纳左藏库以助军费伏蒙圣恩不允所请臣虽已拜命退窃维念以无功而享厚赐实所难当伏望圣慈许依前劄所请特令缴纳

以安愚分取进止

御笔

所乞不允可便收边事方急来日留身面奏

奏道君太上皇帝劄子【道君行至拱州降赐御笔令奏稟欲留内侍冯彦等事具劄子奏知】

臣伏奉道君太上皇帝特赐御笔恭审銮舆已次拱辅即日季春极暄圣躬万福臣子之情不胜感拚但恩礼过当非所敢承岂任惶惧伏奉处分令具奏使臣冯彦等事臣今早入对已即时奏闻得旨专遣中使致书问圣意所欲留者当稟圣训然臣见以忧虞之余心力凋耗已入劄子乞罢知枢密事外任宫祠恐不获前路迎候无任瞻天仰圣激切屏营之至

梁谿集卷四十四

卷四十五

钦定四库全书

梁谿集卷四十五 宋 李纲 撰表劄奏议五

附御笔批荅

乞罢知枢密院事除外任宫观劄子

第二劄子 第三劄子

乞免赴祥曦殿从驾劄子

第四劄子 第五劄子

缴进第五次乞罢文字劄子

亲笔宣谕赴院供职 亲笔手诏

谢乞出不允降 亲笔手诏表

乞罢知枢密院事除外任宫观劄子【靖康元年三月道君太上皇帝将还京师上御延和殿议奉迎之礼耿南仲出劄子乞尽屏道君左右内侍等不许至奉迎行宫辄入者斩公谓不必如此但遵常法足矣语颇侵之及再对睿思殿南仲遂讦伏阙事乞付御史台根治公上劄乞罢】

臣闻见危致命臣子之常分陈力就列古人之格言方艰难之时固当徇国忘躯而至於揣分量才又有不能则止之义辄申愚恳上瀆天听伏念臣赋性蠢愚问学荒浅比由庶僚荷陛下异恩擢在政府自蒙委任夙夜究心外扞强敌内安衆志上赖宗庙社稷之灵陛下仁圣所格丑类退师京邑宁谧传檄而三镇坚守奏使而两宫协和区区之忠志愿粗毕而臣自事变以来夜以继日无时暂休智术殫於思虑意气索於忧虞内揆凉薄实难勉强况今朝登老成贤智并用正论得伸於庙堂德意下洽於海?自此天下豪杰忠智之士当茹连而进内修政事外复境土以副陛下尝但愿治之意顾如臣者材术既踈心虑愤耗深恐有误使令以速罪戾伏望圣慈许罢臣知枢密院事特除一在外宫观任便居住则仰荷陛下始终保全之恩捐躯报国期於异日干冒天威无任战汗之至取进止

御笔

今封还卿奏岂可如此朕委付之意至矣更勿少疑不得再请虽累百章亦当封还付李纲

第二劄子

臣适具奏以备经忧虞心虑愤耗乞罢知枢密院事除一在外宫观差遣伏蒙圣慈特降中使封回所奏章御批训谕令不得再请圣意隆厚感戴天恩非臣糜捐所能上报窃念臣奋自寒苦初无所长遭遇陛下龙飞之初适丁艰难国家多事蒙被獎擢得以见危致命少效臣节都邑底宁昆夷息喙斯皆陛下盛德所致如臣何力之有然而孤危之迹踈拙寡助力小任大夙夜忧恐自非陛下深察而保全之宁有今日常愿戎马既退三镇保全上皇銮舆还阙二圣重欢目覩盛事乞身归休安於田亩乃其素志适今早进对与大臣议论不合遂诋臣以士庶伏阙之事是臣结构至欲送御史台根治伏念臣备位枢筦横遭诬蔑有玷国体宁不痛心所以遽上封章实非获已虽蒙圣恩委曲宣谕终不自安伏冀哀怜使遂所请未填沟壑誓当捐躯以图仰报臣更不敢供职见般出启圣院安泊听候指挥取进止御笔

依已降旨不许般出启圣院依旧赴院供职第三劄子

臣伏蒙陛下以臣上第二劄子乞在外宫祠特降御批令臣依已降旨赴院供职仰荷圣恩弥深感戴臣闻难进易退者君子之风贪位慕禄者人臣之戒臣自庶僚荷陛下特达之知擢参大政遂长枢庭所以辄受而不敢固辞者盖以方时艰难义当自竭虽叨冒非据不自知其不可然於君子难进之义已不能无愧今日戎马既还国势粗定庶几易退以补前愆至於贪位慕禄则非臣之素志也况因廷对同列议论偶有不合遂遭诋诬包羞忍耻强颜取容不惟有玷国体亦将取轻於陛下其何以協赞帷幄之谋折冲万里故敢仰恃天恩乞身而退庶几去就之节尚无愧於古人伏望圣慈怜臣区区非敢沽激特从所请勿使颠隮荷恩无穷没齿难报见今已在启圣院听候指挥取进止

御笔

可赴院供职不得再有陈请今封还卿奏

乞免赴祥曦殿从驾劄子

臣伏蒙陛下特遣中使宣押赴祥曦殿起居从驾臣已具劄子乞在外宫祠及夜来伤风头目昏眩今来驾诣宁德宫所有随班起居从驾难以趲赴伏望圣慈特赐蠲免谨具奏知

御笔

体前後累降旨挥速出供职虽上百章亦当封还第四劄子

臣累具劄子乞一外任宫祠未蒙俞允今早御药梁方平等宣押赴祥曦殿起居从驾至宁德

官臣不敢不遵稟圣训然而臣於进退之义有不得已者方欲再具劄子上冒天听伏蒙圣慈特降御批促令供职仰荷厚恩非臣殒首所能报称臣闻匹夫不可夺志也臣区区之志本欲只俟边境稍宁国势安定上皇还宫即丐补外已尝具奏知非缘昨日与大臣议论不协之故因事辄发伏望睿慈察臣忱诚特从所乞虽在田里敢忘大恩臣不胜祈恳之至谨四具劄子奏知取进止

御笔

不允仍依累降旨挥勿更有请

第五劄子

臣已四具劄子乞在外宫祠伏蒙圣慈批答不允仍降旨挥诸处不得收接文字仰蒙知遇之意所当上稟圣训不复有所陈然事有不得不自明者敢冒斧钺之威仰祈天鉴臣前日延和殿奏对因与耿南仲辩论臣以谓天下之理明则诚诚则明自明与诚推之可以至尧舜闇则疑疑则闇自闇与疑推之其祸有不可胜言者南仲当以尧舜之道辅陛下而其人闇而多疑其言有不足深采臣当时止缘国事出语激切实无他肠不谓南仲衔臣当语及再对睿思殿忽言臣与姚平仲结连二月一日劫塞并言初五日士庶伏阙系陈公辅首先率众并有使臣数人在其中鼓唱作乱今公辅不可为司谏乞付御史台根治其意专以诋臣蒙陛下委曲宣谕南仲奏陈不已称若不付御史台则罢陈公辅不然则臣当乞去无可留之理臣契勘昨来西师既到臣与将帅实谋用兵尝於榻前议论八事谓如扼河津禁抄掠以困金人以将帅之意移檄军前复归三镇当时吴敏种师道等同对实闻其事至初一日姚平仲妄举臣未尝与知是夕止缘三奉御劄力疾出封丘门前去策应而外庭至今犹以为平仲之举臣实使之且平仲系受宣抚司节制虽种师道犹不与闻在臣行营司初无统摄安得而与纵使与闻止缘国事岂有它故而南仲举以为罪何也臣既罢之後般出浴室院谢绝宾客皇惧待罪间忽蒙陛下遣中使宣召始知有士庶伏阙之事方扰攘中蒙陛下委任抚谕弹压辞不获命至斩决数十人数日而後定臣之区区谅蒙圣察而南仲指陈公辅专以诋臣何也且陈公辅与臣初昧平生当日在与不在伏阙之中臣不得而知也若南仲果识公辅知其首谋当时诚以为非自合即时奏劾岂容今日乃始因事上陈兼公辅之为谏臣非臣荐引亦初不与南仲而南仲欲以为去就何也臣以谓今日朝廷方祸乱救宁之初正当以别白是非为先庙堂之上是非不明何况天下若以南仲之言为是朝廷自当付之有司根治党与诚果有之臣首当在诛夷之列若以南仲之言为非则当明告中外洞然晓知使臣不受黯闇之谤臣之於此岂得不辨必若朝廷重惜大体欲两全之莫如与臣一宫祠使归田里则仰荷陛下生成覆载之恩始终待遇之赐异时图报捐躯有日伏望圣慈特允所请取进止

御笔

不允所乞今封还卿奏勿复有请

缴进第五次乞罢文字劄子

臣前者累具劄子乞在外宫祠初二日蒙遣中使宣押赴福宁殿赐对臣尝面奏第五劄子伏蒙陛下再三宣谕还所上章仍命中使押赴枢密院供职臣不敢不遵稟圣训即曾具奏俟奉迎毕日当伸前请今上皇还宫既已累日圣孝所格中外鼓舞今早又获扈从问安龙德宫目覩盛事可谓幸会而臣以忧虞愤耗之余被巧诋难明之谤尚冀圣度保全得请骸骨伏望天慈许臣所乞所有前日进呈劄子谨再具缴进冒瀆天威无任惶惧待罪之至

御笔

依累降旨不允所乞

亲笔宣谕赴院供职

卿忠义之志朕所素知方国家多艰实赖共济更不得有请便赴院供职付李纲

亲笔手诏

卿累贡封章恳求去位自陈危恳甚骇予闻迺者寇在近郊士庶伏阙一朝仓猝衆数十万忠愤所激不谋同辞此岂人力也哉不悦者造言何所不可故卿不自安殊不知朕深谅卿之不预知也前日宰执台谏沮师败谋格塞公议已悉罢逐方今四海所愿以为辅佐多聚庙堂朕於任贤勿貳去邪勿疑自以为庶几焉卿其深体朕心亟安厥位以济国事付李纲

谢乞出不允降亲笔手诏表

臣纲知伏蒙圣慈以臣累具劄子乞外任宫祠特降亲笔手诏曲加抚谕令安厥位以济国事者冒贡忱辞方惧雷霆之震特颁温诏遽窥云汉之章既辨明其谤言又勉励以国事恩隆命薄感极涕零【中谢】伏念臣结约亡奇迂愚有素幸遭云龙之会获施犬马之劳受知既越於常伦得谤遂生於意外傥非上智曷谅微忠伏蒙皇帝陛下烛以天光形於奎画安危疑之孤踪洗黯闇之厚诬遂中山之功岂曰乐羊之力辨博陆之譖实由汉帝之明臣敢不仰体眷怀勉安职守修政事而恢境土方只奉於睿谟捐躯命以徇国家誓力酬於大造

梁谿集卷四十五

卷四十六

钦定四库全书

梁谿集卷四十六 宋 李纲 撰表劄奏议八

论守御劄子

进备边御敌八事

乞修塘泺劄子

乞修边备添置参谋编修官劄子

乞措置三镇劄子【御笔批答附】

辞免转太中大夫表

再乞罢知枢密院事守本官致仕劄子

第二劄子【御笔批答附】 第三劄子【御笔批答附】

三乞罢知枢密院事劄子【御笔批答附】

第二劄子【御笔批答附】

论守御劄子【敌骑出境乞用富弼守御一策分兵控扼要害之地具劄子进呈】

臣窃观自秦汉以来制御戎狄未有得上策者惟本朝与契丹为澶渊之盟守之以信结之以恩百有余年边境晏安兵革不用和好之笃古所未有然而所以制御之术曷尝一日弛备耶财用充足粮储有余士马精研将帅用命则彼虽欲窥边徼而封疆无隙可投欲不守盟何可得也臣伏见仁祖时富弼所上守御二策审地形观事机分兵控扼要害之地左右出入纵横应援曲尽其妙然以谓非三十万衆不可则知制胜之术在於足兵与王剪之伐荆必六十万而後行其理一也臣愚以谓今日防秋正宜用弼之说度时之宜良将劲卒外布边境重兵大帅雄扼诸镇使贼不敢有觊觎之心万一奔冲可以制其死命诚奇策也所有富弼守御策二篇谨具缴进伏望圣慈特赐省鉴采其说而用之取进止

备边御敌八事【三镇官吏军民为朝廷坚守公奏宜飭武备修边防条具八事以进】

一唐之藩镇所以拱卫京师故虽屡有变故卒赖其力而及其弊也有尾大不掉之患祖宗监之销藩镇之权罢世袭之制施於承平边备无事之世越在今日则手足不足以为扞头目为今之计莫若以太原真定中山河间建为藩镇择帅付之许之世袭收租赋以养将士习战阵相为唇齿以扞金人可无深入之患又沧州与营平相直隔黄河下流及小海其势易以侵犯宜分滨棣德博建横海军一道如诸镇之制则帝都有藩篱之固矣

一自熙丰以来籍河北保甲凡五十余万河东保甲凡二十余万比年以来不复閲习又经燕山云中之役调发科率逃亡流移散为盗贼今所存者犹及其半宜专遣使团结训练令各置器甲官为收掌用印给之蠲免租赋以偿其直武艺精者次第迁补或命之官以激励之彼既自保乡里亲戚坟墓必无逃逸又平时无养兵之费有事无调发之劳此最策之得者

一自祖宗以来养马於监择陕西河东河北美水草高凉之地处之凡三十六所比年废罢殆尽而更为给地牧马民间杂养以充数官吏便文以塞责而马无复有善者又驱之燕山悉为敌人所得今诸军阙马者大半宜复祖宗监牧之制权时之宜括天下马量给其直则不旬月间数万之马可具也

一河北塘泺东距海西抵广信安肃深不可涉浅不可以行舟所以限隔胡骑为险固之地而比年以来淤淀乾涸不复开浚官司利於稻田往往泄去积水堤防弛坏又自安肃广信以抵西山地形低下处可益增广其高仰处即开乾壕及?马坑之类宜专遣使以督治之

一河北河东州县城池类多隳圯堙塞宜徧行修治而近京四辅郡诸畿邑皆当筑城创置楼橹之属使官吏兵民有所恃而安万一有贼骑深入虏掠无所得可以坐困

一河北河东州县经贼马残破蹂践去处宜优免租赋以赈恤之往年方腊扰浙东犹免三年今三镇之民为朝廷固守安可不议所以大慰其心者

一河北河东诸州最以储峙采买粮草为急务宜复祖宗加擡粮草钞法一切以见缗走商贾而实塞下使沿边诸郡积蓄丰衍则寇不敢动矣

一陕西解盐无煮海之劳而给边费足民食其利不赀自行东南盐法而解盐地分益陕西边益贫愿复祖宗旧制以慰关陕兵民之心

乞修塘泺劄子【敌骑既退乞同李邕措置塘泺城堡水柜等事具劄子进呈】

臣伏覩种师道詹度等奏金人入马已出塞垣朔方保全宗社大庆然彼但以河间中山两路州军坚守之故且惧王师之袭不得不遁其意岂尝一日忘割地之约耶深虑秋冬之交弓劲马肥复犯边徼扞御之策所当预修契勘安肃广信平等军东有塘泺西抵太行中间坦涂不过三百余里塘泺既可增广其他地势虽颇高仰亦因高就下限以长堤潴蓄水柜以为阻固如水柜不及之处自宜修筑城堡屯兵控扼或设堑堦以虞奔冲兹事体大非藉能臣未易办

集窃见枢密副都承旨李邈累任河北边郡风绩素着深究边防利害欲乞特建一司以邈充使专切措置塘泺城堡水柜等仍乞朝廷多方应副庶几克成大功以为永远之利

乞修边备添置参谋编修官劄子

臣窃惟军政之不修二十余年於此矣将骄卒惰赏罚无章每战辄北兵既寡弱民又凋弊敌人由此敢肆凭陵中国之不振未有胜於此时者也今贼虽退师尚未出塞所至剽掠无复顾惮盖由初未尝有所惩创时方向暑须暂远去秋凉马健何惮而不来此其可虑又非前日可比谓宜及今速为之备一曰选将二曰募兵三曰训练四曰保甲五曰马政六曰缮器甲七曰峙粮草八曰修城壁九曰增塘泺十曰置堡寨凡此皆军政之大者当今之急务也而其财用调度之费不与焉前此贼未退师支梧目前固有未暇今度其势出塞决在旬日而此去防秋近在三数月间要当自兹讲求施行不可复缓又况西戎跳梁五路并入四夷交侵诚可深虑臣以书生备位枢筦方艰难乏使之时乞避贤路不蒙赐许夙夜思之国之大事无过於此诚非一介孤陋所能独任要当合衆志協衆力上稽祖宗之旧下考当今之宜庶几有济欲望圣慈许臣辟置参谋官四员於职事官中不拘官资高下兼充仍添置编修官二员同共措画条具以时推行如蒙允许容臣续具姓名以闻御笔

依奏参谋编修添置四员

乞措置三镇劄子

臣朴野无所取材自蒙陛下委任力守三镇不可割之议区区赤心始终一节不顾谤尤者诚谓祖宗土地虽尺寸难以与人傥必割之无以立国冒瀆圣聪者熟矣臣累次面奉圣训候金人过河别行遣使计议三镇之地今来计程已是渡河之日所有三镇合行计议乞降御前文字付臣因控扼河津兵行选使同共前去取进止

御笔

三省密院同共详议莫更卑辞遣使求之见亲王随行不可轻易系国安危

辞免转太中大夫表

臣某言近具劄子辞免覃恩转官伏蒙圣慈降诏不允者出震膺图咸庆风云之会乘龙施泽敢怀雨露之私洵贡忱辞冀回渊聽窃以历数盖归於天命讴歌允協於民心大宝既临羣工受祉如臣者以身许国初何意於陞迁叨位本兵顾已踰於涯分更容贪冒徒速颠隮伏望皇帝陛下俯徇至公曲从素愿惜名器之重爵尊朝廷行贵近之先化成海?俾能无愧实预有荣所有告命未敢只受

再乞罢知枢密院守本官致仕劄子【靖康元年五月守御使司补进武副尉二人以齎御前

蜡书间道至太原赏之补乞奏知上批有大臣专权浸不可长之语上劄子乞罢】

臣前日伏覩宸翰守御使司转资奏行批知大臣专权浸不可长圣恩隆厚未赐诛殛伏读以还不胜皇惧臣伏念昨者金人乘虚直犯城阙臣以菲材猥当任重伏蒙圣恩许以便宜从事有功则赏有罪则诛乞以上闻盖稟睿旨旬月以来国势粗定屡曾面奏乞罢守御使司未奉俞允而边陲之间贼马屯泊间道通信欲及机会非假赏典不能使人故如奏行转资之事往往尚仍前日此乃以守御使司未罢之故非臣敢创为此也兼臣契勘置司之日蒙陛下颁降空名官告绫纸凡三千道若以委任之专凡此所降告身皆可尽用而置司以来前後书填只用三十一道而已自非灼然委有绩效之人不敢妄与今宸翰以为专权窃恐圣意有所未亮也臣闻衆嘘漂山聚蚊成雷臣之孤忠困於无助爰自遭遇未逾岁月而几於危殆者屡矣仰赖圣明洞照愚悃故敢尚此龟勉以图报效而浸润日闻圣听已惑臣之微躯宁复自保夫专权者臣子之大戒而人主之所甚恶也臣虽至愚何敢当此重念臣竭忠报国非敢爱身然窃以谓任则当勿疑疑则当勿任唯疑与任不可并行今陛下既已疑之矣岂可复处臣以枢机之任况臣自比日以来忧悸成疾心力耗尽动辄遗忘深恐有误国事伏望圣慈许臣守本官致仕得避贤路乞此骸骨归安田庐伏惟陛下天地父母哀而怜之始终保全勿使颠沛则臣感戴天恩期於结草臣无任

御笔

前日所批止系要依祖宗故事无纖芥之疑卿但安职所乞不允仍不得再有章奏

第二劄子

臣伏蒙圣慈特降中使宣押臣赴枢密院供职及家属归府第仰荷天恩第深感戴窃念臣偶以冗材滥膺重任初乏涓埃之补自貽专辄之愆大度兼容未加谴责何施面目复冒宠荣伏望陛下终始哀怜曲垂保庇特依所乞许臣守本官致仕使与田夫野老共祝尧年非徒危疑之迹可以少安亦使进退之间不累国体臣已见出门外聽候指挥所有不候奏知出门之罪伏重赐黜责施行

御笔

所乞不允已差御药宣押可赴院供职

第三劄子

臣伏蒙圣慈以臣上第二劄子乞守本官致仕特降御批令臣赴院供职不得更有辞免仰荷德恩弥增感惧臣窃以枢筦之任号为本兵况当艰难之秋可见委寄之重自非信臣曷可冒处而臣稟性蠢愚滥被眷獎无涓埃之小补有谗谤之并兴至烦宸章宣示三省怨怒传播喧於外廷臣独何顏复居密宥之地伏望陛下哀而怜之特赐保全使得乞身而去不胜幸甚此

志已决仰冀听从臣无任祈恳之至

御笔

不可自疑有骇衆听已令宣押当体朕怀

三乞罢知枢密院事劄子

臣猥以凡材误蒙异恩擢用枢筦筹画无取料敌不明致令种师中姚古之师为金人溃败太原围急未知所以解救之方又臣尝遣张师正统领胜捷人兵前去策应不谓师中即以师正充选锋贼马邀截先次奔北既乏知人之明又无扞患之略岂可贪冒宠荣尚居宥密之地以塞贤路祖宗旧制边事失律必罢枢臣伏望圣慈重赐黜责以允公议臣不胜皇惧待罪之至

御笔

早来已与卿面论不须如此令封还所奏勿复再请

第二劄子

臣伏蒙圣慈以臣上章缘种师中军行失利乞赐罢黜特降御批开谕不允仰戴天恩第深感惧窃以枢筦本兵之地专任边事与他宰执责任不同败师蹶将咎将谁执况有祖宗之成宪所当遵依伏望矜怜特赐斥免以副公议兼臣才术空疎志气凋落诚不足以上副委寄不胜皇恐待罪激切之至

御笔

依已降指挥不允仍止来奏

梁谿集卷四十六

卷四十七

钦定四库全书

梁谿集卷四十七 宋 李纲 撰表劄奏议九

附御笔批荅

辞免河北河东路宣抚使劄子

第二劄子 亲笔宣谕请行

第三劄子 第四劄子

第五劄子 第六劄子

第七劄子 第八劄子

亲笔宣谕节赐裴度传

谢赐裴度传劄子 第二劄子

乞罢宣抚使待罪劄子

第二劄子 第三劄子

第四劄子 第五劄子

亲笔宣谕三首

辞免河北河东路宣抚使劄子 【靖康元年五月种师道以疾乞罢宣抚使有旨以公代师道宣抚使河北河东上劄辞免】

臣伏蒙圣慈特降宸翰河北河东国家根本之地委令宣抚臣以孤生误蒙天恩自庶僚中擢任枢筦以死报国此志已定况当危难之秋主辱臣死乃分之宜但今日此举系国安危种师道中以宿将统重兵以援太原不旋踵而溃散臣独何人敢任此责又种师道威望素隆见为宣抚若罢师道而授臣恐外议不以为当区区微躯诚不足惜惧误国事傥陛下必欲使之亦何敢辞调兵选将应副钱粮须旬月始办太原围久王师既岌深可寒心臣虑此数日间已难守矣适见布衣高世兼奏状谨缴进更容来早稟受圣训谨具奏知

御笔

如师道不罢亦不妨事便可治行

此任无易卿者为朕建功切在审而後行不可轻接战

第二劄子

臣伏奉御批以臣辞免宣抚使除命特加训谕此任无以易卿者窃念臣自遭遇以来惟知竭忠尽力以图报效而横罹谤议皆出意外累尝乞身未蒙俞允且使待罪枢筦仰承睿算尚可黽勉若令宣抚两路将兵於外岂臣孤危乃敢出此伏望赐照察余俟面奏

御笔

朕志已定须当卿去不允所乞

亲笔宣谕请行

卿素忠义何故不欲去适览章奏太原府出人五百斫贼数十级以此见之尚可为卿何不奋然请行以成功名可体兹意

第三劄子

臣伏奉宸翰令具有名望武臣契勘方今有名望武臣无如种师道者虽老其智谋犹足用旦夕入覲以优礼待之必肯为陛下用以李弥大副之朝廷已为得人所有臣今来除命伏望圣慈特赐寝罢

御笔

不允所乞国方多难不可辞

第四劄子

臣适方具劄子辞免恩命复蒙圣慈特降亲笔手诏令与师道同行勿复有辞者臣之区区已具此奏伏望睿察追寝成命无任祈恳之至

御笔

不允所奏

第五劄子

臣伏奉圣慈以臣累具劄子乞免宣抚使除命复降御批朕志已定须当卿去不允所乞国方多难不可辞者窃念臣爰自变故以来奋不顾身以徇国家未尝辄敢辞难盖荷陛下知遇得以少效孤忠今日师中挫衄内外惴恐此诚多难之时捐躯报国实臣素志岂复当辞但陈力就列不能者止臣内揆絀薄实难勉强而况遭罹谗谤动辄得咎积忧成疾心力殫耗岂敢以孤危之踪乃辄当统帅之任伏望特加睿察寝罢此除更俟来日面奏

御笔

成命已行必无改易卿当为国立功不得辞免

第六劄子

臣伏蒙圣慈特降亲笔除臣宣抚两路应大小事一委便宜施行不从中制但责成功亦不求速者仰荷委寄之重敢不奉承睿旨然臣适见河间帅臣奏报贼马侵犯雄州安肃军一带乞差兵三五万人前来防把又见姚古奏报陈迪郝怀下把南北关人兵并皆溃散乞添差兵把截事势已急与其令臣作宣抚使统兵二万前往滑州所费不貲曷若各分万人犄设讵往河北沿边及河东把截以济一时之急所有河北制置使只就委刘韜於事为使其种师道乞加优礼或留京师或归屯所乞自圣裁臣非为身谋但欲措置常理以济国事伏望聪察谨具奏知

御笔

卿宣抚两路此等事可一面施行刘韜事令三省降旨师道已留京师

第七劄子

臣伏蒙圣慈以臣辞免宣抚使新命并乞罢枢密院职事守本官致仕符降中使封回劄子赐御批不允臣仰荷天恩第深感涕实以宣抚枢密之职於今尤为重任而臣材术浅薄中遭谗谤难以冒居非为身谋盖恐误国伏望察臣忱诚特从所请遴择信臣付以重任天下幸甚臣见以眼疾在假俟稍痊安当求对次干冒天威无任战汗之至

御笔

卿昨日已受命岂得再辞河北河东实系宗社卿宥密信臣朕所委寄便当来日受勅此志决定卿切体之

第八劄子

臣昨晚对睿思殿窃见陛下缘边事焦劳至於感恻臣子之情不遑宁处是以未敢固辞令来除命退伏惟念任重力薄恐辜委寄诚难勉强臣本书生素不知兵昨於艰难之初蒙陛下任使辄当兵事盖缘围城之中事出仓卒无缘号召天下贤才故徒以区区之忠遂应误选贼骑既退又蒙擢置枢筦求去不遂既已负非才之责矣然因天下献言而用其智谋上禀睿训旁资同列议论得暂承乏於此今者忽蒙擢为大帅使之出将於外非所克堪中夜惊惕此必有建议不容臣於朝者况自顷以来横罹谤议或以为狂率或指为奸佞其甚者至以为收人心而又上烦宸翰有威福专权之语今咫尺天威日在左右得谤尚如此而况使将重兵远去阙廷乎臣区区一身诚不足惜深恐上误国事虽陛下复欲保全势不可得伏望圣慈更赐详察特与寝罢成命仍许臣解枢密院职事守本官致仕退归田庐无任皇惧待罪之至

御笔

朕面谕已至诚意切当体国受命必无回命之理亲笔宣谕节赐裴度传

节出裴度传一段令直笔录赐卿忠义徇国何愧前人竚观成效以宽朕忧

谢赐裴度传劄子【上令直笔录裴度传降赐具劄子称谢且录裴度论元稹魏洪简章疏上进】

臣伏蒙圣慈除臣河北河东路宣抚使累具劄子辞免未蒙俞允又被宸翰过有褒语并赐臣裴度传仰荷委任之重顾臣何人可以当此窃以祖宗积累垂二百年河北河东最为根本之地金人乘虚两路并入自河北入者既已侵犯都畿厚载而归矣而近者雄州奏报不待凉秋已复犯塞自河东入者破忻代以围太原行将半年未有解围之意宿将重兵数路应援悉皆溃散校之吴元济区区以蔡州数城之地为唐室患固不相侔而环蔡诸节度之兵与今日士马其强弱又不可同日而语而臣徒抱孤忠才术疎短曾不足以望裴度万分之一陛下以艰难乏才之故误有使令以度况臣实谓非伦非特未允公议且恐有误国事伏望睿明於在廷之臣精加选择付之重寄庶几成功仰副陛下北顾焦劳之意天下幸甚

御笔

已除卿宣抚使当受命

第二劄子

臣窃见诸葛亮出师表其言明於治体以谓亲贤臣远小人此先汉所以兴隆也亲小人远贤臣此後汉所以倾颓也夫君子小人於用兵之际似不相及而亮深以为言者诚以寇攘外患有可以扫除之理而小人在朝蠹害本根浸长难去其患有不可胜言者是以吉甫赞周王以北伐必有孝友之张仲裴度相唐宗以东讨必去奸邪之元稹用能成功焜耀图史君子小人之不两立从古已然臣窃观陛下嗣位之初适遭金人入寇宵旰忧勤励精图治思刷前耻虽

古帝王勤俭之极无以远过然君子小人尚犹混淆於朝翕訖成风殊未退听谓宜留神照察在於攘逐戎狄之先朝廷既正君子道长则所以扞御外患者有不难也今取裴度论元稹魏洪简章疏节其要语辄尘天听不胜战汗之至

御笔

览卿所奏铭记於怀但为国了事与卿共太平之乐乞罢宣抚使待罪劄子【既受宣抚使命以军马未办量展行日御批迁延不去岂非拒命上劄子待罪及缴纳告敕】

臣伏奉宸翰谓臣受命月余迁延不去岂非拒命者伏读震栗不知所措契勘臣於前月二十三日受敕至今才二十日当时蒙御批用太史局择定今月二十二日启行臣以庶事未办尝具回奏乞展三日此乃恐事有未备上累国体非敢迁延今蒙圣训以为拒命臣无任惶惧待罪之至伏望圣慈特赐宥责

御笔

封还卿奏不须如此依定日二十五日内起发

第二劄子

臣尝具劄子以奉御批谓臣迁延不行岂非拒命伏读殒涕惶惧待罪乞赐宥责未奉指挥伏念臣本以书生遭遇盛际常愿奋身效命以报圣知自受宣抚任职以来夙夜忧惕惧不克任辟置官吏选用将佐团结队伍关请器甲措置钱粮雇买车马种种军需率皆创建非若童贯谭稹诸事熟成上下应副咄嗟可办而陛下督责之峻犹未及元选定出师之日便谓臣迁延拒命不行窃恐圣虑有所未亮也臣前备员守御使司激赏探报使臣已蒙宸翰谓其专权今承乏宣抚使司治行量展日限又蒙御批谓其拒命专权拒命者臣子之大恶有一於此罪不容诛陛下方临遣大帅震扬国威扞强敌解重围而以专权拒命之人充其选无乃不可乎臣闻军旅之事非任之专信之笃者不可以成功臣日在陛下左右咫尺陛下犹且圣训如此况行师於千里之外谤黷交兴上惑睿听陛下果能谅其区区之忠乎与其进无所成有误国事不若知难而退甘受窜诛伏望圣慈罢臣知枢密院事河北河东路宣抚使重赐黜责以正典刑选命信臣委以重任臣见居家待罪无任祈天俟命惶惧战越之至

御笔

岂须如此止欲卿速行今封还卿奏

第三劄子

臣伏蒙圣慈以臣累具劄子待罪乞罢知枢密院事并宣抚使职事特降亲笔封还所上章感

戴恩德弥深震恐窃念臣智识浅短学术迂疎独於义命之际素知自信曩者迁谪七年退伏田里不知贫贱之可羞竭来中都适遭陛下龙飞特被眷獎致身枢辅不知富贵之可乐徒以上荷天恩未能报称故虽屡求去位终亦未果今孤危之迹讒毁交兴罪状日闻致烦宸翰屡有训勅今复有拒命之语退自循省莫知所以良自伤悼夫欲效区区之忠者臣之志也至於成功则有非人之所能为者岂可必哉宣抚两路人臣重任事有至难自非陛下不致毫髮之疑於胸中安能有济臣窃观圣听不能无惑於羣言日侍清光尚难自处而况可使之统重兵於千里之外哉此臣所以日夜忧惧而不得不辞也伏望圣慈怜臣於艰难之秋尝效犬马之力特赐保全解其职任使遂退休则图报大恩当期异日所有臣昨蒙除尚书右丞知枢密院事宣抚使等告勅谨具缴进乞此骸骨归於山林臣无任干冒天威惶惧战越俟死之至

御笔

何故如此方朕委付两边事俟卿前去措置所有告敕封还不得更有陈请并无毫髮之疑止要促卿速行

第四劄子

臣伏蒙圣慈以臣待罪乞罢知枢密院事河北河东路宣抚使重赐黜责特赐御批封还劄子仰荷天恩尤增感惧重念臣小才无取罪状已多与其他日受误国之诛不若自归於司寇伏望睿断特正典刑所有宣抚使职事乞早差官交割管构臣无任惶惧战灼之至御笔

封还所奏

第五劄子

臣契勘宣抚司已渐就绪钱物之类并未曾支动伏望圣慈选差宰执代臣使事窃见徐处仁唐恪朝之老成累任帅臣谙练兵事可以充使如陛下不欲遣之於外但以使事委之且留京师令统制官等分领将卒前去刘韜解潜处使唤以宣抚司钱物应副自足办事更乞圣裁臣未敢搬出见在府第待罪听候指挥

亲笔宣谕三首

宣谕累百章不允辞免

卿所请虽累百章不允可疾速办行起发

宣谕疾速办行

朕无纖芥所怀止欲激卿速行不须如此决不允从疾速办行夜来所批督卿速行今推托如

此何望焉

宣谕陈奏请行

河东兵民日望宣抚到彼朕批语激卿欲行【所有元批旨封】实不期卿误听累乞退闲朕昨日进退疑惑甚难出手欲全君臣之义垂之万世今日见卿陈奏慨然请行释去疑念足见忠义之诚久而益坚朕甚嘉之

梁谿集卷四十七

<集部,别集类,南宋建炎至德佑,梁谿集>

卷四十八

钦定四库全书

梁谿集卷四十八 宋 李纲 撰表劄奏议十

亲笔宣谕不须与三省议

论宣抚职事劄子

第二劄子

第三劄子 第四劄子

亲笔宣谕三省 谢赐御筵表

谢降赐玉束带等表 谢赐鞍马表

谢琼林苑赐御筵表 亲笔宣谕途中将护亲笔手诏

谢宣抚河北河东降亲笔手诏表

乞深考祖宗之法劄子

亲笔宣谕览所上章陈祖宗之法

论不可遣罢防秋人兵劄子

第二劄子

亲笔宣谕不须与三省议

路允迪等恤其家甚善益见徇国勤劳之意卿行不须与三省议此事已决何必如此凡事断而可成再三反复愈乱人意卿可一心措置备办成功之後与卿共享太平之乐

论宣抚职事劄子【累具辞免不获将以六月二十五日出师上劄】

臣伏蒙睿训卿行不须与三省议此事已决再三反复愈乱人意者仰荷委寄之重第深感涕臣既已拜命受兵促装整驾岂复有可回之理见危致命臣子常分亦无足道但国家之事中

外一体同心一德乃克有济今陛下遣臣独出圣断臣不量才而受任二三大臣不以为然使他日果能支梧则已稍有疎虞仰累陛下知人之明此臣所以夙夜震惧而不自安也更望圣慈博尽大臣之谋使臣既行之後无沮难无谤讒无钱粮不足之患则进而死敌以报天恩实臣区区素愿死且不朽冒昧自列无任战汗之至

第二劄子

臣伏蒙宸翰卿出师今论已定者仰荷委任之重第深感惧然兹事体大系国安危非臣一人所可独任其责宰执间议论尚有不同者徒迫天威罢师道而遣臣观昨日之所评议与今日之所施行其意可见伏望圣慈更尽大臣之谋使人无异辞同任成败他日或少有差跌不独臣受误国之诛岂胜幸甚至於以身徇国进而死敌则臣之素志也夫复何说以辞

第三劄子

臣契勘童贯以枢臣为宣抚使踰二十年所握者皆关陕之精兵西讨夏贼南殄方寇北攻燕云丧失师徒无虑数十万遂使国家兵势削弱以至今日有敌国凭陵之祸然贯一将蒙上皇信任之专武臣将帅皆出其门内帑供给不可胜计置平货场等以斡万货之低昂丰财足以养士厚赂足以弭敌故虽行师用军无有纪律久而後败今臣受任於国家艰危之秋姚种二帅军马溃散之後哀疲劣久不训练之兵以抗强敌率乌合素不拊循之将士以邀成功甚矣其责重而且难也惟有一策不爱金币以养士而作其气庶几可为而今之宣抚使司悉仰给於朝廷府库空虚无以给予前日乞一百万才实得二十万已有难办之论不知何以使臣率励将士支梧两路而宽陛下北顾之忧也陛下谓臣忠义感激奋不顾身则可谓臣谙练兵事果能成功则不可夫以兵弱财匱之时而欲徇国家之急以扞屡胜骄暴之敌虽三尺之童亦知其难更望陛下与二三大臣深计而熟虑之异时无谓臣轻率敢往而不顾国家之大计也议者又谓臣建守三镇之策今日之事臣当任其责是大不然三镇者祖宗陛下之三镇果能守则当与天下共守之如必使建议者任其责则後谁敢为陛下纳忠者更望圣慈与宰执商议审处令各为奏明言遣臣之利害是非如何激励士卒如何应副钱粮屯泊当於何处战守当用何策断自睿意使臣得遵禀而行不致误事非独臣之幸也实天下之幸也

第四劄子

臣昨自陛下龙飞临御海?臣以非材特蒙獎擢自庶僚不旬日而参大政遂获待罪枢府深惟遭遇之异窃自感励思欲罄竭以图报效而材疎智短终未能少收尺寸之功内负慙惕夙夜靡遑兹者伏蒙陛下委以河北河东两路重寄臣自视阙然恐不足以仰承委付之意至於不避烦黷力祈罢免而眷属之厚不容退避见危致命岂敢固辞深惟国事之大非小己私智所能独办今其将行愿受睿算与庙堂之成谋使臣得以遵禀奉行庶几有济夫用兵之道虽临机制变不可预计然规摹大略当须先定今日之事莫大於防秋莫急於解太原之围士大夫之献说者不过和与战二策而已金人留吾亲王宰相以为质屯重兵於太原已半年矣使者旁午冠盖相望而欲得三镇之意愈坚和果可恃乎种师中姚古以十万之师相继溃散战果

可必胜乎和不可恃则秋高马肥贼骑侵软议者必以臣今日出师为致寇之端战不可必胜则万一将士或复有小衄必又以臣为轻举误国不知陛下睿算与夫庙堂之谋所以授臣使防秋而解太原之围者当决以何策而可也前日和议割三镇之失至今为梗今日之谋倘或更有差误则天下之势有不可胜虑者矣愿陛下及臣之在廷与五六大臣熟议决策特降亲笔俾臣遵行臣非敢爱死诚恐有误国家大计故敢冒昧言之仰黷天威伏深战栗

亲笔宣谕三首

宣谕不责速进

应河北河东并便宜施行不可深进或少衄亦不罪捷到亦不为喜但坚固期於全三镇是朕之意卿宜体此不责速进但款曲图之庶保万全

宣谕一切便宜行事

朕信任卿坚如金石应一行事朝廷岂能预先定得卿可一切便宜施行

宣谕所到如亲行

李纲所到如朕亲行

谢赐御筵表

臣某言伏蒙圣慈以臣差充河北河东路宣抚使启行有日特赐臣御筵者授钺将坛谬总六师之寄肆筵宸禁猥烦八簋之陈诏语春温威顔天迺【中谢】伏念臣奋身寒苦逢世亨嘉禄仰斗升粗识素餐之耻腹谖藜藿初无肉食之谋自筦枢机空糜廩庾适犬戎之犯顺骑遶并门驱虎士以遄征军连代北悯其行役锡以宴娱仍诏佩橐之臣以示加笏之宠钉繁列宿粲鏐带之内盼光夺流霞灩玉舟而亲劝驩腾剖曲荣絶典彝此盖伏遇皇帝陛下俎豆豪英帡幪辅弼大亨以养躬节俭以旁招小雅之诗政修攘而不废已侈百朋之锡诂言三爵之过臣敢不仰怀推食之仁力刷饮河之耻取羊豕执俘而献期熊罴饮至以策勲守祖宗之故疆誓不轻於赤壤上君王之万壽行入贺於紫宸

谢降赐玉束带等表

臣某言伏蒙圣慈以臣差充河北河东路宣抚使启行有日特降中使赐臣玉束带一条捻金线小花紫战袍一领金笏头带一条鱼袋全牙筒一面绿袋金银五百两绢五百匹细物一百匹拣芽小龙茶三千銖椽烛五十条刀劒六口人马甲一副金镀银□ 枪一条花角弓一张箭三十只乌银犀皮鞘劒一口者总戎两部曾未鬯於国威申锡百朋已繆承於天宠辕门改观帅幄生辉荷优眷之有加揣虚庸而失措【中谢】窃以先王盟府之法赏必示功大臣服

與之宜德惟稱物凡此焜煌之數當酬瑰偉之勲慨念臣愚早逢主聖蔑着銖分之效敢懷錫予之貪屬小丑之未平曾大邦之敢拒猥膺推轂獲與登壇才乏西平帑仍豐於異錦德非裴度帶有過於通犀衣以珍袍副之古簡琯戈寶劒俾執銳以輸忠夙夜旰食期通宵而盡瘁丁寧示眷伋俸銜恩此蓋伏遇皇帝陛下躬上聖之資濟中興之業力排羣議獨奮睿謀脫三鎮於虎狼拯兆民於塗炭天聲震疊國勢救寧察臣早與於邊機故此俾宣於廟算憫其行役被以寵靈臣敢不肅整勝兵大摧驕寇期無南下之牧仰寬北顧之忱

謝賜鞍馬表

臣某言伏蒙聖恩特降中使賜臣馬二疋金鍍銀開裝紫綉鞍轡一副烏銀裝蕃鞍一副者使命來臨天威在望申遣左璫之重載頒內廐之良佩服恩榮祇深慚懼【中謝】恭惟皇帝陛下端一心而觀萬化操八柄以馭羣臣念其驅馳之勞錫以便蕃之寵壯元戎之十乘解左服之兩驂偉然神駿之姿被以連錢之飾臣敢不仰承睿眷俯罄愚忠誓不與賊以偕存顧雖捐軀而何惜余齡尚壯雖無據鞍矍鑠之姿將命不愆或遂攬轡澄清之志

謝琮林苑賜御筵表

臣某言伏蒙聖恩以臣今月二十五日總師出門特差翰林學士吳玘就琮林苑押賜御筵者寵靈下逮已沾零露之恩宴衍俯臨再被需云之渥載惟僥冒第劇戰兢【中謝】伏念臣社稷散材康瓠小器力學粗知於忠義逢時竊意於功名適丁艱難猥叨任使超居丞轄曾罔着於休功繼掌樞衡迄蔑聞於善狀自惟迂拙每丐退藏未容乞身而歸更與登壇之選雖忠誠之備寫終天意之莫回禮遇彌加褒榮浸侈初賜宴於中禁復申犒於上林天廚具絡繹之珍樂府備鏗鏘之奏雍容和氣感激懦衷下及羣僚亦與榮觀顧寵嘉之莫擬撫羈賤以何堪此蓋伏遇皇帝陛下以道觀能使臣以禮推食慕漢高之烈脫袍有藝祖之風致此鰥生亦膺異數臣敢不力修軍政大振國威獻北闕之俘愿希踪於前世却南牧之騎期無媿於古人

親筆宣諭途中將護

數日不見卿良深引望途中勞神不易太原重事委任於卿更宜將慎用副朕懷

親筆手詔

敕李綱卿以鴻樞之柄總元帥之權方庚伏之屆時眷匱薄之勤止載惟忠荃深所嘆嘉顧邊警之未寧繫壯猷之是賴以卿舉措為國安危欲見威而銷萌宜持重以制勝往思愍慎務決萬全卿其勉圖朕所傾竚夏熱卿比平安好遣書指不多及

謝宣撫河北河東降親筆手詔表

臣某言今月二十八日伏蒙親筆手詔一道以臣宣撫河北河東兩路特賜撫諭者跪辭丹陛

方违咫尺之威捧诵紫泥遽奉丁宁之训洪惟德意仰见天心【中谢】伏念臣学浅而术迂德轻而援寡骤蒙睿獎超执事机方强敌蕃锐於晋疆而宴寇拏兵於朔部长蛇封豕肆毒吾民锋蝟斧螳扞我天讨属圣神之在念宜俊彦之旁求猥及非才俾专大计实安危之所系顾举措之敢轻负责良深抚躬知畏伏惟皇帝陛下廓至明而在位揽长轡以驭臣任用者必责其有成训迪者必规其所弊虑臣轻於料敌故申持重之言以臣勇於赴功故有愆慎之诚乃彤一札以取万全臣敢不上体渊衷仰循圣诏遵仁圣之秘略参以并行体魏武之新书动以从事乞深考祖宗之法劄子【靖康元年七月初总师道出巩洛望拜陵寝上劄子乞深考祖宗之法进君子退小人】

臣总师道出巩洛望拜陵寝潜然涕流恭惟祖宗创业守成垂二百年圣圣传受以至陛下适丁艰难之秋戎狄内侵中国势弱此诚陛下尝胆思报励精求治之日伏望圣慈深考祖宗之法一一推行之进君子退小人无以利口善谗言为足使益固邦本以图中兴上以慰安九庙之灵下以为亿兆苍生之所依赖天下不胜幸甚臣忘生触死冒进狂言不胜战越待罪之至

亲笔宣谕览所上章陈祖宗之法

览所上章陈深考祖宗之等事足见忠义爱君之心当一一铭记於怀

论不可遣罢防秋人兵劄子【靖康元年四月公在密院乃与许翰条具调发防秋之兵至七月公已出宣抚朝廷降旨诏书所起之兵罢去大半公上疏力争】

臣昨待罪枢府伏蒙陛下委令措置防秋人兵臣意以谓中国军政不修几三十年矣阙额不补者过半其见存者皆溃散之余不习战陈故令金人得以窥伺既?燕山长驱中原遂犯畿甸来无藩篱之固去无邀击之威庙堂失策使之割三镇质亲王刼取金帛以亿万计驱掠士女屠戮良民不可胜数誓书之言所不忍闻此诚宗社之羞而陛下尝胆而思报者也今河北之寇虽退而中山河间之地不割贼马出没并边诸郡寨栅相连及不少休太原之围未解而河东之势危甚旁近县镇皆为贼之所占据秋高马肥敌骑凭陵决须深入以责三镇之约及金帛之余数倪非起天下之兵聚天下之力解围太原防托河北则必复有今春之警宗社安危殆未可知故臣辄不自揆为陛下措画降诏书以团结诸路防秋之兵大约不过十余万人而欲分布河北沿边雄霸等二十余郡中山河间真定大名横海五帅府腹里十余州军沿河一带控扼地方翊卫王室堤防海道其甚急者解围太原收复忻代以扞金人夏人连兵入寇不知此十数万之衆一一皆到果能足用而无贼马渡河之警乎今臣被命出使去清光之日未几朝廷已尽改前日诏书调兵防秋之计既罢峒丁又罢刀弩手又罢土兵又罢四川福建广南东路将兵又罢荆湖南北路系将不系将兵而京西州郡又皆特免起发是前日诏书所团结之兵罢去大半不知金人聚兵两路入寇将何以支梧而朝廷何恃不留意於此也臣窃思之以兵为不须起者大概有五川广福建荆湖之地远一也钱粮犒赏之费多二也河北寇退天下已无事三也太原之围贼马不多不攻自解四也探报有林牙高丽之师金人牵制未必深入五也若以川广福建荆湖之地远则诏书之下以四月期天下兵以七月当时关报三省何不即止今已七月远方之兵皆已在道始复约回是复蹈今春勤王之师约回之弊也一岁

两起天下之兵中道而两止之天下谓何臣恐朝廷自此不复能取信四海而将士解体矣国之大事在戎宗社安危所系而且行且止有同儿戏臣窃痛之若以谓钱粮犒赏多则今春无兵扞寇致令误国土地宝货人民皆为所取今惜小费又不为之备臣恐後來所取又不止於前日也况元降指挥防秋人兵各令賚粮以行则钱粮犒赏之乏自非所患庙堂不深思宗社大计而惜小费臣窃所不取也若以河北寇退天下无事则边郡日报金人聚兵声言某月入寇当取某地强敌临境非和非战朝夕恐栗惧其复来天下果无事乎贾谊谓厝火积薪之下而坐其上火未及然因谓之安以今日观之何止於火未及然殆处於烈焰之旁而言笑自若也若以谓太原之围贼马不多不攻自解则自春徂秋攻守半年曾不能得其实数姚种二帅以十万之师一日皆溃彼未尝有所伤衄不知何以必其兵之不多以为可以不攻而自解者臣以为非愚则诬至於林牙高丽牵制之报理或有之然不可恃彼之不来当恃我之有备则屯兵聚粮正今日之先务不可忽也今河北河东州郡日告危急乞兵皆以三五万为言而半年以来未有一人一骑可以副其求者防秋之兵甫集又皆遣罢不知此何理也若必以谓不须动天下之兵而自可无事则臣诚不足以任此责陛下胡不遣建议之人代臣坐致康平而重为此扰扰也除范世雄所统湖北兵闻已至襄唐间臣已作奉圣旨令疾速发赴宣抚司外所有余路乞依元降诏书起发庶几不误国事

第二劄子

近降指挥减罢防秋之兵臣所以深惜此事者一则河北防秋阙人恐有疎虞二则一岁之间再令起兵又再止之恐无以示四方大信防秋之计臣前奏论之已详请为陛下更论不可失信之意者周为犬戎所侵尝以烽火召诸侯兵恐诸侯之未必至也举烽以试之诸侯之兵大集知其试已皆怒而归其後真举烽无复至者去冬金人将犯阙诏起勤王之师远方之兵踊跃赴难至中途而寇已和有诏止之皆愤惋而反今以防秋之故又起天下之兵良非获已远方之兵率皆就道又复约回将士卒伍宁不解体夫以军法勒诸路起兵而以寸纸罢之臣恐後时有所号召无复应者矣

梁谿集卷四十八

卷四十九

钦定四库全书

梁谿集卷四十九 宋 李纲 撰表劄奏议十一

乞罢宣抚使劄子

第二劄子

乞罢宣抚使表 第三劄子

第四劄子 第五劄子

第六劄子 第七劄子

再乞罢宣抚使表 第八劄子

第九劄子

辞免除观文殿学士知扬州劄子

乞核实宣抚司见在军兵财物劄子

乞罢宣抚使劄子【七月二十五日解潜折彦质出兵南北关与贼相遇力战而退上劄子待罪乞罢职任】

臣近具奏状劄子以解潜折彦质南北关进兵将士退却乞赐黜责未奉指挥伏念臣昨蒙圣恩差充河北河东路宣抚使自以智术浅短不足以仰副委任之重累具辞免不蒙俞允迫於天威黽勉就职自受命以来思自罄竭以图报效而军旅之事素非所习节制不明方略无取致解潜等与贼遇於南北关力战累日势力不加寻即退却曾无尺寸之效责在大帅咎将谁归夙夜忧惧心气怔忡动辄遗忘岂可复总军政伏望圣慈矜怜检会臣待罪章疏特降睿旨罢臣知枢密院事及河北河东路宣抚使遴选重任代臣职任就近令范世雄管构许臣交割迺迺前去听候指挥

第二劄子

臣伏蒙圣慈以臣乞罢职任特降亲笔令安心职事及蒙宣谕和议解围两不相妨若金人必欲三镇不免战争今则解围之事不可少缓臣伏读圣训第深感惧窃以今春贼马犯阙仓卒

无备自当议和但一切如其所欲许以三镇及金币之数太多则为非是臣所以当时与宰执力争者正恐贻今日之患非为不欲和而主战也贼马既退河北两镇幸自保全而太原之围至今未解陛下既出师以解围又遣使以约和议虽两不相妨然敌情狡狴自春徂秋顿兵坚城之下而不退又以重兵侵犯河朔我师屡北而议和之使始行臣恐中国之势益弱而黠敌之气益骄矣且自秋以来沿边探金人日聚兵为南牧深入之计朝廷日罢兵如太平无事之时今中山河间真定诸郡乞兵告急羽书狎至宣抚司无兵可遣申奏朝廷又只行下宣抚司措置是徒以空文往复初无补於实用敌骑猖獗复有今春之虞将何以御之臣屡具劄子乞再行起发後來罢止防秋人兵团结弓手之类未蒙施行伏望留神为宗社计募兵择将以图自强无谓和议之使便可恃以为安也如臣书生不习兵法不历行阵大帅之任诚非所宜况今春危城之中陛下之所驱策者悉已去位而臣独以非才尚叨重寄恐不知者谓臣黷武贪功为国生事招致人言陛下虽欲保全不可得也仰冀圣慈终始哀怜特降睿旨许臣守本官致仕糜捐之报期於异日冒干天威不胜战越待罪之至

乞罢宣抚使表

臣某言伏蒙圣慈以臣累具劄子乞罢知枢密院事河北河东路宣抚使守本官致仕或外任宫观一次特降诏书不允者王事方棘愿徇国而捐躯将略弗优敢吁天而请罪与其冒宠荣而误国曷若乞骸骨而避贤优诏弗俞灿细书之一札孤踪增厉惕危肠之九回再沥愚衷仰干睿听【中谢】伏念臣斗筭小器章句陋儒粗闻忠义之风不知军旅之事分栖迟於巖壑敢希冀於功名属国步之多艰躡贵游而并进荐膺圣獎超执事机俾待罪於西枢复宣威於北部自惟譾薄必至颠隮既恳避之莫从卒怀忧而就遣经营庶务黽勉百为鬓髮为之苍浪气血从而凋丧法严令具虽明馭衆之方将惰卒骄尚袭近年之弊并门之围未解保塞之寇鼎来致此猖狂职臣庸懦虽屡祈於罢黜终未赐於允俞伏望皇帝陛下覆以尧仁察之舜智念臣才谋浅短不足有为怜臣疾病连延诚非避事冀垂寬宥特赐保全尽解兵权俾归田亩江湖在望庶自毕於余生沟壑未填或收功於晚节

第三劄子

臣所乞罢职任非缘避事及为身谋实以不习军旅之事不可为帅自知甚明恐误国事及今改命尚可设计以解太原之围以御河北之寇仰副圣意更少稽缓决致疎虞虽赐斧钺之诛亦复何补伏望睿慈特赐矜察

第四劄子

臣累具劄子乞罢知枢密院事河北河东路宣抚使守本官致仕伏奉宸翰令安心职事未赐俞允伏念臣猥以庸庸误膺委寄力小任重福过灾生疾病交攻心虑愤乱寝食俱废生气索然恍或贪冒宠荣尚总军政必误国事自取颠隮伏望圣慈察臣忱诚非有沽激特降睿旨许依所乞使获退休则终始保全虽天地父母之恩何以加此余龄未泯誓极糜捐干冒天威无任惶惧激切之至

第五劄子

臣累具劄子仰干天听以不材而当重寄恐误国事乞赐斥罢许令致仕别选能臣局踣俟命未蒙俞允第深惶惧臣闻量材授职不强以所不能者君之道也陈力就列而不能则止者臣之节也如臣书生不习金革之事受命之日固尝力辞迫於天威黽勉就职夙夜自竭思效铅刀一割之用而进无尺寸之功乃知素非所习不可勉强傥或贪冒恩荣而忘不能则止之义岂惟有误国事且将得罪於古圣人臣所以不避斧钺之诛再三冒瀆期於得请仰冀圣聪有以照察之也臣又闻壮火之气衰少火之气壮臣自今春以来更历忧患志气凋落正如伤弓之鸟望曲木而先惊责其勇敢复如曩时虽自激昂岂可复得方陛下欲张皇六师荡攘羣丑之秋必得心果气锐谋猷方壮之人奉命徂征乃克有济伏望圣慈察臣惓惓之诚非爱死非谋身正恐更或败事上累陛下知人之明误国大计虽伏鈇鑕亦复何补特赐矜怜许以骸骨归於田里则天下之人皆知陛下以臣尝效犬马之力曲赐保全谁不知劝非独臣区区之私幸也干冒天威无任战越待罪之至

第六劄子

臣累具劄表干冒天聪乞罢职任守本官致仕或外任宫观一次伏蒙圣慈特降亲笔许臣候种师道到交割职事赴阙议事仰荷天恩终始保全但深感泣近准尚书省劄子折彦质除宣抚判官及备奉圣旨令臣不得轻易进兵伏念臣智谋无取疾病交攻比日以来夙夜震恐心气不宁动辄愤乱岂敢复为进兵之计但边事紧急须人措置而臣束手坐视无可为者深恐误国伏乞降旨促师道起发或且令折彦质前来交割臣得扶疾迺迺前去听候指挥不胜惶惧激切之至

第七劄子

臣累具表劄奏状仰干天听乞罢知枢密院事河北河东路宣抚使守本官致仕或外任宫观一次伏蒙圣慈再降诏答未赐俞允重念臣学术荒疎智能譾薄误被使令过其分量虽自罄竭曾无尺寸之效夙夜愧惧忧悸成疾不能支持伏望矜怜特降睿旨许依所乞异时图报当极糜捐干冒天威无任惶惧战越之至

再乞罢宣抚使表

臣某言伏蒙圣慈以臣累具劄子乞罢知枢密院事河北河东路宣抚使守本官致仕或外任宫观一次再降诏书不允者危诚上达方虞斧钺之诛温诏俯颁未遂丘园之请敢再陈其恳悃庶仰冀於矜从【中谢】伏念臣一介书生不习兵事忘身徇国虽坚卫上之心制胜运筹初乏折冲之略误蒙天獎俾长枢庭出分阃外之权未迪师中之吉虽圣恩寬大必将赦三北而用孟明然公议沸腾岂肯以一战而恕房琯与其招人言而得罪曷若控君父而乞身往城于方宜有赫赫之南仲在泮猷猷必资矫矫之虎臣自度非才请避贤路伏望皇帝陛下容之以天地之量烛之以日月之明怜臣劳瘁而无补於事功察臣精诚而有志於忠义进以道而

退以礼不使翱翔保其始而全其终勿令陨越则臣誓坚素守仰戴鸿恩失东隅而收桑榆捐躯未晚先朝露而填沟壑结草为期

第八劄子

臣伏蒙圣慈特降宸翰矜怜孤踪过有存抚初言睿断所以用臣总戎之故中言诸将难以倚仗遂致不敢轻易进兵之由终言臣昨在围城之中尝效犬马之劳欲力赐保全之意圣恩隆厚虽父母之於子不过如此感激涕零不能自止伏念臣学非适用材不逮人徒抱愚忠常欲奋不顾身以徇国家之急误蒙委任俾之宣抚两路而臣自知材力讷薄诚不足以仰副重寄力具辞免天意莫回龟勉就职亦欲少效涓埃之报而事与愿违略无所补以宽陛下北顾之忧此臣所以夙夜震恐慙叹愤懣至於寝食俱废疾病交攻累沥危诚以乞骸骨仰冀矜从虽被窜诛所不敢辞也伏蒙陛下圣训丁宁既照察其精诚又悯念其劳瘁许以保全不使陨越顾臣何人遭遇如此粉骨碎身曷足图报伏望圣慈检会臣累上表劄奏状特降睿旨从其所乞许令罢知枢密事河北河东路宣抚使守本官致仕或外任宫观一次上以昭陛下保全臣子之大德下以全微臣知止之节非独臣之幸也实天下之幸也臣见迺邇前去封丘县以来听候指挥干冒宸严无任惶惧俟罪之至

第九劄子

臣伏奉亲笔累数百言训勅丁宁以终始保全之意宸章奎画灿如日星臣伏读感涕不能自止已具劄子称谢及乞检会臣累上劄表奏状特降睿旨许令罢职任守本官致仕或外任宫观一次未奉俞允蝼蚁之诚敢再叙陈仰干天听伏念臣疎拙愚直初无他长方道君朝仕不过史官以言事远谪流落七年误蒙召还遭遇陛下龙飞之际不待左右之言首蒙赐对臣未及敷奏之间圣语褒谕以臣昨论水事章疏曾经御览记录姓名遂被亲擢躋处从班未旬日间金人犯阙臣非时请对与宰执廷争有合天意遂蒙擢与大政方扰攘中日被委使中遭诋诬罢斥累日圣恩隆厚劳问不辍寻复旧任自春以来孤危之踪任用保全获至今日皆出天造而臣材力绵薄初无毫髮之补滥膺两路宣抚之寄虽受命未久然不能率励将士驱逐丑类以宽陛下宵旰北顾之忧中夜以思有面目今蒙恩召赴阙议事咫尺天威虽不胜臣子恋慕之诚然复何颜以望清光兼臣屡经忧患夙夜震恐疾病交攻心气不宁难以勉强任事所以不避斧钺之诛控告君父乞赐罢黜投闲养疾不敢贪恋宠荣妨塞贤路诚非获已伏望圣慈容以天地之度照以日月之明听臣危恳哀而怜之特降睿旨从其所乞则陛下非独有保全臣子之言乃有保全臣子之实蒙被驱策者孰不感励兼臣犬马之齿未衰使得就闲养疾心气稍安复蒙任使捐躯未晚干冒天威无任祈恳激切战越待罪之至

辞免除观文殿学士知扬州劄子【九月初交割宣抚司职事与折彦质还次封丘被受尚书省劄子除观文殿学士知扬州具劄子辞免】

臣准尚书省劄子备奉圣旨除臣观文殿学士知扬州天恩隆厚未赐诛责复加宠荣感戴之极涕泗横流伏念臣偶以庸庸叨备器使有罪无功不足以当秘殿之隆名心剿形瘵不足以

任淮海之重寄倘或冒处必致人言已具状奏闻乞追还成命外伏望圣慈检会臣累上章疏特降睿旨依臣所乞守本官致仕或外任宫观一次则始终保全悉归天造臣以备受指挥免见谢辞不候受告般家接人取便道疾速发赴新任密迕阙廷不获瞻望清光岂胜犬马恋慕之情虽在山林不敢少忘陛下天地父母之德惟当旦旦焚修仰祝睿算乞核实宣抚司见在军兵财物劄子【靖康元年八月末被旨赴阙议事九月初行次封丘蒙恩除观文殿学士知扬州上劄子具宣抚司见管军兵财物数目奏闻乞差官前去核实】

臣伏蒙圣慈以臣累具表劄乞罢知枢密院事河北河东路宣抚使特除臣观文殿学士知扬州军州事兼淮南东路兵马钤辖臣已具奏辞免恩命乞守本官致仕或外任宫观讫念臣仰荷圣知特加委任所以力丐罢者非爱身怯敌之故特以疾病及节制不专议论不一进退牵制事有不可为者难以虚受其责臣自六月二十七日总师出国门七月二十日次怀州八月二十一日被受尚书省劄子召赴阙议事任宣抚司职事并在道涂首尾五十余日初宣抚司蒙朝廷差到步兵二万分为左右前後中军军四千人临启行日得旨差左军统制官曲奇将本军往北河招抚胜捷叛兵差右军统制官黄璘将本军往真定府宣抚副使刘韜下使唤臣所将带前後中军凡万二千人见在怀州屯驻随时训练并陕西路节次发到保甲一万三千余人见分威胜军隆德府泽州汾州卫州等处防守范世雄带到荆湖北路将兵峒丁刀弩手等五千余人见发往隆德府屯驻前项兵并未曾使用初宣抚司蒙朝廷应副钱二千万贯又御前降到见钱钞二十万贯银绢各十万匹两除支官兵食钱并十日一犒设用过数目不多外余皆桩留怀州及在京降赐库尚有在内藏库未曾支出者三分之二具有文历簿籍掌管官吏可考按也臣既罢去恐不知者谓臣丧师费财惟陛下遣使核实虽臣自以不才丐罢愿朝廷益择将帅抚驭士卒与之扞敌金人狡狴谋虑不浅和议未可专恃一失士卒心无与御侮则天下之势去矣臣自此不复与国论敢冒死以闻

梁谿集卷四十九

卷五十

钦定四库全书

梁谿集卷五十 宋 李纲 撰表劄奏议十一 【亲征行营司劄子御笔批荅附】

奏知防守酸枣门并乞分遣执政官分巡四壁守御劄子

奏知酸枣门守御扞退贼马劄子

奏知再遣王师古等兵会合何灌兵出战劄子乞给赏将士劄子

奏知已遣王师古出援张撝勾收招募人马劄子

奏知造桥利害劄子

奏知种师道等兵马劄子

乞种师道听节制劄子

奏知城上守御器具有未备处劄子

乞措置防护汴河斗门及引水入濠劄子

乞内外兵马并听节制劄子

亲笔宣谕城外军马听宣抚司节制

乞中军人马於殿前班教场教閱劄子

奏知放入何灌人马许孝烈等驻泊去处劄子奏知捉到活人等押赴种师道劄子

奏知定厢禁军食钱劄子

奏知所统五军分隶无复移易劄子

奏知感寒在假服药劄子

乞用暖轿至合门劄子

亲笔宣谕策应姚平仲三首

乞免策应姚平仲劄子

乞种师道同出策应劄子

乞应副长入只候人马劄子

亲笔宣谕不得交兵

罢尚书右丞待罪劄子

奏知防守酸枣门并乞分遣执政官分巡四壁

守御劄子

臣适来已到新酸枣门躬率将士防守探得北贼已约三四百人过城壕内作过今已号令城上见严备守御外即时劄付何灌张撝引两头项人马前来掩杀合具奏知仍乞分遣执政官分巡守御

御笔

执政上城恐防行遣号令已差蔡懋提举自可巡城分官守御

奏知酸枣门守御扞退贼马劄子

臣见在酸枣门城上同卢端措置守御及催督张撝何灌王师古等接战贼兵退屈势必万全不烦圣虑所乞差宰执分守壁垒虑惊东击西事体不细臣切望留神所有刘延庆西壁阙人已差人应副去讫谨具奏知

御笔

公忠略之志朕记於心更切询问曾经边塞人悉心体国分布防守存恤抚劳若贼兵退遁异等獎擢奏知再遣王师古等兵会合何灌兵出战劄子

臣探得张撝人马已到陈桥门外转城淹杀贼兵其先在酸枣门下作过番贼渐已过壕溃散臣再遣王师古王何等兵自万胜门出会合何灌兵同共掩杀谨具奏知

御笔

访闻何灌已身死未知兵马差甚人统领已批付三省密院疾速照会施行如王师古王何可差即便差充

乞给赏将士劄子

臣见在酸枣门分守京城北壁贼兵渐退将士多重伤乞赐降下银碗彩绢给赏并於南北酒库等处支酒付军前使用谨具奏知

御笔

酒已支四百瓶银碗共二百只量功支赏公更悉心扞御朕皆知之李纲传御笔内藏库支彩绢无支绢一千疋

奏知已遣王师古出援张撝勾引招募人马劄子

臣奉圣旨分兵出援张撝等军马今来已遣王师古外全阙人兵契勘李弥大已充参谋所有提举前後中军招募到人马已有器甲除已一面勾取赴本司外合具奏知伏乞更赐处分施行

御笔

依奏

奏知造桥利害劄子

臣见同蔡懋监视造桥已差人兵防护臣愚窃谓桥成贼马寅夜或有冲突恐非力所能制深属不便渡棧虽稍迟极为得策更望圣慈详酌施行

御笔

若不作桥金国愈疑可用枋或板作桥日晚权时彻去庶得稍便如可施行奏来

多用甲兵强弩斩马刀李纲日逐专在彼措置照管或吊桥甚善

奏知种师道等兵马劄子

臣适得种师道奏状四封谨遣投进询来人云师道所统兵马约二万余人大半系骑兵皆有器甲士皆勇锐虽师道令歇亦皆不肯星夜前来继有陈开姚平仲及他头项兵共约十万余人臣已将差到人犒设及发文字与师道传谕圣意讫合具奏知

御笔

可间道催天下兵不可不密言语文字亦不可不慎恐为金人所获更令种师道勾集陕西未来者将官人马

乞种师道听节制劄子

臣契勘种师道所统西兵将至阙下兵家以节制为重节制不立虽以李光弼郭子仪为帅亦有相州之溃今来种师道所统兵到日欲乞特降睿旨听臣节制庶几不至误事

御笔

种师道宿将善於兵职位甚高难受卿节制作同官替曹蒙可也曹蒙戚里岂识兵事奏来付李纲

奏知城上守御器具有未备处劄子

臣今日依禀圣旨在新郑门应副姚平仲下人马器甲急逐在军已请器甲津般到新郑门约计八十余副据姚平仲称得旨巡视西北城壁回至新郑门已日晚乞来早交割臣已委官在门下管押讫并据姚平仲称东西水门须用排叉木以防贼马及城上守御器具北之边城有未备处臣已逐一劄下京城所依应施行去讫合具奏知

御笔

卿竭力徇国朕甚嘉之中心不忘金人多诈奸谋不浅切在审详行之

乞措置防护汴河斗门及引水入壕劄子

臣伏奉御批送到劄子为壕河水势陡落见有人涉水过往寅夜不便令多差人守御臣已劄下四壁疾速依应施行契勘汴河水涸今已累日虑被贼人开决斗门欲遣将兵防护汴河堤岸司官吏前去相度收斗门水并南有蔡河西有金明池水柜金水河皆可引水入壕增助水势欲乞指挥都大提举汴河堤岸司同共相度疾速措置施行谨具奏知

御笔

依奏同陈良弼评议如可以施行即疾速措置

乞内外兵马并听节制劄子

臣昨日申时闻马忠承枢密院指挥移塞入壕披城屯泊事属非便臣即时劄下马忠依旧於元劄塞处不得移动今准内降御批依旧令劄塞施行乞奏来急速不得时刻注滞臣已再行下马忠遵依圣旨施行去乞契勘臣屡奉圣旨专令掌兵马事应系内外统制兵马并令听臣节制军政方一欲乞降睿旨付三省枢密院今後有指挥应千兵马事并先关送行营使司相度施行庶几不敢误事谨录奏闻取进止

御笔

城内兵马听李纲节制城外兵马别差人

亲笔宣谕城外兵马聽宣抚司节制

应城外军马统制统领官已下并听宣抚司节制不得侵紊付李纲知委奏

乞中军人马於殿前班教場教閱劄子

臣契勘中军统制人马见在殿前司驻泊缘殿前司窄狭难以教閱欲乞时暂权於殿前班教场内教閱一日犒设乞依旧於殿前司驻泊伏望特降指挥取进止御笔

依奏

奏知放入何灌人马许孝烈等驻泊去处劄子

臣早来已具奏知何灌人马暴露日久欲乞来日相度开门放入臣已差下统制官王师古交割统领其许孝烈郭渊臣即不知御前已差兼不知本人见今驻泊去处更指挥元承受官司催促施行谨具奏闻

御笔

一面审详施行

奏知将捉到活人等押赴种师道劄子

臣伏奉御批令臣将捉到活人及走还汉人押赴种师道乞奏臣已依稟圣旨将夜来李构押到走还汉人赵寅押赴种师道处外合具奏知

御笔

更押数人前去

奏知定厢禁军食钱劄子

臣伏奉御批措置厢禁军米事臣契勘城守粮食最为大事见在米粟有限运漕未通支俵数目太多又有食钱实为饶冒臣欲乞禁军并支二升半厢军二升其食钱诸处申请数目不等见行勘会亦乞措置务均一谨具奏知如合圣意乞降付臣施行

御笔

恐减之生事卿更思施行

奏知所统五军分隶无复移易劄子

臣伏奉御批令臣措置兵事整龔军马臣窃仰陛下威断神武出於天纵戡定大难定克有成而臣猥以常材方艰难中谬当重任敢不率励将士以死报国仰答恩遇臣所统左右前後中军分隶已定乞降处分无复移易谨具奏知

御笔

更不移准此

奏知感寒在假服药劄子

臣今月三十日早朝退忽感寒气发热头昏见今服药欲望圣慈许免来日早朝取进止

御笔

莫要医官否将息早出参时方多事全赖执政可否相济当体此意

乞用暖轿至合门劄子

臣伏奉御批抚问令臣将息早出参者臣仰戴圣恩不胜感涕重念臣自军兴以来夙夜尽瘁靡遑食息冲冒风寒见今在行营司用本司医官看治臣晓夕稍可支梧欲望圣慈特许臣用暖轿至合门外不以时入对取进止

御笔

依奏

亲笔宣谕三首

宣谕只今策应姚平仲

李纲只今前去策应姚平仲不管少有违滞

宣谕押人出门策应

仰李纲只今押人出门策应

宣谕姚平仲已出兵

姚平仲已出兵仰李纲疾速尽数发人马前去策应随宜措置如敢违滞当行军令

乞免策应姚平仲劄子

臣伏奉御笔令将带本司人马出城策应姚平仲臣契勘近者福宁殿议用兵事期以二月六日且候姚古种师中到今来姚平仲举事臣不预知诸军人马整龔未毕兼臣见以感寒发热在假就行营司将理委是难以前去伏望圣慈特降睿旨免臣策应取进止

御笔

李纲须管火急前去策应取军令状奏

乞种师道同出城策应劄子

臣伏奉御批令臣策应姚平仲臣敢不力疾仰报陛下委遇之意缘陕西诸路及四方勤王之师并系受种师道节制乞降圣旨令种师道与臣同出城庶几缓急之际可以策应谨具奏知臣相度本司人马当出城北占据形势一则策应姚平仲二则护卫都城臣已指挥勾集中军左右人马赴封丘门听候使唤欲乞降付新旧封丘门锁匙

御笔

种师道自别一项系前锋出战难以同共卿等只作後军策应可疾速施行不得轻动与诸将审而决之大功只在今夕来早矣首尾卿赞而成天人必助之

乞应付长入祗候人马劄子

臣已到封丘门伺候左右中军人马齐足出城近壕差到长入只候四十八人并未有马欲乞降旨於本班中选择应副谨具奏知细纸甲乞降付十副

御笔

一面於合属处作圣旨取急速

亲笔宣谕不得交兵

李纲等见统制兵马为有计议使人在此未可交兵应城外诸处兵马依此不得交兵李纲切依此不可少有违误大事

罢尚书右丞待罪

右臣今月初三日准东上合门关报三省枢密院同奉圣旨罢臣尚书右丞行营使交割与蔡懋臣已即时罢任交割讫见今在浴室院待罪臣不胜惶惧战越之至谨具奏闻

御笔

不须待罪安虑

梁谿集卷五十

卷五十一

钦定四库全书

梁谿集卷五十一 宋 李纲 撰表劄奏议十三【守御使司劄子御笔批答附】

乞黜责梁方平许佃劄子

乞差孟揆干当舟船劄子

奏知范琼下军马前去怀泽州防托劄子缴进根刷到递角劄子

奏知四路出兵控扼河津劄子

乞立定支破诸色人食钱劄子

奏知支钱放散城上保甲劄子

乞於殿前衙置宣抚司劄子

奏知收到梁方平独脚旗劄子

奏知募到使臣侯章去大金军中见肃王劄子进呈抚谕河北及奨谕徐处仁诏劄子

奏请画一劄子

奏知种师中在太原府南石桥下寨劄子奏知种师中见在榆次县下寨劄子【卷尾】奏知种师中已到真定应援太原劄子

乞严止絶诸军浮言扇惑劄子

乞委三衙拣禁军劄子

发遣快行亲从官待罪劄子

奏知喻意吴敏劄子

乞赐武汉英等器甲袍带劄子【卷尾】

奏知发夏国诏书劄子

奏知姚古节制不明乞差解潜抵替劄子乞罢守御使司劄子 第二劄子

第三劄子

乞黜责梁方平许佃劄子

臣见已安抚宣德门外军民各令归家照管老幼仍号令不得打伤内臣出榜告示如违当行处斩已各退散欲往西北城上照顾守御比闻梁方平许佃自臣罢後依旧上城守御不合军民之心欲乞将两人黜责以为将士之戒不然乞陛下即降指挥各令罢去别择人管理取进止

御笔

依奏黜责与保命卿且为朕慰安人心

乞差孟揆干当舟船劄子

臣契勘将来控扼河津合通南北道勾集舟船事务不少欲乞差孟揆充军前构当舟船事务贵得办集合具奏知取进止

御笔

依奏付纲

奏知范琼下军马前去怀泽州防托劄子

臣适得孟揆劄子称范琼下军马於二十二日晚到滑州下寨为桥船落水过渡未得臣与吴敏等商量欲劄下范琼令过河前去怀州泽州防托良便更合取自圣裁谨具奏知

御笔

依奏

缴进根刷到递角劄子

臣契勘昨自金人作过以来道路不通四方奏报委积邮传臣寻委差本司属官张奕同马忠措置新郑门以西递铺今根刷到递角六百余件除系进奏院收管外有金字牌子肆个已开

奏状五十纸并实封奏状二十封用黄靶封全谨具进纳

御笔

备见卿勤劳益加叹獎

奏知四路出兵控扼河津劄子

臣伏奉圣训薛安等不可都统制缘系宣抚司日前差委今来金人已行三日若候姚古种师中恐缓不及事臣与三省枢密院参议於今月十三日四路出兵控扼河津如金人渡河即会合护送至河间中山府界今具兵将人数下项

一马忠往濬滑州控扼河津

统西兵四千九百九十一人

统东兵一万九千五百三十三人

一郝怀往河阳控扼河津

统西兵五千八人

统东兵三千一百五十四人

一韩世忠往大名府控扼河津

统西兵四千一百二十一人

统东兵三千七百一十六人

一林良器往阳武原武控扼河津

统西兵四千七百二十四人

右谨具奏知取进止

御笔

今四路出兵都统制不才恐误国大事须候姚古先令薛安去後差姚古临阵易将不便切

候姚古等知奏

乞立定支破诸色人食钱劄子

臣准御宝批送娄全等叫道流星马请不得口食钱米事伏奉圣训速与施行臣已劄下四壁应有似此之人立便支给外契勘京城逐壁日前支破诸色人食钱多寡有无并不立定则例皆是临时各自申请所以不均臣见令取会欲乞候取到数日本司量度中制立为定例庶几均一取进止

御笔

依奏

奏知支钱放散城上保甲劄子

臣契勘城上保甲暴露日久元系畿县差到其家类遭兵劫理宜先行放散臣已劄下逐壁令人支钱一贯文放散去讫所有团结到城里居民臣已指挥并令放散惟守城正兵须俟大军控扼河津都城解严方合卸甲放散归营合具奏知

御笔

甚好所有钱并须均齐切当诚所掌人

乞於殿前衙置宣抚司劄子

臣伏奉御宝批令臣差人押宗室士玠赴大宗正司庭训讫除名锁闭又令臣差统制官日下将兵於京城内巡逻弹压臣已恭依圣旨差人管押士玠赴大宗正司交割及令左右中军统制官分认地界差将佐人兵巡逻弹压去讫又奉御批今将大晟府旧行营使司置宣抚使司令种师道在彼镇服衆情仍先出文榜令百姓通知惟此一事未敢施行盖行营虽罢已改作守御使司臣每遇早朝退依旧在彼治事所有本司人吏官属并在彼安泊文籍钱物银绢器甲等并在彼置库安顿若置宣抚使司则百事又皆紊乱劳扰窃虑陛下所降今来指挥未相照应谨却缴进如欲种师道在近镇压乞降指挥於殿前衙置宣抚司可也更望圣慈详酌施行谨录奏知

御笔

依所奏施行访闻百姓见今尚有杀内侍官者仰速差人禁止

奏知收到梁方平独脚旗劄子

臣今晚途中逢快行家捉到两人称传呼兵士解甲及将青黄独脚旗俵与地分寻询问两人称系北壁提举守御官李构下使臣传指挥厢军不得带甲下城如遇下城并令解甲其独脚旗不肯承认已割问李构外已将两人解送开封府并据告事人称梁方平将皂独脚旗锹钁等分散在逐地分臣已差使臣分头根究收取未到及据闻勅来见臣称北壁传指挥收了守城人枪刀器械见李构称是曾指挥交收了及修内司兵士称奉修内司姓吴人指挥令去壕外筑墙高六尺如此则金人可以藏身矢石皆不可及逐项事节皆系紧急伏乞圣慈详酌施行谨具奏知

见收到独脚旗九面除两面留此照验外七面今缴进所有北壁器仗已割下依旧俵散去讫再具奏知御笔

一面令改正

奏知募到使臣侯章去大金军中见肃王劄子

臣近召募到使臣侯章前去大金军中见肃王并驸马曹晟体问消息今据侯章回来称到磁州潞阳野寨中见肃王并曹晟并各安乐未有回期取到肃王曹晟亲书付本家文字今缴进谨具奏知

御笔

大金军马次第如何只今奏来

进呈抚谕河北及奨谕徐处仁诏劄子

臣恭禀圣训拟草定抚谕河北州郡及奨谕徐处仁诏书二道进呈如可施行乞用御宝下以凭发遣北京差来人事属紧急合具奏知进止

御笔

诏甚奇若人去时切防虏掠恐金人得知不便卿微疾想渐平愈更宜加慎

奏请画一劄子

臣今具合奏事件下项

一胜捷兵昨日得旨差孙渥张师正统领前去访问孙渥官虽高不曾经历行阵武略大夫王从道西人善用兵饱经战鬪欲令同张师正统领仍乞来日引对赐以器甲战袍令日下发遣

御笔

依奏

一陕西转运使张灝以其父孝纯令赴阙奏事已到国门乞降旨合令不隔班先次上殿讫回任

御笔

两日前已指挥合门讫

一京畿地八将已差赴种师道下使唤所有孟彦宏押到西兵保甲二千余人却拨与钱盖将带往陕西使唤

御笔

依奏

右谨具奏知

奏知种师中在太原府南石桥下寨劄子

臣伏奉宸翰种师中在甚处差人探问及起京西一将赴宣抚司使唤臣契勘适见刘韜奏状称据中军将赵哲申师中军马探望得在太原府南石桥下寨去太原十八里已差效用两人前去探问外所有京西将兵见契勘差拨次其刘韜奏状缴进谨具奏知

御笔

若是如此可令刘韜急发人救应并应副粮草前去不移刻行

奏知种师中已到真定应援太原劄子

臣适得刘韜谕日报种师中已於二十二日到真定由井陘路应援太原并擒到生口处审问得金人辎重十六七间已离太原粘罕二十一二间亦此去韜欲遣人前去收复忻代所有谕目同缴进谨具奏知

御笔

览来奏少解忧心皆祖宗积德所致羣公同心之力可更措置早令出界今秋甚近大要枝梧

粮食人马城池塘泺一一急速施行

乞严止絕诸军浮言扇惑劄子

臣伏奉圣训诸军乱传散赏前事如何可以消弭臣契勘诸军只缘上皇扈从人兵给赏过优推恩过厚所以鼓舞浮言今将已缉捕在殿前司开封府人杖配惩戒静以镇之自须无事或出一勅榜开谕军人以上皇暴露日久扈从之人理宜优异乃以崇奉上皇之故至於在京诸军非有功者不赏事体不同今後辄敢撰造语言通相扇惑者并从军法如此处置似为稳便更乞圣裁谨具奏知

御笔

依奏

乞委三衙拣禁军劄子

臣伏蒙圣训欲於辇官教骏清卫厢军内拣禁军臣窃思之於事甚便但专委三衙自可以办如别置拣兵所则三衙必又有语更望圣裁

御笔

依奏如已拣充禁军虑或逃避当严立法发遣快行亲从官待罪劄子

臣前月二十八日奉御批守御使司快行亲从官十二日发遣归本司臣即时依禀圣旨发遣归本司讫适闻前项亲从官并已得罪臣契勘累尝具奏乞罢守御使司未蒙俞允故前项人亦因循未曾发遣归司今来逐人别无罪犯若以因循有失发遣罪乃在臣伏乞圣慈特赐黜责臣无任皇惧待罪之至取进止

御笔

无得罪之理已降旨皇城司令依旧只应卿但安虑此乃皇城司官误晓今早批旨深所爱卿始终保全但审思之罢司更俟略经思虑付出施行

奏知喻意吴敏劄子

臣伏蒙圣慈令臣喻意吴敏不得再有陈请吴敏适间宣押到都堂不曾相见已即上马作简与之亦未曾答容臣再以简具道圣意续奏闻次

御笔

如此不知卿晓其意否不知为甚图作纷纷

奏知发夏国诏书劄子

臣伏奉宸翰付到夏国诏即差使臣齎发前去合行事容臣来早同宰执面奏次谨具奏知

御笔

来早奏恐迟先具奏

奏知姚古节制不明乞差解潜抵替劄子

臣伏奉宸翰太原未解围日夕忧念寢食皆忘仰见圣慈留神边事焦劳如此臣等措置无效不胜皇惧待罪之至适得种师中奏统制诸将已至太安驿去太原府九十里节次斩获金人首级开道路得张孝纯蜡书张师正军马已到中山行军有法决须成功欲乞先次降诏獎諭及抚问将士量加犒设其姚古节制不明致汾州统制官等军马溃散乞差解潜抵替其解潜已到长安已催令星夜发来赴阙奏事讫前去亦须多降金帛令军前激赏访问汾州见有官绢十余万匹河东民户以金人虏掠见无衣着而有窖藏以绢易粟可以足食所有种师中等奏状三纸缴进乞赐圣裁

御笔

种师中奏昨日并皆子细看了封出除已降诏獎諭师中外并令三省密院行下量加犒赏其余解潜等事依奏作圣旨施行

乞罢守御使司劄子

臣累具劄子乞罢守御使司未蒙俞允窃缘使司今来别无职事而有官吏食钱之费在今日财用窘乏之际诚为可惜臣愚以谓不若遂行罢去将所余银绢钱物等并归元来去处官告送纳御前如圣意未欲遂罢即乞别差官提举及将臣所辟置官属见存数员并行减罢取进止

第二劄子

臣契勘昨具劄子乞罢守御使司伏被圣旨令候金人出境结局今来河北敌军已退太原解围只在朝夕所有守御使司别无职事欲乞限五日结絶所有见在钱物银绢官告等乞并送左藏库桩管听候枢密院缓急支用其簿历等并送比部驱磨一宗公案付枢密院收管取进止

第三劄子

臣今早尝具劄子乞罢守御使司未蒙降出施行窃缘敌人远去京邑底宁守御之司实为虚设伏望圣慈特赐俞允臣早来所上劄子欲将本司所余钱帛官告等送左藏库寄纳准备枢密院缓急使用今来相度亦不须如此乞尽拨归元来去处官告送纳御前或行毁抹见今库官攒造供具已支见在数目续具进呈取进止御笔

可併归枢密院其钱帛官告等本处收听候缓急取旨支用

乞赐武汉英等器甲袍带劄子

臣伏奉圣训令武汉英张思正来日日下出门已劄付逐人知委欲乞早赐器甲袍带以激劝之谨具奏御笔

已差陈顾言赐讫

乞催教车战使臣教头劄子

臣伏奉宸翰李石处战车数等可取索定验堪使者令造臣近已曾取索到数等内姚古者似可用昨已造五百两近再指挥凑造一千两已於姚古处勾能阵战使臣教头十人前来教习尚未到谨具奏知

御笔

可催督施行

奏知种师中见在榆次县下寨劄子

臣伏奉圣训速要见种师中见在甚处臣适见河北运使张益谦奏体探得师中见在榆次县下寨臣已召募效用与借进义校尉前去榆次县师中处投下文字候取得回文日取旨推恩补正所有张益谦奏状缴进谨具奏知

梁谿集卷五十一

卷五十二

钦定四库全书

梁谿集卷五十二 宋 李纲

撰表劄奏议十四【河北河东路宣抚使司劄子一御笔批答附】

乞使副差武臣一员劄子

论兵食等事劄子

乞免签书密院常程文字劄子

乞括马劄子

乞差曲奇充统制官劄子

再乞曲奇劄子 乞置承受官劄子 乞令承受官王褒随军劄子

乞辟刘靖充统制官劄子

乞令李邈权帅真定劄子

再乞免签书密院常程文字劄子

缴进秦元图册及奏知解潜议事劄子

奏知看详秦元图册并乞差察视亲事官劄子 乞支降见钱劄子

乞治逃避士卒劄子 奏知应副解潜等银劄子

奏知赏罚董有林冀景等劄子

乞令张灝同折可求节制汾晋人马劄子 再乞令张灝同折可求节制劄子

乞招捕胜捷军劄子 乞差种师道巡边劄子 乞立收复忻代赏格劄子

乞殿前马军司摘马劄子

乞使副差武臣一员劄子

臣伏蒙圣训已除臣宣抚使李弥大为副臣与弥大实皆书生初不深晓兵事恐误国计使副当以武臣一员有名望者为之臣非敢惜身避事实惧仰辜委任之意更望圣裁谨具奏知

御笔

若与师道俱行亦无害但恐老不肯治事卿参酌众议只今奏有名望者武臣一员来急速

论兵食等事劄子

臣伏奉御笔卿素忠义何故不欲去者臣既已受命岂敢不行实缘朝廷之事议论不一或以为臣所请之物难办或谓师道不当罢或谓臣不当行纷纷如此何以集事臣窃谓陛下所以遣臣者欲责以事功也若兵寡则何以分援两路而振国威若物少则何以供给将卒而作士气况两使并行於事体自是未当非臣不欲行也伏望圣慈特赐睿察更容来日面禀圣训谨具奏知御笔

卿去时切不可轻举接战除此祝卿其余定保万全必不貽朕念宽北顾之忧矣物与兵二事朕当悉力应副三省之议未定适已亲笔出知早来喻卿者意卿但抚绥将士慎重措置

乞免签书密院常程文字劄子

臣伏奉圣旨未起离间依旧於枢密院治事臣契勘见今宣抚司事务烦多精力不给欲乞除枢密院应于边防调发兵马差除兵将官使臣外其余常程文字特免签书取进止

御笔

依旧签书

乞括马劄子

臣契勘军行全藉骑兵今来宣抚司出师得马不满千疋又多羸弱金人铁骑动以万数将来防秋不知何以御之今早尝具面奏乞於都城括马以济目前之用伏蒙俞允敢望圣慈令三省日下措置先降指挥非品官不许乘马续令开封府根括立定格尺价例官为收买其低小不堪披带者不在此限尽数拨赴宣抚司给散阙马诸军庶几军容稍振不为虚文可收实用取进止御笔

李纲乞括民马可详酌施行付中书急速行下乞差曲奇充统制官劄子

臣契勘曲奇今日已到阙伏望圣慈差充本司统制官填刘锡改差阙取进止

御笔

旗鼓等并依奏行下曲奇欲差作御带不知卿可辍否别踏逐人亦须有之适彦质奏来河东事并有次第须卿早去受命已月余尚迁延如此有损国体兼河北河东人民日望宣抚到卿可促日前去马等事已指挥尚书省速令应副讫

再乞曲奇劄子

臣伏奉圣训以臣辟置曲奇为统制官令别作路逐者契勘种师中姚古军溃散之後仰荷天慈委以宣抚重寄主忧臣辱不敢辞难旋择将佐无一可用者非得一二统制官稍有名望何以服衆前乞刘錫不旋踵已除制置使今幸曲奇到阙若不干冒圣聪辟置军中使护诸将则此行未见有可委仗者伏望睿慈特从所乞不胜幸甚取进止

御笔

边臣可委岂无但未踏逐到耳莫且寻如果无别奏李邦彦已令责

乞置承受官劄子

臣契勘宣抚司各置承受官一员伏望圣慈於近上内侍中选差取进止

御笔

差睿思殿祇候王褒

乞令承受官王褒随军劄子

臣伏蒙圣慈遣宣抚司承受王褒前来议事将来军行欲乞令王褒随军前去更合取自圣裁括马尚未蒙朝廷施行日限已逼乞降睿旨催促谨具奏知

御笔

王褒随军可依所奏劄与本人括马文字只今再録卿所论劄子一本来待看详催督

乞辟刘靖充统制官劄子

臣契勘中山府路钤辖刘靖已到阙其人材武有谋臣欲辟充宣抚司统制官伏望圣慈特赐召对问以方略臣前荐文林郎郭制中虽已得旨赐对久未有班次乞下阁门令来奏引对取进止

御笔

依奏施行

乞令李邈权帅真定劄子

臣曾具劄子乞令李邈权帅真定盖恐钱伯言到迟有妨刘韜出入李邈权帅真定亦可倚以办事伏望圣慈早赐降旨施行取进止

御笔

已批付三省讫只今更催【已批出三四日为甚至今未行卿可问三省官】刘韜奏甚善卿一面措画施行

再乞免签书常程文字劄子

臣近具劄子乞免枢密院签书常程文字伏奉御批依旧签书臣契勘见今宣抚司措置事务委是繁多日力不给伏望圣慈许臣除应于边防调发兵马差除兵将官使臣外免签书仍不依时上马赴宣抚司治事取止止

御笔

依奏

缴进秦元图册及奏知解潜议事劄子

臣伏奉内批取秦元所进三册二图谨依稟缴进适已召解潜议事欲且保隆德府观事势前去威胜进兵来早对讫出门谨具奏知

御笔

解潜事依奏卿可将秦元所进三册二图令三省密院同看如可用即降阵图付秦元教保甲三册令诸军保甲为永久法疾速施行

奏知看详秦元图并乞差察视亲事官劄子

臣伏奉御批令将秦元所进图册付三省密院同看详施行臣已依稟讫所有将来出师合差察视亲事官随军使唤乞降旨皇城司依前後体例差拨取进止御笔

两割并已行下三省并马军司及王宗濬讫亲事官令差去赴宣抚司卿可疾速治行为朕了此大事必有厚报太原围闭久每念之无不流涕也

乞支降见钱劄子

臣伏蒙圣慈令三省支降钱十万贯文京西转运使司采买粮草应付宣抚使司准尚书省劄子令於新税钱内支拨窃缘新税钱见於民间理索今来出师在近理须预办粮草深虑阙误伏望圣慈令自朝廷支降见钱或於内藏库借支将来却令桩还庶几日下可以集事取进止

御笔

朕应副卿令内库借支日後令朝廷拨还画旨行下系一十万贯

乞治逃避士卒劄子

臣契勘方此暑月出师士卒已有弃下器甲逃避者若不严行止絶切虑遁相仿效深属不便臣已令诸军检察如见得姓名即具奏闻乞下开封府及本营缉捕从军法施行先具奏知

御笔

当如此朕已亲笔下开封府如缉得宣抚司逃避军人差人押送赴卿施行

奏知应副解潜等银劄子

臣伏奉宸翰令臣将本司银钱应副河东支用臣契勘已将银二万两应副解潜见钱钞十万贯应副钱归善五万贯应副折可求一万贯应副高卫外今再起发银二万两应副钱归善一万两应副张灝共计应副过银五万两钱一十六万贯并差使臣管押前去候取收附到日缴进次谨具奏知

御笔

已令快行齎关子与河东转运银绢折钱金令内臣蒋尧卿押付折可求银绢令李伦赴河东转运司银绢令秦同老押赴卿各有数不能具写俟到卿一一差点检取会数奏来如更阙少亦具奏

奏知赏罚董有林冀景等劄子

臣契勘诸道约日会合进兵之初须令赏罚分明足以劝沮窃见武节郎董有林权知隆德府数月修葺城池招复逃散人户极有风绩武节郎杨志昨随种师中先次收复榆次县大兵既

溃志不免退师诸将散逸志独收集残兵保据平定屡次立功杀退敌马理须激赏臣已便宜作奉圣旨董有林与合职杨志与免合降官更转一官乞冀景昨於石岭关失守近又於文水县溃散王用昨统守御司人兵中路溃散近又於文水县败劫理须重罚臣已便宜作奉圣旨冀景王何各削夺在身官职令白身充统制候立到奇功与甄叙乞谨具奏知御笔

甚善极当理所有转官人关与三省出给官告乞令张灝同折可求节制汾晋人马劄子

臣伏奉宸翰张灝欲依旧节制将士解围太原令臣熟思合如何施行奏来臣契勘折彦质奏解潜以节制不一十羊九牧无所适从故罢灝节制今来灝所团结召募将士民兵等亦五百余人欲往汾州会合折可求身自督战兼汾州一带有松子岭之类可以出奇皆灝平时措置去处欲乞许灝同折可求节制汾晋人马会合解围更望圣裁取进止

御笔

依奏

再乞令张灝折可求节制劄子

臣伏蒙圣慈差使臣押到太原府下蜡书人并宣示张孝纯蜡书臣敢不迎尊睿旨约束将帅会合解围以上副焦劳之意近具劄子乞令张灝同折可求节制令措置西山一带伏望早降睿旨庶使不失机会取进止御笔

依奏卿一面画旨行下

乞招捕胜捷军劄子

臣访闻胜捷军兵势颇猖獗若不早行掩捕招收渐向东南为患不细臣已作奉圣旨令宣抚司出榜招谕令人齎榜付曲奇韩世忠及行下逐路提刑司去乞所有榜文今同缴进谨具奏知

御笔

足见忧国爱君之心嘉叹不忘

乞差种师道巡边劄子

臣累具劄子乞依旧起发诸路防秋人兵及乞令种师道统帅前去中山照应系国大事皆未得报伏望陛下深留圣念取进止

御笔

种师道已降勅差带枢密巡边【为别无名故以巡边为名】

乞立收复忻代赏格劄子

臣契勘解围太原不次推恩已有亲笔手诏外收复忻代未曾明立赏格忻代不复则太原亦难安居臣欲乞将立到奇功收复忻代将士与依解围太原推赏庶几有所激励其王以宁乞前去措置劄子今同缴知御笔

依此降旨晓喻将士

乞殿前马军司摘马劄子

臣伏奉宸翰令促解潜前去河东交割职事已行下令限日下出门去讫臣见今治行但所得马军三千人内二千七十余关马殿前马军司不肯应副虽蒙指挥枢密院措置应副缘太仆寺等处见今关马无可支拨伏望圣慈降旨殿前军马司摘那有马人兵抵替须管足庶几军容稍振实系国体取进止

御笔

足则恐难足得可令摘马一半应副系见殿前马军司见管数摘那一半大率见在一千疋摘五百疋赴宣抚司作奉圣旨施行

梁谿集卷五十二

<集部,别集类,南宋建炎至德佑,梁谿集>

卷五十三

钦定四库全书

梁谿集卷五十三 宋 李纲

撰表劄奏议十五【河北河东路宣抚使司劄子二御笔批答附】

缴进刘韜申状劄子

奏知约束解潜等会合劄子

缴进通信林牙书词劄子

论郭仲苟劄子 奏知行遣亲事官劄子乞修复塘泺旧制劄子

乞令张慤专一应副粮草劄子

发回亲事官劄子 奏知贾琼等功状劄子乞在外宫观劄子

奏知大臣拟进文字劄子

缴进太原 寨图劄子

乞遣使劄子 再请宫观劄子

奏知督责张灝劄子 亲笔宣谕节制事宜谕施行节制事
宣谕再劄下节制事奏乞起发弓弩手劄子

乞致仕宫观劄子

缴进刘韜申状劄子

臣得刘韜申状録到太原府张孝纯蜡书系刘韜遣人於鸠尾送书入城孝纯方知朝廷遣韜并解潜措置河东解围事系今月初一日臣契勘太原围闭已踰半年军民坚守无有二心今诸将约期会合有可成功之理此诚宗社之休而陛下圣德所致更望少寛圣虑所有刘韜申状同缴进谨具奏知

御笔

览兹奏涕下沾衣卿忠义徇国奋不顾身太原解围专在卿力不可出此月恐敌情愈生奸计朕日望捷音更与督诸将

奏知约束解潜等会合劄子

臣得刘韜咨目与解潜张灝等议定二十八日进兵会合解围臣元约二十五日以前以潜灝称威胜军汾州两路军马器甲钱粮未备故展三日不出此月使事稍办集亦所不争臣已催趲元降付河东器甲及截拨陕西器甲过怀州界度如期可以至军前又以本司银绢见钱关子劄次应副已再行约束解潜张灝折可求令如期会合前去所有刘韜咨目及臣约束今同缴进谨具奏知

御笔

卿切指挥诸将牙相照应敢有观望不进者卿便行军法仍令诸将知如立功便除节钺更有奇功当加开府仪同三司将士兵卒两倍推恩若止逼逐出界亦奇功也归师勿遏卿更详之解潜似不用心卿更诫之【并可求】卿所奏并依奏付三省密院讫

缴进通信林牙书词劄子

臣所遣归朝官通信林牙书词録白缴进谨具奏知御笔

通信林牙书甚善快行四人并李伦秦同老押钱银绢系三项今日已起发尽絶数日想可到更俟童贯物来当发金二万两付河北河东卿不须虑朕不应副朕凡事节俭收拾金银钱绢止欲实赏战事保守祖宗疆土

论郭仲荀劄子

臣伏见知雄州郭仲荀罢不知何故仲荀沈鸞有谋谄练兵事武臣中所难得守雄州极为有功今既罢任未有差遣臣契勘太原府见阙总管见今王稟祗是权在城中将来解围须要得力兵官干办军马伏望圣慈优与仲荀迁官特除太原府路都总管令随宣抚使司候太原解围日发赴新任取进止

御笔

已与仲荀转一官差随宣抚司听候任使如到卿一面作圣旨差注

奏知行遣亲事官劄子

臣契勘昨承御前差到察视亲事官二十人分在五军察视今月二十二日有中军察视亲事

官闵义一名饮酒至醉将把门兵士刘兴耀打据监门使臣周全等呵验委实有酒具状申举臣寻送推司根问招伏情犯臣以系御前差到之人具所犯送皇城司施行谨具奏知御笔

一面处斩军中不可不肃郤待更差十人亲事官去与卿使唤今来有过委卿一面断遣

乞修复塘泺旧制劄子

臣契勘塘泺深不可舟浅不可涉限隔戎马实为国家永远之利缘塘泺有蒲鱼稻田自来系屯田司勾管以修治堤防为名其实以充私用往往放泄塘水营利自丰渐令塘泺湮废不足限隔深失祖宗之意今来新开塘泺皆系民田伏望圣慈特降睿旨下河北路转运司相度会计一岁所修堤防之费量自转运司及朝廷应副不许种植稻田其蒲鱼之利许小民采取庶几塘泺渐复旧制而沿边贫民蒙被陛下德泽实为大惠取进止

御笔

依奏卿一面作奉圣旨行下讫奏

乞令张慤专一应副粮草劄子

臣昨已得旨令张慤张益谦应副本司粮草除张益谦已往刘韜军前外张慤近准尚书省劄子令往中山府置司采买本司关漕臣应副窃恐误事兼采买自来只合委官不须置司伏望圣慈特降睿旨令张慤专一应副本司粮草其中山府采买令委官前去施行取进止御笔

依奏卿一面作奉圣旨行下

发回亲事官劄子

臣伏蒙圣慈再差到察视亲事官十人臣契勘本司左右军已差往河北前後军已差往河东见今中军已有先差到亲事官使之察视今来所差到十人别无使唤去处臣已令快行家依旧管押赴皇城司外谨具奏知御笔

甚善

奏知贾琼等功状劄子

臣据刘韜王 状申贾琼杨志於壽阳县界节次攻击戎马及杀获近上首领赶堕崖谷死者甚衆兼捉到活人称敌衆中说今次南朝人马硬不似日前必是将银买来虽小捷未足道然大兵会合断进亦足以为先声除贾琼已取到立功人功状奏闻外杨志功状见取会保明谨具奏知

御笔

甚可喜皆卿措置所致贾琼杨志疾速保明功状当优与推恩朕削减滥赏专以官爵赏军功战士乞在外宫观劄子

臣辄沥诚恳仰干天听臣素有少肠气疾近因冒暑发作痛楚牵拽腰腹两日来顿觉行步艰难见力疾治事深恐有妨军政误国大计今来诸路大兵会合并已进兵太原围解祗在朝夕伏望圣慈察臣非避事者特降睿旨许令候太原解围之後次第将本司职事交割与刘韜除臣一在外宫观使得就闲养疾异时驱策誓极糜捐干冒天威无任皇惧战越之至取进止

御笔

卿奋然忠义乃社稷之臣朕方赖卿如长城岂得有此请今封还来奏

奏知施行大臣拟进文字劄子

御笔

大臣奏军前事付去看详可否施行付李纲

臣伏奉宸翰宣示大臣拟进文字四件臣看详皆可施行已逐一行下诸路将帅去讫契勘大兵进发会合今已三日仰遵睿算冀克有成但臣责任之重夙夜震惧不皇宁处才候军前有报即上闻次谨具奏知

御笔

卿想劳神朕自二十八日至今夜卧不安席惟俟嘉音

缴进太原敌寨图劄子

臣昨遣郭执中随解潜军至北关令照管控扼将士具到劄子并画到太原敌图一本同缴进谨具奏知御笔

执中老成素知兵遣去甚善今日童贯金已到河北河东差内侍陈珣杨公谨管押逐路转运司各一万两卿军前三千两窃恐转运无心力卿可与措置庶共济国事朕应副两路行遣寝食未尝忘愿早复祖宗疆土

乞遣使劄子

臣近蒙圣训遣使金国今适其时乞降睿旨令速发遣庶几不失机会取进止

再请宫观劄子

臣伏蒙圣慈以臣具劄子自陈因冒暑宿疾发动乞候太原解围就緒日除一外任宫观特降亲笔不允仰戴天恩伏深感泣窃念臣迂迈无取误蒙陛下特達之知付以重寄不敢辞难今者大兵进发指期破敌保全旧疆臣敢不力疾自效但於仰遵睿算破敌解围之後乞赐矜怜从臣所请则终始大德异时图报当誓捐軀干冒天威无任皇惧战越之至取进止

御笔

卿副朕委寄竭身徇国破敌解围之後当与卿共保太平之休勿复有请

奏知督责张灝劄子

臣伏奉宸翰宣示张灝奏状令臣措置施行臣契勘灝昨缘罢节制不肯与事致汾州等处军马久失整饬既蒙圣恩复还节制自合星夜詣汾州治兵上以报国下以救援父兄久在围城之患乃以催督粮运为辞久留平阳府及称得折可求报汾州有戎马出没且在回牛岭照应显是推托逗遛不进臣已作奉圣旨劄下折可求须管收复楼烦县及劄下李宗应副钱粮般运晋降斛?不管阙误外一面推督张灝赶趁大军责以不忠不孝之罪将来解围太原如灝辈实不可驱使乞候解围後便罢灝察访使谨具奏知

御笔

张灝如此显见误事卿自可一面施行

亲笔宣諭节制事

御笔

节制不一乱之道也朕已屡批付卿外今三省议定再劄下可行下诸将朕行遣应副边事虽寢食之间不敢忘卿知

宣諭施行节制事一项

节制事一项付卿施行庶归於一易於听从已亲笔批去今再劄下可遍行诸将

宣諭再劄下宣节制事

检会元降指挥宣抚总制置制置护诸将仰诸路统制军兵官遵依元降指挥并听宣抚节制如取宣抚节制不及者令听制置节制其张灏种师弓王以宁既统领兵马自合依诸路例施行【急速行下】

此系急速卿可火急遍行下诸将虑到太原平川节制不一不便切早行下此大事也行乞奏来

奏乞起发弓弩手劄子

臣契勘范世雄今日以统领到土兵等见依则例犒设及支散器甲节次起发赴解潜军前据折彦质劄子称解潜委是危急等候前来策应臣已曾奏闻乞降睿旨将守御使司勾去刀弩手及拨付种师道下湖南将兵依旧起发赴本司差往河东策应伏望圣慈体念解潜一军缘金人重兵前来委实头重或有疎虞遂致猖獗则威胜泽潞一带便见搔动特赐允从差人管押令蹉程前来不胜幸甚取进止

御笔

四日已发去朕行遣边事不使少有迟滞不曾少放心日逐忧念

乞致仕宫观劄子

臣辄沥诚恳仰干天听载惟冒渎良积兢惶伏念臣学识迂疎才术短浅幸遭陛下龙飞之初误蒙识擢获参大政方金人犯顺危城之中特被委任昼夜罄竭不敢辞难常以叨冒过当欲俟敌退事平之後乞归田里章疏屡上不蒙俞允佩戴恩德以感以惭比者奉命宣府两路眷倚之重尤非愚臣所能克堪力辞不获黽勉就职冀图报效以副陛下北顾焦劳之忧而臣素不谙练兵家之事号令不明方略无取自出师以来将士屡北未能有尺寸之功仰荅殊遇夙夜忧悸不遑宁处旧有心气之疾怔忡健忘顿不能枝若不投诚控告君父谁复为臣言者军政废弛且误国事虽伏斧钺之诛亦复何补伏望圣慈矜怜特降睿旨择所以代臣者罢臣职任许令迺邇前去听候指挥如蒙天恩终始保全未加窜责令臣守本官致仕或外任宫观一次退休养疾岂胜感戴激切之至取进止

梁谿集卷五十三

卷五十四

钦定四库全书

梁谿集卷五十四 宋 李纲

撰表劄奏议十六【河北河东路宣抚使司劄子三御笔批答附】

乞按河东地图劄子

乞保明拒守立功等事劄子

乞待罪劄子

乞差范世雄充判官劄子

奏知令折彦质控扼守备事劄子

乞於怀州置司劄子

奏知发去生兵等事劄子

奏知掩袭南北关贼马劄子

再乞差范世雄充判官劄子

奏知令刘韜等度事势进兵劄子

乞优赠阵亡孙逢等劄子

缴进折彦质等谄目劄子

待罪第二劄子

乞留熙河蕃僧军前使唤劄子

奏知进兵次第劄子

乞赏血战戮累溃人劄子

奏知刘韜欲由壽阳进兵劄子

乞降衲袄劄子

乞按河东地图劄子

臣据刘韜申王 王渊等二十九日於竹宁下寨探报有金人二千余骑过平城县南已整阵前去掩杀契勘平城县在辽州之北正系去太原之路敌知宣抚制置两司在威胜军一路故以重兵前来扞御而以轻骑遏辽州之师今解潜既能御敌重兵则轻兵必为王 所破乘胜逐北别无阻抑决须解围及牵制南北关敌势数日间决见次第臣愚窃谓金人若潜伏山谷时我师之出据扼险阻以断粮道且絶援兵则深为可忧今先来迎敌乃我之利又得湖南北兵前去应援据险以南方强弩大箭射之定须退走平定汾辽之师并进决有成功之理臣蒙委寄之重虑有疎虞日夕皇恐仰凭天威冀克有济更望圣慈下有司取河东地图一本置御座之侧臣每奏报诸路进兵接战下寨去处庶可稽考谨具奏知

御笔

见有图一面日逐稽考

乞保明拒守立功等事劄子

臣据解潜申自初一日至初四日与贼相拒依旧於扈甲射占地利下寨相度敌势进兵及本司参议官郭执中勾当公事董元凯劄子称北关守把使臣除彭彦一寨为贼攻破外其余王孝忠邹处节陈思恭等寨依旧据险固守敌马见在南北关内盘泊为北关杀千余人解潜诸部杀二千余人皆精兵所以不敢前来冲突臣契勘金人包藏祸心非特坚围太原又欲乘此秋凉决策深入自非前期整龔军马已有堤备则敌马猖獗势未可知前此兵将望风辄溃今解潜种师弓等与贼血战拒扞贼马不使侵轶已第四日深为可嘉臣除已约束解潜驱逐敌马不管别致疎虞相度进兵外仍令开具保明立功及伤中阵亡人先次推赏庶几有所激劝其退避人已斩百余人讫谨具奏知

御笔

立功及伤中人自当先次推恩疾速保明来不次迁擢

乞待罪劄子

臣以非材误被陛下知遇常愿奋不顾身以图报効近蒙圣恩差充河北河东路宣抚使任大责重惧不克堪累具辞免不蒙俞允黽勉就职自出师以来夙夜震恐不遑宁处究心竭力期解太原之围以副陛下眷獎之意而制置副使解潜与敌相遇於南北关力战累日兵卒溃散

致误国事皆缘臣节制不明方略无取有此疎失罪何所逃伏望圣慈特赐诛窜以允公议臣以军政不敢擅行交割见供职待罪无任皇惧战越之至取进止

御笔

所乞不允仍止再请

乞差范世雄充判官劄子

臣得刘韜谕目并申状具道进兵次第并招纳到耿守忠手下人谨同缴进今解潜军溃所望立功解围者惟韜所遣两项人马汾州兵所有威胜军一路人马及臣节次遣去兵未有统属权系折彦质节制窃虑难以责办所乞与范世雄进职差充宣抚判官令节制威胜军一路人马破敌解围伏望圣慈体念今来河东事体危急出自睿意不爱官爵使人奋不顾死上以宽陛下北顾之忧下以应援诸路之师一时之急如世雄材略两作帅臣熟於兵事付以节制必能成功伏乞速赐降旨施行取进止

御笔

范世雄甚当已降旨讫续次封赐告去卿一面作奉圣旨与令先供职不可缓
衲袄已发一万领续见催发去次
湖南人已指挥讫朕数日烦恼不可言太原事思之苦痛苦痛

奏知令折彦质控扼守备事劄子

臣据折彦质劄子解潜一行人马连日血战至初四日辰时敌并力攻犯营栅遂致奔溃潜并将佐未知去处彦质见於威胜收集散亡竭力控扼又据隆德董有林申探到初四日辰时以来金人冲撞透中军解制置随时上马引带使臣东北上去臣契勘解潜於南北关拒扞贼马委是竭力但兵卒尚袭旧态遇敌辄溃致将佐等不能自立虽严加约束未能改革今来解潜失律致误国事皆臣节制不明所致除已别具劄子待罪外见令折彦质等根寻解潜在去处招集将佐及溃散人兵控扼敌马及令威胜泽潞严为守备於琅车天井关诸处差兵防守把截去讫谨具奏知

御笔

解潜等用命事卒不能枝梧可与放罪出来收集人兵控扼敌马

乞於怀州置司劄子

臣伏奉宸翰令臣相度进至泽州臣契勘自怀至泽一百余里不甚相远其於军前皆系遥制

然怀州阻山带河控制河北河东两路粮道易通可以御敌保辅帝都正宣抚司可以置司去处若进至泽州则无险可扼难得粮食只可照应河东一路臣欲乞只置司於怀州令范世雄节制军马前去候得南北关可以进兵续行相度更乞圣裁取进止

御笔

依奏

奏知发去生兵等事劄子

臣契勘胜负者兵家常势解潜力战累日以寨栅不如法为金人冲溃令折彦质招集已见次第若措置得宜郤可取胜兼发去生兵及湖南北路军马又二万余人极力措置更乞圣慈少寛天虑取进止

御笔

衲袄已有造了者除此发去外见差内臣一两日起发次卿坚诚徇国实副朕望然敌屡胜锐不可当功在高垒深沟所谓避其锐气击其惰归勿与争锋待其懈而击之便胜千万慎重庶寛朕虑也范世雄并依卿奏降旨讫王元事已批付三省施行

奏知掩袭南北关敌马劄子

臣契勘敌马冲溃解潜军只据南北关不敢猖獗深入必为王渊等处牵制窃虑敌分重兵扞御诸路军马只以疑兵据南北关可以乘机袭夺已逐急劄下折彦质令陈迪权充统制郭浩充副统制令募人前去探得如可以乘机掩袭即一面统领本司发去生兵措置施行去讫谨具奏知

御笔

甚好乘其不备然须十分防其冲突范世雄速令前去与解潜措置南北关掩袭牵制辽汾界敌马再乞差范世雄充判官劄子

臣累具劄子乞降睿旨差范世雄充宣抚判官伏望圣慈早赐详酌施行庶令节制湖南军马策应解潜决保成功如世雄老练兵事累任帅臣数千里勤王令此统兵前去与一近上职名以激励之诚不为过更乞圣裁取进止

御笔

已依卿所奏行告令快行人赐卿讫但切持重扞其冲突若再举解围须汾州南北关平定等

并进庶分敌势千万不可轻进朕日夕惊忧心神不宁卿再三诫诸将切不可轻进图万全可也

奏知令刘韜等度事势进兵劄子

臣得刘韜申状谕目称王渊等兵已到榆次县界探得解潜前军有走散之人方据山下寨亦乞驻军候解潜整龔并进韜已指挥令疾速前去榆次侧近下定硬寨分遣奇兵捣敌巢穴及间道遣人报太原出兵腹背夹击措置解围若探得解潜军出南北关即王渊军马便合拔寨趋太原臣契勘今解潜军溃窃虑王渊折可求等探知不敢进兵及敌马溃解潜之师分兵前去扞拒诸路军马不得前进臣已劄下刘韜等令更切审度事势如诸路声援相及可进即进及十分过作堤防照护粮道不管别无疎失去讫所有刘韜申状谕目同缴进谨具奏知

御笔

切不可督战根本事大兵法见可而进知难而退在此切留意

乞优赠阵亡孙逢等劄子

勘会解潜统领人马於南北关遇敌见阵相拒所有获级并伤中阵歿之人臣已指挥解潜具姓名保明申宣抚司切待具奏推恩施行及访闻得使臣孙逢张逵首先入贼阵歿委是忠勇可嘉臣亦已指挥解潜具事状供申及差人遍於阵地根寻逐官屍首如法殓埋并具家属去处申本司切待优加存恤支与赙赠及保奏朝廷乞优与逐人本家恩泽以为死士之劝去讫谨具奏知

御笔

当与赠节度使其余优与恩泽疾速保明

缴进折彦质等谕目劄子

臣得折彦质谕目解潜已到龙德种师弓等将佐及招集人兵渐见次第见行整龔以图再举今得范世雄湖南北路兵马前去军当复振兼得张灏谕目折可求进兵已至文水县亦有敌马前来扞御见占稳措置今同缴进谨具奏知

御笔

可劄下诸将捉到活人子细问敌情以谋胜之日俟嘉音

待罪第二劄子

臣近具劄子以解潜师溃待罪乞赐窜责伏蒙圣慈特降亲笔不允仍止再请仰荷天恩以感以惭伏念臣自膺委使义不顾身虽殫夙夜之勤曾靡涓埃之补将士失律责在帅司节制不明谁执其咎伏望出自睿断特正典刑别委能臣不误国事臣无任皇惧战越待罪之至取进止

御笔

卿忠勇任事实副朕望裨将少退乃军中常事所乞不允仍止来章已令王【阙】齎诏前去今再批付卿乞留熙河蕃僧军前使唤劄子

臣伏奉宸翰问初一日力战熙河路蕃僧臣体访得上件蕃僧委是率先用命亲手杀百余人见今重伤在军前将理臣已劄下令具供状保明外先次支与银绢一百匹两乞欲乞且留军前使唤候事平日发遣赴阙谨具奏知

御笔

除王忠孝已转官外其余军兵全军各转四资各支银绢十匹两卿督令速保明奏并支者银绢令当彦质面前支乞奏

奏知进兵次第劄子

臣伏蒙圣慈特降亲笔处分进兵次第诚如圣训臣已遵禀行下外契勘自约日进兵已踰十日缘解潜遇敌力战师溃汾辽平定之兵亦不敢进今王渊之军在平城县界折可求之兵在文水县界刘靖贾琼之兵在寿阳县界皆下硬寨等候南北关出兵齐进今陈迪郭浩等已前去占据南北关解潜范世雄之军迤迤前进臣已劄下刘鞬折可求等令各督责诸将攢那进兵遇敌重者深沟坚壁以相持遇敌轻者整阵设伏以邀击前无阻碍者径趋太原如互相顾望首鼠不进当坐逗挠之罪已行下去乞谨具奏知

御笔

亦不可令孤军深入可先督范世雄解潜疾速前去与诸路同进解围

乞赏血战戮累溃人劄子

臣契勘解潜南北关之战虽致师溃然将士极为力战其阵亡伤中立功血战之人自合推赏臣已行下诸寨保明去乞前此师溃阵亡伤中立功之人不复推赏今宜革去此弊使将士知劝渐肯用命其累次溃散之人亦密谕折彦质解潜范世雄令根究痛行斩决庶几军兵知所畏惮渐就军律惟军政不修之久一旦号令欲其赴敌视死如归诚为难事惟当以渐革之久当自改合具奏知

御笔

如此正合朕心卿更勉力分朕忧俟成功当有厚报衲袄已差吏部使臣起发讫所有差下内臣俟别有物即令押出次湖南兵已依奏付守御司

奏知刘韜欲由壽阳进兵劄子

臣据刘韜申欲令王渊与刘靖刘士元等合军由壽阳进及遣杨志贾琼等出奇捣虚与土豪秦中宝等乘夜会合直趋太原臣已行下韜令占稳措置去讫谨具奏知

御笔

不可令孤军深入决致败事不可幸一胜切须再令汾州南北关出兵三路并进方可先次令两项整龔人马王渊若孤军又败愈难下手

乞降衲袄劄子

臣已具奏闻乞先次降下衲袄二万领支散湖南北路人兵伏望圣慈令速赐支降余者亦令接续前来般赴河东应副军前支用取进止

御笔

见行催督已有发去者

梁谿集卷五十四

卷五十五

钦定四库全书

梁谿集卷五十五 宋 李纲

撰表劄奏议十七【河北河东路宣抚使司劄子四御笔批答附】

乞差王元允都统制劄子

奏知折可求兵马冲散劄子

奏知催解潜整军与范世雄会合劄子

乞正冀景等军法劄子

乞选代职许归田里劄子

奏知王渊等顾望不进劄子

论督责王渊军深入事劄子

乞韩世忠等劄子

奏知差有风力人知濬州劄子

乞保全王以宁劄子 乞不推赏王以宁劄子 乞督刘韜进兵劄子

亲笔宣谕委寄终始【卷尾】

收复文水县乞指挥刘韜等进兵劄子

亲笔宣谕三首【卷尾】 奏知金国遣使劄子 缴进詹度奏差人兵劄子

乞留解潜折彦质劄子

奏知范世雄进兵劄子

乞更措置河北人兵劄子

奏乞降獎諭下张換狀

奏劾张灝兵退卻及待罪劄子

奏知候种师道到交割劄子

乞差王元充都统制劄子

臣累奉宸翰宣諭汾州一路將帥不可倚仗今果如聖訓尤幸軍馬未甚深入散失不多可以且令依城下寨牽制賊勢但今日將佐勇而有謀絕無其人如折可求冀景等皆累經敗衄虽湔洗用之責以後效氣決不振臣欲乞差王元充都统制替折可求曲襄充副都统制替張思正可求令還任照管麟府路邊面張思正冀景如未正軍法并重行貶竄庶几將士有所懲戒其軍兵累經潰散及今次首先退避人臣已劄下張灝令密行體究一面斬決去訖曲襄見以罪系京兆府臣曾見曲奇稱其可用已一面勾取外所有王元乞降旨令起發前來其折可求等候王元曲襄到日施行謹具奏知御筆

王元不甚中使休要已差劉銳替折可求知恐帶了本路兵馬張思正冀景何用卿一面處置

奏知折可求兵馬冲散劄子

臣据張灝申今月初六日折可求進兵至郭棚寨初七日卯時与賊兵戰殺退兩合賊增兵犯陣左陣兵力不加遂散動兩陣人馬極力扞敵逾兩時方退恐敵再來奔冲那移還汾州元帶兵馬三萬七千余人除冲散兩陣人馬見收集外見在人馬三萬四千余人騎已再行團結及据折彥質備錄到折可求狀見於汾州待罪已具奏開去訖契勘汾州兩頭項兵馬別无倚仗將帥可求退保汾州人兵不甚散失未可督責便令前進臣已作奉聖旨特与放罪今於汾州城外整飭軍馬下定硬寨選擇精銳人兵時复深入牽制賊勢如何以前進即迤邐攢那進發去訖謹具奏知

御筆

可求不中使已令御帶劉銳輟与卿使此人可用令專节制一路人馬余人可罢节制

奏知催解潛整軍与范世雄會合劄子

臣契勘范世雄所統將兵峒丁刀弩手共三萬人除留下病患人其余并已起發前去見催解潛整飭軍馬候世雄到會合進兵謹具奏知

御筆

解潛不中使可专委世雄败军之将惑衆听亦恐妨妬立功之人

乞正冀景等军法劄子

臣伏奉宸翰宣谕王忠孝等将士功赏圣恩隆厚足以激劝用命立功之人但将士怯懦者多动辄奔北未能仰副陛下张皇六师之意赏既重则刑必行乃克有济臣见体究解潛折可求下首先退避之人如冀景辈皆累经溃散当正军法以为惩戒其捉到军前逃避士卒各依法施行庶几渐革前此玩习之风谨具奏知御笔

甚好卿如此能分朕忧嘉叹不忘王忠孝等告已付彦质赐卿更取会到与未到奏来

乞选代职许归田里劄子

臣伏蒙圣慈特降亲笔抚劳有加仰荷隆恩非臣陨首所能报称窃念臣自今春以来蒙被委任皆极烦难不敢辞避初为留守继为亲征行营使又为都大提举京城四壁守御使今为河北河东路宣抚使自春徂秋俾夜作昼无少休息比日出师尤极忧惧寢食皆废须发尽白深恐心虑凋耗智术浅短有误国事伏望天慈矜怜照察选老成谙练兵事大臣前来军中代臣任职许归田里终始保全使臣不至颠隮仰累陛下眷獎之意不胜幸甚干冒天威无任惶惧待罪之至取进止御笔

今封还所奏今後不可如此方赖卿镇抚决难施行奏知王渊等顾望不进劄子

臣契勘自二十八日出师至初四日凡六日解潛於南北关遇敌马相持四日力战而溃是时敌之重兵皆在南北关王渊若能乘虚速进则太原之围有可解之理出师六日只在平城县西驻泊而平定军之兵亦只在壽阳顾望不进至闻两路师却即便退回殊失应援节制之意今又自务保全不复图进兵解围之策其情可见乞赐圣察

御笔

累批去卿可照会施行边事未宁想劳神虑更宜坚愍期於解围廼朕望也

论督责王渊军深入事劄子

臣伏奉宸翰王渊军马不可督令深入恐孤军失利臣契勘王渊自二十八日出师至初九日只在平城县西去辽州只数十里刘韜闻南北关汾州师却即时勾回不曾遇敌臣亦不曾督令深入如解潛折可求之师臣每约束只是务令持重行数十里皆遇敌而溃此盖将佐不材士卒不用命臣节制不明之罪若谓疾驱深入以轻进故致此败衄即初不如此伏乞圣察

御笔

诚如所论更宜厚赏罚激励士卒用奇决胜一委在卿持重控扼亦当留念

乞韩世忠等劄子

臣伏奉宸翰差刘锐前去汾州替折可求臣初不识锐昨曾见种师道称之今蒙御前辍去甚幸可求俟锐到须令还麟府照管边面不惟累败不可倚仗亦恐强之使留不肯用心但须俟锐到方可指挥臣已差王忠孝前去充副都统今日闻忠孝以重伤就医恐去不得即须且用曲襄更俟体究及曲襄到此詢以方略今日将佐极难得人素不曾拊驯只是闻声且便使唤所以临事未必得其实效近见报召韩世忠董琦黑真赴关此数人臣今春曾经使唤伏望圣慈令发赴本司差往军前取进止

御笔

依所奏数内韩世忠京师为无将且留外余卿一面勾取使唤王忠孝且多方与恩恤难得难得

奏乞差有风力人知濬州

访闻知濬州王师古为患在假久不供职缘本州正当河北冲要控扼之地昨因金人残破修葺城壁制造楼橹开掘壕堑皆未就绪今来防秋之际全藉有风力才干守臣竭力措置须至奏闻者右伏望圣慈速降睿旨令朝廷选差有风力人承替王师古乃不候受告疾速起发赴任供职所贵不致阙事

御笔

一面选差人承填乞奏

乞保全王以宁劄子

臣伏奉宸翰收王以宁奏极可采令臣使之出奇挠敌焚其粮草及招诱耿守忠等臣已遵禀行下契勘以宁勇而有谋然人或谓之狂今日艰难之秋若非狂者安肯为朝廷用冒矢石而立功名哉更望圣慈保全必能自効臣已令以宁与范世雄会合措置解围必先诱敌使我军得一捷然後可以鼓行而前谨具奏知

御笔

甚好当力为保全

乞不推赏王以宁劄子

臣近准枢密院劄子奉圣旨王以宁许孝烈等以鬪敌捉获金人一百余人特与转三官内王以宁仍除直祕阁承御前差快行家齎到王以宁告一轴已收管讫契勘上件金人续据王以宁申言语不通恐是包家人马因南北关溃散在村落打劫逢官军前来抗拒鬪敌致被捉获见押在平阳府根究臣已差使臣并晓番语人前去体问如委是包家人即押赴种师弓下依旧使唤其王以宁许孝烈等不合推赏如系金人即行给降候体究到事实续具奏开次

御笔

依奏

乞督刘韜进兵劄子

臣伏奉宸翰太原祖宗之地当竭力图解断不敢言弃及令臣约束诸将务要持重守险伺便解围臣敢不迎遵睿训除已措置行下外契勘汾州一路军马折可求等不可倚仗须候刘锐到日进兵尚未见起发前来乞降指挥令星夜蹉程前来供职刘韜以河北防秋为言无进兵意臣虽已谕韜令部分诸将与范世雄等约期会合再图解围深虑韜得安肃军报金人重兵压境牵制依前顾望不肯进兵则南北关汾州难以独进伏望圣慈特降亲笔督韜进兵仍録付臣照会所有臣近与刘韜谘目同缴进谨具奏知

御笔

常批与卿者文字便是批与刘韜者可照会施行收复文水县乞指挥刘韜等进兵劄子

臣据张灏王以宁申十五日整龔军马讫犒设将士斩冀景及首先退避兵级百余人号令讫进兵至十七日午时夺得上贤岭诸将用命杀退金人二十余里死者如麻已占据文水县了当系张师正统制军马前去臣已具奏闻及行下张灏等令保明得功人及丁宁戒谕更令占稳审度利害进兵及劄下刘韜范世雄解潜等令疾速乘机会合前进缘韜闻河北探报累得谘目文字未有进兵之意臣已累具奏知外伏望圣慈速赐指挥施行取进止

御笔

措置极善昨日闻捷中外皆庆更行下诸将切当十分防备恐不测来奔冲不可轻进令刘韜占稳牵制奏知金国遣使劄子

臣契勘奉使粘罕军前张亢已还阙颇能道敌中次第伏望圣慈持令赐对可备询问其金国欲遣人使前来使名不逊及河东见屯军马恐为窥伺已尝具奏闻乞速降指挥施行取进止

御笔

令於不曾屯军马别路疾速前来

缴进詹度乞差人兵劄子

臣据詹度画到中山府州军图称本府已差到防秋人兵五千人外余处并未曾差到谨具缴进

御笔

已差万人分往诸处

乞留解潜折彦质劄子

臣准尚书省劄子奉圣旨解潜令发赴钱盖下使唤折彦质赴阙张灏罢节制臣契勘解潜折彦质虽怯懦然两人终与西北将士相谙一溃之後且当责其後效使之整鬬收集以图再举范世雄初到未知本末与西北将士亦未相谙兼亦须得一武臣以为副臣欲且留解潜彦质与世雄同共措置候踏逐到可用武臣令替解潜臣已作奉圣旨行讫其新差汾隰州都统制刘锐至今未见前来乞赐指挥催督施行取进止

御笔

并依所奏刘锐一两日起发彦质略令来奏事奏知范世雄进兵劄子

臣据范世雄申已整鬬军马出南北关据险进兵应援汾州一路军马及据王以宁申已分兵前去收复祁县谨具奏知

御笔

更令诸将十分占稳不可落贼奸便

乞更措置河北人兵劄子

臣累具奏状劄子以金人重兵侵犯河北沿边州郡及诸路帅司防秋人兵数少乞朝廷更行措置伏望留神毋忽敌人以臣劄子降付三省密院措置施行取进止御笔

已差韩世忠统万人前去应援韩世忠已与正任团练使

奏乞降獎谕下张焕状

访闻安肃君知军武功大夫张焕自到任以来修整城池楼櫓教閱军卒不自爱身敢出御敌金人亦稍畏之常作御铁骑奔冲阵图日逐亲自教习士卒委实用心须至奏闻者右臣伏望圣慈特赐獎諭下张焕庶使愈更勉励以图报国谨録奏闻伏候勅旨

御笔

獎諭今付卿

奏劾张灝兵退卻及待罪劄子

臣据张灝申汾州一路军马收复文水县次日金人增兵力战半日间势力不加将士退卻已备録奏闻外契勘张灝违本司节制擅发军马致令落敌奸便及臣不能节制张灝使违约束有误国事伏望圣慈并行黜责已具奏劾待罪取进止

御笔

不须如此安心职事

奏知候种师道到交割劄子

臣准尚书省劄子奉圣旨令臣候种师道到起发赴阙议事臣已知委讫才候师道到交割职事即时起发前去听候指挥谨具奏知

御笔

十日收此奏知军中无事可喜可喜金人河北大段猖獗卿可候师道到日量带衙兵等巡历河北一带至滑州照应措置驱逐敌兵

亲笔宣諭委寄终始

裴廩至知卿在军中悉意措置至忘寝食须发皆白体国如此何忧不济更宜安心勉力以成大功副朕委寄始终不移之意卿每奏请兵一一应副凡事但奏来

亲笔宣諭三首

宣諭闻已斩冀景

闻冀景已斩甚善乃御衆之道久不相见极思企近闻班直四人逃走往范琼处可差人押来禁卫有法不得逃走

宣谕得捷

人日得捷奏如病获痊皆卿措置之力欣跃无穷更宜关报刘韜等同共破敌且须十分占便宜不可少落奸便所有将官已转五官其余人疾速保明闻奏

宣谕不得轻易出兵

李纲不得轻易出兵更与诸将熟议

梁谿集卷五十五

卷五十六

钦定四库全书

梁谿集卷五十六 宋 李纲 撰表劄奏议十八

贺皇帝登宝位表 上皇帝封事

贺皇帝登宝位表

臣某言伏覩建炎元年五月一日赦书皇帝嗣登宝位者多难之际真主以兴天地神祇永有顾歆华夏蛮貊永有奉事照临所暨呼舞惟均【中贺】臣闻天生烝民必立聪明睿智之主以为之君故万邦羣黎有所戴仰国有大故必建戚藩宗屏之懿以纂其祀故社稷郊庙有所依归自有生民以来书契所载古今通义何莫由之国家受天眷命垂二百年圣圣相传功德洽丕冒海?渗漉羣生而靖康改元之初金人称兵再犯王室为长蛇封豕以荐食上国为彗孛欃枪以俶扰中原前皇帝为生灵屈已以讲和以宗社坚壁而固守曾不悔祸莫肯退师率其凶狂陵虐天邑金汤失险朝廷以危致二圣銮舆之北征及百官宗室以咸从寇攘之祸振古所无含生之伦痛愤彻骨况臣世荷荣宠尝忝近司闻问震惊叩心泣血天佑我宋笃兴真人脱身危城之中总师大河之外讴歌狱讼不约而自归将校臣民叩阊而有请纂继大统绍隆前休爰即兴王之都以履崇高之位神器不至於久虚万机不至於久旷岂人之力实天所为恭惟皇帝陛下温恭而文英睿以武夙受茅土为国屏藩世当平康韡棠棣之华萼时适艰棘赴鹄原之急难威德素结於人心孝友耸闻於羣听绍千载之休运膺命世之嘉期以成再造之功以建中兴之业而臣适承召命祇造阙廷率义旅以齐驱靡捐自效闻大号之已建悲喜兼怀冀得覲於清光以粗陈於愚悃孤忠悦效矢死为期臣无任

上皇帝封事【被领开封府事之命总师次江寧府上皇帝封事】

五月日新除资政殿大学士太中大夫领开封府事陇西县开国伯臣李某昧死再拜上封事皇帝陛下自古夷狄为中国患所以待之者不过三策曰和曰战曰守而已长驱深入吾城池坚而人心固则可守凌犯无已吾士卒勇而形势利则可战彼气既慑吾辞理直而威力强则可和故能守而後可战能战而後可和三者虽殊其致一也臣不敢远引前古请借景德靖康之事以明之真庙景德中契丹百万入寇廷臣之议有欲幸江南及蜀以避之者赖寇准一言而决遂幸澶渊渡河而亲征既杀其酋挾揽羌情震怖遣使请和捐金币三十万而约成是景德之事非独能守而於战与和两得之所以盟好之固踰百年而两国生灵皆赖其利也至靖康初金人称兵以犯中原当时亦有为避狄之计者而後卒坚守骄骑薄城攻围连日杀伤甚衆贼气挫矣而吾之援师日集和非所难朝廷主谋之臣苟欲脱一时之祸而不为长久之计其所邀求一切许之既割三镇又质亲王又取犒师之物金银币帛不可胜计千倍於澶渊之时而岁赂之数又不与也有以死争之而弗能得者迨援师之集既衆士气勇锐可以施周亚夫困七国之策以与之再盟而朝廷惩姚平仲刼寨小衄遂寢用兵之谋及其退也又不复邀

击遂使金人志得气满有轻中国之心是靖康之事止於能守而於和与战两失之也其後三镇之兵民为国坚守朝廷始以保塞陵寝之故遣使计议愿以租赋代割地之约金人唯阿造为衅端以寇边而许和犹自若也主议者信之以为其和必成而凡欲治兵设备者皆以为害於和议而沮罢之金将渡河犹以为割河北河东之地奉之以袞冕辂车尊号而师可解及既登城矣犹逼朝廷降诏假和议遂定之说以款勤王之师至尽取都城之子女玉帛然後刼质二圣六宫宗室百官以行然则自今观之所谓和议者果如何也夫金人自用兵以来专以和议疑敌人以取胜其与契丹二十余战每战得地辄和既和复求衅端以战而卒灭之今於中国复用此策中国信之而不悟至於今日祸败如此岂不重可痛哉或谓吾之兵力不迨金人远甚靖康之初虽欲坐困邀击必无成功徒结深怨故不得已而信其和此殆不然夫论兵当论其机会一失机会弗可为也靖康之初金人初无犯阙之意兵不过六万太半杂种而河北边郡帅府既不设备沿河又无控扼之兵是以乘势直捣都畿而吾之守御既严援师既集进不能攻退不能却以重兵临之而以余军待其抄掠即行掩击则粮餉絶而寇可图矣既归渡河驱掠妇女輜重徧野半济击之其法必胜而朝廷皆不以为然失此机会故有今日之患夫夷狄者小人之类犹之盗贼也小人无以制御之而欲乞怜以望其有惻隐之心不可得已盗贼白昼入主人之室探匱发篋得其所欲曾不为之扞敌则何惮而不再来何为而不尽取哉若夫吾之将士习於军政久废之後固难得人然以忠义激其心以赏罚作其气岂无可可用者将士犹手足也朝廷犹腹心也今与人鬪腹心怯而望手足之强必无此理朝廷议论二三而望将士之用命盖亦难矣此皆前事不可追悔而臣之所以痛心泣血者二圣沈於北廷生灵於涂炭自古夷狄之祸中国未有若此其甚也天佑我宋必有英主为宗庙社稷之所顾依万邦羣黎之所戴仰拨乱反正以图中兴故使陛下圣躬得脱於屡危之际去春奉命使金而去其军中去冬出自危城而总师朔部乃有今日入继大统之事皆天地神之所显相非人力也恭惟皇帝陛下英睿之?久动羣听孝友之德实形四方然而嗣位之初当宗社艰危之秋中国衰弱之日上则欲还二圣之銮舆下则欲拯生灵之危阽扞御大敌保绥万方厥惟艰哉思其艰以图其易则今日待夷狄之策所谓和战守者当何所从而可也欲和乎则前日之和其效如此而金人北归虽宗室亦尽徙以行其意为如何而二圣之辱实不共戴天之讎和岂可复信欲守乎则朝廷已失河北河东两路士民之心或为金人之所得或为豪杰之所据密迩畿甸易为侵陵守岂复易图欲战乎则去冬将佐卒伍乏人抚御皆散而为盗贼兵力益弱经此祸乱士气益衰所谓勤王之师多募之於田亩之间不习兵革战岂可必胜是三者今日国论以何为宗顾臣日夜思虑念之至熟因时施宜有策於此及当今之务数十条皆急切而不可缓者非得望清光於咫尺之间未易殫言也夫以今日之国势而望靖康之初其不相侔岂止相什哉然而犹有可为者祖宗德泽在人者深陛下英明天下仰望以谓必能济大业转危而为安也且害菑之臻国家代有或多难以兴或将坠复续故无知祸齐而小白实长五霸骊姬乱晋而重耳实盟诸侯司马晋罹聪曜之酷而元帝起於江东李唐有安史之乱而肃宗起於灵武况我有宋幅员万里生齿之衆士民犹足用哉傥能尝胆励句践之心枕戈怀子胥之志驾馭豪杰揽用贤材法创业之雄谋革天下之弊事则中兴之功亦不难建昔少康以一旅之衆灭浇羿而祀夏配天不失旧物光武以数千之卒破寻邑而克扫大憝汉以再

<佐卒伍乏人抚御皆散而为盗贼兵力益弱经此祸乱士气益衰所谓勤王之师多募之於田亩之间不习兵革战岂可必胜是三者今日国论以何为宗顾臣日夜思虑念之至熟因时

施宜有策於此及当今之务数十条皆急切而不可缓者非得望清光於咫尺之间未易殫言也夫以今日之国势而望靖康之初其不相侔岂止相什哉然而犹有可为者祖宗德泽在人者深陛下英明天下仰望以谓必能济大业转危而为安也且害菑之臻国家代有或多难以兴或将坠复续故无知祸齐而小白实长五霸骊姬乱晋而重耳实盟诸侯司马晋罹聪曜之酷而元帝起於江东李唐有安史之乱而肃宗起於灵武况我有宋幅员万里生齿之衆士民犹足用哉傥能尝胆励句践之心枕戈怀子胥之志驾驭豪杰揽用贤材法创业之雄谋革天下之弊事则中兴之功亦不难建昔少康以一旅之衆灭浇羿而祀夏配天不失旧物光武以数千之卒破寻邑而克扫大憝汉以再

兴况陛下之明而临御九有之师哉然大患之後百孔千疮夏已及半去秋不远非早图之则秋膏马肥寇骑又将奔突不能支梧四海且有横流之势可不为之寒心以夜继日而为其所当为者耶臣素愚直平日惟知读书深考古今治道欲推之当世以尊主而芘民又尝愿以忠义自奋以徇国家一日之急当宣和之初蒙道君皇帝采其虚声擢置左史得侍清光窃见天下有危乱之兆因奏疏论水事其意以谓变异不虚发必有感召之因灾害未易弭必有销复之策乞因侍立面奏其故譬犹失火之家欲为曲突徙薪之谋而权臣忌之沮抑使不得对因而迁谪流落七年其後有盗贼兵革之事道君皇帝感悟以奉常召还然已晚矣靖康改元金人犯阙前皇帝於仓卒扰攘之中听用其言擢与大政窃见和议不可保信因力陈兵备之策其意以谓夷狄之性贪婪无厌不可恃其不来当恃我之有备宜益治兵收将士之心以御外侮欲以身任其事譬犹救火之

<集部,别集类,南宋建炎至德佑,梁谿集,卷五十六>家实为焦头烂额之客而忌嫉者衆讒譖百端使其身不得一日安於朝廷其策百不得行於一二卒诬以罪窜之远方其後敌骑再犯都畿而前日以和议为然者举皆误国前皇帝感悟复有今日之召然又已晚矣臣荷二圣之知遇悼孤忠之失图虽心驰魏阙九重之中而身在江湖万里之外不获执干戈卫社稷以伸臣子犬马之诚疾首痛心泣尽而继之以血恭承召命即日戒途率湖南义兵倍道前进欲趋元帅行府以造阙庭而行次江淮恭闻二圣羽卫北迁远狩沙漠痛愤彻骨絶而复苏继覩陛下俯徇羣情嗣登宝位悲喜交集不能自胜夫人君大正始故於即位之初立政用人必有以大慰天下之望者况於国势削弱天步艰难之时其可忽哉恭俭者人主之常德也英哲者人主之雄材也继体守文之君则恭俭足以优於天下至於兴衰拨乱之主则非英哲不足以当之惟其哲故见善明足以任君子而不为小人之间惟其英故用心刚足以断大事而不为小故之所摇在昔人君体此道者惟汉之高祖光武唐之太宗本朝之艺祖太宗为然臣愿陛下深考汉唐三帝与艺祖太宗之所以创业中兴大过人者了然於胷次物至而应之则天下之事虽未底绩固已定於心术之中矣臣以疎远未覲清光辄敢以刍蕘之言求吁天地诚以爱君忧国心迫而情切故不自知其不可伏惟圣慈留神幸察使愚者千虑或有一得之可采则臣所以尽忠於陛下者乃所以报二圣之知遇也干冒天威无任惶惧战越之至

卷五十七

钦定四库全书

梁谿集卷五十七 宋 李纲 撰表劄奏议十九

辞免领开封府事奏状

辞免领开封府事表

节制湖南人兵赴行在奏状

乞将江寧府作过周德下胁从军兵分隶京东州军奏状

辞免尚书右仆射第一表

辞免尚书右仆射第一劄子

谢赐茶药表

辞免御筵奏状

辞免领开封府事奏状

右臣蒙恩复元官除前件职名差遣臣窃以国家艰难之时特加湔洗有所任使不敢辞免然京邑浩穰之地当金人残破之余必其惠政足以牧养细民风力足以镇服奸猾乃称兹选实难其人而臣忧患相仍志气凋落使当繁剧之任必貽瘵旷之愆伏望圣慈许臣祇赴行在朝见上殿乞特除臣一在外宫观差遣任便居住则仰荷天地保全之恩尚冀异时得尽犬马万一以图报称臣无任祈恳之至

辞免领开封府事表

臣某言伏奉闰十一月三日圣旨蒙恩复元官除资政殿大学士领开封府事者负罪黜幽方惧滨於死所有过用旧乃幸许於生还叨秘殿之华资膺天府之重寄恩光并集图称为难敢冒贡於忱辞以仰干於鸿造【中谢】伏念臣迂愚有素结约亡奇顾造道之弗优乃逢辰之过幸秉史笔於政和天临之日与国政於靖康龙飞之初直道以行孤忠自许但知爱君而忧国岂复计家而谋身初被中伤若沙虫之射影终遭巧诋类贝锦以成文致慈母投杼而下机缘苍蝇变白而为黑必欲挤之死地岂徒窜之蛮方赖仁明之烛幽俾孤危而假息飘零去国寧悲骨肉之生离寤寐怀君恐堕寇讎之奸计果闻铁骑再犯金城号令阻隔者半年烟火断

絕者千里虽心驰魏阙之下常梦清都而身滞江湖之滨莫陪义旅痛心疾首泣血忘生忽承召命之颁倏若沈疴之去虽韩安国起徒步以为内史而张子高由亡命以刺冀州方之所蒙詎足为比顾以材力绵薄无能之质而当贤智驰骛不足之秋已试罔功力辞乃可然念宗社危急国家艰难二圣拘甚危之城四方骇不存之地乃君父忧辱之日岂臣子辞难之时率励军声誓清国步舳舻衔尾破巨浪於长江旌旗改容触畏景於隆暑碎身何有陨首以之伏遇皇帝陛下应天顺人纂图继统英武震於夷狄孝悌通於神明揽用贤材驾驭豪杰励枕戈尝胆之志有济世安民之心而臣忧患侵寻志气凋落抑强扶弱詎堪牧养於细民修政攘戎庶可图上於方略伏望收还成命以穆师言则臣失东隅而收桑榆捐躯未晚先朝露而填沟壑结草为期臣无任

节制湖南勤王人兵赴行在奏状

右臣昨自观文殿学士知扬州责授保静军节度副使建昌军安置寻移夔州安置未到间蒙恩复元官除前件职名差遣系闰十一月三日圣旨道路艰阻近方承命臣自在远方闻金人攻围都城之久凡以忠义自奋者皆募兵入援况臣荷国重恩尝被柄用愿效犬马之力夙夜不遑徒以身在罪籍不敢妄发及承召旨即日率湖南提举等司勤王人兵赴元帅府稟受节制会合前进行次池州伏覩元帅府檄书方审都城失守二圣播迁臣子之心不胜痛愤至太平州伏覩赦书陛下嗣登宝位赦书内一项应宗室及官员并忠义之士在外非曾奉朝廷及大元帅府指挥激於忠愤自募勤王人兵未有统属仰交付所至州县兵官量带人从前来行在契勘臣所率系湖南提举等司人兵系朝廷指挥所起之人即非私募今来防秋不远窃虑难以放散臣见节制取真扬便路前去泗州宿州屯泊听候朝廷指挥臣量带防护当直人赶赴行在伏望圣慈特降旨俟臣到日许令先次朝见上殿谨录奏闻

乞将江寧府作过周德下胁从军兵分隶京东州军奏状

右臣节制湖南勤王人兵行次江寧府有作过军人首领周德等昨於四月一日反叛胁逼徒衆拘囚安抚使宇文粹中杀伤钤辖兵将官通判已下官员数十人土民死者甚衆刼掠官私财物为之一空据城守拒东南震动虽受发运司招安借补官职一向迁延推托缘故不肯起离怙衆阻兵作过如故人情汹惧臣以便宜檄令听受节制前去勤王其周德等以重兵四集方肯听命拣到勤王人兵一千余人皆系周德胁从之衆欲起发间据江东路安抚使司申【云云】其首领补官人周德等四十六名已行军令处斩讞即与其余军兵自不相干差本路提举常平官王枋统领随逐臣起离江寧府前来东南人情方始安贴臣已牒王枋统领上件人兵於泗州屯泊听候朝廷指挥伏望圣慈特降睿旨将上件人兵分隶京东路州军离散其衆候到令具军分姓名报江寧府津遣逐人家属赴分隶去处勿令更归庶几别无他虞

辞免尚书右仆射第一表

臣某言伏奉制命除臣正议大夫尚书右仆射兼中书侍郎进封陇西郡开国侯加食邑实封者尹厘京邑之剧冒贡忱辞延登揆路之华遽颁涣号方修政攘戎之多故须经体赞元之实

才自揣非宜诚难叨据敢吁天而有请良躋地而靡容【中谢】臣闻自昔中兴之君必得非常之士相与同德以克有功传说之相武丁济巨川作舟楫之用周宣之任吉甫宪万邦有文武之?光武起於南阳邓禹为之羽翼元帝兴於江表王导为之腹心因时施宜亦克用义况於拨乱反正大有为之主岂无高识远略不世出之臣洪惟国家混一区宇七圣之创业垂统威灵在天两朝之继体守文德泽渐世属强邻之逆道困中原以诈谋神都失金汤之虞翠华有沙漠之幸天命未改真人以兴开府建牙虎步大河之外膺图履籍龙翔兴王之都固将尝胆思亲枕戈待旦革积年之蛊坏新函夏之观瞻张皇六师缉熙庶绩以雪二帝之辱以伸中国之威宜有杰材来佐休运方兹天步艰难之际实非琐质侥幸之秋如臣者器不逮人学未闻道识迂用拙世知断断之无他志广材疎自笑落落而难合偶缘遭遇获与政机已试罔功坐致衆毁之销骨既衰多病重以积忧之熏心去魑魅之域而已幸於赐环簪云龙之廷而方期於披雾丐归故里以养余龄岂谓皇帝陛下默而识之於衆言殽乱之时举而用之於羣陰闭塞之日考慎其相濫及非才顾蚩力岂足以负山而螳臂安能以当辙一身何有虽知取义而舍生斯民所依大惧妨贤而误国伏望皇帝陛下收还成命改授其人持危扶颠允迪栋隆之吉力小任重免貽鼎折之凶岂独微臣自幸於保全盖於万方同资於庆赖敢输悃悞仰冀哀矜臣无任

辞免尚书右仆射第一劄子

臣伏奉制命除臣某官已奉表辞免以闻者伏念臣信古太过涉道弗优徒抱爱君忧国之孤忠初无防患保身之远虑被两朝之眷遇躋衆俊以驱驰忌嫉者多谗谤易积自去天阙迨今踰年岂期夷狄之凭陵遂致宗社之危急闻问惊惶泣血痛心恭承睿主飞龙於宋都适当微臣赐环於湖外所愿俯伏文陛瞻望清光敷陈苦心献纳至计然後丐此骸骨归于山林拭目中兴没齿无恨伏蒙皇帝陛下眷知有素图任独先俾其效力於艰难之时欲使收功於桑榆之日上荷恩德固当捐躯而臣忧患以来志气凋落加有负薪之疾初无济川之才傥不量力而度能必致瘵官而误国故敢披陈肝胆仰冀矜怜改授俊臣收还成命勿嫌反汗之累以免覆餗之忧特降睿旨俟臣朝见上殿乞除臣一宫观差遣任便居住以安愚分干冒天威无任战越之至

谢赐茶药表

臣纲言伏蒙圣慈以臣赴召将次阙廷特降中使传宣抚问赐臣茶药各一银合者祇覲清光方幸日畿之密迓亟颁温诏爰瞻星使之来临悯其微勤錫以异数仰荷眷恩之厚不知感涕之零【中谢】伏念臣被遇两朝粗守一节当陛下龙飞之际适微臣环召之初顾兹川涂之阻修恨无羽翼以奋励以日为岁戴星以行伏蒙皇帝陛下曲轸睿慈特加抚问念其暑行劳勩之故赐以涤烦蠲疴之珍顾臣何人乃复得此退惟鄙陋诚难副寤寐之求仰奉谘询或能致药石之报臣无任

辞免御筵奏状

右臣今月二十九日准尚书省劄子奉圣旨以臣将到国门特赐御筵三省枢密院官并赴内
黄潜善押筵仰戴天恩不胜感激然臣趋赴行在未获瞻望清光遽颁异数岂所宜蒙方朝廷
多事之时此礼宜省伏望圣慈特赐寝罢以安愚分臣无任恳祈之至

梁谿集卷五十七

卷五十八

钦定四库全书

梁谿集卷五十八 宋 李纲 撰表劄奏议二十

十议上【初至行在未受命以十议邀说】

议国是 议巡幸

议赦令 议僭逆

议伪命

议国是

臣窃以和战守三者一理也虽有高城深池弗能守也则何以战虽有坚甲利兵弗能战也则何以和以守则固以战则胜然後其和可保不务战守之计惟信讲和之说则国势益卑制命於敌无以自立矣景德中契丹入寇罢远幸之谋决亲征之策捐金币三十万而和约成百有余年两国生灵皆赖其利则和战守三者皆得也靖康之春粗得守策而割三镇之地许不可胜计之金币以议和惩刼寨之岌而不战於和与战两失之其冬金人再寇畿甸廷臣以春初固守为然而不知时事之异胶柱鼓瑟初无变通之谋内之不能抚循士卒以死扞贼外之不能通达号令以督援师金人既登城矣犹降和议已定之诏以欸四方勤王之师使金得逞其欲凡都城玉帛子女重宝图籍仪卫辇辂百工伎艺悉索取之次第遣行及其终也刼质二圣巡幸沙漠东宫亲王六宫戚属宗室之家尽驱以行因逼臣僚易姓建号自古夷狄之祸中国未有若此之甚者是靖康之冬并守策失之而卒为和议之所误也天佑有宋必将有主故使陛下脱身危城之中总师大河之外入继大统以有神器然以今日国势揆之靖康之初其不相若远甚则朝廷所以扞患御侮救寧万邦者於和战守当何所从而可也臣愚虽不足以知朝廷国论大体然窃恐犹以和议为然也何哉二圣播迁陛下父兄沈于北廷议者必以谓非和则将速二圣之患而亏陛下孝友之德故不得不和臣窃以谓不然夫为天下者不顾其亲顾其亲而忘天下之大计者此匹夫之孝友也昔汉高祖与项羽战于荥阳成皋间太公为羽军所得其危屡矣高祖不顾其战弥励羽不敢害而卒归太公然则不顾而战者乃所以归太公之术也晋惠公为秦所执吕卻谋立子圉以靖国人其言曰失君有君羣臣辑睦甲兵益多好我者劝恶我者惧庶有益乎秦不敢害而卒归惠公然则不恤敌国而自治者乃所以归惠公之术也今有贼盗於此刼质主人以兵威临之则必不敢加害以卑辞求之则所索弥多往往有不可测之理何则彼为利谋陵懦畏强而初无惻隐之心故也今二圣之在北廷莫知安否之审固臣子之所不忍言然吾不能逆折其意又将堕其计中以和议为信然彼必曰割某地以遗我得金币若干则可不然二圣之祸且将不测不予之是陛下之忘父兄也予之则所求无厌虽日割天下之山河竭取天下之财用山河财用有尽而金人之欲无穷少有衅端前

所予者其功尽废遂当拱手以听命而已昔金人与契丹二十余战战必割地厚赂以讲和既和则又求衅以战卒灭契丹今又以和议惑中国至於破都城灭宗社易姓建号其不道如此而朝廷犹以和议为然是将以天下界之敌国而後已臣愚窃以为过矣为今之计莫若一切罢和议专务自守之策而战议姑俟於可为之时何哉彼既背盟而刼质地不可复予惟以二圣在其国中不忍加兵俟其入寇则多方以御之所破城邑徐议收复建藩镇於河北河东之地置帅府要郡於沿河江淮之南治城壁修器械教水军习车战凡扞御之术种种具备使进无抄掠之得退有邀击之患则虽时有出没必不敢深入而凭陵三数年间生养休息军政益修士气渐振将帅得人车甲具备然後可以议大举振天声以讨之以报不共戴天之讎以雪振古所无之耻彼知中国能自强如此岂徒不敢肆凶而二圣保万壽之休亦将悔祸率从而銮輿有可还之理傥舍此策益割要害之地奉金币以予之是倒持太阿以其柄授人藉寇兵而资盗粮也前日既信其诈谋以破国矣今又欲蹈覆车之辙以破天下岂不重可痛哉或谓强弱有常势弱者不可不服於强昔越王句践卑身重赂以事吴而後卒报其耻今中国事势弱矣盍以句践为法卑身重赂以事之庶几可以免一时之祸而成将来之志乎臣以谓不然夫吴伐越句践以甲楯三百栖於会稽遣使以行成而吴许之当是时吴无灭越之志故句践得以卑身厚赂以成其谋枕戈尝胆以励其志而卒报吴今金人之於国家如何哉上自二圣东宫下逮宗室之系於属籍者悉驱之以行而陛下之在河北遣使降伪诏以宣召求之如是其急也岂复有恩於赵氏哉虽卑身至於奉藩称臣厚赂至於竭天下之财以予之彼亦未足为德也必至於混一区宇而後已然则今日之事法句践尝胆枕戈之志则可法句践卑身厚赂之谋则不可事固有似之而非者正谓此也然则今日为朝廷计正当岁时遣使以问二圣之起居极所以崇奉之者至於金国我不加兵而待其来寇则严守御以备之练兵选将一新军律俟吾国势既强然後可以兴师邀请有此武功以俟将来此最今日之上策也古语有之曰愿与诸君共定国是夫国是定然後设施注措以次推行上有素定之谋下无趋向之惑天下之事不难举也靖康之间惟其国是不定而且和且战议论纷然致有今日之祸则今日之所当监者不在靖康乎臣故敢陈和守战三说以献伏愿陛下断自渊衷以天下为度而定国是则中兴之功可期矣取进止

议巡幸

臣窃以国家都汴处中以临四方垂二百年靡有变故岂特仁德足以结万邦之心亦由以中制外据天下之利势使之然也方今多难之际不可定都以权时宜固有所不得已者然宗社朝廷一迁天下之势必有偏而不起之处中原摇动卒难复安此臣所以夙夜思虑欲为陛下权天下之势以济长久之策也古者帝王有巡幸之礼故虞舜五载一巡狩羣后四朝而成王抚万邦巡侯甸见於周官之书今四方多故宜讲巡幸之礼以镇抚之除四京外以长安为西都襄阳为南都建康为东都各命守臣营葺城池宫室官府使之具储峙糗粮积金帛以备巡幸陛下时乘六龙銮輿顺动以天临之览观山河之形胜省察牧守之治忽抚士民问风俗收豪俊之用以攘戎狄复境土然後复据河洛而都之此今日权宜之上策也用臣此策其利有三藉巡幸之名国势不失於太弱一也不置定都使夷狄无所窥伺二也四方望幸使奸雄无所觊觎三也至於费用则长安当委之四川襄阳当委之荆湖建康当委之江淮闽浙深戒守臣因陋就简勿事壮丽图来上惟取便安因缘搔扰者重寘于法则三都成而天下之势安

矣议者谓车驾当且驻蹕应天以系中原之心或谓当遂幸建康以纾一时之患臣皆以为不然夫汴京宗庙社稷之所在天下之根本也陛下嗣登宝位之初岂可不一幸旧都以见宗庙社稷慰安都人之心下哀痛之诏择重臣以镇抚之使四郊畿邑之民入保益治守御之具为根本不拔之计哉天下形势关中为上襄阳次之建康又次之今舍上中而取其下非得计也宜先期降勅榜晓谕军民及以修谒陵寝为名择日巡幸据要会之地以驻六师既有以系中原之心又有以纾一时之患策无出於此者臣愚伏望圣慈断自渊衷详酌而推行之天下不胜幸甚

议赦令

臣伏读陛下登宝位赦书窃怪与祖宗登极之赦恩数不同及得张邦昌僭位伪赦考之乃知登宝位赦书一切比附以行也臣所致疑者有三祖宗登极惟赦杂犯死罪以下至於恶逆则不赦盖恶逆者天地之所不容使其罪亦得以幸免则人伦废而天理絶矣邦昌尝位宰辅依附夷狄易姓建号身为恶逆之魁故其伪赦不循典宪而首为乱阶今陛下缙承大统以为神民万物主岂可不法祖宗而赦恶逆哉此臣之所疑者一也祖宗登极自京官以上有转官恩数而选人则否岂非以其员多而太滥故耶邦昌僭窃欲以私恩收天下之士心故其伪赦虽选人亦有循资之文今陛下嗣位於艰难多事之时正宜吝惜名器示天下以大公至正之道岂可不法祖宗而行滥赏哉此臣之所疑者二也祖宗登极於有罪犯安置编管羁管等人次第推恩或量移或自便或叙用或复官以其罪之轻重为差故恩施而威立邦昌伪赦一切复官而有职名者又皆复职惟以姑息更无典宪今陛下出政於国势削弱之际正宜分别是非行核实之政岂可不法祖宗而务姑息哉此臣之所疑者三也是三者岂朝廷以今日事势为正当如此耶将以邦昌伪赦寛大而不比附以行则失天下之心耶抑邦昌与闻国事欲以此盖其恶耶臣愚窃以为过矣宜降诏改从祖宗之制恶逆不赦选人不循资安置编羁管人令刑部检具元犯以闻等第施行则国政立而人心服矣春秋大正始今日所当正者莫先於此伏望圣慈断而行之以公天下为度而勿以反汗为嫌天下幸甚

议僭逆

臣闻节义者天下之大闲僭逆者臣子之极恶春秋之义人臣无将将而必诛况以僭窃位号为天下所共愤怒者哉谨按张邦昌被遇道君之朝久与机政际会靖康之日擢冠宰司资其重臣奉使敌帐初无忠义殉国之意但为谀佞保身之谋去中国者踰年从北骑以偕至方二圣播迁之日无一言营救之忠凭恃金人盗据神器国破而资之以为利君辱而攘之以为荣窃有乘輿安处宫禁降旨以行其僭命南面以朝其伪臣易姓建邦四十余日逮金人之既退方降赦以收恩考其四日之手书犹援周朝之故事而陛下总师于外天人所归勤王之兵四面云集乃始退还旧班遣使迎奉今乃冒处王爵极其褒崇不闻泥首以自拘方且偃然为得计人之干纪一至於斯傥或逃诛何以立国或谓陛下嗣登大宝乃邦昌揖逊之谋以罪为功臣所不喻夫英宗之曾孙神宗之孙道君之子渊圣之弟惟有陛下一人而已天佑我宋必将有主主宋祀者非陛下而谁四海臣民所共欣戴邦昌何力之有哉今其党与尚布朝列秋高马肥突骑猖蹶挟借其势陛下不得而制之矣中夜以思不寒而栗伏望陛下断以英哲而察

其罪恶特正典刑而肆诸市朝以慰四方忠臣义士之心以垂万世乱臣贼子之戒天下幸甚

议伪命

臣闻运会之厄何代无之为臣子者不幸而遇其时则仗节死义有死而已国家涵养士类垂二百年适遭金人之变刼质二圣拥銮舆而北迁逼立臣僚易姓建号而近臣百官忘朝廷之厚恩惜性命於俄顷稽顙屈膝奉贼称臣有为金人之股肱驱逼道君太上皇帝皇太子后妃及搜捕宗室戚属者有为金人之喉舌传命令废本朝而建伪楚者有因为奸利污染国戚者有为伪楚之辅翼总其政事者有受伪楚之官爵与闻议论者有肆为恶言以辱本朝以谄邦昌者或为之草劝进之表或为之定册立之仪视之恬然不以为怪夫节义者正所以责士大夫也至於武夫则当阔略昔李唐有安禄山之乱大臣如达奚珣陈希烈之流皆相贼用事而其余受伪命者肃宗反正以六等定其罪然後唐之威令申以有中兴之功今宜仿此考核其罪之轻重以为之用事者为一等以受伪官迁职者为一等以北面而臣事之者为一等其有致仕及曾乞致仕而不许者犹有羞恶之心并与旌别应以忠义为贼所杀如李若水等皆追赠而优恤其家则善者知劝恶者知戒天下之士风丕变矣夫节义者天下之大闲也近年以来士知利而不知义故平居无事之时惟以保家谋身为得策而一经变故坐视君父如行路之人自非一振国威大变其风天下未易理也伏望陛下断而行之以扶持节义之教天下幸甚

梁谿集卷五十八

<集部,别集类,南宋建炎至德佑,梁谿集>

卷五十九

钦定四库全书

梁谿集卷五十九 宋 李纲 撰表劄奏议二十一

十议下

议战 议守

议本政 议贵成

议修德

议战

臣闻天生五材民并用之阙一不可谁能去兵故黄帝伐蚩尤於涿鹿之野尧伐丛支胥敖舜伐三苗禹伐共工汤伐有夏文王伐崇武王伐商皆缀甲厉兵効胜於战阵之间夫五帝三王岂不欲坐致治安哉顾其势有所不能故必以战续之寛则两军相攻迫则杖戟相撞然後可以建大功而定祸乱是故兵胜於外义强於内威立於上民服於下欲错国於尊强者非兵不可也本朝艺祖太宗削平僭乱混一区宇用兵不过十万人而天下承平垂二百年夷狄宾服外患不兴豪俊销亡内难不作治既极矣兵亦随废至於近年有养兵之费无训兵之法有蓄兵之名无用兵之实军政大坏金人因之得以陵侮中国而致靖康之祸则兵制久废之过也夫秦晋齐魏韩赵皆天下劲兵之地也古之为国者得其一则足以战胜而霸诸侯今国家兼有之而每与金人战望风辄溃不能取胜则积威约之渐也方今当京邑残破二圣播迁之後国势益弱士气益衰而欲遽与之战正犹病人气体未复而欲与壮士鬪必不可也昔周用乡遂之兵而出无不胜汉用羽林孤儿七郡良家子而制服四夷唐用府卫之兵而威振天下齐用管仲之法而九合诸侯秦用商鞅之令而卒并六国然则有天下国家者强兵战胜之术槩可覩矣为今之计莫若法乡遂府卫之制而寓兵于农法羽林孤儿七郡良家子而参以募兵改法更令信赏必罚以壮国威以养士气使之有勇而知方然後兵乃可用也昔句践有会稽之耻欲用其民而五年休养五年训练卒以报吴今天下之广生齿之庶休养训练当以三年为期则战可以得志矣惟国家承平之久文事太胜士以武弁为羞而学者以谈兵为耻至於战卒贱辱之甚无以比者正当趋时之变以武为先能言兵者稍褒崇之置武功爵益养死士有以得其心而作其气则战胜於一日之间有不难也伏惟陛下留神幸察

议守

臣闻居於山者必高垣墙固柴栅以虞虎狼之害居於野者必盛僮仆励甲兵以防盗贼之患夫金人虎狼盗贼也曾不过为防虞之计而裂地厚赂以予之譬犹割肉以啖虎狼而欲止其

转噬出财帛畀盗贼而欲止其侵陵岂可得哉臣所谓三年然後为可用者谓大举以报今日之耻也至於守备则自今以往当日为虞害防患之计不可輒辍夫金人既已得所欲挟二圣卷六宫而北之矣逼胁邦昌使僭伪号其意亦岂果在邦昌哉特迫於时月不得不归知天下之戴赵氏必将有主而陛下总兵於外必为臣民之所推故留此以为中国衅端其意不难知也语曰鞭虽长不及马腹夫以四方万里之远而金人欲以力经营之故其力之所及者靡不悉取而其力之所未及者留衅以为异日之图此必至之理也为今日守备之策当以河北河东之地建藩镇立豪杰使自为守朝廷量以兵力援之而於沿河沿淮沿江置帅府要郡以控扼修城池备器械屯兵聚粮坚壁清野教车战以御其奔冲习水战以击其济渡使进无所掠退不得归则其势必不敢深入至於陵边隅破城邑则不能保其必无也但能备御今冬不至越軼使国势渐定人心稍安则自此得益修军政吾无患矣臣愚料之金人秋冬之交决须再来仍分为两道由河东来者自京西以扰关中与夏人连谋欲窥陕川由河北来者自京东以扰淮南与高丽连谋欲窥江浙则京西陕右京东淮南不可不为之防当择大帅屯重兵以经略之譬犹治病当视脉息察邪气之所入预遏絶之不然待其既至而後治则无及已惟陛下熟计而早察

议本政

臣窃以朝廷天下之本也政事法度於是乎出故中书进拟门下审駁尚书奉行皆所以宣布天子之命令使四方禀承焉政出於一则朝廷尊而天下安政出於二三则朝廷卑而天下危天下之安危系於朝廷之尊卑而朝廷之尊卑系於宰相之贤否与夫人主听任之重轻其可忽乎唐至文宗之朝可谓衰弱矣武宗既立得一李德裕相之而威令遂振何哉德裕知所本故也其初为相即上言曰宰相非其人当亟废罢至天下之政则不可不归中书武宗听之号令纪纲咸自己出故能削平僭伪号为中兴然则艰难多事之秋所以出政者尤不可以不一也自崇观以来政出多门阉宦恩幸女谒皆得以干与朝政所谓宰相者保身固宠不敢以为言遂失其职法度废弛驯致靖康之祸非一朝一夕之积也臣愚诚愿陛下深思天下安危之本察德裕之言而法武宗之任监崇观之失以刷靖康之大耻宗社生灵不胜幸甚

议责成

臣窃以废核实之政舍久任之法而欲事功之成虽尧舜有所不能故唐虞之际三载考绩三考黜陟幽明以鰲治水至於九载绩用弗成然後竄殛加焉此所以允厘百工而庶绩咸熙也今以州县之间任一官效一职者数改易之犹不足以为治况於朝廷之上艰难多故之秋而欲收功於旬月之间哉以靖康一岁中考之宰相易者七人自知枢密院事至签书枢密院易者二十余人宣抚制置使副易者十五人进退将帅大臣未有如是之速者是以措置施設议论取舍人各不同先後舛逆首尾衡决纷然无所适从至其甚也大臣莫肯任事而坐观胜负者攘臂於其间反为得策故其祸变不可胜道且以金人观之自用兵以来其谋议任用之人亦尝有所改易否乎所谓黏罕斡离不者皆握兵十余年其威信足以用其衆而吾以骤进亟罢之将帅大臣当之宜乎不能取胜也譬犹奕者置碁不定不足以胜敌况於用人不知信任之道而欲拨乱反正以扞大患以图中兴岂可得哉伏望陛下於选任将帅大臣之际精加考

择得其人则久任而责成功勿为细故之所摇勿为小人之所间则天下之事庶乎可为也

议修德

臣闻昔有夏先后方懋厥德罔有天灾山川鬼神亦莫不寧暨鸟兽鱼鼈咸若而伊尹之称商则曰非天私我有商惟天佑于一德非商求于下民惟民归于一德帝王之所以为神民万物主者仰以动天俯以感民非德何以哉方今国家新罹夷狄之祸百度多废四方未寧乃天意民心去就之际伏望陛下日新盛德以感动之体尧之仁以覆民躬舜之智以察物卑宫室菲饮食以法大禹之俭远声色遗货利以法成汤之明至于日昃不遑暇食如文王之忧勤一怒而安天下之民如武王之果毅豁达大度同汉高祖之用人听言如流同唐太宗之纳谏勿以小善为无益而弗为勿以小累为无伤而弗去日慎一日新而又新思宗社之危而不忘之於寤寐念父兄之辱而欲见之於羹墙出於至诚悠久不息则天意民心自然感动以图中兴有不难也书曰皇天无亲惟德是辅又曰民罔常怀怀于有仁传曰应天以实不以文动人以行不以言臣愿陛下特留圣意天下不胜幸甚

梁谿集卷五十九

卷六十

钦定四库全书

梁谿集卷六十 宋 李纲 撰表劄奏议二十二

辞免尚书右仆射第二表

辞免尚书右仆射第二劄子

谢除尚书右仆射表

御书

谢赐御书表

辞免正奉大夫第一表

辞免正奉大夫第二表

谢转正奉大夫表

谢赐御马表

辞免尚书右仆射第二表

臣某言伏奉制命除臣正议大夫尚书右仆射兼中书侍郎进封陇西郡开国侯加食邑实封寻奉表辞免伏蒙圣慈降诏不允者忱辞上達盖量力以知难温诏伏承乃宣恩而推重仰荷大君之殊遇益虞小力之难胜敢陈蝼蚁之诚冀回天地之听愧惧交集感涕横流【中谢】臣闻泰否相生治乱相纠否终则倾而有泰之兆乱极则变而为治之萌然而处泰治者易为功革否乱者难为力自非明君硕辅有千载一时之会何以兴衰拨乱慰万邦羣黎之心方今当宗社再安之初乘夷狄凭陵之後国势削弱人心动摇军政蠹坏而不修士气委靡而不振物力既屈仓廩竭而府库虚号令未通朝廷缓而州县弛营垒之卒溃而为盗贼田亩之民转而为甲兵官非不多而人材诚为鲜少地非不广而井邑类多凋残搢绅无仗节死难之风黎庶有偷衣靡食之志百度皆废四维不张实国家艰难多事之秋乃贤智驰骛不足之日任一相以同德厥惟艰哉障百川之狂澜孰能任此而臣学识甚陋心志弗强徒抱自信不移之忠初无趋时适用之术谋王体而断国论尚或可言穆天紱而斡化枢则非其任与其覆餗而误国曷若见险而乞身再渎天威冀从人欲伏望皇帝陛下扩以天地之度烛以日月之明洞察非材追寢成命则臣保全晚节得养拙於故庐图报大恩期捐躯於异日

辞免尚书右仆射第二劄子

臣伏奉制命除臣某官寻具劄子辞免伏蒙批答不允者臣闻昔扬雄有言曰世乱则贤智驰骛而不足世治则庸夫高枕而有余本朝承平垂二百年辅相之臣当国家闲暇之时容有非材滥厕其间者至於方今艰难之秋朝廷之尊卑宗社之安危生民之利病皆系於辅相乃贤智驰骛不足之日图任非人将何以拨乱反正副陛下忧勤愿治之志哉如臣驽力薄材决不足以胜任此所以闻命夙夜震惧而不敢承也伏望圣慈察臣辞免出於诚悃非若平时为备礼之文特寝成命除一在外宫观差遣以安愚分则臣仰荷保全之恩誓图报効无任战越俟命之至

谢除尚书右仆射表

臣某言伏奉制命除臣正议大夫尚书右仆射兼中书侍郎进封陇西郡开国侯加食邑实封再具表劄辞免伏蒙圣慈降诏不允仍断来章者危诚仰控冀蒙听允之私温诏俯颁采示眷怀之厚力辞弗获黽勉以承虽宠命之自天益战兢而无地【中谢】伏念臣少虽力学擅坎井而每见笑於大方壮欲有为局辕驹而徒有志於千里因循仕宦荏苒岁时适当国家艰难之秋愿致节义自奋之效道君尝嘉其愚直渊圣亦许以朴忠谗嫉既多飘零何有遇陛下龙翔於大火之次偶微臣环召於重湖之南方擢用之不疑盖照知之有素矢石交下虽机穽之甚深日月方中宜云雾之皆扩顾臣何者被遇若兹蟠木轮囷无左右先容之助循墙偃俛怀颠危非据之慙流涕陈辞披肝纳计敢效唐臣邀说之十事庶几商相咸有於一心伏蒙皇帝陛下烛以天光采其刍说进言若石之投水从善如阪之转圜周室中微宣王有兴衰拨乱之志汉祚尝絶光武有戡乱配天之功方之英明盖亦么麽有君如此陨首奚难臣敢不效微力而驱驰忘其不足以胜任尽愚衷以筹虑或冀有补於将来丕变土风一新军律修政事而攘戎狄誓不与金敌以偕生广孝友以格天人期可致銮舆之遄返辞之吊矣天实临之

御书【上自元帅府将登宝位遣从事郎刘默由湖北齎赐亲笔御书】

某顿首清暑伏惟钧候万福久违瞻渴王室多故金人连岁侵逼中间诏书已再讲和所以严戢兵锋岂谓天未悔祸乘舆蒙尘闻之心焉如割已令会兵追击冀遂奉迎而归方今生民之命急於倒挂谅非不世之才何以協济事功阁下学穷天人忠贯金石是用尽复公旧官职泽被斯人功垂竹帛乃公素志想投袂而起以拯天下之溺以副苍生之望所祝道中倍加保卫谨啓某顿首伯纪枢密观文

谢赐御书表

臣某言从事郎刘默至自德安府伏奉元帅府劄子复臣中大夫观文殿学士又奉亲笔御书一封臣已拜受讫者远迂一介之行人荷皇慈之轸念曲赐十行之亲札仰宸翰之昭回以金声玉振之章寓鸾翔凤翥之画光生郤屋情若父兄跪诵以还感涕横集【中谢】臣闻自古圣主贤臣之相得譬犹风虎云龙之相从盖不约而自亲岂有求而後合惟成汤之举伊尹志

气已相与於躬耕应聘之时而传说之相武丁谋猷岂旋定於登车受币之际故能同德相与有为苟非其人孰振斯道恭惟皇帝陛下英武善断聪睿以谋虎步齐魏之郊实天所相龙飞九五之位岂人能为方艰难多故之时有所慎微臣之意偶来从於江湖之上遂冒据於辅弼之先一军皆惊如筑坛之拜韩信万户则止敢封邑之望留侯惟听用无三人之疑盖照知非一日之积发函泣读陨首知恩臣敢不密赞大猷仰遵睿训变百官偷惰之习以二圣旋归为期三年有成冀跻民於仁壽什袭以宝愿传宠於云来

辞免正奉大夫第一表

臣某言伏奉制命以陛下嗣登宝位覃恩授臣正奉大夫依前尚书右仆射兼中书侍郎进封陇西郡开国公加食邑实封者应龙翔而庆云集幸际会於休辰时雨降而品物亨亦沾蒙於霈泽大恩甚渥寸报未遑敢布由中之言以渎盖高之听【中谢】伏惟皇帝陛下英睿出於天纵孝悌尽於人伦当国步之多艰膺帝命而继统华夏胥悦神人有依式颁涣汗之恩覃及搢绅之士而臣误承睿獎濫厠宰司初无经邦之勲首被班秩之宠载惟添冒弥切凌兢伏望圣慈追还成命则臣俯蹈孤危之迹或可自安仰裨兴复之功庶乎有望

辞免转正奉大夫第二表

臣某言伏奉制命以陛下嗣登宝位覃恩特受臣正奉大夫依前尚书右仆射兼中书侍郎进封陇西郡开国公加食邑实封寻具表并劄子辞免伏蒙降诏不允者湛恩难於叨冒屡贡忱辞至意极於褒扬荐颁温诏不避再三之渎敢陈悃悃之诚【中谢】恭惟皇帝陛下躬上圣之资抚中兴之运执德刚健乘六龙以御天受命溥将首庶物而出震撼此风云之会发为雷雨之私上下均沾远迩咸被而臣误膺睿獎濫处宰司经体赞元愧乏涓埃之补颁庆行赏敢忘伛偻之辞伏望圣慈追寢成命以安愚分以穆师言则臣远效古人粗守一介之节仰裨大政庶收千虑之功

谢转正奉大夫表

臣某言伏奉制命以陛下登宝位覃恩授臣正奉大夫依前守尚书右仆射兼中书侍郎进封陇西郡开国公加食邑实封两具表劄辞免伏蒙圣慈降诏批荅不允仍断来章者否极为泰而天地交濫膺辅相之任屯散为解而风雨作叨沾优渥之恩固避莫从以荅为愧【中谢】伏念臣闽海冷族乾坤腐儒历事三朝粗守一节顾功名之何有怅岁月之已徂寸心如丹弥觉爱君之切短髮半白率皆忧国之余岂期暮龄乃遇休运蓬飘梗泛偶起於江湖之滨虎啸龙吟遂感於风云之会一言寤意而仅同高庙令十事邀说而有愧老猎师曾何补於涓埃乃荐膺於宠数循墙弗许拜命若惊此盖伏遇皇帝陛下以道观能运神心而独断以公冒物一天视而同仁霈为雨露之恩初无迹遐之间致兹琐质亦被鸿私臣敢不仰体眷怀益坚志节披肝胆而效计期无负於古人修政事而攘戎庶可观於来效

谢赐御马表

臣某言伏蒙圣慈特降中使赐臣御马二疋者颁天廐之拳奇风云随於絶足迂星使以临賁光宠动於私廷夫何朴陋之获此神骏之物恩辉若此报称谓何【中谢】伏念臣俎豆之事则闻未尝学军旅之事樗栌之材甚陋岂能堪栋楹之材偶当国步之艰难特荷圣知而驱策筋弩肉缓讵胜十驾之功御适饗调亦有千里之志伏蒙皇帝陛下日加三接恩解两骖悯其驱驰之勤锡以安闲之乘铁花秀发先其备物之骠雪彩皓鲜副以照夜之白昭示百辟克壮元戎都邑叹惊骐驎行於地上将士感动夷虏在於目中愿伸一汗之劳以报千金之赐臣敢不体称德之善喻励伏枥之壮心石庆虽愚期举策而知数之反不伐誓絶意於为先

梁谿集卷六十

卷六十一

钦定四库全书

梁谿集卷六十一 宋 李纲 撰表劄奏议二十三

乞於河北西路置招抚司河东路置经制司劄子

乞募兵劄子 乞括买马劄子

乞於沿河沿江沿淮置帅府要郡劄子

乞於河北西路置招抚司河东路置经制司劄子

臣窃以河北河东两路国家之翰蔽也唐杜牧谓河北视天下犹珠玑也天下视河北犹四支也珠玑苟无岂不活身四支既去吾不知其为人故王者不得不王霸者不得不霸猾贼得之足以致天下不安其地势风俗使然也而河东实为天下之脊介於河北陕西之间其地险固其民坚忍其俗节俭其兵劲悍祖宗得天下削平僭乱罔不臣服惟河东最後再驾而後得之其难如此而靖康之初金人犯阙以孤军入重地我之守御固而援师集其势不难於和宰相失策欲脱一时之祸而不为久长之计凡所邀求一切许之遂割三镇而河北河东之地几去其半及贼兵退三镇兵民为朝廷固守中山真定及沿边诸郡既已保全而贼尽力以围太原不肯舍去朝廷遣使以兵民之意及保全陵寝之故愿输租税以易疆土金人且许且攻几年而太原陷犹信谗诈以讲和不为备预之策至其渡河再薄都城遂尽割两路以与之画河以为界遣执政侍从郎官数十辈分诣交割皆为两路之人所杀夫朝廷割地不足以塞金人贪婪之欲而适足以失两路士民之心使地割而和可成宗社遂安犹之可也今乃假和议以款我既破京师挟二圣以北狩胁逼臣寮僭窃神器矣而议者犹以割地为然此何理哉河北西路三帅府二十余郡靖康末所失者真定怀卫濬一帅府三郡而已其余至今皆坚守一路兵民有城郭者依城郭无城郭者依大河山西自相结集多者数万少者不下万人各立首领以相统率知名号者已数十处日以蜡书号吁朝廷乞师请援愿为前驱因而招抚为吾之用数十万衆不日可致而金人留兵怀卫濬三郡以扼吾要津每郡不过三千人其余皆胁制吾民剪髮易衣以疑我耳大兵临之遣间要约必有应者则三郡不旬月间可复也三郡既复则真定可图而中山之围可解河北复为我有矣然後第功行封以河外郡县悉议封建使自为守朝廷量力以助之则藩篱固而中原宁此今日之要策也河东之势亦然但所失州郡视河北为多然所以处之之策亦无以过於此者臣愚欲乞於河北西路置招抚司河东路置经制司择文武臣寮中有材略名望素为两路兵民信服者为之使副布宣朝廷德意以结其心信赏必罚以作其气训练习服以教之战量补名目以旌劝其首领宽给钱穀以赈贷其乏絶辟置僚属将佐乘机应变一切许以便宜从事则两路可以复全中兴之功指日可成必自此始犹扞水患於决溢之口则下流无泛滥之虞御盗贼於门墙之外则堂奥有安靖之势理之必至也倘舍此而不为则两路之人且归怨於朝廷强壮狡狴者反为贼用将何以待之故臣以谓

今日之所当先务者无急於此惟睿断不疑特从所乞天下不胜幸甚

乞募兵劄子

臣窃以祖宗建国以兵为重熙丰盛时内外禁卒马步军凡九十五万人承平既久阙额三分之一失於招填比年西鄙丧师江浙山东寇作继之以燕山陷没所亡失者又半重以靖康之变金人再犯都城诸路禁军往往溃散流为盗贼天下之兵所存者无几矣朝廷以蜡书召天下勤王之师皆募於田亩之间及游手浮浪之人虽其数甚衆环绕畿甸不得毫髮之力而东南公私财物为之一空大抵起一兵公私所费非五十缗不可而沿路供给钱粮之费又倍於此是一兵率费百千而起万兵则所费百余万缗矣今秋期不远理当拣择留之分屯沿河要害之地则所费不过日给钱粮而已朝廷初不校此应勤王之师已行放散披甲荷戟而归者项背相望於道路亦有才至中途不待令而自返者不知将来防秋於何所取兵而可也禁兵之数既已不多而民兵又不可复起虽起之必无应者秋高马肥虏骑或复深入其何以支吾哉臣愚以谓济今日一时之急莫若取财於东南募兵於西北夫东南之财已竭矣而臣以谓不得已犹有可取者当诱上户物力有余之家出财以助募兵朝廷量多寡以名目酬之民知国家有兵而後家室可保则亦不以为厉已也国家岁漕东南财谷以为上供又榷茶盐之利以实中都盖以养兵且给六宫百官之费待祭祀宾客之用供玩好宴游之奉今六宫百官之费祭祀宾客之用省矣而陛下节俭无玩好宴游之娱故凡上供财穀茶盐之利除经费外一切裁损专以养兵则亦无不足之患臣愿下募民出财之令且降旨委官措置於京东京西陕西河北募兵优立例物之数创为军号团结训练一切以新法施行分隶将佐逐处屯泊以时教閱比之起东南勤王之兵其利害不同者有三东南之人柔弱不耐劳苦一也不服水土类多疾病死亡二也屯驻稍久则有思归之心往往逃亡溃散三也而募西北之人以为兵则无三者之患团结训练积以岁月皆为精兵与夫起乌合之衆暂聚复散岂不相远哉今河北河东京东西为金人所扰民不能归业者甚衆而陕西素号产兵之地愿及时遣使於数路募兵於合屯驻路分建置营房更番以卫行在以镇四方以备征讨此时不可失也伏望圣慈特赐详酌施行

拟募新军号

骁胜军 壮捷军 忠勇军 义成军 龙武军 虎威军 折冲军 果毅军 定难军 静边军

欲陕西路委钱盖河北路委张所各募伍万人京西路委谢颙京东路委程弼孺各募二万五千人每二千五百人为一军其招填等仗例物月给钱粮并依上禁军法团结训练并依新军法每招填及一军就本路选差有材武大小使臣充统制官部队将量给盘纏钱管押起发赴行在听候指挥於合屯泊去处驻劄其不及等仗人听充本路帅府要郡募兵及厢军余依新降募兵指挥施行

乞括买马劄子

臣窃以马之於军旅其用大矣而马政之不修未有如近年者自监牧之法废而为给地牧马州县行文具以塞责民间养羸瘠以充数而茶马司惟以博易珠玉为事无良马焉燕山陷没北边之马又皆为金人所得夫金人专以铁骑取胜而中国之马耗亡如此何以御之臣顷在密院尝献言请括买天下之马及许客人结揽陕西纲马赴京师其说谓凡养马者必是上户及吏人医官僧道之流立三等价下州县括买之未为厉民而旬月之间数万之马可具足以济一时之乏又陕西纲马管押至京馈养不时死损过半令客人结揽则逵者必多又请复监牧之制而朝廷许令相视监牧结揽纲马如所言独不行括买之令靖康末金人既破京城首下令取马违者族诛凡得马余万疋而京师之马为之一空是吾所有者不能用之而反以资敌得不为失计乎今行在之马不满五千可以披带者无几权时之宜以奋张军容非括买不可宜先下令非品官将校不许乘马然後诏州县籍有马者以三等价取之严隐寄之法重搔扰之禁奉行有绪稍激劝之则数万之马尚可得也又命陕西四川茶马司益市马而广西邻特磨道亦有可市者募客人结揽送纳以给诸军及分给沿河江淮间帅府要郡然後举行祖宗监牧之制择官委之待以岁月则马不患乎不蕃庶可以足军旅之用乞於沿河沿江沿淮置帅府要郡劄子

臣窃以唐有天下贞观开元间号为治平无事者以外有方镇之兵扞御边陲内有府卫之兵临御方镇表里相制国势以安其後府兵之法坏边兵之势强乃有天宝安史之乱然卒戡定之者方镇力也代宗避吐蕃之寇而幸陕德宗避朱泚之变而幸奉天亦资方镇之兵以复国然行姑息之政威柄下移强藩悍臣浸成跋扈此非方镇之罪措置失策之过也祖宗监唐末之弊削方镇之权惟沿边帅司屯宿重兵委以军旅之事腹内会府虽有帅号其权甚轻自余列郡守臣悉委文吏不与军政以处承平治安无事之时可也今玁狁内侵坏吾边防以扰腹心之地盗贼乘时蜂起蚁结而州郡犹以承平之制临之安能扞患御侮镇抚之哉故唐方镇之弊尾大不掉而今日州郡之弊手足不足以扞头目理势然也救其弊而振起之莫若取方镇之制用其所长去其所短择人而任之使大小相比远近相维以蕃王室则中国之势尊矣臣愚欲乞於沿河沿江沿淮置帅府要郡次要郡帅府带安抚使节制一路即唐节度使之兵也要郡带兵马铃辖次要郡带兵马都监以佐帅府即唐观察防御团练之兵也朝廷减上供金谷使之养兵宽法制而假之权将佐僚属听其辟置平居责以训练閱习卒然有盗贼之变即帅府量事起兵统率以行与邻路约为应援会合有功者增秩进职而不移其任如此数年上下安习即州郡之兵可用矣如蒙圣慈俯从所请乞降旨三省枢密院条具合行事件取旨施行

拟帅府要郡次要郡

河北东路

帅府【大名府 横海军】

要郡【开德府 棣州】

次要郡【滨州 永静军】

京东东路

帅府【青州 徐州】

要郡【袭庆府 登州莱州 密州】

次要郡【沂州 淄州维州】

京东两路

帅府【东平府 应天府】

要郡【济南府 兴仁府濮州】

次要郡【济州 单州】

京西北路

帅府【河南府 顺昌府】

要郡【河阳府 颍昌府 陈州蔡州 汝州】

京西南路

帅府【邓州 襄阳府】

要郡【唐州 随州】

次要郡【金州 均州商州】

永兴军路

帅府【永兴军】

要郡【陕府 虢州华州】

次要郡【同州 耀州】

淮南东路

帅府【扬州】

要郡【宿州 楚州】

次要郡【泗州 真州海州 和州】

淮南西路

帅府【庐州】

要郡【壽春府 亳州】

次要郡【舒州 濠州 蕲州黄州 光州】

江南东路

帅府【江宁府】

要郡【宣州 江州】

次要郡【饶州 信州池州 太平府】

江南西路

帅府【洪州】

要郡【处州 袁州】

次要郡【吉州 抚州】

荆湖南路

帅府【潭州】

要郡【衡州】

次要郡【永州 道州】

荆湖北路

帅府【荆南府】

要郡【鼎州 德安府鄂州】

次要郡【沔州 岳州复州】

两浙西路

帅府【杭州】

要郡【镇江府 平江府湖州 常州】

次要郡【秀州 衢州】

两浙东路

帅府【越州】

要郡【婺州 明州】

次要郡【温州 处州台州】

梁谿集卷六十一

卷六十二

钦定四库全书

梁谿集卷六十二 宋 李纲 撰表劄奏议二十四

乞修军政劄子

乞置赏功司劄子

乞令诸路郡县增修城壁器械劄子

乞教车战劄子

乞造战船募水军劄子

乞省官吏裁廩禄劄子

乞修军政劄子

臣窃以大军之礼用衆也军之所以积少为衆聯属不散可恃以胜敌者以其有纪律也团结则有保伍之联教閱则有战阵之制执被则有甲冑五兵之利进止则有金鼓旌旗之节禁戒则有号令之威上下则有陞级之法兵将相谙彼此相救逃亡潰散者必诛搔扰乱羣者必罰立功者必厚赏死敌者必优恤此之谓纪律有纪律然後军可用也国朝军政最号严明自童贯高球主兵以来其制始坏团结保伍废而无以相维持教閱战阵废而无以习攻击甲冑五兵初不服练旌旗金鼓初不习熟禁戒号令之威不振而无以作士气上下陞级之法不行而无以一士心兵将取於临时而初不相知彼此递相观望而初不相救卢沟之溃反以金帛招集则逃亡潰散者不诛矣浙东之役虏掠良民财物者悉皆官军则搔扰乱羣者不罰矣仆厮亲近皆授高爵而立功者不赏以收身不到为名而死敌者不恤纪律如此而欲驱之以抗大敌岂不难哉是以金人再犯王室则控扼之兵望风先溃攻围帝都则救援之师逗挠不进其因循至此非一日之积也且金人训兵十有余年不用令者小则必死大则族诛此法既行威信已着则用刑反少故能灭契丹陵中国积威约之渐非一日也中国之兵既失训练又不用令者不必诛逃亡潰散者反招集之此风既成习以为常则有不可胜诛者矣故以天下之大而不能御一方积弊之渐亦非一日也夫用兵驱之於死地者也苟非畏我过於畏敌进有生理退而必诛则安能使之効一日之命以成却敌之功哉为今日之计莫若更军政而渐治之团结之法自五人为伍积至於二千五百人为军部队将统制官递相临制皆有尺积伍符以周知其名数呼召指使存亡功过不劳而可知临阵战鬪进退缓急不约而相援如此则兵伍有所聯属而不散矣教閱之法以车骑步兵摠为营阵进退坐作分合出入皆依新制革去旧教文具之法如此则行阵足以扞御铁骑矣习弓弩者不必以斗力而以射亲中的者为上习

牌枪刀者不必以中敌而以勇敢向前者为胜神臂筒射凤凰等弓可以及远宜教之使精兜鍪全甲卒伍多不肯披甲宜习之使熟如此则甲冑五兵之利可以自保而取胜矣古之行师者闻鼓则进闻金则止以旗之偃举为所向之指麾今则不然金鼓间作初无进止之令旌旗错杂初无指麾之意宜依古制以习兵之耳目如此则金鼓旌旗之节可以一衆而临敌矣禁戒号令虽出於临时而信必在於言前然後威可畏也上下陞级虽着於甲令而势不容於幸免然後法可行也自部队将至统制官皆精选而预设之使其恩威素行於士卒则兵将相谙矣自伍甲部队至六军皆使之左右前後迭相应援观望不进及辄退者必行军令则彼此相救矣禁军逃亡依法七日不首身者必斩遇敌战鬪力不能胜因而溃散不再聚集归本部者必诛因而作过者灭族则逃亡溃散之弊可革矣禁军於行师之际盗博鬪殴饮酒至醉抛弃器甲藏匿妇人胁取财物煽摇惑衆者并行军法则搔扰乱羣之弊可惩矣先登陷阵及能以弓弩射中贼者虽不纳级亦赏一军全胜则全赏一军虽不胜而其间有能自斩贼级及中伤在前者则自赏如此则立功者劝矣将士战歿非逃亡者委保伍将佐开具保明优恤其家不得辄以收身不到开落违者重寘於法如此则死敌者劝矣此则今日军政之急务当以次施行也然臣顷年尝询一老卒其言曰昔日禁军难作而易活今日禁军易作而难活诘其所以则曰昔日法行而上下之分严故难作然请给衣粮及时而得无冻馁之患故易活今日法不行而上下之分苟简故易作然请给衣粮多不及时又有坐仓折估之法妻子不免於冻馁故难活其言极为有理则欲修军政而严纪律当先留意於所养之者以素得其心不可使之怨咨也所有修改军政合行事件乞降旨三省枢密院同条具取旨施行

拟团结新军指挥

欲令御营司将见管马步军兵拣选团结许自指识同保以五人为伍内推一人为伍长五伍二十五人为甲别选一人为甲正四甲一百人为前後队差队将正副二人五队五百人为部差正副部将二人五部二千五百人为军差正副统制官二人伍长以承局节级或长行中有武艺为衆所推者充甲正以十将节级有武艺为衆所推者充前後队各差引队一人选十将节级壮勇能率衆入贼者充押队一人选十将指挥使能部辖者充正副队将差副校尉小使臣充正副部将差大小使臣以上有材武边功者充统制官朝廷选差自武长以上皆置黑漆木牌长一尺阔三寸书刻所辖人姓名以雌黄填之置腰间甲正则书所辖伍长姓名队将则书所辖甲正姓名部将则书所辖队将姓名统制官则书所辖部将姓名皆置籍掌於行营司有事故逃亡并即时申报差人补填遇有使唤并全军或全部差拨不许抽摘出战有功及能递相救援并许统制官部队将次第保明推赏其伍长以上所辖姓名牌子一面刻统制官押字统制官牌子一面刻都统制押字有移易补填即时申报换牌牌旧者毁之团结讫具数申行营司将来帅府要郡团结军兵准此

乞置赏功司劄子

臣窃以战危事也驱之於万死一生之地蹈白刃冒矢石以首争首以力搏力而求胜於一日之间非有赏刑之信何以要结其心鼓作其气使之犯难忘死而效命哉古者赏必先士卒而不踰时欲其知劝也诛不舍贵近而无幸免欲其知惧也近年赏罚与此相违赏之所行皆权

贵嘱托与亲随厮役之流而士卒履行阵以立功者未必赏将帅提兵以自卫见敌不战望风遁走者又不加诛而士卒溃散亦以转山迷道为名而招集之则彼何所劝而力战何所惮而不走以求生哉臣顷在枢密院见童贯推燕山赏案及於朱勔父子并其婿如知秀州周审言皆未尝从军则其余所赏者推类可知而西兵陈状乞赏皆十数年前未施行者诘其所以则当时帅司既上功状复送下保明经隔岁时将帅移易则保明不至而赏不行今虽欲行亦无所考据矣又赏功散於诸房既无程限又不委官点检人吏得以高下其手使有功者愤叹然则欲士卒之知劝何可得也又闻燕山之役刘延庆拥精兵十五万於卢沟河燕山纵间言且将劫寨延庆信之遽焚积以中军先遁而十五万衆一夕俱溃童贯不能诛而反以银绢招溃兵然则欲士卒之知惧何可得也积习之久将士玩以为常靖康之间虽骤赏力战如邹处节之军斩梁方平张师正王从道之徒犹未足以革前日之弊故金人再犯都畿将帅奔走士卒溃散者不可胜计今日之策非大变此风不能有济欲乞令三省枢密院同置赏功司专差人役承行应有战功者并令将帅所辖官画时条具结罪保明申奏赏功司置籍承受据功状次第取旨推赏人吏承行量事立程限委左右司郎官枢密都承旨点检违限者黜罚因而受赂者依军法即有冒赏而不实者许人告推治改正元保明官司重行审责其遇敌不战辄逗挠奔北之人必诛别立约束行下庶几士心孚信旧弊渐革取进止

乞令诸路郡县增修城壁器械劄子

臣窃以国家承平之久自河以南皆腹心内地城池堙圯而不修去春贼骑渡河残破畿邑止於百里之内盖未知中国虚实不敢远纵贼退因建议请修畿甸诸邑拱郑许滑四辅郡洛阳河阳城壁以坊金人复来使吾民有所保聚而贼骑无所抄掠朝廷已降指挥而言者以为扰民遂复止之及去冬再寇纵兵远掠环畿千里之内无人烟矣今京东西及江淮之间州县往往无城将来秋冬彼必愈更南牧何以扞守治安之久虽小邑犹藏万家之室穀粟货财不可胜计使彼得之因粮取财胁掠吾民以为之用是所谓借寇兵而资盗粮也夫惜一时之扰而忘长久之计岂策也哉宜命州县以渐增修城池朝廷量降度牒应副至於器械甲冑之属州县类多阙之亦宜立名色降様制使及时制造除戎器械不虞此正今日之先务也

乞教车战劄子

臣闻以步兵战者不足以胜骑以其善驰突也以骑兵战者不足以胜车以其善扞御也古之战者必以车故称武王曰戎车三百两称卫文公曰革车三百乘称宣王曰我车既攻称小白曰兵车之会六而兵赋则必使之出车天子曰万乘诸侯曰千乘大夫曰百乘皆以兵车为制也後世车战有曰武刚车有曰偏箱车有曰鹿角车皆与古异制则便於其事而已金人以铁骑胜中国其说有三而非车不足以制之步兵不足以当其驰突一也用车则驰突可御骑兵马弗如之二也用车则骑兵在後度便乃出战卒多怯见敌辄溃虽有长技不得而施三也用车则人有所依可施其力部伍有所束不得而逃然则车之可以制铁骑也审矣靖康间献车制者甚衆独统制官张行中者可取其造车之法用两竿双轮推竿则轮转两竿之间以横木箠之设架以载巨弩其上施皮箠以扞矢石绘神兽之象弩矢发於口中而穹其目以望敌其下施甲裙以卫人足其前施枪刃两重重各四枚上长而下短长者以御人也短者以御马也

其两旁以铁为钩索止则联属以为营体制简而运转速真御戎之利器其出战之法则每车用步卒二十五人四人推竿以运车一人登车望敌以发弩矢二十人执牌弓弩长枪斩马刀列车之两旁重行行五人凡遇敌则牌居前弓弩次之枪刀又次之敌在百步内则牌偃弓弩间发以射之既逼近则弓弩退後枪刀进前枪以刺人而刀以斩马足贼退则车徒鼓噪相联以进及险乃止以骑兵出两翼追击以取胜其布阵之法则每军二千五百人以五分之一凡五百人为将佐卫兵及辎重之属余二千人为车八十乘欲布方阵则面各用车二十乘车相联而步卒弥缝於其间前者其车向敌後者其车倒行左右者其车顺行贼攻左右而掩後则随所攻而向之左右前後其变可以无穷而将佐卫兵及辎重之属皆处其中方圆曲直随地势之便行则鳞次以为阵止则钩联以为营不必开沟堑而筑营垒最为简便而全固昔卫青征匈奴以武刚车自环以御敌故能深入马燧帅太原制战车冒以狻猊甲士列戟副之故能兵冠天下惟房琯用之为贼所焚而後世议者遂以为车不可用殊不知古之兵车谓之革车冒之以革者正所以防火也欲胜金人铁骑使不得奔突持久以取胜利器无以加此今图画样制及分合阵图上尘圣览乞降付行营司制造教习便殿按视可以施用即颁降帅府要郡施行

乞造战船募水军劄子

臣闻生於陆者安於陆生於水者安於水南方之人习水而善没其操舟若神而北人有惧舟楫而不敢登者习於性成也骑兵於南方非所便而南人教之水战必可取胜昔曹操以数十万衆顺流袭吴而周瑜以三万人逆战於赤壁因风纵火焚其船楫遂大破之操自此不敢有窥江表之心而鼎足之势立其後曹丕复以大兵次广陵观长江风涛汹涌吴人戈甲旌旗之盛恐惧而退晋有江左苻坚以百万之衆次淝水而谢玄以八千人破之衆皆奔北闻风声鹤唳皆以为王师将至则东南之兵养育训练因地利而用之亦足以自守其地应沿河沿淮沿江帅府要郡凡临流去处宜仿古制以造战船上设楼櫓可以施弓弩下运舳舻可以破风涛颁法式以授之仍募习水者为水军以时教閱激赏贼舟济渡会合掩击以我之素习击彼之暂济其势必胜得一胜则贼必破胆不敢有窥东南之心矣嘉佑中范仲淹上言乞於河阳置战舰水军以防契丹当时以为迂阔不果行使用其说翔设至今则大河备防靖康初金人岂能遽济渡哉先事而言则近乎迂事至而後图之则无所及其实今日之急务也所有诸路合置战船募水军欲乞专差官前去措置取进止

拟水军号

楼船军 凌波军

欲於沿流帅府要郡次要郡置水军以习水战并招募习水善没操舟便利之人俱刺手背除以时教閱外许自便遇有使唤旋行勾集仍止披甲充驾舟之人其施放自用正兵分布战船依新降教閱水战法式指挥施行

乞省官吏裁廩禄劄子

臣窃以承平之际虽无事当备官以张朝廷之容艰难之际虽多故当省官以责事功之实至於禄廩亦当随宜裁节以济一时之急盖世方多难财用之入不比於治安之时而用度之广有过於无事之日非加裁节以协厥中则何以为经久之制用过乎俭非得已也文臣六曹尚书侍郎事简者不兼置给事中中书舍人之类可阙其半寺监长贰六曹郎官以繁简相兼学官館职之类比旧制减半开封府曹掾依旧改为推判官武臣条具员额除见领军职及团结新军置正副统制部队将外余并量事减员如此则中都之官省矣监司发运使副以两员为额属官减半提举香盐茶矾司并归提举常平司提举市舶除广南外余路并归转运司提举保甲司并归提点刑狱司属官不得过一员如此则外路之官省矣通判两员处止置一员以司录依旧为金书节度判官厅公事曹掾官依旧为节度观察军事推官録事司户司理参军添差监当官并罢县万户以上置丞不满万户者不置如此则州县之官省矣三省枢密院人吏员额及转官止法并依祖宗旧制监司州县吏员三分减一如此则吏员省矣应宰执子弟带贴职及待制以上并罢如此则职名省矣宰职俸禄及现任宫观未有差遣待阙京朝官以上俸钱并减三分之一如此则廩禄节矣省冗员节廩禄以济一时之艰难俟将来恢复天下再安自当依旧则官吏亦岂曰厉已哉此今日不得已之务也如合圣意乞降旨三省措置施行

卷六十三

钦定四库全书

梁谿集卷六十三 宋 李纲 撰表劄奏议二十五

议巡幸第一劄子

议巡幸第二劄子

乞减上供之数留州县养兵禁加耗以宽民力劄子

乞修茶盐之法以三分之一与州县劄子 乞剗刷官田仿弓箭刀弩手法给地养兵劄子 乞籍陕西保甲京东西弓箭社免支移折变团结教阅劄子

论君子小人劄子

议巡幸第一劄子

臣以愚陋误蒙圣恩擢任宰相初对之日尝以巡幸之议冒瀆天聪其意以为京师初经残破之後理难固守然车驾不可不一到以慰天下之心然後銮舆顺动法古巡狩之理以行四方西则关中南则襄阳东则建康以天下形胜之势观之关中为上襄阳次之建康为下伏蒙睿慈特采其议已降指挥京师催促修城祇备谒款宗庙而永兴襄阳建康皆令葺治宫室以俟翠华之幸臣累留身奏事论及天下利害安危所系之大者未尝不以此为言尝蒙宣谕但欲先迎奉元佑太后及迁六宫如建康并禁卫家属愿迁徙者亦尽遣南去而车驾独留中原选将屯兵以卫行在虽关中可往虽金人可战臣窃仰陛下英睿果断如此虽古创业中兴之主如汉之高祖光武唐之太宗不是过也昨日忽被手诏宣谕京师未可往而欲为大王避狄之计巡幸东南择形胜之便利远水火之焚溺来春还阙聚粮屯兵为守御攻讨之计令臣条具合措置事务以闻臣伏读愕然未喻圣意不知天虑与前不同果以为当如此耶将左右大臣密献此说姑从其策耶如天虑果以为当如此臣窃以为未然而左右大臣密献此说则臣窃叹其未尝深思远虑姑欲脱一时之患而不知祸难之在後也夫京师宗庙所在陛下即位之初礼当一到徒以城池之修未备而防秋之期已迫势有未可往者臣固不敢力争至於巡幸东南以避狄则臣不知车驾果将安之耶若欲出於下策遂往建康则臣恐天下之势倾而中原不复为我有矣请为陛下试详言之夫陕西者中国劲兵健马之区也河北河东者中国之屏蔽也京畿及东西者中国之腹心也江淮荆湖闽浙川广者中国之支????也今与隣国争屏蔽之地不能保腹心以号召劲兵健马与之驰逐而欲自窜於支????之乡臣恐天下之势偏而不举敌骑深入号令不行州郡莫相救援皆将碎於贼手如以精兵惊扰京东控制淮楚陛下虽欲还阙不可得矣况欲屯兵聚粮议攻守计以迎二圣哉王命不通盗贼蠭起杀害官吏屠陷城邑如今之河北兵民不待金人然後为害自江以南皆当摇动不知献策之臣果能保其

必守乎夫江之广不如河江之险不如河江之湍激不如河金人渡河犹不御江岂可恃而南人之轻脆非北人之比贼至则溃南方之城壁非北方比贼攻则破陛下必以幸建康为安臣愚且以为过矣夫利在耳目之前患在一世之後中智以上乃能知之今欲乘舟顺流而东其安便比於鞍马之间何啻相百远幸江湖之滨其间适比於兵革之际何啻相万然偷取一时安适而忘祸患之在後献说者如此臣愚窃以为不思之甚矣为今之计纵未能行上策以趋关中莫若取其次策以适襄邓襄阳近为李孝忠所据虽已溃散恐或残毁惟邓为可以备车驾之时巡夫邓者古之南阳光武之所兴也西邻关陕可以召兵北近京畿可以遣援南通巴蜀可取货财东达江淮可运穀粟有高山峻岭可以控扼有广土宽城可屯重兵民风号为淳固盗贼未尝侵犯此诚天设以待陛下之临幸事之机会不可失也愿召守臣增修城池漕臣储峙粮草朝廷给降钱帛广行应副专遣使者以督其事将来秋高六飞启行由陈蔡唐以趋南阳不过半月可達天下之士知陛下之不忍弃中原也河北河东之民知陛下之不远徙也天下郡县知陛下之处中以临四方也皆当心服而无解体之患是一幸南阳则三者皆得一幸建康则三者皆失利害安危之几在此一举陛下何憚而不行也臣愚伏望圣慈断自渊衷从臣之言勿是先入之说天下不胜幸甚

议巡幸第二劄子

臣已具劄子论车驾巡幸京师城壁未可保守修葺未备当权时之宜驻蹕南阳据天下之中以号令四方不宜东幸建康弃置中原以失天下之心伏蒙圣慈令与执政同议然前疏未尽区区之意敢昧死再陈之臣闻自昔人主当草昧艰难之时或与英雄角逐或为强大所侵皆据地利而莫肯先退尽人力而莫肯先屈夫胜天下者必以势而据地利莫肯先退者势也盖天下者必以气而尽人事莫肯先屈者气也汉高祖与项羽战於荥阳成臯间相持累年高祖虽屡败不肯退尺寸之地既割鸿沟羽引而东遂有垓下之亡曹操与袁绍战於官渡操虽兵弱粮乏不肯解去既焚绍辎重绍引而归遂丧河北由此观之与勍敌争胜负岂可不据天下之势而先自退哉唐之初突厥颉利以数万骑饮马渭水去长安才数十里太宗以七骑临渭上与语以大义折之既而王师大集旌旗戈甲光彩精明颉利震怖遂以请和本朝景德中契丹以数十万寇澶渊真宗渡河亲征射杀所谓统军挾挽者虜主惶惧遂亦请和而去两朝盟好凡百余年由此观之为强大所侵岂可不作天下之气而先自屈哉今金人虽号为勍敌其实皆中国失策养之使然考其兵之强盛岂能过项籍袁绍其敢深入岂能过颉利契丹而吾方其未至之时已相与震怖委弃中原而自窜於江湖之间既失天下之势又索天下之气不知敌骑果复渡河攻围我城邑屠戮我人民以精兵控扼淮泗而王命为之不通盗贼蠭起所在窃发跨州连邑自相建置将何以待之且今之所恃者兵也陛下每欲聚西北之兵十余万日加训练以待亲征睿谋壮矣既适建康不知此兵将何所用夫建康水乡其土卑湿其食鱼稻非西北之兵所利不产粟麦稗草土气多热非西北之马所便往年方腊起於江浙朝廷遣西兵讨之疾病物故者三之二而马之存者无几由此观之欲聚西北之兵而适建康犹资章甫而适越也惟南阳可为令冬驻蹕之计赖天之休陛下圣德所感河北河东两路兵民戴宋之心借使贼敢深入邀截掩击中国得一胜则天下之势壮而气振矣然後降亲征之诏率天下之师问罪以迎二圣之銮輿决有转危为安拨乱反正之理在陛下自强不息力行之而已臣备位宰相不惟仰荷特達之知思自竭尽以报万一天下之责交归谋虑一有不当无以塞

之伏望圣慈断自渊衷察臣孤忠勿为羣议所惑天下不胜幸甚乞减上供之数留州县养兵禁加耗以寬民力劄子

臣伏以祖宗取於民者有常制供於国者有常数州县寬裕民力丰饶而国用足崇寧大观以来兴造既多用度浸广於是设法以取之盐钞茶引类多抑配和买均余无钱可敷至於宣和之间有应奉需索之烦有燕山免夫之役物力大屈人心惊疑如居风涛汹汹靡定靖康之初降寬大之诏将与民休息而兵革未已调发方兴州县官吏不克奉行徒有虚文初无实惠民之憔悴几不聊生今日国势人心比之靖康之初又不相侔自非无名之敛一切罢去与民更始则失业不聊生之民皆将聚而为盜賊天下之势离矣夫自崇观以来增上供之数而一路州县又有养兵给官吏禄廩之费用度百出何自得之於是常赋之外加数以取於民如江东西湖南北有至於纳加耗米四石仅能了常赋米一石者猾胥黠吏又因缘为奸欲民力之不困何可得也登宝位赦书已令勘会上供增数蠲减宜於元额以十分之三留本路养兵及官吏禄廩之费受纳常赋依法加耗外不得辄取犯者重寘於法则民被实惠而有更生之望矣国家前此屯兵於畿甸故岁漕东南金穀以实中都今京畿屯兵无往日之数而帅府要郡养兵之制兴则随时增减以足国用以寬民力不可缓也自余不急之贡及年例抛买无用之物皆宜蠲减茶盐不得抑配余买先给价钱如此然後可以为政夫民犹鱼也财犹水也鱼恃水以生民恃财以养水日涸而至於涸则鱼亡财日取而至於匱则民散故善养鱼者蓄之於陂池深渺之间善养民者临之以寬厚简易之政审能行此则足以得民心得民心斯得天心矣如合圣意乞降旨三省措置条具施行

乞修茶盐之法以三分之一与州县劄子

臣闻摘山煮海者天下之利源而国家经费所赖以给足也祖宗之时茶盐之利在州县则州县丰饶崇观以来茶盐之利在朝廷则朝廷富实其後悉归於御府以为玩好宴游锡予之物则天下利源竭矣今国势抢攘如此州县匱乏尤甚而兵革未息寇难方多有犒师养兵修繕戎器之费赖此干运以济艰危其势固未能尽捐以与州县然须惇尚俭素因陋就简内之掖廷用度甚尠外之官吏廩禄裁减亦微凡前日无名之费不急之务一切无有则亦不必尽蓄之中都为今日之计莫若损益其法以通商贾凡茶盐之利以三分之一与州县既足以纾州县之急又足以给朝廷之用则内外兼济轻重惟均天下之政事可举矣夫王室根本也州县枝叶也王室腹心也州县四支也槁泽肥瘠通为一体然後可为况艰难之际实赖州县协济国事州县不足重困吾民此法之所以不可不变通也如合圣意乞降旨中书省措置施行

乞剗刷官田仿弓箭刀弩手法给地养兵劄子

臣闻以不教民战是谓弃之未尝素教而以之战是弃民也古者兵民不分无事则为乡遂之民有事则为军旅之士三时务农一时讲武少习长安皆为精兵有所不出出无不胜矣唐设府卫之兵颇仿古制无养兵之费而有用衆之实此良法也後世兵民既分不可复合惟陕西沿边弓箭手及近置湖南刀弩手犹有古之遗意其法给田百亩使家出一人为兵自备器甲之属官为收掌有事则给之而养马者又别给田五十亩私自习学武艺而官以时按閱其有

力者虽一人系籍置私名数人以相挟辅故弓箭手雄於西边扞御夏人多赖其力而刀弩手之法颇与之相类亦能镇服蛮獠不敢妄动令东南官田最多如所谓户絶田逃亡田天荒田屯田之类皆是莫若一切令剗刷用弓箭刀弩手法参酌中制募民为义勇军给地与之州郡籍其名数依新军团结以时教閱则十数万衆不劳力而可具假以岁月皆精兵也又皆土著无逃亡溃散之患最策之得者如合圣意乞降旨三省措置施行

乞籍陕西保甲京东西弓箭社免支移折变团结教閱劄子

臣窃以祖宗籍陕西河北河东之民以为保甲河北五十余万河东二十余万而陕西之数不下河北命提举官摠之以时教閱盖有意寓兵於农也十余年来降指挥以免教閱其法遂废而保甲不知兵徒有其名而已靖康间臣尝建议乞专遣使团结训练加详於旧与其召兵他路不若因此用之为得策而朝廷不以为然今河东河北之地既为金人之所践蹂豪杰强壮多依山寨以相保聚朝廷已置招抚经制司以抚循经略之矣独陕西保甲名数尚存可行措置然陕西之民素困於支移折变宜一切蠲免而系保甲之籍者依新法团结以二千五百人为一军差正副统制官摠之以时训练有事艺精者补以名目擢充部队将之类则数十万兵不日可具西可以扞夏戎北可以御金人非小补也京东西有弓箭社亦皆可仿此推行如合圣意乞降旨三省措置

论君子小人劄子

臣昨日奏事论及人主之职在知人虽尧舜犹以为难诚能别白邪正使君子小人不至於混淆然後天下可为伏蒙宣谕知人亦非难事但考其素行则知之窃仰圣训诚得知人之要然臣窃谓国家艰难之际图回事业虽材智兼用然帷幄腹心非君子不可何哉君子爱君而不谋身忧国而不谋家以公忘私以义忘利而小人则反此自昔人主信小人而任之其国未尝不至於危亡夫小人岂不欲安存而恶危亡哉然使之谋人之国必至於此者以其无远见而操术然也彼方以谋家保身营利趋私为得计於国事恬不加恤非不加恤也以为必不至於危亡而不知恤也唐天宝末杨国忠既激安禄山叛以信其言又促哥舒翰出兵潼关恐其不利於已动为身谋不顾社稷计及遭陈元礼之变刃加於颈而後知盖亦晚矣是其所以求全者乃所以自族也范祖禹有言大避害就利者小人之常也利於己而不利於人则为之害於国而不害於家则为之自以为得计矣而既害於国则亦害於家不利於人则亦不利於己是以自古小人之败必至於家国俱亡而後已此圣人所以戒小人之勿用也然而为人主者曷尝不欲用君子而退小人哉卒之君子多不能安其身於朝廷而小人尝得志者君子行道直自信笃去就轻好恶正故也行道直则不能阿諛以取容自信笃则不能过防以远害去就轻则不为爵禄之所累好恶正则不为奸邪之所喜自非人主明足以察诚足以任则君子虽欲有为於当世不可得也齐小白之任管仲信而弗疑此所以成霸业故曰有人而弗能知害霸也知而弗能用害霸也用而弗能信害霸也信而以小人参之害霸也霸犹如此况欲图天下之事业以起中兴之功哉陛下既得知人之要矣更愿致察於君子小人之间天下不胜幸甚

梁谿集卷六十三

<集部,别集类,南宋建炎至德佑,梁谿集>

卷六十四

钦定四库全书

梁谿集卷六十四 宋 李纲 撰表劄奏议二十六

乞罢尚书左仆射第一劄子

乞罢第一表 乞罢第二劄子

乞罢第二表 乞罢第三劄子

乞罢第三表

谢罢相除观文殿大学士提举杭州洞霄宫表谢落职依旧宫祠鄂州居住表

贺天申节表【功德疏附】

谢移澧州居住表

谢复银青光禄大夫表

谢除提举临安府洞霄宫表

大行隆佑太后崩慰表

乞罢尚书左仆射第一劄子

臣早间留身奏事尝具诚恳干冒天聪以臣智识浅短议论迂阔深恐不足以仰副陛下委任责成之意乞赐罢免过蒙圣慈特加慰劳未从所请第深感泣伏念臣愚蠢无取独守孤忠遭遇陛下龙飞之初特加识擢起於江湖之滨任以宰揆之职人言纷至睿断不疑特達之知旷古无有臣所以仰戴隆恩誓以死报夙夜黽勉思竭犬马之力以图尺寸之功扞御外艰销弭内患使中国之威稍振则二圣之还可期奉事左右复致太平此臣区区至愿也然而事有与愿违者臣受材素拙禀性复疎材拙则不能适时之变通性疎则不能防物之窥伺加以孤危之迹冒处宠嬖之先趋操既已不同谋议自然各异诚虑不能上体圣意协济艰难虚负天下之责周任有言曰陈力就列不能者止孔子有言曰所谓大臣者以道事君不可则止臣非不贪恋陛下恩德欲效涓埃然力有所不能道有所不可则臣岂敢虚负宠荣久妨贤路伏望圣慈特降睿旨罢臣左仆射兼门下侍郎职事除一宫观差遣或守本官致仕臣自今月十六日更不敢供职俯伏俟命干冒天威无任惶恐激切之至

乞罢尚书左仆射第一表

臣某言已具劄子乞罢尚书左仆射兼门下侍郎除一在外宫观或守本官致仕伏奉诏荅不允者冒贡忱辞祈归政柄曲颁温诏未谅愚衷辄输肝胆之诚敢避再三之渎恩深志激言出涕零中谢臣闻明主用人进以礼而退以义君子事上用则行而舍则藏矧当国家艰难之秋尤赖股肱协济之力苟不胜任其敢冒居复念臣朴鄙之资不足以适时蹇浅之学不足以揆事误蒙识擢付以钧衡黽勉百为冀荅丘山之赐侵寻两月曾无毫髮之劳爰莫助之慨其叹矣经略远图则以为迂阔廷争大议则以为擅专屡尝借筭而谋实有掣肘之患譬呼医而吐药石敢言瞑眩之期犹敦匠而止斧斤难任斲削之事与其尸素曷若退休谨援周任陈力就列之言仰遵仲尼以道事君之训乞此骸骨归於山林伏望皇帝陛下照以离明运之乾健策骥騄之逸足捐樗栌之散材则能否各安其情用舍两得其道愚臣既不虚任天下之责庙略亦以早致中兴之功兹非饰辞敢以死请谨奉表陈乞以闻

乞罢第二劄子

臣适具劄子乞降睿旨罢臣新除左仆射兼门下侍郎除一在外宫观差遣或守本官致仕伏蒙圣慈特降中使宣押臣赴都堂治事仰荷天恩第深感涕伏念臣来自疎远误沐眷知事功无毫髮之称罪戾有丘山之积自揆力小不足以任重且虑位高必至於疾顛仰无以副陛下委任之恩俯无以行微臣欲为之志窃自慙惧求即退休方虞斧钺之诛迺荷宠光之逮载惟冒昧弥切兢惶伏望皇帝陛下怜其孤忠照以睿智察臣非敢轻为於去就悯臣实有所不得已而然断自渊衷许从所请则端揆之地不至於妨贤驾蹇之姿得容於养拙异时驱策誓极糜捐臣见不敢供职俯伏俟命干冒天威无任惶恐激切之至

乞罢第二表

臣某言已具表劄乞罢尚书左仆射兼门下侍郎除一在外宫观或守本官致仕伏奉诏书批荅不允者精意格天能动盖高之聽危辞沥血愿明难夺之心轻去大恩非缘细故敢再陈其恳悃以必冀於矜从中谢臣闻天子之君万邦莫先於论道宰相之宅百揆无大於荐贤方国家多难之秋尤将帅之材为急所以萧何之於汉必主韩彭有若房乔之於唐亦推英卫惟天下危而注意将则四面立而国势安顾两河之土疆乃中原之屏蔽名城坚垒巢穴相望高山大川蟠互交鎖风气使用武之习兵民坚戴宋之心因而用之靡不济者堤防修则泛滥自息藩篱固则堂奥可宁机会在於一时功利收於百倍力陈至计幸契渊衷创招抚经制之两司择张所傳亮为二帅所建议於靖康之末得朔部之民情亮搃戎於建炎之初有大将之规略皆采衆论匪徇私心斋坛既登戎车甫驾时靡旬日之久变生腹心之间枢庭降旨以沮所者踰千言宸翰从中以罢亮者方寸纸事同戏剧人为嗟咨而臣备位宰司误膺国寄既不能以先见之明杜谗口又不能以至诚之意回天心复何面顏尚叨宠禄伏望皇帝陛下虚心体道公听并观悯臣谋所当为盖专於保国察臣去不得已非薄於爱君特许罢於政机俾得归於田里誓坚晚节仰荅鸿私谨再奉表陈乞以闻

乞罢第三劄子

臣再具劄子乞降睿旨罢臣新除尚书左仆射兼门下侍郎伏蒙圣慈特降中使宣押臣赴後殿起居奏事及赴都堂治事仰荷隆恩之厚第深感涕之私臣窃以人主之任人莫大於用舍人臣之事君莫大於进退可则用之否则舍之无所容心者人主之道也见可而进知难而退不敢失义者人臣之职也方陛下断自渊衷力排羣议而用臣必以臣为可以寄天下之安危图天下之事业以济艰难岂特欲臣雷同取容以充位而已哉今者以谋事则迂踈而与衆不谐以荐材则乖忤而为衆不喜譖愬之言既至罪戾之迹日闻求欲协济盖亦难矣陛下将焉用之是不若舍之为愈也方臣荷陛下特達之知蒙委任之重不自知其浅陋欲尽犬马之力以图报称岂敢辞难苟免为一身之计哉今者指摘之者其发既巧沮抑之者其言益彰辯直解纷之不暇求欲建非常之功於绳墨之外盖亦难矣与其强顏以妨贤路是不若退之为愈也伏望皇帝陛下审用舍之权而使臣得全进退之节俾遂所请罢臣宰相职事除一在外宫观或许守本官致仕使得稍逃官谤养疾丘园保全晚节则臣仰戴陛下天地父母之德捐躯之报其必有时臣见居家不敢供职俯伏俟命干冒天威无任惶惧激切之至

乞罢第三表

臣某言已再具表劄乞罢尚书左仆射兼门下侍郎伏奉诏书批答不允者感激危辞敷陈已极眷留縶礼当荷尤难岂进退去就之敢轻盖规矩準绳之难合轩墀将远涕泪交零中谢伏念臣一介孤生两朝旧物以腐儒而谈军旅之事以陋质而充柱石之材赋分穷奇殆将天厌触事齟齬似非人为适当云起龙骧之秋自谓千载一时之遇召从江海畀以机衡被宸章有忠贯金石之言奉玉音有气折四裔之训恃眷知之有素忽窥伺而不防凡所施为皆成罪衅其进銳者其退速物理固然以誉亲者以毁踈人情应尔顾难得者可乘之机会而所惜者已定之规模岂惟系宗社之安危盖亦本生灵之休戚如臣用舍何足少多虽匹夫无不获自尽之功矧大臣有不可则止之戒敢言斯义仰戴必从伏望皇帝陛下洞照微诚曲矜深恳俾退避於贤路以保全於素心犬马之恋无穷徒深局踳天地之恩难报终誓糜捐谨三奉表陈乞以闻

谢罢相除观文殿大学士提举杭州洞霄宫表

臣某言伏奉诰命除臣观文殿大学士依前银青光禄大夫提举杭州洞霄宫任便居住者上还印绶方虞谴责之严退即田庐更冒光华之宠殊庭优礼秘殿清资拜命若惊拊躬增厉中谢伏念臣人微学陋志广材踈妄意功名象龙岂能致雨潜心文墨画饼不足疗饥当艰难多故之秋被考询非常之选代大匠斲已血指而汗顏躡衆俊先宜擢髮以数罪念朝廷爱惜寸陰之日非臣子贪恋宠利之时与其尸禄而妨贤不若乞骸而避路力祈罢免曲荷矜从五湖扁舟虽有慙於范蠡三宿出昼犹窃慕於孟軻孤忠自怜大恩难报此盖伏遇皇帝陛下尧仁天覆汤圣日跻审大君操用舍之权俾微臣全进退之节情同犬马悲迹远於华轩身在山林终心驰於魏阙

谢落职依旧宫祠鄂州居住表

臣某言伏奉告命落臣观文殿大学士依旧银青光禄大夫提举杭州洞霄宫鄂州居住者辅相失职宜即明刑天地有容祇从薄责恩深罪大感极涕零中谢伏念臣乾坤腐儒闽海冷族遭朝廷之多故躡英俊以登庸虽怀忧国爱君之心初无持危扶颠之术荷知特達思图报於涓埃谋已阔疎曾莫虞於机穽虽尝身退尚致人言顾沥血安能明心虽擢髮不足数罪睿智有察覆照无私寬其斧钺之严诛处以江湖之善地姑镌秘职尚领真祠此盖伏遇皇帝陛下道大尧天仁深汤网怜臣寡与自取颠跻察臣孤危本缘愆直特曲宪章之峻俾沾饩廩之余臣敢不循省前非益坚素守轩墀在望莫施犬马之劳恩辉所临但倾葵藿之志

贺天申节表【功德疏附】

臣某言伏遇今月二十一日天申节者星虹枢电协帝王震夙之期福海壽山罄臣子归依之愿矧尝叨於宰辅特仰被於眷知伸颂尧年弥深封祝中贺恭惟皇帝陛下聪明天纵齐圣日跻绍隆烈祖之丕基振起中兴之休运诞弥厥月实开长发之祥壽考维祺宜膺天保之报而臣比缘罪戾拘系江湖殿陛称觴莫筵鸳鸾之列云天在望徒倾葵藿之诚

天申节功德疏

右伏以里社鸣而圣人生允协千龄之运应龙翔而雾雨集咸倾四海之心輒输向日之诚仰祝後天之筭皇帝陛下伏愿丕图永固宝历常新万壽无疆振中兴之大业一人有?底庶国以咸宁

谢移澧州居住表

臣某言蒙恩以谪降官不许同居一州移澧州居住者负罪远屏去魏阙者再冬抱病连年走江湖者万里仅存残息仰荷隆恩中谢伏念臣学不足以为己而欲推之以为人谋不足以保身而欲底之以保国进不量其浅薄退遂致於颠跻烂额焦头何补救焚之道跋前疐後自貽速谤之忧天地涵容日月清照虽远从於譴斥乃曲荷於保全迨此例迁犹得善地此盖伏遇皇帝陛下以智为烛所宝者慈怜其孤危之踪处之深避之所尚叨厚禄以养余生臣敢不铭骨知恩洗心念咎情同鸟雀愿依汤网之寬仁德仰乾坤肯慕湘累之狷介

谢复银青光禄大夫表

臣某言伏奉告命特授臣银青光禄大夫臣已望阙谢恩祇受訖者负衅投荒已荷听还之赐弃瑕録旧更邀宠秩之颁仰佩恩光益深感涕中谢伏念臣赋材甚陋造道弗优适当艰难多故之秋误蒙考询非常之选进乏扶危持顛之策以为国退无防患寡过之术以保身屡致顛跻有辜眷遇谪堕江湖之上茫如醉梦之中岭峤逾年瘴疠为羣於魑魍海岛万里风涛几葬於鲸鲵得返中州特缘大需幸丹书之初削岂旧物之敢期纶綍既行士夫改观此盖伏遇皇

帝陛下以道建极与物为春乘六龙以御天奉三无以劳世察积毁之销骨曲赐保全念向隅之可悲每加矜惻致此孱庸之质亦沾甄叙之恩臣敢不澡雪前非激昂晚节山林待尽邈无就日之期畎亩爱君弥切後天之祝

谢除提举临安府洞霄宫表

臣某言伏奉勅命差臣提举临安府洞霄宫已望阙谢恩祇受讠者鲸海聽还方栖迟於故里琳宫得请遽叨沐於湛恩拜命若惊抚躬增愧中谢伏念臣斗筭小器章句陋儒当艰难多故之秋有特達非常之遇力薄任重宜自取於颠跻罪大衅深每曲蒙於覆护方且涵泳恩波於大山巉岩之下更获寅奉仙圣於殊庭真館之间坐縻廩稍之优顏之厚矣愿修香火之报天实临之此盖伏遇皇帝陛下汤圣日跻尧仁天覆奉三无以劳世舍用何心悯一夫之向隅保全有道致此桑榆之景获沾陶冶之公臣敢不洗濯前非激昂晚节抱慙养拙未从沟壑之捐就日望云弥深畎亩之爱

大行隆佑太后崩慰表

臣某言今月初三日伏覩尚书礼部符四月十五日大行隆佑皇太后崩者弃荣养於东朝颁遗诰於南国凡曰臣子孰不哀摧臣某诚悲诚痛顿首顿首伏以大行隆佑皇太后毓德明柔秉心渊懿正坤仪於元佑之日复椒房於建中之初荐历多艰盖将有待当张楚僭伪之际力主奉迎迨苗刘变逆之秋曲加保佑功在社稷泽被烝黎虽高前古母后之风未孚万国驩心之奉有大德者必得其壽徒闻往哲之言以小疾而遽返其真莫晓高穹之理恭惟皇帝陛下性敦仁孝念軫艰虞慎终之典加隆报德之心罔极怅仙游之浸远悼慈容之莫追愿少抑於至情以永膺於多福臣限以在远不获躬诣阙庭敬奉表称慰以闻

梁谿集卷六十四

卷六十五

钦定四库全书

梁谿集卷六十五 宋 李纲 撰表劄奏议二十七

辞免荆湖广南路宣抚使奏状

辩谤奏状

谢差中使传宣抚问降赐茶药表

已受告命再辞免奏状

论宣抚两司职事乞降处分奏状

乞拨还陈照等人兵奏状 乞差拨诸项人兵奏状 乞将福建等路宣抚司钱粮通融支用奏状 乞令福建等路宣抚司差拨兵将会合讨捕曹成奏状

乞不许诸处抽差韩京等军马奏状

辞免荆湖广南路宣抚使奏状

右臣伏奉告命除臣观文殿学士荆湖广南路宣抚司兼知潭州军州事填见阙仰荷圣恩不胜惶惧感激之至伏念臣迂愚鄙拙初无材能当建炎初蒙陛下起於闲废之中付以机柄之重备位宰司两月余日曾无毫髮之补负罪已深虽尝乞身以退人言游至谤议沸腾自取顛隳屡濒於死仰赖睿明察其无他终始保全卒因宥赦得归中州继复职秩窃禄宫祠诚为侥幸伏惟天地父母之恩何以论报今者又蒙大恩湔洗前愆弃瑕录用进职秘殿委以荆湖广南四路重寄顾臣何者罪戾之余乃当此选所宜黽勉就职竭尽疲弩以图报称而臣累年以来遭罹忧患深涉瘴疠之乡疾病交攻气血衰耗心志不寧动辄惊悸加有重腿足弱之疾行步艰难使当方面之寄深虑处画顛错有误国事伏望圣慈矜怜特降睿旨追寢成命使臣得安闲散寻访医药养痾山林异时稍安蒙被驱策不敢辞难誓极糜捐以酬洪造所有告命未敢只受见寄纳福州军资库听候指挥谨录奏闻伏候勅旨

辩谤奏状

契勘臣蒙恩除前件差遣起於闲废之中授以方面之寄仰荷圣德弥深感泣窃缘臣昨於建炎初丐罢宰相得请以宫祠归自後累有言章论列臣辅相无状措置乖戾等事屡貽谴责罪衅实深不敢自辩今蒙朝廷湔洗录用委以重寄内有所言事件与今来差遣相妨者若不披

露肝胆控告君父力賜辯明則臣豈敢安心職事以圖犬馬之報謹具於左

一臣自建炎元年八月內乞罷左仆射職事蒙恩除觀文殿大學士提舉杭州洞霄宮任便居住乘船欲歸常州無錫縣居止十月間至鎮江府聞有辛道宗下叛兵自秀州作過迤邐由蘇常前來即雇客舟由大江內以歸初不曾與辛道宗下叛兵相遇當時臣弟從事郎綸在無錫縣與知縣郝漸商議說諭叛兵不曾焚毀邑屋臣是時方到鎮江府初不與知言者乃謂臣遣弟迎賊傾家貲犒設制緋巾數千頂以與之實為不根坐此落職鄂州居住行謫者至引漢棄京房唐誅元載等語以實其事臣不勝惶懼殞越之至今來蒙恩宣撫荆湖正是盜賊區宇馬友曹成李宏楊華劉忠奮進韓京吳錫等擁衆多者十數萬少者亦數萬人跨據州縣遞相屠掠自余盜賊千百為羣不可勝計若不宣國威靈廣行招誘則何以仰副委使輯綏一方緣有前件人言未曾辯明於今來職事實有相妨心不自安伏望聖慈特賜鑒察

一臣自建炎二年責居鄂州又移澧州感恩念咎杜門循省不見賓客惟修香火之緣讀誦佛書仰祝睿筭以致臣子拳拳報德之誠至於世故百念灰冷豈敢復與言者乃謂臣資囊士人上書詆訐朝政以圖復用非置之海島使與中原士大夫相絕則朝廷之禍難未已坐此責散官安置萬安軍臣不勝惶懼殞越之至今來蒙恩宣撫荆湖廣南四路當盜賊猖獗民力彫瘵之時若非與賢士大夫相接議論商榷休戚利害而力行之庶幾毫髮之補則何以仰副憂勤圖治之意緣有前件人言未曾辯明於今來職事實有相妨心不自安伏望聖慈特賜鑒察右謹具奏聞干冒天威無任戰越激切屏營之至伏候勅旨謹奏

謝差中使傳宣撫問降賜茶藥表

臣某言伏蒙聖恩以臣除荆湖廣南路宣撫使兼知潭州特降中使傳宣撫問敦遣赴任賜臣茶藥銀合各一具臣已望闕謝恩只受訖者久去天墀徒深葵藿之志遠迂星使特頒雨露之恩只佩寵光彌增感涕臣某【中謝】伏念臣一介腐儒三朝舊物荷聖神之知遇念終始之保全辯丑詆於豺狼當路之時脫余生於蛟鰐垂涎之口恩輝厚矣報稱蔑然迨至命帥以總戎乃復棄瑕而用舊式頒異數昭示眷私滌煩以北苑之靈芽損疾以尚方之妙劑寶奩深貯溫詔延敷穆如清風之慰心恍若沉疴之去體夫何孤陋有此遭逢此蓋伏遇皇帝陛下聖德日躋神心天運公生明而忠邪自辨道乃久而是非日明故於起廢之間示之體貌欲使錫命之際知所勸懷臣敢不仰體皇慈深求民瘼布宣威德庶收藥石之功慰撫烝黎俾知飢渴之解愿圖尺寸之效以答乾坤之私臣無任感天荷聖激切屏營之至謹奉表稱謝以聞臣某誠惶誠懼頓首頓首謹言

已受告命再辭免奏狀

右臣昨於三月二十八日准樞密院差使臣齎到告一道除臣前件職名差遣臣以疾患未敢只受牒送福州軍資庫寄納具奏狀辭免恩命交付差來使臣齎赴行在投遞今月初九日承尚書省劄子四月七日奉聖旨令入內侍省差內侍官一員前去敦遣疾速起發赴任仍宣賜茶藥銀合續於初十日入內侍省西頭供奉官于蓋到臣居止降賜傳宣撫問臣仰荷聖

恩不胜惶惧感激之至已力疾祇受告命望阙谢恩乞重念臣学术空疎智识浅短徒以孤忠误蒙知遇当陛下龙飞之初首膺考慎之选迂拙寡与自取颠隮仇怨造谤必欲寘之死地仰赖圣慈洞照诬妄终始保全使得视听食息以至今日天地大恩非臣糜捐所能报称今者又蒙眷獎弃瑕录用加以秘殿隆名委以数路重寄匪颁温诏礼意便蕃顾臣何人可以当此窃缘臣积年忧患之余血气早衰心志雕耗自去岁以来又感卑湿得腰脚重腿之疾行步艰难深恐总戎讨贼抚循疲民措置失宜有误国事虽仰迫天威不敢不黽勉就职进退维谷夙夜靡遑伏望圣慈察臣恳悃非敢托疾辞难避事特降睿旨检臣前奏许令罢免依旧宫祠追还成命以安愚分干冒天听无任战越之至臣见择日开司进发上道迺逦前去建昌军以来听候指挥谨录奏闻伏候勅旨

论宣抚两司职事乞降处分奏状

右臣契勘祖宗以来所置使名莫重於宣抚多以见任宰相执政官充使韩琦范仲淹等皆尝为之近来知枢密院张浚宣抚陕西四川参知政事孟庾宣抚福建江西京湖南北路皆见任执政无可议者如臣蒙恩起於闲废之中使守藩方亦带四路宣抚之名实为叨冒兼孟庾已充荆湖南北路宣抚使韩世忠副之朝廷付以重兵委之平殄羣寇今又除臣宣抚荆湖事体重叠实有相妨借使诸处盗贼一司欲令招纳一司欲令讨捕不知何所适从诸州钱粮一司欲令支用一司欲令桩留不知如何遵禀以至节制诸将军马辟差州县官吏行移措置皆有妨碍两司既疑於任事朝廷亦难以责成乞自朝廷将两司职事明降处分使有遵守庶几不致误事伏望圣慈特降睿旨详酌施行

乞拨还陈照等人兵奏状

据统制官任仕安劄子契勘仕安所统军马元有统领官陈照马準下人兵共为一军计二千八百余人承宣抚使司劄子备奉圣旨指挥於辛企宗下拣选精锐共成三千人付仕安存留福建路弹压未曾拣选间蒙宣抚司就差陈照马準於南劍州驻劄续於三月初五日准宣抚司劄子备奉圣旨改差仕安带所部军马随逐荆湖广南路宣抚使前去潭州之任其陈照马準亦是仕安所部之数近承福建路安抚司将陈照马準下人兵一千五百人别作一项申乞存留福建朝廷不见此系仕安所部之数已依所乞窃缘陈照马準下人马皆是仕安使唤惯熟之人如拨留福建仕安所部人兵见在止有一千三百余人显是军少不成军伍今来朝廷已差申世景下军马前来福建近已入境欲乞申明朝廷将陈照马準下人马依旧拨还仕安军中部领随逐荆湖广南宣抚使司前去庶得合成一军讨捕盗贼不致误事寻牒福建路安抚司会问因依据知福州兼福建路安抚使程迈公文四月初二日准枢密院绍兴二年三月二十七日劄子据福建路安抚司申奏契勘本路事平之初人情未安生计未备兼建州之民素多凶悍乍得放散归业未肯甘心陇亩窃虑依前啸聚乞存留马準陈照下人兵一千五百人及别无近上统制官弹压乞别选精锐一千五百人前来通陈照马準下人兵共作三千人於上四州军屯泊右奉圣旨令武功大夫神武前军统领申世景将带所部人马前去福州驻劄弹压并已差陈照马準军马并听福建路安抚司节制又准枢密院四月二日劄子枢密院奏勘会已降指挥令神武前军统制申世景将带所部人马前去福州驻劄弹压契勘申世景

本部止是一千二百余人窃虑数少缓急使唤不足右奉圣旨令单德忠带领本将官兵随申世景人马前去福州驻劄权隶申世景下使唤候到本州并听安抚司节制者

右臣契勘任仕安下元系统领官三员陈照马準李建共计人兵二千八百余人合成一军并是任仕安所部昨降指挥同存留福建路听安抚司节制分拨任仕安李建在建州驻劄陈照马準在南剑州驻劄二月八日准尚书省劄子除臣荆湖北等路宣抚使就韩世忠下拨高举一项人马八百余人随逐前来之任续准尚书省劄子枢密院奏勘会已降指挥令李某将带高举一行人马前去潭州之任窃虑韩世忠下阙人使唤奉圣旨以差任仕安将带所部军马随逐前去其高举一行依旧听韩世忠使唤省劄既到之後福建路安抚司却将统领官陈照马準下人兵别作一项陈乞存留福建并不声说元系任仕安所部军马致朝廷不见得前项事因已依所乞存留其统制官陈照下计七百八十六人马準下计七百一十四人除两项存留外任仕安并李建共止有一千三百余人显是单少分拨部伍不行令来朝廷已再差申世景单德忠两项军马约二千余人前来福建伏望圣慈特降睿旨将统领官陈照马準下人兵依旧拨还任仕安所部庶几稍成军容实系国体

乞差拨诸项人兵奏状

右臣准尚书省劄子勘会已降指挥福建江西荆湖南北路宣抚使副孟庾韩世忠总率大军自温州起发迤邐入江西由洪袁州前去湖南措置盗贼今来新除荆湖广南路宣抚使李某见在福州前去之任其经由道路理合照应四月七日三省同奉圣旨令李某将带军马疾速起发依降指挥相度由汀道州就令抚定广东经过州军前去之任臣勘会自福州至潭州若由建昌?吉入衡州前去约三十余程若由汀道广南前去须由梅循惠广端康封梧昭贺等州皆烟瘴深处约九十余程实为非便今相度欲自江西建昌?吉前去与福建江西荆湖宣抚司大兵自不相妨兼速至潭州本任可以措置本路职事如朝廷欲令臣先到广东抚定州县即由建昌军?吉州南安南雄英韶广等州亦可前去但道路迂远卒未有到潭州之期又缘英韶循惠等州目今见有盗贼头项不一万数浩瀚曹成十数万人见在连贺等州作过正阻湖南潭州之路臣若取道广南抚定诸州非得重兵不可以行今来止有拨到任仕安一项人兵一千三百余人显是单少须候画一奏状内踏逐诸项人兵差到齐足乃可前去伏望圣慈特赐睿察处分施行

乞将福建等路宣抚司钱粮通融支用奏状

右臣契勘臣所领荆湖宣抚职事与福建江西荆湖宣抚使司军马事体一同所用钱粮理合通融应副不分彼此今来福建江西荆湖宣抚使副一行军马先到江西并荆湖路分有所逐路州县钱米并系先次剗刷拘收若不通融应副支給窃恐臣所经由州县及到荆湖路军兵官吏批请及安泊老小州县无可应副缓急阙絶误事欲乞朝廷指挥若孟庾韩世忠未班师以前已剗刷下江西荆湖路诸州县钱粮听两司军马通融应副支給班师之後钱粮余剩及以前朝廷支拨并别路取拨到钱米银绢祠部官告等余剩之数并乞桩留拨付本司所贵就近应副免致叠有申奏陈乞紊烦朝廷亦恐往复迟缓不能及事伏望圣慈特降睿旨处分施

行

乞令福建等路宣抚司差拨兵将会合讨捕曹成奏状

右臣据荆湖南路提刑司桂阳监申曹成一项贼马约有可战兵三万余人别有占巢打食人约六万余人占据道州半年有余於今年三月内已离道州侵犯广南贺州又据亲卫大夫建州观察使权知潭州兼权湖南路安抚总官岳飞申已将带所部军马统率吴全韩京吴锡等兵前去道州措置曹成契勘臣蒙恩除荆湖广南路宣抚使准尚书省劄子备奉圣旨逐路兵马并听节制所有岳飞吴全韩京吴锡等兵见在本路并合听臣节制除已劄下岳飞统率逐项军马疾速前去道贺州以来措置招捕及差使臣齎送朝廷降到勅榜黄旗金字牌等付岳飞军中令相度事势如曹成有改过自新听伏招纳之意即差晓事文武官各一员齎前件旗榜等前去说谕祸福开示大信特与招纳拣选精銳强壮人结成队伍分隶诸将听候使唤不堪披带可以执役之人刺填诸州厢军老弱病患及不愿充军之人给与公据放散内有系西北无业可归之人并分拨诸州居住将系官荒废户絶田土量度给与耕种务必得所如不伏招纳依前作过即会合广西安抚司措置掩杀亦已劄下广西安抚司照应施行窃缘曹成一项人马万数浩瀚岳飞等兵人数不敌非得福建江西荆湖宣抚使司差兵将前去協力招捕窃虑淹延为二广之患缘贺州系广南西路伏望圣慈特降睿旨下福建江西荆湖宣抚司令不拘路分差兵将前去会合招捕施行

乞不许诸处抽差韩京等军马奏状

右臣蒙恩除荆湖广南路宣抚使准尚书省劄子节文二月八日三省枢密院同奉圣旨逐路兵马并听节制契勘岳飞一项军马八千余人元在洪州驻劄听江西安抚大使节制朝廷近差权潭州见将带本部军马在湖南道州措置曹成依近降圣旨指挥合听臣节制韩京一项军马一千余人元在衡州驻劄吴锡一项军马一千五百余人元在郴州驻劄并听湖南安抚使司节制见带所部军马随逐岳飞前去道州吴全一项军马八百余人亦系自江西随岳飞前去道州并合听臣节制除已劄下逐官知委外窃缘荆湖两路系东南上流目今盗贼头项衆多内曹成一项贼马已侵犯广南东西路连贺等州非压以重兵势难招捕将来盗贼平定之後亦须屯驻军马控扼要害之地庶几强敌不敢窥觊今来逐项军马虽合听臣节制窃虑它司陈乞得旨临时难以占留有误大计伏望圣慈特降睿旨不许诸处抽差令臣得以专一拊循训练缓急之际可以倚仗不致阙误

梁谿集卷六十五

卷六十六

钦定四库全书

梁谿集卷六十六 宋 李纲 撰表劄奏议二十八

具荆湖南北路已见利害奏状

乞留程昌禹依旧知鼎州奏状

乞措置捕招?州盐贼奏状

乞令韩世忠不拘路分前去广东招捕曹成奏状

乞令韩世忠相度入广西招捕曹成奏状

具荆湖南北路已见利害奏状

今具荆湖南北路招捕盗贼拊循归业之民经营控御措置钱粮已见利害下项

一准福建江西荆湖南北路宣抚使司关荆湖南路马友约六万余人马数千疋船数千只见在潭州李宏约一万余人见在岳州曹成约十万余人见在道州刘忠约一万余人见在岳州平江潭州浏阳界出没作过胡元奭三千余人见在茶陵界上李冬至余党五千余人见在郴连界上荆湖北路杨华约一万余人雷进约八千余人刘超一万二千余人见在鼎澧州界已上约二十余万人其余接境去处千百为羣又不在此数盗贼之衆如此非得重兵制御弹压使之畏威不敢猖獗然後可以招纳为用而遽欲以恩意姑息怀之臣未见其可也今福建江西荆湖宣抚司临以重兵理当听命访闻马友一项人马即日见在潭州视诸处头项颇为循理宜先次招纳稍加旌赏以劝其余刘忠一项人马号白犢笠即日见在岳鄂潭袁诸处界上屯泊出没作过自知罪大不能自新尝於旗上有永不伏招安之语此一项最为桀黠猖獗数州之民皆被其害宜先次讨荡使其余知所惩创胡元奭一项已为提刑吕祉会合杀散刘超一项已为鼎州帅臣程昌禹遣兵逼逐出境未知所向自余李冬至鍾相余党杨华雷进逐项贼火招纳讨定当随宜措置外惟曹成一项狡狴惨酷尤甚屡招屡叛所至一人为梗靡有噍类即日见已起离道州侵犯广西贺州界分缘广南州县素无城郭人兵孱弱深虑乘虚远引为二广之患宜先遣晓事官吏使齎朝廷所降勅榜黄旗金字牌先去抚谕示以祸福许之自新如听伏招纳即依金字牌上圣旨处分将所刼掠及老不堪披带人经所属给据放散外其实堪披带出战人结成队伍并听宣抚司使唤具首领姓名推恩外其首领理须拨隶诸将下随材录用不堪拨带出战尚堪执役之人合刺充厢军分隶诸州其?退老弱不堪执役之人给公据放散如系东北人无业可归合就近分送州县居住将天荒户絶抛弃转徙逃亡系官田土措置给与耕种借贷种粮务令存恤得所昔东晋朝北方流人皆置侨寓州军以处之盖流

人与土着盗贼不同放散则无所归又须结集为盗合藉州县官用心循拊自当复为良民伏乞朝廷更赐详酌指挥其李宏一项元隶马友今已将带一行人马擅住岳鄂亦乞依此施行如不伏招纳依旧作过即乞多发兵将会合掩杀以殄灭为期如此则荆湖盗贼不踰时可定缘臣所得圣旨指挥令相度由广东前去之任因令抚定广南州军见已具奏申明若自广南前去即荆湖事无由措置深虑有失机会伏望圣慈特降睿旨作朝廷行下付福建江西荆湖路宣抚司密切措置施行

一勘会荆湖南北路州县居民近年以来初遭鍾相孔彦舟作过迁徙失业重以马友曹成李宏刘忠刘超杨华雷进十数头项蹂践搔扰民不聊生湖南潭衡全邵道永郴桂阳湖北岳鄂鼎澧并属县等例皆残破民居存者百无一二田土荒芜财用匱乏将来盗贼平定之後若不极意招集料理使之归业开辟耕凿以望岁丰则破残州县卒未就绪欲乞朝廷特降勅榜晓谕应归业之民委实曾经兵火不曾种蒔去处与免将来冬苗租税无力耕种贫不能自存者官贷种粮随物力等第约度数目支給候将来成熟随料回纳入官逐州见今起发上供钱绢银等委是无从而出特与权免一次捡踏田土支散钱粮官吏奉行不得灭裂搔扰重寘於法务令实惠及民使一方晓然知朝廷德意所在契勘荆湖土地沃衍最为出产谷米财物去处止缘累年盗贼失於措置遂至凋敝朝廷稍寬目前之急不惜赈贷之费假以年岁间渐次复旧国用何患不饶如合圣意伏乞特降指挥施行

一荆湖之地縣数千里南通二广西引四川北控襄汉东接江淮自昔号为上流诸葛亮谓之用武之国今朝廷保有东南制御西北荆湖诸郡如鼎澧岳鄂连荆南一带皆当屯宿重兵倚为形势使四方之号令可通襄汉之声援可接乃有恢复中兴之渐今福建江西荆湖路宣抚使司之兵将来平定盗贼之後复还行在臣画一内依所降指挥踏逐乞兵不满万人若到本路兼得岳飞吴玠韩京吴玠等兵方能仅及二万之数分屯布依沿江要害去处深虑不及伏望圣慈许臣候到本路相度形势图上方略别行申请

一契勘荆湖两路当盗贼兵火之後物力大屈今来养贍官吏军马振贷归业之民修治官府城壁器仗之类百色用度并皆未有指拟去处朝廷欲以二广经理荆湖固为得策然广南素号薄瘠米谷不多财用窳乏加以比年应副朝廷须索尤觉困匱借使竭力剗刷所有几何今又盗贼未弭道路不通卒未可以那移应副近准尚书省劄子许於吉州榷货务支银一万两钱一万贯此但可以支目前之用若要支梧年岁间非於江西邻近湖南州郡权宜应副决不能有济伏望圣慈特降睿旨令於筠袁吉等州应副米十万石於转运司及吉州榷货务应副银五万两钱十万贯接续支使庶几不致阙误右谨录奏闻伏望勅旨

乞存留陈昌禹依旧知鼎州奏状

右某准尚书省劄子节文二月二十七日三省枢密院同奉圣旨荆湖东西路依旧为荆湖南北路逐路州军除分鎮县余并依旧制内湖南依旧潭州置帅李某兼本路安抚使余已降指挥湖北於鄂州置帅刘洪道除徽猷阁直学士差知鄂州充荆湖北路安抚使程昌禹罢湖西安抚其所管军马尽数交割与刘洪道讫发来赴阙臣契勘荆湖北路为鍾相孔彦舟刘超

雷进杨华等盗贼连年残破杀戮官吏所余无几除辰沅靖州系深入溪峒州军外惟鼎州昨带湖西路安抚使系右朝散郎直龙图阁程昌禹在任二年措置讨捕杨么杨华锤相余党杀败刘超逼逐出境招纳彭筠六千余人一方粗定颇见宣力今来有指挥罢赴行在虽远方不知事因询之衆论以谓昌禹在鼎州实有功效别择守臣未必能知首尾或致误事兼契勘荆湖北路安抚司移就鄂州其鼎州旧带钤辖如刘洪道知鄂州充湖北路安抚使程昌禹知鼎州充湖北路兵马钤辖听受节制自不相妨伏望圣慈特降睿旨且令昌禹依旧在任如已差官亦乞别降指挥施行

乞措置招捕?州盐贼奏状

右臣准尚书省劄子节文四月七日三省同奉圣旨令李某将带军马疾速起发依已降指挥相度由汀道州就令抚定广东经过州军前去之任臣又依禀圣旨行下广东州军勘会今盗贼数目屯泊作过去处措置招捕外访闻广东盗贼一项犯南雄英韶等州一项犯循梅惠等州动以万计残破诸县杀害平民皆是?州诸县平时般贩私盐之人其初千百为羣入广东界掳掠牛畜财物之类巡尉弓兵不切用心捉杀使之厚有所得而归复为平民?州守令亦不谁何累岁如此浸淫不制今年遂至有万余衆入南雄英韶者围郡城刼岑水场而去入循惠者破龙川长乐兴寧河源博罗等县直抵循惠城下至今犹未复归巢穴原其所以致此皆由州县弛慢之故今若欲锄其本根须就?州措置扫荡巢穴诛其首恶乃可惩艾臣见具奏申明经由道路如蒙朝廷依臣画一内所乞踏逐数项兵七八千人可以由广东前去即乞许臣到?州官吏兵将并听臣节制庶几可以施設方略治其本源下流自然无患如合圣意伏乞特降睿旨施行乞令韩世忠不拘路分前去广东招捕曹成奏状

?广东东路安抚使林通四月空日劄子节文契勘曹成贼马三月二十九日自道州侵犯临贺遣兵四出见屯两路要害去处本路兵力单少素不练习西路尚有洞丁刀弩手可用至如东路枪杖手名籍虽存其实农夫岂可出战除已逐急发兵控守关扼然贺州势在上流南入连英东下封康不数日便至番禺今来封连探报事愈危急准枢密院劄子差高举一头项兵应援二广并未见入界除已统率人兵旦夕就道至封康以来防遏外乞拨高举人兵星夜前来应援庶几保全二广又?广南东路转运判官章杰四月十四日申探报曹成贼马分作三头项透入贺州富川县侵犯贺州杀人放火刼虏人民贼势浩瀚乞催发高举人马兼程前来会合捉杀免致奔冲又?广南东路转运判官章杰四月十四日申探报曹成贼马四月初三日乘牌船过水东入贺州放火烧本州敌楼战棚及居民屋宇等贺州知州及本州官尽出州城下水前去乞速差兵前来救援又?广南东路转运判官章杰四月十六日申?广州怀集县申四月初一日曹成贼马侵犯县界令佐等将带弓级保甲枪手等前去迎敌贼衆浩瀚势力不加遂致溃散其贼兵直冲突占据本县广州事势危急乞摧发高举人兵疾速前来应援者右臣所?广南东路安抚使林通转运判官章杰公文探报曹成贼马次第备録在前契勘臣昨准尚书省劄子除臣荆湖广南路宣抚使於韩世忠下拨高举一项兵马八千余人听臣节制续准指挥改差任仕安将带所部军马随逐前去之任其任仕安下人兵元管二千八百余人又为福建路安抚司陈乞统领官陈照马準下一千五百余人存留福建其余止有一千三百余人委是单少臣以见具奏辞免恩命未敢申陈今来蒙恩差入内内侍省西头供奉官於盖前来降

赐敦遣就道臣仰迫天威已祇受告命择日开司朝夕启行今据广东路官司申报曹成贼马已破贺州占据怀集县系广州属县事势委是危急帅臣林逋称亲自率兵前去封康州防托切虑未足倚仗其广州繁富号为东南都会虽有可守城池若帅臣已去谁与固守实为可虑臣方受命之初道里辽远又所得任仕安兵才千余人难以分拨应援虽已遵依近降指挥许依江东路安抚大使画一差兵二万人旋行踏逐方据奏请听候指挥无由目下便得齐集深虑应援有失机会曹成贼马为二广之患滋大万一广州或致失守自余州郡多无城池皆须望风奔溃其害有不可胜言者臣辄有愚虑仰瀆天听臣窃见福建江西荆湖宣抚副使韩世忠行军整肃忠勇有谋曹成据贼十余万衆除老弱胁从妇女外能战兵尚三万余人使其余将士当之未必能有济欲制此贼或招或捕非世忠不可今世忠统兵已到吉筠袁间深恐拘碍路分止在荆湖不敢前去广南则曹成为二广之患其势未艾伏望圣慈矜怜广南两路生灵之衆在今日为朝廷腹心之地不可不早加料理特降睿旨令世忠不拘路分量留人马照应荆湖外尽将所部取便道前去应援广东措置曹成一则军马已集可以目前使唤二则道里已近可以指期而至臣愚窃谓朝廷今日应援广东之策无以加此又广东素号瘠薄应副大军钱粮必致阙乏世忠既行福建江西荆湖宣抚司将剗刷到钱粮可以通融应副此又军期所须之大者如合圣意乞作朝廷措置用金字牌入递付世忠施行臣已具奏遵禀圣旨许依江东安抚大使画一指挥踏逐人兵如蒙朝廷应副亦乞用金字牌降下勅劄庶几早得齐集可以与世忠声援相接二广早见平定

小帖子

契勘福建江西荆湖宣抚司与荆湖广南宣抚司两司不相节制如蒙圣慈从臣所请令韩世忠前去广东招捕曹成乞降指挥令与臣关报事宜同共措置庶几不相违戾有所協济仰副委任之意伏候勅旨乞令韩世忠相度入广西招捕曹成奏状

今月二十七日准尚书省劄子江南西路安抚大使李回奏缴到岳飞状准江南西路安抚大使司牒三月二十二日准枢密院三月四日劄子奉圣旨令岳飞到袁州更切勘量贼势如贼兵衆且於袁州驻劄候宣抚司人马到同共进兵如曹成已受招安起发赴行在即与马友会合同共剿杀刘忠乞续往潭州无致稍失机会却致贼兵破坏二广飞一行军马已到衡州茶陵县不往承准郴衡州桂阳监等处关报及飞亦差人探得曹成已发人马取三月十九日起发往泉永州侵犯广西界分并前军人马往贺州路前去其曹成中军见在道州未有的实起发月日见不住放人四向虏掠杀人放火似此显见曹成未肯便赴行在意欲侵犯二广作过今准前项公牒奉圣旨指挥缘一行官兵已过袁州地里稍远兼续於四月初三日准荆湖东路提刑司关报探得曹成贼马已起离道州前去广西飞除已差人探仔细外今已进发往郴州桂阳监已来驻泊如曹成不赴行在及未入广西飞便行措置进兵掩杀若曹成已入广界不审今飞一行军马如何施行已具录奏闻伏望圣慈特降睿旨付飞以凭遵依施行

右勘会近据岳飞申到前项事理勘会曹成一行虽有五万余衆其少壮之人止仅二三万四月二十六日已奉圣旨令岳飞更切探伺如曹成委是不肯赴行在已侵入广南地分即统率诸头项军马取径路并力追袭掩击务在从长措置保护二广无致稍失事机破坏广南州县

仍令广南东西路帅臣依已降指挥起发逐路洞丁刀弩手将兵士军弓手民兵疾速躬亲统率前来界首与岳飞会合并力夹击并劄与孟庾韩世忠及臣措置施行者

右臣近据广南东路安抚使林通转运判官章杰申探报曹成贼民已破贺州侵犯广州界分占?怀集县广州事势危急乞发兵应援臣已具奏闻窃见韩世忠治军严整忠勇有谋少见其比乞令不拘路分统率大兵前去广东应援措置招捕曹成免致广南两路破坏州县外今准枢密院劄子备奉前项圣旨令岳飞更切探伺如曹成已侵入广南地分即统率诸头项军马取径路并力追袭掩击务在从长措置保护二广劄付孟庾韩世忠及臣疾速措置臣已关送福建江西荆湖宣抚使副及劄下岳飞?依圣旨指挥施行讫契勘曹成一项贼马最为桀黠外假听从招纳之名内有包藏窥觊之意占据道州半年有余侵犯二广其衆号称十万除老弱胁从妇女之外可战之兵犹有三万余人既为大兵所逼遂有乘虚深入二广之计广西犹有洞丁刀弩手兵将之属可以控遏广东兵力实为单弱难以支梧深虑州县望风奔溃为害不细今虽已降指挥令岳飞统率诸头项人马追袭掩击窃虑岳飞所率兵数不多钱粮阙乏未必能济非得韩世忠统率大兵前去措置应援及将福建江西荆湖宣抚司剗刷到诸路钱粮通融应副深恐未能早见招捕了当兼契勘曹成本系荆湖盗贼只缘大兵所逼遂犯广南若拘以路分谓目今作过不系荆湖地分即是以邻国为壑恐非朝廷销弭内患之意臣今欲乞自朝廷降指挥令世忠相度如大兵目今已在湖南及筠袁间即由全永入广西路自桂府顺流以趋广州如大兵目今在?吉间即由南安南雄英韶路顺流以趋广州可以遏贼之冲令岳飞统率军马由道贺追袭其後臣如蒙朝廷应副画一内所踏逐兵勾抽齐集亦可以由?吉英韶前去封康循惠间随宜措置御贼奔迸与之協力进讨不数月间须见了当却由便路趋湖南措置其余盗贼不难平定伏望圣慈特降睿旨详酌施行

小贴子

臣契勘广南西路五十余州旧号荒远在今日实为要地今曹成侵犯若不早加措置招捕了当窃恐两路州县为贼残破卒难经理兼两路皆有獠人溪洞乘势必须作过广西与交址相邻亦恐有所窥伺道里去朝廷最远将来兵力难及朝廷不可不深留意於此伏乞圣察

梁谿集卷六十六

<集部,别集类,南宋建炎至德佑,梁谿集>

卷六十七

钦定四库全书

梁谿集卷六十七 宋 李纲 撰表劄奏议二十九

贺天申节表【功德疏附】

乞以江西钱粮应副荆湖赡军奏状

乞降旨林通刷下钱米存留本路支用奏状乞差内侍一员承受发来文字奏状

将带军马之任奏状

再乞差使臣齎旗榜招抚曹成及论招捕盗贼奏状

乞依近降指挥乞兵二万人措置招捕曹成奏状

乞拨顔孝?军马付本司使唤奏状

乞差拨兵将前去广东招捕曹成奏状

贺天申节表【功德疏付】

臣某言伏遇天申节者帝出乎震与物为春天作之君惟民其乂适届诞弥之月咸倾善祷之心矧蒙睿主之知尝叨近辅仰祝圣人之寿敢後华封臣某诚欢诚拊顿首顿首?惟皇帝陛下德合乾坤明并日月昭受维新之命图回复古之功以尧舜之用心法高光而建业照临四海载当震育之辰寿考万年永笃家邦之庆而臣误蒙中诏往守南藩莫陪鸳鹭以称觴徒效葵藿之倾日

天申节功德疏

右伏以星虹流渚式昭诞圣之期鸞鸞鸣岐允協兴王之运四海罄华封之祝一人膺景命之祥必藉胜因仰资睿筭皇帝陛下伏愿後天难老长居覆焘之功与物为春永宝好生之德复文武之境土享尧舜之历年万寿无疆四方来贺

乞以江西钱粮应副荆湖赡军奏状

右臣伏蒙圣恩除荆湖广南路宣抚使兼知潭州於潭州置司窃原朝廷令臣宣抚四路之意

盖缘荆湖南北两路累年为盗贼蹂践州县残破钱谷阙绝欲令将广南东西两路财赋经理荆湖使之养兵赈民葺理州县早得就绪规略甚远今则不然荆湖盗贼如曹成一项十数万人既坏荆湖诸州又侵广南界分破扰连贺侵逼广州其势未艾非得大兵会合未易招捉罄广南两路财赋应副支遣尚恐阙乏岂复有余可助他路是今日逐路事势与朝廷前日措置经理之意全然不同臣已具奏闻乞以江西钱米应副荆湖伏望圣慈特降睿旨检会臣前奏特赐指挥施行

乞降旨林通刷下钱米存留本路支用奏状

右臣准尚书省劄子节文广南东路转运判官章杰劄子为张忠彦兵二千余人见在英韶州驻劄钱粮阙乏应副不行乞行措置劄送臣本司措置施行除已依禀措置外契勘广东虽号薄瘠财用不足然张忠彦兵才二千余人岂有遂至应办不行之理将来大兵前去招捕曹成何以应副支遣访闻广东路安抚使林通被受指挥总领诸司钱物应副买牛粿米之类将诸州钱物尽行剗刷拘占遂致贍给军民钱谷不足今来曹成贼马侵犯广东势须用兵讨捕若非通融移挪诸州钱米应副支遣必致阙乏有误国事伏乞朝廷勘会如林通委曾得前项指挥即乞特降睿旨令未得施行已桩管钱米等并未得起发且存留本路应副大兵支用候将来盗贼平定财用有余别行相度措置庶几不致阙误

乞差内使一员承受发来文字奏状

右臣伏蒙圣恩除臣荆湖广南路宣抚使见起发前去之任窃缘荆湖广南见今军兴招捕盗贼朝廷劄降指挥与本司奏请文字皆系军期急速荆湖南北广南东西四路去行在道里最远虽入急递例多稽迟实封奏状赴都进奏院通进司投进经隔官司伺候时刻亦有留滞窃虑申奏事宜等待报应坐费时月有失机会伏望圣慈特降睿旨许臣申奏如系事干军期急速听径赴内侍省投进差入内内侍省一员专一承受所有朝廷劄降圣旨指挥并用金字牌入急脚递不得入铺星夜传送前来庶几报应疾速不致误事

将带军马之任奏状

准绍兴二年二月八日尚书省劄子二月八日三省枢密院同奉圣旨李某除观文殿学士荆湖广南路宣抚使兼知潭州仍於本州置司不候受告般家接人前去之任逐路兵马并听节制仍具已起发及到界首文状申尚书省臣?依前项圣旨指挥已具奏闻择定五月初六日起发今来已於五月初六日申时起离福州将带统制官任仕安军马由南剑州邵武军迤迤前去之任外须至奏闻者

再乞差使臣齎旗榜招抚曹成及论招捕盗贼奏状

?广南东路经略安抚使林通申契勘曹成人马昨占?湖南东州後来移军往广西贺州驻劄日近常遣游骑散行劫掠广西数郡及迤迤侵入本路封连州界两路居民并各逃散耕种失

业今来通除已?依圣旨指挥一面躬亲统率将士等起发前去缘本路将兵不满千人近蒙朝廷令宣抚司分拨高举兵马应援累遣催促至今未见到来其曹成贼马动是万衆窃虑支梧不前蹂践州县卒未休息为本路生灵之患近承广西经略许中牒据曹成状供申吴宣抚已被受朝廷诏旨令赴行在乞行发遣後來宣抚司已出给发遣曹成前去行在一宗文字付曹成於三月二十日起发到寧远县因知道州向子恣将近降捕促赏格大书揭榜路旁致曹成复回贺州为无粮食不免散行抄掠近闻曹成军中颇有自新之意通除已逐急具状奏闻乞速降指挥差官由广东路前来招抚曹成一军除放散掳掠外所有堪用之人选择少壮亦得添助朝廷勾管使用不惟保护两路财赋全活数州百姓而戢兵安民为利实大申本司乞速赐差官前来招抚以纾两路之急须至奏闻者

右臣契勘昨来荆湖羣盗惟曹成人数最多曹成侵逼岭外唯广州事体甚重故今日招捕盗贼後先缓急之序臣谓当以经营曹成救援广州为急曹成十万之衆除老弱妇女外能战之兵不下三万今据广南东路经略安抚使林通前项申述已侵入本路封连州界若便行进兵掩击贼必闻风奔冲南向不唯先犯广州而广南东西两路州县必皆受害臣以谓经营曹成军马先须招抚为策之善缘招安巨寇必得重兵先张形势示以国威使之畏伏若止欲怀以姑息之恩贼衆必不肯投戈解甲分散徒党如此是目前名为招安必貽後日之大患臣请以近事验之昨赵延寿未到德安府愿从陈规与抚谕官冯轡招安既近州城觐知德安兵数不多遂乘规出城餞轡辄谋驱掳规仅以身免官更多为延寿所得延寿自繁昌历建康湖杭千有余里必要赴吕颐浩军前招安刘光世韩世忠等招之皆不听命假道徽州不敢入城秋毫无犯其意可谓确矣及至祈门浮梁见种师古等兵衆不多遂刼盟以执师古直犯饶州赖阁皋力战方退复领余党猖狂於宣徽之间久之方定以此可见盗贼狼子野心叛服无常要当压以重兵始免反复臣蒙恩命除荆湖广南路宣抚使兼知潭州见今止有拨到任仕安一头项军马计一千三百余人虽已具奏遵依近降圣旨指挥许依吕颐浩昨任江东安抚大使画一踏逐军马至今未奉回降指挥其元降圣旨许就用吴敏措置下兵粮体问除广西见在兵将外亦别无措置下军马道路寫远见今阻隔卒难办集窃恐迁延日月贼势益张而臣误蒙委寄之重深虑事失机会若一处帅府失守益难料理乞降睿旨从臣所乞踏逐军马外更自朝廷差拨一军整齐兵将付臣使唤臣又尝奏论韩世忠忠勇有谋治军严肃可以倚仗今若委世忠进发广东以援广州使臣同共措置招抚则曹成之衆可以放散老弱择强壮充兵分隶军中指日可定缘世忠系宣抚福建江西荆湖路非得朝廷指挥恐不敢出本路界以援二广不惟二广州县未甚残破速当保全而荆湖剧贼皆视曹成以为叛服若招抚曹成已定全得二广则荆湖两路盗贼或招或捕皆易为力顾曹成桀黠拥衆数万非世忠全军声势之壮未易使之听从臣前所谓当以经营曹成救援广州为急者此也臣前已遣人齎金字牌黄旗黄榜前去荆湖委岳飞差人入曹成军中招谕计程不久当到又虑道路或有阻塞今据林通前项申述臣已逐急再遣人齎金字牌黄旗黄榜由广东路前去招抚曹成伏望圣慈详酌前後奏请早降睿旨施行臣见起发建昌军等处听候指挥

小帖子

契勘荆湖州县残破略遍二广帅府各系全盛处若蒙朝廷许令韩世忠前去救援即乞降指

挥指定从韶州路赴广州屯泊免致贼马奔冲保全广州即广东州郡皆恃以安伏望睿慈详酌早降指挥乞依近降指挥乞兵二万人措置招捕曹成奏状

准枢密院闰四月二十六日劄子福建江西荆湖南北路宣抚使司申契勘曹成占据湖湘之久已奉圣旨发赴行在近因岳飞倚本司大军之势提兵压境遂致疑贰遽令羣党南去今收李回书报已犯连州亿度其计决窥二广且军兴已来郡邑多经残破二广幸无兵火深虑民物将被其害伏望圣慈速赐睿旨措置施行勘会宣抚司大兵未到湖南之时曹成已是不伏招安不肯前来赴行在侵犯二广势已猖獗遂降指挥令岳飞统率诸头项人马前去掩击又据探报曹成贼马已占贺州侵犯昭连州界作过续降指挥令岳飞依已降指挥取径路前去广南并力追袭务要早得殄不致侵扰州县其合用钱粮委逐路漕臣多方那融協力应副仍劄与宣抚司去讫今来宣抚司人马约程已到湖南闰四月二十四日奉圣旨令宣抚司勘量贼势如岳飞孤军难以破贼即疾速分拨人马前去策应务要剿除净尽保全二广仍劄与李某疾速由广东前去保护本路及令宣抚司期约广西许中起发本路军兵及洞丁等并力会合掩杀去讫劄送臣依已降指挥疾速施行须至奏闻者

右臣契勘昨奉圣旨令相度取道广东之任就令抚定广东州县臣已遵依相度奏闻未奉回降指挥间广东经略安抚使林通申曹成侵犯贺州及怀集县已具陈述措置曹成招捕利害闻奏外今准前项指挥臣已依圣训起发前去广东州军措置抚定缘臣见带军马止有任仕安一项计一千三百余人除火头輜重外结成队伍不满千人虽依朝廷近降画一指挥踏逐人兵并未蒙差到亦无近上可使将官委是兵力单弱使唤不行其曹成贼马万数浩瀚设若不就招抚为岳飞等逼逐奔突二广广西犹有洞丁土兵弓弩手等可以防遏广东将兵孱弱除广州外其余州郡并无城壁可守非得重兵岂能挫遏贼锋保护两路况臣误蒙圣恩宣抚荆湖广南委寄之重深虑无以远将明命宣畅国威使巨寇望风震服万一与贼相遇势当掩击亦须军马俵布得着方免疎虞兵法十则围之倍则战今以千兵而当十万之衆是以一当百虽古名将能以少击衆亦难成功况臣书生不谙行阵徒以尝备位宰相特蒙弃瑕录用使之抚定一方今日职事动系国体与战将偏师侥幸一时之利者自不同科其所乞之兵未敢全望依朝廷近降画一指挥满二万人数时下且得万余人分为五军粗成军容张大声势鼓行而南庶几亦可指授将佐乘机制变施設方略保全二广仰冀陛下南顾之忧若只令臣以任仕安千余衆苟且将带前去窃恐虚受重责伏望圣慈矜察特降睿旨检会臣依近降画一累奏踏逐将兵早赐指挥更自朝廷差拨一军整齐兵将付臣使唤臣见迤邐前去听候回降指挥

小贴子

臣契勘枢密院劄子内备奉圣旨令福建江西荆湖宣抚司斟酌贼势分拨人马策应岳飞上项所差兵合自南雄英韶前去广州稍可扞御贼马保全广东乞降睿旨令差拨随逐臣前去听受节制庶几藉其兵力诸事易为措置如蒙圣旨允臣所请乞用金字牌降下施行

乞拨顔孝军马付本司使唤奏状

右臣契勘昨奉圣旨许用江东安抚大使吕颐浩画一指挥内一项踏逐差兵二万人臣本司已具奏踏逐辛企宗阎皋等军至今未奉回降指挥近闻辛企宗阎皋等军马皆已为福建江西荆湖宣抚使司抽拨分隶诸将无可指準其余所乞朱师闵郝晟李山等兵人数不多亦未蒙差到今准枢密院劄子缘曹成侵犯封连等州闰四月二十四日奉圣旨令臣径自广东前去保护本路缘臣所带任仕安军马止一千余人兵力单弱事势急迫别无可以踏逐窃见新除湖北路安抚使刘洪道见将带崔邦弼颜孝?两项军马在建昌军驻泊以鄂州粮食阙乏未曾之任乞降指挥就近拨颜孝?一项军马付臣使唤却就江西别拨将兵与刘洪道庶几臣可以即行勾唤早得齐集发付广东兼湖北路军马自合听臣节制伏望圣慈特降睿旨施行

乞差拨兵将前去广东招捕曹成奏状

今月二十五日准枢密院五月二日劄子节文广西路经略使司申节次据统制官杨友等申探报曹成贼马约十余万衆起离道州攻破道州逼近昭州界分本司除见整龔人马极力扞御况曹成数衆贼马啸聚日久势力凶盛本路人马素来单弱委实不敌难以支梧已累申牒宣抚使李某广东路安抚使岳飞去外伏望朝廷体念二广生灵之衆速赐指挥催督诸头项人马兼程前来与本路兵将并力会合早获扑?免致贼徒残破以南州县除已具奏闻外候指挥小贴子称照会曹成作过累年既就招安旋复变辞者前後凡七八次昨自攸县驱携帅臣向子諲占据道州挟使移文称奉帅司指挥移军就粮及自牒广东州郡饰说移军因依诈出文榜焚戢侵陵其实搽源剔数无有遗类备录召赴行在诏书申三路宣抚吴观文而修立寨栅濬治壕塹为迁延之计今贺州稍有常平米斛贼既得食姑且偷生既变之後或传又有奏陈必肆诡说万一朝廷爱惜生灵许以自新非有重兵弹压驱逐必亦未肯解散伏望特降指挥催督诸处大兵速至会合若果就招安即令解甲分散党类不然则痛行掩杀期於净尽庶几凶徒知有畏惮勘会已累降指挥令岳飞统率诸头项人马前去广南并力追袭其合用钱粮委逐路漕臣多方那融应副闰四月二十四日又奉圣旨今宣抚司勘量贼势如岳飞孤军难以破贼即疾速分拨人马前去策应务要剿除净尽保全二广仍劄与李某疾速由广东前去保护本路及令宣抚司期约广西许中起发本路军兵及洞丁等并力会合掩杀去讫令劄送荆湖广南路宣抚使李观文依已降指挥疾速由广东前去保护本路仍具已起发去处日时申枢密院须至奏闻者右臣契勘昨准尚书省劄子勘会已降指挥福建江西荆湖南北路宣抚使副孟庾韩世忠统率大军自温州起发迤邐入江西由洪袁州前去湖南措置盗贼今来新除荆湖广南路宣抚使李某见在福州前去之任其经由路分理合照应四月七日三省同奉圣旨令李某将带任仕安军马疾速起发依已降指挥相度由汀道州就令抚定广东经过州县前去之任臣窃详是时曹成占据湖南道州未曾侵犯广东界分朝廷之意止是欲臣与孟庾取道相避事体不至相妨近来累承枢密院劄子备奉圣旨以曹成贼马侵犯二广攻破贺州逼近封连等州令臣疾速前去广东保护本路是今日发遣臣取道广东之意与近降指挥全然不同所将带军马亦须量度事势添差应副窃缘曹成贼马据湖南二广诸处申报皆称有十万余人朝廷近降指挥亦言能战之兵约及三万人以三万必死之寇而使臣以元降指挥将带任仕安下千余人兵往遏其锋保护广南两路事岂能济除已具奏依朝廷降到许依吕颐浩昨任江东安抚大使画一踏逐兵二万人旋行踏逐辛企宗阎皋朱师闵郝晟李山等军马约八九千人至今未奉回降指挥不见得朝廷差拨应副数目窃虑别有拘碍占留

不足元踏逐之数今来广东事势危急臣被奉圣旨指挥前去难以等待别行踏逐欲乞朝廷勘会应副不足之数速降指挥就江西安抚大使下逐急摘那数头项得力兵马凑足元数听臣总领前去广东措置曹成使唤免致往回待报坐失机会其上件辛企宗阎皋等军马已系福建江西荆湖宣抚司抽摘分拨前去如已蒙朝廷差拨应副亦乞明降指挥依旧尽数拨还庶几不误指準伏望圣慈特降睿旨施行

小贴子

契勘辛企宗下军马类皆精銳但企宗怯懦不能驾御用之士卒以抑而不用之故多怀怨愤如蒙朝廷拨付臣使唤即乞别择近上统制官将领伏望圣察

梁谿集卷六十七

卷六十八

钦定四库全书

梁谿集卷六十八 宋 李纲 撰表劄奏议三十

乞令韩世忠统率兵将前去广东招捕曹成奏状

经过邵武军乞往祖莹展省奏状

乞差辛企宗军马奏状

乞令韩世宗摘那军马量带轻齎前去招捕曹成奏状

再乞差辛企宗等军马奉状

乞令岳飞且在潭州驻劄仍乞拨还韩京等军马奏状

乞令韩世忠统率兵将前去广东招捕曹成奏状

准枢密院五月二日劄子枢密院奏勘会据探报曹成贼马占据贺州侵犯昭连州界作过已降指挥令岳飞取径路前去广南并力追袭近约程宣抚司人马已到湖南闰四月二十四日又降指挥令宣抚司斟量贼势如岳飞孤军难以破贼即疾速分拨人马前去策应务剿除净尽保全二广仍劄与李某疾速由广东前去保护本路及令宣抚司期约广西许中起发本路军兵峒丁等并力会合掩杀去讫续据宣抚司申明广南东西系李某路分未委合与不合措置已劄下本司自合不拘路分依已降指挥节制诸军量度贼势遣发军马竭力措置外三省枢密院同奉圣旨曹成系在湖南作过走透入广东西路其本路宣抚司自合袭逐讨杀与李某协力同共措置劄与李某孟庾韩世忠照会令劄送荆湖广南路宣抚使李观文照会仍依已降指挥疾速由广东前去保护本路仍具已起发日时申枢密院须至奏闻者

右臣契勘见遵奉圣旨将带任仕安所部军马前去之任取道广东抚定州县已於五月六日起离福州经过南劔州见今已入邵武军界近据广东经略安抚使林通申曹成攻破贺州侵犯广东州县有愿就招抚之意臣本司已差官齎朝廷降到勅榜黄旗金字牌等前去委自帅漕两司相度事势施行缘贼情狡狴屡服屡叛不可信仗非得重兵临之决难制御已累具奏闻乞降指挥令福建江西荆湖宣抚使司分拨兵将不拘路分前去招捕又累论奏乞令韩世忠亲统大兵自南雄英韶前去广州以来与臣同共措置庶几可以保全两路未奉回降指挥今准枢密院劄子备递到前项圣旨指挥与臣奏请之意事体相合仰见睿明照烛万里之外神心经画动合机会天下不胜幸甚除已备录关送福建江西荆湖宣抚司差拨兵将同共措置施行外勘会曹成贼马万数浩瀚能战之兵不下三万人系是朝廷劄到之数见今惟有岳

飞一项军马约万余人前去袭逐约度已到近地今来福建江西荆湖宣抚司所差兵将须得一二万人更会合许中诸头项军马方能与之力敌又须得韩世忠亲自统率前去乃有决胜之理窃虑福建江西荆湖宣抚司差拨兵将不多及韩世忠非奉圣旨指挥不敢躬亲前去二广伏望圣慈检会臣累奏事理更赐详酌特降睿旨施行

小贴子

契勘今来福建江西荆湖宣抚司发兵应援广东如系韩世忠亲行合与臣同共措置外如只差拨兵将自合随逐前去听臣节制庶几号令归一不致误事伏望圣慈特降处分施行

经过邵武军乞往祖莹展省奏状

右臣遵奉圣旨将带任仕安所部人马前去广东抚定州县今月二十五日已入邵武军界缘臣昨起离抚州日将一行军兵辎重器甲尽用溪船装载住邵武军以免山路崎岖般挈之劳今到邵武军却合差拨人夫措置出陆又有本军老小约计二千余人欲自邵武军分拨由汀州路往潮州安泊亦合擘券差官部辖前去须留三五日方得办集契勘邵武军系臣乡里有祖莹去城七里久不展省臣已一面措置辎重器甲为陆行计分拨老小往潮州外量带人从前去祖莹展省并不相妨亦无分外留滞日数缘臣见统军马合具奏知

小贴子

臣契勘自邵武军由江西路与孟庾韩世忠商议同共措置及一就将带分拨人兵前去广东更无留滞去处惟是去行在益远日望朝廷回降指挥深虑传递及专差人道路稽迟所有乞用金字牌降下事件伏望圣慈照察特降指挥

乞差辛企宗等军马奏状

今月二十九日准枢密院劄子勘会曹成侵犯广南作过其广西见有许中躬亲提兵在本路界首把截湖南孟庾韩世忠岳飞大兵袭逐追捕惟广南军马单弱窃虑逼逐侵扰事不可缓五月十八日奉圣旨令李某依已降指挥疾速往广东置司扞寇候孟庾韩世忠抚定羣盗讫前去潭州之任臣已依禀圣旨指挥前去广东措置保护须至奏闻者

右臣契勘昨准尚书省劄子勘会李某前任宰臣已降指挥除荆湖广南路宣抚使兼知潭州其合申请画一事件若候条具到来窃虑道路辽远却致後时四月七日三省同奉圣旨应干合行事件并依吕颐浩昨任江东安抚大使日所得画一指挥施行内一项许踏逐差兵二万人臣已遵依圣旨指挥施行踏逐辛企宗阎皋朱师闵郝晟李山等逐头项人兵约计八千余人已具奏闻外近又具奏乞抽差刘洪道下顔孝?一项人兵及乞逐急於江西安抚大使下摘那数项军马应副随逐臣前去广东措置招捕曹成贼马保全三广并未奉回降指挥今准御前金字牌递到枢密院劄子许拨还统领官马准下兵七百余人外其余所乞军马并未蒙差

拨窃虑朝廷系与画一事件一道即同降下入寻常急递是致未曾被受今得旨催促前去广东扞御曹成只据目下所有人兵共计二千七百余入委是兵力单弱何以挫遏十余万衆贼马之锋非得所乞军马齐集实难虚受重责契勘臣所乞兵马除朱师闵已回行在外其余辛企宗阎皋李山郝晟顔孝?等兵皆在江西建昌军?吉州如蒙朝廷应副用金字牌降下指挥使臣得以因行勾抽将带前去广东使唤勒成部伍军容稍整庶几远方知朝廷所以遣臣之意曹成或可望风招纳事系国体非臣敢私伏望圣慈速降睿旨检会臣累奏踏逐乞兵因依特赐矜允施行臣见自邵武军起发建昌军抚州以来听候指挥

小贴子

契勘臣画一内元乞辛企宗下兵计四千人近闻在路逃散所存不多缘企宗怯懦不能用衆致其下人兵多怀愤怨阎皋下兵元约一千五百余人阎皋得罪已为宣抚司分拨李山下兵元约一千人今闻只有六七百人见在?州其李山系委弃邵武军擅走出江西界之人上项三项军马如蒙朝廷拨付臣使唤并合别择统制官将领前去所有郝晟顔孝?等兵皆只及五六百人闻亦见为宣抚司勾在吉州缘逐项兵本非福建江西荆湖宣抚司元将带之数所以臣敢踏逐奏乞差拨如蒙朝廷尽行应副亦不过得三五千乞依前奏於江西安抚大使下摘那凑足数庶几可济目前之急合具奏知

臣契勘福建江西荆湖宣抚司与臣本司名号既同责任亦等而兵力事体复然辽絶臣目今所得兵曾不及其一统制官之数今来措置广东贼马虽蒙已降指挥令分拨兵将前去缘非臣所部终是难以使唤远方州县见两司事体不动有观望亦难号令伏望圣慈特降睿旨检会臣踏逐元数特行应副使事有可为之理臣敢不竭尽死节以图报称伏乞圣察

乞令韩世忠摘那军马量带轻齎前去招捕曹成奏状

今月二十九日准枢密院劄子荆湖广南路宣抚使李某奏契勘曹成一项贼马侵犯二广广西犹有峒丁刀弩手兵将之属可以控遏广东兵力实为单弱难於支梧今虽已降指挥令岳飞统率诸头项人马追袭掩击窃虑岳飞所率兵数不多钱粮阙乏未必能济非得韩世忠统率大兵前去措置应援及将福建江西荆湖宣抚司剗刷到诸路钱粮通融应副深恐未能早见招捕了当今欲乞自朝廷降指挥令韩世忠相度如大兵目今已在湖南及筠袁间即由南安南雄英韶等顺流以趋广州可以遏贼之冲令岳飞统率军马由道贺追袭其後臣如蒙朝廷应副画一内所踏逐兵勾抽齐集亦可以由?吉英韶前去封康循惠间随宜措置御贼奔迸与之协力进讨不数月间须见了当却由便路趋湖南措置其余盗贼不难平定候勅旨今检会枢密院奏勘会据探报曹成贼马占据贺州侵犯昭连州界作过已降指挥令岳飞取径路前去广南并力追袭近约程宣抚司人马已到湖南闰四月二十四日又降指挥令宣抚司斟酌贼势如岳飞孤军难以破贼即疾速分拨人马前去策应务要剿除净尽保全二广仍劄与李某疾速由广东前去保护本路及令宣抚司期约广西许中起发本路军兵洞丁等并力会合掩杀去讫续据宣抚司申明广南东西系李某路分未委合与不合措置已劄下本司自合不拘路分依已降指挥节制诸军量度贼势遣发军马竭力措置外五月二日三省枢密院同

奉圣旨曹成系在湖南作过走透入广东西路其本路宣抚司自合袭逐讨杀与李某协力同共措置劄与李某孟庾韩世忠照会又奉圣旨令孟庾韩世忠依已降指挥火急追袭讨杀救护二广无令侵坏州县如遣发军马不能尅日殄?大寇即本司自合躬亲前去务要日近平定旋逐具追杀次第闻奏仍劄催李某依累降处分疾速往广东置司扞寇其两司措置事宜并须互相关报无致抵牾臣已遵禀圣旨指挥及关送孟庾韩世忠照会施行须至奏闻者

右臣契勘近累具奏以曹成侵犯二广贼衆浩瀚事势危急乞自朝廷降指挥令韩世忠统率精锐军马一二万人不拘路分前去措置追捕及令福建江西荆湖宣抚司将剗刷到逐路财用照对分拨往二广人兵桩办一两月钱粮随军前去支遣今准前项圣旨指挥仰见睿慈以二广事宜留神经画如此然臣窃谓令福建江西荆湖宣抚使移司往广东不若上令世忠总兵前去之为得策移司则一行军兵官吏輜重之属皆须随行迁徙既难费用不貲深虑二广偏重仓卒应副难以责办或致阙乏若止令世忠摘那精锐人马量带轻齎前去可以乘机破贼事毕即还本司不致劳费实为利便伏望更赐详酌指挥施行臣尝备位近司仰荷知遇委任之重苟有所见不敢不竭尽区区之愚至於取舍则合取自圣裁冒瀆天聪无任战越之至

再乞差辛企宗等军马奏状

准枢密院六月九日劄子准御前金字牌降下枢密院奏勘会曹成已自桂阳监入江西听福建等路宣抚司招抚其荆湖广南宣抚使李某依元降指挥便可径赴潭州新任奉圣旨令李某将带军马取径路往潭州之任仍令孟庾韩世忠疾速措置湖南事宜交割与李某讫发来赴行在其韩世忠军马令於建康府驻劄仰世忠量带亲兵前来奏事劄送臣疾速施行具知禀申枢密院臣已遵依圣旨指挥自建昌军南丰县取径路由?州前去潭州之任须至奏闻者

右臣契勘昨奉圣旨令候孟庾韩世宗措置荆湖南北路盗贼了日前去之任今来两路盗贼除曹成一项贼马为岳飞杀败并残党乞就宣抚司招安外其余盗贼刘忠李宏杨华杨么郎雷进及鍾相残党等万数浩瀚尚未曾措置讨捕闻欲秋凉方行进兵及马友下人兵见在潭州亦未曾措置差拨放散今准前项圣旨令孟庾韩世忠疾速措置湖南交割与臣发赴行在窃虑逐项盗贼非日下措置可了孟庾韩世忠得赴行在指挥逐急便行交割将带重兵起离前去臣所得兵止是任仕安一项军马二千七百余入近虽拨到辛企宗阎皋下兵缘逐军已为孟庾韩世宗分拨及时暂抽差前去见存数目不多其近拨到韩京吴锡吴全等兵今来又准枢密院劄子拨随岳飞往江州屯驻委是势力单弱难以措置弹压窃虑盗贼窥觜无所忌惮依前猖獗为两路之患虚负罪责临时难以申陈伏望圣慈特降睿旨更赐详酌指挥施行

乞令岳飞且在潭州驻劄仍乞拨还韩京等军马奏状

准枢密院六月九日劄子准御前降下金字牌枢密院奏勘会已降指挥令岳飞候平定曹成日将带本部军马前来行在及韩京吴锡吴全军马令岳飞交割与李某使唤今来已破曹成及已降指挥令李某取径路往潭州之任缘江州系紧切控扼合屯重兵去处奉圣旨令岳飞将带本部并韩京吴锡吴全军马前来江州驻劄仍疾速开具掩杀曹成贼马有功官兵保明

开奏当议推恩及令李某勾抽程昌禹下杜湛所统八千余人使唤割送臣疾速施行臣已依圣旨指挥施行外须至奏闻者

右臣契勘荆湖两路系东南上流之地累年为盗贼侵扰往往占据州县不复知有朝廷如马友见在潭州虽号稍知逆顺之势不敢猖獗然亦擅置官吏分兵近郡肆意诛求民不聊生盖缘本路久阙帅臣前後差除多不到任全无重兵弹压故敢如此近蒙朝廷差亲卫大夫建州观察使岳飞权知潭州兼本路安抚使马步军都总管将带一行军兵前来湖南又缘追捕曹成未曾到任今来岳飞讨杀曹成将欲了当又领前项圣旨指挥令往江州驻割窃缘本路盗贼头项衆多如刘忠李宏杨华杨么郎雷进及鍾相残党等多者数万少者不下万人马友见在长沙兵数号称十万其实亦须五七万人非得素有名望威略显着近上武臣统率重兵不能讨捕弹压放散今来韩世忠兵既有圣旨指挥前去建康府驻割其岳飞又令将军马往江州屯驻即是本路名将重兵顿去无有留者窃虑盗贼窥见朝廷事势无所畏惮依前放肆为患不细臣虽系前宰相误蒙恩除四路宣抚使兼本路安抚使缘所得兵数不多无近上武臣为之副贰难以弹压安知马友不忌臣之来如唐藩镇往往不纳帅臣或致戕害者多矣况刘忠李宏杨华雷进之徒皆系剧贼孟庾韩世忠将带重兵自到荆湖未曾措置今来遽将职事交割与臣何以善後近奉枢密院劄子差到韩京吴锡吴全三项军马文字到司才两日间又准今来指挥令随逐岳飞前去虽蒙拨到程昌禹下杜湛所统八千余人其人系随逐昌禹自蔡州前来鼎州亦系要害之地见有盗贼不可阙兵亦难全行勾抽其杜湛彭筠本系荆湖北路军马合听臣节制指拟防秋之数若差那去韩京吴锡吴全等军却分拨得杜湛彭筠军马於臣本路全无增益有失指準伏望圣慈体念荆湖重地目今盗贼除曹成一项将欲了当外其余全未平定须得近上武臣措置招捕及将来防秋不可阙兵特降睿旨令岳飞依元降指挥依旧权知潭州兼权本路安抚使候臣到任交割职事令岳飞且於潭州驻割听臣节制一面措置分散马友军马及讨捕刘忠杨华李宏杨么郎雷进及鍾相残党等庶几韩世忠去後收拾後段不致阙人及将韩京吴锡吴全等兵依前降指挥拨付臣使唤庶几将来防秋不致阙事臣仰荷圣恩起於罪废之余付以四路重寄夙夜震悚惟恐不能称副之意苟有愚见不敢不尽陈述干冒天聪无任惶惧待罪之至

小劄子

臣看详枢密院劄子备奉圣旨指挥勾抽韩世忠兵前去建康府驻割及令岳飞将带军马屯驻江州与前後所降指挥顿然不同窃虑系是江北或有传报之警欲为防遏之计臣窃谓建康府路已有都督吕颐浩一行军马今来韩世忠又带重兵前去势似偏重岳飞前去江州又复端闲虚废日月臣愚欲乞令韩世忠分拨近上统制官将兵万人驻割江州广张声势以代岳飞权留岳飞驻割潭州经画两路盗贼不数月间决可平定万一松江或有警急臣预行排办舟船自潭州至江州顺流不过数日可到臣当躬率本司军马与岳飞水陆并进以为应援两不相妨而於荆湖两路为利甚大措置羣盗可以永絶後患臣谓策无出於此者更望圣慈与二三大臣特赐详酌速降指挥施行

臣窃观自昔讨捕盗贼必得功绩已着之人盗贼畏威自然望风奔溃於讨捕易为功力今来

岳飞破曹成十万之衆羣盜皆已胆落若使稍留本路措置招捕功倍他日盜賊平定之後荆湖自此可以料理日爲防秋之計控扼上流實系國體如或失此機會羣盜猖獗郡縣又復殘破將來實難支梧伏望聖慈特賜睿察施行臣契勘馬友近與劉忠戰爲其所敗見今力敵收拾將士欲再舉兵必留岳飞本路駐劄使率馬友以討劉忠必能有功劉忠既破之後朝廷量加旌賞馬友別與一處差遣使離潭州即荆湖可無後患其餘羣盜亦可漸次招捕平定實爲利便伏望聖察

梁谿集卷六十八

<集部,別集類,南宋建炎至德佑,梁谿集>

卷六十九

钦定四库全书

梁谿集卷六十九 宋 李纲 撰表劄奏议三十一

乞差杨惟忠下胡友毛佐军马奏状

乞令福建等路宣抚司通融应副钱粮奏状乞催江东安抚大使司差那兵将会合捉杀姚达奏状

乞且於衡州驻劄候福建等路宣抚司班师前去之任奏状

乞拨还韩京等及胡友等两项军马奏状

乞差杨惟忠下胡友毛佐军马奏状

右臣昨准尚书省劄子奉圣旨许依吕颐浩昨任江东安抚大使日画一指挥数内一项踏逐差兵二万人臣已遵依圣旨指挥先次踏逐辛企宗阎臯朱师闵郝覈李山五头项军马约计八千余人近准朝廷备坐到圣旨指挥除朱师闵系已差充神武中军郝覈系孟庾所踏逐充亲兵李山差出干事所有辛企宗阎臯下人兵除随逐孟庾韩世忠往湖南外其见在辛企宗下人兵拨付臣使唤近?辛企宗申阎臯下人兵约二千余人尽数已为韩世忠分拨隶诸统制官下臣已奏乞更不抽差外前件踏逐五项人兵只得辛企宗一项又多逃散之数委是单少虽蒙朝廷差到张忠彦人兵内多冗滥又须拣汰亦是人数不多今踏逐到杨惟忠下有军马八九千人见在江西路内统领官胡友毛佐部领三千余人在袁州?州就粮其余人数并在洪州驻劄今来杨惟忠已是身故上项军马未曾拨隶见系李回权行拘管欲乞尽数拨付臣使唤如或朝廷别有差使去处亦乞於数内辍那胡友毛佐两项人兵三千余人逐急差拨付臣贴充二万之数候臣所乞诸处军马齐集见得少剩的实数目续具申陈伏望圣慈特降睿旨施行

乞令福建等路宣抚司通融应副钱粮奏状

准枢密院五月十八日劄子荆湖广南路宣抚使李某奏内一项臣所领荆湖宣抚职事与福建江西荆湖宣抚使司军马事体一同於用钱粮理合通融应副不分彼此今来福建江西荆湖宣抚使副一行军马先到江西并荆湖路分所有逐路州县钱米并系先次剗刷拘收若不通融应副支給窃恐臣所经由州县及到荆湖路军兵官吏批请及安泊老小州县无可应副缓急阙絶误事欲乞朝廷指挥若孟庾韩世忠未班师以前已剗刷下江西荆湖路诸州县钱粮听两司军马通融应副支給班师之後钱粮余剩及以前朝廷支拨并别路取拨到钱米银绢祠部官告等余剩之数并乞桩留拨付本司所贵就近应副免致叠有申奏陈乞案烦朝廷

亦恐往复迟缓不能及事奉圣旨令孟庾韩世忠候抚定荆湖南北盗贼班师日量度合用数外尽数留与李某割送臣照会施行臣已关送福建江西荆湖宣抚司恭依圣旨指挥施行须至奏闻者

右臣契勘昨奉圣旨令臣往广东置司扞寇候孟庾韩世忠抚定盗贼了当日前去潭州之任今准近降圣旨将带军马取径路往潭州之任仍令孟庾韩世忠疾速措置湖南事宜交割与臣讫发赴行在窃缘湖南北路盗贼除曹成一项将欲了当外其余并未曾措置窃恐孟庾韩世忠得召赴行在指挥逐急将职事交割与臣所有招捕其余盗贼及措置防秋等事全藉钱粮应副今来荆湖两路已是阙乏虽已差官前去广南东西路州郡剗刷缘道路寫远卒急难得应手支遣全藉福建江西荆湖宣抚司遵依今来所降圣旨指挥将见管钱米银绢官告度牒等除量留外尽数关送臣本司应副支用窃虑尚有执吝及别作名目支拨有失指準伏望圣慈特降睿旨下福建江西荆湖宣抚司体念国事不得辄分彼此逐一开具名色关送臣本司以凭差官拘收讫具奏施行庶几不致阙误

乞催江东安抚大使司差那兵将会合捉杀姚达奏状

右臣昨在福州未起离间准尚书省劄子令臣措置姚达残党?福建路安抚司申姚达残党自汀州复回邵武建昌军界首藏泊作过臣已具奏闻乞候将来起发於邵武建昌军就近措置近准枢密院劄子备奉圣旨姚达残党已割付李光李回外令臣疾速前去广东今来经由建昌军窃见姚达残党首领余照李宝等见在邵武建昌军抚州三路界首藏泊作过焚烧劫掠民被其害其姚达残党元自汀州回日只有三百余人今来虏掠百姓入火已及一千余人官兵鬪敌互有胜负见今依?山险出没不常除刘洪道差统制官颜孝恭下军马会合捉杀其建昌军等处别无得力人兵可以弹压今来刘洪道将欲发赴鄂州窃虑将带颜孝恭军马前去及安抚大使司差兵未到间贼势转见猖獗臣已割送刘洪道且留颜孝恭下军马同建昌军等处人兵会合捉杀候安抚大使司兵到日续行起发外伏望圣慈特降睿旨催督江东西路安抚大使司疾速差那兵将前来会合掩击庶几早见殄灭

乞且於衡州驻劄候福建等路宣抚司班师前去之任奏状

右臣准福建等路宣抚使司关检准绍兴二年三月十八日枢密院劄子枢密院奏福建等路宣抚使司准枢密院劄子节文奉圣旨李某除荆湖广南路宣抚使兼知潭州逐路兵马并听节制勘会本司系宣抚福建江西荆湖内荆湖今来又除李某宣抚其本路军旅钱粮并辟置官属措置事务行移文字之类显有相妨若不申明必致误事伏望朝廷详酌速赐施行候指挥右勘会福建江西荆湖南北路宣抚使司如到荆湖路应措置事务合从本司施行候将来本司班师回军即合从李某措置自不相妨奉圣旨割与本司并李某照会又准枢密院劄子勘会曹成贼马侵犯广南作过奉圣旨令李某依已降指挥疾速往广东置司扞寇候孟庾韩世忠抚定羣盗讫前去潭州之任割送臣疾速施行又准金字牌降到劄子枢密院奏曹成贼马已自桂阳监入江西听福建等路宣抚司招抚其荆湖广南路宣抚使李某依元降指挥便可径赴潭州新任奉圣旨令李某将带军马取径路往潭州之任仍令孟庾韩世忠疾速措置

湖南事宜交割与李某讠发来赴行在劄送臣疾速施行臣已遵依圣旨指挥施行外契勘近闻孟庾见往湖南缘有前项疾速措置湖南事宜交割与臣讠发赴行在指挥窃恐孟庾未到潭州及虽到潭州措置盗贼事宜未了间便离本路将本司职事交割与臣其韩世忠岳飞两头项重兵并各抽回建康府江州屯驻臣本司军马全然不多虽蒙拨到一两项残零人马悉是乌合又无威望素着武臣总领若便依今来圣旨指挥径赴潭州使荆湖羣盗窥见虚实愈更偃蹇一有侵侮实损国威当是时臣虽捐躯无补於事目今荆湖两路盗贼除曹成一项杀败有就招抚之意将欲了当外其余刘忠李宏杨华雷进杨么郎锺相残党十数头项万数浩瀚若孟庾韩世忠措置未了间便行交割岳飞又往江州重兵名将一旦俱去即与前来候孟庾韩世忠抚定羣盗讠前去之任圣旨指挥大段不同今来孟庾韩世忠措置荆湖盗贼如或未了速要班师赴行在及往建康府驻劄朝廷防秋事体尤重若交割宣抚司职事臣恭体圣意不敢复有陈请外只乞依臣前奏存留岳飞一项军马且在本路措置招捕盗贼听臣节制不数月间须见次第将来沿江或有警急自合发遣前去应援所有福建等路宣抚司钱粮并辟置州县官等若孟庾韩世忠未起发间合与臣本司通融应副将来起发日自合依前降指挥交割与臣措置施行臣今一面起发建昌军南丰县由抚吉州前去相度若事势别无阻碍欲乞且於衡永州驻泊候孟庾韩世忠班师回军及朝廷降到指挥许令岳飞存留本路即往潭州置司伏望圣慈特赐矜察早降睿旨施行使有遵守

小贴子

契勘孟庾韩世忠系福建江西荆湖南北路宣抚使副专切措置荆湖两路盗贼今来刘忠等十数头项多在荆湖北路及两路界首出没作过并合措置抚定近金字牌降到圣旨指挥催促孟庾韩世忠疾速措置湖南事宜却不该载荆湖南北两路窃虑孟庾韩世忠执此指挥只据湖南时下抚定即便交割与臣致朝廷不见得湖北两界首所有剧贼十数头项未了并与岳飞一项军马尽行起发则两路更无重兵决须误事伏乞检照前後所降指挥明赐处分施行

乞拨还韩京等及胡友等两项军马奏状

今月初二日申时准内侍省发到金字牌御前实封文字枢密院劄子枢密院奏勘会李某依元申请画一指挥差拨军马二万人今来朝廷已节次应副差拨过马準陈照任仕安共二千七百余张忠彦四千人杜湛八千人郝晟二千九百人辛企宗四千余人共计二万一千六百余人今来已过元乞数目奉圣旨劄与李某照会仍依已降指挥疾速取径路前去潭州之任具已起发及到任日时闻奉劄送以疾速施行臣已恭依圣旨施行外须至奏闻者

右臣契勘昨奉朝廷差到统制官任仕安并统领官李建陈照马準下兵共计二千七百余及今来指挥依臣踏逐於福建等路宣抚司尽数拨到辛企宗下人兵共计四千余人及郝晟下兵二千九百人据郝晟状申见统官兵实计二千八十四人马六十七匹前件三项人兵共计八千七百八十四人其朝廷差到不系臣踏逐杜湛下人兵八千人张忠彦下四千人勘会昨据程昌禹申杜湛下人兵只计二千余人元系蔡州将兵随逐程昌禹前来鼎州後來招到

刘超下彭筠一头项军马五千余人共计约八千人已有指挥依旧听昌禹使唤兼鼎州系控扼要害去处窃虑难以全行勾抽及张忠彦军马系是乌合冗滥之人朝廷见有指挥令痛行沙汰及未知见今存在去处难以指准此两项军马臣欲乞令别听朝廷差使所有元降画一指挥许臣踏逐差兵二万人除已有任仕安辛企宗郝晟三项人兵共计八千七百八十四人外尚欠一万一千二百一十六人欲望圣慈特降睿旨检会臣累奏乞将朝廷已差韩京吴锡吴全三项军马共计二千七百余入依旧拨还付臣本司及臣近奏乞差杨惟忠下统领官胡友毛佐人兵三千余人充填阙数外其余见少六千余人容臣续行踏逐陈乞施行庶几招捕盗贼措置防秋不致阙误

小贴子

臣契勘朝廷元降指挥许依江东安抚大使例差兵二万人缘荆湖两路界分阔远非江东一路之比其上件差兵二万人如足元数犹恐俵布控扼使唤不足今来所乞存留岳飞一项军马於本路驻劄系在二万人数外盖欲藉其威名措置盗贼早见了当及防秋已迫缓急可以倚仗朝廷如以所乞在二万人数之外即乞除臣今来所乞拨还韩京吴锡吴全及踏逐差胡友毛佐人兵外尚阙六千余人未行差拨伏乞照会施行

梁谿集卷六十九

卷七十

钦定四库全书

梁谿集卷七十 宋 李纲 撰表劄奏议三十二

开具钱粮兵马盗贼人数乞指挥施行奏状

检会臣自置司以来节次被受朝省劄子备奉圣旨皆令取道广东抚定州县候孟庾韩世忠措置盗贼了日前去潭州之任後來缘曹成贼马侵犯二广续降指挥令臣往广东扞寇保护一路臣遵依圣旨取便道发往广东行次建昌军南丰县准御前金字牌降道枢密院劄子枢密院奏勘会曹成已自桂阳监入江西听福建等路宣抚司招抚其荆湖广南路宣抚使李某依元降指挥便可径赴潭州新任奉圣旨令李某将带军马取径路往潭州之任仍令孟庾韩世忠疾速措置湖南事宜交割与李某讫发来赴行在臣亦已遵依圣旨改路由抚吉州前去之任乞於衡永州驻泊已具奏闻外窃详前件指挥与前後所降指挥不同必谓曹成已听福建等路宣抚司招抚赴军前区处了当其余盗贼不难招捕所以令孟庾韩世忠疾速措置事宜交割与臣讫发赴行在及令臣取径路往潭州之任臣今行次抚州节次据探报体问得曹成见与岳飞相持於全邵间徒党散漫桂阳郴永皆被其害即未曾赴福建等路宣抚司招抚及承福建等路宣抚司关据探报曹成贼马近自广东复回湖南在全邵州武冈军上下岳飞见在衡州又体问得马友昨在潭州虽擅行辟置官吏拥衆自防蚕食诸邑然又受朝廷恩命若以重兵临之决可招抚全得其衆分隶放散今闻马友为李宏所图併其军马多备舟船般载见在钱谷舫泊岸下虽未见得的确因依缘既有变动与前日事体又复不同其马友徒衆不伏李宏招收者依旧散为盗贼劫掠诸县其余仍旧团聚潭州及据岳飞申亦称马友为李宏所杀又据探报刘忠见据岳州平江一带近复多聚舟船屯泊君山虽遣人至福建等路宣抚司军前愿就招抚决难保信其余杨华雷进杨么郎鍾相残党彭铁大邓装等皆在逐处作过如故及别有数项盗贼不得头首姓名藏泊洞庭湖等处时到潭州城外出没抄掠据前件探报事节即是曹成贼马初未曾招抚了当及其余盗贼头项不一万数浩瀚恐非旬月间所可措置若朝廷且令孟庾韩世忠在荆湖两路措置盗贼务令净尽其势尚须数月方可结絶臣若发赴本路於衡永州驻泊缘孟庾韩世忠已自吉州往湖南路亦分拨军马由衡永州前去钱粮阙乏难以供贍检会昨降指挥孟庾等申今来除李某宣抚荆湖其本路军旅钱粮措置事务等显有相妨奉圣旨福建等路宣抚司如到荆湖应措置事务合从本司施行候将来本司班师回军日即合从李某措置缘有前项指挥两司难以同在一路於措置盗贼及防秋等事皆有相妨臣合与不合依元降指挥少候孟庾韩世忠措置荆湖盗贼了当日前去交割万一朝廷有防秋警急事宜速欲得孟庾韩世忠班师赴行在及孟庾韩世忠体朝廷之意逐急将荆湖盗贼曹成李宏刘忠等逐项剧寇量行措置便将职事交割与臣缘臣见今军马单少钱粮阙乏兼防秋之期已迫全然未有指準昨具奏乞差拨九项军马及乞支拨钱粮虽蒙朝廷摘那应副後來他司占留及朝廷改差并未曾拘收到一人一骑虽蒙朝廷降下许拨钱粮只是数目未有可以指拟支拨去处若非特降指挥依臣近奏所乞存留岳飞一项人兵且在本路驻劄措置羣盗及将朝廷已拨到军马更不改差及不许他司占留尽数拨还并臣续

踏逐到胡友毛佐两项人兵特赐差拨贴成元降指挥二万之数委是军马单少不足以防秋扞制盗贼及检会近降指挥福建等路宣抚司将来班师日应干钱粮银绢祠部官告等除量度合用数外尽数桩留拨付本司依臣近奏乞更赐约束不许别作名目占破及以羨余为名献纳朝廷尽数充拨本司支用如是余剩数目不多支用不足若不於江西转运司邻近州郡支拨应副目前支遣委是钱粮阙乏不足以赡养军马窃缘招捕盗贼控扼要害之地分布防秋以军马为先养赡军马以钱粮为急臣今将节?所准朝廷降到指挥及乞差拨军马钱粮朝廷已未应副数目及荆湖见今盗贼人数逐一开具声说在後伏望圣慈详酌逐项事理明降处施行谨具下项

一本司节次被受尚书省枢密院劄子降到圣旨指

挥

尚书省劄子孟庾韩世忠总率大兵由袁洪州前去湖南措置盗贼今来荆湖广南路宣抚使李某前去之任经由路分理合照应四月七日奉圣旨令李某将带军马相度由汀道州就令抚定经过州郡前去之任

枢密院劄子勘会曹成贼马侵犯广南作过广东兵马单弱窃虑逼逐侵扰事不可缓奉圣旨令李某依已降指挥疾速往广东置司扞寇候孟庾韩世忠抚定羣盗讫前去潭州之任枢密院劄子孟庾等申本司系宣抚福建江西荆湖路内荆湖路今来又除李某宣抚本路军旅钱粮辟置官属措置事务行移文字之类显见相妨伏望朝廷详酌施行勘会福建江西荆湖路宣抚司如到荆湖路应措置事务合从本司施行候将来本司班师回军日即合从李某措置自不相妨奉圣旨劄下逐司照会

枢密院劄子勘会曹成已自桂阳监入江西听福建等路宣抚司招抚其荆湖广南路宣抚使李某依元降指挥便可径赴潭州之任奉圣旨令李某将带军马取径路便可赴潭州之任仍令孟庾韩世忠疾速措置湖南事宜交割与李某讫发来赴行在

契勘臣自置司以来被受朝省劄子降到圣旨并令由广东前去之任盖缘福建江西荆湖宣抚司同在一路诸事相妨及朝廷方以重兵委孟庾韩世忠措置荆湖盗贼故每降指挥必令臣候孟庾韩世忠抚定盗贼了日前去之任今来近降指挥以曹成已就招抚令臣更不由广东取径路前去潭州之任今据诸处关报曹成见在全邵等州与岳飞相持元未招抚了当其余盗贼刘忠李宏雷进杨华杨么郎锺相残党邓装彭铁大等亦未曾招捕了絶孟庾韩世忠近方自吉州发遣军马前去湖南措置臣若径往潭州之任其两司同在一路委有妨碍又闻潭州见有李宏马友之变未见的确因依非得重兵难以弹压伏望圣慈详酌事宜令臣依累降指挥且往广东措置或在?吉间少候孟庾韩世忠措置盗贼了当日前去交割伏望圣慈特降睿旨施行

一本司被受尚书省劄子许依江东安抚大使吕颐浩画一事件内一项踏逐差兵二万人寻

行踏逐奏乞差拨及蒙朝廷应副人数

辛企宗下人兵约四千余人

阎臯下人兵约一千五百余人

朱师闵下人兵约一千余人

郝晟下人兵约七百余人

李山下人兵约一千余人

准枢密院劄子奉圣旨朱师闵军马见在神武中军使唤郝晟人兵已降指挥差充孟庾亲兵李山见差出干事外辛企宗阎臯旧管人兵除已随孟庾韩世忠前去湖南外其余见隶企宗所管并依所奏拨与李某使唤本司寻关送福建江西荆湖宣抚司依圣旨指挥差拨得回文但称已节次起发往荆湖南路并不曾差到窃缘臣昨系往广东抚定州县故所降指挥辛企宗下人兵除已随孟庾韩世忠前去湖南外其余差拨与臣使唤今来臣依近降指挥取径路往湖南潭州之任所有辛企宗阎臯下兵合尽数拨赴本司伏乞特赐指挥

岳飞下人兵约一万余人

韩京下人兵约一千余人

吴锡下人兵约一千余人

吴全下人兵约七百余人

准枢密院劄子除岳飞已召赴行在外韩京吴锡吴全下人兵候随逐岳飞讨捕曹成了当日拨付李某使唤寻劄付岳飞照会差拨未有回报间续准枢密院劄子奉圣旨江州系紧急控扼合屯重兵去处令岳飞将带本部并韩京吴锡吴全军马前来江州驻劄本司近已具奏申明荆湖盗贼招捕全未见次第韩世忠岳飞两项重兵名将一旦尽去窃虑羣盗益无忌惮势必猖獗乞令岳飞於本路驻劄措置盗贼及将韩京吴锡吴全军马依旧拨还本司充防秋使唤伏乞特赐指挥

张忠彦下人兵二千余人

杜湛下人兵八千余人

准枢密院劄子许从本司勾抽使唤其张忠彦人兵多系冗滥朝廷见劄付臣有痛行沙汰指

挥本司遣使臣往广东及岳飞处相寻未有回报不知存在去处杜湛下元系蔡州将兵止系二千余人随逐程昌禹前来鼎州又招安到彭筠下五千余人已系本路指準防秋人数兼鼎州见有盗贼难以全行勾抽目今湖南道路不通差人前去勾抽未得伏乞照会

契勘本司陈乞九项人兵蒙朝廷应副五项及别差到杜湛张忠彦两项军马内辛企宗阎臯下人兵系福建等路宣抚司占留未曾发遣韩京吴锡吴全三项系朝廷改差其杜湛张忠彦两项见行勾抽未得所有元降画一指挥许差二万人除任仕安一项军马二千七百人见带随行外其余累次奏请并未曾得一人一骑目今湖南盗贼衆多防秋已近深虑有误国事伏望圣慈特降睿旨施行

一本司初置司日蒙朝廷降到激赏钱银及依吕颐浩任江东安抚大使日岁计钱米都数及本司陈乞於江西邻近州郡支拨钱米应副日下支用数目

尚书省劄子於福建路转运司支钱二万贯充沿路些小犒设支用见已支到於降赐库收掌支用

尚书省劄子於吉州推货务支银一万两钱一万贯充激赏支用累移文催货务但称阙乏至今并未曾支到

尚书省劄子降下申请画一内一项依江东安抚大使例钱四十万贯米二十万硕充一岁支用缘本路州军累经残破全然阙乏虽已差官於广南东西路剗刷缘道里寫远目下无以应副支遣乞候依近降指挥於孟庾处交割余剩钱粮如数目不多支用不足即乞许臣於江西转运司及筠袁吉州先次拨米五万硕钱十万贯应副目下支用庶几临时不致阙误伏乞特赐指挥

尚书省劄子本司奏乞令福建等路宣抚司候将来班师日将余剩钱粮及以前朝廷降赐及别路取拨到钱米银绢度牒官告等并乞桩留拨付本司所贵就近应副奉圣旨令孟庾韩世忠抚定荆湖南北路盗贼班师日量度合用数外尽留与李某劄送本司施行缘福建等路宣抚司已有指挥催促措置湖南事宜交割与臣发赴行在窃虑班师在近其上件余剩钱米银绢祠部官告等乞特降约束令不得别作名目占破及以羨余献纳朝廷尽数拨付臣充经理荆湖之资应副军期支遣伏乞特降指挥

契勘前项财用并是指準的确合用之数除福建转运司应副到钱二万贯文外所有其余数目若非朝廷特赐紧切指挥深虑只成虚文有误指準伏望圣慈特降睿旨速赐施行

一本司据福建等路宣抚司及湖南北路诸处申探报荆湖南北两路见今盗贼人数及作过去处

曹成约有十万余人自道州侵犯贺州及封连等州为岳飞杀败见今分作数项在全邵州武

冈军道州永州等处屯泊作过即未曾就福建等路宣抚司招抚了当

马友约有十万余人元占据潭州分拨徒衆於外县及衡州等处就粮近为李宏杀并目今徒党为李宏招收者依旧团聚潭州及不伏招收之人四散虏掠作过

刘忠约有三万余人元在岳州平江潭州浏阳等处据险出没作过近闻福建等路宣抚司大兵到来聚集舟船於岳州君山屯泊访闻曾遣人至福建等路宣抚司愿就招抚缘本人自知罪大不赦决难保信

李宏约有一万余人元系马友下统制官引兵叛去占据岳州近闻与潭州通判张揆合谋杀戮马友并其军马未见诣实因依见在潭州

杨华约有一万余人见在鼎州及潭州益阳县界出没作过

雷进约有八千余人见在鼎澧州及潭州界上出没作过

杨么郎约有五千余人见在潭州界上出没作过锤相残党约有一万余人见在鼎州澧州界上出没作过

邓装约有三千余人见在郴连州界上出没作过彭铁大约有数千人见在桂阳县界上出没作过

契勘前项剧贼十余头项衆数十万皆是累年占据湖南州县作过之人其余不得名字於洞庭青草湖藏泊出没作过及诸处小盗千百为羣不可胜数今来福建等路宣抚司承朝廷指挥催促措置窃虑非旬月内所可了当若便行交割与臣非得岳飞一项军马於本路驻劄同共措置及臣累奏踏逐人兵特降指挥尽数差拨凑足元降画一指挥二万之数实难以招捕前项盗贼及措置防秋等事深恐决致误事伏望圣慈检会臣近奏特降睿旨施行

梁谿集卷七十

卷七十一

钦定四库全书

梁谿集卷七十一 宋 李纲 撰表劄奏议三十三

再乞拨还韩京等军马奏状

乞除任仕安合门宣赞舍人奏状【阙】

到湖南界首谢表

乞差使臣管押吕直等军马依旧付本司使唤奏状

乞下本路及诸路转运司科敷钱米於田亩上均借奏状

再乞拨还韩京等军马奏状

七月二十八日准枢密院劄子准枢密院七月七日劄子勘会已差拨兵马计二万一千六百余人付李某使唤奉圣旨依已降指挥疾速星夜前去之任劄送臣疾速施行臣已遵依圣旨指挥自吉州兼程前去湖南之任外须至奏闻者

右臣契勘昨蒙朝廷降下画一依江东安抚大使吕颐浩例踏逐差兵二万人已差到任仕安下人兵共计二千七百余入辛企宗下人兵三千三百余人郝晟下人兵二千八百余人已上共计七千九百余入外准枢密院劄子拨到见在湖南屯驻韩京吴锡吴全三项军马方行勾抽取问人数未到间续准枢密院劄子令岳飞将带韩京吴锡吴全等兵前去江州驻劄却令臣於程昌禹下勾抽杜湛人兵八千余人及勾抽张忠彦下人兵四千余人使唤已上通约计二万余人缘杜湛人兵只系二千余人并近招收到彭筠兵五千余人通约计八千人据程昌禹申鼎澧州见今有鍾相杨华残党出没作过别无兵将可以扞御乞存留依旧使唤契勘鼎澧州系湖北要害去处上件杜湛等兵难以全行勾抽及张忠彦兵见在广东福建等路宣抚司及岳飞勾唤并不前来臣累行移文前去亦不报应见委广东经略安抚使向子諲前去措置外其杜湛张忠彦下人兵乞朝廷特赐豁除或别承差使不充二万人之数其韩京吴锡吴全等兵已系先降指挥拨隶臣本司後來续降指挥令随岳飞前去江州驻劄今来岳飞已蒙朝廷依旧存留湖南路驻劄更不前去江州其韩京吴锡吴全等兵却合隶臣本司臣除已劄送逐人照会外伏望圣慈特赐睿旨施行

到湖南界首谢表

臣某言伏奉告命除臣观文殿学士依前左银青光禄大夫荆湖广南路宣抚使兼知潭州充

湖南路安抚使马步军都总管不许辞免内外官司不许收接文字臣已只受告命遵禀圣训自福建路起发於今月十一日至衡州茶陵县入湖南路界交割本路安抚使职事讫者抚楚奥之俗於遐方叨将明命观天人之文於秘殿复与清班惟宠数之过优知委任之难称以荣为愧感极涕零【中谢】窃以荆湖之奥区实为东南之重地控引川广襟带江淮方时承平为一都会属夷狄之俶扰致盗贼之内讧郡邑凋残奸吏因而渔猎田畴荒蕪遗民谁与拊循宜得信臣往膺重寄如臣者崎 可笑结约亡奇徒自信其孤忠曾莫着於微效三朝遭遇滥叨出将入相之名七载飘零初无防患周身之术一昨归从海上退处闽中疾病交攻但有餌药扶持之志血气伤耗敢怀据鞍矍铄之心岂谓皇恩不遗旧物付以分阃之重任加以禁殿之隆名中使来临载传温诏匪颁下逮只沐湛恩不容一再以恳辞乃尔龟勉以就职安国久废岂死灰复然之敢期文渊慨怀必马革裹尸而後已此盖伏遇皇帝陛下法天御极体道应时明原省以定是非本何心於用舍修政事而攘夷狄盖有意於翕张致兹忧患之余亦荷甄收之赐臣敢不激昂素志澡淪前非抚凋瘵以牧善良宣威灵而戢奸宄承流宣化远希循吏之风御侮折冲更励虎臣之节

乞差使臣管押吕直等军马依旧付本司使唤奏状

臣昨准尚书省劄子勘会李某系前任宰臣已降指挥除荆湖广南路宣抚使兼知潭州其合申请画一事件者候条具到来窃虑道路辽远却致後时四月七日三省同奉圣旨应干合行事件并依吕颐浩昨任江西安抚大使日所得指挥施行臣恭禀圣旨参照吕颐浩画一陈乞内一项许踏逐差兵二万人内乞差辛企宗下兵四千余人隶本司使唤续准枢密院劄子奉圣旨辛企宗旧管人兵内除已随孟庾韩世忠前去湖南外其余见隶企宗所管军兵依所奏拨与李某及令孟庾候起发日将郝晟一军尽数交与李某应副使唤尚虑兵轻阙人奉圣旨令孟庾韩世忠候李某到湖南新任据抽差过辛企宗元管人马尽数拨与李某应副使唤劄送臣疾速施行臣寻行下辛企宗契勘昨於福州承福建等路宣抚使孟参政劄子权差过官兵二百一十四人马三十疋差将官李守恭使臣何广马俊管押前去又於建昌军承福建等路宣抚副使韩少师劄子令提举董观察权於军中差拨过使臣弓箭手王琪等七十五人马七十五疋将带前去湖南措置盗贼又於抚州蒙福建等路宣抚使孟参政钧旨差本军统领官吕直权於军中及衙兵内差拨过官兵共六百四人马三十一疋已上共计抽差过兵将八百九十三人马一百三十六疋累行关送福建等路宣抚司遵依元降圣旨指挥尽数拨还并不关报访闻上件兵将系孟庾差充亲兵统制官姚端说谕前项兵将陈状不愿归辛企宗部下契勘辛企宗交割马军之後为患在假见在吉州将理已乞宫祠寻医不在军中亦已关送福建等路宣抚司照会勾抽前项人兵近据回报却称为有马友下溃散人兵见在筠袁州作过差吕直李守恭等前去招捕请一面自行勾收寻差使臣齎文字前去勾收吕直李守恭等赴臣本司充亲兵使唤据统领官吕直等申今月初十日准宣抚参政相公劄子绍兴二年八月十日准当月初三日枢密院劄子枢密院奏福建等路宣抚使孟庾申昨自福州节次差到吕直等八百五十五人作亲兵使唤乞不许诸处差取右奉圣旨依所乞令孟庾将带吕直等前来赴行在劄付吕直更不须前去招捕盗贼臣契勘吕直李守恭人兵元系辛企宗下所管军马节次为福建等路宣抚司抽差前去依六月内圣旨指挥合尽数拨还臣本司使唤今来孟庾却作昨自福州节次差到亲兵使唤及不许诸处差取并不声说元系辛企宗下人兵

合拨还本司之数致朝廷不见得上项因依所乞令将带赴行在窃缘前项人兵系是於辛企宗下摘那精锐军马前去其所存留人兵并效用使臣类多冗滥见行拣汰非得吕直等拨还臣本司难以复成一军缓急何以倚仗伏望圣慈特降睿旨候孟庾到行在日令枢密院差近上使臣管押吕直李守恭人兵依元降圣旨指挥付臣本司使唤施行庶几朝廷号令必行所系不细

乞下本路及诸路转运司科敷钱米於田亩上均借奏状【系为本路科借不均乞行下止随田亩多寡均定】

右臣自入湖南界分窃见州县类皆残破民户凋零田土荒芜财力空匮每处延见耆老仰体朝廷德意询问民间疾苦皆言累年以来为盗贼之所侵扰官兵讨捕又皆科敷民间应副钱粮次数既频无可供应上户类皆逃移往别路营生抛下田产不复料理其中下户出卖产业净尽犹未足以应副须索故致人户不敢归业公私受害臣寻行体究州县科敷之弊盖缘朝廷昨降指挥应合科催物色并依人户等第依税钱每贯合出若干印榜晓示本路监司申明乞於田亩多寡定科敷之数声说不明遂致官吏因缘为奸大抛虚数种种作弊且如军期不得已而取於民当据合用之数於田亩上均定谓如合用钱一万贯米一千石逐州抛下诸县合先会计诸县田亩数目如有田十万亩即合每亩均钱五十文米半升推此言之多少皆可预行约度科率均一民力不至困乏今则不然转运司约度抛科更不会会计合用之数行下逐州逐县虚抛大数抑令诸县承认诸县亦不照用行下之数却於田亩上创自桩起钱粮之数谓如衡州诸县逐次科敷本州行下逐县令科钱三万贯米五千硕安仁县却令每亩出钱二百五十文米五升一县之田约计三十万亩则科敷之数钱计合出七万五千贯米计合出一万五千硕衡阳县令每亩出钱五百文米一?一县之田约三十万亩则科敷之数钱计合出一十五万贯米计合出三万硕通衡州五县计之一次科敷所出钱米不可称计其间形势官户人吏率皆不纳承行人吏又於合纳人户公然取受更不催纳其催纳者尽贫下户因缘抑勒情弊百端民不聊生其逐年合纳夏秋正税却更不行催理盖缘受纳正税交收皆有文历难以作弊其科敷之数以军期急迫为辞类皆不置赤历亦无收支文字可以稽考又一路州县官更多系权摄与人吏通同作弊侵渔搔扰莫甚於此且以今年计之应副曹成及岳飞并福建宣抚人兵已是三次科率民力安得不困臣见痛加止絶出榜州县将前项科须未纳人户并更不得催理自今以往一切科须并行住罢如有军期急阙常赋不足非奉臣本司指挥不得擅行科率却令州县依法於省限内催理正税其以前科敷之数依去年明堂赦文许於正税内尅折见体究作过实有情弊官吏续具奏闻乞重置典宪伏望圣慈特降睿旨以臣所陈行下本路及诸路转运司令应干科须并先会计合用之数於逐州总计田亩上均敷即不得虚抛大数及於田亩上别行桩起钱粮之数庶几民户渐次复业得被朝廷实惠天下幸甚

梁谿集卷七十一

<集部,别集类,南宋建炎至德佑,梁谿集>

卷七十二

钦定四库全书

梁谿集卷七十二 宋 李纲 撰表劄奏议三十四

开具本司差到任仕安等兵马人数留韩京等军马奏状

奏知段恩招诱本司军兵逃走状

乞正李宏擅杀马友典刑奏状

乞令许中收买战马奏状

张忠彦不肯赴本司公参乞依旧归江西任奏状

乞本司自备钱本前去广西出产盐地分计置煎盐奏状

开具本司差到任仕安等兵马人数留韩京等军马奏状

臣契勘七月二十九日准枢密院七月二十二日劄子奉圣旨令岳飞且在湖南等路措置追捕盗贼候稍息日别听指挥续於八月初五日准枢密院七月二十五日劄子岳飞依已降指挥且留湖南等路措置盗贼专听李某节制臣已劄下岳飞遵禀圣旨指挥回军前来本路驻劄未到间今据右武大夫文州团练使枢密院将领韩京申得岳飞公文八月十一日准八月五日枢密院劄子枢密院奏勘会已降指挥且留湖南等路措置盗贼今据岳飞奏曹成贼衆并已破灭招收净尽湖南二广别无曹成溃贼兼韩世忠大军已到潭州抚定李宏马友人兵及已破刘忠大寨所有岳飞合依先降指挥前来江州驻劄右奉圣旨令岳飞依先降指挥立便起发前来江州驻劄申本司照会臣窃缘本路盗贼全未衰息韩世忠虽破刘忠大寨其刘忠见在岳鄂间据胡家寨招集溃散军马已及五千余人马友溃散人兵见有数头项各数千人及潭州邵州界上等处作过近据韩世忠下提举一行事务董旼申已接引到王方一项人兵三万余人及曹成下人兵七万余人见在辰沅等州有公文情愿听福建等路宣抚司招抚昨晚起离辰沅州欲自邵州入衡州前去江西路追赶福建等路宣抚司公参缘董旼只带亲兵三千人见在邵州欲接引招抚曹成王方十万之衆窃虑难以弹压其曹成素来狡狴必谓福建等路宣抚司既已班师岳飞人兵未到臣所将兵人数不多本路别无重兵故以受董旼引接为辞渐复南来有窥伺湖南及二广之意万一猖獗委是难以支梧兼杨么下贼党亦系数万人见据洞庭湖水寨周围一千余里见今出没於潭鼎邵州界首作过其余盗贼如邓装彭铁大杨华雷进锺相残党等依旧占据巢穴侵犯州县未曾讨捕今来岳飞却称曹成贼衆已是破灭招收净尽荆湖二广别无曹成溃散贼马李宏马友人兵及刘忠并各了当合依先降指挥前去江州驻劄委是故违诏令不肯前来欺罔朝廷别取指挥兼臣本司亦未曾被受

前项圣旨指挥窃虑既令听臣节制朝廷必须行下臣本司体究岳飞所陈是与不是着实方降处分万一诏令果是已改不敢再三案烦朝廷只乞存留韩京吴锡吴全三项军马依旧拨归臣本司使唤庶几多方措置弹压目前曹成刘忠杨么等十数巨寇及为防秋之计若更不蒙朝廷应副韩京等三项军马委是见在兵数单弱难以存立伏望圣慈特降睿旨检会臣累奏乞存留韩京吴全吴锡三项军马速赐指挥施行今开具臣本司见管人兵数目下项

任仕安下元管二千七百余入

一百余人为福建等路宣抚司统领官段恩招诱前去

一百余人在路逃亡死损

见在二千五百余人

辛企宗下元管四千余人

九百余人为参知政事孟庾带充亲兵前去不曾拨还

四百余人为福建等路宣抚司统领官段恩招诱前去

见在二千七百余入

郝晟下元管二千八十人

近据申报只有一千六百余人

已上三项人兵通计六千八百余人

小帖子

契勘韩京下兵约计一千五百余人吴锡下兵约计二千人吴全下兵约计二千五百人三项共计六千人并臣本司见管人通计一万二千余人依元降指挥许踏逐兵数尚阙八千余人如岳飞一项军马不可抽摘即乞自朝廷别选近上兵官带所部军马付臣本司使唤充填上项人数庶几不致阙事伏乞速赐施行

契勘臣累具奏乞依元数添差人兵累准枢密院劄子拨程昌禹下杜湛人兵八千人及张忠彦下兵四千人付臣本司使唤窃缘杜湛人兵据知鼎州程昌禹申见今鼎澧州盗贼出没杜湛人兵分布控扼不可摘那其张忠彦人兵据广东帅臣林遹运判章杰申忠彦见在广州恣为不法虽已被受臣本司劄子不肯发来公参乞差兵将前来弹压起发缘臣本司见今兵将

单弱不可摘那已具奏乞下江西安抚大使司差拨兵将前去押归江西旧任此两项人兵欲乞朝廷豁除不在臣本司合得兵数之内已累具奏闻伏乞特降睿旨施行

奏知段恩招诱本司军兵逃走奏状

臣近准枢密院劄子枢密院奏神武副军都统制岳飞申契勘飞近恭奉圣旨指挥收捕曹成贼马屡获大捷分遣军马自广西追赶至广东连州并湖南界往回数千里今节次据本军诸将申到有逃走官兵四百七十八人下项契勘使臣效用军兵见此暑月披带衣甲艰辛劳苦怯战辄敢弃甲或将带衣甲鞍马逃走之人显见所走人其改易姓名别投他军伏望朝廷重立赏格遍行下神武诸军并诸路帅臣及逐头项统兵官根缉收捉差人押赴飞军前对衆依军法号令所贵带甲忠勇将士不敢仿倣逃窜小帖子称契勘本军逃走官兵往往辄投他处收留若不严行约束无以惩戒伏望朝廷给降黄榜一道付飞随军张挂及乞止絶诸军等不得诱引擅使招收本军官兵右奉圣旨依所乞令枢密院给降勅榜今检会诸军逃走使臣依例立赏钱三百贯效用军兵赏钱一百贯劄付臣疾速施行臣已遵依施行外契勘近来管兵将帅招诱别军人兵投充本军使唤改换名字难以稽考紊乱军政莫此为甚且如臣本司昨蒙朝廷於福建等路宣抚司拨到辛企宗一项军马於吉州驻劄候臣到来其吉州官吏更不交与口食钱米半月余日致令典卖罄尽又方支俵衣赐间拨付臣本司文字到来更不支給衣绢缘此军兵皆以为两司事体不同致有逃亡人数衆多体问得系是福建等路宣抚司看管老小营寨统领官段恩用银绢钱暗行招诱及捉到逃军赵俊等供通状称探问得统领官段恩每名用例物钱五贯文省银一两绢一疋招收别军人兵是致抛下器甲逃走在去图请新军例物入已使用不期被收後使臣捉获除已将赵俊等处斩签喉令衆外寻劄下段恩根问招收本司人兵因依及关送韩世忠令根究施行皆不报应今朝廷虽因岳飞申明逃亡投换之人重立赏格若不收坐擅行招收将领兵官重加典宪终是难以止絶伏望圣慈特降睿旨下福建等路安撫司勾追统领官段恩付之有司根治特赐黜责庶几少有惩戒仍乞朝廷详酌立法施行今具臣本司自吉州以来为福建等路宣抚司看管老小营寨统领官段恩招收过人兵共计五百一人须至奏闻者

乞正李宏擅杀马友典刑奏状

右臣准枢密院劄子近据福建江西荆湖南北路宣抚使司奏潭州申副总管马友自到潭州擅置刑狱枷栲州县官僚分遣牙兵肆行刼掠杀害良善无所不至又遣本军官遍权属县强取钱粮凌逼知通跋扈恣横及遣牙兵下村收捉百姓蒋暹等剗刷金银每二十人为一串皆透手心以索贯之出语不逊欲抗拒王师承武功大夫贵州团练使统制军马李宏父文承马友勾请前来会合收捉刘忠既到潭州即无遣兵收刘忠之意言语大段不顺宏不敢依从於六月一日统兵入城已将马友处置讫除已铃束军兵不令搔扰晓示居民安业外奏闻事六月二十六日奉圣旨李宏诚心体国剿除叛迹备见忠义可令学士院降勅书獎谕其马友军衆令枢密院给降勅榜抚谕差使臣齎送前去仍仰孟庾韩世忠措置抚存将湖南江淮百姓放令归业外将带堪出战人马随军使唤劄送臣照会臣窃见拱卫大夫成州团练使马友与武功大夫贵州团练使李宏皆是北来盗贼侵犯湖南占据州县内马友以尝杀败孔彦舟已

蒙朝廷勅命除湖南路副总管在潭州驻劄一年有余虽胁制官吏搔扰百姓掊聚钱粮赡养从衆不无过恶然实未见有背负朝廷之迹李宏陰图杀害并诛将佐王成等十数人却称马友尝有不顺之语不敢依从於六月一日统兵入城已将马友处置讫既无证佐事理难明设使马友有不顺言语及诸般过恶近则有福建等路宣抚司见在吉州远则有朝廷皆可申陈听候指挥岂可擅行诛戮如杀一副总管以言语他故加之则以次将领凡欲戕害将帅者何所不可方今朝廷欲振起中兴之业正当分别是非明辨曲直使号令所及羣盗心服自然不劳兵革可以?定今马友下溃散军兵数万为羣散漫於江湖间虏掠作过虽加招抚往往以此为言未肯听从今来李宏已随韩世忠军中前去伏望圣慈特降睿旨将李宏特正典刑庶几四方盗贼见朝廷纲纪既正渐次率服

小贴子

臣契勘李宏既杀马友之後恣其徒党盗取官司仓库金银钱米为之一空官吏居民尽遭刼掠类皆裸露其所得财物尽於岸下用舟船装载意欲遁去适值韩世忠前军统制解元到来尽皆拘拦入城又遣人兵夺门欲出为解元杀败数百人事方稍定显见李宏图杀马友本非激於忠义若不明正典刑深虑为盗贼所窥上累国体不细臣素愚直辄敢干冒天威妄有陈述伏乞圣察

乞令许中收买战马奏状

右臣契勘军旅之事以马为先近年以来金人专以铁骑胜中国而中国以步兵当之安能取胜臣误蒙圣恩委以荆湖广南四路重寄其荆湖路接连荆南襄汉江淮一带为东南上流最系控扼要害去处所得兵将数目既已不多又皆步人万一秋冬之交强敌至何以扞御窃见广西路接连特磨道多出善马可以博易朝廷见委广西帅司许中计置收买计纲发赴行在访闻许中收买到马数目颇多见於广西诸处收养伏望圣慈特降睿旨令许中於买到马内拨五百疋付臣分下诸军充骑兵使用仍乞许臣委官自行收买庶几军容稍振可以扞蔽一方不致误事

张忠彦不肯赴本司公参乞依旧归江西任奏状

右臣累准枢密院劄子差拨张忠彦一项人兵四千余人付臣本司使唤臣累劄下张忠彦令起发前来赴臣本司公参并无报应今据广东帅臣林通转运判官章杰劄子节文称契勘本路昨因凶贼邓庆等作过蒙朝廷差江南西路副钤辖张忠彦一军前来擒捕其邓庆等已系本路官兵收捕了当准枢密院劄子立便统率军马回归本路依已降指挥听宣抚司节制其张忠彦妄以申审为名并不遵依朝廷起发兼张忠彦昨在江南西路前後蒙朝旨令听杨惟忠张俊李回岳飞节制并不遵依自到本路承岳飞及福建等路宣抚使司勾唤亦不肯前去今据张忠彦公文六月十九日申时准荆湖广南路宣抚司劄奉圣旨令忠彦一行军兵听宣抚司节制除已遵守施行外乞应办合用钱粮等虽有公文如此声说其实不肯前去却称不曾被受朝廷指挥见在广州招纳亡命郭中复宋安国宋举正及袁潭等在其军中日夜谋

议恣为不法愈见狂悖窃恐别致生事欲乞拣选将佐一两员精锐一二千人遣来本路催督押发施行庶几可以安静一路小贴子称忠彦所为不法视州县官吏以为仇讎今来所陈若稍漏露必致生变害及一方伏乞密切施行忠彦每声言欲自潮惠入闽中今来乞差兵将令自循惠前来庶几可以折其奸谋亦乞照会臣契勘张忠彦前後被受朝旨令听诸处节制并不受命今来拨付本司使唤亦是不肯前来兼臣本司见今兵将单弱难以抽摘前去弹压其张忠彦元系江西路副钤辖欲乞朝廷密切行下江西安抚大使司差拨可以倚仗兵将自循州惠州前去押发忠彦回归江西旧任庶几广东可以无虞伏望圣慈特降睿旨详酌施行

乞本司自备钱本前去广西出产盐地分计置煎盐奏状

右臣累具奏闻乞於江西路隣州拨米五万石钱十万贯应副本路支用至今未蒙回降指挥盖缘本路连年为盗贼蹂践州县类皆残破百姓屡经科须物力匮乏难以再行敷配深虑目前阙乏无以贍给军兵招捕盗贼及到本路官私空匮皆如所料虽多方擘画应副支遣别无可以措置理材足用之术喋喋仰烦朝廷方当多事之时决难逐一指准应副窃见广西逐年煎造海盐元额都计二千一百万斤近年以来失於措置煎造不及四分之一其余皆是失陷之数湖南北路见今通行广东钞盐商贾入纳般运数目不多遂致阙食每斤价例日渐增长厚利悉归商贾民间日食贵盐见今私贩公然行往实难禁止欲乞朝廷特降指挥许令臣本司自备钱本前去广西出产海盐地分计置煎盐於二千一百万斤十分数内只乞二分数计四百二十万斤本司自备舟船脚力般运前来本路出卖庶几盐价稍平民不艰食赢余之数可以贍养军兵不致仰烦朝廷应副如朝廷以为有侵?货务之利即乞依广东钞盐体例於?货务入纳钞面钱即於盐法并不相妨委是利便伏望圣慈特降睿旨详酌施行

梁谿集卷七十二

卷七十三

钦定四库全书

梁谿集卷七十三 宋 李纲 撰表劄奏议三十五

弹压遣发董旼降到王方曹成人马经过衡州出界奏状

收降到马友下溃兵步谅等奏状

乞发遣水军吴全等付本司招捉杨么奏状乞给赐度牒紫衣师号变转修葺廨舍奏状乞将鼎州依?州等处例带提举鼎澧等州兵马盗贼公事奏状

乞差杨晟惇充湖北路提刑奏状

乞下镇抚使令有盗贼侵犯邻镇合出兵迭相应援奏状

招降安镇等人兵奏状

弹压遣发董旼降到王方曹成人马经过衡州出界奏状

契勘臣遵奉圣旨统率一行军马前来潭州之任近到本路衡州节次据拱卫大夫贵州刺史福建江西荆湖南北路宣抚使司提举一行事务董旼申依准福建等路宣抚使司劄子备奉圣旨指挥前来衡邵辰沅等州措置招收曹成王方两头项人兵其王方下计二万人曹成下计七万人自邵州取衡州路前去江西赴福建路宣抚司公参已关报经过州县排办钱粮草料应副到来支遣外申乞更赐催督等事臣契勘董旼所申招到上件人兵数目浩瀚兼体问得董旼下随行亲兵只计二百余人并自衡州邵州一带州县并皆残破官司仓库匮竭人户累经科率委是困乏寻劄付董旼照会将招收到曹成王方两头项人兵逐一拣选内有老弱不堪之人并行措置放散外开具的实人兵数目供申续据董旼申已行下王方曹成等将老弱不堪之人沿路放散及到邵州亲自拣选除放散外王方下实管四千六百余人曹成下实管一万六千余人并老小辘重不下数万人声势差大缘本路衡州及郴永等州军兵稀少窃虑上件人马到来难以弹压及据本路监司州县并衡州父老节次申乞本司留候曹成到来遣发出界保全一路臣统率一行人马遂且於衡州驻劄弹压遣发自茶陵县出江西界及那拨钱粮应副支遣至八月二十八日据修武郎齐拱引领到王方下统领将佐使臣效用人兵等到衡州已那拨钱粮应副批支起离前去又至九月初八日据董旼引领到曹成下统领统制将佐使臣效用人兵等到衡州亦已那拨钱粮应副批支起离前去续据安仁茶陵县申其上件两项人兵并已出本路界去讫其逐项人兵经过衡州合用钱粮草料等并系臣亲在衡州弹压将本司人兵钱物那拨支給应副遣发即不曾就人户科敷须至奏闻者

收降到马友下溃兵步谅等奏状

据福建江西荆湖南北路宣抚使司八月十五日关勘会筠袁州管下有李宏马友下逃避人兵本司寻差官前去招唤去後今据取到武翼郎阁门祇候荆湖南路副总管司统制军马赦通状准福建等路宣抚使司差到武功大夫高州刺史裴渊齎到使司黄旗榜文前来招唤讫外开坐赦通乞给降付身等因依勘会本司累奉圣旨指挥催促发赴行在并已差内侍宣押见迤邐进发外关送臣本司照会措置施行续据探报有马友溃散人兵统制官步谅等将带人兵二万余人侵犯潭州醴陵浏阳衡山攸县等处冲突入逐县放火杀人虏掠作过贼势猖獗臣本司差使臣戴友端等齎朝廷降到勅榜黄旗并本司榜文前去招抚其步谅等於衡山县界吴集市割成硬寨栽埋鹿角建置木栅将吴集市左侧民居尽皆焚荡差发人兵四散虏掠全无肯就招抚之意臣自衡州弹压曹成军马了当移司前来衡山县措置差本司统制官武显大夫任仕安武功大夫康州刺史王俊武功大夫阁门宣赞舍人吴锡统领官马準陈照汤尚之等统率将佐军马前去招捕据武显大夫本司统制官任仕安申今月十九日承准使司指挥统率一行将佐人兵往衡山县吴集市措置招捕步谅下人兵仕安等整龔将带所部军马连夜渡江直抵步谅寨前分布军马四向围掩其贼人等擂鼓发喊拽出人兵抗拒鬪敌仕安等率励将士用命向前冲突掩击其步谅等知势力不敌出投马前情愿乞降仕安遂收斂军马相对割寨节次追唤到以次首领曹立韩海夏泛等同步谅前来军中勒令贼兵解甲放释器仗将老小拽出寨外一并管押前来公参有日前出寨打虏人兵差统领官陈照汤尚之等四向招收别具供申臣已行措置将步谅等逐头项人兵拣选强壮堪披带之人结成队伍拨隶诸统制官下使唤内有不堪披带堪执役人輜重火头祇应其老弱疾患不堪执役情愿逐便之人及驱虏到土民妇女并给公据放令逐便外契勘一行统制统领官将佐军兵等委是向前用命立到功效之人臣见开具姓名等第奏闻乞优与推赏外须至奏闻者

小贴子

契勘马友下溃散人兵见有一项首领王进王俊等近五十余人在湘乡宁乡等县屯泊作过已差使臣前去招抚未肯听伏又有一项李宏下人兵元系解元统押自水路前去至岳州溃散见在浏阳醴陵作过臣已选差军马分头前去招捕续具奏闻次契勘今来招抚到马友下统领官步谅等人兵并老小近二万五千余人除拣择放散外可得强壮堪披带兵六千人已分隶诸统制官下结成队伍使唤所有续招收到人兵候见人数即行措置团结成军分布使唤别具奏闻次伏乞照会

乞发遣水军吴全等付本司招捉杨么奏状

契勘荆湖南北路土贼见今有杨么雷进邓装彭友王盈等各据巢穴出没作过数内杨么见今拥衆数万人在湖南两界东至岳州西至鼎澧州南至潭州北至荆南府幅员数千里悉为盗区近来再?澧州侵犯荆南府松滋等县及於鼎州一带及潭州益阳湘陰等县作过於羣盗中最为猖獗体访得杨么元系锺相残党以妖术鼓惑愚民其立说谓从之者无税赋差科无官司法令愚民乐从而又孔彦舟马友刘超彭筠散亡之衆尽入其党以故人数衆多占据革

者次第施行诏以徐处仁吴敏及余为提举官命既行为南仲沮止敏丐去不果余奏上曰陛下即大位於国家艰难之时宜一新政事以慰天下之望而朝廷玩愒日复一日未闻有所变革近欲置司讨论寻复罢之今边事方棘调度不给前日爵禄冒滥耗蠹邦财者宜稍裁抑以足国用此政事所宜先者上以为然委余条具以闻余奏上三十余事谓如节度使至遥郡刺史祖宗本以待勲臣故俸给特厚当时员数絶少今皆以戚里恩泽得之除边功外宜悉换授环卫官以抑其滥又三省堂吏祖宗时转官止於正郎崇观间始许转至中奉大夫今宜复祖宗之制余皆类此上深然之降付三省已而揭榜通衢曰知枢密院事李纲陈请裁减下项又榜东华门曰守御使司给诸军甲钱多寡不均御前特再行等第支給而守御使司初未尝给卸甲钱也余闻之惊骇徐询所以乃执政间有密白上以余得都城军民之心欲以此离散之余始忧惧不知死所矣方欲复丐罢会守御使司补进武副尉二人具状奏知上批出有惟辟作福惟辟作威大臣专权浸不可长之语余惶惧於上前辨明曰始亲征行营及守御使司得旨一切以便宜行事给空名文武官告勅帖等三千余道自置司以来用过三十一道而已此二人者乃齎御前蜡书至太原当时约以得回报即与补授故今以空名帖补乞奏闻乃遵上旨非专权也且叙孤危之踪为人所中伤者非一愿罢职任乞骸骨归田里上温颜慰谕以谓偶然批及非有他意余退居定力院入劄子待罪丐去章十余上上悉批荅不允遣使押入余不得请即径出通津门欲东下上遣中使宣押挽舟入城络绎於道既归府复锁府门余翌日见上曰人主之用人疑则当勿任任则当勿疑而大臣以道事君不可则止今陛下惑於人言於臣不能无疑又不令臣得去不知此何也上安慰久之余自此多在告日欲去而未能会种师中歿於军前种师道以病告归执政有密建议以余为宣抚使代师道者初干离不之师还抵中山河间两镇兵民以死固守不肯下肃第修葺制造庶几假以岁月渐见就绪谨録奏闻乞将鼎州依?州等处例带提举鼎澧等州兵马贼盗公事奏状

右臣据知鼎州程昌禹申本州赡养军兵几及万人缘盗贼作过调发兵马四向讨击钱粮委是阙乏本路并无漕臣应副澧州既已残破辰沅靖州自来系鼎州应副即无钱米可以那移目下只是於本州收拾些小钱粮应副军兵食用委是急阙窃恐别致生事臣已逐急於本司攢那钱三万贯差官齎付程昌禹处应副支遣外伏望圣慈特降睿旨更自朝廷量与应副施行仍将鼎州依?州等处体例带提举鼎澧辰沅靖州兵马盗贼公事许程昌禹就近节制谨録奏闻

小贴子

臣契勘湖北安抚使系在鄂州去澧州并辰沅靖州远者二千里沔州已系残破去处及辰沅靖州皆系深入溪洞州军自来系听鼎州节制其鼎州系带一路兵马钤辖若令依?州等处体例带提举鼎澧辰沅靖州兵马盗贼公事许令就近节制责以平贼於本路帅臣自不相妨委是利便伏乞圣察

乞差杨晟惇充湖北路提刑奏状

本司九月十五日据承信郎权荆湖北路提点刑狱司缉捕使臣王黼状称昨随本司官左朝

散大夫荆湖北路提点刑狱吴珪在全州管下被曹成溃兵劫虏道路不通本官病患自广西州县间道前去荆湖北路至桂州兴安县其所患加重於八月二十三日身亡蒙本官宅送出本司铜印一颗系提刑吴珪存日封号令蠲申所属交割缘本司签厅官并吏人等昨为曹成溃兵劫虏之时走散不知下落兼湖北转运司亦不知见在去处申乞差官权管湖北提刑司职事以凭齎印前去交割施行本司勘会湖北路鼎澧等州管下见有杨么等盗贼数火作过万数浩瀚其提刑司不可阙官措置寻契勘中奉大夫直秘阁前提举荆湖北路香盐杨晟惇见在靖州本官曾蒙朝廷除提举香盐官风力强敏谙晓湖北事宜除已逐急差杨晟惇交割荆湖北路提点刑狱司印记职事权行管干外欲望圣慈特降睿旨早赐差湖北路提点刑狱官立限令起发前来赴任如朝廷铨量审问见得晟惇可以充上件差遣亦乞赐差委所贵一路速得监司可以倚仗協济须至奏闻者

小贴子

契勘杨晟惇本贯靖州谙熟湖北事宜昨来吴珪自承朝廷指挥改路之後更不曾前去湖北路界分措置盖缘鼎澧岳鄂等州例皆残破本路监司往往憚於巡按逐州只在远处行移致一路事无人協力与州县料理见今并无监司益见委靡不振所乞朝廷审量就差杨晟惇伏望睿旨特不拘碍近降本贯指挥

乞下镇抚使令有寇盗侵犯邻镇合出兵迭相应援奏状

据中卫大夫忠州防御使荆南府归峡州荆门公安军镇抚使兼马步军都总管兼知荆南军府事解潜申准使司劄子要见襄州目今事宜契勘本镇近承德安府复州汉阳军镇抚使陈待制差人齎到蜡书称叛贼桑仲余党李横与知随州李道於六月十三日部领襄随邓郢州所管军马及逐州百姓共约五六千人前来攻围本府乞差军马应援潜契勘襄阳系与本镇邻接恭依分镇诏旨敦睦隣好兼近承今年闰四月二十四日枢密院劄子坐奉圣旨非奉朝廷指挥不得擅便出兵缘李横已承朝旨差权主管襄阳镇抚使遂移牒襄阳镇抚使李横遵依朝旨施行去後今月初八日承德安镇抚使陈待制关报八月十九日李横人兵攻打城壁被城上守御军兵民等并力扞御鬪敌杀退於当夜远遁前去及捉到李横队内牙兵王贵一名言说李横待到襄阳歇泊後却领人马来郢州就人去荆南厮打除已措置堤备外申本司照会须至奏闻者右臣窃详朝廷分镇诏旨敦睦隣好及枢密院劄子备奉圣旨非奉朝廷指挥不得擅便出兵盖谓诸镇平时无事不许擅自出兵相加如系有盗贼攻围理宜互相救援今来襄邓镇抚使李横叛逆擅自出兵攻围德安府以蜡书求荆南应援解潜却称上件指挥不敢出兵窃虑有失元降诏旨之意深属不便伏望圣慈特降睿旨申明元降指挥之意行下诸镇庶几協力应援可以扞御外寇谨録奏闻

招降到安镇等人兵奏状

臣契勘已於九月二十五日具録奏闻为臣本司差统制官任仕安等统率一行将佐军马於衡州衡山县界吴集市胁降到马友下溃兵统领步谅等赴臣本司公参外有日前出寨往衡

州安仁耒阳等打虏人兵总辖官安镇翟忠等二千余人未曾回寨本司分遣统领官陈照汤尚之两项军马取径路会合前去追袭招捕如敢拒抗即乘机掩杀取令净尽不管稍有走透今据陈照汤尚之申统领军马前去捕安镇等内陈照统兵至衡阳县界地名黄田岭遇贼五百余人各着异色衣服执持器械分头前来冲击照躬亲分拨人马四下向前迎敌至酉时杀散贼众除杀死并重伤外活捉到正贼二十余人就便解送湖南提刑吕祉交收汤尚之统兵至离衡州五十里地名灵泉乡逢贼五百余人各持枪杖软缠着彩色衣服杀人放火虏掠乡民尚之躬亲统率将佐官兵掩击其贼分布前来拒敌两时辰杀贼退走追袭杀死贼徒大半及生擒到一十九人亦解赴湖南提刑吕祉收管讫照与尚之在安仁县会合准使司机宜谢朝散牒探报贼人大段侵犯耒阳县管下作过遂各统兵同共前去追袭自安仁县径入小路追从耒阳县界地名赤土塘又复入高亭大路系通桂阳监郴州永兴县入广南路口虑恐侵犯逐处作过遂领兵从径路迎截至地名苦竹逢贼三百余人当时说谕招收各不肯听伏前来拒敌照与尚之统兵掩击杀退贼众黏踪追杀至当月二十八日巳时又有贼马五百余人在地名鸿鹤村放火杀人虏劫作过照与尚之分布人马前去对贼说谕招收依前不伏前来迎敌与官军两下交锋鬪敌至晚除杀死并斫到首级外生擒到贼徒八人解赴提刑吕祉收管照与尚之拥兵追袭剿杀至当日戌时其贼首安镇翟忠势穷不敢再战遣人前来迎军告降照等差使臣刘荣唐庆前去引唤到安镇翟忠一行人兵於十月一日到本军并已管押赴本司公参讫臣已将被虏胁从及老弱不堪披带人愿逐便者尽给据放令逐便外拣选堪出战人共一千三百余人并拨隶陈照汤尚之管辖结成队伍听候使唤臣契勘统领官陈照汤尚之一行将佐军兵等用命与贼鬪敌屡获胜捷又能收降贼首等数管押前来并无走透实有功效臣见取索的实立功官兵等第姓名开排别具奏闻乞优与推赏外须至奏闻者

梁谿集卷七十三

<集部,别集类,南宋建炎至德佑,梁谿集>

卷七十四

钦定四库全书

梁谿集卷七十四 宋 李纲 撰表劄奏议三十六

招降到王进等人兵奏状

按发张揆等在任取受不法奏状

推勘到张揆等不法奏状

乞宫祠奏状

获到王俊下兵并夺到马奏状

吴锡申捉到李贇等奏状

湖南无溃兵作过奏状

招降到王进等人兵奏状

据左武大夫泰州刺史荆湖广南路宣抚使司前军统制军马吴锡申准宣抚使司劄子使司契勘马友下溃散统领王进等五千余人在湘乡安化县界首占据七星寨四散打掳放火杀人作过先系韩少师并提刑司差人前去招安一向迁延不即前来公参近有一头项三百余人以受招安为名前来潭州江西岸道林寺屯泊缘使司在衡山县措置步凉人马未到州间却陰与潭州城内已前招到人兵通谋表里相应诱引城内人兵数百人出城前去归队一夜乘船直抵城下意在背叛作过劫取钱粮当被使司先差往潭州弹压统领官李建觉探得知领兵射回贼船其贼连夜走归七星寨合大队依前沿路杀人放火据州县申到贼势大段猖獗合行招捕劄锡仰将带统领官李建马準焦元等各统所部军马齎使司榜文前去招捕至十月初十日过大沕山沕壠庄逢贼五百余人於两山埋伏被本军将官畦贵差白旗子绰探得知领兵从四山并进掩击贼兵奔走入七星寨锡遂带领一行军马前去追袭当日晚离七星寨十里下寨先差效用李青齎使司旗榜前去招抚锡即便拥军於十一日絶早到七星寨口内有一项王俊等带领一千余人先次开走远去外其王进等走往蔡塘恃守山险占据地利劄立硬寨锡遂领衆兵直抵贼寨分布高山四面围掩其贼无所逃遁势力逼迫方据李青於贼寨内将引到提辖徐彦出来报覆称王进等三千余人愿就招降锡为先准使司指挥如贼意愿就招降即不得恣行剿杀当时遂遣统领官李建焦元马準与将官畦贵许权直入贼寨諭以祸福其间尚有引衆执夯枪刀不受招降之人遂指令军马围定寨门收捉对衆处斩号令弹压贼衆尽纳器械锡即时管押所招降到王进等并老小赴使司公参讫所有一行将

士等委是用命向前围下贼衆贼徒知不获免哀鸣乞降不欲杀戮实有劳效伏望详酌特赐保明申奏乞朝廷推赏施行须至奏闻者右所据统制官吴锡前项申述臣除已一面勘会立功人等第诣实别具保明申奏外所有招降到王进等一行人兵臣已措置拣选将老弱不堪披带执役及被驱虏人给据放令逐便外其强壮堪披带人并拨隶诸统制官下使唤讫所有王俊等领一千余人节次探报见往邵州界作过臣已差统制官吴锡等再领军马前去追袭措置招捕施行

按发张揆等在任取受不法奏状

据右承务郎权通判潭州军州事张揆申自靖康元年节次於本州置到宅子两所房钱五贯并於湘潭县置到田土及於孤遗买到庄子通共四处委是妨嫌申乞详酌依条对换一别州通判理到任月日或令揆折资罢任施行臣契勘权潭州通判张揆於本州既有物产委有妨嫌合行罢任已劄本官依所乞罢任外体问得张揆元系修职郎权知湘潭县因孔彦舟占据潭州与揆乡里令傅雱差揆权通判揆与彦舟通家往还至以妻妾奉之倚其势力与成忠郎权知长沙县林之问县尉张杰等同作奸弊恣为不法以科敷为名百端骚扰类多入已及彦舟叛去又与林之问因马友在潭州依旧因缘为奸任内於湘潭等县置买田宅假托唐晖孟扩等名目置买并将诸县官田低价估卖赢落取受及与林之问收到诸处空名官告度牒自擅书填出卖得钱入已赃数钜万自知所为不法陰养亡命以为羽翼奸赃狼籍罪恶贯盈臣已勾追张揆林之问张杰等枷项送所司差潭州长沙县丞李绶置司推治及委转运判官王淮监勘追干连证佐人等根勘情节续具案申奏外须至奏闻者

乞宫祠奏状

右臣昨准告命除臣荆湖广南路宣抚使兼知潭州内外官司不得收接文字臣以闲废之久早衰多病不敢辄当委寄之重具奏辞免伏蒙圣慈特遣中使传宣降赐敦遣疾速赴任臣仰迫天威力疾就道冲冒暑热得痢症之疾久不痊愈既到本路夙夜黽勉?心职事以图尺寸之效少报大恩而臣忧患之余疾病交攻志虑凋落动辄遗忘深恐无以仰副委任之意有误国事伏望圣慈察臣数千里冒暑远来到本路已及三月余日仰体朝廷德意罢去科须拊循凋瘵民渐归业遣兵将降到马友下溃兵除放散外得强壮近万余人分隶诸将措置防秋亦渐就绪目今湖南路别无大段盗贼境外亦无警急探报即非有所规避特降睿旨依旧除臣一在外宫观差遣别选能臣付以四路重寄使臣得就闲散寻访医药庶几未先犬马以填沟壑异时蒙被驱策誓极糜捐干冒天威臣无任惶惧战越之至

推勘张揆等不法奏状

本司先体访得右承务郎权通判潭州军州事张揆元系修职郎权知湘潭县因孔彦舟占据潭州与揆乡里令傅雱差揆权通判揆与彦舟通家往还至以妻妾奉之倚其势力与成忠郎权知长沙县林之问县尉张杰等同作奸弊恣为不法以科敷为名百端骚扰类多入已及彦舟叛去又与林之问因马友在潭州依旧因缘为奸任内於湘潭等县买置田宅假托唐晖孟

扩等名目买置并将诸县官田低价估卖赢落取受及与林之问收到诸处空名官告度牒自擅书填出卖得钱入已赃数钜万自知所为不法陰养亡命以为羽翼奸赃狼籍罪恶贯盈本司已将逐人枷项送所司差左宣教郎长沙县丞李绶置司推治及委右朝散郎充湖南转运判官公事王淮监勘本司已具録因依奏闻及申尚书省照会去後不住催促十月三十日据推勘官李绶及监勘官王淮申勘到张揆入已赃二万七千八百余贯组绢一万三千九百余疋林之问入已赃一万三千四百余贯组绢六千七百余疋所招情犯因依除已系推勘院具案奏闻外臣契勘张揆林之问等倚贼为奸作过累年前後侵盗官钱刻剥百姓脂膏赃私入已不可数计缘经营奸利日久交结小人踪迹诡秘今来按发勘鞫其张揆等类以簿书不存证佐亡歿官司难以稽考臣以潭州盗贼方定人始复业深虑干连枝蔓不欲一一研究根究其推勘院止令据目前见在证佐有文字可以追会者根究勘鞫已见逐人赃数不少死有余罪外据林之问李珣通说曾见孔彦舟言揆有劝彦舟据二广洞庭不可分付别人之语虽林之问李珣两人通说一同缘为彦舟不在揆不招伏狱无从勘揆实迹切谓当时彦舟改过已受朝廷恩命忽复反覆背叛未必非揆有以啓之揆迎彦舟於湘潭县迤邐同来潭州彦舟反叛官员如孟扩等例皆被害而揆与之间独全揆虽以妻妾奉贼名为驱虏前去其後犹遣人与彦舟通书不絶马友之来揆复与友歛密假友讨击彦舟之功侥幸改官以除通判仍权州事洎李宏杀马友其徒党尽掠在城公私之物帑库一空百姓官吏剥脱衣服悉皆裸露又甚於彦舟初叛之时友下溃兵四出焚劫作过至今为患未已而揆与之间坐观变乱其身与家安然无事生计独存考其始终变诈百出阳为任职自立官府其实交结盗贼幸乱乐祸用意不测若非朝廷遣帅提兵径到潭州折其奸谋则揆与之间倚贼为湖南之害未有已时罪恶实为重大今推勘到张揆林之问等情节各系死罪伏望圣慈察张揆林之问等情理巨蠹特降睿旨处断施行庶为奸赃之吏不忠於国家者之戒

吴锡申捉到李贇等奏状

本司契勘先有马友下溃散统领王进王俊等五千余人在潭州湘乡安化县界首占据七星寨四散打虏放火杀人作过臣寻遣前军统制军马左武大夫泰州刺史吴锡将带人兵前去措置招捕续据吴锡申部领人兵至七星寨口数内有一项王俊等带领一千余人先次开走远去外有王进等三千余人被官兵围掩无所逃遁并各情愿招降其王进等一行人兵及老小等已押赴本司公参逐一拣选并分隶诸军使唤臣已具上项因依奏闻并申枢密院照会讫续节次据探报王俊等带领一千余人见在邵州界内出没作过臣再遣吴锡将所部军马前去措置掩捕今据吴锡申到邵州贼在地名峯岭高平等处割寨去邵州城二十余里锡遂将带军马於十一月初四日五鼓以来乘贼不备直至峯岭其贼恃嶮把定关隘锡鼓勇一行将士不避矢石取夺到峯岭关杀退贼徒追赶到高平大寨前有贼一千余人分两头项与官兵接战相拒至未时以来贼衆大败杀死贼徒四百三十余人并活捉到将官李贇收救到老小及被虏人共六百余人外有其余残党四散逃遁见不住追捕施行臣除已催促吴锡火急措置黏踪追袭掩杀取令净尽外须至奏闻者

获到王俊下兵并夺到马奏状

契勘昨有马友下溃兵统领王进王俊等五千余人占据湘乡县七星寨放火杀人出没作过臣本司差发兵将前去招捕除已招降到王进下人兵外有王俊下一头项人兵约一千余人自安化县走往邵州前去续据邵州申王俊贼马攻破邵州新化县发出贼徒四向打虏逼近邵州委是危急臣本司差拨统制官吴锡带领所部军马前去措置招捕据吴锡申已於峯岭关高平寨等处杀死贼徒四百三十余人并活捉到将官李贇并老小六百余人外有其余残党四散逃遁见不住追捕施行臣本司已具奏闻并申枢密院照会讫再据吴锡申今月初七日追赶贼徒至地名朱溪竹园其贼於山岭上布阵与官兵交战移时贼兵大败杀死贼徒五百余人当阵杀到强壮贼兵三百二十人夺到马二十五疋老小六百余人除沿路据被虏家口节次识认外有见在老小三百一十九人及於衆死屍中收到王俊前後付身告劄八纸印纸历子一道请受券历一本外有贼徒三百余人四散奔走申本司照会除已行下吴锡再发兵将子细根逐王俊的实下落及追捕散走贼兵外须至奏闻者

湖南无溃兵作过奏状

契勘臣恭奉圣旨将带一行军马前来荆湖路措置盗贼於八月十一日入湖南界探报曹成下约七万余人受福建等路宣抚司招安自辰沅州起发前来沿路杀人放火依旧作过衡永全邵等州人心震恐臣本司差使臣齎文牒等前去约束及於衡州驻劄弹压曹成人马令取径路入江西界至九月十六日曹成人马节次出境了当有马友下溃兵统领步谅等二万余人自江西袁州入湖南界攻破醴陵衡山攸县等处臣即时亲统一行军马前来衡山县驻劄与贼对垒夜遣兵将渡江直捣巢穴招降到步谅等人兵老小共二万余人除给据放散外得强壮六千余人分隶诸统制官下其步谅下有安镇等三千余人先次出寨前去衡永州等处打虏作过臣即时遣统领官陈照马準等前去招捕除杀死贼徒外招降到二千余人亦已措置分拨了当自衡山县起发前来潭州已於十月初四日交割职事体问得马友下溃兵王进王俊等见在湘乡县占据七星寨虏掠作过臣即时遣发统制官吴锡等前去招捕除降到王进一头项三千余人外有王俊一头项一千余人开走远去续据邵州申王俊犯邵州界内攻破新化县四散打虏逼近邵州委是危急臣即时再遣吴锡将带一项军马前去讨捕据吴锡申两次杀死贼徒近一千人生擒三百余人获到贼将李贇等其余残党并各走散臣即时行下吴锡须管追袭招捕净尽又续据吴锡申追袭前件贼徒至全州界杀获贼徒及统领官荣贵外生擒到统领贼首王俊其余贼徒七百余人并已解甲投降委实净尽及在江西湖南两界首屯泊作过溃兵亦已遣发兵将逼逐远去目今荆湖南路别无溃兵作过民渐归业须至奏闻者

梁谿集卷七十四

卷七十五

钦定四库全书

梁谿集卷七十五 宋 李纲 撰表劄奏议三十七

乞取益阳县财赋还潭州奏状

讨杀本路作过溃兵了当见措置杨么等贼奏状

杨么占据洞庭系湖北路本司已遣军马把截奏状

已据益阳县财赋应副鼎州来年财赋取自指挥奏状

乞取益阳财赋还潭州奏状

据右朝散郎降充直秘阁权发遣鼎州军州事程昌禹申十一月初三日准绍兴二年九月十日尚书省劄子九月九日奉圣旨令潭州权拨益阳县财赋应副鼎州如本州县占愆及不供实收支钱粮报应听鼎州按劾令佐下人吏许勾决除已差官前去益阳县外申本司乞指挥施行须至奏闻者右契勘臣本司即未曾被受前项指挥自到本路累据鼎州申钱粮急阙臣本司昨兼宣抚荆湖北路理合通融已於十月内逐急辍那银一万两就益阳县拨米一万石应副支遣去讫今来又据程昌禹备到指挥令权拨益阳县财赋应副鼎州窃缘本司元被受圣旨画一指挥差兵二万人节次蒙朝廷差拨军马及入湖南路招降拣选到步谅安镇王进等堪出战人兵目今约已通及二万人数逐月支请钱米浩瀚依元降指挥系通拨二广合用财赋养赡今来既罢宣抚使荆广四路各归帅司即本司见屯军马二万人只合用湖南一路财赋支遣显是养赡不给若依前项指挥权拨益阳财赋即本路大段窘急目前便见阙误又缘湖南一路累经残破民力困匮在潭州诸县尤甚自经孔彦舟马友等屯泊日久劫掠净尽至如湘阴一县税赋几无人户可催输纳通计诸县见存凋零人户税赋不多各系兵火後来不住应副岳飞韩世忠大军委是重困缓急难更科须所有本路军马见别具利害申取朝廷指挥外伏望圣慈详酌前项事理特降睿旨将益阳县财赋依旧充潭州支用其鼎州钱粮乞令广西路那融应副施行庶免误事

讨杀本路作过溃兵了当见措置杨么等贼奏状

准绍兴二年十月二十四日枢密院劄子枢密院奏访闻广东西湖南路尚有盗贼余党若不乘时措置收捕了当窃虑日久滋长作过奉圣旨令广西湖南路帅臣提刑疾速措置遣发兵将督责应干捕盗官会合讨捕须管日近净尽不得容纵滋长作过仍逐旋具收捕次第申枢密院劄送臣疾速施行臣今契勘先蒙圣恩除荆湖广南路宣抚使兼知潭州臣依奉圣旨统率大兵前来措置经理招捕盗贼自八月十一日入本路界有马友下溃兵首领步谅等二万

余人劫掠醴陵衡山攸县等处臣遂遣发统制官武显大夫任仕安左武大夫泰州刺史吴锡等统率军马直捣步谅等巢穴已招降到步谅一行人兵赴臣本司公参又有马友下溃兵首领安镇翟忠王进王俊等数头项於潭衡永邵郴等州管下作过及刘忠下溃兵首领谭深王顺两头项从江西路界侵犯本路浏阳攸县地分臣节次措置遣发统制官吴锡部领军马讨捕招收内安镇等四项已讨捕招收了当节次奏闻并申枢密院去讷今来臣本路管内即无作过溃兵外止是郴州管下土贼邓装彭支接连江西广南界分出没及武冈军管下徭贼接连湖北出没未平先已遣发统制官武翼大夫文州团练使韩京各率领军马见措置掩捕外隣路江西界有马友李宏刘忠溃兵湖北界有土贼杨么等时复侵犯本路益阳湘陰醴陵浏阳茶陵攸县管下亦已遣发兵将及督责应干捕盗官把截扞御不管透漏外谨具已措置讨杀招收了当及见措置招捕盗贼如後须至奏闻者一已措置遣发军马掩杀及招降过盗贼一本路管内作过溃兵并已掩杀招降了当一马友下溃兵首领步谅等二万余人劫掠醴陵衡山攸县杀人放火本司遣发统制官任仕安吴锡率领军马措置招捕於九月十九日在衡山县管下吴集市杀降到步谅等二万余人并押赴本司公参除被驱虏情愿归业人各给公据放令逐便外拣选到强壮人兵六千余人见分隶诸军使唤

一马友下溃兵首领安镇翟忠等三千余人在衡永郴州管下打劫杀人放火本司遣发统制官陈照汤尚之招捕见阵杀死外於十月初一日招降到安镇等二千六百九十五人押赴本司公参除被虏情愿归业人各给与公据放令逐便外拣选到强壮人兵一千六十七人见分隶诸军使唤

一马友下溃兵首领王进王俊等五千余人在湘乡县管下占据七星寨打劫杀人放火本司遣发统制官吴锡率领军马措置招捕除王俊不肯受降带领贼兵开走外於十月十一日追袭到地名蔡塘招到王进等三千余人押赴本司公参除被驱虏情愿归业人各给与公据放令逐便外拣选到一千五百一十八人见分隶诸军使唤

一马友下溃兵首领王俊等一千余人不肯受降开走劫掠安化新化县逼近邵州杀人放火本司再遣发统制官吴锡率领军马前去措置讨捉续据吴锡申於十一月初四日在地名峯岭关高平寨逢贼迎敌杀死四百余人活捉到将官李贊一名并老小六百余人外其余残党四散逃遁再行追赶至地名朱溪竹园交战杀死五百余人当阵杀降到强壮人兵三百余人夺到马二十五疋老小六百余人并收到王俊前後付身告劄印纸历子请受券历外有王俊等三百余人四散奔走再行追赶先次招抚到提辖桑文等五十余人外王俊等复聚欲取山口并石限路奔冲永州全州界分至十四日到地名太白村下寨三鼓以来贼兵偷劫本军所下寨栅本寨知觉掩杀至五鼓以来其贼大败追赶至武冈军与邵州接界地名横江杀获副统领荣贵并贼徒等生擒到王俊其贼势穷力屈乞就招降今招降到一行人兵七百余人马一百余疋老小五十余人外别无走散人兵委是尽净所有招降到人兵除被虏情愿归业人各给与公据放令逐便外拣选到强壮人兵六百三十四人分隶诸军使唤

一隣路江西界作过溃兵并已掩杀出本路界讷

一刘忠下溃兵首领谭深在江西路界未知的实人数近侵犯潭州浏阳县管下作过本司遣发统领官陈照焦元部兵前去措置掩捕於十二月初二日到浏阳县地名楼下沙堆逢贼谭深等一千余人迎敌杀败追袭至地名枫林杀死贼徒五百余人擒伪提辖仇青将官王琼都教头甯秀徒伴三百余人并收救被虏老小等及夺到岳飞差人齎去御前招安金字牌一面岳飞公牒一道统制官姓毛人膀一道黄旗一面其贼并各追袭掩杀出离本界乞本司已将捉到贼首仇青等处斩讫

一李宏下溃兵首领王开山名顺约三千余人在江西界近侵犯潭州攸县管下作过本司遣发统领官郝晟马準部兵前去掩捕於十二月初八日袭逐贼人所向到袁州萍乡县并地名双塘掩击杀死不计其数生擒到次首领五部统领孟进并贼徒七十余人夺到旗三十余面枪四百余条鞍马等及收救到被虏老小四百余人外残党并各走散复入江西路界本司已将捉到贼首孟进等处斩讫

一见措置遣发军马招捕盗贼下项

一本路

一贼首彭铁大名友系在郴州桂阳县宜城乡三单团作过

一贼首邓装在郴州宜章县管下见占据莽山劄寨

一傜人首领杨再兴等在武冈军管下聚集万衆出没不常烧劫作过

一隣路见有盗贼与本路接界见差兵将把截防托

一湖北路贼首杨么占据鼎州龙阳沅江县管下地分恃水乘船出没时复侵犯潭州益阳湘陰县地分作过

一江西路界州县见有刘忠李宏马友下溃兵首领张成及姓高姓刘人数头项未见的实人数时复侵犯潭州刘阳等县作过

右件如前谨録奏闻

杨么占据洞庭系湖北路本司已遣军马把截奏状

契勘土贼杨么黄诚等占据洞庭青草三江之险聚衆数万出没鼎澧潭岳荆南峡州数千里之地为荆湖腹心之大患臣已尝奏闻去讫近来贼寨数出榜文讹言指斥自称爷法不奉正朔杀戮招安使臣诱胁近地民户凶悖不逊大段猖獗若不趁此春冬水涸之时速行讨荡窃虑将来江湖水势泛涨贼益得计侵犯州县难以支吾缘杨么黄诚等寨栅巢穴并在鼎州龙

阳沅江两县界去鼎州止三二十里远者不过五六十里於湖南潭州正与益阳湘陰两县接界近准尚书省劄子备坐今年九月二十四日圣旨指挥节文诸路帅臣带宣抚者并罢荆湖南北路各隶本路帅司劄付本司臣已遵依施行其鼎州系湖北路即不隶属臣本司照对鼎州有兵万人屡与杨么贼徒见阵惯习水战见有战船可用而臣本司元拨到兵将及新收招降之衆皆系北人自来不谙水战又臣初到湖南计置打造战船仓卒未办今来趁时讨捕杨么黄诚平荡巢穴全藉鼎州进兵臣本司军兵可防托把截本路界分使唤欲望圣慈特降睿旨催促鼎州及早进兵庶几贼衆有殄之期不至滋蔓

已拨益阳财赋应副鼎州来年财赋取自指挥奏状

勘会臣先蒙恩除荆湖广南路宣抚使於今年八月内到本路据知鼎州程昌禹申钱粮急阙乞行支拨臣已辍那钱三万贯及续於益阳县今来秋苗米内支拨一万硕应副鼎州外又据程昌禹申録到尚书省劄子奉圣旨令潭州权拨益阳县财赋应副鼎州缘臣本司及潭州即未曾被受前项圣旨已具因依申奏朝廷未蒙回降处分间又累据程昌禹申委是急阙乞支拨应副臣遂更不待朝廷报下逐急将本县苗米除已拨一万硕应副鼎州及二千硕般赴鼎州应副张宗元等人兵之用外措留本县合用之数有其余正米六千余硕并耗米四千余硕并拨付鼎州去讷今又据程昌禹申本司钱粮阙乏乞将益阳县财赋尽数支拨应副寻行下本县契勘据知益阳县事魏舜臣申本县自今年正月一日至今每日所收酒税牙契并夏税折纳等钱蒙福建等路宣抚使司本路转运司及本州累行差官下县尽数剗刷应副大军支遣了当今来将欲年终日逐续收钱数不多分桩诸司窠名余剩些小系省钱只可应副得本县批支土军舖兵及过往官兵外只有一色秋税苗米豁去被贼残破逃田等数实催二万五千四百六十余硕除已支拨及措留外应副鼎州正米一万六千二百六十余硕耗米四千二百四十余硕通共应副过二万五百余硕节次般赴鼎州讷今来本县委实更无钱贯可以拨付鼎州臣已再行下本县将绍兴二年岁终见在酒税牙契等钱除措留支用外尽数拨与鼎州讷臣今照对近承朝廷指挥诸路帅臣带宣抚使并罢荆湖南北广南东西各隶本路帅司本司一行军马支用钱粮浩瀚既无二广财赋通融应副又拨益阳县财赋应副鼎州委实难以支吾兼据程昌禹申本州屯兵万人月支米一万四千余硕岁计支米一十六万八千余硕月支钱一万五千余贯岁计支钱一十八万余贯虽今来拨益阳一县财赋其阙少数目尚多若非朝廷措置应副或於广南西路支拨不唯鼎州决至阙误兼湖南财赋窘迫亦难以供贍衆军所有益阳县今年冬财赋已尽拨付鼎州外其绍兴三年分夏秋税并酒税牙契等钱更合取自朝廷指挥伏望圣慈特降睿旨详酌施行

梁谿集卷七十五

卷七十六

钦定四库全书

梁谿集卷七十六 宋 李纲 撰表劄奏议三十八

乞降度牒拨还两浙安抚大使司赡军盐钱奏状

乞差罗选要部兵扞御猺贼奏状

乞专责江西漕臣吴革应副钱粮奏状

相度归明官任满轮易奏状

乞全州免听广西节制奏状

宫祠谢表 天申节贺表【疏附】明堂贺表

乞降度牒拨还两浙安抚大使司赡军盐钱奏状

契勘本司近据左朝散郎权通判潭州军事刘鹏申先准福建江西荆湖南北路宣抚使司指挥一行大军犒设钱计二十四万贯文令转运司与本州同共出备内本州已应副过钱一十九万贯文外有钱五万贯文系令转运司应副寻申转运司乞行支拨承转运判官孙绶指挥为大军起发煎迫措置不及再三令鹏逐急就两浙安抚大使刘光世差来回易使臣承节郎李杰处於赡军回易盐钱内兑支钱二万贯文遂得应副大军起发不致阙事除已拨还过钱三千贯文外尚欠钱一万七千贯文不住据使臣李杰守等拨还乞下转运司拨还施行本司寻下转运司拨还去後据转运司申寻拖照得昨福建等路宣抚司大军在潭州除本司应副过金银并径拨钱应副支用外今来别无钱物可以拨还已牒潭州照会去讫本司再行契勘潭州通判刘鹏先借上件钱已是应副福建等路宣抚司大军起发支遣了当今来不住催逼申乞拨窠名钱贯缘本司见应副安抚使司大军钱粮日逐合支数目不少尚未足办委是阙乏别无官钱可以拨还申乞施行臣今契勘本路州县自建炎四年以来数遭兵火官司民户虏劫几尽潭州为孔彦舟马友所据相继福建等路宣抚司军马到州屯驻措置盗贼每月支费钱三十余万贯米五万硕并犒设钱二十四万贯一月计支费钱粮近六十万贯又岳飞一军於本路支费皆以军期责认州县剗刷仓库科歛疲民公私罄匱自臣到任潭州一行大兵日用钱粮浩瀚漕计阙乏应副不足委是无钱可以拨还前项借兑应副福建等路宣抚司支费过两浙安抚大使司赡军回易盐钱一万七千贯文伏望圣慈详酌特降睿旨从朝廷给降度牒付两浙安抚大使司充还上件借过赡军回易盐钱施行须至奏闻者

乞差罗选要部兵扞御猺贼奏状

准绍兴二年十一月二十三日枢密院劄子节文勘会武冈军隶属湖南缘相去本路帅司辽远与广西桂府稍近奉圣旨委广西帅臣许中遣发罗选要约度事势将带人兵前去武冈军驻劄共力扞御猺贼候一向事宁日方得勾回如罗选要差出不在本司即别选堪倚仗官兵前去仍令程昌禹差发官兵应援劄送荆湖南路安抚使司疾速施行臣已备录前项指挥牒广西经略安抚许中遵依遣发罗选要将带人兵起发前来武冈军驻劄并牒程昌禹照会差发官兵应援外今有奏请画一事件不项须至奏闻者

一臣契勘江西路尚有溃兵作过及本路郴州与江西?州广东韶州等处接界有邓装彭友等出没虏掠即日江湖水势渐长杨么贼徒猖獗除分屯军马扞御溃兵收捕邓装彭友及会合诸路讨荡杨么外缘本司差去把截猺贼军马不多窃虑观望事势转至猖獗今来朝廷令广西帅司就近遣发军马同共措置诚合事宜深虑广西边发不多坐费岁月无补於事契勘臣昨任荆湖广南路宣抚使日曾行下广西帅司於隶将不隶将人兵一万五千余人内拣选二千五百人团结成一军辎重火头在外委罗选要充统制官听候缓急勾抽使唤欲乞特降指挥差拨前件已团结军马前来庶几可以倚仗

一臣近奉圣旨权节制程昌禹等军马会合收捕杨么贼徒已催发进兵讨捕外今蒙朝廷令广西帅司差发罗选要军马前来武冈军共力扞御猺贼窃虑广西帅司所遣将佐军马既到本路亦合权听臣节制庶几不致有失事机伏望特降指挥施行

一臣契勘本司见管军马逐月合用钱粮草料缘本路州县累经兵火公私匮乏见今支遣不继今蒙朝廷下广西帅司差发官兵前来武冈军其所用钱粮伏望朝廷特降指挥下广西路转运司计备半年合用钱粮前来应副支遣庶几不致阙误

一臣契勘武冈军猺贼据恃山险出没作过臣虽分遣官兵前去扞御及见一面措置施行外缘自来攻讨溪洞全赖器甲利以长兵多用神臂弓取胜臣本司诸军阙少器甲本路诸州数经兵火及武冈军累年徭人作过用兵不已甲仗库空虚全无可以施設臣先带宣抚使司曾行下广西制造器甲及契勘得桂州见管神臂弓数多行下经略司取神臂弓三百张缘并罢宣抚各归逐路帅司不曾起到伏望朝廷特降指挥下广西帅司将造到器甲及见在神臂弓依数支拨并合用箭数一就支付施行

右件如前谨录奏闻

乞专责江西漕臣吴革应副钱粮奏状

勘会臣先准尚书省劄子节文绍兴二年八月十五日奉圣旨令韩球於已降杂本紬绢内先次兑支绢八千匹紬二千匹应副冬衣使用仍仰给於建康府寄桩上供紬绢内依数取拨补还应副杂买及令韩球於江西上供米内拨三万硕及於本路合起经制钱内拨五万贯应副支使臣於去年十月初一日已後累牒韩球遵依支拨及委吉州通判高公惕计置起发上件紬绢差本司准备差遣李?等前去江西路催促施行去後至今三个月余韩球并不依数支拨

亦无回报今方据吉州通判高公惕申承韩球牒称别无紬绢已申朝廷乞下湖南收簇本色及以见钱相兼支給或乞下建康府於寄桩紬绢内正行支拨并据准备差遣李?等申韩球百端推托未肯支拨钱米却承临江军牒准韩球牒称本路所入经制钱不多已申尚书省乞蠲免去讫备録申臣乞照会施行臣今照对先提领军马之任经过吉州韩球占愆不应副钱粮留滞师行臣曾具韩球弛慢奏劾蒙朝廷委江西安抚大使司体究以故韩球挟此私忿故违前项已得圣旨阻滞不肯先次兑支紬绢及支拨钱米窃缘臣本路数遭兵火公私匮乏今来潭州屯兵数万支用浩瀚委实供贍不继指准江西支拨上件钱帛斛?到来支遣去冬诸军已是无衣绢可以支俵今来又逼合支春衣月分似此韩球挟私不为遵奉圣旨兑支应副深恐军士因缘衣粮欠阙别致生事伏望圣慈详酌特降睿旨施行仍乞严立日限专责漕臣吴革应副庶几不致迟误

相度归明官任满轮易奏状

准绍兴二年十月四日尚书省劄子臣寮上言臣窃见溪洞归明官应湖南边郡及二广皆有自崇观以来员数?多当时朝廷务要优恤远人於是添差为诸州郡指使及添差监酒税之类意在资以俸给以活其家本不取其才任及至後來诸州措置隘寨益广缺人把托於是又尽令管押兵夫其所管押皆是乡民其归明官生长溪洞初无爱民之意亦不习朝廷法令恣犬豕性贪婪无厌鞭笞摧辱无所赴愬假如州县虐政苟或替移民复得苏至如归明官有自归明至今已及十年十五年乃至二十年未尝罢去民之无告无有休已甚者广田宅结婚姻所喜则相亲所憎则加害党类既植根株牵连岂可置而不恤哉议者欲令帅臣籍其姓名同州县官三年一易或云只循旧例添差罢其管押兵夫之事臣愚以谓远方传闻难以预度今欲望睿断详酌割付二广湖南帅臣因使人之行而面授之俾之密行措置务令适宜既不令归明官失所致怨亦不令远民受害无已庶得少称陛下轸念元元之意伏候勅旨十月四日三省枢密院同奉圣旨令广南荆湖路帅臣限五日措置闻奏仍不下司割送臣施行须至奏闻者右勘会湖南管下溪峒归明土官除在本洞弹压山獠即无系本路诸州添差职任外其潭衡等州见管添差监当指使并系广西湖北管下溪洞酋首初以纳土补官次则注授差遣迁徙出离巢穴以安边面依条不厘务亦不差注替人本州常切羈縻其官司自合遵守法令不可差委干当及管押丁夫把隘之类臣今相度应添差诸州归明官并支与本等请给养贍籍其姓名常切照管以三年为任虽军期亦不得差委干当事务及管押兵夫把隘等若任满轮易添差充非缘边州指使监当亦不许签书公事及主管官物之类仍依条候接人到日方得起发及关报移任州军照会如官司依前辄有差委乞朝廷严立法禁约束施行

乞全州免听广西节制奏状

据武功大夫荅州团练使知全州军州事苏易状申照会本州系湖南僻远边州昨缘本路盗贼四起邻路广西经略司措置堤备奏乞朝廷割本州隶广西因此画绍兴元年九月一日奉圣旨今後遇有军期其全州许听广西经略安抚司节制互相应援易契勘本州止管两县共有九乡所入财赋至微累年调发兵马非泛支遣浩大又去夏遭孔贼残破民力凋瘵虽与广西相邻缘系湖南古郡即今本路盗贼未息州县悉力堤备久隶本路帅司若更听广西经略

司节制设有调发本州兵马或分屯官兵驻割不唯难以应副又缓急之际与本路帅司指挥两有牵制若一违戾以误军事官吏枉负典宪申乞施行须至奏闻者右臣契勘全州自旧系湖南属郡南至桂州虽只二百里其川原道路并不相接遇全州管下徭贼出没并别处盗贼侵犯其全州措置事宜并听湖南路帅司节制若全州不失堤备则广西路更无军期如去年六月曹成侵犯桂州事势危急赖湖南路安抚使司遣发张宪吴锡两项军马自全州径入桂州界方始解围以此显见全州只合听受湖南路安抚使司节制今若令更听广西节制不唯一州难以遵守两司指挥兼广西路桂州遇有军期其事宜并须先在湖南况今本路武冈军管下接湖北等处徭贼作过正与全州一带溪洞徭人连接臣已措置调发兵将及令全州等处团结兵民併力扞御掩捕若全州听受节制不一深恐缓急调发及分屯军马因缘牵制无所适从有误臣本路军事为未便所据武功大夫荊州团练使知全州军州事苏易前项状申欲望圣慈详酌特降睿旨全州免听广西经略安抚司节制如日後广西或湖南路有军期即两司自相关报应援施行庶几各路军政归一不致别有侵紊

宫祠谢表

臣某言臣昨任知潭州兼湖南路安抚使准勅差提举西京嵩山崇福宫任便居住者奉诏令於侯藩愧无善状修香火於琳馆叨沐宽恩感惧交深涕泗横集【中谢】伏念臣衰迟孤迹忧患余生蒙起废於丘壑之间使收功於桑榆之日荡攘群盗循抚疲民黽勉百为蔑着涓埃之效积累多衅终烦搏击之方荷圣度之包荒宏皇明而烛隐衆毁销骨虽貽投杼之嗟太阳中天必冀容光之照解帅阃之重寄还真祠之旧游有腼面顔尚叨饫廩此盖伏遇皇帝陛下躬天锡之勇智济国步之艰难以虞舜好察之心行成汤克寛之政致兹罪戾亦被保全臣敢不澡雪前非激昂晚节遥瞻轩陛虽无望云就日之期自屏山林益励爱君忧国之志

上天申节贺表【功德疏附】

臣某言今月二十一日天申节中外称贺者薰风協序炎德鍾祥纪诞节於亨辰对中天之休运【中贺】恭惟皇帝陛下仁均覆载政懋经纶亲总馭於羣才期荡平於逆寇丰年助顺丑类革心愿宏艺祖之开基安斯民於一怒坐格仁皇之至治嗣宝历於无疆臣尝玷宰司外叨真馆七星去国难忘畎亩之忠万寿称觴莫预云龙之会

天申节功德疏

右伏以中天啓运赖真主以成能率土怀仁宜高穹之眷命敢因诞节申祝寿祺被海藏之灵文效嵩呼於愚悃皇帝陛下伏愿绍隆大统永庇羣生顺风雨於农时助成妙略配乾坤於圣德坐享遐龄俯及万方均兹五福臣无任

明堂贺表

臣某言伏覩今月十五日明堂大飨礼成者与天合德载隆眷佑之休唯圣为能不忘昭事之

意已告成於茂典仍敷布於湛恩【中贺】臣闻自昔总章以时宗祀发扬至教必崇简大之规对越高穹要在精诚之格允属中兴之运克讲合宫之仪恭惟皇帝陛下道妙难名机深不测忧勤愿治惟民瘼之是求寅畏保邦岂神欢之敢挈爰及郊禋之岁载新路寝之祠气肃杪秋日涓既望云屯移仗虽天步之尚屯宣室受厘实帝心之丕应臣尝叨柄任久去天光闻盛礼之举行徒深爵跃造广筵而称庆莫效鳧趋

梁谿集卷七十六

<集部,别集类,南宋建炎至德佑,梁谿集>

卷七十七

钦定四库全书

梁谿集卷七十七 宋 李纲 撰表劄奏议三十九

陈扞御贼马奏状 獎谕诏书

谢表 询问边防利害诏书 谢询问利害表

陈扞御贼马奏状

右臣伏觀进奏院报今月初二日三省同奉圣旨敌人窥伺承楚如别有警急当亲总六师往临大江臣子之情中外同切忧愤况臣世受国恩尝蒙眷獎擢寘近司虽以罪戾退伏海滨荷保全之大德未尝食息少忘朝廷安危休戚实与国家同之敢竭愚慙以今日扞御贼马事势陈为三策以献庶几千虑一得仰裨庙筭之万一伏望圣慈特垂省览赦其狂瞽而取其区区之忠臣不胜幸甚臣窃以伪齐刘豫以蛇豕之姿扶金人虎狼之势僭窃名号盗据旧都踰五年矣包藏祸心久而未发今者辄敢遣其孽子率叛将驱遣民借助强敌与之南牧侵扰淮甸睥睨江左虽兵之衆寡谋之浅深难以遥度而预料然吾之所以扞御之策不可不用其至恭惟陛下天锡勇智洞照事机慨然出自英断将亲总六师以临大江则翠华所幸保据形胜号令诸将使相应援信赏必罚将士乐从貔貅之师百倍其气敌之退屈已在目中睿谟克壮其计得矣然臣窃谓解杂乱纷纭者不控拳救鬪者不搏搢批亢捣虚形格势禁则自为解耳昔人用兵多出於此魏赵相攻齐师救赵田忌引兵以趋大梁则魏兵释赵而自救齐师大破之於马陵兵家形势从古已然今伪齐悉兵南下其境内必虚而岳飞新立功於襄汉其威名已振亦既班师屯于武昌伪齐必不虞其再至也陛下悦降明诏遣岳飞以全军间道疾趋襄阳更摘湖南北骁将锐兵为之继援命信臣总统乘此机会捣颍昌以临畿甸电发霆击出其不意则伪齐必大震惧呼还丑类以自营救王师追蹙必有可胜之理此举非惟牵制南牧之兵亦有恢复中原之兆此上策也朝廷或以兹事体大馈饷之费调发之烦仓卒未能办集则銮輿驻蹕江上势须号召上流之兵如岳飞王 及湖南北诸将部曲除留屯外各摘精锐军马尽集官私舟船逐路应副钱粮命将统率顺流而下旌旗金鼓千里相望以助声势则敌人虽衆岂敢南渡仍诏韩世忠刘光世帅其全师进屯淮南要害之地设奇邀击絶其粮道贼必退遁保全东南徐议攻讨此中策也万有一借亲征之名为顺动之计委一二大将扞敌于後则臣恐车驾既远号令不行诸将无应援協济之谋卒伍有溃散標掠之势士气既索人心不固控扼一失其守贼得乘间深入州县望风奔溃其为吾患有不可胜言者矣此最下策也或谓臣曰往岁金人南渡以退避得计今胡为而不可臣应之曰不然金人南渡利在侵掠既得子女玉帛而时方暑则势必还师朝廷因得收复残破州县还定安集渐成区宇故在当时为退避之计则可今为是役者伪齐也使之渡江而南必谋割据得一县则占一县得一州则占一州得一路则占一路师不徒还而奸民溃卒见利忘义幸灾乐祸者从而附之声势?张则将何以为善後之策哉故在今日为退避之计则不可况伪齐所驱胁而来皆京东西关陕之民非

金人比借有寇骑势必不多朝廷措置得宜将士用命则安知此贼非送死於我昔苻坚以百万之衆侵晋而谢安以偏师破之顾一时机会所以应之者如何耳臣愚伏望圣慈特降臣章与二三大臣熟议之臣自经忧患以来衰病交攻志气凋落加有重腿之疾步履艰难方国家多事之秋既不能执干戈以卫社稷又不获陪羈勒而扞牧圉夙夜忧叹孤负大恩死不瞑目徒有拳拳之诚不能自己故敢以刍蕘之说上瀆天聪传曰狂夫之言圣人择焉愿陛下无以人废言非特臣之幸也干冒天威臣无任

獎諭诏书

勅李某所奏具已见陈为三策扞御贼马事势具悉朕以豫贼逋诛敢称兵而内向金戎助逆共举衆以来侵覆载靡容臣民共愤廼亲乘於戎辂用戡定於边隅卿忠贯神明虑先著蔡料敌於千里之外制胜於三策之间既揽囊封备观筹画见大臣体国之义得贤者爱君之诚心在王室而无中外之殊忧以天下而以安危自任忧恟所属嘉叹不忘故兹獎諭想宜知悉冬寒卿比平安好遣书指不多及十八日

谢表

臣某言伏蒙圣恩以臣具已见陈为三策扞御贼马事特降诏书獎諭者囊封上奏冒陈千虑之愚忠函诏俯颁光奉十行之细札粲若日星之丽宠踰袞绣之华只荷恩私采深感涕【中谢】窃以逆臣干纪肆其蛇豕之心边寇怙强借以虎狼之势侵陵淮甸窥伺江南六飞决策以亲征诸将摧锋而用命人神助顺辅相协心明明庙谟宜天声之大振嘽嘽王旅将贼党之尽殲而臣夙荷眷勤尝陪机政抱病负罪虽远迹江海之滨忧国爱君每驰心輦轂之下当天步艰难之日乃渊衷开纳之秋敢输老马之知少赞宝龟之用顾借筋力以靡及慙料敌之匪工出位而言方虞斧钺之戮虚心以听亟被丝纶之褒拜赐甚优以荣为惧此盖伏遇皇帝陛下勇智天锡聪明日跻谓光啓於中兴必削平於大憝欲恢远略以尽刍蕘之言故不遐遗曲敦簪履之旧致兹误宠骤及非才臣敢不仰体睿慈益坚素节谋或可绩悦着称甲令之忠知无不言愿继尘乙夜之览臣无任

询问边防利害诏书

勅李某比以逆臣啸乱反易天常陰导狄人提兵南向朕亲乘戎辂号令六师将士协心人百其勇按甲江上时出轻兵所向奏功俘馘系酋彼势既屈潜师遯逃念兹却敌之初图为善後之计卿以旧弼乃心王家必能为朕深思熟讲凡今攻战之利守备之宜措置之方绥怀之略可悉条具来上朕将虚已以听择善而从君臣之间期於无隐利害之决断以必行钦仁嘉猷冀闻确论故兹诏諭想宜知悉春寒卿比平安好遣书指不多及九日

谢询问利害表

臣某言伏蒙圣恩特降诏书令臣条具边防利害来上臣已遵稟睿训具状奏闻者十载倦游

屏居海上数行温诏来自日边凡清问之下询皆一时之急务恩辉所逮报称为难【中谢】
窃以询于刳尧帝王之盛德告以善道臣子之至情秦询黄发而霸业成汉屈羣策而帝功立
久矣不讲寂然此风皇帝陛下慨国步之多艰惩前谋之未淑时乘戎辂躬总六师文帝幸亚
夫之营恩均将士太宗临渭水之上气讐羌戎肆於却敌之初图为善後之策特颁明诏俯访
旧人丁宁胥训之辞若恭承黼座之侧谘諏当世之务如亲顾草庐之中询事考言远迈唐虞
之举画奇吐策宜得平良之臣而臣曩以非材尝叨近辅学术泥古识虑阔疎忧患薰心志气
凋落夫何歟啓寡闻之陋亦与询谋采择之闻谨已审察事机条陈利害亟上皂囊之奏冀尘
乙夜之观慙直不移仅同汲黯之妄发疎通知体岂类贾生之能言伏望皇帝陛下察以至明
容之大度赦其狂瞽博招可绩之谋用以设施大啓中兴之运则臣继此有得敢忘上陈海岳
深崇岂赖涓埃之助日月清照但倾葵藿之心臣无任

梁谿集卷七十七

卷七十八

钦定四库全书

梁谿集卷七十八 宋 李纲 撰表劄奏议四十

奉诏条具边防利害奏状

右臣伏奉诏书以伪齐金人戎马退遁令人深思熟讲凡今攻战之利守备之宜措置之方绥怀之略条具来上臣仰荷圣恩怜臣孤迹尝备位於近司察臣迂愚有千虑之一得虽以罪戾屏伏海滨曾不遐遗以国家边防恢复大计特降清问顾臣学术阔疎智识浅短何足以称诏旨而裨庙略之万一敢竭狂瞽以塞明命伏惟陛下留神采择臣不胜幸甚臣窃以僭逆之臣挟强悍之敌提兵南向俶扰淮壖其意盖料朝廷蹈前日退避之辙得以乘间渡江凭陵东南不虞六飞亲临江上号令既行赏罚既明将士摧锋俘馘系路敌气挫屈潜师遁逃此盖陛下睿谟宏远天威英断之所致宗社无疆之休中外臣子之共庆也然臣区区之愚窃愿陛下勿以敌马退遁为可喜而以僭逆未诛仇敌未报为可愤勿以保全东南为可安而以中原未复赤县神州犹污於腥羶为可耻勿以诸将屡捷为可贺而以军政未修士气未振尚使狂寇得以潜逃为可虞则中兴之期可指日而俟矣臣谨考往古之迹揆方今之宜条具攻战守备措置绥怀之策以献议者或谓敌马既退当遂用兵为大举之计臣窃以为不然譬如奕碁先当自生乃可杀敌生理未固而欲浪战以侥幸此非制胜之术也高祖先保关中故能东向与项籍争光武先保河内故能出征以降赤眉铜马之属肃宗先保灵武故能破安史而复两京今朝廷以东南为根本傥不先为自固之计将何以能万全胜敌又况将士暴露之久财用调度之烦民力科取之困谓宜大为守备痛自料理使之苏息乃为得计议者又谓敌马既退当且保据一隅以苟目前之安臣又以为不然譬如弈碁舍局心而就边角迫蹙徧小浸以衰微何以取胜秦师伐晋以报殽之师诸葛亮佐蜀连年出师以图中原不如是不足以立国高祖在汉中谓萧何曰吾亦欲东耳安能郁郁久居此乎光武破隗嚣诏岑彭曰人苦不知足既平陇复望蜀此皆帝王以天下为度者也不如是不足以混一区宇戡定祸乱又况祖宗之境土岂可坐视沦陷不务恢复今岁不征明年不战使敌势益张而吾之所纠合精锐士马日以损耗何以图敌谓宜於防守既固军政既修之後即议攻讨乃为得计此二者守备攻战之序也至於守备之宜则当料理淮南荆襄以为藩篱夫淮南荆襄者东南之屏蔽也六朝之所以能保有江左者以强兵巨镇尽在淮南荆襄间故以魏武之雄苻坚石勒之衆宇文拓拔之盛卒不能窥江表後唐李氏有淮南则可以都金陵其後淮南为周世宗所取遂以削弱今朝廷欲为守备则当於淮南东西及荆襄置三大帅屯重兵以临之东路以扬州西路以庐州荆襄以襄阳为帅府分遣偏师进守支郡小筑城垒如开新边其初朝廷应付钱粮谓如淮东则以江东路财用给之淮西则以江西路财用给之荆襄则以湖南北路财用给之徐议营田使自贍养遇有贼马则大帅遣兵应援稍能自守商旅必通乃可召人归业渐次葺理假以岁月则藩篱成矣前有藩篱之固後有长江之险加以战舰水军使沿江一带帅府郡县上连下接自为防守则敌马虽多岂能轻犯近年以来大将握重兵於江南官吏守空城於江北虽有天险初无战舰水军之制故敌人得以侵扰窥伺欲为守备无他反此而已或谓三大帅率重兵以屯江

北则供亿之费不貲臣应之曰使三大帅屯兵於江南亦仰给於朝廷其费等耳曷若使之渡江葺理淮南以为家计则朝廷异时可省经费而藩篱之势成为无穷之利守备之宜莫大於是守备矣然後可以议攻战之利亦当分责於诸路大帅谓如淮东之帅则当责以收复京东东路淮西之帅则当责以收复京东西路荆襄之帅则当责以收复京西南北路川陕之帅则当责以收复陕西五路诸路尅捷因利乘便收京畿复故都以戡大憝此虽落落难合然在陛下志先定於中而断以至诚必为之意盖无不可成之理至於择将之术治兵之政车马器械之制号令赏罚之权兵家皆有常法无待臣言而战阵之间因敌决胜临事制变者兵无常形又不可以预图也臣愿窃以为献者在勿失机会而已夫机会之来间不容髮以战则胜以守则固一失其机悔不可追昔刘表悔不用蜀先主之言蜀先主曰天下日寻干戈事会之来岂有终极若能应之於後则此未足为恨也臣窃观朝廷近年以来失机会者多矣自今以往如能保淮南荆襄以为固选将练卒厉兵秣马聚财积谷应机而作则以弱为强取威定乱於一胜之间僭逆之臣可正藁街之诛强悍之敌岂无殄灭之日攻战之利莫大於是此二者守备攻战之策也若夫措置之方则臣愿先定驻蹕之所盖万乘所居必择形胜然後能制服中外以图事业临安平江皆泽国褊迫偏霸所据非用武之地惟建康自昔号为帝王天子之宅以其江山雄壮地势寛博可容万乘故六朝以来更都之今銮輿未复旧都莫若权宜且於建康驻蹕控引二浙襟带江湖运漕贮穀无不便利臣昨於建炎初建议巡幸关中为上襄阳次之建康为下者以天下形势言之也今以建康为便者以东南形势言之也然淮南有藩篱之固然後建康可都愿陛下与二三大臣熟计之既料理淮南仍诏建康守臣治城壁修宫阙立官府创营房使麤成规模以待翠华之幸近年以来车驾所寓因陋就简诸事草创虽陛下以时方艰难用过于俭然宫室制度亦有不可已者有城壁然後人心不恐有官府然後政事可修有营房然後士卒可用惟自朝廷应副诏有司以渐修建庶几不扰此措置之方所当先者也绥怀之略则臣愿先为自强之计夫西北之民皆陛下之赤子荷祖宗涵养之德其意曷尝一日忘宋哉特制於强敌之势为所驱迫陷於涂炭故舍二百年之本朝而事大不道之僭逆岂其本心惟朝廷之力未能保覆之故数路之民虽困於重斂伤於峻刑而不能以自归徬淮南荆襄藩篱既成壤地相接甲兵既备天威震惊必有结约来归如宿迁之民者必有愿为内应如京东郡县者宜命诸帅优加拊循来归者给田土内应者予爵赏官吏将士禄秩由旧许之自新孰不感悦朝廷近者得诸路签军皆不杀而优恤之自贼中来归者皆优与官秩可谓得策更愿力为自治自强之计使陷溺之民知所依怙益坚戴宋之心此绥怀之略所当先者也攻战守备措置绥怀皆中兴之至计今日之急务圣问所及臣已麤陈其梗槩矣臣伏读诏书有曰朕将虚已以听择善而从君臣之间期於无隐利害之决断以必行臣三复圣训不知涕泗之交颐也何则君臣之遇号为千载听言用谋尤其所难未信而言则有谤已之嫌交言深则有失身之戒盖虽朋友尚不易言而况於君臣之间乎今陛下求治之切诏旨如此而臣以忧患之余孤危特甚欲浅言之则何以副陛下期於无隐之训欲深言之则虑有犯顔逆鳞之愆感惧交中进退维谷虽然陛下当艰危多故之秋诏臣以丁宁惻怛之意緘默不言臣则有罪有君如此其忍负之敢冒鼎鑊刀锯之诛以布心腹肾肠之实惟陛下幸察臣窃观陛下有聪明睿智之姿有英武敢为之志然自临御迨今九年国不辟而日蹙事不立而日坏将骄而难御卒惰而未练国用匱而无赢余之蓄民力困而无休息之期陛下忧勤虽至而未足以成中兴之业者则羣臣误陛下之故也陛下自近年以来所用之臣凡几人慨然敢任天下之重建事立功与夫充位备员者皆不逃於圣鉴夫用人如用医必先知其术业可以已病然後

使之进药而责成功今於医者之术业初不详究而姑试之则虽日易一医无补病者殆将饮药以加病而已平居无事小廉曲谨初似无过而乏济时之大略忽有扰攘之故则错愕无所措手足不过奉身以退天下忧危之重委之陛下而已不知何补於国家陛下亦安取此大槩近年所操之说有二闲暇则以和议为得计而以治兵为失策仓卒则以退避为爱君而以进御为误国衆口和之牢不可破然累年之间冠盖相望而初不得其要约翠华蒙尘而尚未有所定居上下苟且偷安而不为长久之计天步艰难国势益弱职此之由大运有开天啓宸衷超然远覧悟前日和议之失而亲总六师惩前日退避之非而亲临大敌逆臣悍邻数十万衆饮马江干虽未能扫荡邀击尽殲丑类而天威所临已足以使之震怖不敢南渡潜师宵奔则和议之与治兵退避之与进御其效槩可覩矣今敌马虽退而其情狡狴变诈百出未大惩创疆场相望道里不远安知其秋高马肥不再来扰我使疲於奔命哉是宜明诏於却敌之初求善後之策也臣夙夜为陛下深思所以为善後之策者无他在尽反前日之所为解琴瑟而更张之先定其论如奕碁之立意後图其功如奕碁之置子必可得志臣请试陈其说窃观自古创业中兴之主必以兵胜而为亲征之计者其意岂谓必冒矢石履行阵而後可哉黄屋所临人心自固赏罚既当士气奋张用能成功故高祖既得天下击韩王信陈豨黥布未尝不亲行光武自即位至平公孙述十三年间无一岁不亲征本朝艺祖太宗定维扬平泽潞下河东皆躬御戎辂真庙亦有澶渊之行措天下於大安此所谓始於勤劳終於逸乐者也退避之策可暂而不可久可一而不可再退一步则失一步退一尺则失一尺往时自南都退而至於维扬则关陕河北河东失矣自维扬退而至於江浙则京东西失矣万有一敌骑南牧复将退避不知何所适而可航海之策万乘冒风涛不测之险此尤不可者惟当於国家闲暇之时明政刑治军旅选将帅修车马备器械峙糗粮积金帛敌来则御俟时而奋以光复祖宗之大业此最上策杜牧所谓上策莫如自治也臣愿陛下自今以往勿复为退避之计可乎臣又观古者敌国善邻则有和亲仇讎之邦鲜复遣使岂不以衅隙既深终无讲好修睦之理故耶东晋渡江石勒遣使于晋元帝命焚其币而却其使彼遣使来且犹却之此何可往假道於僭伪之国而自取辱无补於事祇伤国体金人自知积怨之重惧我必报其措意为如何而我方且卑辞重币屈体以求之其不推诚以见信决矣器币礼物所费不貲使輶往来坐索士气而又邀我以必不可从之事制我以必不敢为之谋是和卒不成而徒为此扰扰也非特如此於吾自治自强之计动辄相妨实有所害金人二十余年以此策破契丹困中国而终莫之悟夫辨是非利害者人心所同岂真不悟哉聊复用此以侥幸万一曾不知为吾害者甚大此古人所谓几何侥幸而不丧人之国者也臣愿陛下自今以往勿复遣和议之使可乎此二说者既定然後择所当为者一切以至诚之意为之先後本末各有次第俟吾之政事修仓廩实府库充器用备士气振力可有为乃议大举则兵虽未交而胜负之势已决矣抑臣闻朝廷者根本也藩方者枝叶也根本固则枝叶繁朝廷者腹心也将士者爪牙也腹心壮则爪牙奋今国家远有盛强之大敌近有僭伪之逆臣所仰以为扞蔽者在藩方所资以致攻讨者在将士然根本腹心则在朝廷惟陛下正心以正朝廷正朝廷以正百官使君子小人各得其分则是非既明赏罚必当自然藩方協力将士用命虽强敌不足畏虽逆臣不足忧此特在陛下方寸之间耳臣昧死条上六事一曰信任辅弼二曰公选人材三曰变革士风四曰爱惜日力五曰务尽人事六曰寅畏天戒何谓信任辅弼夫拨乱之主履时艰难资辅弼之臣同心同德相与有为岂易致哉必如元首股肱之於一身父子兄弟之於一家乃能協济故高祖视萧何如左右手太宗遇房杜如子弟蜀先主得诸葛孔明如鱼之有水不如是不能感会风云以成王霸之业今陛下选

於衆以图任遂能扞御大敌可谓得人矣然臣愿陛下待以至诚无事形迹久任以责成功勿使小人得以间之则君臣之美垂裕无穷昔高祖始终用萧何太宗始终用杜房故能戡乱定功卒致太平管仲有言曰知人而不能用害霸也用而不能信任之害霸也信任而使小人参之害霸也霸者犹如此而况於欲恢复天下者乎魏郑公有言曰君臣同心是谓一体岂有置至公事形迹若上下共由兹路邦之兴丧未可知也夫事形迹者未必有过举而魏公以为兴丧未可知者凡以无至诚相与之意而惟嫌疑之为避不足建兴邦之大绩故也陛下诚能推信任之诚臣将见辅弼任责而中兴之业不难致矣何谓公选人材夫治天下者未尝不资於人材而创业中兴之主所资为尤多何则继体守文率由旧章得中庸之材亦足共治至於艰难有为兴衰拨乱则非得卓犖瑰伟之材未易有济故武王之有十乱宣王之有吉甫方叔召虎高祖之有三杰光武之有邓禹耿弇吴汉之属太宗之有房杜英卫之流宪宗有裴度武宗有李德裕皆以不世出之材佐大有为之主参翊佐佑以成大业古今通道其可忽诸然自昔抱不羣之材者多为小人之所忌嫉或中之以黯闇或指之为党与或诬之以大恶或摘之以细故而以道事君者不可则止难於自进耻於自明虽负重谤遭深谴安於义命不复自辨惟至明之主为能察小人之情伪而辨其臣之非辜此霍光所以见察於昭帝房乔所以见信於太宗也陛下临御以来用人材多矣世之所许以为正人端士者往往闲废於无用之地岂非罹此谤耶遂使陛下寤寐侧席而有乏材之叹怀材抱义愿为国家宣力者无因而进前陛下盍亦少留圣意致察於此洪范皇极之畴曰无有作好遵王之道无有作恶遵王之路无偏无党王道荡荡无党无偏王道平平好恶偏党皆足以为至公之累惟以道为公而无好恶偏党之私则王道明矣魏郑公卒太宗遣人至其家得书半藁其可识者曰天下之事有善有恶任善人则国安用恶人则国弊公卿之内情有爱憎憎者惟见其恶爱者止见其善爱憎之间所宜详慎若爱而知其恶憎而知其善去邪勿疑任贤勿猜则可以兴矣太宗感悟夫人主岂能无爱憎然必去爱憎而後得人以兴者爱憎出於私情用人以兴邦必由於公道故也管仲虽仇齐公必用雍齿虽怨汉祖必赏而况其余乎陛下诚能推至公之道臣将见人材辈出中兴之业不难致矣何谓变革士风夫用兵之际似与士风初不相及然其实相为表里者也士风淳厚则议论正而是非明朝廷赏罚功罪当而人心服此措置所以得宜而寢明寢昌也士风浇薄则议论不正而是非不明朝廷赏罚功罪不当而人心不服此措置所以失宜而寢微寢弱也晋之士风尚虚浮而不事事故当时措置乖谬盗贼并起而有五戎乱华之祸至本朝嘉佑治平以前士风何其淳厚也自数十年来非特不事事而已奔竞争进议论徇私邪说利口足以惑人主之听元佑大臣如司马光之流皆持正论为朝廷长虑却顾图久远之计社稷之臣也而羣枉嫉之指为奸党听其言则大者可族小者可诛赖国家寬仁祇从窜逐其士风递相仿倣颠倒是非变乱白黑政事大坏以驯致靖康之变非偶然也殆今四十余年世变风移爱憎之情销尽然後朝廷始知元佑羣臣之忠褒赠官秩录用子孙然已何补於事曷若早变此风则忠臣无诛谪之冤国家有治安之实两受其利岂不美哉臣观近年士风尤薄随时好恶以取世资不顾国体惟欲进身不核事实惟欲伤人大冒则大进小诋则小迁滂訛成风此非朝廷之福也陛下得一张浚副以重权使御强敌於关陕浚虽以忠许国而事失机会不为无过言者痛绳丑诋诬以大恶岂不太甚欤浚有浴日之功足以结陛下之知有大臣之辨足以回陛下之听故得自洗濯复侍清光於帷幄之中然其所伤已多矣藉使遭谤困谗之臣无浚之功又无大臣为之辨白而有下石以挤之者则何以自雪於君父冀察其不然哉夫朝廷设耳目及献纳论思之官以广视听固许之以风闻至於大故亦须核实使果如其言则诛责

所加岂宜止从轻典使言而无实则诬人之罪伏谗蒐慝得以中害善良皆非所以修政也臣愿陛下降明诏以戒谕士大夫使体德意从忠厚变近年浇薄之风昔贾谊劝文帝养人臣以礼义廉耻陆贄劝德宗听言必考其实而察其情以正典刑不宜两置而不问皆治道之要陛下诚能行责实之政臣将见士风淳厚而中兴之业不难致矣何谓爱惜日力臣闻之周书曰功崇惟志业广惟勤盖功以志崇所以为之规摹也业以勤广所以为之积累也犹建大厦堂室奥序其规摹可一日而成至於鸠工聚材则积累非一日所致创业中兴何以异此高祖得韩信与之论亡楚之策光武得邓禹与之论兴汉之谋蜀先主得诸葛亮与论鼎立之计皆定於谈笑之间而高祖以五年成帝业光武以十三年混区宇先主得蜀亦在数年之後盖积累而致者如此今陛下临御九年于兹境土未复僭逆未诛仇敌未报尚稽中兴之业则其始不为之规摹其後不为之积累故也边事纍纍定之时朝廷所推行者皆簿书期会不急之细务至於攻讨防守之策国之大计皆未尝留意安得不为僭逆之臣强悍之敌之所窥伺然则自今以往其可不惜日力哉昔禹不贵尺璧而惜寸阴今日朝廷艰难乃惜分阴之时臣愿陛下诏二三大臣熟议所以规摹者凡所施为画一条具如立课程以次施行又诏州县使体陛下德意而奉承之所立期限勿太遽以致搔扰勿太缓以失机会使事得其序不扰而办乃为得策夫天下无不可为之事亦无不可为之时惟失其时则患之小者日益大事之易者日益难正如医者之治病其在皮肤针烙及之其在五臟汤剂及之至於骨髓则虽有扁鹊俞跗蔑以为矣此时之所以不可失也诗曰迨天之未阴雨彻彼桑土绸繆牖户今此下民敢侮予孟子曰国家闲暇及是时明其政刑虽大国必畏之矣夫用智者当於未奔沈之前千日聚之以待一日之用渴而穿井鬪而铸锥其能及乎陛下诚能存爱日之心将见为无不成中兴之业不难致矣何谓务尽人事臣窃观天人之道其实一致人之所为即天之所为也国之将兴百度皆举天实佑之犹之农夫尽其穠蔭之力乃亦有秋使未尝致耕耨之勤而欲望稼穡之利其可得耶天不人不因人不天不成人事尽於前则天理应於後自然之符也光武以兵三千攻寻邑百万者人也适雷电风雨遂有昆阳之胜而中兴之运啓者天也孙权以兵三万拒曹操数十万者人也适风顺可以纵火遂有赤壁之捷而鼎足之势成者天也谢安以兵八千击苻坚百万者人也适秦师小却遂有淝水之功而东晋之祚延者天也创业中兴之主莫不皆然尽其在我者而以其成功归之於天孟子曰君子创业垂统为可继也若夫成功则天也今未尝尽人事敌至则先自退屈而欲责功於天其可乎臣愿陛下诏二三大臣協心同力务尽人事以听天命则恢复土宇翦屠鲸鲵迎还两宫必有日矣夫人心即天心也下得人心上合天心则无不成之功陛下诚能和同天人之际臣将见中兴之业不难致矣何谓寅畏天戒夫天之於王者如父母之於子爱之至则所以为之戒者亦至是以孔子作春秋於灾异必书以谨天戒臣观商之盛如武丁周之盛如成王汉唐之盛如文景太宗之时未尝无天变而不为灾者以能寅畏其戒而仰合其心也是知人主之於天戒必恐惧修省以致其寅畏之诚则能变灾以为祥天人之际何其昭昭然也比年以来荧惑失次太白昼见地震水溢或久阴不雨久雨不霁或当暑而反寒乃正月之朔日有食之此皆天意眷佑陛下丁宁反覆以致告戒陛下虽尝降诏俾士大夫各修厥职以荅天譴然臣窃谓应天以实不以文此在陛下以至诚之意正厥事以应之昔宋公一言而妖星退舍大戊桑穀共生於朝而反以为祥陛下诚能行应天之实臣将见百祥来止中兴之业不难致矣此六者皆陛下所当先务正心以正朝廷者故龚士愚臣忘生触死为陛下详言之抑臣又闻圣人不畏多难而畏无难或多难以固其国啓其疆土无难以丧其国失其土宇昔少康以一旅之衆而祀夏配天不失旧物光武太宗皆躬擐甲

胄履危險而身致太平享国长久今朝廷人材不乏将士足用江淮荆浙闽广川陕财用可理足以为中兴之资陛下勇智天锡春秋鼎盛欲大有为何施不可要在改前日之轍断而行之耳昔仲虺之称汤不称其无过而称其改过不吝盖帝王之度如天地之无心是则行非则改何憚之有酈食其劝高祖铸印以封六国之後子房一言则趣销之封德彝劝太宗用刑法以威天下魏郑公一言则行仁义遂致贞观之治无损盛德而大功可成岂窃窃然畏人之议已哉陛下视建炎以来其所措置是耶非耶以为是则何以不见其效以为非则安可复蹈其轍臣前所陈皆改轍之道非循旧迹所能为也择善而从斟酌而行则在陛下夫以祖宗二百年之基四海亿兆之生灵皆系於陛下清燕之间圣虑及此得不栗栗危惧勉勉自强上以慰祖宗在天之灵下以副四海生灵之望哉昔周宣中兴南征北伐之威复古接下之美咏於小雅盖有文武之吉甫显允之方叔以为之将帅有孝友张仲以在其左右故能内修政事外攘夷狄复文武之境土然则陛下所当法者深考周宣之诗则得之矣所谓善後之策何以加此臣以至愚极陋之质荷陛下非常特达之知龙飞之初虚席以待眷遇之礼迈以等伦特以志广材疎自度不足以任天下之责力丐罢政无补国事每自愧惕违去阙庭九更寒暑犬马之心何尝一日不在赤墀之下自以罪戾远屏不敢复与世故葛藟之言久不上达近者边报警急戎辂亲临臣子之情不胜愤 故敢冒昧以三策为献伏蒙圣慈特降诏书獎谕今者又奉诏旨咨以当世之务而臣不量荒浅冒进狂瞽之说以瀆天聪昔太宗谓魏郑公为敢言谢曰陛下导臣使言不然其敢数批逆鳞哉今陛下盛德过於太宗臣虽无魏公之敢言然展尽底蘊亦思虑之极也良药苦口而利於病忠言逆耳而利於行在陛下察之而已况臣自经忧患衰病交攻气息奄奄日与死迫常惧先犬马填沟壑无以报盛德之万一今得奉明问摅至情臣愿足矣虽死之日犹生之年也伏望陛下哀怜赦其愚直而取其拳拳之忠实天下之幸干冒天威臣无任

卷七十九

钦定四库全书

梁谿集卷七十九 宋 李纲 撰表劄奏议四十一

谢复观文殿大学士表

谢再任宫祠表 亲笔诏书

谢亲笔表 谢亲笔劄子

辞免江西安抚制置大使兼知洪州奏状辞免第二奏状

谢复观文殿大学士表

臣某言伏奉告命复臣观文殿大学士依前左银青光禄大夫提举西京嵩山崇福宫臣已望阙谢恩祇受者禋祀合宫精意格于上下锡福寰海湛恩浹於臣民致兹罪戾之余亦预甄收之列以荣为惧既感且慙中谢伏念臣造道弗优赋材甚陋值国家之艰棘躋英俊以驱驰当圣主龙飞之初误蒙首举任大臣栋隆之责其敢雷同惟信古太过而欲为曲突徙薪之谋故与物多牾而每致跋扈尾之患奉身以退何补朝廷任运而行有同醉梦念一违於轩陛忽九换於星霜适魑魅喜过之乡自貽伊戚免蛟鳄垂涎之口难报此恩恍然若脱兔之投林老矣嗟病牛之卧壠窃真祠之厚禄已负素餐极秘殿之华资更慙非据叨膺宠渥采积凌兢此盖伏遇皇帝陛下体道之公以慈为宝陟降无私於好恶体貌不替於初终厘事告成欲均敷於有衆皇恩广被遂滥及於陈人臣敢不益坚葵藿之心期保桑榆之节望鸳鹭之清切莫陪北阙之班奉香火之精懃愿祝南山之寿臣无任

谢再任宫祠表

臣某言伏奉勅命令臣候提举西京嵩山崇福宫今任满日特令再任臣已望阙谢恩祇受者先瓜期而有请方惧谴诃拜天命之来临曲垂矜允冗食坐糜於公廩素餐愧益於私心中谢伏念臣壮年妄意於功名叨膺识擢晚景备尝於艰险惟欲退藏流寓海邦未遂挂冠之志仰资禄养久陪奉祀之官更沐隆恩许令继任自顾不材之木宜在无何之乡终日安闲既无忧责闔门温饱皆荷仁慈此盖伏遇皇帝陛下以道观能法天覆物知樗栎不劳於斲削蝸鷺亦遂於逍遥致此孱庸获沾恩渥臣敢不勉坚素守期保岁寒缉旧学於简编益求此道励精诚於香火少答鸿私

亲笔诏书

朕昨总戎车前临敌垒泊潜师之引遁劳戎役以言旋惕若眇躬惧兹多难聿求善後之计敢蹈护前之非博访旧臣屡形深诏卿首陈三策适投却敌之机继上六条大阐兴邦之略意拳拳而曲折言凛凛而高明有发予衷如对卿言此乃卿精忠许国诚节表时虽在燕闲之中不忘开济之事肆披夙蘊因致良规省阅再三嘉叹不已至若议和避地之失练兵积粟之方将议改图共期底绩临朝愿治顾策虑之是资当馈思贤念话言之可想宜从疾置时告嘉猷终藉经纶之才助成戡定之烈故兹亲笔以示至怀赐李纲

谢亲笔表

臣某言今月十七日承御前金字牌降到亲笔诏书一道臣已望阙谢恩祇受讫者芜辞冒贡方虞萧斧之诛宸翰载颁乃膺华袞之宠灿烂奎壁之画昭回云汉之章蔀屋生辉臣邻改观中谢窃以人臣之言不激切不足以动人主之听而激切则有逆鳞之愆人主之听不广大不足以尽人臣之言而广大则有盈庭之咎辞顺理直而匪讦者言之善博询精考而不惑者听之公自古所难於今乃见皇帝陛下悼戎垒之弗靖慨国步之多艰欲成扞御强敌之图故有谕取旧臣之令而臣夙叨殊獎尝忝近司清问下询虽颇殫於千虑空言上达曾何补於万分误蒙睿慈亲洒宸笔褒以精忠之目许之时告以言凤翥鸾翔笔势妙追於古蹟风飞雷厉训辞感动於人心顾臣何人当此异数邓禹披光武之亲诏李靖奉太宗之手书如臣所蒙视古无愧刻之琬琰着圣君与善之诚传之云来见愚臣许国之志此盖伏遇皇帝陛下成能天纵盛德日跻招来俊杰之谋協济兴王之运礼从微始濫居辛毅之先仁不遐遗曲敦簪履之旧致兹荣耀骤及凡庸臣敢不仰体眷怀益坚素守衰慙定远难致玉关之功老比营平愿上金城之略报恩有路矢死为期

谢亲笔劄子

臣某今月十七日承御前金字牌降到亲笔诏书一道臣已望阙谢恩祇受讫跪读圣训仰戴天恩涕泗横流精爽飞越窃念臣赋性朴鄙初无寸长误被特达之知首膺考慎之选待遇之礼超軼等伦犬马微诚敢忘自効而臣许国之忠虽切防患之术实疎拙於谋身与物多牾乞骸罢政诬谤并兴流言飞文污渰天听负忧抱衅不敢自明陛下察其心於羣口铄金之际薄其罪於衆人欲杀之时始终保全使得视听食息以至今日肉骨之恩尽出鸿造永惟天地父母之德非臣殒首捐躯所能报称昨自去冬狂敌犯顺戎辂亲征海?之情同深愤激而臣不量浅短辄以己见陈防扞敌马便宜利害以闻伏蒙诏书特加獎谕迨至今春敌骑既遁又奉诏旨令臣条具攻战守备措置绥怀所以为善後之策者来上臣感荷大恩殫竭愚虑敢以区区管见冒瀆天聪议论迂疎文辞拙直大惧不足以裨庙筭之万一今者乃蒙圣慈亲洒宸翰曲赐褒称既目之以精忠又许之以时告不遗簪履之意溢于训辞顾臣何人可以当此铭镂肌骨矢死不忘昔唐权德舆尝读太宗赐李靖手诏至流涕曰君臣之际乃尔耶如臣所蒙於靖何愧顾臣荼然衰病未知图报之所惟当什袭秘藏刻之金石传示云来使天下後世知圣君不忘旧臣乐取诸人以为善者如此非独臣之幸也实天下之幸也臣已奉表称谢外谨斋沐亲书劄子冒尘听覽臣不胜感恩惶惧战越之至

辞免江西安抚制置大使兼知洪州奏状

右臣今月二十六日准御前金字牌降到尚书省劄子十月十六日三省同奉圣旨除臣江南西路安抚制置大使兼知洪州不许辞免不候受告限三日前去之任臣上荷圣慈不以罪戾终弃特加擦拭录用仰戴天恩但深感涕伏念臣迂陋无取误被圣知终始保全以今日更蒙起废付以方面之重在臣愚分义当龟勉遵依严限即日就道以副睿獎少图尺寸之报重念臣自经忧患以来衰病交攻志虑凋落自荆湖得腰足之疾艰於步履杜门不出三年于兹衆所共知近年复感寒热眩瞽并作使当一路兵民之寄必致误事上累圣主知人之明虽死不足以塞责敢望圣慈洞照微恳追寢成命使臣得安闲散寻访医药庶几疾疢可安异日蒙被驱策誓极糜捐以图报効干冒天聪臣无任惶惧战越之至

辞免第二奏状

右臣今月十九日准御前金字牌降到尚书省劄子以臣具奏辞免江南西路安抚制置大使兼知洪州恩命十一月初十日三省同奉圣旨不允令学士院降诏不得再有陈请疾速前去赴任臣感戴天恩涕泗横集伏念臣自国家多故以来误蒙驱策未尝辞难然臣学识迂疎赋分浅薄触事龃齬自招悔尤一昨被命宣抚荆广时以巨寇扰攘不敢力请扶疾就道既至本路招捕盗贼循拊流移整缉军马经理财用策弩砺钝庶以少副委任之意惟知竭力以向前不虑烦言之在後凡造不根之谤率皆可骇之辞自非上赖睿明洞照诬枉姑使罢免以归则臣虽欲自便於江海寂寞之滨不可得也今者蒙恩起废付以江西一路兵民之重边徼宁谧无警急之虞而宸衷鑒临有近降亲笔褒谕之诏在臣愚分岂不愿行以图报万一实以疾病交攻精力顿衰忧患熏心动多遗忘深恐临事乖错复致人言有辜圣主终始保全之德所以夙夜忧惧而不敢承臣闻行百里者半於九十此言晚节末路之难也重念臣以蒲柳早凋之质迫桑榆将暮之年弱植易摇惊魂未定幸安闲散庶或保全岂可复冒宠荣重为小人者之所指议哉不避再三之瀆敢沥血诚控告君父伏念圣慈深察危恳曲赐矜从追寢成命许臣依旧外任宫祠使得养痾藏拙待尽山林则臣仰戴大恩死当结草干冒天威无任惶惧待罪之至

梁谿集卷七十九

卷八十

钦定四库全书

梁谿集卷八十 宋 李纲 撰表劄奏议四十二

亲笔诏谕 辞免第三奏状

辞免劄子 谢亲笔诏谕表

缴进十议劄子

受告命乞赴行在奏事奏状

乞降旨合门到日先次引见上殿奏状

到国门奏状 再乞上殿劄子

谢遣中使赐银合茶药表

亲笔诏谕

朕以大江之西俗轻而悍弄兵之寇无岁无之师旅荐兴民益凋瘵肆图旧弼往镇临之卿威名德望耸动一时风采想闻人自慙服起于闲馆作我价藩匪惟指顾之间一变潢池之习先声所暨谅折遐冲朕之用卿审矣卿宜以安社稷为已任勿间中外勉为朕行不必数有请也故兹亲笔诏谕卿其悉之

辞免第三奏状

右臣近准尚书省劄子备奉圣旨以臣辞免新除江南西路安抚制置大使兼知洪州不允所乞臣已再具奏辞免未奉回降指挥今月二十二日承御前金字牌降到亲笔诏谕勉臣使行不必数有所请臣不胜感恩荷德惶惧激切之至伏念臣学术空疎才能迂拙尝误蒙於器使初不阅於岁时建炎承乏宰司者仅七旬绍兴将命荆广者才数月迄无善状仰报明恩岂徒一誉而一非固已再奋而再蹶自知浅薄姑务退藏迹异羲之虽微誓墓志同仲子但欲灌园岂谓皇帝陛下曲轸深慈眷怜旧物起自闲废之地付以方面之权亲洒宸章临赉丘壑隆恩厚德超度等伦琐质庸材益难报称而臣衆毁所集忧患异於他人多病交攻精力愆於往日经霜之叶望风而先零伤弓之禽闻弦而亟陨畏首尾而身之余者有几惧萋斐而心之虑者益深惟险阻艰难之备尝宜恐惕惊危之独至使膺委任必致颠隮与其异时蒙旷职之诛曷若今日被固辞之责力祈矜允不避再三伏望皇帝陛下洞照忱辞无嫌反汗使安闲散深庇

孤踪至於在畎亩而爱君伏嵎巖而忧世此则微臣之素志岂以进退而异心闲寂之中思虑有得自当献进於君父庶几图报於涓埃干冒天威俯伏俟罪

辞免劄子

臣某伏蒙圣慈付臣以江西一路重寄臣以忧患之余早衰多病再具奏辞免乞寝成命未奉俞允今月二十二日承御前金字牌降到亲笔诏谕赐臣德意之隆训辞之渥非臣愚陋之所宜蒙臣不胜感激惶惧之至伏念臣久荷国恩误被驱策备尝艰险屡蹈危机仇怨满前得谤特甚皆缘国事岂有他哉一昨靖康间金人犯阙臣窃谓朝廷军政不修故使彼敢肆陵侮当治兵为自强之计然後和约可成而主和议者一切苟且目前不为宗社生灵长久之策谓臣异议遂成怨仇至建炎初遭遇陛下龙飞首蒙擢用真之宰司是时伪楚张邦昌以太保同安郡王领尚书省臣窃谓邦昌已尝僭窃位号岂可参与朝政使四方解体上疏乞正其罪圣意开纳邦昌谪授散官安置伪命臣寮等第行遣而受伪命者复成怨仇二怨合力致死於臣巧诋厚诬靡所不至加以危踪寡与忌嫉者多徒抱孤忠不能自达今者陛下察臣於积毁颠沛之中起臣於远屏闲废之地宸章奎画光贲山林圣德厚矣而臣久冒风波之险实怀忧畏之心啓处不遑进退维谷藉使臣力疾承命黽勉效官遇事蓄缩无以自见岂不仰负陛下委任之意哉所以不避斧钺之诛累奏力辞者非独以犬马之齿已衰负薪之疾方甚之故也伏望圣慈哀怜更加睿察许臣少安闲散保全晚节使仇怨者无以中伤则臣感戴天地父母之恩陨首捐躯何足论报臣已三具奏辞免外谨斋沐亲书劄子干冒天聪伏俟严谴

谢亲笔诏谕表

臣某言伏蒙圣慈以臣具奏辞免江南西路安抚制置大使兼知洪州恩命特降亲笔诏谕臣已望阙谢恩祇受告命乞者忱辞冒贡仰祈从欲之仁宸笔载颁误被非常之宠天语丁宁而温厚云章灿烂而昭回久抱负薪之忧有稽严命莫遂循墙之请徒切腼顔中谢伏念臣奋自书生幸遭休运当圣主龙飞之日寔中兴草昧之初博选时髦首冠台辅外拒凭陵之强敌矗定规摹内排僭伪之邪朋稍伸典宪荷知甚腆图报未能责重忧深果自貽於颠覆才疎意广终何补於涓埃赖皇明之烛幽脱谗波於滨死美名峻秩尽复青毡三径一廛已甘白首敢意睿明之求旧加怜孤陋之投闲起自山林付以方面亲御翰墨发为奎壁之文光贲臣邻增重藩屏之势恩辉若此报称谓何此盖伏遇皇帝陛下清明在躬忧勤图治念股肱之郡聿求共治之良采葑菲之材不以下体而弃诞敷大训式遄其行用人无中外之殊实繫鸿造自任以社稷之重其可易当臣敢不佩服深慈激昂晚节谨奉法而循令庶宣化而承流成象可观幸仰窥於羲画上章请覲愿亲奉於尧言臣无任

缴进十议劄子

臣契勘昨於建炎元年六月初一日到行在所次日再蒙赐对便殿尝以十议奏陈其一曰议国是大略谓和战守其本一事能守而後可战能战而後可和不务战守而惟和是務必致误国圣意开纳得旨降付中书省遵守其後用事者复以和为然卒无显效而所失则多今者天

啓宸衷悟和议退避之非治兵饬备欲为自治自强之计兹诚宗庙之灵社稷之福而天下烝黎之幸也臣流落九年颠沛於风波之中幸存余息得见朝廷开至正大公之道为中兴恢复之谋窃自欣庆死且不朽兹蒙圣恩起於闲废付以江西帅守之任而臣实以衰病不敢复当一路委寄之重已三具奏辞免外所有前件十议虽尝禀圣旨修録建炎初时政记已具事目奏闻缘文多不曾该载全文窃虑朝廷自渡江後文籍散失元本不存谨缮写备录投进缴连在前仰尘睿鑒虽时运不留事多既往其间议论偶有合於今日朝廷所施行者庶几或可以裨补庙筭之万一干冒天威臣不胜惶惧战越之至

受告命乞赴行在奏事奏状

右臣今月二十日准都进奏院递到诏书一道以臣三具奏劄辞免江南西路安抚制置大使恩命诏降不允不许再有陈请臣无任感天荷圣惶惧激切之至已望阙谢恩祇受告命讫伏念臣违去阙庭十更寒暑葵藿倾於日月犬马恋於轩墀不胜臣子瞻慕君父拳拳之情兼有本路职事合禀圣训而臣赴任取道江东去朝廷不远伏望圣慈特降睿旨许臣候经由信州日量带人从趋赴行在令合门不隔班先次引对奏事毕免谢辞取便道星夜之官如蒙矜允使孤远之迹获望清光臣颠仆道路退即沟壑所欣愿也臣起发迤邐前路听候指挥干冒天威伏深战越

乞降旨合门到日先次引见上殿奏状

右臣近准御前金字牌降到尚书省劄子以臣乞赴行在奏事正月十九日三省同奉圣旨依所乞又准尚书省劄子奉圣旨令臣疾速起发前来臣已於今月初十日到信州见遵依圣旨指挥星夜蹉程趋赴行在伏望圣慈降旨合门候臣到日依元降指挥不隔班先次引见上殿奏事

到国门奏状

右臣近准尚书省劄子奉圣旨已降指挥李某召赴行在令臣疾速前来臣已於今月二十日到国门讫伏望圣慈降旨合门依元降指挥令臣不隔班先次上殿奏事

再乞上殿劄子

臣契勘昨具奏乞赴行在奏事今来已蒙圣恩於假日特坐引对缘寒食节假未开有妨谢辞臣今有已见急切利害并本路职事合具奏禀伏望圣慈特降睿旨取进止

谢遣中使赐银合茶药表

臣某言伏蒙圣慈以臣被旨赴行在奏事特降中使赐臣茶药银合各一具臣已望阙谢恩祇受讫者十年去国幸入覲於轩墀千里羸粮敢惮烦於川陆过蒙天宠特遣王人闵其载驱之

劳锡以匪颁之数恩辉甚渥报称为难中谢伏念臣懵学无长孤忠自许惴惴渊冰之上荷圣度之保全营营榛棘之间赖睿明之昭鉴迨兹起废曲轸深慈付重寄於上流许来朝於行阙威顔咫尺方将披云雾而覩青天温诏丁宁固已御风霜而挟纯纁更颁妙品副以宝匳北苑灵芽涤烦消渴尚方珍剂愈病析醒大君异数以礼贤微臣何功而拜赐恩深德厚感极涕零此盖伏遇皇帝陛下盛德日跻至仁天覆察臣断断无他技尝备使令怜臣拳拳知爱君来自遐远式昭恩礼庸示龙光臣敢不益励此心少图微效入而告后愿陈药石之言出而抚民试求刍牧之地臣无任

梁谿集卷八十

卷八十一

钦定四库全书

梁谿集卷八十一 宋 李纲 撰表劄奏议四十三

论中兴劄子 论金人失信劄子 论襄阳形胜劄子 论和战劄子

论朋党劄子 论财用劄子

论营田劄子

论中兴劄子

臣窃观自古中兴之主未有不由祖宗积功累德结於民心者故周宣本於文武汉光武本於高祖文景唐肃宪武本於神尧太宗其植根固其流波远虽或中微一旦愤起则天戈所挥靡不如志兴衰拨乱光复旧物非偶然也恭惟国家膺受天命祖功宗德圣圣相承重熙累洽几二百载深仁厚泽渗漉万物民之戴宋於亿万年何有穷已运遭阳九金人作慝宗社颠危不絶如綫陛下应天顺人纘承大统十年于今励精图治枕戈尝胆欲戡大憝迎还两宫绥安区宇则夫克致中兴如周汉唐有不难也臣闻势有强弱事有成败虽弱而有可成之机虽强而有必败之兆顾其理之如何耳譬如医者之疗病不问形之壮羸惟察脉之治否兴亡之理何以异此昔高祖与项籍相持当是时项籍强高祖弱然天下知高祖之必兴者以其所施为当於人心也是以随何援此以说诸侯多仗劔以归高祖遂成帝业光武起兵以攻王莽当时王莽强光武弱然天下知光武之必兴者亦以其所施为当於人心也是以王常吴汉耿弇之流一时英俊皆合谋以归光武遂致中兴然则强弱成败之理槩可覩矣金人不道为封豕长蛇以荐食中国可谓强也然恃其诈力惨毒无恩神怒人愤其亡必暴此虽强而有必败之兆者也陛下时乘六龙保据江左遵养时晦可谓弱矣孝悌通於神明仁心结於海隅应机而发蓄锐而奋其势必起而应之者此虽弱而有可成之机者也夫普天之下皆吾土地食土之毛皆吾民也被坚执锐为敌人之所驱役者皆吾将士也垂绅搢笏为敌人之所官使者皆吾士大夫也彼其心曷尝一日忘宋哉顾国家之力未能覆护之偷生於僭伪之邦苟免於虎狼之口而已陛下诚能以天下为度拯之於涂炭之中则一人之心千万人之心是也岂无感动愿复见汉官威仪为中国礼义之人者哉臣愿陛下与二三大臣熟计凡所施設务推至诚以当人情亲信仁賢以为腹心驾御英杰以为爪牙谨号令使毋数改明赏刑使当功罪训练士卒修除戎器理财以义使歛不及民而用度足积谷以时使虽遇凶岁而馈饷丰知彼知己因利乘便大振天声以临之臣将见四方响应麇举云集沛然有不可御者中兴之期已在指掌之中矣伏惟陛下留神幸察

论金人失信劄子

臣窃观金人自宣和靖康以来凭陵中国其所以为起兵之辞者不过以失信二字加於中国而已文檄之中动辄及此而中国之士大夫与夫兵民将士不察其故亦自以为失信於强邻而致此扰攘也语之则愧耻而扼腕用之则望风而奔溃职此之由殊不知失信在金人而不在中国彼方恃虎狼之威假信义之说以责我吾之人谋回遘方震怖之不暇岂敢与之争是非曲直哉徒受失信之名使士大夫与夫将士兵民茫然不知所仗此不可以不辩也臣请为陛下详言之方宣和间遣使与金人结约海上同谋契丹厚与之赂而得燕云之地以为失信於契丹则可以为失信於金人则不可其後金人败盟以陷燕山遂犯京城此则金人之失信一也敌骑犯阙勤王之师未集人情震骇主和议者不为久长之计一切以不可许者许之结成祸根至今为梗然当时所许乃城下之盟神所弗听元约肃王至河而反不肆侵掠而金人挟肃王以渡河虏掠子女玉帛杀戮尤甚黏罕复陷威胜隆德等州渊圣尝降诏书谓金人渝盟必不可守此则金人失信者二也朝廷遣使交割三镇而三镇之民守死不从此特中国之人不愿沦於异域耳渊圣奉书请增岁币以代三镇租赋金人挟此遂有再入之举朝廷遣执政郎官分行割地奉使北方往往为两河之民所杀如聂山王云之流是也由是观之三镇之民朝廷岂能令之哉敌骑既破汴都登城不下犹假和约已成之说以款勤王之师遂迁二圣卷六宫而北之策立逆臣易姓建号此则金人失信者三也金人负大失信者三反以此名加於中国以为起兵之辞正犹盗贼劫掠主人恃其凶威靡所不至而犹自以为已之直而主人之曲也小人横逆君子犹以禽兽畜之况夫外邻强暴中国岂可以信义与之较曲直哉然臣闻师直为壮曲为老兴师动衆奉辞伐罪以直为先愿陛下降臣此章与大臣熟议发德音下明诏详述自宣和靖康以来失信在彼而不在此使中外士大夫与夫将士兵民周知其故晓然不疑庶几在我有辞人百其勇士气日振戡乱定功莫此为先伏惟陛下留神幸察

论襄阳形胜劄子

臣窃以当今天下形胜在襄阳何以言之四方地势正犹碁局今车驾驻蹕於吴越是置子於东南隅也宣抚处置司聚兵於川陕是置子於西北隅也湖湘屯重兵以控制是置子於西南隅也吴越由湖湘以趋川陕如行曲尺之上相去万有余里号令未易达首尾不相应一有缓急何以为援惟襄阳地接中原西通川陕东引吴越如行於弓弦之上地里省半而又前临京畿密迩故都後负归峡蔽障上流遣大帅率师以镇之如置子於局心真所谓欲近四旁莫如中央者也既逼僭伪巢穴贼有忌憚必不敢窥伺东南将来王师大举收京东西及陕西五路又不敢出兵应援则是以一路之兵禁其四出因利乘便进取京师乃扼其喉拊其背制其死命之策也朝廷近拜岳飞为荆襄招讨使其计得矣然驻军岳鄂未闻前进岂不以自兵火以来襄阳焚毁尤甚野无耕农市无贩商城郭隳废邑屋荡尽而粮饷难於运漕故耶臣观自古有意於为国家立功名之人如刘琨祖逖之徒未尝不据形胜广招纳披荆榛立官府履艰险攻苦淡积日累月葺理家计然後能成功者若欲坐待其自成必无此理愿诏岳飞先遣将佐军马及幕府官径取襄阳随宜料理修城壁建邑屋招纳西北之民措置营田劝诱商贾之伍懋通货贿稍稍就绪然後徙大兵以居之旁近诸郡如金房随郢见属我者可以抚绥如陈蔡许颍见从彼者可以攻取不过年岁间必有显效如谓屯兵聚粮运漕为难则汉江出襄阳城下通於沔鄂漕运之利未有如此之便者当以兵护粮船使彼不得抄掠则吾事济矣今日天下形胜臣愚以谓无出襄阳之右者伏望圣慈特加睿察早降指挥无使缓不及事天下幸甚

论和战劄子

臣闻战国之际合从连横皆其国安危存亡之所系而当时六国之君不能深计利害以听其说从人凭轼结驷说以合从之谋则曰谨奉社稷以从横人凭轼结驷说以连横之说则又曰谨奉社稷以从是其胥次初无一定之计而有羣言之所眩惑宜其无成功而卒至於败亡也夫合燕赵韩魏齐楚之师協谋并力以拒秦此六国之利故从约既成投书函谷关而秦师不敢出关者十有余年岂非计之得耶其後秦遣横人游说以欺六国之君於是散约解争割地以赂秦秦有余力以蚕食天下而六国遂以不振由是言之为六国计从说是也横说非也今之所谓和战者何以异此古者邻国交好则有和亲聘问往来休息兵革灾患相恤庆贺相从夫是谓和金人则不然假和议以行其诈谋割地取赂既以约和则又求衅以战以此亡契丹而困中国中国为和所误者多矣十余年来持和议之说一切苟且希冀万一者何其纷纷也夫靖康之间彼以敌国待我尚可言和至建炎以来见於文檄彼其待我者为如何乃欲恃和议以为自安之计其可乎况仇讎之邦不共戴天卑辞重币祇自取辱何益於事惟当修政刑明赏罚选将帅治军旅备器械利甲兵峙糗粮积财用士气既振乘机大举以恢复中原是战之可成中兴之业犹合从以拒秦不可易之理也然兵凶器战危事虽孔子未尝不致其慎故曰临事而惧好谋而成其可易言哉知彼知己乃可以战我实而彼虚我坚而彼危我治而彼乱在我者有一定之规摹有应变之方略有辑睦之将帅有精练之士马有蓄积之财用谷粟而又敌人有间隙可乘之机会然後可以决胜於千里之外宗社安危所系不可忽也今日为吾患者不在刘豫而在金人军政既修欲议恢复正当虑始虑卒预图善後之策得某地当屯某兵用某人可守某地新附之衆如何抚绥将来之事如何措画使金人来援刘豫当如何以待之此数事者皆有定议则中兴之功已在吾掌握中矣夫胜负兵家常势大计已定愿无以细故动摇益务自治自强如汉高祖之坚忍乃可得志傥或且战且和如六国之朝从而暮横臣愚未见其可也伏望圣慈留神幸察

论朋党劄子

臣观自昔论朋党者无如欧阳修之为详尽其言曰夫欲空人之国而去其君子者必进朋党之说欲孤人主之势而蔽其耳目者必进朋党之说欲夺国而与人者必进朋党之说夫为君子者固当寡过小人欲加之罪则有可诬者有不可诬者不能遍及也至欲举天下之善求其类而尽去之惟指以为朋党耳故其亲戚故旧谓之朋党可也交游执友谓之朋党可也宦学相同谓之朋党可也门生故吏谓之朋党可也是数者皆其类也皆善人也故曰欲空人之国而去其君子者惟以朋党罪之则无免者矣夫善善之相乐以其类同此自然之理也故闻善者必相称誉则谓之朋党得善者必相荐引则谓之朋党使人闻善不敢称则人主之耳不闻有善于下矣见善不敢荐则人主之目不得见善人矣善人日远而小人日进则为人主者依然谁与之图治安之计哉故曰欲孤人主之势而蔽其耳目者必用朋党之说也一君子存羣小人虽衆必有所忌而有所不敢为惟空国而无君子然後小人得肆志於无所不为则汉魏唐梁之际是也故曰可夺国而予人者由其国无君子由以朋党而去之也呜呼朋党之说人主可不察哉修之言如此诚为切当臣以谓人主之所至恶者朋党也小人之所以陷害善良者朋党也为国家患有不可胜言者朋党也人主操天下之利势端居九重之中惟恐人之

相与朋比以为欺罔故曰其所至恶者朋党也君子汲引善类以其彙征而小人指为朋党可使尽去不为已害故曰所以陷害善良者朋党也党锢之祸起而汉室以倾牛李之党炽而唐室以微故曰其为患有不可胜言者朋党也嘉佑间韩琦范仲淹富弼之流用於朝廷其所荐引类多君子小人不悦指为朋党欲尽斥去赖仁宗皇帝有以察之故小人之言不用而韩琦范仲淹富弼之德业得以光明于时此宗社无疆之福也刘向有言曰执狐疑之心者来谗贼之口持不断之意者开羣枉之门汉元帝优柔不断故萧望之周堪刘向之徒不容於朝唐文宗优柔不断故曰破河北贼易去此朋党难人主之德刚健如天光明如日辨是非察邪正则小人道消君子道长愚智贤否各当其分尚何朋党之足患哉臣窃见近年士人中尚有乘间投隙造为险詖之言以惑陛下之听者一时名士皆指为朋党赖陛下有以察之不用其说而善类得所依怙刚明盛德可以无愧於仁祖矣然小人之情譬如穿窬之盗稍失堤防有隙可乘则必复出为恶伏望圣慈考欧阳修之言而察仁祖之用心消小人而进君子早建中兴之业以致太平天下幸甚

论财用劄子

臣窃见自宰臣以下裁减俸禄有以见朝廷财用之阙也陛下临御以来恭俭忧勤无燕游玩好之娱六宫简省无横恩滥赐之费执政常虚侍从多阙省台寺监之官未尝具员而财用阙乏乃至此者岂非以养兵之费不貲故耶臣窃观近年行在禁卫之兵与夫诸将屯兵於大江表里不啻数千万人日有食钱月有俸料时有激赏犒设凡数倍於承平无事之时而户部岁入常赋无承平三分之一朝廷所资榷货亦颇有入纳不如平时之数者然则积月累岁帑藏遂虚无足怪者户部调度不足则仰给於朝廷朝廷支降不继则责办於州县虽陛下屡降宽恤之诏不许敛取於民然势有不得已者非取於民曷从而得降官告给度牒理积欠卖户帖名虽不同取於民一也方今民力凋弊取之不已物力耗屈人心惊疑非长虑却顾之策易曰何以聚人曰财理财正辞禁民为非曰义财非义不理兴师动众奉辞伐罪非财不行今陛下张皇六师恢复疆土以建中兴之业而财用不足将何以克济大功昔太公佐周而立九府之法管仲相齐而明取予之权范蠡霸越而用计然之策萧何辅汉而专转输之事近世有唐自天宝而後兵拏不解肃代德宗之朝有刘晏韩滉之流皆通於财计权百货之低昂笼天下利以佐军兴不斂於民而国用足载在方册其术可考臣愚伏望圣慈降旨朝廷委官考刘晏韩滉事迹可行於今者条具进呈试采其说择有心计疏通公廉之臣而推行之庶有补国用於户部常赋朝廷榷货外别项封桩专以养兵而佐中兴伏惟陛下裁幸

论营田劄子

臣窃见朝廷近来措置营田诸路帅臣皆带使名以总治之可谓得策然今日之事莫利於营田亦莫难於营田何哉耕辟疆土教之稼穡足食足兵且耕且战此所以莫利於营田也开荒垦废必有其人若藉民力则淮南兵革江湖旱灾之余民力凋弊田畴荒芜况欲率之以事新田力必不给若用兵伍则诸军久习骄惰但知开口仰食乃欲驱之使从事於南亩势必不能而又牛具谷种农家所须皆不可阙劝惩勤怠督视耕获必须亲临取予有术其利犹在数年之後此所以莫难於营田也臣愚谓宜令淮南襄汉宣抚招讨使各置招纳司以招纳京东西

河北之民明出文牒厚加抚循有来归者拨田土给牛具贷种粮使之耕凿许江湖诸路於地狭人稠路分自行招诱而军中人兵愿耕者听其请佃则人力可用矣初年租课尽畀佃户方耕种时仍以钱粮给之秋成之後官为籴买次年始收其三分之一二年之後乃取其半罢给钱粮则所谓知予之为取政之宝也凡此数者皆措置之大概其详须画一条具立为成法乃为长久之利不然徒有营田之名初无营田之实何补於事伏望圣慈特降睿旨下臣此章令诸路营田使司各具利害申朝廷斟酌其宜而推行之庶几有助养兵之费不胜幸甚

梁谿集卷八十一

卷八十二

钦定四库全书

梁谿集卷八十二 宋 李纲 撰表劄奏议四十四

论赈济劄子 论江西军马劄子 论江西钱粮劄子 论?州盗贼劄子 论福建海寇劄子 乞宫祠劄子

论常平劄子 议迎还两宫劄子 辨余堵事劄子

论赈济劄子

臣伏蒙圣慈付臣以江西一路兵民之寄适当本路去岁旱灾之後仓廩无储谷价翔踊民户流移军兵阙食人情焦然如臣疎拙诚未知所以赈济之策窃观近降亲笔诏书督责监司守令存抚赈恤悉力推行毋使诏旨徒为文具仰见陛下加惠元元德至渥也然饥流之民祇是乏米若蒙朝廷悯念肯於邻路及本路那移斛?应副则官吏岂敢坐视乏食之民不加赈济自貽罪戾如使米斛无所从出则虽督责之深人人愿以罪去终无实惠可以及民此不可不察也契勘江西一路所养饥流民人数至广今去秋成之期尚远虽近蒙朝廷於饶州拨米一万石应付赈济及赡养军兵然米数不多将来必致缺食臣窃见江东路建康府宣池等州并系去年丰熟地分必有常平义仓等米可以那移应付又抚州建昌军在本路粗为丰熟有朝廷昨给降官告度牒作采赈济共计一万四千余石本州别无支用欲望圣慈特降睿旨於建康府宣池等州常平义仓米内通融那拨一万石许本路自差人船前去搬取将来秋成却行拨还及将抚州建昌用官告度牒采到米许臣随宜拨充诸州赈济支用庶饥流之民不致乏食得全性命於荒岁以副陛下加惠元元之意

论江西军马劄子

臣契勘朝廷昨降江南西路安抚制置大使画一指挥差兵二万人绍兴三年分有兵一万八千人後来节次拨隶都督府韩世忠岳飞等军四年分有兵一万五百人五年二月内指挥除存留丘贊一军外自余军马并拨付岳飞今来本司所管丘贊军马不满二千人马百余疋窃见江西路分控扼上游与淮南相接道里不远昨见金人兵马渡江首犯洪抚等州李成马进等亦破江州侵犯筠洪盖缘兵力单弱不能扞御朝廷灼见利害因建大使付以重兵使任一路之责累年腴削存留仅及十分之一又皆瘦弱之兵缓急不可倚仗万一强敌侵陵江上不知何以使之镇抚要害之地况今?吉盗贼累年出没作过为患数路讨荡未平非有可用军马卒难殄灭臣未敢乞依元降画一指挥差拨数足若蒙朝廷先次差拨一半使及万人庶使稍成军制可以倚仗伏望圣慈特降睿旨选差近上统制官将带所部军马赴本路驻劄听臣节制与丘贊军马通计人数其余乞许臣踏逐申朝廷指差庶几训练习服军声稍振可以镇压一路折冲御侮少副陛下委任之意

论江西钱粮劄子

臣契勘本路安抚制置司元降画一指挥每岁支降钱四十万贯许取拨诸色上供经制等钱并於苗米内取拨十五万石应副养兵近年以来缘兵马多拨隶都督府韩世忠岳飞军中本路转运司将上件支降钱米除措留应副丘贇一军外其余并行拘收不复支拨今来丘贇一军每月用钱八千余贯米一千四百余石虽系转运司抛下洪州认定应副缘本州缺乏自去年五月以後至今年正月以前已拖下五万余贯委是贍兵不足今来臣乞依朝廷元降画一指挥差兵二万人内先差拨一半应副使唤其钱米等亦乞於元降画一指挥内先须支拨一半应副支遣伏望圣慈特降睿旨如臣所请庶几本路军马不至削弱钱粮不至缺乏可以控制上流图尺寸之功以副委任之意

论?州盗贼劄子

臣契勘本路?吉二州民素强悍狃於为盗结集凶党动以数千百为羣头项不一出没江西广东福建数路作过虽朝廷节次遣兵或招或捕至今徒党依旧猖獗全未平殄多於?州管下诸县择要害地建置寨栅蜂蚁屯聚窥伺间隙攻陷州县杀戮生灵虏掠财物为害不细一路官兵进讨则散入他路诸路官兵进讨则深入巢穴依负险阻卒难讨荡官军既退则复出为恶习以为常而又诸路军马无所统一乍前乍却心力不齐非设方略使诸路之兵节制归一难以成功伏望圣慈特降睿旨令江西广东福建三路军马一处节制诸路各应副钱粮江西兵屯?吉州广东兵屯循梅州福建兵屯汀州禁其出没抄掠因利乘便会合掩击讨荡巢穴剿殄积年逋诛之寇或因兵力招抚出降以酋首并强壮人充军前使唤使数路良民早得奠居不胜幸甚

论福建海寇劄子

臣契勘广南福建路近年多有海寇作过劫掠沿海县镇乡村及外国海船市舶司上供宝货所得动以巨万计官司不能讨捕多是招安重得官爵小民歆艳皆有仿效之意臣恐自此为患未艾盖缘两路帅司并无战舰水军遇有海寇坐视猖獗不能进讨止是於沿海摆布些小兵卒为保守之计贼船来去近远不常并海之民罹其毒虏掠船舶既多愚民嗜利喜乱从之者衆将浸成大患如晋之孙恩不可不过为之备伏望圣慈特降睿旨常存兵於两路镇压仍下逐路帅司委以措置战舰招集水军水夫常加教阅令士卒习於风涛之险以水夫驾舟以官军施放虽贼櫂飘忽可以追逐掩击殄灭一两头项则余人有所忌惮不敢觊觎妄作庶几海邦之民得被朝廷大赐不胜幸甚

乞宫祠劄子

臣伏蒙圣恩付臣以江西帅守之任又被诏旨许令入覲十年去国仍旧望清光於咫尺之间亲闻玉音臣子之情不胜忉蹈感激之至伏念臣自远黜坐之侧仇怨交攻谗谤蜂起仰赖圣慈照察保全乃幸今日复覩天顔顾虽糜捐何以论报然臣衆毁所集积忧熏心比年以来得

志慮不寧之病平居閑寂羸可支梧稍親事務動輒煩憤多思健忘發歇不常使當一路兵民之寄深恐仰孤陛下委任之意所以請對丹墀者正欲面奏懇惓冀蒙矜允伏望聖慈察臣忱誠特降睿旨罷臣新任依舊宮觀差遣使安山林得以養痾藏拙以盡余年不勝幸甚干冒天威無任戰越

論常平劄子

臣聞火旱金穰天有常數雖堯湯不能無水旱而能不為水旱所困者人事修而蓄積備也傳曰國無九年之蓄曰不足無三年之蓄曰國非其國況年歲之儲尚有缺乎祖宗常平之政寔用古制豐年則增價以糴不使傷農凶年則損價以糴不使艱食倉廩有蓄而民無飢困之患勅令具禁制嚴密誠良法也建炎以來罷提舉官而以茶鹽司兼之奉法不謹浸以隳壞常平諸色錢物州縣那移朝廷剗刷所余無幾豐年粒米狼戾則無錢以糴凶年民有飢色則無米以糴法存而人不舉可勝嘆哉去歲之旱縣亘數路江湖為甚而福建廣南次之官吏坐視民之流移而無以賑貸則常平之政不修之過也臣愚伏望聖慈特降睿旨改提舉茶鹽官為提舉常平茶鹽等事勿使視之為兼職恬不加恤責其遵奉法令不得少有違戾自今州縣不得那移朝廷不復剗刷依舊推行糴糴之政敢有違戾重寘典憲庶幾良法復舉民受其賜天下幸甚

議迎還兩宮劄子

臣伏觀陛下近降親筆詔書念道君太上皇帝孝慈淵聖皇帝銓輿未還久困沙漠陛下欲盡為人子為人弟之道而未可得辭旨懇惓讀之者為流涕臣竊仰陛下孝弟之至通于神明思慕之極見於羹牆誠意格天天必從之兩宮雖遠安知無可還之理然議者或謂二聖還則難於所處臣竊以為不然昔漢高祖既定天下太公猶存高祖曰定天下者我也故太公稱太上皇韓安國援此以說梁孝王使知帝王無私天下至公之道萬世之訓也方宣和末金人犯闕道君不能御而遜位淵聖及靖康末金人再來淵聖不能保而遠狩絕域僭偽之臣易姓建號宗社顛危天下反覆賴陛下總師於外億兆推戴受天眷命入繼大統守宗廟社稷為神明萬物之主迨今年國勢羸定此陛下之功也況將恢復區宇翦屠鯨鯢使中國再安二聖旋軫為宗社無疆之休哉正當盡為人子為人弟之道問安視膳先意承志極四海之奉致天下之養使薄海內外歌咏嘆仰而垂裕無窮豈不韙哉臣聞至誠感神惟德動天無遠弗届舜往于田號泣于旻天于父母自古帝王稱為達孝無如帝舜者臣愿陛下夙興夜寐齋明盛服禱于上下神示惟以二聖早還為祈朝以听政昼以访问夕以修令總覽萬機惟以何施何為而可以還二聖為念則神明之所協相必有合天人之愿者矣昔申包胥聞伍員有亡楚之言則曰我必存之其後哭於秦廷以乞師果復楚國狄仁杰語武后之事於荆南江中其後卒復唐嗣垂祚三百匹夫之念其烈如此況於陛下履帝王之位躬孝悌之德欲救父兄於漠北苦寒之乡天地神人其所佑助宜如何哉昔太公為楚軍所獲高祖兵振太公乃歸陛下誠能為自治自強之計國勢日隆臣將見如侯生之流緩頰往說迎還兩宮仰副陛下之盛德必不乏人矣臣以愚憊干冒天威不勝戰越取進止

辯余堵事劄子

臣伏見靖康間結約余堵事近年朝廷士大夫不深知其故往往追咎以為失策又以其事為專出於臣此所謂見影而吠聲者也臣請論之余堵者耶律氏之尊屬也實掌契丹兵柄天祚失德人心離叛余堵欲立其子所謂晉王者以靖國人未果而女真之變作余堵將兵于外以御之其謀頗泄天祚誅晉王及其母余堵聞之不敢歸國遂從女真方粘罕之圍太原也余堵在其軍中因使者蕭倫等來使達意於中國欲援立耶律氏且為內應是時邢倬張撝館伴得其言奏聞淵聖宣諭宰執金謂國家自澶淵以來與契丹盟好百有餘年兩國生靈皆受其賜古所未有一旦見利敗盟遂有金人之禍非援立耶律氏以合天心禍難未已且謂使謀雖泄亦無甚害正欲間之使燕人德我而金人疑燕如高祖使陳平間楚之義淵聖以為然得旨令宰執召使人會議翌日宰相徐處仁吳敏知樞密院事臣某門下侍郎耿南仲中書侍郎唐恪尚書右丞何?同知樞密院事許翰皆聚於都堂召使人蕭倫等并館伴官邢倬張撝河東轉運司張灝皆使與議詢其說與邢倬張撝所奏之說合宰執因以朝廷之旨諭之以答其意是時雖屏堂吏而與議者衆其言頗泄於外士大夫多知之其後臣被命宣撫兩河得淵聖親筆令援立契丹招納李嗣本等軍前以蜡書結燕人者甚多屬官詹大和主之皆得其要約何独余堵哉未几徐處仁吳敏罷而相唐恪朝廷之論中變臣亦以疾丐歸其事遂寢今詹大和猶存可召問也靖康之末言者乃以余堵之事歸罪於臣士大夫不知本末從而和之因敵制謀結約離間此兵家之常事昔高祖與項籍爭天下則遣隨何說其諸將使背楚而歸漢仁宗欲制西夏則遣種諤間其族用事酋首後皆得志奇謀秘計顧所以用之者如何耳今朝廷方合衆智屈羣策制敵國以圖大功計謀未可廢也臣恐議者猶援余堵以為言使智慮之士懲創畏縮不敢盡其謀畫非計之得伏望聖慈與大臣熟議凡獻策者察其事宜如可採用一切推行後有显效優加旌賞庶几協謀并力可為中興之助取進止

卷八十三

<集部,别集类,南宋建炎至德佑,梁谿集>

钦定四库全书

梁谿集卷八十三 宋 李纲 撰表劄奏议四十五

进奉迎录劄子 奉迎录

进呈劄子 徐处仁等表

道君御制青词 渊圣御制宣谕

进奉迎录劄子

臣靖康初任知枢密院事被渊圣皇帝命迎奉道君太上皇帝于南京蒙道君赐对听纳其说罢幸亳社西洛旋归京师二圣重欢四海胥庆道君察臣之忠赐以御笔礼貌优异渊圣察臣之忠赐以亲笔褒谕再三而靖康之末臣既去位羣枉当国与臣为仇颠倒是非变乱白黑孙覲因召试中书舍人作戒励诏显诋臣为指天画地睥睨两宫唐恪因令榜於朝堂士大夫信以为然罕有知其实者銜冤抱愤顺受黜闇不能自明伏遇皇帝陛下盛德日跻大明旁烛凡臣子之忠於所事而为回邪之所诬蔽有迹可考者悉蒙昭雪君人之道孰先於此臣近尝以二圣所赐御笔刻之琬琰盖欲侈大其赐因自辩白以装成碑本托给事中臣祉以示右仆射臣浚遂获上闻伏蒙宣谕欲见道君御笔真蹟臣已恭依圣训具奏缴纳外所有臣靖康间编修到奉迎录并臣进呈劄子二首徐处仁等表一首道君御制青词一首渊圣御笔宣谕一首繕写合成一轴谨具劄子缴进仰尘天听伏望圣慈特加睿察臣不胜惶惧战越之至取进止

奉迎录

靖康元年二月初十日金人退师道君太上皇帝自镇江府回銮次南都徘徊不进欲诣亳州上清宫烧香及取便道如西都渊圣以为忧又每有书至必及朝廷改革政事又批太皇后当居禁中出入正门於是喧传且有垂帘之事又批吴敏李某令一人来莫晓圣意皆言事且不测臣奏渊圣曰所以欲臣及吴敏来无他欲知朝廷事耳吴敏不可去陛下左右臣愿前去奉迎如蒙道君赐对臣具条陈自围城以来事宜以释两宫之疑决无他虑渊圣初不许臣力请之乃听渊圣令齎御前书达道君且赐行宫官属茶药银合有差十七日离国门十八日早次陈留县秋口遇太上皇后船臣具榜子拜谒道左太上皇后舫舟令内侍杨修传教旨劳问臣附奏曰陛辞日有所得圣旨合具奏知乞依赵野例幄前奏事复传教旨允臣遂登舟入幄中帘前拜讫具道渊圣思慕且叙方艰危中蒙擢任感激之意太上皇后亲加奨谕臣再拜谢讫太上皇后曰朝廷欲令於何处居止臣对曰朝廷见以撝景园为宁德宫奉太上皇后盖遵禀

道君太上皇帝十二月二十三日圣旨指挥太上皇后已得旨令居禁中臣对曰以皇帝圣孝殿下圣慈母子之情岂复有间但稽之三从之义道君太上皇帝居龙德宫而殿下居禁中於典礼有所未安朝廷讨论但欲合於典礼以慰天下之望两宫安则天下安矣太上皇后曰朝廷须是措置令是则得因泛说他事臣拜辞登岸因召内侍杨修李侁等三人坐幕次与再道前语三人者皆宁德宫官也以臣言为然因入白之复传教旨相公所论甚有理但既居宁德宫後欲到禁中神御前烧香可否但奏来臣附奏曰太上皇后既居宁德宫皇帝自当时诣省问万一欲暂到禁中岂有不可之理因遣使赐香茶酒食等钱五百贯给散随行使臣以前语具劄子奏知渊圣且云太上皇后已有许居宁德宫意愿一切不须示以疑阻以昭圣孝二十日抵南都得旨二十一日引对是日道君御幄殿臣起居讫升殿奏事具道渊圣思慕欲以天下养之意道君泣数行下曰皇帝仁孝四方所知且獎諭曰都城守御宗社再安相公之力为多臣再拜谢讫因出劄子二纸进呈其一乞道君早回銮輿不须诣亳社西都以慰天下之望其二自叙素蒙道君教育擢用於国家艰危之中得效犬马之力欲乞身归田庐之意道君慰劳再四因曰相公顷为史官缘何事去臣对曰臣昨任左史得侍清光几一年以狂妄论列都城积水伏蒙圣恩宽斧钺之诛迄今感戴道君曰当时宰执中有不喜公者臣愧谢因奏曰臣昨论水灾实偶有所见自古虽无道之国水犹不冒其城郭天地之变各以类应正为今日兵革攻围之兆尝观开天传信记载天宝中长安大水後数年乃有安史之变其事与今日相类大抵灾异变故譬犹一人之身病在五臟则发於气色形於脉息善医者能知之非有物使之然一气之先至者尔所以圣人观变於天地而修其在我者故能制治保邦而无危乱之忧道君以为然特加獎諭因询敌骑攻围都城守御次第臣具以实对语既浹洽道君因宣諭行宫止递角卸纲运等事曰止递角只缘都城已受围恐为金人知行宫所在卸纲运亦恐为敌人所得非有他也臣又奏曰方艰危时两宫隔絕彼此不相知虽朝廷应副行宫事亦不容无不至者在圣度照之而已道君因询问朝廷何故追赠司马光臣对曰方金人在外人情恐惧不安司马光实得都人之心故追赠之欲慰安都人心又问曰何故拆夹城公知所以置夹城之意否臣对以不知道君曰内禅之意久已定但人不知偶缘金人犯阙事成於仓卒间尔本欲内禅後於夹城中往还抱子弄孙不欲令皇帝频出人主频出则不威此本意也臣对曰臣久在外方实不知此意如朝廷近日拆去夹城之意则臣知之夹城中通宫苑皆游燕之地自艮岳九曲池至龙德宫後正与金水门相接金人下寨在金水门外平时夹城中有清卫兵卒巡防洒扫自金人犯阙尽应募守城夹城中无一卒守宿恐有奸细不测之患故拆去使与宫禁相絕备不虞也如此之类凡询十数事皆逐一解释道君无语因从容复奏曰臣辄有愚意仰瀆圣聪皇帝仁孝小心惟恐一有不当道君意者每得御批诘问辄忧惧不进膳臣窃譬之人家尊长出而以家事付之子弟偶遇强盗刼掠须当随宜措置及尊长将归子弟不得不恐然为尊长者正当以其能保全大计慰劳之不当问其细故今皇帝传位之初陛下巡幸适当大敌内向为宗社计政事不得不小有变革今宗社无虞四方以宁陛下回銮臣以谓宜有大慰安皇帝之心者其他细故一切勿问可也道君感悟曰公言极是朕只缘性快问後即便无事因内出玉带金鱼袋古象简面赐曰行宫人得公来甚喜以此慰其意便可佩服臣固辞不允再拜受赐而退二十二日扈从道君诣鸿庆宫烧香初臣行至拱州见奉迎道君禁卫宝辇仪物等留不进因以便宜作奉圣旨令趋南都至是道君烧香禁卫宝辇仪物等适至南都士女民庶夹道耸观是日再召对于幄殿道君太上皇帝出示文字一轴乃太宰徐处仁以下表奏具道太上皇后不当久居禁中及出入宣德门指挥其语颇激切於臣名銜下注奉使字道

君曰适得徐太宰表乃是问头当如何答臣对曰徐处仁等但以嗣圣忧恐故有此奏今既不用前项指挥似不须答此表容臣携归道君曰甚好臣因以表轴置公服袖中道君又出尚书省劄子云朝廷有指挥行宫内侍十人皆与在外宫观不得入京城此辈皆是日在左右梳头系裹不可缺之人臣奏曰如圣意欲留容臣携此劄子归奏知皇帝取旨道君曰甚好数内两人系童贯亲戚不须留余人如冯彦等只乞留龙德宫祇应因宣谕令来日朝辞讫先还阙赐酒食香茶等二十三日朝辞再对于幄殿道君出小字青词藁一纸俾宣示宰执百官乃道君初传位奏天所作者道君宣谕曰本欲往亳州太清宫以道路阻水不果又欲居西洛以皇帝恳请之勤已降指挥更不戒行公先归达此意慰安皇帝因袖中出书付臣仍宣谕曰公辅助皇帝扞敌守宗社有大功若能调和父子间使无疑阻当书青史垂名万世臣感泣再拜受命辞讫即先具劄子以所得道君圣语奏知渊圣御批有覽来奏知卿奏对之语忠义焕然之语二十五日还抵阙下对于垂拱殿进呈道君皇帝御书具道所以问答之语渊圣嘉劳久之因奏道君欲留内侍姓名得旨听留龙德宫祇应复以道君所赐玉带牙简进纳御府有旨再赐二十七日宰执奏事延和殿进呈车驾出郊诣资福寺迎奉道君仪注耿南仲违议欲尽屏道君左右内侍出榜行宫有敢入者斩先遣人搜索然後车驾进见臣奏以车驾行幸自有常法有视皇城门者有视宫殿门者用各不同不若止依常法不必如此示之以疑必欲过为之防恐却有不可防者南仲曰易曰或之者疑之也虽圣人有所不免臣曰古人虽不免於疑然贵於有所决断故书曰稽疑易曰以断天下之疑傥疑情不解如所谓窃鉄者则为患不细南仲纷纷不已臣奏曰天下之理诚与疑明与闇而已诚则明明则愈诚自诚与明推之可以至於尧舜疑则闇闇则愈疑自疑与闇推之其患至於不可胜言耿南仲当以尧舜之道辅陛下而其人闇而多疑所言不足深采渊圣笑之南仲怫然怒甚既退再召对于睿思殿赐茶讫南仲忽起奏论士民伏阙之事乞付御史台根治渊圣及宰执皆愕然臣奏曰臣适与南仲辩论于延和殿实为国事非有私意而南仲衔臣之言故有此奏伏阙之事陛下素所鑒察臣不敢复有所辩但臣以非材冒处枢辅仰荷特达之知未能有所补报区区素志欲俟敌骑出疆道君銮輿还阙然後求归田庐臣之愿也今南仲之言若此臣岂敢复留愿以事送有司臣得乞身待罪渊圣笑曰伏阙士庶以亿万计如何结集朕所洞知卿不须如此南仲犹不已臣因再拜辞出居啓圣院不复归府第入劄子求去章凡十余上皆批答封还不允差御药宣押造朝及押赴枢密院治事复即时上马四月朔车驾诣宁德宫复遣御药宣押扈从道君太上皇帝以三日入国门臣以守御使职事迎拜於新宋门内道君於辇上顾揖翌日扈从朝于龙德宫复上章恳请求罢知枢密院事渊圣降手诏数百言不允复令徐处仁吴敏谕旨又召至内殿面加慰谕且曰敌人方退正赖卿協济艰难今遽欲舍朕何之前事不足介怀宜为朕少留辞意恳恻臣不得已再拜受就职进呈上道君太上皇帝劄子二首已见卷四十四太宰徐处仁等上道君太上皇帝表一首

臣处仁等言伏奉道君太上皇帝御笔太上皇后合入正门之中门皇帝膺受圣训即命祇承臣等以为不可辄据法义争之伏自皇帝嗣位以来动遵去年内禪手诏今宁德即撝景园以奉皇后所居此内禪诏旨也百司共守四海咸知一旦变更羣疑纷起今若徙居内禁复将出入中门既犯皇帝之等威又违道君之本指若非垂帘听政於国当无此仪臣等闻天无二日国无二王治生於一乱生於二三治则宗庙社稷安存乱则宗庙社稷危亡故定帝王之一尊以临四海者非私已也所以尊宗庙而重社稷使天下而不正夫一非帝王所以为治也大臣

之义以道事君苟利宗社死生以之而况人君而可不谨夫家人之情则有母子之私恩朝廷之法必有君臣之大义以义制恩则恩纪可全以恩废义则恩义更失是以先王为国必以礼也恶可以忽恭惟道君太上皇帝凝心道素脱迹尘樊禅逊之际比德尧舜垂名亿载高视千古於此几微岂难洞照殆恐从臣未知奏啓臣等冒昧万死因此复愿有陈自顷敌人犯阙乘輿渡江皇帝居围城中昼夜戮力忧宗社之颠隮念上皇之播越言则涕下感动天人是以百神顾怀羣心效顺卒安大业再正寰区乘輿之还万人交庆谓宜慈孝之恩益敦休极之乐无量薄物细故岂足寘怀而诘问繁多屡形亲翰皇帝伏读夙夜震悼食不甘味寢不安席夫大功不录而小过是求盛德不扬而微失是举虽严君不行於其臣而况慈父忍施於其子臣等伏望道君太上皇帝陛下顺苍穹之休命遂黄屋之非心杜塞谗言敦笃至性一切礼法付之有司但使宗社泰定则陛下寿祉万年永享天下之养自极荣乐所有前件御笔臣等未敢宣示伏望降旨特赐收还谨上表奏稟以闻臣处仁等诚惶诚恐顿首顿首谨言

道君太上皇帝御制青词一首

奉行玉清神霄保仙元一六阳三五璇玑七九飞元大法都天教主臣诚惶诚恐顿首顿首再拜上言高上玉清神霄九阳总真自然金阙下臣曩者君临四海子育万民缘德菲薄治状无取干戈并兴弗获康靖以宗庙社稷生民赤子为念已传大宝于今嗣圣庶几上应天心下销兵革所冀遐迩归顺宇宙清宁而基业有无疆之休中外享昇平之乐如是兵戈偃戢溥率安康之後臣即甘心守道乐处闲寂愿天昭鉴臣弗敢妄若将来事定复有改革窥伺旧职获罪祸大已上祈恳或未致当更乞重降灾咎止及眇躬庶安社稷之基次保羣生之福五兵永息万国咸宁伏望真慈特赐省鉴臣谨因神霄直日功曹齋臣密表一通上神霄玉府玉清引进仙曹伏须告报臣诚惶诚恐顿首顿首再拜以闻

渊圣皇帝御笔宣谕一首

覽来奏知卿奏对之语忠义焕然朕甚嘉之途中劳神不易上皇袖中小字数事可先次封进

梁谿集卷八十三

卷八十四

钦定四库全书

梁谿集卷八十四 宋 李纲 撰表劄奏议四十六

进道君所赐玉带牙简奏状

谢赐金带等表 谢赐玉鹞马表

论进兵劄子

进道君御画并渊圣所赐玉带奏状

进道君御画并渊圣所赐玉带劄子

进道君所赐玉带牙简奏状

右臣昨於靖康初奉渊圣皇帝圣旨迎奉道君太上皇帝於南京蒙恩赐玉带一条牙简一面简袋上有织成小龙窠臣即时具奏回纳蒙遣内侍传宣再赐迨今十有一年奉以周旋不敢失坠今者幸蒙圣恩许令入覲获望清光已尝面奏道君所赐玉带牙简等不敢藏於私家谨用匣复緘封齎诣通进司投进缴纳御府仰尘睿覽伏望圣慈特赐矜允谨録奏闻

小贴子

臣契勘所藏道君御画两轴偶忘记带行容臣到洪州日并渊圣所赐玉束带差人齎赴行在投进伏乞圣察

谢赐金带等表

星使俯临天光下逮申请便蕃之异数误膺优渥之殊荣抚已无堪拜恩增愧【中谢】伏念臣赋材甚陋造道弗优蚤蒙特达之知初乏涓埃之补来从疎远过被眷私焕宝带之万钉藹芳醪之九醞尚方名果御府珍庖并示宠光式昭体貌此盖伏遇皇帝陛下念旧不遗於簪履取材无弃於菲葑致兹湛露之恩滥及蓼萧之质恩高汉祖有解衣推食之仁德迈周王同路车乘马之予臣敢不激昂晚节图报隆施强饭据 自叹廉颇之已老立朝束带愿效子华之能言

谢赐玉鹞马表

臣某言伏蒙圣恩特降中使赐臣玉鹖马一匹臣已只受讫天庭入覲慙非季子之归御廐呈材滥受康侯之锡宠踰其分愧溢于怀【中谢】窃以晋文多修扞之功乃被周王之赐子仪有戡定之烈是膺唐帝之恩顾臣何人亦与兹数去轩墀而恋宠畀牧圉而增荣秀骨兰筋腾骧磊落殊形逸态倜傥权奇锺流云飞电之姿有超山跨谷之足宜膺驾御节以和鸾以畀琐材实谓非称此盖伏遇皇帝陛下法天临下以道观能起臣於闲废之中赐臣以清燕之对礼加三接恩解左骖悯其驱驰之劳予以安闲之乘而臣衰頽已老结约亡奇修我戈矛莫豫宣威於沙漠归于丘壑终期解纵於渭滨

论进兵劄子

臣近者伏蒙圣恩许令入覲特御内殿三赐引对疎远之迹得望穆穆清光於咫尺间从容移时仰聆玉音俯竭愚悃臣子之情不胜欣幸然进对之久恐劳圣躬加以言词拙讷敷奏迂疎犹有未能尽其底蘊者敢昧死以闻臣本书生初不知兵自靖康以来窃见朝廷军政不修致有夷狄之祸夙夜以思欲振起中兴之业为自治自强之计非兵不可昔苏轼当熙宁元丰间着论深戒用兵使轼生於今日则必以兵为先务何则所遇之时异也然兵家多故千绪万端有奇有正变动无方能读其父书者未必能施於行事不读古兵法者未必不暗合孙吴顾所以用之者如何耳臣尝推原古人用兵之意比较今日主兵者之失大略有四夫兵贵精不贵多多而不精反以为累故昔之善用兵者料简至精率能以少击衆如干将镆铘迎刃而断莫之敢撓其与顽铁岂可同年而语哉王邑百万而破於光武之三千苻坚百万而败於谢玄之偏师用此道也又况将兵如将将多多益办唯韩信能之自余各有分量今之诸将贪多务得见他人之兵则垂涎以思并吞初不自量其智力果能节制运动如身之使臂臂之使指乎否也冗食既多坐耗国用疲劣弗简遇敌先奔一大将连十数万之衆未闻有敢深入而建奇功者此不务精而务多之故也将贵谋不贵勇勇而无谋适为败擒故昔之善将兵者或深谋於已或广谋於人韩信背水而阵示以大将旗鼓使敌趋利拔赵帜而夺其城遂以破赵将士皆莫能知此深谋於已也得李左车西向而师事之遂传檄而定燕齐此广谋於人也周亚夫亦然其谋於已则坚壁不战以困七国之师志虑一定虽梁孝王不能夺者是也其谋於人则听赵涉遮说走蓝田出武关抵洛阳直入武库击鸣鼓而骇诸侯者是也善将者莫不如此而今之大将号为出羣帅之右者不过勇猛敢进未闻长虑却顾虚心下士以谋为先者求其据形势中机会料敌制胜不战而屈人之兵者可得哉此不务谋而务勇之过也阵贵分合合而不能分分而不能合皆非善置阵者诸葛亮以石布八阵图於蜀江水中晋大司马温见之曰此常山蛇势也击首则尾应击尾则首应击其中则首尾皆应非能分能合何以至此自金人凭陵以来未闻诸将有与之对垒而战者率皆望风奔溃间有略布行阵为其突骑所衡一散而不复合於古人置阵之意岂不相远哉鱼丽偃月平锐曲直阵形虽殊其欲能分合一也合而不能分则非所以适变分而不能合则溃而已矣古之阵法皆能制敌於部伍曲折之间故诸葛亮以之擒纵孟获李光弼以之大破史思明而今之阵法徒为文具而不适用此不务分合之过也战贵设?不设伏而直前使敌无中断邀击之虞皆非善战者北戎侵郑郑公子突谋为三覆以待之衷戎师前後击之尽殪昔之善战者未尝不以设伏为先山川林莽荟蔚深密皆可伏兵或诱之以利而使前或示之以怯而使逐薄於险阻之地击其首尾而不得相援断其腹心而不能相支如猛虎?於机穽之中齧骇狼顾鲜有不甚败者今之诸将或有与敌相遇惟

务力争不求谋胜虽小有获未闻有能大殲丑类者此战不设伏之过也是四者今日诸将之失愿陛下明诏之使知古人用兵之深意则於折冲御侮致果杀敌之方非小补也昔高祖驾御韩信英卢如指踪猎狗而得兽光武驾御寇邓耿贾所向无不成功陛下十数年来委任诸将不爱高爵重禄以得其心分以坚甲利兵以作其气驾御之术固非愚臣之所能测识然窃见朝廷近来措置恢复有未尽善者五有宜预备者三有当善後者二臣荷恩之深尝蒙圣慈特降亲笔有宜因疾置时告嘉猷之语苟有所见其敢隐藏请试为陛下详言之何谓有未尽善者五夫兴师十万日费千金聚人必以财理财必以义以朝廷之威擅天下之利势而欲措置财用使养兵不乏何施不可善制国用者有生财之道有节用之法有救弊之说有核实之政有懋迁之术有阖辟之权审此六者则虽养兵之多何患乎财用之不足而朝廷初不留意於此唯取於民之为务降官告给度牒卖户帖理积欠折帛博杂预借和买名虽不同其取於民一也上户竭产不足以供买官资之敷配下户絶食不足以应科斗升之诛求物力耗屈人心惊疑如居风涛汹汹靡定夫民为邦本本固邦宁基址薄则栋宇有倾危之忧水泉涸则鱼鳖无生养之理为父母而日削其子饱腹心而自戕其肌欲求久安其可得乎昔唐德宗急於用兵而有除陌钱税闲架之令遂致奉天之变今日诚不可不以为鉴此未尽善者一也夫千里馈粮士有饥色樵苏後?师不宿饱军旅之兴粮餉为先而去年自江以南縣地数千里适有旱灾粒米惟艰谷价翔踊饥民饿殍相望于路虽浙西号为丰稔然以一路而供江湖数路之求势亦安能有余朝廷采买数目虽多亦必未能丰衍王师一动运漕飞挽何以能给议者谓当因粮於敌臣窃以为不然使敌人聚粮或有败北焚荡而去必不使为我有粮道不继为患甚大若欲取於伪地之民则官军掠抄甚於寇盗有违吊伐之义失民望而坚从贼之心非计之得此未尽善者二也金人专以铁骑胜中国而吾之马少特以步兵当之飘暴冲突势必不支平时不务有可以制铁骑之术而亟欲兴举夫工欲善其事必先利其器况於战阵之际国家安危所系岂可忽哉此未尽善者三也夫用兵如奕碁先能自固乃能杀敌根本之地当以重制轻乃能安全臂指之势当以大用小乃能运动今朝廷与诸路之兵悉付诸外外重内轻指大臂小平居已不能运掉则缓急将何以使之扞患而却敌哉兵犹博也本多乃胜善博者徐出以待时今乃罄所有以事一掷其可乎此未尽善者四也臣於陛辞日窃闻麻制以韩世忠岳飞为京东西路宣抚使圣意可谓断矣然兵家之事行诡道鸷鸟之搏必戢其翼猛兽之攫必匿其爪藏杀机也今者不得已而用兵不知欲敌人之知乎欲敌人之不知乎欲敌人之为备乎欲敌人之不为备乎事固有先声而後实者然既有其实乃可先其声昔韩信虏魏王禽夏说不旬朝破赵二十万衆诛成安君於泜水上故能发一乘之使奉咫尺之书使燕齐从风而靡有其实故也今吾军初未尝有其实而遽以先声临之其可乎此未尽善者五也何谓宜预备者三中军既行宿卫单弱肘腋之变不可不虞此行在不可不预备者一也江南东西荆湖南北兵将尽行屯戍鲜有敌人或有乘间捣虚之作则将何以待之此上流不可不预备者二也海道去京东不远乘风而来一日千里苏秀明越全无水军则下流不可不预备者三也何谓当善後者二夫胜负兵家常势有胜必有负胜之非难持胜为难而况於负哉藉使王师克捷能复京东西地则当屯以何兵守以何将金人来援当何以待之两路之民怀戴宋之心有来苏之望久矣既得其地而吾之力足以覆护之此当善後者一也万一得其地而不能守得其民而不能保两路生灵虚就屠戮而使两河之民絶望於本朝则恢复之功难为力矣昔宋武帝长驱以复关中而卒不能有惟其善後之策不先定故也善奕者其置子之意乃在於数十着之间岂临事而後虑哉胜犹於此则所以图为善後之计者宜何如哉此当善

後者二也陛下天纵英武念二圣於漠北出自睿断图此武功事势既然必不得已臣愿献愚计军政既修莫若小试勒兵於山东夫山东天下之陆海也贼豫赖以以为根本之地与吾淮南壤土相接河渠相通土马易行粮饷易致宜令韩世忠率师先临继遣刘光世为之策应张浚分兵以防江岳飞重兵且屯襄阳勿轻动以牵制其师使不得应援募敢死将士由海道以捣其腹心择要害之地控扼以断金人来援之路京东郡县必有起而应者抚绥料理务尽其术京东可保乃可徐事京西此今日之至计也臣蒙陛下面谕以十数年来训练士卒今方可用臣退而询之士大夫咸以为然区区愚虑尚有可疑者以谓吾之士卒初未尝与大敌力战则欲保其临敌用命无奔溃之虞犹未易也金百链则为精金卒百战则为精卒故臣欲试之山东者使战得一胜则士气百倍乘破竹之势所向无前矣惟陛下财幸昔周宣中兴北伐则夷獫狁南征则平淮夷宜乎意气勇锐飏举电发然常武之序曰有常德以立武事因以为戒然则知有此武功未尝不以诚一之德为主也夫其进锐者其退速物理之自然兵威方强志虑太锐一有挫衄遽自退屈岂可谓之常德哉高祖与项籍战其丧师跳身者屡矣然卒以此胜坚忍而有常故也昔魏相之告宣帝曰救乱诛暴谓之义兵兵义者王敌加於己不得已而起者谓之应兵兵应者胜争恨小故不忍愤怒者谓之忿兵兵忿者败利人土地货宝者谓之贪兵兵贪者破恃国家之大矜民人之衆欲见威於敌者谓之骄兵兵骄者灭相之论可谓切当夫兵以义起以应动而不忿不贪不骄是谓常德此帝王之所当尽心也伏惟陛下留神幸察臣昨在靖康中与闻国论当是时岂不愿和但欲和得其是则两国生灵皆赖其利今日朝廷之议臣虽不得而与然闻之士大夫亦颇得其梗槩矣臣素以治兵为然岂不愿战但亦欲战得其是则中兴之业自兹以始夫天下士民凡有知识者孰不愿陛下以战则胜以守则固而早致中兴之功独议和者不然袖手旁观惟觐一有差失以售其说臣愿陛下以持重用兵以多筹取胜而无为议和者之所幸天下不胜幸甚取进止

贴黄

臣窃谓朝廷用兵有横议沮师者罪固不可赦至於陈献利害欲弥缝阙失助成大功则宜特留圣意曲赐嘉纳庶几有智虑者皆愿自竭有补国事伏望圣察

进道君御画并渊圣所赐玉带奏状

具位臣李某

道君太上皇帝御画二轴

渊圣皇帝所赐玉束带一条

右谨用匣二只盛贮黄绫袋复封全随状差人齎诣通进司投进缴纳御府伏望圣慈特赐矜允谨录奏闻伏候勅旨

进道君御画及渊圣所赐玉带劄子

臣近蒙圣恩召赴行在奏事特於内殿引对臣窃见陛下思慕两宫欲见之於羹墙臣子之情不胜激切尝以道君皇帝所赐御笔一轴玉带一条牙筒一面缴纳御前庶几真蹟故物仰经睿览少慰陛下孝思之万一今者又以所藏道君皇帝御画二轴渊圣皇帝所赐排方玉束带一条具奏诣通进司投进外窃念臣当靖康间蒙两宫知遇异於等伦所得赐物什袭以藏常恐失坠今得复归御府不至流落人间莫大之幸取进止

梁谿集卷八十四

卷八十五

钦定四库全书

梁谿集卷八十五 宋 李纲 撰表劄奏议四十七

谢到任表 亲笔赈济诏书

遵禀赈济奏状 谢赐亲笔赈济诏书表乞於户帖钱内支十万贯充营田本钱奏状乞於江东浙西州军支米三万硕应付本路赈济奏状

乞蠲免灾伤路分人户四年积欠劄子

乞差将兵讨捕?吉盗贼及存留李山弹压奏状

乞将丘贇下存留洪州军兵充亲兵奏状乞依吕颐浩例於隣路拨米赈济奏状

谢到任表

臣某言伏奉告命除臣江南西路安抚制置大使兼营田大使马步军都总管兼知洪州军州事兼管内劝农使臣已於今月二十三日到本路交割职事讫者起膺分阃滥当江表之十连入覲行朝误蒙昼日之三接只奉丁宁之训勅敢辞疲役之驱驰已见吏民布宣德意【中谢】伏念臣驽骀陋质樗栌散材叨考慎於风云感会之初迄无善效备使令於盗贼披猖之际颇着微劳甘心流落者十年徧尝艰危者万状兹蒙起废来从寂寞之滨更许造庭赐以清燕之对抚劳优渥宠锡便蕃凡铄金销骨之谤诬皆见覲从风而散释迫承临遣深轸皇慈乃眷大江之西近接长淮之境屡更兵火继以旱灾流移衆而田莱多荒科敛烦而财力耗屈欲御寇则军马单弱将养兵则帑藏空虚疆场弗宁盗贼未殄付以扞患御灾之政宜得通方适变之才顾臣何人乃预兹选此盖伏遇皇帝陛下日绩盛德天覆羣生既谅臣之忠诚故委之以要害之地欲试臣以民事乃任之以艰窘之时而臣命蹇数奇材疎志广终始维持於一意俯仰无愧於此心使足食及兵而可为尽瘁敢忘於夙夜倘求牧与刍而不得乞骸愿返於山林

亲笔赈济诏书

朕以诸路去岁旱灾深虑细民艰食而州县府库空虚未知拯救之术慨然在念夙夜不忘惟吾帅守监司委付一路分朕忧顾者也必不忍坐视不恤其協力悉心多方劝诱积米之家俾其食用之余尽以出粜尚庶几济兹数月流殍之苦务修乃职以副朕意付李纲

遵禀赈济奏状

右臣今月二十二日准御前金字牌降到亲笔诏书付臣令劝诱积米之家俾其食用之余尽数出粜以济流殍之苦仰见圣慈矜悯元元欲济其艰危者如此其至臣已遵禀睿训措置劝诱出榜置历差本司属官分诣诸州委知通县官召上户有积米之家使其自陈自指挥到日见有积米之数许其乞留若干食用其余依市价量减尽数出粜外臣契勘积米之家减价出粜止是可济有钱籴米之人其流移之民无钱籴米官中见行赈给米数不多前去秋成尚远难以接济臣已一面措置多方劝诱上户情愿纳钱米入官以助赈济者许其陈乞官告度牒之类折还价直候见数目容臣续具奏陈乞赐支降给还庶几饥民不致乏食实为利便

谢赐亲笔赈济诏书表

臣某言伏蒙圣恩以本路旱灾之後小民阙食特降亲笔诏书付臣劝诱积米之家出粜接济食用以恤流殍之苦臣已遵依睿训措置施行者倬然云汉之章光临下土霈为雨露之泽惠浹遐方滥分千里之忧幸拜十行之赐【中谢】窃以抑高举下者天之道博施济众者仁之方观易象有裒多益寡之文论政术有知予为取之宝顾兹江右星分翼轸之躔偶值岁凶民乏馥粮之积竭仓廩之储以赈之而不足劝停蓄之家而利之则有余深軫皇慈特颁宸翰饥民衔德而已有饱意富室闻风而去其吝心岂惟流殍之余得全性命将见精诚之格复致和平此盖伏遇皇帝陛下所宝者慈以民为贵悯赤子之艱厄降玉音之丁宁而臣滥总帅权幸承德意雨阳时若方厥壤之可游稼穡繁滋欣有秋之在望乞於户帖钱内支十万贯充营田本钱奏状

右臣伏蒙圣慈特降告命除臣本路营田大使臣近因进对已尝具劄子进呈营田事件已蒙朝廷降付都督行府措置外臣窃惟屯田之策尤便於艰难用兵之际其用力虽劳而见功博故汉赵充国行於金城魏枣只行於许下晋杜预行於襄阳皆能坐制敌人以收成功今日欲建恢复之策营田诚不可缓也臣顷者承乏荆湖广南宣抚使日於潭州管下剗刷抛荒田土得数万亩招降到步谅等人兵除放散外择强壮者刺手为军得万三千余人又於羣盗军中得牛数百头方欲措置营田为上流控扼久远之计而臣以人言罢去其事遂寝至今以为恨今者朝廷讲明利害诸路并置营田使推行其法诚为得计然臣窃谓良农治田必先有本乃可图利今江西一路累经兵火之後抛弃絶户荒田顷亩不可胜数皆系膏腴尽为荆棘之地臣除已行下州县剗刷应于抛荒田土所有召募人户开垦辟收买牛具借贷粮种所费不貲自非朝廷宽给钱本何以充济伏望圣慈特降睿旨旋赐本钱十万贯充营田之本先试行於洪州管内候稍就绪渐令他郡仿倣施行将来见效组计本息以本还朝廷以息充本路养兵之费遇有羨余亦可补助国用庶几实利不为虚文仰副陛下委任之意

小贴子

臣所乞营田钱本如蒙圣慈矜允乞於榷货务或本路户帖钱内拨见钱十万贯如官告度牒之类决难转变无补於事其余合条陈事件候朝廷降到钱本日许臣画一条具申请伏乞圣察

乞於江东浙西路州军支米三万石应付本路赈济奏状

右臣准尚书省劄子新江南西路安抚制置大使兼营田大使兼知洪州李某劄子云云勘会已降指挥於饶州上供米内取拨一万石及於本路上供米内更支拨一万石应副赈济外二月二十九日三省同奉圣旨令将抚州建昌军糴到米取拨随宜赈济劄送臣照会即时行下逐处官司遵禀圣旨指挥施行据抚州建昌军申安抚司分拨到官告度牒糴赈济米除节次支拨外见在数目不多其朝廷元降指挥於饶州上供米内取拨一万石应副赈济据饶州公文称本州并无见在米斛即不曾支拨到应副赈济窃缘本路旱灾之余民户乏食累奉诏旨及朝廷指挥督责赈济今来抚州建昌军见在数目不多饶州上供米又不曾拨到委是赈济急阙官吏坐视无所措手伏望圣慈特降指挥於江南东路及两浙西路州军朝廷见有米斛桩管去处支拨米三万石令本路差官及自差人船前去搬取仍乞严降指挥诸路官司不得占吝候本司差到官吏人船日即时交量应副庶几下户及流移饥民有以接济仰副陛下加惠元元之意

乞蠲免灾伤路分人户四年积欠劄子

臣已到江西本路界首交割职事延见父老询问民间疾苦皆云去岁旱伤之後谷价翔踊民间乏食第三等户止是食粥第四第五等户多是掘草根而食官中见催绍兴四年积欠无从可出臣契勘下户积欠有一二十户合纳一石者虽数目不多然民无从出复有公吏须索之扰情实可悯伏望圣慈特降睿旨将灾伤路分第三等已下人户绍兴四年积欠特与蠲免或权行倚阁候秋成日随苗送纳庶几仰副陛下加惠元元之意乞差兵将讨捕?吉盗贼及存留李山弹压奏状

右臣据徽猷阁直学士左朝散大夫充江南西路安抚制置使兼马步军都总管胡世将申统领官丘贇人马本司已依奉圣旨发遣权听岳招讨前去使唤去讫今据吉州申据永新县申有凶贼郭少二等啸聚三百余人在安福县陈会山及有贺小大贺小二等结聚三百余人在永新县斩山往来两县杀人虏劫作过并龙泉县申有贼人周花八等结集二百余人在地名旧塘及永新县界官北等处杀人放火并永丰县申有谏花三等二百余人在乡放火虏劫及庐陵县申被永新县会山周花八手下残党郭二郭四等计一百余人入管界地名梅花烧劫杀人作过乞差军马前来讨捕防遏臣契勘近因进对具劄子乞依元降安抚大使画一指挥差兵二万人内先差一半付本路应副使唤蒙朝廷关送都督行府至今未奉指挥臣只将带到朝廷先差付本路统制官申世景一项军马人数不多今据前件申报吉州永新县等处盗贼作过六头项已及一千余人委是阙兵分头前去措置讨捕旱岁饥民易为啸聚若不乘时扑灭渐致滋蔓决须猖獗後来难以殄灭伏望圣慈特降睿旨日下於近便处先次摘那差拨兵将二千人付臣相兼使唤庶几不致误事

小贴子

如蒙圣慈矜允乞用金字牌降下圣旨指挥庶使早得被受

又

契勘?州管下依旧盗贼出没作过本处只有岳飞下统制官李山军兵一千余人在彼讨捕今准都督行府指挥许令岳飞抽回窃虑官兵起发之後凶徒愈更啸聚与吉州群贼相应猝难剿除伏望圣慈特降睿旨且存留李山在?州弹压措置候朝廷别差到军马即令起发前去

乞将丘贊下存留洪州军兵充亲兵奏状

勘会本司旧管亲兵两军计八百余人马七十余匹内一项军兵三百余人马五十余疋权拨隶统领官丘贊军部辖袞同教閱并有一项统领官高道所管五百人马二十余疋於去年二个月内系岳飞权将带前去湖南捉杀後來事毕更不曾发还本司今来丘贊一军近奉圣旨指挥拨付岳飞使唤除见存留军兵三百人在洪州外自余人马并老小尽数将带前去虽蒙都督行府指挥令存留五百人其二百人亦未曾差到即目帅司并无亲兵使唤伏望圣慈详酌特降睿旨只乞将上项丘贊下存留军兵三百人依旧还本司作亲兵使唤仍乞下岳飞发还逐人老小前来洪州安泊

小贴子

契勘本路前任安抚大使除帅司自管亲兵外有差被枢密院军兵一百五十余人今来本司并无亲兵伏乞圣察

乞依吕颐浩例於隣路拨米賑济奏状

右臣近为本路去岁旱灾所养饥流民至广仓廩无储寻具奏闻乞於建康府宣池等州常平义仓米内通融借拨米斛候将来秋成拨还及乞将抚州建昌军官告度牒余到米一万四千余石随宜拨充诸州賑济续准尚书省劄子勘会已降指挥於饶州上供米内拨取一万石及於本路上供米内更支拨一万石应副外二月二十九日三省同奉圣旨令将抚州建昌军余到米取拨随宜賑济臣今取会到饶州状称本州上供米斛除灾伤减放及已支使外别无见在数目并抚州建昌军所余米又已科拨付诸州虽有见在数目不多臣已再具奏闻乞於江东两浙路丰熟州军见桩管米内支拨三万石应副未奉回降指挥伏见湖南安抚大使吕颐浩近蒙朝廷於隣路广西州军支米三万石应副窃缘本路旱伤阙乏与湖南路事体一同今来若不申告朝廷支降委是无可賑给下户不得趁时耕种将来秋成更无指準伏望圣慈详酌特降睿旨许依吕颐浩之例於隣路江东或两浙州军支拨米三万石许本路差雇人船前去般取付臣科拨賑给庶几实惠可及下户将来岁事有望不致阙误

梁谿集卷八十五

卷八十六

钦定四库全书

梁谿集卷八十六 宋 李纲 撰表劄奏议四十八

画一措置赈济历并缴奏状

乞将贍给丘贇军钱粮充申世景支遣奏状乞将本路灾伤州县合起折帛钱依条限催纳奏状

乞催起岳飞军马劄子

画一措置赈济历并缴奏状

契勘本路去岁旱灾尤甚今正当新陈不接之时米价翔踊细民阙食下户流移无本耕种上軫圣虑屡降德音督责监司守令广行赈济今月二十二日被受御笔诏书节文令帅守监司多方劝诱积米之家以其食用之余尽数出粜庶几济此流殍数月之苦当日又准尚书省劄子备奉圣旨指挥节文停蓄之家尚敢不从劝诱依前闭粜量度轻重一面断遣除已备録全文印榜晓示外今具遵依圣训措置劝诱下项

一本路逐州军使司各置印历一道差官分诣委自知通行下诸县每县州给印历一道备録使司指挥差官分诣监督令佐分定乡分躬亲就乡询究的实有米人户使其自陈截自指挥到日见有积米之数许乞存留若干食用外其余尽数依市价量减施行出粜责令隣保对定着实有米人户於历上亲书着字所委官限五日周遍赴县攒数令佐就历同书结罪次日缴纳本州本州总诸县之数抄上使司给到文历内除认数不多或认数多见得已是情愿出粜之人更不须召赴本州外将自余有米数多责认未定之人仰县令将带同赴本州知通限当日审实更加劝诱合存合粜数目如有认粜米数三千石以上依得二月八日检会到绍兴元年五月十四日该补官资之人即取县官保状当官先次给与空头付身候粜足日赴州书填其以次数多之人粜及二千五百石与补进勇副尉二千石与补守阙进勇副尉一千五百石与免将来差科三次一千石与免将来差科二次五百石与免将来差科一次如敢吝惜不肯出粜拒抗官司之人审究见在着实盛顿米谷去处盘量见数具情节申取使司指挥当议酌情断遣枷项号令

一州县已劝诱到上户及有米之家出粜米数每升依逐处市价减十五文出粜遇市价减落再令量减将城郭乡村之家给历每口不过一升分定出粜人户乏食之家齎历或五日或十日一次前去粜米其有米之家收钱粜米并书历着字为据不即时出粜许粜米人赴官申陈候粜絶日计数申官司取历照验结算都数如有粜余不实诸般欺弊搔扰并委知通县令檢察施行

一今来劝诱上户及积米之家减价出粃止是可济有钱粃米之人其流移饥民与下户无钱粃米之人官中见行赈济支过米数已多前去秋成尚远难以接济今措置委自知通县令多方劝诱上户及有积米之家如有情愿纳钱米入官以助赈济者许以其入纳之数陈乞官告度牒之类依价折还一户所纳价直不足即许衆户结甲同共细计陈情其入纳数目浩漭之人当议特行奏请优与推恩亦仰愿入纳人户於历上亲书着字为据其入纳米即於出粃米内除豁施行仍依绍兴五年十二月十日本路转运司已得劝诱人纳指挥许候受付身讫作官户免身丁等事

一今来劝诱止系上户有物力及停蓄积米之家其中下户有些小食用米谷即不得一例前去巡门抄割以至搔扰

一县官亲诣诸乡询究有米之家责令隣保对定合存留食用并合出粃之数务要不扰取见的确若有失实或因缘为奸稍涉违戾作弊并从诸司按察移文本司备申朝廷先次差替取勘施行

一县官亲诣乡村检察所带人从不得过十人每人日支米二升钱五十文省不得容纵作过并差公人弓手下乡因缘搔扰使司除已差人密行体探外委自知通觉察申举公吏并行决配

一劝诱历到限十日劝谕了当其地远户多县分许量展日限摺角实封专差人齎诣使司听候指挥其给历粃米即仰一面措置施行

録白画一缴奏状

右臣今月二十二日准御前金字牌降到亲笔手诏及同日又准金字牌降到尚书省劄子指挥劝诱积米之家出粃米斛接济饥贫下户等事臣除已遵禀圣旨同转运司官商议措置备録印造文牒及措置到劝诱画一事件各置印历一道专差人齎付洪?等一十一州军收管差委强干官分下诸县逐一依应多方劝诱务要实惠及民接济下户仍令多印文牒散给乡村晓示去讫臣窃虑逐州当职官不切遵禀奉行灭裂亦已分差官前去诸州逐一检察如有违戾去处别具因依奏劾施行外今録白措置劝诱画一事件一本在前

小贴子

臣契勘今来劝诱减价出粃米斛止是可济有钱粃米之人其流移饥民无钱粃米官中见行收养见在米数不多前去秋成尚远难以接济及下户无本可以种田之人官中亦无钱米可以借贷臣已行措置劝诱上户有物力之家如有情愿纳钱米入官以助赈济借贷者许以其入纳之数陈乞官告度牒之类依价折还若入纳数目浩漭之人别行奏乞优与推恩外伏望圣慈许臣候见得有人入纳之数逐旋具合折还官告度牒等申奏朝廷乞行给降仍乞依绍兴五年十二月十日本路转运司已得劝诱人纳指挥许候受付身讫作官户免身丁等事庶几

易於激劝饥民不至乏食下户可以趁时耕作将来秋成可望不误岁计

臣契勘劝诱粳米依先降指挥及三千石已上各有补授名目外其不及三千石之数即未有明文窃虑无以激劝臣已相度一面行下诸州劝诱如粳及二千五百石与补进勇副尉一千五百石与免将来差科三次一千石与免差科两次五百石与免差科一次外欲乞候见得有出粳及上项数目之人除免差科从本司给据行下州县施行外其补进勇副尉及守阙进勇副尉许臣一面出给公据具姓名奏朝廷乞给降付身伏望圣慈特降睿旨施行

乞将贍给丘贇军钱粮充申世景支遣奏状

契勘近蒙朝廷差申世景一军前来洪州驻劄权听本司节制使唤所有合用钱粮臣已一面牒漕司契勘将元养丘贇军钱粮窠名应副及具因依奏闻乞下转运司桩拨去讫近又承漕司回文行下洪州桩办支給今月初六日续准尚书省劄子节文为承都督行府关欲将丘贇一军合用钱粮内米依数桩留充申世景支遣外其合用钱数令江西帅司依旧应副津发前去岳飞军前三月二十二日奉圣旨依其申世景合用钱令户部科拨申尚书省契勘申世景人马已到洪州见用贍给丘贇钱粮窠名日旋收桩支給尚自不足所有本路诸州应诸色上供经制折帛系省不系省等钱一切尽系漕司拘桩指定科拨充岳飞大军等支用除外别无支使不尽窠名宽剩钱物兼本司所卖钞引内除广盐钞已住罢及矾引出卖不行外虽茶引稍有客人入纳节次准朝廷支降应副转运提点等司即日犹有积压下八万余贯未支窃虑户部不见得本路别无空闲名色钱物科拨虚数行下无可取拨有误军食伏望圣慈详酌臣前奏及今状事理特降睿旨只乞将元贍丘贇军钱充申世景支遣其丘贇合用钱数却乞将元应副申世景钱从朝廷支降径发轻贍往岳飞军前庶几不致防阙

乞将本路灾伤州县合起折帛钱依条限催纳奏状

右臣今月初四日到本任交割职事初六日承都转运司公文准尚书省劄子节文勘会本路合发折帛钱元责限三月桩足系指拟应副大军欲督责两漕臣拘催日下并要起发尽绝奉圣旨依仍展十日检准绍兴勅诸税租日限江南东西路夏料五月十五日起催八月十五日纳毕又勅诸人户输纳有期限而官司辄促其常限者徒一年因至逃亡加一等洪州於去年十二月九日准尚书省劄子勘会江西合纳夏税及和买物帛每岁例系量度分数折纳价钱其绍兴六年分人户折纳之数未曾立定折纳之数理合预行措置以便人户输纳十二月八日奉圣旨除准衣并丝更不折钱外其余紬绢绵并以十分为率绢二分紬四分绵三分仰赵子湑预先依此分明开坐行下所部州县候来年合入输纳物帛条限即依今来立定名色分数折纳见钱仍仰从第四等已下人户折纳如不足即通第三等人户纳钱其合纳本色物帛亦仰依限催理送纳起发前去郢州今年二月初三日本州承转运司公文准诸路军事都督行府劄子节文今岁合起折帛钱限三月已前收桩数足计置发往郢州下卸今来又承前件三月二十九日指挥合至四月初十日限足窃缘被受指挥已四月初八日其折帛钱虽已行下催促并未纳到必致有违朝限臣契勘本路人户合纳今年夏税和买物帛朝廷元降指挥立定分数从第四等已下折纳价钱依条限催理系是优恤下户以便输纳今来催纳限至四

月十日了毕正是蚕麦未熟新陈不交之时下户何由了纳况本路所管诸州去年亢旱尤甚洪吉筠袁江抚州兴国临江军皆是灾伤至重去处所有第四等已下人户多是贫困官中见行抄割给米赈济之人何缘更有积蓄非时预行输纳若复州县逐急措置先从上户有力之家预催折纳见钱即将来合输本色之数却当於第四等已下人户催科显见重困必至流移所害非细臣窃读近降亲笔诏书令劝诱积米之家出粜以济流殍之苦加惠元元诚意惻怛今来所降指挥如此何以取信於民伏望圣慈特降睿旨将本路灾伤州县合起折帛钱依条限催纳其不系灾伤去处自依今来立限指挥庶几下户得被实惠不致逃亡臣已行下灾伤州县更切听候朝廷指挥外见不妨本职待罪

乞催起岳飞军马劄子

臣访闻岳飞已丁母忧飞孝於其亲将来朝廷起复辞免往来必费日月伏乞早降处分兼诸路钱粮多起发往郢州交卸势须先屯重兵及措置仓库安顿去处又自汉沔至郢州千有余里与伪境相隣须有军马防护粮道方可无虞臣仰荷眷知苟有所闻不敢不奏伏望圣慈特降睿旨速赐施行

梁谿集卷八十六

卷八十七

钦定四库全书

梁谿集卷八十七 宋 李纲 撰表劄奏议四十九

措置招军画一奏状 谢赐银合茶药表谢还赐玉带牙筒等表

乞兵於舒蕲黄州驻劄奏状

措置招军画一奏状

准枢密院劄子诸路军事都督行府关枢密院关内降付下新江南西路安抚制置大使李某劄子奏臣契勘朝廷昨降江南西路安抚制置大使画一指挥差兵二万人绍兴三年分有兵一万八千人後來节次拨隶都督府韩世忠岳飞等军四年分有兵一万五百人五年二月内指挥除存留丘贊一军外自余军马并拨付岳飞今来本司所管丘贊军马不满二千人马一百余疋近又拨随岳飞前去使唤虽蒙朝廷却差申世景军马於本路驻劄才千余人马数十疋窃见江西路分控扼上游与淮南相接道里不远昨来金人贼马渡江首犯洪抚等州李成马进等亦破江州侵犯洪筠盖缘兵力单弱不能扞御朝廷灼见利害因建大使付以重兵使任一路之责累年脔削存留仅及十分之一又皆疲弱之兵缓急不可倚仗万一强敌侵陵江上不知何以使之镇抚要害之地况今?吉盗贼累年出没作过为患数路讨荡未平非有可用军马卒难殄灭臣未敢乞依元降画一指挥差拨数足若蒙朝廷先次差拨一半使及万人庶使稍成军制可以倚仗伏望圣慈特降睿旨选差近上统制官将带所部军马赴本路驻劄听臣节制与申世景军马通计人数其余乞许臣踏逐申朝廷抽差庶几训练习服军声稍振可以镇压一路折冲御侮少副陛下委任之意右关送诸路军事都督行府右勘会大兵见今屯驻江淮应援措置防扞欲将本路见阙禁军令帅司措置招填阙额除本路将兵自合全将专听帅司差拨外据本路不系将兵见管人存留一半本处使唤余一半令大使司选差逐州军兵官一员别作一项训练遇春秋从帅司勾抽本司按閱若遇缓急合要人兵使唤即行勾抽与已差申世景官兵相兼使唤如赴帅司按閱及缓急差拨其军兵并依例分擘衆粮外每日添支食钱五十文候将来防秋日即相度调发军马前去本路已上所差禁军并系本路人额其钱粮自合本路应副合用军器令帅司一面措置造作支用如有合行事件条具申取朝廷指挥今关送枢密院指挥右劄送本司依都督行府关到事理施行本司契勘昨置安抚制置大使降到画一指挥差兵二万人系在本路系将不系将兵之外今来所乞二万人一半人数蒙朝廷降到都督行府指挥候将来防秋日调发前去却令措置招填本路系禁军阙额今依应开具阙额人数并措置招填事件下项

一系将兵一十指挥计五千一百人已有三千九百

三十三人见阙一千一百六十七人

潯州八指挥见管三千三百六人见阙一千四十四人

吉州两指挥见管八百九十七人见阙一百二十三人

已上将兵承今来指挥令帅司措置招填阙额自合全将专听帅司差拨使唤欲乞令逐州并本将限一季据阙额招填如招填不足即从本司措置量增例物招填讫发付本将填阙

一不系将兵共二十一指挥计七千五百四十一人已有三千三百三十五人见阙四千二百六人

洪州七指挥见管六百一十七人见阙二千三十三人

江州三指挥见管四百六十四人见阙五百三十三人

抚州两指挥见管七百四十一人见阙一百七十九人

筠州一指挥见管二百五人见阙一百五人袁州一指挥见管三百一人见阙九人

临江两指挥见管三百五人见阙三百六十二人建昌军两指挥见管二百六十八人见阙三百九十九人

兴国军两指挥见管一百八十四人见阙五百六人

南安军一指挥见管二百五十人见阙六十人已上不系将兵承今来朝廷指挥令帅司措置招填阙额存留一半本处使唤余一半令本司别作一项训练勾抽使唤欲乞令逐州限一季据阙额招填如招填不足即从本司措置量增例物招填讫发赴本军填阙

一契勘本路自来招填禁军每名例物钱三贯文绢一疋今来物价高贵窃虑无人肯就招填今欲将诸州阙额人数每名增钱一贯文作四贯又绢一疋今纽计招填系将不系将共阙五千三百七十三人合用钱绢下项

绢五千三百七十三疋

契勘转运司见有本路上供绢一万七千余疋於洪州军资库桩管欲乞於数内截拨五千二百七十三疋桩充前项招军例物支用

钱二万一千四百九十二贯文

契勘本路诸州各有总制司钱与应副月桩大军钱粮窠名不妨碍欲乞通融一路从本司取

拨充前项招军例物支用

一契勘本路合招填阙额禁军五千三百七十三人

今约合用钱粮下项

每一月合用

粮米六千八百七十七石六升

料钱一千五百六十八贯文

衣赐

春衣

绢一万七百四十六疋

紬八百四十疋

布三千一百一疋二丈

随衣钱七千二百一十一贯六百四十一文

冬衣

绢一万一千四百六十疋三丈

紬二千六百八十疋二丈

布八百四十一疋

绵六万五千一百九十一两

随衣钱五千九百九十五贯一百九十三文

一岁通计合用

粮米八万二千五百二十四石七斗二升料钱一万八千八百一十六贯文

絹二万二千二百六疋三丈

紬三千五百二十七疋二丈

布三千九百四十二疋二丈

绵六万五千一百九十一两

随衣钱一万三千二百六贯八百三十四文已上合用钱粮等数目浩瀚缘诸州所入财赋有限并系转运司括责扣拨令认定月桩应副岳飞等大军支遣除外别无赢余窠名钱物今承朝廷指挥招填阙额禁军并系本路人额其钱粮自合本路应副若非特降指挥本路漕司通融应副即逐州既无可指拟赡养必不能遵奉招填额足欲乞候招到人数目令转运司据招填到人数应副

一契勘本路帅司以前自造到器甲昨系本司统制官祁超等军马关借披带使用其逐项官兵节次抽摘赴都督府岳飞军前尽数将带前去见今阙乏今承朝廷指挥合用军器令帅司一面措置造作使用如有合行事件具条申取朝廷指挥本司见开坐名件行下诸州令依应造作外所有合用钱物欲乞朝廷特降新法度牒二百道应副支用候将来支絶日再行申请

谢赐银合茶药表

臣某言伏蒙圣慈特降中使传宣抚问仍赐银合茶药臣已望阙谢恩只受讫者只奉明纶起临江渚远迂肤使来自日边丁宁训劳之辞稠叠宠绥之礼王灵所逮士论增荣【中谢】伏念臣顷以衰颓久安闲散误应方面之寄适当旱暵之余仓廩无储士多饥色潢池有盗民未奠居自慙报效之迟敢意抚存之厚灵芽贡於北苑珍剂出於尚方并沐匪颁式昭殊獎此盖伏遇皇帝陛下明并日月德合乾坤悯臣下之勤劳极朝廷之礼貌致兹异数滥及非材臣敢不勉自激昂少图报称涤除烦渴期有慰於人心蠲治沈痾益务求於民瘼

谢还赐玉带牙笏等表

臣某言伏蒙圣慈以臣进到太上皇帝所赐玉带玉束带牙笏一面御画二轴特降睿旨还赐臣已望阙谢恩只受讫者抗章有请愿还御府之珍被旨弗俞复拜匪颁之宠赐虽云旧命实维新【中谢】伏念臣遭遇休辰尝与尚方之珍赐奔驰一纪惟知什袭以秘藏奉以周旋不敢失坠荷明恩而入觐蒙清问之下询宝气腾辉期复归於天上物华得地庶不落於人间伏蒙皇帝陛下体圣与仁宝慈及俭眷怜迂拙尝调护於两宫宠贲衰迟特便蕃於三锡仍颁旧物庸示新恩而臣晚景无堪难当异数壮心未已愿效微劳粹质温纯自慙比德之非称古制正直誓将击贼以奚难臣无任

乞兵於舒蕲黄州驻劄奏状

勘会淮西蕲黄三州昨奉圣旨听本司节制其逐州系在江西大江之北各与伪齐地分邻接正是紧要重地先蒙朝廷除岳飞兼节制逐州缓急有以扞御本司近为岳飞已奉圣旨改授湖北京西路宣抚副使即上项三州并本路沿江兴国军江州并未有措置堤备窃虑贼情不测别生窥伺遂具状申朝廷乞速降睿旨措置施行续准都督行府枢密院劄子备奉圣旨令岳飞依旧兼行节制蕲黄三州本司照对除蕲黄州系岳飞兼行节制外所有舒州元系淮西宣抚使司地分逐州即目并无军马防托缘防秋在近唯江西沿江一带接连舒蕲黄等州全然未有兵备今来岳飞大军将行起发往襄阳府刘光世大军将行起发往庐州即舒蕲黄州愈更空虚若不预行措置深虑外寇乘间侵軼缓急无可支梧所系利害非轻欲望圣慈详酌特降睿旨下岳飞分拨军马四千人差近上统制官於蕲黄两州驻劄刘光世分拨二千人差近上统制官於舒州驻劄将来防秋有警并许听臣节制使唤庶几临时不致误事

小贴子

臣契勘黄州对江南岸系鄂州武昌县接连江西兴国军界正是本路控扼要害去处其武昌系属湖北地分每遇防秋蒙朝廷降指挥专委湖北帅臣固守欲乞朝廷更赐指挥劄下湖北路帅司预行措置武昌沿江一带水陆备御之计庶几缓急不失事机

梁谿集卷八十七

卷八十八

钦定四库全书

梁谿集卷八十八 宋 李纲 撰表劄奏议五十

乞移总管?州措置捉杀盗贼奏状

乞下都督行府催捉遣兵奏状

论赈济劄子 乞差军马劄子

乞宫观奏状 乞宫观劄子

催差军马劄子 乞截留王彦军马奏状

乞移总管?州措置捉杀盗贼奏状

勘会本路?吉州管下民俗犷悍平日狃习为盗前後累蒙朝廷并本司遣发军马节次招补过贼徒不少尚有余党时复啸聚出没不常缘?吉州盗贼皆系土居顽恶不逞之人即与溃兵游寇事体不同每有窃发动以千计所属巡尉势力不加便敢轻犯州县肆行猖獗若闻重兵到来即复远遁潜伏山谷官兵才退依旧作过今来若非专差兵将於逐州阅习训练就近措置卒难殄灭照对本路所管东西第六将兵系在?吉州住营截日见管三千八百余人及逐州各有土豪可以驾御使唤本路有马步军副总管康随合通管一路系将不系将军兵可以专委前件职事兼本官见奉都督行府指挥差措置?吉州界盗贼本司今相度欲权暂移副总管康随前去驻劄专切提督两州兵将依时训练教阅武艺修治器甲及招填阙额人兵务要精熟足备仍就近取会见作过盗贼头项如承关报即一面斟量调发措置招捕及申报本司其所至巡尉并将兵并听节制使唤庶几凶顽之徒知所畏惮渐可消弭本司除已一面劄下随依应起发前去外须至奏闻者

乞下都督行府催捉遣兵奏状

契勘本司近为节次承据提刑司及?吉州南安临江军等处申报管下见有诸头项贼徒结集作过乞兵收捕本司已逐急差亲兵权统领王彦将带所部三百人随逐副总管康随前去措置招捕?吉州南安军未获贼徒及分遣申世景官兵二百人令将官王胜部押前去临江军新淦县措置邹乌八等贼徒及於本军差拨将官马仙押三百人往吉州措置管下见作过盗贼外缘本司见存军兵大段数少今来作过贼火头项不一委是阙兵分拨前去捉杀已节次开具贼首姓名申奏朝廷及都督行府乞於近便处摘那差拨兵将三二千人前来相兼使唤续准都督行府四月二十四日关勘会行府见议遣兵前去至今未蒙差到今又据逐处申报有

贼徒结集作过缘今来正当栽插收割禾稻之际窃虑诸处盗贼轻视帅司官兵单弱恣行劫掠使良民不安居有失岁计须至奏闻者 右谨件如前欲望圣慈详酌本司累奏并今状事理速降睿旨下都督府催促摘那兵将二三千人前来本司应副相兼使唤庶几防秋已前乘早扑灭免致滋蔓难制

小贴子

契勘?州界见有曾六冠曾大喉黄锹钻曾九唐四谢鬼七李洪刘宣吴添廖一长刘十二谭十二萧破洞谢大小鬼青唐贼包十九等并烧劫龙南县等贼吉州界有曾太保郭少二尹使者周花二谌花三易十二罗大萧安世等袁州界有王权苏军九等南安军有何少七吴守传李收李回等临江军新淦县界邹乌八等除谢鬼七已遁邹乌八王权已杀获外所有上件未获贼徒姓名已系前状开具奏闻去讫伏乞睿照

论赈济劄子

臣昨者入覲伏蒙圣慈宣谕江西旱灾饥民阙食使之推行赈济及至境上又奉亲笔诏书令劝诱积米之家以其食用之余尽数出粜以济流殍之苦臣仰体天意敢不夙夜自竭以奉诏旨自到本路与监司协力行移州县凡有流徙阙食之民通融斛斗尽令给米收养共赈济五万九十二人又给历州县遣官检察令劝诱积米之家减价出粜米麦谷二十一万八千一百二十四石五斗其间亦有愿入米麦以助官中赈济者臣已各项开具数目别状奏闻讫契勘本路连年旱歉去岁尤甚臣到任之初米一升价钱至一百三四十文近来雨泽沾足早禾已熟米价顿减新米一升止四五十文将来秋成决有可望之理此盖陛下勤恤民隐至诚惻怛圣德感召和气之所致然今春小民乏本田亩有不曾种蒔者甚多人情方苏未宜重取更望朝廷宽假有以涵养之乃为得计昔周宣遇灾而惧侧身修行而王化复行前日旱暵安知不为中兴之资在陛下特加圣意而已干冒天威不胜战越

乞差军马劄子

臣窃见江西路环数千里为郡十有一为县五十有三控引荆湖襟带吴越为上流重地去淮南京西道里不远平时商旅由独木渡江自光蔡以趋汴都最为径捷当六朝时九江豫章皆为重镇屯兵选帅以临之今朝廷保据江左审察形势知此地之要害故与江东荆湖皆置大使付兵二万假以重权钱粮优裕赡养不阙所以崇屏翰之势为长久之策也近年以来军马拨隶他将钱米随亦转移疆场荡然无扞御之备仓廩枵然无蓄积之资而犹建置大帅是有名而无实其失本意远矣且以江东荆湖论之建康有张俊一军当涂有刘光世一军武昌有岳飞一军犹足以奋张军声以为翰蔽江西一路独无兵将沿江上下千里之间殊乏控扼使敌人不来则已如其果来必乘间捣虚则无如江西者矣譬犹邪气之伤人必由间隙盗贼之妄意必出无备岂可忽哉臣昨者入对尝具劄子乞元降画一指挥军马钱粮之半伏蒙圣慈察见本司有矜从之意降付朝廷至今未蒙应副臣非不知方朝廷措置淮甸恢复京东西未暇及此然但知进前不知备後非策之得也今沿江所屯数十万衆摘万人以为一路根本似

未为多臣昨自行在将带到申世景一军才千余人分遣讨捕盗贼已差出三分之二见今诸郡窃发者纷纷未已正缘兵力单弱不能镇服所致而欲使之扞御大敌岂不难哉虽依近降指挥招补阙额禁军然未经训练何可倚仗非得正兵相兼使唤决误国事又舒蕲黄三州实为江西屏蔽见听本司节制亦无军马内舒州隶刘光世蕲黄州隶岳飞臣近已具奏闻乞於刘光世军中摘那二千人屯驻舒州於岳飞军中摘那四千人屯驻蕲黄州缓急听臣节制亦未奉指挥伏望圣慈特降睿旨下都督府如臣前奏所乞差吴锡等军一万人充江西大使司军马仍令刘光世岳飞分兵屯戍舒蕲黄州与江西相为表里庶几敌人不敢窥伺一路生灵恃以无恐不胜幸甚臣以衰病难当重寄已具奏乞依旧在外宫观差遣必冀矜从然不敢以将去之故不为国家深虑至计伏望圣察

乞宫观奏状

右臣昨蒙圣恩除今任差遣臣以忧患之余早衰多病三具奏辞免皆蒙降诏不允及赐以亲笔趣行臣不敢仰违威命黽勉就道上章请覲正欲面奏难当委任之意既获瞻望清光特荷眷獎不容逊避且蒙宣谕委以推行賑济圣心怛惻至于再三臣所以不敢固辞者亦欲少効尺寸以报大恩而自到任以来适当仓库匱竭新陈不接之际夙夜忧虑啓处不遑用是宿疾间作动多眩瞀深虑旷阙复致人言今幸賑济稍已就绪秋成有望人情渐苏实无规避之嫌敢沥血诚仰干天聽伏望圣慈特加矜怜许令依旧在外宫观庶几就门可以养疾异时复被驱策誓极糜捐以图报称

乞宫观劄子

臣两具奏闻乞罢帅守之任除一在外宫观差遣未奉回降指挥伏念臣自建炎初误蒙任使适当艰难之时独持战守之策孤危寡与屡遭谤诬仰赖圣明脱身九死今得承乏方面亲覩中兴岂不知幸然臣福过灾生早衰多病私门祸故弟妹丧亡情惊无聊志虑凋落多忧健忘拜跪艰难近日以来频在假故深虑妨废职事益负素餐之讥所以不敢久当分阃之寄屡上请闲之章诚恐一有疎虞误陛下委任之意虽杀身不足以塞责伏望圣慈哀怜特降睿旨检会臣前奏早赐矜允使得休养山林寻访医药於未死间获观陛下恢复中原摅愤千古臣之志虑毕矣干冒天威无任惶惧待罪之至

催差军马劄子

臣契勘近具劄子奏陈乞差元所请本路军马一万人及於刘光世岳飞军中摘那军马於舒蕲黄州驻劄未奉回降指挥近闻刘光世军马已起发往庐州岳飞军马已起发往襄阳府本路所乞军马未蒙都督行府差到沿江一带并无控扼窃虑贼情狡狴或有窥伺乘间捣虚无兵应援深为可虑兼契勘岳飞大军移屯襄阳所有钱粮并系本路应副经由蕲黄等州自沔鄂以趋襄汉实以本路为根本以蕲黄等州为咽喉之地万一本路为贼所扰蕲黄等州为贼占据无兵扞御即本根之地动摇钱粮无自而取咽喉之地阻塞粮道无自而通襄汉之军坐见困乏为害不细若待临时申请决致误事所有前後累奏所乞军马非独止为本路之故伏

望圣慈特降睿旨於都督行府见管军马中摘那差拨应副及令刘光世岳飞差兵前来舒蕲黄州驻劄施行

乞截留王彦军马奏状

契勘累准都督行府劄子缘本司申乞差拨防秋军马勘会行府见议遣兵前去关送照会今月初四日又准都督行府劄子缘本司申乞先次摘那将兵三二千人前来本司应副相兼捉杀盗贼使唤申闻事勘会已降指挥令王彦将带兵马前来行府约至七月间可到候到行府日即量度差拨前来今关送照会右本司体问得王彦见在荆南府除存留营田人兵外将带军兵装发舟船前来人数不多约七月尽八月初间可到江州本司缘防秋阙少军马及近据筠袁吉等州申报日有盗贼啸聚作过阙兵分头讨捕已具状奏闻并申都督行府枢密院乞截拨王彦军马存留本路防秋及讨捕盗贼使唤今准前项都督行府指挥候王彦到日量度差拨前去窃虑王彦军马到得行府已是秋深义复差拨前来须至冬月不唯往返虚费日月又虑军马远涉劳顿後期误事除已再具申都督行府乞截留王彦就便听本司节制使唤於沿江屯驻防托及分兵前去?吉等州讨捕盗贼外伏望圣慈详酌早降睿旨施行

小帖子

契勘本路盗贼除?州南安军日近有刘宣等攻破龙南县等处作过外其余诸县盗贼头顶不一已曾开具申禀吉州近有湖南贼首王权见不伏招安依旧啸聚作过袁州近有黄颠叔贼马约一千余人马数十疋见在筠袁州界上作过委是急阙人兵分头讨捕伏乞圣察

契勘本司累申朝廷乞差防秋军马并蒙关送都督行府今来行府近已移司前去泗上诸将军马并皆发絶窃虑别无兵将可及本路所有王彦一军已得都督行府指挥差拨但须到行府方始发遣前来窃虑迂回有失指拟秋深或有警急难使本司虚当一路之责伏望圣慈出自睿断许就便存留一路不胜幸甚伏乞睿察

契勘王彦军马在荆南驻劄系是四川应副钱粮今来如蒙圣慈许截留本军在本路防托使唤即乞下本路都转运司将系省不系省并上供钱未应副贍给王彦一军伏乞睿旨施行

梁谿集卷八十八

<集部,别集类,南宋建炎至德佑,梁谿集>

集八十九

钦定四库全书

梁谿集八十九 宋 李纲 撰表劄奏议五十一

应诏条陈八事奏状 车驾巡幸江上起居表乞降诏诸帅持重用兵劄子

应诏条陈八事奏状

臣伏觀近降诏书以地震求言虽刍蕘之微亦得上达况臣尝备近司荷恩隆厚受知特深苟有所见其敢隐默輒罄狂瞽冒尘天聪伏望圣慈特赐睿览谨条具奏闻下项

一臣闻地道积陰以静为德理不当动动必有变春秋二百四十二年间地震五圣人必谨而书之者志变也汉唐以来或频年震或一年数震变不虚发其感召之因皆有所自可考而知迺者六月乙巳地震于驻蹕之所陛下克谨天戒降诏求言诚得警惧修省之道然臣闻应天以实不以文天人一道初无殊致唯以至诚可相感格临变而惧变已则忘有敬天之言无畏天之实皆不足以销弭变故导迎吉祥凡以无至诚惻怛之意故也夫夷狄兵革女子小人皆为陰类愿陛下致察於数者之间每事致戒则化灾为祥何难之有昔成汤遇旱禱于桑林以六事自警而雨泽时至天人之际应若影响不可诬也臣愿陛下以应诏上封事者特加省览其言可采降旨亟推行之不必加赏夫忠义之士有爱君忧国之心者但以言听计行为志岂待赏而後劝哉至於草茅疎远不识忌讳论议激讦亦望容贷以来直言日慎一日不以天地之变为出於偶然如日月之蚀既过则怠於修省此乃所以为应天之实也天下不胜幸甚

一臣窃闻诸道涂车驾将有建康之幸既降旨以趣营繕又具例以勅百司此诚甚胜之举然日俟一日未闻下戒行之诏岂犹有所疑而未决耶夫建康在东南为形胜之地在今日为不可不驻蹕之所臣尝条具奏闻屡矣天时地利人事皆当舍临安而幸建康比者地震不在诸郡而在临安不在他所而在宫禁此无他天意欲陛下有所迁动避危以趋吉而已夫怀与安实败名昔公子重耳安於齐子犯谋醉而遣之自齐适秦秦伯纳诸晋遂成霸业今陛下久驻蹕临安踌躇未迁无乃有安之之意耶不然天意何以丁宁告戒之若此此天时之不可不幸建康者一也临安褊迫偏霸之地非用武之国又有海道不测之虞曷若建康襟带江湖控引淮浙龙蟠虎踞自古称为帝王天子之宅此地利之不可不幸建康者二也诸将衆兵已皆分屯淮泗陛下时乘六龙躬率六师进临建康则将士之气百倍其勇号令赏罚皆出睿断人人愿战前无坚敌与夫深居而遥制岂可同日而语哉此人事之不可不幸建康者三也臣愿陛下断自宸衷不贰不疑投龟而决早降诏旨以慰士民之心庶几中兴之运不日可致伏望留神幸察

一臣窃观古之善治兵者必多其将之员数而少给之兵所以为臂指聯属易相运动之术汉光武之二十八将是也又必重内轻外以为强本弱枝表里相济之术唐府卫之兵是也祖宗

制兵每将不过五千人其不隶将者每指挥不过五百人有事则临行阵无事则归营垒此得所谓多将员而少给兵之法尽屯天下重兵於京畿足以制四方州郡之兵又设禁旅拱卫王室此得所谓重内轻外之意海内平定几二百年靡有兵革职此之故今陛下震皇武以图恢复之烈尽以重兵分隶诸大将多者至十数万人平居已不能运掉而况於仓卒扰攘之际乎宿卫单弱初无正兵缓急何以卫宸极而御外侮此臣之所以夙夜寒心者也虽陛下恩信足以结之威德足以服之手搆指顾莫不从令然立国之道当为长久之策恐不应如此臣愚伏愿陛下当留圣意偏裨中有可用者亲加识擢渐付以兵使自成头项以备缓急驱策或收召旧人或选择将士广置禁旅更番宿卫使为天子正兵考汉唐之旧制遵祖宗之成宪稍复前规销弭後患以早致中兴之功天下不胜幸甚

一臣闻兵法欲致人而不致於人此犹棊家之争先法耳故善棊者之置子必能制於数路善兵者之御敌必能禁其四出今诸将大兵列屯淮泗又以宰相督之可谓重矣敌人之势亦必聚其犬羊以抗王师则京西一带必有力不暇及之处愿诏刘光世专事陈蔡岳飞专事唐颖使敌人分兵以拒我则淮泗之力纾使不能分兵则乘间捣虚吾无遗策矣今刘光世军已进据合肥而岳飞大军尚留武昌未进诚恐缓不及事坐困钱粮未见其可伏望圣慈特降诏旨督促其行庶几不失机会今冬可无冲突之虞愿加睿察

一臣闻行师用衆粮饷为先虽有坚甲利兵非粟无以战虽有高城深池非粟无以守有国家者无三年之蓄曰不足而况於月支日给乃旋为之计乎去岁旱灾之广绵地数千里谷斗有至千余钱者常赋损於减放漕计困於转输富平义仓匱於赈济公私枵然皆无储蓄使今秋复继之以水旱其何以堪所幸天道佑顺雨阳时若遂成有年江浙闽广悉皆登丰目今米价已减将来穡事告成粒米定须狼戾此诚朝廷广籴储蓄之秋也昔赵充国讨先零尝谓塞下籴四十万斛贼岂敢动哉由是观之国以兵为命兵以食为天何可少缓夫谷太贱则伤农乘登丰之岁以善价广籴官有储蓄而农不告病是行一事而两利也朝廷近降籴本付转运司限数收籴固为得策然转运司不过分降诸州诸州不过分降诸县诸县不过敷配人户强委之直而责其粟则是和籴之名无和籴之实非计之得也臣愚伏望圣慈特降睿旨令诸路州郡以转运司所分籴本专委官吏置场收籴其初即以善价取之民间量增分数严立约束使无邀阻糜费则人户商旅自然乐输数百万斛不难办也始时民间唯患交子恐难行用今朝廷既改交子之法以为关子即与见钱无异自可通行唯官告勅牒须劝诱上户使之入纳亦乞令州县以劝诱到见钱付之籴场使之收籴庶几革近年科籴之弊公私两济天下不胜幸甚

一臣窃见朝廷近年以来委办州县或制造器用或收买物色期限太严督责太峻州县官吏不敢申明如期应命但欲塞责而不为长久之计遂使公私皆受其弊而卒无补於实用如福建之剡海舟制造灭裂寻即损坏广南之买耕牛道里辽远率多毙蹠此皆所费不赀无益於事不可不察也夫创造不精曷若买舟之可久远致多毙蹠曷若厚价以招来虽有所费盖不得已如其不然所伤实多方朝廷用兵之际财赋窘迫岂可不计较爱惜而耗蠹於无用之地哉臣愚伏望圣慈特降睿旨今後朝廷抛降制造收买物色或期限太迫或土产非宜并许州县申陈利害从长相度以闻朝廷更加审察而施行之庶几公私两便无虚费而有实利天下不

胜幸甚

一臣窃见朝廷前此数年专以退避为策亦不责州郡以扞守又降诏旨许令保据山泽以自固城壁守具率皆不治循习既久往往以修城壁为生事建议官吏反受罪责如连南夫以修泉州城委官体究裴廩以修衡州城重加贬黜州郡望风畏缩无敢复议修城者夫以偷惰苟且之习而重之以朝廷威令其谁敢复冒罪责而建长久之计乎臣恐自此州郡城壁壕堑颓毁湮塞不复修矣今与僭逆之寇壤地相接无数百里之远而沿江表里数十州郡朝廷所恃以为藩篱者荡无城池可恃以守卒然贼马惊近边摩封疆不知何以御之此臣之所不能晓也臣愚伏望圣慈特加睿察令朝廷熟议如扞御之计非城池不可即乞降旨明告中外以昨来罪责官吏自缘搔扰非以修城之故应沿江州郡候今冬农隙许之渐次修筑城池建置楼橹之类朝廷特与应副庶几自保之计既备进讨之策可行天下不胜幸甚

一臣窃覩近降指挥禅林僧徒贫病不能贴纳者先以常住代支续令拘收还纳自非出自圣慈曲加矜恤何以及此然臣窃谓僧徒中有财利者多是律僧营生与俗无异虽重取之何所不可其禅林僧真实学道之人一缾一鉢随时粥饭往往无余今使之贴纳非惟贫病无自而出亦有害其学道之心圣慈既加矜恤许令常住代纳固已深慰物情伏望特降指挥委州县体究实系贫病无可贴纳之人令本寺常住代支更不拘收还纳庶几学道之流得以安心净业此亦仁政之一端也伏乞睿察

右件八事谨録奏闻伏候勅旨

车驾巡幸江上起居表

臣某言伏覩进奏院报九月一日车驾进发巡幸江上者銮辂顺动法天道以省方灵旗指麾慰民心而伐罪号令所及呼舞惟均臣某诚惶诚惧顿首顿首恭惟皇帝陛下孝悌通于神明覆载侔乎天地念父兄之辱欲救之於关河万里之间悯烝黎之艱将拯之於涂炭十年之後采之公论断以必行方其发轫之初已有中兴之象劳军细柳想按辔而徐驱督战澶渊宜应弦而远遁凡为臣子咸愿翼从况臣尝备近司最蒙殊獎守藩条於外服莫陪羈勒之余望日御之所临徒深葵藿之志臣无任瞻天望圣激切屏营之至谨遣左宣教郎本司干办公事臣罗荐可诣行在所奉表起居以闻

乞降诏诸帅持重用兵劄子

臣近尝具奏论诸帅重兵尽屯淮上寇伪亦必聚其犬羊之衆以抗王师则京西一带必有力不暇及之处宜诏岳飞进兵可以得志近据岳飞公文分遣兵将收复镇汝军商虢等州杀获甚衆所得粮储不貲颇如臣之所料然臣窃谓大兵吊伐当以招纳为先不在广行杀戮收复境土当以保守为上不在亟务攻取愿诏诸帅约束将士使明知陛下之德意则中原士民日俟王师之来响应影从大功易集臣又闻寇伪相与定谋不争城邑纵我师使深入而断其归路使果出此不可不戒愿诏诸帅以持重用兵勿为利诱而堕其计中则师出万全区区愚虑

庶有补於万一伏望圣慈特赐睿察

梁谿集卷八十九

卷九十

钦定四库全书

梁谿集卷九十 宋 李纲 撰表劄奏议五十二

【阙】

乞下?吉州守臣不得占留兵将奏状

乞拨那军马奏状

乞罢江西帅仍乞宫祠或致仕劄子

蕲州探报 缴进蕲州探报劄子 【阙】

扬声大举则往往无事寂无传闻则往往深入今乃信不可凭之探报而弛一路之防守深恐非策臣素愚忝仰荷圣意獎遇隆厚每思竭犬马之力以报天地之恩而今者江西委寄之重军马单弱无以为防秋备敌之计使仓卒有警旋行控告朝廷乞遣援兵必不及事孤生灵之所望误国家之大计虽死何以塞责臣前上章以疾丐罢蒙恩降诏不允训词温厚有边吏戒严商秋俯及之语伏读感激不知涕泪之零然臣之所以冒昧敢以此时而求去者非独以难胜剧任之故正缘防秋无备不敢虚受其责今者銮辂时巡郡国视劳六师此非臣子坚为去就之时臣虽衰疾未敢复有所请伏望圣慈特降睿旨令朝廷定议本路防秋如合遣兵即乞早摘那军马前来应副措置拨布控扼如不合遣亦乞明降指挥无使日夕指準以误士民之望不胜幸甚臣谨遣左宣教郎本司干办公事臣罗荐可诣行在所枢密院稟议如蒙圣慈特赐召对亦可以询访本路事宜曲折干冒天威无任惶惧战越之至

乞下?吉州守臣不得占留将兵奏状

契勘昨准都督行府劄子及枢密院劄子备坐圣旨指挥令本司招填本路阙额禁军除将兵许本司全将勾抽外其不隶将兵诸州存留一半其余一半许本司勾抽教閱以备缓急使唤本司已遵奉圣旨指挥行下诸州除江州兴国军系沿江州郡合行措置控扼其所管不隶将兵尽皆存留更不起发止起发到筠州抚州临江建昌南安军一半不隶将兵人数全然不多其吉州?州见屯将兵依元降指挥系合全将听本司勾抽使唤缘为两州有盗贼残党理宜存留一半将兵弹压遂止行下东南第六将并?吉两州起发见管将兵一半前来分布控扼使唤虽已行下勾抽深虑两州守臣不念轻重缓急之势惟务占吝以盗贼为名妄有奏陈不肯如期起发有误指準窃缘江西一路唯洪州江州兴国军最系沿江控扼紧急去处若有军马防扞大敌即可以保全一路不致侵扰其?吉两州皆系内地吉州盗贼目即并已衰息?州虽有些小残党其存留一半将兵自可措置弹压伏望圣慈特降睿旨令朝廷行下两州守臣遵奉

元降圣旨指挥及依本司措置止许存留一半将兵不得尽数辄有占留以误大计一路不胜幸甚

乞拨那军马奏状

右臣近据舒蕲黄等州探报伪齐淮河北州郡顺昌府陈蔡等州遂平褒信等县皆有人马驻劄及八月二十二日伪齐人马侵犯德安府应山县作过战败官兵杀死赵将又据兴国军申京西宣抚司劄付黄州八月二十六日准都督行府劄子指挥令管下黄州预先踏逐险固移治去处缓急迁移保守不管少有误事仍令密切施行不得张皇致人民警扰又据转运判官逢汝霖公文今月二十四日准金字牌降到御宝封下枢密院劄子九月十九日枢密院奏勘会岳飞见提大兵於襄阳岳鄂一带措置边事其本军合用钱粮系江西及朝廷应副皆取道九江方至鄂渚日近据探报寇伪贼马聚兵陈州顺昌府意欲侵犯淮西其江州最系紧切控扼去处兼虑缓急阻遏粮道理宜措置右奉圣旨令岳飞摘那一项军马疾速顺流前来江州屯驻照应措置控守仍具所差统兵官职位姓名起发日时申枢密院其合用粮料委逢汝霖应副臣契勘近累具奏闻本路当上流重地沿江一带要害去处并无兵将控扼深虑寇伪窥伺间隙冲突侵犯乞自朝廷遣发本司合得军马应副防秋分布使唤虽蒙关送都督行府至今未曾差拨今据前项逐州探报及都督行府枢密院劄子其探报贼马事件类皆符合如臣平时所料本路事宜委是紧急虽有指挥令岳飞摘那一项军马前来江州屯驻缘岳飞大军见在襄阳府道路遥远未必能如期前来及虽遣发元无限定人数势须鲜少有误指準若不别行措置决致上误国事伏望圣慈矜念本路全无得力兵将可以控扼扞御缓急贼马侵犯必至疎虞一路生灵所系非细臣以疎远孤寒寡援虚当重任万一败事虽死不足以塞责断自宸衷特降睿旨令都督府日下摘那一项得力军马差官管押星夜前来应副使唤会勘诸州及朝廷探报寇伪贼马聚於陈颍者三万余人如或侵犯本路沿江及诸处控扼非万五千人不可除本路措置见管兵可得四千人外尚阙万一千人又恐朝廷以淮泗间见有边事虽遣兵马不能及此数目致令分布使唤不足勘会福建路统制官李贵见部人兵在汀州驻劄广南东路统制官韩京见部人兵在循梅州驻劄皆与本路相隣李贵近杀败刘大醉贼马韩京近杀败刘宣贼马?寇渐向衰息不敢侵犯两路欲乞特降指挥於李贵韩京所部军马逐急更各摘那一半差近上得力将官部领赴本司应副控扼使唤候防秋罢日各遣归逐路屯劄去处庶几声援稍振竭尽愚虑或可以效犬马之力备御强敌保全一路以报圣恩万分之一死且不朽如以臣今来陈请不合庙谟即乞朝廷察臣不材先次罢黜无使虚受误国之责亦臣区区之至愿也谨沥血诚干冒天威无任惶惧战越之至

贴黄

臣所乞摘那韩京李贵一半兵将如蒙圣慈矜允即用金字牌递角降付韩京李贵军中并福建广东路帅司及本司照会庶几早得被受不至後时伏望圣察

臣近据岳飞公文称强敌兵少钱粮不继已勾回干事军马臣窃虑近降指挥令岳飞摘那一项人兵前来江州屯驻照应防守亦未必可以指準伏乞圣察乞罢江西帅仍乞宫祠或致仕

劄子

臣辄沥血诚仰干天听退惟冒渎死有余罪伏念臣鄙朴无取误蒙圣恩起废於十年流落之余畀付以一路兵民之寄夙夜黽勉期称所蒙适丁伪寇猖獗之秋当为防冬扞守之计而臣本司军马尽已拨隶诸将沿江千里要害之地初无数旅控扼之兵累具奏陈未蒙差拨今者边郡探报羽檄交驰朝廷行移星火紧急皆谓贼马屯聚将为捣虚之谋惟臣本路空虚初无御敌之具倘使犬马之衆来犯封疆则夫士民之心何所倚仗臣已再上章疏控告朝廷乞摘那都督行府之偏师及勾抽福建广东之半将济此危急庶能保全臣闻有言责者不得其言则去有官守者不得其职则去帅守江西臣之职也朝廷付臣以一路委任重矣不知缓急之际责臣以守乎不责臣以守乎责之以守则必与之以可守之具不责之以守则非独朝廷今日事体不可如此亦非臣平日之素志也如蒙朝廷俯从危恳使兵力粗可支梧则贾谊所谓守圉扞牧之臣诚死城郭封疆者臣虽无似窃庶几焉倘或所陈不合庙略即乞朝廷以臣不材先次罢黜使得归老山林保全晚节亦臣区区之至愿伏望圣慈特降睿旨怜臣坚请力争盖忧於误国察臣难进易退非薄於爱君早赐矜从以安愚分谨斋沐亲书劄子干冒天威无任惶惧战越待罪之至

贴黄

臣窃以防冬之际虽非守臣可以乞去之时然臣条具利害请乞军马一路扞守之计凡二十余次不蒙朝廷差拨今来探报危急实难虚任重责伏望圣慈特降睿旨除臣一在外宫观或许臣守本官致仕以养衰疾取自圣裁早赐矜允

蕲州探报

今月二十六日准光州牒今月二十一日戌时据探事效用蒋贤等到州供称今月二十一日未时有伪贼马军二百余正於谷口渡已过淮南岸及见有马步军接续过淮前来不见的实数目贤等奔走前来执覆牒契勘据探报贼马已是渡淮连夜决来攻围本州委是危急请照会施行者右谨具申江西安抚制置大使司谨状并小贴子探报今来贼兵系孔彦舟作先锋缘本人旧充蕲黄州镇抚使在蕲州屯驻熟知地利窃虑窥伺蕲黄州一带为害不细伏乞速赐指挥施行

缴进蕲州探报劄子

臣已具奏方欲遣发间据蕲州公文准光州探报九月二十一日有伪贼马军二百余正於谷口渡已过淮南岸及有马步军接续过淮前来不见数目探闻系孔彦舟作先锋缘本人旧充蕲黄州镇抚使窃虑窥伺蕲黄一带申本司照会臣契勘近据淮西诸州探报寇伪聚兵陈蔡顺昌府意欲窥伺淮西今来蕲州探报贼马已渡淮前来淮西一带州军并皆已得朝廷指挥移治更无限阻直可径到大江本路沿江要害合行控扼去处并无兵可以分布使唤委是危急伏望圣慈特降睿旨日下差发得力成头项军马星夜前来应援措置防扼庶几尚可支梧

若只倚仗已割岳飞分拨兵将决致误事所有蕲州探报公文真本缴连在前谨具进呈取进止

贴黄

臣契勘前件探报虽已密行下江州兴国军等处措置防扼缘逐州亦是阙兵分布使唤深虑朝廷遣发兵将并岳飞分拨军马未到间贼马径渡江前来江西作过洪州兵既不多城壁颓毁方欲下手修治全然未有次第亦无楼櫓及防城器具等委是难守万一仓卒欲乞许本司随宜措置以待援师更合取自朝廷指挥伏乞圣察

梁谿集卷九十

卷九十一

钦定四库全书

梁谿集卷九十一 宋 李纲 撰表劄奏议五十三

论击贼劄子 再乞罢帅劄子

乞差发军马劄子 奏陈防秋利害劄子进道君御书碑本奏状

进皇帝御笔诏书奏状

乞下淮西宣抚司差军马前去光州驻劄奏状乞施行?州占吝将兵奏状

乞拨韩京等军马奏状

论击贼劄子

臣窃观自古用兵者相持既久则非出奇不足以取胜曹操袁绍官渡之事是也王师与寇伪相持於淮泗间几半年矣前日岳飞之举我出奇也惜乎以钱粮不继而勾回干事军马未能成功今日贼马渡淮彼出奇也若能设策破之则奇反在我臣愿陛下速遣得力兵将自淮南前来蕲黄间约岳飞兵相为掎角以夹击之期於必胜以复陈蔡则淮泗之师亦自当解大功可成至於江南屯兵控扼以扞奔冲自是一段不可阙也伏望圣慈特赐睿察取进止

再乞罢帅劄子

臣近者冒万死干天听乞罢臣江西帅任依旧除一在外官观或守本官致仕未奉俞允伏念臣材能无取误蒙圣恩帅守一路夙夜黽勉愿效涓埃以图报知遇之万一而臣自今春入覲之初即论本路为上流重地去敌境不远朝廷建置大帅付兵二万人近来拨隶他将靡有存者窃虑不足以折冲御侮镇服一方乞差万人庶可集事伏蒙宣谕以臣言为然既而降付朝廷止是关送都督行府累具利害申都督行府止云见议遣兵自春徂冬初无一人一骑至者方用兵之际边报警急之秋付臣千里之寄而军马单弱曾不足以薄具防守臣虽至愚岂敢贪恋宠禄虚任重责哉所以不避斧钺之诛乞归山林非独以衰年多病不任繁剧之故也重念臣自靖康以来为国深虑心之精微衆人不达皆以主战归之姓名误落於寇中尤为敌人之所不喜使其知臣块守空城於此无兵可以为用其致寇必矣如臣者固无足道然尝为大臣被遇三朝使失守殒身上累国体虽死不足以塞责伏望圣慈哀怜特降睿旨检会臣前奏所请官观或致仕早赐施行臣不胜幸甚谨斋沐亲书劄子冒渎天威臣无任惶惧战越待罪之至

乞差发军马劄子

臣伏准御前金字牌降下枢密院今月十七日劄子以臣乞除在外宫观差遣或许守本官致仕备奉圣旨不允令学士院降诏仰荷圣恩但深感涕伏念臣材能无取误蒙睿獎起於闲废之中付以方面之寄夙夜黽勉愿效涓埃以图报遇之万一自到本路适当旱暵阙乏之余金谷细碎皆躬亲料理粗能支梧应岳飞大军钱粮亦不敢阙乏建置营房修葺城壁制造器甲安集流移招捕盗寇皆稍就绪惟是军马单弱不足为一路防守之具自非朝廷应副则新招乌合之衆何足倚仗累具奏陈未蒙差拨近者边报警急贼马渡淮侵扰淮西州县沿江一带要害去处并无控扼人情震恐臣深虑仓卒之际或有冲突与其无兵扞御受失守之诛曷若控告君父为退休之计情迫辞切日虞谴诃岂谓皇帝陛下察其精诚悯其拙直既赐以诏书不容遽去又谕以所乞兵马别作施行虽父母之於子恕其愚而拯其急不是过也今者王师大捷贼兵遁逃固足以纾目前之忧为中外之庆然月始初冬解严之期尚远兵贵预备黠敌之衆尚多正当益虞大敌愈修军政防患於不必防之地持胜为不可胜之谋用正为奇济虚以实则江西一路尤今日所当留意也臣窃恐朝廷以既捷之後便谓可以无虞兵马不必调发间隙不必堤防则非臣所敢知也伏望圣慈速降睿旨所遣本路军马早赐施行及臣所乞李贵韩京一半兵将特如所请庶几扞御有备可以辑宁一路仰报大恩衰病之躯终冀矜从得安闲散干冒宸聪无任惶惧战越之至

奏陈防秋利害劄子

臣伏覩枢密院劄子行下捷报刘光世张俊杨沂中等大破伪齐贼马於淮淝之上斩馘擒捕甚衆残党遁归淮北此诚陛下天锡勇智道兼神武驾御将帅恩威并行所致露布所传中外同庆然臣窃见间探所报伪齐乞兵於金人其统领来者如四太子龙虎大王浑女浑金牌郎君之类头项颇多未闻有渡淮而南者其侵犯淮淝及光山六安等处作过止是李成孔彦舟叛将签军深虑贼情狡狴置重兵於後而以签军来尝我师若一胜之後兵骄气惰则为患有不可胜言者加以时方初冬去解严之期尚远合当措置防守去处更宜严为之备伏望圣慈降诏诸将既加獎谕又戒其无以战胜而骄益务淬砺以待大敌仍命朝廷按图以视诸路某路固实当设疑以欸贼兵某路空虚当增兵以御侵掠使江淮之间表里相资首尾相应万一寇骑冲突堕吾术中王师能取胜於金寇则恢复之功在此一举不再籍矣臣以迂陋?远辄议大事罪当万死伏望圣慈特加睿察取进止

进道君皇帝御书碑本奏状

右臣今年三月内蒙恩赐对内殿尝以道君太上皇帝所赐御书一轴进呈及乞将刻到碑石等进御府伏蒙宣谕许令投进臣近於福州旧寄居处取到道君太上皇帝御书碑石两段及元打下碑本四十八张已標背一轴用匣复封全谨差人齎赴通进司投进伏望圣慈特降睿旨宣取臣无任惶恐战越之至谨録奏闻

进皇帝御笔诏书奏状

右臣昨於去年十月内蒙恩除今任差遣三具奏辞免伏蒙圣慈特降亲笔诏书趣行又於今年三月内赴任至江西界首准御前金字牌降下亲笔诏书以本路旱灾饥民乏食令劝诱积米之家尽数出粃以济流殍之苦臣到任所以前件亲笔诏书刻之琬琰置州治中以垂永久谨櫟背成轴用匣复封全差人齎赴通进司投进伏望特降睿旨宣取臣无任

乞下淮西宣抚司差军马前去光州驻劄奏状

今月二十日据兴国军状申十月十五日未时据进武副尉本军使臣何诤申今月十三日戌时有黄州差去探报衙前华昇申今月初十日到沙碛市见光州知州王敦武以下官员般移老小军民在沙碛市石盆山寨住泊探到伪贼孔彦舟等人马见在淮河东北畔朱高市劄寨及据权发遣兴国军左朝请大夫王翦劄目窃观唐史张巡许远固守睢阳遂使贼兵不敢越睢阳而犯江淮史臣称之曰张巡许远以疲卒婴孤城抗方张不制之虏鯁其喉牙使不得搏食东南牵制首尾而唐全得江淮财用以济中兴今来伪齐遣孔彦舟系桥渡淮攻围光州首尾半月无兵救援致使光州官吏奋发忠义出城击退其功绩诚可嘉也孔彦舟引兵入六安军前去而光州於今月初六日夜二更兵民皆出城往光山县名为移治不知所向是光州官吏虑恐贼兵再来攻围依前无人救援缓急城?则一城皆被杀虏所以弃之而远遁深恐伪齐探知移兵前来据守光州系桥运粮时遣贼兵前来侵扰蕲黄等州则江西日有警急契勘江西诸州例阙城壁不得不为之虑兼淮南州军方始安定岂可再致残破所据兴国军探报及权发遣兴国军王翦劄目在前本司契勘光州系淮西路分接连陈蔡伪境自兵兴以来虽累经残破然最系控扼去处近者孔彦舟贼马攻围累日官吏兵民竭力扞守贼马退去即是光州城壁尚犹可守缘得淮西帅司指挥许之移治又虑贼马再来攻围无兵应援遂於贼退之後官吏军民并皆迁徙出城就光山县屯泊今据兴国军守臣王翦前项陈述深虑伪齐探知移兵前来据守光州系桥运粮时发贼兵侵扰蕲黄等州则江西日有警急不可不虑事理诚为切当伏望圣慈特降睿旨下淮西宣抚司疾速差拨一项军马前去光州屯驻却令光州守臣率官吏军民依旧归城措置扞御庶几不致误事其蕲黄州已得湖北路宣抚司令相度移治指挥亦乞朝廷详酌施行

小贴子

契勘光州或为贼所据则蕲黄又须移治江北更无扞蔽自江以南沿流险要去处既无军马可以控扼州县又无城池可以自固使贼渡江占据州县为患不息伏望圣察

乞施行?州占吝将兵奏状

据?州申淮安抚制置大使司劄子已行下东南第六将依限统押已團結下一半将兵前来分布控扼使唤本州先准使司劄子指挥團結一半将兵听候防秋使唤寻下东南第六将團結将下见管近军二千九百二十五人缘为龙南等县并广东目即皆有盗贼逐次分遣将兵前去逐处讨捕及分差州衙正副将路分押队及诸处防把委是人数稀少差那不行兼仓库虚乏无可预借欲望与免起发存留本将扞御弹压庶免别致生事申本司契勘东南第六将兵

自来合听帅司节制近因本司起请防秋军马准都督行府及枢密院劄子备坐圣旨指挥本路将兵遇缓急全将合听本司差拨使唤本司缘为?州管下尚有土贼残党未致净尽已行下本将存留一半在本州弹压外其余一半将兵先次团结成队伍日逐训练以备本司缓急勾抽使唤已备坐申朝廷去讫本司近来不住承据江北蕲黄州探报寇伪贼马侵犯淮西州县事宜紧急沿江合行措置把截去处别无军马防守遂於九月二十八日以後排日入递及专差使臣计一十五次劄下?州勾抽上件已团结下一半将兵前来本司分布控扼使唤亦已具因依奏闻外今据前项陈述委是本州当职官不以国事为意但欲尽数占留将兵却将本司已团结人数先期散在诸县故作占破体问得?州管下诸县今年丰熟盗贼渐已衰息虽有些小残党去处其存留一半将兵一千五百人自足弹压措置今来本州全不体认探报紧急事有轻重辄以盗贼为名占吝不肯发遣显是并不遵奉圣旨指挥及故违本司节制除已再行催促发遣外伏望朝廷检会本司前奏更赐指挥施行

小贴子

契勘朝廷一路置帅正为节制军马於事宜缓急之际得以度量轻重抽差使唤今来本司差拨?州一半将兵应副沿江防扼非特当边报警急之际又系遵奉近降圣旨指挥其?州当职官吏辄敢妄以盗贼为名占吝不遣故违圣旨及本司节制致乏军兴实缘臣人微望轻不足表率一路遂令列郡陵侮帅司伏望圣慈特赐罢黜其?州官吏亦乞特降睿旨施行

乞令岳飞兵前来江州仍许听本司节制奏状

契勘近据转运判官逢汝霖公文准枢密院九月二十六日劄子枢密院奏勘会岳飞见提大兵於襄阳岳鄂一带措置边事其本军合用钱粮系江西及朝廷应副皆取道九江方至鄂渚日近据探报寇伪贼马聚兵陈州顺昌府意欲侵犯淮西其江州最系紧切控扼去处兼虑缓急阻遏粮道已奉圣旨令岳飞摘那一项军马疾速顺流前来江州屯驻照应措置控守其合用粮斛委逢汝霖於桩管应副岳飞米内取拨五万石前去支用右奉圣旨令岳飞依已降指挥疾速摘那前去本州屯驻措置控守仍具所差统兵官职位姓名起发日时申枢密院申本司照会本司缘有孔彦舟贼马攻围光州探报备坐前件圣旨指挥牒湖北路宣抚司疾速差兵前来江州驻劄续据湖北宣抚司签厅公文称宣抚岳少保见为目疾在假本司见调发官兵五千人并车战船前去蕲阳屯驻请照会契勘蕲阳系江北岸属蕲州管内去江州地里遥远其江州系江南岸最为要害去处沿江渡口并无军马控扼缓急难以相照伏望圣慈特降睿旨下湖北路宣抚司依元降圣旨指挥别差一项军马前来江州屯驻与蕲阳军马照应相为表里及乞朝廷检会臣近奏屯驻江州军马许权听本司节制庶几扞御贼马可以保全一方不致误事

小贴子

契勘今来贼马侵犯淮西州军与江西止隔一水沿江州郡如洪州江州兴国军最是要害去处全无军马控扼事属危急如今岳飞军马不来江州屯驻及虽来江州屯驻不许权听本司

节制实恐无益於事伏望圣察

乞拨韩京等军马奏状

契勘本司近具奏闻以军马单弱防冬之际缓急贼马侵犯无以扞御乞自朝廷遣发及福建路见在汀州驻劄统制官李贵广东路见在循梅州驻劄统制官韩京所部人兵内各摘那一半差近上得力将官部领赴本司应副使唤候防冬罢日各遣归逐路屯劄去处未奉回降指挥窃缘本司昨得圣旨指挥辟置都统制官一员节制三路军马讨捕?寇今来已蒙朝廷许辟左武大夫吉州团练使任仕安充本司都统制韩京李贵兵马自合听受节制见今屯江州与本路相接朝廷遣发军马未到间如得权宜差拨应副庶几声援稍震可以备御强敌保全一路伏望圣慈特降睿旨检会前奏速赐施行

梁谿集卷九十一

<集部,别集类,南宋建炎至德佑,梁谿集>

卷九十二

钦定四库全书

梁谿集卷九十二 宋 李纲 撰表劄奏议五十四

獎諭防秋利害诏书 谢獎諭表

再陈已见劄子

乞降旨岳飞遵依圣旨差兵屯戍江州奏状施行招军奏状
乞遣兵收复光州奏状乞遣兵策应岳飞奏状

乞蠲免淮衣紬绢奏状

乞将户帖钱分作二分随秋税起催给卖奏状乞施行?州不发将兵奏状

獎諭防秋利害诏书

勅李某省所奏陈防秋利害事具悉卿勤劳王室作时股肱控制上流实邦屏翰方朕亲乘戎
輅抚劳江干乃远抗於封章仍备言於谋略洞明利害切中事机寇已在吾目中何烦聚米肉
方陈於几上可以行师嘉尔壮猷副予廷望故兹獎諭想宜知悉冬寒卿比平安好遣书指不
多及

谢獎諭表

臣某言伏奉诏书以臣奏陈防秋利害切中事机特加獎諭臣已望阙谢恩祇受讫者瞽言之
达方虞出位之诛温诏诞敷更被自天之宠载惟叨冒深切凌兢【中谢】伏念臣识虑迂?材
能譾薄所愿学俎豆之事未尝读孙吴之书偶当戎事之艰危辄罄愚情而忖度惟忧国爱君
之心切故苦口逆耳之言多亮之者谓怀匪躬之诚笑之者谓犯斯疏之戒但知自竭岂暇恤
他正如野老之献芹敢意圣君之采菲伏蒙皇帝陛下天地容纳日月照临嘉其千虑一得之
愚獎以细书十行之札褒踰华袞赐重万金蔀屋为之生辉士民忽焉改观臣敢不激昂素志
砥砺孤忠益思料敌制胜之谋以助御侮折冲之计灵旗所指方勒燕山之铭崖石可磨愿撰
涪溪之颂

再陈已见劄子

臣今月十日准御前金字牌降到枢密院劄子奉圣旨以臣奏陈防秋利害切中事机令学士
院降诏獎諭劄送臣照会仰荷圣恩第深感惧伏念臣罕识寡闻初无智略徒以误膺知獎实

同安危故敢每以瞽言干冒睿听伏蒙皇帝陛下天地容纳日月照临不惟恕其狂愚又复獎以优诏顾臣何人可以当此惟知自竭以报鸿私臣窃见国家与寇伪相持累年以来未有如今日之捷也原其所以致此盖缘六飞亲临将士用命之故倘非车驾在近威令可行则淝水之师安能既退而复进变败而为成哉前年亲临则寇骑宵遁今年亲临则伪齐奔比其效昭然可见臣愿陛下乘时稍进以临镇江号令王师士气益振则虽黠寇陰遣援兵未必不闻风而退屈昔汉祖亲临垓下而西楚以亡真庙亲临澶渊而北戎以服自古创业中兴之主未有不履危而求安者惟陛下断以不疑布昭圣武以定大业天下不胜幸甚臣又窃思国家近年以激励将士之故每一战胜则不计首级全军推赏习以成例帑藏爲虚今者诸将咸捷当行庆赐欲广其施则惧物力之不给欲小其赐则惧士心之未厌此尤所当虑者也夫人情感激有不待赏而劝者推赏先後有未下车而封者臣愿陛下降哀痛之诏悯将士罹兵革之苦凡死於战阵先加封爵厚赙赠收恤其家死者哀则生者劝矣然後明诏统帅审定功状俟防冬解严庆赐并行其谁曰不然昔句践厚养死事而士卒思奋汉祖先封雍齿而反侧者安急先务也臣愚不达大体惟陛下裁察尘渎天威无任惶惧战越之至

乞降旨岳飞遵依圣旨差兵屯戍江州奏状

契勘本司累具状奏闻乞差拨本路防冬军马虽奉指挥许行差拨至今未蒙差到及近降指挥令岳飞分一项军马屯驻江州至今亦未到来止是差到兵将於蕲阳驻劄人数不多窃缘伪齐贼马北来侵犯淮西虽为诸将杀败遁归淮北然贼情狡狴防冬日月尚远沿江一带合行控扼去处理宜堤备今来不敢更望朝廷遣兵只乞降旨岳飞遵依元降圣旨差拨军马於江州屯戍与蕲阳水军相应庶本路缓急有所倚仗不致误事

小贴子

契勘今月十二日据蕲州申岳少保自江州复回鄂州所有元差将官王莹在蕲日屯泊一项水军并已带回即是沿江一带并无军马屯驻缓急深虑误事伏望圣察早降睿旨施行

施行招军奏状

近准枢密院劄子枢密院勘会诸路州军多有西北流移人民窃虑阙食因而失所理宜存恤兼诸路州军见管禁军比缘兵火之後例皆阙额虽已降指挥招填并未见招到人数三省枢密院同奉圣旨令诸路帅臣行下诸州军委自守贰将西北流移无归人民情愿充军堪披带少壮人疾速措置招填阙额禁军并日下放行请受本司已遵依施行专委洪州钤辖兵官措置招填至今多日未见招到人数寻行询问盖缘西北流移人民日望朝廷收复中原得还乡土不愿於东南州军充填阙额禁军实恐将来收复之後既系兵籍难以还乡却愿投充统制官申世景军中他时移易屯戍有可归之理契勘申世景一军所管止千余人数目不多本军先具申明朝廷乞添差人或许招收人兵使唤续准朝旨候到江西别听指挥本司近再备据本军陈乞上项事理於七月十八日供申枢密院至今未奉回降指挥今来西北流移人民在本路颇多若不依近降指挥招收窃虑饥寒失所或致流为盗贼委实可悯如蒙许行招填申

世景军中即乞通旧人以二千五百人或三千人为额庶几日加训练渐成精兵与本路隶将不隶将兵相兼使唤可以扞御一方不致临时更烦朝廷遣发人马仍乞所招填人止刺手背将来收复中原可以给据复归农田实为利便伏望圣慈特降睿旨详酌施行

乞遣兵收复光州奏状

今月十一日据兴国军申据进武副尉本军指使何诤申报到下项

一今月初一日光州探事人翁进等回申供於十月二十二日蒙本州差与使臣张準等前去旧光州探事至二十三日夜昏黄到光州西城厢听得城上发擂打更遂令赵青先回前来本州报覆进等去州绰人问信不曾捉得人只见城上四壁有火明打更不见城内人马数目的实首领姓名却揭到伪齐褒信县事总领军马榜一道赴州取覆

一今月初七日光州探事人张真等回申供十月二十六日蒙本州差去旧光州探伪齐贼马动息真二十八日早日出以来到州南七里冈奔城去时只听得光州城上见真等打锣真等为人少不敢近城前去只见城上有白旗十余面不见得城里贼马数目首领姓名

一十月二十九日有光州光山县徐知县管押公吏民户前来光州移治山寨处称十月二十七日有伪齐占据光州贼马绰巡前来光山县赶赴杀夺人户其时徐知县下弓手等人见阵其贼兵复回光山县放火烧毁屋宇前去

一光州再准淮西宣抚使司劄子指挥称契勘光州今来贼已退别无警急当司已於今月十六日三次劄下本州依旧移回光州安泊治事去讫并不见申到知禀须至指挥右劄付知光州王敦武依累次指挥疾速施行具知禀状申照对今来光州见被伪齐贼马占据目今未曾移回前去

右本司契勘光州昨因移治自知州以下并徙居山寨为使臣阍寔等据城反叛投顺伪齐近承淮西宣抚司公文已杀败伪齐贼马退归淮北皆已净尽今据前项兴国军探报其光州依旧系伪齐贼马占据未曾收复窃缘光州系在淮河之南与伪境陈蔡相接今来若为伪齐贼马所据便可於淮河繫桥般运粮食济度军马向南作过与蕲黄为隣更无控扼去处深虑为患不细欲望圣慈特降睿旨下淮西宣抚司遣发近上兵官统领精锐军马前去收复於日近了当庶几不致为一方之患

乞遣兵策应岳飞奏状

臣十一月十九日据岳飞公文今月十二日据统制官寇成等四状申称自虢州获捷之後再抚存商虢西京长水福昌永宁伊阳一带百姓了当於十月二十七日探报蕃伪贼马侵犯铁领关其把隘乡兵统领申称贼马厚重支吾不往成等所统人马不多遂移寨前来横涧设伏堤备於二十九日有马军千余疋前来见阵掩擊敗走杀死贼兵百余人夺马二十余疋内辨

认得有蕃人三二十人至三十日有马军二千余骑再来冲突成等鼓率官兵向前迎敌掩杀贼徒退走杀死数十人活捉八人内七人系蕃人重伤相继皆死问不得蕃人头领姓名一名系刘豫人高收通说得蕃人有一万五千余人马有三千余疋刘豫有二万余人马有二千余疋依旧系伪王太尉韩观察傅安抚成大尹等统率当时追赶间其贼衆埋伏数路分头一布前来成等为见贼马势重即时拽领军马於朱阳五里川择利下寨伏乞使司火急星夜差发军马前来救援同日又据商州驻劄准备将贾彦十一月初一日申番伪贼马万余人已犯商洛县又据统制官王贵十一月初四日申何家寨伪五大王聚集蕃伪贼马重厚亦有在旧唐州下寨侵犯襄阳界分并镇汝军贼势重厚见侵犯邓州界作过贵虽已遵依使司差到干办于大夫备传指挥措置事宜更乞疾速差发军马前来同共掩击并於十一月十一日据统制官崔邦弼今月初六日申贼马侵犯信阳军作过遣发将官秦佑於长台镇杀散贼马追赶至望明港大寨为见贼马衆多却拽领军马回信阳军下寨伏乞使司疾速添差军马前来同共掩杀飞契勘诸处申贼马分路前来侵犯意欲决图上流飞虽目疾未安不免将带在寨军马过江措置外申本司照会臣契勘寇伪并力侵犯襄邓信阳军等处兵势厚重谋虑非浅今来岳飞虽已前去措置掩击缘荆湖接连江西一带地里阔远窃虑孤军缓急难以扞御伏望圣慈速降睿旨令刘光世遣发军马前来策应及命重臣统大兵屯驻九江督战庶几上流重地不致疎虞再获大捷天声益振恢复之功在此一举乞赐留神幸察

乞蠲免淮衣紬绢奏状

契勘洪州以前年例桩发淮衣紬绢二万四千余疋自经兵火残破之後不曾收桩自绍兴二年已後至今年各蒙朝廷蠲免起发今来近准指挥令本司预将绍兴七年分淮衣紬绢折纳米斛缘上件紬绢本州已累年不曾收桩起发委是无可拘催折纳欲望圣慈特降睿旨将本州来年分合发淮衣紬绢之数依已前年例蠲免施行

乞将户帖钱分作二分随秋税起催给卖奏状

勘会本路见依奉朝廷指挥措置出卖户帖内去年旱伤及四分以上州县依元降指挥候今年起催秋税日给卖臣契勘本路去年亢旱比之他路尤甚内洪吉筠袁江抚州兴国临江军皆是灾伤至重有及七八分去处乡民大段贫困其间有逃移之人尚未尽能复业虽今秋丰熟缘春耕之时正在阙食谷价翔踊人户无本作田所种不多私债甚重民力未至苏醒今来州县见行起催会之一路数目浩瀚又缘本路按月起发应副岳飞大军钱并系见钱缘此民间难得见钱号为钱荒兼目今谷价顿减若责令人户依限并行送纳愈见困弊深可矜悯欲望圣慈特降睿旨下本路都转运司许将去年旱伤及四分以上州县未卖户帖价钱分作二年随秋税起催给卖如人户情愿以米斛依本处市价抵头折纳者听更不收纳加耗凑作和余之数起发庶几稍寛民力

乞施行?州不发将兵奏状

契勘本司昨准都督行府及枢密院劄子降到指挥本路将兵遇有缓急许本司全将勾抽使

唤及不隶将兵许勾一半赴本司按阅使唤本司已遵依前项指挥施行缘东南第六将并无?吉州驻劄窃虑本州有盗贼残党除存留一半措置弹压外祇令将一半将兵团结听候本司缓急勾抽今年十月内据淮西蕲黄等州探报寇伪贼马万数浩瀚侵犯光州及庐寿等处缘本司别无军马可以控扼沿江要害去处遂劄下?吉州起发已团结下一半将兵前来应副分布使唤除吉州发到三百人外其?州见管将兵二千九百余人合行起发一半一千四百余人本州占吝妄以盗贼为名并不肯起发一人一骑本司已两具奏闻及申都督行府蒙朝廷行下?州限一日分析不起发因依及都督行府劄子如本司勾抽诸州军兵守臣辄敢占吝不即发遣自合按劾申奏本司亦累劄下及遣使臣前去催促并不依应今来淮西等处贼马已为诸路大兵讨杀各已退遁沿江一带平宁本司目下不须前件将兵已劄下?州权免起发别听指挥外照会一路将兵依法合听帅司节制又有近降朝廷指挥许本司於防秋警急之际起发使唤其?州守臣妄以盗贼为名占吝不遣不惟有违本司节制亦不遵奉朝廷指挥虽今来沿江幸保无虞窃虑向後缓急之际难以调度及其余州军仿倣解体不复遵禀节制缓急有误国事臣以人微望轻不足表率一路已具奏闻乞先次罢黜外所有?州弛慢官吏已送袁州取勘伏望圣慈详酌施行

小贴子

契勘洪州北至淮南界二百余里南至?州十五余程将兵尽在?州防秋之际若不先期起发必不及事兼?州盗贼比之春夏间十无二三虽有些小皆是残党其存留一半将兵及本州诸县巡尉弓兵又不下千余人自足措置弹压今来?州官吏全不体念事有轻重妄以盗贼为名占吝不遣若不蒙朝廷略赐施行委是帅司虚设缓急之际难以任责伏望圣察

梁谿集卷九十二

卷九十三

钦定四库全书

梁谿集卷九十三 宋 李纲 撰

表劄奏议五十五

乞轮差将兵赴帅司驻劄奏状

奏陈生擒伪齐贼衆劄子

獎諭賑济诏书 谢獎諭表

乞宫观奏状 再乞宫观奏状

不允宫观诏书

同运司乞兵捕?贼奏状

乞沿淮汉修筑城垒劄子

乞纳级计功推赏劄子

乞用瓦木盖置营房劄子

乞轮差将兵赴帅司驻劄奏状

契勘洪州未经兵火以前系本路马步军都总管司画奉圣旨?州所屯东南第六将兵每上下半年分轮一半赴洪州驻劄後來洪州经兵火残破建炎四年内罢帅隶属江州路安抚司并拨?州隶属鄂州系湖北路?州缘此申请续降指挥令洪州将东南第六将起到人兵尽数扫归元来去处至绍兴元年内洪州复置帅司系安抚制置大使蒙朝廷差兵二万人其?州却拨隶本路缘已有上件军马帅司不曾陈乞依旧勾抽一半将兵前来更戍今来?州不知有前项因依习成年例称有盗贼占吝将兵不肯发遣洪州虽系帅司其元差兵二万人节次拨隶他将祇有统制官申世景计千余人委是缓急使唤不足难以分布防秋及弹压一路伏望圣慈详酌特降睿旨许依元降指挥将本路所管将兵上下半年轮差一半洪州驻劄仍令?州依旧例逐旋桩办钱粮前来支給庶几缓急不致依前占吝有误国事

奏陈生擒伪齐贼衆劄子

臣窃见近日诸将获捷其捷报内并称生擒伪齐贼衆多者以万数少者亦不下数千人除愿充军外余皆给据放散所获粮斛多者十余万石少者亦不下数万除给散外尽皆焚毁契勘诸路招捕盗贼即有给据放散归业之理今来伪齐贼党虽元系朝廷赤子缘州县未尽收复其给据之人寔无所归若令依旧归伪齐州县将来不免又被驱胁从军死於锋刃诚可矜悯今江淮间旷土甚多见措置营田全少人夫可以耕作臣愚伏望特降睿旨行下诸将今後生擒到伪齐贼衆除拣选愿充军外余人并管押赴江淮荆湖逐路帅司令措置分俵充营田使唤寔为利便其所获粮斛亦乞指挥务令爱惜或可保守或可般运或可给散随宜措置勿令焚毁以为将来大兵就粮之资寔为得策伏望圣慈特赐详察

獎諭賑濟詔書

勅李某省所奏賑濟飢民招還流亡事具悉朕臨朝愿治當寧興嗟念百姓之多艱恐一夫之失所而去歲亢旱遍及江湖誦云漢之詩而不敢康致桑林之禱而不敢怠申飭使者分拯黎元移粟他州備修荒政究茲惠術責在帥臣惟予廊廟旧弼之賢能體國家勤恤之意撫綏罷病安輯流亡方略敷施功效顯著推霖雨之余潤活一路之生靈眷言忠勤寔副倚賴為之嘉嘆至于再三故茲獎諭想宜知悉

謝獎諭表

臣某言伏奉詔書以臣賑濟飢民招還流亡特加獎諭臣已望闕謝恩祇受訖者宣化承流本藩方之職守念功揚善乃國家之憲章拜賜非宜以榮為愧【中謝】竊以天地之盈虛有常數堯湯之水旱無飢民惟人事之允修宜天災之靡害爰自兵火抗攘之後初無倉廩積粟之儲歲一不登野有飢殍賴宸衷之軫慮底黎庶之咸寧惟上聖博施之仁衆宜協力活一路生靈之命臣獨何功濫膺華袞之褒益重素餐之責此蓋伏遇皇帝陛下法天覆幬如日照臨周知臣下之勤勞寸長必錄曲示朝廷之禮貌細札屢頒致茲孱陋之資亦冒便蕃之寵病牛卧壠嗟筋力之易疲倦鳥思林期樊籠之可脫已上投閑之請愿施從欲之恩誓畢此生仰酬洪造

乞宮觀奏狀

右某伏奉詔書以臣近具狀奏聞乞罷帥臣之任除一在外宮觀不允所乞仰荷聖恩第深感涕伏念臣孤陋無取叨冒已多久居患難之中但有退休之志誤承恩獎起帥大藩詔旨屢頒不容遜避黽勉就職倏忽踰年雖殫夙夜之勤曾蔑涓埃之補素餐之責啓處不遑兼臣多病早衰心力凋耗忧思健忘拜跪艱難近日以來頻在假故深恐妨廢職事有辜朝廷委寄之意屢丐閑散實以愚誠控告君父非敢備禮况今車駕巡幸建康江西一路号为上流重鎮在吳則周瑜魯肅之所屯守在晉則溫峤陶侃之所鎮臨宜得精力克壯之臣付以御侮折冲之任如臣不材衰病豈可冒居伏望聖慈矜憐旧物曲賜保全特降睿旨依臣所乞除在外宮觀差遣任便居住庶几晚節末路猶有可言天地大恩蝼蚁難報干冒宸聰伏俟斧鉞之戮臣无任祈懇激切之至

再乞宫观奏状

右臣近具奏闻以臣衰病日加心力不逮深虑有误朝廷委任乞罢帅守除一在外宫观未奉回降指挥窃见都进奏院报左司谏陈公辅乞去以靖康间士庶伏阙为人诬其鼓倡至今犹未辨白为言伏念臣当时遭谤尤甚虽尝蒙渊圣皇帝特降诏书宣示四方而仇怨至今以之籍口以积年往事不敢复自辨明至使谏臣援以求去在臣愚分其何敢安伏望圣慈特降睿旨检会臣前奏速赐指挥除臣宫观差遣置之闲散庶几保全晚节不致上累国体臣无任惶惧战越祈恳之至

不允宫观诏书

勅李某所奏乞除宫观差遣事具悉惟豫章之故郡实吴会之扞关控制上流巩固南服以卿辅弼宽吾顾忧抚潢池弄兵之民当饥馑相望之後易彼俭岁化为丰年治最彰闻玺书屡下方倚蕃宣之重共图社稷之安乃抗封章恳祈避谤且伏阙之往事皆不根之浮辞排邪议以用卿断由朕志守夙心而自信无恤人言勿复有云往安厥位所请宜不允故兹诏示想宜知悉春暖卿比平安好遣书指不多及

同运司乞兵捕?贼奏状

据吉州申契勘?贼谢小鬼尹宝谢凯等结集二千余人皆是强悍累次作过徒党自?州兴国县前来侵犯本州庐陵太和永丰吉水县管下虏劫作过於十二月二十八日冲入永丰县正月初五日冲入吉水县杀人放火已遣发封武节统押诸头项官兵会合掩杀因官兵稀少头回溃散已再差封武节整龔军马向前讨捕今月初六日在吉水县七里逢贼接战势力不加溃散内黄从义被虏袁吉州都巡伤中封武节未见下落乞差官兵前来应援安抚制置司除已差申世景下将官马仙带领所部兵三百人及统领官王彦选拣精锐人兵四百人前去应援捉杀外契勘今来春首正系州县催纳苗米装发纲运及人户耕种之时其?贼谢小鬼等结集凶徒作过侵犯吉州诸县旁近州县类皆警扰有妨官司受纳装纲及百姓耕作安抚制置司虽已遣发人兵前去应援缘祗有申世景一项军马一千余人除遣发外人数不多窃虑贼势猖獗难以扞御虽已割下?州及东南第六将分差将官人兵前来策应又恐?州守臣孙佑依前占吝不肯遣发致令贼衆滋蔓筠袁吉州素来凶恶之人递相仿倣作过为患不细伏望朝廷特降指挥於近便处疾速摘那遣发一项军马三二千人前来权听安抚制置司节制会合捉杀所有钱粮乞於本路近便州军上供钱米内支拨不以远近前去讨捕仍乞朝廷割下?州守臣不得依前占吝将兵公共協力措置庶几凶贼早得平殄一方宁息须至奏闻者

乞沿淮汉修筑城垒劄子

臣伏覩手诏车驾将乘兹春律驻蹕建康此诚至当甚盛之举也臣昨奉诏书条具边防利害尝论驻蹕建康为措置之宜所当先者然其说谓淮南有藩篱之固则建康可都宜命诸将移重兵於江北料理营田葺治城垒则藩篱可成今大将既已移屯矣营田既已施行矣楚泗既

已修筑城垒矣惟是沿淮如庐寿沿汉江如襄邓等处尚未措画臣愿陛下降诏刘光世岳飞乘士卒之暇以渐修筑如韩世忠之於楚张俊之於盱眙杨沂中之於泗使名城坚垒縣亘相望以张国势以讐敌心又命朝廷选通知古今臣僚按行淮汉深考古迹要害控扼之地如濡须坞牛渚圻之类筑垒屯兵益务自固使犬羊无侵突之虞貔虎有蓄锐之利以守则固以战则胜此今日之上策也夫守战一道也能固守而後能进战是守者进之基也譬如奕碁之家凡欲胜人先须自固此言虽小可以喻大今陛下既已断自渊衷不贰不疑驻蹕建康以承天意矣伏望圣慈益修战守之备以建中兴之功天下不胜幸甚臣以衰病见丐闲散不胜臣子爱君忧国之诚辄复自竭冒昧以闻或有可□亦臣仰报圣恩之万一也干渎天聪臣无任惶惧战越之至

乞纳级计功推赏劄子

臣伏见祖宗旧制军功赏格以首级为法每获一级或转官资或支银绢是以当时赏功核实无伪滥之弊自近年以来纳级计功之法废全军推赏之制行诸将告捷皆以弃头不斫横屍满野推堕崖谷沈溺江湖不可计数为言遂使有司不得核实朝廷无所考据一军千人则千人推赏一军万人则万人计功殫官爵不足以褒宠竭府库不足以锡賚岁用之广百倍往时罄百姓之脂膏耗朝廷之根本日益月增殊无艺极臣未见其可也今者车驾巡幸建康将定恢复中原之策则所以懋赏报功使将士知劝节以制度使国用不匮不可不深为之虑也臣愚伏望圣慈特降睿旨今後诸将告捷并计级数不得以弃头不斫横屍满野推堕崖谷沈溺江湖为言除保明验实计级推赏外其有摧锋破敌立到奇功之人虽不获级别许保奏优异推恩庶几实立功效之人有所激劝而朝廷无滥赏之费戡乱定功不难致也取进止

乞用瓦木盖置营房劄子

臣伏见朝廷以沿江州郡近多火灾虑有奸细作过累降指挥严行禁戢事理固当如此然臣窃谓军马屯聚去处往往取办一时祇以茆竹蓆?之属盖搭房舍以省功力一有遗漏不可救止火力所及官司屋宇亦遭焚爇至及万家或靡有孑遗者如前日临城镇江太平州之类是也今车驾巡幸建康千乘万骑理当建置营房屯驻将士谓宜寬商贾以招徠材植置官窑以烧变磚瓦下傍近州县以摘那工匠选有材者专董其事不数月久即见就绪仍禁止民间自今不得以茆竹盖屋已盖造者渐行修换严保伍巡逻之法谨防虞器具之备以絶回祿之患其余州郡有军马屯聚去处亦可依此施行庶几火不能作人得安堵区区愚虑干冒天聪取进止

梁谿集卷九十三

卷九十四

钦定四库全书

梁谿集卷九十四 宋 李纲 撰

表劄奏议五十六

道君太上皇帝升遐慰表

宁德皇后上僊慰表

乞推广孝思益修军政劄子

车驾巡幸建康起居表

论建中兴之功劄子

论举直言极谏之士劄子

乞不必远召将帅劄子

乞差兵会合措置处寇奏状

道君太上皇帝升遐慰表

臣某言今月初六日准尚书省劄子正月二十五日三省枢密院同奉圣旨何苏奏使回得大金国右副元帅书具报道君太上皇帝久违和豫厌世升遐祸变非常五情崩溃叩地号天无所迨及凡在臣庶悉同哀慕臣已率在州官吏於今月初七日举哀成服讫者国家鍾九六之运銓輿有沙漠之行遽厌弃於人寰遂上宾於帝所徒抱遗弓之恨莫闻凭几之言臣民痛心天地改色臣某诚哀诚痛顿首顿首伏以道君太上皇帝圣由天纵道本生知储精十闰之间图治百王之上逊禅侔於尧舜忧勤过於禹汤适遭丑类之凭陵因致翠华之播荡关河万里霜露十年朔野驰心犹伫八龙之返使輶通问空纏九土之悲恭惟皇帝陛下备极人伦敦崇圣孝孺慕不忘於宵旰深思欲见於羹墙尝胆枕戈夙讲奉迎之计问安视膳阻伸致养之诚罹此闵艰何以堪处伏望为宗社之大计副生灵之至情少抑圣怀俯从礼制冀昊穹之悔祸乘将士之奋忠报不共戴天之讎神人所助建中兴复古之烈华夏永宁

宁德皇后上仙慰表

臣某言本月初六日准尚书省劄子正月二十五日三省枢密院同奉圣旨何苏奉使回得大金国右副元帅书具报道君太上皇帝久违和豫厌世升遐宁德皇后亦已上仙祸变非常五情崩溃叩地号天无所迨及凡在臣庶悉同哀慕臣已率在州官吏於今月初七日举哀成服讫者天柱倾而絶地维日华亏而沈月魄矧陟方於遐域尤軫慕於圣怀承命震惊拊心摧殒臣某诚哀诚痛顿首顿首伏以宁德皇后体俪宸极德合坤灵上皇资内助之贤渊圣严母仪之奉徽音流乎海宇懿范着於宫闈遭国步之艰难从銮輿而出狩惟备尝於险阻致或爽於兴居问寝龙楼莫遂九重之养传音沙漠空遗万国之悲恭惟皇帝陛下夙蕴孝思永怀慈训以富贵崇高而不得尽人子之志以兵威强盛而未能报敌国之仇忽凶讟之遽闻谅至情之曷处念四海乱离之未靖膺两宫寄托之匪轻尝胆有为冀刷凭陵之耻茹荼虽痛愿宽哀慕之情用慰在天之灵是为报亲之义

乞推广孝思益修军政劄子

臣伏覩皇帝陛下以奉使何苏回得金国右副元帅书报道君太上皇帝久违和豫厌世升遐宁德皇后亦已上仙圣情追慕孝思罔极颜色之戚哭泣之哀羣臣不忍仰视传於四方莫不殒涕虽遵国家旧制以日易月而宫中自行三年之丧虽俯徇宰执百官之请七降批答始以军事方棘不得已而从之犹施素幄听政於几筵之侧圣孝隆厚度越百王简册所载未之有也臣闻之礼经曰父母之讎不与共戴天为匹夫而能复讎者前史美之况於万乘之主乎金人不道以其诈谋陵中国破都城邀两宫以北狩而置之漠北苦寒之野饮食衣服医药皆不得如意以至大故此陛下不共戴天之讎也讟音之来既不以时又以朝廷新有武功始遣使回具报凶问皆其奸计岂诚意哉遣发使人奔问讳日奉迎梓宫在人情固不可後然或从或违处其度内皆未可知臣恐议者又以此为敌人之重有害於吾自治自强之术则在朝廷不得不先定其策也自建炎以来为和议所误专务退避国势日蹙主威日削失天下者太半方幸近年天啓宸衷悟和议退避之非为治具进讨之计天声渐振寇伪震讐将有恢复之期傥或缘此堕其计中小不忍以乱大谋则为害有不可胜言者矣昔新城三老说高祖曰明其为贼敌乃可服高祖听之三军縞素为义帝发哀率诸侯东向以诛项籍而汉楚胜败之势遂分今陛下诏屯边将士不用旧例尽为道君太上皇帝举哀其策得矣臣闻将士感愤至有感哭连日不辍者人心戴宋追思道君太上皇帝恩德久而不忘於此可见臣愿陛下顺人心承天意益广孝恩施之行事枕戈尝胆修政攘戎以报不天之讎以刷中国之耻一饮饴一寝兴无不以两宫大故为念则必有合於天人之愿者矣匹夫之孝感动天地至有鱼跃于水笋生于冬者而况陛下贵为天子富有四海孝悌之至通于神明圣心感格所欲其有不从者哉臣以愚直荷道君太上皇帝知遇虽尝抵牾终不弃捐奉迎南都恩抚甚渥闻问哀恸不如无生惟有孤忠愿纳之陛下故敢罄其狂瞽不避斧钺之诛妄有献陈伏望圣慈不以人废言与五六大臣深议而力行之天下不胜幸甚干冒天聪取进止

车驾巡幸建康起居表

臣某言伏覩都进奏院报车驾以二月二十七日进发巡幸建康府者乾旋坤转共知天意之回雷动风行顿觉皇威之畅御六龙以于迈屯万乘以要区三灵欢欣四海呼舞【中贺】窃

以江左之形胜莫如建邺之雄浑自昔称帝王之州於今为东南之会控引淮海襟带江湖岂惟民物之阜蕃寔乃舟车之辐凑玉麟神玺晋以中兴虎踞龙蟠吴资用武兵戈之後王气方隆皇帝陛下慨国步之多艰悯帝都之未复因之天险济以人谋高祖之固关中战必胜而攻必取光武之保河内利则伸而钝则蟠赤县神州行遂定都於河洛灵川沃野聊兹临幸於江山方将张皇六师震叠中土驾馭貔虎翦屠鲸鲵扫陵寢之氛埃葺宗庙之钟虞恢复故境再臻太平而臣误被宸恩滥当阃寄虽长堤新廐窃慕於韦丹顾重镇上流有慙於温峤心驰魏阙莫参鸳鹭之行地近日畿益倾葵藿之志臣无任瞻天望圣激切屏营之至谨遣左朝奉郎充本司干办公事韩岳诣行在所奉表起居以闻臣某诚惶诚惧顿首顿首谨言

论建中兴之功劄子

臣伏觀车驾以仲春令辰发轍吴门巡幸建康断自宸衷不貳不疑慨然有恢复土宇扫清中原拯济蒸黎戡定祸乱克翦大憝刷耻复仇之志天下臣子莫不望风跂踵踊跃愿少须臾无死以观中兴之功诚甚盛之举也臣窃观自古建功立事扶持社稷之臣未尝不以立志为先申包胥闻伍员有覆楚之言则曰我必存之其後哭秦庭以乞师卒如其志张柬之语武氏於荆南江中其後卒复唐祚垂祀三百一夫发念其烈如此而况以圣明之资为万乘之主乎高祖之志见於不肯郁郁久居汉中而与韩信论定三秦之策光武之志见於披輿地图於信都城楼上与邓禹论天下大计此皆志定於前功成於後初似落落难合而卒能建大功立大名定大业功施於当年名垂於後世载在典册不可诬也恭惟皇帝陛下天锡勇智运属艰难遵养时晦之久应机立断幡然改图思欲拨乱兴衰光复祖宗之大业故亲总六师以临江表舍去吴越而幸建康渐为北伐之计志虑规模可谓宏远矣臣愿陛下益广圣志扩而充之与神为谋日新其德勿以去冬骤胜而自怠勿以日前粗定而自安凡可以致中兴之治者无不为之凡可以害中兴之功者无不去之有所规画措置必以天下为度必以施於长久可传於後世为法则中兴不难致矣夫中兴之於用兵止是一事要以修政事信赏刑明是非别邪正招徕人材鼓作士气爱惜民力顺导衆心为先数者既备则士奋於朝农安於野谷粟充盈财用不匮将帅辑睦士卒乐战用兵其有不胜者哉方今黠寇虽强不仁不义专务变诈暴虐以胁迫天下神怒人愤莫之与亲自古岂有如此而能久立国者正如隆冬固陰沍寒层冰千里阳和既回应时消释此理之必至无足怪也昔者范蠡说越王勾践以持盈者与天定倾者与人节事者与地勾践用之国以富强然又必以人事与天时相参然後乃能成功遂以报吴臣窃观国家去岁诸路丰穰今春雨阳调适又将丰岁是在我者得天时矣正当修人事以应之以我之无衅待彼之有衅则戡乱定功役不再籍夫何远之有臣以固陋自靖康以来与闻国论独持战守之策不敢以和议为然今十有二年矣孤危寡与屡遭谤诬仰赖圣明曲加照察脱身九死之滨今得承乏待罪方面恭闻戎辂临驻江干将大有为以成戡定之烈欣幸之情倍万常品顾虽衰病尚庶几未填沟壑间获观陛下恢复中原摅愤千古志愿毕矣辄罄狂瞽干冒天威

论举直言极諫之士劄子

臣伏觀二月九日手诏以太阳有异氛气四合令中外侍从之臣遵前後诏书各举能直言极

諫之士一人將諫以過失次第施行用承天意有以見陛下克謹天戒思聞諫言銷弭變故以助中興之運甚盛德也臣竊考西漢舉賢良文學之士詳延于庭如董仲舒公孫弘晁錯之徒不過對策一篇指明時政得失至本朝設賢良方正能直言極諫科始有進卷及試六論乃對廷策其六論題雜出於經子史注疏之間所以求卓識洽聞之士號為制科其得人如富弼張方平夏竦皆致宰輔其次如錢易錢明逸孔文仲武仲蘇軾蘇轍兄弟之流皆為名士論議有補於國家然制科之舉貫穿古今汪洋浩渺非強記博識積以歲時未易能究其業所以朝廷近年復置此科未有應令者無足怪也今者陛下以天變之故詔中外侍從之臣遵前後詔書各舉能直言極諫之士臣深慮有司拘以進卷六論牽制舉者難於得人無以仰副陛下咨訪闕失寅畏天戒之意臣愚欲望聖慈特降睿旨將今來所舉直言極諫之士與免進卷六論祇令對策于廷仍於制策內許其展盡無隱庶幾直言嘉謨得以上聞其進卷六論自以待應科目之士天下不勝幸甚取進止

乞不必遠召將帥劄子

臣伏觀陛下駕御將帥恩禮兼隆至有不遠千里召赴行闕者燕射錫賚賜予優渥此誠足以得其心而用其力也將帥荷眷遇之厚爭先望天光而聆玉音竭蹶造朝惟恐居後此亦臣子之至情然臣聞古之善為將帥者非有大事不去屯所文帝欲勞棘門灞上細柳之軍則親臨之凡以三軍之命系於主帥機事之來間不容發使帥不在軍敵人覘而知之卒有警急何以應敵今將帥既輕千里而入覲又有進對燕犒之留連邊境有虞誠不可不慮伏望聖慈留神深念自今非有大謀議不必遠召將帥如有燕賜之恩遣近臣即其軍中可也庶幾將帥得以畢精進慮為陛下敵忾御侮以圖恢復將來武功告成中國乂安之後念功賞勞出於曲賜朝夕進見體貌有加鐘鼓不作則遣使以訪之惟陛下所幸耳愚慮所及冒昧以聞死有余罪惟陛下裁察取進止

乞差兵會合措置寇奏狀

契勘?州管下盜賊多是舊來招安已受官資及已有差遣不曾起發赴任離去巢穴之人近緣知州孫佑措置討捕有討捕之意無討捕之術謀慮不密漏泄事機致令皆懷反側結集復行作過如周十隆張大閑謝凱尹寶謝小鬼等頭項不一多者數千人少者數百人遞互入火劫掠鄉村殘破縣邑?州管下如興國雩都?化瑞金等縣并遭焚毀謝小鬼等近者侵犯吉州界分殘破永豐吉水等縣逼近州城又於太和萬載縣界內盤泊作過本司遣發申世景下將官馬仙統押軍馬前去會合巡尉及吉州將兵追襲斬殺五百餘級殺獲首領蕭破洞賊勢方沮又遣統領官王彥將官王勝各統所部軍馬前去永豐興國縣界會合巡尉討捕張大閑周十隆尹寶李安淨等除近據?州將官曹綱申殺獲尹寶賊徒不計數目及據統領官王彥申已討蕩永豐縣賊沈三千軍生擒賊首殺獲三百餘人并據吉州申張大閑已就招安見赴州公參及據?州將官何榮申殺敗周十隆等復奪興國縣追襲至贛縣界殺死賊徒五百餘人又據將官馬仙申殺賊徐聳賊徒生擒徐聳已解吉州根勘本司已具逐項因依申朝廷外竊緣近來周十隆與謝小鬼尹寶殘黨及自余賊徒丁二十一謝二十八花張細計明寶丁和尚呂添男謝凱陳八梗廖車頭十等互相合火人數衆多雖累次殺敗尚未衰息本司已劄下將官馬仙

統領官王彥專一於永豐興國縣措置討捕并近蒙朝廷差到福建路統制李貴下軍馬前來會合今月初二日據李貴申已將帶所部軍馬前來吉州界首會合捉殺所有隨軍老小乞於吉州屯泊本司已割吉州踏逐官屋及寺院屯泊并應副錢糧外契勘賊累年出沒作過正如溪洞獠人不復知有王化致令一州一州財賦催理不行傍近郡縣皆被其毒為害甚大若朝廷必欲掃蕩巢穴窮究根株為一勞永逸之計非壓以重兵且招且捕將招出头首并桀黠徒黨押赴軍前使喚使良民漸次歸業未見其可兼州南安軍見有廣南劉宣湖南李才古政譚城鄧宣芳正等賊徒各數千人頭項不一李貴軍馬人數不多未可全然倚辦竊見湖北京西路宣撫使岳飛下軍將多在鄂州屯駐見於本路起發錢糧前去應副若乘此邊境寧息別無探報之時選擇得力統制統領官摘那數千人前來本路就糧權聽本司節制令與李貴及本路兵將會合措置不數月間決可平殄將來盜賊既平之後亦須且留李貴軍馬屯泊吉州與本路兵將相為表里彈壓使殘黨不敢復出嘯聚作過或有作過之人即時討殺此為得策若目前討捕不遣重兵只據見在兵將竊緣賊火數多官軍有限勢力疲乏別無策應難以成功若將來賊平之後不別屯軍馬但以賊付之本路將兵軍力單弱必待殘破州縣屠害生靈一方震擾乃始申告朝廷遣兵應援緩不及事為患不細兼吉州殘破縣分賊平之後亦合體究着實蠲放稅租使民戶得以安業除已遣在朝奉郎本司干辦公事韓昱詣朝廷稟議外伏望聖慈特降睿旨令朝廷詳酌措置施行

梁谿集卷九十四

<集部,別集類,南宋建炎至德佑,梁谿集>

卷九十五

钦定四库全书

梁谿集卷九十五 宋 李纲 撰表劄奏议五十七

乞差赵不华等充招捉盗贼官奏状

乞就都督府发遣得力统制官部押三二千人前来使唤奏状

差官体究周十隆等受招安及令李贵差人入寨告谕奏状

辞免转金紫光禄大夫奏状

周十隆不从招抚李贵进兵杀散乞差岳飞下兵就粮讨捕奏状

乞差赵不华等充招捉盗贼官奏状

契勘本路处吉筠袁抚州南安建昌军等处常有盗贼结集作过其初微细正缘巡尉不切用心向前缉捕渐至滋蔓及至会合诸处巡尉又无节制统一乍前乍却遂令贼徒得生奸计招诱徒党恣行劫掠暨遣官兵前去讨杀贼徒即时分散藏伏更无踪绪官军既退又复啸聚出没作过若不别作措置深虑搔扰州县残害民良不得安业为患未已今相度欲於本司置措置招捉盗贼官两员不拘京朝官选人择有风力材干曾经捕盗有功绩之人充上项差遣依本司干办公事理为资任除身分请给外遇差出措置应本路州军有盗贼窃发去处合行会合巡尉讨捕招捉盗贼破券一道其供给等并於本司钱内支破应本路州军有盗贼窃发去处合行会合巡尉讨捕即差措置招捉官前去措置统率讨捕其巡尉怯懦不肯向前之人并许申本司体究得实按劾奏闻庶几巡尉有所统一協力向前不致误事盗贼易得衰息今窃见右承议郎前知临江军新淦县事赵不华右儒林郎筠州军事判官冯汝嘉逐官委有材干风力在任捉获凶恶强盗人数甚多杀获贼首邹乌八及招到单子珍等绩效尤着本司已保明乞优异推恩外如蒙朝廷许置上项员阙即乞差前件官两员充填

小贴子

契勘本路吉等州盗贼时复作过即与其他诸路帅司事体不同兼本司减罢文臣准备差遣五员外止有干办官五员节次蒙朝廷差委前去逐州催促军器和余军储等事委是阙官今来所乞措置招捉盗贼官两员如止许暂时措置候盗贼宁息日罢亦乞朝廷特赐详酌施行

契勘近日贼谢小鬼等侵犯吉州及张大闲周十隆等见在永丰兴国县界首作过本司已遣发兵将前去措置外其永丰县又有一项李安净啸聚徒党劫掠作过人数渐多契勘右承议

郎前知临江军新淦县事赵不华见得替在洪州寄居本司已逐急依所得便宜指挥差本官权充措置招捉盗贼官前去统率巡尉讨捕李安净等外伏乞睿照

乞就都督府遣发得力统制官部押三二千人前来使唤奏状

据统制官李贵申?贼周十隆节次差人前去说谕朝廷德意许之自新前来公参其周十隆并不遵禀及故违江西安抚制置大使司所立日限反复并不从招抚出参依近降指挥合行讨捕兼准枢密院劄子若不听从即会合本路应干捕盗官兵等并力剿捕外窃缘周十隆所居巢穴系在山谷深僻去处徒党衆多据贵所管官兵委是分布不着除已申?州差发将兵外申本司乞差兵前来会合措置剿捕施行本司契勘所管申世景一军止及一千余人见今差出将官马仙王胜孟通统领官王彦等前去讨捕吉州贼尹宝临江军贼李安净?州?化贼赖漏八袁州石铁牌潘小叔等已起发过一千二百余人委是无兵可以差拨窃缘周十隆等系?州剧寇所养枪杖手三千余人谢小鬼二千余人其余头首如谢先谢谌张收万云田玉卢超张迪等各系招安已授官资差充诸州措使未曾赴任之人每名所养枪杖手皆不下三二千人从来并听伏周十隆使唤今来周十隆既不遵禀朝廷指挥公参致令官军进讨决须啸聚徒党抗拒官兵若官军人数单弱不能讨捕即其余头项首领定须仿倣作过为患不细本司累具申呈乞就便差拨岳宣抚下一项军马前来同共措置至今未奉回降指挥今据统制官李贵前项申述事势迫急伏乞特降指挥早赐差拨或只就都督府遣发得力统制官部押三二千人星夜前来应副使唤不过一两月间决可擒捕周十隆谢小鬼等其余首领亦可以重兵弹压使之出离巢穴永絶後患

差官体究周十隆等受招安及令李贵差人入寨告谕奏状

勘会?州兴国县管下有周十隆钱响谢小鬼等结集徒党作过本司节次依奉朝廷指挥劄下统制官李贵措置招捕近虽据李贵申称贼首周十隆等愿受招安祇是发遣到次首领锤珉钱宝刘集三名赴?州公参外其正首领周十隆等各未曾出官公参及李贵所给公据五千道差人送入贼寨放散徒党亦祇是据凭贼人具到人数给与公据并不曾当官逐一拣放本司寻访闻得贼徒收领公据在寨实未曾放散徒衆归业见今依前恃嶮不肯出参遂差使臣李俊齎榜劄付李贵差人指引入寨说谕头首周十隆等再限三日出官公参及令将徒党当官逐人拣选存留强壮桀黠之人同正次首领并行解赴本司如出违所立日限迁延不出即会合官兵并力措置讨杀及具状申奏朝廷去讫续准枢密院三月十四日劄子为周十隆累经招安反复作过奉圣旨除贼首周十隆一名不赦外其余徒衆许其自新本司缘为逐人已有愿受招安之意及再立限差人入寨说谕亦於今月十一日再具因依申奏乞依本司已行事理催促招谕候到司日依元降指挥特与招抚去後至十二日准枢密院劄子周十隆等愿受招安虽已降指挥不赦缘今来既有自新之意理宜寬貸劄付本司指挥李贵疾速措置招抚及十三日再据李贵申备据兴国县状称周全钱响谢云於三月二十三日赴县出头公参了当即或归各人本住处讫本司亦已不住劄李贵催促说谕正次头首周全等依限赴军前公参同拣选到强壮徒伴解发前来本司外今访闻得统制官李贵备据兴国县所申周全等赴本县公参即不曾入县其逐人将带徒党枪杖手数百人前来城外下寨系本县知县出城

接见周十隆等便当公参并李贵先申周十隆等愿受招安已给公据五千道前去其徒党亦未放散除已差委本司准备差遣右承直郎钱受之躬亲起发前去密切体究周十隆等的实受招安事李保明供申仍计会李贵差人入寨分明告谕周十隆钱响谢小鬼等体念朝廷宽大之恩催促依限同以次首领及一行徒党赴李贵军前公参逐一当官拣选被驱虏胁从及老弱等人放散外及强壮桀黠人并一行正次首领令李贵量留人马在?州弹压将带自余人马管押赴司出头若违限迁延不出意在欺罔朝廷不禀本司指挥即行进兵措置讨捕须要擒获贼首不管走透

小贴子

契勘?寇自来作过递相关借枪杖手以助声势本司切虑周十隆既不伏公参官军进讨必於诸头项下借枪杖手已出榜晓谕今来官兵止是讨捕不遵禀朝廷指挥周十隆谢小鬼两人其余首领谢先等不得关借枪杖手如有暗行关借之人本司察探得知将来朝廷遣发大兵并须一例讨杀如有却能擒捕周十隆谢小鬼等赴官并依赏格保奏推赏亦乞睿旨

辞免转金紫光禄大夫奏状

右臣准尚书省劄子四月十六日三省枢密院同奉圣旨李某典藩踰年民安盗息宽朕忧顾宜有褒嘉可特转金紫光禄大夫劄送臣照会仰荷圣恩第深感涕伏念臣孤陋无取叨冒已久居患难之中但有退休之志误蒙恩奖起帅大藩诏旨屡颁不容逊避黽勉就职倏忽踰年虽殚夙夜之勤曾灭?埃之补素餐之责啓处不遑廼蒙异恩特加迁秩无功之赏岂所敢当况今车驾巡幸建康江西一路号为上流重地在吴则周瑜鲁肃之所屯守在晋则温峤陶侃之所镇临宜得精力克壮之臣付以御侮折冲之任如臣不材衰病实难冒居伏望圣慈特降睿旨追寝成命仍检会臣累奏陈乞一在外官观差遣任便居住庶几晚节末路犹有可言天地大恩蝼蚁难报所有特转金紫光禄大夫恩命不敢祇受

周十隆不从招抚李贵进兵杀散乞差岳飞下兵就粮讨捕奏状

准枢密院都督府劄子枢密院奏勘会昨降指挥令李贵将带全军前去招捕?吉盗贼其本军已入江西界多日并未见申到招捕火数措置次第今据江西安抚制置大使司申?贼周十隆等於今年正月内结集贼徒在?化等县杀人放火作过大段猖獗显见本军迁延玩寇不为速行措置致贼滋蔓兼周十隆系累经招安授官後来反复作过理难容贷三月十四日奉圣旨除贼首周十隆一名不赦外其余徒衆许其自新仰李贵统率官兵疾速前去措置招捕须管生擒周十隆其擒获人依格推赏外更支钱一千贯招到徒党并特免罪将胁从并老弱人放令归业留强壮人随军使唤务要速得平殄无致迁延走逸滋长劄付本司催促措置招捕施行

右勘会前项周十隆等贼徒先准指挥令统制官李贵措置先行招抚如不听从即会合兵将巡尉并力剿捕本司遂不住催促李贵措置招捕近据李贵申差人賫旗榜入寨招安取到周

十隆钱响谢小鬼等愿受招安文状只是发遣到次首领锺珉等三名赴官外其正头首周十隆钱响谢小鬼等未曾赴官公参本军虽出给公据五千道差人送入贼寨放散徒党亦止是据凭贼人具到人数给与公据即不曾当官逐一拣放本司寻访闻贼徒收领公据在寨实未曾放散徒衆归业见今依前恃嶮不肯出参本司再於三月二十八日差使臣李俊等齎榜前去入寨说谕头首再限三日出参又割下李贵如周十隆等依得本司所立日限出官公参即将徒党逐一当官选拣将正次头首并强壮桀黠人存留并行解赴本司其被虏胁从及不堪披带人给据放令归业如出违今来所立日限迁延不出即会合官兵并力措置讨捕今准前项圣旨指挥除周十隆不赦外其余徒衆许其自新等事理本司契勘今来周十隆钱响谢小鬼等本司已依元降指挥再立日限差人前去说谕出官公参未到若便遵依今降指挥施行缘一行徒衆皆系久来附从周十隆作过之人窃虑本人诱惑驱率别致走透杀害平民卒难殄灭欲乞候见得周十隆等如依得本司差人说谕赴官公参陈放徒伴了当即候解发到本司日依朝廷元降指挥特与招抚若依前不伏出首即依今降圣旨指挥周十隆不赦行下统制官李贵等措置并力讨捕施行更合取自朝廷指挥

小帖子

契勘本司累具奏闻并申枢密院都督府乞就湖北京西路宣抚使司差拨兵将前来讨捕?贼未奉回降指挥今来朝廷灼见周十隆过恶已降圣旨指挥不赦势必用兵讨捕窃缘?州将兵系是土人多与贼情相通互相闪避不肯用命兼有其余贼火分擘前去捉杀所差到李贵下军马人数不多及本司官兵亦是单弱难以分布把截要害去处使不致走透深入巢穴必可擒捕今来只乞就岳飞下差拨三千人前来本路就粮讨贼不过三两月间便可讨荡又缘周十隆系?州前後作过群贼所宗若就擒捕其他群贼皆可措置平殄既已降指挥不赦而兵力不能胜之却致猖獗则为害必大伏望圣慈特赐详酌早降睿旨施行

契勘军行粮食为先若差他处军马前来讨捕?寇即须又有钱粮之费如蒙朝廷就近差拨岳飞下军马即於本路就支钱粮实爲利便亦乞圣察

梁谿集卷九十五

卷九十六

钦定四库全书

梁谿集卷九十六 宋 李纲 撰表劄奏议五十八

同诸司乞兵应副本路急阙使唤奏状

再辞免转官奏状

準省劄催诸州军起发大军米奏状

谢赐夏药兼银合茶药表

谢转金紫光禄大夫表

同诸司乞兵应副本路急阙使唤奏状

契勘本路自今年正月以来致已受招安人周十隆谢小鬼钱响等作过蒙朝廷差到统制官李贵部押军马前来措置招捕至今未见了当其邻近州县素来凶悍不逞之徒递相仿效啸聚猖獗头项不一帅司虽随宜遣发兵将前去讨捕缘军马单弱分俵不着以此贼徒窥见官军次第无所忌憚结集火数渐多滋长难制虽累具申奏朝廷就便遣发军马前来应副使唤至今多日未奉回降指挥逐司照对目即本路吉抚州南安临江建昌军管下皆有盗贼作过日逐不住据逐州军申乞差兵收捕逐项盗贼帅司见管统制官申世景下人兵除节次差出外别无兵将遣发今再具日近据州县申到盗贼已及差发兵将措置讨捕下项

一州兴国县贼首周十隆谢小鬼依奉朝廷指挥令催促统制官李贵措置招捕近据李贵申逐人愿受招抚除已发到钱响一名见在军前外其周十隆谢小鬼等并不体认朝廷宽恩许令自新之意一向推托不肯前来公参及给去公据亦不曾放散徒党故违帅司再立日限见依朝廷指挥会合州将兵讨杀未见了当

一据抚州等处申有州化县贼赖花十九赖漏八赖二十四赖十七及客贼李八卢四程念八邓军四罗赖九等纠合一千余人先侵建昌军南丰县界已次侵入抚州宜黄临川崇仁县冲散官兵杀人放火刼掠作过帅司已差申世景下将官王胜管押军兵二百余人前去会合巡尉讨捕及就差见在永丰县捕贼统领官王彦军兵四百余人取径路前去措置掩捕未见申到次第

一近据袁州申萍乡县界见有湖南贼石铁牌及王权苏胜陈老虎残党并吉州安福县潘小叔贺和尚等贼数头项合成一火刼掠作过本州差官兵巡尉收捕两次冲散杀死弓兵不少

见今猖獗人数已及七八百人别无官兵扞御委是危急帅司已逐急差元在吉州捕贼将官马仙三百余人前去讨杀至今未见申到次第

一据临江军申贼人李安净等虽被统领官王彦杀获一百余人擒次首范少七等一十余人外见有贼首李安净并残党未获出没作过已差将官孟通军马讨捕未得了当

一据吉州申贼徒尹宝等虽被将官马仙杀散及擒获尹宝全家父母妻子等有贼首尹宝等残党依旧啸聚作过未得了当

一又据吉州申有永新县贼王该等啸聚四百余人劫掠作过及虏去?州节推刘彦登家属见差巡尉前去招捕未获

一据南安军申近有侵犯城下作过贼人丘明残党古政芳正刘思同方全朱明谭诚邓宣等一千余人见在管下沙村等处作过帅司已劄差?州将兵三百人前去本军同巡尉措置讨捕未见申到了当一据?州申瑞金县贼蔡居道等纠集徒党二千余人拘执催税官权县裴汝能杀死人吏弓兵等劫夺去系官钱物见委官前去体究及劄下?州差将兵前去措置未见申到次第

一契勘?州管下已招安有名目差遣不曾起离巢穴之人除周全钱响外见有张收谢先谢谌万云田玉谢响卢超张迪等十数人各立山寨收养枪手各系三二千人平时听伏周全使唤今来李贵进兵其周全已与张收同共作过窃虑余人反侧不安别致生事帅司除已劄下李贵止系捕周全谢小鬼外不得以捕捉周全为名搔扰其余已受招安人引惹生事帅司虽已出榜晓谕亦须压以重兵使怀反侧之人不敢作过

右逐司契勘本路见有前件贼火头项不一帅司虽已分遣官军前去收捕缘止有申世景一项军马除火头辎重外可以出战不及千人差出讨捕每头项不过三百人伺候一处贼势稍衰又移往一处讨捕其差出兵将例皆暴露日久疲乏别无人兵可以策应抵替其李贵所部军马人数亦是不多深虑贼徒结集愈众轻视官兵转见滋蔓侵扰州县难以制御欲望圣慈体念一路事理非轻特赐睿旨检会帅司累奏就都督府差拨一头项军马三五千人员前来本路应副急阙使唤候盗贼宁息即时发遣归元来去处所贵有所倚仗临时不致误事

再辞免转官奏状

右臣近准尚书省劄子备奉圣旨以臣典藩踰年盗息民安宜有褒嘉特转金紫光禄大夫寻具奏辞免伏蒙圣恩降诏不允臣不胜惶惧感激之至臣窃以帅守之职当任一路之责非若列城膺一郡之寄而已本路自今春以来?寇作过惊扰旁郡虽遣兵讨捕寻即败获然以军马单弱之故未能扫荡巢穴穷其根株以宽朝廷忧顾罪戾是虞何功之有傥以盗息民安为名叨冒赏典公议谓何非独臣所未安实亦有累国体兼臣屡以衰病请闲见患疮痍久在假故深虑妨废职事复敢烦言伏望圣慈特降睿旨追寝成命以安愚分仍乞检会臣累奏除一在

外宫观差遣任便居住异时蒙被驱策誓极靡捐千冒天威无任战越

准省劄催诸州军起发大军米奏状

今月二十二日准行在入内内侍省降到金字牌御封六月十七日尚书省劄子节文降到指挥令江西转运司於去年上供等米内起发五十万硕前去江州桩管除近除豁二万二千二百余硕充一路数内多科之数一万硕应副洪州一万硕?州减免外有四十五万七千七百余硕虽近据逢运判具到已发四万七千硕亦未见申到的实起发纲解契勘朝廷见行措置军事其上件米斛旦暮便要支遣不可少有稽缓有误军食右已劄下转运司据未发米斛限七月十五日终须管一切数足外劄付本司更切严紧催促施行本司已即时牒转运司遵依圣旨指挥火急催发施行去後今据转运副使逢汝霖徐林公文契勘本路上供额米系以秋苗桩办自经兵火之後多有逃阁及间有灾伤年分所催税赋例皆不及旧额其上供之数逐年并蒙朝廷除豁祇以实催米数起发照对上供米旧额一百二十六万九千硕会计绍兴六年一路实催秋苗止有九十八万三千三百五十九硕一斗六升虽蒙减免上供一十六万九千硕外犹一十一万六千石系是实催苗米外虚数无所从出并和籴米减免三万外收籴三十七万石缘?筠州见有盗贼收籴未足截日通已籴三十四万三千五百九石六斗五升及紬绢折纳米五万六千八百一十三石六斗九升三合已上三色共实合发米一百三十八万三千六百八十二石五斗三合依准逐次所降指挥科拨内二十万石应副行营左护军四十万石岳太尉三十万石张少保十一万七千一百四十三石七斗六升三合就支外只有三十六万四千八百七十二石一斗系元拨付江州及改拨行营左护军米应付老小江州桩管之数近准五月四日都督府劄子指挥於上件改拨米内转发八万石往庐州截日通已支发过江州桩管米共一十万一百石外自余未发江州米二十六万余石见晓夕极力催督起发伏缘本路递年所催秋苗尽充上供外诸州不无逐急侵用数目见据洪州申科折糯米一万三千余石折科马料七百三十七石并据?州申秋苗止纳到四万余石遣兵招捕盗贼调发将兵支过口食别无从出不免侵支上供米九千一百余石已系知州孙佑自劾申奏及吉州申庐陵吉水永丰太和县共八千三百七十八户委被?贼烧劫逃移去年二税无从催理已委官覆实及申尚书省乞行阁放兼?州南安军盗贼未息见蒙朝廷遣兵收捕有合除豁数目并在上项实催苗米之内其合起赴江州米即无四十五万七千七百余石之数本司已节次开具前项秋税不及旧额等因依供申朝廷乞以实催籴到米数起发去讫今准前项指挥本司除已遵依紧行催督逐州军据合发米数火急依限起发外申本司并小贴子契勘本路逐年实催苗米每岁侵支残欠常不下十余万石且如绍兴三年计一十八万九千二百余石四年计三万三千五百余石五年系旱伤实催数少亦计十万一千余石所有绍兴六年实催计九十八万余石比之递年数多又缘盗贼未息且约侵支残欠一十五万石其未发江州米二十六万余石若除上项侵支残欠一十五万石约止有未起米一十一万余石通已发过一十余石共计二十一万余石系江州桩管之数又小贴子契勘所催秋苗从来每年有人户残零拖欠比年以军事紧急督责州县严行拘催如吉州有官人萧嗣宗郭振民临江军邹迪功等皆是抵顽不纳税赋并具申朝廷已皆行遣以此可见本司与州县非不用心督责严切止缘民户凋残盗贼尚多不无拖欠之数伏乞照会

右勘会江西一路自兵火残破之後又经旱灾人户凋耗虽去年稍得丰稔人户未尽归业田土荒废尚多谓如洪州分宁奉新等县人户所存才有十之三四其余县分号为多处不过十之六七通一路计之多寡相补才及承平之半税赋自然难以及额又加?州累年为盗贼猖獗税赋往往催科不行吉抚筠袁等州亦有盗贼残扰去处遂致苗税亦多拖欠若不以实入之数起发上供一切督迫州县必欲及承平额数不惟无所从出兼恐州县不免数外科敷重困人户非独不足以仰副朝廷宽恤之意亦使官吏虚负罪责所有转运司具到前项因依伏望圣慈详酌特降睿旨施行

谢赐夏药并银合茶药表

臣某言伏蒙圣恩特降中使传宣抚问赐臣暑药兼银合茶药臣已望阙谢恩祇受讫者悯藩方之修扞深轸天慈赐御府之匪颁远迁星使拜恩优渥拊已凌兢中谢皇帝陛下道格天渊仁渐动植總英豪而驾御复土宇之暇章知臣下之勤劳载隆体貌当炎蒸之鬱勃特示眷存北苑灵芽涤烦销渴上方珍剂愈病析醒顾臣何人亦膺此赐竭犬马之力愿尽瘁於衰年进药石之言誓少酬於鸿造

谢转金紫光禄大夫表

臣某言伏奉告命特转金紫光禄大夫累具奏辞免蒙降诏不允不得再有陈请臣已望阙谢恩祇受讫者假守踰年未塞剖符之责误恩增秩更叨出綽之荣虽具列於危惊曾莫回於渊听仰承明命弥切厚顔中谢伏念臣猥以琐才幸陪休运荷分阃一方之寄折长江千里之冲抚字虽劳曾未苏於凋瘵芟夷无术初莫变於剽轻乏龚遂渤海之能愧汲黯淮南之治佩牛带犊旧习犹存裹甲囊弓兹风未见宜在黜幽之典乃蒙褒进之恩抗章莫遂於循墙拜赐实同於临谷宠光若此报称谓何此盖伏遇皇帝陛下盛德包荒至仁善贷执赏罚之大柄示磨励之宏规每於臣邻曲加体貌致此懋赏滥及孤踪臣敢不深体眷怀益思勉励竭犬马之力虽莫报於乾坤遂麋鹿之心尚有祈於君父

梁谿集卷九十六

卷九十七

钦定四库全书

梁谿集卷九十七 宋 李纲 撰表劄奏议五十九

应副新?州张翬钱粮在职待罪奏状

乞屯兵江州防秋奏状

措置本路盗贼奏状

乞戒约捕贼乱行斫级希求功赏等奏状约束统兵官招捕盗贼奏状

乞将上供钱米应副李贵军马奏状

应副新?州张翬钱粮在职待罪奏状

勘会近奉圣旨令湖南差统制官步谅军马前来江西会合李贵措置盗贼权听本司节制其步谅统押官兵已到吉州本司寻行差拨前去?州驻劄措置盗贼权听新知?州张翬使唤去後今月初七日据张翬申契勘统制官步谅军马一行钱粮依先降指挥合系本路转运司应副今来转运司只行下?州令於税米内支钱於应副安抚司钱及转运司八色钱内支缘?州见今盗贼纵横诸县道路不通财用阙絶访问六月内支军粮米尚欠二百石支遣不过七月已後月分各合支七千余石未有一粒至十月方纳税米见今委无税米可支八月冬衣钱合支五万贯九月赏给钱合支二万贯亦未有一文近蒙转运司差属官前来剗刷虽平準务本钱并已刮刷尽絶委实无钱可支窃虑步谅军马到州目下并无钱粮决致生事翬恭依圣旨指挥前去赴任已到吉州讷为见?州阙乏实是怯懦逗留不敢前去交割除已具状申朝廷乞赐先次罢黜外乞指挥移文转运司真实那移钱米应副施行勘会新知?州张翬近因经由洪州赴本司稟议有劄子称?州阙乏尤甚官司窘迫目下经营无缘便有所济乞本司支借钱米专充招捕盗贼使用本司已於昨得朝廷指挥带余米内支借米五千石於回易钱内支借一万贯并支物货等组计二千余贯应副前去讷今又据前项申述契勘?州缘诸县各有盗贼难於催科及本州官吏有失措置遂致财赋大段阙乏目前已是阙乏钱粮支給官兵请受今来步谅一军虽蒙朝廷指挥许於湖南桩拨钱粮应副文移往返卒未能副目前支遣其转运司所拨名色官钱多系本州日前使过即不见存之数又有军衣赏给等数目浩瀚本官到任之初委难责办若非朝廷特降指挥应副决致误事本司照对见管朝廷出卖钞引钱一面逐急於数内支拨一万贯并再於带余米内支拨三千石给付本官及牒转运司将实管钱米辍那应副?州目前急阙并劄新知?州张翬催促星夜起发前去赴任外所有?州自余阙乏钱粮伏望圣慈特降睿旨施行

贴黄

契勘本司累具奏闻乞将本路上供钱米应副李贵兵马支遣却於福建路桩收元赡养李贵军马钱粮起发上供及将本路月桩钱应副步谅军马支用却令湖南桩收元赡养步谅军马钱粮就近发往鄂州未奉回降指挥窃缘本路州县钱米除上供月桩外别无宽剩之数若朝廷止令转运司?那应副委是无所从出伏望圣慈速降睿旨与决施行

乞屯兵江州防秋奏状

臣窃闻思患豫防与事来辄应者利害相去甚远平时不思为豫防之计及事至而应岂不有误国家之大计耶目今伪齐之兵为刘光世等败於淮淝之上其余破亡残党散走啸聚往来於淮西之间蕲黄两州既有岳飞等军屯驻鄂渚分布策应照得蕲黄两州与江州实为对境蕲黄即江州之胁背江州即江西之咽喉也万一败亡之卒批亢捣虚延入内地使不豫为之计临时缓急调发於他郡则受敌之际旁需救援岂不误事哉况蕲黄等州与江州烟火相望通淮之路大小十数马行不过三四日步军不过七八日便抵江面若无屯驻军马防拓要害受敌必速池鄂救援非月余不至何益於事臣窃谓淮西之舒蕲与淮东之通泰事颇相类京口无兵则无以护通泰九江无兵则无以援舒蕲舒蕲不守则江西受敌矣臣已依指挥将江西等州兵将许臣勾抽使唤照得江西盗贼已渐宁息将逐州所屯驻兵勾抽一半起发分布控扼所有一半仍旧屯驻讨捕盗贼未至净尽去处其隶将兵虽例前去差拨窃虑逐州占吝不为发遣兼蒙朝廷差到李贵步谅人兵皆在?州措置盗贼相去逵远缓急难以勾抽使唤沿江一带险要去处并无人兵可以分布防守况车驾驻蹕建康如江州等处最为上流重地又与去年防秋事体不同理宜分屯大兵以爲控守朝廷必已行下措置本司并未曾被受指挥伏望圣慈特降睿旨早赐详酌施行

措置本路盗贼奏状

契勘臣去年春夏间到官之初适当旱岁米斗至千余钱盗贼稀少盖缘远方之民但见朝廷除本路安抚制置大使意谓所统军马必多巨寇皆不敢起小盗随亦宁息至今年春因?州官吏失於抚循引惹生事致周十隆谢小鬼等残破属邑侵犯吉州永丰吉水等县本司差将兵前去讨捕每头项不过数百人虽幸杀败遏其?焰使复归巢穴然兵力单弱不能深入穷其根株相继福建路李贵一项军马前来与贼相持山林险阻之地久未有功旁近凶徒窥见官军势力弗强皆有跳踉之志虽去岁丰稔粒米狼戾斗米不过百钱而鼠窃狗偷纷纷不已诚有以致之也?化赖漏八杨三十四两项贼徒相继侵犯抚州势颇飘暴本司遣统领官王彦将本部军马前去会合临川知县王时率弓兵土豪深入讨捕已招降到杨三十四等其赖漏八等亦为土豪所杀见擒捕到徒党数十人付抚州建昌军推治袁州萍乡县有湖南及吉州太和县贼徒石铁牌锺牛皮贺和尚等啸聚作过本司遣申世景下将马仙将所部军马前去讨捕并已招捉了当筠州高安县近有熊清等贼徒去城数十里劫掠人户知县步汝霖县尉李聃年躬亲前去讨捕为贼所害及杀伤官兵弓手土豪甚衆本司遣发统领官王彦前去讨捕已擒获贼首熊清等八名解赴本司凌迟处斩讫并斩贼徒一十六级见委巡尉搜捕残党惟是

吉州永丰县贼首李安净出没於崇仁新淦永丰等县作过虽中间为王彦杀获徒党一百二十余人又复啸聚至今犹未败获不逞之徒往往借其声势劫掠村疃本司近已再遣王彦自筠州前去会合已遣军马须管於日下捕获外抚吉筠袁等州目下别无作过盗贼惟是?州周十隆谢小鬼与其余已受招安不离巢穴之人如张收等十数项贼徒深虑秋冬之交结集作过又有刘宣一项贼马见在本路与广东两界首及古政李才等数千人见在湖南与本路两界首来往作过今冬势须过为堤防臣已与新知?州张巽商议措置屯李贵步谅两军於旁近遣元系本州招安使臣罗武赖胜钱响等入贼说谕周十隆谢小鬼张收等今放散徒党赴州公参与免罪犯不夺已补官资其家依旧听纳租税因令挈家居於州城渐次发遣赴本司听候朝廷指挥其有不从者会合军马讨捕更不招安庶几革去旧习不至养成後患所有刘宣古政李才等贼徒一面遣发东南第六将兵前去讨捕伏望圣慈降旨朝廷更赐指挥施行

乞戒约捕贼乱行斫级希求功赏等奏状

契勘本路州县管下遇有盗贼作过遣发官兵前去讨捕其统兵招捉官多是逼逐贼徒出界或擒获到些小徒伴便於申报捷状内循习近年体例妄称与贼见阵弃头不斫追杀数十里横尸徧野堕落崖谷湔溺江河不知其数残零贼徒别无踪绪其招到贼火亦不令出公参与拣选存留强壮人上称并已给?放散遂致贼徒得为奸计聚散出没终不败获兼保明功状难以核实推赏本司已行下统兵官仰今後捉杀盗贼告谕士卒如遇见阵杀败贼徒并须要斫到首级赴官验认其生擒之人不得杀戮尽数押赴统兵官前验实解送所属根勘如在两界首讨捕不以远近追袭即不得以赶散出界为名便行抽回军马仍仰统兵官置籍録记立功姓名功状具的确见阵得功因依杀到首级及生擒人数结状保明供申以凭委官检验阵场核实推赏仍戒约不得乱将平民杀害斫级充数希求功赏如本司觉察得知其统辖官部队使臣以下并当次第重有行遣若委有逼逐落崖溺水之人亦仰统兵官验实保明的确死损人数同申即不得依前泛滥供报如遇招安贼火仍遵依前所行指挥尽要正次首领出官公参与拘收器械烧毁寨栅将一行徒伴?选强壮堪披带之人并行存留在军具数申取指挥施行外伏望圣慈特降睿旨令朝廷更赐详酌行下庶几有所遵守

约束统兵官招捕盗贼奏状

勘会?州管下见有凶贼周十隆谢小鬼等结集作过累准朝廷及都督府指挥令本司催督李贵措置招抚如不听从即会合将兵讨捕本司寻行下李贵催督遵依施行及一十三次劄下?州四次劄下东南第六将催差将兵起发前去会合讨捕六次??州申承李贵申周十隆等不从招抚乞差将兵前来讨捕已帖将官曹纲日下部领将兵前去本司续又五次径劄下曹纲催促进发至五月初五日?李贵申周十隆等不从招抚已两次进兵杀败贼徒外贼首周十隆谢小鬼及自余贼徒走散未获已申?州乞差将兵巡尉前来会合讨捕至今未到本司遂行下取问本州及将官曹纲具拆违慢不即起发将兵前去会合因依及具状申乞朝廷指挥施行去後又经多日并不曾?曹纲申到已起发文状五月二十二日??州五月十四日状申方称见帖将官曹纲部领将兵日起下离前去会合李贵讨捕又未见得委的曾与不曾起发显是将官曹纲全不体认朝廷累降指挥及不听从本司节制致误会合讨捕走透贼徒缘本州相去?

州及东南第六将地里遥远每有行下调发等事动经旬日方到今来本州管下见有盗贼作过头项不一似此帅司号令不行缓急必致误事欲望圣慈特降睿旨施行

乞将上供钱米应副李贵军马奏状

右臣契勘近蒙朝廷以本路见有盗贼阙兵讨捕差到李贵步谅两军人马除步谅壹军拨就吉州驻泊已奉指挥以月桩钱应副郤令湖南收簇拨还湖北宣抚司外有一军见在吉州驻泊虽与步谅人数不相远然请受则例过之三倍步谅一军月费钱四千贯米八百石李贵一军并老小月费钱一万二千贯米一千四百石本司累具申奏乞令本路将上供钱米应副赡养却令福建路收簇拨还未奉回降指挥止是令转运司那应副转运司亦别无擘画止是令州县自行措置目今吉州申钱粮阙乏无可应副窃虑别致生事臣契勘见今吉间盗贼虽节次讨捕稍安巢穴缘巨盗头首如周十隆谢小鬼刘宣古才尹宝等并未曾捕获递相结集至秋冬之交决须作过若有钱粮赡养李贵一军存留本路弹压庶几至时不致猖獗若钱粮赡养不足日有目前之忧即将来盗贼亦不暇恤李贵在福建与本路赡养之费惟均而利害相万俱望圣慈特降睿旨令朝廷更加详酌如李贵一军别无钱粮应副赡养即乞於岳飞军中差拨三二千人前来本路就用钱粮弹压讨捕其李贵军马候岳飞下兵将到日发回福建路驻劄仍乞早降指挥施行

梁谿集卷九十七

<集部,别集类,南宋建炎至德佑,梁谿集>

卷九十八

钦定四库全书

梁谿集卷九十八 宋 李纲 撰表劄奏议六十

条具利害奏状 本路阙雨乞罢免奏状

乞宫观劄子 乞益修政事劄子 乞详酌见余晚米奏状

条具利害奏状

契勘本路盗贼久未宁息虽因民俗顽犷好复仇怨所致要在小民迫於衣食易为凶徒之所结集若使田亩之民衣食不乏各有生理凶恶之人不得诱为徒党安能一呼便至千百为群滋蔓猖獗臣窃见本路催起上供税赋月桩钱及籴买数事实有未便於民间者本司已尝具奏申陈未奉回降指挥若不别行措置小民渐至失业必致驱而为盗遣兵讨捕卒无已时致赤子之流离情实可悯臣尝叨近辅分典要藩荷恩最深欲报无所苟有所见不敢隐默今条具如左须至奏闻者一本司近准御前金字牌降下尚书省劄子令臣催督转运司起发上供无额斛?寻取到转运副使逢汝霖徐林状节文契勘本路上供米斛系以秋苗桩办兵火之後多有逃阙又间有灾伤年分所催税赋例皆不及旧额其上供之数逐年并蒙朝廷除豁只以实催米数起发照对上供米数旧额一百二十六万九千石会计绍兴六年一路实催秋苗止有九十八万三千三百五十九石一斗六升虽蒙减免上供一十六万九千石外犹有一十一万六千石系是实催苗米外虚数无从所出又?吉南安军盗贼未息见蒙朝廷遣兵收捕有合豁除数日系在实催苗米之数已节次开具前项秋税不及元豁等因依申朝廷乞以实催籴纳米数起发去讫申本司照会臣勘会江西一路自兵火残破之後又经早灾户口凋耗虽去年稍得丰稔人户未尽归业田土荒废尚多谓如洪州分宁奉新等县人户所存才有十之三四其余县分号为多处不过十之六七通一路计之多寡相补才有承平之半税赋自然难以及额又如?州累年为盗贼猖獗税赋往往催科不得吉抚筠袁等州亦有盗贼残扰去处遂致苗税亦多拖欠若不以实入之数起发上供一切督责州县必欲及承平额数不惟无所从出兼恐州县不免数外科敛重困人户非独不足以仰副朝廷宽恤之意亦使官吏虚负罪责近已备録转运司具到前项因依奏闻伏望圣慈早降睿旨令转运司且以实催之数起发庶几小民不至重困流为盗贼不胜幸甚

一本司去年内差干办公事韩岳前去诸州军点检奉行宽恤事件续?本官申筠袁州临江军系灾伤最甚去处有不曾逃移人户缘灾伤草贼侵扰死失佃户耕牛阙乏谷种无力输纳乞依湖南州县已得圣旨指挥差官检视民间耕种田畴只?所垦田亩多寡之数纽纳税租并临江军知军赵士劭状本军日逐?清江新喻三县民户投诉缘去岁早歉虽不曾逃移离业实以饥贫无牛种失於布种及虽有曾布种去处又不能周遍逐县不住追催枷禁鞭笞要依递年纳户下全税乞从本军施行窃详绍兴三年正月二十七日都督府劄子节文应人户归业者

候催科?所垦田亩多寡之数合纳租税仍免本户差役一年其上件投诉民户虽不系因逃移归业之人盖是恋土不忍去父母之邦缘此饥贫失於布种原情亦可矜悯若不随宜措置则追纳既峻无所从出避一时刑责之患必见转徙乞且据所垦田亩随分数减今岁税租等事本司已备録前项逐官所申事理申奏至今未奉回降指挥访闻筠袁州临江军灾伤人户至今缘此拖欠租税官司催督致有逃移伏望圣慈特降睿旨下转运司差官体究将绍兴六年分人户布种田亩不遍拖下税赋见挂欠者特与并行放免庶几小民安业不至失所

一契勘本路每月应副岳飞大军月桩钱九万余贯自来系以轻賫金银相兼见钱起发昨缘湖北随军运判刘延平移文只今起发见钱自役诸州不惟艰於应办其装法糜费亦不易出自去年四月臣到任以来催督至今共起发过一百七十余万贯本路钱宝泄於他路不复可还民间阙乏号为钱荒以故谷贱伤农民户输纳夏税户帖应於名色难得见钱闻里愁叹至有委弃田产逃移者若不别行措置将来愈见阙误本司昨准金字牌降到御封尚书省劄子催起月桩钱连到状式立限取会已未起发轻賫窠名斤两数目以此见得诸路应副大军皆合用金银相兼桩发累曾具状奏阙伏望圣慈特降睿旨行下转运司许令诸州将所认月桩钱计置轻賫与见钱相兼起发仍照应在市价例务令两不相妨庶几可以桩办不至走泄钱宝民间交易及输纳官中不至阙乏实为便

一契勘自来朝廷行下转运司采买斛?如有采本则官中得米民间得钱两为利便近年多是颁降官告勅牒与见钱相兼已是难以行使今来朝廷降下本路和采专用一色关子虽有许拨经制总制钱指挥缘应副赡军多无见管钱物深虑采买不行州县不免抑配重困民力窃缘商贾兴贩斛?赴官巢纳犹可给与关子令赴所属支请今来客旅兴贩稀少唯是采於乡村民户积累升斗以足额数乡民中巢得些小关子岂能前去数千里外官司请领必为兼并之家以贱价取之赢落官钱规图厚利朝廷所费则一小民受害徒为富商大贾之资深属未便伏望圣慈特降睿旨令朝廷支降见钱与关子相兼采买采於乡村即给见钱采於商贾即给关子庶几小民获受实惠不至重困一路不胜幸甚

右谨件如前谨録奏闻伏候勅旨

本路阙雨乞罢免奏状

右臣契勘本州自七月以後不雨遣官致祷管下神祠佛宇应有仙圣灵迹去处及筑坛塑龙迎请圣水躬亲斋素日事祈求虽获感应并皆微细不得沾足见今晚田已是亢旱此盖守土之臣德薄人微缪当方面之寄精神不足以感格政术不足以共理致兹旱暵覃及一方伏望圣慈特赐罢免遴选帅守以宽忧顾臣不胜祈天俟命激切屏营之至

乞官观劄子

臣契勘自今春以来实缘衰病屡上封章乞罢帅权投置闲散未蒙矜允近为本州入秋阙雨已觉亢旱罪在守土之臣已具奏闻乞从罢免未奉回降指挥窃念臣忧患孤生早衰多病久

苦疮痍复得筋挛之疾行步蹇缓拜跪艰难加以素有疾眩医治弗效动多遗忘常恐颠仆一路兵民之寄事体至重傥不量力勉强负荷决致踈虞伏望圣慈特赐哀矜许令罢免除一在外宫观差遣任便居住庶几疲弩得就休息尚沾廩饩以养余龄感戴天地之恩何以图报干冒宸严臣无任

乞益修政事劄子

臣闻和气致祥乖气致沴天人之际应若影响不可诬也政令和平合於民心天应以福雨阳时若而为丰岁此和气致祥之符也政令乖戾拂於民心天应以灾水旱极备而为凶年此乖气致沴之符也丰凶之本乃在人主心术朝廷注措之间宗社之安危生灵之休戚系焉可不惧乎前年江湖闽浙尝苦大旱流移失业殍踣相望陛下轸虑之深不遑暇食亲洒宸翰劝诱赈济其所全活不知其几千万人至诚动天报以休应曰雨而雨曰阳而阳岁大丰穰民以安乐自经一稔之後上下恬嬉不复勤恤民隐朝廷意民间之有蓄积百色诛求上供不以实数而以虚额和籴不以本钱而以关子丝蚕未生已督供输禾谷未秀已催装发州县困於转输文移急於星火官吏愁叹闾里怨咨感动天心旱灾复作江湖淮浙所被甚广岁且歉食人情惊疑如居风涛汹汹靡定然则陛下欲消弭灾异导迎吉祥不必他求但如前日之用心自然感召和气休应立臻则旱暵必复为丰年矣昔周宣遇灾而惧侧身修行欲销去之而王化复行云汉之诗是也安知旱暵之灾行为中兴之资乎愿诏朝廷益修政事凡所以赈救民灾给足军食者早正素备无待仓猝取具於临时也方今强敌凭陵僭窃窥伺屯兵淮汴以为控扼欲进则未能欲退则不可开口待哺於县官者数十万人平时运饷已极劳费岁一不稔将何以给之夫今日之患欲民力宽则军食阙矣欲军储裕则民财匱矣二者如铁炭之低昂此首重则彼尾轻非有术以权之使敛不及民而军食足不可得而均也孟子曰无政事则财用不足今屯兵之数不多於前时而养兵之费十倍於往日死生去来无籍可稽上功行赏无实可考转资迁秩者动以万计廩禄之费又不知其几何也开端者不可复敛放行者不可复收日益月加无时而已天地之生财有时人力之理财有限而度量不立於其间养兵之费有增无减坐致耗屈竭出於民谓之有政事可乎此臣之所以日夜为陛下寒心者也夫政事立然後财用足财用足然後军食给军食给然後民力宽民力宽然後天心格天心格然後和气可召而为丰年此臣所以愿陛下救今日之弊以修政事为先也臣仰察天时俯揆人事今日诚为危急存亡之秋惟陛下念宗社生灵之重图为善後长久之策留神邦本天下幸甚臣以衰病屡乞闲散将归山林不胜忧国之情辄复自竭陈其大略以瀆天听如圣心尚有所疑愿赐清问得以展尽底蘊为陛下详言之誓罄狂瞽仰酬大恩臣无任

乞详酌见籴晚米奏状

右臣契勘本路春夏之间雨阳调适早禾已是成熟收割了当自入秋以来阙少雨泽已觉亢旱又生青虫食害苗稼见今祈祷未获感应若更旬日内无雨晚田决致旱伤窃见朝廷近降指挥受纳秋苗及和籴米斛并要一色晚米窃虑既不籴纳早米晚稻又失指準有误大计伏望圣慈特降睿旨令朝廷更赐详酌施行

梁谿集卷九十八

卷九十九

钦定四库全书

梁谿集卷九十九 宋 李纲 撰表劄奏议六十一

论淮西军变劄子 乞黜责或官祠奏状 缴奏修举过职事乞官祠状

奏陈淮西事宜 獎諭诏书 谢獎諭表

论淮西军变劄子

臣据舒蕲江黄州探报郿琼叛逆拥淮西全军并都督行府庐州官吏兵民等尽归伪齐沿江州郡人情惶骇此诚不测之变朝廷措置失当深可痛惜者也臣请为陛下条陈之刘光世治军素无纪律遇敌辄避衆所共知不为无罪然其所部军马皆陕西西蕃部落招降巨盗及签军汉儿勃海之流最为彪杂乌合光世御之以寬颇得其心平时不至散叛已为不易去冬贼骑侵犯淮西光世初虽左次以避敌终能返旆而成功朝廷因而抚之激励士气亦足控制一面乃轻从其请罢兵柄而投闲散将士缺望遂生携贰之志此措置失当者一也既罢光世帅权即当豫选武臣之有威望知略者以为之代使将士悦服人无间言则一军安矣乃遣吕祉以参谋总师分守不正不足以莅军事名望素轻不足以厌衆心号令赏罚亦必有不合其宜者驯致变乱岂无自而然哉昔人有云每一发兵头须为白此言用兵之难也祉以书生骤得官职意谓功名可以唾手而取轻当委寄智小而谋大力小而任重坐使叛将得成其奸此措置失当者二也王德郿琼在光世军中皆号梟将德以严猛失士心琼以姑息得衆情平时已不相能易帅之後自当分置他军以絶间隙乃使共事以成忿争吕祉又不能驾御而调和之宜其生变此措置失当者三也初光世一军老小尽寓太平宣城将士进屯庐壽限以大江足以系累其心非小补也自今夏经火灾之後乃悉徙居江北以此悦衆而不知有携手同归之虞术亦疎矣此措置失当者四也王德擅离职奔归行朝正当权时之宜归罪于德械系有司遣使抚存军中喻以祸福必有忠义奋发安衆而解纷者衆情既安琼必遁逃借有从者不过部曲耳密谕邻境诸帅出兵遮截邀击於要害之地琼必成擒不务出此而亟置宣抚制置使副临以重兵是趣之使去也生灵遭屠戮官吏被驱虏数万之衆一朝失之谁任其咎此措置失当者五也军旅之事机会之来间不容髮措置一失祸患随之而况五乎深可痛惜试毕其说自艰难以来所乏者兵西北将士尤为难得以百金募一卒以万金养一士未足为多十年之间疾病损死所余几何今一旦而亡数万之衆弃抚育之恩归仇讎之境此深可痛惜者一也舍我归彼贼势益张朝为君臣暮为仇敌如李成孔彥舟关师古輩我不能有反为贼用致死於我可不悲乎郿琼将士备知东南曲折秋高马肥为之乡道以扰江淮宁不可虑此深可痛惜者二也朝廷屯重兵於淮南以为藩篱仰此一军控制庐壽尽卷而去藩篱缺矣何以补之拆东补西愈见踈阔奸逆窥伺强暴凭陵丧威辱国自取予侮此深可痛惜者三也近年议战士气稍振去冬累捷国势浸强将定恢复之谋渐成中兴之业而以措置失当之故亡此全军使忠臣义士扼腕愤叹此深可痛惜者四也此端一啓人各有心後來将帅何以号令此深

可痛惜者五也书曰虽悔可追语曰既往勿咎此虽措置失当深可痛惜然既往之事不可复追臣愿陛下鉴前失以图将来而已所谓鉴前失以图将来者降罪已之诏痛自追咎以收人心一也谋善後之策益务持重以固国势二也增宿卫之兵以备不虞三也采耆哲之言而勿偏听四也坚圣心之守而勿轻变五也遇变而惧修省以应之其说固多然在今日莫先於此五者昔明皇幸蜀中道将士有散叛之心明皇下哀痛之诏谕以诚意衆志乃定德宗遭奉天之变所降诏令武夫悍卒闻皆感泣卒复京师陆贄有言曰动人以言所感已浅言又不切人谁肯怀所谓降罪已之诏痛自追咎以收人心在今日为不可後也天方艰难深閤成功之所正如逆风行舟用尽气力不离本处两年以来经营恢复盖亦勤矣然卒未能收尺寸之功今一朝以措置失当之故人心携离士气凋丧岂可不相时之宜暂辍攻取之谋且为固守之计静以待之俟人心之既宁士气之复振然後可以行师顺时而动以讫天诛所谓谋善後之策益务持重以固国势在今日为不可後也天子所居上宪乾象紫微之宫三光之廷皆有藩垣以拱卫宸极行幸之所尤宜严备以待非常今陛下巡幸省方驻蹕建康而禁卫单弱朝廷初不留意近闻杨沂中刘錡皆以殿前中军及侍卫马军司兵出戍淮甸外重内轻诚可寒心肘腋仓卒何以待之明受之变商鉴不远所谓增宿卫之兵以备不虞在今日为不可後也昔秦穆公归自崤作书以自誓其言曰尚犹询兹黄髮则罔所愆又曰如有一介臣断断猗无他技其心休休焉其如有容人之彦圣其心好之不啻如自其口出是能容之以保我子孙黎民亦职有利?夫黄发之臣其经历久询之则利害必审好善之臣其忌嫉少容之则荐进必多方召以元老壮犹而兴周房杜以持衆美效之君而兴唐职此之由也夫专任乃能成功而偏听亦能致乱顾所以听任者何如耳汉唐之初以专任兴秦隋之季以偏听亡是以尧舜之世任贤勿貳任欲专也明目达聪听欲广也方今寇伪鸱张将士离散天下危於累卵陛下得不广聪明为扶颠持危长久之计乎所谓采耆哲之言而勿偏听在今日为不可後也自古创业中兴艰难之际叛将不能无也在高祖时有若卢绾陈豨在光武时有若彭宠卢芳在太宗时有若辅公祐王君廓德宗奉天李怀光叛之肃宗灵武康楚元张嘉延叛之晋迁江左苏峻祖约叛之惟能因时制变旋即讨定故不足为患今淮西一军数万之衆一旦叛去固不为小变若能应之於後亦未足为吾害也或谓敌人得吾叛将因而用之决须深入建康去淮南不远势恐难安是不然韩世忠兵屯淮东张俊杨沂中兵屯淮西岳飞兵屯上流不下数十万人又有长江天堑之际若能抚绥将士措置合宜号令得所贼马岂敢深入傥以一时之变而议退避则车驾一动大事去矣所谓坚圣心之守而勿轻动在今日为不可後也帷幄之谋必有胜筭愚臣私忧过计不识忌讳激於忠愤忘生触死冒进狂瞽然臣闻天地之变不足为灾人不尽言国之大患侍从者献纳论思之官也台谏者耳目腹心之寄也今侍从台谏以言为职类皆毛举细故以塞责所论不过簿书资格守倖令丞除授之失当至於国家大计系社稷之安危生灵之休戚者初未闻有一言及之陛下试察如淮西之变侍从台谏之臣亦有见危纳忠为陛下言之者乎大臣怀禄而不敢谏小臣畏罪而不敢言此最今日之可忧者臣以蠢愚夙荷睿獎每思竭尽以报大恩第以人微迹踈无阶自致遇事辄发罪当万死伏望圣慈哀怜孤忠留神听览傥有补於万分之一虽死之日犹生之年也尘渎天聪臣无任惶惧待罪之至

小贴子

臣续据探报郾琼驱虏官吏兵民老小凡二十余万人北去兵部尚书都督府参谋军事吕祉

并帅臣等并为所执统制官乔仲福张景刘光时等死之此岂小变未闻朝廷别有处画臣以远初不敢论列再三思之当艰危之际仰荷重恩尝蒙诏许令入告若不尽言实负陛下然臣前件劄子指陈朝廷措置失当忧愤所激情迫言切难以复处藩方已别具奏闻乞赐黜责或检会累奏除一在外宫观差遣以安愚分伏望睿察臣近准都督府劄子招收淮西回易官兵已差都承旨张宗元前去措置臣窃以宗元之行何异於吕祉更望圣慈详酌淮西军事只委制置使杨沂中为便伏乞睿察

乞黜责或宫祠奏状

右臣已具劄子论列淮西叛将郿瑊事宜奏闻其言指陈朝廷措置失当但欲纳忠於国情迫言切必有抵忤难以复当帅守之寄伏望圣慈特降睿旨黜责施行兼臣久患足弱拜履有妨疾眩为梗动虞颠仆累奏乞宫观差遣未奉俞允今来感时忧愤疾势益深如蒙矜怜察其用心未忍窜殛只乞除一外任宫观任便居住曲赐保全以安愚分干冒天威臣无任

缴奏修举过职事乞宫祠状

右臣伏以衰病累具奏陈乞罢帅守除一外任宫观未奉回降指挥窃念臣忧患之余误蒙圣恩付以江西一路重寄夙夜黽勉未敢自暇以图报知遇之万一自去年四月初到任至今年八月终已及一年五个月适值旱岁遵奉圣旨赈济劝糴以活饥民又依禀朝廷指挥招填军额建置营房修筑城池缮治器甲增修官府剏盖仓库催发钱粮招捕盗贼皆系臣躬亲逐一措置处画心力殫耗幸已就绪今者以病乞身即非别有规避兼臣近以淮西叛将事宜指陈朝廷措置失当实缘忧愤成疾心气不宁思虑颠错难以安职伏望圣慈哀矜特降睿旨检会臣累奏罢臣江西安抚制置大使兼知洪州除授宫观差遣以养病躯以安愚分所有臣在任修举到前件职事厘为六状仰渎睿览无任惶惧战越之至

奏陈淮西事宜獎諭诏书

勅李某省所奏陈淮西事宜切中事机事具悉昔留侯以八难止食其之说买臣以十策屈公孙之谋盖人主有广览兼听之明则臣下有竭智尽忠之益卿位隆将相计安国家身虽任於藩方心实存於王室比阅淮堧之议蔚有汉臣之风去两短集两长所愿闻於药石画一奇出一策尚不废於刍蕘矧乃嘉猷母忘入告故兹獎諭想宜知悉秋冷卿比平安好遣书指不多及

谢獎諭表

臣某言伏蒙圣恩以臣奏陈淮西事宜切中事机特降诏书獎諭者事君无隐敢输忧国之谋陈力不能辄布乞身之恳恩颁温诏感集愚衷中谢伏念臣猥以诸生偶陪兴运三朝被遇誓殫夙夜之勤一纪孤危备历风波之险曲荷圣神之眷滥当帅守之权识昧知几岂能料敌而制胜才非任重惟其置散以投闲盖常出位而多言祗欲辞荣而养疾囊封屡贡上干鈇钺之

威綈檢誕敷遽冒絲綸之寵茲蓋伏遇皇帝陛下道隆覆載明極照臨察其犬馬之誠每加听
納憫其簪履之旧未忍弃捐特軫皇慈荐垂睿訓榮既踰於華袞惧若殞於深淵臣敢不仰体
至仁俯全晚節危言入告益思藥石之忠衰疾丐归愿遂山林之志

梁谿集卷九十九

卷一百

钦定四库全书

梁谿集卷一百 宋 李纲 撰表劄奏议六十二

奏陈利害劄子 乞宫观奏状

奏陈车驾不宜轻动劄子

乞令湖北京西宣抚司差兵控扼江表奏状进御书草圣千文赞劄子

奏陈利害劄子

臣近者不量浅短辄冒万死条陈淮西叛将利害仰瀆天聪夙夜靡寧以俟严谴伏蒙圣慈既赦狂瞽又降玺书特有褒谕感戴大恩非臣糜捐所能报称然臣窃见都进奏院报张浚罢相以言章落职宫观淮西之变浚实有罪责罰之加其谁曰不宜但言者引汉武诛王恢事以为比臣愚窃以为不然试为陛下陈之昔王恢设马邑之谋欲诱匈奴击之事既不谐武帝以造兵谋本出恢动大衆而无成功不诛无以谢天下遂下恢廷尉此武帝之过举非盛德事也何则胜负兵家常势顾规略何如耳易象有左次无咎之言兵法有善败不亡之戒渠以一失遂害大计哉观秦穆之用孟明拜赐於三北之余光武之用冯异收功於桑榆之际则知武帝之诛恢未为无失也今浚之罪乃在於志广才疎力小任重不能谘諏良策而专於自用不能辑睦将帅而轻务改移遂致士卒携离舍我就敌以此罪浚夫复何辞若以王恢为比咎其始造兵谋则是因咽废食惩?吹壑以细故而摇大计恐非策之得也今方强寇凭陵僭逆窥伺国势未定人心惊疑若不注意治兵以为自强之计则何以安宗社保生灵固边疆御外侮徒以措置一失之故遂欲尽弃前日之所为归罪始造兵谋者臣恐智谋之士卷舌而不敢谈兵忠义之臣扼腕而无所发愤将士解体而不用命州郡望风而无坚城陛下将谁与立国哉且今日朝廷之势固自若也襟带江淮保据荆襄连接川峡韩世忠张俊岳飞吴玠之军分屯要害不下数十万人兵未为弱去冬败刘麟刘猷之徒甚衆用兵未为不利倘因淮西之变益自惩创审号令明纪律徙诸军家属於江南以便粮饷教战舰水军於沿江以备不虞姑辍进取之谋且为固守之计和協辑睦静以待之使国势渐定人心渐安士气渐振乃可徐议恢复譬犹病人调治向安又为药餌所误伤其正气岂可遽欲康强哉不察此理经变故而亟动摇使外寇得以乘其间隙譬犹弈碁前着既差後着复错是谓自败欲求胜敌不可得也臣顷年尝因贼马入寇淮甸献陈愚计以谓退避之说不可行於今何哉前之为寇者金人也利於虏掠得所欲则还师今之为寇者伪齐也利於土地得一郡则守一郡得一邑则守一邑翠华退避之後将士奔溃贼势鸱张将安所定止哉误蒙采择特降褒诏今日之说亦犹是也伏望陛下坚圣心而勿动修军政以自强无为趣时献言者之所摇古语曰临大难而不惧圣人之勇也惟陛下留神幸察夫张浚措置失当诚有罪矣然其区区徇国之心有可矜者愿少寬假以责来效昔汉高祖用兵丧师跳身者屡矣然卒与成功者皆旧臣也借使每败必逐则张良陈平之流

不胜其诛矣臣前所论淮西事宜指陈浚措置失当非党浚者今此论奏亦非为浚游说也因言者引王恢造兵谋之喻深恐退避讲和之议复出以眩惑圣听则大事去矣宗社安危自此而分故敢披露肝胆冒昧有言死有余罪臣以衰病累请宫祠未奉俞允迩来犬马之疾益深将填沟壑已别具奏乞骸骨以归山林贪恋明时何可言喻爱君忧国之志虽在畎亩岂敢弭忘伏望陛下哀而怜之干冒天威无任惶惧战越之至

小贴子

臣契勘朝廷所恃以御敌者将士也新失淮西之军将士之心未定正当静以养之频降诏旨慰劳抚谕使明知陛下德意所在庶几士心复安若先为退保之计以示怯敌臣恐诸军将士解体人人无固守之志为盗之招昔真宗皇帝澶渊之行未定又欲南幸召高琼谋之琼对曰南幸无不可者但虑将士离散不复可收遂定亲征之谋臣以谓正与今日之事相类窃见近降指挥应副庐寿盱眙等处米斛并改拨赴建康府下卸又差梁汝嘉知平江府外议皆谓车驾将幸平江平江与建康相去不远徒有退避怯敌之名臣私忧过计冒昧上闻不胜皇惧伏乞圣察臣近据岳飞公文今月十九日部率军马前去襄汉臣契勘淮西兵将新叛之後藩篱踈缺并无控扼朝廷近降指挥令飞分兵屯驻江池等州事理正宜如此今乃前去襄汉上流空虚缓急何以应援伏望圣慈详酌特降睿旨令飞屯兵照应江池及淮西一带候过防冬措置襄汉未晚伏乞睿察

乞宫观奏状

右臣近以衰病累具奏闻乞罢帅权除一宫观差遣伏蒙圣慈降诏不允仰荷大恩第深感涕窃念臣孤陋无取误被眷知起於闲废之中付以方面之寄竭来江右物华再秋虽殫夙夜之勤曾蔑涓埃之补而臣年衰景暮福过灾生百病之所交攻万虑之所纏集将遂填於沟壑愿休息於山林方本路盗贼稍衰之时兼沿江边报未急之际不乞身而闲退必误国以颠隮伏望圣慈特降睿旨检会臣累奏除一外任宫观从便居住或许守本官致仕庶几专近医药尚保余龄干冒天威无任惶惧战越之至

小贴子

契勘臣自春夏以来久患疮疡才稍痊安又得足弱筋挛之疾拜跪艰难步履蹇缓至今未愈近来复苦心气烦愤健忘渐成淋疾医者谓忧虑伤损所致若不控告君父罢免帅权少就闲散决难自全伏望圣慈哀怜特从所请使得归休保养衰疾异时蒙被驱策不敢辞难伏乞睿察

奏陈车驾不宜轻动劄子

臣近因上疏论淮西事宜尝献狂瞽窃谓车驾不宜轻动正当静以镇之诸将重兵不宜抽回正当分屯要害益为自固之计妄意及此其说略而未详今闻朝廷以梁汝嘉知平江勑盖营

屋万余间及召张俊杨沂中全军还驻建康如此则是移蹕之谋抽回军马之计皆审如所闻宗社安危生灵休戚系此一举敢冒万死为陛下详陈之臣闻自昔用兵以成大业者必先固人心作士气据地利而不肯先退尽人事而不肯先屈是以楚汉相距於荥阳成臯间高项虽屡败不退尺寸之地既割鸿沟羽引而东遂有垓下之亡曹操袁绍战於官渡操虽兵弱粮乏苟或止其退师既焚绍辎重绍引而归遂丧河北由是观之今日之事岂可因一叛将之故望风怯敌遽自退屈果出此谋六飞回驭之後人情动摇莫有固志士气销缩莫有鬪心寇伪乘之谁为陛下坚守苦战以御大敌者且建康去平江无数百里之远非有高山大川以为限隔健马疾驰数日可至徒有怯敌之名无益退避之实建康有长江天堑之险不能固守何有於吴会哉声势所逼退而之临安又退而之会稽又退而之闽粤极矣我退彼进使贼马南渡得一邑则守一邑得一州则守一州得一路则守一路乱臣贼子黠吏奸氓从而附之虎踞鸱张虽欲如前日返驾还辕复立朝廷於荆榛瓦砾之中不可得也偷取目前之安不顾异时噬脐之悔非策之得者借使寇骑冲突不得已而权宜避之犹为有说今幸疆场未有警急之报兵将初无不利之失朝廷正可惩往事修军政审号令明赏罚益务固守而遽为此扰扰弃前功蹈後害以自趣於祸败岂不重可惜哉臣故曰车驾不宜轻动正当静以镇之者此也臣又闻自昔有江表者必以淮南为藩篱屯重兵於江北然後江南可安六朝相继数百年虽苻坚石勒宇文拓跋之盛不能陵践凡以强藩巨镇尽列淮上也故後唐李氏有淮南则足以保国既失江北国势遂卑由是观之今日之事岂可因一叛将之故悉罢屯戍遂欲弃置於度外张俊既去盱眙杨沂中又去庐壽李宏独以千兵守之使贼挟叛将以来则庐壽必不能守前日郿瑯之叛屋宇仓廩置而不焚岂无深虑使贼得据合肥则舒蕲光黄一带无兵可御决须退保是贼无亡矢遗镞之费以谈笑而下淮西也一失淮西与之共长江之利江南可得无患乎州县无备人情震骇一患也塩货不通粮饷皆阻二患也济渡多端难於控扼三患也时出兵以扰我疲於奔命四患也得吾州县蟬结蚁聚水草有依遂为吾之痼疾五患也昔人有言长江千里当备者不过数处如人一身腠理为急淮西者今之腠理也贼马入寇必趣庐壽前日以刘光世全军数万人守之犹惧不济今乃无兵是委重地与敌以为背脇疽根岂不重可惜哉臣故曰诸将重兵不宜抽回正当分屯要害益务自固者此也前日刘光世一军以措置失当之故将士携离舍我归敌非细故矣万一因此翠华移蹕将士召还以致不可胜言之患是措置之失又非前日之比也昔人有言动不详思辄喜言误误不可数也臣观朝廷自建炎以来每失机会其误多矣譬犹奕者前着虽差後着犹可救也若着着皆误何以取胜傍观者得不为之寒心臣愚窃思所以为今日计愿陛下深体汉祖之用心坚忍而勿轻变非有大警急姑少安之丁寧训戒三四大臣益图所以自固之策遣张俊全军进屯庐壽而存其家属於建康以便粮饷命韩世忠兼保盱眙而留杨沂中以卫行在诏岳飞分兵江池以保上流沿江有备则国势亦粗定矣前日剡造车船战舰所费不貲初不闻置军教閱将安用之谓宜收拾於建康上流州县如太平江池等州芜湖繁昌湖口等县摆泊仍於江湖间募习水善游者万余人刺手背为水军差官统领分隶教习使金鼓旌旗上连下接以备缓急之用则贼骑虽炽亦岂敢遽窥江右哉使今冬防守无虞则人心自安国势亦固可以徐图善後之策舍此不为而但务退保臣未见其可也抑臣闻之书曰民非后罔戴后非衆罔与守邦又闻之孟子曰保民而王莫之能御天子作民父母必有保民之心然後衆心欣戴如子之保父母此上下之所以能相固也蜀先主去荆州从之者数万人曹操逐之或劝舍衆而速行先主曰衆人从我岂忍弃之说者谓其有帝王之度区区偏霸之主犹如此而况於天下之君乎臣愿陛下以保民之忧

为先则虽弱必强中兴之业不难致矣臣以愚拙每进狂直之言必蒙褒纳有君如此其忍负之故敢於艰虞之时复进苦口逆耳之说言或可采愿陛下与三四大臣熟议利害断而行之庶几有补万一徒能容纳而不用无益也昔汉高祖开济大业非无张良陈平之臣出奇画策动必有功然劝为义帝伐项羽者三老董公也劝出武关置军宛叶者辕生也劝都关中者娄敬也劝以亲子弟王齐者田肯也必有衆谋乃能有济今臣以孤陋远在千里之外每有所闻辄献臆说仰裨庙谋尚庶几於数子伏望圣慈赦其罪而取其忠天下不胜幸甚

乞令湖北京西宣抚司差兵控扼江州奏状

九月二十四日准枢密院九月十四日劄子节文本司申契勘郿琼靳赛等率淮西兵将全军反叛驱拥官吏军民归附伪齐窃虑不测前来沿江诸处作过其江州委是要害去处并无兵马控扼欲望朝廷检会本司近奏事理速降指挥行下湖北京西宣抚使司差拨军马前来兴国军江州驻劄以备不虞右检会八月二十一日奉圣旨令岳飞差拨水军三五百人乘驾战舰委近上统制官统率顺流於蕲阳镇摆泊仍令差先锋人船前往江州屯驻照应控扼近据岳飞奏缘淮甸即日别无探报如稍紧急自当量其贼势轻重即时调发军马前往蕲阳或江州照应劄本司照会契勘本路系抵接淮西界分去伪境不远近庐州郿琼等反叛之後日有探报以北事宜缘今岁防秋事体即与以前年分不同其本路沿江一带及蕲黄等州紧要控扼去处并未有军马防扞兼本司见管官兵人数不多又缘诸州县管下有未获盗贼残党各已分差前去捉杀所有江州等处合屯军马若候有警方遣前来窃恐後时却致迟悞欲望朝廷特赐详酌行下湖北京西宣抚使司先次遣发军马前来江州一带屯驻预行措置控扼防拓免致临时误事

进御书草圣千文赞劄子

臣伏覩皇帝陛下以御书草圣千文赞宠赐宝文阁直学士右太中大夫江南西路都转运使臣子洎宸章奎画璨然如繁星之丽天臣辄摹勒置於豫章州学宣圣殿阴使诸生得以瞻仰且拜手稽首作赞系於刻石之末词旨浅陋不足以揄扬盛美臣则有罪谨缮写在前并以石本装治进呈干冒天威臣不任惶惧

梁谿集卷一百

<集部,别集类,南宋建炎至德佑,梁谿集>

卷一百一

钦定四库全书

梁谿集卷一百一 宋 李纲 撰表劄奏议六十三

条具防冬利害事件奏状

乞施行余应求张翬捕盗功效奏状

乞施行修城官吏奏状

谢提举临安府洞霄宫表

条具防冬利害事件奏状

契勘臣近累具奏闻以衰老疾病难当方面委寄乞罢帅权除一宫观差遣或许守本官致仕伏蒙圣慈降诏不允仍令依累降指挥不得再有陈请感戴天恩涕泗横集臣虽衰病敢不黽勉自力用忘疾惫以图报万一然臣所管江西一路实为上流辅翼建康驻蹕之所蔽障闽广接连荆湖自江以北控引淮西去伪境不远豫章九江兴国三郡縣地千余里皆系要害去处吉筠袁等州素产盗贼蜂屯蚁聚千百为群不可胜计而自近年以来帅司所统军马尽为诸将之所兼并器甲钱粮席卷一空臣到任之初蒙朝廷差到申世景一军才千余人比因盗贼猖獗又蒙指挥添差李贵步谅军马人亦是不多仰赖朝廷威灵两年之间招捕群寇凡数十火几数万人逆者诛锄顺者惠来幸悉寧谧惟是防冬以扞大敌之具阙然未备诚可寒心近日探报敌人增兵驻陈蔡颍昌临汝诸郡与舒蕲光黄对境相望间遣步骑渡淮作过未有重兵可以扞御九江兴国沿江一带又无精卒为之控扼新经郿琼之变藩篱踈缺人心动摇万有一穴骑奔冲有南牧之意何以待之今年防冬非去年比而本路空虚军马单弱与去年无异如臣一介书生踪迹孤远岂敢虚任重责积忧成疾恐误国事屡此乞身非得已也今者既蒙圣恩未忍弃捐尚使待罪藩方以备驱策自非投诚控告君父洞照几微审量事势摘那兵将假以权宜使得竭犬马之力图尺寸之报则何以仰副使令庶无罪悔敢陈愚恳冒渎天聪伏望圣慈曲赐矜察特从所请所有防冬合行事件谨画一条具下项

一本路或为贼马侵犯理当随宜措置仓卒缓急之际有难待奏报者欲乞应防冬事件特许臣以便宜施行乞奏闻

一本路元置安抚制置大使司差兵二万人近年拨付都督府及分隶诸将湍奔矢往并无留者虽蒙差到申世景李贵步谅军马人数不多又以吉筠袁等州盗贼残党之故分屯弹压不可辍那目今防冬之际勾集使唤全然缺乏夫以一路十余州数千里之地与敌相隣日夜窥伺防守之职责在帅司而不畀以重兵徒有其名而无其实虽使廉颇李牧为帅亦不能有所

施設而欲付一衰病书生使之谈笑却敌安能有济倘或兵将足用使令不之臣虽不才殫竭弩钝临机制变庶几尚可为朝廷独当一面以保上流不能则继之以死所甘心焉无兵将虚受重责一死虽小臣实惜之至於敌至而避怀印远遯但为身谋不为国计则非臣之素志也伏望圣慈特降睿旨差拨可用军马五七千人与见管之兵相兼使唤庶几不致误国方朝廷新失淮西之兵非不知缺乏兵将然摘那应副於当用之处有不可已者伏望留神幸察

一本路江州最为重地自昔六朝皆屯大兵择名臣以居之吴则陆逊东晋则温峤陶侃诚以控扼上流不可与他郡比也方今车驾驻驂建康九江尤为要害虽尝降旨令岳飞分兵屯泊至今未闻有至者夫兵贵合不贵分此特兵家常势至於要害之地当分兵控扼使敌人不敢窥伺所谓先人有夺人之心岂可执哉近年九江为马进所据朝廷遣大兵攻讨几半年仅能克之今舒蕲光黄并无扞蔽使敌骑奔突占据九江则江东西必大震扰其为患非浅浅也伏望圣慈特降亲笔趣飞分兵疾速依近降指挥屯驻江池以固上流之势事不可缓

一东北流移之人布满江西其间多少壮可用者无业可归迫於饥寒类多失所朝廷近降指挥令招充阙额禁军诚为得策然必令刺填洪州军额一隶军籍卒无脱期非人情所乐遂致无愿就者深虑转徙沟壑或流为盗贼诚可矜悯伏望圣慈特降睿旨许令招民充义兵只刺手背日加训练听本司使唤所有钱粮本司自行应副支給候遇防冬具人数申取朝廷指挥实为利便

一田邦直一军五百余人元系本司军马昨缘本司兼蕲黄等州宣抚使差往蕲州驻劄钱粮之类并依本司应副近来差屯光黄州又得探报就移庐州屯驻淮西既屯重兵邦直之兵人数不多必不藉此本司得之可以增重兵势分布使唤伏望圣慈特降睿旨将田邦直一军拨还本司实为利便

一本司昨得朝廷指挥许置都统制一员遇有贼盗会合广东福建军马并听节制近据广东统制官韩京申见令将官曹绍统所部兵七百人在循州兴宁县驻劄听候使唤又据福建统制官王进申见统所部军马在汀州驻劄两界首见无盗贼皆去本路不远伏望圣慈特降睿旨许臣勾抽使唤候过防冬发回逐路

一本司年例蒙朝廷支降钱十万贯应副防冬支用去年防冬不敢紊烦朝廷今年防冬非去年比窃虑缓急缺乏无以支梧缘本司见有朝廷出卖茶引钱伏望圣慈特降睿旨许依年例於茶引钱内应副庶几不致悞事

一洪州月支官兵粮米七千余石岁支八万五千余石除正苗米尽数起发上供外本州所得耗米等支用仅及其半去年蒙朝廷支拨二万石尚犹侵用过上供米一万二千余石已具奏闻乞行销破今年秋旱差官检踏放数不少又有闰月支费益多已具奏闻乞依去年例於上供米内支拨应副外更乞添支二万石伏望圣慈特降睿旨支拨施行

一防冬之际全藉有以激劝将士使之用命伏望圣慈特降睿旨给降从义郎至承信郎告各

五道进武校尉至进勇副尉绫纸各十道付本司收管遇有实立功效之人画时书填给付候过防冬具用过数目缴申朝廷其立功官高之人别具功状保明供申听候朝廷指挥

一江州旧属江东朝廷以与洪州相为表里割隶江西诚为利便惟南康军建昌县间於江州洪州之间犬牙相错不属本路每遇防冬之际措置斥堠济渡军马难於号令深属不便伏望圣慈特降睿旨许令南康军及建昌县兼听本司节制庶几不致缺误

右谨件如前谨录奏闻伏候勅旨

贴黄

臣契勘建炎三年突骑自武昌渡江侵犯江西当时但为退避之计官省既行帅臣亦遯兵民莫有统率之者遂致洪州残破最为惨酷抚吉筠袁皆被其害绍兴元年李成马进占据九江自筠及洪贼势猖獗朝廷命将帅统重兵以破之贼马远遯保全一路以至今日由是观之退避之与进讨其效可见今本路自兵火之後六七年涵养休息渐复承平旧观万一寇伪乘间南牧欲退避则不可欲进讨则无兵不知朝廷使臣何以处之委一路生灵及财赋根本之地置而不恤使寇伪得以占据未见其可也若谓贼未必来及淮上有兵如去冬之捷虽来未必能南渡皆出侥幸侥幸岂可数哉如臣画一所陈皆防冬所不可阙及审度朝廷可以应副者方敢冒昧以闻伏望圣慈与三四大臣熟议早降指挥如朝廷以为不必遣兵实难虚受重责乞检会臣累奏所乞或先次黜责施行伏望睿察

臣契勘近据探报寿春府光州皆有贼马渡淮前来作过称系孔彦舟王孤角等军马委是紧急所乞兵将伏望速降睿旨差拨或旋次起发前来应副分擘使唤伏乞圣察

乞施行余应求张翥捕盗功效奏状

勘会本路吉等州管下昨来不住有?徒结集羣衆肆行警刼乡村残破县道逼近州城溃散巡尉官兵杀死知县及捕盗官猖獗作过臣节次遣发兵将及关牒提刑司官同共督责诸州措置招捕过大小头项贼火六十余件已行开具申奏朝廷乞契勘本路提点刑狱公事余应求?州张翥自到任以来夙夜究心同共協力措置施設方略遣兵杀获凶贼刘宣温铁弹罗十二刘四花魏照等贼徒及生擒贼首刘宣刘洪并招安到久不获败贼首周十隆谢小鬼赖十九丁二十一刘动天谢先谢聪罗动天尹宝张大闲方叔公等头项火数不少目即本路惟吉袁州抵接湖南界及?州僻远去处尚有些少败残徒党已遣兵前去招捕外今来盗贼委是衰息所有逐官备见宣力委有功效欲望圣慈详酌特降睿旨施行

乞施行修城官吏奏状

勘会先奉圣旨指挥令逐路帅司督责所属州军专委守贰各行点检城壁若城大难以因旧修筑仰随宜减蹙务要省便臣寻契勘洪州城池自建炎三年十月内经金人残破之後不曾

修治城壁摧毀壕堑堙塞并无楼櫓器具兼城北一带皆无居民尽是荒闲田土地步阔远又城外积沙高与城齐可以下瞰城中缓急难以防守恭依前项圣旨指挥相度到合行裁减自洪乔门至崇和门取直修筑新城门撤壕堑却将旧城裁减充防扞江水堤岸臣一面兑那本司钱物计置材植塼灰等物料於诸州刷壮城兵士量行差拨及本州壮城厢军并於洪州管下县分应干僧寺道观有常住物业者纽计税钱量差夫力各日支破口食钱米相兼工役已节次具因依奏闻去後续准朝廷支降空名承信告一十道助教勅二十二道应副变转支用自绍兴七年正月初五起工创新截筑城身长七百一十二丈五尺根基阔二丈五尺面收阔一丈八尺并护膝墙女头通高二丈二尺表里并用塼裹砌及墁砌城面炮台墁道瓮城亦系用塼裹砌计用过新砖一百余万并系置窑烧变并令窑户断扑供应及於城外开掘周回壕河计长七百一十二丈五尺面阔六丈深一丈六尺并造到马面敌楼大小共一百余座计六百六十余间及计备城上要用防城器具箠篱牌狗脚木炮坐橦木等修盖诸城门楼一十一座瓮城两所钓桥四座防城器具库屋两处计四十间并皆齐备据都壕寨官申十一月十五日修城毕工已将寺观人夫等犒设放散其有所用钱粮收买塼灰木植等物尽系本司措置应副并无一事一件取於民间所有首尾宣力官吏欲望朝廷详酌施行谨具如後须至奏闻者

提举官

武功大夫特差权发遣江南西路兵马铃辖洪州驻劄武登

左朝奉大夫通判洪州军州事崔耀卿

左朝奉郎权通判洪州军州事李利用

都壕寨官武节郎杜观

制造楼櫓防城器具及受给钱粮官

武功大夫忠州防御使前洪州兵马都监时光祖

武功郎江南西路安抚制置大使司准备将领张复

受给塼木器具官

下班祗应萧安 张道

部役官

从义郎白惇智

忠翊郎孙臯

成忠郎周端

保义郎兰浩

进义校尉张福

下班祗应张嘒

进武副尉郝敏

本司点检文字

进武副尉杨安中

保义郎雷德成

主行人吏四名

张京 何琳 陈光祖 汤頔

右谨件状如前谨录奏闻

谢提举临安府洞霄宫表

臣某言伏奉勅命除臣提举临安府洞霄宫已望阙谢恩祇受讫者分阃踰年莫着蕃宣之效奉祠得请曲蒙覆护之恩感涕无从兢慙罔措中谢伏念臣误膺器使素乏材能徒有忧国爱君之心曾无周身防患之术囊封上达每罄愚忠函诏俯颁屡叨睿獎夫何抵忤自取悔尤嘖有烦言愧渎盖高之德事无实状难当溢恶之辞岂敢辨明但祈照察兹盖伏遇皇帝陛下以慈为宝体道宅心推善贷之深仁扩纳污之宏度致兹盛德施及孤踪臣敢不省循致谤之由克谨保身之戒攀援望絶方屏迹於山林祝颂诚深愿凭因於香火

梁溪集卷一百一

卷一百二

钦定四库全书

梁谿集卷一百二 宋 李纲 撰表劄奏议六十四

论使事劄子 辞免知潭州奏状辞免知潭州兼荆湖南路安抚大使奏状辞免第三奏状 允诏

谢免荆湖南路安抚大使兼知潭州依旧宫祠表

论使事劄子

臣窃见朝廷遣王伦使金国奉迎梓宫往返屡矣今者伦之归与金使偕乃以江南诏谕为使名四方传闻无不骇愕何者两国通使讲好息兵以礼为先自敌以上无所不用其至礼之经也乃今不着国号而曰江南不云通问而曰诏谕此何礼也宋有天下几二百年祖功宗德以圣继圣声教溢於四表炎运中微夷狄乱常驯致靖康之变国祚几绝赖陛下总师大河之北入继大统羣臣推戴克受天命履大宝临万邦为神民万物之主一纪於兹矣敌人遣使乃敢命名如此自古夷狄陵侮中国未有若斯之甚者原其所自皆吾谋虑弗臧不能自治自强偷安朝夕无久远之计羣臣误陛下之所致也臣请试为陛下详言之方靖康末金人破都城毁宗社逼二圣銮舆以北迁易姓建号而陛下应天顺人光复旧业自我视彼则仇讎也自彼视我则腹心之疾也岂复有可和之理然而朝廷遣使通问冠盖相望於道路卑辞厚币无所爱惜者正以二圣在其域中为亲屈已不得已而然犹有说也至去年春两宫凶问既至陛下抱哀恤创钜痛深虽未能躬率六师以报不共戴天之讐犹当寝罢使者绝不与通以正仇讐之名慎固封守选练将帅以为自保之计观衅待时动必有功传曰名其为贼敌乃可服欲正仇讐之名以张恢复之本正在此时而朝廷失策复遣使以迎梓宫亟往遄返帑藏为虚初不得其要约今者敌使荐至廼建诏谕之号公肆陵侮不知朝廷将何以应之夫奉迎梓宫乃陛下孝思罔极在人情不得不如此者然金人狡狴动出计谋我以诚求彼以诈应借此为重成其奸心不知朝廷何所凭信臣恐堕其计中祸难之未艾也臣闻忠信为周古者遣使以忠信为主故小雅於皇皇者华君遣使臣之诗谏谋度询必以周爰为言使不忠信为国之患非浅浅也彼王伦何为者市井狙僇之才左右卖国之伍三尺之童皆知其不足信而朝廷信之此必有甘言以中朝廷之欲臣恐听虚词而受实患如楚之信张仪以求商於之地也且伦使事初以奉迎梓宫为指而金使之来乃以江南诏谕为名循名责实已自乖戾则其所以罔朝廷而生後患者不待诘而可知臣在远方虽不足以知其曲折然以愚意料之彼为此名以遣使其邀求大略有五必降诏书欲陛下屈体降礼以听受一也必有赦文欲朝廷宣布颁示郡县二也必立约束欲陛下奉藩称臣禀其号令三也必求岁赂广其数目使我坐困四也必求割地以江为界淮南荆襄四川尽欲得之五也此五者朝廷从其一则大事去矣天子之令曰诏臣下则以禀令受诏为事倘屈体降礼权时之宜以聽其诏令则君臣之分定矣君臣尊卑如天地相远降尊就卑以天为地可乎其不可者一也天子之恩曰赦臣民则以遇赦该恩为幸倘朝廷宣布颁示郡县则天下知朝廷之势去士民之心离矣其不可者二也履至尊以制六合

曰天子谨制度以为诸侯曰藩臣天子出命者也藩臣禀令者也倘奉藩称臣禀其号令则事不在我国家之势倾矣其不可者三也朝廷全盛之时岁赂金人百五十万犹不能给遂至败盟今日保据东南财用鲜少又有养兵之费日益窘迫而欲增赂以求全盖亦难矣其不可者四也淮南荆襄江浙之屏蔽也四川天下之上流也不能措画屏蔽保有上流资天险结人心以为固而欲割要害之地弃民以求安必无之理其不可者五也金人变诈不测贪婪无厌纵使听其诏令奉藩称臣其志犹未已也必继其号召或使亲迎梓宫或使单车入觐或使移易将相或使改革政事或竭取赋税或腴削土宇从之则无有艺极一不从则前功尽废反为兵端以谓权时之宜聽其邀求可以无後悔者非愚则诬也使国家之势单弱果不足以自振不得已而为此固亦无可奈何今土宇之广犹半天下臣民之心戴宋不忘与有识者谋之尚足以有为岂可忘祖宗之大业生灵之属望弗虑弗图遽自屈服祈哀乞怜冀延旦暮之命哉昔少康以一旅之衆祀夏配天不失旧物光武骑牛从军杀新野尉然後得马率乌合三千破寻邑百万遂定中兴之业晋保江左财用匱乏王导至身衣练布诱善贾以济国用卒延国祚百有余年今朝廷事力虽不足以望全盛之时然将士如云带甲之卒数十万士马之盛岂不过於少康光武谷粟金帛运漕不絶舳舻相?财用之多岂不过於东晋有可爲之资而陛下又有过人之聪明何憚不为而欲北面以事仇讎甘受此屈辱也夫自古创业中兴之主多由布衣奋空拳以取天下非吾之兵民财用而吾能因而用之积累以成帝王之业诒谋子孙垂裕无穷今兵民财用皆祖宗之所以遗我者而陛下不思所以用之遽欲委身束手受制於仇讎之手此臣之所不晓也陛下纵自轻奈宗社何奈天下臣民何奈後世史册何且立大事建大功者必以作士气得人心为先而号令赏罚者其具也人心士气在今日虽已不及建炎之初然审号令明赏罚以振起之尚为我用陛下一受制於强敌号令赏罚皆不由於已出士气日索人心日离将士益桀骜而不可驭民庶益泮涣而不可蓄威令一去如神龙之失水为蝼蚁所困後虽悔之噬脐何及此臣所以夙夜痛愤而寒心也议者必谓势有强弱弱者必服於强故太王事狄勾践事吴孙权事魏皆行权以济大业藉此以感动圣意臣皆以为不然昔者大王居邠狄人侵之事之以珠玉犬马皆不得免徙居岐山之下从之者如归市狄人乃已今陛下能以此已金人之侵乎勾践身入吴以为臣仆仅得归国枕戈尝胆卒以报吴今陛下能以此报金人之仇乎孙氏起於江东未能自立故臣魏以俟时今陛下藉祖宗二百年之基业纵使未能恢复土宇岂可不自爱重而怖惧屈服以貽天下後世之讥议哉为此说者但欲求合於朝廷之意而不顾患祸之在後臣愚窃以为过矣昔赵欲帝秦鲁仲连辞而折之以谓秦帝则诸侯皆为所制不听命则诛戮随之欲帝秦者知其利而不知其害秦非礼义之国仲连有蹈东海而死耳不忍为之民也新垣衍屈不果帝秦而秦师为之退舍曹操以十万衆临荆州势摇东南虽张昭亦欲迎之周瑜为孙权画策以谓如臣者何往不可将军安所容乎权拊案大悟遂有赤壁之战而鼎足之势成此二人者其所陈说深切着明二君听之遂能反祸以为福转败而成功胷中照了明白洞达果断而不疑也今彼使之来其用事者未必不以兵随之以以为胁制之术顾朝廷所以措置者如何耳措置有备虽苻坚百万之师不足畏措置无术虽数千百骑便足以为吾扰方危迫之秋无排难解纷之略则无贵於智者矣朝廷自十数年来议论不一执守不坚无规模素定之计玩岁愒日苟且过时无积累就绪之功唱为和议者纷纷趣度目前而不以後艰为念以致今日之陵侮非偶然也忠义之士怀才抱智不能自达者顾岂乏人臣愿陛下特留圣意且勿轻许深诏羣臣讲明利害可以长久之策悉以上闻陛下择其善者而从之广谋兼虑而不偏听於今日事必有所补臣昨於建炎元年尝献国是之说以

谓朝廷不能自强自治但欲卑屈以从之虽至於奉藩称臣敌人之谋势犹未已又於绍兴五年蒙降诏访问尝献乞罢议和之说以谓遣使议和敌人必制我以必不敢为之谋邀我以必不可从之事非徒无益而有害於吾自治自强之计为患甚深区区之忠幸蒙睿察今日之事无他遣使议和不已使敌人得窥伺谋画皆引惹之所致也臣愿陛下为宗社大计万机之余长虑却顾覽前古之兴亡究今日之利害傥或权时之宜稟其号令自後别有须索如前所陈复稟正朔易服色趣朝会擅诛赏尽取鞍马器甲之类当如何处之而吾之士气既索如何可以复振人心既离如何可以复收国势既倾如何可以复定今日执和议生事者果能任其责而保其必不然乎远察太王勾践之事与今日不同深味仲连周瑜之言与今日相若利害昭然矣臣世受国恩奉事三朝蒙陛下知遇尤厚常愿奋不顾身以徇国家之急今事势危迫所以应之一失机会则祸难相寻为害有不可胜言者又非前日之比区区孤忠愿效愚计第恐朝廷不能用之夫用不用在朝廷而臣激於义有不得不言者惟陛下留神幸察臣窃观国家之与金人势不两立而今日之事止在於絶之与通亦不难决也与之通则听其号令而臣属之动为所制身危国蹙必至於亡而後已与之絶则图所以自治自强者选将励兵待其来而御之胜负之势犹未定也与其事不共戴天之讎仰愧宗庙俯失士民之心而终归於亡貽羞无穷曷若幡然改图正仇讎之名辞顺理直以作士民之气犹可以履危而求安转亡而为存未为失策也二者利害相去远矣臣愿陛下出自睿断正王伦误国之罪而肆诸市朝彼使未入境则却而弗纳已入境则拘留而勿遣降哀痛罪已之诏深咎前日和议之失丁宁反覆其言切至以激励天下臣民将士之心尽取赂遗敌人金帛以募敢死之士训练习服以守边疆以备不虞以制敌人冲突此计既定诏旨既颁臣将见人情翕然回心易虑天地神明亦当助顺强敌之师不战而自屈矣然後据江淮以为固进贤俊退佞谀修政事明赏刑治军旅积金谷待时而奋以图恢复此岂可与受制於人甘心屈辱同日而语哉且刘豫者金人之所立八九年间接之所以奉金人者可谓至矣一旦废弃如弁髦土梗何则彼为利谋而初不以恩信为事也陛下视金人之於我孰与於豫豫犹如此於我可知彼虽以江南数千里地王我为言犹不足信而况於复故境归侵疆乎唯智者可与料敌唯明者可与照奸陛下或以臣言为未然愿降臣章与羣臣之有智略者虑而图之勿为单见之所惑勿为讎敌之所欺勿至将来追悔不及而後悔则宗社生灵之福也传曰日中必昃操刀必割时乎时不再来臣言可采陛下断而行之勿疑以为议论乖谬而害於今日之至计愿先斧钺之戮以惩妄发夫主忧臣辱主辱臣死国家事势至此死何足惜惟陛下裁幸臣昨任江西安抚制置大使日因淮西酈琼之变以已见利害具奏申闻误蒙圣恩降诏獎谕以疏中论及侍从台谏以谓侍从者论思献纳之官台谏者耳目腹心之寄以言为职类皆毛举细故以塞责所论不过簿书资格守卒令丞除授之失当至於国家大计系宗社之安危生灵之休戚初未闻有一言及之遂犯台谏之怒厚诬丑诋以无为有羣起而攻之伏蒙圣慈洞照非辜力赐保全使得归休山林养痾藏拙臣之为幸大矣蒙垢忍耻不敢自明緘口结舌不敢复与世事故刳菟之言久不上达然惓惓之心未尝一日不在赤墀之下也今闻使事方亟所系国体非轻存亡之端非独安危而已臣不胜愤懣敢以狂瞽干冒天聪罪当万死俯伏俟命

辞免知潭州奏状

右臣今月二十日准尚书省劄子二月八日三省同奉圣旨差臣知潭州臣闻命震惊罔知所

措伏念臣受材譎薄赋分奇穷误被使令荐更方面无丝发之功以报殊遇有丘山之咎以致烦言闲废以来岁月未久遽蒙擦拭复界藩维自顾何人可以当此矧湖湘之重地乃东南之上流兵火之余寇盗未靖师帅之选授受惟难如臣忧患余生疾疢交作血气凋零精力弗强自藏寂寞之滨尚嗟衰瘁况膺繁剧之寄必致颠隮伏望圣慈垂情旧物怜弩马之已老哀倦翮之屡伤特降俞音收回成命使遂安于丘壑庶或保於桑榆仰报大恩愿期他日

辞免知潭州兼荆湖南路安抚大使奏状

右臣近准尚书省劄子二月初八日三省同奉圣旨差臣知潭州已具奏辞免未奉回降指挥续准尚书省劄子二月十一日三省同奉圣旨除臣兼荆湖南路安抚大使又准尚书省劄子二月十五日奉圣旨令臣不候受告般家接人疾速前去之任仰荷圣恩不胜震惧窃念臣自朝廷多事以来每被使令不敢辞难而臣稟性迂愚动辄妄发易犯衆怒自致烦言昨者蒙恩起废两帅江湖但知激励以向前不虞弹射之在後皆遭白简公肆诋诬以是为非以无为有凡乡党自好之士所不为者猥琐污蔑无所不至虽蒙朝廷洞照曲赐保全置而不问然露章既传孰不骇愕臣深惟大臣之义获谤于时但当静默循省以冀朝廷之见察不敢自明孤远寡与又无为臣言者包羞忍耻分老山林藏拙待尽絶意荣望岂谓天恩轸念旧物亟加甄录不终弃捐收於寂寞之滨付以兵民之重虽韩安国起徒中而为内史张敞由亡命而绾郡章较臣所蒙何足为喻然长沙乃臣旧治当时不以善去今日何可在行即使臣顽钝无耻贪恋恩渥延见吏民何以为顔况臣齿髮浸暮衰病相仍积忧熏心精力顿耗愧不自量复当重寄必致疎虞以误国事所系匪轻伏望圣慈察臣惓惓之诚非敢饰说托故为辞特降其睿旨追寝成命许臣依旧外任宫观庶几晚节不至颠隮天地父母之恩终期报称

辞免第三奏状

右臣伏蒙圣慈以臣具奏辞免新除知潭州兼荆湖南路安抚大使特降诏书不允者仰戴天恩第深感涕臣闻人君知人善任使则足以成功人臣奉公匪懈则足以称职各尽其道非相为赐也臣以散材遭逢休运蒙陛下起於罪戾闲废之中付以方面兵民之寄者屡矣德厚恩深每欲黽勉自竭以图报万一而以迂踈之故无周身之术动致烦言溷渎宸聽卒不能有以少称知遇之意此臣所以夙夜感叹而不遑啓处也今者罢自江西为日未久又蒙湔洗畀以帅权虽陛下日月之光幽隐必烛而微臣蝼蚁之迹局蹐靡容昔汉文帝闻季布贤召之既而罢归布曰陛下以一人誉召臣一人毁去臣恐天下有识者有以窥陛下也顾臣区区之进退如双鳬乘鴈之去来何足少多然数年之间亟奋亟蹶上累陛下知人任使之明实有系於国体况臣衰病日加精力凋耗积以忧患心气不宁岂可复当上流重镇之任伏望圣慈察臣精诚非敢饰说以辞难检会臣累奏追寝成命依旧外祠以安愚分臣不胜祈天望圣激切屏营之至

允诏

勅李某省所奏乞检会累奏依旧外祠事具悉朕念远民且以湖湘帅阃之重简求宿望往镇

临之卿许国之忠不择地而安有自来矣兹览来疏至於再三是何辞之力也重违卿意其复以真祠之禄从所便安抑不失朕体貌之意可依所请依旧提举临安府洞霄宫任便居住故兹诏示想宜知悉夏热卿比平安好遣书指不多及

谢免荆湖南路安抚大使兼知潭州依旧宫祠表

吁天请命方虞雷电之诛称物施仁遽沾雨露之泽荷恩益腆抚已增惭【中谢】伏念臣少也过庭尝闻诗礼之训晚而遇主滥陪宰辅之司虽迂?素乏经世之远猷而拙性常谨律身之小节坐罹谗毁皆出怨仇马援谗深谁与辨明於薏实羲之誓墓但期终老於兰亭岂谓大君未忘一介起於闲地付以名藩而臣景迫桑榆衰先蒲柳忧畏甚矣直类伤弓之禽疲瘵繭然久抱负薪之疾既不获黽勉以承命又深惧稽迟之速辜夙夜靡遑进退维谷念父母之於厥子惟疾痛之为忧而天地之於羣生俾飞潜之各遂力布由中之恳果蒙从欲之私琳馆优游尚叨厚廩海邦深远仍许便居此盖伏遇皇帝陛下体道宅心用人维已不遗簪履之旧物每赐记怜尤矜樗栎之散材曲加庇覆致滋孤陋亦获保全臣敢不克戒暮涂益修素履甘山林之寂寞一洗五十七年之非冯香火之因缘上祝亿千万岁之壽

梁溪集卷一百二

卷一百三

钦定四库全书

梁谿集卷一百三 宋 李纲 撰

劄子一

与宰相论扞贼劄子 与右相条具事宜劄子与宰相乞兵劄子

与宰相乞王彦军马劄子

与宰相论扞贼劄子

某伏覩进奏院报三省枢密院同奉圣旨探报敌人窥伺承楚如别有警急当亲总六师以临大江某於十月二十二日已曾具奏以今日扞御贼马事势陈献三策自福州入急递投进今来又覩进奏院报韩世忠统全军於承楚间迎击贼兵连获胜捷有旨分遣台臣督刘光世张俊统兵渡江应援车驾已起发进临江上抚劳诸军窃惟朝廷当危急艰难之秋为宗社生灵之计建大议决大策不贰不疑毅然亲征将士用命捷音系路庙谟克壮敌势退屈诚可为天下大庆然贼情狡狴戎事方棘机会之来间不容发某辄敢竭其愚虑陈十事以献伏望钧慈特赐详覽有可以裨庙算之万一者愿施行之勿以人废言不胜幸甚谨具下项

一宜防备生兵某窃覩伪齐刘豫招诱叛将驱河北河东陕西之民挟带寇骑侵扰淮甸聚粮既久【传闻伪齐聚粮於淮阳宿迁县甚久为入寇之计非一朝一夕】入寇亦早【往年寇骑南牧多以春冬之交今伪齐以冬初已入寇比之往年为早】偶然有窥伺江左之意今既王师屡捷挫其锐气势必迟留境上乞师金人万有一重兵继来我以疲乏之兵当新羈之马则将何以取胜宜命诸将蓄养锐卒更进迭休使有余力以待之又於诸路摘那精锐军马以为济师之计庶几可以扞御

一宜防备海道某窃闻伪齐刘豫於登莱等州多造海舟又於楚海等处虏掠客旅舟船其用意非浅浅也方冬月风便之时势须驱使山东之人自海道犯浙东一带滨海州县则吾腹内之民扰矣然自海道来者必皆步人实不足畏朝廷既遣兵将分屯明越以备不虞而沿海州县巡尉弓兵数不为少合之则势强分之则势弱宜命帅司并提刑司团结成军於要害地摆布控扼又募海上土豪自备舟船巡遯扞御许以将来事定重与推赏不为无补

一宜防备上流某窃观自昔侵犯东南未有不由上流者舳舻相接顺流乘风自川江而下日数百里不旬月间可至江浙故上流之地自吴及东晋以来必屯重兵乃可保国今归峡荆南岳鄂九江一带虽无他虞然屯兵不多所幸襄汉复为我有上流形势倚之为重襟带荆蜀控引江淮下瞰畿甸真形胜必争之地也宜命大帅统重兵以镇襄阳则上流有屏蔽之势江浙

可以奠枕中原有恢复之兆畿甸可以俯窥此最今日之上策惟庙谟熟计之

一宜防备四川某窃观金人累年侵犯四川其意盖以蜀中富庶欲必得而後已所幸山川险固将士用命仅能保守今贼马南牧扰我淮甸安知不别遣重兵窥伺川峡道里辽远号令难通都督既已不行两宣抚不相节制邈然一方深可忧虑宜命信臣早临抚之布宣威德不失机会庶几四川生灵有所依怙国势赖以安非细故也

一宜保淮南某窃闻金人中间通使屡有画江之言盖为刘豫之计今贼马南牧虽未必敢窥江左其意决欲尽得淮南深虑兵交使在其间复有画江之请朝廷欲纾目前之急或遂许之则大事去矣夫淮南者江南之屏蔽也六朝所以能保有江左者以强兵巨镇所以为藩篱者尽在淮南故以魏武之雄苻坚石勒之衆宇文拓跋之盛卒不能窥江表後唐李氏有淮南则可以都金陵其後淮南为周世宗所取遂以削弱此必至之理也万一有画江之请谨不可许宜命诸将協力击贼使之退遯将来措置淮南当於两路置两大帅以临之东路扬州为帅府屯重兵为根本之地分遣兵将进守楚海濠泗壽春淮阳沿淮一带诸郡小筑城垒如开新边其初朝廷应副钱粮徐议营田使自贍养遇有贼马则大帅遣兵应援稍能自守乃可召人归业渐次葺理假以岁月而藩篱成矣前有藩篱之固後有大江之险然後可以立国而议攻讨之策近年以来大将握重兵於江南官吏守空城於江北虽有天险初无战舰水军之备不几於倒置而虚设乎愿庙堂熟计之

一宜调和诸将某窃闻师克在和不在衆将帅不和而能成功者未之有也武人之性刚果有毗睚之失必相怨愤而激以忠义则往往复合者其性然也郭子仪李光弼同在朔方未尝同堂共席而坐一闻安史之变子仪中分麾下与光弼勉之立功何则先国家之急而不以私害公也贾复寇恂不相能光武解之曰天下未定两虎安得私鬪朕为分之於是并坐极欢共车同出结友而去今朝廷所赖以爪牙者三大将也平居无事之时人情岂无纖芥今当朝廷艰危之秋使之各渡江以相应援则当以调和之为先宜赞渊衷降宸翰遣近臣推明古之将帅徇国家之急而忘私忿之意勉以忠义使之欢然犄角立功则贼虽衆多不难破也愿庙堂留意

一宜增置禁卫某窃观自古人主必有亲兵所以制障表里为长虑郤顾之术也祖宗禁卫之兵总之三衙其制甚备自经变故以来人数浸少止以将兵为卫非强本弱枝之策今将兵既遣渡江宿卫单寡何以镇服中外仓卒召募固难得人谓当有术以权之窃见近降指挥复置御营使司宜因此时号召诸路统制官之有名望者使率其部曲充御营使司五军统制平时与禁卫之兵相参宿卫缓急听御营使司使唤更不隸属诸大将下使军容奋张国势益隆诚今日之先务也

一宜广备粮食某窃谓用兵以粮食为急粮食以飞挽为难今贼兵扰吾淮甸将士扞御势或持久则粮食不可不广为之备访闻湖南米百钱江南东西岁亦丰稔朝廷近者增置漕臣宜命江湖广行收采措置舟船顺流而下储蓄於建康镇江转漕淮甸以给诸军庶几仓卒无乏絶之患若止仰常赋深恐缓急不免科须米价翔踊民力重困惟庙堂图之一宜措置战舰水

军某窃观大江限制南北实为天险然必以人力加之险乃可恃魏武亲临瓜步孙权以舟师拒之见旌旗戈甲之盛叹曰生子当如孙仲谋权告以春水方生疾病将作操乃还其後曹丕南伐见波浪汹涌吴师有备亦曰彼有人焉未可图也遂班师由是观之?长江之险择要害之地置战舰水军使形势相接金鼓之声相闻敌人虽有百万之师岂敢轻犯哉何则彼为济渡之谋而我有攻击之具主客之势既不相侔北人所习又非其利真东南形胜保国之要术也今国家权寓江左而累年以来不闻措置设险之策使敌人得以窥伺玩岁愒日於闲暇无事之时遑遽震恐於仓卒扰攘之际有险而不议所以守之者可以为而不为真可惜也荆湖间车船乃唐嗣曹王臯遗制其大有至三四十车者挟以双轮鼓棹而进驶於阵马又仁宗朝修武经总要该载古今战舰之制甚备愿命荆湖及颁降式樣於沿江诸州使之制造召募水军统以将佐逐时阅习可以为长久之利非一时之急而已天下无不可为之事勿谓缓不及事而遂置之天下幸甚

一宜措置杨么某昨任荆广宣抚使日招捕羣盗数万人惟湖北贼杨么据重湖之险非有战舰水军未可攻讨尝具杨么本末申奏以谓此贼不可轻是时朝廷已罢荆广宣抚司特降指挥令某节制湖北荆南同共进讨方措置间某蒙恩罢任朝廷委制置使王 同两路帅臣措置迨今未闻殄平势颇猖獗盖此贼非陆地羣盗之比据重湖环千余里出没不常其徒皆舟人渔子便於操舟又有溃散兵卒窜其间以教之战我师深入欲速成功则往往不利屯聚持久则钱粮之费不貲今又淮甸警急朝廷不免摘那兵将则此贼之势又复鸱张未有扫荡之期为吾牵制非细故也宜命两路帅臣谨重未须深入俟其抄掠则随宜击之分兵屯濒湖诸邑使之不得侵渔种植以絶其粮明出文榜揭近上首领姓名重赏捕之许其徒中自相杀并以携其党与之心贼必渐困然後可图兵以缓为速如赵充国之讨先零是也今其徒既衆必示以生路乃可使之解散而取酋首必欲尽灭以坚其从贼之志非策之得也惟庙堂裁处与右相条具事宜劄子

某窃以主上躬睿智神武之姿有知人之明所以待遇相公仰成恢复之业者信任之专古所未有相公蘊王佐之才有不世出之略被受眷知愿捐躯以徇国者精忠之诚远追古人愤强敌之凭陵耻逆臣之僭窃悼二圣銮舆之未还悯中原生灵之涂炭深谋远虑图此武功此固十数年来天下士民之所僣望者也然而适当旱暵之余财用匱乏民力凋瘵不取於民则调度不足取之过甚则人心惊疑正在斟酌损益之间使军不乏兴民不告病乃为得策辄殫浅短之虑庶几万一之得以裨庙筭伏望钧慈特赐采择谨具下项

一某昨过衢州窃见都督行府劄子颁降官告劝诱上户进纳文臣司宣教郎至迪功郎武臣自修武郎至承信郎价直各有等差计钱六十一万贯内宣教郎六万贯迪功郎一万贯其余升降各以万五十贯为率契勘自来进纳文臣止於判司簿尉遇有功改官即转入右列盖所以清流品重名器也今以京朝官许之进纳恐失本意又上户之家虽有物力安能目前具六万缗以买一官若分科衆户则未知此官当使谁受某谓不若以一宣教郎分为六迪功郎仿此以行则上户易出财人情乐於入仕州县劝诱不至费力又无轻名器之患就不得已之中此为长策仍於诸郡量减分数庶几不至竭泽易於趋办伏望钧慈更赐裁处

一某契勘本路人户合纳今年夏税和买物帛朝廷元降指挥立定分数从第四等已下折纳价银依自来条限起催盖优饶下户易於催纳今承都转运司公文准尚书省劄子勘会本路合发折帛钱元责限三月桩足欲督责两漕臣拘催日下并要起发尽絶奉圣旨依仍展十日若依所展日限合至四月十日了足今来正是蚕麦未熟新陈不交之时本路洪吉筠袁江抚州兴国临江军皆系灾伤至重其第四等已下人户多是官中见行抄割赈济之人难以预行催纳如州县逐急於上户催科将来下户郤合入纳本色显是重困除已申奏朝廷乞将本路灾伤州县合起折帛钱依条限催纳其余州县自依今来立限指挥庶几灾伤下户得被实惠不致逃亡更望钧慈特赐照察

一某窃见诸路应副岳飞钱米并津船至郢州交卸势须先有重兵屯驻及修盖仓库安顿去处又自汉沔至郢州千有余里密迤伪境须得军马防护粮道乃可无虞某窃以谓不若且於郢州椿管候将来大军进发沿汉江有备乃可旋次措置津船实为得策更望钧慈特赐裁处

一某窃见自军兴以来收於民者非一降官告给度牒卖户帖理积欠折帛博杂预借和买名色甚多当此旱灾之余民力已困诚愿朝廷讲求理财之道救弊核实开阖贸迁使不敛於民而用度足乃为长久之计伏望钧慈特赐垂念

一某近因入劄子论兵家利害妄意朝廷措置有未尽善者五宜预备者三当善後者二议论迂?诚不足裨补庙谟之万一姑尽其拳拳之忠而已辄录副本拜呈伏望钧慈特赐详览

与宰相乞兵劄子

某已具状申都督行府本路?吉袁州建昌军等处近来盗贼头项渐多盖缘军马单弱不足镇压如处州元有李山一项军马贼势稍息李山近为岳飞勾回贼盗遂复猖獗接连袁吉一带饥民啸聚作过本司虽遣发军马人数不多深虑贼势滋蔓为数州之患将来难以殄灭伏望钧慈早赐指挥於近便处先拨军马二三千人赴本司相兼使唤钱粮之类令转运司於上供钱内应副庶几盗贼可以措置及前期训练以备将来防秋之用不胜幸甚

与宰相乞王彦军马劄子

某契勘近尝条陈本路防秋利害乞差元所请本路军马一万人及於刘光世岳飞军中摘那军马於舒蕲黄州驻劄已具奏闻去讫近闻刘光世军马已起发往庐州岳飞军马已起发往襄阳府本路所乞军马未蒙都督行府差到沿江一带并无控扼切虑贼情狡狴或有窥伺乘间捣虚无兵应援深为可虑兼契勘岳飞大军移屯襄阳所有钱粮并系本路应副经由蕲黄等州自沔鄂以趣襄汉实以本路为根本以蕲黄等州为咽喉之地万一本路为贼所扰蕲黄等州为贼占据无兵扞御即根本之地骚动钱粮无自而取咽喉之地阻塞粮道无自而通襄汉之军坐见困乏为害不细若待临时申请决致误事前後累申所乞军马非独止为本路之故近准都督行府劄子已勾王彦军马赴行府约七八月间可到候到日差拨前去勘会王彦军马见在荆南府未曾起发将来得到都督行府须在八九月间郤行差拨前来已是深冬不

惟往返虚费日月兼又军马劳顿後期失事伏望朝廷特赐指挥令王彦军马候将来过本路日就便存留听本司节制於沿江分布防扼及抽那往?吉等州讨捕盗贼庶几不致阙误所有乞於刘光世岳飞军中差兵前来舒蕲黄州驻劄亦乞早降指挥施行

小贴子

契勘本司近准都督行府劄子已巡按淮甸所有合申请事件申取朝廷指挥今来所乞就便存留王彦军马伏望钧慈详察早降指挥

梁谿集卷一百三

<集部,别集类,南宋建炎至德佑,梁谿集>

卷一百四

钦定四库全书

梁谿集卷一百四 宋 李纲 撰劄子二

与右相乞罢行交子劄子

辞免转官与宰执劄子

与宰相乞宫祠劄子

与李尚书措置画二劄子

与右相乞罢行交子劄子

契勘近承都转运司公文依准朝廷指挥本路和籴米二十万石其所降籴本以三分为率约计一分系新法交子二分系金银勅牒等具交子尚未降到某窃谓交子之法行於四川则为利行於他路则为害四川山路峻险铁钱脚重难於齎挈故以交子为便当时设法者措置得宜常豫桩留本钱一百万贯以权三百万贯交子公私均一流通无阻故蜀人便之近年不桩钱本其法已弊况欲行於他路哉今东南道路安便铜钱脚轻若欲便民固已不待交子自能流布目今户部财用窘迫必无数百万桩留钱本交子之行止凭片纸民间得之交手相付不敢停留良民折閱转卖不得元直十之二三兼并之家贱价停蓄坐享厚利争竞既起狱讼滋多其为害有不可胜言者某大观间任真州司法参军兼管常平仓库是时朝廷推行交子之法豪民挟形势户竞以贱价得之以待见钱输纳官司不敢不受应系官钱悉是交子其後觉知不便从而改法仓库见钱为之一空由此观之非独不便於民而官司尤甚今朝廷乃欲讲推行诚献言者之过也伏望钧慈更加详察特赐敷奏早行寝罢勿待公私已受其弊见不可行而後改天下不胜幸甚

辞免转官与宰执劄子

某误蒙圣恩特加迁秩寻具奏辞免又奉诏书不允无任感惧之至契勘本路近以?守失於抚循致已受招安人啸聚作过旁近郡县类多惊扰虽遣兵讨捕凶焰稍衰然以兵将分布不足之故尚多漏网残党犹有窜伏山林出没未已者帅司任一路之责何所逃罪今乃以盗息民安为名叨冒恩赏何以厌服公议兼某年来衰病屡请就闲见患疮疡久在假故深虑职事废弛以速官谤伏望平章都督特进仆射相公洞照诚恳特赐敷陈追寝成命以安愚分仍检会某累奏除一在外宫观差遣庶几得脱繁剧渐就休养仰赖庇庥保全晚节不胜幸甚

与宰执乞宫祠劄子

某伏以衰病累具奏陈乞罢帅守除一外任宫观未奉回降指挥窃念某忧患之余误蒙朝廷付以江西一路重寄夙夜黽勉不敢自暇以图报知遇之万一自去年四月初到任至今年八月终已及一年五个月适值早岁遵奉圣旨赈济劝糴以活饥民又依稟朝廷指挥招填军额建置营房修筑城池缮治器甲增修官府廨盖仓库催发钱粮招捕盗贼皆系某逐一躬亲措置处画心力殫耗幸已就绪今者以病乞身即非别有规避兼某近以淮西叛将事宜指陈朝廷措置失当实缘忧愤成疾心气不宁思虑颠错难以安职伏望平章都督特进仆射相公哀矜特赐敷陈检会累奏罢某江西安抚制置大使兼知洪州除授宫观差遣以养病躯以安愚分所有某在任修举到前件职事厘为六状已具奏闻及申尚书省都督府外伏望钧慈特赐详察

与李尚书措置画一劄子

某窃观六朝於上流重地必择名臣为之帅守使自为家计乃能镇抚一方屏翰王室皆有实效不事虚文私窃慕之故自到豫章以来修筑城池为可守计创置营房使兵民不相杂处缮治器甲修造官府仓库措置财赋蓄积金谷团结军伍招捕盗贼皆幸稍稍就绪庶几古人之万一少副朝廷委任之意今具下项

一修筑城池

洪州城池北面尤为阔远皆系荒闲田地无人居止又城外一带尽是涨沙高与城齐可以下瞰城中若欲为可守之计其势不得不修治因朝廷有蹙减指挥具奏条陈利害且乞给降空名告勅等得旨给空名告勅五万贯自去年收买木植烧变塼甃等至今春兴工止是本州厢军壮城及他州剗刷到兵卒共五百余人渐次修筑至夏末秋初方借寺观庄夫以助工役日给钱米月有犒设皆大使司办给并不支用漕司经费至十一月半毕工为城七百二十丈壕与城等为楼橹一百二十余坐计七百余间为城门十有一所计三十余间器具篋箠炮座等并旧城皆一新未尝调发民户一夫无颗粒分文敛於民者用新塼百二十余万口皆自置窑烧变及令窑户高价揽扑皆有数在工房可稽考也泰发到豫章日愿一登新城按视及登新旧城以望涨沙方见裁减利害之不谬

一创置营房

洪州自兵火之後营房并无存者厢禁军与民杂处不可钤束兼得朝廷指挥每岁防秋许勾抽本路隶将不隶将兵按閱使唤亦无寺观屋宇可以屯泊不免建置营屋大使司支钱与诸州收买木植及令诸司根括户絕抛弃屋宇折移改造置营房三千余间并系瓦屋除拨付本州厢禁军逐营外造客军营房一所五百余间见今屯泊诸州及步谅军马使司工房及洪州工案皆有图籍具在可稽考也

一缮治器甲

大使司元降画一拨兵二万人自近年以来并拨付都督行府及岳飞下去年春乃无一人一骑留者併与器甲军须一切席卷而去某去岁到官检视甲仗库空空如也因奏朝廷乞降告勅以渐制造督责两作院严其课程又分委诸州制造逮今已积三千余副金鼓旗帜弓弩刀枪之类率皆新置又以格式造战船战车三胜弓合弹弩等皆有名色数目在工房愿泰发因暇日试閱视之

一建置官府仓廩

洪州素无吏舍止以设厅前廊屋为之难以检察因规度都厅之南造使院三十间以居羣吏却以设厅前旧吏舍分置甲仗激赏营田仪从添赐等库下马门外旧皆草屋为造房廊数十间收其直归公使库州学旧未全备为增修两廊斋舍等五十余间大丰仓自兵火後全无屋宇为造新廩八座计四十余间以贮大使司并常平司米斛前此并无教閱之所为造新兵射厅及閱武堂防城器具之类不可无安顿去处为造东南壁及西北壁防城库两所共四十间无館宾客之所为置候参谋宅以充行衙见今贾路分居止皆有数目在工房

一措置财赋

洪州前此财赋所以匱乏者非惟以年凶民贫用度广之故不治其源使之然也诸县者财赋之源置而不问每遇缓急窘迫之际乃召县令使之甘认应副岂非倒置乎某自到任将诸县合纳窠名钱一切根刷见名色将本县合支用之数分拨窠名存留应副外自余并诸司钱物并令解州次月五日前到违限者治之又每季因通判行县委之剗刷以此源源而来不絕官吏军民请受并按月排日支給军衣之类亦前期桩办不阙月桩钱最为难办本州应副岳飞月六千余緡田邦直月一千二百余緡养申世景兵月九千余緡凡一万六千余緡此皆的确不可阙者今月桩库常有二三万緡见管盖缘中间力申明朝廷理会减免每月折帛钱三千余贯及拨到发运司二分钱及朱墨勘合钱等所以粗有赢余又每差使司回易官载米斛前去湖北回易兑拨应副岳飞军中既有利息又省脚费此不可不知也某去岁初到官日大宁仓米止有四石六斗军资库钱止有二百余贯今钱贯米数颇多於前日春衣钱亦已桩下二万贯幸取仓库都历及稟支历试閱视之

一积蓄金穀

使司金穀颇有积蓄未尝有毫髮敛取於民者皆系措置回易均节用度收拾失?所致近交割与权官钱约计七十余万緡米计八万余石州县之数不在是也亦尝具数申奏朝廷近闻有金字牌拨钱二十万緡银二十万两金三百两赴江州桩管听候朝廷指挥取此犹可若再取即不堪命矣所以积蓄得此钱米者盖缘每每力申明朝廷若一切委随则扫地皆尽矣於中米尤可惜去岁初到升百三十秋得一稔升十数文寸积铢累以及此数若不妄散以陈易新可以常为洪州之根本非细事也洪州岁用米八万余石而所得耗米止及其半何以支吾此亦须有以处之方欲申明洪州聚三司官吏数倍他州而所得耗米絕少何以能给谓如安抚司漕司官吏自当责办一路宜於吉抚等州耗米多处约度应副乃为长久之策更在裁度也

一团结军伍

大使司初有兵二万人至去年春尚有数千人朝廷拨与岳飞遂无一人一骑留者某自行在乞得申世景军将带前来才及千人其後累乞兵於朝廷止是关送都督行府及乞兵於都督行府报云候有警急日遣发然竟无一人一骑来者既而有淮上之捷侥幸少安自今年春以盗贼纷扰之故屡次申陈蒙朝廷差到李贵步谅军马各千余人今秋并勾赴本司教閱以申世景将本军为前军贾和仲将诸州起发隶将不隶将兵为左军任仕安将洪州禁军为中军李贵步谅各将本部兵为右军後军共六千余人团结教閱军声粗振然其间如申世景李贵步谅之军多西北人差可用如本州及诸州兵但可张声势耳此五统制者皆一时之选更有以驾馭激劝之也

一招捕盗贼

本路盗贼?为最吉抚筠袁次之去年到任之初远方人但闻遣一前宰相为大使意谓统兵必多往往戢服其後?守孙佑邀功生事致?寇已受招安者蠭起几破吉州赖本司遣兵袭逐破之复归巢穴然所遣不过数百人群盗窥见鲜少递相敦学纷纷不已延及抚吉筠袁亦有窃发者所幸将士用命招捕一火了当又措置一火方渐衰息至秋初得张柔直来守?州相与商议措置又得朝廷差李贵步谅两军前来渠魁如周十隆谢小鬼等悉就招抚如刘宣熊定李安静等悉就擒捕凡招捕过群盗六十余火其间每火有至数千人者皆有人数姓名在刑房亦尝开具申奏今一路盗贼有名字者悉已净尽大抵江西民俗犷悍轻生喜乱有仇杀之风全在巡尉得人於其微时用心缉捕无使滋蔓则亦不能为大害也要当使之服业田亩而无科须之扰廛为上策耳

前件八事漫以浼闻亦旧令尹之政必以告新令尹之意幸冀照察

梁谿集卷一百四

卷一百五

钦定四库全书

梁谿集卷一百五 宋 李纲 撰状一

申省乞立价卖告敕状

申省乞措置盗贼便宜施行状

申省乞降淮南东西路茶长引状

申省乞留四色钱数应副洪州起发岳少保大军支用状

申省乞将逃移灾伤人户见欠夏秋税特行住催等事状

申省乞将修城造军器度牒给降告敕状申省乞告敕造军器状

申省具截城利便无扰民户状

申省乞存留回易酒库状

申省乞立价卖告敕状

勘会近奉圣旨指挥给降到激赏空名承信承节保义郎告各五道州助教敕三十道度牒二百道未有立定价例缘本路监司及诸州军各有朝廷给降官告度牒价例增减不同今来本司劝诱出卖未得伏乞详酌立定逐色告敕等价例降下以凭遵依出卖

小贴子

契勘本司先准朝廷指挥给降官告收籴赈济米其入米人许作官户理为选限参部注授差遣仍许帅司差权职任今来本司所得激赏告欲乞依上项指挥施行庶几易於劝诱

申省乞措置盗贼便宜施行状

勘会本司先画降圣旨指挥除临阵出奇事干机会许便宜施行外余并申取朝廷指挥契勘本路旱灾之余盗贼窃发甚衆?寇尚炽如日近据吉州申永新县等处已添五六头项计一千余人某已具奏闻乞差军马前来措置全然未到若不许便宜从事委是难以措置弹压欲望朝廷详酌早赐指挥除临阵出奇事干机会外措置盗贼特许从便宜施行

申省乞降淮南东西路茶长引状

契勘本司依奉朝廷指挥置场出卖茶盐矾钞引近准指挥淮南东西路分合改作长引路分许客人请买两等长引本司寻申尚书省乞给降长引一十万贯已蒙给降到司见行招诱客人等请外窃缘本司节次承准朝廷指挥於卖到钱内支钱一十万贯应副运判逢大夫充起纲廩费五万贯应副都运赵徽学充打船等钱二万贯应副洪州收采军粮二万五千贯应副提点铸钱司充铜本钱已上共计合支拨钱一十九万五千贯除旋支过一十万五千余贯未支八万九千余贯缘所管钞引内广盐钞引已行住罢及矾引少有客人等请其茶短引只是通本路兴贩少有客人入纳唯是茶长引不住有客人等请今来正是造茶月分只合要茶长引趁时接续出卖欲望朝廷详酌速降指挥下都茶场更行给降淮南东西路两等茶长引三二十万贯应副本司招邀客人入纳趁此时月发泄茶货贵不致有妨客贩

小贴子

契勘近蒙给到十万贯长引内除洪江州兴国军引节次有客旅前来等请外所有宣池太平州引出卖大段微细往往商贾多是就近於建康府榷货务请等今来所乞长引欲乞以十分为率将四分给洪州【二分草茶引二分末茶引】二分给江州兴国南康军【内江州乞一半草茶一半末茶引兴国南康军并乞草茶引】长引应副劝诱入纳伏乞早降指挥施行

申省乞留四色钱数应副洪州起发岳少保大军支用状

据洪州申据通判申具准都转运衙牒准尚书省劄子内奉圣旨指挥专一主管自今年春季为始将每日合收经制无额移用钱拘截别项桩管听候圣旨指挥取拨采买绍兴六年分和采米本钱每月具收到数申除已依准行下诸县等处遵依施行外申州及据申备据都酒务状本务契勘除无移用钱窠名外止有日逐收到一分经制司钱六分无额上供钱一分提刑司经制钱经制司量添糟钱四项窠名见今日逐解赴司法厅月桩库交纳应副岳少保大军支用所是春季内收到上项窠名钱数并排日解遣去讫今来所准上件指挥拨充采买本钱逐旬解赴通判衙交纳桩管听候朝廷取拨本务未审将前项日收经制司四项窠名钱数依旧解纳月桩库唯复依今来指挥解赴通判衙桩充采本支用申州乞施行申本司乞施行本司契勘洪州逐时所收前项四色窠名钱系本州收桩按月起发应副岳少保大军支用今来若行取拨逐色钱充采本所有合起月桩钱本州委实别无合收名色官钱桩发却致有误军前指準支赡欲望朝廷详酌特赐指挥依旧存留上项四色钱数令本州逐月收桩起发应副岳少保大军支用免致阙误

申省乞将逃移灾伤人户见欠夏秋税特行住催等事状

勘会本路州县去岁旱伤内有至甚去处访闻人户未经差官检放租税以前其间多有先次逃移之人不曾经县陈诉乞行检放後来所差检视官更不曾将逃移人户名下乾旱田段依例检放税苗以至县官亦不检察却见行催理逐户名下合检放税苗是致逃移下户不敢归

业荒废田土转见失所已牒提举茶盐常平等公事司措置委官体?施行及行下洪吉等八州军照会更切催督令佐速便先次根括逃移未曾归业人户数目将名下去年以前见欠官物并未得催理具数供申去讫本司今契勘灾伤人户依今年三月四日圣旨指挥除灾伤及四分以上拖欠绍兴四年以前租税合行除放并依今年三月二十八日圣旨灾伤人户内本户放税五分已上第四等已下逃移人户合纳绍兴六年夏税以十分为率每科各与倚阁二分候来年随本料送纳外所有绍兴五年系灾伤最甚年分其拖欠残零税租未有许与减阁明文若行尽数催纳深虑细民经此大旱力所不及未能输纳理宜存恤今欲乞将逃移人户归业之人绍兴五年户下未纳官物特行住催其自余应系灾伤人户见欠夏秋税官物各随料次分作三料带纳庶几上副朝廷宽恤之意

申省乞将修城造军器度牒给降告敕状

勘会洪州城壁自经兵火之後本州阙乏至今未曾修治及城上合置备御楼櫓战棚防守器具等事一切并无缘本州系一路帅府去处城壁最为急务不可废弛若不措置兴修及将濶远去处裁减不唯渐有摧倒日後愈费工力兼合用守御人兵浩瀚缓急必致误事本司除已一面委本州官检计合裁减兴修工料及相度开具紧要受敌之处欲随宜建立战棚敌楼计备防守器具外已具申奏朝廷乞下所属先次给降新法度牒二百道变转专充修城使用及近准枢密院三月十三日劄子仰依都督行府指挥令本司措置招填本路阙额禁军缓急调发使唤其合用军器令帅司一面措置造作如有合行事件条具申取朝廷指挥本司寻条具合行事件数内一项契勘帅司以前自造到军器昨系本司统制官祁超丘贇等军马关借披带使用其逐项军兵节次抽摘赴都督府岳飞军前尽数将带前去本司器甲见今阙乏今承朝廷指挥合用军器令帅司一面造作使用如有合行事件条具申取朝廷指挥本司见开坐名件行下诸州令依应造作所有合用钱物亦已具状申朝廷特降新法度牒二百道应副支用候将来支絶日再行申请去後未奉回降今据洪州申备准四月二十六日都省劄子具到和采画一内一项看详今来所乞权住给降新制度牒应副其他官司专充采本四月二十七日奉圣旨依本司契勘所乞给降修城并打造军器度牒并系指準急要变转支用不可少阙欲望朝廷特赐详酌如所乞前项度牒四百道依近降指挥合权住给降即乞逐急纽折价钱给降官告及助教敕牒下本司应副转变支用所贵不致阙误

申省乞告敕造军器状

契勘本司元降指挥差拨军马二万人逐时造到器甲名件数目浩瀚後來军马旋次拨赴都督行府及岳少保下并器甲将带前去本司并无见在军器近蒙朝廷及都督行府指挥合用军器令帅府一面置造支用如有合行事件条具申取朝廷指挥本司除已将合置造器甲弓弩名件数目抛降下诸州军置造外累具状申朝廷乞支降新法度牒二百道应副支用未蒙降到如不合以新法度牒应副即乞将官告并助教敕牒準折价数支降庶几可以趣时置造军器不致阙误

申省具截城利便无扰民户状

契勘洪州城池自建炎三年十月内经金人残破之後不曾修治城壁摧毀壕堑堙塞并无楼櫓器具兼城北一带皆无民居尽是荒闲田地步濶远缓急难以防守今委武功大夫权本路军马铃辖武登相度合行裁减自洪乔门至崇和门取直修筑新城开?壕堑却将旧城裁减充防扞江水堤岸又旧城向北一带自来上有涨沙为患几与城齐难以措置今来存留旧城为堤亦可以扞隔涨沙为永久之利检计到合用工料木植砖灰等本司已一面那融兑支钱物计置收买材植物料等窰造窑务烧变成砖又用砖数多勾到南昌新建两县窑户高与价值每一口砖计价钱二十文足令结揽烧变应副使用及於诸州刷壮城兵士量行差拨及本州壮城牢城厢军等相兼修筑又缘工料浩大窃虑迟延已将洪州管下县分应干僧寺道观有常住物业者组计税钱量差夫力本司支破钱米贴助修筑并不调发逐县人夫亦无一事一件取於民间窃虑寄居及过往士大夫不知上项因依但见本州修筑城壁便谓调发人夫料买物色乱有传播以为搔扰達於朝廷难以辨白今画到修城图子贴说次第须至缴申所有本司累具状申朝廷乞支降新法度牒二百道充修城使用伏乞早赐指挥降下拨还兑支钱物接续支用如不合以新法度牒应副即乞将官告并助教敕牒準折支降施行

申省乞存留回易酒库状

本司据洪州申承都转运司牒备准尚书省今年正月二十一日劄子措置条画欲行下两浙江东西路诸州军各权暂添置户部贍军酒务一所内见有本州比较务去处更不创置止就旧务措置开沽於总制司钱内就截钱帅府一万贯余州五千贯专一循环充本将收到息钱与本州经费外余数拘收应副大军月桩钱及令逐路州军知通相度於管下富庶县分兴置等事内一项所置酒务系专要贍军支用窃虑置务州军别有回易等酒库侵夺课利除都督府见置激赏酒库外其余一时许置回易酒库并自开沽日住罢奉圣旨并依本州除已遵依施行外申本司所准前项指挥於诸州添置户部贍军酒务收息专充应副大军支费朝廷设意欲寬民力极为利便契酒洪州见有系省酒务两所内东酒务系旧比较酒务本州见行遵禀将本务见在酒数拨入都酒务趁办课额截拨总制司钱回买所有麴米关借槽仗什物等就本务兴置外窃缘安抚制置大使司自置司以来画降圣旨许置回易遂行措置以回易钱起置回易酒库循环作本造酒变卖收息应副本司诸般支用自起置回易酒库今已累年即不妨洪州省务趁办课额所有本司逐时按阅军兵遇有调发犒设激赏按月供给使臣及一司公吏请给并纸劄等造作军器收买物料支給工匠雇直应千百色支费至广全仰上件息钱支使所有本司见置回易酒库今来若行住罢即顿阙钱物应副上件官吏兵将等百色支用不免上烦朝廷支降缘本司回易酒库与洪州酒务及今来所置贍军酒务措置得宜自各不相侵夺沽卖得行可以趁办及额兼本州管下诸县内除南昌新建两县系倚郭及靖安一县系山僻小邑外自余分宁武宁两县系旧有比较酒务去处丰城奉新进贤三县亦各户口稍衆人烟翕集皆可兴置贍军酒务收息补助月桩钱物定须饶衍除已行下本州竭力相度措置外欲望朝廷详酌特降指挥许依旧存留本司回易酒库庶几两无相妨不废一司用度缓急不致阙乏上烦朝廷实为永久之计

卷一百六

钦定四库全书

梁谿集卷一百六 宋 李纲 撰状二

申省相度吉州将兵状

申省应副张龙图米等状

申省乞施行籴纳晚米状

申省措置酌情处断招降盗贼状

申省陈述受纳夏税物帛状

申史馆承受元帅府御书状

申史馆缴编次到建炎制诏奏议表劄集状

申省相度吉州将兵状

准枢密院劄子尚书省送到权发遣吉州李弥逊劄子契勘本州逐年起发上供钱物米斛居江西一路之半若无盗贼侵扰即易为应办缘本州与?州接界盗贼冲突无时啸聚徒党动是数千窥伺州城正缘本州土城不坚才经连雨又多倒塌不可防守兼军兵人数不多虽有逐县巡尉多是怯懦之人不能御敌所部弓兵人数亦少是致州郡无以堤防方其於平时补治城壁招练军民不惟别无钱本支用又有搔扰生事之嫌若缓急旋行措置委是无及以此例皆循习不敢举行遂致废阙每遇盗贼警急以至残破州县皆拱手坐视如日近虔贼谢小鬼等八头项约四千余人冲突侵犯逼近州城残破吉水永丰两县为害甚大今相度到合行事件若蒙特赐施行即於朝廷别无窒碍而使一路岁入不致亏欠一州人民不致伤残实为利便开具画一於後一去年二月内准本路马步军都總管司牒备准枢密院劄子於吉州添置禁军两营通旧满二千人牒州相度供申昨为诸县灾伤乞候丰熟日措置弥逊契勘本州别无禁军名额止管一千人系於?州东南第六将下分拨前来委是不多缓急无以扞御今相度本州可以添置两指挥禁军一千人不隶将下专一准备州界急切讨捕盗贼不许差出亦不许诸司抽差使唤如允所乞其招军例物请给等并乞依东南第六将上等禁军则例其余合行事件别具申请施行一本州见管将兵一千人将官在?州驻劄虽许差本州兵官一员兼训练缘兵官职事繁冗不得专一契勘本州有见任准备将领一员系注差材武人每季诣诸县教閱弓手一次职事大段简省欲乞令兼管统辖训练将兵如蒙朝廷许依弥逊所乞添置不系禁军一千人亦乞就令统辖训练将兵兼自来盗贼窃发会合巡尉弓兵仍乞将州界内巡

检土兵就令将领统辖教閱庶几缓急有所统一可以用事伏候指挥小贴子称契勘见今正是盗贼扰攘之际与平日事体不同若下省部勘当定是拘碍常法有害随宜措置欲乞断自朝廷量度如弥逊所陈委有利便伏乞特降指挥施行伏候指挥割送本司限三日相度申行在枢密院契勘吉州近年多有羣盗侵扰盖缘本州永丰县系与?州兴国县抵界素多盗贼巢穴去处本州龙泉安福永新袁州萍乡县又与湖南界分相连接山林深远为盗贼渊藪出没之地近来湖南每有盗贼作过或被官兵逼逐亦是侵入吉袁州管下作过良民被害不得安业其逐州各合屯兵专切弹压防扼缘本司阙兵差那前去今来所准前项指挥除吉州所乞创置军额不隶诸司使唤等事理难施行外本司今契勘本路所管东西第六将兵一十指挥每营额置五百人别差部辖将校一十人共额管五千一百人内八指挥并正副将官部押队使臣系在?州驻劄两指挥在吉州驻劄其?州本将截日总见管止有二千八百四十七人计阙二千二百五十三人系阙额两指挥已上本司今相度欲於?州八指挥将兵内将两指挥阙额最多处併填见阙一般军额或等仗请受同处军分营额郤那已拨并两指挥阙额军分一千人就吉州招置所有合要部辖人且令吉州於旧管将校等内权行选差兼管部辖候招到人数稍多具合用人数申帅司於?吉两州通行取补将校管辖及於?州那拨副将一员前来吉州驻劄同共措置招刺训练候招置及教习事艺稍成次第即从帅司体度吉袁两州有盗贼自来出没作过县分量行分屯弹压扞御所有招军例物合用钱粮衣赐仍乞下转运司契勘科拨应副委是利便更合取自朝廷详酌施行

申省应副张龙图米等状

契勘本司去年蒙朝廷指挥许随宜措置带余米斛每正苗一石带余二斛截自指挥到日为始至今年下限满共带余到占米等二万三千余石已告示诸县有米带余人户及未纳零数并与住罢将带余米依时直纽钱价通计三万余贯已行下逐县将人户合纳应於官钱给钞销折本司郤支拨钱代纳去讫近据新知?州张翥申本州钱粮大段阙乏到任之初实难措置本司两次於前件带余米内拨米八千石应副前去外犹有其余米斛见桩管充本司准备军期缓急支用

申省乞施行余纳晚米状

据洪州申准转运司牒备奉朝廷指挥今岁和余大米五万石内先余一万五千石并限九月终余足起发前去张少保军前缘本州管下诸县民田多种早占少种大禾其所种大禾系在向去十月方始成熟民间并无蓄积陈大米即与其余路分州军事体不同今来秋田阙少雨泽已觉亢旱见在差官分头祈祷尚未感应若以等候大禾成熟日收余窃虑有违九月余足起发元限本州亦未敢趣时收余早占米斛已申转运司乞赐申明朝廷施行外申本司并承转运副使徐显谟公文契勘近准六月二十八日尚书省劄子指挥上供米斛系充军粮早米不堪久贮其合起应副行营左护军湖北京西宣抚司早米二十万石不须更催早米如人户愿以旧米豫纳即行受纳起发即不得催理早禾以此本路和余米斛并合收余粳米内先余一十万硕本司已於七月十六日牒诸州照会收余旧米外其余米九月开塲自合收余晚米申本司契勘本路春夏之间雨暘调适早禾已是成熟收割了当自入秋以来阙少雨泽已觉

亢旱又生青虫食害苗稼见今祈祷未获感应若更旬日内无雨晚田决致旱伤窃见朝廷近降指挥受纳秋苗及和籴米斛并要一色晚米窃虑既不籴纳早米晚稻又失指準有误大计已具奏闻乞赐朝廷详酌施行去讫今据洪州前项申述本司契勘本州管下乡民所种稻田十分内七分并是早占米只有三二分布种大禾又缘入秋以来久阙雨泽已见亢旱窃虑晚田向去难以指準其早米官中既不籴纳虑为兼并之家停蓄及他路客贩前去有误岁计欲望详酌早赐指挥施行

申省措置酌情处断招降盗贼状

契勘官军自来讨捕盗贼有招降有胁降虽同谓之降而事体全然不同或聚集徒衆官军未易败获或保固险阻官军难以攻取遣人齎发旗榜入贼说谕供伏欸状听从号令解释器甲束缚枪杖依限出参有悔过自新之意此招降也招降则当免放从前罪犯一切不问首领量补官资徒党拣选使唤待之与诸军一等若或官军已临贼阵决可擒获及与官军已入贼巢逃避无所乃始祈哀乞降保全性命出於事不获已此胁降也胁降则当以便宜酌情处断其有久为头首累受招安长恶不悛及杀人衆多情理巨蠹之人自合依旧处死及有随队刼掠不曾杀伤之人合从断配若是驱虏入队为贼负荷不曾刼掠作过之人合从释放上项胁降即难与招降一例放免今来本路前後胁降到贼并不分别遂致凶徒无所惩戒方其啸聚徒党初谋作过之时已谓官中必须招安可无後患恣情刼掠无所忌憚及至官军围掩不能自免又使出降给据放散安然无事至有朝受公据散归田里暮持枪杖放火杀人遂致凶徒递相仿倣一火才了一火又生无有穷已本司今将近来讨捕到赖满八扬三十四熊清李安净等诸项贼火徒党内有胁降之人用所得便宜指挥依前项措置酌情处断外依乞更赐详酌如得允当即乞指挥行下见有盗贼诸路帅府依此施行庶几事归一体盗贼有所惩戒渐见衰息

申省陈述受纳夏税物帛状

窃见行在户部帖本州受纳夏税物帛官将受纳到应于夏税物帛数目开具实封申尚书省仍候将来受纳了毕即别行攢类亲书都数结罪保明供申契勘依法夏税受纳开场日县申本州州申转运司点检及纳毕申所属监司选官称量合系上供之类即团并成纲发赴左藏库交纳内有合系本州支給官兵春冬衣赐等用即从本州支遣皆有账籍可以稽考此祖宗旧制不可易之法也今朝廷尽废前法令户部径帖州县受纳官令开具受纳数目径申尚书省则是朝廷平时所设监司帅守皆不可信而取信於州县小官废成法而失大体非所以示天下窃为朝廷惜之以愚意窃料此必户部建明欲尽取夏税物帛以足用度而不恤州县官兵支费此尤不可者近年州县米斛悉充上供钱物悉养大军窘匮甚矣若更尽取夏税物帛将春冬合给官兵衣赐令州县自行擘画措置委是难行伏望朝廷特赐详酌指挥施行外所有户部帖下本州受纳物帛官朝旨未得施行别听朝廷指挥

申史馆承受元帅府御书状

准史馆牒勘会本馆见修纂建炎日历合要元帅府事迹参照修入契勘元帅府昨在济州日曾以书赐李相公即未见得系於何年月日於甚处承受及有无谢表须至公文牒请详此契勘前项文字请抄録送史馆以凭修纂契勘某昨於建炎元年五月内自资政殿大学士太中大夫领开封府事蒙恩除尚书右仆射兼中书侍郎於南京行在供职据从事郎刘默状申四月内承元帅府差齎亲笔书往湖北路等候投下行至德安府闻自江淮间前来却齎亲笔书回某是时实於南京承受有表称谢所有谢表今录白缴连在前

申史馆缴编次到建炎制诏奏议表劄集状

右某近承史馆牒当馆见修纂建炎日历合要时政记参照昨蒙朝廷降下观文相公省记到建炎初任宰相编类到时政记内文字首尾未详及拜罢辞免奏劄批答并未曾抄录赴馆并靖康初渊圣皇帝即位事迹亦未曾编类前来守等参照某契勘除靖康初间渊圣皇帝即位事迹不曾被旨未敢编类外今将自建炎初除罢宰相制命诏书批答辞免称谢表劄及奏议建明劄子皆已得旨施行者编类次第勒为四卷缮写成册缴申史馆用匣复盛贮鎖钥全伏乞照会收管施行

梁谿集卷一百六

<集部,别集类,南宋建炎至德佑,梁谿集>

卷一百七

钦定四库全书

梁谿集卷一百七 宋 李纲 撰状三

申枢密院乞施行劄子差兵将状

申都督府乞差拨军马状

申督府密院催差军马状

再申督府密院催差军马状

申督府密院相度措置?州盗贼状

申督府密院乞防秋军马状

申督府密院具?吉盗贼再乞防秋军马状申督府密院开具沿江州县合控扼去处乞军马防守状

申枢密院乞施行劄子差兵将状

契勘某近赴行在进对具劄子奏乞依元降画一指挥先次旋差一半兵一万人其要用钱粮亦乞依元降指挥先次支拨一半钱二十万贯米七万五千石应副续准枢密院二月二十九日劄子已关送都督行府劄某照会今已多日未奉回降指挥江西系上流重地非屯重兵缓急何以控扼兼?吉州盗贼乘此荒旱啸聚作过自三月以来已添六头项约一千余人若无重兵弹压讨捕定是猖獗将来难以殄灭右谨具申枢密院伏乞早赐指挥施行

申都督府乞差拨军马状

勘会本司近为所管统领官丘贇人马已依奉圣旨发遣权听岳飞使唤蒙朝廷拨到申世景军马人数不多近据吉州申永新县等处有盗贼六头项计一千余人阙兵分头措置已具因依奏闻乞於近便处先摘那兵将二千人付某相兼使唤未奉回降指挥今来?州界尚有未获贼火不少因统制官李山为岳飞勾回又复出没作过续又据南安建昌军袁州等处申见有凶徒结集啸聚劫掠村乡火数渐多须至申闻者右契勘本路?吉州平日素多盗贼闻大军到来讨捕便即远遁潜伏山谷官兵才退又复出没近蒙都督行府遣副总管康随及差岳飞下统制官李山领兵收捕虽节次承关报杀败火数未能剿除净尽李山军马既回又复猖獗今来本路只有某带到申世景一项军马人数不多除已分遣一半前去吉州捉杀外自余官兵

见留洪州帅府弹压所有其他州军见作过盗贼委是阙兵分头前去措置讨捕旱岁饥民易为啸聚若不乘早措置渐致滋蔓後来难以殄灭伏望详酌日下於近便处先次摘那差拨兵将三二千人付某相兼使唤庶几不致误事

申督府密院催差军马状

准枢密院四月五日劄子节文本司奏吉州管下有凶贼郭少二等贼徒啸聚作过乞先次差拨兵将二千人前来相兼使唤及乞存留岳飞下统制官李山军兵在?州弹压措置等事奉圣旨令都督行府相度应副劄送本司照会须至申闻者右勘会本司见据提刑司?吉州南安临江军等处申报?州界有曾六冠曾大喉黄鳅鑽曾九唐四谢鬼七周诚梁玩李洪刘宣吴添廖一长刘十二谭十二等吉州界曾太保尹使者郭少二周花八谿花三易十二罗大等南安军界何少七吴守傅李收等临江军新淦县管下有已受招安邹乌八等贼徒结集头项人数不一猖獗作过乞兵讨捕本司已委本路副总管康随将带存留丘贇下将官王彦官兵三百人前去就节制东南第六将兵及巡委措置招捕?吉州南安军管下盗贼并分遣申世景下官兵二百人前去临江军新淦县与本县知县右奉议郎赵不华商议同共捕捉邹乌八等贼徒外见存军马弹压一路数目甚少其李山一项军马又已抽回赴岳飞军前缘今来作过盗贼头项数目委是阙兵分头前去捉杀窃虑诸处盗贼见得官军单弱结集滋长卒难剿除伏望钧慈详酌今来所陈事理速赐指挥於近便处摘那差拨兵将三二千人付某相兼使唤并支拨钱粮等庶几不致误事

再申都府密院催差军马状

契勘本司先为吉州管下有凶贼郭少二等贼徒作过遂具状申奏朝廷乞先次摘那差拨兵将二千人前来相兼使唤及乞存留见在?州驻劄岳飞下统制官李山军马具在本州弹压措置候朝廷别差到军马即令起发去後续准枢密院四月五日劄子奉圣旨令都督行府相度应副本司寻契勘近又不住据提刑司申?吉州南安临江军等处?州界见有曾六冠曾大喉黄鳅鑽曾九唐四谢鬼七李洪刘宣吴添廖一长刘十二谭十二等吉州界曾太保尹使者郭少二周花八谿花三易十二罗大等南安军何少七吴守傅李收等临江军新淦县界有已受招安邹乌八等贼徒结集头项人数不一猖獗作过乞兵讨捕本司已委本路副总管康随将带存留丘贇下将官王彦官兵三百人前去就节制东南第六将兵及巡尉措置招捕?吉州南安军管界盗贼并分遣申世景下官兵二百人前去临江军新淦县与本县知县赵不华商议同共捉杀邹乌八等贼徒外见存军马弹压一路数多甚少其李山一项军马又已抽回赴岳飞军前缘今来作过盗贼头项数多委是阙兵分头前去捉杀窃虑诸处盗贼见得军马单弱结集滋长卒难剿除本司已於四月十九日具状申枢密院及都督行府乞於近便处摘那差拨兵将三二千人前来相兼使唤并支拨钱粮等庶几不致误事去後未奉回降指挥须至再具申闻者

右申枢密院及都督行府伏乞检详本司前申及今状事理速赐指挥施行

申督府密院相度措置?州盗贼状

七月十八日准枢密院七月一日劄子臣寮上言臣窃以?州地险民贫风俗犷悍居无事时羣出持兵私贩为业自军兴以来啸聚为盗招捕殆将十稔终未殄?臣深求其故乃知招安之後田业荒芜耕种不具州县救目前之急不暇存恤又督逋负宿恶乘之相煽愈固加以巢穴深远山多瘴疠官兵惮於穷讨有司疲於供亿往往以招安为便殊不知官其首领余衆何归朝廷若不严行措置异时邻境悉因相率从贼患益滋矣臣愚过计欲乞汀州常屯兵千人循梅州各屯千人?州屯二千人岁更番每遇猖獗并力掩杀仍择守令专意抚存失业之人如此则良民有以自存顽民知所畏惮庶几兵可强而寇可销矣俟其平定瑞金乃於诸邑上流增以军使之额邑宰兼之留屯千人委帅司拨差本州将兵四百人他州六百人陰防其微选骁将主之庶制其命俾不复萌意实永远之利也取进止奉圣旨令李某连南夫张致远相度申枢密院劄送某疾速施行某契勘?贼旧年止是冬月农隙之时相率持杖往广东贩盐以图厚利後來渐次於循梅等州村落间劫掠得牛畜钱帛归家使用巡尉不敢谁何徒党渐衆遂犯州县至建炎四年官省移在?州陈大五长啸聚作过当时官司措置无策赏罚失当土豪有物力之家往往啸聚结集报复讎怨头项渐多州县不能制御连结滋蔓以至今日虽遇丰年亦不衰息其说有二一则?民赋性犷悍喜於为盗易为结集动以千百为羣互相劫掠凌逼州县不畏刑法不顾死亡循习成风不以为怪异於诸路盗贼二则自近年以来专务招安官司失於措置有以诱之为盗谓如招安到贼火首领尽补官资放散徒党其徒党中桀黠者又复纠集徒衆自为头首以俟招安复得名目递相仿倣无有穷已其招安出首领虽已补授官资或与差遣多是不离巢穴不出公参依旧安居乡土稍不如意或资用阙乏则又相率为盗以此滋蔓虽痛遭屠戮亦不改悔窃恐为患未艾今来朝廷欲措置?寇不过招捕两事临以重兵有以制其死命然後可以招抚务令措置合宜乃为得策何谓临以重兵有以制其死命今?寇巢穴多在江西福建广东三路界首置立寨栅为三窟之计一处有兵则散往他处官军既退则又复团聚中间遣发军马卒不能穷讨正以节制不一之故若节制归一使其不能散逸且捕且招威令既行则穷寇别无他策必须自归然後结以恩信使之改过自新将为首及徒党桀黠之人尽赴军前使用以除後患此最策之上者某昨曾陈请乞於江西路置都统制一员节制三路军马以招捕?贼蒙朝廷许令本司辟置然至今未敢辟者非惟难得其人亦以本路军马单弱不足以副都统制之名故迟留至今如蒙朝廷遣发防秋军马使本路兵势稍壮方可辟官充上件差遣使统三路之兵以措置?寇数月之间必见就绪既以兵力招降乃可使之远去巢穴以消永久之患应招安到贼火除放散胁从羸弱之人外其头首及强壮桀黠之人并令解发赴军前使唤头首与补正官资及其余强壮人并与刺手背分隶诸军下使唤若能用命立功优与旌赏或有作过必杀无赦其不能悛改逃亡复归本土之人许诸色人捕斩籍没田产编配妻子以系累其心使知为盗之无益自然不敢复为头首则?人喜为盗之风渐次可销昨韩世忠既破范汝为其头首及强壮人并将带随军前去所以建州数年无盗贼之虞者正以措置得策至於盗贼衰息之後又须县令得人劳心抚字使作过桀黠之人既去良民得以复业安於田亩乃可以化盗区复为乐土此尤不可後也某昨尝奏请辟置?州县令已得指挥许辟然至今犹未敢辟奏者实以?之诸县多是瘴烟之地盗贼出没不常朝廷初无赏格士大夫之有材者多不愿就又难强之使行今吏部注授者既不肯赴任见任者又皆欲省罢欲其?心职事抚字远民消革盗贼之风未易可致欲望朝廷优立赏格将来辟置知县到任半年

盗贼稍除良民复业选人特与改官京朝官与转行一官候任满日各再与转一官其盗贼平定之後量与蠲免租税已前欠户并免催科庶几官吏尽心民庶安业复有承平之象所有乞将?州属邑分置军垒屯兵一节见行相度别具供申外谨具申枢密院都督行府伏候指挥

申都府密院乞防秋军马状

准诸路军事都督行府七月二十九日下本司劄子节文本司申乞截留王彦军马就便听本司节制使唤於沿江屯驻防扼及分兵前去?吉等州捕盗等事勘会王彦见病昨已准圣旨指挥令统率军马前来行府应副沿江使唤候将来到日量度分拨官兵前去如缓急本路别有寇伪警报行府即遣发大军前去措置扞御劄本司须至申闻者右勘会本司昨累具状申都督行府乞差拨军马前来本路防秋及分布捉杀见作过盗贼使唤先准都督行府劄子见议遣兵及续准指挥已勾王彦军马候到行府日即差拨前去本司又再节次具阙兵因依申行府乞截留王彦就便听本司节制分布使唤今准前项指挥本司契勘今来已是九月防秋之际沿江一带合行措置控扼去处并未有兵备若候有寇伪警报方行遣发军马前来应设防扞深恐後时决误国事欲望详酌速赐指挥差拨兵将前来本路沿江一带摆布防扞使唤庶几不致临时误事

申都府密院具?吉盗贼再乞防秋军马状

据吉州申据下班祇应徐彦时百姓徐二黄永经州陈状八月二十九日早据百姓黄永引到吉水县五十一都税户徐二称今月十七日夜有?贼王三将朱十一将等二十三人各有衣甲枪刀义刀等投徐二家令本人探本州有无大兵欲报讎杀本州官员掳掠人民等事寻差人前去徐二住处地名桐木塘离州城五里以来收捉到贼人刘大王太名方龙十朱五陈花十一并杀获到首级两级勘据刘大等招通委是同兴国县贼首王四闲等为探得驾动及本州无人马节次前来徐二家要二十日夜往李十二等家打刼了後就便过江往城下报讎杀本州官员人民放火掳劫财物本州已将刘大王太名方龙十朱五陈花十一处置讞申本司又据吉州申近据永丰知县申?州兴国县贼徒欲侵犯本州管下刼掠作过又据吉水知县申八月二十五日据孙胜告首?贼姓晁等人四散会得二百余人前去吉州作过本州已差发官兵捕捉续据吉水县弓手徐坚等与本州监梅林渡使臣廖文寛等节次获到孙胜告首结谋?州将兵晁清等九人已送下右司理院根勘至二十七日又据太和县尉张廸功申据土豪萧安世申传闻兴国县招安人张细髻等因缘手下人盗去王家牛与财主鬪敌各有杀伤再集周十龙谢二十八花张大闲吕宝等三千余人在彼团定王家寨兴国县尉见在彼劝和因依州司已行下兴国县接界永丰等县差发巡尉体探把截限备外缘所管弓兵人数不多窃虑晁清等走散残党或兴国县张细髻等啸聚羣衆不测冲突本州管界作过衆寡不敌难以支吾临时申请不及乞差兵前来本州驻劄讨捕须至申闻者右本司已累具状申都督行府乞差拨军马前来本路防秋及分布捉杀见作过盗贼使唤去後未奉指挥差到今据吉州申体探得?州管下张细髻等结集作过乞兵讨捕缘本司止管统制申世景一军人数不多委是阙兵分拨前去措置欲望朝廷特赐详酌早降指挥施行谨具申都督行府及枢密院伏候指挥

申督府密院开具沿江州县合控扼去处乞军马防守状

契勘本路西接湖北东连江东北与淮南对境去伪地不远沿江州县渡口险隘去处自来防秋皆合行措置控扼前此数年本司蒙朝廷拨到兵二万人可以分布使用如江州兴国军皆屯重兵武寧分寧诸邑亦有军马近日兵将尽皆拨隶都督行府及岳少保军中所存无二十分之一今来秋气已深应合控扼去处并无兵可以防守虽朝廷遣兵屯戍淮上可以保障然预备不虞兵家常理亦本路近年旧例不可顿阙若沿江三州军有兵可守缓急别无疎虞则其余州县皆可保全所有防守虽合用兵数至多今来止望朝廷依累降指挥量行差拨五七千人本司随宜措置庶几不致阙事今将沿江州县渡口及险隘合行屯兵控扼去处画图贴说缴申朝廷都督行府乞赐指挥差拨应副施行今开具下项

一沿江合控扼州军

洪州 江州 兴国军

一沿江合控扼县分

洪州武寧县 洪州分寧县

江州瑞昌彭泽县 江州湖口县

兴国军通山县 兴国军大冶县

一合控扼险隘

武寧县界狗狡口 瑞昌县界泉口

一合控扼渡口

李家渡 马家渡 富池口

洪雪洲 磁湖

右谨具申枢密院都督行府伏候指挥

梁谿集卷一百七

卷一百八

钦定四库全书

梁谿集卷一百八 宋 李纲 撰书一

与了翁书 与吴元中给事书与许振叔显谟书 上王太宰论方寇书上门下白侍郎书

与了翁书

某顿首拜啓提宫右司丈座下曩岁姑苏获奉海语迨今六年不果通问执事第勤瞻咏今者罪谴幸托仁里因得询问动静窃承寓居庐阜之侧燕居甚休殊以为慰暑溽比日不审体气复何似伏惟尊候万福某学识浅陋荷上眷知擢处华近每愧无以补报万一愚戆妄发罪当诛殛上恩寛大不忍寘之斧钺姑从薄谪且得善地省咎念恩日深惭惧沙阳去乡里不远而溪山之胜鱼稻之饶为七闽最士夫渐先进之风多可语者罪戾得此大过所望非幸会耶且置是事疎拙之性懵不辨理惟是平日为信释氏因循倥偬常恨未能徧读其书逮抵兹邑征商粗办居多暇日适罗畴老修撰杂创藏典缘事甚盛因与二三禅老结看经社以酬宿昔之志良自喜也然华藏广博初心乍游浩无涯涘譬犹泛海不观斗杓岂能了知所适之方而到彼岸窃闻吾丈留心藏教有日矣以巨眼而阅灵文必有所深契者方此待罪筦库无缘趋造函丈以承绪余愿因便风略示其要以为华藏指南则善财之参岂待南历達摩之旨不从西来自利利他以所得者还为人说亦佛菩萨之意也近於陈麟宣教处见华严阁记融事理为一门会禅教为一法仰味至言深所叹服新着必多悦蒙垂示一二以为後进发药之资不胜幸甚拙恶四篇辄浼听覽以丐斤削正暑伏冀为道自重五月十一日某顿首拜啓

与吴元中给事书

某顿首拜啓元中宫使给事台座便人至伏领春初所赐教玩味再四如奉言色不胜感慰中夏暑溽不审比日体气复何似恭惟台候万福某待罪沙阳行半年矣省咎念恩日深愧惧所幸征商职事粗办日有余暇适罗畴老修撰新创藏典因与一二禅老结看经社撮其枢要随即録之此外间亦弄文墨以自娱适士人中有邓肃者颇有俊气时与酬唱以尽溪山风月之美用是不觉岁月之度第亲年浸高远去庭闱数千里外此情如何蒙谕周悉非眷念之厚何以及此感服无已窃闻复职计召还不晚矣中外所望非特拙者有觐於庇赖也達可北门之除颇协士论近道维扬相会必欵其论如何信斯比报宫祠果能就闲完养数年甚善不知卜居何地因书幸致意未果修问见素才得从官遂尔物故人世浮脆如幻如梦无可恋着观此益使人灰心耳如人饮水冷暖自知如人登山各自努力尝以此语献于左右愿留意近着八篇辄録去以发千里一笑有未然者幸以见教未有瞻晤之期惟冀为道为民自重谨奉啓承动静五月二十八日某顿首

与许振叔显谟书

某顿首振叔知府显谟尊兄专人来特辱教赐殊荷眷意窃审郡事多暇为况甚休尤慰瞻跂比日暑溽伏惟台候万福某待罪贬所托庇如昨征商之余日得观阅藏教留心空门以洗三十八年之非此外颇亦繙经史弄笔砚聊以自慰邑官为具舫构阁以尽一邑溪山之胜时时登临一觴一咏有足乐者士人中有邓肃者颇俊爽间与酬唱有邓覲者其家好士喜具盘饌有邓密者喜种花虽殊方絕域者圃中色色有之时以来供有陈渐者深於经术议论渊源可听而畴老修撰晚年留意内典不为今之禅流莽荡不可穷究葛藤戏论家有园池竹木森然时得游从其间清谈终日观此数事岂复有流落之叹第亲年高矣远去庭闈未有归期此怀何已异时傥蒙恩贷得归养亲当遂屏迹山林以求素志幅巾杖屨同为惠山之游以毕此生第恐振叔方为世缘挽留未暇从我耳如何吴元中近得书趣尚可喜昨过维扬相会差欸否何深之知比经从去冬道姑苏邂逅虎邱为一日之欸历落如故同时放逐已有得宫祠者非久可还否见素才得从官便入鬼錄人生如此亦可观矣虽有久近竟亦何较今人但知营营以厚其生初无一念以善其死溘然之後平日所耽恋者无一可得而所造诸业随念现前散入诸趣可不惧耶用是益知空门真所依归者振叔留意於此久矣顷虽欸会因循未能深叩所以有可垂教愿无吝焉近文四篇谩资一笑正暑切冀为时自重挥汗布此殊不周谨五月二十八日某顿首

上王太宰论方寇书

宣和三年正月日某顿首再拜少保太宰相公阁下某愚陋无取昨者误蒙识擢备员左史侍清光者几一年常愧无以补万分之一妄论水事罪当诛殛上恩涵覆不忍寘之斧钺姑从薄谪夙夜循省感惧交深今兹又缘赦宥与牵复之列获遂归养仰戴天地父母之赐铭镂肌骨未知死所此盖伏遇太宰相公以道佐天子务崇寛大洗垢滌瑕许之自新致兹狂狷亦与甄錄佩服盛德何敢弭忘某自去冬承吏部符罢任起离闽中将道浙东省亲毗陵行次上饶适闻睦州方寇猖獗道路不通遂由江东泛舟以归又值黟歙失守郡县惊扰间关险阻获达金陵出於天幸然某迟回饶信诸郡者凡两月余於方寇事亲见探报及得於传闻实为详悉日夜虑之至熟窃不胜愤懣深惧州郡部使者不以实闻朝廷设有奏报不过告急乞兵为自完之策拘於吏文陈迹不尽至於东南大计与夫破贼之谋初未尝及也恭惟相公得君当国以身任天下之重而某平日荷知遇之厚不後他人辄敢具所闻及区区管见冒昧钧听伏幸裁察方寇初作据邦源村地枕歙睦之境怙险凭阻胁从乌合之衆不过千余人耳当是时江浙屯兵要害之地以强弓劲弩守之使虏掠者不得出从乱者不得入不旬月间粮竭衆离贼可谈笑缚也统兵於浙者不知出此其初轻敌而欲速成功悉驱巡尉深捣巢穴则为所败其後贼以虏掠致师官军追之堕其计中则又败自两失利之後士气不振统兵者有怯敌之心悉聚浙兵屯於青溪距贼巢穴者六十里先遣保甲营木寨掘壕塹然後进师一旦为贼所乘向之木寨适足以为火攻之资弓矢不及施器械不及用束手受戮一扫而尽贼气既锐莫之沮遏遂焚青溪诸邑以及睦州其後又破富阳诸邑败官军於陆和寺设疑兵自江乘潮而下统兵者悉衆扞之贼由山径捣虚以入遂陷钱塘此则浙兵措置失律之过也黟歙距贼巢穴八十里屯兵数千以扞贼冲适守臣宪司移易罢去旧者既去官新者未到任虽有将兵莫相统一贼衆出没虏掠村落去郡十数里间视之恬然莫有与之敌者一旦卒然逼郡城奸细为之内应兵火四起乃始出鬪已无及矣夫以去贼巢穴之近而自贼作以来曾不为城壁壕塹守

御之具至使陵踐如入无人之境诸邑靡然皆为所破此则黥歙豫备不严之过也夫歙睦钱塘者东南剧郡生齿衆多财赋充衍士大夫之渊藪也狂贼乘间而作不旬月而陷两州一督府县邑以十数无辜之民横被屠戮官司府库皆为掩有士大夫之家碎於贼手而奸恶无赖之徒杂然从之自为得计凶?寢炽江浙为之震动可不为之痛愤哉伏以国家承平之久东南之民习於治安不识兵革垂二百年郡县弛备率无城郭将不知兵兵不知战是以狂贼窃发官兵疲懦望风奔北居民迁徙莫有固心官吏往往亦为遯逃之计无足怪者然东南者天下之腹心也江浙者又东南之腹心也歙睦钱塘者又江浙之腹心也国家以养兵为重而养之之具金缗谷粟转江通漕尽在东南由歙以之濒江诸郡数百里由杭睦以跨浙东西亦数百里旬月以来又不知其变动如何良可寒心得为之深计而早虑哉为今之计破贼之策大槩有三一曰审地势二曰遣重兵三曰择良帅江东地势近贼巢穴莫便於宣二浙地势近贼巢穴莫便於杭杭虽为贼所陷然传闻淮甸之师继至贼已弃城而去设使不去亦当力争命帅屯兵於二郡因利乘便收复睦歙使贼还保巢穴不敢放肆然後殄灭可期若夫散兵他郡地远而力分未见其利此必审地势之策也江浙之兵屡为贼败士气凋索不可复用其势必起兵他路及遣畿甸之师以临之一以张军势二以安民心三以沮贼气惟遣兵多则见功速虽暂有所费不得而惜此必遣重兵之策也国朝以来号为剧贼者侂智高之於邕王则之於贝耳当时帅师以破智高者则狄武襄公青文潞公彦博也二公者威信素着故能节制将士使之用命破贼於旬月之间今方寇悖乱僭逆残陷州县又非智高则之比自非选用曾任边帅素有威名方略之人付以兵柄未易成功此择良帅之策也得良帅总重兵以临要地又当许其便宜从事不从中制摧锋陷阵者信赏犒亡败衄者必诛料敌制胜以荡覆其巢穴然後贼可指日而平也又有不可缓者江浙之间频年水旱民力凋耗加以狂贼窃发州县追呼骚扰不胜其困宜下寛大之诏凡邻贼州县科率调度不急之务一切权罢积欠逋负权行倚阁出禁帑截上供钱谷以给军资使民晓然知朝廷德泽策无先於此者夫天下犹之一身疮痍即吾之肌肉也盜賊即吾之民也民愚无知初虽胁从陷以所欲货财可掠而有妇女可虏而得仇怨可起而报平日束於法而不敢为者皆公然得为之无怪其徒之浸多而乐为之用也善治疮痍者毋使浸淫善制盜賊者毋使滋蔓滋蔓难图皆起於忽之以为不足虑此不可不察也恭惟相公仰被圣天子之所眷倚俯为四海之所具瞻独秉钧衡之初狂贼偶发适当是时然则安宗社福生灵立太平之基者当自破此贼始幸望留意毋忽夫通天下之志者莫如言方今世故岂可一二指陈惟通言路使人之得尽其心而毕其说是者从之非者置之而不加罪衆志毕陈可以不劳而成天下功况於盜賊何足翦灭哉必欲通天下之言愿自某此书始亦尝致书执政与此互见伏惟變调之暇试取观之有可以裨庙堂之末议者窃冀不以人废言也干冒威严无任惶恐战越之至某顿首再拜

上门下白侍郎书

宣和三年正月日某顿首再拜门下侍郎阁下某窃以东南习於治安之久兵民不知金革之事郡县初无城池之守狂贼窃发扰吾腹心有不可不虑者而某罪戾之迹幸蒙赦宥归自闽中道出江浙询闻甚详思虑至熟敢私布于左右以备采择之万一方寇者本狂愚无知之人传习妖教假神奇以惑衆遂谋僭逆然有狡狴奸人为之辅翼悉假古人名号以自隐莫知其为谁何凭负险阻胁诱乌合亡命之徒建号改年妄相称谕其初不过刼掠村落运致资粮偃

强巢穴以苟岁月耳偶值浙兵措置失宜屡战屡北贼遂猖獗某在饶信亲见探报观其行兵狙诈百出侮官军於掌股之上窃意未易制御不旬月间果陷歙睦钱塘焚荡县邑以十数江浙为之骚动此岂可不为之虑而犹以常寇待之哉譬犹火燎于原必绝其道乃可扑灭今贼势鸱张凶焰浸炽凭陵州县如入无人之境莫有沮遏之者其势必择良帅遣重兵以据要害之地运筹决胜折其角牙制其奔逸收复所陷州县使贼畏缩退保巢穴两路并力锄其根原则扑灭之期自可指日而定也要害之地江东莫如宣两浙莫如杭杭虽为贼所陷传闻淮甸之兵继至贼已弃城而去设使不去亦当力争命帅遣兵以?宣则江东诸郡皆有所恃而进可以取歙命帅遣兵以据杭则两浙诸郡皆有所恃而进可以取睦得歙睦则贼之巢穴可俯而窥矣夫有兵而无帅与无兵同有帅而无节制与无帅同方今江浙之兵率皆挫衄不可复用必烦朝廷以虎符起畿甸及他路之兵以临之然不为之择威信素着晓兵事有方略者为之帅则遣兵虽多未必有所补也或以谓盗贼窃发不足命帅则国朝以来剧贼如依智高王则不过据一郡当时命帅以讨之者狄武襄公青文潞公彦博也矧今方寇悖逆僭乱攻陷州县杀掠兵民声势又非二贼之比岂委任一二监司郡守不知兵者所能殄灭哉诚得良帅总重兵许以便宜从事节制严而号令明江浙合势如首尾之相应将士协力如臂指之相使信赏必诛以作士气而摧贼锋左剪右屠转战逐北则此贼不足平也朝廷立赏格以捕贼每名若干此止可以得小盗耳今方寇凶徒以钜万计所陷州县府库仓廩民间物力悉皆掩有财足以聚众力足以使人恐未易以立赏捕也为今之策莫若用边赏之法除渠魁及为之辅而有名号者重赏以构之外自余一切计首虏以受功以陷阵克敌敢鬪者为上则将士劝矣贼以区区胁从乌合之众而能败官军陷州县者以其敢杀戮忘生而不畏死也吾之将士率皆欲全躯而保妻子以谓与贼鬪者必死而临敌逖逃者可生虽有坚甲利兵安能使之破贼哉为今之策莫若一以军法从事逗挠奔北者必诛使之进与贼鬪犹有生理退而逖逃有死无赦以首争首以力搏力而人自为战则贼可破矣诛赏者驱将士於矢石用命戮力之大柄诚得良帅而付之虽懦夫疲卒且将化为精锐矣此不可不察也恭惟朝廷留意西北所以折冲御侮者甚备然自今观之西北不足忧而江浙为可虑何哉西北高城深池楼櫓相望强将悍卒习於战阵卒然戎狄惊边徼靡封疆吾有以待之未足为深患也故自西鄙用师以来夏人每倾国入寇者屡矣曷尝有失郡县之患哉江浙治安垂二百年州县苟且城池弛备百姓闲逸官兵偷惰目不识旌旗之色耳不闻金鼓之音一旦狂贼窃发望风奔溃名郡剧邑谈笑取之万有一浸淫滋蔓历时愈久其势必貽朝廷东顾之忧可不为之深虑哉伏望门下侍郎以一方生灵为念因进对间详以此闻所谓贼不可忽而命帅遣兵据要害以图进讨不可缓者使狂悖之寇剿殄有期东南之民安堵无患天下不胜幸甚某庸陋不材素荷知遇敢缘国事辄布腹心以裨庙筭之万一亦尝致书宰执与此互见幸试取而观之恕其狂諄干冒威严无任惶惧战越之至某顿首再拜

卷一百九

钦定四库全书

梁谿集卷一百九 宋 李綱 撰書二

与郑少傅书 与中书冯侍郎书

上王右丞书 与梅和胜侍郎书与程伯起舍人书

与郑少传书

宣和三年正月日某顿首再拜少傅太尉相公阁下某以一介草茅之贱误蒙主上识擢躡处
华要虽从废斥旋被甄録天地父母之德欲报无所罪戾之余思深气讐岂敢复指陈当世之
务惟是狂寇方十三者窃发江浙陷没州县震动东南适当归自贬所道路经由之地探报传
闻备见本末不胜愤懣欲陈制贼之策裨补万一少赎前日之罪人微迹疎厥路无由窃自伤
悼恭惟少傅太尉相公养气刚大许国精忠仰为圣主之所取信俯为苍生之所属望当今大
臣敢以危言说论啓沃宸聪者非公而谁辄不自揆以区区管见冒昧尘露仰渎钧听伏望怜
其意而少垂择焉不胜幸甚窃见方寇初作据歙睦两路险阻之地与之结构者数十人胁从
之衆不过千计公然僭拟谋为叛逆无所忌憚当是时捕盗官司不以实闻朝朝廷屯兵守隘
徐图讨荡必胜之策则贼乃几上肉耳何能为哉部使者奏报既不以实乃欲亟剪灭以速成
功计轻虑浅屡为所败其後悉聚浙兵屯於青谿复为所破贼势鸱张莫敢沮遏焚荡县邑放
兵四掠不旬月间陷睦歙杭三郡一督府谈笑取之如入无人之地盗有府库仓廩虏掠妇女
屠戮士民焚烧屋宇不可胜计原其所以致此皆由奏报不实使朝廷不知其详待为常寇之
过也何以明之往年刘五起于淮南不过有衆数十人窜伏山谷间当时命使督捕急於星火
遣兵屯守以钜万计寻即殄灭此见朝廷除患之速今方寇悖逆叛乱啸聚凶徒非刘五之比
而命使遣兵踰时方至此有以知奏报不实致朝廷不知其详者一也往年讨捕刘五监司逗
挠不职例皆停废此见朝廷督战之严今部使者坐失州县首为逃窜之计未闻显戮以厉其
余此有以知奏报不实致朝廷不知其详者二也近年刘花三起於闽广不过刼掠村落未尝
敢与官兵敌然立赏之格钱至万三千缗官至武翼郎犹未败获此见朝廷嫉恶之深今方寇
公然叛乱建号改年陷没州县而其初立赏不过数千缗官止承信郎此有以见奏报不实致
朝廷不知其详者三也夫盗贼乘间窃发何世无之所患者捕盗官司不以实闻忽之不以
为事浸淫滋蔓养成乱逆其害有不可胜言者今方寇势已张炽不爱人命动辄杀戮能用其衆
藐然有轻视官兵将吏之心所指郡县如期辄取此必有狡狴智诈之人为之谋画者未可忽
也某去冬道信州闻贼猖獗破浙兵焚青溪以轻舟蹶使者分兵攻掠郡县窃以谓睦歙当贼
巢穴前後相去不百里守御之具不固其势必为所陷乘锐以犯钱塘动摇浙西有可虑之势
未几果闻其陷歙睦径趋钱塘则其智谋岂浅浅哉然贼能攻而不能守一时焚荡杀戮以快
意而无固守之计此可以力战复也传闻钱塘既陷後数日淮甸之兵适至贼弃城而去未知
信否纵使不去亦当力争何哉钱塘有江山形势之胜城郭完而民力庶东控会稽西鄣湖秀

诸郡真设险之地也自钱塘以东贡输运漕皆所取涂自钱塘以西地非不广民非不衆然皆平原易野无有山川城池之阻以为扞蔽故复得钱塘屯重兵以守之可以遏贼之势而全二浙利无大於此者为今之计破贼之策莫若择良帅遣重兵以临要害之地此三者相须以成功者也有要害之地而无重兵以临之则不守有重兵而无良帅以统之则将士不用命诚择威信素着有方略之帅统重兵以临要害因敌制变以图进讨则破贼形势已定矣所谓要害之地者在二浙则钱塘在江东则宣城是也钱塘去睦宣城去歙远不百里睦歙去贼巢穴亦远不百里欲复睦歙非命帅统兵於钱塘宣城不可也欲荡贼巢穴非复睦歙不可也若夫帅非其人及但委监司郡守以统制之不据要害之地而散兵他郡祇欲自保窃恐此贼难以指日削平矧亦未易制其冲犯也恭惟国家承平之久东南之民尤习治安不识兵革一旦狂贼放肆民心皇皇莫有固志加以频年水旱民力凋弊州县追呼骚扰百出朝廷宜有以大慰安之者而剪除鲸鲵之计亦不可以不早定也自贼作以来百有余日焚掠县邑而村落不复道攻州郡而县邑不足言一路者积州县而为之者也此岂可习以为常而不骇痛哉官兵未有闻捷奏而溃败者屡矣借使贼徒旷诛假息更在数月之後两路之民辍耕失业屯兵仰食坐有糜费国用必屈他路忽有窃发而应之者何以备御此扫荡之计所以不可缓也伏望太傅太尉相公以东南大计为虑进对清燕之间极言敷奏贼势有不可忽者择帅遣兵进讨有不可缓者使狂悖之寇速就诛夷江浙之民早遂底定天下幸甚某亦尝致书宰执与此互见辄録副本上呈以备采择干冒威严无任惶惧战越之至某顿首再拜

与中书冯侍郎书

宣和三年正月日某顿首再拜中书侍郎阁下某窃以国家治安之久东南弛备郡县类无城郭之固兵民不习战鬪之事乃者狂寇乘间起於江浙之间曾未踰时战败官兵攻陷郡县歙睦钱塘皆碎贼手可为痛愤伏惟中书侍郎浙人也贼之所以猖獗官兵之所以失利郡县之所以失守必已详达钧听不敢复翫缕一一以陈第某罪戾之迹幸蒙赦宥获遂北归适当贼发之时道路惊恐崎岖艰阻不可名状窃思幸生太平之世而亲遇骇闻之事夙夜惟念不胜愤懣尝试策所以破贼者虽腐儒之常谈然不可不察愿试陈之以备采择之万一破贼之策大略有三择良帅遣重兵以临要害之地是也朝廷选用威信素着有方略之人不患无帅以虎符起畿甸他路诸将不患无兵惟是要害之地两浙之冲以图进讨不可不讲某以为要害之地两浙在杭江东在宣何以言之贼既陷睦则杭距之为最近杭虽为贼所残然传闻不守复为官军所得借使未得亦当力争而据之屯兵固守则跨浙东西皆有所恃可以进而取睦贼既陷歙则宣距之为最近宣虽贼所未至然居民皆已迁徙官吏亦为遯逃之计急以重兵守之母为贼得则濒江诸郡皆有所恃可以进而取歙复取睦歙使贼不敢放肆退保巢穴然後两路可以协力因利乘便同时进讨翦除鲸鲵絶其本根此所谓地利不可失也夫命帅统兵临要害以图进讨此策之必然者也至於入巢穴冒险阻与贼争利於崎岖山谷深林丛薄之间则恐非西北之兵所便也於此有策当起福建路兵及广行召募福建路枪杖手自衢入睦自信入歙以攻贼於巢穴则必胜矣何则闽人趨捷劲健耐辛苦而习步战履峻险之地如履坦途尚气而好鬪以诛赏激之用其长必得其力也愚窃料之异时破贼於巢穴者必此曹也然闽中比年以来民力尤困惟朝廷权时之宜而优恤之罢不急之务以寬其力必有仗节死难之士用命而立功者庙堂之议幸留意於此某疎拙不林曩之远屏孽乃自作幸蒙寬宥

得归养亲有田梁谿之上足以供伏腊今乃与贼为邻金鼓之声相闻士大夫之家率皆迁徙以避寇亲年高矣聚族几千指亦将餬口於他郡惟望朝廷通羣策择其善者而从之克清大憝救宁一方使与避寇之人得复扶老携幼以还故居虽毕此生得为太平之幸民亦足矣素蒙知遇之厚敢布腹心伏幸裁察亦尝致书宰执与此互见協贊机务之暇愿试取观之愚者千虑庶几一得干冒威严无任惶惧战越之至

上王右丞书

宣和三年正月日某顿首再拜尚书右丞阁下某读古书窃见盗贼多起於治安极盛之世惟以良帅重兵决策进讨随手殄灭无有遗患犹之身也疮痍乘间发於四肢必以毒药攻之毋使浸淫厥疾乃瘳良帅重兵盗贼之毒药也苟兵不重则无以制贼而使军容奋张帅不良则无以制兵而使将士戮力有重兵而无良帅以统之号令不明诛赏不信智谋不深胆略不勇则兵虽多适足以为累是良帅者尤所当急者也汉之盛时盗贼尝起矣至遣绣衣直指使者督捕诛二千石以下乃能克之唐之盛时盗贼尝起矣得郭子仪李光弼之徒以为之帅乃能剪灭国朝以来号为剧贼如侂智高王则辈亦尝据有州郡当时命帅以讨平之者狄武襄公青文潞公彦博也由是观之盗贼窃发治世之所不免要在择帅付以兵柄可以无虞帅非其人一失事机浸以滋蔓则其患有不可胜言者恭惟国家承平之久垂二百年东南之民习於治安不识兵革州县因循城壁隳弛将卒怯惰莫知战鬪迺者方寇窃发江浙之间啸聚乌合之衆以钜万计不旬月陷歙睦杭三郡一督府县邑以十数士民之家肝脑涂地公私帑藏为之一空虏掠妇女焚荡舍屋不可胜计原贼猖獗盖缘江浙无重兵以临之虽有兵而统制之者非其人错置不善因仍至此也得为之痛愤哉今朝廷既察其故分遣重兵以临要害之地矣然统制之帅所宜慎择非威信素著智略过人者弗可用也何则驱士卒以扞盗贼以全躯顾妻子之人而当亡命不畏死之寇自非威信素著将士用命安能使之求生於死地而人自为战哉贼徒狡狴狙诈百端前日歙睦钱塘之兵皆中奸计自非智略过人习於兵事安能使之机械无所设而隳吾术中哉威信素著虽教妇人以战可使之冒锋镝蹈水火古人有之孙吴是也智略过人虽当百万之寇可使奔溃闻风声鹤唳皆以为王师将至古人有之谢安是也况总重兵以攻盗贼何难之有夫行军用师虽因敌制变临事施宜不可豫言然决胜大略必先定於胷次攻盗贼戡祸乱御夷狄其理一也请借古以明之汉景有吴楚之变得一周亚夫为帅虽不自意能至洛阳然坚壁固守不与争锋而以梁委之策已先定故能待其食尽气衰一举破之汉宣有先零之患得一赵充国为帅虽俟至金城图上方略然屯兵积谷计已先定故能待其种落离散一举灭之今方寇虽庸人一时窃发然有奸恶为之辅翼厚赏峻诛能用其衆曾未踰时其鸱张已如此殆非浪战之所能破也然则决胜大略岂可不择帅而先定哉恭惟尚书右丞学该古今智周事物公忠直谅以宗社生灵为心協贊庙谟戡定此贼愿以择帅为先务博询衆老或起於闲废之中或擢於行列之间或徙於边陲之地许以便宜从事委任以责成功使鲸鲵指日可平而东南安堵无患天下不胜幸甚某昨以愚戆妄发负罪远屏幸蒙赦宥得削丹书辄敢僭易忘其言之不祥复有所献诚以愤懣不能自已亦尝致书宰执与此互见有以备采择者幸望裁察之干冒威严无任惶惧战越之至

与梅和胜侍郎书

正月日某顿首再拜和胜礼部侍郎台座春暄不审动静何似伏惟神所听劳台候万福某违去言教涉三年矣向仰之情无日不在门下也前年夏以愚触罪苍黄去国平时交游至厚者往往不复通问独吾和胜送饯於门欵曲终日非高义絶人远甚欲敦薄俗而重僚契曷能及此铭刻於心未易殫叙别後闻公峻陟从班屡被宠渥喜而不寐念欲具尺牋致贺谢之诚以通殷懃而远屏海隅筦库征商之外杜门省咎京师亲故书问一切废絶用是不果辱爱念素厚当不以此加遣诮也去冬承吏部符蒙恩牵复本等差遣罢任既削罪籍复还故资无九年之谪而有三金之养方窃欣幸将自闽中道浙东省亲毗陵适闻方寇窃发於睦屡败官军贼势猖獗道梗不通遂谋迂路由江南以归又值黟歙为贼所陷濒江诸州纷然惊扰村落间盗贼蠭起借声势以劫掠者不可胜计间关险阻自饶信抵池阳偶得一舟涉长江冒风涛之险几月而後達金陵又闻钱塘失守为盜所据其去毗陵不数百里士大夫家皆迁徙以避寇势须亲奉挈族餬其口於他邦四顾茫然未知税驾之所由此观之其艰危惴栗忧愁之状为如何耶用是数月以来髭髮渐有白者志气衰落不复如往时矣行年将四十於梦幻不实之境独惊噩如此何以堪之一身不足道也所可念者上有高年之亲下有千指之累舍去田园未知适从以吾一身一家幸无恙犹且忧惧扰扰如此因思歙睦钱塘三郡十余县士民之家以亿万计横遭屠戮肝脑涂地其酷毒为如何得不为之痛愤哉每一念此不觉淚之承睫又复窃叹以谓方策所载而骇闻者不意身见之也和胜乡里与贼境接不百里当稔闻其详自钱塘陷没以来又将一月传闻贼徒弃城不守复为官军所得未知信否自余州县又不知变动复如之何也大槩贼作之初捕盜官司意在掩匿不以实闻错置乖方浸淫滋蔓遂致於此为今之计莫若择帅遣兵据要害以图进讨下寬大之诏使邻贼州县之民知上德泽此则急务窃不自揆以书達宰执诸公论此数事辄又复为一书烦和胜達之庶几无阻滯之患区区愚虑或能裨补万一余书亦录副本浼呈以书意互见恐其欲知本末也千万勿以示他人幸交游中平昔所畏服者独吾和胜前年试闈廊庑间语端不虚发何哉士大夫所养以气为主平时如虎犹恐其临事之如鼠况复佻佻倪倪惟知佞柔以媒富贵自余何足观哉每读前史见古人立名节大略率以气作之和胜刚介自喜胷中之气常勃勃然宜其临事不苟挺挺有古风烈也自公登禁从士夫称诵不容口及见谢章铤亮奋厉使人增气但恨远方不知公在掖垣琐闥所论何事以平日料之必有可观然方今居可言之地者论事当以天下大利害生民大休戚为本至於排击一二士夫此未足道愿公勉之侍从之臣皆以论思献纳为职而任天下之责和胜勿谓迂南宮侍郎遂可安枕而卧富贵易得名节难立当时处此位勿使天下指为善保富贵之人乃所望於左右也辱公情义同於骨肉不觉叨叨死罪死罪某迂拙有素加以遭逐以来多病早衰不复堪为当世用矣区区之志惟望朝廷早殄此贼浙东安堵复得扶老携幼归於故庐耕钓梁谿之上以毕此生更冀故人勉辅圣主以福斯民得与樵夫田叟同被余润夫复何言此外千万良食自重

与程伯起舍人书

正月日某顿首再拜伯起中书舍人台座春暄不审动静何似伏惟神相靖共台候万福某违去门下忽涉三载仰德之情朝夕在怀前年以愚触罪仓皇去国不果一别尝辱坠教所以慰诲良厚及抵谪所首蒙书祝眷予有加佩服至意亡以为喻罪戾中不敢作京师亲故书遂稽修报必蒙照亮近见邸报窃承给札代言陞华禁从殊慰士论辱爱素渥喜可量也某兹者蒙

恩牵复罢任出自余庇以感以慙将道浙东省亲无锡偶值方寇窃发道路阻絶由江东以归履畏涂冒风涛之险几月然後達金陵又闻亲老同骨肉辈避寇徙居未知所诣遣人询访尚未得报此情如何然徘徊江左之久於贼事讲闻甚详虑之至熟辄以书達宰执诸公具论本末区区始脱罪籍复此妄发所谓愚不可及然载於方策而骇闻者今乃身见之得不为之痛愤哉五书副本敢以洵呈幸冀一覽勿以示他人也伯起平日耿耿之志交游所共推服今据要津与国论以献纳论思为职适当此时愿展尽底蘊为宗社生灵之福勿习循默为保富贵之计乃所望於左右也未有拜见之期千万为国自重

梁谿集卷一百九

<集部,别集类,南宋建炎至德佑,梁谿集>

卷一百十

钦定四库全书

梁谿集卷一百十 宋 李纲 撰书三

崇阳与许崧老书 蒲圻与许崧老书 澧阳与许崧老书 海康与许崧老书

别幅一 泰宁与许崧老书

崇阳与许崧老书

某顿首启崧老宫使右丞冬序隆寒伏惟燕处超然钧候胜常昨者庐阜获从杖屨之游者数日慰悻多矣别来忽复半年岂胜驰仰中间辱教赐以传闻从者所寓不一久稽修报愧荷无喻得珪老书乃知眷聚已过云岩计大旆今已至止遂为安居之谋否区区夏末即抵湖外属沿江盗贼传报纷错宿留通城崇阳间今岁且尽矣虽小寇尚未衰息庶几阻江无南渡之志旦夕遂如渚宫事有轻重不得不豫料然又有非料度所能及者亦姑听之耳前蒙海谕悚荷云岩丈室竹林间风月殊佳第恐不甚宜冬竹庵录示月林堂和篇讽味叹服辄复次韵和呈以资一笑李道夫闻有旧必数过从此但终日块坐时与古人相对黄卷间耳春秋书窃愿一观少窥独究遗经终始之意告就赵令处借一介送示幸甚如定居修江此去不远时得通问也临江萧建功秀才了翁孙壻极佳士慕义之久欲一见望幸与进也岁暮未有承晤之期临书增怀切冀为国自厚谨上状不宣某再拜

蒲圻与许崧老书

某顿首启崧老宫使右丞台座使至两奉海墨殊荷眷情履兹新阳伏惟钧候多福区区自崇阳趋鄂渚行次蒲圻被受近旨检会左降官不许同处一州移居澧阳自蒲圻由岳适澧便道也少留治装朝晚遂行澧阳深僻远江非鄂渚比虽使自择不过如此感惧深矣然自分宁至澧与鄂道里惟均尚冀时获通问也宠赐和篇辞意高古殆不容复继矣叹仰无喻近诗文数篇漫往以资一噓愿勿他示为幸蒙不鄙借示春秋集传使得窥寻圣作以考圣人笔削褒贬之深意幸甚俟反覆究观有所疑难续具咨质传毕即专人驰书府次某饱食闲暇无所用心亦颇得追绎旧学第苦道途奔走未得息肩到澧阳如得少安杜门省愆收心反照以观四十六年之非此外於经史间随分有所发明亦不虚度岁月傥成篇帙自当録往以资琢磨第恐迹愈孤危未必得安居耳妄传之多乃所以速其远也惶恐惶恐元中书前路即遣人送去必不遗坠无缘少奉言色临书驰情岁晏苦寒千万为此道自重不宣某再拜

澧阳与许崧老书

某顿首启崧老宫使右丞台座岳阳人还奉十二月五日所教赐审闻钧候胜常感慰无喻岁

华改新伏惟茂对令辰拥培殊祉某待罪澧阳才息肩复闻有海南之行不胜惶惧束装俟命即上道然传报已久而命犹未至益以震悚章疏不知曾见否大槩以六事为言其五皆靖康往事其一谓罢黜不当迂路归无锡而且与县官饮宴惠山复资囊士人上书诋朝政得失冀复召用所以屏之海外坐此而已方建炎秋八月丐罢相而归至十一月始有落职之武昌指挥则当其未谪数月间不归其家将安归乎惠山乃靖康间所赐以为功德院一诣饭僧初未尝与县官饮宴也至资囊士人上书言事冀复召用此岂理也哉是身许国已久方宣和未变故汹涌及靖康中谗谤沸腾分甘死矣得逮今日皆其余也岂复吝惜然圣主在上睿知日跻如日中天而万物毕照终冀蒙察死且不朽自古贤智不能自免者多矣况以疎陋之姿而值艰危之际进不量其材力退遂至於颠隮罪大谪轻夫复何道数舍之远无缘一别情可量也前蒙借示春秋集传玩味谛绎心舒目明不能去手此书黯闇久矣今乃灿然非精思深考超诣自得何以及此叹服无已辄作数百言书於後引之本未知是否殊愧率尔也然前书所谓犹有疑者窃恐未免有求之太备索之太过去处而三传之说亦有邈焉与经相违者正当信经而不信传痛删去之然後圣人之意明不当尚取其近似之说以亏一篑之功也愿试陈一二以质所疑孔子因鲁史而春秋作於史之阙则亦阙之所谓信以传信疑以传疑故曰吾犹及史之阙文也若桓四年不书秋冬十五年夏五不书月十七年五月不书夏此皆史之阙文故圣人因而不书以志阙若於不书秋冬不书月不书夏取诸成岁及辰计之数求其义而为之说则恐求之为太备孔子作春秋於天地灾祥必谨书之使畏天者知其故而恐惧修省故曰天垂象见吉凶圣人象之若书常星不见夜中星陨如雨地震山崩之类此皆德政不修有所感召而然故圣人书之以记灾若於常星不见夜中星陨如雨言霸统将兴而兆齐小白於甲辰甲午地震言素王终始而生死孔子於沙麓崩言晋文公将霸之祥而地理决则恐索之为太过三传之说固有与经相违而可信者如经书赵盾弑其君而传言盾之罪在於出不越境反不讨贼而已经书许世子买弑其君而传言买之罪在於不尝药而已弑君大恶也圣人正其罪而书之岂苟然哉虽三传之说与经不同或可信者近於义故也至经书襄七年公会诸侯於鄆郑伯髡顽如会未见诸侯丙戌卒於鄆而传言子驷杀之左氏谓子驷忿郑伯不礼使贼夜弑僖公以疟疾赴於诸侯公穀则谓郑伯将会诸侯以从中国而其臣欲从楚故弑之所以不书弑者为中国讳也夫以不礼於其君与所从不同之故遂成弑君之恶恐不若是之甚左氏载八年楚师伐郑子驷子国子耳欲从楚子孔子僑子展欲待晋子驷曰民急矣姑从楚以纾吾民晋师至吾又从之敬共币帛以待来者小国之道也牺牲玉帛待於二境以待强者而庇民焉寇不为害民不罢病不亦可乎由是观之则子驷亦无必从楚之意将会诸侯遂先弑其君何哉左氏第言子驷弑僖公初不言经所以不书弑之义而公谷言之夫春秋二百四十年间弑君三十六孔子皆正其罪而书之弑君而贼不讨则不书葬以责其臣子今书郑伯髡顽如会未见诸侯丙午卒於鄆又书葬郑僖公则僖公欲会诸侯未见而卒尔理甚明白三传之说皆不可信当悉删去之以经为信可也某尝谓介甫作字说其发明义理之学甚深然人得以议之者以求之太备故也古者六书有象形谐声转注假借会意之类而一切以义训之故不免有穿凿之患然则春秋因史之阙文略而不书者存而不论勿求之太备则善矣又尝谓汉儒言灾异其指陈天人之际甚明然後世得以议之者以索之太过故也惟先格王正厥事觀天地之变则侧身修行以应之而汉儒一切引类为之说故不免有附会之弊然则春秋於天地之灾祥谨而书之者论其大意而不索之太过则善矣孟子曰尽信书不如无书吾於武成取其二三策而已信道之笃取舍於经者犹如此而况於传乎三传独左氏躬见鲁

史公穀乃得於传授春秋书君氏卒以议世卿左氏乃言君氏为隐公之母善学春秋者去而弗取则郑伯之弑诘可信哉是三者窃意以为如此未敢必也承切磨之喻故不敢自隐或有可采愿无以人废言其或未然却告垂海幸甚方幸江湖间相去不远书问往反可以资讲贯之益今乃屏之海外邈无还期离羣索居之念宜何如哉世路方艰千万为此道自重不宣某再拜

海康与许崧老书

某顿首启崧老右丞兄侍史湖外人来伏领中夏所赐教墨窃审动静感与慰并秋高江外气候已凉伏惟燕处多裕钩候多福某以黎寇未靖尚驻海康官军进讨贼势稍衰早晚遂南渡矣自抵岭海幸与小子无恙然从者物故过半瘴疠之乡真可畏也蒙海谕之厚铭佩无已垂示易书彖象并论语语法言训诂已领离羣索居之久得闻所未闻於蛮夷寂寞之滨恍然如奉言色喜可量也忧患中读易如管中窥豹时见一斑辄以所妄见者为之传又着释象训辞明变类占衍数诸篇解剥易体非敢谓足以垂世成一家言聊以自娱忘忧永日而已常恨羈囚未缘求教近於元中处尽传盛着遂获窥寻微旨证其所合而考其所不然者幸甚幸甚卓见洽闻发明难言之意多矣然有未能无疑者求於大象似太深而求於彖爻之象似未备也尝作书与元中论之今録往又尝掇所着释象中数十条致元中处戒其勿他示唯因风録致左右愿试取观之可见大槩庶几千虑或有得焉观易之象正犹观天辨其分域察其名数然後吉凶妖祥可得而占不然则以斗为箕以角为尾以紫微之垣为三光之廷其相去辽絶可胜言哉观象然後可以得意得意然後可以忘象而近世学者因王弼筌蹄之说皆废象而不谈此所以多失圣人之旨也互体卦变见於春秋传所载占筮之言皆古书不可废也汉魏间言易者泥於象而不求其义所取迂阔多失圣人立象之本意而自辅嗣以来一槩以义而不求象不得辞之指因以失义者亦不为之少要之二者兼乃有得尝试取彖爻之象审而观之其所以示人者盖灿然矣况以高明之识精深沈郁之思洞视而熟察之其所得遂将超轶絶尘何可跂及耶所谓彖爻之象者元中书已论其略今试及其一二姤之女壮象在乾巽乾健也巽长女也一阴初生已为长女而健此女壮之象也晋之康侯锡马蕃庶昼日三接象在坤离【离日也坤臣也】牝马也坤比於离以柔顺得君康侯锡马蕃庶画日三接之象也余卦皆然也第或取互体或取卦变或取卦爻为不同耳爻象盖亦如此然又有相因以取象者如益六四利用为依迁国则初九利用为大作所谓大作者如盘庚之厥攸作视民利用迁定之方中作於楚宫是也损上益下正在此爻故其象取於迁国大作亦犹损六三之为得友而上九之为得臣无家也有相反以取象者如颐之初九以阳在下有自养之才然居动体则不能守之以静故为舍尔灵龟观我朵颐六四以陰在上资物以为养然居止体则有以静养其威之意故为虎视眈眈其欲逐逐龟伏气虎食肉相去远矣动止殊而吉凶异亦犹大过九二之为枯杨生梯九五之为枯杨生华也凡此之类不可以一端求因象会意乃知圣人立象之妙唯变所适而不可穷也所谓卦体者颐损益外实中虚有离之体故爻象取龟大壮外柔内刚有兑之体故象爻取羊之类是也所谓卦变者变蛊之六五以为九五则蛊变而为巽故其象以先甲後甲为先庚後庚变明夷之六四以为九四则明夷变而为丰故其象六五上六以暗在上为见斗见沫之类是也凡此合一卦以观然後得之亦犹颐中有物曰噬嗑小过有飞鸟之象时一见之使学者精思而後得焉妄谓如此未知然否愿有以警诲之幸甚论语语法言训诂

发挥妙理脉络贯通正得古人立言之旨甚善皆圣贤言行之要惜乎近世之人以为童稚之习而弗深考也道途间因为小子讲解漫着其说颇足正旧训之失如井有人焉之井不施其亲之施凡百余条今録十数章往以丐监裁或有可取当令小史以拙笔故楮尽书之以致几格间也世故方尔吾侪唯当益求性命之理守死善道耳余复何言诏令既下想见士夫迁徙纷纷念之心折豫章遂为都会分宁僻远自不相关从者不必更他六月初书已办欲来江外不知後复如何族大累重一迁自非易事也闻杜门谢客唯以着述为事不胜叹仰儒书训释既当不若於佛书中发其妙意虽见性了心不立文字然法门差别理事通融偏参亦自无碍大抵训释前言盖专以为己非为人也块处海岛既远朋友渐摩之益又无书可观其遂君子之弃而小人之归乎会晤无期可量悵跂切冀良食自厚因张漕人还寓书以承动静不宣某再拜

别幅

来教谓设卦观象而系之辞故辞皆自象生说易者之谬妄不难穷者以有象质之也又金石草木和合为药寒热燥湿体性顿殊六十四卦三百八十四爻字字有象此言尽之矣至谓互体不足取则似不然求易之象於正体互体卦变卦画时来俯仰之类皆不可废若祇於正体中求即不合者多必为之说却成牵强如观之盥而不荐震之匕鬯剥之牀户归妹之虚筐皆俯仰也临之八月复之七日贲之相文咸恒损益之上下皆来时也噬嗑之颐中有物鼎之象大过之本末弱小过之飞鸟中孚之豚鱼皆卦画也井之改邑不改井同人之于野巽之先庚後庚皆卦变也取於互体者尤多如晋有艮体则为鼠巽有兑体则为巫鼎有乾兑则得妾以其子如履有离巽兑则为跛眇如此之类盖不可胜举以十三卦考之噬嗑正体离震互体坎艮离日也取诸龟贝之属也震动而艮止也坎衆也此所以为日中为市致天下之民聚天下之货交易而退各得其所之象也豫正体坤震互体坎艮坎为盗坤顺也艮止也所以为门阙也震动而有声也动乎门阙之间而有声顺以止之此所以为重门击柝以待暴客之象也余卦皆然可思而得也互体取象曷可少哉又观乾兑为夬百官以治万民以察而得兑为附决之说兑乾为履以柔履刚以刚啞柔而得九五为夬履之说如是者盖不可胜穷然後知易之变一寓於象而观象之妙一寓於变执一端以求之则差矣愿以精深之思索於数者之间必有神会而默契者其或未然亦望海谕幸甚某再拜

泰宁与许右丞书

某顿首啓崧老宫使右丞兄台座去秋人还辱教答审闻动静甚详感慰无喻孙壻继附到论易春秋两书反复熟读恍如对谈喜可量也迁居扰扰久不具记不审还来为况复何似履兹新春伏惟钧候多福区区挈族寓居乡邑目前粗迁邻境巨盗稍就招纳第效顰者纷纷蜂起未知得奠居否方今岂敢怀安流行坎止姑随缘耳去冬传报江上扰攘及分宁武宁良用恇情继闻群寇即退深隐山谷当无惊虞不知且复安处唯别所图适四海横流其势未艾吾侪正当远引犹之奕者须观局势不可留滞一隅以貽後悔也幸熟思之学易不言象而象在其中此诚至论然要须观象无所差忒乃可若谓舍象而能得意则恐未然春秋推明灾异此正圣人所以和同天人之际者前书不欲指事谓如山崩而兆霸统地震而兴素王恐难以必学

者之信後世山崩地震多矣而霸统不立素王不作有诘此者将何以解之大抵天地之变五行之详各以其类应盖气之先至者犹病在五脏善医者察色按脉而知之通夫古今一理也宣和已亥都城之水实兆靖康兵革之灾尝观开天传信记载禄山未乱前数年长安大水几冒城郭乃知天之告人如此之审非有物使之气之自应若合符节论灾异者不必过求直以类推则得之矣因海谕故及此顷在海上取自共和乞於五季史家所载天地五行变易缙为一书虽未成就然已有可观篇帙浩大陆涂不能将即附海舶来闽中寄沙阳一相识家到此未暇取近传盗贼焚劫未知存否傥得藁沓尚存编摩成书庶几有补於世愿丐一言以冠篇首不朽之传诚有赖也还家几半年矣日困人事笔砚遂疎得有定居之所复理故学且从者寓止稍相通可以时从质问何幸如之元中久不通问远寓瘴乡殊使人念之然无寇盗之虞未为非得策也李道夫珪老时过从否春风浸暄敢冀为天下自重谨上状不宣

梁谿集卷一百十

卷一百十一

钦定四库全书

梁谿集卷一百十一 宋 李纲 撰书四

澧阳与吴元中书 吴元中答书

桂州与吴元中书 别幅

象州与吴元中书

澧州与吴元中书

某顿首拜启元中观文相公大孝服次叙慰已具前幅岁暮阴寒不审孝体何似伏惟动履支持违去言色於今三年矣靖康秋末尝辱长芦所赐书时大旆既行区区亦有云安之谪一向奔走道涂间不获修问瞻仰之怀无终食置也今春承命来武昌道中忽闻先丈太中遽弃荣养闻问怆悼良不胜情惟公纯孝天至而终天之别隔絶殊方复阻奔赴永惟哀慕荼毒何以堪此人生忧患一至於此天之佑善理实可疑奈何奈何念欲俟至武昌专人布慰适道路间关秋初才及郡境复澧阳之移故尔後时负负而无可言者照遇之厚当有以恕察之也某迂陋有素惟公知之去春闻有尹京之召率湖南义旅以辅王室之难次江淮间乃闻都城?没二圣远狩痛愤几絶覩上登宝位赦书悲喜交集第欲一至行在覲新天子即丐归休而途中闻有告廷之命虽荷特达之知自视阙然尤不敢当既而力辞不获龟勉就职才两月余虽夙夜罄竭庶几补报万一而疎拙寡与动辄齟齬自度终无以仰副圣主委任之意方时艰难不敢贪恋宠禄备位妨贤虚受天下之责力前退罢幸蒙矜从而论者纷纭不已其言可骇可愕赖上睿明有以照察其无他俾居武昌德至渥也及兹例迁复得澧浦深僻远江虽使自择不过如此念思省咎日以感惧正恐孤危之踪不能久安於此不然息肩杜门洗心悔往知四十六年之非而国日新於来者何幸如之追思靖康相从於廊庙如一梦间既去之後国家变故遂至於此虽欲效其区区何可得哉当时动为身谋争宠利而舞智以御人主误国败事者今皆安在吾侪正如救焚固愿出力於焦头烂额之间至於力之所不能致则天也非人之所能为也尝观古人处天人之际未尝不尽其在人者至於无可奈何则归之於天故西汉有王氏之祸其梓柱生枝叶扶疎之祥见於成哀间知数者言汉当再受命故哀帝改号陈圣刘几以应岂非天乎然时有刘向拳拳纳忠帝室专以远外戚进宗族为言虽遭深怨而不惧其後王章因日食之变极论王凤遂死狱中既更哀成而王氏遂已篡汉李唐有武氏之变其兆已存於宫中李淳风尝言於太宗而濫徐君羨之诛几以应之岂非天乎然而则天之立褚遂良长孙无忌来济郝处俊之徒力争之皆以贬徙其後上官仪因高宗之怒将草诏黜之竟不果而死既废中宗武氏遂已革唐向使刘向王章之言成帝能用之不用外戚虽既用而又抑之则必无王氏之祸使高宗能用褚遂良上官仪之言不立武氏虽已立而黜之则必无武氏之变然而数子者其意虽切而言卒不用事卒不可止者天也言虽不用至於斥逐以死而数子卒不

改悔者不以天废人也君子以谓知所守靖康之事大概类此然小人之乱邦必至於国家俱敝而後已可胜叹哉吾辈在宣和末变故汹涌是身已当死於兵革之间在靖康末谗譖沸腾是身已当死於斧钺之下得至今日皆其余也已为幸人夫复何道然有不解於心者两宫远狩於絕域羣生方困於兵戎王室之危若綴旒然此所以终夜不寝痛悼而寒心者也惟公精忠许国乃身在外乃心罔不在王室虽藐然哀疚之中此意岂少忘哉峨山於岭外为善地於今日为乐土其风物见於柳子厚所作山水记中似亦不恶燕处想能安之顷得信斯书报眷聚已往骨肉皆在目前尤非细事某待罪於此不敢弛担僥遂度岭得密迓良幸第贱累辈皆留浙中累欲挈来正恐踪迹不定故久不果亦姑听之耳崧老昨邂逅於庐山相从十余日颠沛中道力益坚殊可畏仰有书致左右今兹世路方难未有会晤之期者此情何量敢冀节抑哀慕为天下自重谨奉状不宣某再拜

吴元中答书

敏叩首上状敏罪衅深崇天畀酷罚先君即世泣血蛮徼岁律已更尚以乏使不获奔讞以为公忧伏承遣使不远千里慰吊哀惻奉问崩割苍天莫闻呜呼不孝不能终养田里驰驱当世又不能忠以败国事天实留之使受鉅痛以惩斯世至此极也靖康之初闻贬就道时先君极康宁且毅然无惜别意私谓再见可卜钱塘之难七十日幸全以迂吴兴书来满幅如平时意自此少安矣後十日遂至大故呜呼遽至此乎药餌弗尝大事弗亲闻言万里未即归死不肖之孤痛何毒也奉命来柳尽室踵至时辞其家今复满前而独先君音容终天絕矣想公闻之亦不胜其哀也蒙谕别後出处之详初敏至夷陵闻公当来白帝荆盗梗涂不复相闻建炎赦令至天倾地覆始奉的问身繫远方徒死无益泣血累日又复媮生既闻上圣继统又喜公已登庸八月离涪陵九月传公去朝去岁奉先君之讞於南岳六月至柳而比复传公三易地来使至自澧阳所传信否契濶三年人生亦孰非梦何梦之异耶垂示靖康之事反复天人之际甚悉虽然此公自为说可也先事廷诤退无遗恨进不大任责有所归若敏何敢言此受上皇之托以辅嗣圣奉渊圣之命以宰国事去位数月大耻如此顛輿被兵求由与责怀王堕马贾生悲哀古人之心不吾欺也得罪以来念王室之变故痛二帝之行役悼素志之零落叹生民之流离每一念至不如无生事既已矣无所效唯端居净虑以尽洗其四十一年之非虽然有不可解於心者无所逃於天地之间如水之湿火之热性也亦命也昔申包胥闻伍员覆楚之志则曰我必存之楚大国也当是时楚之敌国君臣相与谋楚者未必敢有是言而申包胥以一夫言於野如此其後哭秦庭乞师卒如其志诸葛孔明与先主论天下於南阳是时曹氏已擅汉孙氏已盜江表三世矣孔明之言无不讎者海内鼎裂犹为刘氏宗臣张柬之之语武氏於荆南江中卒复唐祚垂祀三百此数子者皆论国家於江湖草莽之间而国卒赖以复兴由是以谈虽曰天数亦人为也一夫发志其烈如此僥办诸心必有以合天人之愿者矣敏固罪废僥得饭疏饮水生为宋民死卧宋土夫复何恨如其不然虽顽钝无堪窃尝奉令承教于二帝矣太祖造区夏海内蒙福者於今十世民之戴宋岂有穷哉惟公忠义盖天下功名震四夷精心血诚宜无不在王室愿言勉之我仪图之爱莫助之道远世难无缘面谭故辄发其一二示及旧疏向在湖外已尝获见此皆目前可数利害也崧老报书纳去自桂至象九驿取道龙城却减一驿但陆出麻兰之侧颇险故来者皆泛浔江而一日兼两驿有半大旆果南或不憚小舟荡兀即过我而往亦良幸余唯为国保重谨因还使布谢不次敏叩首上状

桂州与吴元中书

某顿首再拜元中观文相公大孝服次人还伏辱教答窃审履兹青阳哀慕之余孝履支福下情感慰某罪戾远屏闻报即已行次桂林虽迄今彼未被受不敢稽留逶迤南去仰戴宽恩日益慙惧当艰难多故之秋误蒙考慎既无持颠扶危之术又无保身自全之计进不量其浅薄退遂至於颠跻乃分之宜夫复何道然言者所论六事其五皆靖康往故如刼寨伏阙之类其一谓资粮士人上书以冀复用岂理也哉睿智在上如日中天终冀蒙察死且不朽谕海古人一念之烈悦办诸心必有合天人之愿者非精忠之至有大愿力何以及此正所望於左右也如某罪大不容於世即死海外此志已矣惟公勉之见约水行可以邂逅固所深愿第恐好事者又从而旁缘造言以为公累不然麻兰之险小舟荡兀非所惮也幸冀照察无缘承晤此情可量切望节抑哀慕为国自重不宜某拜后

别幅

某再拜昨日抵桂林方作书欲遣人承问使至特辱教赐开谕周悉感服无已承录示靖康旧语读之感慨方危疑之际祸患不测非公力为辩释此身不能自保久矣虽公未尝一一见喻宁不知之其秋出师固知堕恪计中亦尝面道其详然力辞而卒行者非特迫於威命如所谓杜邮之赐势不得已亦庶几立尺寸之功以塞厚赏然後解兵归印幅巾柴车径返田庐此素志也不谓事与愿违驻车河内未踰月而庙筭中变公既去位某亦罢归一切皆如恪策而人罕知之者初某既总师指挥维命刘韜为副及其後乃知恪所荐也解潜初与韜会议於隆德韜志甚锐及潜出兵韜忽中变按兵不行故失期会而潜有南北关之溃适所遣属官张叔献者自韜军中来能道其详乃知韜将出兵而得恪书遂有缓师之谋虽书辞不可知而意则可料也其後韜之子子羽道其书辞於人果如所料此二人者今皆见存他日可询也渊圣又御札付韜而误付宣抚司其戒勅之语与本司所禀受不同亦必恪意解潜为制置使折彦质为河东勾当公事张灝为转运使折可求为都统制皆各受御前处分进退自如因报公罢遂相援此为言以谓节制不专难以责成功必致误事非使节制归一以谋万全之举则太原之围必无可解之理不然愿丐罢去遂得请夫恪之意不过欲作相耳而妨功害国其巧如此今恪已死尤之何益所可痛者小人动为身谋不恤国事一至於此故范祖禹以谓用小人必至於家国俱亡而後已岂不信也哉前书所谓舞智以御人主者为恪设也又承询以天下安危存亡大计如某迂疎再奋再蹶进不足以谋夫国退不足以保身何敢复议此哉试陈梗概言之而不忤恃公之知我耳夫天下犹一身及其病也必有致病之源靖康之初所以致寇者其病源於崇观以来军政不修而起燕山之役靖康之末所以致寇者其病源於春初失其所以和又失其所以战何也贼以孤军深入重地前阻坚城而後顾邀击之威初未深知中国之虚实也而吾之援师日集当是时不难於议和其所邀求度可许者许之不可许者勿许则约成而和可久朝廷为其胁制初不计此所求一切听从故使贼得以窥中国之弱而约不能坚此失其所以和也当时力争於榻前者正谓可以脱一时之急而贻将来之祸虽有智者莫能善後虢射父所谓期年狄必再至示之弱矣者是矣诸道之兵既集数倍於贼福宁会议正欲用亚夫之策复畿邑絶粮道禁抄掠困其师以胜之而姚平仲先期妄发其议遂格夫刼寨小衄也而因以沮必胜之计邀击良策也而抽回袭逐之兵故使贼安然捆载而归无所忌惮此失其

所以战如奔棊然岂能尽杀敌而我无所伤哉借使以吾兵之二而易敌兵之一犹为中国之利深入者覆师则疆外者破胆矣失此机会故贼志日侈士气日沮长驱凭陵至今为梗先軫所谓一日纵敌数世之患者是也今国家变故既尔宁可追咎既往然不知其源何以治病此二者安危存亡之源也或者见靖康之末失守而以靖康之初坚守为非亦可谓不知变矣靖康之初与夫靖康之末事势岂可同日语哉贼初犯阙时朝廷失於堤防故使之渡河而至城下其所以急欲去者初不为久留计及再举南牧则有必取之心此不同者一也贼初抵城下不数日间援师已集中外音问络绎不絕及再至则围城之中始以蜡书起兵中外阻隔不通此不同者二也渊圣登极之初士气人心贾勇百倍其後稍稍解体此不同者三也其细他故不可胜言故在靖康之初有备则当守在靖康之末无备则当避岂可胶柱而鼓瑟耶今以後而罪前是犹治病不别脉色不察证候以後药之失而咎前药之得岂理也哉夫宣和之间病成而未作靖康之初病作而未甚至靖康末则病甚矣故以靖康而视宣和以建炎而视靖康国势人心与夫经营之难易何啻相什百哉然建炎之初犹有可为之理者河北失真定怀卫濬四州河东失太原泽潞汾晋六七州皆靖康末有为失之其余皆为朝廷守兵民之心戴宋坚甚而河北东路京东西陕西诸路未受患也当时料理其两河以为藩篱因其人而用之则中原可保车驾巡幸不去中原则四方可安譬犹初病中风者药石之功犹可及而复为全人也既舍此策以苟目前之安坐视数路之莫救河北河东悉皆陷没而其京东西陕右类遭侵掠去春关中既扰今则鄜延丹坊又破坏庆诸路数月以来未知复如何西北如此则中原岂复为我有哉譬犹再中风者遇良医犹不免有偏废之患医非其人未可知也西北之於天下非特形势便利乃将帅士马甲兵之所出兴衰拨乱之具在焉失之则其具何自而得欲修大厦之倾而乏材料可乎贼善因兵於敌非特因粮而已去春破京东西者多闻两河之人使复用京东西陕右之人剪发易服被甲执兵则遇者皆以为贼望风奔溃何往不可虽东南未得高枕而卧也正犹大厦之倾日葺之则有复全之理不然风雨之所颓圯而後已可以数其迁为安耶今日之策急料理之可如东晋然东晋亦未可轻议之也辅相如王导人望如顾荣贺循纪瞻经营中原如祖逖刘琨方面如温峤陶侃郗鉴强藩重兵控扼上流始能抗石勒之徒保有江左如奕棊者一失腹心之势则虽欲保守一隅岂易得哉杜牧有言上策莫如自治自治之术以进君子退小人为本君子进则虽微必强小人进则虽盛必衰此匡复之象也理必至此心术不同而已今之事必其真有勾践枕戈尝胆之志必能行卫文布衣帛冠之政任人者体刚明诚一之德受任者革忌媚偷惰之风一切以公天下保国家为心日引月长使国势浸强庶乎可为此安危存亡之所系也自经变故以来尤觉可不可之有时时不可而为之犹逆风行舟用力多而无补使遇其时呼吸响应顺风开帆一日千里可也愿公深自蓄养方燕闲时究观古今之变而察其机会异时复膺大任则宗社生灵之所赖必有在矣昔蜀先主劝刘表因曹操在官渡而袭许昌表不从其後悔之先主曰天下之事机会之来岂有穷已若能应之於後则此未足为恨今敌强我弱然安知异时无可乘之机耶此可为智道难与世俗论之也某久已灰心今复远屏海外与中原絕此志已矣因诲问所及故辄发其狂言死罪死罪某再拜

象州答吴元中书

某顿首启元中观文相公大孝服次使至奉望日所赐教伏审即日孝履支福慰佩兼怀区区

已次象郡跂望龙城才数舍之远不获一见我劳如何在八桂覩德音闻车驾南渡仓卒惊扰感愤弥日不能自己事势遂尔奈何恩霈旷荡独不沾濡而谴谪之辞弥重罪魁怨府萃於一身慙怍震惧益无所容方建炎初固尝建议以谓今日之策惟有自治自强而已上下協济真以古之创业中兴者为法庶几国势可以获振不然未见其可也其後以所议不合罢去而募兵买马选任将帅经营藩篱保据形势种种皆以为罪已施行者一切罢之两年以来谋国者不闻有所措画贼入吾境破城邑扰诸路恬若不闻惟幸其不来而来即避之不知此何策耶中国坚强之地在西北柔脆之地在东南贼因间乘势先荡覆吾坚强之地而不加料理今遂长驱以窥东南此正如曹操先事河北关中而後临荆吴其计策岂浅浅哉东南所恃者长江之险耳有战舰水军而後险可用顷降指挥於淮江翔置者正以备此赤壁一战而鼎足之形成魏终不敢有意江表使其有备敌敢以非所长而轻济耶今事已尔非呼吸所能办万一贼以偏师渡江又将何以御之夫避可暂而已至於再至於三将若何代宗避吐蕃於陕以有李郭之徒可恃於後也德宗避朱泚於梁洋以有晟燧之徒可恃以成功也比殊不闻得大将为谁可以庸方面之寄者有一宗泽已不能容况其余乎此所以深忧而窃痛也当国者姑欲咎既往以为归罪之所果能有所补耶且伪楚之事欲尊用之者怀二心以事其君者也自开辟以来岂有二其心而可以立事者乎比年冠盖相望於道彼曾不闻有所报答而文檄公然指为僭伪用意如此而欲因其所立以结好此何理也使归罪而足以解纷所谓死有轻於鸿毛者戴宋之志得矣第恐不可以为训耳嗟乎子胥欲霸吴而尸浮於江苌宏欲兴周而血化为碧孔融以为汉而见收田丰以言效而不免昔之贤智如此何独我哉今日之事安处患祸者易扶持危颠者难仆已安其易者惟公勉其难者则包胥哭於秦庭而存楚東之语於江中而昌唐必有在矣恐遂不复晤语故辄及之议国是一篇乃邀说十事之一漫録去可以见其梗概迂疎如此而欲求知难矣哉公遂得自便闻之喜过於自得承欲卜居衡湘间恐亦未为得计龙城可居不若少安为佳幸深思之慰谕之厚感服无已止有一舍更无他法却觉身心轻安乃知成就此缘皆善知识也然吾侪皆以一念之差与世故相值乃尔决非偶然世间法莫不素定惟当坐进出世间法耳益远言色邈无见期千万为天下自重不宣某再拜

梁谿集卷一百十一

<集部,别集类,南宋建炎至德佑,梁谿集>

卷一百十二

钦定四库全书

梁谿集卷一百十二 宋 李纲 撰书五

贵州答吴元中书 怀泽与吴元中别幅再与吴元中别幅
郁林与吴元中别幅郁林与吴元中书 与吴元中别幅

贵州答吴元中书

某顿首启元中观文相公大孝服次人还蒙教赐窃审迩来动静之详慰佩无喻春深气益暄伏惟孝履只福靚三月六日内禅诏旨王室变故遂至於此痛愤何言又传御营将士榜檄乃知逊位缘此之故所传敌国之意非也诏旨姑欲假此以为辞耳彼为赵氏之故而欲以此为讲好息兵之谋其术不亦疎乎自古不能自强而专以退避为事威灵尽去则必有此变曩议巡幸亦尝陈此以谓留中原虽艰危然人心士气百倍可保无虞若幸东南则肘腋之变不可测实不敢任其责盖亦以理料之耳方建炎丁未秋主谋者既不为保中原之计即须乘势幸建康而料理淮南以为藩篱措置战舰水军据江以为险则东南犹可保而无一旦仓卒之患犹得下策此琅琊王所以闻西晋之故即日渡江也当时诸人但为身谋不为国计以谓渡江则天下以弃中原之罪归於已故操两可之说为驻维扬之谋以南迁议归咎他人扬声北还又不为东南守御之备日复一日惟幸敌人之不来而来即南渡以避之自以为得策耳然不知大江阻其後非仓卒所能济则必有扰攘狼狽之势祸变不测向之谋自以为巧者乃所以为?也大抵为身计巧则所以谋国者必疎为国计深则所以谋身者必拙二者不可得而兼故能忘身及家以为国者国安而身与家同其休窃窃然惟以谋身为事则家国必至於俱亡而後已此君子小人之所以异而有国者必以用小人為戒也別紙所諭何慮之深方今戴宋之志无穷而不以进退二其心者獨吾二人耳借使如前書所謂死得其所矣尚何言哉自古必有不二心之臣死社稷者亦常理也況又不必爾耶宣和間王蔡童梁所以謀身者至矣然卒不免靖康間唐覲之徒所以謀身者亦至矣然又不免至汪黃則又巧過於數子然又有今日之事吾二人者其拙不若人可勝言?以其拙故反得視聽食息以至於今此豈可以人力致耶如仆之危又非公比姑置靖康不論前日用事者以事勢相激之故必欲置之死所選造百端處心積慮念念不忘未及措手彼已先自罹禍以是知天之能勝於人而力不足以勝命也居易俟命使內省不疚俯仰無愧足矣如是而不能免亦命也舍虛幻身求真實法為宋純臣而死不猶愈於彼之死乎以此胷次坦然無復憂懼此說雖似不情然理實如此不知公以為如何區區自過象郡頗覺為嵐氣所中飲食多嘔姑少留懷澤將理公僥尚居龍城健步往還不十數日可通音問或有所見愿見告也初夏秣數日間千萬節抑為天下自重不宣某再拜

怀泽与吴元中别幅

承諭晉宋參辰之說理實然也曩嘗相與論於省中臨亦以此奏淵聖且謂太原之圍已幾年

矣賊之巢穴已固不能保其必解安知未行彼不以坐困而已破乎迫於威命既行愿任今冬扞御之責使太原遂破亦當圖所以復之者故多請器甲以行意欲鼓動雨露之民而用之既得罷而志不遂所諭搗燕山者是也當時亦有此意但倉卒戒行危疑百端種種不集而料理稍就緒廷議已變故不及此當時師中若能休兵平定百里之內牛酒日至而犒師與姚古約定而後進兵宜有可解惜其輕進而吝賞士不用命而墮賊計也若謂按兵中山先聲後實如李左車之說則不然漢兵破趙二十萬衆故燕齊靡然從風威足以讐之也韓彭韓彭之師捆載而歸初無邀擊之威則尼堪何憚望風而解太原乎大抵靖康之事正犯師或輿尸之戒而廷議不一此所以卒無成功也高祖非獨以軟弱為大度又以大胆為英材曉事為明智興衰撥亂之主對勅敵馭羣雄大要在此爾然此乃天之所賦非積學所能致存亡興廢之所系非偶然也建炎初嘗取漢高光武唐太宗事迹散在諸傳者刪去繁細掇其大節為一書目之曰漢唐三帝紀要錄為之序而上之以廣睿聖之意而贊之者以為孩提且指太公建成之事為言其譖愬之術每下又非靖康間此知書與不知書故不同也

余堵之事乃敵國兵家之常當時金議以為泄雖亦無害者正欲間之使燕人德我而金人疑燕如高祖使陳平間楚曷嘗畏其知耶果畏其知必不文墨付其使而取必於其事之成也其後王云雖口傳道其語而卒不公然以為言者其意可見但中國所以應之者謬耳其後軍前以蜡書結燕人者甚多詹大和主其事亦頗得要約既變遂不諧爾何獨此哉賊之欲得志於中國者豈以此故但彼強我弱彼智我愚彼協我不協故我之施於彼者不行彼之施於我者必中如以曹馬之事間吾二人者遂以為信然而余堵之事彼不為動此乃勝負之所以不同也士大夫不知古今不識事理往往指此為弊端豈不可笑建炎初知和議之誤國故批出行遣初無公姓名而江夏增之此得之子諱子諱得之世則其詳他日可詢其後既至行在屢於睿聖前開陳方欲俟措置事稍就緒入章辨明罷去遂不果疑以為通偽楚之意非也然今日得與和議之列豈非福人耶往事皆不足復道但當思今日之策當何處之吾輩雖不復任責然所以為國家慮者不能自己也以愚意料之所謂輕騎潛行欲襲我亦未必然但既不為備又無斥堠則探報不明而人心易搖又屯聚左右者正兵皆少皆招安盜賊如閻瑾丁進之徒彼皆利於南渡則得以復肆剽掠故金人游騎及境則張皇以告急朝廷無備不能自固而倉卒渡江則淮南州縣盡為盜賊所破所謂真楚通秦碎於賊手者乃盜賊非金人也藉使金人蔑視中國輕兵深入知其所以應之彼亦未為得策今日之事當盛兵以扼江險而又以扼其歸路則賊亦豈敢久安居淮甸間但不知京東西兩路今復如何耳兩年坐視城邑之破如越人視秦人之瘠恬不加恤遂至於此罪當以是為先而言者咎其不早渡江抑末矣然事勢至此其初在於不恤諸路其終在於倉卒渡江倉卒狼狽則威靈盡去故江北盜賊得以殘破州縣江南禁衛得以脅制朝廷此舉動所以不可不審也正如低棊對手高棊未必有殺之之意低棊惶懼多自着破今日變故皆驚擾之所致苻堅以百萬之師南寇謝安出游別墅終日處畫將帥皆當其任必不如此偽楚之事初以其嘗自歸止於遠屏欲法光武待盆子以不死之意其後緣鞠承華夫人語言事而陳氏之事遂露睿聖以其據正寢通官嫔故震怒而卒有後命事在罷相數月然不如此則今日之事未可知也前疏所謂秋高馬肥虜復入寇挾金人之勢不得而制之者謂此欲尊用之者其懷貳甚明

建炎初張所首論江夏兄弟之奸以散官安置既而吳玠論汪送部其後潁川極論二人以謂

必误中兴遂置极法次年春邵成章因张遇事有言缴申二人亦窜逐布衣魏祐连上五书闻亦不得其死其秋马伸疏十五事攻之谪山东监尚不知存亡也颍川之书甚明白激切初无指斥之语但论此二人中其要害故下毒手以绝来者祐之书尤知当世大略此数书皆传异日必见之伸之章所论皆细故以谓如二人者大略非所责然当今任天下之事者正当责其大略而细故可简伸之言非是如其人亦不易得而必欲置於死地近世所未有也

再与吴元中别幅【四月十六日】

所谕建炎非靖康比当直罢和而治兵此至言也石勒遣使东晋元帝焚其币而却其使立意如是然後可以立国今乃不共戴天又非勒之比彼方以讨僭伐叛为辞而此欲以讲好息民为说复追悔不尊用邦昌以解纷虽戏剧不如此

所谕当为数节是也然今亦岂可复望为全人能保东南如东晋已是妙手脉络不通药石之功不能至必有偏废不举之处能遏横流使不至大溃以今证候观之亦岂易耶公意欲径趋关中上策也初议正欲如此而议者以蒲解为贼所得相去密迩动听故深憚往屡论不可始为襄邓之谋前疏所谓纵未能行上策以趋关中犹当用中策以趋襄邓是也其意谓襄邓由武关可以通关陕亦可为之渐其後中策不能行况其上耶其後见关中南阳为贼所破则又指以为非策殊不知有备而能自强虽与贼对垒可也无备而不能自强虽远徙将安之古人所谓我之所至敌亦至焉是已

所谕声多而实少意多而谋少此言深中所病然靖康中所起防秋兵其後罢去大半安能充数在河阳尝三具疏争之言切而甚详必曾见也其後国论既异则虽多亦奚以为建炎初有可以得兵之理者两河之民无所归者衆而京东西强壮散徙者亦多十数万不难集故当时建议欲取财东南募兵西北既有绪而罢去言者指以为罪遂悉停之今数路之民反为贼用前日之犯淮甸者皆吾民也已有兵不能用而以资贼今岂可复得耶东南岁漕谷粟财帛者正以养兵当时亦不患无养之之具今则兵财皆可患矣又尝欲以官田如户绝天荒逃田之类如弓箭手法养兵於民事已具而不果行然民兵非数年不可用亦止可施於本土而募兵训练可以远戍必兼用之兵非募即民今人见募兵即曰兵骄不可用见措置民兵即曰民不可使为兵不知何自而可得也五季之际兵何尝不骄周世宗及艺祖用之遂为精兵大抵数年来军政益坏者议论不一而任人不专所以主之者非其人故也人材固难得然古之建功者未尝借材於异世舍短取长亦有可用但习熟见闻少超拔之则议论纷纷此最可患建炎初召关陕将佐数十未罢间到者十数人皆有可观有李庠者老於边为童所黜谋略魁伟非诸将比因荐之为副留守遂为渊所毒而死殊可惜渊之忌与潜善同三月初闻渊亦死今将佐犹难得也州县惯习朝廷议论不一之故奉行灭裂虽美意亦为具文此风岂易革但朝廷坐作得定是非赏罚明自当丕变今国论云何而责州县难矣夫兵骄民困奸雄攘斂夷狄凭陵犹未足忧而所忧者在於小人盖其谋身之计得君之术排陷之谋皆难与争锋如建炎初其未至则设筭以待之其既至则掣肘以沮之其既去则多端以归罪之此岂可与力争耶因知古人以消长为天行者惟此系於天非人力所能胜也今虽已尔而羣阴固结者自若观以捭疏而引会其用意之巧如此事殆未足犹之病者微有阳气犹不能死全阴则已矣此所以

可忧也尝思封建虽有末强本弱之弊然各能立国而夷狄盗贼之患不若後世之甚郡县施於承平之时则善矣巨盗起夷狄横则往往不能制之三代秦汉以来可考也惟唐方镇之制处乎封建郡县之间盖方镇者节度一道之兵自唐初有之当时内有府卫外有方镇表里相制最为得策至开元末府兵内铲边兵外作於是始有安史之变卒赖方镇平之其後裂河北以与三叛将德宗惩奉天之难行姑息之政方镇始强唐末有巢寇之乱方镇益盛而全忠遂以亡唐夫唐之变藉於方镇之力矣所以强盛至於不可制者措置失当之过也

国初以唐为鑑削方镇之权以絶尾大不掉之患是矣然至於今日承平之久郡县单弱不能卫王室如手足之不足以扞头目故夷狄颺驰盗贼蜂起莫有能抗之者则守常不变之过也为今之计唯复方镇之制少因革之可以渐振中国然节度观察防团之类今为阶官不可复改故建炎初置帅府要郡以安抚使钤辖都监代之庶几不骇人耳目而寓方镇之意当时即欲分隶州县减上供财谷使治兵而假之权议不同者以为未可分隶而财谷当俟其具数来上然後降旨故少缓之既而罢去遂已至今帅要之号犹在监有名而无实也或谓此制行则藩方将有难制者亦过计矣犹之治病当以小者易其大者故病洞泄则有脱之理必以热药补之已而成痢而痢可为也病热者则当以寒药下之必羸困则徐以温药调理然後可以复安汉高捐关东以封韩信黥彭非不知此三人者得广地则难制然当时忧在亡楚故不得不然楚亡而三人亦擒矣今夷狄盗贼之变如此而欲以郡县常法持之无异投参术而欲去症瘕起羸瘵法方变而已忧其弊岂不过?然要在得人如太原之得马燧泽潞之得李抱真不数年间遂能以弱为强尝着论甚详偶已束装未果录俟续驰去公试思之以为如何此事不厌讲之熟也

郁林与吴元中别幅【五月七日】

论高祖光武甚善顷尝作序进三帝录及其梗槩漫录去并所着郡县封建方镇三篇同往虽不成文取其意可也愿勿以示人及建明募兵劄子亦可以见当时措置募兵及所以养之大概然此所募兵正欲置营房於河北京东西陕西更番以卫行在当时行在絶无兵也帅要兵如大名四军止万人耳传为十万则太过当时立额固有多处然不过招填不足似未为害孰若全不招而无兵以战守并与其地与民而弃之耶兵贵精不贵多至论也有兵又须训练得帅以驭之乃为精兵犹之有材料又得巧匠以用之乃可建大厦有材料而无巧匠则拙有巧匠而无材料则是无面而造食也失当时可投之机会最为可惜至於养兵之费窃谓朝廷岁漕东南米六百万余石及上供财帛等正以养兵及六宫宗室百官之奉祭祀宾客赏赉之用又榷天下茶盐之利以供非泛之费今此等用度絶省矣若均节之则不患无财岂专恃募民助国哉然此乃建炎初事今地益蹙民益困江湖运道不通则非徒无自得兵财真可患矣唐之方镇唯河北三镇许之世袭盖有为而然余路则否建炎初下令以河北河东封能守者听其世袭而沿江河淮置帅要但假之权使治兵非世袭也略仿唐制然此亦建炎初事今之证候又不同矣三等之规固善其谁行之观沿江置制置使而淮南未闻大槩可见不知失淮南则江以南可保乎东晋能保江左以有淮南後唐迁於豫章正以失淮南之故其利害甚明至於倚关中以复河北在今日诚为渺茫天意难测会有时耳

郁林与吴元中书【七月十五日】

承谕日读华严此书广博微奥难得其指归游心之久当有深契而自得者愿垂诲一二发药幸甚忧患中观易妄有所见世谓易类佛书之圆觉虽大指如此然立象尽意正类华严以种种表法其含容无尽一也易论世间法华严论出世间法唯知世间出世间等无二法则知二书无差别矣近世学易者以王弼筌蹄之论捐象数故多失圣人之意殊不知得鱼兔然後可以忘筌蹄未得之间岂可遽忘哉唯因象数以求意而不泥则得之矣离羣索居深恨不得讲贯之益也见仲古言公随行有崧老易书果尔告就黄守处借一介送示年运既往矣庶几以此洗心会晤无期惟坐进此道为望

与吴元中别幅【七月二十五日】

见折仲古言公随行携崧老易书故前书就借恐其行缓今托宾守专人致此庶几速得如果有之告就柳守处更借一介同送示幸甚顷在湖外传得崧老春秋集解推究象数殊有工意其易书亦然故窃欲一见之易之妙处在观象知数而今人皆拨置不复道因失圣人之意多矣犹之观天以南箕为北斗考历以二至为二分其所失岂不远哉立象尽意其象具存顾弗深考而数非有所传授不可然亦有可以心悟者此难以笔舌言也古人学易有互体卦变时来俯仰之类皆不可废惟其是而已忧患中读易时见一斑辄着其说以为之传又作释象训辞明变类占衍数五篇以解剥易体庶几成一家言文多未果致左右更欲得崧老书以参订之异时或得生还可藉手以见也

梁谿集卷一百十二

卷一百十三

钦定四库全书

梁谿集卷一百十三 宋 李纲 撰书六

雷阳与吴元中书 再与吴元中书

雷阳与吴元中书

某顿首啓元中观文相公大孝服次近者使还上状计已尘浼伏被八月二十五日所赐教墨窃审迩来动静胜常感慰无谕秋暑未阑信後伏惟孝履支福蒙诲谕华严宗旨所以与易同别者久逃虚空而闻昆弟亲戚之警欬慰可量也然则书窃谓易象正类华严以种种表法含容无尽世间出世间等无差别与来诲有未合者试毕其说华严以一尘含法界易含容无尽此固二书妙处不约而自合者至易之立象以尽意华严之托事以表法则所谓一尘含法界而含容无量者乃存乎其中二书立象表法以示人正为此事恐不当析而为二也华严法界不可穷而易断自乾坤以下本无二理世间出世间亦无二道何以言之易之卦以八周其立象皆八华严之方以十圆其表法皆十乾以三奇而尽天下之刚健坤以三耦而尽天下之柔顺六子亦然故天地万物之情无不摄總於八卦者重而错之而其象遂至於无穷此即华严法界之互相摄入也夫以不可穷之法界而视乾坤以百千三昧法門而视易简其不相侔可胜计哉然一为无量无量为一小中现大大中现小法界之成坏一沤之起灭是也乾坤之开辟一气之盈虚是也宝刹现於毫端一法周於沙界远则不御不亦大乎迩静而正不亦小乎此乃所谓一尘含法界而含容无尽者也岂有大小多寡之异耶易以卦为时其在华严则世界也易以卦为才其在华严则法門也华严法界自香火海建立如倒浮屠递相围绕其说至於不可说然不离於十方华严法門自十波罗密建立为十信十住十回向十地有百千无量三昧法門然不离於十位易自乾坤建立而为八卦自八卦重而为六十四卦其时其才差别不同而本之者八而已占筮之法自一卦复变而为六十四步历之术自爻策推之其数相乘有不可胜言者此易之书所以配华严之无穷也尝观十处九会虽升诸天宫说法而不离普光明殿虽普现羣生前而常处菩提会每会必有十方法界诸佛菩萨同一名号来集作礼同一威仪慰谕称讚同一言说乃至所事之佛所从来国无不同者此何理耶譬犹镜镜相照光明交处其中妙影重重相入无有穷尽是故百亿天地即乾坤也百亿日月即坎离也百亿山海即艮兑也陰极阳生君子道长佛世出也阳极陰生君子道消佛灭度也刚柔相推以生变化世界生灭相因依也六爻周流循环无端万物轮回互高下也由是言之华严法界与易之乾坤诸卦岂有二理哉尝观善财之入法界徧参五十三善知识童男童女外道仙人医卜船师无不求也妙高之峯海岸旷野城邑聚落无不至也文殊导其前普贤示其後弹指而楼阁开摄心而佛境现其表法之意微矣然所以为菩萨道行菩萨行者则不出诸波罗密等法而已六十四卦善知识也君子观象善财徧参也卦之象无所不取而君子观之无所不法自强不息积小高大非精进乎自昭明德作事谋始非智慧乎反身修德俭德辟难非忍辱乎称物平施施禄及下非布施乎惩忿窒欲慎言语节饮食非持戒乎立不易方言有物行有恒非禪

定乎教思无穷容?民无强茂对时育万物所谓慈也议狱缓死明慎用刑而不留狱所谓悲也饮食燕乐朋友讲习所谓喜也独立不惧遯世无闷所谓舍也成卦之象皆出於乾坤君子观象皆得於易简易简而天下之理得矣由是观之华严法门与易之易简诸法所谓世间出世间岂有二理哉系辞论八卦必妙之以神八卦者菩萨也如所谓文殊小男普贤长子之类是也神者佛也如所谓毗卢遮那之类是也生生之谓易一陰一阳之谓道陰阳不测之谓神犹佛之有清淨法身圆满报身千百亿化身之类言之异也八卦用事而易无作诸菩萨说法而佛无言散佛之体则文殊得其理普贤得其行观音得其悲势至得其智合之则佛也散易之体则乾得其健坤得其顺六子得其动止?两说入合则易也神无方也易无体也佛身充满於法界无不在无不为也无芥子许孔中无虚空无一尘中无佛身翺飞蠕动皆神之所妙草木缕结皆易之所存反而观之则大千法界与夫天地万物皆在吾方寸之间故孟子曰万物皆备於我矣反身而诚乐莫大焉楞严曰一切世间诸所有物皆即菩提妙明元心心精徧圆含裹十方反观父母所生之身犹彼十方虚空之中吹一微尘若存若亡如湛巨海流一浮沤起灭无从此心地法门也为易之说则曰复其见天地之心乎以此洗心退藏於密吉凶与民同患为华严之说则曰当观法界性一切唯心造善用其心则获一切胜妙功德心静而明廓而大虚而通寂而灵建立万法为之主宰而常患物蔽之则明者暗大者小通者碍虚者顽所以操存而舍亡也故易立象以含容无尽华严表法以一尘含法界皆以其本来所有者示之非能与其所无而增其所亏也体此道者莫若诚至诚则不息不息则悠久悠久则博厚博厚则高明故曰唯天下之至诚为能尽已之性能尽已之性则能尽人之性能尽人之性则能尽物之性能尽物之性则可以与天地参此致其诚而天地万物得於一心者也昔之发无上道者自十信始故曰信为道元功德母长养一切诸善根断除疑网出爱流开示涅槃无上道由此充之为十住十行十回向十地成等正觉犹育孩稚以为成人养根萌以为成材其骨节枝干初已具足充大之而已其悲愿之深勇猛精进为羣生入诸恶趣受种种苦心不退转而况死生祸福毁誉足惊怖动摇之乎故能出入三界游戏十方於梦幻中而作佛事此致其诚而华严法界得於一心者也二者皆不出於心法故吾侪之所当自事者心而已了此则廓廓然更有何事夫法华之喻非不表法也然不若华严全体表法之圆诗之比兴非不立象也然不若易之全体立象之周故窃谓二书圣人以之立教於中国佛以之立教於西方其揆一也然易之教渐穷理尽性以至於命华严之教顿直以白牛之车接上根者故易之教洁静精微由域中以趣方外华严之教广博妙严由方外以该域中此其不同者而其归一也两被来教皆有不复措意儒术之语初固疑之今乃知以世间出世间法判而为两之故也夫昼之所想即夜之所梦生之所履即死之所为春之所种即秋之所获所以处世间者即所以出世间者儒释之术一也夫何疑哉神通妙用在运水般柴中坐脱立亡在着衣吃饭中无上妙道在平常心中愿试思之常爱合谕辨博条畅无所拘碍然绳以法度得不谓之凿哉孟子曰所恶於智者为其凿也如禹之行水行其所无事也如智者行其所无事则无恶於智矣夫所以恶於凿者谓逆理也顺水之理而凿之使通何不可之有禹导河而凿龙门决汝汉排淮泗其所凿多矣今濒江诸山陡隳其半石壁巉然皆禹凿之余唯顺水使就下而趣於海故能锡玄圭而告成功使如近时凿三山以制河於两股之中则真所谓凿者也若合论者其言顺理乃所谓无恶於智者宰予之对社木孔子所以深责之者非特以强为之说而已正为使民战栗失周家忠厚之意二者皆因来谕故及之不知然否承录示襄陵易传重烦颐旨感愧兼深近得崧老六月间书第录寄乾坤两象及诸卦大象今遂得全书观之慰幸何已顷见其所着春秋集传辞

意简古如嚼橄榄?久方有味意谓羲书亦然今乃文采瓌丽旨趣明達引类释义其言放肆该洽如河汉之无极殊出意表乃知思精而才高卷舒雕璞无不可者正当於古人中求耳虽未暇深考然领略其大意卓然高识发明圣人之旨者博矣异时昭耀决不磨灭诚如所谕然犹有间然者惜其求於大象者太深而求於彖爻之象者未备也大象未明一卦之体有实然者天行健之类是也有假设者天在山中大畜地中有山谦之类是也君子法之有取其义者有因其事者有随其时者有顺其象而法之者有反其象而法之者不可以一槩论反其象者正犹华严淨行会一切不善法皆为善法此睽之所以同而异明夷之所以用晦而明也云雷为屯之象君子以经纶规模所以济屯而已若以经象云纶象雷则不可山上有雷为小过之象君子以行过乎恭丧过乎哀用过乎俭三者皆过於所当过者而已若求诸雷山之象则不可凡此之类皆求之太深者也象以言一卦之才爻以言六位之情有是象则系之以是辞拟之而後言非苟然也象之象有取正体者姤之女壮晋之锡马蕃庶之类是也有取互体者蒙比之筮大畜之不家食之类是也有兼取正互体者屯豫之利建侯涣萃之假有庙之类是也有取卦变者井之改邑不改井噬嗑之利用狱之类是也有取时来者临之八月有凶复之七日来复之类是也有取卦爻者中孚之豚鱼小过之飞鸟之类是也孔子於噬嗑言颐中有物於鼎言鼎象也以木巽火烹饪也於井言巽乎水而上水於小过言有飞鸟之象皆一见之使学者比类而思焉其实象辞或事或物莫不有象也爻之象有一爻之辞而兼五爻者若比六五王用三驱失前禽邑人不诫是也有兼四爻者若解之九二田获三狐得黄矢是也有兼三爻者若师六五田有禽长子帅师弟子舆尸是也有兼二爻者若姤之九五以杞包瓜是也有相应者若睽之厥宗噬肤遇主於巷之类是也有相比者若丰之遇其配主遇其夷主是也有取正体者若鸿渐于木射雉一矢亡是也有取互体者若晋如鼫鼠用史巫纷若是也有兼取者若鸟焚其巢系于苞桑是也有取卦体者若颐损益之龟大壮之羊剥之牀是也有取卦变者若无妄之不耕获不菑畲巽之先庚後庚丰之见斗见沫是也有取爻之刚柔者若豫有艮体为介于石而困之刚爻亦为石节有艮体为不出门庭而同人之柔爻亦为门是也有刚柔之爻兼取者若革之九五颐之六四皆为虎遯之六二革之初九皆为牛是也时物不同唯变所适虽取之非一端其实爻辞或事或物莫不有象也顷尝疑观盥而不荐当作沃盥之盥谓其致洁诚以先之也及考诸象乃知为裸鬯之裸盖卦体有裸鬯之象其二体坤巽巽入也坤地也裸鬯入地以求神於陰所谓臭陰达於渊泉者也裸灌盥其字通用见於小学是以知欲定象辞不可不求於象也又尝疑姤九五以杞包瓜杞之象在四谓初刚柔正应也及考诸象乃知象在九二盖二居巽体巽为木木之坚忍而体卑者杞也柔生於下如足蔓之瓜以杞包之使得所附而不高则柔道牵而不长以之者五也故为以杞包瓜方姤之时其权在二其患在初故羸豕也鱼也瓜也皆初之象也金柅也包也杞也皆二之象也使二能制初则刚柔相遇常为姤而已不能制之柔道浸长而变二之刚四阳皆为之遯然则杞之权安得在九四哉故二为包有鱼四为包无鱼为是故也是以知欲定爻辞不可不求於象也今考崧老之说亦以盥为致洁以杞在九四则误矣凡此之类皆求之彖爻之辞未备者也然区区妄见有与说易者不同而独与崧老合者如渐上九鸿渐于陆之类是也有大同小异者如中孚之豚鱼吉之类是也鸿之为物以知进退为义进至于陵极矣故复渐于陆者以退为进所谓进退可度也故其羽可用为仪吉在象则下艮为陆上巽为进退是也而说者唯求进义至欲改陆以为達不亦过乎崧老虽不取象而亦以为退之渐者以义得之也中孚成卦二陰偶於中四阳周於外盖有胎卵孚保之象胎生之多者莫如豚卵生之多者莫如鱼故其象为豚鱼吉者圣人

仁心感物及於胎卵其政则所谓不麝卵不杀胎取鸟兽鱼鼈必避其孚乳之时是也崧老之说谓中孚有伏卵之象得之矣而谓三之象为豚四之象为鱼则非也方欲参订以崧老之是者正此之非而以考於象偶有得者亦以告之庶几有以互相发明也夫易者象也象也者像也犹今之像设拟诸其形容象其物宜使观象者有所考焉尔审象而得之如高宗以梦而得传说循名而失之如燕人市璞而得死鼠由规矩以为方圆然後可以议方圆於规矩之外也即陰阳度数以求道然後可以见道於陰阳度数之表也相马者按法式以求之则仪氏?中帛氏口齿谢氏唇髻阙一不可及其至也则牝而黄牡而骊足以得天下之马未能察马之法式而曰我能得马者妄也鱼兔得筌蹄捐淳酎流糟粕弃此为得象者言而非求象者之事也所着释象诸篇方欲即此以求象詎敢自谓得哉然用心则苦矣平时观书常患涉猎多以意读而弗深考偶有所得随亦忘失唯笔削之则说而不通必思思而不得必考沉思博考心醉神开然後得之此训释前言所以不为无补於学也虽然岂敢谓足以垂世哉聊以自娱永日而已易者忧患之书学於忧患之中乃能有得正犹诗之穷然後工也虽不欲示人至於朋友同志亦所不秘也今掇释象中数十条如前所言者录致左右乘暇试观之或有可取不至如宰予之对社愿以一字定褒贬焉其乖於理者亦望一一疏示琢磨之益正望於左右也然窃告勿以它示盖其间亦有未安随得随改者未欲拈出惟并此书能因便风录以寄崧老幸甚时方艰难吾三人者皆羈旅数千里外而书疏往反所论如此书生习气真可笑也互体卦变见於春秋传所载占筮之言其来久矣时来者刚柔相推相文之法俯仰者卦之覆变九师之流各祖述之以自名家皆古法也汉魏间谈易如京房翼奉陆绩虞翻之徒则一槩以象而不及义故其取象迂阔而烦多悖於义因以失象者多矣自辅嗣而降则一槩以义而不及象故其训义不得辞之所指因失立象之意亦不为少二者胥失也孔子赞易盖兼备焉象少义多者欲学者精以思索惟於十三卦制器尚象大振发之者举一隅之意也平时尝疑今之筮者惟用爻辞而彖辞几於虚设又诸爻皆变莫之适从因考古之占法乃知爻有变则从爻辞如陈侯之筮敬仲遇观之比曰是谓观国之光利用宾于王是也爻无变则从彖辞如孔成子之筮卫元遇屯以示史朝曰元亨利建侯是也二爻以上变则从所变之彖辞如穆姜之筮遇艮之随元亨利贞无咎是也如此之类非考则弗获此思学之所以必兼也亦恐欲知故因垂问时来俯仰附着于此信笔作书不觉辞费然公方北归我正南渡自此书问势难数通而况欲窥寻声光耶会晤之期益以远矣故因论易华严之合辙以所妄见者以告庶几坐进此道则虽湖海阻邈未尝不若谈笑於一堂之上其或未然切望镌谕敢不钦承余惟为天下自重不宣某再拜

再与吴元中书

某顿首啓元中宫使观文相公钧席比以尺牋托天游附达当已尘浼道阻且修不果时问动静良深向仰春气清和伏惟燕处多豫钧候万福顷见报得请虽深愜雅怀殊阙士夫之望其於善刀藏之则得计矣区区旅食长乐粗遣羣盜幸王师以次削平更得善後之策闽中可以少安山林间人均受其赐非浅浅也大旆今尚寓龙城否湖南密迩势不无震扰卜居之宜更宜深入思虑为佳崧老闻寄身蛮洞中至今无耗可念可念燕闲何以自适想游华严境界所造益深甚恨阻邈未能一叩关键以释蒙昧便风海示一二幸甚自前年秋还家得与骨肉辈相聚饱食逸居早眠晏起素餐之媿夫复何言第以族大累重未能屏迹深僻随分有人事不

得一意所学如海上时然时从道人野叟游究摄生理颇觉有益石韞玉而山辉水含珠而川媚斯言妙矣居瘴厉之乡尤不可不留意也近文数篇谩录往以资一笑峽南气候不常切冀为国自重遣人还八桂寓此以承兴居不宣某再拜

梁谿集卷一百十三

卷一百十四

钦定四库全书

梁谿集卷一百十四 宋 李纲 撰书七

与陈几叟主簿书 与李萧远郎中书与向伯恭龙图书 与李封州致远书

与萧建功书 与宋景晋待制书

与周元中书 与李泰发待制书与许振叔徽猷书 与秦参政书

与吕相公别幅

与陈几叟主簿书

某顿首几叟主簿宣教执事间违之久每深驰情冬寒伏惟尊候胜常梁谿之别忽忽五年经历变故皆典籍之所未尝有此固平日之所深以为忧者第不谓若此之遽而又一身当之也靖康初见与诸李书独不蒙枉教意以仆在政府故及其冬谪云安道筠袁长沙留颇久去吉为不远亦不蒙一字之辱窃致疑恐有见鄙於朋旧者又思几叟相知素厚设有未然亦当有以教之未应遽踈外也用是恐悚莫知所以萧懋德来辱书所以开谕甚至前疑顿释乃知音问之踈但以近世贵人待仆耳此非所以望於几叟也某迂拙寡与逢时艰难进不能持危扶颠以济国家之急退不能防患保身以为自安之计力小任重不自度量过情之誉暴集无实之毁随至再奋再蹶几至於颠踣而无所容荷上覆照保全使处於江湖善地念恩省咎以感以慙夫复何道第世故方尔天下所望如中立者亦不过奉身而退少伊欲舖其糟而啜其醢一跌而殒盖其难如此可胜叹哉虽然凡此皆天也非人之所能为也追思了翁平生私忧过计之语今日皆效智如蓍龟使人益叹仰耳见示默堂箴碑本使得置之座右愧感无已如仆者动罹忧患正坐不能默耳又欲使之有言其何辞以告辄拾了翁遗意作四絶句以塞来命愿勿以示人也萧懋德远见访愧无以答其厚意风度夷旷趣操端亮不问而知其尝从了翁游也君子之泽能入人深如此见懋德云几叟有欲相过意果然当作书张漕令就提刑司求沿檄幸见报也所欲言者非面不尽正寒千万良食自重不宣某再拜

与李萧远郎中书

某再拜萧远郎中执事顷於王尧明处讲闻甚久愿见未遂每深驰情辱书所以慰藉勤渥佩服无谕凝寒不审动静复何似某?拙寡与适当国步艰难之秋进无持危扶颠之策以副图任之意退无防患弭谤之术以为保身之谋仰荷上恩寬覆处之江湖善地兹者移居澧阳虽使自择不过如此感惧之深夫复何道承海以读易之学厚意何以当之士固有终年同处初不相知亦有未尝会面而意气膍合者与执事初无一日之雅而遽以二书告之非意气相期何

以及此忧患之余正欲以此洗心第鄙暗未能有所悟解愿以深所得者发药之幸甚沔澧相去不远傥得少安继此可以通问岁云暮矣切冀良食自重不宣某再拜

与向伯恭龙图书

某拜啓伯恭知府安抚龙图执事自适岭海不敢复与中州士大夫通问独切怀仰旬日前领所寓临川书专使来又辱教颺感服至意亡已窃审夺哀以从王事还来孝体万福尤以慰浣区区南渡次琼山忽奉德音听还大恩难报第深感涕假道广东以归访家於江浙未知川途通塞何如世故至此痛愤何言闻诸道路长沙仓卒之变微妙手弹压即湖湘间当大扰矣辱垂谕又得其详良以叹服靖康初巨寇临城而奸民乘间作过择情重者治十余辈以故踰月帖然迨有二月五日之变始纷纷劫掠亲持所得内侍家弓刀之属诣行营者一日之间至千余人推倡率者得二十余辈梟首号令余皆叱遣人遂以为好杀殊不知京城持仗为盗法皆当死矧此时耶以法言之乃是所贷者千余人借其首以行吾令者聊复尔耳此意罕有能识者今足下乃能如此岂不真可叹服哉嗟乎诛一以惩万则谓为好杀治兵以自强则谓之主战持此议以御今日之患憂憂乎难矣哉以足下了了於此故漫及之然威信既着之後卻須拊以恩意使恩威竝行何往不济更有一事凡经变故小民必乘时以掠富家不但卒伍而已诛之则不可胜诛不治则啓侥幸乐祸之心其患在後当於事定威行之後置一官司出文榜立期限俾得阑遗之物一钱以上竝自陈纳过期因事彰露为人告发并置之法旬日之间当已山积矣必为二籍有记号者归其主无者以助军费公私两办而小民有所惩此唐人以棘围收华清材石术也足下既办上段此下段不敢不以告顷治金陵叛卒尝以此语守土者而不能行迨今以为恨然又須乘时为之既久则須斟酌耳仆自寓瘴海随行使令者物故过半独父子幸无恙不为瘴毒所染然贱躯得重膺之疾行立皆妨殆为废人矣天幸生还采薇散髮若脱兔之投林今适其时赖足下辈努力为宗社计扞患御侮使得安於丘壑间耳幼年术者谓命似东坡虽文采声名不足以望之然得谤誉於意外渡海得归皆略相似又远谪中了得易传论语说尤相合者但坡谪以暮年仆犹少其二十岁坡儋耳三年仆琼山十日比之差优至坡归以承平无事之时仆归以艰难多故之日则不可同年而语也此行往返先兆甚多皆非人为以此处之粗能恬然海上间亦作诗文以娱但不敢以示人亦无可示者因来谕漫录近所作一卷去亦有韵语一篇奉寄聊发数千里一笑观毕须束之高阁恐有照管不到处且免笺注也元中间通书尚留龙城未有所适崧老今犹寓修水否得舍弟辈九月间书已挈家如浙东亦未有定居此行姑询访就之贵聚今留临江惟挈来长沙在今真觉有累然不必过虑也惠龙焙毛穎甚荷蓬萊香少许漫致海南远意未期合并千万为国自重途次具报不宣某啓上

与李封州致远书

某拜啓致远知郡学士执事都門之別踰一纪矣庚子岁在闽中尝一通问尔後不果嗣音然景向之情不少忘也岁前自海外蒙恩北归次绣江询沿流郡守乃审从者屈临偏壑方欲具尺牋以承动静使至竟先翰墨之辱慰藉之意良厚愧佩无谕新春伏惟尊候多福区区自宣和末以迄于今经历变故皆载籍所未闻所蹈危机亦古人所罕有靖康间事諒已稔闻不复

具道建炎初睿主龙飞首被考慎之选力辞不获则思欲毕精极虑以图报万一而迂愚寡与爱莫助之动辄齟齬自度不足以任天下之责则又遽乞身而去诚以艰难多故之秋非贪恋荣宠之日暨进亟退非得已也後一年竟以人言遂涉鲸波罪衅之深分死海上不归骨中州矣大恩听还实出望外第深感涕与贱累辈相别跨涉四年归心如飞至容南适感疠气又传报江湖间寇盗惊扰纷纷忧愤之深宿疾大作须调治稍安及道路无梗然後敢行尚阻承晤驰情可量敢冀为时自厚前迓光宠草略具报幸察某再拜

与萧建功书

某啓懋德承务执事崇阳之别忽涉三年自适岭海不复与中州士大夫通问久不嗣音然怀仰之情未尝少忘也专人来远辱书翰殊荷眷眷之意且审动静尤以为慰春深还来体气胜常区区南渡次琼筦蒙恩听还出於望外第深感涕海道往返幸无虞岁前行次容南方欲问津五羊渡庾岭由江西以归浙中忽传突骑南牧江湖纷扰道路梗阻不免少留继闻洪抚不守诸郡望风皆下良用骇愕峡江深僻当无兵火之忧想亦随例惊扰今已宁帖否远方殊不闻行在近耗此情可量早晚或取途闽中以归如江西已平静即假道亦未可知世故至此良可痛也录示李先之着述并贶笔墨感戢海上逾年了得易传内外篇及论语详说颇有所发明甚恨未得晤语漫录去一册可以见其梗槩诗二篇聊发数千里一笑须近文并字附三轴去余未暇及何当会面以慰此怀临书增情千万为器业自爱某啓上

与宋景晋待制书

某顿首拜啓宫使待制执事南都之别首尾六年无从通问良积向仰使至伏被翰墨副以长牋辞义粲然所以慰藉良渥感服何已窃审履兹新春台候多福为慰区区无似当靖康初荷渊圣特达之知审观夷狄凭陵中国之难未已愿効微力盖恐桑梓翦为龙荒正犹救焚得受芘赖岂敢言焦头烂额之功耶异意者沮之动失机会谗间百端竟以罪逐其後都城失守銮輿远狩每一念之未尝不痛心而泣血也建炎龙飞首被抡选疎拙寡助自度终不足以副委任责成之意亟丐罢归而喷有烦言殊骇闻听仰赖睿明有以察其无他姑从远斥海峤踰年滨死屡矣既蒙恩宥许以生还又荷湔洗尽复旧秩永惟天地之德何以论报然连年奔走繚络万里深冒瘴氛疲病有不可胜言者近自江东携家以居闽境踰伏深僻庶几少安而还邑羣盗蜂起殊未奠居迫不得已又须远适茫然未知税驾之所忧患之余何以堪之承来诲乃知从者亦因寇攘屡更迁徙嗟乎每读前史当乱离之际抚卷而永叹者不谓身见之也垂示龙德亲笔石刻伏读流涕方议奉迎盖有难其行者所以力请而不顾正欲解纷释疑两宫安则天下安矣幸如所愿而谗夫因以媒蘖且为进身之资所以不能少安於朝者盖造端於此迨突骑临城渊圣感悟知所疑之不然始出耿聶而罢唐恪然亦已晚矣拳拳孤忠天实临之此盖执事之所亲见闻者故敢因海谕辄及皇恐皇恐建昌方扰虽村落间恐非可安之地承欲趣漳泉间甚善亦谋此行第道阻未果姑少迟之耳无官守者何往不可而任责者不然近世以一槩处之可乎未缘承晤临书增怀千万良食自重门中均庆闻太冲寓止相近因见烦道意迫冗上状不宣

与周元中书

某顿首元中贤契执事崇阳之别忽忽涉四年矣自适岭海无由通问每深怀仰已酉之秋尝得李道夫书言足下欲相从於鲸海之上意谓聊复尔耳今奉来教连幅陈义粲然乃知果蹈前约往返数千里冒犯瘴疠间关险阻亦已勤矣虽道途相失荷意之厚何以当之嗟乎仆远谪虽平生亲旧有不复相闻者而足下眷眷於我如此当於古人中求然不免为今人所笑奈何兼审行李已達温陵即日体气胜常为慰仆前年春闻有万安之徙未受命即行夏秋之交次雷阳适海南黎寇猖獗未敢南渡其冬官军破贼乃乘桴次琼筦两日而德音至蒙恩许自便留十日复渡海而北往来皆便风无惊涛之恐岁尽抵容南传报敌骑深入江湖间大扰道塞不可行宿留至春暮得寇退报且知家寓鄱阳属邑幸无虞乃由藤梧康端广惠循梅以趣临汀意欲身留建劔间遣子弟挈家来会适有王 溃军之变不果因自盱江访家於山谷中幸骨肉长少无恙留两月与姻戚会聚始得扶老携幼归寓昭武之泰宁盖乡邑也地僻民淳方且安之偶邻境盗起连破数县环视皆战区势不可处则又冒险迁徙得達长乐才数日耳奔走五年间繚络万里余幸且顽健又蒙上恩悉还旧职近复窃禄宫祠侥幸多矣以足下眷眷於我故详布之自温陵至此六驿愿即命驾见过徐议所适可也在海上了得易传内外篇颇究圣人立象立意之旨冀足下来一观有以订正之行即拚会希慎爱灯下草草不宣

与李泰发待制书

某顿首启泰发知府待制执事久不承动静正此怀仰季弟至自浙西辱书所以劳海良渥慰佩亡谕岁暮苦寒比来为况何似伏惟台候万福区区徙家闽岭虽颇深僻然狗偷鼠窃蜂屯蚁结所至纷然未知得安居否流行坎止姑随缘耳伏承峻陟从班殊副士论临安重寄非宣城比以偏垒尝试之效当方面可为之时宜贤者之所优为去就之谕第恐不能如雅怀也尝爱贾生有言曰为人臣者主耳忘身公耳忘私国耳忘家利不苟就害不苟去唯义所在故父兄之臣诚死宗庙法度之臣诚死社稷辅翼之臣诚死君上守圉扞敌之臣诚死城郭封疆故曰圣人有金城者此物此志也彼且为我死故吾得与之俱生彼且为我亡故吾得与之俱存彼将为我危故吾得与之俱安自古以来未有不如此而能立国者然守圉扞敌之臣所以死城郭封疆者岂徒然哉平居闲暇之时讲明扞守之策内告於朝外施於事在我者尽矣一旦有不虞之患则死之此之谓死职若夫告於朝而不从施於事而不可则所谓有官守者不得其官则去者也岂可顾恋宠禄舍所重而取所轻哉近日习俗颇与此异正赖贤者有以振之耳忧患之余血气益衰痼疾间作不复有意於世扶危拯溺未坠此道非公辈而谁故敢尽告正阻承晤临书增怀千万为国自厚谨启布问不宣某顿首启

与许振叔徽猷书

某顿首拜启振叔提宫徽猷执事虎丘之别迨今五年自适岭海无缘通问第深翘跂季弟还自浙西远辱教贶且闻动静之详感慰无量岁晏苦寒还来为况复何似伏惟台候多福区区蒙恩北归继复旧秩皆出望外慙荷何言秋半次鄱阳初冬携家还乡目前粗安流行坎止姑随缘耳末由承晤敢冀以时自重谨奉状不宣某顿首拜启

别幅

某悚息相别五年之间王室变故土宇分裂生灵流离一至於此念之心折浙河繁会之地闻尽为瓦砾之場田园虽有存者讵复敢保前此不敢自爱愿出一手正惧桑梓剪为龙荒不谓事与愿违虽欲为焦头烂额之客而不可得身蹈大祸几不脱垂涎之口固顾潜然夫复何道见季弟言从者所居幽胜可人意颇安之今日之事犹之棊然宜观局势不当留滞一隅以貽後悔也无官守之责何所不可愿详处之辱爱念及此悚悚某悚息

与秦参政书

某顿首拜啓参政太中台座初夏清和不审动静何似伏惟翊赞多暇神所听劳钧候万福靖康间幸获承晤方事之丛不果欸奉迨今慊然建炎初次南都闻公当朝廷变故之际精忠许国临大节而不可夺随奉銮輿北狩沙漠私窃慕仰未几丐罢机政退藏山林人言?来继谪湖海当是之时南北阻絶意谓无复有通问之期况得窥寻声光耶去秋蒙恩还自海上访家江南闻公脱身敌帐归次行在惊拚交集求之载籍盖亦罕有非忠贯金石神明扶持何以得此念欲具尺牋以通勤拳之意时方挈族如昭武席未及煖羣盗纷起势不得安复徙长乐转侧兵火间无复须臾宁以故稽缓负负无可言者伏承膺受眷知进参大政士大夫交庆而区区之怀至於喜而不寐者正人在朝善类有依公道既伸天将悔祸盖为宗社计也方今天步艰难国势削弱外有强敌之凭陵内有猾贼之纷扰兵骄财匮士气益衰愿公勿滞一隅目前之安而观天下之形势岂不深可寒心哉惟公直谅公忠久孚中外进用廊庙适当国步艰难之秋窃计密侍帷幄嘉言谏论启沃帝心知无不言者故未易缕数窃愿以一言为献者杜子美所谓公若登台辅临危莫爱身而已天下之祸多出於大臣顾宠禄而保身故李林甫荐蕃将帅边利其无入相之资而启安史之乱王黼起燕山之役为固宠之谋而致金人之变事若出於一辙者保身之智周也保身之智周则谋国之术疎许国之诚笃则谋身之计拙二者不可以兼得然自营之私虽若甚巧而身卒不能保者多矣以公灭私外其身而身安者老子所谓非以其无私邪故能成其私者是也公生明偏生暗以公用心则一切法成以私用心则一切法坏故人臣极位以公名之眷注之隆早晚当正钧轴摄念如此天下幸甚区区比年以来遭历忧患伤罹谗谤皆人之所骇闻者自非荷上恩覆察其无他终赐保全则虽欲视听食息於今日岂可得哉自适瘴疠之乡血气日衰志虑凋耗疾病相仍今一臂重痺几不能举恐终为明时废人矣跼伏山林保养余龄志愿止此岂敢复论天下事然在畎亩而不忘君非特激於忠义利害休戚实相与同之朝廷安则天下安天下安则此家此身始有容处以此又未能愒然於心今日之事念之熟矣眷照之素辄敢及之僭易僭易正阻参承敢冀上为宗社善卫生经伫膺大祥以福天下谨奉启布执事不宣

与吕相公别幅

伏审介圭入覲涣号诞敷陞亚保之崇资付冢司之魁柄?惟欢庆平章仆射少保相公秉心克一经德不回励忧国爱君之诚精忠自许膺出将入相之任文武兼资一人眷注之隆四海具瞻之切老成登用中外交欣矧兹衰病之余素荷照知之厚其为忤跃倍万常情辄裁短启以

叙庆贺之意伏幸鉴察昨者率易以拙篇见意方惧冒昧伏蒙不鄙特赐属和句法之工窃用叹服许与之厚何以仰承谨当藏之篋笥永以为好传示云来有荣耀焉不胜感佩之至

伏承垂诲能平内寇然後可以御外侮此言尽当今之要务矣建炎初亦尝以此意具奏以谓盗贼皆吾之赤子调护失所故至於此招抚以为我用其利甚溥光武之用铜马曹操之用黄巾皆得其力然威令不神而徒以区区姑息之恩结之非徒不得为用而患难之兴未艾也是时李昱鸛张於山东杜用窃发於淮右叛兵溃卒蚁结於黎驿鱼台皆去行在无二百里命将四出不旬月间斩馘平殄殆尽其余巨寇以次招降使之渡河故一时盗贼稍遂宁谧者以上意明断而不疑也今江湖间巨寇以十数多者衆至十余万跨据州县如来教之所谕非以宿将重兵临之岂易控制哉州县不得施其政士民不得安其业内不宁而欲求外患之弭难矣愿公为上建明条陈盗贼之当讨者命张韩之流总兵捕逐以次削平其就降者必羈縻酋首分散徒党择其精锐者别命将以统之使为我用乃可自江以南盗贼既平财货可通生民有苏息之期中兴之业可振起也因海谕故敢僭易及此惶恐惶恐

伏承海谕祖宗军旅将佐旧制与近年开端而难继者非诚心体国何以及此不胜仰服自兵兴以来如此之弊不可胜数今少保相公当国洞见弊源正当权之以术销之以渐使得复其旧天下幸甚骤而革之则物情骇矣愿深留意於此然区区之愚窃愿有献者振起中兴之功当以明功罪别邪正内君子外小人为先根本既固则枝叶自茂元气既正则疾病自痊此在公度内而辄敢以告恃照有素且当世务莫急於此也僭易惶恐惶恐

窃观自昔有为之相遭时遇主共济艰难者必先为之规模譬犹大匠之作室门庑堂奥皆已素定於胷次鸠工抡材积日累功而後大厦成书曰功崇惟志业广惟勤功以志崇者其规模也业以勤广则有积累之绩焉所志者小而责以大功固不可得规模既定而欲求效於旬月之间者亦未见其可也建炎之初规模在於两河两河者中原之屏蔽也既失之矣今日之策规模在於淮甸荆湖淮甸荆湖者江左之屏蔽也诃可後哉六朝之所以能保江左者以藩篱在淮甸而荆湘上流皆有强藩巨镇以为控扼李唐所以能都建康者以有淮南其後淮南归於周则有豫章之徙势使然也为今之计保有江左恢复中原莫若以料理淮南与荆湖上流为先命大将总重兵据形势务屯田招集流亡且耕且战外扞强敌内靖羣盗积谷通货养士训兵一二年间藩篱之势成国势既定事力有余然後可以议进取此今日之时务也时变不同而欲以昔之策施於今是犹胶柱而鼓瑟必不可矣周王朴为世宗画策必取淮南者先易而後难也今日欲复区宇必料理淮南荆湖者先近而後远也愿公无以人废言为宗社计加虑於此天下幸甚

闽中自去冬以来盗贼纷扰上四州率皆残破駸駸及下四州矣其原起於范氏盖有为之谋主者包藏祸心有所窥伺待时而发近者狂悖之语形於移文擅起民兵焚掠诸邑迹状显着而官司无敢谁何者自招安以来酋首依旧握兵徒党未尝放散竭一路膏血以养之所费已八十余万未有艾极藉寇兵资盗粮不知此何理也福建为浙东屏蔽通道二广朝廷今日岂可不留意於此程殿撰书中必详具覆此不复覩缕幸冀照察某罪戾之余蒙恩复职出於望外实自陶熔之赐岂胜感惧自居海滨得重腿之疾宿瘴间作齿髮凋耗行步艰难恐不复久

为世间人矣方将餌药扶衰庶延残息以观中兴之伟绩得与田夫野老同受大赐何幸如之

梁谿集卷一百十四

卷一百十五

钦定四库全书

梁谿集卷一百十五 宋 李纲 撰书八

与吕相公第一书 与吕相公第二书 与吕相公第三书 与吕相公第四书 与吕相公第五书
与吕相公第六书

与吕相公第一书

伏奉告命除某荆湘广南路宣抚使顾惟踈拙罪戾之余何以得此实自陶熔推挽之赐岂胜感服窃念某累年忧患异於常人瘴疠所侵宿病间作血气凋耗心志不寧事绪稍繁即觉方寸愤乱近以所居卑湿复得重腿脚弱之疾呼医用药久犹未效使之膺方面之寄节制数路经营羣盗实难勉强必误国事力具奏辞免而近降指挥内外官司不许收接文字悽悽之诚无由上达敢望钧慈矜怜孤迹特与将上敷奏许之罢免使得依旧宫祠寻访医药以养病躯莫大之幸辄以奏状及録白副本纳上

某再被都省劄子敦趣上道又蒙海谕屏去寻常礼数感惧之情良不自胜近年士大夫辞免恩命固有姑以为礼者如某迂疎见於已试诚不足以当委任之重加以疾病医治久未痊愈难以勉强力祈罢免非备礼而已朝闻命夕就道古人有之然皆素为将帅部曲甲兵色色备具故可如此今朝廷起某於闲废之中所降指挥惟得任仕安兵千余人其余条具画一事件辟置官吏差破诸色人应副钱粮起发之类皆不该载虽欲力疾上道岂能办集兼某累年以来遭罹诬谤皆骇闻而难堪者朝廷未曾与辨明而遽使之当阃外之寄尤非所宜提千余疲卒以临数十万盗贼安能有济敢望钧慈矜怜特与敷陈追寝成命莫大之幸况已有福建江西荆湖宣抚今又置此一司似乎重叠节制行遣一切妨碍使州县何以遵禀备礼置之不若不置之愈也荷相公眷念有同骨肉故敢冒昧辄布腹心惟怨亮幸甚情迫辞切皇恐无地

伏蒙垂谕江浙福建盗贼渐次平静惟荆湖巨盗纷纷非重兵不可扫荡必得孟韩二宣抚引兵到彼方能殄灭内寇既除方图外患先後缓急之序诚如钧海所及韩世忠勇而有谋决能办此外议恐朝廷别有使唤去处未必为此行望相公矜念荆湖两路盗之衆不及时讨定其害有不可胜言者惟留意主张毋辍韩侯使副孟参政了此一事为善盗贼既定长沙帅守遴选其人置衰疾者於度外使得且就闲养异时驱策所不敢辞敢冀矜念某再拜

伏蒙垂谕伪齐有不可讨之理不万全不可轻举钧谕及此天下幸甚兵法知彼知己乃可以战如海谕所及可谓知彼矣知己则未也自比年以来国势削弱将士骄惰今方渐有振起之意譬犹病人有向安候正须自养而欲遽与人鬪可乎为今之策莫如自治既平内寇则以料理淮南为先某尝献此於左右矣而料理之说必先为之规摹六朝所以能保有江左者以强藩巨镇布列南淮为之屏蔽也今宜择要害之郡以为藩篱而於督府置大帅以总之以今治

江重兵及荆湖将来招诱之衆分屯营田且耕且战招集归业之民垦辟耕凿幸岁一稔积蓄渐充武备修饬以守则固以战则胜乃可徐议其余此规模先定之说也近年以来深可惜者淮南诸郡多付盗贼以为镇抚使夫建侯於经纶屯难之时固所当为然不因功德而以与不可制御之盗贼责其能布宣德泽於平居无事之时扞患御侮於仓卒变故之际何可得哉今宜渐收镇抚使元系盗贼不得已而付之者如孔彦舟辈优与官职驾驭用之而所领州郡择人为帅渐成屏翰之势乃可立国至於欲有所为则须车马甲兵将佐偏裨纖悉具备粮食财用种种优裕士气已振而又有可乘之机会然後可以议不然则在今国势岂宜更有差跌哉此在相公度内乃蒙下询故敢竭尽其愚伏幸详察皇恐皇恐某再拜

与吕相公第二书别幅

窃覩邸报伏审光膺典册开府建牙兼将相之大权当中外之重寄共惟欢庆都督特进仆射相公精忠许国勲业格天常有亲提虎旅扫除氛祲之心果膺授钺斋坛总督中外之命方今时运将泰国步犹艰必得一代之宗工当王导谢安之任乃能振起中兴恢复土宇是宜断自渊衷特颁异数以千载久废之职付之信臣拱垂而仰成也某久荷眷知之隆幸出指呼之下其为欣拚倍百常情更望益励壮猷茂建殊绩以对扬天子之休命不胜颂咏之至

某疎拙寡与独荷相公倾盖相知意气膺合自经忧患以来尤欲退藏省事不谓过蒙獎借今兹误恩实自推挽岂胜悚佩衰病相仍心力凋耗深恐有误国事辄具辞免仰烦敷陈上恩过优不容逊避特遣中使降赐敦遣益深惶惧迫於天威不敢不力疾上道然瘠朽之质其实无堪已再具奏乞检会前奏特赐罢免更望钧慈曲为奏陈俾遂所请以全晚节不胜幸甚仰恃眷怜谨布腹心敢冀垂念干冒不胜悚惕之至

伏蒙朝廷颁降相公昨任江东安抚大使日陈乞画一指挥许令遵用窃观其间论请兵及乞差武臣总管措置控扼等事可谓周尽事情已比类条具陈请外更有小节未备去处亦已条画申明惟是荆湖两路疆界濶远接连襄汉四川襟带江淮二广为东南上流目今盗贼蜂屯蚁结见数者二十余万非得重兵岂易招捕福建江西荆湖宣抚司将来讨定盗贼之後须还行朝本路分兵屯驻防托要害之地以备强敌非得兵五七万人安能足用今依画一内申请才得二万之数又须旋行踏逐闲废之久亦莫知兵将姓名数目所在姑以耳目所及者陈乞止有八千余人惟岳飞及吴锡韩京吴全数项军马见在湖南依近降指挥合听某节制亦乞拨充前项数目闻岳飞者忠勇持军颇有纪律辄具奏乞依画一陈请差充本路副都总管敢望钧慈特赐敷奏俾从所请不胜幸甚其将来扼控合用兵数尚阙容到本路续条具申禀次

某向者上状辄以荆湘置两宣抚事体相妨仰渎钧听伏蒙垂谕两司不相节制区区之虑正不在此昔唐兵围相州郭子仪李光弼皆在其间而九节度之师所以皆溃者盖以节度不专之故今宣抚两司同在一路招捕贼盗支用钱粮辟置官吏号令军将无缘一一相合朝廷何以责成某已具奏乞许罢免或明降处分将两司职事区分庶几有所遵守不知朝廷之意以为何如伏望钧慈早降指挥施行重蒙垂谕且往二广抚定诸州以俟孟韩回师上荷軫念然事欲求成必先正名名不正而欲济之事不可得也今两司皆是宣抚而兵将多寡事体重轻

甚相殊絕深恐将来虚受其责更望照察有以处之不胜幸甚皇恐皇恐

承都省劄子备奉圣旨令相度由汀道之任已依稟相度具奏朝廷如欲令速到本任措置本路职事莫如自江西?吉以趋衡潭如必欲令取道二广路极迂远三倍於江西又方暑月瘴疠正作而英韶循惠间皆有寇盜其势非得重兵不可以行须就建康?吉等处俟候陈乞踏逐诸项军马齐集乃可前进又曹成一项贼马已犯连贺二广兵弱亦须重兵乃可措置招捕兵力不足未见其可伏望钧慈特赐亮察早降指挥使可遵稟施行

兵行以财裕为先蒙朝廷专委荆湖漕臣为应副而漕臣两员竝不知任已於画一中具奏踏逐到朝奉郎王淮可以倚仗乞差充湖南转运判官又知鼎州程昌禹任内招捕盜賊循拊兵民颇有劳绩近已罢任深虑别差官未必能如昌禹欲乞且存留在任伏望朝廷特从所乞不胜幸甚

比者上状人还特辱宠赐教答诲谕周悉眷劳有加感刻之情无以为谕不审大旆已未起离行阙将来驻师何地如闻少留建康谅惟措画经略已有成筭某窃不自揆尝以料理淮南以为藩篱蓄锐待时之策献于左右更望深留钧意不胜幸甚

与吕相公第三书别幅

不审总统大军已次何地如闻自镇江少驻建康伏想措画已就绪屹如长城尽护江表甚慰中外之望某亦已开司非晚啓行第以疎拙衰病之资辄当阃外委寄之重愧惧之极夙夜靡遑尚冀仰赖庇庥未即罪谴拳拳之怀非面稟莫既万一

某忧患之余衰病日加本不敢当数路重寄咫尺天威临以使命不容退避仰恃相公当轴照亮有素勉就职已於二十四日开司择五月六日啓行种种旋行办集殊觉费力任仕安兵千余人逐急分作三军军数百人不成部伍平时使将带之任固无不可今荆湖二广盜賊如林非得重兵何以镇服又蒙指挥取到广东抚定诸州今曹成一项贼马已破连贺侵番禺其衆十余万除老弱妇女外少壮能战者不下三万人提千余卒岂能使之畏威怀德肯就约束切望相公垂念检会某画一近奏依江东安抚大使已得指挥所踏逐兵早赐差拨如其间已有占破者乞自朝廷别差一项近上统制官自成一军者付某使唤不胜幸甚

得广东报曹成军马已至贺州占据怀集县系广州属邑不数日可至番禺林帅以统兵界首扞御为名不在城中谁与固守势殊可虑得密院近降指挥曹成如犯广南令岳飞追袭掩击深虑势力不敌未能决胜非得韩少师率兵一行恐难制其死命缘广东非福建江西荆湖宣抚司路分乞自朝廷降指挥令不拘路分前去招捕庶几有济某如蒙朝廷差拨人兵齐集亦可自英韶前去以遏其冲与韩声援相接但两司不相节制须得指挥令同共措置为善申都省状论之甚详伏幸加察

申都省状五件恐相公已起离行在别録一本致左右伏望特以一言奏上庶几渊衷取信朝

廷一一应副施行非特某蒙被大赐而已幸冀照察

与吕相公第四书别幅

窃承大旆已起离行阙不审總师今次何地方此隆暑伏惟冲冒跋涉有勤輿卫精忠许国窃计不以为劳也规略之远伫观恢复迄用有成以隆宗社无穷之基以慰四海倾徯之望无缘躬受约束但有瞻跂

某力疾上道已次南劔闲废之久乍总戎律殊非所宜加以剏置一司种种旋行办集尤觉费力以绵薄而当委任之重夙夜震惧不遑寧处数日来髭髮皆白精爽皆耗乃知忧患之余所伤已多不可勉强如此荷照知之厚不审蒙矜念否近具画一申请兵粮之类至今未奉朝廷回降指挥引领望之以日为岁日被密院劄子今处置诸处盗贼亦得荆湖广南州郡文移乞发援兵本司目今得任仕安兵总千余人无可分拨不过行移劄牒备礼而已当职任而无实以称之良自愧忤敢望相公特留钧念无推挽之於前而使之颠沛於後幸甚幸甚

密院劄子有旨令某径诣广东保护本路已依稟迺前赴然曹成贼马侵犯广东近在数程之间而某置司之初总兵上道其去广东远在数十程之外使贼果猖獗安能有及又所将带任仕安兵除輜重火头外结成队伍不满千人纵使奔趋到彼疲乏甚矣以千兵当十万之衆其何以战非得朝廷应副前奏所踏逐兵稍成军容势决未可轻动如蒙敷奏俯从所请遣韩侯行使与某同共措置即由南雄英韶径趋番禺循海潮惠一带势便安枕可以责办军赋会合岳飞许中之兵三道掩击决有可胜之理策无出於此者幸相公垂念近得广东林帅报曹成贼马既破贺州遂犯封连亦闻有就招抚之意虽贼情狡狴不可信仗然因而抚之使果能改过自新夫复何求倘或疑贰俟广东有备因而图之亦未为晚昨日奉密院劄子令孟韩二帅分拨军马应援岳飞会合广西许中兵夹击期於净尽击之是也第恐广东未有备贼逼重兵必乘虚以犯番禺林帅既以提兵防托为名不复城守深虑失番禺则其余州郡望风奔溃为害有不可胜言者今日之策非得韩侯亲提兵以临之未见所以挫遏贼锋保全二广之计某已具奏乞韩侯不拘路分前去与分拨军马意已相合但遣他将不若韩侯自往之万全必待他日二广残破而後遣则无及矣僭易惶恐惶恐

相公都督中外委任之重眷倚隆矣然议者犹谓王导谢安昔居此职初不去朝盖艰难之时斡旋机柄进退人材规模远略以图恢复皆当处中以制外择任将帅如腹心之使股肱乃为得计区区前书所以言相公不可一日去上左右者正为此也其详更托李参议道鄙意幸望钧察僭易悚息悚息

朝廷初议欲以广南财赋经理荆湖所以使某由广南之任者欲令与孟参连避而已今则不然荆湖巨寇反在二广某之此行又令保护与广东元降指挥殊为不同非得重兵其何以济正犹疾病证候既变则所以治疗之者亦不可执伏望相公特为以此意敷奏如蒙朝廷应副使可图尺寸之效虽触隆暑冒烟瘴以赴一方之急所不敢辞也伏幸留念

与吕相公第五书别幅

不审大旆今次何地果於何所置司传报不一皆未敢以为信然顾惟长江表里远暨荆湖尽属部封防秋已迫当使号令络绎於路得以遵稟约束预为堤防以免虞且知大府次舍所寓缓急有所控诉莫大之幸方今强敌未衰僭窃密迹日有窥伺东南之意明斥堠广耳目多遣闲谍以知其情最为急务至於警急之报亦宜密切行下诸路俾得先事为备伏望钧慈特赐鉴念某总师已次建昌南丰本欲取便道赣上为广东之行忽被受金字牌降到指挥以曹成已就招抚令径往长沙之任及催促孟韩二帅措置事宜交割与某讫发赴行在韩侯一行军马就建康驻劄岳飞亦有屯驻九江指挥事体与日前措置顿然不同莫知所谓岂江北之有警故耶孟韩久驻庐陵以时暑之故未曾措置盗贼独曹成一项为岳飞所破余党有就宣司招抚之意未知今复如何其余刘忠李宏杨华雷进杨么锺相残党皆负固自若马友之徒亦未曾放散今名将重兵一旦尽去以二十余万盗贼交割与本司使以所得数千乌合之衆当之其败事必矣辄具奏及申使司乞存留岳飞於潭州驻泊听某节制使率马友以讨刘忠决须成功自余羣盗皆可以次招捕虽二大帅班师未有害也不然实难以虚受重责亦具申稟敢望钧慈留念幸甚幸甚

与吕相公第六书别幅

昨孙宣干行并续差使臣两具竿牍候问记室必获呈浼道途扰扰且苦痼疾不果以时布起居状第勤瞻咏近见邸报伏承有赐环之命及得金字牌降到七月二十五日枢密院劄子伏见签押窃审已还廊庙处中制外深得晋朝王谢总统之意天下幸甚某蒙眷最厚方惧迂疎不胜阃外之寄以速官谤闻命欣跃实倍常情敢冀照察

不审北报复如何士夫见召韩侯之遽物情颇扰然安知其非以虚声扰我正当定以应之耳钱塘固非乘輿久驻之所然在今日未有能胜之者何者江左形胜之地在建康然非料理淮南藩篱已固则建康未可都其次莫如长沙有重湖之险有沃野之饶襟带江淮控引川广接连襄汉异时恢复中原必自此始然累年为盗贼占据州县残破民力凋弊非假以岁月拊循整葺未易就绪目前便於漕运以养重兵舍钱塘何适福建川广皆为无策非计之得也驻驂之地最第一义必定於无事之时有警急然後图之则无及矣某窃不自揆尝草具其说欲献於上以裨庙堂之末议又恐僭易未敢妄发如蒙钧慈许其申陈续当编次缮写以进皇恐皇恐

伏蒙朝廷存留岳飞一军於本路屯驻且令听某节制仰荷钧念岂胜铭佩本路盗贼马友李宏虽已杀捕而其徒党犹存曹成刘忠虽已破败而其酋首尚存至於杨么杨华雷进邓装锺相残党出没作过残破郡县皆自若也岳飞一军终恐不能久留本路而其所得军才及七千人除辎重人从疾患孱弱者其堪出战不过数千人何以镇压两路且为防秋之计惟韩京吴锡吴全三项军马共数千人元在湖南已得旨拨隶本司续有指挥令随岳飞往江州屯泊却令本司勾抽程昌禹下杜湛人兵使唤今昌禹再任鼎州不可阙兵杜湛等自不可勾抽而岳飞复留本路则韩京等三项兵马却合拨还本司已具奏申明敢望钧慈速赐行下所以必

整会於今日者恐岳飞朝廷将来别有差使又欲挟之以行临时艰於陈请也喋喋不胜惶恐

昨蒙朝廷许依相公在江东日画一指挥踏逐差兵二万人数内踏逐辛企宗军马但欲得其兵非欲得企宗也近已交割到二千余人外尚有一千余人精锐军马为福建等路宣抚司择拣勾抽将带往湖南路本司已得旨令数尽拨还累累关送皆不报不知何谓候班师日依旧占恹不遣不免再须干告朝廷盖不得此千余精锐人兵其余皆拣退孱弱者无所用之人又有马百余匹本司诸军全然无马此尤不可辍者先具禀知幸赐钧察企宗以病丐罢欲乞宫观或寻医退亦佳矣已具奏闻敢望速赐施行幸甚

荆湖两路连年为盗贼残破公私匮乏福建等路宣抚司屯兵月余日费钱三十万贯米五万硕公帑既空悉取於民近又科犒设钱二十万贯皆出於潭之诸邑而诸郡所取又不在此数大抵不下百万民不聊生某到任之後竝未有分文颗粒可以赡养军马民间既难复取州县又无见存虽已遣官往二广剗刷道里迂远岂能济目前之急累具奏祈告朝廷乞於江西邻郡拨米五万石钱十万贯应副急阙至今未蒙回降指挥令再具奏乞就袁州拨米顺流良便及其?货物转运司拨钱应副庶几不致阙悞矣仍乞以上件钱米充岁赐之数敢望都督相公以两路为念特赐矜从不胜幸甚近於建康府会到都督相公昨任江东安抚大使日画一指挥数内两项合行申陈一项系朝廷应副全装甲一千副又给祠部五百道变转下诸州制造本司人兵全阙器甲只乞依例给降祠部应副制造一项系於岁赐钱内拨钱十万贯充回易本司所得岁赐钱米通计一岁用度所阙尚多犒设将士之类若非回易决难应副乞依例拨钱十万贯充回易各具奏闻敢望钧慈特赐敷陈期於必从不胜幸甚此等事若非都督相公熟於兵间岂能洞见利害无似遂得依傍至计以免旷失感服何穷伏冀照察朝廷所恃两司者初无彼此而州县诸司种种观望妄生分别殊可笑怪谓如辛企宗一军拨过本司则吉州更不批支钱粮方支衣绢间差拨文字到则更不支給昔人谓廩赐不均其何以战小人之志衣食而已厚薄如此安得不为之动心坐此亡去者数百人皆为他军以钱绢招诱军政之坏未有甚於此时朝廷所当留意也某见所统兵竝未曾支请春冬衣赤露蓝缕无可装着天气尚寒深属不便累具奏乞於吉州封桩上供绢内拨赐二万疋应副支給伏望矜从不胜幸甚喋喋干冒惶恐无地

辄具短启叙谢且致区区之恳意在卒章伏乞特赐钧览矜悯衰病忧患之余难以复当军旅之事奏疏将来到日曲加敷陈必冀从允不胜幸甚然某窃慕古人一日必葺之义在本司一日亦须扶病措置不敢弛懈伏幸照察

梁谿集卷一百十五

<集部,别集类,南宋建炎至德佑,梁谿集>

卷一百十六

钦定四库全书

梁谿集卷一百十六 宋 李纲 撰书九

与吕相公第七书 与吕相公第八书 与吕相公第九书 与吕相公第十书 与吕相公第十一书
与吕相公第十二书 与吕相公第十三书

与吕相公第七书别幅衡州

某少留衡阳候委官葺理诸军营房更数日间即如长沙本路事一面於此措置但州县官吏类皆权掇民户困於科须盗贼仍旧猖獗兵将单弱钱粮空匮殊未知所以料理之说藉使目前极力擘画粗可支吾万一将来北方有警强敌分头入寇不知使之何以扞御中夜思之不寒而栗非敢爱身惟惧无以仰称朝廷委任之意今幸都督仆射相公还归廊庙处中制外洞见万里之情辄敢逐一申陈伏望钧慈特赐矜察不胜幸甚某再启本路州县官吏类皆权掇往往有出於孔彦舟马友之手者因缘科歛与公吏通同为奸皆去其籍不可究治夏秋正税却更不行催纳正税则有簿历拘收难以作弊科歛以军期急迫为辞无籍可考又於田亩上大桩数目不复会计合用之数形势公吏之家例皆不纳所纳皆贫下户催及数分则又住罢其余皆暗卖取受公然入已民力重困逃亡倒户者不可胜计某入境之初首罢科敛严加约束将绍兴元年以前未纳正税与折敷配今年正税却令依限催理庶几官吏可以察治民渐复业伏幸钧察

近蒙朝廷差拨岳飞一军存留本路措置盗贼专听某节制方幸有可倚仗忽闻以岳飞奏报本路羣盗已是静尽却有指挥依旧屯驻九江殊失所望本路盗贼马友李宏虽已杀捕其徒党依旧散漫作过曹成刘忠虽已溃散其酋首依旧拥衆自若近据探报刘忠在岳州境上据胡家寨招集余党及亡命已五千余人董旼以福建等路宣抚司为名招收接引曹成王方自辰沅州前来称十余万人借使虚张人数亦须数万而董旼欲以三百亲兵弹压恐无此理深虑贼情狡狴复有窥伺湖南二广之意所以深欲得飞且来了此一事并其余杨么之徒人数亦自不少措置一两月稍见次第则移屯九江未晚今乃听其憚行欺罔之辞不复核实前命方行後命已改诸将欲自便者其谁不然某恐自此号令不行於将帅矣僭易及此皇恐皇恐

岳飞一军本司累具申奏祈告朝廷方蒙矜从今以飞片纸虚辞即行改命窃恐朝廷所以待大帅与武将者轻重不伦为有识者之所窥测若且下本司体究着实然後降旨似为得体幸望洞察今飞若果已别降指挥不敢再三烦紊朝廷只乞依旧拨还韩京吴全二项军马庶几目前且可支吾不然决难自立兼韩京吴全等以飞强夺其人马有隙皆不愿从之抑使往即复为盗无疑有乞回避状备録申密院并望钧慈本司见管兵二千余人得韩京等军可及万人比元数阙少尚多敢冀垂念得差近上兵官如王 之类一军前来莫大之幸皇恐皇恐

本路州县连年遭盗贼残破蹂践之後又应办大兵钱粮官司空匱悉科取於民间奸吏乘时哀歛民力重困又别无生财足用之道惟是前奏乞依江东安抚大使例拨钱田易及今奏乞於榷货务依广东钞盐例入纳钞面钱般运广西盐赴本路出卖一使民不食贵盐二可抑私贩三收其赢余可以养兵不取於民而用度足皆於朝廷惠而不费又於盐法竝无妨碍伏望相公力赐主张不胜幸甚

本司人兵今年春冬衣赐竝未曾支请赤露褴褛如丐者然天气渐寒深恐逃散者多本路军衣素仰湖北今不复有无可擘画去处累具申奏乞降指挥於吉州封桩绢内支二万疋应副支遣敢望钧慈速赐施行不胜幸甚广西拨马及许全委官收买一事并乞垂念已作此书未遣人使臣自行在还伏被教赐仰荷眷与之厚窃审钧候一成康复下情感慰之至伏蒙垂谕存留岳飞本路出自钧意非都督特进相公练達边事洞见机会何以及此今既复尔必有深不以为然者决难复回若得拨还韩京吴锡吴全等军马贴助单弱之势尚可支吾目前不然何以能立功望相公力赐施行不胜幸甚荆湖虽远然手足之与腹心同为一体岂可遂置度外哉凡申陈事件具劄子拜陈敢冀留念

与吕相公第八书别幅潭州

某留衡阳两旬弹压曹成自径路趋江西幸已出境钱粮之类皆本司那应副斂不及民适马友下溃兵二万余人自江西复入本路连破浏阳醴陵衡山诸县遣人招抚不肯听伏焚掠四出人情惶骇某自衡阳移师衡山与其寨栅相去三十余里夜遣兵将渡江晨扣巢穴贼衆初犹抗拒既知势力不敌遂束手自归除放散老弱外得强壮者六千余人分隶诸将尚有三千余人远去打虏未还然尽得其老小已分兵招捕势须听从入境之初一举幸胜皆钧庇所及湘乡安化间有一项五千余人亦马友之衆浏阳有一项二千余人乃韩世忠下统制官解元管押去李宏刘忠之党至岳阳溃散复此作过当次第遣兵措置将士功状旦夕奏请望赐钧念庶几可以使人先此布悬惶恐惶恐

本路盗贼除马友李宏下溃散人兵外土贼有杨么雷进邓装彭友等数项内杨么最为剧寇拥衆数万占据重湖绵亘千里为鼎澧潭岳数州之患凭恃险阻舟楫之利出没作过官军罕得其便又以妖说惑衆愚民乐从其势滋长虽已遣使臣齎勅榜黄旗招之决未肯听从近得榜文数道词语不逊尤甚非用兵讨荡其患未已议者谓冬深春初水涸之时正可进讨须得水军捣其寨栅逼令遵陆官军乃有决胜之理水军吴全元隶本司近随岳飞往江西见今端闲未有使唤去处敢望钧慈特降指挥令吴全留老小於江西统率人兵赴本司使唤候讨荡杨么了毕却往江西未晚机会不可失愿赐裁处幸甚幸甚

潭州累年为盗贼所据有权通判张揆与孔彦舟马友交通挟贼之势恣为不法权长沙令使臣林之问等为之牙爪科率钱米多入其家公然置买田宅书填官告出卖入已赃污狼籍以钜万计莫敢谁何本路权摄官乘时据攘虽皆有情弊然此两人为之冠舍而不治何以惩奸已行按发付之有司俟狱具即以奏闻其人猾甚且复多金深虑有为之地者伏望特进相公特赐照察候案上取旨重与行遣庶几为奸赃吏之戒不胜幸甚冒昧惶恐

潭州自为金人焚荡之後孔彦舟马友李宏相继占据残破尤甚官府廨舍仓库营房率皆无有城壁摧毁楼櫓一空皆须旋行葺治钱粮阙乏目前养兵犹惧不给民力困弊又难科须而城壁营房仓库廨舍皆不可缓者辄具奏闻乞降祠部紫衣师号变转修造假以时月庶几渐见次第敢望钧慈特赐应副莫大之幸

鼎州程昌禹累年扞御盗贼颇为宣力近见邸报方为朝廷所知然窘急已甚诚难支吾本司已逐急?那三万缗济其阙乏此外非力所及敢望自朝廷特与应副幸甚澧辰沅靖州去鄂渚极远道途又为杨么梗塞不通如蒙指挥令提举兵马盗贼公事听其就近节制责以平贼实为便利并乞钧察

某忧患之余与世寡合不当复出徒荷相公照知之厚推挽之力虽勉来此以衰病迂愚之资当数路兵力之寄决难胜任第以乍到未敢遽然有请止俟过防秋盗贼稍息即丐闲散以从素志素蒙亮察敢布腹心伏幸矜念

本路钱粮匱乏全仰漕臣措置应副侯懋去此几年黄敦书犹未至闻以母老丐宫祠已得请尚未见报孟参政昨在本路差左朝散郎新提举广西左右两江洞公事赵志之权其人实有心计通於财赋敢望钧慈特赐陶铸替黄敦书改差阙已差下范渙却令改替志之庶几仗其材力可以倚办協济国事不胜幸甚伏幸垂念干冒惶恐

与吕相公第九书别幅

月初遣使臣修记室之问窃计已尘钧覽专人至特蒙教赐仰荷眷予之厚伏承诲谕早到长沙尤佩至意某八九月之交少留衡阳弹压曹成出境即趋衡山亲遣兵将招降步谅下溃兵事毕遂入长沙交割将两月矣诸处作过人兵收拾殆尽羣盗稍息民渐归业皆自庇休之赐岂不知幸引领门墙第深依仰之至

某近者辄以衰病不堪阃寄仰瀆钧听复丐宫祠必蒙矜亮曲赐陶铸重念某忧患异於他人诬谤至今未息实不可任军旅之事徒荷相公推挽之力诲谕郑重不敢不行冒暑远涉中涂得疾恐复有避事之嫌未敢遽请今扶持到本路已幸累月赖朝廷威德盗贼渐息归民稍安北方无警急之报可以乞身养痾林薮敢望相公终始其赐保全晚节使进退之际粗有可观不为世所指议莫大之幸恃眷照敢布腹心惶恐无地

与吕相公第十书别幅

比遣使臣上状伏计已尘听覽被受尚书省劄子罢宣抚使荆湖南北广南东西各归逐路帅司已遵依施行绵力薄材得释四路重寄实自钧庇岂胜感幸第元降指挥荆广宣抚司系依相公昨任江东安抚大使画一则例辟置官吏差拨兵将支用钱粮之数今既罢宣司止充安抚未审官吏兵将钱粮合如何措置除已逐急改正司名一面节次具奏听候朝廷指挥外伏望钧慈早赐详酌降下使有所遵守幸甚

荆广宣抚司昨得指挥差兵二万人节次蒙朝廷拨到一万余人自至湖南招降步谅安镇王进等兵拣择强壮分隶诸将已及二万之数上流重地此屯二万固不为多然非藉二广通融应副而以一路残破州县财赋养之决至阙乏今宣司既罢见在兵将未奉朝廷指挥如或存留本路弹压恐须减拨别承差使庶几钱粮不至窘急已具申明更望钧慈特赐裁处不胜幸甚本路作过溃兵多系曹成马友下人某自到湖外九月间在衡阳弹压曹成出境既而移师衡山亲遣兵将招降到马友下步谅安鎮等并老小二万余人十月初次长沙即遣兵讨七星寨王进王俊等招降到王进三千人王俊以二千人逸去侵犯邵州再遣统制官吴锡讨捕杀获千余人余党悉降目今境内作过溃兵竝已静尽一路幸尔寧帖皆自钧庇所及见报朝廷差姚舜明侍郎湖南招收盗贼不知何谓然姚侍郎练达军事雅有帅才某见以衰病具奏复丐宫祠如蒙钧慈即以代某使早得脱此莫大之幸不然鼎州程昌禹亦其人也仰恃眷照辄敢冒昧惶恐无地

前书辄布恳悃仰渎钧听素荷照知必蒙垂念已两具奏闻复丐宫祠以养衰疾今再以劄子浼呈得早赐陶铸不胜幸甚重惟误恩之初蒙喻以朝受命夕引道之义不敢辞难力疾此来今幸赖朝廷威德盗贼收寧此方无警急之报可以乞身进退之节始终其赐实有望於左右也干冒皇恐之至

宣司之罢不为细故两奉教墨皆不及之不知何谓第深惶恐蒙谕孟参尝论湖南北事不缘此否某素辱孟参相照但近因朝廷分拨兵将桩留钱粮不免移文促之又过吉州日韩球并守倅不肯应副钱粮尝勾决人吏造言譖愬闻孟参亦颇云云前书已尝缕布正恐造膝之间有所议论敢望钧慈洞照特赐辨明不胜幸甚恃厚眷辄敢及此悚息之至

总戎之难相公之所谙练今聚兵二万太半皆招降新附之人一旦改司事权尽去钱粮阙乏将士解体官属悉罢独留一衰病书生不知使之何以弹压万一少有变故区区一身不敢自爱但恐有误国事上累相公推挽之力此所以夙夜震惧而不遑也敢望钧慈矜怜特为敷奏俾从所请早得罢免佩荷厚德何有穷已异时有所驱策所不敢辞伏冀垂念

某赐书窃审动静下情感慰之至伏蒙垂谕津置粮米二千硕至鼎州应副徽猷一行人兵已令益阳县桩办自益阳至鼎才三程可以搬运伏恐钧悉某自到本路以鼎州阙乏辍银万两米万硕助之近闻有旨以益阳财赋拨与鼎州长沙诸邑类皆残破目下养兵既无二广之助又失益阳决致穷迫已具申陈敢望裁察防江有备北边无警皆自相公威德所及更冀益究远图以副中外之望

与吕相公第十一书别幅

近遣使臣累修记室之问窃计一一尘浼钧览岁龠将终江北无警中外晏然帷幄所衡宗社允赖天下幸甚更望上体眷注精调鼎茵益究远图茂对光宠以副具瞻不胜愿颂

近承密院劄子催督招捕盗贼某自到本路夙夜究心措置仰赖朝廷威德及将士之力前後

七捷除杀获外招降到三万余人拣汰老弱放散驱虏得强壮几万人分隶诸将此曹皆东北无所归之人纵之使去又复为盗已刺手背团结与旧兵同为队伍逐日训练假以时月当皆为精兵矣目前境内幸已肃清维杨么据重湖之险在鼎岳间彭友邓装巢穴榔?境上马友刘忠溃兵尚有往来出没袁吉界者须邻路会合乃可讨捕已逐一具申禀伏幸钧照

湖湘间累年为羣寇所扰困於科敷民多流徙还来盗贼稍息别无重敛已渐归业田畴悉已耕垦道傍有起屋而居者涵养年岁间可望复旧第控制上流重地不可阙兵养贍兵将钱粮为急恐须上烦朝廷经度耳取过目前何所不可如欲真为控制之计恐非如此所能办也某早晚去此更望相公深留钧念幸甚幸甚某前书辄布恳悃仰干钧听欲复丐宫祠以便衰疾荷眷照之厚必蒙矜从然尚未被命尤窃震恐日来所苦加剧以见总军马不敢在告将理勉强治事实难支吾深虞有误国事为相公推挽之累辄再具劄子拜呈敢望钧慈特为敷奏早赐陶铸不胜幸甚冒昧惶恐某孤拙之迹忧患异於他人此相公所知昨者误恩付以湖广重寄惶惧不敢当蒙上遣使趣行不容逊避又承相公诲谕再三故力疾就职既到本路羣寇满野未敢遽有所请今幸半年间招捕盗贼渐已静尽可以乞身故敢冒昧伏望钧慈曲赐矜从如已差下人亦告指挥催促前来使衰病早得脱此佩荷厚德何有穷已窃冀垂念

辄有少恳干冒钧听荆广宣抚司昨辟陈公辅充参谋官梁泽民充参议官已随司罢讫既误其远来又失旧任殊用自愧敢望陶铸公辅依旧宫祠泽民以本等差遣照劄得付下不胜幸甚劄子谨拜呈伏冀矜念

与吕相公第十二书别幅【正月二十三日】

某屡布诚悃仰干钧听欲复丐宫祠退归山林以养疾衰章上已久至今未闻成命第深震悚顾孤拙之迹素荷知照谅蒙保全使得尽进退之义更望曲赐垂念不胜幸甚

本路盗贼仰赖朝廷威德招捕悉已尽静惟江西袁吉接界尚有数项溃兵出没作过已分遣兵将屯驻浏阳醴陵攸县茶陵诸邑及檄江西亦屯兵於萍乡万载永新等县庶几表里易为招捕管内州县流移之民渐已归业野外田畴耕垦殆徧今岁如得一稔疮痍有可瘳之理此皆相公经纶调燮之效远方幸甚更望益励壮猷振起中兴之业以福天下区区愿颂

近被旨令节制刘洪道解潜程昌禹所遣军马会合讨杨么已檄诸路及遣本司统制官吴锡等由陆涂破其莲塘数寨俘获颇衆程昌禹所遣杜湛亦屡捷第刘解相去稍远恐未必能如期约见剏造战舰渐成次第所乏者水军耳伏蒙垂诲许差崔增一军前来仰荷留念春水渐生二三月间正可深入讨荡过此恐散漫难制敢望指挥早与发遣不胜幸甚某虽朝夕去此本路利害所系不细故敢浼闻伏幸矜察

近得指挥就广西起发军马同讨武冈徭贼朝廷措置诚为尽善广西军马既到本路窃恐亦合依鼎鄂荆南例权听本司节制具状申禀敢望早赐行下不胜幸甚

与吕相公第十三书别幅【二月十九日】

窃见邸报以言者论列有旨特差宫祠不胜震惧重念某忧患余生罪衅深重招致人言不敢自明上恩宽覆未遽窜殛止处之闲地仰戴天地之德第深感涕自非都督特进仆射相公矜怜有素曲赐保全何以得此慙荷之情无以为喻祇俟折彥质到交割讫退归山林杜门屏迹省念愆咎伏望钧慈更赐照察惶惧愧汗不知所云

某待罪湖湘踰半年矣常惧颠覆上误国事今者蒙恩得释重寄慙荷何言所有自到本路招捕作过溃兵盗贼头项人数及见管军马钱物数目开具奏闻并申枢密院敢望钧慈特赐照察不胜幸甚

昨者招捕到步谅翟忠安镇王进王俊等作过数头项溃兵辄以功状上之朝廷顾某虽以罪罢而将士之功不当使缘某而废敢望钧慈矜念特与将士推恩庶几有所激劝不胜幸甚所有後來节次招捕立功人乞降指挥折彥质次第保奏冒昧钧听惶恐无地

湖南诸头项溃兵招捕悉已静尽惟北有杨么而武冈徭人出没作过势颇猖獗虽随宜措置旋创战舰水军及分遣兵将前去应接深虑占据险阻未易扫荡此二事更望朝廷留意一路幸甚

卷一百十七

钦定四库全书

梁谿集卷一百十七 宋 李纲 撰书十

与秦相公第一书 与秦相公第二书 与秦相公第三书 与秦相公第四书 与秦相公第五书
与秦相公第六书

与秦相公第一书别幅

某比者蒙恩有荆湖广南宣抚之除顾惟罪废之余非陶铸推挽之力何以得此第深感惧重念某自罹忧患于今七年奔走江湖岭海之间繚络数万里未尝息肩前年秋归自海上挈族如闽中又值盗贼之扰迁徙不一未尝奠居加以染瘴疔感卑湿疾病交攻无旬日之安而前此遭罹谗谤积忧薰心志虑不宁动辄烦愤使当方面之寄必致乖错以误国事力具奏辞免冀蒙上恩追寝成命而近降指挥内外官司不许收接文字恳迫之情无得而达再四思之惟有干冒仰冀矜察辄以奏状及录白副本纳吕相处伏望留念特与将上曲赐敷陈遂其所请不胜幸甚干冒惶恐之至

某被都省劄子敦趣受命就道及蒙诲谕不必礼辞再三时方多艰宜效古人朝受命夕引道之义感惧之情良不自胜近时士夫辞免恩命固有备礼者然难进之意犹赖此以存至於自知其不可而固辞则与夫备礼者又不相若古人朝受命夕引道如郭子仪高崇文之徒皆素握兵柄部曲将佐车马器械种种毕备故闻命亟行非独忠义所激亦蚤正素具乃能如此今闲废之人色色皆无朝廷所降指挥初得高举兵七千人继即改差任仕安止千余人其余辟置官吏应副钱粮条具画一之类并不曾该载无由施行虽欲力疾之道势不可得况某瘴疔之染已深诬谤之言未白使抱病提千余疲卒以临盗贼数十万之衆安能有所济哉不自量力曳勉以行不过复如向子諲耳某不敢自爱恐为朝廷羞此所以闻命惶惧而不敢承也窃望相公垂情加察朝廷既置福建江西荆湖东西路宣抚今又命某宣抚荆湖广南两司同在一路节制不一行遣不同不知使州县如何遵禀此又大不可者孟韩二帅既次荆湖盗贼平定之後长沙之帅礼宜遴选其人愿且置某於度外使得养痾山林莫大之幸

伏蒙诲示议者欲某有所辟置择委敦朴之佐以济实效李泰发尚书亦以书及此意仰佩眷与良以为愧某靖康中被命宣抚河北河东两路辟置官属如范世雄充参谋官郭执中王以宁充参议官田亘韩瓘邹柄詹大和充机宜梁泽民赵桷赵戡张叔献陈汤求充干办公事张牧黄钺陶恢张光等充准备差遣不过十五六人其余皆因种师道之旧惟以何大圭为掌管文字使掌表章而大圭文人轻俊馆中士夫多不喜之造谤者遂有聚轻脱於河内之语而议者今犹未释是以一大圭而为衆人之累也数年来凋丧之余仅有存者不知衆所指目为谁朝廷今日正当以核名实为先愿相公试博询之有以垂谕某虽以衰病力辞期於得请然承命自改益以知士为难所欣愿也伏幸照察

伏承垂谕朝廷措画之意欲以二广理荆湖渐通京西南北以接陕右规略远也然二广素号瘠薄财赋窘乏加以比年应副朝廷须索尤为空匮而荆湖濶远盗贼繁多养兵赈民恐非通融广中财用所能办济当更益以江西邻近州军钱米庶几可为至於因避患之北人今为寇者诱之归乡自非临以重兵收还权柄择精锐者勒成部伍使听号令有不能也招离散之遗民今羸馁者劝之耕凿自非施以实德蠲减租赋择贫窶者贷以种粮使安田亩有不能也国步艰难之际辅相侍从之臣争任重责而某以衰病之故力辞恩命负罪多矣然陈力就列不能者止孔子取之惓惓之心惟相公亮之而已

契勘某自建炎元年八月内乞罢右仆射职事蒙恩除观文殿大学士提举杭州洞霄宫任便居住乘船欲归常州无锡县居止十月间至镇江府闻有辛道宗下叛兵自秀州作过迺由苏常前来即雇客舟由大江内以归初不曾与辛道宗下叛兵相遇当时某弟从事郎纶在无锡县与知县郗渐商议说谕叛兵不曾焚毁邑屋某是时方到镇江府初不与知言者乃谓某遣弟迎贼倾家货槁设制缁巾数千顶以与之实为不根坐此落职鄂州居住行辞者至引汉弃京房唐诛元载等语以实其事今来蒙恩宣抚荆湖正是盗贼区宇马友曹成李宏杨华刘忠雷进韩京吴锡等拥衆多者十数万少者亦数万人跨据州县递相屠掠自余盗贼千百为羣不可胜计若不宣国威灵广行招诱则何以仰副委使辑绥一方缘有前件人言未曾辨明於今来职事实有相妨又自建炎二年责居鄂州又移澧州感恩念咎杜门循省不见宾客至於世故百念灰冷岂敢复与言者乃谓某资囊士人上书诋訐朝政以图复用非置之海岛使与中原士大夫相絶则朝廷之祸难未已坐此责散官安置万全今来蒙恩宣抚荆湖广南四路当盗贼猖獗民力凋瘵之时若非与贤士大夫相接议论商榷休戚利害而力行之庶几毫髮之补则何以仰副忧勤图治之意缘有前件人言未曾辨明於今来职事实有相妨兼某以病患具奏辞免恩命伏望矜察

与秦相公第二书别幅

某兹者以忧患衰病不敢当荆广委寄之重辄具辞免仰烦敷陈蒙恩遣中使降赐敦遣不容逊避岂胜惶惧迫於天威不敢不受命力疾就道已开司择日起发第伤弓之余惩羹吹虀动辄畏缩宁复有意气可当方面之任加以见病腰脚步履艰难不任兵事已再具奏闻乞检会前奏特许罢免更望钧慈再为将上俾从所欲莫大之幸仰恃眷情叠有干瀆下情悚惕之至伏冀矜察

伏蒙朝廷颁降吕丞相昨任江东安抚大使陈乞画一指挥许令依用已遵稟条具申请外有未尽事件别具画一申明伏望详酌早降指挥内一项依例许踏逐军兵二万人契勘荆湖目今盗贼见数者二十余万上流疆界濶远分兵屯驻要害堤防强敌通四川襄汉声援岂二万兵所能徼布重以某闲废之久不知朝廷兵将姓名人数屯泊去处旋据目前所知踏逐才有八千余人近得湖南关报乃知岳飞吴玠韩京吴锡数项军马近及万人见在湖外依近降指挥并合听某节制已具奏乞岳飞充本路副都总管其逐项所部兵不许他司抽差如朝廷拨此数项充二万人之数亦可时下使唤已别具劄目陈述乞差之意伏望相公取旨特从所乞如有已拨属福建江西荆湖宣抚司兵亦乞依今来所乞拨付本司不胜幸甚昔王翦伐荆非

六十万不可今欲平定荆湖保据形势为长久之策得兵二万实为不多又系依江东许用之例非创行申请敢望照察幸甚某前书略道两宣抚不可同在一路之意未蒙照察吕丞相书中第言得旨许不相节制殊不知正以此为患也易於师之六三言师或舆尸凶又於六五言长子帅师弟子舆尸贞凶舆衆也尸主也六二在师中吉所谓长子帅师六三又以弟子衆主其凶宜矣而使之者在六五故象以使不当言之兵家之忌最在衆主而节制不一唐九节度之师所以皆溃於相州者正坐此故当时李郭皆在其间犹不免此况其余哉某已具奏并申都省论两司同在一路相妨利害颇详伏望相公特赐采览取旨别降处分使有所遵守不胜幸甚某窃原朝廷之意使某取道二广者正欲使两司相避之故然古人必先正名名不正则言不顺言不顺则事不成今荆湖盗贼之多欲宣抚司招捕早见就绪非先正名专任而责成功未见其可伏愿深留钧虑於此非独某之幸也僭易惶恐无地

近被旨令相度由汀道之任因令抚定广东州军比元降指挥增相度二字仰荷朝廷圆融之意不胜感激由汀道以趋长沙比之自江西以往路远三倍又方暑月瘴疠正作恐非将带军马之时其便否则固不待言而知朝廷必欲令抚定二广亦不憚此然英韶循惠间盗贼出没甚衆曹成一项几十万人四月初已犯连贺等州二广兵力素弱吴相昨所聚兵如峒丁之类又闻已皆放散某今所得任仕安兵才千余人安能有济如蒙朝廷尽行应副所踏逐到诸项兵得以统率过岭会合二广之兵控扼其冲节制岳飞等兵袭逐其後庶曹成或有可以招捕之理不然兵不足恃未见其可某非遇事辞难者但事求可济而已伏望相公特赐加察见报吕丞相新除不审此行之意何谓某尝於吕相书中具道未可轻举宜料理淮南自为家计蓄锐待时之意不谓乃尘钧览过承宠谕第深愧感睿主圣德日跻眷倚方隆恢复中兴之业皆在良弼更望益茂远猷以副中外之望

某再拜伏蒙朝廷指挥本路漕臣专切应副钱粮近据湖南吕祉及诸州申一路州县缘累年盗贼残破之後无有全者钱粮种种缺乏漕臣两员孙绶避贼不在本路侯懋与黄敦书对移敦书以母老闻乞宫祠目今本路并无漕臣某於画一申请内乞差朝奉郎王淮曾任湖南漕属颇知一路财计所在伏望朝廷特赐陶铸庶几可以倚办知鼎州程昌禹在任二年讨定盗贼安集归业之民颇见宣力近罢报赴行在深虑别差官未必通知首尾却致误事伏望朝廷特赐指挥令昌禹依旧在任已具奏并申尚书省敢冀钧察

某再拜某虽力疾就道具奏辞免恩命深恐伺候指挥凡百後时已一面申请事件辟置官属之类所由请事皆竭愚者之虑窃望朝廷详察矜从应副辟置官属惟梁泽民邹柄黄镌为旧僚泽民谙练事务柄直谅有其先人之风镌好学有吏材故敢复行辟置伏望钧察某再拜伏蒙垂谕於福建运司及吉州榷货务共拨银钱等仰荷垂念得此方可起发了结目前支费至将来岁计全然未有準拟荆湖两路连年盗贼残破既无财用今又福建江西荆湖宣抚司先到本路纵有些小见在当已一空广南两路自来薄瘠匮乏今又盗贼之警调度百出自难支梧岂复有余可以通融应副吴相昨任广西宣抚使日开司未久遽罢剗刷所得既已不多今又经隔时月当已无有虽已差官前去剗刷势难指拟势须干告朝廷更於江西邻近州军及转运司榷货务等处应副米斛钱银已具奏并申都省伏望钧慈特赐指挥不胜幸甚

某再拜朝廷元降指挥令任仕安将带所部军马随逐前去之任仕安部下元系统领官三人共有兵二千八百余人福建路安抚司已於降指挥之後却将统领官陈照马準下兵别作一项申请存留福建朝廷不见得上项事因已依所乞今仕安所部止有一千三百余人全然不成部伍分拨使用不行虽已踏逐依所降画一奏差又皆在远卒难齐集今福建路已得申世景兵二千余人已具奏乞行拨还伏望早赐指挥施行昔封常清出师军容不整为燕人所窥遂坚从贼之心今某蒙恩除四路宣抚使出师之初止有千人不成部伍安知盗贼无窥伺者窃望钧察幸甚

某悚息再拜新参旧与之往来甚厚去岁同到福唐乃不复相闻疑以建炎初会稽尽放和预买绢尝降两官之故今作书后以谢不敏未知能释然否恐相公所欲知故以浼听幸照察

与秦相公第三书别幅

某开司之初种种旋行办集殊为费力惟是兵将尤为单少权将任仕安下见管军马分为三军每军才数百人前此朝廷建置宣抚司未尝如是盖任仕安下兵本辛企宗统制官一项军马今又以摘其半於福建是朝廷置一四路宣抚使反不及辛企宗下一统制官平时无事使之将带之任固无可今荆湖二广羣寇聚萃数十万人只如曹成一项除老弱妇女外可战兵已三万人不知提此千余兵取道广东果能为朝廷宣威而招抚之否与此名必责之以实深恐虚受天下之责又复颠躋辄敢布露近於画一奏状内乞兵伏望钧慈逐一应副不胜幸甚

近具奏乞依朝廷降到江东安抚大使司画一内一项许旋行踏逐差兵二万人已旋踏逐数项奏取指挥内辛企宗下兵四千余人访问皆已拨散所存无几深虑有失指準缘某闲废之久不知目今兵将姓名数目及屯泊去处伏望朝廷特与差拨或蒙取旨差近上统制官如王之类整齐一军应副使唤庶不误事某忧患之余本不敢受委寄之重徒以上荷圣恩不容避免相公当轴必蒙照亮又所降画一指挥许踏逐添差人兵故敢龟勉就职少图报效更望钧慈矜察幸甚

某自二月初蒙除授中间辞免颇费时月远方皆已闻命如湖北湖南广东州郡往往有书问及公文到来独潭州正是置司之所略无文移虽已令取索接人及应干须知事件亦无报应盖缘马友见拥十余万衆屯泊湘潭其意未必不忌某之来如唐藩镇跋扈遣人代帅往往不纳者多矣朝廷纵使由便道之任非得重兵亦何以镇压使不敢妄作况其余羣盗如刘忠刘超李宏杨华雷进之徒布满境内非兵何以讨捕朝廷目前借以兵力使可施設年岁间措置就绪自可归还正犹小商贷本於大商两受其利此事愿相公深留钧虑幸甚连得广东关报曹成已破连贺进迫番禺帅臣提兵出扞恐但为避寇之计谁可固守极可忧虑朝廷虽已降指挥令岳飞入广东界追袭深虑衆寡不敌未能制其死命非得韩世忠率大兵拦截应援决不能保护二广今韩兵已到荆湖若拘路分其肯前进宜自朝廷降指挥谕以曹成本是荆湖盗贼大兵所迫遂犯广东令不拘路分取便道进兵招捕防遏其冲如能保护二广州县不至残破招捕了当待以不次之赏决须有济某如蒙应副所踏逐兵将之类亦可自英韶进与之

声援相接但两司不相节制须降指挥令事宜相关同共措置乃可军期报应以速为善已具奏乞於内侍省投进文字及用金字牌降付朝廷指挥并乞钧察

昨蒙垂谕以二广经理荆湖此固朝廷置司之意今二广自有寇盗应副军兴已告缺乏与前日事体不同更望钧慈详酌如某前奏乞以江西邻近州县应副钱粮不如此决不能济所以韩侯乞为广东之行非独藉其兵力亦以福建江西荆湖宣抚司剗刷钱粮有余可以通融应副之故若止仰二广恐致缺误并望钧慈某愚拙有素每有所见於申奏之间不敢不尽事情敢冀恕亮

与秦相公第四书别幅【五月二十二日剑南州】

某力疾总师上道已次劔浦诸事草创种种费力加以闲废之久习成踈嬾牵强应接尤非所宜忧畏之余思虑万端连夕不瞑数日须髮顿白遂成衰翁乃知古人每一发兵髮头为白之语端不虚也朝廷艰难之秋傥得效尺寸以报圣主特達非常之遇虽陨首捐軀甚所欣愿第恐縣薄终无以仰副湔洗委任之意夙夜震惧不知所为尚望相公洞察愚悃始终赞成无推挽之於前而使之颠沛於後非独某之私幸也惶恐惶恐某申陈画一及累具章奏乞军马钱粮等事至今未奉回降指挥日逐被受朝廷劄子今措置荆湖广南盗贼及诸路日有文字至本府称为盗贼所扰乞发兵应援河北诸路又以钱粮缺乏日虞变故为言不免坐视叹息行移劄牒为文具以塞白而已何则所得任仕安兵千余人除輜重水头外结成队伍不满千人兵既不足以分拨支降到钱数目不多经由州县类多残破往往缺乏日虑兵食之不继财又不足以赈贍徒有宣抚之名而无其实将何以修举职事仰称任使俯慰人望此某之所震惧而靡遑也伏望矜察

某近得广帅林通咨目及公文具道曹成犯广东界有听就招纳自新之意虽贼情狡狴未可信仗然广东虚弱无兵可以制遏其冲深虑岳飞逼之乘间蹂践其害不细辄遣官齎近降勅榜黄旗金字牌及本司榜文前去广东帅司委林通相度事势差官同往招抚权事之宜不得不然榜文并林通咨目谨録白拜呈幸望钧悉如受招抚之後又复疑贰俟本司军马已至广东会合岳飞及广西帅司三道夹击决有可胜之理今未有备而遽欲逼逐其害甚大愿相公特留钧虑

某已遣官属旗榜等招抚曹成昨日被受密院劄子委福建江西荆湖宣抚司分拨人马策应岳飞及令某径趋广东保护本路分拨人马之意与某近奏令韩世忠不拘路分前去措置之策颇同但遣他将不若韩之亲往为万全耳令某径往保护广东朝廷之意固善但恐不曾垂虑其兵力不足也夫以两司之名同而本司所得兵不及福建江西荆湖宣抚司一统制官欲使提千余兵扞十万之寇保全两路其何以能济愿相公有以处之使稍可施为无巧妇无面之叹虽触隆暑冒烟瘴以副一方之急所不敢辞也惶恐惶恐

某昨依朝廷降到许用吕丞相任江东安抚大使画一内一项踏逐差兵二万人也踏逐辛企宗阎皋等兵未奉指挥今闻此两项人皆已为韩侯分拨前去虽蒙朝廷应副恐亦难以指準

目前别无可以踏逐去处唯刘洪道见将待崔邦弼顏孝恭两项人马见在建昌军以湖北乏粮未曾起发已具奏乞拨顏孝恭下兵付本司使唤庶几就近可以勾抽兼湖北人兵自合听某节制伏望特与应副凡朝廷行下圣旨指挥付某军中乞并用金字牌事势急迫庶几早得办集前已具奏并乞垂念

番禺为广东都会多富商大贾蕃客之家号为富庶在朝廷则市舶香盐所在利尽南海故为盗贼垂涎之地今欲保护广东必先保护番禺帅臣林通以统兵界首防托为名不复为城守计某私窃忧之今朝廷指挥孟参韩侯分拨军马应援当自南雄英韶以趋番禺则循惠梅潮一带州县便有奠枕之势可以责办军赋如随岳飞之後以往则势益偏重下流必受其害愿相公审度续降指挥能令韩侯一行大善不然令以所拨军马随逐某前去听禀节制亦因得藉其军容诸事易为措置已具奏并申枢密院幸望痛察

昨者朝廷遣使讨荡范汝为羣寇瓯闽遂安自此惩创当无复敢有犯上作乱者庙略远矣议者谓建民有杀子之风此乃其报而某独以谓慈孝忠顺本是一法无父子之恩而欲责之以君臣之义难矣作铭一首庶几知者稍革其弊辄以碑刻一本计四轴驰纳左右文辞芜蕪取其意焉可也伏幸照察

与秦相公第五书别幅【五月二十七日顺昌县】

某顿首再拜区区恳悃前书布之详矣仰揆高明必蒙鑒念密院使臣至伏领五月二日所降劄子备奉圣旨令福建江西荆湖宣抚司不拘路分讨袭曹成且令某与孟韩二帅同共措置与某累奏意颇相合非朝廷留念二广事体之重何以及此然古人所以师不踰期役不再籍者以量彼已之势不憚一时劳费之故今曹成徒党之衆非得韩侯亲统精兵一二万以临之恐未易制御淹延时月为害浸广韩若亲行策无以加如只是分拨兵将即乞听某节制已具申奏伏望钧慈照察速赐施行幸甚

某自开司至今才一月色色皆系旋行措置今渐就绪但所乏者兵将耳累具奏请未奉回降指挥昨画一内所乞差者恐有拘碍不知朝廷差拨应副若干数日深恐不足元数有误指準今事势迫矣无缘坐待往复之报伏望钧慈令契勘应副不足数逐急降指挥於江西安抚大使及杨惟忠下摘那数项人兵凑足用金字牌降下庶几就近可以勾抽将带前去所乞拨还马準及差拨顏孝恭军马再具申陈敢乞留察

某所带任仕安兵下老小二千余人甚为累暑月暴露道途尤非所宜今欲自邵武分遣往潮州安泊庶几本路粮饷可办军兵晨夜亦可倍道兼程以趋广东自此无复濡滞去处第俟望朝廷回降指挥以日为岁寻常急递自行在至此月余方到专遣人亦须二十余日又须道路无阻乃可如期今去行在益远深虑报应後时事失机会累具申奏乞以圣旨指挥事件并用金字牌降下庶几速得被受今之余字牌乃古羽檄遗制施之军事实为允当伏望敷奏特从所请不胜幸甚

某亟遣密院使臣回道途间挥汗上状殊不端谨幸望钧察亦遣使臣兵级随逐前去朝廷回降指挥得以付之为幸前路续修问次

与秦相公第六书别幅【邵武发】

某顿首再拜被受御前金字牌递到密院劄子以某奏请韩侯亲统大兵前去广东措置曹成特降指挥孟韩二帅如遣发军马不能尅日殄?大寇即本司自合躬亲前去仰见睿主留神远方俯采葛藟之言如此天下不胜幸甚然犹有愚见不敢不尽陈之窃虑孟韩执本司躬亲前去之文谓当移司则官吏兵将輜重之属尽当随行不唯迟缓有失机会二广之势偏重深恐仓卒色色难以应办却致缺悞不若只令韩侯选择精锐以行量带钱粮轻齎以备缓急乘机以破大憨事毕即还本司最为得策探报韩侯尚在吉州由南雄英韶顺流以趋广东挫遏贼势正便道也伏望钧察僭易惶恐惶恐

某再拜上啓被旨许拨还马準人兵付任仕安仰荷朝廷照察然画一内所乞数项军马未奉回降指挥恐是与画一申请事件袞同降下遂致稽缓广东之行既速唯以军马之集为先敢望检会累奏及今来奏请特赐钧旨摘出画一内踏逐乞差军马一项先与施行仍用金字牌递降不胜幸甚材植办然後可以责匠氏之巧鱼肉备然後可以责庖人之精某虽不才傥蒙朝廷应副粗足有为愿尽死节以报圣主大恩马革裹尸乃素志也伏幸垂察

应本司奏状等皆某亲所草定苟有所见不敢不尽惓惓之忠但恐情有所激辞或拙直伏望相公敷陈之际特赐鑒念幸甚适得荆南镇抚使解潜报桑仲为郢守所杀襄邓间其徒颇猖獗不知朝廷已得此报否今以潜申状纳呈恐钧悉

梁谿集卷一百十七

<集部,别集类,南宋建炎至德佑,梁谿集>

卷一百十八

钦定四库全书

梁谿集卷一百十八 宋 李纲 撰书十一

与秦相公第七书 与秦相公第八书与秦相公第九书

与秦相公第十书与秦相公第十一书与秦相公第十二书与秦相公第十三书

与秦相公第七书别副【六月十七日南丰发】

某师行已次南丰欲取便道如贛上以趋广东忽得金字牌降下指挥令取径路赴长沙新任大暑中得免瘴乡之行早到本路措置防秋莫大之幸然荆湖南路盗贼如刘忠李宏杨华雷进之流大者十余小者未易悉数孟韩二帅以重兵来临久驻庐陵皆未曾料理独曹成一项为岳飞所破余党有就降意将欲了当其余皆自若也今二帅遽有班师之期而岳飞亦有屯驻九江指挥是朝廷所以踰年命将遣兵经营湖外者一旦尽去深虑羣盗乘间猖獗不可复支辄具奏乞留岳飞且於长沙驻劄收拾後段奏疏论之颇详利害甚明伏望钧慈深留思虑特为敷奏俯从所请不胜幸甚

比者使臣自行在还伏蒙颁降到勅劄画一等种种仰烦朝廷应副不胜悚惧第所乞五项人兵惟得辛企宗阎臯两项又有除随逐孟韩二帅外只据见管人数差拨指挥近据辛企宗申阎臯下人兵尽数已为韩帅分拨隶诸军下企宗人兵止是时斲差那前去不曾分拨今企宗见随逐二帅前去湖南欲乞更不勾抽阎臯下人兵外其企宗下时斲差出人兵乞尽数拨还庶几稍成军伍兼韩京吴锡吴全三项人兵已蒙拨付本司今又改与岳飞殊失指準虽蒙拨到杜湛一项已系见在湖北路军马合听节制指準防秋之数辄具奏陈伏望钧慈矜念荆湖最系重地分布控扼全藉重兵目今盗贼衆多措置招捕非兵不可特依所乞将逐项人兵依旧拨还干冒惶恐之至

某昨蒙朝廷降到画一指挥许依吕相旧例差兵二万人依稟踏逐盖为一路防秋措置盗贼之计非欲尽令随逐为广东之行也其後曹成侵犯连贺得旨令前去扞寇保护本路则非得重兵不可故累具申奏及以尺牋干溷钧听今所降指挥既与前日俟孟韩二帅措置盗贼平定日之任不同而防秋之期已迫所得辛企宗张忠彦等兵又各不多其间冗滥尤须拣汰则是二万之数所缺甚衆除乞拨还韩京吴锡吴全外窃见杨惟忠下有兵八九千人胡友毛佐两项军马约三千余人见在袁州驻劄惟忠既已物故未有拨隶去处伏望钧慈拨此两项充二万之数俟诸头项齐集续具少剩申陈庶几有可指準不胜幸甚喋喋干浼惶惧无地某昨蒙朝廷令由二广之任所以不敢惮远者亦欲身

到两路那移财赋为经理【阙】行虽遣属官终非亲临之比加以道路辽远文移动费时月仓卒岂能应用此正所谓远水不足以救近焚也所以前奏乞就江西邻郡应副钱粮正恐目

前缺乏预为之计今蒙朝廷许令福建等路宣抚司候班师日量留用度外其余钱粮之类尽拨付本司须俟见所拨到之数已未足用续具申陈孟参政颇靳於财深恐占愆有悞支準欲乞以本司所奏行下更赐指挥施行不胜幸甚某所奏乞权留岳飞於长沙驻劄了当荆湖羣盗一事夙夜思虑策无出於此者更望相公与参政枢密二公取某申奏所陈事理熟复虑之如蒙特赐采纳曲垂矜从某犹可以待罪阕外庶几尺寸之效以报上恩不然名将重兵尽去而以十数头项剧寇付一书生使以未尝拊循乌合之兵以抗豺虎其败事必矣愿先以疲懦窜谪无令虚负误国之罪他时无以自明不胜幸甚某见自南丰由径路趋贛上听候指挥伏乞矜察情迫辞切特炤知之有素也惶恐惶恐

与秦相公第八书别副

某近次南丰欲取便道以如广东忽被指挥径赴长沙新任遂改途由此以福建等路宣抚司见往荆湖两司同处一路事体相妨又有旨催促孟韩疾速措置湖南事宜交割讫发赴行在韩世忠兵屯建康岳飞兵屯九江与朝廷前此经画之意荆湖目今事宜全然不同具奏疏论列未奉回降今又被受密院劄子有令韩世忠一面遣发军马往建康之文益以惶惑虽窃意朝廷有江北警急之报预为堤备不得已而如此然亦须斟量事势使先後迟速可观不为奸雄之所窥测乃为得体今号令忽遽首尾衡决遣师命将不责成功追之使还不虞後患某未见其可也孟韩二帅自福建讨捕范汝为之後移师江湖踰半年矣值此时暑未曾进兵羣盗猖獗如故刘忠聚舟船以屯君山李宏杀马友以据长沙曹成虽为岳飞所破分为十数头项势益散漫毒流於全部道永武冈之间初未宣司招抚其余杨华雷进杨么郎鍾相残党之流据巢穴出没作过自若也夫以二帅提重兵来临之久所费不貲曾未能破一屯抚定一党籍手以报而遽已召还自历年之所经营者一旦尽废何以震讐羣寇使之畏威救宁遐方慰生灵之望哉二帅之还势固不可止谓宜存留威望已着之将纪律素明之兵弹压招捕收拾後段使不至甚狼狽犹未为失策今并与岳飞一军徙屯他路则某区区愚见不知所以善後矣已具奏乞留飞且於本路驻劄措置盗贼将来沿江有警自可顺流应援一举而两得未奉俞音今再因金字牌递角附奏论之颇详心之精微尽於此矣伏望相公特为敷奏必从所请非独荆湖两路之幸也某忧患之余不当复为世用徒以上恩未报荷相公推挽之力黽勉就职用忘疾惫今兹陈请所系甚大傥蒙矜允虽力小任重已不自量犹可竭尽浅短待罪阕外庶几尺寸之效不然便当乞骸骨以归山林虽窜责所不敢辞诚恐有误国事其敢为身计哉辱眷炤之厚辄敢尽布其腹心伏幸鑒念

某尝谓贾生有言守御扞牧之臣诚死城郭封疆其所以死者岂徒然哉必告所以守御扞牧之计於上言听计从事不成则以死继之告而不从有去而已今人不然初既轻受当告不以告告而不从又不能去敌至则为遯计此近世之大弊也国家不日引不月长而疆场日蹙坐此之故某前幅所陈愿相公勿以为过第以朝廷所以遣孟韩二帅者军马如何财用如何事体如何较之本司灼然可见今一旦委去而以数十万盗贼付之本司使以数千乌合之兵当之安能有济正当以实告于朝廷之时窃望钧慈特赐矜察悉如所请莫大之幸

昨得报潭州积粮数万硕钱万贯意谓可以用近闻马友为李宏所杀尽以钱粮装舩舣岸

城内公私刼掠一空其余州郡皆以屯兵及为曹成下散漫卒伍蹂践类皆匱乏将来到本路目下便缺支遣虽遣属官往二广剗刷卒未能就手其势非得江西州郡逐急应副决见狼狈已具奏乞依孟韩得取拨邻路钱物指挥庶几可济伏望钧慈详酌施行马友者於羣盗颇有知顺逆之意遂为李宏所图长沙遭此又难料理未知孟韩既到何以处之时间虽当牢笼将来须当辨直若以言语及惨酷为罪自有朝廷及宣抚司在何至擅诛也此理晓然更望钧虑处置当则奸雄自服所以消患於冥冥者多矣僭易死罪舍弟三人仲不事事常慕马少游之为人如某者正其所悯笑也叔方委以家事季往浙东亲迎皆不果来故虚合辟亲属差遣蒙询问故详及之如蒙公朝使某有祁奚之举此三人者皆国士也伏恐钧悉

与秦相公第九书别副

昨日因金字牌递角回於申省状皮筒内尝附手询必已彻钧听恐道路或有阻节再令小儿书写拜呈书中所恳存留岳飞一事辞情激切非敢有所要也诚恐孟韩班师之後羣寇蚁结蜂屯收拾不了无以副上委任之意且为相公推挽之辱故敢力布悃悃使荆湖南路盗贼悉已平定王师凯旋犹当留重兵镇压矧十余头项剧寇未尝招捕得一项了当二帅握兵在近李宏已敢杀马友以掠长沙如刘忠曹成之徒决未可以理义说非藉飞威名已着与之協力措置後段定须狼狈此系朝廷利害非特某及本路而已窃望相公详观事之本末而熟虑之机会间不容髮正谓此尔惶恐惶恐某前奏乞令韩侯分兵屯九江而辍岳飞跃驻师湖外深惧僭易冒昧有陈近得韩侯报其意亦以建康为非便愿宣力於江西【以素与彭城不相能恐缓急不相应援及都督府安抚大使之兵萃於彼艰於粮食之故】颇与区区愚见相合彭城屯镇江都督屯建康皆重兵也如韩侯屯九江岳飞屯长沙控扼上流之地似为得策又荆湖因得飞兵措置羣盗以絶後患缓急沿江有警使上下连接势力颇均更望相公有以处之此朝廷大事苟有所见不敢不以告幸冀矜察

某昨具奏乞於江西诸郡支拨钱米应副蒙朝廷割下画一内许截拨荆湖广南钱米都数及许令福建路宣抚司班师日将余剩钱米等拨付本司指挥又蒙海谕不胜感戢荆湖钱米匱乏甚矣得漕司申目今应副宣司及岳飞大兵批请皆是於民间科须又长沙新有李宏之变公私刼掠一空更无分支颗粒可以指準广南虽遣属官前去剗刷道里辽远水路不通非半年间措置未能就手才到本路目前便见缺乏宣司余剩之数亦难全仰已再具奏乞於江西漕司及筠袁?吉等且应副米五万硕钱十万贯以济目前之缺及乞依孟参所得截拨邻路钱米指挥不如此虽许应副亦未必得观刘洪道得米万五千硕至烦朝廷差官监督则可知临时缺乏旋行申请则无及矣惶恐惶恐有自湖南来者闻孟韩至潭州已差李宏充副总管与元系马友下两项人兵只令自行拣择放散余悉依旧存留虽传言未必可信然恐决有此理既得催督班师召赴行在指挥忽忽措置不顾貽患於後自宜如此如偏裨杀一副总管以言语微罪加之便得副总管深恐此风不可长而奸雄有以窥伺愿相公留钧意於此一事如闻马友者颇知逆顺之势有意自新不复为非其徒不乐如此尝以语言动之友不从故李宏得以乘间与其徒相结而戕友不然其谋亦岂遽能成哉如蒙朝廷许留岳飞军马尚可弹压及随宜措置不然未论其他存留徒党之衆何以贍给变故卒未定也幸望钧察

伏蒙垂谕以向子諲代林逋帅广子諲作帅虽未可责备然贤於逋远矣广西更望留念择人今帅府号为东南全盛者独桂广及福唐耳方全盛时轻於畀付及残坏後方欲料理其难易岂止百倍哉程昌禹蒙朝廷许令再任昌禹在鼎州毁誉之者相半想不无过举然两年间倾侧扰攘能破剧贼而保一州人情安之因任诚为得策但其人申请有难应副者某俟到任当镌谕之蒙海荣阳乃江西所荐此固其一流人方建炎初行遣受伪命者江西不在吴莫之下今朝廷颇是前日行遣分判白黑独江西尚在大帅之列议者谓相公以乡里之故颇优容之殆不然正恐不详知建炎初事耳伏蒙朝廷应副辛企宗及郝晟军马仰荷垂念杜湛下八千人初无此数近又有指挥依旧听程昌禹使唤兼鼎州最系要害去处恐难以全行勾抽张中彦四千人最无纪律乌合冗滥见不知存在去处此两项占万二千人窃望朝廷豁除勿充二万之数别听差拨使唤所乞韩京吴锡吴全三项人兵不惟已蒙拨付本司兼据吕祉申韩京人兵随逐岳飞至道贺间飞利其甲马皆择精壮者分隶将下而听其自便此近年诸将习成之态也京缘此悒悒抱病以余卒数百人留茶陵不复在飞部下吴锡人兵亦多散去者吴全则原系水军正可施於重湖若依旧拨还本司非特藉其兵力亦可以全此三将仍得尽数拨还指挥为幸其余踏逐胡友毛佐下三千人更在裁酌施行

邹柄者志完侍郎之子学问节操才识皆过人靖康间渊圣特命以官某尝置幕下其後造谤者亦波及之建炎初除衢倅复以言者报罢坐废六年旅食异方艰窶甚矣近因画一再行辟置而柄以书力辞陈义高而虑患深不欲强之已从其志瓌奇之宝弃掷道傍诚为可惜伏望相公特与收拾置陶铸间必有可观不然且与旧物使有餬口之资以免饥饿亦足矣幸冀照察顾彦成劄子整会奏荐恩泽谨纳呈并望垂念惶恐惶恐靖康初折彦质随种师道至京师议论颇可采自师道军中参谋官除军器监既而除龙图阁待制充枢密院都承旨彦质荐解潜为河东制置使以代姚古彦质亦以本官奉使河东为御前干当公事与潜同治兵於隆德府夏末秋初某宣抚河北河东辟彦质充参谋官彦质只留隆德不曾到军中供职其後七月末间诸将得进兵多爽独解潜彦质以兵万人与贼遇於南北关累战而溃有旨彦质潜皆时勒停某具奏乞且存留收拾溃兵以俟再举有旨潜白衣领职彦质召赴阙议事过怀州留军中者累日某与论节制不专之弊是时刘韜以宣抚副使治兵於辽州折可求以都统制张灝以都转运使治兵於汾州潜彦质在隆德各直达奏事承受御前文字得旨各不同而自为进退既约出兵两路不进而潜独进故及於溃某以谓诸道之兵方集必欲再举非尽罢诸处节制而一听於宣抚司决难成功彦质亦以为然云俟见渊圣当面奏其详既至京师适徐吴以纷争罢相而唐恪当国议论皆变彦质亦尽变其前日之说以合恪某以徐吴既罢内无助者上疏力丐罢去遂有赴阙议事指挥除彦质宣抚判官交割职事时八月末也其後金人再入彦质委怀州自河阳渡河径走陵西以入蜀故建炎初有海外之责

与秦相公第十书别幅

荆湖之盗蜂屯蚁结王旅来临正如以杖撩之散漫螫毒正当徐徐收拾扫除令尽以絶後艰今二大帅班师之遽措置诸事不免草草决须遗患将来非得名将重兵存留镇压何以善後所乞岳飞於本路驻劄及拨还韩京吴锡吴全等军屈指计日以俟报乃寂然不闻俞音岂朝廷多事不暇恤此将思虑颠错谋画弗臧言轻不足以取信而然耶窃自循省慙汗愧缩若无

所容便欲自劾待罪又恐近乎激讦失大臣体正易所谓羝羊触藩不能退不能遂者夙夜震
作靡遑宁处伏望相公矜察检会累奏事理特赐详酌施行不胜幸甚

杜湛军马本自蔡州随程昌禹来今昌禹既蒙朝廷许令再任杜湛决难勾抽兼鼎州实系要
害之地与长沙为屏蔽兵岂可摘张中彦者闻见在番禺韩世忠岳飞皆尝呼之不来本司屡
檄令前来公参至今无一字之报势已反侧恐难以寸纸号令矣前奏已乞豁除此两项别听
朝廷差使见今所得兵惟任仕安辛企宗郝晟共约七千余人企宗下见拨在宣抚司及郝晟
军马孟韩尚占恹未遣憂憂乎其难如此乃知秦应副王翦六十万使伐荆为不易也窃望相
公委曲应副如元降指挥之数使某可以勉收尺寸之效仰报上恩不为推挽者羞莫大之幸
韩京申状吴锡蜡书纳上更望察其情而审处之惶恐惶恐

得湖南漕司报福建等路宣抚司军马屯泊本路已认定月费钱三十万贯米五万硕州县残
破之後罄竭剗刷尚未足备而长沙近遭李宏之变公私钱粮刼掠一空所般载舟船虽尽为
官兵拘截然其间所有必无再入官帑之理是长沙表里皆悉罄匱某将来到任瞻眷军马措
置事宜全然未有分文颗粒可以指準累具奏乞朝廷於江西路支拨米五万硕钱十万贯应
副目前急缺伏望钧慈体察非得此决致误事特降指挥专委江西漕韩球应副不胜幸甚

二广闻以曹成侵犯调发之故一丁至有出七八千者民不聊生观此岂复更有赢余虽已遣
官剗刷正恐如割肉鹭股而远水不足以救近焚也刘洪道犹蒙朝廷应副如某哀祈如此相
公其忍不置念乎

某建炎初尝以十议陈说又尝取汉高光唐太宗行事编年撮其要节目为汉唐三帝纪要録
作序冠篇首以进并议巡幸劄子皆恐相公不曾见辄敢録致几格如蒙机政之暇略赐观览
以见当时议论大?不胜幸甚闻福建等路宣抚司差属官赵康直管押银十万两以羨余献今
月十四日已离吉州朝廷既有指挥令候班师日量度用度其余尽数拨付本司则羨余自不
当献伏望相公特垂钧念候到特赐指挥以信号令天下之幸非独本司及荆湖南路之幸也
僭易僭易

妻弟张焘蒙陶熔记注之选非相公以人材为意汲引寒畯何以得此第深感服顾彦成整会
恩泽劄子前书忘记今谨纳上幸望垂念

与秦相公第十一书别幅【吉州】

某累具奏乞存留岳飞一军驻劄本路招捕余寇良愧冒昧昨日金字牌降到密院劄子得旨
如所请仰荷朝廷应副岂胜感幸如飞年齿方壮治军严肃能立奇功近来之所少得然正当
且使在人下有以调御服习之使知礼义名节异时决为中兴名将若使便当一面骄心易生
适所以坏之近以权安抚之故亦颇有过举吕宪书中能道其详俟续纳呈今既存留本路自
合听某节制更得朝廷明降指挥庶几易为駟策幸望钧察本司蒙朝廷应副到兵任仕安辛
企宗郝晟三项通约计八千人尚缺万二千人蒙指挥令勾抽杜湛张中彦下兵以足其数契

勘程昌禹下杜湛彭筠两项计八千人今昌禹再任鼎澧见有盗贼系要害控扼去处别无人兵杜湛等军马决难以勾抽差拨张中彦见在广州孟韩岳飞皆追之不来本司文移亦不报应桀骜如此急之恐必生变已委向帅令措置经营之兼其下皆乌合泛滥不中使唤乞朝廷豁除此两项之数幸甚韩京吴锡吴全已蒙拨隶本司近降指挥令随岳飞屯驻九江今飞既留本路此三项兵却合归还已劄逐人照会及具奏申明幸望垂念

某所以累具申奏乞拨还韩京吴锡吴全等兵者非敢固有执占实皆有说此三项兵将久驻湖外颇能立功如韩京之破胡元奭吴锡之破李冬至皆为一方之人之所信服吴全本系水军本路重湖奥深盗贼多藏泊其间出没作过如杨么之徒是也所以旷诛积稔者正以无水军之故此三人者各因其材而用之必有可观又缘岳飞强分韩京之兵利其甲马多不安之所分之兵皆已溃去如拨还本司贴见在数成万余人训练拊循庶几可以镇压一方兼岳飞一军存留本路其他亦未敢别有陈请幸望钧察飞元将万二千人今又得曹成溃兵万余数目已多将兵犹将各有分限多多益办者唯韩信为能今将兵过其量者多矣恐朝廷不可不裁处也

适得湖南报韩帅已破刘忠砦栅忠已逸去又一未了当曹成也朝廷指挥既峻二帅必便班师本路公私萧然一空今又添屯岳飞军马钱粮全未有可指準所乞於江西邻路应副钱十万贯米五万硕盖欲接济目下缺乏不尔必致误事敢望矜念非不知朝廷多事势不得已惶恐惶恐

累蒙垂谕孟韩班师日所余尽以付本司仰荷留念然私窃计之恐决无沾丐後人之理今询问得见有银十五万两在吉州委官桩管收余及有?抚州刷到钱米亦在吉州已具状申枢密院乞降指挥尽数截付本司敢望速赐施行不胜幸甚事出急迫殊可悯笑也

与秦相公第十二书别幅

某今月十一日已次荆湖界首交割本路安抚使职事一行军马幸无他虞皆出庥庇第以沿路疾病之故及州县应副夫力多累日而後集师行不无稽滞岂胜惶惧入境之初询问民瘼耆老皆云累年以来既为盗贼之所蹂践又为科需之所骚扰州县官吏类皆权摄假借盗威侵渔百端以故良民多未复业田畴亦皆荒废今朝廷遣兵破贼愿少休息以就生理闻之怛然伤心昔人以兵火之余比之疮痍者正欲勿扰则凋瘵之民将自安耳此事非通才实德爱民体国者未易能办如某叨冒深惧终无以副委任之意夙夜震恐不遑宁处更望有以教督之不胜幸甚

伏蒙朝廷特辍岳飞一军於本路屯驻且令专听某节制仰荷钧念与荆湖之民同受大赐今马友李宏虽杀捕而党与数万犹散漫於江湖间曹成刘忠虽破溃而酋首拥衆侵犯州县犹自若其余杨么杨华雷进鍾相残党作过如故近复攻陷澧州深虑岳飞终不能久留本路某所得兵才七千余人除輜重人从孱弱疾患之外可出战之兵不过数千人杜湛人兵程昌禹果力争以为不可勾抽理势宜然将来未定羣盗欲讨捕则阙兵将欲招纳则乏钱粮何以使

之镇服一方收拾後段以副朝廷所以责任之意所乞韩京吴锡吴全等军及於江西支拨钱粮应副急阙奏疏及尺牘中论之已详敢望少留钧念不胜幸甚岳兵已衆不及此时拨还韩京等军他时别有差使又欲将带以行则申陈无及矣惶恐惶恐

不审北报比复何如士夫见召韩侯之遽人情颇扰第恐彼闻都督之建不能无疑故亦以虚声应我未必真敢深入然彼以其虚我所以待之者可不以其实哉区区愚虑以谓朝廷所得探报皆当密付逐路帅臣使为之备且降指挥令贼入某路则某路为之应援陕西五路所以能抗夏人者正以此策而中国比年为夷狄盗贼之所破坏正以不相应援之故如人左手有所螫蠹而右手不救可乎今江淮四大帅刘光世与李光固不相能而建炎初某尝行遣李回至今其憾不释缓急之际责其应援难矣由此观之置帅使之如手足又在朝廷所以审处之也

驻驿之地宜定於无事之时仓卒迁徙非计之得东南形势惟建康长沙建康料理淮南藩篱之固然後可都长沙兵火之余非假以岁月未易就绪必欲恢复中原必自此路始某草具其说未敢遽献如蒙听其妄发愿与葛尧同尽其愚惶恐惶恐

比到庐陵交割辛企宗兵不满三千人其间多冗滥者势须汰去又以吉州官吏并漕司不支钱粮几半月逃亡者数百人皆为韩军以钱绢招收军政之坏极矣朝廷所当留意措置也此外有吕直李守恭精锐人兵千余皆节次为福建等路宣抚司勾抽今随在湖南近降指挥许尽数拨还累次关送皆不报如班师日尚犹占恠又须千烦朝廷不得此则虽得前兵无益也企宗者以疾丐罢去非惟怯懦难使兼以尝为制置使故颃顽未易屈折不若听其退为佳已备録其状乞宫祠或寻医敢望速赐施行任仕安向在福建杀叶彻扞退范汝为贼衆十数万人保全南劍及下四州以俟宣司之来实立奇功今来随逐来荆湖弹压一行军兵尤为整肃辄具奏闻乞与一合门宣赞舍人以激劝之如蒙陶铸不胜幸甚

某本司元降指挥并依吕丞相昨任江东安抚大使日体例近於建康府会到吕丞相画一内两项合行申陈一项系朝廷应副全装甲三千副又给祠部五百道令自行装造今乞依例只给祠部以诸军甲冑絶少器械亦多损坏势须下本路制造以备使用一项保於支到岁额钱内拨钱十万贯充回易本路残破之甚所得岁额钱米养兵尚缺岁计之半若非回易即犒设诸项支费皆无从出今乞依例拨岁额十万贯回易庶几不至时有紊烦朝廷此皆惠而不费者敢烦钧慈速赐施行累具奏乞於吉州封桩绢内支二万疋充一行军兵春冬衣赐天寒将至赤露蓝缕无以卒岁诚可矜悯坐此逃入韩侯军中颇多若不得衣恐更别有散失窃望垂念某每所陈乞皆不敢多为之数并系不可阙者方敢千告朝廷惶恐惶恐

得张舍人书报有谤某於上前者其言可骇窃料之必某参政也前书已尝具道所以拜闻者正虑其如此然亦不谓以小憾而造大谤遂浼天听其不仁亦甚哉如某人固天下之俊材然无绳墨规矩取其文采不过一翰林承旨耳若乃黼座之前数尺之地非天下贤德君子长者岂可立此近见邸报纷纷此固士夫之所预料必至於此更望相公於汲引之际慎之某横遭诬蔑自非朝廷推究辨明岂能自白前此造谤者多矣朝廷未尝推究而遽行其言在某分上

俯仰无愧岂敢自明然所累国体甚大诗不云乎谗人罔极交乱四国巷伯疾谗至欲投畀豺虎有北诚痛愤之深然欲止之非推究不可采苓之诗止谗之道伏望少留钧念不独某受其赐而已惶恐惶恐

与秦相公第十三书别幅【衡州】

荆湖凋弊之甚盖缘连年为羣盗占据蹂践应副官军钱粮悉出科率州县官员类皆权摄与公吏通同作过应科须钱粮皆无簿历可以稽考於田亩上大桩数目除催纳外其余不催纳者尽是暗卖取受以故民力重困而夏秋正税却不催理事皆倒置某入境之初询究民间疾苦无大於此已将科须一切罢免建炎四年绍兴元年分正税将应干科须与剋折外余数并今年正税并合举催以充贍养官兵之费第民户逃徙田畴荒芜又值秋旱成熟去处不多全藉州县官得人庶几劳来安集渐使复业已一面依所得指挥遴选辟置外深虑部中先有授下人为见料理稍成次第却来赴任致辟置官不安心职事已具申奏乞辟置官已到任去处先授下者到更不放上欲与别辟一般差遣伏望钧慈照察施行不胜幸甚

近蒙朝廷存留岳飞一军本路措置盗贼仰荷特达应副犹未勾回间忽闻续有指挥以飞奏陈本路盗贼并已静尽依旧令江州屯驻殊失所望目今曹成刘忠见拥衆如故马友李宏徒党散漫作过杨么雷进邓装鍾相残党占据窠穴出没自若谓之静尽可乎飞憚於回军辄敢欺罔朝廷理须行下本司体究着实乃为得体今遽已改命使武夫悍卒谓朝廷可欺以自便帅臣不能制其进退恐非计之得也如岳飞果已别降指挥不敢再三烦紊朝廷只乞拨还韩京吴锡吴全三项军马庶几贴助见管单弱之兵可以支梧目前不然决难以自立京锡等乞回避岳飞状备録申枢密院并乞照察比见朝廷行下因福建等路宣抚司奏而奨谕李宏若欲权济一时之事则可以谓正当如此则恐所以听察者过矣马友李宏均为盗贼友据潭州率敛苛酷不为无罪然已受朝廷真命为副总管宏擅诛杀可乎宏既诛友劫掠公私财物悉用船装载岸下适宣抚司兵到故不得遽去谓激於忠义可乎见今马友徒衆不受招抚皆挟此以为言某窃谓非执李宏以正典刑不足以服羣盗之心辄具奏闻愿相公试思之今日紊乱军政莫甚於招诱投换近过吉州辄为韩世忠下看管营寨统领官段恩用利物招收去五百余人虽近因岳飞申明朝廷立到赏格恐不能禁止当坐所招收官庶几有所惩戒併望照察

昨蒙降旨令福建等路宣抚司将勾抽去辛企宗下人兵尽数拨还本司及令班师日将余剩财物尽数拨付本司荷朝廷之意厚矣累关孟参政勾抽去吕直李守恭等九百余人马一百三十余疋并不曾拨还一人一骑班师之日捆载而归并不曾拨到分文颗粒第虚烦诏令枉费文移而已良用慙忤某与孟富文不为不厚前此在福唐亦甚欸乃不知其临利害如此亦闻对宾客言以某陈请之故颇不能平深恐从容造膝又有翟公异之作敢望相公敷奏之间先为及此庶几不能上惑圣聪莫大之幸伤弓之禽何所不虑愿赐矜察伏蒙垂谕张士襄已如钧旨某有合得恩例欲与舍弟文林郎纬陶铸一监岳庙差遣敢望留念惶恐惶恐

卷一百十九

钦定四库全书

梁谿集卷一百十九 宋 李纲撰

书十二

与权枢密第一书 与权枢密第二书 与权枢密第三书 与翟参政书

与程给事第一书 与程给事第二书 与程给事第三书 与程给事第四书

与权枢密第一书

伏审光奉赞书进登宥密之地廊庙得人搢绅胥庆矧兹踈拙雅荷照知欣愜之情倍百常品辄具短啓叙贺伏幸鑒念

前年秋幸於德兴邂逅使旆少欸绪言良以为慰间违忽复许久自藏山林不果通记室之问中间承峻登八座亦稽修庆悚仰之情无以自喻天步艰难非得英伟之才相与協济何以振起中兴之功正人登用善类有依恢复可俟诚为天下贺非独区区之私幸也

某忧患之余衰病日加惟思退藏不敢复与世故今春忽蒙上恩付以荆广四路之寄深虑絀薄不足以仰副委任具奏辞免蒙遣中使降赐趣行不容逊避第增感惧逼於天威已祇受告命就福州开司今月六日起离上道已次昭武闲废之久习成踈嬾乍兹总戎尤非所宜加以前此谗谤之深思虑过当动辄畏缩未知所以能济数日髭髮顿白遂成衰翁良可叹也辱照素厚必蒙矜念有少情恳具别幅伏幸留意惶恐惶恐

朝廷於荆湖置两宣抚司故种种事多相妨前此令将带任仕安所部军马千余人由广东之任因令抚定广南州县但欲令与孟韩二帅相避而已今则湖南巨寇侵扰二广事势危急续降指挥遂令前去措置保护夫以曹成贼马十余万人能战之兵不下三万而欲令以千余疲卒趣往保全广南两路岂不难哉已累具奏乞依近降许用吕相昨任江东安抚大使画一内人数差拨兵将至今未奉回降指挥为今之计非朝廷尽数应副及令韩世忠亲统一二万精锐兵将同共前去措置诚恐未易支梧再有申奏论之颇详伏冀钧念早赐施行不胜幸甚

某踈拙寡与冉奋再蹢滨於死者屢矣仰荷上恩保全以至今日又蒙擦拭録用顾将何以报称万分之一虽触隆暑涉长道冒瘴氛当剧寇其何敢辞今兹又幸人居本兵之地有孝友之张仲知自免於烦言此所以喜而不寐也二相炤察颇深独公巽以建炎初守会稽尽放和预买尝降其两官之故颇不能平去岁同寓长乐不相往来遣人致区区之意亦不报深恐蓄憾未已近作书啓以谢不敏未知能释然否此恐公所欲知故辄以洩闻愧仄愧仄伤弓之禽

惊於曲木伏幸痛察

与权枢密第二书

某顿首拜啓枢密端明台席比两拜书并咨目必已呈洩暑气正隆不审迩来动静何似伏惟神明協相钩候万福某总师已次南丰本欲取径路以趣广东适被受金字牌降下指挥令赴长沙置司又须改途惟是荆湖盗贼之炽孟韩二帅有旨趣令交割班师深惧縣薄无以为善後之策仰副委任夙夜震悚未知所济惟远赖辉芑有以照矚之耳正阻参承敢冀为天下自重朝廷遣韩孟二帅统重兵以临湖湘闻以暑月之故未曾进兵措置盗贼惟曹成一项为岳飞所破有就招抚之意未知今复如何自余刘忠李宏杨华雷进杨么郎鍾相残党凡十余头项剧贼负固自若马友见以十万衆蚕食长沙亦未放散今孟韩得旨催促结絶交割讫赴行在深虑此逐项巨寇非旬月所可措置其势决须留遗後人非得重兵及名望已着近上武臣存留本路措置招捕安能有济辄具奏乞留岳飞就潭州驻劄并乞拨还韩京等三项军马踏逐到杨惟忠下统领官胡友毛佐人兵乞拨充元降画一二万之数凡五状具申密院别副録事目拜呈敢望垂念特与应副不胜幸甚

别幅

今具奏闻及申枢密院事件下项

一状为已遵依圣旨取径赴潭州置司缘荆湖盗贼未曾措置平定孟庾韩世忠恐得召赴行在指挥便行交割乞更赐详酌指挥事

一状乞存留岳飞且於潭州驻劄措置盗贼及拨还韩京等军马事

一状乞指挥孟庾韩世忠拨还时慙差出辛企宗下人兵事

一状踏逐到杨惟忠下统领官胡友毛佐人兵乞拨付本司使唤事

一状乞指挥福建等路宣抚司遵依近降圣旨指挥候班师日除度量合用财物外将其余钱粮银绢等尽数拨付本司不得别作名目占破事

右具呈某再拜

与权枢密第三书

使臣自行在还伏蒙宠赐翰墨劳问有加益叨眷予之渥不胜感佩窃闻朝廷以北报有警颇饬边备樽俎折冲当有成算第区区之意以谓端的探报宜密付沿江诸帅使预为堤防且严行告戒入某路则某路为之援庶几并力合势可以有功如使坐视不救非计之得也特炤僭

易悚息悚息

荆湖连年为羣盗蹂践州县悉皆残破官吏类多权掇民户困於科须田畴荒芜财力空匮殊未知所以为拊循料理之术自非朝廷寬其銜勒洞照惴惴凡所陈请一一矜从则何以使之自试而收尺寸之效辄有十数事皆目前急务申奏取旨敢望钧慈特赐一言之赞两路受赐非浅浅也辄以事目具劄子拜呈幸冀垂念近蒙朝廷差岳飞在本路措置盗贼被受劄子未旬日间已别有指挥如止坐飞奏而改命恐武夫不复可号令矣本路盗贼初未衰息马友李宏虽杀捕其徒党散漫作过曹成刘忠虽溃败其酋首拥衆自若杨么邓装杨华锺相残党据巢穴出没如故飞乃以为静尽可乎朝廷不加体究遽从其言非计之得也既已如此不复敢再有请但乞存留吴锡吴全韩京三军共五千余人庶几可以支梧目前不然决难自立敢望钧慈特赐矜从速与行下幸甚

与翟参政书

昨者流寓闽粤幸大旆先止三山亟欲造谒以叙积年间濶倾仰之素客或谓执事以建炎初故颇不释然又方谢絶宾客逡巡而未敢尽诚恐将军有意督过之也羣寇继作迁徙不常居无何执事已趣装赴召竟不获彻声闻于典谒者每一念之慙汗无地近辄修尺牋少谢不敏伏蒙诲谕郑重眷与之情溢于辞翰既恨为小生所误又愧以区区鄙陋而窃量君子之心也已幸贯过敢不改事桑榆之收期无负於古人耳伏冀恕察某初得旨由广东之任以孟参先至荆湖两司不可同在一路之故非有他也继以曹成猖獗乃有保护二广置司扞寇指挥触隆暑戴星而行已次南丰忽奉金字牌降旨令径赴长沙新任且趣孟韩二帅班师韩兵屯建康岳飞兵屯九江事变如此岂江北之有警耶荆湖剧寇十余项衆数十万独曹成为飞所破残党有就招抚之意余皆未曾措置负固自若今重兵名将一旦尽去不知何以为善後之策某辄具奏乞留岳飞驻劄长沙率马友以讨刘忠以次招捕余盗万一沿江警急顺流应援未为後时岳飞留则二帅可还二帅还某乃可到任交割措置事势不得不尔奏疏论之颇详望参政试取阅视更与右揆熟议速降指挥幸甚幸甚

伏蒙垂谕种种悉如所请应副仰荷眷念今日之事惟兵将钱粮为急画一内丐兵五项独得辛企宗一项兵企宗谬懦无取祗藉其兵颇精锐近闻兵之良者皆为韩侯取去殊失所望数日前被受密院劄子拨到韩京吴全吴锡三项军马不旋踵复差与岳飞虽蒙却拨杜湛下人兵填补缘湛已系湖北听节制之兵初无所益此朝四暮三之说也已具奏乞拨还逐项及再行踏逐杨惟忠下两项军马敢望垂念本路钱粮固已缺乏幸朝廷许令福建等路宣抚司以余剩之数尽拨应副更俟拨到见得已未足用续具申禀次四支所以能运动全在腹心阃外之事朝廷留意乃可庶几尺寸之效惟公念之惶恐惶恐

伏蒙宠答长牋词旨高古数十年来殆无此作钦玩无斁不能释手第褻予过当岂迂陋之所敢当佩服眷意不胜慙感谨叙谢万一仰恃知炤此书更不敢具外啓伏幸恕察

与程给事第一书

某顿首啓伯禹侍读给事台座近累上状当一一呈浼连辱海翰不胜感慕见报有贰卿之除旋闻诸郡方以为讶承喻乃知其详得此月初邸吏申有旨还旧物计已供职大暑还来动静何似伏惟台候多福某触热戴星而行已次南丰本欲取便道趣贛上以如番禺适被金字牌指挥径赴长沙置司得免提兵远涉瘴乡良以为幸第孟韩二帅殊未曾措置荆湖盗贼独岳飞能破曹成犹未了当已有催促班师指挥韩屯建康岳屯九江事体一变且遽何也岂江北之有警耶正阻承晤切冀为国自重湖外盗贼如刘忠李宏杨华雷进杨么郎鍾相残党等十余头项见数者二十余万人小者不可胜数马友以十万衆蚕食长沙虽不甚猖獗亦擅置官吏肆为诛求民不聊生孟韩二帅提重兵久驻庐陵皆未曾措置独岳飞能以偏师破曹成十万之衆残党有愿就招抚之意未知今复如何孟韩遽趣交割班师岳飞亦以所部徙屯他路是朝廷所以遣名将重兵经营两路者一旦尽去令一书生独当豺虎兵既单少又无近上威名久着武臣与之共事何以能济羣盗窥见事势如此又复蜂起其害未艾窃恐诸公思之未熟也但以委任孟韩及遣某由广东之任初意与今来所降指挥观之事理岂不甚明为今之计非留岳飞在本路决无可为之理奏疏论之甚详辄録副本去幸留意详阅因见右揆为力恳之能用此言非惟?拙可以待罪闕外数路实受其赐於国体所系匪轻不然愿挂冠神虎乞骸骨以归山林虽谴责所不敢辞也千万照察朝廷曲留如此莫且少安时艰愿且隐忍以济国事去冬羣贤彙进善类相庆今屈指所存无几矣江北近耗如何忽得韩岳屯兵江上之报初甚骇之徐思尚令疾速措置荆湖事宜交割及韩侯有入覲指挥却似差缓必是有警预为之防也大抵比年多随事支梧初无先定规画有事则遑遽事过则慢弛习成此风欲无仓卒之忧得乎沛国万壽之召出朝廷意否此公伪楚懿亲其操术足以感移心意岂宜在此地耶当明受之际既无大节可称又降指挥召伪楚戚属其礼意之厚虽起伊吕不过如此不知此何意?若以谓尊崇邦昌亲属强敌便须休兵窃恐必无此理不然其意安在恐右揆初不知此一段事愿以白之其所降指挥求於官司可得也僭易僭易

与程给事第二书

近遣使臣至行在尝奉状当已呈浼秋暑异常伏惟台候多福区区已次临川朝夕自庐陵以如衡永第孟韩见在湖南终恐相妨已具奏申明矣长沙马友为李宏所图公私刼掠一空益难料理皆措置稽缓所致也荆湖羣盗猖獗自若未知所以绥靖之方有可以见教幸不鄙外余惟为国自厚前对光宠近降指挥令孟韩疾速措置湖南事宜交割与本司讫发赴行在昨日又得金字牌降到指挥令韩侯一面遣发军马往建康驻劄是否复候措置了当即班师回军朝廷遣二帅提重兵自福建移师江湖踰半年初未曾措置了得一事曹成为兵飞杀败徒党犹八九万散漫於全部道永武冈之间未就招抚李宏杀马友以据长沙刘忠聚舟船以屯君山其余十数头项剧贼皆负固恃衆出没作过自若以重兵临之次第招捕非半年未能就绪而二帅以趣召之故欲以旬日定之有此理否傥江北有警欲韩侯兵屯驻建康以为堤备亦须且留岳飞一军在本路措置收拾後段庶几不甚狼狈今乃并飞军徙屯他路号令忽遽首尾不相照如此宁朝廷未之思乎第追思元遣孟韩宣抚江西荆湖之意及自到荆湖已奏措置了当若干盗贼见今所存若干及本司元被受指挥皆令候孟庾韩世忠措置盗贼了当日之任今乃遽交割数十万盗贼以数千乌合之兵使招捕之果能有济否事节便自可见若从所请留岳飞军某尚敢承当不然愿先以罪去犹愈於将来误国事也愿公特为见右丞相

力道此恳今日之事必求可济非敢有所要也某前奏谓韩侯之兵宜分屯九江得其书亦以为建康非其所便愿在江西宣力镇江刘建康吕皆重兵也江西以韩湖南以岳正得分布控扼之策更愿与庙堂熟计之幸甚幸甚【奏检録去恐欲知本末也】

与程给事第三书

近累上状当一一呈浼伏被六月中书赐窃审动静胜常感慰亡谕秋暑未阑还来台候复何似某已次临江适苦疟痢少留数日调治会马友下溃兵数千人破筠之新昌上高去此祇数十里郡人震恐已遣使臣齎旗榜往招抚之如肯听从须少待其来料理之不然即遂径趋庐陵俟朝廷回降乃如衡湘间北行种种窒碍盖是除授草草不虑始不要终之故今荆湖羣盗云扰余波溢於邻路大费收拾而孟韩二帅遽欲班师重兵名将一旦尽去何以善後马友李宏曹成之徒自己散漫而刘忠者以愿就招抚欸宣司陰为窥伺诱降招纳曹成徒衆万余人势益鸱张如韩侯不利此一项遽引兵以如建康即荆湖之患未艾其余支节徒党之属又不论也累具奏乞存留岳飞且於本路谨守及拨还韩京吴锡吴全等兵且就邻路江西应副钱粮以济目前之缺屈指计日以俟报而朝廷漠然如不闻不知何故岂遂置荆湖於度外而区区谋虑一无足取耶某赋分数奇动多齟齬每愿终老山林不复与世故而今者误蒙诸公推挽牵强至此疾病交攻心剿形瘵自度卒不能以胜任愿上乞骸之章以全晚节行劾奏矣夫鱼肉具然後可以责庖者之精粗材石集然後可以责匠氏之巧拙今物料悉不应副而欲使之虚受重责可乎但以元降指挥令候孟韩措置盗贼了当日之任与今来事势观之不待深考而可见幸为特见秦丞相备言之易所谓羝羊触藩不能退不能遂者正今日之事也余惟为国自重

与程给事第四书

比入湖南境遣人至行在尝拜状必已呈達使臣还辱书赐殊荷郑重之意秋高气清伏惟琐闥多暇台候康福区区少留衡阳先遣葺治诸军营房非晚即如长沙始到本路百事坌集如治乱丝已不胜其疲勤矣目前尚可极力支梧秋冬之交万一边报有警兵力单弱钱粮空匱不知何以为策中夜思之不寒而栗未有承晤之期敢冀为时自厚谨上状承动静不宣

本路积弊在於科须官吏通同为奸皆去其籍不可稽考民以重困入境之初首先罢之郤令州县催理正税以给养兵之费目前虽觉费力料理就绪他时却须见效有数事不免干朝廷降指挥如拨岁额钱回易运广西盐以足民食而抑私贩取其赢余养军皆惠而不费者幸借一言使早降指挥庶几可以趁时措置其余如乞就广西拨马吉州拨衣绢皆决不可缺者亦幸留念岳飞闻已别降指挥章奏累上仅得之而飞一奏即免行事至於此夫复何言但得依旧拨还韩京吴锡吴全三项军马庶几目前粗可支吾不然势决难立闻诸公似以此方为远而当缓殊不知心腹手足同为一体岂可遂置度外哉易所谓羝羊触藩不能退不能遂者正今日事也

承谕天下形势在荆南恐未为确论今日至要处乃在襄阳控引川陕襟带江淮下临旧都连

年弃置不复料理失此则中原不复可图矣虽然能立能步然後可以趋走今日国体犹未能立而欲趋走可乎近有旨令孟参以勾抽去兵尽数拨还本司以班师日余剩财物尽数拨付本司意则厚矣兵未尝拨还一人一骑财物未尝拨到分文颗粒虚烦诏令徒切自愧奏状检辄纳呈恐欲备见本末区区既已到湖外似非避事但得一两月间别无警急之报措置数处盗贼就绪便可塞责丐归山林如伯禹方当为朝廷判白黑明是非使公议有所主盟求去之坚非士大夫所望於左右也勉旃勉旃

梁谿集卷一百十九

<集部,别集类,南宋建炎至德佑,梁谿集>

卷一百二十

钦定四库全书

梁谿集卷一百二十 宋 李纲 撰书十三

与李似表教授书 与马总管书

与向伯恭龙图书 与邹德久通判书与张柔直左司书
与吕安老提刑第一书与吕提刑第二书 与吕提刑第三书与吕提刑第四书
与吕提刑第五书与折仲古龙学书 与潘子贱龙图书

与李似表教授书

某顿首啓似表教授学士亲友执事为别忽忽累月良深驰向暑溽不审动静何似伏惟善逴行阙尊候多福区区旅食长乐粗遣三月初遣人投二相书并以辞免文字托为将上至今两月余指挥人尚未还不知何谓忧患之余衰病日加不惟不敢复当委寄之重兼元降指挥亦有失於契勘难施行者谓如既有福建江西荆湖路宣抚使今又置荆湖广南宣抚司是两宣抚同在一路节制不一郡县如何遵禀朝廷何以责成荆湖间羣盗知姓字者三十余万非压以重兵岂能招徠使听约束今才得任仕安兵千余人能有济乎自江西趣潭约三十程取途汀道三倍於此又皆烟瘴之地舍近从远此何理也若欲扞蔽二广恐非千人远涉所能办又自来置司在远方势难待报必令依某人已得指挥有未尽事件续具画一申请乃可辟置官吏之属既有官吏兵将亦须令所在路分应副起发钱粮乃可行遣今一切不该载惟督令即日就道虽欲力疾势不可得向辞免劄子中惟以疾辞而二相书中颇道一二庶几其知不得不辞之意并皆未报不知朝廷未暇及此惟别有说也近有来自孟参幕中者云已有省劄至福建江西荆湖宣抚司令候将来讨定盗贼了毕回军日以职事交付荆湖广南宣抚司是朝廷已悟两司不合并置如欲措置得宜不若因仆引疾且与罢免候盗贼平定别议帅守付之後段乃为得体况衰病实不堪此得且养痾山林莫大之幸前书具恳似矩尚书借一言之助更烦达此仍询问与决迟遲之意因的便报及幸甚近想已有美除向热千万为器业自爱某再拜

与马总管书【南劔】

某咨目拜上总管拱卫团练执事使臣至远辱书翰佩荷勤意畏暑比日想惟动静胜常区区蒙恩付以荆广四路之寄闲废之久衰病日加恐不足以当委任之重具奏辞免蒙遣中使降赐趣行迫於天威已力疾总师就道以被旨抚定广东乃之任取道颇迂远至湘潭间当在秋初也承过有垂谕并以长牋为贐殊深愧戢自孔彦舟占据长沙残破湖外闻执事能明逆顺之势为朝廷宣力击败彦舟其余北来逐项军马将领多怀反侧独执事忠义卓然初终不渝一方赖以绥定良用嘉叹自古名将多出於隐仄之中转祸为福书功竹帛以垂不朽者多矣

倔强以苟岁月终亦何补幸深察此以益励忠诚以报国家所以待遇之厚行即同事预以欣慰知近出师讨刘忠堕贼奸计兵将颇有溃散者胜负兵家常事宜益自治以图後举失之东隅收之桑榆何晚之有愿勿以小愤驱将士於必死之地愤兵必败古人所戒切宜慎之未承晤间千万为功业自重

与向伯恭龙图书

某咨目再拜伯恭安抚龙图执事间违滋久日深怀企叠辱书赐乏便不及一一修答尤用愧仰畏暑不审比日动静何似伏惟台候多福区区蒙恩付以荆广四路之寄闲废之久衰病日加恐不足以当委任之重具奏辞免蒙遣中使降赐趣行迫於天威已力疾总师上道以被旨抚定广东乃之任取道颇迂远至湘潭间当在初秋也承垂谕从者昨在曹成军中事体向已於孟参政处见咨目公文备知曲折今曹成已犯广东得林帅公文有愿就本司招抚之意已遣官齎金字牌勅榜黄旗等使往开谕虽贼情狡狴未可信仗而权时之宜不得不然其余须俟亲到可区处也承有旨赴行在当不容以补服为辞伫闻除目以慰士论某见迤邐前去听候申明回降指挥悦取道江西遂有承晤之便所怀非面不尽万一未间更冀以时自重前迓光宠

与邹德久通判书

某咨目再拜德久通判学士执事至辱书赐辞意灿然且审迹来动止之详感慰无谕酷暑可畏伏惟尊候多福区区总师已次建宁得旨先如广东当自南丰径趋贛上度庾岭以之番禺触热远适殊非衰病所堪加以闲废之久乍总戎律思虑百端数日来髭髮之白不胜其镊追思洞霄散吏若仙官然未易可得也昨者不揆辄欲邀致贤者幕中庶资谋画之益共济国事乃蒙峻拒所以见谕者陈义高而虑患深读之惘然良用愧仄初欲再往牵强窃恐立意已定不容进说又亲嫌之谕尤切事情故不敢复议此正犹介甫欲妻王令而忘其同姓也聊发一笑寻常之渎不足以容吞舟之鱼而瓌奇之宝遗弃路傍终有识者岂敢私有之哉荷照之厚有可以见教母金玉尔音乃所望於左右也益远齐馆此情可量千万为器业自爱挥汗布叙幸枳置路

与张柔直左司书

某顿首啓柔直左司郎中执事昨者闽部少欸绪言殊慰景仰违奉忽复累月行役倥偬不果通问窃计善达行朝久矣见报承有宰属之除甚副士论秋暑未阑比日动静何似伏惟台候多福区区行次南丰被旨径赴长沙遂此改途至清江适疟痢大作梗羸劣殆不能支调治稍安当自庐陵以趣衡湘未有承晤之期第深驰向敢冀为国自厚前膺禁近之拜

某再拜区区忧患之余衰病日加岂复可当阃外之寄上恩不容逊避黽勉力疾就道触隆暑戴星而行遂成疟痢加以思虑萦心夙夜震悚髭发顿白非复长乐时矣朝廷初令取道广东候孟韩抚定盗贼了日之任今乃遽趣二帅班师岳飞一军亦徙屯九江荆湖羣盗如曹成刘

忠等拥衆如故马友之党散漫於衡湘间亦有溢入於江西者其余土贼杨么雷进邓装辈出没作过自若而名将重兵一旦尽去欲使本司以数千乌合之衆当之何以能济累具奏乞存留岳飞一军且於本路驻劄及拨还已隶本司韩京吴锡吴全军马於江西邻郡支拨钱粮应副急阙皆未得报今再具奏辄録奏检去一观幸为见右相力言之得速降指挥幸甚幸甚眷集计时得安问北耗迩来如何趣召二帅并岳飞徙屯必是有警急之报然安知非以虚声扰我能定然後能应正当斟酌之耳如岳飞於荆湖驻劄自於防秋初不相妨万一沿江有警顺流应援未晚也此侯威望已着庶几措置羣盗易为功力区区言之屡矣殊不蒙以为然深恐大兵一去不可复回曹成与刘忠复窥湖湘即一路生灵将复涂炭二广又将震扰虽料理噬脐何及切冀深照此理而力恳之荆湖应副孟韩之师月费钱三十万缗米五万硕公帑既竭歛之於民又已匱矣长沙复遭李宏之变官府民户刼掠一空将来到任贍养军马措置事务未有分文颗粒可以指拟虽以遣官往二广剗刷远水安能救近焚哉所乞十万缗五万硕殊为不多但欲接济目前急阙并幸垂念也

与吕安老提刑第一书

某顿首使至连辱书赐窃审履兹凝寒动静胜常为慰吴锡大破王俊斩获四百余级生擒贼将杜贊获老小六百余人邵阳遂安残党走武冈境上已令穷追期静而後已锡常有愧邵人因令立功以盖前愆果肯尽力得此一项了湖南境内粗定第出没两界首者势须防托湘陰浏阳醴陵攸县益阳皆不可无兵已议各遣一部五百人更戍得来谕不约而合第钱粮日觉窘乏前所得上江诸州者渐罄殊未有继者盖养兵二万人日费三千缗月支者又不在此数自到长沙四十余日已支二十万缗诸军衣钱又费十万降赐库收拾得数万两银皆尽於此矣日望二广财赋通融应副殊未有到者既有近降指挥势决不可复得良可虑也上流重地屯兵二万数不为多既无他路之助非尽得本路所入必致缺乏又恐朝廷见盗贼稍息便以为无事版曹督输上供即养兵之费益无从出耳刘程二帅日以急缺来煎迫今得免此甚幸第以今日之势观之湖北非藉此中以二广应副安能有济湖北定然後可以料理荆南以通襄阳渐为恢复之计今浸失初意夫复何言得吕元直书亦有趣入长沙之语盖殊不知此间事答书已具道且力丐宫祠已入两章决期得请自余非所敢知也承谕经制银甚荷既已申明不若少待然令拨本路事理则无可疑者在两路则分彼此在朝廷岂有彼此之殊哉万一急缺虽无指挥亦须担当况已得旨利害重则易为人言所眩愿深思之所期於左右者甚远故不得不告幸察岁晏千万为器业自重

与吕提刑第二书

某顿首拜啓安老提刑正言执事近两奉状皆以病倦不果亲作方此愧仰伏辱手海窃审履兹凝寒台候多福为慰区区承乏粗遣蒙垂谕乃盛德事顾何足以当之祇佩厚意无有穷已浏阳攸县既捷群寇远去刘超一项复来就招抚并老小共千五百人拣放後当不甚多也郝晟已先遣往郴江韩京俟茶陵稍定即行邓装之徒计不难破目前境内粗已宁谧皆将士之力然所以能致此者不失机会而已愚集兵夜渡而步谅晓降邵阳兵朝至而王俊暮获招降者輜重不犯秋毫杀获者财物尽给将士新卒可怀而旧兵有思奋之志者职此之由是皆古

人已效之術但恨鮮克用之耳目今以親舊人錯雜團結訓練數日前按閱已有可觀假以時月當皆為精兵向承諭及今日作帥當以訓軍伍治器械為先誠知言哉朝廷初意欲以二廣經理荆湖漸為控制襄漢連接川陝之計今既不然殊覺省事亦衰病可以乞身之秋也宮祠章再上猶未報萬一未如所請當遂挂冠以歸耳前日得呂元直書方漸知自到湖南事有旨令會合劉洪道程昌禹解潛兵進討楊么權听本司节制此賊据重湖之險為數路患猖獗久矣今茲水涸正可掩襲但恨無水軍而戰艦未備已一面製造召募檄諸道並進在此一日即為作一日事此素志也武岡獠人楊再興遣人納款雖未可信然正當不逆詐已遣使臣齎勝撫之并牒報諸司更煩審處可以即遣行獻歲祗數日間無緣会晤第有馳仰切冀對時自愛上狀不宣【答督捕盜賊奏檢納呈恐欲見也】

与吕提刑第三书

某咨目再拜安老提刑正言執事數日前遣使臣郭璘至武岡嘗寓書記室當已呈洩獻歲發春伏惟履茲令辰台候多福得韓京郝叟報已帥師過郴之永興近頗聞叟向者嘗招收京軍中人京以今听其节制之故稍理旧事遂致不協深恐非徒不能成功或致敗事輒欲煩使旆一至郴江督捕使二將盡听节制不獨兩人素服德望樂備驅策可使忘其私忿累年逋寇決有乘機可擒之理伏想留意國事以一方生靈為念必不憚行今納公文去幸冀照察今湖南境內賴朝廷威德羣盜悉已肅清惟北有楊么恃水為險南有鄧裝彭友巢穴依山武岡獠人時復出沒攻討之序固自有次第近得旨节制諸路軍馬以討楊么乘此春水未生之時正宜深搗第此間戰艦水軍皆旋創置殊未備就已檄程昌禹遣兵搗其腹心而此遣吳錫屯橋口王俊屯湘陰李建屯益陽以備奔冲及破其比近陸途可至寨棚時下措置只得如此呂元直書中許撥崔增一軍來若得此軍船艦粗辦吾無虞矣鄧裝彭友韓京足以破之但須得使旆親臨更與指踪事可萬全矣至於獠人跳踉必未至大段猖獗此間力亦未能及姑俟所遣使臣回徐圖之未為晚也不識公意以為如何元直書報偽齊誘重兵入關以窺四川解潛探報亦然上流重地朝廷不於無事留意奈何尚阻參承千萬為國自重不宣【正月三日】某悚息已作此書方欲遣人間得歲前所惠教審聞動靜下情感慰示諭武岡事前幅已道其略今陳照屯瀏陽焦元屯醴陵馬準屯攸縣以備江西潰兵吳錫屯橋口王俊屯湘陰李建屯益陽以備楊么韓京郝叟方事鄧裝彭友力有所未暇及姑少俟於可為之時一舉而定乃佳耳譚希莊固非將才姑藉其諳知彼中人情庶幾別不生事聊復爾耳張中彥下兵亦何能為更煩因書喻邵守倅使不乏其錢糧足矣須器甲此正所缺者從者如到郴可檄取郴并桂陽為本司製造下者逐急應副示及其數使事畢歸納可也十一日初遣人于朝廷丐宮祠至今未還更旬日間須到所愿一請即遂所欲耳何當面晤馳仰馳仰

与吕提刑第四书

某咨目再拜安老提刑正言執事近累奉狀計已呈洩使至連辱書貺切審邇來台候多福感慰兼集須空名告劄昨荆廣宣司初不曾申請降到惟有韓京繳到數道今有公文送去幸照悉招盜賊以官出於不得已今既兩路有兵勢窮力蹙不擒即降似不須此待其到軍前効用立功而後官之乃佳如彭友輩正當責其反覆失信不即就招俟其公參示以告劄而未為書

填姑俟後効乃为得策某自到本路所招降人并不曾假以名目虽近上头首非曾被受朝廷真命悉降充効用亦尝具此因依奏闻诚恐愚民无知见作盗贼得官以为仕涂捷径生觊觎之心则一盗息一盗兴无有穷已前日福建范汝为乃其验也更冀熟虑而审处之幸甚陈楚南者豪猾为一乡之患罪恶贯盈前此重赏所不能得密切捕获见追证根治若只同十连人押解远去决须窜逸今纳公文幸备録回报棘寺如必欲得候其再来追取狱情已圆可以具情节申奏乞酌情断遣可惜止用常法也千万照察二点窜回捕获甚善此曹如贷其死便有此患诚不可恕昨晚得枢密院劄子有旨就广西差拨兵将来武冈同讨杨再兴措置得已移文许帅矣醴陵人吏已发遣使旆想即为郴江之行刘超者来日到此虽止千五百余人然皆刘忠下所谓花面兽者闻颇骁锐俟痛拣决分隶诸将也彭友之衆皆可放散独留头首押赴军前为佳向暄敢冀为国自壽【正月六日】

与吕提刑第五书【正月二十日】

某顿首啓使至奉教颺伏审履兹春寒台候多常感慰无喻区区粗遣送有一项溃兵犯浏阳乃杨惟忠下兵所谓王大刀者江西帅司遣往?上叛而归焚掠筠州自分宁路来皂衣白帜传者遂以为江北寇遣陈照李建等御之已逼逐出境杀获五十余人腰间得付身皆江西帅司所给者乃信传言之妄又得醴陵探报萍乡千百为群者凡数项何其纷纷也辱来谕知?吉群盗蜂起又得广东书循惠间扰扰渐逼番禺殆将不制奈何不择帅不治其微养成滋蔓势稍缓则遂以为无事不复加意此患殆未已也韩京虽小岷然能卒保茶陵诚为可嘉第不计粮道贪利远追犯兵家忌其败固宜已劄下许其以功赎过且移文使司根?李端不入贼及鼓扇卖卒先归者此不可不治也昨已遣郝最马準助京致令白德下兵止在衡州防托初不知其已在京军前数百里之远机会间不容髮岂可持此为溃归之端哉郝最已取间应援不速因依然京既遣之往郴道里迂回文移往返亦安能责其如期必至申状元初不及马準既赖其会合之力逼贼出境始还攸县似不必深诘公意以为如何京军初失利士气未复欲振起之当以何术幸以见告亲招降人拨隶诸将只得就近如京远在数百里外自不能及闻张中彦下兵刘崇者颇横谭希庄弱不能制之今在邵亦未能有益於措置骚人欲拨此一军隶京如何更烦为熟虑之仍密其事为幸中彦既诛此曹不能无反侧然昨已明谕之近又劄下邵州犒设聊以慰安其心韩郝两军以其暴露亦与犒设须烦使司以经制钱支马準下兵已令攸县支散矣伏恐知察近遣吴锡李建讨荡杨么莲塘等寨杀获颇衆自此其徒不敢复过江南战舰自十五车以下已制造得十余只海鳅棹船之类二十余只於诸军中选择水军几二千人杂以民间战船数十只日逐教习旌旗戈甲皆一新春水渐生可以深捣巢穴此贼不难破第衰病归兴日浓丐於朝者甚力稽於梦卜决有脱去之理恐不能为朝廷了此一段事为可恨耳遣去行朝使臣计程数日间当还可见与决又不知代者为谁得不俟代而去乃为幸也自到本路半年矣养兵二万钱粮之类皆躬自料理均节民不告病今虽欲去廩有余粟库有见缗亦不至缺乏貽後人患当悉具数以告于朝庶几谤者无所容其喙也民瞻近曾通问否闻闽中泉福间余极贵建寇复尔扰扰殆未有可安处如何吴元中遽薨谢殊可痛悼其家尤为狼狽欲归葬三衢道路梗阻如此何缘得达已劝其不若谋葬衡山未知肯见从否区区倪尚留此犹可为出力不然须烦左右照瞩应副也未缘披晤敢冀为国自厚前迓光宠

与折仲古龙学书【正月三十日】

某顿首拜啓仲古知府安抚龙学台座近使臣赖充行附状计已呈达中春气和不审动静何似伏惟台候多福见报窃承新命?拙复有交承之契何幸如之使旆已次何地愿趣驾为望未承晤间更冀为国自重前膺宠数谨上状不宣

区区抵湖湘间踰半年矣衰病无堪日思退缩去冬亟上疏丐还阙寄愿置闲散已有言者论其罪状仰荷上恩宽覆复畀祠宫感涕何已又幸复与贤者为代闻已专遣使齎信劄前去有不许辞免及不候受告等指挥计已拜命切望疾驱早临所部使罪戾之迹得遂脱此乃故人之大惠也专人候承动静俟闻使旆压境别驰问次幸冀照察

某悚息再拜置司之初蒙朝廷节次差兵近万人自抵湖湘招降溃卒除拣汰外得强壮万余分隶诸将目今有兵二万三千余人将佐多堪使唤者初至长沙当马友李宏变故之後钱粮缺乏躬自料理均节养兵半年未尝横歛粗亦足备目今州县仓有米三十余万硕库有钱二十余万贯上江诸州不与焉朝廷降赐初止银万两钱二万贯逐旋收拾今有银六万余两金二千余两经制回易钱各五万贯境内盗贼悉已静尽流移归业惟湖北有杨么水寇近亦破其数寨见治战舰水军每日教阅稍俟其精熟即可深讨巢穴北方亦无警急之报解罢镇抚斥候甚明凡百足可措置愿以济物为心逢场作戏可也余续具报幸察

吴元中家必已离桂府今次何地昨致书许帅并二漕得报皆乐应副必不乏人全郡已委守倅矣此已差下五十人欲俟其家过日令送至三衢今得仲古在此夫复何虑然切须劝其谋葬衡山之谓得策道阻且长此岂扶护远适时耶妙应闻亦欲由此如浙东是否因见幸趣其来也

近具奏乞将荆广宣抚司已剗刷下二广钱物并制造器甲等依旧应副本路昨日得劄有旨已依所请矣恐欲知

与潘子贱龙图书

某顿首拜啓子贱提宫龙图执事岁前陈廸功行上状计已呈浼李漕至远辱书赐殊佩郑重之意初春余寒伏惟台候多福窃承戏彩优游间里想雅怀甚适至於见几而作先衆肥遯则又叹仰之所不能及也何当会晤道所欲言者临书耿耿敢冀为国自厚以俟大来谨奉状附承动静不宣

区区自抵湖湘间踰半年矣赖朝廷威德与将士之力招捕羣寇十余头项踰三万人拣汰外得精兵万余分隶诸将抚之如一亦颇驯扰以故境内粗定流移稍稍归业田野间垦凿殆遍有筑室而居者军食皆躬自料理亦不至缺乏第以衰病日思退缩中冬之初亟上章丐还阙寄愿置闲散已有言者论其罪状痛诋无所不至仰荷上恩宽厚畀祠馆第深感涕代者乃折彦质须俟其到方听罢任今见留广西已致书促其来傥得脱此即径归阙中杜门循省余亡

足言者未有承晤之期可量悵跂陈国佐不鄙远来其意厚矣第以凉薄误其往返之劳为媿何言然平昔服其高义未尝相欸今乃得相从半年余殊深慰幸亦似非偶然也此间事必能具道不复缕布泰发得其遗书知己还会稽千里闻风可以一笑因通问烦为致千万意续附状次

吴元中无疾一夕而逝先是妙应师预言其不能过中冬自桂如郴见之劝其屏絶人事专意内观俟其如期长往而复还亦一段奇事也妙应欲自此过浙东询国佐可知其详

梁谿集卷一百二十

卷一百二十一

钦定四库全书

梁谿集卷一百二十一 宋 李纲 撰书十四

与秦相公书 答钱巽叔侍郎书 答潘子贱龙图书 与潘子贱龙图书 与李泰发端明书
与李泰发端明第二书 与吕安老龙图书 与张德远枢密书别幅 与赵相公书别幅
与向伯恭龙图书 与任世初察院书 与张枢密书别幅 与赵相公书别幅
与张枢密书别幅 与赵相公书别幅 与折仲古承旨书 与吕安老检正书

与秦相公书【九月二十六日】

某顿首再拜啓近者人还辱教答所以慰劳甚厚佩服眷意亡以为喻窃闻燕闲不辍文史之乐尤切叹仰梦幻之境无有是处唯内典深谈实相真可归依华严法华楞严圆觉维摩诸书皆精微奥博助发信心愿乘暇一观必有所契今人谓佛书退藏排遣之具是大不然建立一切发广大心必先了此乃能济物公方涵养终当为苍生起故敢以是为请昔张方平以善方便劝杜祁公读楞严辄録其事去庶几亮区区之意也悚息悚息

某悚息再拜区区自抵长乐屏迹郊外一切谢絶人事得以休养疲薾良切自幸第以族大累重侨寓远方犹仰微禄未能挂冠深以素餐为愧耳元直遂去朝廷闻亦欲来居永嘉是否汪相路枢非晚恐到此正如陂池之鱼游於浅处无往而不值也坐阻良晤遯风不胜瞻咏

某惶恐某去岁湖湘之行良迫於不获已盖恐力辞又有偃蹇不受命之诮故欲覲到而亟归此意公所素亮也既抵本路龟勉百为竭尽愚短粗定一方竟亦何补而横遭口语诬蔑益甚如引某参言受辛企宗米事尤为可骇某参会稽降官之憾向者书中已尝具道盖以同寓长乐而不通问卜其造朝必须兴谤故先事浼闻更有一事可笑某去秋总师过吉州江西漕韩球公然移文州县不使应副钱粮不得已勾决人吏军始得食亦具奏矣球缘此种造谤又尝为韩世忠下营妇殴击在某未到吉州数日之前其後言者乃谓激之使然不知有此理否此皆细故不足道如靖康间描画何所不至当时不敢自辨又无为之辨明者一再拈出即遂以为实矣听言莫先於考实不考实则伏谗蒐慝得以颠倒是非变乱白黑更易有无害治之大者采苓之诗止谗之道也如企宗辈见在降一指挥责军令使具实以闻即便见有无虚实难於降指挥而易与人黯闇此近世循习而不可晓者相公他日再秉钧轴愿痛革此风即中兴不难致某靖康间不幸有伏阙之事建炎初不幸当伪楚之後迨今仇怨满前非荷睿明照烛其无他岂复有今日哉平时粗晓佛理遇不如意皆作善境界想遭谤罹谗皆作善知识想年来衰病相仍百念灰冷世故不复置毫髮於胷中俯仰无愧待尽而已辱公照念甚厚故聊复言其梗槩幸恕其喋喋也惶恐惶恐

答钱巽叔侍郎书

某顿首拜啓宫使侍郎合下去冬承书赐辞意郑重以先内翰墓铭见委宠示行状及千照文字一帙且使令侄申伯垂谕再三佩服不鄙外之意无有穷已窃观自昔瓌伟卓犖之士其名德既足以显白震耀於一时及其终也孝子慈孙必求世之能文而言足以取信於天下者俾之撰次事实作为铭诗以昭告後世乃无慊於其心而世之能文者亦愿得夫瓌伟卓犖之士而铭之无饰说无愧辞因以自托於不朽二者常相资也昔蔡邕有言吾为天下人作碑铭多矣唯於郭有道无愧色耳韩退之作碑铭不轻许可然犹有谀墓中人之讥以是知其难也伏惟先内翰政事文章独步当世高明大节耸动远夷自结主知致位严近而谗说困于生前党议起于身後此固天下公论之所共惜也大明方升公论获伸是宜以铭志付之能文及言足以取信於天下者使之铺张伟绩发挥幽光而乃以属之于某无乃非其任乎某忧患之余意气荒落笔砚芜废大惧文辞之不工而言语不足见信于世人然反覆思之辱照之深而书辞见委甚勤其敢以固陋辞第年来衰病相仍习成懒惰如蒙稍寬其期不胜幸甚伏冀亮察不宣

与潘子贱龙图书

某顿首拜啓子贱提宫龙图执事近辱书赐来介不告而还遂稽修报愧佩无以为喻初寒伏惟台候多福承见索所着易传殊荷不鄙仆顷在海无所用心取易读之观象会意恍若有得因以其说着於篇非敢倣古人训经以垂世姑备遗忘而已自还中州念欲删改成一家言日困多故因循未果去年春归自荆湘寓居长乐郊外杜门谢客终日萧然始得稍亲笔墨寻绎旧学精虑深考为翦其繁芜粗成条理思得卓识博闻之士相与讲习磨礲淬砺证其是而黜其非增益其所未至庶几不悖圣人作易之旨常病未有其人今子贱以过人之聪明介然自守不以世之非誉动其心退居闲处甘於枯淡将与外生死忘得丧者游而能惠然同我所好此固仆之所愿进其说以求是正也仆曩与襄陵许崧老着春秋集传书成出示义有未安仆必一一为言之崧老亦多见从朋友道丧久矣振而起之正在我辈崧老既没微子贱吾何望哉谨以所着易传内篇上下经致左右仆自经忧患以来险阻艰难靡不备尝既不得竭其愚以徇国家之急故自托於空言心力尽於此书愿子贱日置几案间暇则试取观之其有乖戾悖於义理去处悉为签出略以数字道其所以当复思索以从来海岱其中立说与今之说易者不同而偶有可取亦告签出以数字表之使知千虑一得不枉劳心二者幸留意焉传上下经外又有上下系说卦杂卦序卦等传及外篇释象明变训辞衍数类占诸书以解駁易体究象数义理之归当续驰上次圣人作易虽推之无所不通然立象尽意必有至当之理吾徒学易因象以求圣人之意正犹法家铺陈条法以定刑名止於当而已矣苟非其当则以笞杖为徒流其差缪岂不远哉汉魏以前说易者多宗象数而不求义理故取象亦迂濶而不切自王辅嗣以来一切以义理训易而不稽象数其失圣人之旨亦多矣仆此书由象数以会义理然亦未敢自以为然愿且勿以示人姑问难往复使无可疑庶几可传於世千万照亮也建炎初荷上恩虚席以待备位终两月余议论与用事者不合不敢虚负天下之责遽引身以退曾无毫发之补至今自愧近奉诏旨俾追省当时所施行者为时政记以闻衰病遗忘文籍散失才得十之一二已奏篇以塞明命矣辄以别本及所建明并乞罢劄子二十余首録去恐子贱当时到行朝仓卒不知本末可以见其梗槩也七八年间如一梦然追寻往事第使人感慨耳岁聿云暮未有会晤之期此情可量切冀为远业自重谨奉启不宣

与李泰发端明书

某再拜区区自去夏归自湖湘间即杜门不出罕见宾客聊以休影息迹近来居者颇衆如汪张二公虽见访亦循例不入城复谒殊觉省事自旦至夕烧一炷香看一卷经读数板书打一觉睡或宴坐少顷无非自己分上事以此差觉自适第年运而往初未闻道无朋友渐摩之益兹为恨耳闲居既久坐进此道想所造益深愿有以警海之也得子贱书颇以为物之意大深为言答以愿力正当如此至於观消息盈虚之理为进退出处之道则又君子之所贵也公意以为何如

某悚息小诗寄呈聊以见意近着数篇同往可发千里一笑也新文无悵錄示一二以慰岑寂梁干时有人来往剡中可以寄诗简吾辈濶别动十数年各在一方音问岂可复尔断絶耶

与李泰发端明第二书【八月二十二日】

某顿首再拜久不闻动静辱手海如奉言色喜可知也垂谕君子小人进退之理可谓确论然消息盈虚治乱兴衰皆有天命行乎其间非特人事而已君子居易以俟之故方寸常坦然而无戚戚之忧此所以不知命无以为君子也自靖康以来所遭之变皆古所未有岂曰细故其实本於君子小人之混淆君子常不胜而小人常胜然天实为之谓之何哉吾侪当益信此心进则尽节退则乐天死而後已余复何道泰发以为如何某再拜承垂谕潘知録荐章良荷不外泰发之所推许而又子贱之弟其人物不待见而可知固愿备一员之数然今岁文字皆以用尽当俟来春首剡奏次幸冀照悉子贱近数通书识度益高使人叹服何当相与合并以释劳结耶驰仰

某再拜承以日铸茶宣城笔为贶不胜珍感建茗数品共五十朶荔枝一?谩将远意幸恕轻尠也今岁苦旱荔枝难得佳者尝与全真并汪张唱和谩錄呈亦可以见相处之意顷在沙阳尝作荔枝赋近又为作後赋同往聊资千里一笑书生习气不断未能忘情笔砚间聊以游戏耳新着不鄙示及一二幸甚幸甚

某再拜?尾所谕殊荷至意长乐还来居者颇多所恨族大累重不能他适耳汪张皆问相过亦尝邀其会食但区区自湖湘还即屏居郊外杜门不出虽金真亦不谒邻近山寺亦不游聊以休影息迹以故不果到二公之门及追陪其燕集殊觉省事亦颇见亮也荆襄之举今所当为第须为善後之策正犹川陕在棋局皆是合着处但恨所以置子者非耳如何邹德久惠然千里见过殊慰岑寂到此已月余稍凉即归时官荐之此初不闻岂传者之妄耶

与吕安老龙图书【九月二十二日】

某再拜承垂谕荆襄事势并以所上奏检见示皆中今日事机不知能如所议否大抵江浙川陕各在一隅犹之棋局须於腹心置子乃可相及不然道里悬絶缓急何以应援腹心要害之地襄汉是也晋宋以来皆为重镇久合措置今已後时数日前得岳侯书已还师岳鄂不知新

复之地以何人守之祗付之数偏裨果足恃否庙堂必自有处山林无由知曲折又迂濶之虑每切自笑而竟不能改步以与世合亦不解事之一端也因来海辄谩及之

某悚息承需车舩式樣今纳去传毕却告示下战车图樣偶寻未见後便当驰上次来谕恐车舩重大不可用是不然此乃嗣曹王臯所制见於本传非鼎人所能为也顷尝试之运动轻驶施於大江重湖以破长风巨浪乃其所宜要须教阅习熟乃可用今有小舩轻楫而付之不能操舟之人虽寻常之?其覆舟必矣况以巨舰出没江湖间哉前日翟吴之衄正以此故非舟之罪也然此舩正可为水军之家计每一舩须以海鳅之类数十只副之正犹鹿角轻车之副武刚乃可以战幸详思之某再拜

见奏检以杨么厠金人伪齐之末何至是耶前此朝廷以曹成马友辈拥衆各十数万扰湖湘间殊不以此贼为意某到湖南始具事实及榜檄不逊之语列上既已招捕群盗方措置间而宣司罢其後得旨节制湖北进讨即治战舰水军散出榜文厚赏以致其头首十数人余悉许其自归及自相杀并间其党与颇有携散之意未几罢去专遣使而有速成功之心故有前日之衄贼势益张大抵此曹据重湖之险其徒皆舟人渔子便於操舟非官军之利速进则无功久屯则师老而财匱惟择帅而任之用赵充国取先零术此必胜之策也因来谕辄及之未知然否某承惠茅术甚济所乏感戢感戢建茶数品谩以将意殊愧不多也年来衰病尤仰药石以自扶持山林宴坐终日萧然无一事所乏者朋友过从之益耳连得数孙亦足自慰但得如公辈数人坐镇疆场庙堂能用其言吾复何虑耶聊发千里一笑某再拜

胡德辉文行识操於今少见其比以礼罗致犹惧其不至公所简使就权掇宜乎不来也其家贫甚不仰禄之言恐非真实卯酒方醒来使督书草草布叙幸恕察

与张德远枢密书别幅

昨日见报朝廷已往常程亲征之议当已决矣区区忧愤不能自己辄陈三策以献谨録副本拜呈搗虚最为上策以弱为强可收奇功钧意以为如何中策可以御寇出於下策其患有不可胜言者惟公忠义贯日月自任以天下之重愚者之虑傥有所合愿入侍帷幄力赐开陈庶几有补万一莫大之幸某衰病屏迹山林岂复敢与世故愿朝廷安则山林之间亦安毕精竭虑尽其拳拳之诚而已恃眷照之厚当亮此意也惶恐惶恐

与赵相公别幅

比见邸报伪齐挟金骑侵扰淮甸车驾决策亲征诸将用命捷音屡至此皆相公以宗社生灵为心自任以天下之重扶危持颠有回天之力虽莱公澶渊之绩何以加此更冀益收群策茂建大勲再造王室以副苍生之望天下幸甚

某初闻降诏有亲总六师以临大江之语当具奏陈三策以献乞降付中书必已尘浼听览今再具劄子条陈十事并以奏状副本拜呈敢望钧慈特赐详察其间有可裨庙筭之万一幸望

采録施行不胜幸甚朝廷自渡江以临吴越今六年矣平居闲暇之时玩岁愒日未尝图虑所以为立国之策相公爰立未数日间适有警急之报乃当艰难莫大之任屏去近年退避之说奋然进讨蹈危求安真古社稷之臣所自任也更望於事平之後博采衆言以定保有东南恢复中原之至计某虽迂陋敢不竭尽愚虑继此愿有献焉幸望恕察

某自靖康以来数经忧患非他人之比加以衰病相仍已为明时之废人但屏迹山林采薇散髮以终余年岂敢复与世故今者朝廷艰棘不能緘默辄复进其菑莠之言盖以朝廷安则山林安利害休戚实与国同之故敢冒昧自竭庶几涓埃之补区区此情必蒙钧照不胜悚息之至

与向伯恭龙图书

某再拜啓北报警急朝廷悟前日退避之非决策亲临诚为得计不然虽此数月之间何以支梧玩岁愒日於闲暇之时宜乎於仓卒扰攘之际不免有遑遽震恐之患也方事之初怀不能已尝具三策以献误蒙獎诏又尝以十事呈当轴者迂踈之论亦复何补姑致其拳拳之意而已已録致萧懋德处可试取一观不必他示为幸相持既久诸大将未闻有渡江者正如治病既能脉又须善用药以驱逐邪气使不留皮肤间乃可渐就全养坐待其去恐无此理万一淮南有所占据不知何以为善後之策世事方棘每一思之通夕不寐公虽居忧乃心王室想同此怀也何当面道所欲言者临书增情属苦臂痛不及亲书切冀加察

与任世初察院书

某顿首啓世初察院执事久踈修问良切驰仰近黄亲自行在圃方知去春尝辱教答付急足来途中窜去书遂浮沉所幸渠尝窃启緘録得因以见示读之耸然如奉谈笑感慰无喻春寒不审动静何似伏惟履兹新元尊候多福淮甸警急朝廷悟前日措置之非决策亲临士气颇振比闻贼马已遂遁去虽未能奋击殲其丑类然亦足少挫其气使不敢南渡回思前日退避其平居玩岁愒日不为自强之计良可惜也方事之初尝具三策以献误蒙獎諭数日前又承诏旨令条具攻战守备措置绥怀之策来上已具奏闻深愧志虑浅短无以副下问之意辞多未果録去今録前所上三策并诏书谢表等至左右幸一观也去秋有旨令追省建炎初事迹修时政记已奏御矣今并劄子録同往恐世初昨到南都仓卒不知其详观此可以见其梗槩也得勿示非其人为幸追思十年如一梦间徒使人感慨尔来谕中兴之说可谓尽善安得如公辈行其说於朝廷使致恢复之绩衰病者得安山林间何幸如之无缘面谈但有悃跂建茶数品沉香少许漫送书室清坐之资幸检至向暄千万自重门中均庆谨上状不宣

与张枢密书别幅

伏审光膺帝制复冠枢廷本兵得人庙社增重枢密少保勲德之懋自结主知方黄阁之虚席宜正揆路以穆天緯光辅中兴之运伫听告廷之命以慰具瞻区区不胜咏颂之至

伪齐挟金人之势侵扰淮壖六飞亲临将士增气想日来当已有渡江者敌气震讐行当宵遁更望益壮远略以成大勲使中兴之期指日可俟天下幸甚

与赵相公书别幅

近年以来多以和议退避为得计国势日蹙士气不振职此之由相公当轴於仓卒扰攘之际慨然自任以天下之重遂改前辙殆天意悔祸国家中微之运将复光大不然何以天时人事符合若此叹服之深喜而不寐然贼退之後正须种种料理以为防守攻讨之策愿言益懋远图早遂恢复土疆大庇烝黎某虽衰病尚觊拭目以观中兴之盛莫大之幸也伏望钧察

某昨者不揆辄以三策仰干宸聪方虞妄发之譴廼蒙优诏褒谕皆自推奨之赐区区愧荷无以为喻姑此叙谢万一

某伏被诏书令条具边防利害来上已遵禀圣训具状奏闻主上求治之切询及疎远而某以浅短无以副下问之意第深惶惧然日夜念此至熟毕情竭虑以上此奏庶几千虑一得或有裨补圣聪万一非独某之幸也今録副本拜呈狂瞽之言或伤切直亦望开广容恕不胜幸甚伏冀钧察

与张枢密书别幅

窃闻淮甸贼马已遂退遁此皆庙谟克壮措置得宜之所致中外共庆然贼退之後须痛自料理以为善後之策敢望益茂远猷光辅圣世早致中兴之业天下幸甚山林衰病之人犹觊及见之也

某近被诏旨令条具攻战守备措置绥怀之策来上已具状奏闻乞主上励精图治之切深愧荒疎不足以副下问之意然日夜念此至熟毕情竭愚展尽底蘊以上此奏亦思虑之极也庶几千虑一得或有裨补之非特某之幸也今録副本拜呈狂瞽之言或伤切直亦望开广容恕不胜幸甚伏冀钧察

近见朝廷以贼马既退权免起发海舟水夫等州县甚以为幸然打造舟船犹未降指挥所造船七百只每只官破钱二千贯计一百四十万缗六分度牒四分经制等钱私下贴赔又不在此数也此方前次已出度牒钱一百二十万缗今次尤觉难出而又经制等钱并已起发未必有之正当农务之时民力凋弊州县极以为忧兼海船制度与江湖不同江上难以使用如止欲防备海道则似此数太多又官中造船决不如民间私家打造之精致海上风涛使用未必可以长久幸与庙堂诸公熟计之如且令打造一二百只候将来见得可使续降指挥亦未晚也惟公为国为民之意良切故敢出位冒献此言僭易之罪幸冀钧察

与赵相公书别幅

伏审光膺帝制进陟元台成命既颁中外胥悦恭惟驩庆相公道学稽古勲业格天光辅英主以致中兴师表百僚以熙庶绩爵位崇宠礼实宜之某屏迹山林幸托麻庇其为欣拚实倍常情

伏见朝廷於寇退之後修举政事召用人材皆有先後之叙多合天下之心窃庆中兴之有期也然区区愚见以谓当今急务在料理淮南非遣三大将统重兵於江北则淮南未易料理谓宜早降指挥移军淮南令先遣将佐谋议官前去措置候稍就绪日渡江庶几可以乘时料理藩篱之计若必俟秋冬恐或缓不及事此边防大计更望钧虑有以裁处相公乐取诸人以为善声满天下故敢妄进此说僭易之罪幸冀钧察

去岁被旨追省建炎初时政已修纂成上下两卷初冬遣人齎诣行在适有指挥罢常程有司退还不肯收接今再遣人投进辄以副本二册并当时建明丐罢劄子二十余首録成一册仰尘钧听伏望机政之暇特赐观览亦可以见当时备员措意之梗概也洎瀆悚息之至

与折仲古承旨书

某悚息再启去冬狂寇侵扰淮甸声势甚大所幸六飞亲临江上将士奋厉敌气沮索遂以宵遁此皆元台赞襄之力何愧莱公然敌退之後政须痛自料理以为善後之策仲古既在朝廷又居上幕愿言展尽底蘊以济事功中兴之期不难致矣当今急务未易一一缕数惟公与诚廼克有济幸深思愚言恃爱及此悚息悚息

与吕安老检正书

某顿首启安老检正龙图台席正月间人还上状计已尘浼见报新除殊慰士论得脱军旅调度之烦想尤慰雅怀也春气清和比来为况何如伏惟台候多福寇退之後殊未闻料理淮南岂遂以为闲田邪三大将既复置司江南则是尽仍旧贯止为保江之计前日措置特出於仓卒若欲为善後之策恐非屯重兵於淮南以为藩篱未见其可愚意窃料之将来伪齐或再挟强敌南牧必惩前日之无功变动其术而吾胶柱应之可乎安老深被上知又与二相无间胡不力以此为言今虽逆耳後必有验吾辈为人谋事政当长虑却顾为久远之计若趣利目前不展尽底蘊何补於事辱照辄及此悚息悚息无缘披晤但有驰仰敢冀为国自厚伫膺禁近之拜谨奉启不宣

梁谿集卷一百二十一

<集部,别集类,南宋建炎至德佑,梁谿集>

卷一百二十二

钦定四库全书

梁谿集卷一百二十二 宋 李纲 撰书十五

与赵相公第一书 与赵相公第二书 与赵相公第三书 与赵相公第四书 与赵相公第五书
与赵相公第六书 与赵湘公第七书 与赵相公第八书 与赵相公第九书 与赵相公第十书

与赵相公第一书

伏被尚书省劄子误蒙圣恩有江西帅守之除实自陶熔推挽之赐佩服厚德第深下情某忧患之余衰病相仍志虑凋落岂复堪为世用昨者还自湖湘得腰足重膇之疾步履艰难以故杜门不出谢絶人事今三年矣近来复感瘴疠寒热交攻眩瞀并作使之力疾承命必致颠仆道涂幸朝廷委寄已具奏辞免外敢望钧慈特赐敷奏使安於闲散以便医药不胜幸甚

区区微恳已布前幅重念某自朝廷艰难以来误蒙委任不敢辞难虽在流离困厄之中愿报国家之意未敢少忘也今者上恩隆厚庙堂加察起於闲废付以一路兵民之重固愿黽勉趋承图报万一实以抱病之久精力顿衰积忧熏心动辄遗忘深惧临事乖错无以仰副驱策上疏力辞期於得请敢望钧慈洞察诚悃曲赐开陈特垂矜允不胜?祷之至

窃见朝廷除授悉出至公此诚中兴之基而宗社无穷之福也然谋帅之际滥及罪戾之余深恐不足以協士夫之论方今人材衆多可畀方面之寄者初不乏人求之前宰执公忠静重临大节而不可夺如秦观文求之侍从龔亮警敏敢任大事如李端明付以阃外之权必能称职举以代某实允公议敢望钧慈特加亮察

与赵相公第二书

伏蒙宠海北报宁谥去岁旱灾之广有可虑者仰见爱民忧国之诚第切叹仰天下事惟相公留意则夷狄旱暵之患有不足弭僭易及此不胜惶恐

某三具奏辞免恩除不蒙矜允且被亲笔趣行黽勉就道第迂拙有素临事踈濶衰病之余精力弗强使当一路兵民之寄大惧旷失以速罪戾惟仰赖钧慈有以覆护之使不至殒越莫大之幸伏冀亮察

近准尚书省劄子以某具奏请覲得旨矜从十年流落之余迺获造行阙望清光实出钧造第深铭佩将遂俯伏下风以承海约慰平昔愿见之心尤深欣拚区区所怀非面稟莫既万一

与赵相公第三书

某顿首再拜孤远之迹蒙恩许令入覲实自陶铸更蒙海谕尤戢厚德非晚遂有瞻望袞舄以慰平昔愿见之心预深欣浣区区所怀诸候面稟

某岁除受命本欲单骑之任适海寇遽犯福之闽安人情惊扰寓居城外相去密迩遂有挈家之谋上元日起离长乐又值陰雨连縣山路崎岖几於寸进今已幸脱闽境数日间可至上饶自三衢登舟顺流而西度此月下澣之初可到行在伏蒙问劳之渥仰佩眷意不胜下情传闻江西去岁旱灾之余民户流移物力凋耗贍养屯兵賑济饥民极难料理自非仰赖朝廷应副其何以济俟到行在诣都堂呈稟伏冀照察

与赵相公第四书

某比者蒙恩入覲滥被睿獎仰荷吹嘘因获造诸屏着瞻望袞绣之华伏蒙钧慈眷遇良渥屡开东阁使得欵陪讌语佩服盛德拳拳之情无以为喻益远门阑敢冀上体注倚善卫生经茂对宠光以慰中外之望违去钧范忽踰两旬向仰之诚未尝少置途中尝具咨目干瀆钧听计获呈彻某已於二十日到界首交割职事讫縣力薄材当此艰厄之际大惧无以仰副朝廷委任之意既荷钧慈力赐推挽更冀有以终始其赐不胜幸甚区区恳悃谨具别纸伏冀垂亮

江西去岁旱灾次於湖南而南昌视一路为甚流移至多道路相望田亩有至今未耕垦者縣亘阡陌询之父老以谓前此未尝有也中下户往往乏食牛具多已不存种麦亦甚稀少未知向去何以接济虽蒙朝廷许拨饶州上供米一万硕本路遣人船般取得回报去已支遣尽抚州建昌军万四千硕比到亦只存数千硕劝诱上户数亦不多此去秋成尚远賑济殊为缺乏已具奏乞於浙西江东朝廷有米斛处支拨三万硕本路自差人船般取仍得严戒诸郡应副庶几不失指準莫大之幸伏望垂念

某近蒙朝廷委以营田敢不悉心以图报効本路诸色抛荒田土至多已委州县尽令剗刷但剗建之初非寬降钱本使得招召佃户置卖牛具贍养耕种之人何以能趁时营办以为永久之利伏望朝廷特降钱本十万贯文付本司措置俟将来就绪日计算本息以本归朝廷以息充本路支费庶几有营田之实而非特文具而已已具奏并申尚书省外敢望钧慈早赐指挥施行不胜幸甚取会到洪州月支钱米六千余贯石仓库空然米仅有数硕钱仅有数百贯某到任之初茫然不知所措自非朝廷委漕司应副三两个月容某旋行措置向後财计决致踈虞某不足惜深恐误事仰累相公推挽之德切望钧慈特为敷奏早降指挥不胜幸甚漕司见有总制司钱物可以应副与桩岳飞钱粮自不相妨敢冀垂念干瀆惶恐之至

与赵相公第五书【四月六日】

某已次豫章交割职事仰托芘辉规模具在得以遵守良深感服第此方当早暵之余种种缺乏殊非前日之比愿言有以海督之使免於罪戾莫大之幸无缘躬受约束但有瞻跂

本路唯临川建昌去岁薄熟今春耕种亦渐成次叙贛上虽稔然颇为盜賊所扰民顽多不输

纳自余诸郡率皆旱灾下户种艺无本田莱多荒而豫章仓库空匮尤可骇赡养官吏军兵钱粮既无指準而赈济斛?又复缺乏深虑将来有误岁计近被亲笔诏书令劝谕停蓄之家减价出粜既已奉行又措置劝民入纳专欲以赈济给下户之无本者但恐所得莫能徧及已具状奏及申朝廷乞降钱米以济目前之急必蒙矜允今再开项条具仰千钧听敢望垂念不胜幸甚

?寇尚未静尽昨得李山一军屯驻颇能破贼徒党稍稍潜伏近李山既为岳飞勾回余孽无所忌憚遂复出没而又袁吉临江建昌之间饥民往往窃发千百为群今已十五六项深虑凶岁易为啸聚滋蔓难图申世景一军仅千人自遣一半往?吉间自余无兵可以措置累具奏乞就近差拨三二千人应副使唤未奉指挥敢望钧慈早赐差拨以慰一方顒望之意不胜幸甚

与赵相公第六书

近蒙朝廷令运司应副一月钱米大济目前之乏仰荷钧念不胜下情然运司所得止可以相兼充一半之费盖申世景一军虽有丘贲钱粮窠名本州前後登带支遣并无分文颗粒见在皆是旋行擘画应副所以尤觉费力今运司既已无有又不敢仰烦朝廷支降辄伸前恳乞降茶引如元请之数庶几不致狼狈敢望钧慈以旧治为念特赐矜从非特某受赐也喋喋浼瀆第深悚息

本路近来雨泽沾足但下户乏本种田殊可矜念州县所养多坊郭游手之民虽能全其性命不填沟壑然不若实惠及农夫使将来有秋可望前此累尝拜恳乞於邻路有米去处支拨三万硕正为此曹设也万一朝廷缺米辄援吕相例乞支降茶引十万贯当自招诱客旅趁此时入纳应副赈贷敢望钧慈特赐矜允不胜幸甚近被受密院劄子备坐都督行府指挥所乞军马候防秋日发遣令先招填系将不系将禁兵训练使唤已依禀施行缘本路缺乏之甚所有招填例物及赡养钱粮非千告朝廷何以能办已条具画一申请敢望钧察招填新人既未必能敷额又旋行训练非年岁间安能习服将来防秋须得督府如期遣军马庶几可以倚仗上流重地任责不轻更望钧慈特赐垂念

?吉间以抽回李山军马颇复纷纷已遣副总管康随分拨人兵前去措置然兵力单弱深虑不能弹压累乞先差三二千人付本司分擘使唤实非得已近降劄子亦已关送都督行府俛非朝廷特赐指挥势决难得敢望钧照干浼惶恐之至

与赵相公第七书

少恳仰千钧听漕司督催本州积欠钱米皆是某未到任已前拖欠之数本州缺乏之甚近者千告朝廷令漕司应副方能粗了目前支费岂复更有钱米以还旧欠已具事因奏闻及申朝廷乞降指挥销破蠲免自某到任以後督责诸县收簇桩办决不敢复有稽违伏望钧慈特赐矜念早与行下不胜幸甚

夏已踰半防秋之期甚近而本路全无军马所以扞御之策茫然未知所措日深悚惕虽蒙都督行府有许遣兵之文亦未蒙津遣前来深虑缓急决至误事契勘舒蕲黄三州系听本司节制实为江西蔽障之地舒州系刘光世地分蕲黄州系岳飞地分并不曾屯驻军马欲乞朝廷特降指挥令光世分兵二千驻劄舒州岳飞分兵四千驻劄蕲黄两州皆听本司节度庶几将来二大将移屯合淝襄阳本路不至为敌人之所窥伺已具状奏闻及申朝廷敢望钧慈特赐矜允一路生灵不胜幸甚

与赵相公第八书

累奉诏旨以江西旱灾令广赈济及劝诱积粟之家减价出糶某与诸司協力奉行幸已就绪已具状申尚书省今有投进劄子辄録副本拜呈幸望钧悉

迺来雨泽滂沛早稻已熟秋田可望米价顿减人情少苏实庙堂措理之效良可喜也第去岁灾伤地分颇有未曾陈诉之民惧催理欠负至今不敢归业本司已行下州县核实与免催科庶几流移悉复田里亦已申闻并冀照察

某累以本路合差军马上千钧听蒙关送都督行府再得督府劄子见议差拨然到今未有至者非特盗贼滋多乏兵分遣又以防秋在近全未有备日夜悚惕恐辜朝廷委寄之意今再具申稟敢望相公致一言於右相早赐差拨实一路生灵之幸也亦有奏劄条陈利害谨録副本致左右机政之暇特赐采览

抚似之迹仰荷推挽误蒙任使自到豫章行将三月宿病间作心力不强深虑旷缺以貽朝廷之羞今幸赈济就绪雨阳调适遂成丰年於此时求去以养衰病似无嫌避已具状奏闻乞依旧在外宫观敢望钧慈特为敷奏使得养痾山林保全晚节莫大之幸敢冀钧察

与赵相公第九书【七月初九日】

某闲退之久乍当繁剧加以承旱嘆缺乏之余种种料理不无违拂人情去处谅多谤讟尘涸钧听今则财赋粗足官兵俸米既尽支本色料钱亦排日支給庶几自此浮言稍息然迂拙有素多招意外之谤更望钧慈核实而审察之不胜幸甚因吕侍郎书中尝道钧意仰荷爱念故敢僭易及此惶恐无地

某衰病无堪强顔於此虽不敢不黽勉自力以副朝廷委任之意终恐迂踈仰负使令近已具奏乞依旧外任宫祠尚未报行敢望钧慈早赐陶铸使得息迹山林实荷终始之惠岂胜幸甚干冒惶恐

累以本路防秋缺兵控告朝廷及都督行府近得行府劄子许差王彦一军但须候其到乃始差拨今王彦尚在荆南秋期已至深虑道里辽远虚费日月军马有往返跋涉之劳虽已再具申稟缘行府已巡按淮上恐得报後时有失事会敢望朝廷特赐指挥得专遣使臣齎劄命迺

邇前來截留一路不勝幸甚伏冀垂念

近以洪州積欠錢米千聞朝廷伏蒙鈞慈悉皆蠲免自非相公留情旧治察見本末何以及此某與一州士民同受大賜豈勝感激目前雖不至乏絕然防秋之計殊無贏餘已嘗援例申陳更望特賜矜察幸甚

與趙相公第十書【八月三日】

昨蒙朝廷差到統領官何球即時依稟就申世景軍中差撥軍馬令往?州措置群盜未行間適報筠州管下盜作因令就便前去措置本人全不以捕盜為意公然招收亡命冒請錢糧沿路作過搔擾民戶至有強取財物牛畜杀伤平人恐其生事檄令歸司歇泊又自擅往袁州招安所為愈甚本司別差將官馬仙前去措置適得大理寺公文根究何球盜用官物凡二十餘次割下令以職事交割與馬仙訖回歸並不聽从不免先次勾回軍兵及委提舉茶鹽趙大夫隨宜措置差人勾押前來昨日方到本司已送所属根治俟見情節續申朝廷乞重賜行遣以為將佐之戒敢望鈞慈特賜照察

梁谿集卷一百二十二

卷一百二十三

钦定四库全书

梁谿集卷一百二十三 宋 李纲 撰书十六

与赵相公第十一书 与赵相公第十二书 与赵相公第十三书
与赵相公第十四书 与秦相公第一书 与秦相公第二书

与赵相公第十一书【九月七日】

伏读诏书窃审车驾时巡郡国躬劳将士谅惟扈从跋履良勤神用某拘守郡章不获望尘瞻
向行馆第深仰跂伏幸照察

某承乏江右忽将半年左支右梧粗免旷败实赖钧芘之赐第防秋是时屡告朝廷乞遣发军
马虽蒙都督行府累割许差至今未有到者方车驾巡幸江上本路当上流重地尤不可无兵
以备不虞除具奏陈外辄以咨目条具利害仰尘钧听及遣属官罗荐可诣朝廷稟议伏望钧
慈曲加照察特赐矜从一路不胜幸甚干冒惶恐

本路盗贼虽此丰年犹未衰息尚有结集敢窥伺州县良以习俗顽悍喜报仇怨利掠货财不
顾刑法而本司军马单弱无以镇服之所致近者措置王权将招安头首解发赴都督行府军
前使唤复擒获宜春剧贼所谓黄颠叔者与其党百余人余盗稍戢但頼上殊未靖耳昨蒙行
府许先差拨数千兵前来讨荡既出榜告谕颇有惧意久之军马不到知非实然又复纷纷深
恐江上或有警报则为患不细近蒙省割委以相度措置辄以已见条陈利害申稟伏望钧察

本州城壁久不修治类多颓毁又太濶远自城北一带皆是空闲去处难於保守累具状申朝
廷乞降度牒措置修葺及截去濶远空闲去处未奉指挥今时月已迫不免将安抚司钱米那
兑支用收买材料烧变砖甃及工役夫力并不及民谨具图申呈伏望钧察所乞度牒并昨蒙
朝廷指挥令制造军器合用钱物亦累具申请并望行下支給不胜幸甚

与赵相公第十二书

某稟目顿首再拜平章都督仆射相公阁下昔贾谊有言曰守圉扞牧之臣诚死城郭封疆又
曰彼且为我死然後可与之俱生彼且为我亡然可与之俱存圣人之有金城者比物此志也
夫为守圉扞牧之臣而死城郭封疆此固常理然死或重於泰山或轻於鸿毛方其平时请于
朝者无不从也所以为守之之具者无不备也不能则继之以死宜其有鸿毛之轻至於请于
朝者不从所以为守之之具者不备徒假牧守之虚名初无扞圉之实用则志节之士所处此
者宜如何哉某自十数年来忧患相仍加以朴陋迂踈动辄齟齬所愿安於闲散休影息迹不
复敢与世故去年冬误被上恩付以江西一路重寄力具辞避不蒙矜从赐对便朝更膺殊獎

实自相公推挽之赐所以力疾之官黽勉就职者亦愿砥砺弩钝图尺寸之报也自初到任适当旱暵之余帑庾匱乏夙夜自竭簿书钱穀冗琐细碎必亲必躬方稍就绪幸此岁稔粗免旷败亦皆相公庥庇之德心非木石宁不知归近者上章引疾丐罢降诏不允训辞有边吏戒严商秋俯及之语夫防秋在迩岂守牧之臣可为去就之时然某之所以求去正以防秋之故何则叨冒大帅之名而无其实故也某昨具奏乞元置安抚制置大使司军马钱粮之半蒙朝廷关送都督行府行府割下初则曰俟秋高调发军马继又曰见议遣兵继又曰俟勾王彦一军到日分拨前去今则曰候有警急日遣兵应援是朝廷之兵不可指拟也初乞兵日蒙朝廷及行府皆降指挥许招填本路缺额禁军勾抽使唤数月之间极力招填才得六百余人近缘漕司申请钱粮复令权罢诸州不隶将兵数既不多隶将之兵以?吉盗贼之故复难调发是本路之兵不足倚仗也夫以上流重地去淮南及伪境不远沿江千余里要害之地并无甲兵可以控扼守御方边报警急仓卒扰攘之际乃欲望遣兵应援於数千里外不亦晚乎某窃料相公之意不过谓楚泗庐壽襄郢诸将屯宿重兵则江西为内地探报伪党无数路深入之计则江西可无虞故兵不必遣是大不然夫七尺之躯要在腠理千丈之堤溃於蚁穴所以防患者常在不防之地岂可以江西稍内而尽弛防守之备哉况诸将列屯相去絶远使敌人乘间为捣虚之作不知孰肯为援朝廷不预遣兵使自为防守而置一路於度外恐非计之得者自用兵以来敌人张大声势探报妄传分兵以入某路则往往无事深藏固闭匿壮示弱探报无所得则往往深入今信探报而不为一路之备是侥幸其不来尤兵家之所忌也敢望相公特垂钧虑重念某靖康间被命宣抚两河得兵二万人方欲有所施設鼓作两河之人以扞大敌然不为用事者所喜议论不合自出师才五十日即丐罢去其後谤议纷纷然某未尝辨明於俯仰不愧者以无其实故也绍兴初蒙恩起废宣抚荆广得兵万三千人招捕羣盜者数万亦不为用事者所喜到官才数月以言者罢去其後谤议亦复纷纷然某亦未尝辨明於俯仰不愧者亦以无其实故也今某幸蒙上恩委寄又荷相公知獎岂不愿图?埃之补然军马单弱财用窘乏曾无以副其区区愿效之心窃自叹息藉使勉强偷安以侥幸万一不幸稍失支梧致有缺误则平时仇怨群起而交攻之真无以自解矣此所以夙夜震惧而不遑啓处也更望相公曲加照察谨遣本司干办公事官罗荐可具沥恳悃告于行府伏望钧慈特与定义如本路合遣防秋军马即乞早赐摘那前来应副摆布控扼庶无噬脐之悔如不合遣亦乞明降的确指挥无使日夕指準悞一路士民之望而某得以早为去就不胜幸甚干冒钧严无任惶恐某稟目顿首再拜

与赵相公第十三书【十月一日】

伏审光奉朝廷还畀魁柄大慰中外之望窃以国步艰难之际准军叛散之秋上思说言登庸旧弼所以妥安庙社绥靖人心使国势增隆必自有道仁观施設以副具瞻区区不胜倾依之至

淮西叛将出於意外实非细故某辄不自揆尝奏疏指陈朝廷措置失当夙夜忧惧以俟谴呵乃蒙寬恩降诏獎諭尤切震悚进见邸报言事者论右相引汉武诛王恢事以为比窃谓太过深虑随时献说者浸失本旨而避退讲和之说复行则宗社安危未可知也辄复上章以救其失惟是出位之言实为有罪迫於忧愤有不能自己者辄録二疏副本拜呈敢望钧览如有可

采得补万分之一不胜幸甚僭易惶恐论者皆谓宰相还朝必守前议请车驾还幸平江及覩近降指挥改拨廩廩米斛并於建康府交卸又谓且抽回淮南军马沿江屯驻某窃谓朝廷措置因时制宜必不如此藩篱未固百物未备以一捷之故而遽临建康诚太早计相公争之是也今既驻蹕几年徒以淮西叛将遽复舍去使寇伪得以窥伺非良策也第当抚绥将士益务全养静以待之江北屯重兵则江南可以奠枕江北无兵而与贼共长江之利则国势危矣第当抽回老少以就粮饷最为得策敢望钧慈特赐详酌恕其僭易不胜幸甚某以忧患之余误蒙朝廷起废帅守江西已涉两年夙夜黽勉左支右梧幸免旷败实赖钧庇今秋虽旱幸不过甚米价亦不翔踊頼上盗贼蒙朝廷易守蠲免租赋尽罢科须渠魁次第公参复业境上羣盗亦皆击散吉抚筠袁间有名字者悉已招捕了当虽有些小残党留兵弹压无能为也而某自春及今衰病日深医者谓劳心太过所致七上章丐闲庶得休养未蒙矜允今幸相公还朝洞照情素辄敢力陈前恳敢望钧慈特为敷奏使得遂其所欲不胜幸甚均望矜念惶恐无地

某自春夏以来久苦疮疡才幸稍安忽得足弱筋挛之疾步履蹇缓拜跪艰难至今未愈又苦痰眩烦愤健忘复成淋疾医者谓忧虑劳心所致所以力丐闲退政欲少就全养尚有安理不然日复一日遂成痼疾不可为也谨録自春迄今乞宫祠章疏尘浼钧听庶几照察引疾丐闲非在今日敢望相公矜怜曲为敷奏特从所请俛得归休山林保养病軀不至颠仆於道路皆门下之赐也干瀆钧严不胜惶恐

某承乏於此实一年有半仰荷朝廷委寄之意不敢不勉自到任以来賑济劝诱以活饥民修筑城池创建营房缮治器甲措置钱粮招捕盗贼种种皆幸就绪独立於风波动摇之中不意自全非仰赖庇庥何以及此已开具措置事件厘为六状奏闻庶几朝廷知其请闲非敢有所规避谨以副本録呈敢望钧慈特赐详酌不胜幸甚

与赵相公第十四书【闰十月二日】

朝廷累年经营恢复之计渐有气象而以措置一失当之故淮西之军尽归伪境国势稍弱上心感悟召還元弼复畀魁柄政犹羸瘵之人非得活国之手厥疾弗瘳然理义人心之所同然号令施設犁然有当於人心则不约而自服转弱为强以啓中兴之运有不难也相公留意天下幸甚

某以非才误蒙朝廷委寄一路自今春以来援疾求去至于七八近复上章遂乞挂冠实缘衰病非敢饰辞上恩隆厚未忍弃捐屡降诏旨不从所请敢不力疾黽勉以图报万一然本路实为上流重地当寇伪乘间窥伺之秋军马单弱无以控扼万一有贼马冲突何以待之辄具防冬事件仰干朝廷其间乞兵一事尤为最急如蒙摘那可用兵将五千人与见管者相兼使唤某虽不武愿当一面不能即继之以死报上恩兵将无有虽留某於此无益也愿先罢黜实不敢虚受重责伏望钧慈特赐矜察惶恐无地

议者多谓朝廷以张俊屯淮西以岳飞保上流则江西乃为内地又谓万一贼马渡江力不敌

即退保以避之是皆不然岳飞虽有保上流之名而无其实去岁所遣蕲阳水军才数百人安能控扼今岁犹未至也张俊虽进屯淮西而舒蕲江黄未闻有重兵以为扞蔽江西最为虚处岂得不预为之备退避之说不可施於今日如豫章九江不能固守而事退避则抚吉筠袁诸郡皆将为贼占据岂可复得也如朝廷必欲固守则愿假某以所乞之兵如置一路於度外则夫人而可为帅似不必坚留於此非不知朝廷新失淮西之军兵将缺乏然摘那於当用去处有不可已者某顷在湖南吴锡为统制官颇谙使唤如得差拨不胜幸甚不然即别得一项军马亦可敢望钧慈曲赐应副情迫辞切惶恐无地本路盗贼招捕略尽近日贛上又擒获杀散所谓刘宣刘花等者?贼自此当少衰矣唯袁之萍乡吉之永新与湖南接界尚有数火人数亦不甚多已遣属官前去措置督捕会合两路军马讨杀庶几静尽得免旷弛实自钧茆所及前此本司招捕盗贼逐火了当本房签书官及人吏皆随功状蒙朝廷推恩自某到任并未曾申陈今类聚招捕盗贼火数千告朝廷乞量与推赏庶几有以激劝伏望钧慈幸察

本司累申朝廷乞降指挥催促岳飞分兵屯驻九江至今未有到者近日光州等处探报贼马渐有渡淮作过者诸县颇遭虏劫蕲黄一带并无障蔽如九江重地岂可缺兵往年马进占据用兵攻讨半岁迺克今不早为之备一旦残破迺图剋复岂不劳费如岳飞之兵果不可分即乞朝廷别差一项军马屯驻防托在今日守臣尤宜得人谓当权时之宜选差有名望武臣为守使之措画窃见承宣使刘锡沈鹜有谋谄练军政傥蒙朝廷驱策必有可观非特一路之幸敢望钧慈特赐照察

与秦相公第一书

某顿首再拜啓窃审车驾时巡郡国亲劳六师有烦旧弼典司留钥根本之地遂增九鼎之重谅惟眷注之隆行即登庸复畀魁柄以穆天綍中外之望非独区区荷照知之所私愿也

某再拜上啓区区承乏豫章行半年矣幸此岁稔目前粗可支梧近上疏丐闲蒙恩不允迫於防秋及闻车驾顺动未敢坚请傥幸今冬无虞为归欵之计决矣何当瞻晤少奉至言遯风不胜依仰之至

与秦相公第二书【七月二十四日】

某顿首再拜衰晚无堪滥膺阃寄初无善状日俟譴诃误蒙上恩俾之迁秩无功之赏实不敢当力具奏辞免不蒙矜允迫於威命龟勉祇受愧溢于中载惟叨冒出自枢密相公推挽吹嘘之赐铭佩之情何有穷已辄裁短啓以叙谢悃伏幸钧览不胜悚息

某自春夏间苦疮疡为梗近复中湿得筋挛之疾行步拜跪皆有所妨此衆人所见非敢有所托加以痰眩动多遗忘忧患之余血气凋耗自应如此深虑当一路之寄有误国事累具奏乞置闲散未蒙矜允敢以劄子上干鸿造伏望钧慈特赐敷奏使得脱此繁剧休养衰疾莫大之幸冒昧惶恐

某区区所恳实出诚悃非以备礼素荷眷照之厚必蒙矜察如江西日来盗贼渐息豫章财赋料理亦粗足用非不欲尸素以度岁月实以衰病有不能堪者一路委寄之重有非踈拙所能任者自非投诚於公谁复见怜去岁尝致书赵相辄敢録呈伏幸钧览窃见李光瑞明雅有方面才置之海隅未厌士论如以代某必有可观并望垂念幸甚幸甚

某悚息再啓本路自今春?寇猖獗千百为群傲颯者纷纷本司遣发兵将渐次招捕今已尽获其首领惟李安静者最号狡猾势已迫蹙乞受招安更旬日间可见次第区区素无指踪捕盗之才实赖朝廷威德将士効命所致辄具劄目拜呈将士功状继此以上并望钧念秋色已深朝廷守御之备计已有定议如九江上流重地车驾驻蹕建康此地岂可不宿重兵以为控扼谅惟规画部分已毕本司初不曾被受约束指挥辄具申禀敢望钧旨详酌行下不胜幸甚

本路得李贵步谅两军弹压讨捕?寇庶几今冬不敢猖獗然步谅钱粮已蒙朝廷以月桩应副李贵一军未蒙指挥州县窘匱实无寛剩可以?那元系福建军马如许令用上供钱物养贍却令福建桩发上供於事为便更望钧察李贵者近为贼所中伤乞寻医养疾愿选差有名望统兵官付以此军庶几缓急可以使唤并乞垂念

某以本路利害数事奏陈谨録副本拜呈皆系於邦本不可不烦朝廷留念者相公以身任天下之重愿赐钧察

某再拜啓张柔直近过此以贛上缺乏为言本司辍那万缗五千斛应副既至庐陵又以闻贛上缺乏之甚不肯进不免再以三千斛及朝廷钞引钱济其目前之急今闻已到官矣如贛上有盗贼之扰及官吏失於措置仓库匱竭诚可骇闻若非朝廷支拨应副其何能济亦尝开具申陈必蒙照察也

梁谿集卷一百二十三

卷一百二十四

钦定四库全书

梁谿集卷一百二十四 宋 李纲 撰书十七

与张相公第一书 与张相公第二书 与张相公第三书 与张相公第四书 与张相公第五书
与张相公第六书 与张相公第七书 与张相公第八书 与张相公第九书

与张相公第一书

某衰病无堪误蒙钧慈力赐推挽俾当帅守之任自顾阙然何以仰副朝廷委寄之意感愧之情无以为喻比已交割职事仰托大茆庶几免於罪戾辱眷素厚更望有以覆护之不胜幸甚

江西当去岁旱暵之余种种凋弊到任之初钱粮尤为缺乏支給官吏军兵体料钱米月计六千余贯硕养申世景一军久依此数之外而仓库枵然并无储蓄急缺之甚自非朝廷行府辍那应副次难支梧必致生事辄具状申禀敢望钧慈特赐矜察推其赢余以济难窘少纾目前之急非特某之幸实一路之幸也干瀆不胜惶恐

本路当控扼之冲实为上流重寄自来屯驻重兵支降钱粮色色宽裕近年分拨军马付之他将转移钱粮为之一空缓急之际何以支梧伏蒙朝廷以所乞军马缺送都督行府至今未奉指挥兼?州残党向存近岳飞勾回李山一军复肆猖獗加以凶岁饥民易为啸聚袁吉建昌之间复有窃发者颇多申世景军马止千余人分布招捕不足深虑势渐滋蔓将来难以扑灭已具状申禀乞先次辍那三二千人应副使唤伏望钧慈深加照察早赐施行顒望之情以日为岁不胜千恳之至昨陛对日得旨措置赈济务令实惠及民近又祇奉亲笔诏书令劝诱上户减价出粜见遵禀圣旨施行缘下户乏本耕凿已渐失时升合之济未能有补已一面措置劝诱上户入纳钱米以助赈贷使下户有本种田将来秋成可望方可不误岁计容措置就绪续拜闻次幸冀钧照

与张相公第二书【四月二十一日】

某衰病无堪不复敢与世故蒙相公推挽之力感德难胜然到本路之初仓无见粮帑无积镪日支月给皆无指准殊难措置虽蒙朝廷拨到茶引钱二万缗以目前米价计之才可余千有余石正可充月给六分之一县道括刷民间劝诱皆已殫一辄具劄子干瀆行府愿推赢余以济数月之窘使目前用度不缺乃可为将来永久之计敢望钧慈特赐轸念一路之幸非独某受赐也惶恐惶恐

宠谕所乞军马钱粮俟至秋间发遣仰荷盛德亡以为喻然?吉州自抽回李山军马後羣盗复出没作过袁州为攸县贼所侵凡五千余人临江建昌亦有啸聚者通计度万数申世景一军

止及千人已遣五百人前去招捕深虑军马单弱不能成功如范汝为杨么之徒皆是微时不治遂致滋蔓竟烦朝廷遣发大兵所费不貲已具状申行府乞先差拨就近三二千人付本司相兼使唤庶几羣盗早得殄灭亦可训练为将来防秋之计敢望垂念早降指挥不胜幸甚

某辄有论财用数事具劄子申禀又有论兵劄子副本仰瀆钧听幸赐采览

窃以相公膺大任绾重权以图恢复大计正宜虚已广谋以屈羣策愿听逆耳之言勿受逊志之语则辅成中兴之功不难致矣某特荷照知愿为直谅之友以裨补万一言或激切幸冀容恕而察其区区之心可也冒昧不胜惶恐之至

与张相公第三书

窃审钧旆尝渡江犒师至承楚间伏计已遂还辕方此隆暑跋履冲涉不无劳止防秋在迕措画扞御益勤神用更冀保养粹和定而後应茂建中兴之基天下不胜幸甚

某承乏豫章行且两月远托钧芘幸免旷败种种料理不敢惮烦粗已就绪唯是钱粮缺乏适当新陈不交之时极为费力又防秋之期不远茫然未知所措日以悚惕蒙许遣兵仰荷垂念頼上盗贼纷纷虽未惩创得乘此间暇时措置讨捕诚为得策将来沿江或有警急而本路腹心之中亦非细故也更望早赐指挥差拨幸甚累具状申行府乞於刘光世岳飞军中差兵将屯舒蕲黄不唯此地不可缺兵本路藉其蔽障而三郡乃其所部辍那军马似未为过敢望钧慈特赐行下一路幸甚本路昨蒙朝廷於饶州支米万硕守臣占吝不肯应副已累申朝廷乞就沿江有米州军支拨至今未奉回降指挥今再具状申行府方此急缺之际得此万斛庶几少苏敢望指挥行下江东都转运司支拨应副幸甚叠叠干冒朝廷但有惶恐

被受行府劄子委令招填本路缺额禁军见已遵依施行缘本司全缺材武使臣可以部辖训练欲依将兵法辟置部队将等具状申禀敢望钧慈特为早赐指挥行下幸甚

与张相公第四书

某悚息再拜某衰病无堪误蒙上恩付以一路之寄实自相公爱怜推挽所致铭佩之情无以自喻龟勉於此亦既累月适当早暵之余措置料理升合分文收支均节莫匪躬亲久蒙朝廷应副粗能支梧日前於预为防秋之计则茫然未有指準素多思虑日夕忧惕遂觉心气不宁宿疾间作深恐旷缺复致人言以貽朝廷羞今幸赉济就绪雨暘调适有丰年之望於此时求去似无嫌避已奏闻乞依旧宫观差遣敢望钧慈特为敷奏使得养痾山林保全晚节则终始之赐莫大之幸也恃照与之厚辄敢及此惶恐惶恐

某再拜啓累以本路合差军马上千钧听两被行府劄子见议遣兵仰荷垂念今去秋不远深虑必待有警急而後遣决致缓不及事江西重地屯正兵万人既不为多舒蕲三州就刘岳军中分兵驻泊事势又顺敢望特加钧虑早赐差拨一路幸甚有条陈利害奏劄谨録副本纳

呈伏幸省览某以多病情况不堪决为去计犹敢以此浼闻诚以一路利害实系国家休戚不敢以将去而默默也万乞照察

某再拜啓某昨者既以狂瞽之言仰瀆天聰又以副本尘浼钧听过蒙采纳褒予之厚益深愧惧昔秦穆公还自崤而作秦誓诸侯之事耳圣人取以继三代王言之後诚以其言合於道也相公好善受言无愧古人求於近世数十年来盖未之有此某之所以私窃仰服至於喜而不寐也近尝复以迂?之论裨补万一方此震悚被来教知必照察其精诚其心乃安更望相公持以不倦以屈羣策则功业光大辅成中兴何难之有僭易及此实赖深眷惶恐无地

某再拜伏蒙纸尾垂谕徐为後图钧诲及此策虑尽善夫复何道以愚意料之今岁敌必南牧定戒前日之无功改动其辙则吾之所以应之者亦岂可守株岳侯移屯襄阳则上流一带尽无军马控扼缓急何以相应援此相公之所当深虑也本司乞兵数日一申非敢煎迫实以事势已急不得不如此果蒙颐指日下调发到此已是七月间兵须拊循而後可用不拊循而用之虽韩信亦须背水出奇非常道也如得吴锡辈素尝使唤者尤为幸甚切望留念吉州战船沉江中已半年余损坏已甚有状申禀乞付本司拆造防江庶犹可用亦望指挥惶恐惶恐

某惶恐伏蒙钧慈特有颁赐衣着茶药多品礼意勤腆在於菲陋何以克当第深悚感既不敢固辞又无以致答惟当时以药石之言仰报盛德耳昔孔明下教曰诸君第勤攻吾短庶几蜀可治而中原可复愿相公无忘孔明之志则所以永安宗社而大庇生灵者必有在矣惶恐惶恐

某惶恐某窃见交子之法初若可行其後官私皆受其弊而卒於不可行与其至於不可行而後改曷若未行而罢之为愈也崇观间盖尝行之矣然未几改法则是不可行之明验也某辄具劄子论其利害敢私布於左右相公以天下为任而眷倚之重言无不从愿以一言告上及未行而罢之则生灵蒙福何可胜计切望垂念

与张相公第五书【十八日】

窃闻诸大将近已渡江分戍淮上岳侯已趋襄阳臂指之势既成首尾之应必至敌虽未战胜负之计已决矣方今国家之安危系於相公相公之勲业系於此举所愿奠而後发无欲速未见小利量敌而後进虑胜而後会则敌在目中恢复之功不难致也某素荷照知不胜祈恳之至

刘光世移军合淝岳飞进屯襄阳去江益远全无控扼缓急何以应援某累具申禀乞差拨军马非独以本路乏兵之故如襄阳一军财赋仰给本路粮道经由蕲黄沔鄂乃咽喉之地如使贼兵窥伺乘虚惊扰无兵将以扞之则一路财赋何由得粮道阻塞大军坐困其所系非细故也愿相公深思愚言勿吝遣兵使某得以竭尽区区少助万一莫大之幸今再具劄子尘瀆钧听幸望加察

与张相公第六书【七月六日】

近者专人上状伏计获尘听览六月初所遣人还特蒙贬损海翰所以慰劳有加佩服眷情亡以为喻窃审钧旆北渡总制羣帅已临盱眙虽祖逖济江誓扫清中原裴度视师志不与贼俱生方之精忠未足多道更望料敌制胜以谋为先克建大功以副睿主委任恢复之意天下幸甚军事方兴愿言总大略省细故保养粹和与国同休益受多祉区区倾颂

某承乏豫章忽忽三月偶未旷失实自辉苾所及早稻既稔之後公私少宽措置财用支梧目前亦不至缺乏但秋气已至防守之具阙然人情不安反以见尤所以频有申禀诚非获已今蒙割命欲遣王彦一军非荷垂念一路何以及此岂胜铭佩近亦深虑诸大帅已移屯淮上恐行府未必有兵可分惟此一军方顺流而来似可截拨以副急需因疾置冒昧有请度今犹未到也先承钧虑之及感服之深何可言喻然必待到行府然後差拨诚恐往还虚负日月且军马有跋涉之劳到此後期或致失事今再具状申陈伏望钧慈详酌止令就便赴本司分擘防秋及讨捕盗贼使唤事定即发还麾下或别有措置亦未晚也惶恐惶恐

王彦者闻颇忠勇善驭下但中间缘钱粮缺乏部曲有开散者如蒙钧慈许存留於此责以来效必肯竭力以防扞一方然昨屯驻荆南系四川财赋贍养今本路州县财赋以应副岳侯大军已为窘迫须得指挥转运司以系省不系省上供等钱米桩簇应副乃可不致缺乏亦具申禀敢乞垂念

本州以去岁早暵之後仓无颗粒之储今虽遵依前降指挥受纳早米然所得升合之耗仅足月支官兵粮食更无赢余以备防秋缓急用度近尝申禀乞许本司随苗带余庶几少有储蓄以待不虞敢望钧慈详酌行下今岁之稔倍於常年乘此机会不可失也如待将来乏绝旋行措置即已为兼并之家所蓄不得已而科敷即所扰多矣伏幸裁察

别纸蒙下询非相公虚已广谋何以及此大抵兵家临机制胜难以预料以弱为强转危为安止在俛仰之间昔谢元破苻坚百万之衆只缘苻融之却阵周瑜赤壁之胜只缘风便可以纵火此岂可预料哉要之临敌慎重行师以律者其本也见机而作应变无方者其机也不贪近功以图大利必胜之举也愿相公思之近世治兵有可恨者设将太少与兵太多设将少则难制服与兵多则难运掉必欲用兵无不如志要当反此恐须不免上烦料理

与张相公第七书【二十一日】

伏承垂谕诸师进屯措画大略一二不胜叹仰士风不振勇者孤进隋者偷安莫相应援遂使巨寇积稔逋诛而恢复之功未建者职此之由某前疏所论正为此设也今者号令既行臂指之势既顺则扞御侵軼乘机决胜亡不可者非相公威德足以服之未易致此然蜂虿有毒盗贼多智更望临敌慎重於不必备处过为之防不胜幸甚

伏蒙宠谕遣发军马仰荷钧念某累具申禀本路不可无兵利害事理之极谅蒙照察近具劄

子论岳飞移军襄阳财用粮饷仰给本路使秋高江上有警无兵扞御则州县骚动何所取财粮道梗塞何由可达一军坐困此行府所当忧也利害尤大前劄恐未達鈞览今再錄呈又恐鈞慮謂江东两军既行事体相若此大不然江东去伪境远前有大兵蔽障而又去朝廷行府近缓急声援可及本路去伪境近江南北并无兵控扼而又去朝廷行府远此不可不察也惶恐惶恐

本路比来雨暘以时早稻既获其收数倍常年米价顿减人情少苏但以秋期在近方朝廷用兵之时控扼絕无军马不免惶惑又前此数年类屯重兵今独无有士大夫往往以此见责实无以答之?吉间盜賊紛紛日滋所由此故敢望鈞慈特賜矜察於所乞军马中先次差拨数千人及秋初至此以安人心以弭物议或诸师下未可差师乞於麾下摘那不胜幸甚前所陈乞於刘岳军中差兵屯驻舒蕲黃州事理似顺并望垂念某近以賑濟劝糴就緒衰病日甚不敢当一路重寄已具奏聞乞依旧在外宮祠未奉指揮然不敢以欲去之故苟簡灭裂在此一日则料理一日之事如招填卒伍教习训练制造器甲修建营房措置钱粮之类皆渐成次第仰托大芘庶免旷责惟是土风未靖奔竞苟得尤觉过於往时辟缺不足以副其求供须不足以滿其意则往往造为謗讟以务中伤此尤非患难之余所可堪者如蒙鈞慈矜照借以一言之重使得脱此忧恼复自遂於山林之间实荷始终之賜悚息悚息

与张相公第八书【七月十一日】

窃审鈞旆已次龟山庚伏在候諒惟匱泊不无劳止军事方兴切望保蓄精神以静制动定而後应以建不世之勳以成中兴之业不胜祈懇

近准行府劄子许拨差王彦军马讨捕羣盜且为防秋之计一路受賜岂可具言然必待到行府而後遣即有道途往返之劳且虚费日月誠恐有失事会已具狀申稟恐或有阻滯未到今再申明敢望鈞慈詳酌许令王彦到江州日就便赴本司不胜幸甚如蒙开可乞差使臣齎劄命迺邐前来告示王彦军中及付本司照会幸冀垂念

临江军申蕭建功者实有文学节操为士人之所推称内翰朱震江东都运向子諲皆深知其为人本司及转运司保明申奏朝廷乞依近例收召审察必有可观今具申行府敢望鈞慈更賜詢訪特与敷奏不胜幸甚

与张相公第九书【八月四日】

秋气益高军事方棘諒惟总统措画不无少勤神用更望保蓄精神以应机变光辅中兴之业天下幸甚伏蒙宠諭军马仰荷鈞念大兵方列屯淮泗以图恢复而此地在江之南某岂不知势有缓急譬如七尺之軀所当保护者在於腠理江西今之腠理也诸帅联屯相去濶远使賊出於乘間搗虛之计正如賊風飄暴伤人仓卒何以支梧以一路十余郡付一书生使之谈笑折冲恐无此理更望鈞慈特賜垂察某近上章請宮祠未蒙俞允朝夕再具奏陳期於得請愿力賜陶铸莫大之幸劇賊王权苏胜久在湖南江西两界首作过累经招安继复啸聚人甚苦

之近因湖南将官裴铎杀散以数百人潜迹山谷依旧作过本司以旗榜委吉守李弥逊遣人招诱方出公参除放散党与外有头首并强壮人三十三名此曹如放还本土决复啸聚为患未艾因面谕以祸福使发赴行府自效已皆遵稟次日首领四人退悔具状乞免发遣已送所属根治违节制之罪其余二十九人已擢第五名为首领借补进勇副尉遣使臣官兵管押至行府敢望钧慈特赐指挥将首领一人补正外其余分刺诸军严加约束有擅自走回者许诸色人捕斩庶几可絶後患不胜幸甚已具公状申陈伏望钧察

某近者不揆辍应诏以八事奏陈迂濶之言顾亦何补姑尽其区区之愚而已谨以副本拜呈幸望钧览体问得王彦军马已到鄂渚非晚恐过九江前书累尝拜恳欲就近存留不知蒙垂念不窃闻此军亦多乌合非王彦不能制之如到行府简留精锐或遣它将统率前来亦恐无补於事更望钧慈特赐加察

梁谿集卷一百二十四

<集部,别集类,南宋建炎至德佑,梁谿集>

卷一百二十五

钦定四库全书

梁谿集卷一百二十五 宋 李纲 撰书十八

与张相公第十书 与张相公第十一书 与张相公第十二书
与张相公第十三书 与张相公第十四书 与张相公第十五书 与张相公第十六书
与张相公第十七书 与张相公第十八书 与张相公第十九书 与张相公第二十书

与张相公第十书【九月九日】

某累以本路军马上千钧听被受割命书赐每蒙许以遣发岂胜感激然俟望之切岁云暮矣尚未有至者辱近教乃承谕以俟有警急乃遣第深惘然相公总重兵以临大敌方事之棘固难於分人然某亦荷甄陶付以一路重寄无兵无将何以为防扞之计缓急有警而望遣援其能及乎更望垂念所以处已处人者两尽其宜不胜幸甚谨具稟目并遣属官罗荐可诣行府谄稟伏幸钧察

某前乞军马万人今岂敢望此但得朝廷量行差拨本司随宜措置足矣喋喋干冒亦非谓得此兵便可倚仗以扞强敌但欲王灵所及人心自安盗贼自弭风声所暨或销患於冥冥非荷相公知照何敢及此昨被行府割命欲先次遣兵讨荡?寇今州郡预备钱粮寻即行下闻作过者颇戢歛今既阅时殊无事实又复纷纷动以千百为羣至敢窥伺州县如吉州近日告获?贼数十人皆散在民间欲为内应幸而彰露使稍有虞岂不貽朝廷忧哉荷相公期待之厚岂忍使愁坐於此朝夕惴惴若无所措事迫情切不觉叨叨死罪死罪

某衰病无堪仰荷上恩委寄之重黽勉自效不敢少暇迺来措置钱粮制造器甲修建营房营造城壁渐向就绪所乏者军马耳如蒙相公少分麾下数千人使某得以为朝廷保守一方讨捕?吉间寇盗一变旧习复有承平气象亦不虚度岁月然後幅巾柴车返于故栖区区之愿足矣幸望钧察所遣罗荐可佳士顷在高邮立节甚着学问行义皆有过人者愿与之进不胜幸甚幸甚

别幅蒙海谕非荷相公爱念何以及此今大将重兵列屯淮泗敌人必亦啸聚有以待我王师欲亟进则恐胜负之势或未可知欲相与持久则又有师老财费钱粮匱乏之忧此宜相公夙夜之所轸虑也

岳飞捷音系路此可喜亦可惧颇闻骄伪之谋欲捐州县以深入诱我今所遇之敌皆中土之民非劲骑也王师既到宜其望风奔溃若为利诱恐或堕其计中不可不察大抵今日进兵当以招抚为先得地当以保?为上则中原渐有恢复之理僭伪渐有逼逐之势若如平时入生界得地不守惟以扫荡为事重失故民之心恐非策之得者幸望垂念惶恐惶恐

与张相公第十一书

某悚息再拜某已作书方欲遣发适得蕲州报贼马渡淮而南以孔彦舟为前锋步骑相继莫知其数朝廷必已闻其详淮西诸州既得指挥移治则江北全无扞蔽江南要害去处又无兵将控扼危急之甚束手无可措画万一使遂渡江豫章城壁方欲下手修治殊未有次第欲去不可不知相公将何以教之窃料贼兵止是签军朝廷如遣精锐军马自淮南合岳侯之兵角舟夹击必可取胜而防江之兵又自是一段不可阙也两劄谨录呈出奇之说似或可取愿相公深思之医家疗病常患实实而虚虚今日之事亦有此失某尝以防患故当在不必防处拜稟正欲救此如於实处设疑虚处设实以待之则其胜必矣蒙眷照僭易惶恐之至某悚息再拜

与张相公第十二书【十月二十四日】

近者人还特蒙教赐仰荷慰藉之厚累布问记室当尽逵钩览窃审入覲朝廷从容啓沃复为视师之行霜露戒寒计亦劳止瞻望黄阁无由少承诲言向风悃跂之至

伏领行府捷报窃承王师大胜贼骑於淮淝之上指踪诸将尽出宏规此与谢安遣偏师以破苻坚之衆亦何以异既与中外共庆尤切叹仰然重兵为後黠敌常态骤胜而骄兵家所忌愿相公深思预防持胜之道有以待之则前日之捷足以摧其锋後日之胜足以落其胆中兴之势成矣更冀於不必防处曲加提备以江西一路空虚为念深所望於左右也仰恃爱念冒昧及此惶恐无地

某近者再上章丐闲实以难任重责之故蒙恩不允益深震惧素荷眷怜必亮此心不以喋喋欲去为罪也或者谓某蒙相公知炤之厚推挽使处上流重地许兵屡矣而卒莫之遣似非真相知者是大不然相公以恢复天下为心某以保守一路为意所职不同各行其志是乃所以为相知也然我师既胜之後突骑再来必变动其术医家欲虚所实而实所虚实处可以设疑虚处必为堤备江西虚矣愿相公深所实之此非谋自为也切幸无忽

一路将兵听帅司节制此祖宗法也全将兵许本司勾抽使唤此近日朝廷行下圣旨指挥也本路将兵尽在?吉以有贼盗残党之故不欲尽起止令团结一半以应警急之须?守孙佑辄占愆不遣如此则何以帅为可谓失职矣谨具申稟敢望特赐行下不胜幸甚得虞宪劄目贛上盗贼衰息谨录拜呈纵有些小所存一半将兵自足弹压措置并望钧照

近承朝廷指挥岳飞分兵屯驻九江至今尚犹未到昨日得报止遣水军屯蕲阳要领九江有兵与之相照应乃为得策更望劄下促其调发甚幸某所乞韩京李贵兵将之半切望垂念得此则粗可以为声势昨已得指挥听本路都统节制使唤以讨?寇则藉其力为数月防冬之备於理似顺伏幸留念揆寻至此亦可谓穷急矣想蒙悯笑也惶恐惶恐

与张相公第十三书

某近者辄以已见利害仰瀆听览伏蒙钧慈既容其拙直又许以忠嘉感惧之情无以为喻苟有所见敢不自竭窃覩邸报韩侯淮阳之捷为之喜而不寐已而闻之北来士大夫颇有异论虽得言多浮其实未必信然要之王师之举奠而後发当如破竹建瓴使人心响应则大勲易集今羣师未动初无牵制策应之师而孤军独住则其进似太銳援兵既至未尝设伏以谋胜之反为所困仅能溃围而出遽还故垒则退似太速而所得郡县既不界守必有遭诛屠而失望者此某之所以初喜中疑而卒以为忧也深虑韩侯忠勇忿於小失率师复进堕贼计中则安危存亡所系岂浅浅也伏望相公特留钧念使如辛毗者杖节军门制其轻战自秋徂冬且务静重为自防之计以观敌人之动静徐为後图乃策之上者秋高马肥万一北人南牧而吾之疆场有备以逸待劳固已得策借使衅端既开而彼不能来则敌人之情可以坐料然後总统羣帅合谋并力迭相应援鼓行而前必有合於天人之愿者矣传曰师能左右之曰以如人之有左右手足运行作止莫不在我乃能如意使平居不能运掉则缓急何所倚仗哉更望相公加意於此勇者抑之使毋锐进惰者作之使毋媮逸赏罚兼用恩威并行则成此武功何远之有相公蒙上委任之重以一身佩天下之安危而某久荷国恩实与朝廷同其休戚素荷相公知照之厚直以古人相期则临大利害敢不展尽底蘊以效区区之愚忠至於出位之罪则非所敢逃也冒昧僭易惶恐无地伏冀裁察

与张相公第十四书【十二月七日】

比见朝廷行下诸将捷音前此所未尝有也指踪之力实自庙谟中外共庆行岳帅报寇伪相兼侵犯襄邓信阳兵势重厚意欲窥图上流所谋不浅缘荆湖接连江西一带地里濶远别无军马屯驻深虑岳帅孤军难以独力支梧欲望朝廷遣发策应之师庶几可以扞御决收奇功已具申禀伏望钧慈特赐详察不胜幸甚某略以本路乏防冬之兵仰千钧听重蒙下谕良深愧戢今日淮西既捷得以少安实赖钧芘第襄汉之寇复尔侵扰本路终以空虚之故不能自保岳侯屯驻九江蕲阳军马悉已将带前去沿江千里略无控扼夙夜不遑更望钧慈特赐垂念非独某之幸也

窃闻淮西之捷实缘钧旆亲届当涂号令督战所致古人用兵投机之会间不容发良切钦叹今者敌兵侵扰上流虽岳帅勇锐深虑孤军难以独抗不测之虏所系不细相公以身任天下安危如不憚数千里之远一临九江武昌大其声援将士用命决有成功之理四海之望实在此举幸望深留钧念

自昔窥覩东南未有不从上流者今敌人以重兵侵犯襄汉其势恐非淮西之比包藏祸心必有所在愿相公深虑之如刘光世之兵非得相公统大兵以督帅又得杨沂中为之策应岂能既退而复进变败而为成岳飞孤军独当荆湖又与江淮接境并无军马扞贼实皆上流重地势须摘那诸将应援相为掎角乃可倚仗如蒙钧旆亲临一号令尤善之善者也为宗社计谅惟不憚跋涉之劳区区愚虑出此幸望钧察惶恐无地

某昨被受亲笔手诏二道谨募勒上石辄以装轴碑本拜纳左右幸赐钧览

与张相公第十五书【十二月十八日】

伏审介圭入覲已远行朝虽吉甫之归周邦咸喜无以过也伫听策勲膺受多祉续驰庆次诸将屡捷贼马退遁边境宁谧诚宗社之休生灵之福非相公以身任天下之重冒不测之险以报上恩畴克如此不知且固吾圉为复遂行进讨之策此二者正当审处区区愚见谓伪齐既屈必且祈哀於金人骄强之衆虽未必来然自此正恐有劳钧虑耳

近得岳帅报以偏师屡败敌人然置蔡不取已遂歛兵岂有深意耶本谓虜伪相兼窥伺上流势须烦钧旆一到督诸将犄角应援可成大功今既如此愿且当轴处中以观机会徐为後图今日之事惟当自治待时而奋根本壮而枝叶不足虑也切望留念惶恐惶恐

某承乏於此忽见岁暮初以防冬军马缺乏为忧今赖王师之捷遂免疎虞一方宁谧实自钧芘所致岂不知幸第衰病相仍忧虑过当髭髮尽白非复昔年侍坐之时深愿退处闲散渐为归老之计止候春初解严即力申前请敢望钧念深所望於门下也

少意仰瀆钧听本路虽得一稔然去岁旱暵之甚民力未苏起催户贴钱万数浩瀚颇以为苦又月桩钱运赴湖北遂觉钱荒如蒙朝廷令作两限催理及许折纳斛?庶几少寛民力用关子和采若支请无阻诚为利便本司近就洪州兑二万缗回易正合所降法意乃为建康榷货务阻难恐非所以取信於远方皆具状申禀敢望钧慈早赐指挥行下不胜幸甚

与张相公第十六书【十二月十八日】

自淮上王师屡捷之後边境宁谧惟襄汉间尚有出没岳帅累挫其锋防冬遂可无虞实自相公以身任天下之重略不世出之所致顾如某者滥当一路之寄亦赖芘辉得免旷败其为感服岂易具陈辄有已见二事具劄子奏闻副本谨録上呈或可施用幸望采览不胜惶恐

本司当边报警急之际依准行府指挥勾抽?州一半将兵欲就沿江控扼使唤守臣孙佑妄以盗贼为名占愆不遣虽蒙朝廷再降指挥并不依应今来诸路大兵扞退贼马沿江平宁本司目前不须前件将兵已劄下?州权免起发深虑本路诸州自此解体不复遵禀本司节制缓急难以调发已具奏闻及送袁州取勘外敢望钧慈特赐详察兼契勘本路将兵旧有指挥分上下半年更戍洪州缘中间罢帅司及?州拨隶湖北路遂尽数遣还近年虽复旧制缘有朝廷差到大使司兵三万人不复申请今具状申禀伏乞早赐指挥施行不胜幸甚

伏蒙委置建康木植已累行下?袁等州计置应副得逐州报悉皆推托缘本路出产木植止此数州虽已再行催促更望朝廷行下庶几不敢弛慢如?守孙佑凡系本司依例合责办诸州事件并不应副非独占吝将兵而已如某方欲引退岂敢复与之校但帅司事体恐自此废更望钧慈曲赐详察

某夏初抵豫章忽见岁杪缘一念之故措置诸事稍稍就绪今兹防冬仰赖庇庥又得无虞寧

不知幸第衰病日加顿觉心力不逮前时止候开春即伸前请干告朝廷求就闲散已尝布露腹心敢望钧慈豫择代者使得便脱此莫大之幸李光端明如未召还亦当处之方面以之代某必有可观仰恃眷怜辄敢及此惶恐无地

与张相公第十七书【正月十三日】

窃以自昔创业中兴之主必有不二心之臣为之辅翼相与以诚乃克大有为於天下仰观圣主待遇元勳礼无与二而相公精忠许国身任安危可谓无愧於古矣修政攘戎削平僭伪坐收恢复之功祗在朝夕区区不胜倾望依归之至

自去冬王师大捷之後边境寧谧中外晏然御侮折冲之功可谓盛矣窃闻车驾决策驻蹕建康兹惟其时然淮南藩篱谓宜料理审择要害之地建筑城垒以为控扼预备不虞区区愚见僭易浼闻不胜惶恐

某窃谓朝廷欲致中兴用兵祗是一事要当以进人材修政事固根本明是非分别君子小人为先惟相公留意天下幸甚幸甚

某屡致书拜恳以衰病相仍心力不逮难当繁剧欲丐闲散今幸防冬无虞仰托钧慈得免旷败可遂前请已具奏闻乞罢帅事除一在外宫观敢望钧慈察其非敢备礼特赐陶铸使得养疾山林渐为归老菟裘之计仰荷厚德何有穷已干冒不胜悚息之至

本司有申朝廷数事不敢以欲去之故遂废陈禀辄具劄子拜呈敢望钧慈特赐详酌行下不胜幸甚

与张相公第十八书【正月十五日】

近与漕司同具奏及申朝廷以?贼谢小鬼等聚集数千人侵犯吉州残破永丰吉水两县逼近州城作过溃散官兵本司已遣发两头项军马前去讨捕深虑兵数不多难以扞御乞自朝廷就近摘那兵将应副捉杀及闻朝廷见勾抽福建统制官王进军马赴行在乞降指挥令就便前来权听使唤侯讨捕了日发回伏望钧慈早赐详酌施行一路不胜幸甚

春首农事方兴又当官司受纳装发之际盗贼猖獗为患不细如残破永丰吉水两县所失钱穀甚多杀戮惨酷实缘?守以邻境为壑本司兵力单弱不能镇服所致吉州两日来未得贼退之报筠袁诸邑已有僭颺者深虑滋蔓难制伏望钧慈以一路生灵财赋为念早赐遣发王进军马会合讨捕庶几凶徒速就平殄干冒不胜悚息之至

与张相公第十九书【正月三十日】

伏蒙钧慈以今日进守之计下询顾惟迂?岂足与此窃谓进守一道也能守然後能进正犹弈

棋自固然後能胜敌今车驾将幸建康楚泗皆已修坚城其策得矣庠壽襄邓恐亦须如此措置更宜深考古迹如濡须坞牛渚圻之类筑垒屯兵以备不虞使犬羊不能侵突貔虎有以养威见可而进今日之至计也奏御劄子辄録副本拜呈敢望钧察冒昧惶恐之至

?贼谢小鬼等结集凶徒数千人侵犯吉州破永丰吉水两县溃散官军驱执将佐残害甚衆本司遣两项军马前去讨杀并督将兵会合掩击幸获胜捷已催督进兵追袭穷捕第恐兵力单薄未能尽其根株如蒙朝廷济师乘此闲暇之时扫荡巢穴使旧习稍革良民得以安业亦是一事更望钧慈详酌一路幸甚幸甚

某惶恐适得吉州李守书具道盗贼曲折辄録拜呈伏乞钧照

某承乏豫章踰年仰托大芘幸免旷败岂胜感激今安抚司并洪州诸事粗已就绪惟修城一事不欲劳民随宜措置以徐图之楼櫓器具悉皆新创异时成就实为永利伏幸钧察

某近具奏以衰病难当繁剧乞罢帅守改除宫祠未蒙俞允伏见邸报司諫陈公辅援靖康伏阙事求去区区愚分尤不自安再申前请敢望钧慈矜怜早赐陶铸保全晚节实有望於相公切冀垂念惶恐无地

与张相公第二十书【二月二十五日】

伏奉道君太上皇帝崩訃哀恸号絶五情糜溃君临天下二十有六载而陟方於遐域此固臣子所同痛愤矧在廊庙何以堪处枕戈尝胆修政攘戎以报不天之讎以刷中国之耻实有望於朝廷今日不胜哀恳激切之至

本司近以?贼侵犯邻郡丐兵于朝伏蒙差拨李贵一项军马应副仰荷钧念?寇已遣本司兵将会合讨捕剿殄数项亦有受招安者余党渐归巢穴目前粗定深虑官军既退复出为恶已留兵屯庐陵及檄?守措置李贵者尚在汀州未得来信已令助?州招捉矣伏望钧慈

近被朝旨措置创建贍军酒库以助月桩养兵之费既苏民力又使州郡无窘迫之忧诚得策也然尚有可议者内一项应州郡有回易酒库并罢契勘本司自置司以来即有回易酒库收息钱以贍给一司官吏将佐军兵犒设激赏百色之费尽出其中若罢去即用度顿缺须至仰烦朝廷况与今来贍军酒库自不相妨措置得宜决可趣办课利饶衍应副月桩沛然有余若罢此兴彼使本司顿然缺乏恐未尽善辄具利害申明敢望钧慈详酌特降指挥许令存留不胜幸甚幸冀照察本司有申禀朝廷数事未奉指挥皆迫切不可已者敢望钧旨早赐行下不胜幸甚干冒悚息

迺来淮西襄汉间颇有探报当是伪齐以此示其未衰不然溃兵之来不难取胜正在朝廷过为堤防蓄锐养威以待之蔑不济矣率易及此惶恐惶恐

某以衰疾难堪繁剧再上章丐祠馆未奉俞允敢望钧慈察其诚恳非为备礼早赐陶熔使得
归安山林保全晚节莫大之幸素荷眷照叠有尘瀆惶恐无地

梁谿集卷一百二十五

卷一百二十六

钦定四库全书

梁谿集卷一百二十六 宋 李纲 撰书十九

与张相公第二十一书

与张相公第二十二书

与张相公第二十三书

与张相公第二十四书

与张相公第二十五书

与张相公第二十六书

与张相公第二十七书

与张相公第二十一书【三月十五日】

伏审车驾?辰进发临幸建康窃计今已驻蹕累年士大夫之有识者愿望在此今乃如志自非相公精诚足以感动上心力回天步何以及此威声既振国势益隆中兴之期指日可俟更望益懋壮猷早建恢复之功以慰四海士民之望天下幸甚不胜蕲向之至

某辄以已见具劄子奏御顾惟狂瞽之言干冒天聪屡矣何补涓埃第拳拳之诚有不能自己者谨已副本録呈敢望机政之暇一赐采览或有可取进对之际愿与敷陈庶几萤爝之微有助照烛莫大之幸仰恃眷予之厚僭易及此惶恐无地

某待罪豫章实及一年虽仰托钧芘夙夜黽勉幸免旷败然日负素餐之讥深愧无补今者车驾进临建康江右为上流重地岂衰病迂踈者所宜冒居祗俟移蹕粗定再申投闲之请终冀矜从仰烦陶铸也

?寇猖獗虽官军屡胜余党啸聚纷纷未已出入合火人数颇衆官军虽所向克捷但无如其党衆急则走险缓则侵掠四出难捉最可深虑滋蔓駸駸兵将疲乏无以策应或落奸便则为患不细已委提刑司就便节制诸项军马临贼巢穴先遣人说谕愿就招抚则放罪公参不然即合力讨捕颇闻有就招之意但屡服屡叛未可凭信耳辄具利害奏闻并遣属官韩岢诣朝廷稟议敢望钧慈详酌施行不胜幸甚一路休戚所系伏乞留念

寇纷纷正坐孙守欲讨捕太急之故平时以群偷姓名置于坐隅凡事不密致令反侧遂蜂起而为盗贼残破雩都化瑞金兴国及吉州永丰吉水等县酷毒甚矣而佑方自以讨捕为功移文谓诸县人民例皆安业惟有凶贼周十隆恃嶮聚徒侵扰乡村又所保奏功状杀获贼首如谢小鬼之徒至今见在作过者甚众敢肆诞谩多此类也为今之计惟得足当太守有智略而宽猛得中者假以岁月借以事权则群盗不难销弭再三思之如张翥者正可任此朝廷别与佑一郡而以翥守必有显效一方休戚所系不细辄敢浼闻惶恐之至某所论孙佑非以去岁不起将兵违节制之故实以措置乖谬贻害一方所荐张翥非以尝识其人之故实以智略材术正可治相公方以平治天下使士大夫各任其职为事而某待罪方面亦欲列郡得人盗贼宁息故敢僭易以浼钧听亦恃照知之有素也惶恐惶恐伏幸恕察

所遣属官韩岳诣行在奉起居表并乞赴都堂稟议以昨遣罗荐可蒙恩赐对进秩不敢陈乞上殿恐有侥冒之嫌然岳实佳士操履人多推称敢望钧慈与进询以本路利害使得自竭以备采择幸甚幸甚

与张相公第二十二书【三月二十八日】

本路自今春以来雨暘以时农事方兴布种甚广又有丰年之象此诚燮理之功导迎和气所致天道助顺正宜益修人事以应之愿言蚤建中兴恢复之勳以副四海生灵之望天下幸甚幸甚

寇周十隆等虽已受招安不肯赴官司公参亦未放散徒党本司已专遣使臣齎牒前去晓谕示以朝廷恩信使随李统制径赴本司当与保奏以其状词有守无故讨杀及前後招安官多失信之语不免如此万一更不听从即须遵依近降指挥会合讨捕但贼徒众多官军甚少难以分布断其走路所以未易擒讨近具申陈乞摘那岳飞下兵将前来就粮讨贼实为利便更望钧慈早赐详酌行下不胜幸甚幸甚

守孙佑执固不通既无龚遂安之之术又无虞诩讨杀之功听信一二僚属之说掩捕周十隆等致令聚集猖獗残破数县所伤多矣今州租赋益难催科仓库匮乏朝廷降尽为虚文若更年岁间如此羣盗无所忌憚为患益多某前书僭易浼闻乞别与佑一郡而择有智略宽猛得中如张翥者付以郡事必有可观更望相公博加询访为千里生灵之计莫大之幸仰恃知炤之厚敢私布之伏幸钧察

与张相公第二十三书【四月二十日】

比人还拜教之辱慰诲勤恳仰佩眷与之隆无以自喻窃审车驾自抵建康物情悦豫中外宁谧区处将帅葺理藩垣悉已就绪相公以不世出之材遭时得君翊赞中兴绰有余裕更冀益勤远略早成恢复之功大慰天下之望区区此心无日不在门下也

某承乏南昌实踰一年左支右梧仅免旷失仰荷辉芘之厚铭佩何言日来衰病尤甚兼苦疮

久在假故深虑废弛职事旦夕欲复申前请上千陶铸置之闲散使倦飞之翼复返故栖实始终保全之赐也敢布腹心先以冒闻惶恐无地

本路自春夏以来雨暘以时布种甚广又成丰岁目今蚕麦皆登人情安妥但?寇弗靖为可恨耳他路岁丰则羣盗利於蓄积反肆猖獗习以成风良可怪也近见报朝廷已除张翥守?千里得人盗不难弭然亦须少有更张以感其心意新其耳目旧染污俗庶可变革翥到任必能条陈也马扩近已过此更望割下张翥令速赴新任幸甚伏冀钧察

李贵招安周十隆等初甚草草犹欲循习旧例以事虚文本司累备坐朝廷指挥督责适方得报云正首领钱向者已出军前公参见催促周十隆等出参若不如约即进兵讨捕谨具劄子拜呈伏幸钧察周十隆者为?寇之领袖不得此人为患未艾近已有仿倣作过者如瑞金之蔡居道执权县裴汝能以归?化之赖漏八啸聚千余衆侵犯抚之崇仁宜黄本司虽已遣兵讨杀人数不多实难分布深虑连结者衆别致?虞累具申禀乞辍那军马应副更望钧念

伏蒙海谕回易酒库许令存留仰荷垂念不然则此一司难复立矣然至今犹未被受指挥敢望钧慈促令行下不胜幸甚贍军酒库措置渐已就绪所补不细深服朝廷处画之当也

任仕安老练兵事麓细皆可使但性颇褊急故为其伍所不喜昨在福建湖湘屡立奇功中间废罢实为无辜某去冬警急之际辟充本司都统制委之训练备见宣力方朝廷多事之际武夫中如仕安未易多得置之无军马可统之地实为可惜望相公特与收拾湔洗用之必有可观不然则告陶铸一住程合入差遣令依旧在本司以备缓急亦大幸也仰恃眷照辄敢及此惶恐之至

与张相公第二十四书【六月二十四日】

某自春夏久苦疮?近复中湿得筋挛之疾行走蹇缓拜跪艰难加以痰眩复多遗忘忧患之余血气凋耗自应如此惟滥当一路帅守之寄深虑别致踈虞有误国事夙夜震惧不遑宁处已累具奏愿置闲散以养衰疾未蒙矜从辄以劄子仰千钧听敢望曲赐敷陈特从所乞使得早就休息不致颠隮终始保全之赐尽出鸿造不胜恳祷之至

某惶恐再啓本路盗贼除?州南安军数头项已委张龙图提刑司就近措置外吉抚筠袁临江军十余头项本司遣发兵将渐次招捕皆已获其首领筠贼熊清害捕盗官尤为凶暴幸已就戮见督巡尉搜捕残党惟吉寇李安净者最号狡狴难於擒讨近增兵前去措置势已迫蹙愿就招安旬日间必见次第区区指踪捕盗素非所长幸免旷败实赖朝廷威德所及辄具劄目申禀幸望钧察

议者多谓?寇十数头项陰相结连今冬必须猖獗近蒙朝廷差到李贵步谅两项军马存留本路自可制之但步谅一军已蒙指挥许用月桩应副却令湖南拨还鄂渚於事为便李贵一军所费三倍於步谅转运司无余剩可以?那祇是督迫州县深虑别致生事累具申禀更望钧慈

曲賜垂念李貴被傷之後在假已乞尋醫軍中無可倚仗能統帥者亦望早擇其人付之庶几
緩急可以使喚并乞鈞察

車駕駐蹕建康勢須分屯重兵於九江以為控扼竊計朝廷已有措置本司未曾被受指揮敢
望顒旨行下不勝幸甚秋色漸深更望為宗社大計深留鈞念僭易惶恐

本路春夏間雨暘以時早田既登入秋頓缺雨澤已覺亢旱祈禱雖應殊未沾足深慮晚田不
免旱傷近降指揮納苗及和采并不用早米恐誤大計已具申稟更望詳酌早賜施行采本專
用關子無見錢相兼難以行使亦具利害申陳并乞鈞照

與張相公第二十五書【七月十一日】

袁州萍鄉賊石鐵牌鍾牛皮等六人并已招降擒放外得頭首十人徒黨堪披帶四十余人今
遣元殺敗及招降將官馬仙管押赴都督府伏幸鈞察此十數頭首皆系桀黠久在江西湖南
兩界首作過殺傷官兵甚衆累受招安輒復嘯聚今次多方措置始能得之敢望鈞旨令所隸
軍中嚴加覺察稍有違犯即隨宜處置庶几不至逃還復為良民州縣之害一路幸甚幸甚切
乞垂念吉州永豐賊李安淨者去秋招安至本司一夕遁去嘯聚作過出沒於崇仁新淦豐城
數縣界首巡尉不能制中間本司遣兵殺敗不曾獲其魁首又復結集猖獗近遣屬官程圭率
諸頭項兵將四面遮羅深入討捕期於必取凡兩月余日生擒安淨及斬獲以次徒黨去此大
害抚吉筠袁羣盜有名字者并已招捕了當實賴朝廷威德所及獲免曠弛豈勝感懼更望鈞
慈有以誨督之幸甚幸甚

昨蒙朝廷差到申世景一軍自至本司訓練彈壓備見?心內外無事頗賴其力每遣兵捕賊能
以方略授所遣將士出必有功將官馬仙者累次差出討捕羣盜今春追襲謝小鬼尹寶等斬
五百余級近又破袁賊六頭項悉招降其首領實為雋功敢望鈞慈將上本司奏狀優與旌賞
先次推恩以為將士之勸不勝幸甚馬仙令部押賊首赴都督府如蒙召問曲折尤幸僭易惶
恐秋氣已深本路防冬之計全無準擬如聞朝廷委岳侯以九江控扼岳之意謂兵不可分未
肯差撥欲合不欲分此固兵家常理至於控扼要害之地使不為敵人窺伺此又使可後哉九
江為江南上流去偽境不遠蘄黃光州并無蔽障使敵潛師以來而旋求援於七百里之武昌
其何能及頃年馬進據九江朝廷出大兵半年乃始剋捷豈可不慮使九江或有疎虞即江東
西震動其患有不可勝言者愿相公留念某多病久不以狂瞽之言上瀆鈞听第切惶恐

與張相公第二十六書【九月二日】

九月初二日具位某再拜致書平章都督特進仆射相公合下某建炎初蒙上擢任宰司自以
材力淺短論議迂疎不足以任天下之責丐罷機政得請祠宮既而言者交攻以罪去國是時
聞合下為言事官附會時宰以取世資但以為趣時巧宦喜富貴人耳及明受之變某遠在岭
海乃聞合下奮發忠義糾合師旅取日虞淵洗光咸池回六龍以中天然後知合下真一世之
奇才因是乃見而獨恨未之識也數年前某寓居閩中杜門不出以養衰疾適合下自樞廷均

逸弭节海邦谦光过人惠临衡宇因得从容樽俎间奉谈笑而款襟抱侧闻绪余追悔昔日之非深明当世之务每言帝德王功霸略皆在人主心术中顾所以致之者何如耳窃自庆忤以谓炎运中微天心悔祸光辅圣主恢复祖宗之大业非合下而谁未几合下被召还岩廊某亦蒙恩起废承乏帅守踰年於此获窥庙谟之一二以成去冬却敌之功尤切叹仰然自今春合下专任大政以来荐进人材调护将帅措置边防均理财用皆未闻卓然有以慰天下之心者声誉损於前时规模爽於旧说中兴气象邈未有期不知何为而然耶且以近日淮西叛将之事观之官吏军民二十余万一朝相率而北去将佐遇害者甚衆合下平日信任以为可属大事如吕祉者被执以往挫威辱国中外震惊於谁责而可乎某辄不自揆激於忧愤上疏指陈朝廷措置失当深可痛惜及鑑前失以图将来者十有五事達於冕旒之前情迫言切抵忤必多其知我者以为见危纳忠罄不恤纬而忧宗周之陨其不知我者以为出位侵官汲黯之戇又复妄发知与不知且置是事今日国家危急存亡之秋尝为大臣历事三朝怀孤忠而同休戚者苟有所见其可緘默而不言乎恭惟圣上登用合下委任之专听信之笃古所未有往年富平之役三十万衆一战而溃怨而不问去春某入覲轩墀亲聆玉音张某自富平之败始练军事呜呼虽秦穆之於孟明光武之於邓禹冯异何以加此合下所宜益务慎重谘諏良策图不世之功以盖前愆以报知遇使後世称之视古无愧今乃以措置之失亡二十万人寇伪得之增其气?此岂小变虽圣度兼容未以此罪合下天下谓何合下材识高远自任以天下之重前无古人而事有出於意外者愚谓所以致此知任而不知所以为任之道故也今有人於此力足以举百钧而益之以万钧则力必不胜矣然有可胜之理者与人分之也今合下以一人兼将相之权揔中外之任而无人共功名之心软美者进颡諍者?逆耳苦口之言不闻曲突徙薪之谋不至变生所忽不足怪也柳子厚作梓人传谓斲削在於衆工而成功收於梓匠此最知宰相职业者平时犹当如此而况於艰难之际乎萧何相高祖而腹心谋画则有良平爪牙攻战则有信布房杜相太宗而善谏则与王魏善战则与英卫持衆美而效之君此所以成创业开基之功也李林甫卢杞挺乱危国其咎安在忌嫉而已某愿合下为房杜之亚以穆天綽不愿合下为杞林甫之流以私宠利天下之事庶几可为也老子曰非以其无私耶故能成其私以公灭私者忘身与家而其?则国与家俱安背公营私者不过为身为子孙计而其?则家与国俱危不复引古为喻请以近事明之当宣和末如王蔡之徒其所以谋为自安之计者深根固蒂可谓至矣一旦事变往往不能保首领然当承平无事祸故未作之时谓富贵可以长保而为此犹可恕也至靖康间祸故作矣如唐恪聂山之徒其所为有甚於宣和之末然尚可恕者祸故作而未大也建炎之初经靖康之变祸故大矣然黄潜善蠹国欺君又甚於恪山辈今皆安在天理昭然所以未之思者宠利诱於前而祸患藏於隐也方今国势日蹙人心弗宁强敌凭陵僭窃伺加以旱暵为灾财用殫竭而合下独斡化钧佩天下之安危岂可使措置多失以蹈覆车之辙哉因淮西之变痛息惩创辑睦将帅博询衆谋惟其是之为从幡然改图则未必不转祸而为福也语曰过而不改是谓过矣虽古圣人不称其无过而称其改过合下诚能知措置之失当而图所以改之者岂惟宗社安而生灵蒙休合下永膺多福而某将归老於山林亦有奠枕之安合下不自知其为非而无改之之意岂惟宗社危而生灵告病合下之祸可立以待而某虽欲退休亦未知税驾之所矣安危休戚某与国家及合下同之荷照之深敢忘忠告以致朋友责善之义乎某素愚直私忧过计其言激切合下亮而恕之非独某之幸也天下之幸也不然无所逃罪所有奏疏副本敢尘钧览惶恐无地不宣

某悚息区区书中犹有未尽之意敢悉布之昔人有言长江数千里如人七尺之身当备者不过数处虚而当备无如腠理今淮西者东南之腠理也郿琼之叛腠理虚矣今自舒蕲光黄一带并无军马以为扞蔽九江要害之地又无控扼使伪境因用郿琼以扰上流则沿江震惊驻蹕之所不得安矣伏望相公深思所以备腠理之术勿谓敌人不出此策幸甚某已束装待罪闻报即行然不敢以将去之故而废国事并乞钧察

与张相公第二十七书【十月二十一日】

某顿首再拜近专人上状伏承钧旆去国不获尘达第深瞻向进退去就大臣之常想惟以道为怀洞照此理无复芥蒂更望上体眷注加卫寝饗为天下自重区区倾祷

某昨闻淮西之变尝上疏论列但以区区所见欲協济国事图善後之计非有他也致书相公愿有苦口逆耳之言亦欲尽言忠告致往者不可谏来者犹可追之义不谓相公去国之遽书到後时然业已为此不敢自隐辄复尘浼钧听惟相公以道相照必有以察其心而恕其僭易者幸赐采览惶恐无地

某近连上两疏一论言者援汉武诛王恢事非是一论车驾不可轻动淮南军马不可抽回皆未得报夙夜震惧以俟谴诃相公虽去庙堂爱君忧国之诚乃心无不在王室辄録副本拜呈?埃何补姑尽其区区之忠而已幸赐观鉴惶恐惶恐

昨日见报有零陵之行相公平日学佛欲敌死生於迁谪何有然逆顺之境须以道眼照之想不待区区之言也不审大旆取涂何地自洪趋筠袁以达湖南最为安便若自抚吉趋衡则永新茶陵间见有盗贼恐不可行更在裁处倘有承教之便以慰累年瞻渴之情何幸如之所怀非笔舌能既

卷一百二十七

钦定四库全书

梁谿集卷一百二十七 宋 李纲 撰书二十

与李泰发端明第一书

与李泰发端明第二书

与李泰发端明第三书

与吕安老侍郎第一书

与吕安老第二书 与吕安老第三书 与吕安老第四书 与吕安老第五书 与吕安老第六书
与吕安老第七书

与李泰发端明第一书

某顿首自闻贤者得请去朝与士夫同深惋惜然不任天下之责而放怀云海之上其自为计则得矣第未知果能翛然忘情於世乎否也天方艰难使正人端士乍进乍退徒有出入之劳何补於事然精忠之极乃身在外乃心罔不在王室愿毋忘此念苟有所见展尽以闻深所望於左右也无缘面谈但深悃跂

某再拜区区承乏豫章踰半年矣当旱荒匱乏之後一切躬自料理今本司蓄粟数万斛积镪数十万缗州县所有又不在是也修营房三千余间见裁减修治城壁种种稍就绪但所乏者军马耳搜裒一路系将不系将兵近五千余人数日前辟广场大阅器甲旌旗皆一新观者谓前此未之有然皆乌合新募之衆何足倚仗姑可以张声势耳请兵于朝不知次数庙谟方谓屯重兵於淮淝襄汉此方为内地兵不必遣此大不然兵家乘间正如贼风之中人避坚攻脆声东击西於不必防处政须着力今王师布置踈濶初无相应援之理淮西既无屏蔽沿江千余里要害之地又无兵可以控扼措置如此岂不殆哉近遣属官赴行朝稟议未得指挥间探报贼马果渡淮而南攻围光州势渐危急已再具奏告上如朝廷不遣兵即丐挂冠而归岂所欲哉不得已尔今朝廷措置用度乃取财非理财也行师动衆乃致寇非御寇也大兵屯戍之久欲进则胜负未决欲相持则有师老财费之患未审庙谟何以处此今刘光世退保和州岳飞抽回干事军马间探者谓突骑大集於京东西岂非今春命两宣抚有以致之邪世故可虑者非一不独江右而已某处於此与泰发虑於海滨无事之乡其忧天下一也将何以教之两次奏检并与诸公书漫録呈得勿他示为幸

与李泰发端明第二书【十二月十四日】

某顿首再启相望数千里音问非专介不能達方此驰仰使至被翰墨之赐窃审自临永嘉动静之详感慰无喻王师屡捷贼马退遁目前粗安诚为可庆然後段正须料理过作堤备庙谟必有成算也垂论可谓至言欲图中兴用兵祇是一事耳譬如久病之人置而不问非不省事其如日就委顿若真欲医治事绪甚多未易一一言也何当欵奉道所欲言者望风怀想不胜此情某再拜启区区夏初抵豫章忽见岁抄继旱嘆缺乏之余钱粮是忧而岁得一稔当防冬扰攘之际军马单弱而突骑不到沿江晏然皆出望外岂非侥幸今流移归业盗贼衰息帑藏粗充可以藉手而去祇俟开春解严即申前请以丐闲散必冀矜从第未有归栖之地长乐海寇间作势不可复往急欲卜居吴越间素闻佳山水且土风淳厚将有终焉之志不知有地可以见容否已作书托孙叔诣为寻访僧庐民舍可以度夏者才得脱此即束装径往或谓四明为优更须作一段也异时或得卜邻乘兴棹酒船往还为乐可胜计耶有可以见教幸不鄙外

某再拜承谕绘鲁公像於忠义堂甚善甚善见索诗句偶作得一赞以塞来命辞旨浅未得为删润为幸如有善摹画人烦与传一本尤佳吾侪书问往来偶有他故以子弟代书有何不可何至终身銜之东坡恐不至如此待以礼法之外尤仰服宏度也

某再拜承惠柑子良荷至意顷在长乐饫餐此物自来江南岁暮矣犹未之尝乃蒙远饷珍佩何已但以口腹有劳健步深为愧耳黄雀四百只牛尾狸四器辄附还使以表微情幸恕轻洩

与李泰发端明第三书【二月初一日】

某再拜近人还上状计已呈洩窃闻环召为之喜而不寐然至今犹未见报除目何也或谓泰发进退屡矣盍少贬以济时区区独以为不然遇不遇命也何至枉道而伸身哉愿益坚此操造物者於吾侪默定久矣其於进退何有不知以何日离永嘉何日到行阙度已入对新命此间僻远殊未闻便风频冀诲示幸甚幸甚某再啓车驾将驻蹕建康兹惟其时然淮南藩篱当益为之备今楚泗修治坚城固得策矣庐壽襄汉恐亦须如此措置更宜深考古迹如濡须坞牛渚圻之类皆当筑垒屯兵以防冲突上流重镇尤不可不留意也奏御劄子副本録呈譔譔多矣实有不可解於心者知我者谓我心忧不知我者谓我何求我思古人实获我心何当面谈临书不胜驰情

某悚息区区於此忽见改岁去夏旱嘆之余钱粮是忧而偶得一稔防冬扰攘之际军马单弱而沿江无警实出侥幸侥幸岂可屡哉加以衰惫日甚归兴日浓正初已具奏申前请尚未得报近见陈国佐求去之章援靖康伏阙之事尤不自安不免再上章祈速降指挥已束装才得请即径趋浙东谋一寓居处将来车驾移建康可渐为归锡山之计治田园守坟墓以尽余年志愿足矣此计已定或有可以见教幸不鄙外也德远以身佩安危可谓自任以天下之重去冬亲身督战以遏贼冲虽古人何以加诸然自独斡化枢以来已再月矣未闻有大慰人望者岂与人共功名之度有未优乎昔房杜相唐持衆美而效之君去功与名还与衆人而功烈光明至今昭如日月也近尝作书告以中兴用兵祇是一事要当以进人才修政事固根本进退君子小人为先未知能领受否泰发与之欵愿以此道开广其度能如梓人之任斲削则宰相之事业何患不成方得君甚其所系不细又荷其似有相照之意故每因书辄尽区区又未知

其果能见察否也有所闻幸谕

与吕安老侍郎第一书【七月六日】

某顿首啓安老谕议侍郎台座比数拜书人还亦叠蒙宠诲备闻动静岂胜感慰秋暑异常伏惟台候万福见报小司寇新除及有从军之命士夫为之增气谅惟忠义所激不以远适为劳也张丞相北渡以临泗上虽祖逖渡江志清中原裴度亲师誓不与贼俱生何以远过更赖幕府婉婉之画其蔑不济矣更冀益摅素蘊協赞大功使衰病得托余芘果安山林莫大之幸余惟为国自重

某再拜啓区区抵豫章忽三月矣随分料理目前粗可支梧早稻既稔公私少寛殊为拙者之幸第秋期已至所以为防守之备者缺然屡请兵于朝第云关送都督行府屡告督府第云见议遣兵以一路数千里但付一书生欲使之谈笑折冲恐无此理已上疏复丐宫祠犹未得报去意已决实不敢虚任此责也虽大兵移屯淮上斥候益远然其间控扼踈濶缓急敌人为乘间捣虚之作则无如江西者上流重地岂可不置思虑哉近具状申行府乞截留王彦一军度犹未到昨日忽得行府劄子欲分此军前来但须候到行府乃始差拨深恐後时及军马有往返之劳曷若就便存留之为利万一别有措置俟防秋後遣还未晚也已有申状及於右相书中力恳之更烦一言使决如所请乃幸某虽已为去计然一路利害不敢但已千万留念此军在荆南本以四川财赋留此则钱粮亦当预有以处之已於申状声说并幸照察

与吕安老第二书【七月十一日】

某再拜近得右相报诸大将列屯淮上姑务静重徐为後图诚为得策来书谓譬如奕棋递互一着必至相杀此理固然尝观古人用兵多常得先手此棋家所谓争先法而兵家所谓致人而不致於人也高祖既失荥阳客说之使出武关临南阳以致项籍则韩信得以破赵魏燕齐以成汉业汉祖从之後皆如其策此何理哉争先法耳善棋者觉一处少屈则经营他处卒以取胜不善棋者黏悞缴绕不肯鬻舍卒以取败此无它随手而应不为先手之计故也今重兵尽列淮上而控扼甚踈安知敌人不以虚声疑我而为乘间捣虚之谋此幕府之所当留意也敌人前年以兵趋淮甸而不得志在今日必变动其策而吾守株以待之大抵前数年不留意於此正犹碁之不相管带者两年以来又似碁之不立意而信手随人者凡欲杀人先须自活此言先为自固之道乃可胜敌在今日尤当先务也因来教以碁为喻故辄及此某向者途中尝奏疏论用兵利害亦尝以副本令仲弟奉呈不知曾见否近録本纳右相处大蒙开可如未曾见幸於右相处取观也顷年齿壮志锐亦颇有意於此今则衰病相仍唯思山林静处了此余生宫祠之请一不从则至于再三又不然则唯有挂冠耳愿以一言为助使早得脱此莫大之幸此介廼专遣往者有可以见教得详疏示为幸

与吕安老第三书

某啓目再拜安老谕议侍郎台座近专人数拜书计一一呈浼未闻从者到军前动静之详殊

切驰仰秋气已高伏惟台候多福区区承乏豫章托茆粗遣幸此丰岁料理财赋目前不至缺乏朝夕之所忧虑者无兵无将何以防扞不虞干告朝廷殊未蒙应副上流重地使之任责岂敢虚受累有请于行府深望借助必蒙留念也正阻承晤切冀为时自重

某再拜?吉盗贼纷纷不已盖缘前此失於措置养成厉阶所谓头首者既就招安依旧令在巢穴长恶不悛时出作过递相仿傚不复知有官司相习成风非痛革之未易惩翦自某到此随分措置除斩捕外其招安者令择强壮堪披带人并头首解赴本司发往行府听使唤庶几凶党可以渐消有怀土之心者不敢复为头首使艰於啸聚颇为得策近解发王权等三十三人既受约束其头首四人辄复投状乞免行已悉诛之擢以次人借补名目令部辖以行遂无敢违者今必已到军前矣复招安到袁州贼黄颠叔以次首领黄颠三等四百余人以头首十名解去愿悉分置诸军中严逋逃之令使不敢还归年岁间此方当渐平定幸留意也

某悚息近累蒙右相许遣王彦兵亦数具申禀乞就便存留庶免军马往复之劳近闻王彦一军已过九江即此请已不谐矣以私意度之彦军到行府必选留精锐遣他将统余卒来此恐无补於事愿借一言之助使不至太甚或别遣一军如吴锡辈前来庶不误事莫大之幸千万垂念

近报右相造朝不知今还泗上否旦夕专遣属官去续拜书次北事还来如何有所当闻者愿一二见示眷集必时得安问

与吕安老第四书

某顿首啓安老侍郎谕议台席近累上状想无不達辱近书审从右相至行阙复先还龟山跋履当不无少劳也秋气已高比来伏惟台候多福某承乏粗遣措置诸事稍稍就绪所乏者军马耳自初陈请即蒙行府许差累劄见议遣兵书辞尤为郑重然至今未有至者岂遂食言耶付以一路之寄而当此之时无将无兵使之扞御以备不虞何以任责初谓安老既到借一言之重可以决得辱来教乃知不然且谓意见如此世间事岂可以意见为之禅林所谓檐板但见一边事耳今遣本司属官罗荐可诣行在奉表起居及诣枢密院都督行府稟议奏检并与诸公稟目副本録去幸详览可以见其曲折昨上疏丐闲未蒙矜允以训辞有边吏戒严商秋俯及之语又闻车驾顺动未敢再请今所陈乞若量差得数千人使有本领一面随宜措置粗可支梧亦岂敢坚为去就万一又不遣发即须力求去难任此责也大兵既屯边境此方今冬亦有可以苟安之理但出於侥幸非至计也但知论成不知虑败但知向前不知顾後今日之患正在於此蒙见教以忍甚荷爱念然不与之衣而使之忍寒不与之食而使之忍饥不与之兵而使之忍一路之忧责可乎他人尚可如某虚任一路之责决不可者幸试为思之罗荐可节操极佳到行府诸事烦照瞩亦尝於右相书中荐之第恐右相止留行朝渠不到龟山即合遣人達此书不得拜见向寒切冀为国自重不宣

某再拜承喻贵聚还建安甚善骨肉既安居可以一心军事矣近来事会如何大将重兵列屯淮泗欲亟进则恐彼亦有以待我胜负之势难必欲持久则有师老财费缓急又着先手所以

处此殊未易也岳侯屡捷亦可喜亦可惧可喜者前此未有可惧者恐敌有谋或堕其诱我计中有一劄子至上前略论此事谩録呈亦於右相书中力陈论之今日之事不容差失谋议之职愿精以思虑也去人甚的事宜望详报为幸此方虽丰岁而盗贼纷纷不已盖徇於故态及军马单弱不足镇服之故近於袁吉间措置招捉王权数火今又生擒所谓黄颠叔等自此当稍宁帖但頼上殊未靖耳动以数千为群官军分俵不着如得量差拨到不用於江上则用於吉间平治一方革其旧习亦是一事近得旨令相度措置已具奏矣副本纳呈恐欲知也旦夕遣使臣管押招出头首廖一长等去续拜书次今日欲治寇无如以重兵临之尽招出头首及拣强壮桀黠者赴军前分隶使唤立功者重赏作过者必诛逃亡者许人人得以捕斩最为得策奏状中论之甚详前後已解去数十人今所解者皆尝统数千衆屡次作过恐右相留行朝签厅想一面可施行也

与吕安老第五书【九月十二日】

某咨目再拜安老谕议侍郎台座前日遣干官罗荐可诣行府稟议尝奉手状不审已呈達否秋序益深伏惟台候多福前後解发招安到寇首领赴军前使唤凡数十人今又得所谓廖一长罗洞天等十余人管押前去此等皆桀黠啸聚动以千百为群侵扰州县残害一方前此招出并不公参依旧令在乡里稍不如意则复出为恶頼上至今纷纷不已正坐此故惟有发赴军前使之自效立功者赏作过者诛严逃亡之禁许人人得以捕斩军前有逃亡者即行下本司籍没田宅编配妻孥以系累其心如此年岁间庶几旧俗可革渐向宁贴累有文字申陈幸详察近被旨令相度措置已条陈具奏并申行府恐或未到今録检奉呈北事日来如何人还愿详及也岁云暮矣千万为国自重

与吕安老第六书

某顿首啓安老谕议侍郎台座近人还辱教赐殊荷眷意霜寒伏惟台候多福见报入覲复还督府计亦劳止诸将连捷诚为可庆此方尤有所依赖然探报渡淮而南者皆签军突骑岂未尝来或来而未用耶一胜虽足以挫其锋尤宜备大敌之在後戒诸将勿使骤胜而骄也无缘合并但有驰仰敢冀为时自厚前膺异宠某再拜近再上章丐闲诚以不敢虚任重责之故蒙恩不允尤切震惧远依余茆侥幸残冬无虞当申前请终冀矜从也劄子副本録呈朝廷遣发军马固已絶望而本路将兵得旨许勾抽使唤为孙守占恠妄以盗贼为辞亦不肯差拨帅权如此真可笑也頼上盗贼衰息虞宪劄目可见纵使有些小残党所留一半千五百人自足弹压措置劄下一二十次竟不遣发殆是陵侮帅司今有状申行府烦为稟右相得速赐行下为幸此兵虽不足倚仗姑可少助声势耳所至处必与此曹相值诚命分所招深欲不与之校又事势有不可已者幸痛察也

贵聚知已归建上甚为得策必时通安问也承喻有专任签厅之谤此言殆不可晓某自到豫章凡事琐碎米盐细故皆必躬必亲自朝至暮未尝少暇以此料理种种粗就绪同官方有逼下之讥不谓好事者复造此说真所谓颠倒是非变乱白黑十余年来遭此多矣固有大於此者亦何足辩但士风觉得愈更薄恶为可叹耳赵倅一书谩録呈可以为证亦足发千里一笑

也幸安山林自是不合复入保社只得且打退鼓耳公方壮年正宜隐忍以就功名岂可与衰惫者同日而语亦作此念千万努力自爱

与吕安老第七书【三月二十八日】

某再拜啓伏审光奉制书峻登八坐谅惟驩庆去冬却敌之功今春移蹕之策協济居多畴庸良渥甚副士论愿言蚤膺柄任助成恢复之烈深所望於左右也某龟勉於此?埃无补近两上章丐闲荐蒙诏答未从所乞实以衰病侵寻不敢尸素非晚再申前恳终冀矜允有可以见教不鄙外幸甚幸甚

某再拜?寇去岁少定孙守既无龚遂安之之术又无虞诩讨杀之功轻信妄发致群盗反侧啸聚蜂起残破数县延及庐陵本司遣兵掩击屡捷方少衰息今虽已受招安尚习故态未肯公参及放散徒党为患未艾势须讨杀得一两头项则余者易定昨在湖南招捕群寇不甚费力有本领故也已恳朝廷於岳帅处摘那数千人就粮於此以治?贼甚为利便未知肯见听否要须得一好守臣有智略而寛猛得中者付以此郡则功效易见再三思之如张柔直正可任者若别与佑一郡而以柔直处此贤於用兵远矣亦尝荐於右相更望以一言助成千里生灵所系不细也千万留意

近得吴民瞻书贵聚已还行朝今家何地必时通安问也台旆想已不成来九江万一果来幸前期示报张柔直适被召去鼎故敢荐之为一方计非敢有所爱恤也幸察

梁谿集卷一百二十七

卷一百二十八

钦定四库全书

梁谿集卷一百二十八 宋 李纲 撰书二十一

与折枢密第一书 与折枢密第二书与张子公舍人书 与向伯恭殿撰书与陈司谏第一书
与陈司谏第二书与岳少保第一书 与岳少保第二书与岳少保第三书 与岳少保第四书

与折枢密第一书

区区造朝之日适当枢密端明近拜之时得与荣观殊以为幸主上圣学日跻慨然有恢复中原之志愿言展尽底蕴协赞中兴以副海内之望衰病无堪误蒙朝廷付以江西一路之重本欲造膝力辞上恩优渥不容逊避承命而行第切皇惧江西当旱嘆之余阙乏尤甚近得交代胡侍郎书云仓廩空然向去支給官兵钱粮未有指准自非朝廷应副决致疎虞已具劄子干告朝廷乞支拨茶引等钱敢望钧慈特赐矜察昨尝以吴元中事拜闻不知曾因为开陈否公与之素厚而又知其本末为尤详如蒙以片言一雪九泉之冤少恤其家想衔感於地下何有穷已幸望垂念

与折枢密第二书

窃读诏书恭审车驾省方亲劳将士帷幄谋虑伏计不无有勤神用某承乏方面衰病日加大惧旷阙迫於防秋未敢坚为去就止俟解严即申前请仰赖钧慈终冀有以覆护之也累告朝廷及都督行府乞遣发防秋军马虽屡被指挥许差至今未有至者窃料庙谟必谓淮南襄汉屯兵则江西为内地正恐不然预备不虞防患当於不必防之处古人之言不吾欺也况今车驾时巡江上上流重地无兵可以控扼何以使某敢任此责藉使边报无警吉间盗贼未静正以军单弱无以镇服之故若不用之以扞御外寇则当用之以销弭盗贼是朝廷遣兵不为虚设一路士民日夕徯望非独某以职守之故所私愿也伏望钧慈垂念不胜幸甚幸甚

与张子公舍人书

某啓子公中书舍人台座人还奉书赋窃审履兹秋暑台候多福为慰区区同骨肉幸安但入秋以来殊阙雨泽螟螣渐生岁事殊可虑也徧祷羣祀及迎请西山罗汉奉祀於州廨中雷雨立至第所及不广闔境殊未沾足真所谓表意而已闻江东湖南亦苦旱信有时数所可惜者去岁大稔无本以广籴耳误恩迁秩力辞不获两被诏旨不得再有陈请迫於威命黽勉祇受不胜慙悚自春夏间所苦疮痍久不痊愈近因中湿得筋挛之疾行步蹇缓拜跪艰难加以痰眩动多遗忘忧患之余血气凋耗自应如此但多在假故深虑妨废职事有误一路之寄投闲之请所不敢已辄具劄子干告诸公因见幸为具道其详使知非是托疾曲从所恳为望抚吉筠袁间盗贼悉已招捕了当寇见亦宁静付之张守宪司假以岁月不难平也沿江未有警急

之报乘此丐罢实非有所规避千万留意秦相书中恳之尤力必相照亮实有赖其致助也衰病老懒迂疎拙直皆非今日可用之才而又羣小造谤不已无罪无辜讒口嗷嗷必欲中伤岂可不自退藏犹与之较是非曲直哉且如来书所论数事皆是以无为有唱为险肤之说而听之者久不核实遂据以为然此何理哉本州去岁实催到苗米一十三万八千余硕皆系上供及朝廷支用所得以贍养官兵者耗剩之数而已正耗每硕三?【内五胜系转运司拨充明会耗】得二?五胜为米三万五千余硕省耗每硕二胜为米三千余硕占米加一折纳得每硕一?为米八千余硕此皆遵奉朝廷非创例也盘量出剩六千余硕通计前项凡五万二千余硕而州仓月支官兵粮米并诸县支遣以岁计之凡八万六千余硕除所得耗剩米外两次蒙朝廷拨到共二万硕犹侵支上供米二千余硕见具奏乞销破今以奏检録呈以此观之所传加耗以歛民一硕至纳及二硕六七?其可信乎本州夏税和买绢去岁麓恶朝廷督责甚峻且退回数千疋责以陪纳盖缘揽纳人与受纳公吏通同作弊今岁不免约束措置立定价值犹减他州十分之三【他州十千有余本州十贯二百】今録朝旨指挥并退回绢数立定价例文字去看以此观之所传拣择太过至民间倍有所费其可信乎本司官属自干办公事以上与签厅事每日相见呈覆事可从者无不从之準備差遣止是差出干当委以事务遇有职事则稟覆待之之礼自有等降胡可均也若谓简於应接致下情不通则不如此上官世美当兵火之後宰武宁招抚民户归业茶租及额皆应令式诸司相率荐之此亦常事若有隱匿非因讼诉何由知之此但荐其职事修举非荐其行实也若果暴露自有法存岂可逆料而臆度哉凡此数事皆有司存老兄虽疎谬颇亦諳练世故何至懵然全不晓此为此说者虽不吾告吾其知之矣是必近罢去準備差遣魏申宋彦振也二人者皆小人有所挟以利口为进身之资者此每疎而远之犹惧其浼我胡承公为其所欺颇昵信之敢肆臬鸣真小人之无忌惮也不然则过客之不满意者吾老矣岂能事厨传供饋以买一时之誉哉大抵询事须於士人君子长者用小人之言而疑君子其可乎李倅贤者此间每事委之如此繆政致烦台念何不以书询之前遣罗韩两千官至行朝皆士人相见既欵而略不及此何也大抵今日士风浇薄不知大体而惟小廉曲谨之为务如帅一路当日兵革扰攘之际修城池繕器甲整军伍理财赋皆是合做底事稍加意为朝廷立家计以备不虞则傍缘为谤纷纷惟端坐不事事苟爵禄以度岁月者则絶口不道往往反称誉之以为镇静此俗不革欲任贤使能以成中兴难矣辄有数事申陈朝廷皆目前利害并録副本去因见诸公试为道及虽去意已浩然犹未能忘怀庶有补於万分之一也凤阁已几年矣虽陰德在人者必多然见於行事殊未有闻何也方今僭叛凭陵国势迫蹙时事抢攘民多凋弊居献酌论思之地岂可效承平时养资望恋宠禄而嘿嘿哉如前奏所陈以虚数督财赋以关子责和籴等事不知曾经凤阁鸾台否此等事放过孰不可过毛举细故以塞责非所望也有自行朝来者询问之但云善事贵人不知其他何以得此声於梁楚间也自十余年来见相识故旧间有忍穷饿自守者意谓风雨不渝金石不变真若可信一旦得少官职滋味遽失所守便不复知有亲故者多矣富贵易得名节难立勉自标建勿倣俗子之趋操也宫祠之请继此当再具奏又不得请即挂冠矣山林深处求一席之地息念灰心以究无生之学此外无足言者千万努力为器业自爱

与向伯恭殿撰书【正月二十六日】

某顿首啓伯恭都运殿撰使座近人还上状计已呈浼使至尊教贖窃审履兹新元台候多福

感慰无量承被宸翰正芄林之号且得旨按察浙东诸郡遂为天台鴈荡之游可谓盛事赵正之出示唱和长短句便觉胜趣在人目前良健美也辄次韵以发千里一笑得勿他示为幸区区承乏豫章忽见改岁衰病相仍难堪繁剧已再具奏力祈闲散期於得请亦欲卜居浙东不知有地见容否虽已致书赵相谋一居止处更烦伯恭过日试为询访民居僧舍无不可者但得稍宽凉可以度夏为佳异时车驾移跸建康傥遂可归无锡守坟墓治田园为终焉之计此外亡足言者近来出入纷纷但转使高僧厌世情耳泰发之召必已到行朝不知果能用之否伯恭淹回之久禁近之拜想在朝夕士论已迟之矣世事如影随形有而非实不以道眼照之有甚是处吾侪老矣切当留意於此或有所闻愿以见教也未缘会晤敢冀以时为国自厚前对光宠

与陈国佐司谏第一书

某顿首啓国佐司谏台席近以倥偬稍疎修问第深驰仰每於舍弟书中闻动静颇以为慰见邸报伏承进对继有谏垣之除高名大节素简上心谅惟敷奏展尽底蕴大合天意正论有托士夫交庆即日计已供职秋暑未阑伏惟台候多福正阻披承敢冀为国自厚前对光宠

某再拜区区抵豫章行四月矣初至之日适当旱暵之余仓库匱乏饥民满野料理钱粮推行赈济虽细务率皆躬亲踰月之後方稍就绪今幸雨阳时若遂成丰年早稻倍获秋田可望米价顿减物情少苏诚拙者之幸但秋气已深边事方棘乞兵于朝止云关送都督行府累告行府止云见议遣兵目今军马止有申世景下千余人以一路十数郡付一书生使谈笑折冲恐无此理况江西上流之地去伪境不远缓急何以支梧实难虚任此责近上章丐宫祠蒙恩降诏不允朝夕当再具奏期於得请也辱照素厚漫及此幸冀亮察

某再拜当朝廷多事之际在谏诤之列所当论者岂可一二数国佐闲退之久静中所閱多矣方睿主虚心开纳之秋谅知无不言更冀脱略细故指陈今日利害安危之大者使上心洞照中兴之本则天下受赐多矣士大夫奔竞之风兴讹造讪之态尤甚於往日变换白黑颠倒是非此风不除实为中兴之害愿公委曲明白为上言之所补非浅浅也僭易僭易

与陈国佐司谏第二书【十月初二日】

某咨目再拜国佐司谏台席近人还辱教答慰劳有加殊佩郑重之意初冬薄寒伏维台候多福区区承乏豫章蒙免粗遣还来探报纷纷皆谓寇伪聚兵陈颍间意欲窥伺淮西江右适得蕲州移文贼马已渡淮而南步骑相继势颇猖獗淮西诸州朝廷既许移治则自江而北全无屏蔽殊可忧虑某昨到行朝即乞本司合得军马钱粮之半以备防守前後申陈莫知次 竟不蒙差拨议者多谓重兵屯淮淝襄汉则此方为内地故兵不必遣某窃以为不然兵行诡道正如贼风之中人必乘间隙所当防者乃在不必防处屡以此说献於诸公不蒙采覧今乃果如所料江西兵将单弱之甚沿江要害去处并无兵可以控扼朝廷虽近降指挥令岳飞摘那一项军马来屯九江然飞方驻军襄阳相去辽远何时可到自非朝廷遣兵为本路防守之具别择骁将銳兵与岳飞相夹击渡淮贼马则邪气深入之患未易言也辄録请兵奏状劄子副

本拜呈进对从容间能为一言否此国事也所系甚大愿深思之王师与贼相持之久有师老财费之患庙谟处此当有成策然嫠不恤纬之忧日以深矣年来衰病日思退休当此繁剧尤不能堪又不知能侥幸防冬无疎虞否也责之使守而不与其守之之具或有旷败咎将谁归中夜以思不寒而栗欲复为洞霄散吏安於山林岂可得也迩来进对啓沃必多传报之章深慰士论人主之要止在知人治乱安危无不在方寸间愿反覆及此所补非浅浅也无缘面谈但有驰跂敢冀以时自重前膺禁近之拜谨奉咨目不宣

与岳少保第一书

某咨目再拜宣抚少保麾下近者专人上状伏审已获呈洺中夏溽暑不审迩来动静何似伏惟哀慕之余孝履支福窃承有旨起复再降指挥不许复有陈请宣抚少保以天性过人孝思罔极衔哀抱恤犹未祇受虽士论叹仰而某深窃疑之何则君亲之分一也孝於亲忠於君势难两全古人执亲之丧而有墨以即戎經而从政者不敢以私害公也上眷倚之隆以方面之重夺情视事国有常制岂可稽留明命以私恩而废公义哉诚愿幡然而起總戎就道建不世之勲助成中兴之业上以副委任之意下以慰士夫之望方所以为達孝也辱照知之後敢布腹心幸冀恕察无缘承晤但有驰跂敢冀为国自重茂对光宠

与岳少保第二书【十月初二日】

某咨目再拜宣抚少保麾下自闻大旆进讨不果通记室之问第深驰仰通中辱书矧殊佩郑重之意初冬薄寒伏惟揔戎多暇台候万福屡承移文垂示捷音十余年来所未曾有良用欣快伊雒商虢间不见汉官威仪久矣王灵乍及所以抚循之者无所不至想见人情之懽悦也继闻驻军襄邓其所摹画想益宏远朝廷遣使臣降赐轻齎者络绎於道本路漕司亦竭力办集钱粮转達郢鄂比来想不至匱乏所愿上体眷注乘此机会早建不世之勲辅成中兴之业深所望於左右也累日来探报纷纷皆谓寇伪聚兵陈颍有窥伺淮西江右之意闻朝廷已割下使司摘那一项军马顺流前来九江措置防守必已颺旨遣发本路以朝廷不曾拨到兵将沿江要害去处并无控扼方以为忧今得依茆为幸多矣更冀选择精銳早与调发辱照素厚想不待喋喋也适间又得蕲春报贼马已渡淮而南其意非浅愿遣诸将邀击之可以成功少保大军所临无不摧?者此寇乃送死耳然蜂虿有毒亦不可忽幸冀留意正阻披承千万为国自重前对光宠

与岳少保第三书

某咨目再拜宣抚少保麾下近专遣使臣奉状谅获尘洺天气益冷伏惟揔戎多裕神所听劳台候万福前书尝以朝廷探报寇伪於陈颍间聚兵三万人有窥伺淮西江右之意得旨於使司分拨一项军马前来江州屯驻拜恳早赐差拨未奉来报近据蕲黄州探报贼马已渡淮攻围光州今已半月余日人数厚重万一光州失守即定犯蕲黄沿江一带如兴国九江皆是要害去处并无兵将控扼势已危迫日夕颺望使司遣兵前来屯九江敢冀垂念选择精銳军马得万人左右可以分布沿江控扼保全一路实受大赐素辱知照必蒙应副也闻使司军马屯

驻武昌者尚多如得就便差拨顺流前来释此忧悬良深感戢仍先得公文示及所差将佐使臣军兵等姓名人数为幸昨蒙谕欲还武昌近殊不闻动静必是且为屯驻襄阳之计艰难危急之秋切望益励壮猷仰冀主上西顾之忧或有近日探报得并録示为望正阻参承敢冀为国自厚前对褒宠谨奉咨目布执事不宣

与岳少保第四书【十月十六日】

某再啓近者有旨就少保军中拨一项军马屯驻九江措置控守适当贼骑侵扰光州已尝关报使司必蒙差拨今贼骑虽退未测所向正须堤防敢烦颐旨选差精锐兵将早与调发以副一路士民之望不胜幸甚某再啓窃承目疾为梗迺来计已痊复戎事方兴朝廷以荆襄大计仰成少保愿言益励壮猷早建大勲为中兴功臣之首诚所望於左右也辱照辄尔及此悚息某悚息方作书欲遣人闻得转运司公文关报使司已遣发官兵五千人并车战舡等前来蕲阳屯驻方本路阙兵控扼之时乃蒙调发军马隔江照应岂胜感戢但九江最为本路要害去处与舒蕲对境沿流一带并无防守皆系使司钱粮经由之地不可无兵以备不虞如得更遣发三五百人屯驻九江庶几一路可赖以保全受赐非浅浅也荷照之厚必蒙应副干浼悚息

梁谿集卷一百二十八

<集部,别集类,南宋建炎至德佑,梁谿集>

卷一百二十九

钦定四库全书

梁谿集卷一百二十九 宋 李纲 撰书二十二

与张龙图第一书 与张龙图第二书与张龙图第三书 与张龙图第四书与张龙图第五书
与张龙图第六书与张龙图第七书 与张龙图第八书与薛直老宝文书

与张龙图第一书

示谕李统制为盗所伤今日得其申状审如所言良可骇也大抵州县吏卒悉与贼通失於防虞固应有此却云已?輿往贛上将理切烦且与调护使不至大故为幸屡来陈请乞其军歇泊今贵既中伤恐摄事者未必能统衆更烦审度如兴国诸处不须屯兵即径令就老小於庐陵歇泊如兵不可阙即令步谅军马代之为佳已有公文去步谅一军再三思之不若携行使屯贛上为便李贵一军既来庐陵岂可全无军马单车之说似不必尔钱粮已得湖南应副指挥见促漕司令?那他郡者应副如兴国诸处未须此兵即广东湖南境上李才刘宣之徒自可遣往会合讨捕昨就其军中摘那五百人讨李安静一则安静人数不多祇须此兵二则欲减其军三分之一以省贛上钱粮之费皆非得已近遣属官程圭纠合官军巡尉措置李安静者亦颇有绪更看旬月间如何王彦者以筠州盗作执高安令步汝霖及杀死县尉已遣往讨捕其余如王胜辈非不知其凡材但申世景军中所有将佐类不过如此顷在湖南招捕羣盗十四五头项凡数万人如步谅辈皆谈笑致之有本领故也今无本领政如虎豹无爪牙而责其搏噬之功乃反借助於谅辈是可笑也然谅实朴忠可用幸照恤之庶肯尽力见谕钱米具悉自到此寸积铢累政欲备缓急之用以济国事况於柔直分上岂敢吝惜可见示一公文并遣人船前来当更量力辍那应副庐陵未间已装发须就此间津置去也俗语有云穷坑难填贛上阙乏如此若非力恳朝廷何以能济前书所陈乞蠲免销破应副三说似不可忽如有陈请幸一一以副本见示亦欲详知本末致力为助也职事移人久矣何知之晚耶林倅已如所谕移檄权摄并具奏闻矣第不知果肯就职否更以礼致言为佳幕职中亦多阙人有欲辟置者幸见示公文也向实尝以书借寇於朝廷书未到间已有成命得德远书见为案底幸勿见尤也皇恐其它悉如所戒属苦疮?不果亲书千万照察

与张龙图第二书

某咨目再拜柔直知府龙图使座前日人还奉状计已呈浼使至辱手翰窃审抗章有请虽事理不得不尔然急病逊夷排难解纷乃柔直平日之志怯懦逗遛不敢前进恐不应有此言也今孙守既不事事统兵官又为贼所中伤仓库阙乏人情汹汹而从者又迟疑不进无所依仗必甚震骇万一别生变故柔直不得不任其责今就本司所管朝廷钞引钱内逐急支拨一万贯及於丰城县支拨本司米三千硕应副目前急阙为恳徐漕亦许应副万緡五千斛但未知是何等名色渠云前所拨杂本钱但以此为名目可以面支使将来朝廷要米渠自承当又未

知此言可信否也近有指挥就上供米内拨万硕应副两军若徐漕所许万緡五千斛止是拨余本钱及此一项米即不得谓之应副须於漕司诸州桩管钱及明会米内支拨方是真实见在审之渠非不知贛上阙乏之甚倘有变故为患不轻平时亦有忧深思远之言但临利害真实能践言者少乃今日士风之病似不足深责也本司万緡已为雇船差使臣管押至庐陵可托陶强父易舟运至贛上米亦令丰城雇舟津发可更遣人促之通前所拨钱共二万余緡米八千斛并漕司应副亦可粗济目前之急其余已为具奏朝廷今録奏检去一观恐无不应副之理如得就本司茶引内支拨尤良便也书到千万便上道以慰一郡士民所望为幸步谅者不可不携行非唯得?化兴国县报周十隆者见结集其势未艾目前亦可与将兵相制李贵军马暴露日久势须且令归庐陵歇泊遣步谅或将兵代之皆可更在裁处也钱响者已得指挥转两官差充本司準備差使以随李贵军中使臣等候请衣绢尚未到俟到即遣往然此止是一说要须训练兵将整缉巡尉修缮器甲使吾军声稍振乃可游说不然虽缓颊无益也近以筠州高安令步汝霖轻贼深入为贼所害遣王彦军马往讨捕官军至即鸟飞兽散略无踪绪此等本巡尉及宪司职李皆不任责有盗即乞兵于帅司殊不知官军之捕小盗政如骐驎之捕鼠责以近效何可得也自今春?寇猖獗请兵于朝以谓不早平治必有效顰者滋蔓难图今诸处小盗纷纷皆如所言朝廷久不遣兵及遣来又不支拨钱粮止令运司?那应副今日州郡岂有余剩可以?那之理步谅一军至?吉两月推而不纳良由此也区区衰病素无捕盗之能引疾丐闲已三上章如不得请即挂冠或以罪去也无缘面谈但有驰仰千万努力自重谨奉咨目不宣

与张龙图第三书

某拜啓柔直知府龙图使座近两奉状想相继呈浼秋暑甚炽伏惟台候多福误恩迁秩力具辞免两被诏不许再有陈请祇受不胜皇惧自收庐陵信後并不奉教诲传闻以十六日到郡视事不知然否再拨去万緡必已到所悬差船并船匠修城兵卒皆未有到者岂贵人多忘及贛上风土能移人邪聊发一笑运司得金字牌降下省割?州租税及月桩钱悉皆减免可谓寬恩自此措置有绪盗贼积弊不难除也攘夺之区化为乐土真可指日而俟或尚有合申陈事件幸不惜垂谕李贵一军屡乞歇泊已行下令回吉州就老小矣兴国且令将兵屯驻为佳得南安军报古政贼马已杀败出境步谅一军曾遣好否德化既孚羣盗慑服自不须此兵非晚却欲令暂来本司渠屡有状欲一赴本司公参也高安令尉为羣盗所害尽获首领八人就戮李安靖者亦已生擒政如捕逐鸟兽四面围掩终一目之所加捕获安靖乃是步谅下将士前日不可分兵之说却似未是也萍乡贼石铁牌等六头项悉已招降押送督府矣抚吉筠袁间盗贼有名字者幸已招捕了当独贛上数火须烦拊摩苗薊而髮栉之去宿弊而絶後患伫闻报政也某足疾至今未瘳行步蹇缓拜跪艰难适此亢阳日事祈祷殊不能堪乘此盗贼稍息边报无警之际已再上章丐闲养疾期於得请也承谕欲迎庭闱以就养且少缓以候来春为佳未缘会晤但有驰仰千万以时自厚前对光宠谨啓不宣

与张龙图第四书

某咨目再拜柔直知府龙图使座数日前人还奉状必已呈浼连辱手字窃审履兹秋凉台候

多福感慰无喻承下车未几种种皆已就绪非老手安能如此良用叹服但初欲单车入境却步谅之兵不使从行仆坚劝携去今乃并要所存留五百人似有可议者窃料尊意初欲却兵者惧乏财也今欲增兵者钱粮之费出於他州也仆之意则不然谓公初临所部虽以德服人为主要须有威乃克有济况广东湖南两路界首皆有宿盗兵岂可阙故力劝公携谅以行今李才刘宣既已杀败周十隆等又已出参威德已孚岂复更藉余卒目今高安萍乡有熊青石铁牌余党尚敢跳梁已遣赵俊周勉两项人兵前去讨杀与其使端坐而仰餽曷若令讨贼而立功况本司申世景军才千余人终岁差出未尝休息步谅之兵一讨刘宣未足为劳所以有留赵俊周勉两军不无意也当时力乞李贵步谅之兵聊借盗贼之名以为防秋之计迺欲保全一路非止?寇而已近日北方渐有探报声势甚张淮西将郢琼率全军以叛害吕安老驱官吏兵民二十余万以归伪齐沿江州县人情震动此岂小变而朝廷恬然不恤措置乖方已条列陈于上前因乞罢黜未知如何人行速未暇録呈俟後信也傥缘此得去所谓步谅兵并东南将兵自不须得万一未能脱免势须摘那以济目前之急柔直自为谋善矣更烦为仆谋之一路数十郡县而鳩集剗刷仅得疲卒数千人欲保无事岂不难哉将兵元起一半止起数千人期以十月半间步谅之兵到此尚有季秋一月或有些小盗贼趁此月内早与剪除庶几两济也存留将兵在贛上者千九百余人除已差三百人屯南安外余千六百柔直但遣五百人选得力部队将使屯驻雩都?化间其余分屯诸县者并可勾抽回州九千余人日加训练教閱遇有盗贼即随宜差拨讨捕鼠窃狗偷自不敢动才过防冬即便遣还大体如此或有小小议论不妨商量所谓大德不踰闲小德出入可也切幸照亮传守文字至今未到恐有遗失可别见示即当奏辟有江州推官郑抡者极晓事已辟察推守当以节推处之也连日冗甚未能周悉续附状次余冀为国自爱谨奉咨目不宣

与张龙图第五书【九月二十二日】

某拜啓柔直知府龙图使座前月专人奉状至今未还久不领来谕岂以调兵故邪此事灼然易见但微有利害之私即所见遂差向日盗贼抢攘不得不留重兵於贛上今幸少息古政李才刘宣之党既散遁周全谢云张收之徒又已招安则当移於此以为防冬之计岂可缓哉正如富人之家左取右索无不如意而贫家折东补西仅能苟全今本路军马可谓贫矣若不逐急量轻重移用何以支梧日近探报寇伪添屯重兵於陈蔡颍一带又有郢琼之变乘间搗虚莫先江西沿江要害之处并无兵可以控扼丐於朝者屡矣杳然不报想以淮西之故不暇恤此所以不免於诸州摘那非得已也九江兴国既不差筠袁又以残党及人数不多难於摘那所得隶将不隶将兵亦可默计其数矣恃此以保全一路戛戛乎难哉柔直疎通岂不亮此当是故作此恼人情态也一笑昨日余宪过此云得近书正以此为言今更且令韩海将五百人留屯俟别有警急方去勾唤余幸日下遣发令趣中泝前到此欲及教閱粗成军容以张声势也今冬贛上既丰熟又安新政决须无虞但过此数月兵悉遣还政恐却不要耳近得枢密劄子已议归步生於湖南已具奏留之累得书欲来千万便遣秋高伏惟台候万福多冀加爱不宣

与张龙图第六书

某拜啓柔直知府龙图使座数日前专遣使臣上状计已呈浼使至尊海翰欣审还来台候多福调兵事前书拜闻详矣必蒙照察 日探报咄咄逼人切烦如数早遣为幸诸邑些少盗贼且用所存将兵并韩海以渐措置可也计料沿江及此间防托非得三万人不可剗刷才有千人如何分布得着已具告于朝但彼自窘迫岂暇恤此今年气象非去年比殊可忧有可以见教否无由承晤万冀为国自重不宣

德远落职宫祠未知更有後命否也言章引王恢事以为喻深谓未然张之过在於不能辑睦将帅轻事移易措置乖谬使士卒怨叛耳若因淮西一事便谓从前主兵谋之为非则是因咽而废食退避讲和之说复行将何以立国深虑话头既转奸言得以眩惑不免复进狂瞽之说以渎上聪非敢为张游说也近尝致书於张深砭其病吾岂党於张者因其一跌尽废前功便欲诛其始谋自此岂复有敢任事者耶宗社存亡自此而分所以不免喋喋非得已也柔直以为何如獎諭诏并与清河书録去一观幸勿他示

与张龙图第七书【十月二十七日】

某拜啓柔直知府龙图使座前日专人上状计呈浼步谅来辱手海窃审履兹霜寒台候多福感慰无喻存留将兵敢不如命姑俟警急日续勾唤也此如防扞虎狼彼如爬搔蚤虱此欲障蔽一路彼欲弹压一州轻重大小岂可同日语哉昔人有急则借兵於邻国万一突骑有窥江西之意柔直独不能提将兵率土豪千里来援同保上流共獎王室乎以此责他人则不可以责柔直不为过也纸尾避敌之论诚非所望於左右者防扞之计尽心力而为之不能即继之以死何避之有处心不定而欲济大事难矣哉已条具利害悉陈于朝乞遣张俊赴镇淮西催促岳飞保据江池摘那一项军马来此应副使唤敌人未必敢遽渡江万一有南牧之意亦可随机掎角掩击岂可遽自退屈哉本路要害之地政在兴国九江豫章能守此则腹内诸州皆可奠枕不能守此率皆望风奔溃虽欲避敌将焉往哉愿柔直细思之韩海所部五百人烦早遣至欲趁閏月中旬大閱庶几稍张声势教閱之後如诸郡盗贼有窃发者自当遣兵讨捕初未尝吝惜也境内就招羣盗且抚定之有不悛者过防冬後痛与料理亦未为晚千万亮察两疏録呈德远遂有零陵之行或传又再有命未审然否一时不广谋议遂至如此可惜可惜前日得使臣等状方以为讶疑其必以无礼之故蒙諭信然已令随韩海前来俟到此当治之两状漫録去亦恐欲知也未缘会晤千万以道自爱奉啓不宣

与张龙图第八书【闰十月二十三日】

某咨目再拜柔直知府龙图使座荐辱手海殊荷眷情窃审履兹凝寒台候多福为慰张大闲者闻已受招安不知果否得此一项了却本路盗贼悉已平定唯萍乡永新与茶陵攸县两路界首尚有残党已遣韩海邵宗两项军马会合湖南兵将夹攻并遣属官一员前去措置庶几静尽可以报朝廷矣北方探报还来稍静万一无事何幸如之使突骑有渡江者得朝廷益兵数千与岳侯相为表里仆虽不武亦可自当一面何遽为退避计哉来书谓小谅而非大忠未为通论昔安史之乱朔部风从唯鲁公以平原一郡纠集以扞大敌功虽不终亦足以表暴後世岂可谓今无其人若必欲在庙堂而後可为刘琨祖逖之徒皆当束手矣见所与韩抚干书

谓宜务实而勿务虚仆平生所为皆图实效不事虚文如近日勾集诸将大閱正欲训练拊循以待一日之用非止为虚声而已愿勿置疑其间也迺来诸事稍稍就绪正欲省细故惜日力以与将士周旋侥幸防冬亡虞即再申前恳幅巾柴车以返故庐此外无足道者承亲庭已到治所想深慰雅怀无缘少奉绪言但有驰仰千万为时自厚前迺光宠谨奉咨目不宣

与薛直老宝文书

某拜啓直老参谋宝文使座人还被书赐窃审履兹秋杪婉画多暇台候万福感慰兼怀承谕分屯九江殊荷留念近得太尉书亦道此意但欲候有警急乃始遣兵深恐後时九江於今为上流重地秋气之高又近有郢琼淮西之变岂得不过为备沿江要害去处并无一人一骑可以控扼乞兵于朝第云已委使司防扞若必待警急乃遣贼情狡狴万一乘间捣虚为其所先探报往返动须旬日安得无噬脐之悔今淮西新变之後重以沿江无兵人心忧疑如蒙使司辍那五七千人先屯九江以絶敌人之窥伺以安人心之动摇使某得赖余芘何幸如之平时荷太尉相照正有赖於今日望因会次为致区区之恳不敢数奉书也公文纳上幸冀亮察末缘承晤切冀为国自重谨奉啓不宣

梁谿集卷一百二十九

卷一百三十

钦定四库全书卷

梁谿集卷一百三十 宋 李纲 撰啓上

谢宰执复银青啓 谢范相宫祠啓

贺秦参政啓 贺秦相公啓

贺富枢密啓 贺李参政啓

贺吕相公啓 回泉州叶尚书啓

贺孟宣抚啓 贺翟参政啓

贺都督吕相公啓 回翁殿撰啓

谢宰执宣抚荆广啓

回荆广四路监司郡守啓

谢宰执宫祠啓 贺徐枢密啓

贺赵参政啓 贺胡枢密啓

回温州范相公啓 回临安梁侍郎啓

谢宰执复银青啓

归从海外方一洗於刑书告自日边遽尽还於禄秩敢意青氍之旧物复沾白髮之陈人拜命若惊抚躬增愧此盖伏遇平章仆射相公精忠许国以弼亮於一人【执政云以叶贊於政机】寬裕有容以均调於万国【执政云以燮谐於民物】欲振中兴之业式崇仁恕之风致兹罪戾之余亦预甄收之列攀鳞附翼久絶望於风云散髮采薇方养痾於邱壑莫遂趋风之幸第深仰德之诚

谢范相宫祠啓

窃伏海隅方遂山林之适叨居琳馆更陪香火之缘奉黄纸之除书得青氍之旧物载惟侥幸

弥切兢凌伏念某结约亡奇崎 可笑怀许国之心而才则拙有援世之志而术已?烂额焦头何补救焚之道跋胡?尾自貽覆餗之愆脱身九死之滨折节万夫之後六年奔走亦自厌其余生百口追随更复忧於多累与其困蹶於山谷曷若控告於朝廷果荷鸿私曲从微请奉仙圣於燕闲之馆窃廩稍於艰难之秋瘴疠熏心不妨散吏渔樵争席谁识故侯初无梓匠之功但索太仓之粟静惟忝冒愧溢心顏兹盖伏遇平章仆射相公盛德包荒宏材适变任天下之至重素希风於阿衡扶王室以中兴宜比功於吉甫政惟公举道不遐遗致兹罪戾之余亦赖甄陶之力望岩廊之緬邈披云雾之末期鱼鸟何求但深从於潜泳厦屋既壮愿终被於帡幪

贺秦参政啓

伏审祇奉帝俞入参政柄方正人之登用知善类之有依纶綍既颁中外胥庆恭惟参政太中秉心克一经德不回金百链而弥精草疾风而知劲奉銮輿以北狩岂人能为持汉节而南归殆天所相宜有褒崇之典式彰卓犖之忠果被眷求进陟廊庙吉甫用而周邦咸喜士夫亦与於荣观汲黯在而淮南寝谋寇盗不难於销弭仁嘉猷之入告致中兴之可期天意将回人心攸属而某披风惟旧慕义素深救端卿絕域之行虽云无补识子仪未遇之日庶或当仁属久困於谗波幸生还於瘴海天地之恩厚矣蝼蚁之报蔑然丘壑养痾嗟病牛之卧壠岩岫散髮遂脱兔之投林然而王室安则天下安四海定则此身定方国步艰难之际可谓曰忧闻菴臣彙进於朝云胡不喜愿展尽於底蕴以扶持於颠危垂老山林亦受帡幪之赐大书竹帛行观柱石之勲尚慎鼎茵益绥福履仰以副於注倚俯以慰於具瞻颂咏之诚倍万常品

贺秦相公啓

伏审光奉制书峻登揆路国势增太山之重人心如流水之归中兴可期公论攸庆恭惟平章仆射相公直方以大温恭而文立大节於宗祏倾危之秋膺重任於朝廷艰难之日若有神相岂繫人为密勿大猷方赖蓍龟之智燮调元化允资鼎鼐之功惟舟虚可以济巨川惟栋隆可以扶大厦恢复中原之故境大慰四海之具瞻托迹山林亦荷帡幪之赐拭目廊庙永观柱石之勲颂咏之私敷宣罔既

贺富枢密啓

伏审光奉赞书进贰枢筦增重本兵之地坐收御侮之功纶綍既颁中外胥庆恭惟枢密太中高明而博达廓大而裕和声华久着於士林望实雅推於世德惟时先正有劳王家宗社赖其元勲夷虏服其宏度挺挺风烈有之是以似之秩秩德音旨矣维其时矣果被眷知之渥擢升宥密之司帷幄有人搢绅增气惟国家之大竞得士为先而帝王之中兴非兵不可折冲樽俎素高堂上之奇恢复土疆仁致师中之吉顾兹疲病自屏山林愿观鍾鼎之勲亦被帡幪之赐其为颂咏罔罄敷宣

贺李参政啓

伏审光奉赞书进参机政顾老成之登用副中外之具瞻纶綍既颁搢绅交庆恭惟参政太中精忠许国肃括褫身践扬徧於华涂闻望推为旧德自陞宥密之地益着弼谐之声果膺帝俞参付国柄济艰难之大业允资帷幄之谋跻仁壽於斯民行被陶熔之化顾兹衰病屏迹山林愿观鍾鼎之勲亦荷帡幪之赐其为颂咏罔既敷宣

贺吕相公啓

伏审光膺帝制还冠台司勲业高於一时望实孚於四海诞敷涣号大慰輿情恭惟平章仆射少保相公宅心坦夷养气刚大材兼全於文武识洞照於几深适当国步多艰之秋克着王臣匪躬之节殆天所相岂人能为洗日咸池爰正云龙之御扫氛楚塞亲提貔虎之师威德兼隆眷注弥渥方袞职之有阙被环赐而遄归大纛高牙辍长城之重寄绣裳赤舄还岩石之具瞻方叔壮猷而蚩荆来威吉甫复用而周邦咸喜以仪刑于百辟以弼亮于一人经体赞元坐致燮调之效折冲御侮行观恢复之功作芘蒸黎勒勲鍾鼎顾兹衰病之迹久荷眷知之私去国五年屡困谗波之险携家三徙备尝寇盗之忧惟朝廷宗社之再安则畎亩山林之可托此道所赖非公而谁愿精调於鼎茵以茂对於光宠其为颂咏罔既敷宣

回泉州叶尚书啓

真祠散吏已深愧於素餐秘殿清班复稍还於旧物拜恩优渥抚已凌兢知府尚书雅量兼容诚心乐与致兹叨冒之幸实缘獎借之私更荷谦冲特垂庆问江湖阻濶未谐披雾之期翰墨交驰弥切向风之志其为感愧罔既敷宣

贺孟宣抚啓

伏审进参机柄出总帅权宠光震耀於一时风采耸闻於天下诞敷成命大慰輿情恭惟宣抚参政秉心塞渊毓德纯茂以风绩久孚於士望以精忠自结於主知果被简求遂登廊庙属此萑蒲之盗久弄潢池之兵允赖谋猷廓清氛祲建牙开府于宣阃外之威戡乱定功行廸师中之吉顾兹衰病自屏山林虽音问之久?岂瞻怀之敢替执俘猷猷永观鍾鼎之勲枕石漱流亦荷帡幪之赐其为颂咏罔既敷宣

贺翟参政啓

伏审光奉制书进陪政柄纶言所播輿论攸归恭惟欢庆参政太中毓德粹和养气浑厚大册高文足以鼓动当世英声茂实足以辉映士林蚤扬历於禁严久蕃宣於屏翰挂冠神武雅有高世之心视草金銮一为斯文而起果膺简注峻陟巖廊云雷尚屯允赖经纶之业天地交泰伫观辅相之宜某素荷眷私自取?外睽违积稔曾无鱼传鴈系之音跬步三山乃有室迩人远之叹顾连墙而不请谒乃交臂之真相知方宏大度以包荒讵念小故而弃旧属膺中诏往抚南藩衰病日加虚辱斋坛之拜封章继上丐还真馆之游愿少借於齿牙使得从於岩壑披风未遂仰德徒勤冀精调於鼎茵以茂对於光宠其为颂咏罔既敷宣

贺都督吕相公啓

伏审涣号宣恩斋坛授钺眷上相之宿望加都督以视师名教增隆士夫交庆恭惟都督特进仆射相公星躔毓秀世德鍾祥翊国步於多艰不渝素履挺王臣之大节每见赤诚勤劳结圣主之知特達慰輿人之论召从藩屏再冠宰司表正百僚具岩瞻而益峻指麾诸将顾筹幄以谁先爰告明庭首膺新制惟王室之兴复赖君子之经纶淝水策功谢傅实居於总统淮西破贼晋公遂朝於京师伫勒鍾鼎之殊勲不失山海之旧物顾兹?拙久荷照知误膺诏旨之颁往服蕃宣之寄力疾受命触暑戒涂仰凭庙筭之多虽容缓带继上囊封之请期践前言披覲未遑瞻依尤剧愿精调於茵鼎以茂对於宠光颂咏之诚敷宣罔既

回翁殿撰啓

伏审光奉制恩宠还旧物联清班於书殿示优老於琳宫凡在荐绅孰不欣忭恭惟提宫殿撰器全金玉识迈蓍龟蹈道不回挺然仁者之勇学古自任卓尔君子之儒蚤扬历於要津益飞腾於休誉久推时望简在渊衷抱槩怀铅洵膺论撰之选持橐簪笔伫跻侍从之严仰公道之宏开庶旧人之图任某夙契雅好每幸瞻承兹闻成命之颁独倍常伦之喜敢期谦牧先损书词媿荷之诚敷宣难尽

谢宰执宣抚荆广啓

右某啓蒙恩授前件职任不许辞免内外官司不许收接文字已自福建路起发於今月十一日至衡州茶陵县入湖南路界交割本路安抚使职事讫者丝纶下逮不容逊避而牢辞翰墨屡颁更烦敦勉以大义力衰疲以及境抚凋瘵而增伤任重责深以荣为惧窃以荆湖之奥壤实为东南之上流控襄汉而引四川带江淮而连二广地多沃衍民号富饶江濶湖深虽多卑湿之谗风浑俗厚雅有淳古之称自夷狄之蝟张因寇盗之蚁聚通都大邑类成蛇豕之区良田美畴鞠为荆棘之地奸吏乘时而武击平民逃祸而骇奔绥靖一方尽除宿弊惠泽千里诞布新恩非得其人曷称兹选如某者闽海冷族乾坤腐儒遭时艰难虽有爱君忧国之志触事齟齬曾无扶颠持危之功怀疾恶之刚肠天所赋者致销骨之积毁人谁悯之脱身九死之中折节万夫之後遽褰心化固知今是而昔非嵇康岩居但欲颐性而养壽岂期谋帅乃及陈人仰迫咫尺之天威莫遂再三之愚恳触热上道戴星以行迨兹入疆之初尤惊任责之重廉颇虽老尚思复用於赵人房琯已衰徒愿立功於唐室此盖都督特进仆射相公以燮理陰阳之职当经纶屯难之时建不世出之殊勲膺莫敢当之大任王谢总统初不远去於晋朝方召经营盖欲复兴於周道【秦相公云以燮理陰阳之职当经纶屯难之时运量羣材缉熙庶政躬张仲孝友之德而主吉甫揉此万邦有如晦练達之才而齐房乔表于百辟权枢密云以厚德镇浮俗以精忠膺简知協济艰难练達机政】克遴师帅之选聿求声气之同眷此衰迟曲加推挽然以忧患废弃之余而揔军旅之事以孤冷迂?之迹而领方面之权大惧旷瘝以速罪戾方今两路防秋之期迫矣诸郡卒岁之计萧然仗钺江湖者大军亟旋弄兵潢池者余孽犹在欲讨捕则兵将单弱议招纳则钱粮匱空将何以宣畅国威抚安民瘼职思其外愧溢于中愿上乞骸骨之章以保收桑榆之节敢先陈其悃悞庶必冀於矜从瞻望无期倾依徒切白露已

降清风戒寒冀尚慎於鼎茵以茂对於光宠其为颂咏罔既敷宣

回荆广四路监司郡守啓

右某啓此者误承中制俾镇上流宣九重之恩威抚四路之凋瘵委任实重揆绵薄以难胜褒借过优辱书词而增惕伏惟某官克明治本深恤民劳虽身寄於江湖每心存於王室【广东西云诚心於善雅量过人每有推挽之言因致叨踰之幸】干戈未定夫岂偷安朝夕之时智略有余正赖協济艰难之运愿加调羹前对宠光

谢宰执宫祠啓

右某啓昨任知潭州兼湖南路安抚使蒙恩差提举西京嵩山崇福宫任使居住者奏牋上陈方愿从於闲散人言洊至乃特荷於保全还真馆之旧游解帅藩之重任惊慙有腴感涕无从伏念某忧患余生衰迟多病久已忘怀於世味但思息迹於海滨一昨误蒙上恩付之阃寄既不容於逊避亦愿效於驱驰自抵湖湘七更晦朔招捕叛亡之盗拊循凋瘵之民虽竭迂愚何补万一弗堪重任丐归亟上於皂囊屡致烦言疏罪已遭於白简慕古人之余义不敢自论方朝廷之清明终期昭雪仰蒙庇覆使即便安小草出山徒有噬脐之叹大钧播物敢怀跃冶之心此盖某官体道为公待人以恕每虑一夫之失所不使颠跻素知衆口之铄金重烦解释致兹疎拙亦荷甄陶负罪养痾方自藏於丘壑趋风承教益远去於门墙愿调卫於鼎茵以茂膺於光宠其为瞻咏罔既敷宣

贺徐枢密啓

伏审光膺帝制进贰枢庭朝廷得人海宇增庆恭惟枢密端明养气刚大毓德粹和节操迫於古人识度超於当世飞英腾茂久辉映於士林耸壑昂霄果自致於云汉邓禹之遇光武得於立谈马周之说太宗言若素宦论思諫省有古遗直之风视草金銮膺大手笔之任渊衷简在右府进陪闻望素出於汉庭风采耸闻於天下惟王室之大竞得士为先而帝者之中兴非兵不可冀展尽於底蘊以協济於艰难顾兹罪戾之余加以衰耄之及採薇散髮方屏迹於山林承顔接辞阻趋风於斋馆愿亟成於勲业亦与被於帡幪尚慎鼎茵益绥福祉其为瞻咏罔既敷宣

贺赵参政啓

伏审光奉赞书进参机政惟俊杰之登用副中外之具瞻纶綍既颁搢绅交庆恭惟参政太中精忠许国肃括禔身践扬徧於华涂闻望推为旧德自蕃宣於屏翰【一云自召还於藩翰】益茂着於猷为果膺帝俞参付国柄济艰难之大业允资帷幄之谋跻仁壽於斯民行被陶熔之化顾兹疎拙久仰声光【一云久荷照知】方屏迹於山林阻趋风於廊庙拭目倾耳愿观鍾鼎之勲枕石漱流亦被帡幪之赐其为颂咏罔既敷宣

贺胡枢密啓

伏审光膺帝制进贰枢庭朝廷得人海宇增庆恭惟枢密端明材高杞梓德粹珪璋节操追於古人识度超於当世飞英腾茂久耀映於士林耸壑昂霄果自致於云汉奉使絶域而无难色临總铨衡而靡弃材自结睿明之知遂登宥密之地惟王室之大竞得士为先而帝者之中兴非兵不可冀展尽於底蘊以協济於艰难某曩奉披承每怀契濶虽仰德以勤止顾修问之阙然惟兹罪戾之余加以衰耄之及采薇散髮方屏迹於山林承顔接辞阻趋风於斋馆愿亟成於勲业亦预被於帡幪尚慎鼎茵益绥福履其为瞻咏罔既敷宣

回温州范相公啓

伏审光膺帝制起镇侯藩方?日下车之初推承流宣化之本山川改色士民耸观恭惟知府观文相公毓德粹和养气刚大自跻言语侍从之列夙着献纳论思之忠光辅圣朝美化行乎南国退居真馆雅志在於东山惟眷注之特隆岂燕闲之能久果承明命来临大邦樽俎折冲不妨於坐啸岩廊燮理行听於赐环顾抱病山林之间阻趋风斋合之下愿绥福履茂对宠光瞻咏之私敷宣罔既

回临安梁侍郎啓

伏审光奉赞书峻跻法从總天府浩穰之任幹邦计盈虚之权妙选得人公议惟允伏惟知府判部侍郎珪璋粹质杞梓宏材政事优於汉庭风采耸於人望果膺睿獎进陟禁严未遑庆福之修先辱好音之逮采薇散髮方待尽於山林腾茂飞英伫策勲於廊庙愿绥福履益对宠光

梁谿集卷一百三十

卷一百三十一

钦定四库全书

梁谿集卷一百三十一 宋 李纲 撰啓下

贺赵相公啓 贺张枢密啓

贺赵相公啓 贺张相公啓

谢宰执复大观文啓 贺孟枢密啓

复郭少傅啓 贺福帅曾尚书啓 谢宰相制置江西啓 贺江西赵都运啓 兴安抚胡侍郎啓

制置江西回监司郡守啓

贺秦相公啓 贺执政啓

回福建郑运使啓 回福建黄运使啓 回临安府张待制啓 回汪相公啓

贺赵相公啓

伏审光奉制书延登揆路吉甫用而周邦咸喜裴度留而唐室以安君臣庆千载之逢庙社增泰山之重恭惟平章仆射相公养气刚大禀德直方以忠精自结於主知以寛厚素隆於民望召从帅阍入赞化枢方有元戎十乘之行遂膺袞服九章之命安石运筹而苻秦宵遁汲黯在位而淮南寝谋何必肩輿挥羽扇以却敌固应当轴坐黄合以折冲惟天子明不疑不贰极儒者事允武允文当艰难思将相之秋宜出处系安危之本纶言所播舆论攸归方今近有僭伪之齐远有仇讎之狄六龙驻蹕之所靡定二圣回銮之日未期恢复中原必有祖生之志保綏江左亦资王导之才光辅大有为之君远摠不世出之略伫观勲绩亟载旗常某仰德虽勤趋风未幸卧病江海怅无良覲之缘拭目山林愿见中兴之象保綏福履茂对宠光瞻咏之私敷宣罔既

贺张枢密啓

伏审光膺帝制再践枢庭汲黯进而淮南寝谋吉甫用而周邦咸喜纶言所播舆论交欣恭惟枢密少保毓德粹和养气刚大飞英腾茂久辉映於士林耸壑昂霄果自致於云汉馭六龙以返正夙高浴日之功总万旅以临边雅着折冲之绩然而曾参孝而母不免於投杼不疑廉而人或云其盗金无实之言自古所叹惟金石之忠虽磨而不磷故贝锦之谤不辨而自明帝曰旋归复青氊之旧物人思爰立正黄合之虚员愿勿戒於险艰益展尽於底蕴以副苍生之属

望以报睿主之深知顾兹忧患之余加以衰耄之及采薇散髮方自屏於山林承顔接辞幸尝陪於樽俎志气既合襟怀自亲虽出处之不同岂寤寐之敢替拭目倾耳亟观钟鼎之勲枕石漱流亦被帡幪之赐其为颂咏罔既敷宣

贺赵相公啓

伏审显膺大号进陟上台策勲居羣后之先懋赏位百僚之长丝纶所播海?交欣恭惟平章都督仆射相公道与全材天降大任气鍾河岳之秀学洞天人微被遇眷知出陪兴运践历中外茂着休声膺考慎之选於艰难危疑之秋膺事机之变於仓卒扰攘之际绰有余裕澹如平时翊六飞以亲临天威大振致丑虏之宵遁国势遂安惟高祖垓下之师发纵指示则鄴侯为最肆真庙澶渊之役扶持贊襄则莱公居多载考之今何愧於古畴元功之特异付魁柄而增崇揉此万邦式是百辟内则总羣材而熙庶绩外则护诸将而统六师王谢风流既辑宁於南土房杜事业行致力於中原某也忧患之余可笑岩廊再月漫为曲突徙薪之谋湖海九年但有散髮采薇之志岂意垂老之日得见中兴之期抱病山林亦荷帡幪之大德书名竹帛永观柱石之殊勲欣颂之私敷宣罔既

贺张相公啓

伏审光膺典册进秉钧衡裴度平淮寇之强仲山补袞职之阙侧闻涣号大穆师言恭惟平章都督仆射相公德粹珪璋忠贯金石洞察天人之精祲该极古今之变通被知遇於国家多故之时立功名於春秋方盛之日御六龙而返正素推浴日之功统万旅以折冲茂着宣威之绩险夷自得出处何心适戎辂之戒严驰锋车而趣召云销雾散尽释流言坤转乾旋顿回异眷复枢机之旧物抚疆场之全师羽扇以挥貔貅奋厉灵旗所指犬羊遁逃坐收却敌之功克济保邦之略策勲行赏延登揆路之华委任责成兼总戎辂之重顾房乔之谋必断於如晦而曹参之位实次於萧何谠论嘉谋岂特设施於南土远抚长驾行将恢复於中原某也迟暮孤踪漂流远客杜门养疾每迁长者之高车捉麈纵谈窃闻君子之余论以山中之弘景识江左之夷吾喜乐正之有为义盖缘於好善庆王阳之登用志岂在於弹冠有德进则朝廷尊中国强则蛮夷服仁吉甫建兴周之业俾元亮返故园之居愿颂之私敷宣罔既

谢宰执复大观文啓

奉香火於琳宫已负素餐之责冠班联於书殿更貽非据之讥拜命甚优抚躬增厉伏念某瓯闽冷族乾坤腐儒李广数奇岂有侯封之望虞翻多难盖缘骨相之屯误被圣神之知首付钧衡之任信古志笃惟知专意而直前防患术踈靡虑危机之暗发进用再月何补事功流落九年备尝艰险脱瘴乡之滨死荷睿主之深慈幼安浮海以来归仲子灌园而奚恨杜门屏迹初非絶物而离羣卷舌吞声但欲省缘而藏拙不图垂老之际乃见中兴之年此道获伸勃勃胸中之气厚诬洗滌滌物外之人雷风鼓行蛇豕既遁日月清照皂白自分惟皇作极而无好恶之私与物为春而靡迹遐之间致兹孱陋亦预甄收此盖伏遇平章都督仆射相公道大包荒诚深与善以和羹之手而均调於四海以回天之力而弼亮於一人【执政云雅量镇浮诚

心乐善以警敏之才参陪於机政以同寅之德协济於艰难】肆开公正之途大啓休明之运遂使青藜之旧物复加白髮之陈人强饭廉颇龙鍾已老据鞍马援矍铄何为愿饵药以扶衰稍究无生之学期挂冠而上绶渐为归老之谋虽在山林亦托陶冶其为感愧罔既敷宣

贺孟枢密啓

伏审光膺纶制进长枢庭兵本得人国势增重恭惟枢密正奉材高杞梓德粹珪璋忠精自结於主知寬厚允符於民望久陪机政懋着猷为出总王旅则貔貅奋而盗贼销居守帝都则宗社安而士民协勳劳既盛眷倚愈隆果膺华袞之褒遂陟元枢之峻中原未复正须方叔之壮猷黄合悦虚日覬仲山之补袞某荷知有素蒙芘甚深屏迹山林怅望门庭之远书铭竹帛遙观柱石之勲尚慎鼎茵益绥福履其为瞻咏罔既敷宣

复郭少傅啓

伏审光奉明恩进膺异数高牙大纛易镇雄藩希冕篆车视仪亚傅纶言所播輿议允谐恭惟欢庆伏以知府制置少傅太尉材气无双如汉飞将姓名出衆过唐花卿毅然熊虎之姿卓尔韬铃之略辍宿卫於禁省总戎律於海邦未阅岁时懋着勲绩介圭入覲罄嘉谟啓沃之忠显服来归受康侯锡命之宠诞膺新渥还殿旧疆未遑庆幅之修先辱华絨之逮载惟衰病尝捐英风太白之识子仪当其未遇林宗之善元礼则为过情每烦问劳之勤尤见眷怀之厚顾风义之若此宜功名之谓何霜露戒寒鼎茵尚慎愿益绥於福履以茂对於宠光咏颂之私敷宣罔既

贺福帅曾尚书啓

伏审光膺明命起镇臣藩方面得人士民胥庆恭惟知府安抚合学尚书学高儒苑望重汉廷夙崇静退之风久处燕闲之地宸衷简在物论攸归果承纶綍之褒付以师帅之任褰帷入境已增焕於江山颁诏宣风行兴謠於襦袴顾兹迂拙蚤荷照知屏伏山林幸遂依於余芘瞻承眉宇欣将奉於绪言慰拚之私敷宣罔既

谢宰相制置江西啓

伏审告命除前件差遣已於今月二十三日到本路交割职事讫者杜门却扫方从养疾之私推轂授师误膺谋帅之选温诏不容於逊避便朝仍许於对敷训勅丁宁锡予优渥凡十年之黯闇举一旦而光明惟西江之奥区乃上流之重地控引淮浙襟带湖湘洊罹兵火之余重以旱灾之甚流移者十室而六七耕垦者百亩之二三物力屈而人心惊疑谷价翔而饿莩联属兵不足以御敌财不足以养兵虽使疏通之材未知所济以付迂愚之质其何以堪惟朝廷不吝金谷之贸迁俾士民得全性命於荒岁则夫庸陋或可冒居此盖平章都督仆射相公勲业格天勤劳接下持衆美効之君而不忌任大事济以断而不疑主盟善类之风协济中兴之业有如疎拙亦荷陶熔察其臭味之同不待颜辞之接内朝燕见密借吹嘘东合开罇屡陪讌语

意气相期於古人之上规画粗窥於高论之余有社有民既误蒙於推挽足兵足食更远赖於恩辉激昂衰病之姿黽勉尺寸之效过此以往未知所裁

贺江西赵都运啓

伏审光膺帝制荣领使符揔三江漕挽之权足一路兵民之食克当委寄允属老成恭惟都运合学胄出神明时推俊杰茂着风猷之美早联侍从之华琳馆燕闲士论久推於雅望枫宸进对渊衷益注於眷怀果奉明恩起司大计惟西江之奥壤乃南国之上游适当早暵之余坐致财用之乏饥卒开口而待哺流民恋土而思归素钦术业之优宜寛宵旰之顾载惟疎拙获托芘辉咫尺清光方幸蒙恩而入覲峥嵘高义行遂承顔而接辞欣拚之私敷宣罔既

与安抚胡侍郎啓

入覲轩墀误被宠光之渥出临民社叨承善政之余行造门庭遂交印绂恭惟知府安抚合学侍郎儒林杞梓天府珪璋读书过於古人落笔妙於天下蚤持荷橐有论思献纳之忠久分虎符为礼乐诗书之帅比奉锋车之召将为玉堂之游顾兹衰病之姿乃有交承之契规摹具在遵仿奚难今将军乃故将军素辨荣辱之境旧令尹告新令尹愿闻狱市之言斋合匪遥声光在望其为欣颂罔既敷宣

制置江西回监司郡守啓

杜门却扫方遂养疴之私推轂授师误膺谋帅之选温诏不容於逊避便朝仍许於对馭【或云传车已戒於啓行或云传车仍许於造庙】愧竿牋之未修辱緘题之先贐过形褒饰殊佩眷怀力疾効官幸托庇辉之德虚心奉教预深慰浣之情【远郡云声采久违莫遂披承之幸门阑在望第深悃仰之情江西州郡云力疾効官实赖邻邦之助协心共治庶几荒政之修经过州郡云假道封圻将有披承之幸拭目符采预增慰浣之情】岁律方新物华以始愿精调於鼎餗以茂对於宠光颂咏之诚敷宣罔既

贺秦相公啓

伏审显奉册书延登揆路丝纶所播朝野交欣恭惟驩庆伏以平章仆射相公毓德高明养气刚大临危着难夺之节奉上肩匪懈之心顷膺考慎之求未究经纶之业果符梦卜再秉钧衡居东三年政复归於姬旦辟国百里日有望於召公当天步艰难之秋繫庙谟开济之力冀茂建於宏烈以光辅於中兴某罪戾余生衰迟晚景山林屏迹方远托於帡幪鍾鼎篆铭愿逖观於勲绩其为瞻咏罔既敷宣

贺执政啓

伏审光奉赞书入参大政【王枢云延登右府】纶言所播輿议交欣恭惟欢庆伏以某官挺

杞梓之宏材蘊珪璋之粹德【孙参云道义足以镇浮文章足以华国王枢云体高明絶俗之姿稟刚大迈往之气】以闻望久孚於士论以精忠自结於主知果膺寤寐之求进贰机衡之柄【王枢云峻跻宥密之地韩信之拜大将一军皆惊汲黯之在本朝陰谋自息】方国步艰难之际实庙谟经济之秋冀展尽於壮猷以扶持於休运某披风有素贺厦惟深未遑竿牋之修先辱緘题之贶山林屏迹正远托於帡幪鍾鼎篆铭愿遙观於勲烈其为瞻咏罔既敷宣【孙李云某披风有素贺厦惟深屏迹山林远托帡幪之赐篆铭鍾鼎伫观勲烈之成瞻咏之私敷宣罔既】

回福建郑运使啓

伏审运使郎中夙驾轺轩再临闽部江山动色欣旌旆之重来士民归心知恩威之素着顾兹衰病方托庇庥未遑尺牋之修先辱华緘之贶其为感愧罔既敷宣

回临安府张待制啓

伏审光被异恩峻陞次对纶言所播輿论交欣恭惟欢庆伏以知府安抚待制智术疏通才猷敏劭有崇雅黜浮之略躬剴繁治剧之姿中外践扬声闻着甚作镇南服共推弹压之风进直西清宜有论思之益眷遇方宠擢任匪遥顾兹衰病之余累辱緘题之贶慰藉良渥佩服惟深方节序之严凝宜寝饗之调适伫闻休命以穆师言颂咏之诚敷宣罔既

回宫使王待制啓

伏审宠被新恩光复旧物恭惟驩庆窃以宫使待制受材宏博毓德粹温献纳论思蚤通班於法从承流宣化殆徧历於名藩适当艰虞之秋久困闲散之地风雨如晦而鸡鸣不已玉璞韞石而山容不枯惟问学之愈精致年德之弥劭果膺涣号一洗前非还通显之华资游燕闲之真馆玉堂金马行当翔集於天衢大册高文伫闻脍炙於人口某久亲襟抱雅荷照知未遑翰墨之修先沐緘题之贶其为愧佩罔既敷宣

回汪相公啓

伏审入覲明庭显膺异数视亚傅品秩之峻备上将威仪之多以光乡郡之行实为儒者之宠恭惟懽庆伏以知府少傅节使相公赋材宏達毓德粹和久依日月之光遂感风云之会当国论於艰难之际结主知於密勿之中去国十年眷注之怀不替造朝三接恩遇之礼特隆希冕篆车来恭桑梓碧油红旆照映川原岂唯乡里之荣观盖亦搢绅之盛事惟宣城之名郡乃江左之奥区民俗厚龐初岂劳於抚字江山秀发谅不废於登临伫观报政之优即听赐环之亟某久陪羈寓雅辱照知未遑竿牋之修先荷緘题之贶肃霜在候清风戒寒愿精调於鼎茵以茂绥於寿祉其为颂咏罔既敷宣

<集部,别集类,南宋建炎至德佑,梁谿集>

卷一百三十二

钦定四库全书

梁谿集卷一百三十二 宋 李纲 撰记上

报本殿记 求仁堂记

寓轩记 拙轩记

凝翠合记 丛桂堂记

文乡记 报德庵芝草记

本殿记报

佛教自东汉流入中国历魏晋至梁其教浸盛於是双林善慧大士出焉以大智慧善巧方便创建法藏佛菩萨语悉贮其中机运轮旋於顷刻间转百千匝了无滞碍其有信者与受持读诵胜妙功德亦无差别故後世语建藏者必以善慧大士为之本下逮隋唐其教愈隆然所谓经律论者犹不备也于是三藏法师玄奘出焉以坚固心发大誓愿远求法要眇然一身经二十年行数十万里历无数国土险阻艰难滨于九死乃得至所谓西天者讲习诸法以经律论归于此方而三乘教典始遂完具故後世语求法者必以三藏法师为之本是二大士宏阐佛教开示未来有不可称量之功後之置藏读经论律者多矣不能推其所自而为之报非阙典欤右文殿修撰罗公於宝峯栖云禅院既兴宝藏使信心士有所依归又辟经堂使具眼人有所阅习深惟建藏求法二大士之功不可弭忘乃即宝藏之西经堂之後别构小殿设其像貌而奉祠之礼也殿成求名於予予窃谓古者以农而食则必为之祭先农以蚕而衣则必为之祭先蚕以牧马为政则必为之祭先牧凡祭祀之间所以仁鬼神者皆推其本而报之仁之至义之尽也今右文公知二大士为建藏求法之本构殿设像使其徒日以香花饮饍歌呗讚叹修诸供养以昭报之实古之制宜名其殿曰报本则奉祠之意举矣惟转是藏閱是经者於焉瞻礼得其所自知善慧大士以大千经卷转弹指顷为立教故而不为易也知三藏法师不爱躯命远涉异域为求法故而不为难也发无上心而有为者亦若是则所以报之者岂特香华饮饍歌呗讚叹修诸供养而已哉予既以此告公又退而为之记以授住持真戒大师可臣使鑱诸石殿经始于宣和改元之夏告成于明年之秋可臣实?是役者甚力而才云宣和二年七月朔昭武李某记并书

求仁堂记

李子所居之堂以求仁名之客有过而问焉曰求仁而得仁仲尼所以称夷齐也子之名堂取诸此欤曰然客曰子将恶乎求之曰仁者如射反求诸已而已矣为仁由已而由人乎哉吾尝

以是求之客曰然则得之欤曰否客曰何为其然也李子曰君子之于仁其求之也易其得之也难一心之外无余仁一仁之外无余法内之方寸外之万物周徧圆融同一仁体反身而诚乐莫大焉强恕而行求仁莫近焉故曰仁远乎哉我欲仁斯仁至矣非以其求之之易故耶然仁之为任重非强有力者莫能胜也其为道远非笃行者莫能至也一出处语默之失当一视听言动之非礼足以害仁故曰仁者其言也訥为之难言之得无訥乎非以其得之之难故耶惟其求之也易故有能一日用其力于仁者圣人之所取也惟其得之也难故非见善明用心刚特立独行而不顾者未有能成其仁者孔子之门弟子多矣若由之可使治其赋也若求之可使为之宰也若赤之可使与宾客言也至于仁则曰不知其仁也以仁许之顔子一人而已故曰回也其心三月不违仁其余则日月至焉而已矣列国之卿大夫多矣若令尹子文之忠也若陈文子之清也至於仁则曰未知焉得仁以仁许之管仲一人而已故曰如其仁如其仁微管仲吾其被髮左衽矣得仁之难有如此者其于微子比干箕子则称之曰殷有三仁焉其於伯夷叔齐则称之曰求仁而得仁又何怨是皆见善明用心刚特立独行而不顾者也客曰然则求之有益於得欤李子曰求则得之舍则失之求而弗得者有矣未有不求而得者也君子之於仁也用之如水火熟之如五谷颠沛造次必於是也终食之间不敢违也当仁则虽师有所不让成仁则虽死有所不顾夫然故迹之事父远之事君穷则善身达则善天下由自爱以至于博爱由尽己之性以至于尽物之性而仁不可胜用矣客曰然则夫子如之何李子曰求仁者君子之所同也得仁者贤者之所独也以仲尼固天纵之将圣然而於仁则不敢居而罕言之况于予乎虽然尝试与子克己之私复礼之本立则见其参于前也在舆则见其倚於衡也夫然後行则所谓仁者固已粲然毕陈矣姑尽其所以求之在我有庶几乎死而後已又何容心於得不得之间哉客曰唯唯退而书其问答之辞以为求仁堂记云

寓轩记

梁谿居士既谪沙阳官廨陋甚不可以居而居於兴国佛宫自春徂夏气候歊蒸思得寬敞幽邃之宇以为燕居游息之地而宫之傍有轩焉前此以为过客之馆荒废不治因命工以葺之架青松以障日植翠竹以来风饰曲栏以为花卉之圃埋小盆以为芰荷之池地之?埕者与瓦壁之破阙者墙壁楹槛之漫漶者皆以人绩加之不数日焕然一新於是易其旧而名之曰寓轩大哉寓乎谛观此身其本何有从虚幻生从颠倒起如梦中人如逆旅舍其百骸九窍六藏该而存者固已寓矣况夫奔走往来涉世而游宦乎况夫愚戆妄发负罪而远谪乎以此身而居此轩无适而非寓者虽然自其细者观之以眇然之身而寄於四方上下无穷之间虽蛭蝨之居於蜗角浮沤之起於瀛渤未足喻也自其大者观之则方寸之中含容六合无有远迩念现前大地山河视以一眼华藏世界包以一心则虽仕宦而等於游戏可也虽罪谪而随寓安之可也以此身而居此轩虽寓也其有非寓者存焉尝试晨起而坐於轩上取佛菩萨语而观之否则取经史百家之言而参订之否则焚香默坐省循往咎以念前日之非否则宾客游从咏歌笑语以极一时之乐如幻人言如呼声响佛菩萨之语亦寓也如糟粕如筌蹄经史百家之言亦寓也念前日之非而罪性本空非亦何有极一时之乐而生灭相续乐亦不常是皆寓而已矣於诸寓中有非寓者则是轩之前青松翠竹花圃荷池墙壁瓦砾皆足以助发实相而况於佛菩萨之语经史百家之言与夫默坐省循游从咏笑者乎噫安得忘言之士与之坐寓轩之上而听梁谿之寓言则所谓非寓者庶几见之因寓意而为之记云宣和二年四月十二

日

拙轩记

梁谿寢室之側有小軒焉以為燕居食息之所竹樹葱籠鳴禽上下牕明几淨清風徐來梁谿欣然悅之因名之曰拙軒客曰是軒幽邃閑雅為子之所悅顧乃以拙名之何也梁谿曰昔柳子厚謫瀟水上愛其溪山泉石之美買而居之自謂以愚觸罪故凡溪山泉石皆名以愚今予以拙謫居於此而是軒廣不踰丈無丹雘之飾竹樹雖美叢桧茂密不加剪治全其自然獨為拙者之所樂則以拙累之不亦可乎客曰子之拙奈何梁谿曰子欲聞我之拙乎竭淇園之竹以為簡盡中山之兔以為毫不足以載其一二也雖然嘗試為子言其崖略予行不知塗之險夷以蹶于危予動不知時之利鈍以底于困言出乎口紆余為妍予獨澁訥其味淡然意萌乎心机警則臧予獨迂?惡圓喜方學欲趨時為進之梯嗟予獨拙抉摘杳微得之雖艱不可時施文貴適用片言有余嗟予獨拙參訂羣書務怪貪奇祇可自娛古今之變如水如陸舟車易用沒世不復予獨依然謂古猶今欲挽唐虞革民之心萬乘之威如雷如霆神龍之鱗其孰敢嬰予獨藐然忘君之勢欲以蝼蛄求格天地人之任職循默為貴如不聞知緘口莫議富貴可保乃為得計拙者居之不能自已遇事輒發寧復顧已人之仕宦因時逐勢高步青雲一日千里下者亦能寸積銖累拙者居之等於游戲得如嚼蜡失如脫屣凡是數者皆拙之故其大則然其小無數雖或悔之俄而復然與生俱生殆稟於天昔者老氏大巧若拙此巧而拙者也羿工乎中微而拙乎使人無已譽此工而拙者也皆不得為真拙若予之拙其真誰如求之於古有拙於催科而勞于抚字者有拙於生事而舉家食粥者其斯人之徒欤客曰嘻甚矣子之拙也吾將求良醫若古之扁鵲俞跗者飲子之神藥啗去方心規而圓之庶几子之拙有瘳乎梁谿怫然不悅曰天生拙于予俞跗扁鵲其如予何且予之得全于拙也不知天之高地之厚四時之寒暑萬物之生化而況於是非利害之端乎今雖竄逐以其拙故隨而安之亦知谿山僻遠之異於朝廷也窮愁羈旅之異於顯達也幸蒙恩貸得歸田廬一觴一咏左圖右書究余教于釋老味正道于吾儒庶千慮之一得收寸功于三余抱茲拙以終身又豈能釋此之樂而從事於智巧之苦與既謝客退而述之以為記因自號拙翁云時宣和二年四月二十五日

凝翠合記

宣和改元之夏某備員左史以愚觸罪幸天子矜憐不忍置之斧鑕黜守箠庫使食其祿以自循省仰戴隆恩雖天地父母之施無以加也迨抵沙陽雖號僻遠而谿山秀發食有魚稻笋蕨之饒士夫多資者方竊自幸而視事之夕民居延火几爇官局力救獲免臨溪有閣以為征商之所是夕火焚靡有遺子久不克構其明年夏邑令黃存道丞曾昂尉吳燦相與謀曰吾邑溪山之勝茲合所得居多且征商之所不可闕也莫若因其基而增廣之公務不廢而暇日得以資登臨之樂不亦可乎於是僱工鳩材不踰月而告成楹棟牕檻完潔顯敞不侈不陋飾以黝白下瞰平津前楫七峯層巒遠岫左右環抱雲林烟草映帶連縣四望一色因目曰凝翠合而置酒以落之酒酣某舉觴以屬二三子曰天下之事似夫偶然之中有數存焉茲合也回祿焚而辟之二三子構而成之罪戾之迹又適來此為之名而書之皆似夫偶然而實非偶然者也溪山風物之美無窮也而二三子官守有時而去也罪戾之迹雖已廢斥異時悅緣恩霈得歸

养亲以自屏於山林亦不长繫于此也苟不记其岁月何以示来者且慰他日追念游从眷眷之思乎子为我具碑材请以鄙文记之皆应曰然已而碑材具乃述其始末与相告之辞以为之记时宣和二年五月十六日梁谿居士李某记并书

丛桂堂记

元丰中沙阳人有得诗一絶于梦中者其词曰吾庐仙桂作丛荣紫陌先登历几春今日月娥亲付与黄金榜上第三人後数年而了翁登第与诗语合乃知此梦之祥瑞为陈氏设也了翁同祖兄奉议公欲取诗语名所居之坊而不果其子正式居忧多暇葺隐圃小堂而新之堂之左右有桂数本蔚茂芬芳因以丛桂名之从先志也堂成裁长牋叙其所以来谒予求大字榜楹间且乞文以记其事予不得已而为之言曰梦与觉一理也我与物一心也知梦觉之无二理则知未然之事兆於梦寐者初无今昔之殊知物我之无二心则知在此之祥见於彼梦者初无自他之别盖自其虚幻假合者言之则有为之法无非妄者况於梦乎况於他人之梦乎自其妙湛圆明者言之则真不离妄妄即是真自梦梦它亦无差别了之者为圣果而此本不增故虽他心宿住无所不通而达诸法空未尝执着迷之者为凡夫而此亦不减故虽尘劳妄想无所不阂而其梦寐精神与天地流通亦能显发未然之相故若叔孙之号豎牛永叔之系石马後皆果然世之人指此以为默定默定是也定之者其谁耶殊不知妙湛圆明周徧法界同一真体更无别物今日之所梦异日之所为岂有前後间断差别法耶由此推之则过去未来现在三世之法亦若是而已矣夫丛桂之诗为陈氏祥而梦於他人应於数年之後若合符节此见梦者此得梦者此应梦者尝试以是观之正式字兴宗年踰六十风度夷旷嗜作诗得前辈句法於它事一不问晚得子虽幼而岐嶷夙成宜善教之丛桂之祥不一而足必有在矣宣和二年五月十六日梁谿李某记并书

文乡记

文乡自开辟以来有之不知其分域之广几千里也其土居天地之中得陰阳之和气其民多君子明於理义思深而虑远其习俗温厚华藻自然尔雅好辩而善谋其上之所以教下之所以学有诗书礼乐之说天文地理律历刑法之术山川鬼神鸟兽草木之名俎豆钟鼓舟车器械之数罔不毕备游其乡者餐和而饮德神凝而心醉超然自得不知有饥渴之患寒暑之变也可以终其身而名後世是以君子贵之然其风俗随世升降必有一乡之豪杰相与倡和从而振起之方尧舜三代之世文乡大治深醇雅正有灏灏噩噩之风当时非特朝廷之上知褒文乡而旌表之也虽妇人女子小夫贱隶亦往游焉周衰孔子与其徒为之主盟而洙泗之间斷斷如也故其言曰天之将丧斯文後死者不得与於斯文也匡人其如予何盖其自任之重如此下逮战国文乡浸衰深醇雅正之风变而为从横捭阖之俗独屈原宋玉之徒崛起其间颇有古意博辩瓌丽未免有愤懑怪之作识者谓体慢于三代风杂于战国乃雅颂之博徒而词赋之英杰不其然欤秦燔诗书杀豪俊汉祖提三尺剑由马上得之当是时文乡几絶赖天下平定贾谊司马迁相如刘向扬雄班固之徒出焉而文乡复振历魏晋至隋习俗靡丽卑陋浮浅无足取者及唐韩愈倡之柳宗元和之排斥百家法度森严而文乡凜然与汉相望宋兴剗五季之余习欧阳修以古作导之于前王安石以经术成之於後而蜀人亦有以奇辞佳

句铿锵於其间者是以文乡之盛接武三代而下视汉唐为不足多也然则自汉以来数君子者其皆一乡之豪杰欤比年豪杰不作文乡浸复衰弱委靡不振岂其遯伏山林沉潜下僚埋光铲彩而不肯出乎予将游其乡而访之故为之记

报德庵芝草记

邓纯彦昆弟相与筑庵於先运使公新坟使释氏之徒焚修以资冥福予为名之曰报德庵未几有芝十数本产于庵中无木石即土而生初颇柔脆浸以坚实轮菌离奇其色晬然纯彦以语予且求文以记其事予窃思今夏芝生于邓志宏家枯梅干间凡十余本而未已今又生于报德庵二家方居丧力治襄事葬其亲不失时芝草之祥瑞为此致不然曷为而来哉始予抵沙阳询耆老以邑之习俗皆云俗多缓葬其亲权厝浅土有至于数十年而大事未集者予诘其故则曰俗以风水祸福为信然拘忌陰阳岁月时日以故不决又所以送死者厚修佛事待宾客治坟墓其费不貲力不足者耻其不若人因循迁延以俟其力之可以葬而不知年岁之积也予喟然叹曰习俗之弊乃至是耶古者卜其宅兆而安厝之端为亡者设耳传所谓龟言水蓍言市者是也後世始有风水祸福之说治其术者递相毁訾以求自售借使一家有数兄弟则必曰此利於长而不利於幼宜於仲而不宜於伯从而惑之则是终不可以葬也昔楚昭王不肯移祸於其臣晋悼王不肯移害於其民而君子以为达奈何欲邀福于身而不葬其亲哉拘忌陰阳岁月时日之非唐吕才论之详矣请试举其大概古者诸侯五月而葬大夫三月士庶人踰月皆以会葬之多寡远近为制是未尝拘于岁月也鲁葬定公遇雨不克而易日郑葬简公而司墓之室当道毁之则平旦而窆不毁则日中而窆子产命勿毁窆以日中是未尝拘于日时也陰阳家者流使人拘而多畏假於岁月日时以售其说何足信哉若夫送死之厚因以不葬则又失其本矣子路曰伤哉贫也生无以为养死无以为葬也孔子曰啜菽饮水以其所以养养之至也悬棺而窆以其所以葬葬之至也今以修佛事待宾客治坟墓力为未足而使亡者不得反其真岂不失其本哉然则如之何而可曰风水祸福与夫陰阳岁月日时之说世俗有之姑用其术而勿泥焉可也今纯彦志宏家实能如是则芝草之祥出而表之若有陰相之者盖将示人以移习俗之弊故予因为之记而及此庶几缓葬者有感于斯文信而行焉芝且生子之室矣宣和二年八月五日梁谿居士记

卷一百三十三

钦定四库全书

梁谿集卷一百三十三 宋 李纲 撰记下

蕲州黄梅山真慧禅院法堂记

澧州夹山普慈禅院转轮藏记

武威庙碑陰记 游罗浮山行记

邵武军泰宁县瑞光岩丹霞禅院记

汀州南安岩均庆禅院转轮藏记

松风堂记

毘陵张氏重修养素亭记

蕲州黄梅山真慧禅院法堂记

教外别传正法眼藏自达摩西来至忍大师为震旦第五祖然後祖道流通宗分南北由一灯传百千灯至于无穷得法者不可胜数岂具信根久乃纯熟堪任大事而一华五叶时节因缘自应尔耶蕲州黄梅五祖山真慧禅院祖师道場为天下名利而法堂岁久云蒸木腐将有倾压之虞住持者募缘修建邑人蔡氏闻而喜舍捐家资三百余万鸠工抡材焕然一新堂之高五十有二尺其深如之其广倍之修梁虹亘层檐翬飞宏博严丽遂为淮右诸刹之冠经始於宣和壬寅之秋落成於乙巳之冬始之者长老自表也成之者长老宗级也堂成後三年岁次戊申余被命居武昌假道湓浦绂不远百里过予求为之记余谓绂曰一切诸法皆非实相虽佛菩萨为法出世如梦如幻况其余乎今子建堂说法土木之所假合丹雘之所粉饰其堂然也以何为法直指心源见性成佛其法然也以何为说撞钟击鼓升高广坐有问有答敷演举扬是说法耶瞬目扬眉捻槌举拂屈伸动静四威仪中是说法耶德山棒临济喝秘魔义石巩箭是说法耶夫说法者实无所说而闻法者亦无所闻故并却咽喉唇吻道将来乃能问待有广长舌相向汝道乃能答此无一法与人彼无一法可得以法名堂因堂显法已为赘矣而又何以记为哉绂曰虽然如是佛法门中阙一不可故诸佛土有以声音言说而为佛事者有以楼阁庄严而为佛事者此堂倚白莲峰下瞰九江前揖庐阜清静爽垲具胜妙境而水鸟林峦炽然常说墙壁瓦砾咸助发机妙法宣明不假开示至於不得已而示人提唱宗风应机接物纵横舒卷或语或默无非第一义者夫言语解脱文字相空於梦幻中即梦幻而作佛事乃佛菩萨之旨也得公之文以纪岁月作大字榜楹间使游方具眼衲子登斯堂者有悟入处向上

事直下承当末後句目前荐取省住山翁半力不亦可乎余輒然一笑乃为之书建炎二年四月二十日具位李某记

澧州夹山普慈禅院转轮藏记

如来为一大事因缘出现于世示权显实说三乘法度无量衆将入涅槃以正法眼付大迦叶使之流布无令断灭所以显发四十九年随机接物实无所说应得度者本自圆成亦无所得诸大弟子佛灭度後相与结集修多罗藏及诸菩萨制律造论助发实相藏教乃圆譬如宝山庄严殊胜皆衆妙宝所共合成而大迦叶以正法眼展转传授至于达摩流通震旦不立文字直指心源见性成佛譬如一灯传百千灯光明相续无有穷尽彼衆宝山非大法灯之所照烛则不明了故以具眼而閱灵文以法印心如印印泥小大方圆不差毫髮是则名为具看经眼不如是者变为歹相则诸佛说反成魔说有大导师善慧大士以方便智设妙圆机创转轮藏以贮佛语及菩萨语关机斡旋周行不息运转一匝则与受持诵书写一大藏经教等无有异夫一藏教其数五千四十八卷一偈一句含无量义其有受持读诵书写非积岁时晦明寒暑不能成就云何乃於屈伸臂间运动机轮而得圆满应观法界一切惟心由心生故种种法生由法生故种种心生法即是心心即是法心法如如非一非二则一念之际功德周圆与久远时无有差别了斯法者於一尘中转大法轮於一念顷转如是经百千万亿况此法藏现前运转自然能护不可思议胜妙功德以是义故轮藏之兴周徧禅刹与诸有情作大饶益澧州夹山普慈禅院传明大师演化法席十方禅侣响赴云集具大藏经独无轮藏惟大比丘长老善能兴崇寺宇规模建立而荆南府故能仁寺改为官舍有旧经藏制度精好澧倅吴君适至其处乞归付之为天申节祝延圣寿道场之所剏大宝殿茈覆安设相方面埶博广严丽檀信施财匠石献巧水漂巨木材皆香楠以充殿楹溪出异石形如覆钟以奠轮趾衆缘和合不日告成金碧相鲜炳焕殊特诸天宫殿大地山河磅礴穹窿与藏回旋诸大菩萨及护法神宴坐奔驰与藏往复互相扞摩出大音声演出苦空无我妙义凡见闻者靡不蒙益而况发心精诚归向由一转藏至百千转旋见关机反观自性转贪恚痴为大智慧顿悟圆通证无上道夫何疑哉有一居士其家梁谿谋身拙故罹诸忧患去国漂泊经湘沅间闻是比丘大作缘事以身所有随喜而舍舍诸身业为书藏额舍诸意业为作藏记舍诸口业为说藏偈三业皆舍愿从今去永断诸业罪障消除得无生忍时此居士遥瞻宝藏而说偈言我观大藏教三乘十二部广为衆生说皆是诸佛语禅宗指心源不立文字相见性以成佛岂与佛语违了心即了法心法本无二已具看经眼乃可閱灵文谛观诸佛言无一不然者如以印印泥从横皆契合此心未明了欲于纸上求如入海算沙历劫无是处心迷诸经转心悟转诸经是故学道人明心以为最我观转轮藏衆宝所庄严排斡隐机关周行无滞碍山河随地转宫殿与天回诸龙及鬼神蟠结以卫护璀璨种种色发生大光明荡摩出音声演说微妙义佛语菩萨语宝函秘其中运动不崇朝而转无量匝一心生万法万法惟一心心念已周圆功德斯成就藏轮表诸法法轮转於心是故瞻礼人当观能转者我观夹山境清淨古丛林精进老比丘能作大缘事诸缘和合故指顾宝藏成宝藏成既然一切法亦尔仰祝圣人寿後天无有边俯利诸含生神力不思議稽首如来藏及诸菩萨等坐于微尘里转广大法轮刹那於是经能转千万亿方便解脱法化度诸有情於一弹指间洗涤千劫罪是故我皈依回心无上道

武威庙碑陰记

故翰林学士承旨苏公谪儋耳既北归作汉伏波将军庙碑言两伏波皆有功于岭表庙食海上为往来济者指南辞意瓌伟自作碑造今凡三十年未克建立盖阙典也余以罪谪万安行次海滨疾作不果谒祠下遣子宗之摄祭病卧馆中默祷于神异时恍得生还往反无虞当书苏公所作碑刻石庙中使人有所观考以答神贶时建炎三年十一月二十有五日既得吉卜夜半乘潮南渡诘旦次琼筦恬无惊忧後三日祇奉德音特恩听还疾良愈躬祷行宫卜以十二月五日己卯北渡不吉再卜六日庚辰吉己卯之书风霾大作庚辰乃息日中潮来风便波平举帆行船安如枕席海色天容轩豁王露不一时已达北岸乃知神之威灵盭昭着若此苏公之言信不诬也次雷阳书碑施金谿郡守董侯总其事大书深刻垂之无穷且叙所以蒙神之休者志于碑陰式告观者正庙新息马侯也初封忠显王宣和中加佑顺号别庙邛离路侯也宣和中进封忠烈王皆在苏公作碑之後故并记于此岁次己酉季冬十二日武阳李某记

游罗浮山行记

武阳李某归自海上舫舟泊头镇游罗浮山憇宝积延祥寺饮卓锡泉见五色雀暮抵冲虚观月下望麻姑峯秉烛观稚川祠堂丹竈有老道士尝识东坡呼与语久之乘月而归乡人游有同来男宗之从行建炎庚戌岁仲夏望日记

邵武军泰宁县瑞光岩丹霞禅院记

东南名山如所谓四明天台衡岳庐阜号为瓌伟秀絶者多为浮图氏所居名蓝巨刹繇亘相望至于下州小邑一岩一壑搜奇择胜亦靡遗者推原其端必有开土法眼清浄道行高洁为一方之所信仰乃能披榛棘翦道场肇基开迹以贻後人非偶然也邵武军泰宁县山水之胜冠於诸邑出县西门二十里曰瑞溪有山焉三峰秀峙岩洞相聯西曰丰岩东曰瑞光岩中曰罗汉岩岌嶭嵌空鼎足而列皆有兰若建於其下不涂墍茨而风雨之患除不凿户牖而日月之光入堂殿楼阁窈窕玲珑泉石草木幽奇芳润叠嶂屏其前层峦拥其後山回路转岩洞乃出谓造物者融结无意吾不信也三岩中独瑞光岩兴於近年盖宗本禅师之所建立也师邵武农家子初不知书大观庚寅中游山间遇异僧示以出家时节因缘且密有所付心地豁然遂能通儒释诸书作偈颂道未然事多验既落髮受具戒居双林院远近向风户外之屨满矣政和辛卯春师诣汀州南安岩谒定光古佛道出泰宁夜梦紫袍神人告之曰师此行宜住瑞溪觉而异之诘旦瑞溪有檀越曰江牧曰邹扞迎师以居丰岩礼意勤甚师以符梦所告从其请既而同游前岩爱其幽胜二檀越相与曰师恍有意驻錡锡於此当为创筑精庐以垂无穷师许之鳩工抡材不三月而告成会有旨天下佛寺有神仙迹者还为道观听以旧额建寺他所而郡之丹霞院应改朝请大夫权郡事陈侯绍移额於岩中以成师志寺因号丹霞先是岩有光景之异未几院额至故集贤殿修撰罗公時时帅长乐与师有素闻而喜之为目其岩曰瑞光且施财率衆力而新之为门为殿为法堂为丈室於中为钟楼为厨为庖於左为华严阁为应真阁为僧堂於右皆规模丛林具体而微制度精巧金碧炳焕一旦出丰岩罗汉岩右互

相辉映若图画然真胜地也宣和初余以左史论事谪官沙阳殿撰罗公方里居相从甚厚称道师不容口因寓书以偈颂相往来迨建炎末蒙恩归自海上来居泰宁始与师相识尝访於岩间为留宿赋诗而後返今年春盗起邻郡余徙长乐未阅月邑遭兵火焚蕪殆尽独三岩岿然栋宇如故岂非神物护持师之道力有以感格之耶其秋以书来求余记之余既雅重师为人又爱岩壑之美记其敢辞然窃怪近世贵耳而贱目读前史见鸠罗什佛图澄万回普化之流竦然慕之恨不与同时偶有其人则又不甚信重类多如此何独浮图氏哉书于记末庶几览者有感于斯言绍兴元年辛亥八月五日记

汀州南安岩均庆禅院转轮藏记

浮屠氏之流善卫其法而尊其书凡所建立多克有成操术公用心一也佛菩萨语所谓五千四十八卷者创大藏以贮之籤架函复纈悉备具有诵读者盥手焚香整衣敷坐卷舒出纳惟谨又以方便设为机轮使之旋转种种严饰悦可人心俾见闻者自生恭信卫其法尊其书致严如此凡所建立费钜万计寸积铢累仰施于人鸠工抡材不计程度期于满意一有倡者衆皆和之夫大者领袖小者辅翼前者规模後者承继知因果罪福而以利衆为事无忌嫉心无沮坏心以是义故多克有成虽儒衣冠在士大夫之列者不能无愧于兹非操术公用心一能若是乎建炎四年夏余蒙恩归自海上由梅川以趣闽中道南安岩均庆禅院瞻礼定光古佛遗像退历殿阁循东庑见新创转轮宝藏制度精巧堂宇靚深自岭峤以南未之有也询其故则景润宝谦二僧同发心募衆缘之所造因呼而告之曰今天下兵革未息盗寇蜂起凡通都会邑名山奥区所谓大禅刹者焚蕪摧毁盖不可胜计其间经藏金碧相辉化为灰烬瓦砾之场者多矣子方区区劳心费财以营此乎二僧相顾而笑曰世间之法成坏相因坏者自坏成者自成吾知办吾力以成吾志而已岂以彼之坏而废此之成哉余颇愧其言经从临汀邂逅郡倅许侯端夫因以语之许侯好佛者也闻而喜曰微二僧用心之固无以成此藏之瓌奇微公烛理之明无以知僧言之可取愿求公记以貽後人余诺之明年夏余携家寓长乐许侯以书来请曰藏成矣公无食言乃为之书绍兴元年岁次辛亥六月十八日记

松风堂记

梁谿病叟蒙恩归自海上绍兴辛亥之夏始挈其孥寓居长乐之天宁寺寺踞南山栋宇宏丽回睇城郭江山环复尽登览之胜然面势北乡南风不来夏秋之交歊蒸鬱勃虽有高檐广庑如坐甑中病叟益不能堪其明年乃规模逃暑之地於方丈之东得屋数楹高显新洁而寺僧以墻壁壅之限为小室居昧昧也意其後必有异乃始辟而通之短垣之外与山巅平青松千株森列苍翠风度其间声韵萧瑟入轩牕拂怀袖穆然浏然信乎能濯执热而慰人心也因命易柱以梁螯地以璧凿顽石剪榛芜植幽花理修竹日与宾客啸咏其上遂为一寺之胜化烦溽之地为清凉之境皆谓得未尝有乃目之曰松风堂盖纪实也昔柳子厚居永州龙兴寺作西轩记言凿西牖为户户之外为轩以临羣木之杪不徙席不运几而得大观因悟夫佛之道可以转惑见为真智即羣迷为正觉舍大闇为光明岂异物哉吾於斯堂亦云堂成未几被命帅长沙宣抚荆广具奏辞免有旨遣中使降赐趣行不得已力疾上道恋恋不忍去然忧患之余衰病日加实不足当委寄之重方再有请冀蒙矜怜得以养痾山林终遂其志则久假是以

游处未晚也姑为文以识之壬子岁闰夏八日记

毘陵张氏重修养素亭记

古之君子进而在朝则乐行其道退而在野则乐遂其志穷通不同而所乐非穷通则中有所养而外物不足以移之也今夫位三旌禄万鍾致君泽民功大名显此进为抚世者之所好也然是有命焉不可以力致也时适当退则富贵宠利不得而执也就藪泽处闲旷怡性养寿逍遥无为此退居闲游者之所好也然是亦有命焉亦不可以力致也时适当进则山林皐壤不得而留也所养者至则所守者固进退穷通且为昼夜寒暑之序矣昔者伊尹起於畎亩传说起於版筑吕望起於屠钓此数公者方处穷约其意曷尝不欲兼善天下哉既而遭时遇主风云感会自致青云之上其所守者初无异于穷约之时也昔者伯成子高辞为诸侯而耕於陵仲子辞为卿相而为人灌园汉之二疏辞为师傅而告老以归此数公者方处富贵其意曷尝不欲独善其身哉既而脱屣轩冕高尚其事自得於寂寞之滨其所守者初不异于富贵之时也进退两忘而不为之变夫是之谓中有所养与夫小人进则以饗富贵而欣欣退则以失权利而戚戚者固不可同年而语矣故天章阁待制张公以文学取科名以才力精吏事当嘉佑间将漕河朔致位侍从风绩之着为时名臣竟以直道齟齬进不极任一旦引年谢事而归故乡在朝诸钜公赋诗以宠其归者三十余人公即所居之西偏建亭榜之曰养素尽以诗刻石置之亭上治园池艺花竹日与宾客相乐饮酒围碁鼓琴啸咏翛然忘老此真能不以富贵穷通累於胷次者可谓知所养矣迨今六十余年经兵火乱离之後亭宇颓弊殆将弗知其孙牧之惧先德之或坠僦工鳩材因其规模而增广之凡土木瓦甃之朽腐破阙者园池花竹之堙废荒芜者葺理培植焕然一新既落成矣以书抵长乐求余文记其事余告之曰凡物之生动者植者必资于养乃熟乃成其在根荄所谓枝干华实者已具养之而至於高大其在胎卵所谓视听食息者已全养之而至於壮者因其所固有而充之非外铄也君子之所养亦然故孟子曰我善养吾浩然之气其为气也至大至刚以直养而无害则塞乎天地之间养之为义大矣哉今牧之喜节义重然诺年踰耳顺志意不衰晚得一官困于州县而议论挺挺不可屈郭外之田不足以餬口而座上客常满樽中酒不空固已加於人一等矣殆於孟子养气之说槩乎尝有所闻以不愧先德命名贍训之意耶余方避地留滞闽粤异时西归相与登斯亭握手一笑庶几与闻一二以自警焉因次序其说以为之记待制公讳显之其先自江南归本朝家於毘陵牧之名牧靖康中朝廷特命以官今为右廸功郎监常州税云绍兴五年闰月既望具位李某记

梁谿集卷一百三十三

<集部,别集类,南宋建炎至德佑,梁谿集>

卷一百三十四

钦定四库全书

梁谿集卷一百三十四 宋 李纲 撰序一

易传内篇序 易传外篇序

释象序 明变序

训辞上下序【阙】 衍数序

类占上序 类占下序

易传内篇序

六经皆所以载道而易以道陰阳故刚柔相推而生变化天道备矣圣人系辞焉而明吉凶以尽人事所以和同天人之际而使之无间也古文日月为易日阳也月陰也月遯日迈一昼一夜相推而生明阳奇陰耦一刚一柔相推而成卦故曰陰阳之义配日月又曰刚柔者昼夜之象也圣人观变於陰阳而立卦发挥於刚柔而生爻卦爻具而谓之易者盖专以变易为义先儒谓易含三义有不易简易之意者非也故自太极兆而为奇耦自奇耦积而为乾坤自乾坤索而为六子自八卦相重相错而为六十四卦无非变者六爻之义易以贡变动不居周流六虚上下无常刚柔相易不可为典要唯变所适此所以谓之易坎易也道也神也异名同实其旨一也生生之谓易一陰一阳之谓道陰阳不测之谓神三者浑沦而不相离语其大则范围天地语其小则充足毫末刻雕衆形橐籥万化自有形至於无形自有心至於无心莫不综摄乎此则易之为书何为者耶载此而已刚柔有自然之体奇耦有自然之数上下内外有自然之位进退往来有自然之序消息盈虚有自然之理皆所以载天道也而人事存焉是以圣人察卦爻之变因其有是象则系之以是辞以爱恶情伪之相感为吉凶悔吝之端以君子小人之消长为治乱安危之本其所以告人使避凶趋吉虽不离于日用之间而精义入神有出于思为之表和顺於道德而理於义穷理尽性以至於命此学者所以不可不尽心也周官太卜掌三易之法一曰连山二曰归藏三曰周易其经卦皆八其别卦皆六十有四则自伏羲画八卦因而重之六十四卦已陈矣连山夏易也以艮为首故曰连山归藏商易也以坤为首故曰归藏孔子观商道于宋得坤乾焉盖归藏之书然而读易韦编至於三絶作彖象文言诸篇以赞明之则三易之书至周易而後大备故韩宣子适鲁见易象及春秋曰吾乃今知周公之德与周之所以王矣易卦先後之序与彖爻之辞皆文王造始而周公续终之故有王用亨于西山箕子明夷利贞之语不然韩宣子何以知周公之德哉孔子於易其说尤详而论语记羣弟子问答独罕及易故曰子所雅言诗书执礼皆雅言也以诗书执礼为雅言则易罕言矣岂非易者天道所在而性与天道虽子贡亦有所不得闻故耶秦焚诗书易以卜筮之书而幸存今余经类亡阙而易独为完经盖天相之以垂训于万世使一卦一爻有不备者则乾坤或几乎

熄矣汉晋间如九师之流一主於象数而不稽义理故其取象蔓衍迂濶多悖圣人之意自王辅嗣以来及近世学者一主於义理而不求象数故其训义与象相违因失圣人之意者亦不为少二者胥失也夫圣人极数以定象立象以尽意象数者易之所自作而义理寓舍象数以求意是由舍筌蹄而求鱼兔捐麴蘖而求酒醴也鱼兔得然後筌蹄可忘酒醴成然後糟粕可弃故必质诸象数而不谬考诸义理而不惑六通四辟无所滞碍然後圣人之意可见焉孔子象象盖兼之矣然而象少义多者深其阜眇其根幽其所以然使学者精思而自得故也余以罪谪海上端忧多暇取易读之屏去衆说独以心会即象数之幽眇究理义之精微于以窥圣人之制作灿然如据玑衡以观天日月星辰经纬昭回之文吉凶妖祥之理皆可历数而周知喟然叹曰不学易而涉世其蹈祸固宜罪大不死乃得穷圣经于荒絕之乡心醉神开恍若有授之者岂非幸耶昔人作易於忧患者非特智虑不用于时欲有所表见於後盖亦险阻艰难备尝之矣人之情伪尽知之矣然後思深虑危足以发难言之妙蕴以貽范於将来余虽固陋困穷流离之甚其敢忘此乃以所妄见者着易传内外篇训释上下经上下系说卦序卦杂卦总论合为十卷外篇释象七明变一训辞二类占一衍数二合为十有三卷凡二十有三卷虽未足以测圣人之意然发明易学必由象数以极义理之归庶几或自此书始也引义比类反覆参错文辞繁费所不得已览者取其意而勿谓焉可也书始于建炎岁次己酉中夏时赴谪所南征次鬱林成於庚戌季春时自海上北归次宁远凡暮年云谨序

易传外篇序

易有圣人之道四焉以言者尚其辞以动者尚其变以制器者尚其象以卜筮者尚其占易本於数而数不与焉极其数遂定天下之象数兼于象故也有数而後有象有象而後有变有变而後有占而鼓天下之动则存乎辞辞所以该极象数各指其所之而明吉凶以示人者也古之学者必备是五者然後足以窥圣人作易之旨故有推步气候律历之学所以知数也有正卦互体俯仰之学所以观象也有卦变时来消长之学所以察变也有五行世应游魂归魂之学所以考古也有训诂其言解释其义之学所以修辞也近世学者唯尚言辞务明其义而象数变占之学皆失其传则不得圣人之旨多矣今卦爻之象变具在含蓄妙意发挥至理示人甚明顾弗深考而占筮术数之法载於经传者班班可见苟能精以思虑默契于心则古人之学不难到也圣人作易之旨虽非即此而可穷亦非舍此而能得不啻不拘唯其是之为从而已余年运而往行将知命学易於忧患之中既以所妄见者为之传又作释象七篇明变一篇训辞二篇类占衍数各一篇合十有二卷目为易传外篇以解剥易体庶几圣人难尽之意或因是而可窥至於洞象数之表达变通之几占筮之巧妙辞义之精微有不可以笔舌传者则览者当自得焉盖易者学道之筌蹄此书又学易之筌蹄鱼兔已得则筌蹄虽忘焉可也书始于建炎三年己酉之中秋时谪居海上行次雷阳成於四年之仲春时蒙恩北归行次容南凡半年云谨志岁月总其大略为之序冠于目錄之首

释象序

易者象也犹天之垂象经纬昭回环布森列在野象物在朝象官在人象事皆有名数分域灿然以示人故天之高也其故可得而知则以象知之也善占天者必审其名数辨其分域知象

所在而谨察之然後天意可推而吉凶妖祥可得而占不然则以角为尾以昧为翼以斗为箕以紫微皇极之居为太微三光之廷其相去辽絶可胜言哉易象亦然奇耦相交而八卦之象立八卦相错而六十四卦之象生六爻相杂而三百八十四爻之象备正取之为天地水火风雷山泽之八物旁取之则天地之间百物不废其在天者日月之盈昃星斗之斡旋云雨之升降冰霜之凝结无不取也其在地者丘山之丛聚川渊之流止井邑田野城墉衢巷之制千盘陵陆泥沙谷穴之宜无不取也在人则取於君臣父子夫妇男女长幼朋友之伦在物则取于羽毛鳞介草木华实牲醴膏血之品取诸身者耳目鼻口心思之于五官顶颐辅须颊舌之於元首胸背夤腹之於体拇趾腓股之於足莫不具焉取于器者樽簋之属以为礼弧矢之属以为威牀几枕柅之属以为安车輿轮辐之属以为行簪紱裳带以为服馈餼酒食以为养瓶瓮繡幕之於井耳铉趾足之於鼎莫不有焉以礼为象则有祭祀宾客?媾田狩征伐之类而五礼备矣以政为象则有刑法庆赏告命官使事功之类而庶政举矣动静取舍进退往来内外小大先後初终一话一言象皆存乎其中大矣哉易之取象之多也夫八卦错则六十四卦之才殊其所以为消长盛衰治乱安危聚散通塞者亦殊也六爻杂则三百八十四爻之情异其所以为爱恶相攻远近相取情伪相感者亦异也卦者时也爻者人也所遇之时所处之人既不同则吉凶悔吝得失忧虞是非利害其象亦随而变焉此取象之所以不得不多也圣人设卦以观象立象以尽意系辞焉以断吉凶而尽其言因有是象则命之以是辞岂苟然哉辞具难言之象而象含无尽之意深考而谛观之圣人之意盖昭然矣舍象以求易是犹舍日月星辰而观天也可乎哉夫象者像也犹之象设拟形容而象物宜使观者有所考耳审象而得之如高宗以梦而得传说循名而失之如燕人市璞而得死鼠此求象之不可以不察也制器者因规以为圆因矩以为方而後可以议方圆于规矩之外也作乐者因律以召阳因吕以召陰而後可以知声于黄钟大吕之表也相马者按法式以求之则仪氏?中帛氏口齿谢氏唇髻阙一不可及其至也牝而黄牡而骊足以得天下之马不能察其法式而曰我能得马者妄也鱼兔得筌蹄捐醇精流糟粕弃此为得象者言而非求象者之事也自王弼有得意在忘象得象在忘言之论深斥象数之学以谓互体不足遂及卦变变又不足推至五行义无所取而近世学者遂废象而不谈不能知象因失圣人之义多矣殊不知象明而後意可得意得而後象可忘求象未得遽欲弃而捐之不亦过乎互体卦变之属其所由来古矣考十三卦制器尚象之理与春秋传所载占筮之言其说不诬第汉晋诸儒计之不精索之不切一泥于象而不求义蔓延迂濶反害圣人立象之本旨今其书已罕传而爻象之象具在可推而得冥搜远绍惟其是之从而勿泥焉可也夫天象可观而不可穷易之象含天下之至赜而测之益深穷之益远诂可俄而测哉错杂以观其所同比类以求其所异由显以知隐由近以拟远由支离以会归於简易则圣人精微之意若合符节矣作释象

明变序

易者变也自乾坤变而为八卦自八卦变而为六十四卦自六十四卦变而为四千九十六卦无非变者其法起于七八之数而已九为老阳其策三十有六六为老陰其策二十有四陰阳之老必变故得九六之数则动而有所之七为少阳其策二十有八八为少陰其策三十有二陰阳之少不变故得七八之数则静而无所适圣人观变于陰阳而立卦发挥于刚柔而生爻所以明吉凶以示人者因其动而已故曰道有变动故曰爻爻有等故曰物物相杂故曰文

不当故曰吉凶生焉又曰变动不居周流六虚上下无常刚柔相易不可为典要惟变所适然则重六画以成爻统六爻以成卦积六十四卦以成易所以体天地之撰通神明之德类万物之情者其有不存於变者乎孔子论易之变有兼变化而言者有独指变而言者盖物之生由乎化者也物之极由乎变者也阳极生陰则在阳为变在陰为化故凡阳老而之陰者皆刚变而为柔陰极生阳则在陰为变在阳为化故凡陰老而之阳者皆柔变而为刚刚柔相推而生变化变化者进退之象此兼变化而言之也一阖一辟谓之变化而裁之存乎变此独指变而言之也夫陰阖阳辟其极皆变使化而无变以裁之则天地万物何以相禅于无穷爻以倣此故曰爻也者言乎其变者也由爻之变故卦以之变由卦之变故易之变备焉六十四卦三百八十四爻其象不同而圣人系之以辞亦异者莫不一寓于变然而又有专取变以为象象者若井之改邑不改井之类是也有专取变以为爻象者若巽九五之先庚三日後庚三日之类是也以至消长进退之序俯仰盈虚之体应比远近之势爱恶取舍之情即其变而观之易之理盖昭然矣作明变

衍数序

道生一一生二二生三三生万物自道降而生物无非数也易有太极是生两仪两仪生四象四象生八卦自易闡而生卦无非数也造物者本象以出数故曰物生而後有象象而後有滋滋而後有数则数非象不立作易者因数以定象故曰极其数遂定天下之象则象非数不明二者相为表里而已天下之物不逃於数天下之数不外於象天下之象不遗於易故易之为书该极象数以冒天下之道者也数起於蓍蓍以七运而四十九之用圆而神数成於卦卦以八周而六十四之体方以智揲蓍以知策推策以定爻因爻以设卦而易之能事毕矣陰阳有老少此策之数所以殊也刚柔有微彰此爻之数所以别也自天一至天五生数也自地六至地十成数也以奇生者成而耦以耦生者成而奇奇耦相推演而五行之数立矣一三五七九天数皆阳也二四六八十地数皆陰也合天数二十有五合地数三十凡五十有五而大衍之数成矣乾履一于西北巽戴九于东南艮东北而左三坤西南而右七离二震四上峙而为肩坎八兑六下承而为足河图九宫天极之数积矣气有司间而上下左右之分辨精有专散而风雨寒热燥湿之化彰乾兑之金位于西而盛于西北震巽之木位于东而盛于东南离火有君相坎水有降升坤艮之土有始终五运六气坤枢之数行矣乾坤包六子而纳甲之法生五行历十二辰而纳音之法备五声六律十二管旋相为宫有高下损益之制律法出焉参天两地迭相乘除有章蓍纪元之术历法肇焉故以卦当日昼夜各一则为爻十有二者辰也以卦当月六日七分则为三十者日也以卦当时震兑坎离分主春夏秋冬夏则为爻二十有四者气也以卦当年陰阳二卦相交於冬夏二至则为爻十有二者月也参伍以变错综其数引而伸之触类而长之天下之故莫不筦摄于此故明于易之数者顺以数往逆以知来察天人之际於掌握之间洞古今之变於谈笑之顷究观物理与神为谋其故何哉天地之覆载陰阳之生杀日月星辰之运行晦明寒暑之代谢山川之流止动植之死生事之因革器之成坏人之穷达寿夭世之治乱安危帝王之兴衰君子小人之进退消长莫不有数存乎其间故数也者成变化行鬼神虽天地之大不能违也而况於人乎况於万物乎极数之变执神之机在璇衡以观大运据会要以知方来则探赜索隐鉤深致远推陰阳之荒考神明之隱若影响之於形声夫何疑哉汉之扬雄张衡唐之魏伯阳邢和璞本朝之邵雍皆深於数者故雄作太玄衡着灵

宪伯阳有参同契和璞有颍阳书雍以先天图作皇极经世皆宗于易而辅翼推明之至数所在信如蓍龟不可诬也精微之几不可以言传姑取其可陈者着于篇作衍数

类占上序

人心神明之府天地之镜也万物之监也虚而灵寂而通固可以无卜筮而知吉凶所不能然者物蔽之也故必假于蓍龟神物然後能知之龟曰卜蓍曰筮卜所以兆象也自陰阳五行之象交感而生爻者为雨霁蒙驿克故卜之用五筮所以兆数也自陰阳五行之数错综而成卦者内为贞外为悔故筮之用二卜筮之用以其从违断天下之疑无有远近幽深遂知来物故曰探賾索隐鈎深致远定天下之吉凶成天下之亹亹者莫大於蓍龟易之道以卜筮者尚其占而卦爻之变专以筮为主者幽赞于神明而生蓍参天两地而倚数观变于神明而立卦发挥於刚柔而生爻卦爻本于数而数本于蓍故也三易之法一曰连山二曰归藏三曰周易其经卦皆八其别卦皆六十有四连山归藏以静为占故爻称七八周易以动为占故爻称九六七八者少陰少阳之数也陰阳之少虚而未盈故静而不变九六者老陰老阳之数也陰阳之老盈而已极故动而变生吉凶悔吝生乎动者也故易以动为占所以卦爻之辞其变不一者动则观其变而玩其占所指不同故也一爻变则其占用所变之爻辞陈侯筮敬仲遇观 之否 【六四爻变】曰是谓观国之光利用宾于王之类是也二爻至六爻皆变则其占用变卦之彖辞穆姜筮居东宫遇艮 之随 【六二不变外余爻皆变】曰是在周易随元亨无咎之类是也六爻皆不变则其占用本卦之彖辞晋公子重耳筮得晋国遇贞屯 悔豫 皆八曰是在周易皆利建侯之类是也古之占筮以辞为主而又论卦爻之体若毕偃筮仕于晋遇屯 之比 辛廖占之曰吉震为土车从马足居之兄长之母覆之衆归之为公侯卦之类论卦体也若晋成公筮归国遇乾 之否 曰配而不终君三出焉之类论爻体也率之以卦爻之辞揆之以卦爻之体而凶吉之理明矣後世占筮有世应之说有飞伏之候有归魂游魂之法有纳甲纳音之术有星躔气候之数以五行之生克比和六神之王相囚废决定吉凶而京房郭璞焦贛之流又各以其术制易林春秋占法殆废至近世则诸家之术亦失其传所谓以卜筮尚其占者或几乎絶可胜慨哉惟依古法主卦爻之辞而兼论其体参以诸家之术庶几得之今掇取六经春秋传国语所载占筮及诸家之术可用者史氏所传占筮术数之精微者着于篇作类占

类占下序

卜筮术数艺成而下与医祝同科然该极象数探賾索隐鈎深致远圣人之道在焉推原天地陰阳五行之理於卦爻之间逆知吉凶若合符节虽千里之远千岁之故可坐而致至矣哉妙于此者又能将之以道义如司马季主严君平饰之以艺文如管辂郭璞巧发奇中如隗炤赵达预言期运如郑相如桑道茂尤可贵重昔太史作日者列传盖有意推崇之因取西汉以来至于五代史策所载卜筮术数之精微者掇其大要着于类占之末

卷一百三十五

钦定四库全书

梁谿集卷一百三十五 宋 李纲 撰序二

栖云院新修印心堂名序

邓公新坟庵堂名序

送陈渊几叟游庐山序

邓氏新坟庵堂名序

送浮图慧深序

栖云院新修印心堂名序

右文殿修撰罗公既以家所藏佛菩萨书五千四十八卷於宝峯栖云禅院建大宝藏庄严安贮转大法轮使见闻者无不蒙益以作佛事又于藏殿之西相地爽垲构大经堂集诸淨侶同閱秘典规模宏深广博严丽云山妙色泉石清音长在耳目助发实相诚胜事也堂成以告梁谿李某曰子其为我名之某後进晚学不足以知佛法深意辞不获命则为之言曰昔菩提达摩得正法眼藏於西天祖师而来震旦为第一祖其法不假文字直指心源无诸修证见性成佛宜于经教在所摈弃乃以楞伽阿跋多罗宝经四卷付之二祖曰此经可以印心祖祖传授以为心法是知禅教相融初无二门心语相印亦无二法岂特楞伽四卷为然哉诸佛菩萨为一大事因缘出现于世欲令衆生开示悟入佛之知见大千经卷亿万句偈自然演出无量妙义以我所得正法眼藏返观佛语及菩萨语譬如以印印泥圈模点画昭然契合然後乃知心外无佛周徧法界同一真体第一义谛何以故文字言说皆解脱相无差别法故以是看经是则名为具看经眼今右文公深植善本信根坚固了达诸法深妙之义超出世间得法眼正而能殷懃教典建藏构堂与具眼人结看经社精进勇猛无复疲厌岂非以经印心如菩提达摩之所谓乎伏请名堂曰印心堂某既已名之又序其所以名之之意献于公且告後之学者时宣和二年三月二十四日谨序

邓公新坟庵堂名序

予仰闻南阳公之贤推为前辈旧矣罪谪沙阳公已捐館舍不及识而识公之子觐观相从甚厚一同同游宝峯栖云禅院去公新阡不远因纵步往观峯峦环抱而奇秀松梓行列而葱青土木之功方兴而未毕也有堂直墓下以奉荐享有庵居墓傍以修佛事宏壮严洁足以昭孝思而垂久远予窃嘉之於是觐观同辞而前曰先公蓄德好学老而弥笃仕不过部使者而宗

族推其仁乡党服其义士大夫重其节退居闲处凡十余年而不幸即世诸孤藐然縗絰之中念慈颜之永隔而追报之无所也竭力以奉襄事幸已就绪葬有日矣惟是构堂筑庵未有以命之以慰无穷之思也愿吾子为之名且以文序之将存没是幸予辞不获已则取孟子所谓大孝终身慕者名其堂曰永慕堂取诸诗人所谓欲报之德昊天罔极者名其庵曰报德庵夫养生不足以当大事惟送死足以当大事亲丧而能自致其力者如此则所以慕而报之者必有在矣以公之积庆而多贤子异时显白当世为前人光必不乏人予虽罪废方将屏迹於山林尚庶几见之因其序所以名之之意俾刻诸堂知为是名者实自梁谿云宣和二年四月望日梁谿居士李某序

送陈渊几叟游庐山序

江南诸山庐山阜为最北枕九江南据星子奇峰秀岭绵亘连络不可名状号为山林瓌伟絶特之观士夫有高世之趣者多愿游焉政和癸巳之夏予自豫章泛江之京口道庐山下便风顺流日数百里虽窃有愿游之志而不果往昼卧舟中仰望五老香炉诸峯巉然倚天云烟出没顷刻万态意欣然乐之自谓他日裹粮来游以偿夙愿不难也迨今八年薄宦羁束愿莫之遂临风抚心每有遗恨今几叟束装呼仆不远千里而往游之触隆暑涉长道不以为劳其志岂特欲尽山林瓌伟絶特之观而已哉兹山之南有人焉修行如幻三摩鉢提历诸世故备尝艰难如梦如响如光影如空华其心安然不为毁誉之所动摇其容渥然不为穷困之所枯槁其视了然久而益明其气完然老而益壮几叟将往见之为我致问无量居士少病少恼不起居轻利不世事可忍不云何修菩萨道云何行菩萨行愿得居士警欬笔墨之余以作佛事使初发心者多所饶益几叟归其有以语我来若夫山林瓌伟絶特之观幅巾杖履逍遥徜徉骋怀寓目必有佳句从而写之当裒集次第并以示我使玩味讽绎如亲游其间以慰愿到未遂之心焉因为之序以识别宣和庚子仲夏十有一日昭武李某序

邓氏新坟庵堂名序

枌桐邓肃一日造予请曰先子力学砥行有声塲屋间不幸捐馆舍卜兆于沙溪之南将葬矣而肃终鲜兄弟惻然哀疚之中竭力营办幸克有成今即新阡建堂以奉祭祀之事结庵以修香火之缘愿夫子名而书之以光存没予来沙阳雅闻南夫之贤恨不及识而与枌桐游甚厚义不得辞为名其堂曰思远堂名其庵曰显亲庵且告之曰人子之於亲也生事之以礼死葬之以礼祭之以礼而子道备矣故君子居丧则读丧礼既葬则读祭礼而祭之日思其居处思其言语思其所嗜肃然如见其容色慨然如闻其音声虽亲之逝日以远而未尝不若在其左右焉今子建堂奉祭祀之事以追远盍亦致其所谓思者乎此名堂以思远之义也人子之致其孝也始于不敢毁伤其体肤终于立身扬名以显之而孝道毕矣後世金僊氏之教兴其说以谓凡欲追报其亲者必修吾法以资冥福于是人子无以致其罔极之思则必筑室墓次使其徙居之梵呗钟磬之音朝夕不絶庶几获其报焉虽然金僊氏之教报之于幽者也立身扬名以显之报之于显者也今子结庵修香火之缘以报亲盍亦图其所谓显者乎此名庵以显亲之义也夫沙阳之俗类多缓葬其亲予尝诘其所以大抵拘忌陰阳时日及惑于风水祸福之说否则力不足以厚葬耻不若人而不知所谓以其所以葬葬之至也因循习熟遂有积数

十年而未葬者可胜慨哉今子子然旁无兄弟之助而能力奉大事使不失时则所以致其思于祭祀之间者盖无待於予言也若夫立身扬名以显之则亦在夫勉之而已予既名而书之又序其所以名之之义以遗焉俾刻诸石时宣和二年七月十有九日昭武李某序并书

送浮图慧深序

佛教既入中国学者滞于名相不见宗旨多失大乘堕于声闻独觉境界于是达摩西来教外别传正法眼藏不假修证直指心源见性成佛得其法者契悟超脱去来自在不可胜数及其弊也派别流分拈枝摘叶违弃本源去道益远口诵禅谈心迷实相滉漾渺茫莫能究穷颓堕委靡不可收拾与夫滞名相者弊又甚焉予尝於通邑大都丛林之中求所谓行解相应不以语言戏论为禅者千百无一则意山林间必有邂逅而不出者来沙阳闻龙兴深老行孤见卓窃意其人而龙兴去邑几百里久不克见始以书颂往还固已得之矣秋高气凉惠然相过留十余日欵叩其键则信乎不以语言戏论为禅者一日相与坐寓轩之上予谓深曰子知夫佛法未入中国所谓经律论者已具达摩未西来所谓正法眼藏者已传乎深曰何谓也予曰所以禁制诸行者为律所以辨说诸法者为经论曲礼三百威仪三千即律也六经之所载诸子之所言即经论也至于教外别传正法眼藏则孔子与诸弟子见于问答言屯而理解者是已深曰曲礼威仪之为律六经诸子之为经论则吾既闻命敢问正法眼藏之见于问答者何也予曰颜渊问仁孔子曰克己复礼为仁一日克己复礼天下归仁焉此非禅宗所谓心外无法者耶子曰参乎吾道一以贯之曾子曰唯此非禅宗所谓默契顿悟者耶二三子以我为隐乎吾无隐乎尔此即禅宗之扬眉瞬目也朝闻道夕死可矣此即禅宗之坐脱立亡也毋固毋必毋意毋我其无诸滞碍执着有如此者性与天道不可得而闻也其不假文字言说有如此者凡论语所载孔子与诸弟子问答之辞无非明此一事但学者不心会之既其文而不既其实故以吾儒为世间法而以佛之所传为出世间法殊不知其初未尝异也夫儒者问答之言如此而至於曲礼威仪之所履践六经诸子之所讲习亦未尝废然则今之禅者欲悉弃经律论而以滉漾渺茫莫能究穷颓堕委靡不可收拾为禅果真是哉深曰吾今而後知儒佛之无二道心迹之无二法吾将归于山林益求吾心坐断白云不复出矣请与子辞予曰虽然如是妙圆光中亦未尝不相见也因序其语以识别时宣和庚子仲秋二十有六日梁谿居士序

梁谿集卷一百三十五

卷一百三十六

钦定四库全书

梁谿集卷一百三十六 宋 李纲 撰序三

靖康传信錄序【见一百六十一卷传信錄内】

靖康行纪序

乘闲志序【梦志 灾异志 证兆志】

预备志序【书檄 事宜 人物】

靖康行纪序

余自靖康改元之初误蒙异恩擢与大政实总兵事心劳形瘁食息不暇每思平生山林泉石之游笔砚图史之乐不可复得慨然永叹其秋九月得请罢知枢密院事河北河东路宣抚使以观文殿学士知扬州即丐宫祠归梁谿十月抵家一宿湛岷两游惠山?长松坐怪石酌泉烹茶与昆弟啸咏便觉神明顿还旧观久之闻有建昌之谪即日命驾过虎丘临劒池月夜步松江长桥与亲友为别渡钱塘江经严陵瀨自三衢入江西历上饶弋阳游龟峰寺道金溪抵建昌时十二月间也复闻有宁江之命即泛舟由临川如豫章邂逅故人长老怀宗同游翠岩寺观洪崖井复游玉隆万寿宫观许旌阳手植桧累日雪作尤觉景物清絶道龙虎山望仙岩如云烟繚聯千态万状不可模写次筠阳上高游九峰寺山正如惠山而林木蔚然深秀使人怅然次宜春遂由萍乡醴陵以次长沙游道林岳麓寺观唐人篇翰时二年仲春之初也闻江陵为溃兵所据未果行而见报有复官除资政殿大学士领开封府事之命道路阻隔王命不通未敢以为信然已而使来自都城验问审实乃拜命又闻突骑自去冬再犯畿甸有金人登城歛兵不下抚谕四方之诏忧愤感塞涕淚横流即治装率湖南兵入援由岳阳登舟沿江顺流而东将诣元帅府以趋都城实以四月八日离长沙追思自去秋迄今繚绕行万里览观江山之胜幽怀壮志时发于文词之间身劳而心适所不能忘者王室之艰难而已今复堕世网时方多故扰扰万绪起矣欲如前日之闲放岂易得哉姑以自今以往所经历所见闻所施为所会遇日着于篇为靖康行纪使将来有所考云丁未岁孟夏十有九日梁谿居士序

乘闲志序

梦志

周官太史占六梦之吉凶一曰正梦先儒谓无所思虑安然而梦至于喜惧忧噩之类感於物而得之非所以为正也夫人之精神与天地陰阳相流通而一心之灵繚亘今古含容宇宙万

法皆具无欠无余圣人了之无尘垢之累而此亦不增故能通达宿命过去未来无有远近幽深遂知来物衆人迷之为欲虑之所昏而此亦不减故於无所思虑安然而梦亦能显发种种未然之相或以已而梦他人或以他人而梦已今日之所梦异日之所行皆一心法更无他物岂有前後间断分际差别耶此周官之所谓正梦也至於有所喜惧而不得其正有所忧噩而不得其正则想念随之而乐广之所谓因者是已如牧羊者因羊念马因马念车因车念盖遂梦乘车建曲盖而为将帅又如病者因击门之声而念鼓因鼓而念乐因乐而念燕享遂梦作乐而饮酒燕乐列御寇亦言阳盛则梦火陰盛则梦水甚饥则梦取甚饱则梦与凡此皆所谓因也然人之梦想本属颠倒故梦饮酒者旦而哭泣梦哭泣者旦而田猎梦棺柩不祥之物而反为荣华梦臭腐可恶之物而反为利禄而世间一切有为法亦无非颠倒者颠倒之中有正存焉不可不察也昔三国时有善占梦者人告之以梦刍狗者三而所占各异其人实未尝梦也特以意言之而所占亦验深解乎此然後可以语天下之理矣後世占梦之法废然亦有晓然不待占而可知者余自幼年所梦多验经行之地遭遇之故往往先发于寢寐之间及值其时恍如旧游而事曲折若合符契如靖康之事皆梦於十数年之前亲旧饱闻而厌道之既应莫不骇异而不知此乃天下之常理也乘闲近忆数十条书而志之近梦颇异而未应及将来之梦皆当继此而书焉庄周有言方其梦也不知其梦也梦中又占梦焉觉而後知其梦也且有大觉而後知此其大梦也余方在大梦中而屑屑然书此岂不为达者之所笑然世间之事出处穷达皆有自然之分一饮啄一动止有非人所能为者而况大于此者乎昧者见利而忘义爱利而忘人保身而忘国至于无所不至岂非其大惑耶苟知分定而视国如身视人如己勉于义之所当为者而以出处穷达付之自然则此书之传不为无所补也作梦志

灾异志

天地之大一身是也血气调而府藏平则身以之康强德政修而人物安则天地以之和顺至于身失于卫生之经而疾病生焉则发于其色形于其脉者善医者能知之天地失于燮理之道而灾异作焉则天变见于上地变见于下知道者亦能察之夫岂有物使之然哉一气之运有开必先小之一身大之天地吉凶妖祥未有无其兆者也古先哲王观变而惧修厥德正厥事以应天则凶妖可以转而为吉祥如太戊之桑穀高宗之雉雉宋景之妖星退舍天人之际疾如影响不可诬已孔子作春秋二百四十年间灾异之变必谨书之所以使君人者知有所畏而自反也汉儒引类附会其说既不足以取信而後世导谀之臣谄其君以天地之变不足畏每有灾异恬不加恤又从而为之辞遂使时君世主不复畏天而肆情于民物之上稔成祸乱未有若崇观以来也靖康之初夷狄凭陵宗社危急生灵肝脑涂地中国之祸古所未有是岂一朝一夕之故哉其本在於不知畏天驯致使然也故余取闻见之所及灾异之大者着之于篇使後世有考焉作灾异志

证兆志

天人之际其理一也天之所为即人之所为人之所欲即天之所为故国之将兴君明臣良庶事皆举寢明寢昌实天啓其心国之将衰君暗臣劣庶事皆废寢微寢灭实天夺之魄浑沦无间而有数存焉於其间犹之农也是藁是蓂尽其四肢之敏于田亩实天相之有黍稷之利犹

之商也懋迁有无肇牵车牛远服贾实天相之有多余之赢至于农不耕而望谷粟商不贾而望货财有国者人事不修而责命于天此岂理也哉世之言天者以谓一切分定而废人事言人者以谓悉由智力而废天命二者交失也自古有国家兴衰之数曷尝不系乎天然而或过其历或不及期则人事存焉尔汉之高祖有断蛇之符光武有赤伏之?唐之太宗亦名着于图牒然而三君者皆豁达大度其英足以有断其明足以有察故能信任忠良驾御豪杰创业垂统拨乱反正传之子孙至于後世继体守文之君一有暗弱信所当疑疑所当信则全盛之基往往失坠皆天也非人之所能为也国家自艺祖受命削平僭乱混一区宇圣圣相授垂二百年规模超于前古德泽浹于民心迨崇宁大观以来小雅尽废故宣和之末靖康之初夷狄交侵中国以微然知数者形於?纬多能预言以至朝廷之所崇尚闾巷之所讴謡未来之故若合符节天之所以告人者甚明顾弗之察耳取其尤显著者次第于篇

预备志序

书檄志

唐陆贄有言动人以言所感已浅言又不切人谁肯怀故奉天所下诏令贄所草定虽武夫悍卒读之莫不流涕德宗反正贄力居多今夷狄内讧王室危坠九庙陷於兵火而存亡未可知二圣幽於沙漠而安否不得達卒伍化而为盗贼丁农转而为甲兵商贾阻絶而不通士夫奔窜而失职西北残于金革而民情离东南困于调发而物力匱将帅偃蹇莫相统一州县委靡莫相维持此诚国家危急天意人心去就之际也幸有贤主总兵于外可以系天下之心则夫传檄四方号令远迩以援中都以援海?言不得不切意不得不深辞不得不尽诚不得不至庶几人心感而天意回大济生灵再安宗社真今日之急务也诗曰辞之辑矣民之洽矣辞之悻矣民之莫矣辞之不可已也如是应书檄之作皆当以陆宣公为法作书檄志

事宜志

易曰化而裁之谓之变推而行之谓之通举而措之天下之民谓之事业夫事业之措于天下亦贵於变而通之以尽利不失时宜而已况乎遭非常之故而可以常法待之哉祖宗削平僭乱混一区宇监唐之弊而销藩镇之权出治以文而偃天下之武典章文物之所布纲纪号令之所施固足以维国势而措天下于泰山之安至于崇宁大观宣和之间宰辅非人托绍述之名为保宠之术耗蠹邦财斩刈民力士风益坏军政不修败欢盟结边衅迨宣和之末天下之弊极矣故夷狄得以乘其间以陵中国直犯京阙初无藩篱赖渊圣皇帝新即大位人心欣戴同力固守贼以退师是宜朝廷之上一德协心略他故而以治兵防边为急务也奈何狙于承平偷惰苟且之风恬不加恤议论规画稍越故常则阻难排抑不得施行而怀奸希进者又从而密譖而巧诋之以是为非变白为黑惑乱人主之听更相倾陷以取宠禄又甚于崇观宣政之时其意以为突骑必不深入藉使深入不过割地厚赂而已遂使金人无所忌憚一岁之内再围帝城君父播迁生灵涂炭朝廷号令半年不闻四方盗贼所至蜂起岂非胶柱鼓瑟不知通变小人之祸至于此哉以今日而望去年则人情国势其不相侔何啻数十百倍然而犹有可为者祖宗德泽在人者深天下士民未有离志故京城之故出于夷狄而非出于中原州县

之盜出于潰兵而非出于民庶誠能觀今之勢度事之宜收士用安民心選任將帥整治軍旅枕戈嘗胆勵勾踐之心布衣帛冠行衛文之政則恢復宗社保全邊疆以報不共戴天之讐以雪振古所無之耻有不難也昔少康以一旅之衆滅澆羿而祀夏配天不失舊物光武以數千之卒破尋邑而克清大憝致漢中興況我有宋土宇之廣幅員萬里生齒之衆士民猶足用哉夫事貴知變而謀貴先定故韓信之說高祖以收三秦卒成垓下之功孔明之說劉備以取巴蜀卒成鼎足之勢管仲說小白以寄軍政而為五伯長商鞅說孝公以令必行而為七國雄其謀皆定于始見之時況欲加於數子者乎雖然任之不專信之不篤而使小人得以間之則雖使伊周復生恐亦不能有所補也取事之宜於今者次第而條陳之以備一日之用作事宜志

人物志

昔晉祚中絕中原陷于夷狄元帝渡江興于江左有王導以為腹心有周顗刁協戴若思以為股肱有賀循顧榮以從人望有周訪郗鑒甘卓以據要地有劉琨祖逖以恢遠略及其後也輔相如謝安將帥如謝玄方鎮如陶侃溫峤皆世不乏人故能締構群材贊襄中興祀晉配天不失舊物抗石勒之鋒敗苻堅之師折王敦之逆平蘇峻之難保有東南垂百余年人物之不可無也如是今宗社艱危河北河東之地棄而不保或遂陷于敵讐或割據于豪傑則逼迓畿甸汴不可都其勢必有巡幸之事以權一時之宜而濟其急然而人物之衰未有甚于此時也前日失謀敗國妨功害賢之人既不可复用而名望在人屈指無幾任方伯連率之職者率皆妄庸處州縣冗散之中者未易識拔則今之人物所以為輔相帷幄之臣所以為侍從論思之官所以充台諫獻替之任所以當師帥撫御之選所以膺守令牧養之寄所以將監司按察之權當何自而取之以祖宗涵養之久天下衣冠之衆固不可厚誣以為無人然而事迫勢急兼收并用棄瑕錄善舍短求長欲得真賢實材相與協力而扶持之使士夫不復事虛名而收實效官司不復行虛文而施實績民庶不復听虛詔而被實惠夷狄不復侮虛聲而畏實威則求之不可不廣擇之不可不精任之不可不專信之不可不篤庶幾可以濟危圖安撥亂反正以刷亘古所無之耻以報不共戴天之讐誠今日莫急之先務也姑取平日之所知及得于衆論者人物姓名著之于篇以備緩急作人物志

梁谿集卷一百三十六

<集部,別集類,南宋建炎至德佑,梁谿集>

卷一百三十七

钦定四库全书

梁谿集卷一百三十七 宋 李纲 撰序四

汉唐三帝纪要錄序 小字华严经合论後序送萧建功秀才归临江序

迂论序 湖海诗集序【见第十七卷】唐朝贤将传序

雪峯真歇了禅师一掌錄序

汉唐三帝纪要錄序

臣窃观自昔人主履创业中兴之运必有英伟之材以断大事然後能戡难定功而不为小故之所摇必有明哲之智以察至理然後能听言用人而不为异说之所惑必有寬大之量以保衆然後规模宏远而足以济天下必有诚一之德以与贤然後终始无间而足以大有为所以肇迹开基兴衰拨乱克大敌建大勲为神民万物主而垂休无穷者率用此道则汉之高祖光武唐之太宗其人也高祖当秦之亡仗三尺劒驱驰马上以与项籍争天下相持於荥阳成臯间败师跳身者屡矣然气不为之挫而卒亡楚凡五年而定帝业光武起南阳以数千乌合之卒破寻邑百万之师仗节渡河崎岖于赵魏之郊危亦甚矣然志不为之沮故卒能破铜马赤眉之属而汉以再兴太宗乘隋之乱起太原而定关中擒建德世充之徒皆身履行阵冒矢石而不惧征伐四克遂有天下此英伟之材三帝之所同也高祖知人善任使听言如不及将韩信於行伍得陈平於亡命拔足挥洗揖酈生之说辍食吐哺纳子房之策樊噲一言则还军霸上娄敬一言则趋驾关中故能因羣策以屈羣力而大功以成光武指授诸将各当其任料敌决胜明见万里之外冯异获于俘执而建方面之勲邓禹杖策谒于军门遂定大计采耿弇之谋而起兵上谷听邳彤之计而不弃信都故能威谋靡抗动辄如志而太宗之任贤使能好谋纳谏又卓然过人远甚此明哲之智三帝之所同也司马迁称高祖常有大度寬仁爱人意豁如也而马援亦称光武恢宏大度同符高祖乃知帝王之自有真而史称太宗亦言聪明英武有大志而能屈节下士则寬大之量三帝皆然高祖天资慢侮然待萧曹子房陈平密侍帷幄如左右手光武推赤心置人腹中其待寇邓耿贾皆出入卧内如子弟然太宗尤推诚以任人有上疏论房玄龄者帝曰是欲离间吾君臣邪斥岭表尝赐李靖手诏曰军事一以委卿吾不从中制则诚一之志三帝皆然夫有明哲之智而英不足以济之则足于谋而寡于断有英伟之材而明不足以察之则寡于虑而伤于专英明备矣而寬大之量未宏诚一之志未着则亦未足以优於天下故四者兼备德盛业钜则能混一区宇身致太平者高祖光武太宗是也四者不备各有所长则能割据一方粗成霸业者魏武吴蜀之主是也由是推之自古创业中兴之君概可观矣至于英不足而为弱明不足而为暗无寬大之量而狭小无诚一之志而多疑则亡国衰世之君靡不由此恭惟皇帝陛下英明之姿寬诚之德得于天纵与神为谋而臣幸获日侍轩墀仰闻圣训窃叹絶德清光非臣下所能跂及然而绍膺大统适当国步艰难夷狄

强盛之日百度未举四方未宁谓宜深考汉之高祖光武唐之太宗所以创业中兴者神明自得圣心循焉以驭驾群材制胜克敌拨乱世而反之正则我宋中兴之功不难也臣辄不自揆取三帝之行事散在诸传及他史者次第編集删其繁文掇其大节纂成一书目之曰汉唐三帝纪要録敢尘睿听以备乙夜之览庶几萤燭之光裨日月之照烛涓埃之细助海岳之深崇以古为监揆今之宜或有取焉非独臣之幸也实天下之幸也臣谨序

小字华严经合论後序

修多罗藏三乘十二分教皆佛菩萨之所说然广博妙圆极诸经之壺奥莫如大方广佛华严经从上诸德造立疏抄论讚皆为人解说然精深条畅为华严之指南莫如李长者所制合论盖华严明一心之真境含容无尽如设宝监光明相照其中妙影重重摄入故华藏世界名数不可说而不离于方寸之中三昧法门差别不可穷而不出于一念之际毗卢遮那之所建立文殊普贤之所示现皆以上乘顿教接大根者自初发心至等正觉本自圆成无有欠阙体之者以一毫合法界契之者以一悟证无生而地位阶级因果功用历历现前了然不昧言语譬喻开示为人有权有实此华严所以极诸经之壺奥也合论明诸法之本原会归于一如泛巨海浩无津涯必观星斗乃辨方所故自序品至入法界品七处十会天龙八部一切诸神十信十住十行十回十地诸大菩萨善财所参五十三善知识皆以十波罗密互为主伴其间妙宝种种庄严皆以表法学者因之心迹圆融而得悟入此合论所以为华严之指南也微华严无以见佛法理事之无碍故广博而妙圆微合论无以知华严本末之伦理故精深而条畅读佛书而不观华严是犹河伯之喜秋水而不知海若之难穷以见笑于大方之家也读华严而不观合论是犹据图以窥天文而不考甘石之书无以知灾祥之旨也可乎哉然华严凡八十卷合论凡四十论离为二书部帙浩博既不利于观览又艰难于挈提学佛者患此久矣朝奉大夫提举坑冶铸钱张君书言始创意以经论合为一书作小字刊之刻画之精如水布沙如蚕种子匀淨分明悦可人意凡愿者即以施之异时一大部经极一负荷之力所不能举者今斂而小之不盈数函携适四方无不如意非善巧方便孰能如此其用心乐善亦勤矣哉夫一尘中有大千经卷具智慧者破尘出之是为真游华严境界真得合论宗旨信解行证宜自此书始敢告读者应作是观建炎元年八月望日序

送萧建功秀才归临江序

入芝兰之室者久而不知其芳游鲍鱼之肆者久而不知其臭盖其薰蒸渐渍之久与之俱化而不自知是以君子谨乎其所与处也临江萧生不远千里访余於湖外视其貌粹然而温厚听其言毅然而劲正观其文蔚然而条畅究其学渊然而奥博而又乐善好问慊然有不自足之意盖生尝从了翁游甚久又与李先之雅相厚其所与处者如此宜其薰蒸渐渍如芝兰之芳而不自知也然生之质美矣要须更历世故以锻炼之其美乃成精金之所以可贵者以其百鍊而不耗也士方平时论议未尝不有余暇出而临事爵禄诱乎前祸患恐乎後不变其所守者几希至于祸福不足以动其心而惟所学之为行若金百鍊而不耗者了翁李先之其人也了翁平生颠沛患难几三十年气不少挫惟生民之为念而国事之为忧李先之一为小人之所陷困于州县志不少衰其学问至老益笃而二公之道卒光明于今彼临事而变其所守

者虽媮取宠利皆湮没而无闻卒亦何所得哉生行且仕矣其亦观二公之所以处已而游世者以为法乎若余者无二公之道学而有忧患将何以副生远来勤劬之意耶于其归也姑以生之所知二公之所以艰难困抑久晦而乃光者告之且以识别建炎二年十月晦日武阳李某序

迂论序

梁谿病叟当建炎初待罪宰相才两月余以謇画多不合又所荐引将帅同列不以为然沮斥之争弗能得方时艰难不敢贪宠备位妨贤路以误国事三上章乞罢相庶几大臣以道事君不可则止之义天子度不可留从之以观文殿大学士领洞霄宫将归老于梁谿之上守坟墓穷山水之游以终其身而谗者不已其言丑恠肆为巧诋闻者骇汗赖天子睿圣有以察其不然姑褫职俾居渚宫坐食廩禄而处江湖善地德至渥也闲居杜门谢絶宾客念恩省咎之外无所用心则取古之君臣贤士大夫与夫奸邪佞谀乱臣贼子其所施为是非成败治乱兴亡之迹可以垂鉴于後而今之事宜所当变通于昔者极其理而论之其意以谓身既废放不得展尽底蘊以济国家之急姑以智虑所及载之空言以俟後之君子亦不为无补然承乏廊庙既已尝试其拙矣则其所论盖亦濶?而不足以取合于世故目之曰迂论昔孔子欲正名于卫子路曰有是哉子之迂也而孔子告之以名不正则言不顺其极至于民无所措手足夫民之无所措手足乃在于名不正数变之後则自子路观之宜乎以为迂然必欲为政使刑罚清而民服非正名不可则其迂也乃所以为要欤余之论固迂矣安知後世无拙如我者有取於其说而反不以为非乎辞务达故无饰说理务畅故无隐情随意所得而着于篇故无先後之叙览者察焉建炎戊申岁仲秋朔日序

唐朝贤将传序

为将之难非料敌制胜陷坚摧衆之难权重而不骄功高而不伐上承下抚善始善终之为难也韩信连百万之师战必胜攻必取一有骄伐之心而高祖疑之关羽张飞皆万人敌羽喜犯上飞喜刻下蜀先主知其必不能以自全由是观之立功立名未若保功名之懿也唐有天下将臣为多在太宗时当创业之初削平僭伪制御夷狄则有若李靖李积在肃宗时值安史之变戡乱定功中兴王室则有若郭子仪李光弼在德宗时遭奉天之难剪除叛逆光复宗社则有若李晟马燧浑瑊皆能奋忠勇摠谋猷感会风云勒勲帝籍号为大将之贤者至议其优劣则积不及靖光弼不及子仪瑊燧不及晟何哉靖谦退知上恂恂如不能言以沈厚称而积嗜进不已导高宗以立武后几危唐祚其识不足称也子仪朝受命夕引道崎岖谗譖间不辩自明而光弼间隙一开卒不复合至忧愤以死其诚不足称也晟策吐蕃多诈不可与盟而瑊燧信之以有平凉之辱其智不足称也春秋责备贤者故不得不论至为将大略能以功名始终岂可不谓人杰哉尉迟敬德愤厉争功一闻太宗训勅折节自修杜门谢客奏清商乐以自奉能改过矣李大亮宿卫之忠裴行俭苏定方术略之奇秦叔宝薛仁贵李嗣业搏战之勇高崇文纪律之严王忠嗣执守之固李抱真训练之精张万福乐善之笃李光顔愬谋虑之决皆凜然有贤将之风故録次诸传为上下卷表而出之庶几览者以古为监得见贤思齐之义云绍兴二年仲春二十二日序

雪峯真歇了禪師一掌錄序

自達磨流通正法眼藏如一燈分百千燈以心傳心雖法無南北而機有差別其歸一也雪峯了禪師得法于丹霞淳淳得法于芙蓉楷傳曹洞宗旨門風孤峭壁立千仞有所施設皆被上機非中下根器所能窺測了公自號真歇昔演法于長蘆今開席于雪峯學徒雲集從之者常千五百餘衆叢林之盛所未曾有隨機提令應病施方有作者之鈴鎚真良醫之藥石一言一句皆示空劫中眼目非苟然也其徒集機緣語句為一掌錄以初得法由一掌故錄成以示梁谿病叟病叟讚嘆為說偈言其一曰真歇頰邊遭一掌大愚肋下筑三拳自從默契宗風後顛倒縱橫總是禪其二曰正令全提上上機學人到此莫驚疑直須吼裂野于腦始是金毛獅子兒說偈畢以其錄歸之因書其語置篇首云紹興四年歲次甲寅二月朔序

梁谿集卷一百三十七

卷一百三十八

钦定四库全书

梁谿集卷一百三十八 宋 李纲 撰序五

五峯居士文集序 重校正杜子美集序 道乡邹公文集序 论语详说序

古灵陈述古文集序

五峯居士文集序

欧阳文忠公有言非诗能穷人殆穷而後工信哉士达则寓意于功名穷则潜心于文翰故诗必待穷而後工者其用志专其造理深其历世故险阻艰难无不备尝故也自唐以来卓然以诗鸣于时如李杜韩柳孟郊浩然李商隐司空图之流类多穷于世者或放浪于林壑之间或漂没于干戈之际或迁谪而得江山之助或闲适而尽天地事物之变冥搜精链抉摘杳微一章一句至谓能泣鬼神而夺造化者其为功亦勤矣以此终其身而名後世非偶然也故尚书考功员外郎翁君讳挺字士特建之崇安人天才秀发器业夙成年未成童已知声律能赋诗有惊人语及长该极羣书贯穿今古落笔即数千言既而游行四方渡浙江寓淮楚窥衡湘观光上都宦游赵魏之邦尽友其豪俊以故为文雄深雅健渊源浩博能备衆体而尤长于诗其五言七言属对律切风清调深其古风歌行浑厚简淡凌厉奋发絶去笔墨畦径间追古作者信乎天下之奇才也方是时朝廷以经术造士士皆趋时好以取世资而君缓步濶视於其间独有能诗声如内翰毛公友一时名人多称道之然君早游国庠屡冠多士声华籍甚而名不题於鴈塔晚登仕版对扬文陛受知人主而位不过于星郎触时相怒窜逐流离得病以死而年仅踰於知命身之穷近世鲜有与君比者平生所作数千百篇悲欢感慨一寓于诗以发之奇辞秀句脍炙人口诗之昌近世亦鲜与君比者身不穷则诗不昌物莫两大岂不信然自经兵火盗贼之後散失者十之六七嗣子颢之收拾编类於煨烬亡逸之余得古赋若干古律诗若干杂文若干厘为若干卷号五峯居士集以余与君为外兄弟卯角同砚席情相好也遣人致书求为之序余尝观唐李贺号为俊人高轩过之作在其稚年韩愈皇甫湜皆爱重之歌诗之妙独步一时以父讳之故不得举进士坎轲以终年未壮室平时负古锦囊以出得句辄投其中暮归足成不知凡几何篇仇嫉之者尽委粪壤今行于世才数十首则贺不特其身之穷而诗亦穷也君虽不幸其年其位其诗文之所存过贺远矣然贺诗得杜牧序而名益彰余虽欲序君集忧患衰疾文思凋落不能如牧之揄扬称述曲尽其情态以取重于世诚有愧焉耳方命朋旧之爱慕君者求君之残编断简於四方继成卷帙使珠玉之珍不零落兰菊之芳垂无穷庶几以此答君相与之意云绍兴四年四月七日具位李某序

重校正杜子美集序

杜子美诗古今絶唱也旧集古律异卷编次失序不足以考公出处及少壮老成之作余尝有

意参订之特病多事未能也故秘书郎黄长睿父博雅好古工于文辞尤笃喜公之诗乃用东坡之说随年编纂以古律相参先後始末皆有次第然後子美之出处及少壮老成之作灿然可观盖自天宝太平全盛之时迄于至德大历干戈乱离之际子美之诗凡千四百三十余篇其忠义气节羁旅艰难悲愤无聊一见于诗句法理致老而益精时平读之未见其工迨亲更兵火丧乱之後诵其辞如生乎其时犁然有当於人心然後知其语之妙也退之诗云僊官勅六丁雷电下取将流落人间者泰山一毫芒乃知公之述作行于世者未为多遭乱亡逸又不为少加以传写谬误寢失旧文乌三转而为马者不可胜数长睿父官洛下与名士大夫游裒集诸家所藏是正讹舛又得逸诗数十篇参于卷中及在秘阁得御府定本校讐益号精密非世所行者之比长睿父没後十七年余始见其亲校定集卷二十有二于其家朱黄涂改手迹如新为之怆然窃叹其博学渊识而有功于子美之多也昔东坡有言子美自许稷契人未必许也然其诗曰舜举十六相身尊道何高秦时用商鞅法令如牛毛自是稷契辈口中语可谓知子美者矣方肃宗之怒房琯人无敢言独子美抗疏救之由是废斥终身而不悔是必有言之不可已者与阳城之救陆贄何以异然世罕称之者殆为诗所掩故邪尝一啻之肉知九鼎之味有一于此可以卜知其他故因序其集而及之使观者知公遇事不苟非特言语文章妙天下而已绍兴四年甲寅六月朔序

道乡邹公文集序

文章以气为主如山川之有烟云草木之有英华非渊源根柢所蓄深厚岂易致邪士之养气刚大塞乎天壤忘利害而外生死胷中超然则发为文章自其胷襟流出虽与日月争光可也孟轲以是着书屈原以是作离骚经与夫小辨曲说絺章绘句以祈悦耳目者固不可同年而语矣唐韩愈文章号为第一虽务去陈言不蹈袭以为工要之操履坚正以养气为之本在德宗朝奏疏论宫市贬山阳令在宪宗朝上表论佛骨贬潮州守进谏陈谋屡挫不屈皇皇仁义至老不衰宜乎高文大笔佐佑六经粹然一出于正使学者仰之如泰山北斗也道乡邹公自其少时处闾里游庠序登仕途其节操风流已为有识者之所推许至元符间职在谏省适有椒房之事抗章陈列危言骎论耸动四方远谪万里及建中靖国间召还侍从又以直道不容于朝再谪岭表而气不为之少挫遇赦得归作知恩堂以居奉其母友其诸弟教训其子侄欣然不知老之将至所养如此故其文章高明阔远温厚深醇追古作者有黼黻之文有金石之声有菽粟布帛之用信乎有德之必有言也其子柄桂集公平生所为文得赋若干古律诗若干杂文若干合为若干卷而谏省章疏又别为一集将镂板以传于世求序于某义不得辞且为之言曰国之治乱安危存乎言而已矣方嘉佑治平间上之所以求言听纳者既尽其道下之所以献言开陈者又中于理上下交而志通宜乎协气嘉生薰为太平而不可跂及也其後朝廷议变新法言不便者接武窜逐朋党之论寢兴而士始以言为讳自绍圣元符以来遂无言者当时台谏具员然类皆毛举细故以塞责甚者至于变乱白黑颠倒是非投时好以取世资虽谓之无可也独公奋不顾身犯顔逆鳞论国事之大者于言路闭塞之时号凤鸣朝阳然迂谪流离屡濒于死而任言责者益自惩艾不复激昂习熟见闻以緘默为当然至崇观政宣间则又甚矣燕山之役国之大故莫重于此台谏熟视未尝有一言及之驯致祸乱四海横流使公是时犹存居可言之地其肯保位爱身不一开口为社稷生灵之计虽三尺之童有以知其必不然也由是观之公之文章垂于後世诵而读之者想望风采其慕仰为何如哉绍兴五

年岁次乙卯三月二十一日序

论语详说序

孔子之言传于後世者序诗书论礼乐易有象象系辞春秋有褒贬笔削与曾子论孝者为孝经其家之所传者为家语而对国君卿大夫教羣弟子及相与问答之言则有鲁论语二十篇盛哉圣人言之着也自诗书礼乐易春秋孝经之外家语择焉而不精独论语精微衍奥皆道德仁义性命之旨当时记言者有法温润博雅粹然成一家言盖圣人以其治心修身正家理国之要设教以为人其于问答之间随机接物以诱其心应病施药以救其失故问仁者同而告之者有浅深问政者同而对之者有先後或抑或扬以发明其道或进或退以矫揉其材言近而指远守约而施博真可以为天下後世之折衷而能言之类莫之能加也其诸弟子有及门者有升堂者有入室者而问答之间或言出而理解或告往而知来或至于无言然後喻盖根器有利钝而造道有精粗不然至于顔闵游夏曾参有若之徒其言亦皆足以垂法于天下可传于後世则师友渊源圣人之泽深矣故相王文正公旦每以锦囊贮其书观毕则亲緘题之同列疑其为秘方异书也窃视之则论语怪而问其故公曰此皆圣人之言治心修身之要吾辈行已有愧于此多矣先进之尊道畏圣人之言如此而今之士大夫特以为科举进取之资过则不顾又以为童稚初学之书不复精考得不又有愧于文正公之言乎近世学者皆宗王氏之说时有得失而自先儒以来亦有训释失圣人之旨者如井有仁焉其从之也为赤子匍匐将入井之井子在川上曰逝者如斯夫不舍昼夜为叹逝之逝传习谬误其类寔繁余谪官多暇与次子宗之讲说颇是正之因笔其言而成书目之曰论语详说夫博学而详说之将以反说约也推明圣人之旨说之不患乎详而反说约者在乎自得之而已顾学识芜浅不足以窥圣言难知之奥岂敢传诸学者姑以训道子侄开其童蒙可也旧以两字命篇如学而述而之类体制不雅辄取篇之首句易之效老子名章之义厘为二十卷书始于武昌郡以建炎戊申之仲冬成于鬱林郡以建炎己酉之仲夏改定于长乐郡以绍兴甲寅之初秋云具位李某序

古灵陈述古文集序

唐史论文章谓天之付与於君子小人无常分惟能者得之信哉斯言也虽然天之付与固无常分而君子小人之文则有辨矣君子之文务本渊源根柢于道德仁义粹然一出于正其高者裨补造化黼黻大猷如星辰丽天而光彩下烛山川出云而风雨时至英茎韶濩之谐神人菽粟布帛之能济人之饥寒此所谓有德者必有言也小人之文务末雕虫篆刻絺章绘句以祈悦人之耳目其甚者朋奸饰伪中害善良如以丹青而被粪土以锦绣而覆陷穽羊质而虎皮凤鸣而鸩翰此所谓有言者不必有德也君子既自以功业行实光明于时而其余事发为文章後世读书想望而不可及此岂特其文之高哉人足仰也小人乃专以利口巧言鼓簧当世既不足以取信于人而恃才傲物以致祸败者多矣由是言之文以德为主德以文为辅德文兼备与夫无德而有文者此君子小人之辨也窃观古灵陈公所着文章殆所谓有德之言而君子之文欤初公未仕刻意於学得乡士陈烈周希孟郑穆相与为友以古道鸣于海隅人初惊笑其後相率信而从之四先生名动天下既登第累官剧邑推其所学以治民利必兴害

必除听讼决狱庭无留事所至修学校率邑之子弟身为横经讲说士风翕然民俗丕变已而守列郡典大藩益推此而广之治绩尤着虽古循吏不能过也嘉佑中富郑公入相首以文学政事荐公寢被知遇历事三朝鬱为名臣判郎曹则执法而不挠使北庭则守节而不屈任谏省则以忠说补主阙处台端则以公正纠官邪位侍从则竭论思之忠侍经筵则尽劝讲之益上为人主之所钦向下为士大夫之所宗师其功业行实光明如此而所为文章温厚深纯根于义理精金美玉不假雕琢自可贵重太羹元酒不假滋味自有典则质干立而枝叶不繁音韵古而节奏必简非有德君子孰能与此故尝评之其诗篇平淡如韦应物其文辞高古如韩退之其论事明白激切如陆贄其性理之学庶几子思孟轲非近世区区缀缉章句务为应用之文者所能髣髴也嗣子绍夫裒集公文章得古诗律诗赋杂文凡若干篇冠以绍兴手诏经筵荐士章疏而行状志铭附于其後合为二十有六卷集成来谒求为之序某告之曰太上有立德其次有立功其次有立言如古灵先生三者兼备又得诏书褒称推贤扬善之美如此可谓盛矣若其平生行事则有行状志铭可考诵其诗读其书者可以想见其人又何以序为绍夫曰先公虽进不极任而蒙累朝之眷特深谏行言听不为无补于时今即世踰五十年遭遇圣主因览荐士疏藁所以旌宠之者甚厚辄敢刊行遗文用图不朽愿丐一言以发明之某义不得辞勉副其意因论君子小人之文所以不同者昔孔子告子夏曰女为君子儒毋为小人儒夫儒之道通天地人使小人为之则将有诟儒以为奸者而况于文乎经纬天地曰文虽周公之才之美諡不过文而小人假文以为利则与夫儒以诗礼发蒙者同科自古文士多陷浮薄而为弄笔生无足怪也如公功业行实推贤扬善之美如此而其文章浑全博雅又如此宜乎被累朝之眷遇膺圣主之褒崇士林尊仰推为天下君子长者而不敢有异议也然则有余力以学文者可不景慕而知所趋向哉公讳襄字述古官至左司郎中枢密直学士赠给事中中国史有传云绍兴五年闰月朔谨序

卷一百三十九

钦定四库全书

梁谿集卷一百三十九 宋 李纲 撰序五

建炎时政记序【见时政记一百七十八卷内】

建炎制诏奏议表劄集序

送丹霞宗本游径山序

佛印清禅师语录序 中兴至言序

建炎制诏奏议表劄集序

某建炎初自领开封府事蒙恩除尚书右仆射兼中书侍郎以六月一日至南京行在所供职八月五日蒙恩除尚书左仆射兼门下侍郎是月十八日降制以某上章丐罢蒙恩除观文殿大学士提举临安府洞霄宫备位近司七十余日继以罢谪奔走万里流落十年再被録用绍兴四年春以提举西京嵩山崇福宫寓居长乐准尚书省劄子三省同奉圣旨令某省记编録建炎元年五月一日已後时政记进御某已遵依诏旨以省记到昨任宰相日所得圣语所行政事赏刑黜陟之大略着于篇繕写上下两策诣通政司投进有旨宣付史馆绍兴六年夏任江南西路安抚制置大使兼知洪州承史馆牒见修纂建炎日历朝廷降下所省记到时政记文字首尾未详及拜罢辞免表劄批答并未抄録赴馆请编类前来参照某已遵禀将建炎初除罢制命诏书批答辞免称谢表劄奏议建明劄子皆已得旨施行者编类次第勒成四卷窃惟皇上绍大统于国家艰难之际即位之初首蒙考慎其所以委任责成之意可谓重矣而某材能譾薄识虑迂曾不能效尺寸以图报万一奉身以退虽罹患难保全至今日深惭惧今者既蒙朝廷降旨令省记时政之略又承史馆移牒使编类首尾之详检閱旧文追寻往事恍如梦寐益用慨然虽时运不留事势亦异而理有不可改者以理揆事万分之一或有取焉谨繕写成两册缴申史馆庶几可备直笔采择信垂万世谨序

送丹霞宗本游径山序

丹霞宗本师幼遇异人能预言灾祥其名籍甚居邵武之瑞光岩十余年一旦起行脚心尽弃旧所得絶口不复道为此一事徧参诸方游泉南值杲禅师寓佛日庵叩问宗旨言下自谓有悟入处其後杲公住径山师归旧隐欲复往从之游道长乐见梁谿翁语之曰子去瑞光岩几日矣答曰六年翁曰方举足时已合吃三十棒如今归去拘折拄杖向折脚铛中糴饭度日犹较些子若也未然却请饱参到径山为我致问杲公虽未识面妙圆光中已相见了也有一转语托丹霞呈似便请寄个消息来切须急道此外珍重戊午岁十一月晦日梁谿拙翁序

佛印清禅师语录序

崇宁间余侍先公太师守官京师时佛印清禅师住相国之智海道价特高学者云集先公暇日多造其室余亦侍行辱知照甚厚至大观庚寅岁禅师迁化赐塔名曰真寂之塔先公为之作铭有曰水滴沤生云收月白都城东郊塔有真寂者铭文之卒章也後三十年岁在戊午余寓长乐有前住襄阳双池道腴长老来谒出禅师语录三卷将刊板以传丛林求余为序追念智海游从恍如昨日已閱一世怅岁月之易流悼善知识之不可复见也览读怆然因序之曰禅师法名智清俗姓叶氏泉之同安人年二十有二出家受具戒即知有向上事徧游诸方参问宗旨最後见道林佑禅师举幡风非动仁者心动风铃不鸣我心鸣耳之语因展鉢次有所悟入以颂呈佑佑可其所见亦作颂以印证之自此机锋迅发禅苑归仰初住蕲州五祖山法会之盛震于江淮绍圣中智海虚席有旨命禅师住持再召入禁中对御陞座举扬宗风赐号佛印住五祖智海合二十余年今此所录皆禅师平日升堂入室接引学者机缘语句发明心地法门开示佛祖言意可以利一切而传无穷者也余尝观佛祖以心传心无文字相不得已而有言句所以安心治病者何其简易也去本既远派别支分传法者拈花摘叶务为新奇以相眩惑学道者口习耳剽递相模仿以为饱参千差万别不胜其繁而此道日益微矣禅师语句自胷襟流出不事雕琢而自然成文不说义理而自然契道会归有极中边皆甜足以发明佛祖之深心开导後人之正眼余知此录之流行有补学者盖不可为量数也道腴行年将七十以门人之故久要不忘能使此录复传于禅师示寂三十年後亦可谓贤也矣与夫今之士大夫交游之久以信义相期一旦临小利害反眼若不相识者不可同日而语也勉作序以塞其请盖亦有感于此至禅师之所履践施設则先公所作塔铭道之详矣此不复云绍兴八年十一月三日序

中兴至言序

臣闻自古帝王之盛有创业有中兴若汤武之革夏商汉高之灭秦楚唐之代隋此创业之主也宣王承厉王之後兴衰拨乱周道复行光武当汉历中微恭行天讨炎运复续肃宗宪宗武宗当唐室不竞藩镇僭叛征伐四克威令复振此中兴之主也创业之主驾御英雄勘剪勍敌肇造区夏固为难矣而中兴之主视之为尤难者岂不以绍将絕之统承极乱之余或为夷狄之所凭陵或为巨盗之所侵据国势削弱天步艰难纲纪废坏法度陵迟人材衰微物力凋耗振而起之尤不易为力故耶譬犹大厦之倾支扶颠危补苴罅漏与夫经营创建者盖不侔矣然亦有优为于创业者承祖宗积累之基德泽至深人心未变境土土民本皆我有御得其道则亡者可以复存叛者可以复属以弱为强以微为盛疾若俛仰譬犹巨室中衰田园仆隶不幸为有力者之所攘其贤子孙能竭力以料理之则曩之所失一旦复归与夫奋空拳仗一劍以起者不可同日而语也顾所以处之者如何耳恭惟有宋膺受天命薄海内外悉主悉臣祖宗功德超轶汉唐接武三代至道君朝受报收功极炽而丰边衅一开金寇之祸乘间而作渊圣内禅天下归心谋臣弗臧驯致大变实由承平之久人不知兵始务讲和偷安苟且之所致譬犹康强之人负恃壮盛蔑卫生调摄之经得陰阳乖沴之疾邪气深入不务以毒药攻治而顾用参术和之以图安全何可得哉皇天佑宋眷命陛下为神民万物之主临御以来迨今十年宵衣旰食忧勤图治而中兴之业未建者岂所以图之之道犹有未至耶臣以愚陋误蒙眷

獎尝加考验材?分薄自取颠躋曲荷矜怜不弃遐远昨者被奉诏旨条具边防利害虽竭愚虑以塞清问犹未能尽其区区所欲言者夙夜精思至忘寝食谨以已见撰成中兴至言十篇辄敢缮写投进以尘乙夜之览臣之意以谓帝王图治必有本要秉本执要以应万机所操弥约所施弥博故以明本要篇第一本要者人主精神心术之运也举而措之天下必有政事功勲乃成故以修政事篇第二中兴之政莫急于治兵故以治军旅篇第三军旅之兴莫急于财用故以理财赋篇第四足食足兵必据形胜之地以事攻守故以审形势篇第五攻守之具欲善其事必利其器故以备器用篇第六自治军旅至备器用兵家之常道也必有临机应变之术故以察机权篇第七必有料敌制胜之谋故以尚谋策篇第八所以为此者将欲讨僭逆御强敌复祖宗之境土据中原以临四方而已必有先後本末之序故以议恢复篇第九恢复境土国威振矣然後可以奉迎二圣銮舆以天下养昭陛下孝悌之德故以议奉迎篇第十此十篇者凡也其详又有目焉各以类附于篇末辞旨芜浅虽不足以裨庙算之万一亦臣之毕精极虑欲图报圣恩拳拳之至意也昔汉贾山作至言借秦为喻以感悟文帝班固称其言正而善指事意今臣此书持论不敢太高惟务可行立议不敢激讦惟务当理引古以证今自下以及上窃自比于贾山故以中兴至言命篇伏惟陛下万机之暇留神采览明本要篇发明心术无可施行自修政事篇後傥有合于圣意者乞制诏外廷详酌施行天下不胜幸甚绍兴五年月日臣某顿首谨序

梁谿集卷一百三十九

卷一百四十

钦定四库全书

梁谿集卷一百四十 宋 李纲 撰赞上

洪崖先生画赞

双林善慧大士録赞【有序】

瑞芝赞 梁谿真赞

梁谿四友赞【岁寒 虚心幽芳 粲华】

瑞光岩立化雀赞【并序】

绣观音赞

天王院新塑释迦像金色珠赞【并序】

彩塔赞【并序】 富郑公画像赞

如如轩赞

洪崖先生画赞

洪崖先生张氲隋唐间人隐于南昌之西山所乘驴名之曰雪仆数人曰拙曰术曰藤曰葛曰橘出则负巨扇长瓢以从人多绘以为图盖有道者也为之赞云洪崖古先生傲睨得天逸结庐西山下踏雪时一出长瓢与巨扇此外了无物借问侍者谁拙术藤葛橘何年丹青手写此神仙质高风邈如在超然入吾室

双林善慧大士録赞【有序】

昔长者维摩诘具善巧方便居毗耶离城以布施持戒忍辱精进禅定智慧摄诸衆生以慈悲喜舍作诸佛事虽为白衣居家而奉持律仪不着三界虽示有妻子眷属而修诸梵行常乐远离其辨才无阂则现身有疾如应说法令无数千人皆发无上道心诸菩萨大弟子衆皆不堪任诣彼问疾虽文殊师利亦云彼上人者难为酬对深达实相有如此者其游戏神通则能以方丈之室容受九百万菩萨三万二千师子之座而不迫迕示遣化人以衆香鉢取满香饭餍饱十方无量衆会不起于座断取妙喜国土山河如陶家轮及持华鬘示一切衆不可思议有

如此者故佛书以为金粟如来不其然欤惟双林善慧大士应世阐化之迹何其似维摩诘也岂独以六度摄衆生以四心作佛事以白衣居家而奉律仪有妻子眷属而修梵行为似之耶至于辨才无阂其偈颂言语深达实相游戏神通其显示变化不可思议亦与之举相似然故尝自谓弥勒化身而行道山中常见七佛引前维摩接後者良有以也唐人楼穎集大士应世阐化之迹以为之传文字繁纍无以发明甚深难解之义今右文殿修撰罗公以无尽智参订其书芟除润色又为序以表出之而大士立言行事灿然着明读者随其分量各有所得其于助发第一义谛岂小补哉暇日以其书示昭武李某欢喜踊跃得未曾有再拜稽首以偈赞曰

弥勒栖神兜率天下生此土犹久远化身无数在世间善慧大士乃其一于中深秘菩萨行而外示现凡夫相佃猎渔捕悉与同娶妻生子亦复尔忽然照水知宿因本来神智皆具足双林净土坐道场说法度脱无量衆为欲化导群生故六度四心为依止田园庐舍诸器用奴婢妻子亦弃捐而以营修大法会盖行布施摄慳贪强夫暴客与魔民豪夺追逐共诬谤更以软语安慰之盖行忍辱摄瞋恚精进摄诸懈怠者昼夜行道不休息持戒摄诸毁禁者敷草而坐食麤粝智慧禅定无有边摄诸痴乱亦如是慈悲喜舍救衆生微妙宏深难测识虽依如是衆法门亦不於此而常住辨才演说无滞阂譬如空谷中答响歌颂句偈自成章纵横颠倒皆通达神通游戏得自在聊以折伏不信心异香殊相放妙光一叩宫门余悉啓住是解脱不思议正如长者维摩诘应世阐化靡不济故於行道常接後化缘已毕示寂灭迄今何翅五百年虽有文字传未来芜纍不能发实相我观龙津大居士已能深入不二门应缘虽现宰官身於诸世味如嚼蜡燕闲清淨无所为乃以笔墨为法施芟除润色出妙语善慧之书乃光焰佛子若观善慧书当知三士无异法毗耶离城双树林及此龙津元一处受持读诵善思维普愿发心无上道

瑞芝赞

宣和二年仲夏之初有芝生于沙阳邓肃志宏家大小凡十有二色状异常俯者仰者丛者特者紫者如椹黄者如金轮困炜煌真瑞物也前史记孝行之美多以芝产其庐为异而柳子厚有言朽枿败腐使受天泽余润犹足蒸出芝菌以为瑞物今志宏居丧如礼而又能鋭意文辞期于有成以显其亲则是芝之生岂非孝诚所感而文字之祥耶梁谿李某为名其轩曰瑞芝轩使藏芝其间後日有所考焉且为之赞云

太虚磅礴鍾此和气庆门其昌而产斯瑞厥瑞维何灵芝煌煌孝诚所致文字之祥有开必先其应以类力学显亲孰孝于是勉修远业自奋于时匪我云然芝实告之

梁谿真赞

是为梁谿了无差别行年之化三十有八返观其前肤腴色悦从是以往苍顔华髮本来面目不生不灭游戏仕涂天付之拙顺天而行一无敢设独知其天宁有他诀万里清风一轮明月有来问者默然无说

梁谿四友贊序

山居有松竹兰菊目为四友且字之松曰岁寒竹曰虚心兰曰幽芳菊曰粲华各为之贊

岁寒贊

霜霰既零草木殄瘁惟兹岁寒独立不改寸苗初植未离蓬艾挺然凌云色参天黛虬枝茂叶舞影垂陰清风徐来虎啸龙吟与子为友贵相知心何以乐之写此素琴

虚心贊

君子学道其心贵虚此君之心一物本无劲节坚竦清影扶?劒拔环侍十万丈夫细细其香猗猗其緑滴露和烟锵金戛玉与子为友惟日不足何年栖凤慰此幽独

幽芳贊

天地和气萃于幽芳言茁其芽薰然国香緑叶紫茎素荣缥房纫以为佩御彼不祥采自深林置于座侧不改其度其香满室与子为友心同德一优哉游哉聊以永日

粲华贊

我有佳友粲粲其华金英炜煌翠叶交加风露洒濯色香相知宛如美人象服逶迤可以忘忧莫如旨酒泛此粲华益我眉寿渊明一樽子美三嗅永结清欢相从白首

瑞光岩立化雀贊

宣和二年正月二十四日有雀立化于瑞光岩之佛殿香炉上其徒明颐来沙阳出画图示余以偈贊曰菩萨游戏于神通六道四生咸可入为欲化导诸有情故於异类而出现谛观此雀甚微渺每食一粒栖一枝卑飞不出蓬蒿间远举安知鸿鹄志而能坐脱与立亡依彼金容及香火屹然而化不震动如以木石镌刻成非诸菩萨威神力孰能现此希奇事我观三界诸衆生惟人实具大智慧妄想颠倒造诸业失身沦入横生中重为毛羣轻羽族破碎一切诸蠕动虽云妙觉不销亡无那沉迷益玄远菩萨慈悲哀悯故化身与彼为导师缘终寂灭显示人使知佛性无有二佛子若有瞻礼者愿言悉发敬信心勇猛精进趣菩萨皆具如是菩萨行

绣观音贊

观音妙智力无刹不现身出自鍼缕间神通亦如是光华五采备成此六铢衣云髻冰雪衣宝冠瓔珞饰庄严行道相步步妙莲花慈眼视衆生睟然见于色愿言瞻敬者?顾逍遥人系缚本来无何往非自在

天王院新塑释迦像金色珠赞

宣和庚子之秋沙阳天王院命工创造释迦牟尼大觉金僊之像邑之士女童稚出力施财运致土木不约而会既勤朴斲涂墍之功而采饰未施相好未具有以工之所摹画为未然者将毁其像而改造之始建是议而像出异物色如黄金颗如真珠徧满佛身及莲华座如水布沙如蚕种子璀璨熠燿光夺人目士女童稚瞻礼讚叹随意取之取已复生不可胜计于是曩之建议者悔罪懺非财施益盛缘事遂集客以其故语予往观信然亦得数百粒以归予虽不能知其果为何物然窃思诸佛显示神变化导有情不可测量方其入大涅槃现舍利子诸天及人建窣堵波种种供养以作佛事与此像设现金色珠摄伏不信增上慢者其理一也惟舍利子体极坚固锻链焚烧所不能坏而此珠虚脆不实力可破碎为不同耳盖舍利子者报身之所成而此珠即土木假合而化故不得不异也知诸佛法如幻如梦如像如响如光影如空华如寻香城如变化事则彼报身与此土木之所假合彼舍利子坚固不坏与此珠之虚脆不实亦无差别惟达诸法空者可以语此梁谿居士欲重宣此义以偈赞曰

稽首释迦文善逝天人师缘终示寂灭无量舍利子悉建窣堵波天人共瞻礼像法住世间化导诸有情亦示大神变摄伏不信者璀璨真金色清淨妙宝珠即彼土木中现此希奇事有来瞻礼者随取即与之既与出愈多不可为量数当观舍利子及此金色珠坚固与虚脆无异无差别佛子具智慧悉发敬信心勇猛勿复疑归依无上道

彩塔赞

沙阳陈氏女以五色丝缕结成彩塔施栖云璨上人璨以示梁谿居士居士以偈赞曰

释迦佛说妙莲华从地涌出七宝塔栏楯幡幢及龕室宝玲瓏珞震妙音四面皆出旃檀香散天妙华以供养佛以右指开塔户出大音声却关钥多宝如来示全身讚叹说法分半座惟二如来共一塔至今此会尚俨然何人建立窣堵波种种严饰悉具足彩缕萦结尺寸间高广五百由旬等当知一念周圆时胜妙功德已成就若能瞻礼复回观人人具此如来体至心持诵法华经弹指真塔当出现

富郑公画像赞

契丹自澶渊之役通好守约不复盗边至庆历间以我方用师西鄙且厌兵因聚重兵境上遣使来聘欲求关南故地中外震惧是时富公奉命报聘既见其主为陈通好则人主专其利而臣下无所获用兵则利归臣下而人主任其祸彼主感悟因许增岁币而契丹平北方至今无事其後河朔大水民流京东公时知青州兼京东东路安抚使择所部丰稔者五州劝民出粟益以官廩以赈济之得公私庐舍十余万区散处其人凡活五十余万衆立法简便天下至今传以为法惟公以制科中第历谏官侍从至相仁宗皇帝危言直节以道进退勲业甚茂然功在社稷德在生民此二事为最予尝读公谏垣集奉使録慨然想见其风采及来沙阳见公绘像于罗畴老家命工传写且为之赞庶几日瞻仪刑以慰慕仰之心焉其辞曰

天下达德惟仁智勇合之成体散之致用岩岩富公备此三德直道不回以相王国其智伊何
见于使虏敷陈利害以悟其主欢盟至今莫敢予侮其仁伊何见于救灾饥民如云襁负以偕
法简惠周垂训将来何以行兹断以勇克衆人所惧公独不惑夺虏之气厉色折之赈民之饥
诚意活之我生後公今覩厥象丹青载传朝夕是仰

如如轩赞

华屋千楹贪夫所娱一念休歇衺丈有余是轩廓然含容太虚森罗万象体自如如道人何为
於焉宴居动静语默随时卷舒盖将即此以善已而又以示其徒者欤

梁谿集卷一百四十

卷一百四十一

钦定四库全书

梁谿集卷一百四十一 宋 李纲 撰赞下

御书草圣千文赞

龙眠居士画十六大阿罗汉赞

保宁禅师真赞

王摩诘画渡水罗汉赞

雪峰了禅师真赞 顔鲁公画像赞

故赠谏议大夫了斋陈公真赞

佛日杲禅师真赞

御书草圣千文赞

绍兴五年冬皇帝以御书草圣千文赐臣子洎明年夏臣子洎刻之琬琰以示臣某又明年春臣某摹勒于石置诸豫章学舍宣圣殿宇之陰正临讲席使学者得以瞻仰谨拜稽首而作赞曰

伏羲画卦人文以成书契之作以代结绳篆籀而降秦隶乃兴规摹楷法有真有行衆妙且美萃于兹草畴克工之心悟笔到芝靖羲献主盟此道自昔英主鲜不自好惟汉光武投戈讲艺有唐太宗笔蹟奇秘底绥大业实资勇智游戏翰墨乃其余事於穆天子允武允文武定祸乱文该典坟万机之余纵笔怡神作此草圣前无古人亦有人言心正笔正妙哉心画本乎湖静银钩铁纽蟠屈刚劲云汉昭回奎壁辉映如鸟行沙如虫蚀木鸾鹄停峙龙蛇起陆飞电绕枢垂虹饮谷千变万态荡耀心目一人之贵犹或勤斯咨尔多士胡可怠而学问积躬功名济时其则不远瞻之仰之载摹宸翰勒之嘉石龔于殿陰如鲁屋壁天威在望得所矜式微臣作赞垂示无极

龙眠居士画十六大阿罗汉赞

第一尊者正坐垂足手隐横板交十指爪前有居士作礼鬼使致书若请召状後有侍者叉手而立

佛所印可大阿闍黎隐几合爪泊然无为恳请何人投地作礼不起于坐应供千里

第二尊者正坐肩倚拄杖左手握拳近口右手垂膝把经卷微露梵书前设鑪香後有侍者回顾一婆罗门手抱稚狮子

倚杖于肩屈指近喙废经不读思第一义大狮子吼真狮子儿转秘密藏其谁能知

第三尊者正坐跏趺以两手义指置足上昂首仰视锡杖倚牀前有夷人佩劒曲拳後有蛮女捧香山而立

义指膝间目视霄汉意象轩举邈无畔岸刚大之气塞于天渊俯仰无忤纵心浩然

第四尊者据巨石植右膝而坐手持数珠下视一大蛇蟠绕石前右童子震怖掷净瓶巾械于地侍者抱抚犹窃回顾

华林扰虎手举数珠驯彼鬱屈亦用兹乎巨颡修鳞能怖童子慈眼视之毒心自弭

第五尊者偏坐踞一足手执拂回顾侍者于莲花餅折莲房以献瓶中有戏龟童子跪而观之後有夷人佩刀植戈而立

藕花满甌莲房自拆神通妙用在于举拂童子何知跪观戏龟六用不藏使之者谁

第六尊者靠禅板植左膝垂右足而坐两手展经卷开口如读前有狮子衔花胡人背手回顾後有蛮奴执拄杖侍立

老矣衰疲背依禅板读经可为聊用遮眼植膝垂足狮子衔花杜其德机岂有斯耶

第七尊者反掌义指跣足而立仰视空中一珠侍者捧香炉蛮奴佩刀捧盘盛铎杵随之

宝珠腾空光焰璀璨谛玩无斁有见皆幻堂堂风仪龙象之姿灵杵宝铎往将加持

第八尊者跏趺正坐手执方鑪若说戒状傍有侍者合掌蛮奴执羽扇前有后妃盛服前跪若受戒状二女童侍立

本无戒持何尝有破方便为说三世因果服饰炜然王者之妃前跪谛听善思念之

第九尊者扶杖临石岸而立一蛮奴掖之下瞰巨浸观蛮奴以竹器写经卷花卉置水中有群鱼衔经蜃气成楼阁一龙出波浪间

龙鱼秘怪各有佛性散花投经出没游泳具大悲心平等施之往因妙力人天之资

第十尊者倚老松以左手支颐并足而立仰观松杪有猿摘松花以献後有蛮奴抱经持拄杖侍立松竹间有虚禅牀及方案上有古盆贮水养花卉之属

长松森然虬枝拂天支颐据木仰睇玄猿竹树之间方虚禅座我欲摄衣往补其处

第十一尊者偏坐左手按膝右手植牀枌上拳指支颐回视一童子置饭掌中以引鹤

宴坐便安支颐握拳一念不波灵台湛然婉彼胎禽就掌取食了无惊猜驯承恩力

第十二尊者垂足正坐回顾第十三尊者笑语以右手据牀枌左手舒掌侍者以餅水滴掌中

敷座亲密便于笑语怀抱之适怡然相顾沥彼餅液注于掌中普润四大一滴之功

第十三尊者正坐曲身就第十二尊者语以手按板作屈指状拄杖倚禅牀侧後有侍者及二童子碾茶治具于竹林间

俯身说法未能忘言无量妙义见于指端童子茗供竹间治具涤烦消渴惟此之故

第十四尊者长髭郁然不剃植杖林间倚巨松而立观二鹿出岩石傍衔花以献

麋麋群鹿出于岩端植杖倚松寓目纵观风度凝然万法皆了去髮留髭岂无所表

第十五尊者携杖以虎负经自随有老人道帽相并尊者举手作笑语势後有鬼神被甲执旌旗从行鎖一熊负一沐猴

适从何来游历于此大空斓斑负经以侍有伟衣冠山川之神旌麾戈甲其从如云

第十六尊者于山林水石极幽絶处以袈裟蒙头入定有悬瀑淙泻三蛇出其前一将润饮一方行一蟠结

岩谷窈窕林苒扶?瀑布淙射蛇虫之居衲帔蒙头安然入定孰能出之其独也正

绍兴甲寅三月六日梁谿病叟书于长乐城东报国寺後二十日东林珪禅师见访因以遗之

保宁禅师真赞

此是保宁风度具眼衲僧试覷面孔虽然丑拙肚里非常峭措佛祖一口吞尽问着当下休去

却说梁谿覓赞大小一場露布

王摩诘画渡水罗汉赞

阿罗汉具大神通飞锡凌空如履实渺然巨浸与天永戏蹑一杯能径渡云何溪涧咫尺间乃有种种难涉相前者已济气怡然後者将涉有难色老病扶携壮者负足探策引褰衣裾秘其神力不示人如畏黄蘗所诃责我观一切诸有情咸具神通并妙用空中示现十八变正眼观时非吉祥善哉摩诘老画师能以毫墨作佛事稽首十六大声闻皆悉回心等正觉

雪峯了禅师真赞

粹然而深如玉在山而珠在渊颀然而长如野鹤之处鸡群谓是为了四大假合何者是真谓是非了五峯秀出望之俨然道与之貌丹青所传其有不得而传者耶皓月普分千水影清光常满一轮中

顏鲁公画像赞

会稽李光守永嘉郡得鲁郡顏公遗像绘于郡宇之忠义堂昭武李某为之赞曰

英英鲁公人中之龙为唐宗臣见危纳忠巨盜起燕朔部风从独婴孤城以抗其锋功虽不终志实可则间关造朝号为耆德纠繆绳愆毅然正色奸邪媚之摈使去国蹇蹇匪躬险夷一节迨其耄年奉使希烈气沮凶逆诚贯金铁身虽可陨名不可灭岩岩高堂榜曰忠义非公遗像其孰当置登斯堂者宜仰而畏师友其人无公是媿

故赠谏议大夫了斋陈公真赞

如玉之温有睟其容如山之峙有主其中论事有著龟之审知人如衡监之公金百链而不耗水万折而必东置死生于一拾会理事而皆融吾不知其谁氏之学混儒释而为宗兹其所以为了翁者欤

佛日杲禅师真赞

闻佛日之名而未识其面见佛日之相而不闻其言心契神交未识面可也目击道存不闻言可也如水中月虽非实见已有清凉之意如狮子吼虽未发声已有畏仰之心自非真是恁麼人办得恁麼事衆所推许畴克尔耶虽然孤峯顶上诃佛骂祖彼佛日也一幅丹青默然无说此佛日也孰是孰非必有明眼人能辨之者咄

梁谿集卷一百四十一

卷一百四十二

钦定四库全书

梁谿集卷一百四十二 宋 李纲 撰颂 箴 铭 辞

渊圣皇帝题十八学士颂

六箴【言行学友名直】 素斋箴

求仁堂八君子铭 多言人铭

座右铭 潜庵铭

普现庵铭 芝轩铭

瓿粤铭

沙阳和归去来辞 秋风辞

琼山和归去来辞

渊圣皇帝题十八学士颂【并序】

唐天策府十八学士阁立本画像褚亮赞渊圣皇帝题其姓名以赐太子詹事李诗真絶世之宝也臣某拜手稽首谨作颂曰

英英策府十八学士森如骥驂才德兼备太宗御之六轡耳耳嘶风籥云一日千里丹青之妙写于缣素千载风流遇之旦暮於穆渊圣天纵多能游戏翰墨识其姓名人物图绘及兹宸藻是为三絶万世之宝沙漠苦寒翠华未还伤心北顾喟其涕潜安得杰才如彼诸子扶翊中微国势振起岂无赵卒为御以归老臣衰疾跂而望之

绍兴六年七月二十三日

六箴序

予行年三十有八而未闻道日月逝矣岁不我与其君子之弃而小人之归乎作六箴以自警

言箴

意蓄于心宣之以言辞达而已多则赘焉惟仁者为能以言利人惟智者为能不失言于人仁智者予之所未得也不务本而务末胡不默默而多言以自贼耶

行箴

言者虚辞行者实迹与其言丈不若行尺言之非艰幼者能之行之维艰老者病之讷於言而敏於行君子贵之呜呼非斯人吾谁与归

学箴

学以致道积于厥躬人而不学智有盲聋凡百君子学然後知不足非琢成器何贵于玉为学日益为道日损益为损资学为道本未尝务学何以絶为赤子匍匐乃能奔驰明以告子学以聚之

友箴

古之君子取友必端以文会友以友辅仁今之君子慕禄贪位面友非心见利忘义握手指天如见肺肝转足已非自为得计势利之交何异狗彘探汝之情伺汝之过汝不自慎而欲重其祸耶

名箴

名者公器不可多取有心取之是为怨府古之至德民无能名过情之誉何足为荣令闻令望有闻有声得之不愧明德维馨是以君子疾没世而名不称汝不务德而买名以害其生耶

直箴

好直而不好学其蔽也绞直情径行君子所悼晋有叔向古之遗直世无孔子孰为叹息水致曲以通于海木致曲以全其材子胡不学而钓直以自贻其菑耶

素斋箴

不白不彩不质不文绘事为後素居其先皓皓易污营营易点术斯以往其慎所染闲邪复礼友士之仁以文会之反汨吾真抱此以居处子之秀出则事君惟道之就鄙华胜实恶紫夺朱惟正惟中以卷以舒勿贪夫位勿慕夫禄有义有命死生祸福昔者夫子从事于斯体道拯溺涅而不缁殊涂同归何思何虑养心浩然独守其素

临江萧君建功作素斋而求言于余庶几有志于道者作此箴以示之建炎戊申十月晦日书于崇阳僧舍

求仁堂八君子铭序

予日居求仁堂所与友者几杖砚笔樽壶琴枕八君子也各为之铭以着益友相成之义

直几

斲木为几病夫是凭限腋扶肘以便其形子厚所慚次山所恶问何以然惟曲之故我作斯几其直如矢匪雕匪饰自全厥美隐之而坐不倚不局心凝形释死灰槁木

方杖

古后有制老则赐杖用之扶持利有攸往後世灵寿因以傲福光夸赤藤美称桃竹我作斯杖不圆而方刚健笃实用行舍藏曳策逍遥丘园之宝孰为老龙放之而笑

璞砚

黝歙之石温润如玉可磨可镌是资简牒匠氏街巧求售于人奇形诡状制度日新我制斯砚独全其璞其平如砥不假雕斲澁不留笔滑不退墨文字之祥维以比德

象笔

篆籀之变是生草隶束缚以书创物之智毛颖既俘封于管城震掉不律惟以太轻我制斯笔其管以象运用可意如兵随将惟象之齿感雷则文援毫写之其辞如云

自注樽以下四铭阙

多言人铭

李子游于古兰若有金人焉啓其口而铭其臆曰我古之多言人也勿谓多言多言何伤言而当道说约以详胸襟流出与道翱翔如云起雷震于十方如谷答响应而不藏洪纖感物如钟之撞抑扬在指如琴之张烂乎如星辰之经纬沛乎如江汉之汪洋五色相宣黼黻文章五声相比磬筦笙簧悦可人意炳焕铿锵孰知夫色未尝色非青非黄声未尝声非宫非商着于文字文字相宣孰能测量达于语言语言解脱孰得称扬滋发上根下根衆生一音演说徧覆三千大千世界舌相广长是以予终日言而未尝言其心了了终日默而未尝默其音琅琅如来入灭而四十九年不曾说法维摩无语而三十二义皆发光鋭惟道之极言默不足以载故予游戏于辨才三昧聊自得而徜徉李子顾谓其徒志之若此者可以多言矣

座右铭

予名堂曰求仁十二时中行住坐卧未尝须臾离也作座右铭以自警焉其文曰是心廓然无边际徧周法界同一真体强名曰仁求之在已不属中间非内非外一以贯之万物皆备视听言动造次颠沛无须臾离必在於是克已则见复礼则亲一日如斯天下归仁迹之事父远之事君扩而充之以及斯民德被草木信及鱼豚本无别法一视同仁害以求生成以杀身得全于此死生埃尘不即不离非妄非真酌之不竭用之不勤孰能体是号曰能仁顏氏之子请事斯言勒铭左右以代书绅

潜庵铭

龙兴深老作潜庵梁谿居士为书其榜且铭之曰鱼龙潜于渊钓罩絕机械天地潜于心方寸具覆载谛观此庵中不广亦不隘森罗含万象空洞周法界请问云何潜非内亦非外宝刹现一毫须弥藏一芥万缘息一机衆窍虚一噫足迹不可寻湿灰那见怪百鸟不衔花负命难索债全身入虚空无在无不在欲识潜庵人岂离这皮袋

普现庵铭

蒋山佛果禅师勤公筑庵于旧方丈之侧东吴李弥逊以普现目之梁谿李某为作铭曰

一月普现一切水水月无尽月惟一如来普现群生前化身亿万亦如是譬犹一灯变百千光明晃耀无量数又如两镜互相照重重妙影咸摄入我观此庵方丈地而能变含十方界诸天宫殿衆地狱日月星宿及山河人畜龙僊之所居皆悉容受不迫迕谁能住此作佛事现身随类为说法种种化导诸有情而实无一得度者劫风吹鼓世界坏劫水漂流火洞然此庵初无变坏相风灾水火皆熄灭虽云无刹不现身乃是至密藏身处佛子若住普现庵当作是念为正念

芝轩铭

清原山因山水暴至发屋长老师珪得芝草于片瓦之上十叶燦然遂以名轩而求言于梁谿居士为作铭曰煌煌灵芝秀于片甃?雷霆奔为发其羃无情说法非耳者闻云蒸霞濯普香所薰玉润金坚灿然十萼眼正则祥见邪则错惟道人珪禅苑之芝式告观者不须寻思

瓯粤铭

建炎四年秋瓯贼范汝为啸聚回源统制官李捧帅师轻进而没朝廷遣官招抚乃请留屯万人贼势益张陵辄郡县莫敢谁何群盗歆艳环视蠡起绍兴改元之冬遂据建城以叛部勒党与焚掠诸邑破邵武犯南劔气焰炽甚福帅程迈以闻上命左中大夫参知政事孟庾为宣抚使检校少师武成感德军节度使韩世忠副之总神武兵步骑三万水陆并进既次近境贼犹抗拒屡战屡捷径薄城下犹负固不服攻围累日乃始克之仰体仁圣好生之德寬释胁从老稚士女案堵如故剿殄贼党以钜万计分遣偏师扫荡巢穴余盗以次讨定一方救宁惟瓯粤

为天下至险其民尚气而好鬪胁以盗威失其常产相挺为乱自相屠掠不可胜数及王师削平其徒尽殲诛杀之惨必有所致非偶然也议者谓愚民不知逆顺之势因循至此而释氏之流则谓瓠俗生子仅留一二余悉溺之二百年间所杀几何因果报应理固宜然二说虽殊实相表里原其不明君臣之义盖缘不笃父子之恩孝慈忠义本由一心更无别法平居于父子之间无虎狼之仁则临变故之际责其守节不为乱岂可得哉乐羊食子之羹而文侯疑之易牙杀子以适君而管仲非之於所厚者薄则无所不薄因果报应又不论也避地闽中具见始末欲以药石之言明着劝戒稍革其风乃作铭曰

人之大伦惟君与臣尊卑既定其谁敢干闺闱之内父子天属德惟怙恃恩在鞠育为父戕子为臣叛君逆道背理何以为人鬼神所诛天地不佑刀兵翦屠其孰能救相彼瓠粤民俗剽悍负气尚勇轻生喜乱巨盗挺之蠡附蚁从曾未期年同恶内讧王师之来如雷如霆讨叛舍服千里震惊锋蝟斧螳犹敢旅拒转战逐北婴城自固怒其齧齧以抗乔岳翹其萌芽以傲霜雹肥牛僂豚一举碎之宥彼胁从翦其鲸鲵凶徒逆俦尸相枕藉天威所临敢有违者君臣以义父子以恩克笃父子乃明君臣咨尔瓠民自今以往爱育子孙尊君亲上焚尔甲冑折尔戈兵服勤耒耜以保尔生孝慈以忠砥砺名节勒铭山阿敢告耆耄

沙阳和归去来辞

陶渊明赋归去来辞典丽闲放冠絕今古非止独步江左一时而已後虽有作者莫能及也予谪官沙阳地僻家远慨念庭闈形如梦寐适中表吾今罢官西上取道浙江於其行和渊明之辞以示之非敢追继前作姑叙区区之情庶几见吾亲以此慰其心焉

归去来兮负罪远谪何时归惟戇愚之妄发奚流落之足悲顾埃之何补嗟驷马之难追荷天恩之寬大省往咎而知非邈庭闈之安在篋戏彩之莱衣念蓼莪之终养聊咏歌乎式微发于梦寐精爽宵奔髣髴慈顏欢然倚门爰入我庑图史故存诸季环列酌此一樽恍晨钟之惊悟惨酸鼻而蹙顏非吾亲之为念其何适而不安寓禪房之岑寂閨春昼而闭关嘉溪山之秀美时散策而往观望飞云而陟岵悲游子之未还岂翔集而爵跃方局蹐而觐桓归去来兮愿良朋之与游备万物于我身惧放心之不求味理义之可悦乐天命而无忧梁谿之滨有泉石与田畴言蜡我屐载浮我舟不汲汲于三釜聊欣欣于一丘艺兰菊于小圃友龟鱼于清流憇山樊之真宅诚无愧于阅休已矣乎雷霆雨露各一时天之震曜初不留予今驾言将西之为语吾亲归可期奉甘旨于晨夕躬耒耜而耘耔寻北山之旧隐补南陔之雅诗助尧民之击壤终此身以何疑

秋风辞

秋风起兮黄叶飞远客异土兮未能归白露降兮悴衆芳怀美人兮怅难忘变星霜兮阻山河风异响兮水增波遡明月兮发浩歌群陰积兮浮云多岁聿云暮兮奈愁何

琼山和归去来辞

归去来兮吾今蒙恩真得归慨国步之方艰抚世故而增悲迹虽滞而心往时既失而何追悼
匪谋之无策惟有识之知非致翠华之播越犹旰食而宵衣顾一身之飘零如流萤之已微我
归中州匪纾匪奔再涉鲸海脱此鬼门父子相从僮仆仅存酌酒相庆翠杓绿樽思往来之梦
幻粲一笑而解颜方问涂以访家怅何适而可安纷寇盗之蚁结惊突骑之窥关萃百忧于方
寸渺万里而遐观念八骏之北狩踰三冬而未还虽短褐之云多岂复羨夫执桓归去来兮期
汗漫以远游既抱病而已废复与世而何求冀英俊之竝骖解斯民之隐忧梁谿之滨有先庐
与故畴言秣其驹亦泛其舟愿采薇而散髮投脱兔于林丘虽血气之已衰庶精淳之不流聊
颐性而养寿以待尽于真休已矣乎盛衰理乱各一时气机默运初不留造物为此将安之天
地不终否九六亦有期忽天心之悔祸化戈甲为耘耔玩折肱于羲易咏考盘于卫诗谅吾心
之已决可投龟而不疑

梁谿集卷一百四十二

<集部,别集类,南宋建炎至德佑,梁谿集>

卷一百四十三

钦定四库全书

梁谿集卷一百四十三 宋 李纲 撰论上

三帝论 三教论

灾异论 朋党论

三帝论

秦始皇帝汉孝武帝唐明皇帝皆以过人之材履治安之世内则殫奢极侈以竭天下之奉外则穷兵黩武以邀絶域之功甘心方士虚诞之说以求不死为後世笑然而秦传二世而亡武帝躬蹈巫蛊之祸不能保其妻子而卒措天下于泰山之安明皇遭禄山之变身取播迁而肃宗亦能勘定祸乱收复土宇成中兴之业三帝者所为则同而其报不同何也尝试论之人主有过人之材而履治安之世者其志必大而欲必多惟其欲多故必殫奢极侈以竭天下之奉惟其志大故必穷兵黩武以邀絶域之功若夫甘心方士虚诞之说以求不死则亦以其志大而欲多故也是三者虽皆足以致危亡然而其操术英断而发寤悔过者即其身可以转危而为安汉武帝是也其祖宗之德泽深而天下之人材衆者虽失之身而後嗣继兴亦可以振亡而为存唐明皇是也咸无有焉以自底于危亡之地则始皇是已何以知其然耶武帝遭巫蛊之祸悟田千秋之言而其晚节何其与平时相反也平时土木之功声色狗马之玩斩刈民力耗蠹天下而其晚节封丞相为富民侯以赵过为搆粟都尉教民力穡平时开边通道爪牙卫霍猎取夷狄天下骚动而其晚节下哀痛之诏弃轮台之地平时喜方术崇祠祭尊宠文成五利之徒以徠神僊而其晚节降诏曰吾自即位以来所为狂悖为方士之所愚弄天下岂有神僊但节食服药可以少病而已故能收治效于末路委神器于幼子而天下不乱岂非操术英断发寤悔过即其身可以转危而为安耶明皇开元之初励精庶政委任得人衆职修举凜然有贞观之风其後怠忽荒政而内宠擅权外相李林甫杨国忠数十年自蔽耳目养成祸基侈心一开竭天下不足以奉其欲边臣丧师数十万而不得知也方且奉符瑞假神奇以镇服天下禄山乘间窃发金鼓一震窜身巴蜀而委宗社于贼庭唐祀几亡固其宜也然而高祖太宗之德泽结于民心太平既久人材衆多故肃宗建号于灵武而四方忠义之士奋袂而起响应影从不可胜数若顔杲卿真卿倡义于河朔李愬卢奕死节于洛都张巡许远着绩于睢阳郭子仪李光弼成功于长安而唐室再造繫数臣是赖岂非祖宗之德泽深天下之人材衆虽失之身而後嗣继兴亦可以振亡而为存耶若夫秦则岂有是哉阿房之宫隔离天日钟鼓嫫媼不移而具骊山之役下涸三泉中成观游上成山林既以强力擒灭六国又命蒙恬北筑长城以守藩篱却匈奴者数百里遣徐福辈治装入海以求方丈蓬莱亲巡海上以候神人至死不寤峻刑苛法以敲扑天下焚诗书以愚黔首天下豪杰散弃山泽陈胜奋臂一呼豪杰竝起而秦亡矣由此观之三帝者其所为虽同而其报则异岂不各当其分欤人主不幸而有过举若武帝斯可矣彼秦之始皇唐之明皇遗後世戒顾不厚哉

三教论

儒道释三家之教自汉以来鼎立于天下为儒家之学者曰吾之道圣人之道也尧舜禹汤文武周公得其位而行之孔子推而明之其德仁义其文诗书易春秋其法礼乐刑政其民士农工商其位君臣父子兄弟夫妇朋友其服麻丝其居宫室其食粟米蔬果鱼肉生者有养死者有葬治天下者舍吾之道天下不可得而治也为道家之学者曰吾之道亦圣人之道也黄帝得其位而行之老子推而明之尊道德而小仁义贵精神而薄礼法以清静为宗以慈俭为宝以柔弱为体以无为为常秉本而执要少私而寡欲以长生久视为致道之效治天下者舍吾之道天下亦不可得而治也而释氏之徒亦曰西方有圣人焉其名曰佛以布施摄慳贪以持戒摄毁禁以忍辱摄瞋恚以精进摄懈怠以禅定摄散乱以智慧摄愚痴以慈悲为心以寂灭为乐以常乐我净为法以菩提涅槃为至以因果报应为化导之术治天下者用吾之道可以不言而自化不令而自行不待赏罚使民迁善而远罪然则治天下者果何所适从而可乎曰从儒彼道释之教可以为辅而不可以为主可以取其心而不可以溺其迹何也七政之所加五赋之所养中于天下者为中国而儒者之道治天下之常道也礼君臣正上下纲纪法度之所布号令赏刑之所施进君子而退小人使贵贱履位仁贤不肖袭情所以为太平治之至者未有不由此也尧以是传之舜舜以是传之禹禹以是传之汤汤以是传之文武周公孔子由周公而上上为君故其事行由周公而下下为臣故其说明而後世有为之主慨然有志于斯者未有不即其身而致太平之治也岂非崇儒之明效乎若夫道释之教以为辅而取其心则道家之所谓清静慈俭柔弱无为少私寡欲者其说可取而亦足以助教化矣释氏之所谓布施持戒忍辱精进禅定智慧者其说可取而亦足以助教化矣至于以为主而溺其迹则以道家长生久视之说变而为神僊方士之术昔之人君有行之者汉武帝唐明皇是也以释氏因果报应之说变而为祸福禳禳之事昔之人君有行之者梁武帝唐懿宗是也汉武帝内建神明通天之台外宠文成五利之徒崇奉祠祭以候神人然不能消巫蛊之祸唐明皇获灵宝之符致混元之降章疏举于空中梦寐达于帝所然不能止禄山之乱是皆溺于道家之迹以长生久视之说变而为神僊方士之术之过也梁武帝祀郊庙社稷以麋为牲亲屈万乘之尊正坐讲说舍身为寺家奴布髮于地使其徒践之然不能救台城之辱唐懿宗迎佛骨於凤翔歌呗道场以夜继日涕泪悲泣以躬率其臣民然不能益年祚之短是皆溺于释氏之迹以因果报应之说变而为祸福禳禳之事之过也治天下者从于儒则治安之效如彼溺于道释之迹则祸乱之阶如此亦可观矣然则有天下者如之何治之之道一本于儒而道释之教存而勿论以助教化以通逍遥且设法以禁其徒之太滥者宫室之太过者斯可矣又何必人其人火其书庐其居然後足以为治哉

灾异论

孔子作春秋书日食地震山陵崩陨常星不见夜中星陨如雨五石陨坠六鵠退飞鸛鹄来巢霜不杀草李梅冬实者所以记异也书水火之灾雨雹大雪震电晦冥多麋有蜮饥旱螽螟有螻所以记灾也灾异之名自此而起汉儒因之推配五行以为之说是耶非耶曰孔子之所以书之者是也汉儒之所以推配之者非也何哉天地万物以人为本庶政修而万事康得治之道则地平天成物遂其性岂有灾异之变哉政悖其宜事失其叙有乱之理则见于天者日月

薄蚀彗孛飞流霜雪风雨之不时而反时为灾者天之变也见于地者山崩川竭水火为灾震动陷裂而反物为妖者地之变也见于物者羽毛鳞介之孽草木金石之怪螟蝗蠹螽蟊蝼蛄起而稼穡卒痒者物之变也圣人必谨记之使治人事者畏天戒恐惧修省以消去之故曰孔子之所以书之者是也汉儒不揣其本而齐其末以天地之变物之妖孽痼着于形数声色者推而配之五行某事失则某灾为之应某异见则某事为之符其说牵合附会迂阔而难信故曰汉儒之所以推配之者非也然则天地与物之变孰使之然哉主张翕辟亦有司之者耶曰通天下一气耳和气致祥乖气致异人事着于此而祥异应于彼犹影响之于形声自然之符而理之必至者也胡不以身观之元气衰而邪气乘之则疾病不祥之色见于面目达于气体可视而知可诊脉而得其本在于腑脏之失其平而已善医者调其腑脏而疾病可痊善治者修其政事而灾异可弭故尧以水而敝予汤以旱而责躬大戊以桑穀而修厥德高宗以雉雉而正厥事宜王遇旱暵之灾而惧太宗罹蝗螟之异而忧皆能弭灾异以为和平身致大治岂非畏天戒之明验乎後世谈经术者以汉儒推配之说牵合附会为不足信并与圣人所以书灾异之意一切废之其说以谓天地与物之变咸其自尔吾无与也何足畏乎遂使人主乐闻其说不复畏天而有恐惧修省之心其有害岂浅浅哉夫灾异祥瑞其理一也灾异之说使人畏而有所戒祥瑞之说使人骄而有所怠圣人语灾异而不语祥瑞者惧其君骄故也今有一草木之祥一羽毛之瑞则相与嗟叹而三贺之至于天地万物之变则恬不加恤以谓未尝有灾异焉其亦异于圣人之意矣

朋党论

君子小人得位而立人之朝则必各引其类以自助此朋党之所由兴也然而君子之类以道义亲小人之类以势利合君子为国正直而不挠小人为身奸谀而取容其判若白黑然顾人主勿之察耳自古人主知朋党之为患而不知所以致此者在君而不在臣何哉人主之所以处已者其刚足以决柔其明足以照奸其诚足以兴善其中正足以观天下则君子进而小人退所谓朋党者盖无有也迨夫刚不足决而优柔不断明不足照而昏蔽可欺诚不足与而有二三之德中正不足劝而有偏陂之心然後君子小人混淆杂揉引类以相排君子既指小人以为朋党小人亦指君子以为朋党人主苟惑而弗察退君子而进小人则祸乱阶矣请借古以明之方尧之时其所进用者皋陶稷契之徒也其所窜殛者共鯀驩兜之徒也方成周之时其所辅相者周召之徒也其所流放者管蔡之徒也岂有朋党之患哉汉之末其君若桓帝者昏蔽可欺是以奸邪擅朝磐固交错指一时名节忠义之士以为朋党而党锢之狱兴汉因以亡唐之末其君若文宗者优柔不断是以牛李之徒结为死党一时正士不附已者悉排斥之搢绅罹祸几四十年唐因以衰由是观之朋党之说不出于尧舜成周之时而出于汉唐之末槩可见矣人主欲无朋党之患莫如自治刚也明也诚也中正也皆自治之道也易曰夬决也刚决柔也君子道长小人道消也欲无朋党非明可乎诗曰太平之君子至诚乐与贤者共之所谓诚也洪范曰无偏无党王道荡荡无党无偏王道平平所谓中正也率是道以照临百官而君子不进小人不退士大夫不环植而散群未之闻也不能自治而欲分别朋党之是非譬犹烛监不明而欲辨妍媸权衡不设而欲揣轻重盖亦难矣故曰破河北贼易破此朋党难非虚语也

梁谿集卷一百四十三

卷一百四十四

钦定四库全书

梁谿集卷一百四十四 宋 李纲 撰论下

御戎论 理财论上

理财论中 理财论下

御戎论

西夏自继迁盗有平凉灵武瓜沙甘肃银宥之地百有余载乍叛乍臣为边境患谋画之臣竭智于内介胄之士用命于外虚帑藏以给军赋疲民力以飞刍粟旷日持久曾不能殲渠魁复故境制其死命而刘平徐禧刘法之徒覆全师蹶上将者往往而是也夫蕞尔数州之地而以天下之势临之宜若泰山之压卵然而用力之多见功之寡败军之衆者其故何耶行兵之道不若彼者有四自治之术未尽善者有六彼军旅之力全而我军旅之力不全彼士卒之心一而我士卒之心不一彼所规者大而我所规者小彼所图者久而我所图者速此行兵之道不若彼者四也将帅之任不专士卒之气不振糗粮之蓄不广钱货之法不通赏罚之令不明攻守之议不审此自治之术未尽善者六也尝试论之夏人每欲入寇必聚兵于数路之会境举国而来号称百万精壮居前老弱居後去则反是故能深入吾地破城寨虏人畜动辄如意吾则不然每有攻讨五路之帅各以其兵入力散势分不相为用彼方虚城清野待诸路以不争而以全力据要害之地以制一路于必死此前日熙河所以破军杀将也岂非彼军旅之力全而我军旅之力不全故耶夏人非有高爵厚禄以宠战士然而人人习骑射乐战鬪耐饥渴其亲冒矢石蹈锋刃死行阵若谈笑然故能惊边徼摩封疆出没飘暴不可制御而吾之师独土兵熟户蕃汉弓箭手为可用耳至于东南屯戍之兵卒然闻鼓鼙之声见旌旗之色流汗股栗已欲曳兵而走况可与之临阵接战以首争首以力搏力哉弱者先奔则强者亦与之偕溃此黥布之所以破楚将也岂非彼士卒之心一而我士卒之心不一故耶夏人之法战胜而得首级者不过赐酒一杯酥酪数斤其赏之如此其轻也然而得大将覆大军则其首领往往不次拔而用之故其战鬪轻首级而不争乘利逐北多致大胜而吾之法每得一首级则转一资赏帛有差战士知首级之为贵也兵刃既接幸而胜之每杀一人则必下马斩首久而後得奔北之寇已鸟散而远遯矣以故吾之胜未尝有大捷焉岂非彼之所规者大而我之所规者小即夏人狡狴多诈而善谋强则叛乱弱则请和叛则利于虏掠侵犯边境和则岁赐金缯若固有之以故数十年来西鄙用师叛服不常莫能得其要领而其深谋远虑常为积年之计吾则不然方其和附文恬武嬉无豫备不虞之患而一旦叛去则不计利害不议可否遂兴师而攻之以侥幸一时之利岂非彼之所图者久而我所图者速耶四者既如此矣而自治之未尽善者其弊亦可得而言也古之将帅付以阃外之权不从中制利则伸钝则蟠见可而後进虑胜而後会财赋可有也以赏战士而激劝之诛杀可专也虽君命有所不受久任责成不妄罢易故能习熟利害临事制变士卒乐为之用而有功今则不然为帅于千里之外而受制于九重

之中见可欲进而不得知难欲退而不敢用度稍过已从吏议一有不然片纸罢之夫如是而欲责其建不世之功亦难矣此不专将帅之任其弊一也古之良将必与士卒之最下者同其甘苦百里之内牛酒日至以享之激以忠义砺以爵禄不幸战歿恩恤备至生无饥寒之患而有信赏死无妻孥之忧而有荣名是以士卒奋厉感激轻用其死毅然之气愿战赴敌虽身膏草野而不辞今则不然将之与卒固已辽绝而不相知矣廩贮匮乏衣食不足驱而战之歿于行阵则以逃亡为言赙赠不及妻孥无归死者莫恤生者何劝夫如是而欲责其伏节死难亦难矣此不振士卒之气其弊二也国以兵为本兵以食为天虽有金城汤池之固非粟不能守也虽有乌获任鄙之力非饱弗能鬪也鼂错为汉画策使民鬻爵赎罪实粟塞下而赵充国亦言积谷三百万斛寇不敢动矣惟此失策故彼敢为逆由是观之欲强兵以制敌未有不以谷粟为先者今自陕以西关中之地沃野千里古之所谓天府也丰岁粒米狼戾有司窘于钱帛无以广糴凶年军食不足率之于民至有白昼持梃群起而击县令者又行坐仓之法士有饥色其何以战此不广糴粮之蓄其弊三也往岁陕西铁钱与铜钱均用其後铁钱寢轻以二当铜钱之一自东南夹锡钱罢不行悉运于陕西物价翔踊而钱益轻凡二十而当一官兵之俸其数如是月得俸一千者才可以为铜钱之数五十欲其衣食足而勇于公鬪不可得也不为之制则物重钱轻其弊无穷遽以法平之则商贾不行而交易之道废未见有良策者又解池之盐不假烹链而自成其利日为钱一万缗以岁计之凡三百六十万缗可以支陕右兵费五分之一自东南末盐行于西北而解盐不行尘委山积坐失国计每以调度仰给朝廷帑藏为虚亡有穷已此不通钱货之法其弊四也古者赏不踰月欲民之知劝也罚必当罪欲民之知畏也治天下者无所不用赏罚而军事尤甚盖驱民于锋镝之间欲人自为战非赏罚何以使之今有躬踐行阵冒白刃者未必赏而货赂侥幸之人第功殊列偏裨失主将逗留怯敌者未必罚而一有小利则张皇其功以邀上赏尚何以使战士知所劝沮哉此不明赏罚之令其弊五也王翦之伐荆非六十万不行赵充国之讨先零必屯田为积岁之计盖其攻守之策素定于胸次利于速战则必盛卒徒以临之使功无踰时役不再籍利于缓守则必屯田积谷坐省馈运以待其疲弱然後一举而灭之古人立功类皆如此今攻守之议初不先定平居屯戍开口待哺仰食县官其费不貲一旦下攻讨之令又无成策徒浪战以侥幸一时之功是以西鄙用师积数十年未见显效此不审攻守之议其弊六也六弊如此又加以行师之道不善于彼者四以故夏人以区区数州之地敢讐大邦而抗天下之全力保据一方旷诛积稔无足怪者为今之计莫若反此必欲征伐使五路各守其地按兵以备不虞别命大将以精兵数十万齎数月粮择近巢穴美水草之地一路深入可以得志则吾军旅之力全矣广募土兵熟户蕃汉弓箭手以为选锋使之当敌东南之兵特以守营垒护輜重张声势而勿使与战兵杂处则吾士卒之心一矣战胜之功勿计首级而以用命先登却敌破阵为最帅论诸将之功诸将各论其麾下之功必以实闻次第推赏则吾之所规者大矣择将帅训士卒峙糴粮缮甲兵习于山川形势策出万全然後举师而不邀功于旦暮则吾之所图者远矣四者既备而又委任将帅许以便宜从事抚养士卒恤死事以劝生者乘丰岁以广储蓄因时宜以权宝货赏罚之令必信攻守之议必素定而不出于临时则六弊尽去可以有功上以摅祖宗之宿愤下以复境土于舆图奈何可以为而不为也今夏人虽屈膝请和然戎狄异心强则复叛及是时宜思所以制御为万世虑者搢绅之士亦不可以不讲也

理财论上

王者之治天下有政有教教以明礼义为本政以足财用为先孟子曰无礼义则上下乱无政事则财用不足又曰善政得民财善教得民心二者相须以成体然後天下治易曰何以守位曰仁何以聚人曰财理财正辞禁民为非曰义以仁守位而无财以聚之则所谓徒善不足以为政也以财聚人而无义以理之则所谓度量不生乎其间也仁以财施财以义制三者相为表里而天下之能事毕矣成周之时理财用者掌于天官以九贡致之以九赋敛之以九式均节之上以供王及后世子之用下以制百官有司之禄以奉天地宗庙百神之祀以给宾客饗殮之礼其余以待不庭不虞之患出入会计式法具焉民有常职国无暴征上下与足礼乐庶事备而颂声兴记曰冢宰制国用必于岁之杪量入以为出後世以宰相兼钱谷之职而天子后妃赐予游燕玩好之费官吏廩禄祭祀宾客军旅调度河防边计营缮力役与夫水旱不时之资朝廷必周知其数而裁制之盖得周官之遗意故尝譬天下犹之家也今有百口之家其财产之所入仅足用焉则必择长者一人专总之仰事俯育朝夕之所给岁时伏腊之所须婚嫁丧祭之所用皆有常数然後以其赢余可以备凶年而无饥寒匮乏之患苟不然人人得而取之力亦不给矣四海之广生齿之繁租税之所入征商榷酤铸山煮海平准市易香矾茶课之所取不为不多也然而比年以来每患财用之不足者度量不生于其间而费出无节也宰相不任其责朝廷不知其数而内之赐予燕游玩好应奉外之营缮力役边事河防各有主之者随意所欲莫敢谁何以有限之财而供无限之求虽使粟菽如水火钱货如泉源币帛如丘山亦安得不为之匮乏也为今之计所以理财者如之何而可复周官冢宰制国用之意使宰相任责周知天下财用出入之数一切用度本之朝廷罢去烦费而量入以为出庶几乎其可也

理财论中

世之论理财者皆曰天下之大生民之衆不患无财患无以理之讲明其说设法以笼天下之财使民无遗利则国用足矣殊不知自汉唐迄今取于民者已竭又欲以法笼之是民之所以相生养者必欲尽夺之而後已也何哉古者取于民不过什一故孟子曰多乎什一大桀小桀也少乎什一大貉小貉也周衰诸侯专利以自厚亦不过什二故鲁哀公曰二吾犹不足如之何其彻也至秦收太半之赋头会箕歛民不聊生豪杰竝起而亡之汉兴天下平定衣食滋殖加以文景之恭俭国用富饶往往弛租税以寛民力武帝外事四夷内极奢侈海内萧然帑藏空虚调度不给于是舟车有算干盐铁制榷酤告缗钱以足一时之用而後世因之遂为常法唐初以租庸调为民赋之制其後罢而为两税又制茶法取于民者其条益繁孟子曰有布帛之征有粟米之征有力役之征用其二而民有殍用其三而父子离今之民征于三者之外已不可胜数於斯时也又欲设法以笼之使民之所以相生养者必尽夺而後已呜呼其亦不仁之甚矣理财以义为主理财不以义而以法度之威临之何求不得然吾恐聚歛掊克而民益穷非社稷之福也然则如之何而可曰於此有道焉可以民不加赋而国用足煮海采山铸钱是也山海者天地之藏王者所擅而有者也取之不竭用之不既以法权之使运转流行而不穷则其为利可以与天地相参也何哉民自生齿食盐与茶与谷粟等而钱货之法上令之下行之不可以一日无也齐以盐筴富吴以铸钱强自唐以来茶助国用者十居一二讲究其法变而通之以尽利则理财之术莫大乎此夫茶盐者天下之经费也异时官运收息郡县之用所以足者以茶盐之利在郡县也比年走商贾实中都朝廷之用所以足者以茶盐之利在朝

廷也在朝廷而以其半供御府以其半助版曹犹云可也至于悉入御府则天下之利源竭矣若夫铸钱之利所谓母权子子权母者其术有可议焉但当养信使民不以废兴之数为疑耳释此弗议而欲聚斂掊克与民争锥刀之利亦可谓不知理财之本矣

理财论下

议者曰邦用之所以匱我知之矣爵禄滥而冗食多耗蠹使然今若罢冗局省吏员一切务为拏斂之计则邦用可以不劳而告足是知其末而不知其本观其小而未观其大也何哉比年以来耗蠹邦用者其源有五一日营缮二曰花石三曰制造四曰力役五曰赐予是五者虚国罢民之本而糜费之大者今为拏斂之计而不敢及此是不务其本而务其末不节于大而节于小其于邦用果能有所补耶易曰甘节吉又曰苦节不可贞中则甘过则苦今一切拏斂不务中制至于太过而苦亦非长久之策也夫官吏之冗固宜有当罢省者然要须清入仕之源而使士大夫不失职则善耳入仕之源素未尝清员多阙少既不足以容之今又一切罢省使数千人皇皇然无所归宿可不为之念虑哉为今之计莫若于营缮花石制造力役赐予糜费之大者裁损罢省清入仕之源使员阙相称而士大夫不失职则庶乎其可也不然犹之一家父兄之所以自奉养者不能节约而日朘削其子弟以给足焉欲家道之肥其得乎此不可以不察也

梁谿集卷一百四十四

卷一百四十五

钦定四库全书

梁谿集卷一百四十五 宋 李纲 撰迂论一

论创业拨乱之主用人

论骨鯁敢言之士 论君臣相知

论君子小人之势 论君子小人之分 论天人之理

论创业拨乱之主用人

古之创业拨乱之主必有一世之英材起而辅翼之卒然相遇于草昧之中非知之难用之为难而能尽其用为尤难也知而不能用于不知同用而不能尽与不用同知其材而能尽用之惟高祖为然高祖因萧何而知韩信设坛场拜以为大将中分麾下之兵使之定三秦虏魏豹擒夏说破赵二十万衆胁燕平齐卒灭项羽岂特信之功哉高祖能尽其用也因魏无知而知陈平以为护军尽护诸将捐黄金四万斤使间楚之君臣不问出入而楚之君臣果以疑疏遂至于亡出六奇计而天下遂定岂特平之智哉高祖能尽其用也至于子房萧曹则高祖素所自知也何守筦龠馈调兵参从征伐攻城略池而子房运筹帷幄之中决胜千里之外谋合志从无不尽其用者彼韩信陈平皆尝从楚以策干羽弗能用也而羽之骨鯁之臣如亚父鍾离昧之徒一为汉所间遂疑远之用而弗能尽也楚汉之所以兴亡虽其故多端而大要在此故高祖置酒雒阳南宫使通侯诸将言已之所以得天下而项氏所以失之者高起王陵言其故而高祖推明子房萧何韩信之功以谓彼皆人杰吾能用之此吾所以取天下也项羽有一范增而不能用此所以为我禽也呜呼若高祖者其可谓知所以取天下之要欤

论骨鯁敢言之士

自古敌国及将为奸乱之臣惟畏骨鯁敢言之士何哉夫所谓骨鯁敢言之士当大变必有非常之谋临大难必有不可夺之节能格其君之非能副其民之望而国之所恃以安此固敌国及将为奸乱之臣之所深畏也楚欲羸师以诱随而惮季梁晋欲假道於虞以伐虢而惮宫之奇陈平为汉谋楚则曰彼项王骨鯁之臣亚父鍾离昧之属不过数人耳能捐数万斤金反间其君臣破楚必矣淮南王安欲谋反独惮汲黯则曰黯好直谏守节死义至说公孙弘大将军如发蒙耳而曹操遗孙权书亦诡辞令取张昭以効赤心张昭者权之重臣好直谏而不屈者也惟明主为能不为间言之所惑听用而崇獎之故随侯闻季梁之言惧而修政楚不敢伐汉武推汲黯为近古社稷之臣不冠不见而淮南寝谋孙权待张昭益厚而魏不敢加兵至虞公项羽则不然此宫之奇去而虞所以为晋禽亚父乞骸而楚所以为汉灭也悲夫

论君臣相知

昔之君臣所以能有所于世必其相知之深而相与之诚如腹心手足之于一身父子兄弟之于一家不事形迹无所疑间忌媚谄愿者不能容其奸然後可以建非常之功而定大业自汉以来高祖视萧何如左右手处子房于帷幄之中光武之于耿邓元帝之于王导太宗之于房杜皆出入卧内委以腹心故能创业中兴光有天下而宪宗得一裴度武宗得一李德裕皆付任不疑以责成功而唐之纪纲号令遂以复振君臣会遇之际顾不重哉齐公之于管仲一则仲父二则仲父而管仲之言亦曰知而不能有害霸也用而以小人间的害霸也先主之于孔明自以谓犹鱼之有水举蜀国以听之而自二十罚以上孔明皆亲不以为专不如是不足以霸诸侯而据一方况其大者乎若夫且用而且疑之来谗贼之口行谮愬之言有所施为则疑曰不然有所荐进则疑曰不可而欲须功业之成譬犹掣肘而求善书紮足而求远至召医师不使之投药石而责以起死之功用梓人不使之抡栋榑而责以无覆压之患盖亦难矣古人有辞三公之位而灌园弃万锺之禄而不顾者彼岂独轻富贵哉诚难于受任故也

论君子小人之势

君子小人如水炭然势不两立常相为胜负而君子之势常不足以胜小人有国者用君子则治安用小人则危乱人主非甚无道未尝不欲进君子而退小人卒之君子常退小人常进治安之世少而危乱之世多其故何哉则操术使之然也君子之操术其自待者重而去就轻于废兴曰有命於得之不得曰有义自非人主卓然有高世之姿其明足以知人其诚足以任人则君子亦将不与世竞退而自乐其道非特如此而已用之治国不委已而从人必使由于吾之规矩準绳之中逆人之所顺而强人之所劣类非中材之主所能堪此所以尤易舍而难合也至于小人则不然其自待者薄不顾礼义廉耻而惟利之为从富贵爵禄决性命以争之故不得于其君则已一得于君则胶固而不可拔盖其操术必有小忠以结其主之知必有秘计以中其主之欲必阿谀顺旨以声色燕安为之饵屈已厚赂以买其主之左右亲昵以知其动静而迎合其意故自中材之主鲜不惑之及其得志则傲然无所忌惮排摈忠良援引党与丰已殖私而视国家之安危存亡如秦人视越人之肥瘠恬不加恤故古之用小人者必至于家国俱败而後已虽至于败而其君犹有念之而弗释者此小人之进所以为有国者之所深戒也姑取汉唐以来用小人之效数事明之元帝信任石显委以政事而显为人巧慧习事能探人主微旨内深贼持诡辩以中伤人忤恨睚眦辄被以危法自知擅权事柄在掌握乃时归诚取一信以为验尝使出外先自白恐後漏尽闭宫门请以诏开门上许之显故投夜还如所言後果有告显专命矫诏开宫门者天子闻而笑之益怜显赏劳尤厚显以故能潜萧望之令自杀而周堪刘更生坐废錡不复进用张猛京房陈咸贾捐之之属皆抵刑戮而与牢梁五鹿充宗结为党友诸附倚者皆得宠位此岂非以小忠结其主之知耶高宗欲立武后许敬宗李义府揣知其旨朝献策而暮进用乃与王德俭袁公瑜侯善业之徒相推毂济其奸诛弃骨鲠大臣如长孙无忌褚遂良郝处俊来济之属皆不免故武后得肆志攘取威柄天子歛衽而国祚移此岂非以秘计中其主之欲邪明皇罢张九龄而相李林甫也林甫善刺上意而养君欲每奏请必先赂遗左右审视微旨以固恩信至饗夫御婢皆所歛厚故天子动静必具得之明皇任之不疑深居燕适沉湎衽席而致天宝之乱林甫死杨国忠继之恃内援与禄山争宠谓其

跋扈不足图故激怒之使必反以取信禄山既叛独哥舒翰将兵二十万守潼关可以控险拒之而国忠疑其反已且诛君侧之恶从中督战翰遂以败及陈元礼之变身死家破虽悔亦无及矣此岂非必至于家国俱败而後已耶德宗奉天之变起于卢杞故泾军之乱呼于市曰不夺而商人僦质矣不税而间架除陌矣其召怨挺乱皆杞为之既狩奉天姜公辅请挟朱泚以行杞以百口保其不反而泚果为泾军所立浑瑊请道乾陵掎角以破贼杞以谓惊动陵寝请道汉谷而贼果拒隘不得进六师几殆李怀光自河北赴难数破贼杞惧其见帝斥已即谪奏曰怀光勲在社稷贼憚之破胆若许来朝则犒赐留连失事机不如席胜使平京师破竹势也德宗然之诏无朝怀光怏怏无所发遂谋反其後虽斥而德宗念之不衰尝语李泌曰世谓卢杞奸邪朕独不知何也泌对曰天下皆知其奸邪而陛下独不知乃所以为奸邪也此岂非虽至于败而其君犹有念之而弗释者邪呜呼小人之情状多矣惟人主澹然无欲而明足以察之使小人无所施其巧庶几乎君子可进而治安可期也诗曰譬彼飞虫时亦弋获易曰大君有命开国承家小人勿用有国家者可不深戒之哉

论君子小人之分

君子小人之分义与利公与私而已夫谋身之智周则爱君之仁薄虑国之计至则保身之术是二者不可得而兼也韩非曰自营为私背私为公惟君子为能胜己之私而公生明故所见皆远者大者惟其所在与天下国家同其休戚虽无心于谋身而身常安所谓非以其无私邪故能成其私者也有至于蹈祸则其不幸然也小人之智不过于自营而私生暗故所见皆小者近者惟利于己之为从虽区区欲保其身而常至于不可保所谓泛乎其知利而不知其害者也有得以苟免则其幸然也故有国家者君子常欲其在内而小人常欲其在外君子可以处腹心而小人可以备役使苟倒置之则必至于败亡者非其材智之不足心术使之然也赵高之于秦也不可谓无材智其为己之谋至矣不知二世亡而族亦诛虞世基之于隋也亦不可谓无材智其为己之谋至矣不知炀帝亡而族亦不免于祸杨国忠之智非不足知禄山之叛而哥舒翰之兵出关必败卢杞之智非不足以知朱泚之变而李怀光之不许朝必反然且故激之使然者其意以谓哥舒之败怀光之反祸虽在国而未及于己使哥舒反旆以诛君侧之恶怀光见君而斥朝政之失则已且受其害故安为之而不知其终不能以自免也推此则小人之用心亦可见矣善乎范祖禹之论曰所谓小人者利于己而不利于人则为之害于国而不害于家则为之曾不知不利于人亦将不利于己害于国亦将害于家故古之用小人者必至于家国俱亡而後已其真知言欤

论天人之理

天人之理一也人事尽至于无可奈何然後可以归之于天譬犹农夫之治田耕耘之功既至而遇水旱乃可曰天实饥之也医师之治病药石之功既至而犹不起乃可曰天实死之也今未尝力耕耘而望岁于天未尝投药石而责命于天其可乎古之君子以在天者不可知而尽其在人者故立人之朝卒然遇非常之变故及察事理之将然必力争而救止之虽得罪至於蹈死而不悔其意以谓吾知尽夫人事而已幸而时君听之可以转危亡而为安存庸詎知人之非天也不幸而不听至于得罪而死然後可以归之于无可奈何曰天也非人之所能为也

君子亦无憾焉方西汉之末天将以王氏间汉故使以外戚辅政而假之权其梓柱生枝叶扶之祥与夫汉二百年当再受命知数者类能言之岂非天哉然而王氏在位刘向上疏反覆指明其言痛切发于至诚虽结怨而不恤其後京兆尹王章因日食之变奏封事极论王凤遂死狱中更哀平之世而王莽因以篡汉方李唐之初天将以武氏间唐故使之蓄于宫中而为之兆其秘之所载李淳风尝言于太宗而滥李君羨之诛岂非天哉然而武后之立褚遂良叩头流涕力争长孙无忌郝处俊之属和之皆坐窜徙其後上官仪因高宗之怒复深论之将使之草废诏而不果竟以斥死中宗既废而武后因以革唐向使成帝感悟刘向王章之言抑退外戚而进用宗室必无王莽篡弑之祸高宗感悟褚遂良上官仪之言不立后虽已立而废之必无武氏革命之事言虽切至于得罪以死而卒不能止者天也数子者其言如此虽死而不悔者不以天废人也君子以谓知所守焉今不尽人事而一切归于天曰时数当尔天实使然闻数子之言则笑之曰是将以一簣而障江河之溃以一木而支大厦之倾多见其不知量也是果足以知天人之理哉悲夫此後世之所以人事每每不修而悉委之于天也欲无危乱得乎

梁谿集卷一百四十五

卷一百四十六

钦定四库全书

梁谿集卷一百四十六 宋 李纲 撰迂论二

论大将之才 论兵机

论英雄相忌 论共患难之臣

论裴行俭李晟行师 论社稷功臣

论郭子仪浑瑊推诚待敌

论创业中兴之主

论大将之才

将才之难非谓偏裨鬪将之难也而大将为尤难所谓大将者必其恩威足以信服其士卒而智虑足以料敌而制胜不规小利不求近功而深谋远略足以戡乱而御侮此固存亡安危之所系而国之所恃以为命者也古之命大将者必斋戒而设坛场礼之如是其重也命曰阃外之事不从中御任之如是其专也重其礼专其任而责成功故小可以保一国大可以取天下以制夷狄以定祸难未有不在大将者诎可忽哉方战国时齐有穰苴田忌吴有孙武魏有吴起赵有李牧廉颇燕有乐毅秦有白起王翦蒙骜之属皆大将也握其国之兵柄威名震于邻国而秦最强故能卒并诸侯而有天下汉兴亡秦毙楚其从攻伐之将亦多矣独韩信足以当大将之任故萧何力荐之而高祖亦称连百万之师战必胜攻必取惟信为然黥彭之徒不与也其後七国之变则有若周亚夫毅然有大将之节至孝武征匈奴则有若卫青霍去病孝宣讨西羌则有若赵充国冯奉世皆能宣国威灵猎取夷狄如禽兽然光武中兴爪牙之臣称二十八将而着方面之勲如邓禹耿弇冯异岑彭者不过数人太宗削平僭乱猛将如云惟李靖李积号为大将动无遗策至天宝禄山之乱则有若李光弼郭子仪奉天朱泚之变则有若李晟马燧浑瑊皆能勤劳王家扫除氛祲光复宗祏亦其选也是知帝王创业中兴威不若康不父非得杰材以任大将安能底艰难之业以有此武功哉国初如曹彬曹翰潘美王全斌其後有狄青曹玮种谔之徒皆足以为大将之选而自宣和以来夷狄之祸亦云酷矣可以当大将之任如种师道者凋丧略尽见存诸将仅足以充偏裨之选中间博询遴选擢于小官才得一二不旋踵而以寸纸罢之待将帅若是其轻也迄今未闻有建大将旗鼓可以副天下之望者事日益难人材日益乏而不早留意于此可胜慨哉

论兵机

国之存亡在兵兵之胜负在机机者时事适然之会而安危强弱之本也得其机则危可安而弱可强失其机则安必危而强必弱惟明足以见之而断足以行之者为能不失机会而一失机会则其国遂有至于危弱而不可复振者势使之然也方曹操袁绍之相拒于官渡也绍兵强盛军资有余操兵少而粮乏将退师荀彧曰不可此天下之大机也操从其言遂破绍而定河北其後既得荆州败刘备于巴丘矣使操屯兵江陵据上流以临吴会持久经略则孙权不得不服而刘备亦将无所容其身操欲乘胜以取之率兵数十万水陆并进江表震恐虽张昭之徒亦劝权以迎操独周瑜鲁肃以为不然会诸葛孔明至亦曰操兵远来所谓强弩之末不能穿鲁缟者也诚能协规同力以破操则荆吴之势强而鼎足之形成矣成败之机在于今日遂合兵以拒操于赤壁乘风纵火焚其舟楫一战破之而三国之势立然则所谓机者国之存亡所系其可失乎非见微者不可与机而机会之来间不容髮固非衆人之所能识也操方有事于袁绍备劝刘表使乘虚以袭许昌表不能用其後悔之备曰今天下分裂日寻干戈事会之来岂有终极乎若能应之于後者则此未足为恨也若备者真可与机者哉

论英雄相忌

曹操谓刘备曰今天下英雄惟使君与操耳本初之徒不足数也备方食为之失匕箸其後操闻孙权以荆州假备方作书为之落笔于地备又尝与权论周瑜曰公瑾文武筹略万人之英顾其器量广大恐不久为人臣耳而周瑜亦上疏於权曰备以梟雄之姿而有羽飞熊虎之将必非久屈为人用者割土地以资助之恐蛟龙得云雨终非池中物也英雄之相忌如此备虽寬仁得士心而屡战多败然天下皆以英雄许之操亦谓之人杰转侧扰攘之间屡危而脱操使之邀表术权委之牧荆州皆既遣而後悔卒能有巴蜀与操权抗衡此殆天命非独人力使之然也

论共患难之臣

句践以甲楯三千栖于会稽用范蠡大夫种之策行成于吴而卒报之越既灭吴范蠡泛五湖而遗书大夫种曰越王之为人长颈而乌喙可与共患难不可同安乐弗去且受祸种不用其言句践果杀之其後高祖既灭楚而韩信彭越黥布之徒皆就戮故有飞鸟尽良弓藏狡兔死走狗烹之喻嗟乎使可与共患难至于功已成而後有藏弓烹狗之喻亦何为而不可惟其处患难之中亦未必能共之此夫差之赐子胥以属镂而项羽之疑范增至于疽发背以死二臣死而国亦亡所以深可悲也夫

论裴行俭李晟行师

裴行俭出师暮已立营塹壕既周行俭更命徙高冈吏曰士安堵不可扰不听促徙之比夜风雨暴至前占营所水深丈余衆莫不骇叹问何以知之行俭曰自今第如我节制毋问我所以知也李晟之屯渭桥也荧惑守岁久乃退府中皆贺曰荧惑退国家之利速用兵者胜晟曰天子暴露人臣当力死勤难安知天道邪夫营塹地卑则水所鍾使无风雨则已万一有之必致沉溺之虞此行俭所以必徙而适与风雨会其曰无问我所以知者可谓能假天道以行其令

矣天道远而五星盈缩不常故晟惧复守岁则我军不战而自屈其曰人臣当力死勤难安知天道者可谓能尽人事以致其节矣此固衆人之所弗及也大将之术当如此

论社稷臣功臣

周勃亲入北军诛诸吕迎立文帝汉室以安而袁盎与文帝论其为人盎曰绛侯所谓功臣非社稷臣汲黯徒以质直好谏犯主之颜色而武帝与严助论其为人帝曰古有社稷之臣至如汲黯近之矣夫社稷臣主在与在亡与亡方诸吕用事擅相王刘氏不絶如带绛侯本兵柄弗能正其後大臣相与共诛之而适会其成功汲黯面折廷争所守者正毅然有不可夺之节至淮南王欲谋变独惮黯不敢发以谓说公孙弘辈如发蒙耳此固袁盎所以称勃为功臣而武帝所以称黯为近古社稷之臣也以勃为功臣则知陈平之亦功臣也以黯为近古社稷臣则知王陵之亦近古社稷臣也方高后欲立诸吕为王问右丞相陵陵曰高皇帝刑白马而盟非刘氏而王者天下共击之今王吕氏非约也使平勃等协力同辞以拒之则高后知有所惮必不敢王诸吕徐以策图之刘氏何患乎不安而平勃阿高后意皆曰高帝定天下王子弟今太后称制欲王昆弟无所不可者陵既废而诸吕皆王擅权握兵几乱天下其後高后崩平勃谋诛之至使酈寄给吕禄而与之游矫节入北军使士皆左右袒以观其所向亦可谓危矣曷若絶之于早之为愈也故袁盎谓勃适会其成功而王陵之节宜与汲黯同固不待事成而後见也唐高宗将立武昭仪为后褚遂良长孙无忌皆固执以为不可帝以问李积曰将立昭仪而顾命之臣皆以为不可令止矣积阿帝意答曰此陛下家事无须问外人帝意遂定无忌遂良逐而武后立其後唐祚几移然则无忌遂良固社稷臣而积之奸岂非杖平勃之说哉或谓平勃从吕后而卒安刘氏与狄仁杰从武后而卒正唐室异世而同科此不然平勃亲与高帝之盟当诸吕术王时可止而不止其後乃以计灭之仁杰晚相武后以至诚感悟后意遂返中宗仁杰其为优欤

论郭子仪浑瑊推诚待敌

仆固怀恩诱吐蕃回纥数十万入寇郭子仪单骑见回纥于泾阳复修旧好遂破吐蕃于灵台唐室以安而马燧信吐蕃尚结赞之辞为之请盟于朝德宗命浑瑊会盟平凉而虜刼盟瑊仅以身免官属皆陷二者皆出于至诚而成败之势异何也子仪之智足以料敌而燧瑊不然故也夫子仪威信素为回纥所畏服怀恩以其死给之故相与入寇及闻子仪之存固已愕哈而悔来矣当是时子仪之兵才万人而虜衆数十倍力不敌非示以至诚不足以弭祸故子仪因其愿见从数十骑免胄而见之且与之饮食结旧欢回纥感动遂合力以击吐蕃以有灵台之功此非特至诚足以压之而智足以料之也彼尚结赞者其计以谓唐之名臣特李晟与燧瑊耳不去之必且为吾患故纵反间以动晟甘辞厚币因燧请盟以刼瑊而燧不以为疑盖燧徒知其能以至诚得徐守光而不知结赞之为诈故决信之若瑊者但以奉诏为恭而不能料虜之可否是皆诚有余而智不足独李晟谓虜不可盟德宗弗用也既而三帅皆罢如结赞策自古智不足以料夷狄而一以诚待之未有不为害者也

论创业中兴之主

自古创业中兴之主必有包举天下之度运动天下之材其识虑规模英伟宏远然後股肱心腹之臣得展尽底蘊因而翼之以成其功盖与继体守文之君一切资于辅相者不同高祖由布衣仗三尺劒破秦而与项籍争衡方其就封汉中也萧何追韩信之亡而荐之其言曰王欲长王汉中无所事信必欲争天下非信无可与计事者顾策安决高祖曰吾亦欲东耳安能郁郁久居此乎遂以信为大将还定三秦与楚战于荥阳成臯京索间高祖军败脱身跳者屡矣而志不衰下马踞鞍问张良曰吾欲捐关已东弃之谁可与共功者良言九江王布彭越韩信捐之此三人楚可破也高祖用其策卒破楚垓下其後陈豨黥布反高祖皆亲将以讨之天下既定命萧何次律令韩信申军法张苍定章程叔孙通制礼仪其识虑规模不亦英伟宏远欤光武由宗室起南阳亲破寻邑百万之衆既持节渡河崎岖燕赵之间屡困而志益厉攻拔乐阳舍城楼上披舆地图与群臣论所以定天下者其後征赤眉铜马之属皆身临行阵间破而降之既围隗于天水勅岑彭曰两城若下便可将兵南击蜀虏人苦不知足既平陇复望蜀後竟禽公孙述而天下遂定自陇蜀平知天下凋耗不复议兵总揽权纲明慎政体退功臣进文吏量时度力举无过事而海内治其识虑规模不亦英伟宏远欤唐李翱常怪神尧太宗以一旅取天下而後世子孙不能以天下取河北及其甚也内为奸邪阉宦之所制外为强臣藩镇之所逼号令不出国门而卒至于亡此非独势之凌迟亦其不才使之然也犹之父祖起家广置田宅以遗子孙而子孙不才不足以守之昏于酒色惑于仆隶而良田美宅皆为有力者攘取而不知也饥寒逼于已而後知之盖亦晚矣可胜叹哉

梁谿集卷一百四十六

卷一百四十七

钦定四库全书

梁谿集卷一百四十七 宋 李纲 撰迂论三

论天下之势如奕棋 论李广程不识为将论主之明暗在赏刑 论元帝肃宗中兴

论志 论封建郡县

论方镇

论天下之势如奕棋

凡定天下者如奕棋之取势得势而奄有局中者多胜失势而求生边隅者多败善任人者如奕棋之置子夫置子不定不足以胜敌而况于任人乎楚汉之相拒于荥阳成臯之间也高祖虽屡败而莫肯先退其後既割鸿沟羽引而南汉军乘之而楚遂亡曹操袁绍之相拒於官渡也操虽兵少粮乏而莫肯先退其後焚绍辎重绍引而北操军乘之而河北遂定故若高祖曹操者可谓能取势者也高祖用子房萧何韩信皆人杰而项羽有一范增不能用也曹操用荀彧张辽之徒谋无遗策而袁绍有一田丰卒愍而杀之故若高祖曹操者可谓能置子者也观四方之形势於一枰之上任人材之智巧于枯棋之间而天下不难定矣

论李广程不识为将

李广程不识之为将如陈遵张竦之为人李广行无部曲行陈就善水草顿舍人人自便不击刁斗自卫幕府省文书然亦远斥候未尝遇害程不识正部曲行伍营阵击刁斗吏治军簿至明军不得自便不识曰李将军极简易然虏卒犯之无以禁而士亦佚乐为之死我军虽烦扰虏亦不得犯是时汉边郡程李俱为名将然程不识之治军兵家之常道也张竦博学通达以廉俭自守而陈遵放纵不拘操行虽异然相亲友遵谓竦曰足下讽诵经书苦身自约不敢蹉跌而我放意自恣浮湛俗间官爵功名不减于子而差独乐顾不优邪竦曰人各有性长短自裁子欲为我亦不能吾而效子亦败矣虽然学我者易持效子者难将是时遵竦俱以列侯为郡守名重一时然竦之行已士君子之常道也马援征交趾以书诫其兄子曰龙伯高敦厚周慎口无择言谦约节俭廉公有威吾爱之重之愿汝曹效之杜季良豪侠好义忧人之忧乐人之乐清浊无所失吾爱之重之不愿汝曹效之效伯高不得犹为谨勅之士所谓刻鹄不成尚类鹜者也效季良不得陷为天下轻薄子所谓画虎不成反类狗者也吾于程李之为将陈侯之为人亦云

论主之明暗在赏刑

主之明暗国之兴亡观其赏刑则知之矣敬脱挽辂说高祖以都关中即封以为奉春君其後欲击匈奴遣使覘之匈奴匿其壮士肥牛马徒见老弱羸畜使者十辈皆言易击复使敬往还报曰两国相击此宜夸矜见所长今往见羸弱此必欲伏奇以争利不可击也高祖以为沮军械系广武果有平城之围七日而後得解乃赦敬曰吾不用公言以困平城已斩先使十辈言可击者矣封敬二千户号建信侯客有韩生者亦说项羽以都关中羽不能用一言不逊即斩之赏刑如此然则汉安得不兴而羽安得不亡也曹操征乌丸羣臣谏之不从引军出卢龙塞道不通堑山堙谷五百余里遂克之既还问前谏者厚赏之曰孤乘危以傲幸虽得之不可为常诸君之谏万安之计也是以相赏後勿难言而袁绍之南攻田丰说之曰曹操善用兵虽少未可轻也不若以久持之今决胜败于一战若不如志悔无及矣不从丰恳谏绍以为沮衆械系之绍军既败谓左右曰吾不用田丰言果为所笑诸人闻吾败当相哀惟田别驾当幸其言之中也遂杀之赏刑如此然则操安得不兴而绍安得不亡也苏轼有言为明主谋而不中不惟无罪乃有赏为庸主谋而中赏固不可得而祸随之吾今乃知孟德本初所以兴亡者真知言欤

论元帝肃宗中兴

晋自惠帝以来主昏于上政乱于下藩王拥权日相诛讨而王衍之流以清谈废事虚旷无心名重海内风俗大坏荡无纲纪于是刘元海聪曜石勒之徒锋起颺举陷河洛覆关辅而二帝沈于虏廷唐自开元末明皇倦于机务酣适燕安内蛊嬖艳外委奸孽而林甫国忠相继秉政挺乱产祸妬贤嫉能固宠保身不复为国家虑于是禄山思明踵为叛乱陷河朔覆两都而乘輿蒙尘于蜀此二者皆夷狄包藏祸心乘间窃发以为中国难犹之一身暴得剧疾而不可支则必怙康强蔑调护耽嗜慾致耗乏故邪气得以乘虚深入而以疾作之日为受病之始岂理也哉然五季之乱神州天府鞠为寇盗之区虽忠臣志士发愤经略卒不能复则以元帝兴于江左故也安史乱唐盗据神器贼势鸱张而不数年间王师克复凶徒逆俦扫殄几尽则以肃宗治兵于灵武故也夫东南卑远其兵剽轻而元帝由琅琊闻晋难渡江王导诸人相与定君臣之分持弱扶颠百度草创纠合诸镇协智毕力以抗勅敌仅能保守一隅虽有刘琨祖逖驱驰中原志卒不遂其後温裕因时电发复洛阳取关中竟亦不能守也朔方形胜之地士马精强而肃宗起于灵武有郭子仪李光弼为之将帅张巡许远守睢阳以扼江淮之冲其余方镇之兵起而讨贼者不可胜数遂能翦鲸鲵复故都以定天下则虽天时人事不同亦其所处之势使然东晋以区区踈属起江表披荆棘立朝廷有王导以为腹心有顾荣贺循纪瞻以从人望有郗鉴陶侃温峤之属以处方镇保绥东南扞御西北其後苻坚以百万之师入寇而谢安区处将帅以偏师破之晋之享国百有余年自今观之亦未易可轻也

论志

古之有天下国家者其立事建功必有志以居其先故书曰功崇惟志传曰有志于上犹止于中有志于中下焉而已而况无其志者乎图尧舜之事而不能至者汤武是也图汤武之事而不能至者五霸是也图五霸之事而不能至者六国是也定六国之规欲安守之而不能至者亡六国是也故有其志而不能至者有矣未有无其志而能至者也善用志者必为之规模而

其规模之大小如其志之广狭事功之成亦如其规模譬犹大匠之作室堂奥庭庑櫨题栋榑高下修短皆已先定于胸次岂待操斧斤而後议哉韩信说高祖因思归之士还定三秦任天下之武勇以城邑封功臣则项羽之强易弱其後破楚如信言耿弇说光武起上谷渔阳兵以定邯鄲又请益发幽州精兵以集大计而定天下其後既破张步光武劳之曰将军前在南阳建此大策常以为落落难合有志者事竟成也诸葛孔明说蜀先主取荆益以江东为援而御曹操则鼎足之势可成後卒如其策由是观之抗大敌建大事而志不立规模不先定者未有能成功者也

论封建郡县

封建尚矣至秦罢侯置守易以郡县之制而西汉因之颇封子弟功臣使郡国相杂其後诸侯王之国除而卒归于郡县自东汉至今未之有改也夫封建郡县各有所长而又皆不免乎有弊较其优劣则封建为优何以言之并建亲贤以为藩屏大小相维尊卑相制资其犬牙盘石之势以安王室其有不贡不王则牧伯得以征之此封建之所长也至其弊则强侵弱大并小僭礼乐擅征伐天子不得以制之而王室陵夷有蚕食之患举千里之郡而命之守举百里之县而付之令又有部刺史从而督察之片纸可罢一言可令而无尾大不掉之患尺地一民财赋甲兵皆归之于天子此郡县之所长也至其弊则势分而力弱权轻而吏偷内有乱臣贼子之祸弗能正外有夷狄盗贼之虞弗能支而天下震动有土崩之势夫封建郡县皆所以疆理天下为治之具也而非所以为治之道也御得其道则封建郡县皆可安御失其道则封建郡县皆不能无弊而就其弊之轻重言之则封建优于郡县何则蚕食之祸迟而土崩之祸大也三代之王皆以封建享国长久虽至于衰微犹使强国熟视不敢遽取之而夷狄盗贼之患自周以前未闻能大扰天下盖诸侯各治其国力足以扞患而御侮也郡县则不然陈胜吴广一呼而天下响应刘项因之遂以亡秦而汉有莽卓之祸郡县不能正也至唐安祿山史思明叛于燕鼓行而南河朔二十四郡一旦俱陷倾覆两都如入无人之境其後黄巢起于岭表秦宗权起于淮蔡为封豕长蛇天下无不被其毒者而郡县不能制也夫夷狄盗贼之患三代非无然不至如此之甚而秦汉以来有之则封建之于天下优于郡县明矣易曰天造草昧宜建侯而不寧盖封建宜于草昧艰难之时而郡县宜于承平无事之日非变而通之不足以救其弊今夷狄之祸甚于安史盗贼蜂起不减黄秦而郡县尚仍承平无事之制其何以御之意者稍仿封建有以更张而变通之然後可乎夫变通之术安在曰在方镇方镇者全封建郡县而为之者也于古有稽于今可行救今日之弊舍此亦无术矣

论方镇

唐制方镇节度使之兵其始起于边将之屯防者大曰军小曰守捉曰城曰镇而总之者曰道军城镇守捉皆有使而道有大将一人曰大总管已而更曰大都督至太宗时行军征讨曰大总管在其本道曰大都督自高宗永徽後始谓之节度使接乎开元而朔方陇右河东河西平卢范阳劔南岭南诸镇皆置之天宝末祿山思明继反中国大乱而郭子仪李光弼诸节度之兵讨平之大盗既灭武夫以功起行阵者皆除节度由是方镇相望于内地代宗时吐蕃犯京师德宗时朱泚乱变阙下其後李希烈以汴叛李怀光以河中叛吴元济以淮西叛刘辟以蜀

叛李錡以浙西叛刘稹以太原叛而僖昭之间黄巢秦宗权以盗贼扰天下皆赖方镇相与犄角以定其乱则方镇之兵不得谓无功于唐然肃宗既平安史君臣幸安瓜分魏博镇冀卢龙之地授三叛将而朝廷遂失河北其後德宗经朱泚之变厌用兵益务姑息不复谁何故方镇兵骄则逐帅帅强则叛上或父死子握其兵而不肯代或取舍由于士卒以邀命于朝而天子一切屈已以从之至宪宗任裴度武宗任德裕制以权谋讨以威武而叛者诛锄服者惠来唐之号令几于复振下迨僖昭之间唐室微矣巨寇颺起而当时处方镇者又皆盗贼之靡则唐之所以陵夷而卒至于亡者授任失宜而姑息之政积习之势使之然也国家监唐之弊削方镇之权郡县一委以文吏非沿边诸帅不以兵柄假之余路虽督府亦宿兵不多而祖宗德泽浹于四方无大盗贼恩信结于四夷无大征战故能承平累洽天下无事者百有七十余载戴白之老不识金革可谓盛矣然而一旦金敌长驱中原边帅不能抗而腹心郡县兵力弗支类皆望风遁逃奔溃既破京师迁二圣卷六宫而北之矣陷两河扰关中蹂践京东西其势駸駸南来未已所在盗贼乘间窃发者往往皆是而郡县但仍承平无事之制偷取苟安恬不加恤不知何以御之夫唐之方镇其弊也有尾大不掉之患今之郡县其弊也手足不足以扞头目事迫矣其亦取方镇之制变通损益以行之使有方镇之利而无其害庶几协智合力以扞大患救今日之弊乎若夫尾大不掉则非今之所虑也事定然後徐图之可也

卷一百四十八

钦定四库全书

梁谿集卷一百四十八 宋 李纲 撰迂论四

论兵 论帅才

论非常之功 论宰相

论三国之势

论诸葛孔明六事与今日同

论兵

古之有国者戡乱定功未尝不以兵汤武之所以王齐晋之所以霸皆以德为主而以兵辅之自战国秦汉以来兵尤重其国之兴衰视其兵之强弱与其措置之术如何耳然古者兵农不分无养兵之费而有用兵之实至唐兵制凡三变其初府卫之制最为近古府卫之法坏变而为彍骑彍骑之法坏变而为方镇之兵至五季始尽黥以为卒伍而兵农之分不可复合乃有养兵之患国家建都于汴无高山大河之阻其势不得不以兵为强故天下重兵悉屯于京畿更戍边郡以虎符出纳其分布诸路有隶将兵有不隶将兵当熙丰盛时合中外禁卒凡九十五万人而土兵厢兵不在数焉自熙丰至宣和间禁军阙而不补者大半而崇观以来有事於西夏南平方贼北取燕山其所逃亡陷没者又半之而靖康间金人再犯阙其溃败损折者又不可胜数也建炎初勤王之师萃于京畿者三十余万其大半皆民兵而朝廷不复抡择留屯要害之地悉罢遣之其後建言乞募兵于河北关中京东西合十余万更番以卫行在既遣使矣言者谓不患无兵不当募遂罢今西北既复为金人之所蹂践而东南之人类多孱弱未知于何所取兵而可也既稍复方镇之制莫若使之募兵以备出战将校偏裨皆预选任以时训练之又团结民兵以备守御乡村坊郭各随其宜剗刷官田如户絶天荒屯田之类以养民兵之可以出战者如弓箭刀弩手之法明其劝沮假以岁月庶几足兵然其要在于择帅臣以总之帅臣得人则法不患乎不明兵不患乎不足唐马燧之镇太原也承鲍防之败兵力衰单燧募厮役得数千人悉补骑士教之战数月成精卒造铠必长短三制称士所衣以便进趋为战车冒以狻猊象列戟于後行以戟兵止以为阵遇险则制冲冒器用完銳居一年辟广场罗兵三万以肄威震北方李抱真之镇泽潞也乘战伐役赋重人困军伍凋刈乃籍户三丁择一蠲其徭租给弓矢令闲月得曹偶习射岁终大校亲按籍第能否赏责比三年皆为精兵举所得成卒二万不廩于官而府库实缮甲淬兵遂山东天下称昭义步兵为诸军冠而李德裕之帅蜀也当南诏入寇之後蹂践千里荡无孑遗瘢痍尚新非痛矫革不能刷一方耻乃料择州兵之任战者废遣犴耄什三四又请甲人于安定弓人河中弩人浙西繇是蜀之器械犀利率户二十取一人使习战贷勿事缓则农急则战谓之雄边子弟其精兵曰南燕保义保惠两河

慕义左右连弩骑士曰飞星鹜击奇锋流电霆声突骑总十一军而威声隐然震于西南由是观之择帅得人兵不难足但当假以权柄宽其御勒使得尽心而已或谓方镇增募兵之数则养兵之费何以给之殊不知国家屯重兵于畿甸故岁漕东南六百万斛及四方钱帛于京师州郡租赋仅足以办上供犹有不足者今畿甸之兵寡矣而方镇之兵稍增正当量养兵之费损上供之数以给之胡为而不可事固有当因时而变通者正谓此也若夫团结民兵人见巡社之法不可行遂以谓民兵之不可用此大不然巡社之法可行于西北不可行于东南正当斟酌其宜使民乐于从命耳

论帅材

人材之难而帅材为尤难也夫天下非无材因事而后显故有天宝之变而后郭李之功昭有奉天之难而后晟燧之节着今朝廷可谓多故矣而未闻卓然称良帅者岂循资格而不足以得其人欤将拘法制而不足以尽其用欤昔之将帅或奋于奴隶或出于行伍皆能因时以成名而今之士大夫间乃未见何也李牧之为赵将居边军市之租皆自用飧士赏赐决于外不从中覆也委任而责成功故牧乃得尽其智能选车千三百乘骑万三千足百金之士十万以北逐单于西抑强秦南支韩魏当是时赵几伯然则付之以重任而以法制拘之使不得骋欲其有非常之功不可得也诚能略资格而取实效宽法制而责成功将帅之材出矣

论非常之功

有非常之人则有非常之功非常者固常之人所不能与也昔者鲍叔牙荐管仲于桓公曰必欲治国家而伯诸侯非管仲不可于是束缚而取之鲁至则三沐而三薰之飧于庙而问之政管仲乃为陈所以治国而寓兵者行之数年九合诸侯而桓公以伯萧何荐韩信于高祖曰信国士无双如欲长王汉中无所事信必欲争天下非信无可与计事者于是设坛场择日而拜之以为大将信乃为陈所以还定三秦以弱项羽之强者用其策卒破楚而高祖遂有天下太宗之为秦王也府属多外迁王患之房玄龄曰去者虽多不足吝杜如晦王佐材也若终守藩无所事如晦必欲经营四方舍如晦无与共功者因表留幕府从征伐常参帷幄之谋每议事帝所玄龄善谋而如晦长于断二人同心协济太宗多用其策卒定祸乱而身致太平蜀先主之寓襄阳也访世事于司马德操德操曰儒生俗士岂识时务识时务者在乎俊杰此间自有伏龙凤雏而徐庶亦曰诸葛孔明卧龙也将军宜枉驾见之先主三顾之于草庐之中亮乃劝先主取荆益结吴为援以御曹公先主用其策卒定巴蜀而成鼎峙之势由是观之方艰难时非有卓犖不群之材乌足与论非常之功哉

论宰相

宰相以道事君者也故以固宠谋身为深戒以荐进人材为职者也故以妬贤嫉能为最忌孔子曰所谓大臣者以道事君不可则止又曰苟患失之无所不至夫宰相佐天子以治天下一物不得其所乱之阶也操规矩绳墨陈于前而君不能用则当去苟有患失之心则阿谀取容妄作生事亦无所不至矣传曰人主之职论一相一相之职论百官又曰使卿大夫各任其职

夫宰相佐天子理陰阳顺四时下遂万物之宜外镇抚四夷内亲附百姓一夫不获自尽则罔与成厥功进贤使能持衆美而效之君乃为善苟有嫉妬之心则高材美器悉摈弃之失职者多矣李林甫之相明皇也善刺上意而养君欲每奏请必先饷遗左右密伺微旨以固恩信以故当国几二十年开元中大臣多由节度使相天子林甫请用蕃将主边则夷狄可灭利其虏也无入相之资以久已权故安禄山则专三道劲兵卒荡覆天下而王室遂微卢杞之相德宗也率衆哀歛以中帝欲恨悻之声满天下及泾帅乱呼于市曰不夺而商人僦质矣不税而间架除陌矣其倡和造作召怨挺乱皆杞为之朱泚围奉天李怀光赴难泚解去杞惧其见帝斥已短即谄奏曰怀光勲在宗社贼憚之破胆若许来朝则犒赐留连失机会不如席胜使平京师破竹之势也帝然之诏无朝怀光怏怏遂叛帝跳幸梁由是观之宰相固宠谋身其祸至于如此岂非深戒哉林甫性陰密面柔令若可亲近崖穽深阻卒不可得公卿不由其门而进必被罪时相若张九龄李适之皆遭逐帝尝御勤政楼见兵部侍郎卢绚按轡絶道去爱其蕴籍称美之林甫即谄令请老遂坐废于时有以材誉闻者皆能得於天子抑远之以故在位恩宠莫比杞险贼陰狡贤者媚能者忌小忤已不致死地不止顔真卿挺正敢言杞恶之即令宣慰李希烈竟为贼害故宰相李揆有雅望畏复用遣为吐蕃会盟使卒于行帝出奉天崔宁自贼中来以播迁事指杞即诬杀之矫谄害物虽国屯主辱犹警言自肆由是观之宰相妬贤嫉能其害至于如此岂非最忌哉明皇在蜀与裴士淹评宰相至林甫曰是子妬贤嫉能举无比者士淹因曰陛下诚知之何任之久邪帝默不应德宗尝从容语李泌曰卢杞敢言人皆指为奸邪而朕不觉何也泌曰陛下能觉杞之恶安致建中祸邪李揆和蕃真卿使希烈其害旧德多矣天下皆以为奸邪而陛下独不知此乃所以为奸邪也呜呼其真知言欤

论三国之势

曹操之材智胜权备而其臣不及吴蜀力适相当故三国之势鼎峙而足以相抗观操奇谄多数善用兵因敌制胜变化如神每战必克挟天子而令诸侯形顺势便故能亡袁术于淮南诛吕布于下邳破袁绍于官渡进讨乌桓擒馘谭尚北方悉定无後顾之忧乃取荆州以临江汉降张鲁走超遂而关陇平其规略亦宏矣而权藉父兄之资仅足以守江表屡攻合肥师卒无成况能长驱远驾窥中原哉备因败亡奔北之余假荆州之地资刘璋暗弱以取巴蜀崎岖山谷间虽慨然有兴复汉室之志师徒屡动曾无尺寸之功故曰操之材智优于权备然而吴有张昭以为骨鲠有周瑜鲁肃吕蒙以为翼羽有甘宁凌统程普黄盖之徒以为爪牙蜀有孔明以为谋主羽飞云忠以为将帅皆万人敌也而操有一荀文若後竟杀之张辽程昱徐晃之流不过数人余皆碌碌无闻故每征伐操必亲履行阵间此其臣所以不及吴蜀而力适相当也不然以操之雄武其定江表巴蜀奚难哉操走赤壁尝曰备亦吾俦但见事少晚又尝临广陵以望吴军叹其整肃曰生子当如孙仲谋刘景升儿子乃豚犬耳英雄所以相服者固自有道邪

论诸葛亮孔明六事与今日同

诸葛亮孔明既定蜀将有事于中原乃先南征既禽孟获南中悉平上疏出师屯沔阳攻祁山三郡相应关中响震于是有街亭之战马谡败而戮之将复出师又上疏条陈利害其略曰先帝

慮漢賊不兩立王業不偏安故托臣以討賊也以先帝之明量臣之才故知臣伐賊才弱敵強然不伐賊王業亦亡惟坐待亡孰與伐之是故托臣而弗疑也臣惟北征宜先入南故五月渡瀘深入不毛臣非不自惜也顧王業不可得偏全于蜀都故冒危難以奉先帝之遺意也而議者謂為非計謹陳其事如左高帝明并日月謀臣淵深然涉險被創危然後安今陛下未及高帝謀臣不如良平而欲以長計取勝坐定天下此臣之未解一也劉繇王朗各據州郡論安言計動引聖人群疑衆難今歲不戰明年不征使孫策坐大遂并江東此臣之未解二也曹操智計殊絕于人其用兵也髣髴孫吳然困于南陽險于烏巢危于祁連偏于黎陽几敗北山殆死潼關然後偽定一時耳況臣才弱而欲以不危定之此臣之未解三也曹操五攻昌霸不下四越巢湖不成任用李服而李服圖之委夏侯而夏侯敗亡先帝每稱操為能猶有此失況臣弩下何能必勝此臣之未解四也自臣到漢中中間葦年耳然喪趙雲楊羣馬玉閭芝丁立劉合等及曲長屯將七十餘人散騎武騎一千餘人此皆數十年之內所糾合四方之精銳非一州之所有若復數年則損三分之二當何以圖敵此臣之未解五也今民窮兵疲而事不可息則住與行勞費正等而不及虛圖之欲以一州之地與賊持久此臣之未解六也夫難平者事也昔先帝敗軍于楚曹操拊手謂天下已定然後先帝東連吳越西取巴蜀舉兵北征夏侯授首此操之失計而漢事將成也其後吳更違盟關羽毀敗秭歸蹉跎曹丕稱帝凡事如是難可逆見臣鞠躬盡力死而後已至于成敗利鈍非臣之明所能逆覩也于是有散關之役九年復出祁山與張合戰射殺合十二年悉大衆由斜谷出以據武功與司馬宣王對壘而孔明病死於軍中夫用區區之蜀以抗強魏而孔明連年動衆未曾少休夫豈不懷安勢不得已也以謂不然則坐待亡耳觀其所陳六事與今日之勢頗同故備載之以俟識者

梁谿集卷一百四十八

<集部,別集類,南宋建炎至德佑,梁谿集>

卷一百四十九

钦定四库全书

梁谿集卷一百四十九 宋 李纲 撰迂论五

论鼂错王恢 论诸葛瑾

论忠智之臣仁明之主

论偏霸之主专任其臣

论魏文帝献神药 论节制之兵

论将 论唐三宗礼遇大臣论唐德宗任陆贄

论鼂错王恢

鼂错为景帝谋以谓汉封诸侯王连城数十地广势强不遵法制削之必叛然祸小而应速不削亦叛然祸大而应迟故卒削之而七国连衡而起以诛错为名景帝弗察纳爰盎之说斩错以谢七国此景帝之过举也而世以错为愚王恢与韩安国论难于武帝前以谓匈奴击之为便於是诱匈奴入塞汉兵匿马邑旁俟其至击之匈奴未入塞觉悟引去汉兵皆罢武帝以恢议用兵而不能击其輜重弗斩之无以谢天下遂下恢狱此武帝之过举也世谓恢为无谋首将受其咎昔唐宪宗欲讨叛镇其党大惧遣客狙杀宰相武元衡伤裴度群议汹汹而宪宗慨然曰吾专任裴度足以破贼卒平淮西观此则知宪宗之贤於景帝远矣秦穆公用孟明以伐郑晋襄公帅师败诸崤而获之既归穆公待之如初其後卒报晋而君子以为能用善观此则知武帝之不及穆公远矣错以忠恢以无罪死而世又不能知之是可悲也夫

论诸葛瑾

诸葛瑾仕於吴而亮为蜀相权尝遣瑾使蜀通好与亮公会相见退无私面而亮亦尝使于吴权欲使瑾留之瑾曰弟亮已失身於人委质定分义无二心亮之不留犹瑾之不往也其後有谗瑾者谓其密遣人与备亮相闻权曰孤与子瑜有死生不易之誓子瑜之不负孤犹孤之不负子瑜也於是以人言疏示瑾而瑾亦表论天下君臣大节一定之分若权者可谓能信其臣若瑾者可谓明於事君之义矣由权瑾以观先王之时君臣相与之盛至于得尽其心又可以想见其风采也

论忠智之臣仁明之主

惟忠智之臣为能察事之利害毕陈於其君而无隐情惟仁明之主为能以不用其臣之言因事悔悟而追思之唐太宗以兵定天下虽已治不忘经略四夷而魏郑公常谏止之每侍宴奏破阵武德舞则俛首不顾至庆善乐则谛玩无斲以讽切帝及辽东之役高丽靺鞨犯阵李积等力战破之军还怅然曰魏徵若在吾有此行邪即召其家到行在赐劳妻子以少牢祠其墓恩礼有加安禄山初以范阳偏校入奏气骄蹇张九龄谓裴光庭曰乱幽州必此人也及讨奚契丹败张守珪执如京师九龄曰禄山狼子野心有逆相宜因事诛之以絶後患明皇曰卿无以王衍知石勒而害忠良卒不用後在蜀思其忠为泣下且遣使祭於韶州厚币恤其家若太宗明皇可谓仁明之主矣至暗忍者则不然褚遂良既得罪韩瑗言于高宗曰遂良受顾命一德无二向论事至诚恳切诤肯令陛下後尧舜哉被迁以来再罹寒暑其责塞矣愿寛无辜以顺衆心帝曰遂良之情朕知之其悖戾好犯上朕责之诤有过邪卒不从而至于许敬宗李义府之徒则绸缪恩顾而不衰李泌尝对德宗论卢杞曰杨炎之罪不至死杞挤陷之而相关播帝曰卿言诚有之然杨炎视朕如三尺童子有所论奏可则退不许则辞官非特杞恶之也方艰难时视陆贄如左右手既事平遭谗谤帝追仇尽言逐之犹弃梗然至卢杞裴延龄辈则宠任盘固既去犹思之不已呜呼其去太宗明皇不亦远哉

论偏霸之主专任其臣

孙策之创业于江东也以张昭为长史文武之事一以委之北方士大夫书疏多推美於昭欲嘿而不宣则惧有私宣之则恐非宜进退不安策闻之叹曰昔管子相齐一则仲父二则仲父而桓公为霸者宗今子布贤我能用之其功名独不在我乎其後昭纳忠于权卒定江东为一时宗臣苻坚之开基于关中也得王猛任之以政若玄德之遇孔明而内外宗戚旧臣皆害其宠数诋毁之坚怒悉从黜免有至于死者於是猛得尽心辅政内厘百揆外荡群寇拔幽滞显贤才修兵革劝农桑兵强国富垂及昇平临终劝坚勿以晋为图而除鲜卑以便社稷夫以孙策苻坚区区割一方非得其臣而委任之如此犹不足以有为况大于此者乎然策谓我能用昭之贤功名岂不在我坚黜免譖毁猛者使得尽其智力亦可谓有国之明主矣不然得不以昭为收名而惧猛之专权哉由是观之古之兴王其君臣之相与如伊吕之遇汤武风云感会可以想见其盛也

论魏文帝献神药

魏文帝在东宫尝会宾客下令曰今有神药一粒祇可以疗一人而君父之疾皆危将孰献宾客之论纷纭以问邴原原勃然曰父也文帝不敢复诘原之对固善然惜乎不喻之以其理也夫人生在三事之如一则君与父疑乎焉分然孔子曰资于事父以事母而爱同资于事父以事君而敬同故母取其爱君取其敬兼之者父也母之道亲而不尊君之道尊而不亲兼尊亲之道其惟父乎然则药之献于父也宜矣

论节制之兵

兵之有节制犹之一身其筋骸之东欵故以身运臂以臂使指屈伸把握无不在我然後可以

应物而扞患苟筋骸之散而臂指不能相运掉则亦无所事矣兵自什伍积而总之以偏裨自偏裨总之以将而又有大将以临之小大相维尊卑相统其动静进退疾徐缓急一听于大将之节制违则行法有死无赦故连百万之衆可使如一身手足相须头尾相应而战必胜攻必克者用之有道也李光弼与安太清战于河阳未决召诸将曰彼强而可破者乱也今以乱击乱宜无功因问贼阵何所最坚曰西北隅召郝廷玉曰为我以麾下破之复问其次曰东南隅召论惟贞与之铁骑使破之光弼执大旗曰望吾旗麾若缓可观便宜若三麾至地诸军毕入生死以之退者斩遂大破贼其後九节度之师讨安庆绪于相州帝以子仪光弼皆元功难相临摄第用鱼朝恩为观军容使而不立帅于是九节度之师皆溃由是观之有节制之兵虽少足以破敌节制不立虽兵多而子仪光弼在其间亦不免于溃节制不专可不戒哉

论将

昔之善为将者必其威信足以服士卒而恩意足以结之然後可与冒锋鏑同生死陷坚履危如手足之扞头目而子弟之卫父兄戡难却敌以邀成功此非可以一朝夕致也齐用司马穰苴为将而次舍井竈饮食医药皆身自拊循之与士卒平分粮食比其羸弱者三日而後勒兵病者皆求行争奋赴战而燕晋之师闻之解兵罢去尽复得其故境魏用吴起为将而起与士卒最下者同衣食卧不设席行不骑乘亲裹赢粮与士卒分劳苦有病疽者至为吮之士皆乐为之战而秦兵不敢东向韩赵宾从何则所以用士卒者用其力也欲用其力而不得其心力不可用也欲得其心而恩意不足以结之心不可得也譬犹殴市人以战闻金鼓之音见旌旗之色则涣然离矣况可望其杀敌之功哉韩信之下井陉令背水为阵既破赵军吏问之曰兵法有右背山陵前左水泽今将军令臣等反背水阵然竟以胜此何术也信曰兵法不曰陷之死地而後生投之亡地而後存乎且信非得素拊循士大夫经所谓殴市人而战之也其势非置死地人人自为战今即予生地皆走宁尚得而用之乎由是观之士卒非素拊循虽使韩信为将不置死地不足以用其力况其余哉汉以魏其为大将以击吴楚所得赐予置之庑下令军吏裁取殆尽而孟舒魏尚之守云中皆以私财飧士古之良将类多如此唐有禄山朱泚之变而郭子仪李光弼李晟马燧浑瑊之徒起而定之此数子者虽其材略过人远甚亦其所将皆旧部曲威信恩意足以感服之故能必其成功不然如高仙芝封常清非不号为名将而募市人以抗大敌未有不折北不反者也今朝廷将帅之任取其临时兵与将初不相识未闻有以恩意拊循士卒者间有效古人之所为则又疑其以私恩收士卒心呜呼欲责其成功亦难哉为今之计莫若遴选将帅而任之使得拊循其部曲而一切待之以诚庶几其可也

论唐三宗礼遇大臣

肃宗有安史之乱代宗有吐蕃之寇德宗有朱泚之变皆身去宗社而卒能复国者盖亦各有所长观肃代之待李光弼郭子仪虽谗夫憊人譖愬百端卒保全之其後光弼畏祸不敢入朝代宗犹輶致其母存问甚渥而李晟马燧虽以谗间罢兵柄德宗皆以大臣呼之而不名每宴乐恩赐使者相衔于道两家日出无钟鼓声则金吾以闻少选使者至必曰今日何不举乐其礼遇如此传曰有功而见知则说又曰敬大臣则百工劝如肃代之暗弱德宗之猜阻非有过人之聪明而其所长如此宜乎其能复国也昔楚昭王病于军中有赤云如乌夹日以飞太史

以谓是害于王然可移於将相昭王曰将相孤之股肱也今移祸庸去是身乎弗听孔子在陈闻之曰楚昭王通大道矣其不失国宜哉夫病亟而不肯移祸于股肱则其平日之所以礼遇之者可知矣此乃昭王之所以能复国也吾於肃代德宗亦云

唐德宗任陆贄

唐史称德宗在危难时听陆贄谋及已平追仇尽言怫然以谗幸逐犹弃梗其所以不亡者幸也是不然德宗在奉天及进狩山南事无纖细必以访贄而贄纳忠论谏无所回隐帝多从之故兴元戡难爪牙宣力而贄之助为多则德宗不可谓不善听纳惟其在危难时能听纳此乃所以不亡也至危难已平追仇尽言虽贤君有所不免故太宗失于魏郑公而况德宗中材以下之主乎夫有始有卒者其惟圣人思其上者不得而又思其次则後世之主如德宗者亦未易多得也

梁谿集卷一百四十九

卷一百五十

钦定四库全书

梁谿集卷一百五十 宋 李纲 撰迂论六

论节义 论忠孝

论苟或 论立国在於足兵论治天下如治病 论保天下之志

论将相先国事忘私怨

论盗

论节义

节义者天下之大闲而仗节死义者人之所甚难也人君有以崇獎而激励之使知义重于生而不难于处死然後可与济患难而同安乐此所以能立国也不然则弃义徇利偷生惜死之徒羣萃于前一有变故则涣然离矣其肯仗节而以死卫上哉贾谊有言上设廉耻礼义以遇其臣而臣以节行报其上化成俗定则为人臣者主尔忘身国尔忘家公尔忘私利不苟就害不苟去惟义所在故父兄之臣诚死宗庙法度之臣诚死社稷辅翼之臣诚死君上守圉扞敌之臣诚死城郭封疆故曰圣人有金城者此也彼且为我死故吾得与之俱生彼且为我亡故吾得与之俱存彼且为我危故吾得与之俱安夫蹈危亡以图安存舍生取义者类非小人之所为故孔子以谓可以托六尺之孤可以寄百里之命临大节而不可夺者惟君子能之彼小人则不然见利忘义而利之所在则从之故利在君父则从君父利在权臣则从权臣利在阉宦则从阉宦利在盗贼则从盗贼自古及今若是者不可胜数方其平时进谗说纳小忠谄谀柔佞悦可人意及其临难转而之他掉臂不顾而视其君如路人者也况肯履刀锯蹈鼎镬死其君上而执干戈以卫社稷哉节义之士平居事君苦言逆耳至计拂心人主类多不能堪而一旦临变故必卓然有可观者故汲黯守义好面折廷争而武帝以为近古社稷之臣萧瑀耿介不可以利怵死惧而太宗亦以社稷臣许之安禄山及河朔皆陷明皇叹曰河北二十四郡无一忠臣邪及闻颜真卿独以平原守喜谓左右曰朕不识真卿何如人所为乃若此其後归朝峭论鯁议为奸臣所挤殒于贼手毅然之气折而不沮呜呼疾风知劲草岁寒然後知松栢之後凋为人君者詎可不深察此哉

论忠孝

忠孝者臣子之大节而庄周以谓外物不可必故为人亲者莫不欲其子之孝而孝未必爱故孝已忧而曾参悲为人君者莫不欲其臣之忠而忠未必信故比干剖而子胥靡老聃亦谓六亲不和有孝子国家昏乱有忠臣此非薄忠孝之言也乃所以厚忠孝之言也夫忠与孝在我

而信与爱在人在人者何可必哉惟其不可必此所为外物也然而孝子之於亲岂必待其爱而後孝忠臣之於君岂必待其信而後忠哉亲虽不我爱而尽其事亲之孝者孝之至也君虽不我信而尽其事君之忠者忠之盛也使亲能爱其子之孝则家和矣君能信其臣之忠则国治矣家和国治忠孝之名不立惟其孝而亲未必爱故家有不和而孝子之行彰忠而君未必信故国有昏乱而忠臣之节着然则为君亲者可不监哉

论荀彧

荀彧去袁绍越河冀间关以从曹氏遂与帷幄之谋劝其定兖州比之高祖保关中光武据河内深根固本以制天下劝其保官渡比之楚汉相持荥阳成臯间不可先退以自屈皆以帝王之略许之操既得志欲分功于彧而彧力辞不受封其後阻董卓九锡之议操心不能平表彧劳军馈之空器而彧自杀范?取其归正谓能杀身以成仁而杜牧以谓教盗穴墙发柜而不分其财得不谓之盗乎二者之论不同请以裴枢之事明之昔者裴枢相唐而附朱全忠知全忠之必篡唐也为之谋策无所不至其後全忠欲以梁客将张廷范为太常卿而枢执以为不可全忠怒遂杀枢若枢者岂真背全忠而忠於唐哉意谓此细故全忠未必怒而足以示天下公不知全忠乃以谓小者尚不从我况其大者乎故卒怒而杀之彧之於操正类於此若彧之智略岂不知操之奸雄必至于篡汉而取之九锡之议终不可止乎其意以谓阻而少缓之操未必怒足以取为汉之名而不知操之以是为嫌史谓彧忠于汉而杀身成仁者论其迹而不论其心之过也故尝谓孔融志广才疎其死也以愆荀彧计谋深远其死也以巧愆巧不同其於杀身一也然融之英风义气足以感激後人而彧之用心如杜牧者能知之则孰得孰失必有能辨之者

论立国在於足兵

天子曰万乘诸侯曰千乘大夫曰百乘有天下国家者所以保民未尝不以兵之衆寡为差孔子曰足食足兵民信之矣又曰以不教民战是谓弃之传曰自非圣人内宁必有外患又曰出则无敌国外患者国恒亡夫立国在於足兵弃民在於忘战有外患者忧惧而知戒无外患者安肆而日偷此四者国之存亡所系也故夫天下方当强盛之时卒然有不庭不虞之变莫之能御而遂至于不振者多由於恃安而忘战驯致使然唐有安史之乱晋有刘聪石勒之祸皆出於极治全盛之日以王师抗贼无异驱赤子以搏虎狼岂非蹈此患哉国家自澶渊之役与契丹盟好承平无事民不识金革百有余载至崇宁大观以来极炽而丰文恬武嬉偷取安逸兵之阙者不补卒之惰者不练将帅之选不精诛赏之柄不明干戈朽鉄钺钝而金人一旦乘间窃发将士爱死而望风奔北生民无辜而肝脑涂地士大夫闻语战则魂褫魄丧色若死灰惟以遁逃偷生为得计恃安忘战驯致之弊一至于此真可为长太息流涕而痛哭也岂特中国为然契丹自昔以兵力雄于朔方耐饥寒习攻战便骑射制属诸部其享国尤为久远自与中国盟好之後慕华风革旧俗弃毡裘衮衮纨绮捐潼酪嗜茗饮去穹庐处宫殿奢淫无度国人化之无复英鸷强忍之气故金人得以奋其诈力且和且战不数年而卒灭其国由是观之国虽安忘战必危而孔子谓以不教民战为弃之孟子以无外患为必至於亡国者岂虚言哉

论治天下如治病

膏粱以养气体药石以攻疾病此有生之所同也今有人焉不幸而有疾外为邪淫之所伤内致血气之羸耗则善医者必为之聚毒药治鍼砭惟邪淫之务去虽血气之羸不得已焉邪气去而正气生然後疾病可愈气体可充今不治药石而欲以膏粱攻疾病岂理也哉治天下者何以异此故仁恩教化者膏粱也干戈斧钺者药石也牧善良拊雕瘵必有文治则膏粱用焉锄强梗戡祸乱必有武功则药石施焉二者各有所宜时有所用而不可以偏废者也今天下之病亟矣蛮夷猾夏盗贼干纪旷古所无此正修武备协民力扞患侮济危亡以图安存之时虽不免於劳扰岂得已哉而议者不深维其故举一事出一令则以劳扰为言而沮格之至于蛮夷之所蹂践盗贼之所焚掠出没数路几半天下未及之地常岌岌然则恬不加恤而不复议论敢问此何理也夫天下几路一路几州一州几县日复一日偷取目前之安当其可为之时不为而今日残一县明日破一州後日亡一路不加料理而曰姑隐忍之以待蛮夷之自悔祸而盗贼之自销弭正犹得危笃之疾不治药石而欲望其自愈宁有是理哉夫病在皮肤此鍼砭之所及也病在腑脏此汤剂之所及也至于骨髓则扁鹊望之而走矣及是而悔不亦晚乎

论保天下之志

有天下者必有保天下之志然後王业可兴有一国者必有保一国之志然後霸道可立盖志者气之帅而事功之由基也有志以主於中然後见于外者必求所以保之之人而贤材於此乎进用必图所以保之之具而政事於此乎修举人民在所保拊循之而害民者必除土地在所保固守之而侵地者必却随其所保之大小而大以王小以霸则其志之不同也至于懦而无力志窃窃然惟以保身为计贤材政事土地人民皆莫之恤则岂独不能保天下及一国哉虽欲保身亦不可得矣昔者武王助上帝以宠绥四方有罪无罪不敢有越厥志一人衡行于天下武王耻之故能一怒而安天下之民岂非有保天下之志哉由武王推之则後之创业中兴凡能兴帝王之业于天下者皆其志足以保天下者也昔者齐小白曰先公优笑在前贤材在後国家不日引不月长吾恐宗庙之不扫除而社稷之不血食故相管仲而授之以政岂非有保一国之志哉由齐小白推之则後之裂土分民凡能立霸道於其国者皆其志足以保一国者也至隋陈之主则不然炀帝继体守成荒淫失度媮取目前之逸盗贼满天下而不知也尝引镜自照曰此好头项谁将斩之其後卒有江都之祸而陈叔宝据有江左不恤政事隋师伐之国危矣乃曰吾自有计遂与妃嫔同入于井其志如此身且不保而况能保天下及其国哉由是推之则古之亡天下与失国者概可见矣夫志小者不可与语大志近者不可与谋远志锥刀之利者不足与论万金之储志藜藿之食者不足与论太牢之味而况於天下国家安危存亡之至计哉书曰予告汝于难若射之有志又曰功崇惟志射无志则不能以中的士无志则不能以崇功有天下国家者无志则不足以保民呜呼君人者尚志勸其所先务也

论将相先国事忘私怨

萧何曹参方议功定位有隙其後何疾亟惠帝问谁可代者所推贤惟参而参亦自知当相汉

告舍人趣治装既代何为相国举事无所变更一遵何之约束而百姓安之作画一之歌郭子仪李光弼初同居朔方气不相下若仇怨然其後有安祿山之乱子仪泣涕分麾下兵与光弼荐之於朝与同破贼既而代子仪节度朔方营垒士卒麾帜皆无所更而光弼一号令之气色乃益精明昔之为将相者以国事忘私怨至于如此非独推荐之为难而更其职不更变之为尤难也与夫藺相如引车以避廉颇寇恂托疾以避贾复先国事而後私怨视数子未知其孰贤至于修怨逞憾不恤国事如张延赏之沮李晟罢其兵柄力主会盟而致平凉之辱刘仁轨之愤李敬玄表请为帅以代已而致覆师之祸其贤不肖之相去岂不远哉

论盗

世之危乱民之失业与夫兵之溃散者多聚而为盗贼诛之则不可胜诛而力有所不给惟因而招纳之以为我用其力有五以弭内乱一也以御外敌二也善良胁从者可散而归田亩三也强猾勇敢者可藉以备行陈四也以盗贼攻寇讐胜则享其功败则不足惜五也昔者光武用绿林下江铜马诸军而致中兴曹操用黄巾而破绍术太宗起於晋阳取关中以定海内亦多招徕羣盗而用之然自非推赤心以置其腹中恩足以结其心威足以讐其气使遵我之纪律而听我之驱策则用盗有五难已尝放肆而欲收其愤戾之心一难也已尝虏掠而欲窒其贪婪之志二难也易置将帅则怀疑三难也畀之部曲则易叛四难也恩过则骄威胜则怨而反以为患五难也惟善驾驭者恩威得所寛猛得中内得其心外得其力使之视杀敌如杀人取敌资如虏掠虽易将帅而不疑虽畀部曲而不叛与正军相为表里而无骄怨之患则其难也将转而为易昔者光武太宗曹操尝从事于斯术矣

梁谿集卷一百五十

卷一百五十一

钦定四库全书

梁谿集卷一百五十一 宋 李纲 撰迂论七

论张子房郭子仪之诚智

论变乱生於所忽

论西北东南之势 论女祸

论孔文举 论虞舜高光之有天下

论党锢之祸 论人主之刚明

论张子房郭子仪之诚智

高祖取天下以三杰而黥彭之徒不足道也卒之萧何囚繫韩信蒞醢而黥彭亦皆不得其死独子房以三寸舌为帝者师高祖字之而未尝名吕后德之而不敢慢超然远举独能以功名终焉肃宗中兴以郭李而仆固怀恩来瑱之徒不足道也卒之光弼为谗间所乘遂陷嫌隙其怀恩来瑱亦皆不得其终独子仪全名高节烂然独着权倾天下而朝不忌功盖一世而主不疑侈穷人欲而议者不之贬福祿之盛人臣莫及焉盖子房以其智而子仪以其诚智之至者既明且哲以保其身子房以之诚之至者忠贯日月神明扶持子仪以之故夫因固陵之问而议韩彭之地因复道之见而图雍齿之封樊噲之谏还军霸上则曰噲之言可听也刘敬之策建都关中则曰敬之说是也天下已定道引辟谷闭门不出而愿从赤松子游若是者岂非子房之智欤虽智也未尝不本之于诚提孤军以戡大憝仗大义以造王室单骑免胄以见回鹘减省驺从以过朝恩大难略平遭谗基夺兵柄而朝闻命夕引道无纖芥自嫌若是者岂非子仪之诚欤虽诚也未尝不照之以智盖徒智而已不本于诚则陰谋秘计人得以疑之此陈平之智有余所以为高祖之所疑也何足以语子房哉徒诚而已不照之以智则直情径行物得以欺之此马燧之智不足所以为吐蕃之所欺也何足以语子仪哉自古立功名者多矣汉唐以来未有若子房子仪之懿者也有志之士可不景慕而师仰之哉

论变乱生於所忽

秦以三代封建王室削弱之故置侯罢守隳名城杀豪俊而陈胜吴广起于谪戍奋臂一呼天下响应刘项兴而秦遂亡汉矫秦失裂土以封功臣宗室子弟多者至七十余城使郡国相错而韩彭英卢叛于前吴楚七国变于後至元成间异姓诸侯王既已灭絶宗室之国惟食租税至乘牛车自以为可以无患矣而朝政归于外戚王莽因以篡汉光武中兴功臣所封不过大

县数四奉朝请而不责以吏事宗室之国皆有分限抑远外戚不使与政可谓得策矣其後宦擅权党锢之祸兴而董卓曹操相继以取之至唐因隋之制置府兵严镇守威加于夏夷功臣无世袭之国宗室无尺土之封而武韦杨氏乃以女宠扇祸其後安史之乱甫定而藩镇之势浸强分裂土宇擅征伐私货财天子不得以制而朱全忠因之遂移唐祚国家鉴藩镇之弊黜削其权一切任以文吏尺土一民甲兵贡赋皆归于朝廷无尾大不掉之患而宗室外戚又非有过分之宠也北结契丹以为欢邻西制夏人东招高丽南抚交趾率皆臣属非有夷狄之虞也维持制御之术过于前代远甚而金寇乘间窃发驱驰中原遂有不可支吾之势夫自秦汉以来规模计画创法立制所以措天下于安固者莫不自谓足以革前日之弊而曲尽其巧矣卒之所以为变故者皆出于思虑之表其故何哉岂在天者有默定之数而不可以人力为欤抑在人者措置有所未尽而变故生于所忽欤将事之转徙不常而驯致使之然欤盖虽圣人创业垂统立法以传于後世亦不能以无弊故太公为政于齐举贤而尚功後世不免有篡弑之臣周公为政于鲁尊尊而亲亲後世不免有陵迟之渐三代封建後世郡县与夫所以维持制御之术初未尝不善也而祸患生於不虞者人事有所忽而驯致之势使然也惟能因其弊而救之如善医者之治病太过则泻之不足则补之阳盛则济之以寒凉陰盛则济之以温热因病投药视其所偏而扶持之使轻重缓急之势常足以相权则庶几乎其可也

论西北东南之势

自古帝王兴于西北者多能兼并东南而宅于东南者不能制服西北故秦据雍州以蚕食诸侯卒并天下汉都关中破赵取代服燕定齐而卒亡楚晋承曹魏而平吴隋承後周而灭陈唐起晋阳取长安遂定海内本朝都汴先得西北而後下江湖岭蜀服闽浙如拾地芥然东晋宅江表卒不能复中原其後刘裕乘势电扫得洛得关中而亦不能守也宋齐梁陈因之仅足自保竟不能以跬步进岂非地势人事使之然欤盖天下形势西北高而东南下故战国之兵皆仰关而攻秦说者谓自关中下兵如建瓴水而山东王者不得不王霸者不得不霸东南皆江湖沮洳非用武之地此地势然也西北之人强壮坚忍耐劳苦而习用兵加以土产健马便于驰逐精甲利兵强弓劲弩之所自出东南之人柔脆剽轻不习战陈舟楫之所利而非车骑之所便并吞天下者非西北之兵不可此人事然也地势人事如此而又有所谓天时者焉当其可为之时而不为则失机会故谋画之臣听纳之君因时定策间不容髮此刘敬所以脱挽辂以建金城之安留侯赞之高祖即日驾西都关中而不疑也

论女祸

有天下而多女祸未有若李唐之甚者也武后以牝夺晨革姓建号几移唐祚中宗亲为所废处房陵者二十余年一旦复位即纵韦氏几至乱邦韦氏乘夫淫烝於朝斜封四出既鸩帝欲临朝称制明皇亲平内难而开元之末沉酣燕私嬖杨贵妃几至丧国盖人君齐家以正天下故诗以后妃风化为首而昔之帝王未有无家法以貽训後昆者独唐不然高祖之起兵于太原盖裴寂以晋阳宫人私侍之故刼持之遂定秘计太宗既杀元吉纳其妃生子而使为之後武后固常侍太宗矣身接帷幕赐号武媚而高宗立之不耻也中宗幽废与韦后约一朝见天日不相制至复位后与武三思升御牀博戏帝从旁点筹不以为忤而贵妃杨氏初为壽王妃

明皇召内禁中异之即为出自妃意者丐籍女官号太真更为壽王聘妃而太真得幸其家法如此欲无女祸得乎

论孔文举

孔文举志广材疎虽有靖难之志迄无成功而名重海内後世君子亦以高节许之者岂非以其气足以盖天下乎其为北海相为盗贼所围遣太史慈求救于刘备备惊曰孔北海乃复知天下有刘备耶其守青州为袁譚所攻流矢雨集而融隐几读书谈笑自若既还许都虽曹操之奸雄陰狡权势方盛融视之蔑如峭论鯁议屡沮其谋嘲诮躡辘略不为之下故议马日磔之不宜加礼则责之以大臣之节议肉刑之不可复则比之斲朝涉之胫其破袁绍以甄氏赐子丕也则诮之以武王伐紂以妲己赐周公其讨乌丸也则嘲之以大将军远征萧条海内昔肃慎不贡楛矢丁零盗苏武牛羊可并案之其欲诛杨彪也则不俟朝服诣操争之曰孔融鲁国一男子耳今日诛彪来日拂衣去不朝矣其表制酒禁也则以书抵操争之尤多侮慢之辞操以融名重天下外虽容忍而潜忌正议虑鯁大业遂枉奏而杀之呜呼使融不死操内有所惮其敢图九锡建魏国而後卒移汉祚乎故史臣称其高志直情足以动义概而忤雄心使移鼎之迹事格于人存代终之规啓机于身後比之山有猛兽藜藿为之不采虽与琨玉秋霜比质可也不其然欤若融者真所谓乃心汉室以身死之而不与曹氏者也彼荀彧之徒方奴事操之不暇後虽饮药自杀乃其用意太巧不得已而然耳岂可与文举同日而语哉

论虞舜高光之有天下

舜居深山木石之与居鹿豕之与游饭糗茹草若将终身焉尧举而授之天下被袵衣鼓琴二女果若固有之闻一善言见一善行若决江河沛然莫之能御也岂特舜为然高祖由泗水亭长而创业光武由南阳?属而中兴方其在穷约之中一布衣耳及南面而经营天下驾驭诸将听纳群策如石投水而运诸掌其视海内有负固僭窃而不服者必削平之而後已励精图治天下若治其家然盖不如是不足以创业中兴而成帝王之业也

论党锢之祸

东汉党锢之祸其始起于甘陵有南北部之謡汝南二郡謡其郡守转入太学诸生郭林宗贾伟节为之冠与李膺陈蕃王畅更相褒重而怨膺者上书诬告其养太学游士交结诸郡生徒共为部党诽讪朝廷疑乱风俗於是天子震怒班下郡国逮捕党人而膺等皆坐禁锢自是正直废放邪枉炽结海内希风之流遂共相标榜指天下名士而有三君八俊八顾八及八厨之号其後有承望阉宦意指者上书告张俭与同郡二十四人别相称号图危社稷而俭为之魁灵帝诏捕俭等而阉宦讽有司奏捕前党李膺之徒皆死狱中诸为怨隙者因相陷害睚眦之忿滥入党中坐废禁者几千余人凡党事始自甘陵汝南成于李膺张俭海内涂炭二十余年诸所蔓衍皆天下善士而汉亦自此季矣大抵朝廷清明贤俊在位有以制服小人则天下治安而为国家之福朝廷昏微奸邪得志必须诬陷君子则天下危乱而为国家之祸方灵帝之时阉宦擅权莫之敢撓而李膺张俭之徒振拔污险之中蘊义生风以鼓动流俗激浊行以耻

威权立廉尚以抑贵势使天下之士皆高尚其道而污秽朝廷故阉夫憊人因其危而挤之指为部党一网几尽而士有不幸罹其祸者幽深牢破家族而不顾至于伏其死而母叹其义虽颠沛假命而闻其风者莫不钦慕而争为之主岂不贤哉然膺俭等其取名太多其嫉恶太甚固非自全于乱世之道使遇其时其功蹟岂易量耶此非膺俭之不幸乃汉室之不幸也

论人主之刚明

人君不患乎太刚而常患乎柔而不断太刚者不能无过举然不失为贤君柔而不断则遂有昏乱之渐盖刚者多明柔者常暗明暗者贤君庸主之所以分也汉宣帝励精为治信赏必罚综核名实不能无过举然卒为贤君者刚故也至元帝则优柔不断孝宣之业衰焉唐宣宗精于听断以察为明无复仁恩之意不能无过举然卒为贤君者刚故也若文宗则仁柔少断以致甘露之祸观元帝宽宏善下出于恭俭号令温雅有古风烈然有一萧望之卒信谗使自杀至委用弘恭石显则胶固而不移此孝宣之业所以衰而汉之纪纲遂至不振岂非以其柔而暗故欤观文宗恭俭儒雅出于天性慨然慕太宗之治太和政事号为清明然任一宋申锡卒为阉宦所诬而斥之至委用李训郑注则一意而不疑此甘露之事所以祸及忠良不胜其冤而帝亦饮恨而没岂非以其柔而暗故欤夫人君取象于天则以刚为德也取象于日则以明为德也体刚明之德而刚不至于暴明不至于察虽古圣帝明王何以加此至于刚明而不能无过举犹为中材之君若夫刚挠而为柔明易而为暗则失其所以为君之德矣虽欲建功立事追纵古人恶可得哉

梁谿集卷一百五十一

卷一百五十二

钦定四库全书

梁谿集卷一百五十二 宋 李纲 撰迂论八

论光武太宗身致太平

论治盗贼 论形胜之地

论江表

论范蠡张良之谋国处身

论秦隋之势相似

论光武太宗身致太平

自古拨乱之主身致太平未有若光武太宗者也光武发迹昆阳破寻邑百万之衆杖节渡河诛王郎击败铜马青犢赤眉之属张步隗嚣皆身在兵间冒锋鏑履行陈自平陇蜀之後知天下疲耗思乐息肩偃武事修文教非倣急未尝复言军旅太子问攻战之事则不答臧宫马武之徒请击匈奴则报以不如息人每旦视朝日昃乃罢讲论经理夜分而寐虽身济大业而兢兢如不及故能明慎政体总览权纲量时度力举无过事享国三十余年海内称治太宗起义兵晋阳斩宋老生击败薛举仁杲破刘武周走宋金刚擒窦建德降王世充皆身为大将削平僭窃四方遂定既即大位知守成之为难委任房杜与谋大政而魏郑公王珪马周之徒谏必行言必听以仁义治天下数年之後天下大治蛮夷君长袭衣冠带刀宿卫东薄海南踰岭户辟不闭行旅不齎粮取给於道几至刑措享国二十余年夫以光武当王莽之余太宗当隋炀之後身平祸乱创复大业不数年间遂致太平享国长久者彼诚知君道而雄材盛德足以致帝王之隆也故履患难而无惧慑之志处安乐而无骄逸之心太平之治其应如响不其然乎善哉魏郑公之言曰五帝三王顾所行何如耳黄帝逐蚩尤七十战而胜其乱因致无为九黎害德颡帝征之已克而治桀为乱汤放之纣无道武王伐之汤武身及太平然则圣帝明王所以拨乱致治者类皆如此彼後唐庄宗夹河数十战而後胜梁一得位号遂肆骄逸不旋踵而失之矣尚能致治也哉

论治盗贼

治盗贼者如医之治痰涎夫痰涎乃吾之真气所以为津液者也支体之运动关膈之升降皆以津液为本至於聚而为痰涎则必失于调卫而外为邪气之所伤内为寒热之所薄而致然也至其甚则能害人之命盗贼乃吾之赤子所以事农桑者也上下之相治室家之相保皆以

农桑为本至于散而为盗贼则必失於拊循而外为奸民之所胁内为饥寒之所迫而致然也至其甚则能亡人之国良医之治痰涎以药化之使复归乎津液则其身安而不善治者一切以毒药攻之必有偏废之患良吏之治盗贼以术解之使复归乎农桑则其国宁而不善治者一切以兵力胜之必有凋耗之弊此不可以不察也昔者渤海盗贼并起宣帝选用龚遂为太守而谓之曰君欲何以息盗贼而称朕意遂对曰海濒遐远不沾圣化其民困于饥寒而吏不恤故使陛下赤子盗弄兵于潢池中耳今欲使臣胜之邪将安之也帝曰选用贤良固欲安之遂曰治乱民犹治乱绳不可急也惟缓之而後可治臣愿无拘以文法得一切便宜从事上许焉於是盗贼悉平民安土乐业故善治盗贼者如龚遂可也虽然此特盗贼之初其在郡县而良吏得以治之者耳至于巨盗如汉末之黄巾唐末之黄巢则其疾已深非以毒药攻之不能去也虽攻而去之真气散而身亦危矣故黄巾破而董卓曹操因以亡汉黄巢败而朱全忠李克用因以亡唐兹非其证欤

论形胜之地

自古帝王之兴必先据天下形胜之地以为根本故高祖保关中而守之以萧何光武保河内而守之以寇恂皆深根固本为不拔之基以制天下利则伸而进可以胜敌钝则蟠而退足以坚守虽有困败而终济大业者其建策然也曹操之起荀彧劝其先定兖州唐高祖之起太宗劝其先趋长安故能卒有中原而定天下岂非以高祖光武为法乎至于不立根本而浪战虽力胜兵强百战百胜一跌则失之矣此项羽李密之所以败也

论江表

江表自孙氏三世经营之然後能立国以权之智勇因父兄之资能驾驭豪杰而得士有周瑜鲁肃吕蒙之徒以为腹心有甘卓凌统黄盖之徒以为爪牙据有荆楚闽粤之地称帝最後而享国最久故能抗魏连蜀成鼎峙之势至晋而後亡其後晋元帝因之兴于江左有王导以为谋主有顾荣贺循纪瞻之徒以从民望有郗鉴陶侃温峤之徒以处方镇凡荆扬闽鄂要害之地悉置重镇择名帅屯銳兵以控扼之故能保有东南中原虽纷乱而一方晏然强臣虽屡叛而卒以平定至谢安得政而区处藩维授任将帅各得其所故能以偏师破苻坚百万之衆而晋室遂安享国百有余年而刘裕取之以为宋宋亡而萧道成取之以为齐齐亡而萧衍取之以为梁梁亡而陈霸先取之以为陈至隋然後平陈而定海内南北混为一区隋亡萧铣起于江东而李靖擒之唐遂并有天下及其亡也杨行密据江淮而李氏因之遂以江南为後唐至周世宗尽取淮南之地而以江为限则李氏国已危矣宋兴命将帅下江南如探囊中物盖自六朝既废历隋唐三百余年其所以立国控扼之迹既已荡平而李氏区区僭窃于乱世遇真主则折北不支固其理也国家奄有四海垂二百年东南之民习於治安不识兵革而古之所谓重镇要害之地名城坚垒悉已隳废又无宿将重兵以镇之盖在六朝为边圉而在国家为腹心其势不得不然也今朝廷既舍中原不复料理而又不为保东南之计考按古迹命帅屯兵以为藩篱而区区偷取目前之安缓急则南渡恃江以为固及迫则又远徙以避之以此为策虽保一隅未见其可而欲坐享六朝之利盖亦难矣而况大於此者乎

论范蠡张良之谋国处身

范蠡张良其所以谋国处身者何其相似也方句践栖于会稽范蠡劝其卑身以事吴厚赂太宰嚭以解其难而谋所以报吴者及句践乘吴之弊而伐之复栖吴王姑苏之上求哀请命而句践不忍欲赦之范蠡独以为不可援桴进兵卒刎其颈句践既霸蠡以书辞句践乘舟浮海以行终身不反而大夫种遂赐劔以自杀方高祖困于鸿门张良劝其屈已以谢项羽深交项伯以脱于祸而谋所以破羽者及高祖还定三秦与楚相持於荥阳成臯间既割鸿沟以为界羽解而东高祖亦欲罢兵归国良独谏曰此天亡之时不因几而遂取之此养虎自遗患也汉兵追羽卒灭之高祖既帝良道引辟谷杜门不出欲从赤松子游而韩彭英卢皆被菹醢虽萧何不免縲紲之患故夫智谋之士处困厄之时能忍辱以伸其志当事几之会能决断以收其功功名遂能高举远引以全其身微二子吾谁与归

论秦隋势之相似

自周之衰而天下裂为战国至秦始皇然後并六国而称帝自晋之亡而天下分为南北朝至隋文帝然後混南北为一区彼始皇隋文皆有雄材大略过人之聪明其所建立又有卓然杰出于後世者方驾驭将帅削平四方据关中金城之固而都之以临制天下其意皆欲传子孙于无穷然而身没而国危皆以二世而遂亡者失所以为君之道繆所以为治之术亡所以维持天下之具不知其子而付托非其人也夫人君之道秉本执要简而常逸元首丛脞则万事隳堕此不易之理也至秦隋则不然以察为明以苛为德窃窃然惟恐人之轧已而夺之权故始皇衡石量书隋文卫士传餐皆日夜有程不中程不得休息天下事无小大皆决于上丞相大臣不过受成事奉行文书而下皆持禄欺谩以取容此风不改卒至于亡故曰失所以为君之道者此也古之王者得天下以仁虽取之以干戈而治之以礼义其善政美化必有以深结其民之心而信厚和平必有以变移其风俗故三代之所以享国长久者用此道也至秦隋则不然彼见所以取天下之难而常有猜防不安之心以为不决于法刻削而急持之则後世且复分裂而为敌国有曩者英雄割据之患故始皇刚毅戾深乐以刑杀为威专任狱吏而亲幸之海内愁苦无聊而陈胜项籍奋臂大呼天下响应秦遂以亡隋文亦制为严法峻刑以杜天下之变谋臣宿将诛灭略尽元元不胜其毒而杨元感李密倡之群盗蠭起天下大乱涂地而不复振借使秦隋已并天下而以仁义治之惠泽在民虽有胡亥炀帝之不肖天下必思所以继其後而奉之者其亡不若是之遽故曰繆所以为治之术者此也古者立国未尝私有天下必封建亲戚功臣以为藩屏资其犬牙磐石之势以夹辅王室故商周之王皆几千年夫岂无僻王赖诸侯扶之以定其国彼秦见周衰而诸侯更相诛伐天子弗能禁也以为天下之所以战鬪不休者以有侯王於是罢侯置守分天下以为三十六郡其地东至海西至临洮南至北向户北并陰山至辽东身有海内而子弟为匹夫内有奸臣之祸外有大盗之虞一夫作难九世隳庙而莫之救彼隋之所以亡者亦无以异于秦故曰亡所以维持天下之具者此也古者立嗣以为国本既得其人而又付之可以托六尺之孤临大节而不可夺之大臣故本定而国安朝委裘而天下不乱武王欲立成王则托之周公武帝欲立昭帝则托之霍光此周汉之所以隆也始皇有一长子扶苏怒其正谏而使北监蒙恬于上郡沙丘之事虽为玺书以召之而付之赵高故得与李斯同为奸谋而胡亥卒以夺嗣隋文有一太子勇听谗譖而幽囚之临终

以广失礼虽有召勇之言而付之杨素故卒及于大故而炀帝得肆其欲故曰不知其子而付托非其人者此也秦隋相去千有余载其所以混一海内传二世而遂亡与夫所以致亡之道皆若合符节书所谓与乱同事罔不亡者也然秦亡而汉继之传二十余主享国四百年隋亡而唐继之亦传十八帝享国三百余年自三代以来未有与之比隆者然则秦隋者其汉唐之驱除乎不然何其兴之盛而亡之暴也

梁谿集卷一百五十二

卷一百五十三

钦定四库全书

梁谿集卷一百五十三 宋 李纲 撰迂论九

论君臣之分 论霍光李德裕

论除天下之患如治病

论天下强弱之势 论用兵

论料敌 论顺民情

论君臣之分

古者君臣虽有尊卑上下之分而不若後世之邈然辽絶也上焉者必有所不召之臣故汤之于伊尹高宗之于傅说武王之于太公皆待之以师友学然後臣之次焉者亦相与以诚而相遇以礼故观书之所以命君陈毕公而诗之所以歌申伯方叔召虎仲山甫尹吉甫之流情文备至则君臣之际槩可见矣故能举贤才而任之如元首股肱之同一身父子兄弟之同一家事无不虑虑无不周知无不言言无不尽患难则同其忧安平则同其乐建帝王非常之功而不以为难者君臣之义交相得也至秦则不然尊君而抑臣阻法度之威以临之无复有尊德乐道情文相接之意其君抗然于上而视其臣如胥吏仆隶然初无爱敬之心其臣眇然于下而视其君如天之不可亲虽为之辅相者亦有所畏避而不得以自尽故李斯去疾之徒朝为丞相至暮一言不合则具五刑而诛之其余孰不畏罪持禄欺谩而取容哉汉兴以高祖之贤而萧何不免縲紲以文帝之仁而周勃不免对吏景帝诛周亚夫武帝诛翟青刘屈氂等数人而东汉三公动辄下狱盖循秦之弊使之然也太宗之待房杜明皇之待姚宋宪宗之待裴度武宗之待李德裕可谓善矣惟其君臣相遇之难而法度相去辽絶犹袭秦之遗风此德业之盛所以不能及于隆古而至於庸君则贤者?而易去谀佞之徒取容而易合良以此欤

论霍光李德裕

霍光膺武帝之托拥幼主摧奸臣处废立之际临大节而不可夺为汉社稷之臣至宣帝谒见高庙光从骖乘内严惮之若有芒刺在背後张安世代之天子从容肆体甚安近焉及光死而宗族夷灭故霍氏之祸萌于骖乘李德裕相武宗当国凡六年方时用兵决策制胜他相无与威名独重于时至宣宗即位德裕奉册太极殿帝退谓左右曰向行事近我者非太尉邪每顾我毛髮为森竖翌日罢相其後以吴湘事遂贬朱崖故德裕之贬始於奉册传曰威震主者身危其光德裕之谓欤然二君者亦可谓忍而少恩矣故为宣帝谋则念光之功而不使霍光絶祀为宣宗谋则念德裕之功而不使之死于海外可也

论除天下之患如治病

善除天下之患者如良医之治病视其轻重缓急而为之方以其病之小者易其病之大者而徐图之病在虚寒则必以热药补焉热不免于有过则徐思所以凉之病在实热则必以寒泻焉寒不免于有过则徐思所以温之故治洞泄者必至于痢而治强阳者必至于羸皆以小易大徐图之而後安欲一投药而遂无患者无有也方楚汉之争为高祖之患者项羽而已汉兵追楚至固陵而韩彭之兵不至高祖谋于张良良曰未有分地其不至固宜君王能与共天下可立致也齐王信之立非君王意信亦不自坚彭越本定梁地亦望王而君王不早定今能取睢阳以北至谷城皆以王越从陈以东傅海与齐王信使各自为战则楚易败也高祖从之而韩彭果引兵来破羽垓下而楚遂亡夫张良非不知与韩彭之地广其後必至于叛而谋如此者其意以为楚之患大韩彭之患小不捐此地以许两人则韩彭之兵不会而楚不亡俟楚既亡已除其患之大者而後徐图其患之小者可也故卒许之其後楚亡而韩彭果叛汉诛之而天下遂定若良者可谓能知以小易大除患之术矣今天下之大患在金人与蠭起之盗贼其势非复方镇之制而假之权不足以扞御而议者乃忧方镇之制行将有尾大不掉之患若唐室然亦可谓不知轻重缓急之理欲除患而弭乱其可得乎呜呼安得以子房固陵之策告之

论天下强弱之势

天下之势在强弱有能强者有不能强者有能弱者有不能弱者有强而示之以弱者有弱而示之以强者能强能弱者王不能强不能弱者亡强而示之以弱者其兵多胜弱而示之以强者亦能以全其国故秦以虎狼之威据关中金城之固蚕食诸侯卒灭六国而并天下此能强者也太王居豳狄人攻之事之以皮币珠玉犬马而不能免去居岐山之下而从之者如归市此能弱者也突厥颉利寇长安饮马渭水太宗倾府库以与之和而使李靖邀击大破之卒犁其庭而擒颉利此强而示之以弱者也诸葛孔明相先主以取蜀崎岖山谷之间而无岁不出师以扰关中此弱而示之以强者也晋平吴而失中原隋平陈而终江都此不能强者也燕以匕首而激秦息以违言而拒楚此不能弱者也夫天下无常势能用之则弱可以强不能用之则强反以为弱在倏忽之间耳齐有无知之乱而小白以兴晋有骊姬之难而重耳以霸此所以弱为强也吴争衡上国而卒灭於句践智伯欲分赵地而卒亡于韩魏此以强为弱也审强弱之势而善用之天下庶几乎可定

论用兵

昔之用兵者有以少击衆若昆阳之破寻邑淝水之败苻坚是也有以多胜敌若王翦之伐荆韩信之定燕赵是也有以速为策若岑彭之攻公孙述李靖之擒萧铣是也有以迟为策若周亚夫之破七国赵充国之讨先零是也夫以少击衆者必将因便乘势而躡蹙之其机在少譬犹蹙巨石于千仞之山而不假于多力故昆阳之战寻邑拥百万之衆驱虎豹犀象以助其威独傲然有轻汉之志而光武得以投其间与敢死之士三千人冲其中坚城中亦鼓噪而出声震天地莽兵遂以大溃淝水之战苻坚将百万之师以临江汉慨然有吞东晋之心而谢玄师偏师八千以御之乘其军却衆乱追奔逐北而坚之师遂以败散闻风声鹤唳皆以为王师将

至然则以少击衆而能成功者岂非其机在少因便乘势而躡蹙之不假于多力乎以多胜敌者必将以殄灭为期而不再举其机在多譬犹拔大木之本根而後不再举非衆其力则不可故秦欲伐荆而王翦以谓非六十万不可卒如其数以与之遂破荆军而平其地以为郡县韩信既将兵虏魏王豹而定魏地请益兵三万人愿以北举燕赵东击济南絶楚之粮道汉王与之而皆如其言然则以多胜敌而成功者岂非其机在多以殄灭为期而不再举非衆其力则不可乎兵之以速为策者其机在速譬犹猎者之逐兽兔起鹘落少纵则失之岑彭之攻公孙述也袭破侯丹因晨夜倍道兼行二十余里径拔武阳使精骑驰广都去成都数十里势若风雨所至奔散述大惊以杖击地曰是何神也而述遂亡李靖之攻萧铣也大閱兵云安秋潦涛瀨涨恶诸将请江平乃进靖曰兵机事以速为神今士始集铣不及知若乘水傳垒是震霆不及塞耳安能仓卒集兵无以御我此必擒也诸将从之而铣果擒然则以速为策者岂非其机在速而少纵则失之乎兵之以迟为策者其机在迟譬犹猎者之檻虎俟其困而搏之则不为其所伤周亚夫之击七国也以谓楚人剽轻利于速战难于争锋故以梁委之而坚壁不与之战而絶其饷道待其饥而一举破之赵充国之讨先零也以谓羌急之则合缓之则散大兵久留其费不貲故上屯田之策般师罢兵以万人留田待其弊而一举灭之然则以迟为策者岂非其机在迟俟其困而搏之则不为其所伤乎夫兵之多少迟速皆机也善用其机皆足以成功而不善用之则以少而殄若陈豨之尝秦军以多为累若赵括之败长平以速而趋利如龐之死马陵以迟而养寇如刘繇之失江东者多矣可不察哉

论料敌

善用兵者以料敌为巧非谓料其强弱虚实而已能料敌之情而势必至于此之为巧也孙臆为齐救赵而引兵以趋大梁知魏之素轻齐也故减竈以诱之魏将龐果弃其大军与轻銳倍日并行以逐臆此未为巧而能度其行暮当至马陵伏万弩夹道期见火举俱发而破魏军遂杀龐此为至巧韩信击赵引兵东下井陘知赵军未见大将旗鼓未肯战也故使万人先行背水阵而弃旗鼓趋水上军以诱之赵军果争汉旗鼓而逐信此未为巧而能度其空壁逐利先出奇兵二千骑狙伺驰入赵壁拔赵旗帜立汉赤帜而破赵军遂斩成安君泚水上此为至巧寇恂之降高峻遣军师皇甫文出谒辞礼不屈恂怒将诛文诸将谏以为不可恂不听遂斩之而遣其副归报曰军师无礼已戮之矣欲降急降不欲固守峻惶恐即日开城降诸将皆贺因曰敢问杀其使而降其城何也恂曰皇甫文峻之腹心其所取计者也今来辞意不屈必无降心全之则文得其计杀之则峻亡其胆是以降若恂者其料敌可谓巧矣李光弼之降高暉李日越也逐史思明壁野水渡至夕还师留牙将雍希颢守曰贼将高暉李日越万人敌也贼必使劫我尔留此贼至勿与战若降与偕来左右窃怪语无伦是日思明果召日越使以铁骑劫取光弼不然无归日越至而光弼已去遂请降希颢与俱至厚待之高暉闻亦降或问公降二将何易也光弼曰思明再败闻我野次命将来袭必许之以死希颢无名不足以为功日越惧死不降何待降者见遇貳者得不思奋乎若光弼者其料敌可谓巧矣惟其料敌之巧如此故足以立奇功两军相持不能料其强弱虚实者未有能制胜者也战功曰多以多算胜而少算不胜然则不计强弱虚实而浪战者欲无败难矣况能立奇功哉

论顺民情

古之有天下国家者未尝不因其民之情而用之记曰人情者圣王之田也易曰说以先民民忘其劳说以犯难民忘其死孟子曰以逸道使民虽劳不怨以生道杀民虽死不怨杀者管子曰下令如流水之源令顺民心也夫惟令顺于民之心故可以使之犯难忘其劳且死而不以为怨则拂民之情欲以立事而长且久者未之有也以德行之者王以力假之者霸王霸之所以兴未有不因于民者若盘庚之迁都民不适攸居而胥怨则必为之丁寧训告使之知所以迁之为利而後已然则圣王之所以重其民者如此其可忽乎至秦则不然以贵为在已而不可亡以贱为在民而不足听以切阻法度之威以临之焚诗书杀豪俊以愚黔首制为峻刑酷法使民皆愁苦而亡聊思为乱者十室而九故山东盗贼羣起而秦遂亡至高祖约法三章除秦苛政而百姓归心因思归之士还定三秦遂破项籍其後萧何曹参为相知民之疾苦顺流而与之更始遂安海内然则拂民之与因民其效槩可见矣後世奸谀之徒上欲投君之所好而争富贵下欲去己之所患而排忠良乃始建为拂百姓以从先王之道之说以欺人主而取世资凡能奉君之欲者则谓之享上凡欲顺民之情者则谓之下比于流俗遂使其君抗然于上而轻天下之民其民疾视于下而不敢言而敢怒其源起于熙宁元丰之间其流盛于崇宁大观之际其末甚于今日盖有不胜其弊者矣傥能因民之情而用之悦以使民犯难而忘死则外寇虽强不难御也

梁谿集卷一百五十三

卷一百五十四

钦定四库全书

梁谿集卷一百五十四 宋 李纲 撰迂论十

论交深 论管鲍之交

论将之专命禀命

论土崩瓦解蚕食鱼烂之势

论谏 论史

论交深

张耳陈余天下之至交也然而卒相灭亡者岂独以势利而非道义哉其所以交者太深也夫交太深则望之者重望太重则责之者备望重责备则间隙易生而怨祸易作此乃张陈之所以卒相灭亡者也方其穷居结刎颈之欢相然信死岂顾问哉及争张黡陈释之事余怒曰不意君之望臣之深也解印绶去其後卒攻耳而夺之国耳亦奉头鼠窜以归汉王借兵东下战于鄆北卒斩成安君泚水上故其交之所以深者乃其相灭亡之所以酷也夫交深而望轻者惟有德者能之若管鲍是已不然凶终隙末可胜道哉

论管鲍之交

管仲鲍叔古之所谓善交者齐小白谋相而鲍叔荐管仲以为可于是取之于鲁解束缚而相之齐卒以霸其後管仲且死小白谋所以代之者欲相鲍叔而管仲以为不可曰鲍叔牙之为人洁廉善士也一闻人之过终身不忘使之为政上且鈎乎君下且拂乎民而以隰朋为可故鲍叔之举管仲不以为德而管仲不许鲍叔之代已不以为怨萧何曹参以议功定位之故平时有隙及何将终惠帝问所以代之者而何所推贤惟参参既代何为相国一遵何之约束无所变更惠帝尝问之参谢曰高皇帝与萧何定天下法令既明具陛下垂拱参等守职遵而勿失不亦可乎于是百姓悦之而作画一之歌故何之荐参不以参之有隙而推其贤参之代何不以何之有隙而变更其约束古之人处心积虑其公如此盖一切为国家计而忘其爱恶此其所以为大过人也後世之士於其所爱则不计其人之贤否事之是非而于其所恶则虽天下共推以为贤者犹将抑之公论以为是者犹将改之其视管鲍萧曹之所为得不少知愧乎

论将之专命禀命

古之受命为将者付任未专威信未着则必有所假借以立威然後士卒可用而功名可成至

于付任已专威信已着则不必如此故齐景公欲用田穰苴为将以扞燕晋之师穰苴曰臣素卑贱君擢之闕伍之中加之大夫之上士卒未附百姓不信人微权轻愿得君之宠臣国之所尊以监军乃可于是景公使庄贾往而穰苴因其後期不至而斩之又戮使者之仆车之左驸马之左骖以徇而三军之士皆震栗燕晋之师闻之解去追击之尽取所亡之地振旅以归此付任未专威信未着而有所假借以立威者也卫青将六将军兵出定襄以击匈奴右将军苏建尽亡其军独以身自归青问其罪议郎周霸曰自大将军出未尝斩裨将今建弃军可斩以明将军之威青曰青幸得以肺腑待罪行间不患无威而霸说我以明威甚失臣意以臣之尊宠而不敢擅专诛于境外其归天子自裁之於以风为人臣不敢专权不亦可乎军吏皆曰善此付任已专威信已着而不必如此者也後之为将者起冗散而威令未行当以穰苴为法藉贵宠而威令已行当以卫青为法夫岂不同惟度其时势使各有所当则善矣

论土崩瓦解蚕食鱼烂之势

天下之势有土崩有瓦解有蚕食有鱼烂所谓土崩者一倾颓而不可救秦隋之末是也所谓瓦解者虽叛散而犹可拯汉之吴楚之变唐之安史之乱是也所谓蚕食者其受害在外浸以及于内秦之於六国是也所谓鱼烂者其受害在内浸以及于外汉唐之季是也夫秦隋皆以苛法虐政威制海内而继以胡亥炀帝之昏淫民困而主不恤下怨而上不知俗乱而政不修故陈涉李密之徒因时而起奋臂大呼天下从风而响应国遂以亡而不可复振此之谓土崩汉至文景之间可谓盛矣而吴楚乃因鼂错削地之故起而为难合七国之兵带甲数十万然不能西攘尺寸之地而卒以败亡唐至开元天宝之间可谓盛矣而安史乃因中国无备之故起而为寇陷河朔覆两京然不能数年而卒破灭盖汉与唐之德未衰而安土乐俗之民衆虽有乘间窃发者犹可治也此之谓瓦解齐楚韩魏燕赵之师约从而攻秦秦人开关延敌六国之师逡巡而不敢进于是从散约解争割地以赂之秦有余力而制其敝追奔逐北强国请服弱国入朝因利乘便宰割分裂攘肌及骨而六国之君卒不能以自存此之谓蚕食汉唐之季皆权归於閹宦人主之立因其定策大臣废置出其指呼奸邪谀佞结为死党而忠愤名节之士禁锢摈斥而不复用及其甚也外召强臣以诛之閹宦灭而国亦亡故董卓奋而汉祚衰全忠聘而唐室危皆祸自内始而卒至于不可料理此之谓鱼烂夫瓦解之祸轻而土崩之祸大蚕食之祸迟而鱼烂之祸深故天下之患在于土崩而不在于瓦解蚕食犹可御而鱼烂不可支则其势使然也今不幸夷狄凭陵盗贼蠭起而有瓦解蚕食之势当善救之使不至于土崩鱼烂犹庶几乎可为也不然祸可胜既哉

论谏

礼上讽谏而下直谏君子孰不欲讽谏以悟其主而有至于直谏以杀其身者势不得已也盖事明君虚心以从谏虽引义微喻无所不合故有以讽谏悟主者而况于直谏何伤于道乎事暗君强愎以拒谏虽危言切论有所不听故有以直谏杀身者而况于讽谏何补于事乎方舜禹之时都兪赓歌于庙堂之上所以讽喻以相儆戒者可谓至矣其称无若丹朱傲惟慢游是好朋淫于家用殄厥世亦何伤于直故仲虺之称汤以从谏弗咈改过不吝为善而太保之训武王以不矜细行终累大德为非若然者岂非事明君讽谏足以悟主而直谏亦不伤于道乎

至于桀杀关龙逢纣杀比干则事暗君直谏足以杀身而欲以讽谏有补于事盖亦难矣由是观之讽谏施於明君而不害于直直谏施于暗君而无事於讽者必至之理也汉文帝寬仁尽下羣臣谏说虽切常假借纳用之故若冯唐之论颇牧张释之之论嗇夫可谓能讽谏矣至贾谊上书陈时事欲流涕而痛哭爰盎引却慎夫人坐指人彘以为喻而帝亦不以为嫌岂非不害于直耶唐太宗英明能断从谏如流导羣臣而使之言故若魏郑公之言昭陵王珪之论庐江可谓能讽谏矣至郑公之言十渐极陈时政之得失珪之论祖孝孙以谓陛下负臣臣不负陛下而帝亦不以为过岂非不害于直耶若夫萧望之张猛京房之言石显而元帝杀之王章之言王凤而成帝杀之王嘉郑崇之言董贤而哀帝杀之李膺陈蕃范滂之徒言阉宦而灵帝杀之长孙无忌褚遂良上官仪言武氏而高宗杀之张柬之桓彦范等言韦氏而中宗杀之孟昭图言田令孜而僖宗杀之是皆事暗君以直谏而蹈祸乃其所也尚何讽之云哉

论史

昔之秉史笔而其书传於世者皆成於後人之手故秦汉以前成於司马迁西汉成于班氏东汉成於范曄三国成于陈寿晋宋至隋成于唐唐及五代成于本朝当其时非无史多不传而独传後人之书夫後人之所传闻与当时之所亲见其详略审否固不可同年而语矣然而後人之书独传而当时之史多废者岂非以其是非取舍有公有不公故耶夫史之所以取信于天下与来世者以其不没善不隐恶而褒贬无所私也当其时而作史者或由于喜怒或出于爱憎或有所讳避或为之假借而是非取舍不能不容情於其间则奸谀而进者未必贬忠贤而退者未必褒君子为善而失时者未必以为是小人为恶而得时者未必以为非此乃其所以多废而不传也至于异代时世既殊而喜怒爱憎之情云散而烟灭然後公论出而是非取舍如青天白日之清明无讳避假借之私而得奋其直笔以褒贬之虽有误谬讹舛而不足以害其大公则後人之书所以独传者非特以备良史材而文足以行远而已必有当于人心而合天下之所谓公论者焉昔孔子削迹于卫而梦奠之後履传千祀王莽在朝陈功德以亿万计虽扬雄有所不免而後首藏于武库以翟进为鲸鲵以陈蕃李膺为奸党以徐敬业为虺蜥至後世乃始以忠义节概许之事之是非定于後者类皆如此则当时之史多废而後人之书独传无足怪也古者天子不观史而自唐以来始进书又以宰相为监修官而欲取信于後世难矣哉

卷一百五十五

钦定四库全书

梁谿集卷一百五十五 宋 李纲 撰传

武刚君传 方城侯传

文成侯传

武刚君传

武刚君姓金氏名辟疆其先楚人也七世祖镛居於越之耶谿闻欧冶子者通於天地阴阳五行变化之理得铸人术因往见之欧冶子熟视镛曰子之质美矣尝试以吾术治之当为国器乃留与居汰去麤悍萃其精英旬锻月链磨礲而淬砺之文彩艳发其才气天下无双欧冶子抚之曰子所谓铁中铮铮者昔孔子尝铸颜渊矣吾今铸子合则成体散则成章变化不测其犹龙乎因号曰龙渊子以荐於楚王楚王悦之出入起居必以自随威鎮海内名闻诸侯於是晋郑兴师以伐楚曰必以龙渊子为质乃罢兵王与之登城以麾晋郑之师伏尸十万流血千里楚之所以霸诸侯者龙渊之力为多亲属散居四方时时窃借其名以行当战国时尤宠任之其族子有游越者以策干越王勾践勾践将封之以三乡及千户之都二以示薛烛薛烛曰此国宝也三乡二都何足以当之其贵重如此有游赵者头胡纓纓短後之衣以术干赵孝文王赵孝文王好之终日与之相对至忘食寝国事皆废於是庄周为陈其祖之功德举之无上按之无下运之无旁足以决胜天下而头胡纓纓短後之衣其术特庶人之所好不足多也王悟乃疎之遂废不用而当时游侠之士荆轲聂政之徒往往私从之游然皆其术之下焉者也独武刚君辟疆者起於楚汉之间挺挺有祖风烈辟疆之为人明銳劲正遇事立断其学长於天文地理陰阳刑法兵家战鬪之说性刚果不喜人之为柔佞者见有祸乱奸宄必欲削平之而後已其志气凜如严霜秋水毅然有不可犯之色以故乱臣贼子奸邪见之胆破股栗不敢仰视其与人交惟有德者陰卫助之久而无斁苟非其人舍去弗顾秦始皇帝既灭六国焚诗书以愚黔首隳名城杀豪俊收天下之兵聚之咸阳销锋镝铸以为金人十二以弱天下之兵武刚君遯逃山泽间与一时布衣豪俊游其耿耿自若也项籍少年时尝从君学不成去其叔父梁怒之籍曰君一人敌不足学学万人敌耳盖不知君者也独高祖微时雅与君善尝俱行丰西大泽中有大蛇当径前行者还报高祖被酒曰壮士何畏乃与君俱前斩蛇所谓白帝子者遂起兵攻秦既入关降秦王子婴复与项籍争天下战滎阳成臯间武刚君未尝不在左右出入卧内甚见宠任其後韩信陈平黥布闻之皆亡楚仗君以归汉以故高祖胜项籍垓下遂即帝位第功君居第一在萧何曹参右封之峡中号武刚君赐丹书铁券藉以锦绣藏之金匱石室使世世袭之又取武库为君第与秦人传国於汉者公玉玺待遇略等国有大事则召君及玺班於殿庭以示褒宠其子孙往往劲直明敏淬锋歛锷以节义自持能世其家当成帝时有仕於尚方者丞相张禹以帝师位特进甚尊重然阿附王氏不忠帝室平陵男子朱云廷对曰大臣尸禄素餐愿与尚方金某断佞臣一人以厉其余上问谁也对曰安昌侯张禹成帝不

能用其後王氏果篡汉由是世益重其家声历汉至魏晋虽异代犹见礼遇不衰至晋太康中回祿氏作乱劫武库焚荡武刚君之第因以失国而君之远族干将显於世焉干将者与其妻莫耶氏得神仙幻化之术隱於豫章丰城狱中怀材抱德气应於斗牛之间张华与望气者雷焕识之推其分野俾焕往搜访果得干将与莫耶氏而斗牛之间气灭焕私匿莫耶氏而以干将归华且曰是有术终当化去华知其匿莫耶氏也亦曰久当复合及华将遇祸干将果先化去而焕之子携莫耶氏过延平津因跃入水遣没人视之有二龙盘结风涛汹涌雷电晦冥因不复见信乎其得神仙幻化之术而华焕之言验云

太史氏曰古者五行物立其官金姓盖出於少昊氏其族散居五方而刚柔利钝性亦不同武刚君之得姓其北方之强者欤观其为人明利果断不凝滯於物劲正之气毅然见於色其亦鍛链淬砺之力欤卒能佐汉以兴传国数百载可谓盛矣予来延平感干将莫耶氏之事考诸传记嘉武刚君之烈采其行事大略着于篇

方城侯传

方城侯端木子平者尧时人也负其材隐居平阳山泽间郁然有凌云之志与巢父许由为侶弗肯仕尧命益作朕虞益烈山泽而焚之见子平伟其节概荐於共工垂垂命其徒殳斤斧之漆雕氏藻饰之以见尧于总章尧是时法度彰礼乐着垂衣裳而天下治国家闲暇既见子平嘉其有局量井井然以绳墨自治置诸左右因访其所学子平对曰臣樗散蒙帝力生植长养今幸得备器使间方寸浅狭不足以奉清间臣之学上通乎天道而下极乎地理中备乎人事与夫军旅征伐之法故周天之度三百六十有奇在天成度在历成日而历法生焉此天道也开方之术提封三十六万井内建王畿外列侯国而井田之法寓焉此地理也好恶相攻而吉凶生远近相取而悔吝生情伪相感而利害生此人事也不战而屈人之兵者为上以攻则胜以守则固者次之以诈谋得者又次之此军旅征伐之法也尧方命羲和奉若天道历象日月星辰以闰月定四时成岁又命禹平水土奠山川底贡赋锡土姓而苗民有罪命禹徂征且伐丛支胥敖氏之国其说皆与子平合将历试之以事而尧之子丹朱不肖惧其饱食终日无所用心也命子平教之未几丹朱悉传其术帝用嘉之列爵分土封之方城而子平有二子长曰太素次曰太玄子平中分方城之地以予之且教以兵法二子不相能也日寻干戈以相征讨太素矜太玄之弱尝听其增甲兵布行陈定营垒然後与之战而太玄傲然不服转战逐北刘其边陲俾扰其腹心掳掠其士卒攻围侵断智诈百出战罢効首虏计土地虽胜负不常而太素之胜居多其用兵之法虽临事制变不可窥测然循理而动致人而不致于人者常胜不计利害深入浪战者常败有知兵者从旁观之曰此无他争先法耳夫方城圖四境之内地方不过数百里而二子之战积月累岁纷拏不解此与蚩触国於蜗角时相与争地而战伏尸百万流血千里者亦何以异然二子方其战酣时不知天之高地之厚寒暑之切肤饥渴之为患昼战不足继之以夜盖有血气者皆有争心而二子特甚焉其善用兵出于天性非积习所能致每战军士皆衔枚但闻击搏之声进退缓急惟所指使虽战死不离部伍战胜亦无敢讙譁以争功者其操术然也方城侯为人方整严重外虽有廉隅边幅而其中坦然二子圆猾黑白太分勇而好鬪殊不类其父风然要自方城侯教导指纵之使然与斟灌斟寻氏兄弟相攻而宋人教其子为儒墨者异世而同科二子既日以攻战为事陰谋奇计传於後世搢绅之士多

好之者然弗专心致志则弗得也有业其术得待诏金马门者往往善其事而闾巷厮役辈亦喜称道之然习之弗精不善攻战而资守势至有以缓颊游说而胜者方城侯之学衰焉

太史氏曰世多咎方城侯教二子不以诗书礼乐而以兵家法攻伐不休废时乱日欲执其父子投诸江与共鯨鼉兜流窜放殛同其罪殊不知方城侯之学法象所寓有圣人之遗意而军旅征伐先王所不废也永日多暇游目方城命二子小试勒兵掉鞅摩垒折馘执俘鬪智角力相与周旋亦有足观者殆孔子所谓为之犹贤于己者乎

文城侯传

文城侯符君平者其先黄帝时人也以谟画佐帝造书契代结绳之政为之符玺以信之帝嘉其功赐姓符氏号文城侯後世子孙因袭封不絶君平之为人刻志砺已表表自见能文章习古文奇字史籀之学虫书繆篆精甚外虽有边幅廉隅而其中坦然明白可见腹心与人交虽方圆广狭不常然终始如一重信义不轻为然诺有求其文者虽閱千万不少变以故天下信之虽官府必待君平然後决疑当秦始皇帝时甚见尊宠得蓝田美玉以为君平饰置诸左右登封泰山降禪梁甫泥金检玉之事君平之力为多卿相二千石往往以金遗之士大夫亦以嘉木肖其像貌私相问劳其贵重一时如此秦亡刘项战争君平无适莫游楚汉间高祖资狎侮善骂内喜君平而外轻慢不为礼酈生画策则趣铸之留侯借筯则趣销之赵尧一言合则命君平拜以为御史大夫以故羣策毕进遂得天下项羽爱人待士遇君平甚厚至为之抚摩然未尝任使之慙羣策而自屈其力此其所以失天下也世不多君平之功而多高祖者以此君平亡子孙咸至大官或奉使絶域以明汉之威德王莽末改赐姓章氏匈奴单于念旧德为侵犯北边以求复其故姓其得夷狄之心如此然子孙遂以章氏为姓至唐有仕于司农者朱泚之乱以铁骑五千逼奉天司农卿段秀实以谓宗社危在顷刻命往追之倒屣颠沛及于半途德宗遂免于难世以此称其忠然其族人多夸诞诡异居丧者虽于金革之事类皆墨縗世亦以此少之章氏之风衰焉

太史氏曰文城侯立志节以信着天下而奸诡往往窃借其名以行故庄周氏推原罪始欲焚破其家使民朴鄙然议者弗之贬而周之论为过何哉信反而为伪者诚非其罪故也观文城侯信一立而後世子孙咸显白於当世积善之报有以夫

梁谿集卷一百五十五

<集部,别集类,南宋建炎至德佑,梁谿集>

卷一百五十六

钦定四库全书

梁谿集卷一百五十六 宋 李纲 撰文

放蜚文 持八斋文

中隐堂上梁文 桂斋上梁文

放蜚文

客有馈梁谿以双蜚者梁谿再欲杀之再欲活之游宦西北不飧南食也久矣之蜚也於海物中厥味尤珍以是义故欲再杀之然观其形则负介而重迟察其情则若无罪而就死地庖治之法必以斤斧生加斩剉而後可食在彼者受无量苦而又一蜚之中有百千子杀一蜚则百千子皆随而死在我者造无量业以是义故再欲活之疑而未决置于庭中是夜梁谿梦二人一大一小拜於几案之前若从人之遭谴而祈释者叱之不去其拜不已惊魇而寤徐思所以岂畴昔之蜚而为此耶期以明日尚生则舍之旦而视诸庭中则大小相随蹒跚然固自若也梁谿喟然叹曰尝一脔之味厌口腹之欲而使彼受无量苦使我造无量业其轻重为何如因命小舟载之谿之中流而放焉或者曰万物之最灵者人也人不能见梦于人孰谓蜚而能之乎梁谿曰不然善恶之法皆由心造方予之得是蜚也杀活未决疑而置之则一念之善已周圆矣彼感于梦寐之间者乃吾之心蜚何与焉虽然清江之使见梦于元君庖中之蛤见梦於杨杰自昔以异类而能感通于人以全其生者多矣奚独于此而疑之或者又曰蜚生於南海咸波之中今置清谿处非其所又喜曝殼于沙泥之上人且见而取之其於死也何择梁谿曰不然一心之外无余仁一仁之外无余法吾之放是蜚也赦于刀几而错於安全之地知达我心而已矣处非其所而他人得之吾何与焉昔齐宣不忍牛之觳觫以衅钟以羊易之而孟子以为仁术子产命校人畜鱼于池校人欺而烹之子产以为得其所哉自昔达其心而不恤其往者多矣奚独于此而诮之噫有血气之类者好生而恶死物之与人均也以强凌弱暴殄天物遞相杀害无有休已故佛菩萨设为戒律使持戒者戒杀为先今予虽未尝杀而亦未尝持戒则于杀有时而不免焉自今以往当持杀戒实由兹蜚始姑为文以识之宣和二年四月十五日梁谿居士云

持八斋文

斋洁也不饮酒不茹葷以洁已焉儒道释三家皆有斋其为斋则同而所以为斋则异儒家之斋以奉祭祀而致其明故君子於斋必变食惟去其物之可昏溃志意者道家之斋以养神气而致其清故虽五谷犹将辟之而况于血毛之荐乎惟释氏之斋非独其致清明而已也又寓之以爱物之仁修身之智焉其说以谓有情之类含血孕气羽毛鳞介皆具佛性好生恶死与人均也强弱相陵愚智相欺取于网罟圈牢之间置于刀几鼎俎之上炮燔脔割以自充饱仁

者不为也人之与物万死万生犹如车轮互为高下今食其肉後必报之通相噉食无有穷已智者不为也以是义故使之持斋茹蔬一食永断诸业有未能者以渐教之或持六斋或持八斋或持十斋半月一月以达终身非善方便孰能如此余自今夏观閱藏教以酬宿志始持八斋凡遇朔望三日八日必斋虽于肉食未能一切断去庶几有进无退至于永断而後乃已因为文识之以记岁月使异日无负斯言有所考焉时宣和二年四月十五日梁谿居士云

中隐堂上梁文

梁谿十里贯震泽以旁流惠山九峰据兑方而高峙崇冈茂林环于後梵宫琳馆参于前爰卜我居为终焉计不奢不陋粗合于规模匪丹匪青詎慙于轮奐迨其吉日举此修梁面平池之渟渟旁小阁之 崧松竹交?兰菊腾芳不朝市而不山林於焉自适有龟鱼而有泉石可以相娱方将絶学忘忧杜门养拙卧北窗而风至窃自谓羲皇上人耕南亩而秋成犹可乐尧舜之道引壶觴而宴朋旧咏图史以亲弟昆优哉游哉聊以卒岁知足知止夫复何求

儿郎伟抛梁东习习春臯转谷风舒啸但能同靖节醉乡何必记无功

儿郎伟抛梁南梵宇琳宫气象参日射楼台增壮观风传钟磬助清谈

儿郎伟抛梁西九峯秀色照梁谿面野已开清贵阁临流更筑钓鱼矶

儿郎伟抛梁北千里云烟瞻紫极山林幸遂麋鹿心犬马敢忘天地德

儿郎伟抛梁上璧月珠星森万象此心惟有彼苍知屋漏期无愧于仰

儿郎伟抛梁下大地山河同一马此心暂寓太虚中一区聊作逍遥者

伏愿上梁之後兄弟无故朋友方来化日舒长获潜心于圣道丰年和乐助击壤于尧民自天佑之吉无不利

桂斋上梁文

螺江入海引朝夕之灵潮鸡岫连云萃川原之爽气兹为福地爰卜寓居植双桂于僧园结数椽之茅宇虽慙肥遯实获素心同乐天鑪峰之草堂继惠远虎溪之莲社迨其吉日举此修梁突兀东山揖灵源之胜槩苕苕西岭藉高木之清陰翦剔荆榛既开三径疏治【平声】潢潦爰凿两池松筠俨以成行荷芰纷而擢秀滋兰菊以共畹艺芝术而接畦嘉橘芬芳緑苞露重荔支璀璨丹实星垂芳菲不絶于四时泉石粗供于一壑铜瓶夜汲有风月之陪从蕙帐晓开无猿鹤之惊怨蓬户常关而雀罗可设花径不扫而朋簪自来一觴一咏以畅幽怀三沐三薰以语至道细推物理洞观天地之情广览前言备极古今之变曝然放杖而笑莞尔抱膝而吟餌药扶衰愿究无生之学登山临水终谐乐死之心冒危险以全身已凭天造享优游而卒岁

实荷皇恩敢效欢谣聊陈鄙志

儿郎伟抛梁东日上千峯海气红未向扶桑倚长剑且浮瀛渤看珠宫

儿郎伟抛梁西乔木侵天夕照微但愿长庚敛鉞角最怜新月挂娥眉

儿郎伟抛梁南翠竹苍松秀色参南极老人疑我是笑将白发照澄潭

儿郎伟抛梁北魏阙迢迢拱宸德斗车错落转高秋帝座荧煌明紫极

儿郎伟抛梁上合璧连珠森可仰寸诚何以格苍穹空余缥缈青霞想

儿郎伟抛梁下秋色初来正潇洒已惭谢傅卧东山更愧裴公开绿野

伏愿上梁之後年书大有运际中兴安枕山林之间不愁羣盗争席渔樵之侣谁识故侯采薇
散发而为物外游乐圣衔杯而得醉中趣放怀自适与世相忘自天佑之吉无不利

梁谿集卷一百五十六

卷一百五十七

钦定四库全书

梁谿集卷一百五十七 宋 李纲 撰说

种花说 医国说

清议说 蓄猫说

防盗说

种花说

乐全翁晚节於世味无所嗜惟酷好种花凡远方絶域嘉葩异卉有可观者无不求也求而得之植于小圃之中虽祁寒隆暑艺非其时亦无不生者以故圃中之花色色有之既以自娱又以娱客虽他处少其比非特甲於沙阳而已梁谿暇日过而问焉曰子之嗜花有说乎乐全曰然人之嗜花为物所转玩顔色之美好嗅馨香之条鬯足以悦可其意斯已矣吾之嗜花独观其变雷风之所震荡日月之所照烛雨露之所滋润雪霜之所凌挫或茁其芽或敷其英或归其根或成其实四时之变无穷而花之变亦无穷也方时未至若闭苦藏不可强之使开及时既至若愤若怒不可抑之使斂开已而谢则虽天香国色飘零萎落复为臭腐莫可得而留也况其余乎吾尝以是观之则生化化之理在吾目中矣梁谿曰然则子之种花有道乎乐全曰然人之种花助之以人动摇以观其疎密爬剔以验其死生而花之憔悴者已过半矣吾之种花全之以天相其土壤以培?之时其旱乾以灌溉之遂其根本而封植之顺其枝叶而芟治之不益其生不害其长蒔之若子置之若弃任其自然而不敢容私焉彼花之性各不同也或喜阳而恶阴或爱寒而畏暑利燥者宜高利湿者宜下习于其性而人之与花相得于思为之表则远方絶域花之植于吾圃者不异植于其土也虽欲不硕茂而蕃滋得乎梁谿欣然曰吾闻乐全之言得养生焉自吾一身观之由少得壮由壮得老爪生齿长筋转脉摇无须臾停而发之鬢黑者浸假以白肤之充盈者浸假以皱生灭之法念念迁变而况于吾身之外宠辱穷達是非利害耶其来莫御其去莫止是物之傥来寄也不似夫花之荣枯代谢乎万物皆备于我反身而诚不以人灭择其善而固执之则仁义礼智之端油然而生矣彼揠苗助长一日暴之十日寒之者未有能生之者也然而人之赋性亦各不同尊主强国者寓意于功名游居讲学者服情於理义蹈山林者遯迹而长往履廊庙者抚世而进为各适其适而相忘于江湖则其性得矣若夫屈折羈束而强其所不然其不病者几希不似夫花之得性则遂茂而失性则枯槁乎虽然观花以变而有所谓不变者存全花以天而有所谓相天者亦不废焉内求诸身则所以养生者亦若是而已矣乐全曰唯唯因叙其语为种花说以自警云宣和庚子孟夏寓轩书

医国说

古人有言上医医国其次医疾然则国可医乎曰可若之何而医之曰天下虽大一人之身是也内之王室其腹心也外之四方其四肢也纲纪法度其荣卫血脉也善医疾者不视其人之肥瘠而视其荣卫血脉之何如善医国者不视其国之强弱而视其纪纲法度之何如故四肢有疾汤剂可攻鍼石可達善医者能治之犹之国也病在四方则诸侯之强大藩鎮之跋扈善医国亦能治之验之于古则汉贾谊唐裴度李德裕是也至于心腹有疾其始不治养其膏肓攻之不可达之不及则虽有善医者无所措手而况于庸医乎庸医不量其疾之不可为而引毒药以攻之则疾虽去而人亦亡矣犹之国也病在王室则阉宦乱政奸邪擅权虽智者不能善其後而区区庸材外假强臣之力以锄之阉宦奸邪虽去而国亦移矣验之于古则汉唐之末是也高祖由布衣得天下惩秦孤立之弊裂海内以王同姓矫枉过正分地太多贾谊忧焉欲以策销弱之当时不能用其後有七国之变至武帝时主父偃祖述谊策下推恩之令而诸侯寢以衰微唐自安史之乱权归藩鎮飞扬跋扈不贡不朝者不可胜数宪宗得裴度武宗得李德裕而相之四方僭乱元恶大憝以次讨平此病在四肢而善医者能治之之类也东汉之末阉宦奸邪得志以起党锢之狱当时之臣不胜其愤外引强臣以诛之而董卓曹操因以亡汉唐之末阉宦奸邪得志至脇迫其君而幽辱之当时之臣不胜其愤亦外引强臣以诛之而朱全忠亦因以亡唐此病在腹心而庸医引毒药以攻之之类也然则若之何而可曰圣人治未病不治己病不幸有腹心之疾而未至于膏肓则当以药石早为之计言者国之药石也通天下之言路使忠义之士得伸其舌而奋其笔嘉言谏论骨鲠之说日陈乎其前正气胜而邪气销庶几其国有瘳乎若夫深闭固拒以卖直钓名钳天下之口忠言不进而惟谀佞之是闻正犹抱心腹之疾者未尝进苦口之药而日以甘肥悦其意而增其疾欲无膏肓不可得也然则进苦口之药而彼吐之则如之何曰进之者在我吐之者在彼虽或吐之而药之气味必有入也与夫日以甘肥悦其意而增其疾者固有间矣今有疾者一则进药石以蕲其安一则坐视而不救虽药石之功未必效不犹愈于坐视而不救者耶作医国说以遗後之学医者

清议说

国之治乱存亡而君子小人之所以劝沮消长者皆系乎清议清议者出于人心之同然而合天下之公论者是也虽万乘之尊以清议而有所屈虽匹夫之贱以清议而有所伸位三公禄万鍾而清议之所不与则适足以为辱蹈鼎鑊罹放逐而清议之所与则适足以为荣惟义之所在而不可以智力争也君子观焉慕而欲其至甚于爵赏小人惧焉畏而不敢犯甚于刑诛是清议为天下之大闲而不可以一日无者也朝廷之上以此崇獎而使清议在上则足以致治而成功士大夫之间以此激昂而使清议在下则虽不足以致治成功而亦可以为持危扶颠之术至于上下咸无而清议熄则乱亡之道也尧舜之时所进用者禹稷臯陶之徒也所推逊者朱虎熊黑之徒也所流窜放殛者共鯀驩兜之徒也当是之时清议在上故其治功之盛後世想望而不可跂及岂非致治成功之效耶东汉之末阉宦得志奸邪擅权朝廷秽乱而李膺范滂之徒相与激浊扬清砥砺名节毅然有不可夺之志当是之时清议在下故汉室虽微奸雄熟视而不敢取岂非持危扶颠之效耶至于上下咸无而清议熄则若五季是也方五季时君臣上下智诈力争不复知有所谓清议者故卖国贩君同乎市道终始五十年间而易姓者六七自古乱亡之世未有若此之甚者也然则清议之在天下曷可一日无哉故尝譬清议之在天下犹元气之在人也方元气之盛邪气无自而入则疾病不作而寿考康宁及元气之

衰而邪气乘之则疾病交攻然犹未可得而死也至于元气散则死矣清议在上元气之盛也清议在下元气之衰也清议之熄元气之散也何哉清议者其本出于朝廷进贤而退不肖内君子而外小人以爵禄生杀废置予夺之柄为大公至正之道者是也上失其道而所进者非贤所退者非不肖所内者非君子所外者非小人然後下得以私义自高私智非其上而爵不足以贵之禄不足以富之生杀废置予夺之柄曾不若片言之褒贬而清议始移于下矣虽然犹愈于熄也清议熄而礼义廉耻皆亡则所以为国者非其国几何不至于夷狄乎尝以诗观之卷阿者成王之诗也其言曰蔼蔼王多吉士维君子使媚于天子蔼蔼王多吉人维君子命媚于庶人夫以贤者蔼蔼之多而上则媚于天子下则媚于庶人岂不以清议在上故耶雨无正幽王之诗也其言曰云不可使得罪于天子亦云可使怨及朋友朋友责我以义者也进为天子所使而责我以义者怨焉岂不以清议在下故耶至于清议废则王者之迹熄而诗亡矣呜呼朝廷之上若之何而可以不崇獎士大夫之间若之何而可以不激昂哉作清议说以告

蓄猫说

病叟寓长乐城东之佛宫游居寝卧于一堂之上几杖图史悉存其中每夕辄为鼠辈之所扰其始也唧唧咀咀吟啸相呼乍进乍却以摇其须其卒也伺昏出穴沓走羣趋掀箱嚙橐循沿盘盂凡果实之在箱篋者汁滓之在瓮盎者书籍之初装褫者衣裳之非在笥者类遭残毁相逐相鬪缘梁破牖其声喧然卧不得安僮仆之黠者窒隙罅以杜之设机械以误之质鬼神以诅之凭符籙以尸之其术殫而不能去客有请病叟曰隣刹之猫俊而甚武其斑如狸其猛如虎盍假而蓄之庶几可御病叟从其言猫至之夕鼠辈屏迹悄然无声寝安于席病叟喟然叹曰鼠为子神其次玄枵隐伏善盗坎艮之交昼伏夜动齿而不牙穿墉穴壁所至为家是无益于物而能害物如蚊?与蚤蝨虽天地不能不生而能生猫以制其昌永某氏不蓄以罹其殃甚者至于舞子端门为妖为祥今予假一猫而羣鼠自息是岂能尽扼其喉而杀之哉威讐之也有天下国家者任贤使能蓄威望士以为用则盗贼不敢起奸宄不敢作敌国不敢议故士会在晋而羣盗奔秦汲黯在朝而淮南寝谋赵奢李牧吴起廉颇之徒用于国而四隣不犯何以异于猫之制鼠哉不然则虽劳心殫术未见其能御外侮也作蓄猫说

防盗说

病叟所居佛宫面平野而枕崇冈左右皆荔支蔬果之圃虽缭以周墙而旷僻为甚每夕必命仆隶巡徼击柝以戒适亲戚家有?姻之事从者尽行其夕不果僦有盗穴墙以入发柜探囊而趋所失甚衆病叟笑曰此吾不戒之过也彼为盗者妄意室中之藏朝夕营度伺间投隙以求其所欲如小人之窥君子邪气之侵肌肤一有不虞则堕其术中矣今强盛之寇愈肆凭陵僭窃之国益以鸱张垂涎拭目贪婪窥伺日有渡江南牧之意而庙堂之上玩岁愒日偷取安逸怡然不以为事沿江诸鎮将骄卒惰无扞患御侮诚死边疆之心卒然有警其何以抗之哉作防盗说

梁谿集卷一百五十七

卷一百五十八

钦定四库全书

梁谿集卷一百五十八 宋 李纲 撰答

答宾劳

释

释疑

辩

华山辩

对

钓者对

答宾劳

宾劳主人曰盖闻士生於世不逢则已苟逢其时则必下收衆誉上结主知舒翹扬英发策吐奇随势如转圜应变如发机默于所当默为於所当为服冕乘轩衣绣执珪泽被九族荣耀一时今子奋身寒苦遭世隆昌历金门上玉堂载笔螭?日侍清光曾不能结舌钳口循默自守功名富贵计日可取顾乃犯忌触讳志濶论疏效长孺之妄发类平仲之退趋幸蒙寛恩薄谪坤隅倥偬筦库沈迷簿书曾不愧悔色泽肤腴何其谋身之拙而执心之愚乎子殆病矣我其劳诸主人隐几輒然笑而答之曰若子之言无自而可我将劳子而子有何劳于我也尊尊而君卑卑而臣君臣之义人之大伦袭爵履位上下以际各尽其道非相为赐故献言而计效者臣也听言而出治者君也忠臣不避死以立节志士不求生以害仁知致其在我者而已及其成功则天也昔者吕望兴周於屠钓伊尹干汤以鼎俎甯戚悦齐桓於饭牛百里奚得秦穆公于五羖冯唐以立谈而感文千秋以片言而悟武马周由草茅而合太宗娄敬脱挽辂而说高祖收功当年垂誉千古今予人虽微而屡蒙于擢用位虽卑而接武于侍从与闻国论职书言动僥遇事而緘默恋爵禄之荣宠虽保身之计得将获罪于天之是恐观于古人槩可考焉舜命臣以弼违孔立教于犯顔周设官以诏嬖而谏恶轲着书以陈善而责难西旅贡獒而召保训太庙纳鼎而臧孙言其骤谏如赵盾其强谏如鬻拳时运而往风流犹传或伏蒲以移晷或还笏而归田上足可蹶帝裾可牵或额叩于龙墀或血污于车轮斧钺在後鼎鑊在前咸蹈祸而无悔岂邀福于未然前者仆矣後者继?轻一死於鸿毛安天下於泰山故能使当世之主勉强以听感动而悛或藏断罟以志良谏或存折檻以旌直臣是以士颇得行其道而振其气虽匹

夫之贱而有所伸虽万乘之尊而有所畏卫先王之正道立天下之公议底生民之大福为社稷之长计夫然後士为可贵也今则不然上有仁圣愿治之君下无骨骸敢言之臣其旷大之度寬隆之德天覆地载海涵春泽假狂妄之或闻罪不过于黜谪靡闻抗论危言之士诛戮以窜殛也而士咸佞佞睨睨拘拘戚戚取容娵阿拟步蹶蹶翥肩蓄缩卷舌噤默观时低昂逐势反侧保宠禄以饗富贵其视天下漠然如越人视秦人之肥瘠譬犹仗下之马韁上之鹰饱毛血而不搏饫刍豆而不鸣俗日益媮士日益轻其何以功利社稷而纪纲朝廷乎今子惜我以功名富贵之失病我以筦库簿书之繁以此见劳又或不然以展禽之仁三仕而三黜以仲尼之圣委吏而乘田鲁连抗志于蹈海仲子辞荣而灌园子云不能汲汲而执戟望之不肯碌碌而抱关士各有志语不同年以此易彼未知孰贤予虽负於罪戾犹得齿于官聯职事粗办逸居饱餐入则左图而右史出则前溪而後山从吾所好其何适而不安也且予闻之天回地游日居月诸尘迹俯仰急景须臾葛藟空之野马忽过隙之白驹旅浮生于万世寄眇质于八区守满堂之金玉眷强名之妻孥节概不立道义缺如自昔富贵而磨灭者不知其几何咸梗莽而邱墟方窃窃然自以为智不亦愚乎且夫祸福倚伏变化杳冥震荡回薄未尝暂停彼秋之摇落为春之敷荣彼冬之凜冽为夏之歊蒸霁极则雨兮晦极则明剥终则贲兮否终则倾管仲射钩兮卒为仲父傅说胥靡兮乃相武丁体道出处因时止行穷非我病達非我荣虽死生不足以动心又何富贵之与功名抑又闻之道贵常虚物禁太盛富为怨府贵为祸柄隙不在大力难久胜德裕衅兆于奉策霍氏祸萌于驂乘与其一跌而赤族曷若退居闲处乐天而知命予方筑室山林买舟江湖冀蒙贷宥得归故庐乐惠山之泉石友梁谿之龟鱼圃有松竹几有诗书晚食当肉安步当车玩意寂寞游心物初以此终身又安知荣辱利害之所如也若夫方朔以滑稽而玩世钦明以奸谀而托儒主父愿烹于五鼎伯伦寄傲于一壶商鞅挟三策以钻孝公终军请长缨而系匈奴韩非立言于五蠹孤愤之说苏秦励志于捭阖揣摩之书仆诚不能与数子者并故默然独守吾之拙愚

释

释疑

宣和改元夏六月京师大水自都城之西渺如江湖不见涯涘踰汴堤循顾子门以及北郊浸辟雍荡玉津园以及藉田漂溺庐舍人畜不可胜计于是诸门悉上藉新城以为固独东方门南界汴堤北距夷门山水所不及而去都城十余里决汴渠灌田野间以杀水势于是漕运不通而畿甸悉罹水患矣先是暴雨有异物形如龙蛇自雨中降获而杀之识者以为水祥已而果然予时备员左史心独异之窃观主上降诏遣使所以忧劳者甚厚在位者缘此必有发愤纳忠之人乃寂不闻愚戇不能自已因奏疏论列大意以为祖宗都汴百有五十余载未尝少有变故今事起仓卒迹远惊惧诚大异也夫变异不虚发必有感召之因灾害未易弭必有销伏之策宜寅畏天戒招徠说言修祖宗故事以慰天下之望且请因侍立许直前奏事以尽区区所欲言者时十有三日也疏奏屏息以俟而是日无命翌旦造朝侍立如常仪既而宰执奏事班退传旨合门令先退不复得对因上章待罪遂有沙阳之谪客有献疑者曰有官守有言责子以记注为职无言责而论事非侵官乎予应之曰古之为臣者皆可以有言于君故有师箴瞍赋蒙诵百工谏近臣尽规之义後世官守言责既分则独执政大臣侍从论思献纳之官

与夫任台谏之职者可以言天下事左右史虽卑然日侍天子清光以记言动居两省缀侍从末班遇所当论者论之乃其职也曷为侵官昔唐魏謩由右补阙迁起居舍人文宗谓之曰事有不当毋嫌论奏謩对臣顷为谏官故得有所陈今则记言动不敢侵官帝曰两省属皆可议朝廷事而毋辞也祖宗之制虽鎔职许论事况左右史乎冯京范仲淹皆以左右史论事罢去唐介文彦博相与廷辩则蔡襄直前论之以所论不当为罪则有矣未闻以侵官为罪也子曷不责今之不言而旷官者顾乃责我以侵官也客曰然则近世任此职曷为无论事者予应之曰左右史去侍从一间耳幸而不以罪去给札召试则进居侍从之列今人以得侍从为荣故例为循默以俟迁耳客曰然则吾子何不为之意有所蓄姑俟他日未晚也予应之曰是何言与人臣以利为心者可与事君也乎哉贪位慕禄遇事循默而不敢言非以利为心欤以利为心则亦无所不至矣且士气不振久矣在下者惟知爵禄之可贵而决性命之情以争之在上者惟知以爵禄足以笼天下之士而视外廷之臣蔑如也予为此惧窃不自量欲以区区之身而救一时之弊岂苟然哉况夫以左右史为未可言而必待侍从以侍从为未可言而必待执政以执政为未可言而必待宰相以宰相为未可言而又必待其时则果何时而可以言耶此特保富贵为妻孥计者之论耳未可与语以道事君之说也客曰当其可之谓时故言于可言之时则从言于不可言之时则凶今子之言时乎予应之曰当其可者谓当夫事之可者也当夫事之可则为时故时然後言人不厌其言如必待其时之可则龙逢比干之徒当为罪人矣昔之君子於?有道则危言危行故鯁直之论必陈于圣明之主而防患之说必出于治安之世禹之戒舜以无若丹朱傲惟慢游是好太保之训武王以不矜细行终累大德以帝舜武王而其臣之所告者若此何哉爱君之诚深则纳君之言切故也客曰子之职当言而时可言则吾既得闻命矣敢问子之言曰变异不虚发必有感召之因灾害未易弭必有销伏之策夫灾异之说起于汉儒今子之言若是揆于吾圣人之学得无戾乎予应之曰昔高宗有雉雊之异而祖已训王以先格王正厥事宣王遇旱暵之灾侧身修行而王化复行孔子作春秋于灾异必书所以谨天戒也汉儒乃附会而为之说牵合穿凿使人难信此所以得罪于圣人若夫遇灾而惧正厥事以谨天戒乃吾圣人之旨也何戾之有客曰借使子得请而直前则所论者将何为予应之曰孟子不云乎一正君而国定矣所谓正者岂事事而为之哉特在夫心术之间耳兹事体大未可以立谈判也客愕然曰曩也我有疑于子今闻子之言涣然冰释矣因叙其语以为释疑

辩

华山辩

五岳之名若岱宗为告代之所嵩处中而特高衡居下而适平其理皆可以意推独华山命名之义最为难晓字说谓华西方岳也故指所生物与琥同意说者曰白虎通谓少阴生华夫物以春华故素问言天地气交万物华实西方乃擎歛之地何华之有说者又曰华山有莲华峰其上生莲华退之诗所谓太华峰头玉井莲是也指所生物因是得名夫草木之华皆华也何独取夫莲华而谓之华哉窃尝疑此说以为未然元符间予游西过华阴纵观太华自平地斗起数万仞气象雄伟与衆山之迥迥不可同日语也今来沙阳见其图于罗丈畴老家畴老顷尝官华州得此图尤不失真开视恍然与昔见无异因得其所以命名者周官曰使无华离之

地礼曰为天子鬻瓜则华之凡有所分者皆为之华故草木之华谓之华者以其分故也山之形类多上锐独太华其上翼然分而为二如草木之华故名曰华者以山之形名之也其旁小峰与之相类则曰小华山意可见矣以经考之凡山之名有曰熊耳者有曰龙门者有曰砥柱者有曰析城者皆以山之形所相似者名之矣奚独于太华而疑之事不亲见而为之臆说可乎此不可以不辩

对

钓者对

李子游于沙溪之阳有钓者焉盘鍼以为钩擘粒以为饵持竿历时然後有食者引之得鱼才数寸鳞鬣虬然钓者有喜色李子戏之曰嗟乎子之钓何其所得之微也子亦知夫龙伯之国有钓鳌者乎渭水之滨有钓璜者乎富春之渚有钓名者乎子胡不释此而从彼钓者忿然作色曰子之讥我岂不以彼之所得者大而我之所得者小耶彼之所得者虽大然旷日持久又不可必我之所得者虽小然朝夕有获焉方吾沉钩投饵引纖鳞于清波之上与夫连六鳌获双璜得重名者亦无以异也吾方待此以充吾之昼餽又安能释此之甚易而从彼之甚难哉挈其鱼不顾而去李子叹曰天下之事多有似钓者之所谓者今夫抗志立身学王佐之略致君泽民显当年而名後世固不若禄仕全躯保妻子之为易也非特为士者如此而为君者亦然今夫帝王德业百年而後兴必世而後仁固不若霸者富国强兵之为易也非特为儒者如此而为佛者亦然今若菩提涅槃盘积刼修勤化导有情固不若声闻独觉自了疾证之为易也易者顺流而趋难者望崖而反此世之人所以多舍大而乐小也悲夫因书其对以自警

梁谿集卷一百五十八

卷一百五十九

钦定四库全书

梁谿集卷一百五十九 宋 李纲 撰非救

非权 救偏

原

原正 原中

贵

贵畏 贵和

非权

语曰可与适道未可与立可与立未可与权权者古人以为难而今人以为易何哉古人之所谓权者所以为道也故巽以行之而不失其正今人之所谓权者所以为利也故机变之巧无所不至则诈而已矣孔子于南子见所不见于阳货敬所不敬所谓权也告子路以予所否者天厌之诺阳货以仕而终不仕则权而不失其正故曰于卫主痼疽于齐主侍人瘠环何以为孔子孟子对梁惠王以今乐犹古乐对齐宣王以公刘好货太王好色文王好勇所谓权也然於乐言独乐不若与衆於色货勇言与百姓同之於王何有则权而不失其正故曰枉寻直尺而利亦可为欵用权者必若孔孟而後可也今之人则不然其所以用权者为利而不为道故君之所言而然未尝有所可否焉君之所行而善未尝有所正救焉昔之寒心而变色者相与締交而不以为羞昔之骇闻而罕见者相与公言而不以为耻其言曰吾之权术在是不如是则吾身之不能安也吾富贵之不能保也然则其所谓权者果为道耶为利耶其与古人之权果有异耶其无异耶夫权犹权也以轻权重使无失其平古之人遭变事不得已然後用之今之人一切用权以为安身保富贵之术而风俗益以媮纲纪益以坏奸佞益以肆言路益以塞天下日受其弊罪在于大臣之用权于斯时也又欲以权济之是犹以火救火以水救水其名日益多然则如之何而可曰必正而後可

救偏

或曰比年以来人才之进退政事之废兴何其纷纷也其孰为是耶其孰为非耶曰自其所持之说言之则皆是也自其执一端而不能反者言之则皆非也何哉比年以来操天下之柄者所持之说大槩有二一则曰必为寛大一则曰必为摯歛为寛大者之说曰四海至广生齿至衆以天下之财而养天下之人立天下之事诚得理财之术则何患乎不足此其说是也至其

弊则以节用为非而官吏之冗滥政令之猥并蠹国害民虚竭帑藏而不可继岂非执一端而不能反故耶为拏歛者之说曰天下之财入有常数不务节约而量入以为出则糜费多而蓄积竭将无以为国此其说是也至其弊则一切务为削弱而省官太多士夫至于失职罢事太过天下无所取信又其甚者聚歛掊克伤国体而失民心岂非执一端而不能反故也二者之说若东西之不相比若水火之不相入迭相毁誉更相排斥方其是时而说行则人才由之而进退政事由之而废兴人才初不问其贤否也进非其门则竭力以排政事初不问其当否也建非其意则滕口以议是以十余年来纷纷不已搢绅实被其祸而治功亦不克成者其弊在于操天下之柄者各执一偏之见而无公天下之心也然则如之何而可曰必中而後可

原

原正

孟子曰惟大人为能格君心之非君仁莫不仁君义莫不义一正君而国定矣夫所谓正君者岂在夫颊舌之间或进退去就不失其正使人君之所敬畏而取法焉易曰进以正可以正邦也孔子曰所谓大臣者以道事君不可则止此进退之不失其正者也孟子曰迎之致敬以有礼则就之礼貌衰则去之此去就之不失其正者也夫惟进退去就不失其正故道可行于君献可而替否陈善而责难非尧舜之道不陈于其前而人君正心以正朝廷正朝廷以正百官由修身齐家推而達之天下所谓一正君而国定者不其然乎後世之为臣者则异于是其未得之也患得之其既得之也患失之苟患失之无所不至是以率皆操权术以事其君机变之巧谀佞之辞显行而公言之不以为羞内结嬖佞外植党与惟恐人之轧已而爵禄之不固也欲其正君而定国也难矣哉或曰事固有逆取而顺守者以权术取之以正道守之则如之何曰始正而终邪者有矣未有始邪而终正者也商鞅因景监以见而赵良寒心李训郑注因王守澄以进而识者知其必乱进不以正而能正人者自古未之有也或曰管仲以其君霸君淫亦淫君奢亦奢不如是不能趋时以成功曰管仲霸者之佐耳得君之专而功烈之卑曾西之所不为也何足道哉或曰必欲以正没世不行则如之何曰道之将兴也与命也道之将废也与命也可行则施之以为人不可行则歛之以为己穷则独善其身達则兼善天下没世不行何病之有

原中

洪范于皇极之畴言无偏无党王道荡荡无党无偏王道平平无偏者言其所居也无党者言其所与也以所居之无偏而所与者无党故足以致广大而荡荡以所与者无党而所居者无偏故足以致辨治而平平其本皆在于皇极而已皇者何道也极者何中也人君以道致中而偏党之名不立则广大辨治者乃其效然也舜执其两端用其中於民非无偏与汤执中立贤无方非无党与後世以立事则常患乎有偏以用人则常患乎有党曾不足以望治古之隆者凡以不知所谓以道制中故也夫独陰不生独阳不成陰阳偏毗其在天地则为灾其在人则成疾惟陰阳适中而冲气以为和然後风雨节而寒暑时血气平而形体康自然之符也比年以来务侈大者至于泛滥而无均节之法务拏歛者至于削弱而无变通之术立事之有偏孰

甚于此用此则凡彼之所汲引者皆逐而去用彼则凡此之所论荐者皆斥而远用人之有党孰甚于此惟其有偏故事不议其是非非已所立则一切废之惟其有党故人不察其贤否非已所用则一切排之是以十余年来治功不克有成而搢绅实受其祸者不能以道制中之过也为今之计莫若建用皇极以照临百官事惟其是而不问其出于谁之手人惟其贤而不问其出于谁之门兴治补弊而使事无遗利坏植散羣而使人无比德人和而天地之和应然後治可几也其或不然代废代兴一僨一起更为胜负而偏党之弊益深则虽有智者亦不能善其後矣

贵

贵畏

或问人主何所贵曰贵畏曰何如其贵畏也曰大哉畏乎子畏父然後为令子臣畏君然後为良臣畏我友朋乃无失德畏此简书乃无瘵官袭诸人间未有不须畏以成者况人主履至尊操利势擅威福以御宇内合四海之广士民之衆北面而臣服之非有所畏则何所为而不可是以其上必畏天次必畏民其次必畏相其次必畏天下之言诗曰畏天之威于时保之此畏天者也书曰予临兆民嚮乎若朽索之御六马此畏民者也自成汤至于帝乙成王畏相非畏相坎导民者宣之使言非畏天下之言坎夫惟知所畏者如此故能恐惧修省上以谨天戒哀矜惻怛下以得民心敬大臣以尽其谋开言路以通其志未有不措天下于大治者也及其反是则矫诬上天以布命于下非所以畏天也谓己有天命非所以畏民也昵比奸邪而远天下之贤则相不足畏也贼害谏辅而钳天下之口则言不足畏也是四者一无所畏而肆于民上未有不措天下于大乱者也然则自古以来兴王之所以寢明寢昌亡王之所以寢微寢灭者无他畏不畏之间耳传曰畏天者保其国又曰君犹舟也民犹水也水能载舟亦能覆舟又曰入则无法家拂士出则无敌国外患者国恒亡然後知生於忧患而死于安乐皆所以明其不可不畏也故曰人主之所贵者畏为先

贵和

或问大臣何所贵曰贵和曰何如其贵和也曰可否相济之谓和犹之和羹盐梅之味相反而其和可于口犹之和乐琴瑟之声相杂而其和适于耳若盐梅之专一谁能食之若琴瑟之专一谁能听之所谓大臣者以道事君左右人主而法度号令之所由出者也非可否相济而为和则挟私以害公固位以争宠建一政事不议是非肆言以诋之用一人材不察贤否极力以排之遂使法度昔是而今非号令朝出而夕改纲纪日坏而天下纷然莫知所适从者大臣不和之所致也或者曰大臣异论如此岂非可否相济适所以为和乎曰非是之谓也夫和者有异而无乖异而至于乖则非所以为和矣所贵于可否相济者谓其相济于未然之前非以相反而乃以相成也如未然之前初不可否而既然之後退有後言非以相成而乃以相反则所谓不和孰甚于此或者曰敢问大臣不和则纲纪日坏而天下莫知所适从者何也曰纲纪者天下之本也朝廷者纲纪之本也大臣和则朝廷尊朝廷尊则纲纪立纲纪立然後天下定于一而知所适从焉大臣不和则朝廷之势分方且内援嬖幸以为强外植党与以自助政出多

門莫得而遏也權歸北司莫得而收也朝廷操虛器以奉行文書綱紀安得不壞士大夫無所取正天下安所適從哉昔漢陸賈說陳平曰將相和則士豫附士豫附則天下之權在一君掌握之間耳陳平從之與周勃交驩而呂氏之謀益壞此大臣和則朝廷尊而綱紀立之效也晉國之政不一狐突嘆曰狐裘蒙茸一國三公吾誰適從因奉重耳以奔狄此不和則無可適從之效也近世韓魏公琦富鄭公弼范文正公仲淹議論上前未嘗不爭可否及退而相驩則無纖芥之疑嘗曰吾三人者方議國事正如駕車以行險不得不爭及適乎安平則了無一事其驩自若也嗚呼非以天下之至公而忘其私者孰能如是可否相濟之和于是乎在故曰大臣之所貴者以和為本

梁谿集卷一百五十九

<集部,別集類,南宋建炎至德佑,梁谿集>

卷一百六十

钦定四库全书

梁谿集卷一百六十 宋 李纲 撰戒

戒怠 戒贪

书事

书僧伽事 书范文正公事

书杜祁公事 书韩魏公事

书张子厚事 书曾子宣事

戒怠

李子寓居兴国佛宫既涉三时颇怠于守夏秋之交辟北户以来风命樽罍以独酌有偷儿窥伺夜半踰垣开牖发篋以探酒器有声铿然意其鼠也呼童烛之则寇也遽挈所得以往仆隶追之弗及而返李子喟然曰曩吾之始居于是也以垣墉之弗固也门关之弗谨也巡徼之弗备也藏之深而守之警有肃心焉虽有善偷者莫得而窥也今吾之久居于是也增卑培薄垣墉固矣出察入几门关谨矣击柝传呼巡徼备矣藏之慢而守之易有怠心焉故彼得以乘间而窃发也我不招之彼恶得而至之易所谓慢藏诲盗也我之过也彼何罪焉尝试以一身观之所以养生者怠则邪气得以袭所以修性者怠则邪说得以害亦犹是也尝试以一家观之所以防闲者怠则悔吝生所以辑睦者怠则争怨作亦犹是也岂独是哉昔之有天下者若夏之少康怠于畋游而有穷后羿乘之若唐之明皇怠于逸欲而安禄山乘之其理亦然故曰国家闲暇及是时修其政刑谁敢侮之盘乐怠傲是自求祸也祸福无不自己求之者可不戒哉作戒怠以自儆

戒贪

盗入梁谿之室探囊发篋得白金器数事因警而逸候人疑而讯之色变执于有司计赃抵罪其法当黥梁谿愀然曰之盗也妄意室中之藏朝思夕计以迄于成惟一贪心更无他法方其始入于我之室也自谓得志慨然负匱挈篋担囊而趋不幸而警所得不足以充其欲则慊然有不满足之意迨执于有司也曩之所营度而探取者无一可得而得其罪焉与夫世之贪者亦何异今有人焉挟穿窬之器乘间抵巇幸人主之不悟以取富贵爵位极矣金缗溢矣子孙官矣犹且慊然有未足之心一旦溘先朝露则向之所贪者无毫发之得而所造诸业种种现前独以身当之沦入苦趣有至于积刼而不能脱者自智者观之其异于此盗也几何因书之以

为贪者之戒

书事

书僧伽事

世传僧伽为观音大士化身其神变示现之迹载于传说着于耳目不可胜纪予独书其近年亲所见闻者三事政和五年予自考功员外郎告假于朝迎亲吴兴是年秋还抵泗上谒僧伽塔将修供塔下其日天未明普照长老肱齐走人报曰塔有光相宜速至瞻礼予奉亲携家以往则日始出矣有青色光自相轮顶如倒浮屠上属霄汉观者如堵固以叹异得未曾有及辰已间天无纖云秋日愈明而塔之西北隅第四级铜铎中现大宝珠色如烂银如水晶旋转不停光彩炫耀铄人目精凡一饷时若有掣之者珠自铎口中入而第五级铎复吐一珠与前珠等须臾入者复吐吐者复入塔之三隅自第四级至第十三级衆铎皆然惟东南一隅正与日对珠隐不现其楹桷间小铎中亦各有珠垂布周匝璀璨相射如白月昼燃百千灯照满一塔空中宝光飞腾往来大者如星小者如舍利熠燿缤纷若可承揽至午未间方渐隐去如是者凡三日而後已时部使者张根刘焘奉使徐禋郡守吴公懋与其僚属毕会士庶瞻仰以为自昔显示神变未有若此之盛者其後肱齐具图以闻有旨赐号摩尼宝光之塔此一事予得于所见者八年东南大水泗上尤甚淮渚泛滥不及城者数板城门不固水夜自门以入所漂荡者凡千余家人情惶骇莫知所为方扰攘中有僧持鉢以乞或以饼饵施之且告之言此何时而乃求化耶僧笑不答袒去上服径趋入水其去如风俄而城楼自摧正堙水道于是人力可施水患遂弭诘旦官吏按视城楼之摧斩斩然无尺椽片瓦之遗积于坏门如累叠然始知是夜乞食者乃僧伽也郡官相率礼谢塔不开扃则所施饼饵尚留鉢中此一事予得于所闻者明年改元宣和其夏京师积水暴集都城之外浩如江湖是时僧伽出见輶轂之下者凡三初见于感慈塔若挥扇然又见于天清塔又见于相国之东塔皆从二侍者为行道相都人瞻礼阗隘衢巷已而水退都邑抵宁有诏进封普慈巨济大士秩视伯爵诰命之辞有曰其仪屡见万目具瞻岿然灵光佑我昌祚盖此谓也予时自左史谪下去京师此一事兼得于见闻者惟普慈巨济大士灭度至今五百余年而乃以光景形相威神神力与人相济拯危弭患灵迹显然如常住世盖其誓愿宏深神化自在具大慈悲与此士衆生有大因缘故能示现昭昭若此世谓观音化身而维摩诘所说经亦云菩萨住不可思议解脱门能以神变作诸佛事摄受衆生宁不信与故予直书所见闻者着于篇文不雕饰使深達实相修菩萨行者有所稽考凡与见闻皆发信心归依妙觉时宣和二年三月二十五日昭武李纲沙阳寓轩书

书范文正公事

文正范公为谏官时以言事左迁者屡矣方其在朝自奉简俭及谪居于外则务为丰腆或问其故荅曰吾以自适耳夫进退者士之常而比年以来士风颓靡进则穷奢极侈以事富贵退则愀然有憔悴可怜之色者皆是也观公之所以自处者如此可谓深達进退之理矣夫进而简俭则无所恋着而去就轻退而丰腆则有以自适而志气自若公之高明岂不知进退如一而为此不同哉盖将以其身为中人法故也予得此事于吴元中给事因书之使後进知前辈

所为皆有深意

书杜祁公事

彭器资尚书初擢第为天下第一东归道南都谒杜祁公语既久祁公教之治生事器资退而思之不晓其意来日复见问其故祁公徐曰无他观公志气欲立名节夫欲立名节者非有主事使无顾念妻孥之忧则不可于是器资深服其言噫中世士大夫以仕宦为家不治生事者十常六七位朝廷任言责者虽有可言之资往往退顾无所归为妻孥计钳口结舌者多矣间有不恤此者言出身贬妻孥流离困饿无以糊其口於四方至使流俗指之以为戒可不悲哉观祁公之言乃知前辈思深虑远後进之士不可不知也

书韩魏公事

欧阳永叔尝问玉局曰魏公立朝大节孰为难玉局曰莫难于定策永叔曰使我辈处此时当如何玉局曰想亦当然永叔曰我辈皆能为之何难之有玉局曰然则孰为难永叔曰方英庙初立母后垂帘一日帘中出文字一卷皆诉宫禁中事其辞甚切公以文字置怀中徐曰是必有内侍交构两宫者帘中曰有之因举其姓名公曰容臣退处置既归省取怀中文字焚之命堂吏书空头谪降敕徧签执政且命开封府择使臣一员步军司差禁卒二十人呼帘中所举姓名内侍至都堂立庭中面责之填敕编置岭外使臣禁卒即日押行来日见上具道所以于是两宫遂宁若此者乃所谓难故予作昼锦堂记言公不动声色而措天下于太山之安盖谓此也王岩叟着魏公别录逸此一事因书其後

书章子厚事

予备员国史修哲宗正史选举志见实录所载子厚争内降除谏臣事可取因书之元佑初母后垂帘内出朝臣姓名数人皆除谏官子厚于帘前力争以为不可帘中曰此皆大臣所荐子厚曰大臣所荐当以明扬岂宜密有论列上新即位动当遵守祖宗故事奈何首为乱阶今虽未有害异时奸邪大臣阴引台谏与之结交恐非社稷之福于是皆罢噫荐引士大夫固大臣之职也然不当密荐之弊有二一则开多岐之门而权去朝廷二则彰私恩之地而浸成朋党庶官犹且不可况台谏乎观子厚之言可谓切当于理矣方子厚当轴士大夫喜诋诃其失然自今观之爱惜名器坚守法度诸子虽擢第仕不过筦库州县岂不贤哉语曰善人吾不得而见之矣得见有恒者斯可已盖思其上者不可得又思其次也我与子厚亦云

书曾子宣事

绍圣中董敦逸为侍御史奏疏论宫禁中事哲宗怒甚将加远窜宰执无敢言者子宣适与三省同进呈因奏曰敦逸庸人不足惜以言事一不当而远窜所可惜者朝廷之体适使敦逸得重名耳宰执亦以为言哲宗怒稍解其命遂寝苏景谟亲得此事于子宣尝以语予因曰人臣不能忌讳犯人主不测之威傥有惜朝廷之体以一言救之者其罪必解昔退之论佛骨事宪

宗将抵之死裴度救而获免刘禹锡出守播州度亦以其母老为言遂易连州古人类多如此
今不独无救之者因而挤之又下石焉者多矣此风不可复见可为叹息

梁谿集卷一百六十

卷一百六十一

钦定四库全书

梁谿集卷一百六十一 宋 李纲撰

题跋上

道君太上皇帝御书跋尾

渊圣皇帝御书跋尾 皇帝御书跋尾

皇帝御书诏书记

道君太上皇帝赐宋?御书跋尾

皇帝御笔勉行诏书跋尾

皇帝御笔赈济诏书跋尾

渊圣皇帝东宫赐詹事李诗御书跋尾

靖康皇太子学书跋尾

道君太上皇帝御书跋尾

宣和七年十二月二十三日有诏内禅二十四日渊圣皇帝即位靖康元年正月三日道君太上皇帝行幸东南八日金人来侵二月十日退师三月道君回銮自镇江府次于南京有旨诣亳州太清宫酌献是月十六日臣被命奉迎二十日至南京次日对於内殿奏陈渊圣孝思愿以天下养之意道君泣下慰劳久之二十二日扈从诣鸿庆宫烧香还宫再召对敷奏移时有旨罢幸太清宫令臣持御书及小字青词赴阙二十三日朝辞面赐玉带牙简即具录所得圣语奏闻奉渊圣御批有知卿奏对忠义焕然之语二十五日到阙对於垂拱殿以所赐带简缴纳王府蒙降旨再赐四月初三日道君行宫次京城外车驾出郊奉迎是日道君入居龙德宫臣还自南京前後三被道君御书皆进呈渊圣得旨再赐谨摹勒其二刻诸琬琰以永其传绍兴五年八月五日具位臣李纲谨跋

渊圣皇帝御书跋尾

臣靖康初误蒙渊圣皇帝识擢承乏政府凡半年被命宣抚两河自出师至以疾丐罢凡五十

余日前後只受御笔七百余件装褫成七十轴宝藏私家谨以诏书宣谕批荅五道摹刻於石
绍兴五年八月五日具位臣李纲谨跋

皇帝御书跋尾

皇帝以丁未岁五月朔自康王大元帅登宝位前数日以御书遣官齎至荆湖北路赐臣迨今九年矣臣以衰病屏伏海滨今年春被受诏旨令条陈边防利害来上臣具奏以闻七月十七日伏奉亲笔诏书所以褒宠者甚渥臣不胜感恩荣幸惶惧战越之至谨摹勒上石以示万世
绍兴五年八月五日具位臣李纲谨跋

皇帝御笔诏书记

皇帝在御之八载岁次甲寅冬十月叛臣刘豫借助敌人称兵南牧侵扰淮壖边奏来上有诏亲征戎车启途六师云集号令赏罚悉出宸衷将士奋励人百其勇捷音载路屡奏肤公敌人震讟潜军宵遁策勳饮至庆賚毕行皇帝慨然悟前日退避和议之非治兵饬备有不可已者乃於敌退之初图为善後之计发德音下明诏以攻战守备措置绥怀之方询于旧弼微臣尝叨近司亦与谘访之列窃自惟念受知最早荷恩特深平时常恨屏迹遐远徒抱孤忠不获以刍蕘之言达於丹扆恭承清问其敢卤莽灭裂以对既竭鄙虑条具上闻仰塞诏旨又以朝廷根本时务之所当先者六事冒渎天聪惟是学识迂踈言辞拙直大惧不足以裨庙筭之万一伏蒙圣慈容以天地之度烛以日月之明赦其狂瞽而察其拳拳之忠亲御翰墨降诏褒谕所以宠绥之者甚渥训辞温厚有金声玉振之章笔蹟瓌奇有鸾翔凤翥之势天光下逮郅屋生辉顾臣愚庸何以报称窃观自昔帝王当承平无事之时图维治蹟未尝不求言为急务故尧有衢室之咨舜有总章之访禹重昌言汤称好问况於履艰难之运建不世之勳哉秦询黄髮而霸业成汉屈羣策而帝功立光武用寇邓耿贾之谋而炎运复兴太宗听房杜王魏之言而唐室大竞古今一理何莫由斯仰惟皇帝图治之勤求言之切博询精考断以必行无愧前古则夫并天下之谋兼天下之智以大有为修举政事震耀威武削平僭伪底定中原绍复祖宗之大业以致中兴有不难也臣虽衰病待尽山林倾耳拭目犹庶几及见之谨以御笔诏书摹勒成碑以昭示天下使知圣君不忘旧臣询事考言乐取诸人以为善者如此用为献言者之劝不其韪欤绍兴五年岁次乙卯九月二十有五具位臣李纲谨记并书

道君太上皇帝赐宋?御书跋尾

宣和内禪灿然明白与尧舜比德视唐三宗为不足道靖康之初金人来侵道君南幸淮浙渊圣固守京师两宫间隔陰有小人交鬪其间所以敌退二圣重欢略无疑阻者实赖不二心之臣调护之力也至靖康末在廷之臣多罢去以唐恪聂山耿南仲父子用事专以离间为进身固宠之资偃然自谓外敌之不足虑迨敌骑再至道君不得行入居禁中渊圣始感悟罢唐恪相出聂山耿氏父子奉使割地稍召还旧人然亦已晚矣都城既破翠华北狩天下臣子所同愤慨咸谓敌强我弱之所致殊不知祸变之兴以小人离间为基胎也夫处人父子之间号为至难况当国家艰厄之际宗社生灵安危休戚之所系哉其後唐恪仰药而死聂山为绦人所

诛耿氏父子全家陷没相继殂陨天之报施岂不昭然方靖康丙午春臣备位枢廷被旨奉迎道君於南都时徽猷阁待制淮南江浙荆湖制置发运使宋?适自淮甸召还入对又奉渊圣御书如行宫邂逅相见甚款听其言盖惓惓有意於两宫者及绍兴丙辰夏臣承乏江西帅事复与?会於豫章?出示道君御书所以褒獎之者甚厚翰墨如新伏读相与流涕乃知前日之言信不诬也追思往事十有余年如一梦间銮輿滯於沙漠而未还中原因於蛇豕而未复痛心疾首不如无生今天启上心念父兄之辱亲御戎辂以临大敌将士奋勇尽殲丑类灵旗所指其将恢复境土迎两官以还故都有问安侍膳之期乎杜甫有言周宣中兴望我皇洒血江汉长衰疾此微臣今日之志也绍兴六年十二月十四日具位臣李纲拜手稽首谨书

皇帝御笔勉行诏书跋尾

臣昨者误膺睿獎起於闲废之中付以方面之寄而臣忧患之余重以衰疾深惧不足以仰副使令刻奏力辞至于再三屡被诏旨不容逊避又蒙天恩亲洒宸翰式遄其行有卿宜以安社稷为已任勿间中外勉为朕行之语顾臣学术迂疎材能浅薄何以当此虽力疾之官已数月余黽勉职事仅免旷败曾无尺寸?埃之补此臣所以夙夜慙惧唯欲归休山林以逃素餐之责也上章丐罢终冀矜从谨摹勒亲笔诏书于石置豫章公宇中庶几来者有以见圣主待遇旧臣之意垂不朽云绍兴六年八月十五日具位臣李纲谨言

皇帝御笔賑济诏书跋尾

臣今春入覲天阙蒙恩内殿引对恭被玉音抚劳良渥臣具以衰病丐免新任上宣谕曰江西旱灾饥民乏食颇有流移烦卿一行以宽忧顾臣俯伏受命不敢固辞疾驱之官次本路界首被御前金字牌降到亲笔诏书委以劝积粟之家以其食用之余尽数出粜以济流殍之苦臣仰体圣意与本路监司协力推行分遣僚属督责州县劝诱出粜庶几实惠及民以称诏旨凡賑济饥流民五万有余以积粟粜者二十余万石亦有愿献钱谷以助賑济者虽深山穷谷稚耄惇嫠无不渗漉德泽保全其生夏秋之交雨阳时若新谷倍收厥价十减七八民大和乐化愁叹为讴吟变贫窶为富实感召和气导迎休祥实自圣主仁心诚意之所感格或谓至诚不足以动天地臣弗信也谨以亲笔诏书刻之金石以示万世使知中兴之运盖有本云绍兴六年八月十五日具位臣李纲谨言

渊圣皇帝东宫赐詹事李诗御书跋尾

渊圣皇帝毓德东宫十有一年仁孝恭俭敷闻四方平居无所嗜好惟以文翰自娱未尝暇逸观所书道德经少陵诗与太子詹事李诗帖其玩意篇籍尊礼师傅谦光日新之德可谓盛矣使当承平为继体守文之主周之成康汉之文景何以远过惜乎炎运中微金人孔炽嗣大宝於国步艰难之中谋夫不臧卒蒙大难此忠臣义士所以夙夜痛心而泣血也岁在丙辰臣蒙恩来帅豫章僚属许忻出前数书相示覩翰墨之如新想威顔之在望怅日月之易逝悼銮輿之未还感愤激切不知所云绍兴六年七月二十二日具位臣李纲谨跋

靖康皇太子学书跋尾

靖康初纲备位枢廷尝一日同宰执奏事内殿蒙恩赐坐啜茶有旨召皇子国公出见宰执小窄衫玉束带升自东厢至御座前奏问圣体西乡与宰执相揖日角珠庭眉目如画进止雍容俨若成人羣臣咸窃竦叹後一月遂正东宫位号是年冬金人再侵阙都城失守二圣蒙尘皇太子亦北去天下闻之莫不痛愤嗟乎生帝王家正位储贰有温文之德有天人之相一旦仓卒至此此天命之所以难堪也方渊圣在东宫时尝以皇太子学书一幅赠詹事李公家藏至今其壻许忻出以示纲览之流涕谨志其末庶几观者知流传之所自云绍兴六年七月二十二日具位李纲跋

梁谿集卷一百六十一

卷一百六十二

钦定四库全书

梁谿集卷一百六十二 宋 李纲 撰题跋中

书陈居士传後 书四家诗选後

秦少游所书诗词跋尾

玉局论陆公奏议帖跋尾

举潭诗卷跋尾 书邓南夫祭文後了翁祭陈奉议文跋尾

萧氏印施夹颂金刚经跋尾

跋王府君文编 跋了翁墨蹟

书杜子美魏将军歌赠王周士

题定林寺清深堂

书金字华严经普贤行愿品後

跋了翁楞严庵颂

跋了翁书杜子美哀江头诗

跋了翁自跋敢疑论

跋了翁广龟镜录 跋了翁所书华严偈题所书普门品

书陈居士传後

予尝爱范曄作黄叔度传初无言行可见之迹後之读者想望其人如不可及今杨中立先生传陈居士其文亦然居士生於僻远虽无卓然显白于世者既得佳传又得邹陈二公为之书篆且跋其後以垂不朽读者想望其人当与叔度齐驱而并驾云宣和二年五月十一日梁谿居士李纲书

书四家诗选後

子美之诗非无文也而质胜文永叔之诗非无质也而文胜质退之之诗质而无文太白之诗文而无质介甫选四家之诗而次第之其序如此又有百家诗选以尽唐人吟咏之所得然则四家者其诗之六经乎於体无所不备而测之益深穷之益远百家者其诗之诸子百氏乎不该不偏而各有所长时有所用览者宜致意焉偶读四家诗选因书其後宣和庚子仲夏十一日

秦少游所书诗词跋尾

少游诗字婉美萧散如晋宋间人自有一种风气所乏者骨骼耳然要是一时才者沙阳俞趺出以示予为跋其後宣和庚子仲夏梁谿居士书

玉局论陆公奏议帖跋尾

凡文之作贵如谷粟布帛适於用而达於理斯足矣予观陆宣公居仓卒扰攘之间其奏议所陈动中时病屈折颺缕皆根柢仁义道理明白真得作文之体宜玉局之敬慕而不忘也德宗在艰难时恃势如左右手及信任裴延龄辈则弃之如弁髦土梗一斥不复真少恩哉宣和庚子仲夏梁谿居士书

举潭诗卷跋尾

故奉议郎致仕颍川陈公事其母夫人乐氏以孝闻夫人既捐馆舍卜葬於举潭公为之筑庵曰悟真堂曰追远亭曰归真以为祭祀焚修之所故枢密蒋公右丞陆公已下百余人赋诗以咏歌之而夫人淑德懿行益彰闻于时予来沙阳不及识公而与其子正式游间造隐圃观池亭竹树之美皆公身构而手植者可以想见其为人正式一日捧举潭诗卷裁书属予曰先子平昔留意於此既得修撰罗公序其前矣愿吾子跋之以垂不朽予一再辞不可则为之言曰天下之大戒二其一义也其一命也臣之事君义也道合则从不合则去子之事亲命也不可解於心故其生之所以养死之所以葬既葬而筑室以为祭祀焚修之所又求当世显人与贤士大夫书而歌之不如是则孝子必慊然有不足之心焉若公者其於事亲可谓无所慊矣予闻公年七十即谢事优游燕闲凡二十年虽耄而聪明不衰临终怡然而化则其胷中所养宜何如哉惜乎不及识而闻其警欬之余也予既贤公又嘉正式能成先志勤勤而不倦於是乎书宣和二年七月三十日梁谿居士跋

书邓南夫祭文後

不知其父视其子不知其人视其所与游予来沙阳时南夫已死不及识识其子肃俊美而力学有以见南夫之义方及观了翁祭文右文罗公之跋尾乃知二公平昔皆与南夫游从厚善其所称道不妄又有以得其行已之大槩然则予虽不识南夫固已深知其为人矣南夫虽不

通於时有令子以传家又得名卿硕儒之文悼惜而振发之可以垂於不朽夫又何憾宣和二年二月九日

了翁祭陈奉议文跋尾

予昔邂逅见了翁於姑苏观其容貌渥然而不枯察其志气浩然而不挫听其辩论毅然而不屈窃谓近世以来善处患难未有如了翁者今於沙阳见了翁祭其兄奉议公文辞意之高洁笔力之遒健与昔见其容貌志气辩论无少异焉信乎养之完守之固而文章字画似其为人也宣和庚子秋梁谿居士跋

萧氏印施夹颂金刚经跋尾

予尝读易观六十四卦爻象彖辞不离文字而孔子系之曰神无方而易无体又曰生生之谓易然则六十四卦爻象彖辞果足以为易而所谓易者果何物哉及读释氏妙法莲华经观二十八品譬喻言说亦不离文字而其言曰佛说是经於八千劫未曾休废又曰若以七宝满三千大千世界供养诸佛不如受持此法华经然则二十八品譬喻言说果足以为妙法莲华经而所谓妙法莲华经者果何物哉即六十四卦爻象彖辞以学易易已明则六十四卦爻象彖辞如糟粕如筌蹄即二十八品譬喻言说以求妙法莲华经经已见则二十八品譬喻言说如梦幻如响像然则易之所以为易妙法莲华经之所以为经断可识矣由是推之则释氏之书所谓金刚所谓圆觉所谓般若所谓涅槃所谓诸菩萨万行首楞严所谓大方广佛华严一切大乘经典名字方便善巧种种不同无非明此一书者具眼人即其名以契其旨则读诵书写受持演说胜妙功德一念周圆宜其世间人天小果筭数譬喻所不能及也虽然理不碍事事不碍理文字诸相无非解脱故有以音声读诵以笔墨书写以忆念受持以议论演说亦能现获不可思议报应寧不信然观右文罗公序萧氏印施夹颂金刚经其文高妙深达经旨又为哀集持经报应十余事并刻之助发信心其於理事可谓无碍矣萧氏求跋於予故予为言学易之说使知儒佛初无二道学者当以心契之也宣和庚子九月三日梁谿居士跋

跋王府君文编

王以寧周士出其先府君手泽一编示余诗章雅丽笔蹟清劲真传家之宝也靖康二年岁次丁未四月三日观于潭府漕衙之翠藹堂武阳李纲伯纪氏跋

跋了翁墨蹟

余政和乙未岁自尚书郎谒告迎亲霅溪时了翁自天台归通州与之相遇於姑苏一再见有忘年之契後四年当宣和之初余以左史论事谪沙阳了翁方居南康其族人陈渊几叟往见之余因寓书通殷懃且以序送渊并致意焉既而了翁荅书辞意恳恳至举狄梁公及本朝李文靖王文正二公事业以相勉予窃怪公相期太过非所敢当也又後七年靖康改元岁次丙午天子初内禅金人来侵余蒙异恩自奉常不旬日擢参大政实总军旅之事踰月敌退宗社

以安四方救寧叨处枢辅追感知已恨公云亡不及见也未几出使宣抚河北河东两路月余而罢旋即窜贬由建昌再谪川峡适盗据荆南路梗少留长沙前京畿提刑王君以宁不知於何处得公荅余书藁独阙其首数句示余俾追思补亡慨念平生为之流涕教授吴君致尧复出公墨蹟数帖求余跋开卷读之凜然如对面而听其亹亹之言也吴君尝从公游笃善好学因录余书序及公所荅书并以遗之以荅其意且见公知余之厚云靖康二年四月三日武阳李纲谨跋

书杜子美魏将军歌赠王周士

余趣宁江谪所取道湘潭王周士出高丽纸求书时金人再侵将半年未解余闻召命将纠义旅以援王室万一不捷当遂以死报国矣周士未果行而许为之继因书杜子美此篇遗之以激其气云靖康丁未孟夏四日武阳李纲书于长沙漕司之翠藹堂

题定林寺清深堂

李伯纪被召赴行在适汴流浅涸自临淮遵陆道虹县憇定林寺爱西堂幽邃竹木蒙密盛夏无暑气日之曰清深堂命叔易篆其榜以赠长老昌公时建炎改元五月二十四日

书金字华严经普贤行愿品後

大方广佛华严经者诸佛菩萨信解行证大乘之秘典也所说句偈不可量数而龙树传於海经贝叶翻於震旦凡三十九品为八十卷其後又得普贤行愿一品盖是经深入不思議解脱境界成於普贤则得愿品之来虽无量句偈未悉宣布而华严宗旨固已毕陈矣有大比丘敏传以金书是经将建重阁藏于云岩禅刹余方谪居鄂渚假道修江因施金俾书行愿品附于八十卷之末庶几华藏功德周圆法界含生均沾利益时建炎二年岁次戊申六月二十三日具位李纲书

跋了翁楞严庵颂

了翁於世悲愿宏深沦没已久如以愿力故当复再来观其所赠东林珪老伽陀所谓休休莫莫不可说此不可说亦不可三复其言而悲之再来时节因缘必不尔也戊申初秋望日

跋了翁书杜子美哀江头诗

了翁得邵康节易数皇极先天之学心解神悟世故多能前知如丙午岁事尝为所亲者预道之壬寅春公未没前数日其孙壻萧君建功以纸求字公为书老杜哀江头一篇乃絶笔也非惟笔力遒劲略无衰病之气盖寓意靖康之变於其间以公之学精微知数之必尔而平生议论慨然不少屈折虽流离颠沛妻子至於冻饿而不顾可谓不以天废人矣萧君访余於武昌出公书以相示为叹息者久之余尝着论古人处天人之际者正与公合因并书以遗之使读

者知公於古人无间云

跋了翁自跋敢疑论後

了翁晚年尝语所亲曰吾往年以论事遭忧患他无足恤所惧者惟死耳今则死生皆置度外未尝动心观其自跋敢疑论後殆惧死时语也其後谢谪官表云海岛万里不如无子之无忧江湖一身弥觉有生之有患则了无惧意夫死生亦大矣以了翁之学至晚年然後不以动其心其难如此学者可不勉哉

跋了翁墨蹟

了翁书法不循古人格辙自有一种风味观其书可以见气节之劲也临江萧君从翁游得其片纸数字皆缉录成篇可谓好学也已使为善积累如此何所不至在勉之耳

跋了翁广龟镜录

苏许公中枢龟镜录执国柄者可以书绅了翁广之有味其言也

跋了翁所书华严偈

谏议陈公留心内典尤精於华严手写数过前後抄录其要积累篇帙平生践履惟以泽物为心处忧患如游戯盖深解乎此观其所书世间法界等语真知言之要哉

题所书法华经普门品

诸佛菩萨不舍慈悲不厌生死以济群品而观世音菩萨悲愿洪深与十方法界衆生有大因缘能施无畏之力为诸衆生之所依怙故普门品言若有无量百千万亿衆生受诸苦恼一心称名观世音菩萨即时观其音声皆得解脱即理而言所以表法谓如一念热恼即落火坑一念变异即飘堕罗刹鬼国一念瞋毒即为蜿蜒恶兽一念贪恨即为恶人怨贼一念杀害即为刀杖一念系缚即为桎械枷鎖而观世音者岂异人哉称其名号观其音声旋倒闻机反闻自性则诸苦皆空应念解脱然理不碍事事不碍理故有常念恭敬供养观世音菩萨者随感而应如影逐形如响荅声真有火坑变成池者真有脱罗刹恶鬼之难者真有刀杖段段坏者真有桎械自脱者威神之力不可思议佛如实说非虚言也某遇先妣卫国夫人吴氏忌辰既书楞严经观音圆通品以施泮州夹山长老觉海大师善能使置所建观音正法楼中以资冥福又书法华经观音普门品以遗之使瞻礼者知菩萨威神之力不可思议如此二经相为表里不可阙也理事双修所谓观世音者庶几人人见之建炎己酉正月七日书

梁谿集卷一百六十二

卷一百六十三

钦定四库全书

梁谿集卷一百六十三 宋 李纲 撰题跋下

跋道乡墨蹟 跋李先之墨蹟

跋襄陵春秋集传後 书寄崧老易传後

跋东坡书 跋山谷书

跋山谷草书 跋米元章书

跋曹马摹本 跋欧阳公书

跋石曼卿书 跋东坡小草

题唐朝贤将传後

题修西方念佛三昧集要

跋司马温公帖 跋顔鲁公与柳冕帖跋司马温公赵清献公帖

跋邹公诗

跋庆余长老开堂疏【疏附】

唐子方林夫送行诗章表跋尾

跋张嵇仲枢密遗藁二

跋赵正之所藏东坡春宴教坊词

醉笔 草圣

行书 跋温公帖

书陈莹中书简集卷

跋道乡墨蹟

侍郎邹公硕学劲节为天下之所宗仰诗铭精深有古作者之风字画似其人自可宝也

跋李先之墨蹟

余平生不识李先之独闻其为人经术修明议论劲正节操高迈趣与时异久困州县间靖康初首荐之累迁国子祭酒而先之初未尝到都城其後余谪云安道南昌游西山玉隆观乃闻先之赴召至京畿道阻不得进而还相差数日不及见建炎初复除秘书监促其来未几余丐罢相东归亦不知先之曾供职否也临江萧君访余於武昌首询先之则云病不能赴行在所已亡矣朝廷以宝文阁待制赠之因出其来往书帖一卷相示又云先之亦以不一见余为恨余於先之不为不相知而卒不一识面土相见之难如此可胜叹哉先之与陈莹中游定夫一流人凋落殆尽良可为天下痛惜也

书襄陵春秋集传後

孔子道大天下莫能用因鲁史作春秋以俟後世君子虽其义难知然大旨不过尊王黜霸褒善贬恶内诸夏外四裔志天道谨人事而已春秋经世其言简而法三传纬经其说博而详简而法者必待夫博而详者载事实释义例然後圣人之志因以不泯而後世得以知之犹天之垂象昭回森布推步占验非得甘石之书则何以仰观此三传之於圣人所以不为无功也然三家者所闻见异辞所传异辞各有所长而时有异同不合之说则学春秋者宜精思深考揆之以道索之以理取其是而去其非则圣人经世之志得矣或者舍经而信传则是得枝叶而忘本也弃传而观经则是去甘石之书而窥天也二者胥失余患此久矣襄陵许崧老作春秋集传取三家之说不悖於圣人者着之篇而删去其所不然又断以自得之意有发於三传之所不能言者余得而读之廓然如披云雾而覩天日之清明灿然如汰沙石而见金玉之精粹然後知三传果有功於春秋而集传又有功於三传至於断以自得之意则与夫三家者齐驱而并驾也其於学者岂小补哉噫孔子作春秋而乱臣贼子惧盖笔削之际游夏不能措一辞使得其时而道可行於天下则诛赏废置宜如何哉虽不见行事而垂之空言犹足以使後世知君臣父子之道故太史公曰有国者不知春秋前有谗而不知後有贼而不知为人臣不知春秋守经事而不知其宜遭变事而不知其权为人君父者而不通春秋之义必蒙首恶之名为人臣子者而不通春秋之义必蹈於诛死之罪其实皆以善为之而不知其义被之空言不敢辞然则学者其可不尽心乎欲尽心焉当自此书始建炎己酉岁正月五日武阳李纲书

书寄崧老易传後

曳其轮之象妙处在曳曳者自後牽车以缓其行也坎为轮輿既济未济互体皆有坎而初九九二处其後故象为曳其轮睽体亦然故六三之见上九为见輿曳自六三观之则上九处坎体之後疑其无适已之意故也曳之象皆在阳爻则非才之刚而孔武有力者安能曳车以止之哉至贲之初九亦处坎体之下则以舍车而徒为象此之谓唯变所适由是观之岂非字字

有象而互体之类曷可少哉此秘殆亦昔人所未覩也前所录数十条皆考於象而为之说既与世之说易者不同於襄陵易传亦有合不合者愿参考之取其是而削其非因周详以诲谕为望圣人立象以尽意虽如观天下之不可穷然意之所在要有至当去处吾侪即象以求之正如法家断案铺陈法律求所以当其罪而止耳不当其罪则以笞杖为徒流相去远矣此所以必资於讲贯之益在兑君子以朋友讲习理义之说孰有大於此惜乎江海之辽絶而音问之难通也此编切勿以示人非唯尚口乃穷之时不足以取信於世亦其间有未安者随得随改也所着易传九卷总论一卷外篇释象七卷训辞三卷明变类占衍数各一卷合二十二卷俟定居当悉录致左右以求证明唯痛加斤斧乃所望也

跋东坡书

东坡书初类李邕中类徐浩晚乃自成一家其用笔侧以取势与柳公权之论殊不同必有能辨之者

跋山谷书

山谷行书多匾侧此卷独不然殊可爱也梁谿病叟观于都峽山陰

跋山谷草书

山谷晚年草书之妙追步古人张颠怀素正应此尔

跋米元章书

米老书深得古人运笔意但不可求於?矩法度间耳书体出於瘞鹤铭多行草少见其真书护所短故耶

跋曹马摹本

龙眠摹写曹将军马山谷草书少陵丹青引笔蹟妙甚可为十轴之冠

跋欧公书

欧阳文忠公书清劲自成一家公尝言学书如逆风行舟用尽气力不离本处盖不以书自许士夫宝藏其蹟非以名节可贵故邪意外得谤无如公者赖韩富诸公辨明之乃得自白于世故陈莹中尝跋其书云使嘉佑前见此书者皆如今日则朋党之论何由而兴东坡亦以梦奠之後履传千祀证之艰危多在於生前而是非常定於身後可胜慨哉

跋石曼卿书

石曼卿与范文正欧阳文忠蔡君谟苏子美游皆以豪杰许之好事者至称其仙去观诗篇笔蹟真一代伟人也

跋东坡小草

东坡居儋耳三年与士子游墨蹟甚多余至海南寻访已皆为好事者取去靡有存者甚哉好恶之移人也方绍圣元符间摈斥元佑学术以坡为魁恶之者必欲置死地而後已及崇观以来虽阳斥而陰予之残章遗墨流落人间好事者至龕屋壁彻板屏力致而宝藏之惟恐居後故虽鲸海万里 裒殆尽此与迹削於生前而履传於身後者亦何以异北归次端溪郡守陈侯出示小草一幅云得於钱塘僧舍盖坡倅杭时所书也士夫所藏真行多而草少此幅尤可宝爱云

题唐朝贤将传後

梁谿病叟曰为将三世道家所忌岂非陰谋多而以杀戮为事故也惟怀仁辅义公正无私宅心慈恕以杀止杀常出於不得已者可以无咎而庆流後人唐朝贤将多矣独郭子仪李晟号为後嗣能世其家子仪忠厚长者未尝妄杀而晟克复长安市不易肆远方信宿而後知王师之入前史谓三王之兵不过如此身享安荣子孙蕃昌且多贤者天之报施詎不信夫善为将者宜鉴于兹

题修西方念佛三昧集要

庆国夫人鄱阳张氏谨发?心募工缕板印造修西方念佛三昧集要一部普劝发无上菩提心者至心归依西方淨土殷勤恭敬念诵阿弥陁佛尊号如法修行尽此报身随愿往生同成佛道一切有情均沾利益绍兴三年岁次壬子三月中澣日题

跋司马温公帖

朝廷之上事贵当而不贵苟寬言贵尽而不贵苟合苟寬则姑息苟合则雷同而其弊有不可胜言者熙寧间犯谋杀者听自首减等非不为寬而廷臣毅然争之反覆论难不已至有以罪去者惧姑息之为害而展尽底蘊不敢为雷同之说也当是时去嘉佑治平未远其遗风余泽能使士大夫如此岂不为天下福哉数十年间士风一变以驯致祸乱其源非无所自也观司马温公与杂端刘公帖推许之重乃至是前辈之意远矣夫绍兴四年三月日昭武李纲跋

跋顏鲁公与柳冕帖

鲁公草书摹传於世者多矣此帖尤奇虽笔势屈折如盘钢刻玉劲峭之气不少变盖类其为人柳冕唐名士也鲁公名呼之而自称老夫亦可以见当时士契之梗概云

跋司马温公赵清献公帖

永嘉鲍君仕不过州县而卓然自立不阿世以取容刻意羣经为之训释观其所上论新法书识度有大过人者非苟然也司马温公赵清献公皆貽简尺以獎与之歿虽久而名益传嗟夫士负所学生不逢时老死山林又无一世钜公为之称道与草木同腐者多矣可胜慨哉

跋邹公诗

积德鍾庆貽范将来必有贤子孙继其後身享重名膺受福祿必有贤祖考启於先此古今之通理也历考载籍士大夫家世济其美浸以光大靡不由此观舍人公丁宁训诲之时郎中都曹勤恳奉承之意为人父为子孙之道尽矣名誉福祿之报在其曾孙侍郎卓然为世伟人子孙又多贤者邹氏之门兴未艾也愿广其传以为士夫之劝绍兴甲寅季秋十有八日昭武李纲谨题

庆余长老开堂疏

法门差别善财勤南历之诚祖道流通达磨露西来之旨万派殊流而宗於一海千年暗室而破在一灯虽桃发前村自含真谛而琴逢妙指方畅清音喻之者良马见鞭迷之者痴猿捉月盖饭色之殊宝器所感不齐则藕丝之挂须弥终难信解不有宗匠谁为津梁余师上人物外逍遥法中奇特为已则心境俱泯应机则杀活临时禪律通融昔契乐天之间云山静远今离思大之居而况维摩示疾而莫匪为人阿难辞世而重来说法既俯从於輿愿宜遂演於潮音肯令鸡岭昙花不开闽岭必使曹溪法雨重洒建溪至道不烦当仁不让谨疏

跋尾

右建州大中寺长老庆余师再开堂疏先公太师所作也元佑中先公任松溪尉师住邑之中峯寺语道相契数以手帖往还时参政吕公谪居建安尝询衲僧中可与语者先公以师对吕公谕州郡请住大中寺学者云集凡半年余吕公一日约先公同游武夷山及归则师已迁化一复时矣方其示寂升堂集衆告辞跏趺而逝经一昼夜顔色不变吕公泣涕痛悔恨未尝款叩师之关键先公谓师平日所得奇特盍归诚祈恳傥能复来吕公焚香再拜亲以小磬就师耳根击之至数十声师忽开眼笑曰已相别何必尔为公当再留七日遂下坐复居方丈吕公咨问道要且请师再开堂以疏文属先公撰述其间有维摩示疾而莫匪为人阿难辞世而重来说法之语盖纪实也既七日再升堂而化吕公为作碑具载本末置寺中宣和元年自左史谪沙阳道建安游大中寺犹及见碑读之一再过私窃叹仰後十四年绍兴壬子岁被命宣抚荆广经由建上屡经兵火寺宇仅有存者问碑所在则已亡矣为之叹息又三年有住持龙山僧元植者师之法眷也间尝访师遗迹惠然见过出先公所与师手帖以相示翰墨如新读之泫然因留藏于家传示子孙而为亲书四帖及开堂疏以遗之用慰其心且使世之学佛者知道力之固死生一如去来自在有如此者绍兴五年八月五日男具位纲谨书

唐子方林夫送行诗章表跋尾

窃观唐质肃公论潞公灯球锦事有以见当时士风何其忠厚之至也夫大臣邀宠进不以正台谏论列乃其职也人主未察震怒窜贬亦理之常而在廷之臣中执法如王举正史官如蔡襄皆抗疏直前以营救之能文如梅尧臣李师中之流又作为歌诗叙述叹赏以激义夫之气天子悔悟卒行其言不旋踵徙内地召还复用呜呼兹非士风忠厚而盛德之事耶其後谏院公亦论荆公於熙宁间触权臣怒谪官岭海当时名士以诗送行者虽不乏人而营救之风则亡矣一斥不复卒使抱义纳忠之臣流落以死其视嘉佑得无愧乎至元符中道乡邹公以论椒房事远窜则饯送者悉置典宪中丞安敦弹奏犹以为轻望其据义以争难矣谁复敢以诗章指时事而揄扬其美哉兹风一扇士气颓靡习熟见闻以钳口结舌为当然任言责者不过抉摘细故以塞责随时俯仰以为进身之资其视朝廷阙失不啻如越人视秦人之肥瘠甚者至颠倒是非变乱白黑以惑人主之聪明其肯长虑却顾为防微杜渐之计邪燕山之役廷臣至无一人言者职此之故驯致祸变至今为梗非无自而然也由是言之祖宗谨择台谏使之敢言以举绳愆纠缪之职涵养士风使之忠厚以尽激浊扬清之义岂非制治保邦之要道欤唐氏父子继论时宰於权宠方隆之日面折廷争无所顾避使名节之美萃於一门可谓贤矣复用与不复用固不论也然二公之歿碑志不立其族子邵阳太守遵惧岁月之緜远而前德之堙坠哀集表章及送行诗等合为一卷将刻诸石以垂不朽其意岂独贻训後裔为家世之光哉使士大夫知前辈风节凜然若此有补天下多矣是可嘉也绍兴五年岁次乙卯八月十八日武阳李纲伯纪书

跋张嵇仲枢密遗藁一

人材因事而奋节义临难乃显荡阴之役血溅御衣独有一嵇绍安史之乱首唱义兵独有一顔真卿朱泚之变叱三馆之士使不从贼独有一何蕃岂易得哉靖康之季分四道总管以卫王室及金人再侵或拥兵坐视而不进或弃军远遯以自全独枢密张公揔师西道转战以达都城所谋不从城陷被执犹惓惓抗章欲立赵氏其忠于国家大节如此虽古人何以加诸某顷执笔螭坳寓直东省公时夕拜琐闥周旋甚欢迨靖康间宣抚两河辟公之子叔献以从尝见所与家问勉以忠义固已叹服其後闻公遂死国事为之流涕自靖康至今十有一年叔献持节江东某帅守豫章相遇於贵溪道中出示遗藁数轴读之不觉泪之承睫也嗟乎士固有一死非死之难处死之为难也如公之死得其所矣彼忘义而偷生者得不少有愧哉

跋二

士之立名节死国事虽志气有所感激其平时胷次所养必有大过人者遇事而发非偶然也段太尉以笏击朱泚或谓武人一时奋不顾身柳子厚独为哀集遗事作传以明其非真知言哉枢密张公忠义之节着矣临去国日自期必死以书属其家叙平生所操守真所谓中有所养临大节而不可夺者耶书尾犹欲托不朽於墓表若区区於为名者是不然名固士君子之所贵也圣人以名节砥砺天下故士有舍生取义不求生以害仁者唐顔鲁公知必死李希烈自为祭文墓志常寘坐隅与公用心何异近世名节不立而惟自全之为务宜乎遭国家之大

变而伏节死难之臣不能无愧於古人也如公卓然所自立如此吁可畏而仰哉

跋赵正之所藏东坡春宴教坊词

东坡乐语信笔而成初不停缀改不过数处属对精切皆经史全语不假雕琢自然成章吁可畏而仰哉卷尾章草书渊明诗纸背乃经筵当读宝训艺祖遣潘美曹彬下江南方略此轴所谓三絶真可宝也

醉笔

东坡醉中作醒时文章今人醒时作醉中语殆不可晓也

草圣

东坡晚年草圣之妙如此盖积学所致非特天资轶羣絶伦也

行书

东坡行书萃于此轴真无愧於古人

跋温公帖

绍兴七年岁次丁巳初夏中泠彭城郑顾道经从豫章出示温公帖观于精忠堂凜然如对盛德君子瞻其仪形面其语论也使人钦慕不能自已武阳李伯纪书

书陈莹中书简集卷

故赠谏议大夫陈公与先公太师同年登科相好之情如兄弟然某为儿童时固已熟知公名政和乙未岁纲自尚书考功郎谒告迎侍先公於霅上时谏议公自通州徙居天台邂逅相遇於吴门得一再见遽沐称赏宣和己亥岁纲自左史以言事谪官沙阳沙阳谏议公乡里也时公在星子因其侄孙渊往省公寓书以通殷勤蒙海荅良渥直以狄梁公李文靖王文正公事业相期愧不敢当窃不自意公见知之深也靖康初蒙恩识擢於变故扰攘之际公已捐馆不及见每感知已未尝不泫然流涕迨绍兴丙辰岁被命帅守豫章以渊摄机幕暇日出示公平生往来书简凡若干卷翰墨如新庆吊问劳外多论易象佛书及行已立朝之大节信笔辄千余言理致条畅文不加点信乎道学渊源自其胷襟流出特立独行之操非衆人之所能跂及也是可宝藏传之云来以俟後世君子绍兴七年八月望具位李纲书

梁谿集卷一百六十三

<集部,别集类,南宋建炎至德佑,梁谿集>

卷一百六十四

钦定四库全书

梁谿集卷一百六十四 宋 李纲 撰祭文辞疏一

哀辞

萧子寛哀辞 朱时发哀辞

刘仲偃大资政哀辞【并序】

吊祭文

吊国殇文 祭伏波庙文

北归祭文 祭雷庙文

祭南岳文 谒庙文

谒先圣文 哭惠女文

哀辞

萧子寛哀辞

富贵而寿子孙蕃昌此世之所谓福也贫贱而夭子孙不振此世之所谓祸也福善祸淫者天也而致之者人也虽圣人立言垂教使人劝善而惩恶亦不出於此矣然而天之道幽远而难必为善者未必福故以原宪之贤蓬户而瓮牖以展禽之圣遗佚而厄穷好学如顔子而早死信道如扬雄而无後是福善之道有时而不明也为恶者未必祸故以屠沽斗筲之才乘时而致显位以狙佞负贩之术殖货而比封君残如盗跖而得终其天年酷如杜周张汤而子孙咸显大於当世是祸淫之道有时而不行也夫得福者君子之常而反祸焉者君子之不幸也得祸者小人之常而反福焉者小人之幸也将处夫幸不幸之间固未可必而君子之所以治心修身尊德性而道问学者盖专以自为岂窃窃然以是傲福於天哉问学已明德性已成志气之修其视富贵如浮云精神之全其视身世如梦幻若然者虽贫不慊於贵虽夭而有所谓不亡者存虽子孙不振而有所谓传而不知其尽者存荣辱惊惧不入於胷次其精神志气足以傲睨天地而与外生死无终始者为友又奚祸福之足云昔者吾友子寛尝从事於斯矣子寛姓萧氏名愐世为延平之尤溪人博学好古凡六经诸史百家之言陰阳五行天文地理之学贯穿驰骛无所不通与人持论辨博闳肆听之纒纒忘倦尤善着书自成一家言其为人孝友

愷悌敦尚节操於世味泊如也然而学成而道益穷志立而身愈困自擢第历官几二十年而位不升於朝列负郭之田不足以餬口官于南雄不幸道疾而死而年不迨於五十传家惟一子且以疾废是君子之所谓不幸者举集於其身自世人观之其不可哀也耶然子寬於予平昔最厚善予尝从容叩其治心修身之说高明颖脱无所滯碍非徒言之亦允蹈之故其生也能轻富贵而甘贫贱则其死也所谓寿而不亡传而不知其尽者必有在矣世人哀之安知其不以此而复哀世人也予惧世之察者致疑於其间故作为哀辞以道其意云

有美一人兮外和而内刚韞金玉之精粹兮佩兰茝之芬芳包古今於问学兮达志意於文章位不足以称其德兮禄不足以养其生谓难老而早死兮宜有子而病狂哀善人之不淑兮信天道之叵量惟君子之修身兮贵力学而自强盖端以为已兮岂责报於彼苍存一气之孔神兮体此道以翱翔齐死生於书夜兮何富贵之足臧观吾身於露电兮顾委蜕之何伤并天地以悠久兮与日月而争光外万物而独立兮谢尘寰於粃糠嗟世俗之迫隘兮咸物逐而我忘眇所得之毫厘兮遽志盈而气张廓宇宙以遐观兮寄一身於八荒前千古之悠悠兮後百世之茫茫偷荣耀於瞬息兮将见笑於大方夫岂得擅而有之兮溘朝露而泯藏与草木而同腐兮但山高而水长惟夫子之英爽兮顾虽死而不亡托友义於斯文兮庶德音之播扬

朱时发哀辞

朱章字时发洪州分宁人少游太学颇为时辈所称困蹶不第老以恩调信州上饶簿其为人纯厚笃实恂恂如不能言与朋友交淡如也久而益亲闻人之善若已有之称诵惟恐不及於人所短非独絶口不言又为之掩匿惟恐人之知之盖其天性如此雅志好佛蔬食恶衣凡四十年既簿上饶叹曰仕途乃成佛作祖之捷径也凡职事有可以利益於人者知无不为虽甚劳苦同僚所憚时发皆以身任之初共指笑後知其出於诚心乃靡然叹服罢官至京师调岳州司仪朝事予时自考功郎官谒告迎亲吴兴与时发会於维扬吕舜徒家预约时发渡江同游焦山为一日之欵欣然相从既抵焦山则相与徧游僧庐蹑磴道登絶顶以望大江其饮食行步如壮者既归同宿舟中谈笑至夜分不倦又作书以遗予亲及诸季以叙平生诘旦时发渡江如仪真予亦解舟而东不复相闻舟次姑苏适有客自江外来者首询时发动静则已亡矣予愕然骇叹询其所以则云时发是日渡江未至仪真三十里谓僕夫曰吾倦欲寝慎无惊我久之不觉仆夫视之则已右脇而逝抵仪真亲戚为之棺殮支体柔软顔色如生有异香袭人久之方散呜呼死生之於人亦大矣而时发处之如此岂非平日信心坚固重修不已之力欤予窃尝谓人之有生死犹日之有昼夜此必至之理也方昼从事於胶扰之中而其心恬然者以夜有所归宿而安身也苟无所归宿则其心岂得愒然莫之为虑哉至於死生之际则不然自少得壮自壮得老日趨於死地惟知营营以厚其生而无一念以厚其死方且恣情纵欲日造诸业一旦溘然则曩之营营者无一可得而业力现前固有沈絛疾苦愿死而不得者幸而得死流浪转徙散入诸趣岂不哀哉若时发者所见高明卓越予不得而知也然於死生之际颖脱如此是必有大过人者予平日既与之厚又其死时眷眷於予若相别然故为作哀辞以叙述之此非所以哀时发乃哀夫不若时发者云

事之大者莫如死生惟有生之必死若昼夜之代更昼从事而心不憊以夜有所复乎安犹鸟

之得托乎林而兽之得栖乎山各有攸处乃罔後艰奈何死生之际咸熟视而恬然少壮逐物老又甚焉钟鸣漏尽而不止日暮途远而逆施溘尔朝露惟业是随沦入异趣大智所悲猗欤时发信根纯熟四十年来一斋一粥诸恶不作诸善奉行年弥高而德弥劭学愈积而道愈明谢浮生如脱屣宜纯想之飞升追惟平生於予独厚旋踵之间失此良友惟坚固心乃妙法門後之览者庶有感於斯文

刘仲偃大资政哀辞

靖康改元之夏金人攻围太原聚重兵河北境上余承乏枢廷被命宣抚两路以真定帅资政刘公为副秋七月余得旨驻师怀州刘公治兵辽城以王渊王 郑建雄统制军马时制置使解潜龙图阁待制折彦质主隆德府路都统制折可求都转运使张灝主汾州路期以七月末进兵独解潜与敌骑遇南北关力战而溃余皆不进余上疏请治诸将不如约者且止诸司无得专达一听宣抚司节制以议再举不如此必误国事愿乞罢去有旨召赴阙议事而以种师道代时八月二十三日也已而师道病死军中即以刘公为宣抚使折彦质副之其冬金人两路深入刘公造朝城陷遂死节於敌营嗟乎士固有一死或重於泰山或轻於鸿毛非死之难处死之为难也处之而是如张巡之睢阳其食人以为粮者可略也处之而非如樊系之草朱泚册文册成而後仰药又何补哉方靖康之末天倾地覆君臣易位朝鲜伏节死难之士几何不为敌人所笑而刘公毅然不以用舍动其心视死如归遗书其家陈义可观足以激懦夫而羞失节之伍岂不诚烈丈夫哉使其平生行已不无瑕疵犹可以大节而掩小疵矧夫恺悌之德强敏之材疏通之智如铭议之所载皆有大过人者是宜赠典褒崇锡諡忠显天子亲书其碑额以垂荣於无穷也余与公幸有一日之雅其子子翬以墓铭谥议来求挽章余谓既葬则挽章无用作哀辞以慰其心焉其词曰士有一死处之为难死得其所名重泰山猗嗟刘公惟人之杰舍生取义成此大节敌人叹息矧惟士夫激懦愧媮名教之扶美谥易名宸章篆碑为宋忠臣万世同辉我作哀辞以慰其子勿为公哀公实不死

吊祭文

吊国殇文

宣和元年春用师西鄙熙河帅刘法与其军俱殲用事者以违节制罪之赠典不及予窃哀焉作斯文以吊之其辞曰

夏人不宾兮西鄙耸惊蝟结蚁聚兮屯犬羊之羶腥帝赫斯怒兮命诸帅以徂征哀师鞠旅兮致天讨於不庭蕞尔小丑兮敢雠大邦匿其精壮兮示以不争王师如入无人之境兮遽奏捷於三城纵四路之分入兮以全力而制熙河之兵惟熙帅之寡谋兮知不可而弗明统十万之骁腾兮谓可以深蹂而横行路迢回以崎岖兮山斗絶而峥嵘决积水於千仞兮灌长波於联营师不战而自屈兮虽有智者何所施其能堕黠敌之计中兮失天时与地利顾出塞之几何兮亡只轮与匹骑岂无偏裨之勇略兮与士卒之猛鸷弃甲冑之精坚兮投器械之犀利山积云委不可以数计兮咸举而填於卢山之壑摧於饥虎之喙彼本兵之何人兮方惧罪而自为

计匿实状而不以闻兮谓马蹙而崖坠士卒散於逋逃兮将吏殒於自毙痛忠魂之谁诉兮激壮士之愤气惟一胜而一负兮乃兵家之常势奈何不使吾君之得闻兮以边事而为戒邈九重之高深兮岂天下之耳目皆可以欺蔽也呜呼噫嘻想夫貔虎之将熊罴之师耀日戈甲蔽野旌旗力蹙势穷渐车裂帷鼓声不起士气已衰进不得战退无所归惊鱼游於沸鼎骇兽陷於危机方腹背之俱溃何爪牙之可施蹈践纷籍奔崩流离血膏草莽骨委山陂气郁郁以冲汉魂惇惇而曷依兵有节制固不可违若李广之失道与张骞之後期或逗留而怯敌或败北而丧师失军事之机会固可以违节制而罪之岂有肝脑涂地身首分披执干戈以卫社稷援枹鼓而死边陲忘其大烈据此细微纵一帅之有罪顾三军之曷知赠吊不及赙賵不时没者已矣生者长悲其何以励封疆之臣而慰边人之思古者命将付之阃外便宜则行不从中制量敌而进虑胜而会利则伸而钝则蟠战必胜而攻必溃亚夫细柳之军虽君命有所不受充国金城之策虽衆口莫得而议也後世行军颠倒纷纭以将帅为不足信则尽护之以中人口含天宪手握国钧功罪莫实赏罚不伦掣肘繫足智谋曷伸彼九节度之师所以皆败者以有军容之朝恩而德裕之相武宗所以能讨叛锄逆者以尽罢诸镇之监军知此甚易其谁敢陈吾独悲夫事君之事食君之食荷戈从军死固其职惟身没而名颓可嗟悼而叹息茫茫虏地兮流沙千里空山无人兮羌行如鬼砂磧不毛兮雪霜夏坠魂兮归来兮彼西方不可以止敷德泽於幽明兮惟圣天子

祭伏波庙文

年月日具位李纲谨遣男宗之以牲酒香币之奠致享于忠显佑顺王之神惟神功施一方血食千载英爽如在人赖芘庥而纲负罪明时远谪絶岛假道鲸海实仰威灵属苦疮痍阻造祠下聊致薄礼神其鑒之尚飨

北归祭文

年月日具位李纲谨以牲酒香币之奠致享于威武行宫恭承大恩许还中土再涉鲸海曾不踰旬祥飏送帆顷刻千里克济重险非神畴依敢以牲牢躬祷祠下冀得吉卜以终神休尚飨

祭雷庙文

年月日具位李纲谨以牲酒香币之奠致享于威德公之神惟神鼓动万物宣畅天威宅于海陬一方蒙泽而纲负罪远谪久留此邦只荷上恩许还中土道里辽邈山川阻修冲冒瘴氛大惧殒越敢以牲醪躬荐祠下正直是与冀终相之尚飨

祭南岳文

维绍兴二年岁次壬子九月戊午朔二十有七日甲申具位李纲谨遣左从事郎宣抚使司干办公事郑昌龄以牲牢酒醴茗果之奠敢昭祭于南岳司天昭圣帝之神天地凝结五岳环峙奠镇方维炎运中微岱恒嵩华或失其守沦于割据独兹衡岳岿然雄尊作镇尚土为朝廷重

庇麻士民孰不仰止某以不材误蒙上恩宣抚荆广总师置司取道长沙经由岳下戎事倥偬密迓祠庭不护造诣遣官摄祭牲醴之奠惟以告?肃清一方扞御外侮神其佑之尚向

谒庙文

纲肃将使命兼领此邦眎事云初奉神敢後眷兹疲瘵务在抚绥俾有成功尚期陰相

谒先圣文

纲叨膺宸命兼领此邦适当眎事之初敢怠将诚之荐惟王功施万世泽被斯民具载格言付之後学其敢忘於垂训庶有效於微劳

哭惠女文

予谪官自京师挈家抵无锡得一女以惠名之生未月予单骑如贬所半年而後得家问则惠女已亡矣虽在襁褓讵能忘怀作斯文以哭之极其情而卒归之於正云其词曰

负罪左降兮汨吾南征惕威省咎兮敢稽于程变彼季女兮有呱其声割慈忍爱兮单车啓行山川阻修兮鸿鴈无凭一书为重兮万金为轻开缄掩泣兮失此孩婴舐犊之爱兮讵能忘情言念幼稚兮岐嶷夙成日辰孔嘉兮骨相丰盈载衣之褐兮乃畀之名期尔寿臧兮多福是膺云胡不淑兮朝菌同荣兰茁其芽兮霜霰已零玉韞于璞兮斧斤曷胜伤心孔哀兮涕泗从横知我如此兮不如无生呜呼人生一世兮如梦一觉速若电露兮虚若影泡存而非实兮其孰能考殤子为寿兮彭祖为夭虽有修短兮意亦何较请原其初兮大化默造气变有生兮赋此形貌七情与俱兮喜怒谁教知识始分兮指颐而笑修者自遂兮短者自暴自少得壮兮自壮得老均有所归兮矧兹襁褓譬诸草木兮灌莽丛早或失其所兮萌蘖枯槁茫然天运兮恩怨奚报缘熟则来兮本於爱乐缘尽则亡兮又何足悼一气聚散兮死生丑好凡情糾纏兮妄想颠倒背觉合尘兮自罹悲恼勿谓情鍾兮忘怀以道揽涕收泪兮有愧於达者之所劳

梁谿集卷一百六十四

卷一百六十五

钦定四库全书

梁谿集卷一百六十五 宋 李纲 撰祭文辞疏二

祭文

祭陈莹中左司文 祭姨母吴宜人文

祭余相公文 祭黄大资政文

祭高祖妣文 祭曾祖妣祖妣文

祭叔祖文 祭翁士特郎中文 祭张次东中奉文 祭许崧老文

祭黄子凤通直文 祭杨侍郎文

祭九弟司法文 祭胡氏妹文

青词

潭州荐阵亡青词 降圣节青词

禳火设醮青词

疏

吴江宁境寺斋僧疏

邵武军泰宁县罗汉岩设供疏

福州安国院施锦法座疏

潭州荐阵亡水陆疏

福州圣泉院斋僧疏

福州鼓山斋僧疏

福州东山文殊修菩萨疏

祭文

祭陈莹中左司文

维年月日具位李纲谨以清酌庶羞之奠致祭于故左司陈公之灵惟公擢秀甲科实自妙龄浸阶膺仕蔼然休声以节义为防范而行不苟合以公忠为鉴裁而物无遯情其在言责抗章论辩不可胜纪而言之最着者有先知独见之明其在谴逐险阻艰难无不备尝而心不少懈者唯爱君忧国之诚一斥不复踰二十年而志气不衰容貌不枯者盖其所养之厚脱去世累恬然委化而了无芥蒂恬无疾苦者盖其所造之精呜呼哀哉天之生贤千载比肩而在理有不可知者既克生之而不使之有成人之云亡士夫是悼而在公无可憾者身虽没而有不朽之令名惟公胷中素所蕴蓄虽设施之未曾然推原其心夷考其行合海内之公言古之所谓自任天下之重特立独行而不顾者谅非公而谁称呜呼哀哉公与先子平生故人金石之交情均天伦我初识公浙江之滨忘德与齿襟期自亲迨谪沙阳遗问殷勤许与之厚铭心书绅我归自南遽遭凶孤苦杜门公亦北徙一水相望慰海谆谆何翰墨之未乾而死生之永分怅苍生之失望痛故老之凋沦睠淮楚而殒涕嗟往吊之无因寓哀情於一奠冀灵爽之或闻呜呼哀哉尚飨

祭姨母吴宜人文

维绍兴元年岁次辛亥二月某日具位李纲同弟从事郎新差充建康府府学教授经从事郎前平江府司土曹事纶谨以清酌庶羞之奠致祭于亡姨大宜人吴氏之灵嗟嗟夫人令德惟馨嫔于大儒践扬有声象服煌煌帝命是承教子以义治家以肃内外姻娅罔不辑睦寿考康宁以受多福我母居长夫人处中德厚相肖匪惟音容壺范之美士族所宗每见夫人如我母存密勿恩意从容诲言抚我兄弟犹其子然仕宦契濶离合不常靡有三年不奉寿觞瞻望颜色退必沾裳言归樵溪密迩白水盗贼纷纷屯结蜂蚁愿拜牀下咫尺千里云何不淑奄其归真死生之际了然不昏所养如此余复何云丧乱以来衣冠流徙子孙在前还处乡里始终荣万无一二顾此凉薄失所依归终天永诀复见无期陈辞致奠孰知我悲呜呼哀哉尚飨

祭余相公文

维绍兴二年岁次壬子五月庚申朔越翼日辛酉具位李纲谨以清酌庶羞之奠致祭于歿故少傅太宰卫国余公之灵呜呼闽粤奥区实为晋安巨浸盘礴縈以重山风气洋洋是生杰人伟然器度肖彼雄浑天之降才不轻畀付运鍾半千旦暮之遇沙砾何知与时散聚兹五福应厥期数自古在昔治少乱多先民有言勤苦咏歌其孰如公丁时休嘉岩廊尊荣冠佩峩峩为政历年朝野丰暇山林之思道有用舍辞第之懿古人弗谢检身励行孰逾公者高牙大纛昼绣以归镇西之节前载驱驰稚耄舞歌公慈弗威徒尔蒲鞭忍烦公治壮犹未愆垂车是则优游一纪蒞禄靡忒方时艰虞奔走倾侧孰不公卿谁保乡国我昔未遇公实荐之遭时奋身

庶荅无私避地于兹门墙是依如何不淑奄闻公归公之降神来自峻极去比列星终古不没寿考康寧矧攸好德谁者似之尚论往哲我独何为中心载伤知己之恩曷云其忘爰升公堂奠兹一觞公音弗闻有淚浪浪呜呼哀哉尚飨

祭黄大资政文

维绍兴二年岁次壬子五月庚申朔三十日巳丑甥孙具位李纲谨以清酌庶羞蔬果香茗之奠致祭于舅翁特进大资政黄公之灵惟公节行直方问学渊懿致位丞辖郁为名臣盛德元勲载在信史搢绅之士多能言之非纲小子所敢称述惟我先考乃公之甥孩提而孤鞠於外氏海诱长育如已子然舅甥之情世所罕俪顾兹孱陋庆流有衍幼荷獎知命以名字死生契阔三十余年遭时艰难叨任宰辅再奋再蹶天实使之误蒙大恩起自闲废俾总师旅往抚南邦假道故乡恭造墓下敢修薄奠式荐微诚追怀音容有泪如泻英爽不泯庶几歆之尚飨

祭高祖妣文

维绍兴二年岁次壬子六月庚寅朔初二日辛卯玄孙具位李纲谨以清酌庶羞蔬果香茗之奠昭祭于高祖司徒高祖妣夫人朱氏之墓纲久去祖茔有疎展省瞻望松梓每深悲怀今者蒙恩起自闲废总师之任道过故乡谨具牲醪致享墓下英爽不泯庶克歆之尚飨

祭曾祖妣祖妣文

维绍兴二年岁次壬子六月庚寅朔初二日辛卯曾孙男具位李纲谨以清酌庶羞蔬果香茗之奠昭祭于曾祖贈太保五郎曾祖妣成国太夫人廖氏茂国太夫人龚氏昭国太夫人卢氏先祖贈太傅十八郎祖妣丰国太夫人黄氏崇国太夫人饶氏之墓纲夙承祖庆幸遇明时叨被国恩致身宰辅褒贈之典邦有彝章世路艰难久疎展省瞻望松梓心焉永悲今蒙圣恩起自闲冷总师之任道过故乡焚黄之礼其曷敢废谨修薄奠式荐微诚追怀祖风有淚如雨英爽不泯庶克歆之尚飨

祭叔祖文

维绍兴二年岁次壬子六月庚寅朔初二日辛卯侄孙具位李纲谨以清酌庶羞香茗蔬果之奠致祭于叔祖承事二十五郎之灵唯灵纯德懿行乡间所推寿几百年五福兼备纲以迂拙素荷爱怜自归瓯闽久欲瞻省愿莫之遂盗贼阻之今蒙上恩起自闲废总师之任取道故乡拜公於堂但见遗像敢陈薄奠式荐微诚追怀平生涕淚如泻英爽不泯庶克歆之尚飨

祭翁士特郎中文

维绍兴三年岁次癸丑三月丙辰朔二十二日丁丑具位李纲谨具清酌庶羞之奠致祭于故考功郎中士特翁兄之灵呜呼士特何遽然也文追古人识超当世而蹭蹬场屋蹉跎仕涂者

岂非天邪大器晚成寿考是宜为杞为梓如璋如圭云何不淑而止斯耶武夷之山盘礴坤倪独鍾秀气抉摘杳微玉佩琼琚以昌其诗所以垂不朽者其在兹邪惟我与兄为外昆弟舛角相从情均同气我钝而鲁兄敏而慧每策駉蹇以追骐驎我忝近司兄止郎位茫茫大钧孰能问以此意邪丧乱以来亲朋凋坠平生故人半为新鬼衰病忧患之余亦岂能久於此世邪罢帅言还还兄故栖抚棺视窆事与愿违聊陈薄奠侑以此辞英爽如在庶几能听之邪尚飨

祭张次东中奉文

维绍兴三年岁次癸丑三月丙辰朔二十二日丁丑具位李纲谨以清酌庶羞之奠致祭于故知府中奉学士尊亲家张公之灵惟灵夙负才气勇於敢为践扬之久蔚为吏师胷中磊落百未一施谓宜寿考而止於斯纲以姻娅素蒙炤知别多会少形止神驰近者宣城尺素见贻翰墨如新音容已非闻问伤感心焉孔悲罢帅言旋迺公故栖抚棺视窆事与愿违聊陈薄奠侑以此辞英爽如在庶几听之尚飨

祭许崧老文

维绍兴四年岁次甲寅二月朔辛巳具位李纲谨以清酌庶羞之奠致祭于故宫使资政通议许公崧老之灵呜呼天地磅礴河岳炳灵笃生异人郁为世英长松老鹤其仪形也粹玉精金其性情也澄渊藻鉴烛理明也设准持衡称物平也经纬书史文章成也贯通古今议论閎也金石铿锵诗句清也鸾鹄翔翥字画精也勇於为义去就轻也忧国如家秉忠诚也致位通显不自荣也恬澹寂寞得此生也士一于此垂世立名而公兼之以大其声呜呼哀哉易道陰阳消长盛衰春秋名分褒贬是非弥纶天地立万世?先圣制作孰大於斯公独潜心抉摘杳微解駮三传粃糠九师发明象数得其指归羲画麟经粲然有辉呜呼哀哉汉有祿隐时惟子云英材拔萃高识迈伦拟古着书法言太玄士有异论或否或然公独好之推尊其人训释微辞奥义一新所见絶俗岂其後身呜呼哀哉我之识公踰二十年史馆同僚饱闻绪言枢府槐堂两接官聯引身以退归骑聯翩我谪湖外寓江边邂逅相遇庐山之樊握手深谈达旦不眠我谪岭海触冒瘴烟与死为邻蛟鳄垂涎尺书屡及夫岂相怜迨其比归喜见顔间愿言相从杖屨林泉云何奄忽朝露溘先伤心涕零三友之篇呜呼哀哉国步艰难贤智驱驰梁栋之坏哲人遽萎藐然一老天不憖遗人之云亡有识同悲旅櫟漂泊临川之湄无适非土公其永归聊陈薄奠侑以此辞英爽不泯庶其听之尚飨

祭黄子凤通直书

维绍兴五年岁次乙卯八月壬寅朔十八日巳未具位李纲以清酌庶羞之奠致祭于表侄故知县通直黄君之灵君天资孝友端恪温良稟义方之训而承积庆之遗芳也刻志好学习为文词欲自树立以为先德之光也试吏江浙通籍于朝虽未显大庶几自微而寢昌也相期仕途一日千里如骐驎绿耳得大道而腾骧也何意盛年奄随物化如芝兰擢秀而遽殒於严霜也中局静专知所依向临化不怛何遗音之琅琅也圣泉之冈云木苍苍山高水长往安其藏盖体魄归于土魂气无不之何必返于故乡也丧乱以来艰难相依死生契阔重予怀之悲伤

也穀核在盤酒醪在觴終天永訣不知涕泗之滂也嗚呼哀哉尚飨

祭楊侍郎文

維紹興五年歲次乙卯十月庚子朔越十日己酉具位李綱謹以清酌庶羞之奠致祭于致政龍圖侍郎楊公之靈嗚呼天未喪道斯文獲傳必有先進老成足以師表於一世而其深造自得實與古人乎比肩是能陶冶後學收功當年茲儒者之極致在立德與立言惟公挺質粹溫圭璋晬然早飛聲於入雒極師友之淵源顧茲道之未墜企聖域而高騫方世路之孔棘安窮約而迴遭偉名流與鉅德咸愿學而推先逮夫逢辰遇合直道而前抗崇議於諫省持從橐於甘泉跌而復起守則不迂全高節於歲晚知孤標之特堅雖佚老於燕閑曾不廢於簡編閔國步之多艱每忧心於元元喪亂以來耆舊凋零惟公在焉雖年逾八十不為不壽備享五福不為不全然士夫之所以期公者蓋庶幾衛武之箴儆尚得究言行於邱園何忽去此而不顧世豈復有如公之賢者乎嗚呼我之與公久茲周旋公相知心忘德與年瞻儀形而咏嘆覺疵吝之皆痊信有斐之君子知至善之弗諼慨三山之前約卜荔子之初丹何尺書之未久遽永隔於終天日月有期肅焉新阡遙馳誠於一奠悵此意之奚宣公之死為不朽矣惟其愍遺之悲則有涕泗之漣漣嗚呼哀哉尚飨

祭九弟司法文

維紹興六年歲次丙辰七月丁卯朔某日從兄具位李綱謹以清酌庶羞之奠致祭于從弟司法九郎幼成之靈惟靈天資純茂孝友溫恭雖曰未學內行則充掾于吳興風績甚著摘發奸伏已有顯譽江浙弗靖徙居閩溪昆季相從如壘如簾雖嬰疾疢不廢言笑藥餌之扶尚期壽考我來江南再三惜別言則涕零如將永訣閱時未几遽聞訃音心焉如割慟哭沾襟言念先叔友于先公施及後人有來雍雍凡今之人莫如兄弟兄弟之美吾家為懿汝少先往吾衰几何閱水成川前後之波雖夫何傷雖壽何羨幻化茫茫晝夜之變千里致奠聊寫我哀無滯南方魂兮歸來嗚呼哀哉尚飨

祭胡氏妹文

維紹興六年歲次丙辰七月丁卯朔越三日從兄具位李綱謹以清酌庶羞之奠致祭于從妹四姐之靈嗟嗟吾妹令德柔嘉嫕于大族克宜其家良人不吊中道先逝諸孤藐然皆親訓勵敵騎擾華衣冠南奔挈族相依徙居于閩甘苦同之七年於此弗安異鄉日念桑梓久嬰痼疾藥石弗痊我來江南臨別淒然訃音之聞相去半載尚想平生音容如在言念先叔一子一女相繼而亡何遽如許天道茫茫不可致詰或壽或夭孰得孰失諸甥滿前責在外家飲食教誨情當有加庶羞在俎旨酒在卮千里致奠孰知我悲嗚呼哀哉尚飨

青詞

潭州荐陣亡青詞

伏以潭为会府地居上流自经豺虎之争无复江山之胜宸心眷顾帅阃畴咨非特慰扶杖之遗民盖欲追备边之前烈涓辰视事问俗兴嗟拾瓦砾而横栋梁强名旧治听丘墟之号风雨坐感弃骸敢迎羽服之俦共演琅函之秘殫精诚而上叩冀幽显以同休天德好生重开於寿域人情厌乱各保於丰年大振威声克平强敌回两宫之銮辂奉万乘以神都未报国恩谁识愚臣之此意仰凭洪造庶收薄效於当时臣无任

降圣节青词

维绍兴二年岁次壬子十月戊子朔二十四日辛亥具位臣李纲等伏为降圣节遵诏旨於天庆观命道士三七人开启灵宝道场七昼夜设醮一座供养香花灯烛酒果药苗稽首上启三清无极大道太上开天执符御历含真体道昊天玉皇上帝紫微天上帝紫微北极大帝伏以重明继照纯孝奉先只若旧章钦崇令节命幅员之守长伸醮祭於净坛臣等忝布诏条用循科式伏愿太灵昭鉴丕应响臻偃革包戈永绥於群品余粮多稼屡获於丰登凡在飞潜必繫亭育臣等无任

禳火设醮青词

曲突徙薪人事虽存於警戒荧惑退舍天心易变於嘉祥爰念此邦实为都会比岁沦於涂炭遗民起於疮痍百雉城闐鞠惟榛莽万家闐闐半是茅茨元冥方迫於隆冬回禄屡惊於中夜顾有司之失职叹赤子其何辜輒罄精诚用干洪造望云霄而设次输肝胆以投词伏愿上帝溥临衆真交会閔三湘之分野菑害荐臻回九曜之威灵恩光下烛布祥风而一扇俾和气以同游加惠群生永成乐土

疏

吴江宁境寺斋僧疏

右伏以来投世网已缘一念之差仰冒天威何翅万钧之重姑从薄谪皆荷宽恩今则千里去家单车上道割父子兄弟之深爱方险阻艰难之备尝非仗胜因曷蠲往咎是用依梵刹严供名流冀资懺悔之功为洗妄言之罪伏愿能仁覆护大智照临万水千山行无雨雪之阻一门百口居有禄寿之祥誓竭诚心归依妙觉谨疏

邵武军泰宁县罗汉岩设供疏

右伏以因心授法一灯传於千灯会法归心千月摄於一月所以五百大士咸悟客尘十八尊者为之领袖结集耆闍窟飞锡天台山凡山林幽邃之区多仙圣栖隐之地惟丰岩之胜境乃古德之道場洞壑鼎峙而相连殿阁翬飞而交映宜应真之是宅垂妙於一方而纲罔蒙国恩归自海岛病牛卧壠嗟微力之已疲脱兔投林冀余生之或保修珍供以结胜因祝一人万寿无疆之休笃四海群黎咸宁之庆蔚然族属亦获康安仰祈大德之无私克鉴私诚之有在谨

疏

福州安国禅院施锦法座疏

右伏以毗耶离城严饰八万师子之座普光明殿宣说百千三昧之门必假胜缘以作佛事前件锦囊出靖康之御府今施安国之丛林栴檀禅牀已有轮囷之质拈花妙悟何妨文采之彰庄严龙象筵开示人天眼愿敷法席大振潮音以普润於含生皆速登於正觉谨疏

潭州荐阵亡水陆疏

右伏以亡非战罪周易有舆尸之占死为鬼雄楚歌重国殇之祭顾比星沙之分重罹兵火之余上轸主忧大开帅府念方宣於恩德岂或间於幽明即州治之新成启法筵而致洁庶凭佛力俯协人谋伏愿胜气高临冲风自息悯冤魂之忠义早见太平转乐岁於艰难助成远略伏惟三宝证明谨疏

福州圣泉院斋僧疏

右伏以圣泉禅老法席初开梁谿病翁寓居密迹虽白莲花社陶潜不造诣於远公而毗耶离城师利每问讯於摩诃云山在望钟鼓相闻结苾芻之胜缘供蒲塞之净馔金毛师子踞高广坐以嘏呻多宝如来现久远塔而赞叹普祈大衆早悟真乘谨疏

福州鼓山斋僧疏

右伏以名蓝清淨雄踞海山宝阁巍峩肇新栋宇五百大士於焉而栖息八部龙神亦为之欢欣大顶峯前觉林峦之秀发灵源洞里增泉石之幽奇成此胜缘实为盛事大比丘有神通之妙力病居士以庆赞而特来扬般若之宗风供伊蒲之香馔浮杯飞锡应真岂憚於远临展鉢开筵请衆聊同於一饱集兹殊刹共结良因四境奠安永丰登於今岁闔家清吉导福祉於新年三宝证明万灵昭鉴

福州东山文殊修菩萨疏

右伏以惟妙吉祥真法王子毗耶城里宏开不二之门清凉道边妙发前三之语摩善财顶则宝臂出於云表试解脱心则金毛现於空中以大智接群生以至神应诸感真风宛在虚响昭然当院古德道场东山胜地有菩萨之像设乃异人之规模妙相瑰奇独冠他刹金沙璀璨呈瑞一方然而岁月既深崇奉殊阙殿宇荒废供具萧疎欲兴久废之良因必杖大心之檀越伏愿搢绅贤士福德高人特推喜舍之心共入庄严之会各随愿力宠示芳銜谨疏

梁谿集卷一百六十五

卷一百六十六

钦定四库全书

梁谿集卷一百六十六 宋 李纲 撰墓志

宋故【阙】

宋故【阙】

【阙】

切躬自料理以州治为行宫供帐什物种种毕备不扰而办设幕次於行宫之傍以宿卫上皇嘉之命公弹压行宫一行军马及议欲渡江公力言不可愿归安天下之养以慰嗣圣孝思副中外之望上皇乃留后妃亲王帝姬委公护卫一幸镇江而还渊圣知之降诏褒谕除公龙图阁直学士再任其冬金人再来公檄一路兵入援解亳州之围漕粮以给东道总管司千里不絶时诸路勤王之师坌集所过州郡多不听入城独公啓城闔听其自便且躬加抚劳人人悦服及闻二圣北狩号絶仆地移时始苏得大元帅府檄书谓僚属曰此真主也即上表劝进上即位於南都表请移蹕维扬优诏不允覃恩转通奉大夫进文安郡开国侯加食邑二百户食实封一百户有旨召赴行在公以遭时艰虞积忧成疾力请宫祠遂提举亳州明道宫由浙江以归闽中谓子弟曰先公平日常使子孙异日无忘乡里今得从先志幸矣率子弟上冢见耆旧父老尽乡党之礼日与里中贤士大夫游每有庆吊不问远迩戚?必从乡人之後於外氏恩意尤笃朝廷所赐东山大乘寺名刹也极林泉幽胜延致高僧居之与为方外友萧然安於闲静不复有仕进意秩满再请宫祠转正议大夫加食邑三百户疾作上章告老转正奉大夫致仕未被命而公薨於城东僧舍享年五十有五实绍兴三年十月二十有八日也讣闻天子嗟悼赠金紫光禄大夫公娶三衢赵氏少师清献公拊之孙大仆卿?之女淑惠有贤操相待如宾先公百余日终公笃於伉俪所以送终者无所不用其至已而公亦相继捐馆人尤哀之男六人长曰沆任通直郎主管江州太平观次日沛次日泳任承事郎监潭州南岳庙次日汶次日汴日注皆承务郎沛汶汴注皆早卒女六人长天次适廸功郎宣州宣城县主簿王子泽亦先公卒次适承事郎江南西路安抚大使司主管机宜文字叶程次适修职郎黄蒙二人在室孙七人柄栋皆登仕郎棣杆皆承务郎桂早卒据尚幼孙女五人初文定公以翰林学士知贡举有告贡院事非所干预者文定公以身莅之不复自辨出知蕲州既而公生文定公喜见顔间曰吾以茝人而获谴庆鍾是子其能世吾家乎公为人恺悌乐易纯明端恪遇事待物一以至诚其在南阳湍河溢水暴至将冒城郭公登城焚香投文水中俄报河复道在淮西岁抄无雪斋祈备至梦有告之曰雪降家人之梦亦然及开户雪已积矣每雨阳愆期躬祷神祠应响如答未尝不易盖而归也典三大藩所至吏畏民爱去必思之与人交久而益恭虽祁寒隆暑未尝见愠容仆使之贱亦皆拊以恩意气貌温然出语未尝伤人至论天下事龂亮不屈亹亹可听性倜傥喜黜人之急遇宾客曲尽情礼在维扬舟车络绎公帑不给则以家庖私橐继之不少靳也资产素丰坐此常窘自兵火以来江北田宅荡尽而公燕闲山林食客未尝不满坐薨谢

之日家无余资其轻财重义类如此文定公尝以任子恩两奏族人之家皆不及禄公遇郊礼复奏其子且勉使成人族女有未嫁者必为之经营使得所归乡间无贵贱老少待之如一皆得其欢心迨襄事至空井邑送之人人为流涕可谓笃行君子矣初崇寧间用事者变祖宗法度文定公力持之使不得逞因出之於外其後上皇悔悟召还欲复用不果有意於公又为权臣沮抑卒不克有所施設以尽其才有识者尤所深惜也有文集四十卷藏於家诸孤卜葬得地於怀安县感应乡钦德里山川气象深秀雄伟以四年十一月甲子与淑人合葬葬之日久雨为霁人以为积德之报子孙之兴殆未艾也某大观中识公於京师宣和末复相遇於维杨迨靖康秋自枢庭乞郡实与公为代然犹未欵也绍兴初来寓长乐遂得与公游从陪杖屨山林间从容燕笑情好甚笃常窃叹其真天下长者临其丧哭之为恸诸孤状公行事乞文於碑以告神道义不得辞且系之以铭曰

白屋起家奋身孤寒困而後达未足为难公世富贵自强学问力取巍科以跻禁近少长乡曲谦恭逊悌闾里推称未足为美公贵还乡与俗浮沉无小无大得其欢心惟文定公被遇五朝公克绍之德音孔昭风度粹夷襟怀旷达温温君子既明且哲受知圣主说言屡对有嫉之者卒摈於外遇事接物一以诚纯虽?必貌既久弥敦邓蔡之政寬猛异宜吏畏民爱服其设施帅於维扬值时艰棘不扰而办尽瘁事国安分知足退闲林垧萧然自得遗此宠荣宜享遐龄尚膺显报遽反其真搢绅是悼庆流有衍子孙诜诜嗣有典者复大其门勒铭丰碑昭告隧道百世之下斯文可考

梁谿集卷一百六十六

卷一百六十七

钦定四库全书

梁谿集卷一百六十七 宋 李纲 撰

墓志

宋故朝请郎朱公墓志铭

宋故追复龙图阁直学士赠少师钱公墓志铭

宋故朝请郎朱公墓志铭

公讳蒙正字养源姓朱氏其先亳州永城人也十世祖仕闽乐邵武故县溪山之胜因家马遂为邵武人曾祖讳贯赠承事郎祖讳浦父讳藻累赠通议大夫通议公娶故赠太师黄公讳汝济之女资政殿大学士讳履之姊累赠硕人生五子公其长也公少豪迈年甫冠始折节读书下笔为文语辄惊人其舅大资公见而奇之许以能立公益自淬砺徒步入京师寓太学凡十年所与游皆一时英俊元丰中擢第中乙科释褐调扬州江都县主簿公曰古人以三釜及亲为喜今俸禄虽微足以奉甘旨足矣性识强敏遇事不少懈每听讼必得其情而後断之以法令以其能委以县事公亦自任不疑以故江都办治监司荐於朝廷南康军都昌县令其治都昌如江都尤恶其下植党以倾善良告戒弗从即痛以法绳之风俗为革未几丁母忧服除授衡州茶陵县丞茶陵剧邑久阙令仓庾圯坏吏缘为奸租赋不时入公至领县事即条画申陈久不报公叹曰此令丞职也何俟报为亟命构葺仓庾为之一新谨视出入奸弊遂絶租赋皆不督而办岁旱公祈祷齐戒精洁雨随车而至远迩沾足民大感服秩满用荐举改官从辟知定州安喜县时元符三年秋也坐茶陵任内请搬家人庸钱夺官授鼎州龙阳县令丁通议公忧大观初始雪正前事复官除知开封府长垣县未数月差通判火山军秩满造朝权司农寺丞通判德顺军赐五品服政和四年秋以疾丐致政明年夏从官荐公康强有风力请复仕上从之差提点信州上清宫改成都府长生观遂寓居于颍尾八年夏得疾至七月十二日不起享年六十有四累官至朝请郎娶傅氏累封安人二子长曰康年以公致仕恩补将仕郎次曰唐年一女适俊士叶裕民公持身廉慎性质直不自表襮恂恂如不能言而胷中是非了然其在茶陵不能阿事上官为当事者所不悦捃摭细故卒以法中之然选人以般家人【阙】法所听也後卒雪正公坐此困蹶累年而刚直不少衰及倅德顺太守武人越常例遗之甚厚公辞不获悉以所遗寄於公帑凡閱岁太守闻而讶之公不自辨释以病告老而归其後太守坐不法除名而公无毫髮之累识者韪之公平生志气高远常持隐忍就功名之说欲有所为而仕宦齟齬卒不如志其可悲也已诸孤从其治命扶护归邵武将以宣和元年己亥十一月初四日葬于永城乡将堂之原先期公之弟朝请郎绍状公行义使纲为之铭纲视公为外叔父义不得辞铭曰

朱氏之先有功于闽十世其昌公为闻人学优而仕以廉以勤虽或窒之而卒以伸往倅边城力辞馈遗告老而归则莫我累凡今之人顾利忘义闻公之风胡不少愧蓄则厚矣未究厥施谓宜壽考而止於斯返葬故乡宅兆是宜告于後昆篆此铭诗

宋故追复龙图阁直学士赠少师钱公墓志铭

京师浩穰自古难治非夫聪明足以剗制繁剧智略足以摘发奸伏仁惠足以牧养小民威严足以震服豪右未易称职汉有赵张三王唐有许孟容李岷吴湊之流隐然有声不过数人以其知其难也国家都汴尹天府者多名卿才大夫位天子之侍从然独会稽钱公政事号为本朝第一公之尹京前後凡三当天下乂安四方人物之所聚权贵戚属之所居奸人巨猾之所容依凭城社关机开阖干挠法制莫敢谁何而黠胥老吏舞文玩法乘隙射利情伪百出为尹者鲜不墮其术中独公於词讼喧嚣簿书倥偬之间从容谈笑而办幽隐曲折尽得其情吏不能欺而予夺一出於己无敢议者其政尤务抑强扶弱缘饰儒雅不专以柱後惠文从事势家犯法不少假借而下户无告有所依归良民诘误多所平反而豪侠巨蠹必深鋤治当时士人有为政事録者所载百余事皆出人意表世谓神明之政自非兼聪明智略仁惠威严之资有大过人者畴能及此宜乎声称烜赫至今不泯与汉唐名臣相望而无愧也公讳勰字穆父吴越武肃王五世孙自从曾祖忠懿王俶归朝廷今为开封人曾祖侔晋故诸道兵马大元帅吴越国王累赠太师尚书令兼中书令天下兵马大元帅曾祖妣江氏某国太夫人祖易故任翰林学士尚书左司郎中知制诰累赠太尉祖妣盛氏平阳郡君赠某国太夫人考彦远故任起居舍人直集贤院知谏院累赠太尉妣丁氏济阳郡君赠吴国太夫人公生有奇表神气秀发未成童日诵千言及长博闻强识卓不羣谏院公捐馆舍公以遗表恩推与其姊之夫张升卿而刻意力学以期自立从叔父修懿公明逸质问疑义修懿公爱之奏授将作监主簿皇佑三年调监陈州粮料院後历庐睦壽苏等州酒官虽在?酤喧冗间手未尝释卷嘉佑八年诏以六科举士翰林沈学士文通荐公应贤良方正能直言极谏科会神宗升遐罢举治平三年文通又以公应诏熙宁二年始召试以第二人过阁及廷对制策极论新法忤执政意与孔文仲俱被黜还任自是遂罢制科然名望益崇有识者韪之明年秩满赴选部会朝廷检举治平从官应诏所荐淹滞未举者公名居多或沮公以五任监当无课最可称大臣有荐者曰钱某岂监当材耶有诏许以五任阙陞且试剧邑除知开封府尉氏县治声流闻擢流内铨主簿官长陈襄以公所造班簿进呈神宗称之襄曰非臣所能也主簿钱某为之耳有旨令东上合门引见上殿既对敷奏称旨许以清要宰相王安石遣其弟安礼谓之曰能一冠豸乎公谢曰家贫母老不能远行安石知不附已犹除三司盐铁判官提点四园苑提举帑司点检南郊一行事务又诏措置帑法数因事赐对滋被眷知诏迓送北使明年以国子博士除京西路提点刑狱秩满徙河北又徙京东代还复除盐铁判官元丰三年借太常少卿使北还奏上前论契丹形势盛衰之理深切着明上熟复其言会五路军兴除陕西都转运使专主馈运兼制置解盐公即日就道留家京师上每旬必遣内人至第问太夫人安否公在关中转饷如期无扰于民尝躬督飞挽夜行坐界中百余里冒险无所畏避乞事还长安丁内艰奔丧哀毁骨立上遣使劳问赙给加等时元丰四年也五年官制行上先於左司郎中格目内书公姓名遂降诰合门俟公释服明年高丽国王薨来赴上思得公奉使诏起复赴阙公具奏坚请终丧不允特借左谏议大夫充高丽吊慰国信使公入对上顾问甚渥面赐金带公奏人臣出疆当识上旨今外议纷

纷以谓陛下欲给高丽以伐北敌而臣独未知圣意工曰高丽好文又问士大夫家世所以选卿行余无他也乃与左番祭奠使自密州同日发洋公舟五日而达左番飘泊四明踰月始至夷人素闻公名相与聚观至於燕饮逾制与夫馈饷非例者皆却而弗受还次紫燕岛国主王运遣二吏棹小舟以书送馆寓金银器皿四千余两公辞之吏泣曰寡君有命徒归则死顾左番在国已受公曰左右番所见不同尔可死吾不可受须臾风迅遂失所在公有诗曰屡却张膺使犹留返璧殄诗因平安奏偶至上前激赏者久之使还造朝擢中书舍人赐三品服上顾谓曰卿与高丽王书云免诸梁陰阳之患悦滕文哭泣之哀可谓得体矣哲宗即位差权摄开封府正官还自顿递乃罢元佑元年移给事中继除龙图阁待制权知开封府初莅事日吏欲试公讼牒至七百余公徧閱析而为三施行者才百数愆而遣者数十人余悉緘识戒以後勿复来閱月有再至者公诘其故弗服命吏取视之无少差一府大惊且命曹掾省并文具以十为一革簿书相仍重复之弊有戚里子凭藉无赖屡犯禁公治其罪而後奏宗室有任节度使者市贾人米千斛久不偿直公移檄诸司粮料院留券请俸积及其数呼贾人付之有?人尹绅讼继母窃亡父家资改嫁公奏绅既不能养使继母改适又以盗家资为言不可以训特不用?杖而羈于旁郡以励风俗御史台吏人遣其妻讼本官不法事公命杖之翌日吏自来持一器若有所贮置阶庀前诉妻方娠昨蒙杖而堕公熟视状遽判杖其脊吏不伏呼请罪名公不顾徐曰汝家安在适从何许来得无越御路耶吏惶惧而出京城法以屍由御路者徒二年公遇事敢断皆此类也京师尝多雨雪公密启母后以匱具二十余万缗贷贫窶者公躬率僚属徧历委巷排户而给之都人素喜博塞公禁之甚严至是取旨大纵酺博民间驩呼细民赖以获济公平时未尝私见宰执一日白事司空府有典谒吏即客次袖牒陈事公曰此非受讼之所何不来府中吏有所恃颇偃蹇却之不去公叱下械送府狱杖而遣之八座中有抑留侍婢不归其母者母诉於府为移文不报公命迫其家奴付狱根治卒取而归之又台臣有折简私祈寬門医所负者公立其介于庭呼医促其期限由此寢忤权近人多侧目观望摭摭细故交章弹击哲宗照知其故特诏放罪公奏谢有曰乱吾治者常二辅掣其肘者非一人又曰德音始下公议获伸仰皇明之烛幽觉羣邪之夺气其不可屈如此三年春以狱空迁秩公辞不得已乃受而言者复论狱空非实公不自明力丐补外乃以本职知越州兼两浙东路兵马钤辖公既怀绂故乡过家上冢挥金亲旧日引宾朋饮酒赋诗讼庭萧然至终日无一事苏翰林轼时帅钱塘唱和往来无虚日当时以比元白四年移知瀛州兼高阳关路安抚使马步军都总管为帅镇静边人安之除江淮荆浙等路制置发运使行次符离召拜工部侍郎复迁户部尝因转对论六曹事多迂滯省官莫肯裁决又诸曹所受辞牒多不经由所属愿申飭中外遵守诏条其言切中时病七年夏除知青州兼京东路安抚使复留权户部尚书奏罢户部狱措置麴院是岁郊礼公前期奏财计办日坐直舍临智永师草书沛然有余暇诏馆伴北使于同文馆时朝廷欲变帐法事且行矣公抗章争之帐法得不改会尹政不修盗贼公行除龙图阁直学士再知开封府公具奏力辞以谓前愆不辩後效难施优诏褒答公不得已视事不数日滯讼一空羣盗奔佚苏轼时为礼部尚书每俟公治事时送诗求和公不废决遣即次韵答之辞意贍丽轼大惊以简谢曰电扫庭讼响答诗简亦数年来故事也其为当世所重如此八年春为太母山陵顿递使事毕开封属章惇入相公见上具言尝行惇谪辞愿乞骸以避时宰不听绍圣元年翰林阙学士惇三荐林希不行因问上所欲用上曰钱某岂不堪为翰林学士耶即日除公学士知制诰兼侍读经筵进见多诏留身因得款陈天下事哲宗益眷倚之尝论朝廷之盛人物为先今三馆育材之地寂寥无闻乞诏大臣及近臣各举所知引见考实置之文馆以

备器使又论禁军逃亡满限捕获得以案问免死非是厢军决配不到配所者十常七八为患不细乞修严军制又请就郊祀赦恩移放沿江编管人事皆施行一日上许公郊祀後除执政公惶恐伏地叩头辞避及亲祀诏公驂乘以备顾问公以足疾不能久立为解得免而大臣之忌公者日夜求所以去公之术礼部奏公所撰导驾鼓吹辞差互绍改正之不能动会草右丞郑雍乞出批答谕书台臣论公批答中有羣邪交攻之语为附会元佑章累上不出言者不已至全台并进乃罢公翰苑以本官出知池州公既行台臣以状首前所言弗容羣枉误为羣邪交攻朝廷既不问公亦不辩也公在池阳二年为政宽简得士民心四年冬有旨移知和州命未下公以十一月丙辰卒于官舍正寝享年六十有四明年二月庚申诸孤奉公之柩葬于开封府开封县汴阳乡中边村将相里祖太尉公之域公娶吕氏故相文穆公蒙正之孙龙图阁学士居简之女封东平郡君赠越国太夫人先公五年卒至是合祔焉子男十二人曰杲卿朝请大夫致仕曰东美朝请郎主管京东排岸司曰朝隐承议郎通判袁州曰鲁望承务郎西京转运司主管公事曰端已朝散大夫知泰州曰德舆朝散大夫行卫尉少卿曰延硕承事郎监郢州酒务曰伯言左太中大夫提举江州太平观曰君鱼将仕郎曰伯牛未仕其二人早夭女四人长适朝奉大夫诸王府侍讲句颢次适朝奉大夫通判大名府俞授次适朝请大夫荆湖北路转运判官应通次适端明殿学士左通奉大夫提举嵩山崇福宫王孝迪孙男十八人曰净曰浚曰渚迪功郎权国子博士曰涌曰衍迪功郎代州繁峙县主簿曰灝曰沆曰滨曰溥秉义郎曰澤曰潜曰涛曰洵将仕郎曰湜右儒林郎曰淳曰温右承务郎曰注右宣义郎曰洙孙女二十三人公在仕途几五十年积官至朝议大夫勲上柱国爵会稽郡开国侯食邑一千二百户惟钱氏当唐末以武功起东南据有二浙而能尊中国效臣顺以膺宠命金印玉册世祚王爵以抚吴越及宋兴知天命所在顿首自归不烦干戈一方士民克保其生弗识兵革陰功盛德庆流子孙枝叶扶疎冠冕蝉聯膺受福祿不可胜纪而公之祖太尉公始以文章显於咸平天圣间考諫院公忠言谏论受知仁祖至公以才学事神哲二宗閎闕声望益以光显又自太尉公諫院兄弟及公与从兄故枢密直学士藻皆以制举取重名于世而公之从祖文僖公惟演逮公三世五人掌丝纶之职公之诸子杲卿东美朝隐鲁望相继登科德舆伯言皆赐上舍第致位通显衣冠世族儒学之盛甲於本朝天之报施詎不信哉公资性豪迈善议论使人听之忘倦早以字行於世方处塲屋已为一时英俊之所推许及登侍从内外制辞脍炙人口有文集一百卷名会稽公集所为文章雄深雅健得西汉体作诗清新遒丽长於用韵工行草书有魏晋人笔法尝自爱重未尝辄以与人平居恺悌乐易与朋友交终始如一尤精鉴裁所推荐多达者弟侄婚宦皆经其手收养孤遗家常至二百口俭约均一内外无间言其行已大略如此元符三年春太上皇帝即位追复公龙图阁学士官其子三人明年党论兴欲寝前命伯言上书论列得不追降因是免降者四十余家崇宁元年又以党籍刻诸石大观二年再看详公等出籍者十数人三年伯言以公在翰苑所草潜藩加恩制进呈有诏特赠正议大夫公之葬开封也方在谪籍中不克铭于墓建炎元年某月诸子迁奉公及三世之丧葬于镇江府金坛县某乡之原方朝廷大除党籍之禁而收録其子孙旌别淑慝焕然明白乃论譔公平生行事以状来请铭余雅闻公之贤德其敢以固陋辞铭曰钱氏之先有功二浙世济忠顺保有吴越归于有道投龟而决子孙诜诜福祿无阙笃生异人惟会稽公高明博达直谅公忠克举贤科绍其家风对策大庭如长虹声闻四驰淩阶膺仕骅骝得路一日千里蟠根错节游刃历试干将遇物不劳剗制简在帝心将命絕域文采风流远夷矜式张旌却使留殮返璧达于宸聪当宁叹息三尹京邑政声着闻威讐豪右惠养小民决遣如流摘发若神谈笑而治羣盜以

奔代言西掖视草玉堂高辞大笔黼黻文章诗句风清字画鸾翔萃此衆美鬱为邦光经筵启
沃密受眷知同朝忌媚共排去之王佐之才卒不获施昊天不吊哲人遽萎党论之兴踰三十
年胎祸基乱闭塞忠贤大明方升公议日宣微公谁归愿作九原粤自汴阳迁窆京口撫撫崇
冈水深土厚卜云其吉安固永久勒此铭诗以告厥後

梁谿集卷一百六十七

卷一百六十八

钦定四库全书

梁谿集卷一百六十八 宋 李纲 撰

墓志

故秘书省秘书郎黄公墓志铭

宋故左中奉大夫直秘阁张公墓志铭

故秘书省秘书郎黄公墓志铭

公讳伯思字长睿父姓黄氏其远祖自光州固始徙居闽中为邵武人曾祖汝济赠太师曾祖妣高氏赠相国太夫人祖履任资政殿大学士会稽郡公赠特进祖妣段氏封魏郡夫人考应求任奉议郎饶州司録事妣王氏封仙源县君继李氏封贡寧县君任氏封华容县君会稽公由布衣擢高第以德行文学被遇三朝致位丞弼号为名臣公其嫡长孙也公天资警敏风度夷粹幼不好弄惟喜读书日诵千余言每听会稽公讲论经史退与

他儿言无遗误者会稽公尤鍾爱之俾晨夕侍左右躬自训导任为假承务郎尝梦孔雀集于庭觉而赋之词采甚丽识者知其为文祥也故右文殿修撰赠太师李公会稽公之甥也於公为外伯父儒学冠一时会稽公命公师焉鍾学绩文根柢渊源益臻壺奥年甫冠入太学与宿儒寒俊校艺累占上游优与荐送遂过南省属哲庙升遐天子谅陰不言诏罢廷试公名在行间不得摭其素蘊会稽公将以恩例继奏俾增秩公固辞由是益奇之时朝廷方以宏词取士公将应其科肄业不辍人皆谓公决中高选属会稽公薨公以毁得羸疾竟不遂所志士论惜之初公未第前以铨试高等调磁州司法参军久不之任至是改通州司户丁内艰不赴服除授河南府户曹参军公平居笃志文史视世务邈然不以经意其掾洛阳也衆谓会府剧曹难於称职而公应事接物游刃有余不劳而办洛阳故都素号衣冠薺泽公以余暇与其贤士大夫游从容翰墨间相得甚适秩满当受代故资政殿学士邓公洵武实司留钥惜公之去辟知右军巡院公亦乐其山水人物之胜因留不辞盖留者又二年朝廷有知公者除详定九域图志所编修官兼六典检閲文字改京秩寻差充监护崇恩太后园陵使司掌管牋表以修书恩陞朝列擢秘书省校书郎未几迁秘书郎既入馆纵观册府藏书雅愜所好耽玩至忘寢食在馆踰再考丁奉议公忧公性至孝自幼失母氏而贡宁华阳君相继捐馆舍执丧咸以孝闻素抱羸瘵至是不胜哀毁疾遂以剧释服至京师清羸骨立而嗜学不倦盖如昔也复除旧职不数月疾竟不起实政和二年二月二十有六日也公初不甚信释氏遭会稽公丧读佛书恍若有悟遂笃好之奉事精谨将没之夕沐浴易衣西向修念佛三昧而逝家无余貲盈篋笥者书籍而已公体弱如不胜衣而风韵洒落飘飘有凌云之意遇人谦谨恂恂如不能言而高明宏达善着书挥毫数千言倚马可待自幼学至强仕手未尝释卷其所至虽假室暂寓必求明牕

净几图史满前欣然处其间诵习述造皆有程度寒暑不易故其所学汪洋浩博上自六经下至诸子百家历代史氏之书天官地理律历卜筮之说无不精诣又好古文奇字官洛下得名公卿家所畜商周秦汉钟鼎彝器欵识研究字画体制悉能了达辨正是非道其本末遂以古文名家在馆阁时当天下承平无事诏讲明前世典章文物修輿地图集鼎彝古器考订真贋公以素学与闻议论发明居多馆阁诸公皆自以为莫能及也与同僚襄陵许翰尤相善翰喜述作所解太玄诸书有疑义多就公质之是时士务浮竞枝辞蔓衍趣时好以取世资公独退然无营寓意古道所学最为絶俗文辞雅健格高而思深歌思俊逸清新追古作者盖公之学问慕扬子云文章慕柳子厚诗篇慕李太白此自其平日所称道也有文集五十卷藏于家公尤精小学凡字书讨论备尽本朝淳化中博求古法书命待诏王着绪正诸帖公病其乖伪龐杂作刊误二卷考引载籍咸有依据而公之书正行草隶皆精絶初仿顔柳後乃规摹鍾王笔势简远有魏晋风气得其尺牘者多藏弃呜呼昔之所谓好古博雅君子与夫直谅多闻之益友者非公其谁当之公亦颇好道家言自号云林子别字霄宾其再至京师也梦人告之曰子非久人间上帝有命典司文翰觉而书之不踰月遂谢世其事颇与李长吉王平甫同亦异矣夫公自假承务郎六转至朝奉郎自磁州法掾六迁至秘书郎娶张氏故朝奉大夫直龙图阁淮南路计度转运使根之女男二人长曰诏今为右宣教郎前充荆湖南路安抚都总管司书写机宜文字次曰?右从事郎新差福州怀安县尉女一人适故兵部侍郎邹公浩之子曰栩今为右承务郎监潭州南岳庙孙男二人曰禄曰佑某年月日葬公于镇江府丹徒县招隐山之麓距今盖十有七年方葬时诏?尚幼不克铭于墓大惧湮没先德乃状公平生行事来请铭纲於公中表姻娅相与甚厚义不得辞铭曰

天地和气清微淑灵山川炳焕草木敷荣公禀其秀应时以生岐嶷之姿见自幼龄风神凝远玉粹冰清温良端恪祖训是承孔翠之祥乃以文鸣含英咀华休有俊声来游贤关令誉腾跃遂登儒科縻此好爵筮仕之初于西邑洛簿书粗办寓意寥廓发闻惟馨高步馆阁纵观羣书得其所乐贯穿古今见闻日博沈酣耽玩心醉于学根深华茂其辞如云文章典雅诗句清新人皆窘束我独瀟沦追古作者超类轶羣夏鼎周鼓鍾鎛彝樽云雷刻画繚以繆文铭章欵识研究本根洞视千古别其贋真下逮小学订正精明字画之妙晚臻老成有正有隶有草有行鸾翔鹄峙岳立渊渟兼资衆妙以大其名身反不昌遽速殒零兰摧桂折凤去梁倾莫诘其由归于杳冥白玉楼成上帝有诏往司文翰脱屣尘淖世间梦幻孰非颠倒壽夭升沉竟亦何校京口之藏既安宅兆十有七年星流电扫子孙方兴天有显报追作铭诗万世之告

宋故左中奉大夫直秘阁张公墓志铭

公讳植字次东姓张氏世为黟县人唐末避地徙家鄱阳故今为饶之德兴人曾祖某大理评事祖某不仕以隐德闻父某累赠中大夫张氏为鄱阳着姓中大公笃学励行为乡里所推游从皆一时名士然所向不偶老於场屋乃刻意教训诸子而公卒能才学取显仕用承其志人谓中大公有子矣公自幼岐嶷不凡诵书日千余言及长学有渊源於经术洞探旨归作为文词不蹈袭前人自出胷臆汪洋雅健声名籍甚试有司辄与高选遂中元佑九年进士第调邵州邵阳尉迁衡州衡阳令尝谓县令品秩虽卑然受百里之地于天子而牧养之亲民之官莫甚於此其敢莽卤灭裂剥下奉上以取世资故其听讼莅政纖悉必亲多酌以情不拘於法

而邑大治郡守监司有所须求於理不可辄从奸人猾胥洞照情状束缚严甚不敢摇手以故一方畏而爱之郡有小校凭守将势为邦人患一日以事抵邑公痛惩之守将虽不平而公治无衅卒莫能逞憾政声暴着至今士大夫犹能道之以举者改京职知宣州南陵县事其治南陵犹衡阳然不旬月而报政方朝廷以东南当五钱多私铸者为不便更张钱法独行於西北公谓佐官曰是钱民间行之已久骤置不用则细民折阅所丧多矣曷若开帑受之以准宿赋使公无负租下不怨咨而移诸西北於县官初无损也权宜行之民得其赐至画像以祠邑有贵游子负豪干挠县事前政莫敢谁何公至略不假借之气夺然其心不快至是造谤以诬蔑公竟坐废格诏令罢然识者奇公英果达於从政所蓄巨量未易以绳墨议也未几朝廷有知公可任者擢提举黔南地边蛮蜚异时部使者憚於临按奸弊百出公至则躬行责实宿弊尽蠲已而边帅罔功谬论军事以罔朝廷公疾之以实闻遂以越职免及帅以诈穷朝廷察见其妄他司以緘默罢乃复公提举汜水輦运未行会新广盐转般之法遴选计臣除公广东转运判官有旨会邻路使者议于界首时公从兄龙图公相将漕江西适当其事使节相辉联牋上议荐绅荣之就迁提点刑狱旋移江东是为乡部中大公与太夫人时皆康宁安舆就养子舍乡间歆艳一时士大夫有风木之感者因以为不可及也再徙江西相继丁父母忧执丧惟谨服除提点京西刑狱京西岁比不登饥民相挺为盗几半部封公以计策殲渠魁而散其衆所全活者以钜万计进直秘阁陞河北转运副使北骑南牧三镇并警比闻帅不协人望喜乱者揭榜通衢以摇我师公晓譬将士坏其机牙奸不得发後以论事不合罢建炎初除江东提刑有张遇者乘舟沿江大掠境上摠兵募士随机扞御贼不敢驻事平得请提举亳州明道宫岁满起知宣州才下车适有溃兵薄城公仓卒应变守御之具颺旨皆备衆以宵遁复提举江州太平观执政者惜其去起知肇庆府命下不及受以疾不起实绍兴二年十一月庚午也享年六十有三积官至左中奉大夫职直秘阁爵德兴县开国男封邑一百户娶周氏继徐氏皆封令人三子曰炳曰炜皆将仕郎曰灼登仕郎一女适士人臧汉之四孙曰坦曰垸皆登仕郎余幼未名公禀性刚果卓犖不羣喜功名尚气节遇事敢为虽屡挫而不屈其治县有异绩为部刺史扬善嫉恶凡所施为皆不劳而办居家事亲孝友於兄弟疎财好施不轻为然诺与人交豁如也善议论洞达机会每接宾客酒行气振抵掌谈笑常屈其坐人建炎初余自湖湘趋行在所与公邂逅江上相与论世故慷慨奋厉其言亹亹可听窃叹其才高而徘徊之久方欲荐用而余罢政未几公亦就闲其後归自海上见公於德兴把酒道平生公虽已病犹未觉有衰惫意後二年乃闻公讣哭之为恸作文以祭之嗟乎如公之才气其自期岂止刺一路典一郡而已哉胷中所蕴百未一施而遽已矣此所以深可痛惜也其孤将以绍兴四年二月己酉奉公之柩与令人周氏合葬於县银山乡水西之原先期以状来请铭余辱在姻娅且相知之厚义不得辞铭曰

豫章飏风含栋梁志用非其所曷若弃置骐驎饱粟一日千里使驾鼓车凡马何异士有杰才郁为国器厚蓄薄施命有所制嗟嗟次东孝友信义抱卓犖姿负刚果气意象轩豁伟於论议剗治繁剧刃有余地任重致远何所不至刺部典藩职是中秘位止於斯有识长喟银乡之原幽宫永閤往安其居後人之利

卷一百六十九

钦定四库全书

梁谿集卷一百六十九 宋 李纲 撰墓志

宋故朝请郎主管南京鸿庆宫张公墓志

铭

故南昌县丞吴公墓志铭

宋故朝请郎主管南京鸿庆宫张公墓志铭

君讳端礼字南仲姓张氏处州龙泉人也张氏世为龙泉着姓自君之高祖处士君讳珣以德义为乡闾所尊积厚流远子孙蕃昌多由科名登仕版而君之祖考独以隐德称至君乃能以文学取科第位朝列历官有声以为亲荣人谓张氏有子矣曾祖讳宾于曾祖妣叶氏祖讳继昌祖妣潘氏考讳居辰以君通籍于朝累封朝奉郎致仕赠朝请郎妣叶氏以赠继妣林氏以封皆为安人君少警敏自强学问为文尚理致下笔辞意辄过人游太学一举中崇宁五年进士第调陕州司户参军未赴差除管干尚书兵部架阁文字岁再周以省罢授开封府陈留县主簿陞幕职官调秀州军事判官改行颍昌府长社县丞以举者改京秩调襄州司刑曹事改广济军司录事又改泰州司户录事逾年移知常州武进县辟杭州司仪曹事秩满调无为军司录事赐五品服居二岁丁朝请君忧去官服除以母老乞宫祠除主管南京鸿庆宫得请再任以疾卒于里第实绍兴二年七月二十有二日也积阶至朝请郎享年五十有一孝友恺悌容貌粹然恂恂若不出诸口平居视之循谨谦退人也及莅官从事剴繁治剧应刃辄解临事执法据理而争毅然有不可夺之色盖其守於中者刚方而无私故其达於外者果断而不挠殆天资超迈非积学所能致也初佐邑邑令老儒以君年少易之君孜孜所职以绳墨自检而间以邑令之所未至者规之令骇服遂相与为忘年友及任郡僚事无巨细惟是之从一有不当於心必据正论辩达官大吏初虽不喜已而察君用心往往屈已从之以故声称籍甚其治武进为当时诸县之最武进剧邑多世家巨室又当舟车之冲号为难理君下车未几以治闻大抵君之为政能酌物情断以胷臆又皆不越法度人多便之其治官府如治家虽薄物细故必躬临惟谨其御吏如御奴仆教戒不从乃置於法其视民如视子弟抚字之意出於至诚有狱讼移案临阡和声康色询究曲折必得其情而後已至豪强骄横凭藉气焰有所干挠必痛绳之未尝少纵以故吏畏民爱一邑斩然里正之法以貲簿差任责繁重为者多破家君为设方略免其科调民以兢劝先是有当为里正者举家逃去闻君之政乃始归业君政事既简出令必信有所号召榜之邑间辄应如响未尝遣吏持符至村疇间二浙当丽使所往来旧例前旬日集民以备牵挽至有不得餉系累而死者君召民与之期属使者前一日入境郡守以不素备责君荅曰是暮将至无虑也已而数千衆毕集为民所信如此是时花石舟舫络绎於道县出挽夫尤亟既夺农时且去城市远民告病君恨位卑不得自达叹曰以末害本至此乎乃

籍坊民递当其役先後惟均民欣从之逮君之去坊民犹未徧役也又尝以花石故郡俾造舟君不获已令取吏民有罪而情轻者募出赎金以给其费斂不及民每有横斂君固拒不受至再四不见从争之益力郡守怒曰若尔吾将按君答曰某治行久矣守慙易心服之提举常平官欲以甲所应得坊塲与乙君不从提举官怒入邑欲求细故中伤之君避不见问何故答曰既有公事不敢见也提举者无如之何而止君守官抗当路者数矣然卒不能罪者以君廉直谨于法无得而疵也时学校鼎新富民子多假手於人隶籍黉舍以追丁役君悉召使试艺业于庭以判真贋相率引去有假儒衣冠答虐佃夫至自经以死者逮捕赴狱郡学生千余人造庭下祈免之且以词动君君弗许同僚谓君朝廷方崇儒君不少寬假且获譴答曰有罪不治何以为邑卒杖遣之其徒相与走阙下诉君事闻天子洞见情状亲批其奏曰张某无罪由是士民益畏服孤幼钱寄官帑法许保任以贷民俾出息有士人者负责人势贷而不肯偿君捕治甚急或讽之君不止士人迫遽逃去竟以忧畏死他郡君见义敢为不畏强御如是既去民至于今思之後政亦自以为莫能及也在杭幕兼掌市司政令既公食饮外未尝以纖介扰民民服其清已而巨盜起歙睦间乘势破余杭多残害官吏君避地郊野为贼所得有市贾遇之出死力以赎迎舍其家事小定又具舟送之遂免於难非君素履廉白何以得此真可无愧於古人矣官无为地僻政窳君随事纠正多所裨益郡将职租旧薄其後增之田不加多而赋几倍皆责之保伍历数太守弗能正君力陈其非是罢之朝廷降钱和余部送吏悉以鬻盐钞既至会钞法改诸郡恐失期则令民户均赔太守亦欲放之君执不可曰规利失钱吏也奈何以诱民且朝廷以百姓困乏故降余本今反取於民殆非布宣德之意乃具奏而以吏系狱会赦吏得释而民不扰君之力也故事以通判资序为司録者俸给视通判君曰为司録而越职得俸可乎不受其清介不以一毫自污类如此惟君果断之材刚正之守谨廉之操使当刺举耳目之司藩方牧守之任其施設必有大过人者惜其徒居僚佐宰百里而不得尽其材也仕宦始终几三十年循守矩范未尝汲汲求知於人晚节所操益固侥幸进取之意不萌於心既得请祠宫自放溪山以读书教子为乐人尤高之古所谓靖共尔位好是正直者微君其孰当之诸孤以其年九月某日葬君於县之劔池乡秦溪祖塋之侧君娶故中大夫右文殿修撰赠太师李公之次女某之女弟也柔顺有妇德前君七年卒至是祔葬子男三人长曰洙登进士第调婺州东阳县主簿次曰泳次曰津应进士举女二人长适某之子右承奉郎监潭州南岳庙宗之次适某之犹子琳之某於君有姻娅之契相处久而情好笃知君行义为尤详诸甥以状来请铭义不得辞铭曰

貌温兮气刚言有物兮行有常中守固兮视外物其犹糝糠施於有政兮无往不臧位不称德兮发闻则芳胡畀之才兮嗇其壽康主张合辟兮信天道之茫茫身虽不淑兮子孙其昌葬从先塋兮山高水长我铭幽宫兮百世之下其有耿光

故南昌县丞吴君墓志铭

君姓吴氏讳彦申字圣时处州龙泉人也曾祖讳某赠大理评事曾祖妣吴氏赠河东县太君祖讳某赠承事郎祖妣朱氏赠蓬萊县太君考讳某故任奉议郎知湖州长兴县事妣鲍氏封金华县君吴氏之先家于会稽之山陰唐末有为谏议大夫者避董昌乱徙籍永嘉谏议之季自永嘉转择幽胜爱龙泉之松源乡谿山深秀因卜居焉兄弟每一相思则束剑呼仆千里命

驾其友爱如此於君盖始祖也历五代暨国初吴氏世有隐德弗显天圣中君之从祖伯仲始相继登科丞于秘书殿中由是君之曾大父廷评公蒙追荣之恩及长兴府君擢第升朝而君之大父承事公复被褒赠於是吴氏为名家着姓而宗族之登仕版者踵相接於朝矣长兴府君生三子君其长也幼力学有大志才弱冠美秀而文一举与计偕识者皆以早达远到期之居无何丁长兴府君忧哀毁逾礼庐於墓侧终丧思所以为偏亲之荣者五举于礼部不见收而行义日益着於宗族信於朋友推於乡闾大观中诏以八行取士君为乡人称荐时长乐郑修提举两浙学事檄邑官敦请君就黉舍君辞不获命则以书力荐其友人吴逵而归一时士夫高之政和二年中进士第丙科君行年四十有九矣喜见眉睫谓所亲曰此何足云所可喜者世先人之科以拜吾亲耳调秀州司理参军归未及家而金华君捐馆舍以不得拜亲为恨哀动路人服除授宣州宣城县主簿以举者改从政郎授洪州南昌县丞在官逾二年以疾终於官舍享年五十有九实宣和四年十二月十有七日也君孝友惇睦出于天性终身之慕至老不衰吴氏素以富厚称长兴府君没既久从父议析居君当得善利田宅悉以畀从父而自取其次且以家事付诸弟一不问故昆弟义聚人无间言所友皆一时善士与故尚书郎鲍辉乐平令吴逵相好尤笃举动造次必以礼自持乐道人之善所称皆天下长者其学问渊源不务华藻着述文章根於理致久困场屋於得丧澹如也晚始仕虽折腰州县小官然遇事不苟随所至皆有可称其在宣城尝掇水阳镇土豪有与镇官交结者因持一事请托无不满意君至之日首发其奸土豪一夕自恨死既而朝廷【阙】

梁谿集卷一百六十九

<集部,别集类,南宋建炎至德佑,梁谿集>

卷一百七十

钦定四库全书

梁谿集卷一百七十 宋 李纲 撰墓志

宋故安人刘氏墓志铭

宋故袁州士曹周君墓志铭

乐全居士墓志铭

宋故龙图张公夫人黄氏墓志铭

宋故安人刘氏墓志铭

夫人姓刘氏家世福州怀安曾祖讳仲甫太子洗马致仕祖讳若思赠光禄少卿考讳彝朝请大夫行都水监丞赠银青光禄大夫银青以文学行义为儒林所宗被遇神宗皇帝奉使守边数更显任娶枢密直学士陈公襄之女弟是生夫人柔惠婉淑尤为父母之所鍾爱女工之外喜读书能通其义尝手书列女传师慕往烈银青嘉其志为作诗以系之择配难其人以适括苍周公讳池仕至

朝请郎致仕夫人以恩封德安县君次封安人初朝请尝从银青学淳厚笃实尚节义重然诺银青喜其为人居无何银青坐交趾事谪徙涪陵而朝请亦方罢官安陆未有家室则以书属之曰环视故旧间抱古人之义可以托吾家无如子者愿以息女奉箕帚朝请不敢辞遂以夫人归之先是朝请以父命出继叔氏逮夫人入门时所生所後父母俱无恙夫人朝夕往来承事柔声怡色曲尽礼意两堂交口称誉至於接娣姒遇姻党皆得其驩心内外无间言朝请从仕安於义命未尝妄求人知循守涂辙迨于归老夫人内助以成其志同其甘苦休戚者踰四十年相待如一日平居雍肃喜愠不形於色服勤中馈醪醴膳修之事以奉宾祭至老不倦其教子严甚未尝以顏色假借抚诸妇以恩虽婢妾辈怡怡如也事父母尤尽孝方银青在涪陵朝请得官鄂渚夫人迎奉母兄以致养迄涪陵内徙其後陈夫人孀居春秋益高夫人思慕忧勤书问不时至则为之忘废寝食兄朝散郎淮夫年兄弟也夫人每进见常若有所严憚移所以事父母者以事兄不以老故少衰盖德性根於中而安习名教者如此闻者益服其家法为难及朝请既捐馆舍服未除夫人亦以疾终享年若干实宣和三年正月五日也五年二月十有八日祔葬于常州宜兴县永丰乡铜坑之原朝请之兆域子男三人楸迪功郎袁州士曹掾後夫人三年卒柩未仕榘早卒孙男五人叔兴伯骏伯泰仲昌仲岩孙女八人既葬之十年其子楸以状来请铭且曰先夫人淑德懿范宜有以传後而孤露以来遭时多故避地奔走之不暇未有辞刻石置于幽室敢以为请某以姻娅尝拜夫人于堂与其子友善弗敢以固陋辞为之铭曰

为人女则事父母为人妇则事舅姑为人妻则承夫为人母则教子此女子之职天下之常道然鲜克举之夫人事父母以孝闻事舅姑以顺闻承夫以礼教子以义其於为人女为人妇为人妻为人母之道备矣君子偕老不为不寿疏封显号不为不荣子孙诒诒其兴未艾女子处世如夫人者亦可以无憾矣追作铭章置于幽宫质而不文以诏无穷

宋故袁州士曹掾周君墓志铭

造物者之於人材其有意邪其无意邪以为无意则成就长养如榱桷杞梓足以充当世之用是不得谓之无意也以为有意则具是材者往往困滞湮郁弃置於无用之地卒不能以自振亦岂得谓之有意乎余尝疑此二者今於周君见之君讳楸字复本处之遂昌人幼岐嶷不羣读书千余言辄成诵下笔亶亶不休文理可观老师宿儒多称之及长庄重有守笃於名义孝友於家信於故旧朋友平居恂恂如不能言至临事有所见则毅然不可夺问学渊博多自得旨趣不随时好尚以应有司之求尝以乡贡一试礼部不中选即归奉亲养不复从事科举既用亲任登仕版调三衢工曹以亲年高不忍远去求檄旁近郡以便子职恬然不以仕进为意亲捐馆舍执丧惟谨未终制复丁母夫人忧时盗发清溪遂犯武林声震浙右君奉神柩避地郊野率礼无废人以为难丧除再调宜春士曹掾得疾道上抵家七日而卒实宣和六年四月三日也享年四十有四如君器识学行求於士夫间未易多得其一第与夫显白当世为名卿才大夫盖不难也然皆不能如志胷中所存略未施設而遽没於盛年此造物者之所以可疑而自壽自夭自穷自达庄列之流所以得行其说也夫以成就长养之难者如彼而弃置困抑之易者如此虽高才硕学名字不传与草木俱腐者多矣可胜叹哉君之曾祖辰不仕祖元长贈中奉大夫考池任朝请郎以太府寺丞致仕其为人敦厚乐易克享上壽天下称为长者母安人刘氏贈银青光禄大夫刘公彝之女枢密直学士陈公襄之甥治家有法雅善诲子君与弟据友爱甚笃其相切磋如朋友然士林推之前娶叶氏再娶李氏余之女弟也子男二人伯骏伯秦皆好学能文庶几君之余庆在是女二人长适进士张津次尚幼许妻余之子昂之皆李出也卒之明年二月晦葬於常州宜兴县永丰乡铜坑之原先莹之别壠後十一年岁次丙辰其弟据以毗陵邹柄状叙君行事来请铭余与君既忝姻戚雅相义不得辞铭曰

茫茫天运埏陶万彙已幸为人矧复为士渐摩义理聪明日开如杞如梓郁为成材成之既难予之又慳壽夭穷达了不相关倚嗟复本土林之秀材虽孔多命则不偶胷中之奇百未一施堙沉下僚奄忽永归问谁尸之不可究诘从古以然何独今日嶷嶷二子粹美而文庆流有衍宜大其门阳羨之区谿山秀深安于幽宫以利其後人

乐全居士墓志铭

居士讳密字季明姓邓氏其先占籍滑台远祖惟恭唐末总军于宣武以事谪临江子孙因家于外邑沙阳国初沙阳改隶延平故今为延平人曾祖克诚祖若蒙皆潜德弗仕父兼济好学能文有声場屋间晚赴廷试擢优等授昭武司法参军而终累贈奉直大夫奉直公生四子居士其季也居士自幼已有成人风及长博极羣书作文有理致为流辈推许隶业上庠十余年所交皆一时豪俊平居较艺多占上游及试有司则不偶因喟然曰亲老矣安能久违色养以

邀禄仕哉拂衣东归朝夕膝下执子弟之役惟谨伯兄甯既擢第仕宦寢显居士即忘怀进取亲养之暇以讲习自娱未尝一日废卷丁奉直公及太夫人忧执丧如礼崇宁间以八行取士衆推居士为举首辞不就县官敦请勤甚不得已一诣黉舍即弃归时论高之居士孝友出於天性闺门雍睦事兄如事亲然伯兄挂冠而归其次亦皓首每燕客兄弟必偕乡闾美之遇人无贵贱亲疎接之必以诚望其容貌知为厚德君子也县学久颓弊居士倡而新之且为文以劝学者後进景从助贫赈急不计家资问疾吊丧不避寒暑闻人善称之不容口有不如理者以微辞讽之语未尝伤人以故一邑信服每欲有所为必就谘决其行已大略如此辟所居东偏为圃结庵以居名曰乐全故士大夫因以乐全号之圃广才数亩凿池沼置台榭堂宇毕备植嘉葩美木百余种能知花木之性手自培治靡不繁盛四时芳菲不絶宾至具酒肴奕钓觴咏尽欢乃罢其喜客好事虽老不衰尤晓世务贯通古今与人谈论罪罪使听者亡倦余宣和初谪官沙阳一见相契每与居士游燕圃中从容甚适为名其堂曰棣华作大字榜楹间酬唱几成卷轴别去一纪复来则沙阳为盗所扰居士避地长乐之甘蔗洲旧第已为煨烬惟棣华独存余题诗壁间有最爱幽人三径里尽收春色一壶中之句盖纪实也行次长乐居士相访虽年齿已高而气貌不衰所造益以深远尝窃叹其真有德者余被命宣抚荆广辟其子文饶为属官以行别未几遽闻居士之丧为之怆然者累日居士平时学佛独取其心法自避地所归乡邑一日俾家人具汤沐不及待辄易衣跣趺而坐侍者觉有异遽掖使就枕奄然右脇而化实绍兴二年十月二十有六日也享年七十有三乡闾闻者皆为之出涕娶同邑张氏生二男长即文饶宣和初补太学上舍生释褐以亲老久不调官今犹迪功郎次文昭应进士举一女适承议郎广南东路转运判官张致远孙男女各一人尚幼其孤将以某年月日葬居士於沙阳官塘奉直公莹之右从治命也以余与居士游从之旧先期以状来请铭义不得辞铭曰

学以为已而不忘於事退以自藏而不入於迂孝弟着於宗族信义推於里闾以此终其身殆古之所谓一乡之善士者欤修然自得而不累於物澹然知足而不求有余方丈之室有琴书图史之乐数亩之园有池台花木之娱以此遂其性殆古之所谓逸民者欤年逾从心岂曰不壽二子克家是为有後葬从先莹治命之守铭以昭之既安且久

宋故龙图张公夫人黄氏墓志铭

哲庙朝以郊祀成推恩天下诏子孙愿以官授其亲者听朝散大夫直龙图阁鄱阳张公讳根时罢遂昌县令年甫壮欲如诏书休官冀恩逮其祖人皆谓公齿少材高誉望甚休进未可量曷不少须取显仕以为亲荣而遽此汲汲也独其夫人黄氏力赞成之其後龙图公将漕淮南初遇大礼法当?子又欲请于朝官其叔父以告夫人夫人喜见顔色曰公方壮年为祖谢仕今始得子孙之恩复以推叔父皆人所不能而公优为之其助风化多矣愿亟抗章无疑嗟夫仕宦进取鲜不为妻孥计而龙图公所为絶人远甚盖有夫人为之内助而为人妻者能勉其夫以义如此尤所难也呜呼得不谓之贤哉夫人闽之邵武人曾祖讳某赠司徒祖讳汝济赠太师父讳履尚书右丞母段氏京兆郡夫人惟黄氏世为邵武着姓司徒太师有隐德为乡里所推至右丞公以清德直道进位执政为时儒宗而黄氏益显右丞公三女夫人其长也方幼穎悟絶人诵书日数万言辄了其义凡女工之事不学而能及长懿淑端庄动必依礼所以事父母者曲尽其意识趣高迈尤深於老庄之书右丞公每与夫人语未尝不叹息以为不可及也

择配久之元丰中龙图公试业上庠甫冠已三荐于礼部遂擢乙科右丞公时为礼部尚书一见以国士许之且曰器度凝远真吾女之配也遂以夫人归焉夫人之归张氏也王舅姑舅姑咸在堂龙图公性至孝奉养其亲惟恐不及夫人悉力左右之承顺颜色纫饵必亲舅姑爱重每指夫人所为以训诸嬪俾之师法逮事凡三十年服勤如一日及其亡也执丧礼惟谨张氏大族也内外姻戚甚衆夫人上承下抚人无间言惟寛裕无忌嫉喜愠不形於色与人和易怡声下气惟恐伤之虽妾侍辈皆得其驩心右丞公京兆君爱夫人过其子每岁间不远千里归宁京兆君之丧夫人哀毁终丧不茹葷其後右丞公位廊庙退朝无声色之奉独与夫人谈道间及时事夫人辄能断其利害右丞公喜曰是吾益友也建中靖国初右丞公谒告还乡诏趣入覲抵维扬疾作诸子远宦独夫人在旁尝药侍膳昼夜不舍既薨号慕成疾复力疾以治丧事咸有条理右丞公归葬邵武而京兆君葬丹阳夫人岁时致享不辍人谓黄氏有女矣长兄高材旷达不事事其卒也至无以敛夫人赠襚之甚厚賙恤诸孤恩意尤笃其天性孝悌如此初龙图公既休官以归闲居踰十年夫人安於岑寂无半语及荣利事迨近臣论荐落致仕召对夫人不以为戚其後奉使江淮间又十余年士大夫莫不以公久淹于外为惜夫人独曰部使者一路休戚所系随事施設亦足以行其所学矣龙图公性刚直遇事无所顾避夫人每戒之曰释氏六波罗密以般若为宗贵夫以方便善巧济一切也今公欲有为於当世而不知此其可乎龙图公深感其言为之委蛇曲折以行其道十余年间两路之民受赐多矣其後以言得罪夫人泰然无忧色笑谓龙图公曰公虽知所谓般若矣独於能忍抑犹有未尽乎其议论过人皆此类也夫人之妹适刘公正夫刘公绵历侍从遂登宰辅夫人未尝干以私中年笃好释氏世味益薄独扫一室燕坐终日自禅悦自娱自龙图公以罪去益有厌世意尝梦金人长丈余以手授之夫人惊喜而悟顿若有得召诸子告戒甚悉一日晨兴偏诣诸娣姒若叙别然且曰吾终当梦中逝不复以疾病烦人也夜分命儿妇具粥食既而就枕诘旦犹顾左右具龙图公药饵如常时少顷诸子候兴居已奄然逝矣侧卧西乡手结印固不可解实宣和二年闰五月七日也享年五十有九夫人神观泰定气韵洒落虽盛族雅以寒素自将无贵骄之习性乐善闻人有所长称道弗容口龙图公轻财好施常倒囊以賙人之急虽家人饮食衣服有不备而夫人处之怡然无鄙色龙图公治事以严而夫人济之以寛蒞事以直而夫人济之以和伉俪垂四十年日以忠孝相警戒故龙图公立身行道无愧古人夫人之助为多初龙图公致政以母之封封祖母故夫人以所封逊於姑其後以右丞公恩赐冠帔封南华县君至政和间更定命妇号封宜人男四人长曰焘太学博士曰熹将仕郎曰輝曰焕未冠初焘以外祖恩补太庙斋郎夫人戒之曰丈夫当以儒学致身慎无以此自怠遣詣太学十年遂以第三人登第女七人皆通诗礼夫人所自训也长适秘书郎黄伯思次适某次适太常博士李富国次适太府寺丞薛良显次适监杭州都税务范渭次适楚州宝应县丞虞澹其一尚幼夫人既弃杯棬未逾月龙图公疾亦不起诸孤以宣和五年正月壬午合葬于德兴县吴园王舅通直公之莹左先期以状来请铭纲前年自左史谪官沙阳既得归迂路抵龙图公第拜夫人于堂留十余日听其议论亶亶令人忘倦所见超卓虽老于禅学者弗能及也别未半岁遽闻夫人之丧窃叹其於生死去来之际了了如此矧平日荷顾之厚而知夫人之行已为甚详义不得辞为之铭曰黄氏之先世载令德宪宪右丞股肱帝室笃生夫人柔惠温恭曾靡贵骄来嫔张宗孝于父母顺于舅姑以义教子以礼承夫惟龙图公高义迈古险夷一节夫人之助嗜学老庄疏封南华鱼轩象服以宜其家德曜之贤道韞之智视于夫人曾何足俪金人入梦寔符净缘死生大矣而往翛然葬从其夫先莹之侧子孙代昌考此铭刻

梁谿集卷一百七十

卷一百七十一

钦定四库全书

梁谿集卷一百七十一 宋 李纲 撰靖康传信錄序

靖康改元金人犯阙实中国之大变典籍所载未之有也朝廷应变设施大略衆人所共知者往往私窃书之至於庙堂之上帷幄之中议论取舍事情物态为宗社安危生民利害之所系者衆人所不得而知书之或失其实此传信錄所为作也余自宣和已亥以左史论事谪官闲废七年迨乙巳之夏蒙恩以太常少卿召其冬天子内禅召对擢兵部侍郎既改元正月三日差充行营司参谋官四日除尚书右丞充留守五日改充亲征行营使二月三日以姚平仲事罢职五日以土庶伏阙复旧职改充都大提举京城四壁守御使金人退师除知枢密院事六月差充河北河东路宣抚使七月出师次怀州八月召赴阙议事九月还次封丘除观文殿学士知扬州十月以言者改差提举亳州明道宫寻落职十一月责授保静军节度副使建昌军安置寻移宁江以二年春行次长沙闻召命复官除资政殿大学士领开封府事时金人再犯阙几半年京师之围未解四方盗贼蜂起余荷两朝厚恩国步艰难不敢自爱方率义旅以援王室追念自乙巳之冬迄今才岁余一身之进退荣辱天下之安危利害纷然如此岂非其梦耶然一岁之间再致大寇虽曰天数亦人事也去春致寇其病源於崇观以来军政不修而起燕山之役去冬致寇其病源於去春失其所以和又失其所以战何也敌以孤军深入前阻坚城而後顾邀击之威当是时不难於和而朝廷震惧其所邀求一切与之既割三镇又质亲王又许不费之金币使敌有以窥中国之弱此失其所以和也诸道之兵既集数倍於敌将士气鋭而心齐朝廷畏怯莫肯一用惩姚平仲刼寨之小衄而忘周亚夫困敌之大计使敌人安然厚有所得而归此失其所以战也失此二者之机会故令敌志益侈再举南牧无所忌憚遂有并吞华夏之心譬犹病者证候既明当用毒药而不用虽暫得安疾必再来此必至之理也以今日而视去岁人心国势之不相侔何止相什百哉臣子之义惟当奋不顾死以徇国家之急及其成功则天也然自是之後朝廷非大有惩戒士风非大有变革内外小大同心协力以扶持宗社保全家室为事扫去偷惰苟且之习媚嫉潜愬之风虽使寇退亦岂易枝梧哉故余於此錄记其实而无所隐庶几後之览者有感於斯文

靖康传信錄上

宣和七年冬金人败盟分兵两道入寇其一以戎子斡里雅布为帅寇燕山郭药师叛燕山诸郡皆陷遂犯河北其一以国相尼堪为帅寇河东李嗣本叛忻代失守遂围太原边报狎至朝廷震惧不复议战守惟日谋避狄之计然其事尚秘外廷未闻也至十二月中旬间贼马逼近始遣李邕借给事中奉使讲和降诏罪已召天下勤王之师且命皇太子为开封牧宰执日聚都堂茫然无策津遣家属散之四方易置东南守臣具舟楫运宝货为东下计於是避狄之谋外廷始闻余时为太常少卿素与给事中吴敏厚善夜过其家谓敏曰事急矣建牧之议岂非欲委以留守之任乎东宫恭俭之德闻於天下以守宗社是也而建以为牧非也巨盗猖獗如此宗社不守中原且无人种自非传以位号使招徕天下豪杰与之共守何以克济公从官以

献纳论思为职曷不非时请对为上极言之使言不合意不过一死死有轻於鸿毛者此其时也敏曰监国可乎余曰不可肃宗灵武之事当时不建号不足以复邦而建号之议不出於明皇後世惜之上聪明仁慈愧感公言万有一能行此金人且将悔祸退师宗社底宁岂徒都城之人获安天下之人皆将受赐非发勇猛广大慈悲之心忘身殉国者孰能任此敏翌日求对具道所以且曰陛下果能用臣言则宗社灵长圣寿无疆上曰何以言之敏曰神霄万寿宫所谓长生大帝君者陛下也必有青华帝君以助之其兆已见於此上感悟叹息因言李纲之论与臣同有旨召余赴都堂稟议讫随宰执至文字库祗候引对实二十三日也其日余怀所论着劄子待对文字库上御玉华阁先召宰执吴敏等对至日晡时内禅之议已决擢吴敏为门下侍郎草传位诏召百官班垂拱殿下宣示诏旨余不复得对是夕命皇太子入居禁中覆以御袍皇太子俯伏感涕力辞因得疾召东宫官耿南仲视医药至夜半少苏翌日又固辞不从乃即大位御垂拱殿见宰执百官时日有五色晕挟珥赤黄色有重日相摩荡久之乃隐尊道君皇帝曰道君太上皇帝尊道君皇后曰道君太上皇后道君太上皇帝居龙德宫道君太上皇后居撝景园以李邦彦为龙德宫使蔡攸吴敏副之皆奉道君太上皇帝旨也大赦天下翰林学士王孝迪实草赦书而不着上自东宫传位之意致四方疑士论非之诏有司讨论所以崇奉道君太上皇帝者余时犹在奉常条具以闻诏遣节度使梁方平将骑七千守濬州步军都指挥使何灌将兵二万扼河津探报敌骑渐逼故也二十八日有旨召对延和殿上迎谓曰卿顷论水军疏朕在东宫见之至今犹能诵忆尝为赋诗有秋来一凤向南飞之句余叙谢讫因奏曰陛下养德东宫十有余年恭俭日闻海内属望道君太上皇帝观天意顺人心为宗社计传位陛下受禅之际灿然明白下视有唐为不足道也愿致天下之养极所以崇奉者以昭圣孝今金人先声虽若可畏然闻有内禅之事势必消缩讲和厚有所邀求於朝廷臣窃料之大槩有五欲称尊号一也欲得归朝人二也欲增岁币三也欲求犒师之物四也欲割疆土五也欲称尊号如契丹故事当法以大事小之义不足惜欲得归朝人当尽以与之以示大信不足惜欲增岁币当告以旧约以燕山云中归中国故岁币增於大辽者两倍今既背约自取之则岁币当减国家敦示和好不校货财姑如元数可也欲求犒师之物当量力以与之以至於疆土则祖宗之地子孙当以死守不可以尺寸与人愿陛下留神於此数者执之坚无为浮议所摇可无後艰并陈所以御敌固守之策上皆嘉纳翌日有旨除兵部侍郎日下供职靖康元年正月一日上御明堂受文武百官朝贺退诣龙德宫朝贺道君太上皇帝百官班于门外宰执进见三日有旨以吴敏为行营副使以余为参谋官团结军马於殿前司又以蔡攸为恭谢行宫使宇文粹中副之以治道君太上皇帝东幸之具盖鞞里雅布之兵距河濬州不守梁方平战衄烧桥而遁何灌军马望风溃散贼遂渡河是日闻报故也夜漏二鼓道君太上皇帝出通津门东下道君太上皇后及皇子帝姬等相续以行侍从百官往往潜遁是时从官以边事求见者皆非时赐对四日余待对班於延和殿下闻宰执奏事议欲奉銮舆出狩襄邓间余窃思以为不可适遇知东上合门事朱孝庄於殿廷间语之曰有急切事欲与宰执廷辨公能奏取旨乎孝庄曰宰执未退而从官求对前此无例余曰此何时而用例耶孝庄许诺即具奏得旨引对余拜讫升殿立於执政之末因启奏曰闻诸道路宰执欲奉陛下出狩以避狄果有之宗社危矣且道君太上皇帝以宗社之故传位陛下今舍之而去可乎上默然太宰白时中曰都城岂可以守余曰天下城池岂复有如都城者且宗庙社稷百官万民所在舍此欲将何之若能率励将士慰安民心与之固守岂有不可守之理语未既有内侍领京城所陈良弼自内殿出奏曰京城楼櫓创修百未及一二又城东樊家冈一带壕河浅狭决难保守愿陛下详议之

上顾余曰卿可同蔡懋良弼往观朕於此俟卿余既被旨同懋良弼亟诣新城东壁遍观城壕回奏延和殿车驾犹未兴也上顾问如何懋对亦以为不可守余曰城坚且高楼橰诚未备然不必楼橰亦可守壕河惟樊家冈一带以禁地不许开凿诚为浅狭然以精兵强弩占据可以无虞上顾宰执曰策将安出宰执皆默然余进曰今日之计莫若整饬军马扬声出战固结民心相与坚守以待勤王之师上曰谁可将者余曰朝廷平日以高爵厚禄蓄养大臣盖将用之於有事之日今白时中李邦彦等虽书生未必知兵然藉其位号抚驭将士以抗敌锋乃其职也时中怒甚厉声曰李纲莫能将兵出战余曰陛下不以臣为庸懦使治兵愿以死报第人微官卑恐不足以镇服士卒上顾宰执曰执政有何阙赵野对曰尚书右丞阙时宇文粹中随道君皇帝东幸故也上曰李纲除右丞面赐袍带并笏余致谢且叙时方艰难不敢辞之意车驾兴进膳赐宰执食于崇政殿门外庑再召对于福宁殿去留之计未决故也宰执犹以去计劝上有旨命余留守以李昉副之余为上力陈所以不可去者且言唐明皇闻潼关失守即时幸蜀宗社朝廷碎于贼手累年然後仅能复之范祖禹以为其失在於不能坚守以待勤王之师今陛下初即大位中外欣戴四方之兵不日云集敌骑必不能久留舍此而去如龙脱於渊车驾朝发而都城夕乱虽臣等留守何补於事宗社朝廷且将为丘墟愿陛下审思之上意颇回而内侍王孝竭从旁奏曰中宫国公已行陛下岂可留此上色变降御榻泣曰卿等毋留朕朕将亲往陕西起兵以复都城决不可留此余泣拜俯伏上前以死邀之会燕越二王至亦以固守为然上意稍定即取纸御书可回二字用宝俾使追还中宫国公因顾予曰卿留朕治兵御寇专以委卿不当稍有疎虞余惶恐再拜受命与李昉同出治事是夕宿於尚书省而宰执宿于内东门司中宫国公之行已远是夕未还中夜上遣中使令宰执供军令状诘旦决行五日余自尚书省趋朝道路纷纷复传有南狩之事太庙神主已出寓太常寺矣至祥曦殿则禁卫皆已擐甲乘舆服御皆已陈列六宫襍被皆将升车矣余遑遽无策因厉声谓禁御曰尔等愿以死守宗社乎愿扈从以巡幸乎禁卫皆呼曰愿以死守宗社不居此将安之余因拉殿帅王宗濬等入见曰陛下昨日已许臣留今复戒行何也且六军之情已变彼有父母妻子皆在都城岂肯舍去万一中道散归陛下孰与为卫且敌骑已逼彼知乘舆之去未远以健马疾追何以御之上感悟始命辍行余谓宰执曰上意已定敢有异议者斩因出祥曦殿传旨宣示禁卫皆拜伏呼万岁其声震地复入劝上御楼以见将士上可之驾登宣德门宰执百官将士班楼前起居上临栏干久之复降步辇劳问将士余与吴敏撰数十语叙金人犯顺欲危宗社决策固守各令勉励之意俾合门官宣读每读一句将士声喏须臾六军皆感泣流涕於是固守之议始决是日以余为亲征行营使马军大尉曹晟副之白时中罢相以李邦彦为太宰张邦昌为少宰吴敏知枢密院事赵野为门下侍郎王孝迪为中书侍郎蔡懋为左丞耿南仲同知枢密院事孝迪邦彦之姻家故荐之南仲出城已累日上遣使追还之以东宫官故有是命亲征行营使置司於大晟府辟参谋官书写机宜勾当公事管勾文字准备差遣统制统领将领准备差使等择文武官处之吏房户房兵房工房选三省人吏处之上赐银绢钱各一百万贯匹两文臣自朝请大夫以下武臣自武功大夫以下及将校官告宣帖三千余道一切许以便宜从事自车驾御楼之後方治都城四壁守具以百步法分兵备御每壁用正兵万二千余人而保甲居民厢军之属不与焉修楼橰挂犴幕安炮坐设弩床运砖石施燎炬垂櫺木备火油凡防守之具无不毕备四壁各有从官宗室武臣为提举官诸门皆有中贵大小使臣分地以守又团结马步军四万人为前後左右中军军八千人有统制统领将领步队将等日肄习之以前军居东水门外护延丰仓仓有粟豆四十万硕其後勤王之师集城外者赖之以济以後

军居宋门外占樊家冈使敌骑不敢近而左右中军居城中以备缓急自五日至八日治战守之具粗备而敌马已抵城下寨于牟駝冈牟駝冈者京城外西北隅地也冈势隐鳞如沙磧然三面据水前枕雾泽陂即孳生马监之所刍豆山积异时郭药师来朝道君命打球於其间故知可以为寨地金人兵至径趋其所实药师导之人谓药师忠於国家与金人战偶不利而从此余弗信也是夕金人攻水西门以火船数十只顺汴流相继而下余临城扞御募敢死士二千人列布柅子弩城下火船至即以长钩摘就岸投石碎之又於中流安排叉木及运蔡京家假山石叠门道间就水中斩获百余人自初夜防守达旦始保无虞入对垂拱殿方奏事间传报敌攻酸枣封丘门一带甚急上命余往督将士扞御余虑城上兵卒不足用即告上乞禁卫班直善射者千人以从上遣御药卢端同行传旨如所乞自禁中至新城酸枣门几二十里行夹道委巷中惟恐敌之已登城也抵门敌方渡濠以云梯攻城余命班直乘城射之皆应弦而倒余时坐酸枣门下自门上掷人头下者至六七不已询之云斩获奸细俾验认即皆汉人首级也盖扰攘中兵卒妄行杀戮捕获数人即斩以徇因使号令如获奸细捕人亲执出头验实推赏辄杀者斩自是乃止余与官属数人登城督战激励将士人皆贾勇近者以手炮櫺木击之远者以神臂弓强弩射之又远者以牀子弩座炮及之而金人有乘棧渡濠而溺者有登梯而坠者有中矢石而踣者甚衆又募壮士数百人縋城而下烧云梯数十座斩获酋首十余级皆耳有金环是日敌攻陈桥封丘卫州等门而酸枣门尤急敌箭集于城上如蝟毛士卒亦有伤中者皆厚赏之上遣中使劳问降御笔褒谕给内库酒银碗彩绢等以颁将士人皆欢呼自卯至申未间杀敌数千人敌知城守有备不可以攻乃退师因遣使随李邺请和抵城下已昏黑矣坚欲入城余传令敢辄开门者斩竟俟明乃入实初十日也上御崇政殿宰执起居讫升殿奏事引使入对出斡里雅布书进呈道所以举师犯中国之意闻上内禅愿复讲和乞遣大臣赴军前议所以和者上顾宰执未有对者余因请行上不许曰卿方治兵不可命李昉奉使郑望之高世则副之宰执退余留身问所以不遣之旨上曰卿性刚不可以往余对曰今敌气方锐吾大兵未集固不可以不和然所以和者得策即中国之势遂安不然祸患未已宗社安危在此一举臣惧李昉柔懦而误国事也因为上反覆具道所以不可割地及过许金币之说以谓金人之性贪婪无厌又有燕人狡狴以为之谋必且张大声势过有邀求以窥中国如朝廷不为之动措置合宜彼当戢敛而退如朝廷震惧所求一切与之彼知中国无人益肆觊觎忧未已也先定然後能应安危之机愿陛下审之上颇以为然余退巡历城守因乞宰执分提举四壁上命蔡懋分提举京城四壁守御使而李昉是日至金人军中果辱命斡里雅布者南向坐昉望之等北面再拜膝行而前斡里雅布遣燕人王汭等传道语言谓都城破在顷刻所以敛兵不攻者徒以上故存赵氏宗社恩莫大也今议和须犒师之物金五百万两银五千万两绢彩各一百万匹马駝驴骡之属各以万计尊其国主为伯父凡燕云之人在汉者悉归之割太原中山河间三鎮之地又以亲王宰相为质乃退师出事目一纸付昉等达朝廷昉唯唯不能措一辞金人笑之曰此乃一妇人女子尔自是有轻朝廷心十一日昉至自大金军前宰执同对于崇政殿进呈金人所须事目且道其语宰执震恐欲如其数悉许之余引前议力争以谓尊称及归朝官如其所欲固无害犒师金币所索太多虽竭天下不足以充其数况都城乎当量与之太原河间中山国家屏蔽号为三鎮其实十余郡地塘泺险阻皆在焉割之何以立国又保塞翼顺僖三祖陵寢所在子孙奈何与人至於遣质即宰相当往亲王不当往为今日计莫若择使与之往返熟议道所以可不可者金币之数令有司会计所有续具报宿留数日大兵四集彼以孤军入重地势不能久留虽所得不满意必求速归然後与之盟以重兵

卫出之彼且不敢轻中国其和可久也宰执皆不以为然方谓都城破在朝夕肝脑且涂地尚何有三鎮而金币之数又不足较也上为羣议所惑默然无所主凡争踰两时无一人助余言者余自度力不能胜衆说因再拜求去曰陛下擢臣自庶僚不数日与大政臣亦受之而不辞者徒以议论或有补万分之一今与宰执异议不能有所补愿还庶僚以安愚分上慰谕曰不须如此卿第出治兵益固城守恐金人歟我此徐议可也余被旨不得不出复前进曰金人所须宰执欲一切许之不过欲脱一时之祸不知他日付之何人能为陛下了此愿更审处後悔恐无所及因出至城北壁复回尚冀可以力争而誓书已行矣所求悉皆与之以皇弟康王少宰张邦昌为质於金人军中已无可奈何则为之留三鎮诏书戒中书吏以辄发者斩庶几俟四方勤王之师集以为後图而宰执褒聚金银自乘舆服御宗庙供具六宫官府器皿皆竭取复索之於臣庶之家金仅及三十万两银仅及八百万两翌日对于福宁殿宰执以金银之数少惶恐再拜谢罪独余不谢於是孝迪建议欲尽括在京官吏军民金银以收簇犒设大金军兵所为名揭长榜於通衢立限俾悉输之官限满不输者斩之许奴婢亲属及诸色人告以其半赏之都城大扰限既满得金二十余万两银四百余万两而民间藏蓄为之一空余因对于福宁殿奏上曰收簇金银限满民力已竭复许告讐恐生内变外有大敌而民心变不可不虑上曰卿可往收榜毋得告讐余因巡城过榜所令传圣旨收榜归行营司移牒孝迪照会人情乃安自十五日四方勤王之师渐有至者日数万人乃於四壁置统制官招集之给刍粮授器甲踏寨地团队伍皆行营司主之昼夜竭力无少休息至十七八间统制官马忠以京西募兵至遇金人於郑州南门外乘势击之杀获甚衆於是金人始惧游骑不敢旁出而自京城以南民始获奠居矣二十日静难军节度使种师道承宣使姚平仲以泾原秦凤路兵至余奏上曰勤王之师集者渐衆兵家忌分节制归一乃克有济愿令师道平仲等听臣节制上降御笔曰师道老而知兵职位已高与卿同官替曹矜可也盖上级欲以师道为亲征行营副使余窃叹上裁处之当而宰执间有密建白以为不可者上入其言於是别置宣抚司以师道签书枢密院事充河北河东京畿宣抚使以平仲为宣抚司都统制应西兵及四方勤王之师并隶宣抚司又拨前後军之在城外者属之而行营司所统者独左右中军而已上屡申敕两司不得侵紊节制既分不相统一宣抚司所欲行者托以机密往往不复关报余私窃忧之自金人议和誓书既行之後朝廷日运金银币帛之属输其军中名果珍膳御醢之饷使者络绎冠盖相望上又出御府珠玉玩好宝带鞍勒以遗之品数甚衆其价不可胜计余每争以谓此不足为德适所以启戎心虽上恭俭视珠玉如粪土然戎之生心何厌之有衆方称美上德不以余言为然金人益肆须索无所忌憚至求妓乐珍禽驯象之类靡不从之及勤王之师既集西兵将帅日至上意方壮又闻金人掳掠城北屠戮如故而城外后妃皇子帝姬坟墓?殯发掘殆尽始赫然有用兵之意余赞上曰易於谦之上六称利用行师征邑国师之上六称开国承家小人勿用盖谦之极非利用行师不足以济功师之成非戒用小人不足以保治今陛下之於金人屈已讲好其谦极矣而金人贪婪无厌凶悖愈甚其势非用师不可然功成之後愿陛下以用小人戒而已使金人有所惩创不敢有窥中国之心当数十年无夷狄之祸不然一日纵敌数世之患忧未艾也

卷一百七十二

钦定四库全书

梁谿集卷一百七十二 宋 李纲 撰靖康传信录中

二十七日余与李邦彦吴敏种师道姚平仲折彦质同对于福宁殿议所以用兵者余奏上曰金人之兵张大其势然得其实数不过六万人又大半皆奚契丹渤海杂种其精兵不过三万人吾勤王之师集城下者二十余万固已数倍之矣彼以孤军入重地正犹虎豹自投於檻穽中当以计取之不可与角一旦之力为今之计莫若扼河津絶粮道禁抄掠分兵以复畿北诸郡俟彼游骑出则击之以重兵临敌营坚壁勿战如周亚夫所以困七国者俟其刍粮乏人马疲然後以将帅檄取誓书复三鎮纵其归半渡而後击之此必胜之计也上意深以为然衆议亦允期即分遣兵以二月六日举事盖陰阳家言是日利行师而姚古种师中之兵亦将至故也约已定而姚平仲者古之子屡立战功在道君朝为童贯所抑未尝朝见至是上以其骁勇屡召对内殿赐予甚厚许以成功当有节钺茅土之赏平仲武人志得气满勇而寡谋谓大功可自有之先期於二月一日夜亲率步骑万人以劫金人之寨欲生擒所谓斡里雅布者取康王以归虽种师道宿城中弗知也余时以疾给假卧行营司夜半上遣中使降亲笔曰平仲已举事决成大功卿可将行营司兵出封丘门为之应援余具劄子辞以疾且非素约兵不豫备斯须之间中使三至责以军令不得已力疾会左右中军将士诘旦出封丘门勒兵於班荆馆天驷监分命诸将解范琼王师古等围敌骑出没鏖战於幕天坡斩获甚衆复犯中军余亲率将士以神臂弓射却之是夜宿於城外而平仲者前一夕劫寨为敌所觉杀伤相当所折者不过千余人既不得所欲恐以违节制为种师道所诛即遁去而宰执台谏哄然谓西兵勤王之师及亲征行营司兵为金人所殲无复存者上震恐有诏不得进兵而斡里雅布遣使谓用兵特将帅所为不出上旨请再和宰相李邦彦於上前语使人曰用兵乃大臣李纲与姚平仲结构非朝廷议金议欲缚余以予之而使人反以为不可遂罢尚书右丞亲征行营使以蔡懋代之因废行营使司止以守御使总兵事而种师道亦罢宣抚使余是时得止兵诏知事且变即振旅以入城诣崇政殿求对既至殿门闻罢命乃不果退处浴室院待罪时初三日也蔡懋会计行营司所失裁百余人而西兵及勤王之师折伤千余人外余并如故乃知朝廷前所闻之非是夕上降亲笔慰劳锡赉白金缗钱五百贯两且令吴敏宣谕将复用之意余感泣谢恩方欲丐归田庐而有初五日士民伏阙之事初太学生陈东与书生千余人是日诣阙上书明余及师道之无罪不当罢军民闻之不期而集者数十万人填塞驰道街巷呼声震地登闻鼓於东华门击破之上遣吴敏耿南仲慰谕诸生俾之退反为军民所拥不得行必欲见余及师道乃去不得报则杀伤内侍二十余人又诟詈宰执李邦彦蔡懋王孝迪赵野等欲殴击之皆散走藏匿於是上遣中使召余及师道入对余闻命惶恐固辞不敢行而宣召者络绎而至中使迫促不得已上马出浴室院由东门街抵驰道趋东华门军民山积几不可进宣召中使朱拱之复为衆所杀盖怒其传旨之缓也入见上於福宁殿合子中余泣拜请死上亦泣有旨复尚书右丞充京城四壁守御使余固辞上不允俾出东华门至右掖门一带安抚军民余禀上旨宣谕乃稍散去再对于福宁殿上命余复节制勤王之师先放遣民兵盖不复有用兵意也先是所留三鎮诏书余既罢乃遣宇文虚中齎诣金人军中复差臧禹秦桧为割地使是夕宿于

咸丰门以金人进兵门外治攻具故也先是蔡懋号令将士金人近城不得辄施放有引炮及发牀子弩者皆杖之将士愤怒余既登城令施放自便能中贼者厚赏夜发霹雳炮以击敌军皆惊呼翌日薄城射却之乃退有告梁方平欲为贼内应者余召至帐中执之以付御史台推治凡内侍之守城者皆罢京师浮浪不逞之徒乘军民杀伤内侍扰攘中劫掠内侍十余家取其金帛而以所藏器甲弓劒赴官司纳自以为功凡千余人都城惧再有变余命悉集守御使司以次纳讫推其唱首将赏之各自言其姓名凡二十余人审问得实皆斩之余者逐去是日并斩杀伤部队将者亦二十余人然後民情安戢奸宄不作初敌马既抵城下余昼夜巡视有盗衲袄一领者有强取妇人绢一匹者有妄以平民为奸细而斫伤者皆即斩以徇故外有强敌月余日间虽窃盗无有也都城素多火亦无作者至是乃始纷扰数日弹压然後定金人请以越王代康王为质上以越王叔父不可遣乃遣肃王及驸马都尉曹晟以行康王得归上喜赐予良厚康王素有胆气膂力善射居金人军中几月姚平仲劫寨之夕恬然无所惊怖及归国人皆喜争出观之金人自平仲劫寨及封丘门接战之後颇有惧意既得三鎮之诏及肃王为质即不俟金币数足遣使告辞上赐燕於军中初十日遂退师十二日肆赦天下十三日宰执对延和殿余奏上曰澶渊之役虽与大辽盟约而退犹遣重兵护送之盖恐其无所忌憚肆行掳掠故也金人退师今三日矣初谓其以船楫渡河探闻乃系桥济师一日而毕盍遣大兵用澶渊故事护送之宰执皆以为太早余固请之上以余言为然可其请是日分遣将士以兵十余万数道并进且戒诸将度便利可击即击之金人厚载而归輜重既衆驱掳妇女不可胜计气骄甚击之决有可胜之理将士踊跃以行十四日以吴敏为少宰余知枢密院事徐处仁中书侍郎耿南仲左丞李昞右丞初李邦彦蔡懋王孝迪赵野既为国人所勾逐皆藏匿不敢复出上章丐罢上初未许至是邦彦罢相除观文殿大学士中太一宫使懋罢左丞除资政殿学士知大名府孝迪罢中书侍郎除资政殿学士提举亳州明道宫故有是命十五日签书枢密院事唐恪供职初恪以延康殿学士知杭州李邦彦荐用之至是始到阙也十七日泽州奏大金国相尼堪兵次高平县初尼堪既破忻代观察使折可求以麟府兵承宣使刘光世以鄜延兵援河东皆为所败遂围太原攻之月余不能下而平阳府义军叛义军者童贯张孝纯所招云中人也分布河东诸郡平日养贍蓄积为之一空及金人入寇孝纯以义军五万人守石岭关既叛以从金人矣至是诸郡往往杀戮或逐出之而平阳府者破城叛去攻陷威胜军遂引金人入南北关陷隆德府遂次高平朝廷震惧恐其复渡河而南宰执咎予尽遣城下兵以追斡里雅布之师将无以枝梧余曰斡里雅布之师既退自当遣大兵护送初不虞尼堪之来也尼堪之师虽来闻既和亦当自退必无复渡河之理又太行琅车之险已遣统制官郝怀将兵二万屯河阳控扼险道决无他虑而执政中有密啓上者於是御前以金字牌悉追还诸将之兵诸将之兵及斡里雅布之师於邢赵间相去二十余里金人闻大兵且至莫测多寡惧甚其行甚速而诸将得追诏即还余闻之上前力争得旨复遣而诸将之还已五程矣虽复再进犹与金人相及於虢沱河然将士知朝廷之议论二三悉解体不复有邀击之意第遥护之而已於是金人复旁出抄掠及深祁恩冀间其去殊缓而尼堪之兵闻已和果退如余言乃命种师道为河北河东宣抚使驻滑州而以姚古为制置使总兵以援太原以种师中为制置副使总兵以援中山河间诸郡时朝廷金议以三鎮为果不可割有如兵民为国家坚守不下即遣使再议以租赋归之求保祖宗之地故也有旨宇文虚中罢签书枢密院事除资政殿学士知青州李昞罢右丞除资政殿学士宫观以翰林学士何?为右丞御史中丞许翰为同知枢密院事中书侍郎徐处仁供职初处仁以观文殿大学士知大名府上闻其老成有士望方倚以为

相故以中书侍郎召之至是到阙供职未旬日遂拜太宰时三月初间也诏以道君太上皇帝回銮议所以奉迎者以门下侍郎赵野为奉迎使初道君正月三日夜出通津门乘舟以行独蔡攸及内侍数人扈从以舟行为缓则乘肩舆又以为缓则於岸侧得般运砖瓦船乘载饥甚於舟人处得炊饼一枚分食之是夜行数百里抵南都始馆于州宅得衣被之属市骏骡乘之至符离始登官舟及泗上少憩宇文粹中童贯高俅之徒始至童贯以胜捷兵三千扈从渡河以如维扬高俅以禁卫三千留泗上控扼淮津既抵维扬父老邀车驾不可渡江而道君决意南幸遂如鎮江道君太上皇后居维扬皇子帝姬皆流寓沿路州县闻敌退多先归者初恭谢行营所以都城围闭止絶东南递角又止东南勤王之师又令纲运於所在卸纳泗州官吏以闻朝廷不以为然道路籍籍且言有他故而太学生陈东上书乞诛六贼谓蔡京蔡攸童贯朱勔高俅卢宗原於是议遣聂山为发运使密图之山请诏书及开封府使臣数十人以行余因奏事福宁殿留身白上曰此数人者罪恶固不可恕然聂山之行恐朝廷不当如此措置昔肃宗欲发李林甫墓李泌谏谓其如明皇何肃宗抱泌颈泣曰思不及此使山之所图果成惊动道君此忧在陛下使所图不成为数人所觉万一挟道君於东南求劔南一道陛下何以处之上感悟曰奈何余对曰不若罢山之行显责童贯等乞道君去此数人者早回銮輿可以不劳而事定上以为然山乃不果行而童贯等相继皆去道君还次南都徘徊不进欲诣亳州上清宫烧香及取便道如西都上以为忧又每有书至必及朝廷改革政事又批道君太上皇后当居禁中出入正门於是喧传且有垂帘之事又批吴敏李纲令一人来莫晓圣意皆言事且不测余奏上曰所以欲臣及吴敏来无他欲知朝廷事耳吴敏不可去陛下左右臣愿前去奉迎如蒙道君赐对臣且条陈自围城以来事宜以释两宫之疑决无他虑上初不许余力请之乃听上令余齎御前书达道君且赐行宫官属茶药银各有差以十七日离国门十八日早次陈留县秋口遇道君太上皇后船余具榜子拜谒道左道君太上皇后舫舟令内侍杨修传教旨劳问余附奏曰陛辞日有所得圣旨合具奏知乞依赵野例幄前奏事复传教旨允余遂登舟入幄中於帘前拜讫具道上圣孝思慕且叙致方艰危中蒙上擢任感激之意道君太上皇后亲加獎谕余再拜谢讫道君太上皇后曰朝廷欲令於何处居止余对曰朝廷见以撝景园为宁德宫奉道君太上皇后盖遵稟道君太上皇帝十二月二十三日圣旨指挥道君太上皇后曰已得旨令居禁中余对曰以皇帝圣孝殿下圣慈母子之情岂复有间但稽之三从之义道君太上皇帝居龙德宫而殿下居禁中於典礼有所未安朝廷讨论但欲合於典礼以慰天下之望两宫安则天下安矣道君太上皇后曰朝廷须是措置令是则得因泛语他事余拜辞登岸因呼内侍杨修李俅等三人坐幄次与再道前语三人者皆巨璫也以余言为然因入白之复传教旨曰相公所论甚有理但既居宁德宫後欲一到禁中神御前烧香可否但奏来余对曰道君太上皇后既居宁德宫皇帝自当时诣省问万一欲暂到禁中岂有不可之理因遣使赐香茶酒食等钱五百贯给散随行使臣从人余以前语具劄子奏知且云道君太上皇后已有许居宁德宫意愿一切不须示以疑阻以昭圣孝而道君太上皇后入国门日聂山请以禁卫护宣德门道路喧然识者笑之二十日抵南都得旨二十一日引对是日道君御幄殿余起居讫升殿奏事具道上圣孝思慕欲以天下养之意道君泣数行下曰皇帝仁孝四方所知且獎谕曰都城守御宗社再安相公之力为多余再拜谢讫因出劄子二纸呈进其一乞道君早回銮輿不须诣亳社西都以慰天下之望其一自叙素蒙道君教谕擢用於国家艰危之中得效犬马之力欲乞身归田庐之意道君慰劳再四因曰相公顷为史官缘何事去余对曰臣昨任左史得侍清光者几一年以狂妄论列都城水灾伏蒙圣恩宽斧钺之诛迄今感戴道君曰

当时宰执中有不喜公者余愧谢因奏曰臣昨论水灾实偶有所见自古虽无道之国水犹不冒其城郭天地之变各以类应正为今日兵革攻围之兆大抵灾异变故譬犹一人之身病在五脏则发於气色形於脉息善医者能知之非有物使之然气之先至者尔所以圣人观变於天地而修其在我者故能制治保邦而无危乱之忧也道君以为然因询敌骑攻围都城守御次第余具以实对复曰敌既退师方渡河时何不邀击余曰朝廷以肃邸在金人军中故不许道君曰为宗社计岂可复论此余於是窃叹道君天度之不可及也语既浹洽道君因宣谕行宫止递角等三事只缘都城已受围恐为人所得知行宫所在非有他也余对曰方艰危时两宫隔絶彼此不相知虽朝廷应副行宫事亦不容无不至者在圣度照之而已道君因询朝廷近事如追赠司马光及毁拆夹城等凡三十余事余逐一解释谓追赠司马光止欲得民心毁拆夹城止欲防奸细之类因奏曰皇帝仁孝小心惟恐一有不当道君意者每得御批诘问辄忧惧不进膳臣窃譬之人家尊长出而以家事付之子弟偶遇强盗刼掠须当随宜措置及尊长将归子弟不得不恐然为尊长者正当以其能保田园大计慰劳之不当问其细故今皇帝传位之初陛下巡幸适当大敌入寇为宗社计政事不得不小有变革今宗社无虞四方以宁陛下回銮臣以谓宜有以大慰安皇帝之心者其他细故一切勿问可也道君感寤曰公言极是朕只缘性快问後即便无事因内出玉带金鱼袋古象简赐余曰行宫人得公来皆喜以此慰其意便可佩服余固辞不允因服之以谢而退二十二日扈从道君诣鸿庆宫烧香初余次拱州见奉迎道君禁卫宝辇仪物等留不进因以便宜作奉圣旨令趋南都至是道君烧香禁卫宝辇仪物等适至南都士女民庶夹道耸观得旨来早辞讫先还阙赐酒食香茶等二十三日辞再对于幄殿道君出青词藁一纸俾宣示宰执百官乃道君初传位奏天所作者道君宣谕曰本欲往亳州太清宫以道路阻水不果又欲居西洛以皇帝恳请之勤已降指挥更不戒行公先归达此意慰安皇帝因袖中出书付余仍宣谕曰公辅助皇帝扞贼守宗社有大功若能调和父子间使无疑阻当书青史垂名万世余感泣再拜受命辞讫即先具劄子以所得道君圣语奏知上批答曰览卿来奏知奏对之语忠义焕然朕甚嘉之二十五日还抵阙下对于垂拱殿进呈道君御书具道所以问答语上嘉劳久之以道君太上皇帝所赐玉带牙简银绢等具劄子进纳有旨不允

卷一百七十三

钦定四库全书

梁谿集卷一百七十三 宋 李纲 撰靖康传信录下

二十七日宰执奏事延和殿进呈车驾出郊诣资福寺迎奉道君仪注耿南仲建议欲尽屏道君左右内侍出榜行宫门敢留者斩先遣人搜索然後车驾进见余以谓不若止依常法不必如此示之以疑必欲过为之防恐却有不可防者南仲曰易曰或之者疑之也古人於疑有所不免余曰古人虽不免於疑然贵於有所决断故书有稽疑易曰以断天下之疑傥疑情不解如所谓窃鉄者则为患不细南仲纷纷不已余奏曰天下之理诚与疑明与闇而已诚则明明则愈诚自诚与明推之可以至於尧舜疑则闇闇则愈疑自疑与闇推之其患至於有不可胜言者耿南仲当以尧舜之道辅陛下而其人闇而多疑所言不足深采上笑之而南仲怫然怒甚既退再召对于睿思殿赐茶讫南仲忽起奏曰臣适遇左司谏陈公辅於对班中公辅乃二月五日为李纲结构士民伏阙者岂可处谏职乞送御史台根治上及宰相皆愕然余奏曰臣适与南仲辩论于延和殿实为国事非有私意而南仲衔臣之言故有此奏伏阙之事陛下素所鉴察臣不敢复有所辩但臣以非才冒处枢辅仰荷特达之知未能有所补报区区素志欲俟敌骑出疆道君銮舆还阙然後求归田庐臣之愿也今南仲之言若此臣岂敢留愿以公辅事送有司臣得乞身待罪上笑曰伏阙士庶以亿万计如何结治朕所洞知卿不须如此南仲犹不已余再拜辞上而出居启圣院不复归府入劄子求去章凡十余上上皆批答封还不允差御药宣押造朝及押赴枢密院治事复即时上马四月朔车驾诣宁德宫复遣御药宣扈从道君太上皇帝以三日入国门余以守御使职事迎拜於新东门内道君於辇上顾揖翌日扈从朝於龙德宫讫复上章恳请求罢知枢密院事上降手诏数百言不允复令徐处仁吴敏谕旨又召至内殿面加慰谕且曰敌马方退正赖卿协济艰难今遽欲舍朕何之前事不足介怀宜为朕少留辞意恳恻余不得已再拜受命就职他日留身奏上曰金人退师交割三鎮三鎮官吏军民不肯陷没夷狄其势必为朝廷坚守天时寢热而敌有輜重之累必不能久留当即出疆臣恐秋高马肥敌必再至以责前约及今宜飭武备修边防勿恃其不来当恃吾有以待之於是为上条具所以备边御敌者凡八事其一谓唐之藩鎮所以拱卫京师故虽屡有变故卒赖其力而及其弊也有尾大不掉之患祖宗监之销藩鎮之权罢世袭之制施於承平边备无事则可在今日则手足不足以扞头目为今之计莫若以太原真定中山河间建为藩镇择帅付之许之世袭收租赋以养将士习战阵相为唇齿以扞金人可无深入之患又沧州与营平相直隔黄河下流及小海其势易以侵犯宜分滨棣德博建横海军一道如诸鎮之制则帝都有藩篱之固矣其二谓自熙丰以来籍河北保甲凡五十余万河东保甲凡二十余万比年以来不复阅习又经燕山云中之役调发科率逃亡流移散为盗贼今所存者犹及其半宜专遣使团结训练令各置器甲官为收掌用印给之蠲免租赋以偿其直武艺精者次第迁补或命之官以激励之彼既自保乡里亲戚坟墓必无逃逸又平时无养兵之费有事无调发之劳此最策之得者其三谓自祖宗以来养马於监牧择陕西河东河北美水草高凉之地处之凡三十六所比年废罢殆尽而更为给地牧马民间杂养以充数官吏便文以塞责而马无复有善者又驱之燕山悉为敌人所得今诸军阙马者大半宜复祖宗监牧之制权时之宜括天

下马量给其直则不旬月间数万之马可具也其四谓河北塘泺东距海西抵广信安肃深不可涉浅不可以行舟所以限隔胡骑为险固之地而比年以来淤泥乾涸不复开濬官司利於稻田往往泄去积水堤防弛坏又自安肃广信以抵西山地形低下处可益增广其高仰处即开乾壕及陷马坑之类宜专遣使以督治之其五谓河北河东县城池类多隳圯堙塞宜徧行修治而近京四辅郡诸畿邑皆当筑城创置楼櫓之属使官吏兵民有所恃而安万一有敌骑深入掳掠无所得可以坐困其六谓河北河东县经敌马残破蹂践去处宜优免租赋以振恤之往年方腊扰浙东犹免三年今三鎮之民为朝廷固守安可不议所以大慰其心者其七谓河北河东诸州最以储峙采买粮草为急务宜复祖宗加擡粮草钞法一切以见縉走商贾而实塞下使沿边诸郡积蓄丰衍则敌不敢动矣其八谓陕西解盐无煮海之劳而给边费足民食其利不赀自行东南盐法而解盐地分益狭西边益贫愿复祖宗旧制以慰关陕兵民之心上俾宰执同议而其间所论异同虽建横海军一道以安抚使总之而藩鎮之议寢虽委提举官遵旧制教阅上户保甲三分之一而遣使尽行团结训练置器甲之议不行虽委沿边增修塘泺城池而辅郡畿邑已降指挥旋即罢止虽委诸路相视监牧而不复括马虽放河北河东租税而止及一年虽行加擡粮草钞而贴以四分香药虽复解盐而地分不如旧制余力争之不能得大抵自敌马既退道君还宫之後朝廷恬然遂以为无事方建议立东宫开讲筵斥王安石置春秋博士而台谏所论不过指摘京黼之党行遣殆无虚日防边御寇之策反置而不问余窃私忧之惟兵事枢密院可以专行乃与许翰条具调发防秋之兵大槩有五一曰系将兵二曰不系将兵三曰土兵四曰民兵五曰保甲系将兵除已起发外见在者十将将以三千人为率不过三万人民兵弓箭社刀弩手之类是也过一万人保甲除河北河东风起於陕西不过三万人并见在河北河东兵通为二十万以控制要害之地将上得旨颁行然後关三省其间犹有以为不须如此者又乞降旨在京许监察御史以上在外监司郡守帅臣各荐材武智略大小使臣枢密院籍记姓名量材録用上从之又建议以为在京马步军十余万隶于三衙近年不复教阅士卒骄惰缓急用之旋差将佐统领兵将不相识难以责成功乞自枢密院选差大小使臣分四壁教阅因勒成部伍以备缓急上初可之已而殿帅王宗濬等以为侵紊非祖宗制诏罢之余然後窃叹知事之难成也少宰吴敏建议欲置详议司检详祖宗法制及近年弊政当改革者次第施行诏以徐处仁吴敏及余为提举官命既行为南仲沮止敏丐去不果余奏上曰陛下即大位於国家艰难之时宜一新政事以慰天下之望而朝廷玩愒日复一日未闻有所变革近欲置司讨论寻复罢之今边事方棘调度不给前日爵禄冒濫耗蠹邦财者宜稍裁抑以足国用此政事所宜先者上以为然委余条具以闻余奏上三十余事谓如节度使至遥郡刺史祖宗本以待勲臣故俸给特厚当时员数絶少今皆以戚里恩泽得之除边功外宜悉换授环卫官以抑其濫又三省堂吏祖宗时转官止於正郎崇观间始许转至中奉大夫今宜复祖宗之制余皆类此上深然之降付三省已而揭榜通衢曰知枢密院事李纲陈请裁减下项又榜东华门曰守御使司给诸军卸甲钱多寡不均御前特再行等第支給而守御使司初未尝给卸甲钱也余闻之惊骇徐询所以乃执政间有密白上以余得都城军民之心欲以此离散之余始忧惧不知死所矣方欲复丐罢会守御使司补进武副尉二人具状奏知上批出有惟辟作福惟辟作威大臣专权寢不可长之语余惶恐於上前辩明曰始亲征行营及守御使司得旨一切以便宜行事给空名文武官告敕帖等三千余道自置司以来用过三十一道而已此二人者乃齎御前蜡书至太原当时约以得回报即与补授故今以空名帖补乞奏闻乃遵上旨非专权也且叙孤危之踪为人所中伤者非一愿罢职任乞骸

骨归田里上温顔慰諭以谓偶然批及非有他意余退居定力院入劄子待罪丐去章十余上上悉批答不允遣使押入余不得请即径出通津门欲东下上遣中使宣押挽舟入城络绎於道归府复锁府门余翌日见上曰人主之用人疑则当勿任任则当勿疑而大臣以道事君不可则止今陛下惑於人言於臣不能无疑又不令臣得去不知此何也上安慰久之余自此多在告日欲去而未能会种师中歿於军前种师道以病告归执政有密建议以余为宣抚使代师道者初斡里雅布之师还抵中山河间两鎮兵民以死固守不肯下肃王张邦昌及割地使等躬至城下说諭即以矢石及之乃退沿边诸郡亦然而种师中进兵逼之金人出境两鎮无虞尼堪之师至太原城下太原亦坚壁固守尼堪屯兵围之悉破诸县为鑕城法以困太原鑕城法者於城外矢石不及之地筑垒环绕分人防守使内外不相通而姚古进师复隆德府威胜军扼南北关累出兵互有胜负然不能解太原之围於是诏种师中率兵由井陘道与姚古犄角应援太原师中进次平定军乘胜复寿阳榆次诸县不设备有轻金人之意又輜重犒赏之物悉留真定不以从行金人乘间冲突诸军以神臂弓射却之欲赏射者而随行银碗祇数十枚库吏告不足而罢於是士皆愤怨相与散去师古为流矢所中死之其余将士退保平定军而师道驻滑州复以老病丐罢上纳建议者之说决意用余宣抚两路督将士解围一日召对睿思殿諭所以欲遣行者余再拜力辞自陈书生不知兵在危城中不得已为陛下料理兵事实非所长今使为大帅恐不胜其任且误国事死不足以塞责上不许即命尚书省出敕令面授余奏曰借使臣不量力为陛下下行亦须择日受敕今拜大将如呼小儿可乎上乃许别择日受余退即移疾在告入劄子乞致仕力陈所以不可为大帅且云此必有建议不容臣於朝者章十余上上悉批答不允且督令受命於是台臣余应求諫官陈公辅相继上言余不当去朝廷上皆以为大臣游说斥去之乃无敢言者或谓余曰公知上所以遣行之意乎此非为边事乃欲缘此以去公则都人无辞耳公坚卧不起谗者益得以行其说上且怒将有杜邮之赐奈何余感其言起受命上録裴度传以赐余入劄子具道吴元济以区区环蔡之地抗唐室与金人强弱固不相侔而臣曾不足以望裴度万分之一以度况臣实为非伦且言诸葛亮出师表谓亲贤臣远小人此先汉之所以兴隆也亲小人远贤臣此後汉之所以倾颓也夫君子小人於用兵之间若不相及而亮深以为言者诚以寇攘外患有可扫除之理而小人在朝蠹害本根寢长难去其患有不可胜言者是以吉甫赞周王以北伐必有孝友之张仲裴度相唐宗以东讨必去奸邪之元稹用能成功焜燿图史君子小人之不两立从古以然臣窃观陛下嗣位之初适遭金人入寇宵旰忧勤厉精图治思刷新耻虽古帝王勤俭之德无以远过然君子小人尚犹混淆於朝翕訛成风殊未退听谓宜留神照察在於攘逐戎狄之先朝廷既正君子道长则所以扞御外患者有不难也今取裴度论元稹魏洪简章疏节其要语辄尘天听上优诏宠答宣抚司得兵二万人而阙马余白上曰戎事以马为先今乏马如此无以奋张军容昔天宝末封常清出师幽蓟人观之见其军容不整皆叛去今臣出师安知无窥覷者所系国体非细故也事迫矣请括都城马给价偿之可得数千匹上以为然令条具以闻既而勝於开封府曰宣抚司括马事属骚扰可更不施行其意与前所勝同余窃叹息而已以二万人分为五军时捷胜兵叛於河北遣左军往招抚之又遣右军属刘韜时刘韜除宣抚副使乃唐恪所荐余初不知也又以解潜为制置副使代姚古以折彦质为河东勾当公事与潜治兵於隆德府宣抚司兵凡万二千人余请银绢钱於朝廷各百万才得二十万期以六月二十二日启行而庶事皆未办集乞量展行期上批曰迁延不行岂非拒命余惶惧入劄子辯所以未可行者且曰陛下前以臣为专权今以臣为拒命方遣大帅解重围而以专权拒命之人为之无乃不可乎

愿并罢枢筦之任择信臣委之得乞骸骨因以尚书右丞知枢密院事宜抚使告敕缴纳上封还遣使趣召数四余入见上具道所以为人中伤致上听不能无惑者祇以二月五日士庶伏阙事今奉命出使无缘复望清光上惊曰卿只为朕巡边便可还阙余奏曰臣之行无有复还之理昔范仲淹自参知政事出安抚西边过郑州见吕夷简语颺出之意夷简曰参政岂复可还其後果然今臣以愚直不容於朝使臣既行之後无沮难无谤讒无钱粮不足之患则进而死敌臣之愿也万一朝廷执议不坚臣自度不能有所为即须告陛下求代罢去陛下亦宜察臣孤忠以全君臣之义上颇感动乃以二十五日戒行前期锡燕於紫宸殿又赐御筵於琼林苑所以赐劳甚渥余犒军讫号令将士斩裨将焦安节以徇初安节隶姚古帐下在威胜军虚传敌马且至安节鼓扇衆情劝姚古退师至隆德又劝遁去於是两郡之人皆惊扰走散而初无敌马至是从姚古还阙余召斩之人皆以为当翌日进师以七月初抵河阳入劄子以畿邑汜水关西都河阳皆形胜之地城壁颓圯当极修治今虽晚然并力为之尚可及也又因望拜诸陵具奏曰臣总师道出巩洛望拜陵寝潜然流涕恭惟祖宗创业守成垂二百年圣圣传授以至陛下适丁艰难之秋戎狄内侵中国势弱此诚陛下尝胆思报励精求治之日愿深考祖宗之法一一推行之进君子退小人无以利口善谗言为足信无以小有才未闻君子之大道为足使益固邦本以图中兴上以慰安九庙之灵下为亿兆苍生之所依赖天下幸甚初余陛辞日为上道唐恪聂山之为人陛下信任之笃且误国故於此申言之上批答有铭记于怀之语留河阳十余日训练士卒修整器甲之属进次怀州自出师後禁士卒不得扰民有赶夺妇人钗子者立斩以徇拾遗弃物决脊黥配逃亡捕获者皆斩以故军律颇肃无敢犯者尝以谓步不胜骑骑不胜车金人以铁骑奔冲非车不能制之有张行中者献战车制度两竿双轮前施皮篱枪刃运转轻捷每车用甲士二十五人执弓弩枪牌之属以辅翼之结阵以行铁骑遇之皆退遁造千余两日肄习之俟防秋之兵集以谋大举而朝廷降旨凡诏书所起之兵悉罢减之余上疏力争其大略曰臣昨待罪枢府伏蒙陛下委令措置防秋人兵臣意以谓中国军政不修几三十年矣阙额不补者过半其见存者皆溃散之余不习战阵故令金人得以窥伺既陷燕山长驱中原遂犯畿甸来无藩篱之固去无邀击之威庙堂失策使之割三鎮质亲王刼取金帛以亿万计驱擄士女屠戮良民不可胜数誓书之言所不忍闻此诚宗社之羞而陛下尝胆而思报者也今河北之寇虽退而中山河间之地不割敌马出没并边诸郡寨栅相连兵不少休太原之围未解而河东之势危甚旁近县鎮皆为敌兵之所占据秋高马肥敌骑凭陵决须深入以责三鎮之约及金帛之余数儗非起天下之兵聚天下之力解围太原防御河北则必复有今春之警宗社安危殆未可知故臣辄不自揆为陛下措画降诏书以团结诸路防秋之兵大约不过十余万人而欲分布河北沿边雄霸等二十余郡中山河间真定大名横海五帅府腹里十余州军沿河一带控扼地分翊卫王室堤防海道其甚急者解围太原收复忻代以扞金人夏人连兵入寇不知此十数万人之衆一一皆到果能足用而无敌马渡河之惊乎今臣被命出使去清光之日未几朝廷已尽改前日诏书调兵防秋之计既罢峒丁又罢刀弩手又罢土兵又罢四川福建广南东路将兵又罢荆湖南北路系将不系将兵而京西州郡又皆特免起发是前日诏书所团结之兵罢去大半不知金人聚兵两路入寇将何以枝梧而朝廷何恃不留意於此也臣窃思之以兵为不须起者大槩有五川广福建荆湖之地远一也钱粮犒赏之费多二也河北寇退天下已无事三也太原之围敌马不多不攻自解四也探报有林牙高丽之师金人牵制未必深入五也若以川广福建荆湖之地远则诏书之下以四月期天下兵以七月当时关报三省何不即止今已七月远方之兵皆已在道始复约回是复

蹈今春勤王之师约回之弊也一岁两起天下之兵中道而两止之天下谓何臣恐朝廷自此不复能取信四方而将士解体矣国之大事在戎宗社安危所系而且行且止有同儿戏臣窃痛之若以谓钱粮犒赏多则今春无兵扞寇致令误国土地宝货人民皆为所取今惜小费而不为之备臣恐后来所取又不止於前日也况元降指挥防秋人兵各令齎粮以行则钱粮犒赏之乏自非所患庙堂不深思宗社大计而惜小费臣窃所不取也若以河北寇退天下无事则边郡日报金人聚兵声言某月入寇当取某地强敌临境非和非战朝夕恐栗惧其复来天下果无事乎贾谊谓厝火积薪之下而坐其上火未及然因谓之安以今日观之何止於火未及然殆处於烈焰之旁而言笑自若也若以谓太原之围敌马不多不攻自解则自春徂秋攻守半年曾不能得其实数姚种二帅以十万之师一日皆溃彼未尝有所伤衄不知何以必其兵之不多以为可以不攻而自解者臣以谓非愚则诬至林牙高丽牵制之报理或有之然不可恃彼之不来当恃我之有备则屯兵聚粮正今日之先务不可忽也今河北河东州郡日告危急乞兵皆以三五万为言而半年以来未有一人一骑可以副其求者防秋之兵甫集又皆遣罢不知此何理也若谓不须动天下之兵而自可无事则臣诚不足以任此责陛下胡不遣建议之人代臣坐致康平而重为此扰扰也除范世雄所统湖北兵闻已至襄唐间臣已作奉圣旨令疾速发赴宣抚司外所有余路乞依元降诏书起发庶几不误国事未报间再具奏曰近降指挥减罢防秋之兵臣所以深惜此事者一则河北防秋阙人恐有疎虞二则一岁之间再令起兵又再止之恐无以示四方大信防秋之计臣前奏论之已详请为陛下更论不可失信之意昔周为犬戎所侵尝以烽火召诸侯兵恐诸侯之未必至也举烽以试之诸侯之兵大集知其试已皆怒而归其後真举烽无复至者去冬金人将犯阙诏起勤王之师远方之兵踊跃赴难至中途而寇已和有诏止之皆愤惋而反今以防秋之故又起天下之兵良非获已远方之兵率皆就道又复约回将士卒伍宁不解体夫以军法勒诸路起兵而以寸纸罢之臣恐後时有所号召无复应者矣竟不报上日以御批促解太原之围於是宣抚副使刘韜制置副使解潜察访使张灏勾当公事折彦质都统制王渊折可求等会议於隆德府期以七月二十七日诸路进兵平定军辽州两路刘韜王渊主之威胜军路解潜折彦质主之汾州路张灏折可求主之而宣抚副使制置副使察访使勾当公事皆承受御前处分事得专达进退自如宣抚司虽有节制之名特文具尔余奏上以节制不专恐误国事虽降指挥约束而承受专达自若也至期出师解潜与敌相遇於南北关转战四日杀伤相当金人增兵潜军力不能胜而溃平定汾辽之师皆逗遛不进其後张灏又违节制用统制官张思正复文水县已而复为敌所夺余极为上论节制不专之弊又分路进兵敌以全力制吾孤军不若合大兵由一路进会范世雄以湖南兵至即荐为宣抚判官方欲会合亲率师以讨贼而朝廷之议变矣初敌骑既出境即遣王云曹曠使金人军中议以三鎮兵民不肯割愿以租赋代割地之约至是遣回有许意其实以欺我师非诚言也朝廷信之耿南仲唐恪尤主其议意谓非归租赋则割地以赂之和议可以决成乃诏宣抚司不得轻易进兵而议和之使纷然於道路矣既而徐处仁吴敏罢相而相唐恪许翰罢同知枢密院事而进用聂山陈过庭李回等吴敏复以内禅事言者谓承蔡攸密旨及初除门下侍郎亦蔡攸矫制为之责授散官安置涪州余窃叹曰事无可为者矣因入表劄奏状丐罢初唐恪谋出余於外则处仁敏翰可以计去之数人者去则余亦不能留也至是皆如其策章数上犹降诏批答不允余具奏力道所以材能不胜任者且得昏愤之疾不罢决误国事并叙曩日榻前之语於是上命种师道以同知枢密院事巡边交割宣抚司职事召余赴阙且俾沿河巡视防守之具余连上章乞罢知枢密院事守本官致仕行至封丘县

得尚书省劄子有旨除观文殿学士知扬州时九月初也余具奏辞免不敢当且上疏言所以力丐罢者非爱身怯敌之故特事有不可为者难以虚受其责始宣抚司得兵若干并防秋兵若干今屯驻某处皆不曾用始朝廷应副银绢钱若干又御前降到若干除支官兵食钱并犒赏外今皆桩留怀州及在京降赐库具有籍可考按也臣既罢去恐不知者谓臣丧师费财惟陛下遣使核实虽臣自以不才丐罢愿益择将帅抚驭士卒与之扞敌金人狡狴谟虑不浅和议未可专恃一失士卒心无与御侮则天下之势去矣臣自此不复与国论敢冒死以闻既而果有言余专主战议丧师费财者又指言十罪於是着落职宫观责授保静军节度副使建昌军安置又以余上疏辩论谓退有後言以惑衆听再谪宁江用舍进退者士之常此不足道但国家艰难宗社危急扶持天下之势转危为安几成而为庸懦谗慝者坏之为可惜也殆天未悔祸生灵未有休息之期命运之行自有数耶不然何以若此余自建昌假道长沙以趋川峡适荆南为寇贼所据道梗少留时都城复为敌骑攻围朝廷不通耗者累月端忧多暇探篋中取自上龙飞余遭遇以来被受御笔内批及表劄章奏等命笔吏编次之因叙其设施去就本末大槩若此庶几传信于後世时靖康二年岁次丁未二月二十五日长沙漕厅翠藹堂錄

梁谿集卷一百七十三

<集部,别集类,南宋建炎至德佑,梁谿集>

卷一百七十四

钦定四库全书

梁谿集卷一百七十四 宋 李纲 撰建炎进退志总叙上

靖康元年秋余罢知枢密院事河北河东路宣抚使除观文殿学士知扬州以言者落职提举杭州洞霄宫责授保静军节度副使建昌军安置寻移云安二年春行次长沙蒙恩复旧官除资政殿大学士领开封府事时金人再犯阙都城围闭道路阻絶久之闻命即率湖南勤王之师入援王室以四月初啓行自巴陵乘舟泛江五月初次繁昌传元帅府檄方审都城破二圣播迁号恸几絶次太平州覩今上登宝位赦书改元建炎悲喜交集是时金陵为叛卒周德等所据囚帅臣宇文粹中杀官吏居民焚舟船不可胜数刼掠官府士民财物为之一空虽受发运判官方孟卿招安而擐甲乘城杀戮恣横如故余遣使臣齎文檄谕之令听禀节制勤王乃肯释甲然犹桀骜不以时登舟擅驱不当行士卒欲乘间遽去次金陵因与转运判官权安抚使李弥逊谋尽诛其首恶四十六人而以其徒千余人令提举常平官王枋统之以行因奉表诣行在贺登极且辞领开封府事之命上书论时事并具奏金陵东南形胜之地新罹兵火宜早择帅以鎮抚之次宝应闻已降麻告廷除正议大夫尚书右仆射兼中书侍郎陇西郡开国侯加食邑实封荷上特达之知感极而继之以泣次泗上以汴流浅涸舍舟陆行是时四方勤王之师皆已放散因留湖南金陵兵卒於泗奏取指挥独取数百人防护以往次虹县始被受尚书省劄子有旨趣召盖行在前此不知余由江淮以来遣使齎赐御书并降诏皆自湖北往至是得金陵奏乃劄报新除有召旨也因奉表劄以辞恩命次会亭上遣中使王嗣昌传宣抚问赐茶药各一银合奉表以谢次穀熟御史中丞顏岐遣人投文字封以御史台印开视之乃论余不当为相章疏其大意谓张邦昌为金人所喜虽以为三公真王宜更加同平章事增重其礼余为金人所恶虽已命相宜及其未到罢之以为中太一官使兼讲筵官置之闲地前後凡五章皆不降出故岐封以示余欲余之留外而不进也乃知命相盖出於渊衷独断而外廷所以沮之者无所不至益以感惧或劝余不若遂留余曰国家艰危至此极矣岂臣子事形迹避嫌疑自爱惜之时哉上知遇如此得一望清光敷陈腹心退就田里死且不朽如岐言何足恤会复遣使趣召遂行有旨赐御筵於金果园命中书侍郎黄潜善押燕尚书右丞吕好问同知枢密院事汪伯彦同与即具奏辞免次金果园龙图阁学士兼侍读董耘来见传上旨尝遣从事郎刘默齎御书由湖北往迓卿书中有学穷天人忠贯金石方今生民之命急於倒挂谅非不世之才何以协济事功之语感激流涕遂如行在遇三执政南都门外告以已具辞免御筵乃归馆所时以城北钤辖司为府第少顷上遣使趣见进对于内殿见上叙致不觉涕泗之横流上亦感动因奏曰金人不道专以诈谋取胜中国而朝廷不悟一切堕其计中既登城矣犹假和议已定之说以欺四方勤王之师凡都城子女玉帛乘輿服御历代所传宝器下至百工技艺无不毕取然後刼迁二圣东宫后妃嫔御亲王宗室凡系於属籍者悉驱以行遣奸臣传命废灭赵氏而立张邦昌僞号大楚在京侍从百官北面屈膝奉贼称臣莫有死节者自古夷狄之祸中国未有若此之甚赖天佑我宋大命未改故使陛下总师于外为天下臣民之所推戴系坠绪继絶统此非人力乃天授也兴衰拨乱持危扶顛内修政事外攘夷狄以抚万邦以还二圣皆责在陛下与宰相宜得有大过人之才智者相与图治以成中兴而考论之际首

及微臣自视缺然力小任重恐不足以仰副陛下特达知遇之意伏望圣慈追寢成命改授其人实天下幸甚上曰朕知卿忠义智略甚久在靖康时宣力为多特为同列所不容故使卿以非罪去国而国家有祸故如此朕尝进言於渊圣欲使夷狄畏服四方安宁非相卿不可今朕眇然以一身托於士民之上赖卿左右扶持以济艰难此志已定卿其勿辞余顿首泣谢且道董耘所传圣语荷知如此虽糜捐不足以报德然臣未到行在数十里间御史中丞顔岐封示论臣章疏谓臣为金人所恶不当为相如臣愚意但知有赵氏不知有金人固宜为其所恶然岐之论臣谓材不足以任宰相则可谓为金人所恶不当为相则不可臣愚不知金人与赵氏为仇敌其所喜者为赵氏耶其所恶者为赵氏耶且为赵氏之臣而金人喜之此必有以得其心者而反用以为相则自古卖国以与人者皆为忠臣矣今陛下用臣断自渊衷而岐之论如此如臣迂疎自知不足以当重任但愿一望清光乞身以归田里至於陛下命相於金人所喜所恶之间更望圣虑有以审处於此上笑曰岐尝有此言朕告之以如朕之立恐亦非金人之所喜者岐无辞而退此不足恤余奏曰陛下天纵睿圣固不难察此然臣材力绵薄实不足以胜任因出劄子再拜力辞上慰谕久之遣御药邵成章宣押赴都堂治事又命执政聚於都堂即上马归日已暮矣时六月朔日也翌日有旨立新班奏事对于内殿同执政奏事讫留身奏上曰自古人主惟论一相相得其人则朝廷正而天下之事举相非其人则朝廷乱而天下之事废方承平无事之时犹当考论其相而况艰难多事之际乎譬如负重致远力只足以胜百斤而使之荷千钧之重则必顛蹶於道路矣以今日国势观之外则强敌陵侮二圣在其掌握中内则兵力单弱四方盗贼窃发残破州县者不可胜数朝廷之上僭偽之臣方且褒崇信任与闻国政州县之间官吏废弛顾望进退视朝廷号令如罔闻知当此之时虽圣贤驰骛有所不足而欲以臣之迂疎独任其责虽三尺之童有以知其难也易称鼎折足覆公餗而孔子以谓知小而谋大力小而任重言不胜其任也伏望圣慈博选天下之有材智者为相仰佐陛下共济艰难而臣忧患余生得以退藏於深渺不胜幸甚上曰卿素以忠义自许岂可於国家艰危之时而自图安闲朕决意用卿非在今日社稷生灵赖卿以安卿其无辞余感泣再拜曰臣愚陋无取不意陛下知臣之深也然今日之事持危扶顛以创业为法而图中兴之功在陛下而不在臣昔管仲语齐桓公曰不能知人害霸也知而不能用害霸也用而不能任害霸也任而不能信害霸也能信而又使小人参之害霸也夫知人能信任之而参以小人犹足以害霸况於为天下而欲建中兴之业乎方靖康之初渊圣皇帝慨然有图治之意而金人退师之後渐谓无事不能分别邪正进君子退小人而贤否混淆是非杂揉且和且战初无定议至其晚节专用奸佞而黜忠良敌骑再来遂有宗社不守之祸如臣者徒以愚直好论事为衆人不容於朝使总兵于外而又不使之得节制诸将自度不足以任责乞身以退而又百端谗譖窜逐远方必欲杀之而後已赖渊圣察臣孤忠特保全之卒复召用然已无及矣不谓今日遭遇陛下龙飞初无左右先容之助徒采虚声首加识擢付以宰柄顾臣区区何足以仰副图任责成之意然靡不有初鲜克有终如臣孤立寡与更望圣慈察管仲害霸之言留神於君子小人之间使臣得以尽志毕虑图报涓埃虽死无憾昔唐明皇欲相姚崇崇以十事邀说皆中一时之病类多施行後世美之臣常慕其为人今臣亦敢以十事仰干天听陛下度其可行者愿赐施行臣乃敢受命其未合圣意者愿赐折难臣得以尽其说上可之余因出劄子奏陈其一曰议国是大略谓中国之御夷狄能守而後可战能战而後可和而靖康之末皆失之今欲战则不足欲和则不可莫若自治专以守为策俟吾政事修士气振然後可议大举其二曰议巡幸大略谓车驾不可不一到京师见宗庙以慰都人之心度未可居则为巡幸之计以天下形势观

之长安为上襄阳次之建康又次之皆当诏有司预为之备其三曰议赦令大略谓祖宗登极赦令皆有常式前日赦书一切以张邦昌僞赦为法如赦恶逆选人循资降罪废官尽复官职皆泛滥不可行谓当改正以法祖宗其四曰议僭逆大略谓张邦昌为国大臣不能临难死节而挟金人之势易姓建号身处宫禁南面以朝其後不得已乃始奉迎朝廷尊崇之为三公真王参与大政非是宜正典刑垂戒万世其五曰议僞命大略谓国家更大变故鲜伏节死义之士而奉贼旨受僞官屈膝於其廷者不可胜数昔肃宗平贼而污僞命者以六等定罪今宜仿之以励士风其六曰议战大略谓军政久废士气怯惰宜一新纪律信赏必罚以作其气其七曰议守大略谓贼情狡猾势须复来宜於沿河江淮措置控御以扼其冲其八曰议本政大略谓崇观以来政出多门纲纪紊乱宜一归之於中书则朝廷尊其九曰议久任大略谓靖康间进退大臣太速功效蔑着宜审择而久任之以责成功其十曰议修德大略谓上初膺天命宜益修孝悌恭俭之德以副四海之望而致中兴每割读讫又敷陈其所以然上皆令留榻上俟详观有当施行者降出翌日降出议国是巡幸赦令战守五割余皆留中次日与执政同奏事于内殿进呈议国是劄子上曰今日之策正当如此可付中书省遵守次进呈议巡幸劄子有旨令促留守司修治京城祇备车驾还阙欵谒宗庙诏永兴军襄阳府江宁府增葺城池量修宫室官府以备巡幸次进呈议赦令劄子金谓艺祖登进曾赦恶逆今已行难追有旨选人惟有职者循资谪降罪废官令刑部具元犯申朝廷等第叙复次进呈议战议守劄子有旨令讨论修举军政措置控御条件以闻奏事讫执政退余留身奏上曰臣愚瞽辄以管见十事冒渎天聪已蒙施行五事如议本政久任修德三事无可施行自应留中所有议张邦昌僭逆及受伪命臣僚二事皆今日政刑之大者乞早降处分上曰执政中有与卿议论不同者更俟欵曲商量余奏曰邦昌僭逆之罪显然明白无可疑者天下皆谓邦昌处敌中岁余厚结敌酋得其驩心故破都城迁二圣东宫尽取亲王宗室以行邦昌盖与其谋此固不可知然邦昌当道君朝在政府者几十年渊圣即位首擢为相奉使敌中方国家祸难之时如能以守节推明天下所以戴宋之义以感动其心敌人未必不悔祸而存赵氏邦昌方自以为得计偃然当之正位号处宫禁者月有余日敌骑既退四方勤王之师集邦昌擅降伪诏以止之又遣郎官分使赵野翁彦国等皆齎空名告身数百道以行迨彦国等囚其使而勤王之师日进邦昌知天下之不与也不得已乃请元佑太后垂帘听政而议奉迎邦昌僭逆始末如此而议者不同臣请备论而以春秋之法断之若都城之人则谓因邦昌立而得生且免再取科金银而德之若元帅府则谓邦昌不待征讨遣使奉迎而恕之若天下则谓邦昌建号易姓其奉迎特出於不得已而愤嫉之都城德之元帅府恕之者私也天下愤嫉之者公也春秋之法人臣无将将而必诛赵盾不讨贼则书以弑君今邦昌已僭位号贼退而止勤王之师非特将与不讨贼而已其罪为如何昔刘盆子以宗室当汉室中衰为赤眉所立其後以十万衆降光武只待以不死今邦昌以臣易君其罪大於盆子不得已以身自归朝廷既不正其罪而又尊崇之以为三公真王参与国政此何理也议者又谓邦昌能全都城之人与宗庙宫室不为无功而陛下登极缘邦昌之奉迎无邦昌则陛下何以自明臣皆以为不然譬之巨室之家偶遭寇盗主人之戚属悉为驱掳而其仆欲奄家室奴婢而有之幸主人者有子自外归迫於衆议不得已而归所有乃欲遂以为功其可乎陛下之立乃天下臣民之所推戴邦昌何力之有臣於劄子中论之详矣方国家艰危陛下欲建中兴之业当先正朝廷而尊崇僭逆之臣以示四方其谁不解体又僞命臣僚一切置而不问何以励天下士大夫之节执政中有议论不同者乞降旨宣召臣得与之廷辩如臣理屈岂复敢言上许之乃令小黄门宣召黄潜善吕好问汪伯彦再对上语之

故而潜善主之甚力大槩不出前所陈诘难数四乃屈服然犹持在远不若在近之说余曰邦昌当正典刑何远近之有借使在近当幽繫而反尊崇之如此何也潜善不能对上顾吕好问曰卿在城中知其详谓当如何好问曰邦昌僭窃位号人所共知既已自归惟陛下裁处又引德宗幸奉天不挟朱泚行後以为悔以附会潜善不若在近之说余曰吕好问之言首鼠两端且援朱泚以为例非是方德宗之狩奉天朱泚盖未反也姜公辅以其得泾军心恐资以为变请挟以行德宗不听而後果然今邦昌已僭逆岂可使之在朝廷使道路指目曰此亦一天子哉因泣拜曰臣不可与邦昌同列正当以笏击之陛下必欲用邦昌第罢臣勿以为相无不可者上颇感动而汪伯彦亦曰李某气直臣等不及上曰卿欲如何处置余曰邦昌之罪理当诛夷陛下以其尝自归贷其死而远窜之受僞命者等第谪降可也上曰俟降出卿劄子来日将上取旨余拜谢既退窃思若邦昌之事顺逆晓然而犹费力如此其他岂可不忧是夕劄子果降出翌日同执政进呈潜善犹左右之乃以散官安置潭州次进呈议僞命劄子上曰国家顛覆士大夫不闻死节往往因以为利如王及之坐蕃衍宅门诟詈诸王余大均诱取宫嫔以为妾卿知之否余奏曰自崇观以来朝廷不复敦尚名节故士大夫鲜廉寡耻不知君臣之义靖康之祸视两宫播迁如路人然罕有能伏节死义者在内惟李若水在外惟霍安国死节显著余未有闻愿诏京畿诸路询访优加赠恤如王及之余大均朝廷见付御史台推鞠必得其实臣闻方金人欲废赵氏立张邦昌令吴玠莫俦传道意旨往返数四京师人谓之捷疾鬼王时雍徐秉哲奉金人旨追捕宗室戚里令居民结保不得容隐以衣袂联属以往若囚系然其後迫道君东宫后妃亲王出郊皆臣子之所不忍言又受僞命皆为执政此四人者当为罪首上以询吕好问而好问以为有之得旨皆散官广南远恶州军安置余以次谪降内王及之余大均胡思陈冲等以赃滥系御史台候结案日取旨李若水赠官外霍安国赠延康殿学士有死节者令诸路询访以闻又进呈颜岐待罪章疏执政赞上欲令依旧供职有旨令除待制与宫观执政退余留身上曰卿昨日内殿诤张邦昌事内侍辈皆泣涕卿今可以受命矣余拜谢曰自非陛下英睿天纵岂能决断如此天下不胜幸甚臣虽愚陋敢不黽勉自力以图报称因为上言今日国势比之创业为尤难盖创业之主乘兴起之运积小成大犹或易为今日当国势委靡不振之时夷狄盗贼凭陵扰攘之後士风偷惰人情畏怯府库空虚郡县残破百度废弛而欲奋厉整顿以成中兴之功正犹大厦之倾持顛扶危须一一修葺而材料鲜少此所以为尤难也正赖陛下刚健不息以至诚惻怛之意加之不为羣议之所动摇先其大者急者而小者缓者徐图之信任而责成功臣乃得以竭尽愚虑以裨补万一臣窃观自古创业中兴之主莫如汉之高祖光武唐之太宗皆有英明之姿宽诚之德仁厚而有容果断而不惑故能决大事成大功戡定祸乱身致太平臣尝取其行事大节编为一书便於观览欲缮写进呈以备乙夜之观应今日之变诚以数君为法中兴之功亦不难致上可之因论高祖光武太宗数事合於今日者上皆以为然复奏上曰人主莫大於兼听广视使下情得以上通故舜明四目达四聪而天下治今艰难之际四方休戚利害日欲上闻而士民之愿效其智虑尤多陛下即大位已踰月而谏鼓院犹未置恐非所以通下情而急先务者上曰屡语执政犹未措置卿可便与施行余退因批旨置登闻鼓院於行在便门之外差官吏权摄又请置看详官两员於侍从职事官中选应士民上封事陈献利害候降出并付看详官签拟可施行者将上取旨又於省门置司以受词诉公状至是已三具表劄辞免恩命皆降批答不允仍断来章乃诣合门受告有旨兼充御营使以覃恩告廷转正奉大夫加食邑实封时六月六日也

梁谿集卷一百七十四

卷一百七十五

钦定四库全书

梁谿集卷一百七十五 宋 李纲 撰建炎进退志总叙下

是日同执政对于内殿余奏上曰以今日国势而视靖康间其不逮远矣然而有可为者陛下英断於上而羣臣辑睦於下庶几革靖康之风而中兴可图然而今日之事须有规模而知先後缓急之序所谓规模者外御强寇内销盗贼修军政变士风裕邦财寬民力改弊法省冗官诚号令以感人心信赏罚以作士气择帅臣以任方面选监司郡守以奉行新政俟吾所以自治者政事已修然後可以议兴举而问罪金人迎还二圣此规模之大略也至於所当急而先者莫先於料理河北河东两路夫河北河东者国之屏蔽也料理稍全然後中原可保而东南可安今弃置两路不复料理而欲自安於东南譬犹外有寇盗不为之藩篱而欲安於堂奥其可得乎今河北河东虽为金人蹂践而残破河东所失者忻代太原泽潞汾晋其余犹存也河北所失者不过真定怀卫瀋四州而已皆靖康之末所为失之真定以新易李邈为帅怀以折彦质遯去卫以朝廷遣使交割瀋以无城郭之故其余中山河间庆源保塞雄霸深祁恩冀邢洺磁相信安广信二十余郡皆为朝廷守两路士民兵将所以戴宋者其心甚坚在州郡者依城郭无城郭者依大河西山结山寨以为固皆推豪杰以为头领多者数万少者亦不下万人如此知名字者已十数处朝廷不因此时置司遣使有以大慰抚之分兵以援其危急臣恐为金人所迫粮尽力困坐受其敝强壮而狡狴者从贼其次者为盗老弱稚孺渡河而朝廷何以待之且金人善因兵於敌两路军民虽怀忠义之心使救援之兵久而不至危急无告必且愤怨朝廷使金人因得抚而用之皆精兵也彼复何待借兵於他国哉驱之以扰中原而将之以酋首中国之兵亦将望风奔溃未易御也臣愚以谓莫若於河北置招抚司河东置经制司择有材略者为之使宣谕陛下德意所以不忍弃两河於夷狄者措置经营结连其豪杰而用之救援危急收复州县朝廷应副钱粮告敕有功者即命以官其能保全一州收复一郡随其高下以为节度防御团练使如唐方鎮之制使自为守非特絕其从贼之心又可资其力以御敌朝廷久远无北顾之忧此最今日之先务也金议亦颇以为然上曰谁可任此者余奏曰陛下傥采用臣策臣当询访其人续且闻奏既退询於士大夫间多谓张所可以招抚河北傅亮可以经制河东而余亦颇闻其为人张所者山东人以进士擢第有材气谋略当靖康间为监察御史朝廷以金人再犯阙欲割弃河北既遣使矣敌骑薄城京师围闭所在围城中独上言乞以蜡书募河北兵渊圣许之蜡书至河北士民皆喜曰朝廷欲弃我於夷狄犹有一张察院欲救我而用之乎应募者凡十七万人故所之声满河北部勒既定会都城破谋弗果用上即位於南都所首至行在见上论列且条具应募首领姓名人数合措置事件以闻朝廷欲以为郎官奉使河北以董其事会所以察官上章论黄潜善及兄潜厚奸邪不可用恐害新政潜善引去上留之乃谪所凤州团练副使江州安置是时余尚未至行在也故衆谓招抚河北司非所不可然余以所尝论潜善之故颇难之时既迫他无可使者不得已一日过潜善合子中相与款语曰吾辈蒙上委任於艰难之秋实负天下之重责而四方士大夫号召未有来者前日议置河北招抚司搜访殊无人可以承当独一张所可用又以狂妄有言得罪如所之罪孰不以为宜第今日事迫矣一失机会悔不可追不得已势须擦拭用之如用以为台谏处要地则不

可使之借官为招抚冒死立功以赎过似无嫌第未知於公意如何傥能先国事後私怨为古人之所难不亦美乎潜善欣然许诺乃荐之於上且道潜善意上说有旨借所通直郎直龙图阁充河北招抚使是时所已赴谪所遣使臣齎劄子召之二十余日而後至上召对摹画称旨锡五品服内府赐缗钱百万以备募兵半年钱粮给空名告千余道以京畿兵千人为卫将佐官属听自辟置一切许以便宜从事有朝请郎王圭者真定府人真定既破率衆数万保西山屡胜金人闻上登极自山寨间道来其所谋正与朝廷同能道河北事尤详有旨除直秘阁招抚司参谋官使佐所凡留行在者又二十余日而後行傅亮者陕西人以边功得官谙练兵事靖康初至京师上封事请以亲王为元帅治兵於河朔渊圣不喜令押出门其冬复有荐者再召之亮至而都城已破率陕右京西勤王兵三万人首至城下屡立功统御将佐士卒如古人整齐画一无敢犯令者上即位亮诣行在召对除通直郎直秘阁而亮之为人气劲直议论不能屈折执政不喜之除知滑州滑两经残破无城壁亮上疏自陈曰陛下复归东都则臣能守滑陛下未归则臣亦不能守也执政摘其语以为悖傲不逊降通判河阳府亮愤懣而去余至行在亮已行使人召之乃来与语连日观其智略气节真可以为大将者欲且试之乃荐於上以为河东经制副使而以观察使王 为使 亦陕西人累立边功金谓在武臣中可用者上宣谕亮前疏中语余广上意而奏曰人臣论事言不激切不足以感动人主激切则近谤讪故昔之听言者必察其所以如果出於谤讪何所逃罪至於有所激而云则必恕之以来谏言如周昌之对高祖刘毅之答武帝皆人之所难堪者而二主恕之以其有所激故也亮之言如此但欲激陛下以归京师耳非有他故愿圣度有以含容之且人材难得而将帅之材为尤难如亮者今未见其比异日必能为朝廷立大功气劲言直乃关陕气俗之常不足深责上乃许如所请并召对赐 袍带赐亮五品服与兵万人告敕银绢与川纲之在陕西者诏京西陕西漕臣应副粮草余如张所已得旨而遣之初余既建议以料理河北河东为所当先者适後宫降诞皇子率执政入贺余奏上曰皇子降诞考祖宗故事当肆赦陛下登宝位赦已旷荡独遗河北河东而不及勤王之师天下尚缺望夫两路为朝廷坚守而赦令不及人皆谓已弃之何以慰忠臣义士之心而勤王之师虽不曾用在道路半年擐甲荷戈冒犯霜雪亦已劳矣疾病死亡者不可胜数恩恤不及後日复有急难何以使人愿因今赦该载德意上嘉纳故皇子赦於二者尤详又请降诏褒慰两路守臣将佐军民论以朝廷措置救援不弃之意守臣各转两官进职余具职位姓名以闻又诏自今有能收复两路已陷州郡及救解危急保全一方功效显著者并除本处节度观察團练防御使依方鎮法又诏两路军民自今不得撰造事端以疑虑擅杀官吏又命使臣齎夏药徧赐两河守臣将佐又命 货务印造见钱钞遣使齎送两路州郡又命降见钱钞三百万贯付河北东路陕西路漕司广衆应副两路又命起京东路夏税绢於大名府桩管川纲河内衣绢於永兴军桩管以待两路支俵於是两路知天子德意人情翕然蜡书日至间有破贼捷报敌人围守诸郡者往往抽退而山寨应招抚经制司募者甚衆又择武臣可用者置沿河巡察使自河阳抵滨沧凡六处各有地分以为斥堠而潜善建议令马忠将所部兵会雄州弓箭手李成所募兵凡五万人捣虚入界敌必释诸郡之围以自救余曰解杂乱纷纭者不控卷救鬪者不搏截批亢捣虚形格势禁则自为解此固古法但今日士怯兵弱恐未可以深入而马忠者在靖康初虽尝宣力其後官崇志满自爱惜不肯决战屡败衄恐不足以任此莫若使之与张所协力先复濬卫怀三州士气既振乘势鼓行而北则诸郡之围必解而真定可复河北可以得无事矣事固有因时而制宜者此也是时金人留兵三州只数千人余皆驱擄吾民剃剪用之张所遣间与之结连多愿为内应者以官军民兵相表里而图

之功可指日而成故余之策出此而潜善坚执其议上可之余不欲力争乃以忠为河北经制使而以张奐副之奐者陕西人质朴有谋而善战其材远胜於忠既使副忠又令与张所相应援而奐亦以余之策为然进呈谏官邓肃论僞命臣寮劄子多已行遣而肃曾在围城中知之尤为详有未及者数人皆等第行遣如十友之类令留守询访姓名以闻其言颇及吕好问好问者申公夷简曾孙以元佑党籍久困州县士大夫颇推其恬於仕进靖康初余荐於渊圣以为谏官其後为侍从邦昌僭逆以为执政而好问尝以蜡书至元帅府故上即位首擢为右丞肃论之颇怒而侍御史王宾亦上疏极言好问在围城中方渊圣拘於敌营宜以蜡书至元帅府督进师而反劝进为怀二而挟奸无大臣节况尝污僞命不可以立新朝好问慙求去甚力乃除资政殿学士知宣州又进呈肃论耿南仲父子章疏上曰南仲误渊圣罪天下共知朕尝欲手劒击之夫复何道乃以散官安置岭南而其子延禧落龙图阁学士令随侍又进呈王宾论范讷赵野王襄总师逗遛不进而纵其下暴掠甚於盗寇章疏有旨降官分司而宾论之不已乃皆以散官安置又论京西湖北为金人盗贼侵犯有能以死固守而保全一方者有贼未至而先遁遂失守者谓宜褒黜以明功罪如赵子崧之守陈赵子栎之守汝阎孝忠之守蔡黄叔敖之守襄阳李彦卿之守汉阳鄂倅赵令裨之援黄州县令陈规之守德安程千秋之守公安皆宜褒赏有旨转两官或与职名而以令裨知黄州规知德安千秋通判荆南如陆德先之弃随州邓雍之弃荆南舒舜举之弃郢州赵纵之之弃复州皆宜黜罚有旨降两官落职有类此者言事官条具以闻又论折彦质为宣抚副使而逃亡入川峡钱盖为陕西制置使而逃至湖北许高许亢防河而逃至江南倪不惩戒则後孰肯以死任责者有旨彦质散官安置高亢编管岭南盖落职降官分司命南康军奏高亢寓其境欲谋变守倅以便宜诛之而待罪衆谓擅杀为非是余曰渊圣委高亢守河付以兵将甚衆贼将至而先走以铁骑五百自颍昌挈家趋江南沿路劫掠甚於盗贼朝廷不能正军法而一军垒守倅敢诛之必健吏也使後日受命扞贼者知退走而郡县之吏有敢诛之者其亦少知戒乎是当赏上亦以余言为然乃命各转一官是时范讷王襄罢而开封府与留守阙官余荐宗泽於上以为留守非泽不可泽浙东人自为小官即卓犖有气节敢为不诡随於世以故屡失官靖康间知磁州上以康邸持节使敌中时金人已再犯河北泽力挽留以为不可行其後有元帅之命遂即大位泽之功为多同列忌之譖毁百端不得留府中既而除知襄阳府余到行在泽适至与语衮衮可听发於忠义至慷慨流涕故余力荐之上笑曰泽在磁凡下令一切听於崔府君余奏曰古人亦有用权术假於神以行其令者如田单是也泽之所为恐类於此京师根本之地新经扰攘人心未安非得人以鎮抚之不独外寇为患亦有内变可虞使泽当职必有可观上许之乃除延康殿学士知开封府兼留守泽至京师果能弹压抚循军民畏爱修治城池楼櫓不劳而办屡出师以挫敌锋虽嫉之者深竟不能易其任也知北京徐处仁死余荐杜充代之而已刘锡代充守沧州又颇易置诸路帅臣监司及京东西守臣然常患帅材之难得也一日上批出迁汪伯彦知枢密院事而除张慤同知慤是时方自河北都转运使除户部尚书初至行在余因对奏上曰慤以晓财利勤干称以为户部尚书乃其任也今才供职遽除执政不惟太峻未副人望兼户部财计赖慤措置乞少缓之候慤措置财计稍就绪日除擢未为晚陛下用宰相臣不得而与至执政臣当闻敢以为请上乃止令迁伯彦而以黄潜善迁门下侍郎兼中书後二十余日竟除慤盖潜善主之也余因对复奏曰臣前欲少缓张慤除命非沮之正欲藉其力措置户部事今陛下已擢用慤乞且以户部事委之乃命慤兼总领户部财用上又令以许景衡为中丞王宾除谏议大夫时景衡以给事中召未至余奏曰陛下以景衡为中丞诚得其人然故事中丞无自

外除者王宾迁则台中无长官乞候景衡至行在日降处分上许之是时除侍从卿监郎官馆职以补班列之阙及召赴行在者多未至而行在官出自围城中者多求东南差遣以自便上命余草诏以戒谕之其後许翰至余荐之於上谓翰外柔内刚学行纯美谋议明决宜在左右参与大政上亦喜其论事乃以为尚书右丞然翰之来晚不能有所助也初汴河上流为盗所决者数处决口有至百步者闭塞久不合乾涸月余纲运不通两京乏粮米价腾涌朝廷责降都水使者陈求道荣嶷皆为散官依旧领监事又命提举京城所陈良弼同共措置凡二十余日而水复旧纲运沓来乃令三分留一於行在每纲到即间拨入京师粮始足米价始平又择使臣八员为沿汴巡检每两员将兵五百人自洛口管认地分至西水门分布防察乃免濫决之患又於两京城外及沿汴至泗增置巡检商贾始通人情始渐复旧命进奏院邸吏分两番赴行在增给食钱朝廷差除镂板传报外路增置马递舖添给钱粮命令始通州郡命纲运入京者还载诸部公案图籍赴行在官府始有稽考盖行在草创凡百皆逐一施行措置悉类此也

梁谿集卷一百七十五

卷一百七十六

钦定四库全书

梁谿集卷一百七十六 宋 李纲 撰建炎进退志总叙【三】

一日同执政奏事内殿余留身进呈三劄子一曰募兵二曰买马三曰募民出财以助兵费余奏上曰国家以兵为重方熙丰盛时内外禁旅合九十五万人至崇观间而阙额不补者几半西讨夏人南平方寇北事幽燕所折阅者又三之一至靖康间金人再犯阙溃散逃亡者又不知其几何方建炎初天下勤王之师集於都城侧者三十余万人其间多系召募民兵傥择正兵之可用者留十余万分屯要害州郡运粮给之以为後图亦足以壮声势而备缓急朝廷乃一切放散而京东河北之兵在元帅府者又皆援例以归遂使行在禁旅单弱虽旋蒐裒其势不多何以扞强敌而镇四方今已散之兵既不可复追而东南之人其实轻剽不可使之远战耐劳苦习战阵惟西北之人可使为今日之计莫若取财於东南募兵於西北方河北之人金人搔扰未有所归之时而关陕京东西流为盗贼强壮不能还业者甚衆乘此遣使四路优给例物以招募之新其军号勒以部伍得十数万人付之将帅以时教阅训练不年岁间皆成精兵於要害州郡别置营房屯戍使之更番入卫行在此最今日之急务也夫金人专以铁骑取胜而中国马政不修骑兵鲜少乃以步军当其驰突宜乎溃散盖祖宗朝养马於监牧孳生蕃盛所在云布故军旅之用足至崇观间监牧废而为给地牧马有其名而无其实既无孳生马益销耗其後燕山陷没马之入於夷狄者不可胜数金人初犯阙河北畿之马为之一空其後破都城首下令括马而京师之马入於贼者万有余疋今行在骑兵既已不多又皆疲劣官马既无独陕西京东西诸路尚有私马宜降指挥立格尺以善价买之可以济一时之乏民间养马必皆上户及僧道命官之家中下户自无马可养取之既不厉民而旬月间马遂可集朝廷讨论监牧之制修复马政命四川茶马司益市马效在年岁之外马不患乎不足此今日不得已之务也国家新罹寇难京师帑藏悉为金人所取外路州郡以调发勤王之师财用为之一空今又募兵买马招捉盗贼措置边事应副残破州县振举百度以图中兴非常赋之所能供办又不可横赋暴敛科取於民如免夫钱天下至今咨怨惟上二等物力有余之家可行劝诱使斥其赢余以佐国用而以官告度牒之类偿之使朝廷军马精强措置边事就绪盗贼衰息彼乃得保其财产不然虽欲保家室不可得况财产哉宜命州县委曲谕以德意必有乐输从命者此又今日不得已之务也然募兵买马劝民出财全藉州县官吏体朝廷德意而奉行之其有抑勒科配致搔扰者重寘於法奉行有叙不扰而办者量加旌赏令诸路监司保明按察以闻则三者可以指日而办上皆以为然命以劄子付中书省条具取旨乃与黄潜善商议於陕西河北募兵各三万人於京东西募兵各二万人合为十万许召募白身於诸色厢军中?选招收溃散兵卒改刺创置军号骁胜壮捷忠勇义成龙武虎威折冲果毅定难静边凡十军每号四军每军二千五百人例物白身人全给依上禁军法量增分数余给半许用诸路阙额禁军钱常平司钱不足即自朝廷应副每募及一军就本路选差有材武大小使臣充将官部队将押赴行在内京东西委两路提刑司河北委招抚司陕西委经制司而以钱盖依旧为陕西经制使初盖在靖康间尝建议河外湟鄯之地於朝廷无毫髮利而岁费不貲为中国患不若求青唐之後而立之使抚有其旧部以为藩臣朝廷省费而新边弓箭手皆可徙置河内

以备使令有益麻党征者故王之子素为国人信服悦封立之必得其力至是用其策故遣盖为使齎告赐益麻党征措置湟鄯事而因委之以募兵又议买马分为三等格尺价直除命官将校见养马不许括买外余并籍记赴官?选及格尺中披带者即时给还价直每及百疋差官一员管押赴行在隐寄妄冒有马不籍及无马而抑勒令置买者并科违制之罪委逐路提刑司总之又议募民出财宜降诏晓谕俾州县劝诱有能出财助国者籍记姓名多寡申朝廷给降度牒偿之入财多者取旨推恩应劝诱到钱物并别项桩管听候朝廷指挥专充募兵买马缘边事支用敢科配搔扰者命官审责吏人决配委监司按察凡募兵买马劝民出财奉行有叙保明推赏中书条具进呈有旨从之又议措置控御修举军政余谓唐之方镇当时实赖其力以定患难第措置失宜而其後行姑息之政威柄浸移乃有尾大不掉之患祖宗革去其弊削弱州郡之权一切委以文吏非沿边诸路虽藩府亦屯兵不多无敢越?行事以处太平无事之时可也一旦夷狄长驱盗贼蠭起州郡莫有能抗之者遂至於手足不足以扞头目为今之计莫若稍仿方镇之制择人任之而假以权减上供钱谷使之养兵而训练之大小相维远近相援庶几可以救今日之患夫方镇者节度使之兵也其次有观察团练防御今既以为阶官不可复改宜於沿河沿淮沿江诸路置帅府要郡次要郡使带总管钤辖都监以寓方镇之法许其便宜行事辟置寮属将佐以治兵不数年间必有可观昔马燧之镇太原也承鲍防之後兵力衰单燧募厮役悉补骑士教之战数月成精卒居一年辟广场罗兵三万以肆威震北方李抱真之镇泽潞也乘战伐後赋重人困军旅彫削乃籍户三丁择一蠲其徭租给弓矢令闲月得曹偶习射岁终大校亲按籍第能否赏责比三年皆为精兵举所部得成卒二万遂雄山东天下称昭义步兵为诸军冠此方镇之效也要在得人以任之寬其銜勒以责成功而诛赏废置之柄悉在朝廷使无不能运掉之患则今日控御之策宜无大於此者至於军政当法古揆今而更张之古者自伍两卒旅积而至於二千五百人而为师又积而至於万二千五百人而为军其将帅正长皆素具故平居恩威足以相服行阵节制足以相使若身运臂而臂使指无不可者此所以能扞患御敌而成功也国朝之制惟以五十人为一队伍百人为一指挥而有故出师始命将佐取具临时兵将初不相识而欲其临患难而用命指呼如意盖亦难矣今宜法古以五人为伍中择一人为伍长五伍为甲别选一人为甲正四甲为队有队将正副二人五队为部有部将正副二人五部为军有正副统制官节制统制官有都统节制都统有大帅皆平时选定闲居则阅习有故则出战非特兵将有以相识而恩威足以相服驱之行阵益多益治此韩信多多益办之术也夫用兵以赏罚为劝沮而自崇观以来有功者赏踰期败衄者罚不及用命死敌者以收身不到为名而无赠恤遇敌奔溃者以转山迷道为辞而反招收赏罚如此岂复有军政哉宜置赏功司凡士卒有功者即时推赏後有不实坐所保将帅而将之败衄卒之逃溃者必诛临阵死敌者寬主将之罚使必以实告而优赠恤之庶几士气犹可作也且祖宗严禁军逃亡之法而近年不复行也严犯阶级之法而近年不复行也严离部伍之法而近年不复行也严失主将之法而近年不复行也若此之类皆宜申明约束增重法制又纳级讨功之法有当议者如选锋精骑陷阵却敌神臂弓强弩劲弓射贼於数百步外岂可责以斩首级哉若此之类宜命将帅保明全军推赏余又具劄子於上前论之甚详金谓帅府要郡之制可行但未可如方镇割隶州郡措置军政当先施行於御营司及招置新军乃命京东西路京西南北路河北东路永兴军路淮南江南两浙东西路荆湖南北路皆置帅府要郡次要郡帅府为安抚使带马步军都总管要郡带兵马钤辖次要郡带兵马都监皆以武臣为之副改路分为副总管路钤辖为副钤辖州钤辖为副都监总管钤辖司许以便宜行军马

事辟置寮属依帅臣法屯兵聚粮皆有等差遇朝廷起兵则副总管为帅副钤辖都监各以兵从正官愿行者听转运使一员随军一员留本路而提刑弹压本路盗贼遇有盗贼则量敌多寡出兵会合以相应援本路帅臣当职官措置兵马先就绪者当优议旌赏又命招置新军及御营司兵并依新法团结五人为伍伍长以牌书同伍四人姓名二十五人为甲甲正以牌书伍长五人姓名百人为队队将以牌书甲正四人姓名五百人为部部将以牌书队将正副十人姓名二千五百人为军统制官以牌书部将正副十人姓名有所呼召使令按牌以遣而逃亡死伤皆可周知三省枢密院同置赏功司置籍以受功状三日不检举施行者必罚受赂乞取者行军法许人告遇敌逃溃者斩因而为盗贼者诛其家属凡军政申明约束及更改法制者数十条皆勅榜通衢将士观者皆奋励余又具劄子奏上曰朝廷所以备御夷狄者皆在边郡城池器械一切备具故敌未易攻金人内犯乃扰吾腹心而中原郡县积习承平之久城池堙颓并无器械何以御敌金人内犯所至官吏军民多不能守而郡县遂陷没者非特士气怯懦盖御敌之具不备使然宜诏诸路州县以渐修葺城池缮治器械朝廷量行应副有能葺治备具者当旌赏一二以劝之有旨依奏应州县欲修城池者申朝廷给降祠部应副又奏金人专以突骑胜敌而中国骑少步多固宜多致溃败夫步不足以胜骑而骑不足以胜车此必至之理故古人之战多以兵车卫青所以能深入匈奴者以用武刚车自环而依以为固也马燧所以兵雄朔方者以制为战车冒以狻猊象列戟於後行以戟兵止以为阵遇险则制冲冒也後世徒见房琯尝以车战败遂不复用殊不知制御突骑非车不可顾所以用之如何耳但当以革冒之以备火攻故古之兵车谓之革车者所以防火也臣在靖康间驻军河阳则车制简易轻捷数人可推运行进退旋转曲折皆如人意每车用卒二十五人行则为行阵止则为营垒平原可以驰逐险阻可以控扼士卒有所依而铁骑不得以奔冲其制甚精凡造数百两教阅月余士卒皆习熟会臣罢不果用今宜颁其制於京东西使制造而教阅之其详具劄子中因绘图进呈有旨令御营司制造阅习诸将皆以为可用乃颁降两路委提刑司总领之又奏大河江淮皆天设之险帝王所恃以守其国者也然须措置控扼以人绩加之乃为我用苟委之自然不复措置虽大河奔湍虏骑济渡如枕席之上况江淮哉嘉佑中范仲淹请於河阳上流置战舰水军习水战以备契丹之深入当时不从其议至於靖康间金人渡河如入无人之境盖无水军战舰以击其渡而控扼之也昔曹操盛兵以临江表周瑜以舟师破之赤壁而操终身不敢窥吴由是观之使有水军战舰因其济而击之得一胜则敌人破胆矣且金人便於骑射而舟楫非所便以我所长攻彼所短其胜万全但有其备使彼不敢轻济为利已博况胜之哉为今日之计莫若於沿河沿江沿淮州郡置造战舰因其俗之所宜招募水军凡习水而能操舟者皆籍记其姓名平居许其自便有故则纠集而用之逐时教阅量习激赏不年岁间皆为精兵则所以固吾圉者莫要於此其详亦具劄子中有旨如所请招置水军以楼船凌波为号又命御营司干办公事杨观复齎空名告往江浙募人造船余路委提刑司措置总领又奏上既於河北陕西京东西四路募兵而军器衲袄旗帜之类经靖康之变类多散失内库甲冑甚多特太重大兵卒不能胜乞降指挥条具军器衲袄阙数下诸路转运司制造於行在置司取内库甲改为大小三等之制及图画式样刺造旗帜之属上皆可之又询访陕西山东及诸路武臣材略可用者百余人乞召审察以备将佐偏裨之用有旨皆召赴行在自六月初至是凡四十余日措置边防军政之类始渐就绪是时朝廷议遣使金国余奏上曰尧舜之道孝悌而已孝悌之至可以通於神明今陛下以上皇渊圣远狩沙漠食不甘味寝不安席思迎还两宫致天下养此孝悌之至而尧舜之用心也然今日之事正当枕戈尝胆内修政事外攘夷

狄使刑政修而中国强则二圣不俟迎请而自归不然虽使冠盖相望卑辞厚礼朝迎暮请恐亦无益今所遣使但当奉表通问两宫致思慕之意可也上以为然命余草表并致书二酋长乃以周望傅雱皆借官为二圣通问使齎表及书以往又奏上曰陛下当艰难时为臣民之所欣戴纂承大统宜降哀痛之诏以感动天下忠臣义士之心具言祖宗功德涵养海内之深金人不道屠戮生灵之酷社稷艰危之急二圣播迁之痛今日所以赖天下士民同心協力相与扶持保安以致中兴者凡所告谕必尽诚意明白言之无有隐讳使读而闻之者虽武夫悍卒知所激励然後按其所言次第行之无为虚文务施实惠必能昭格天意感激人心转危为安有不难也昔陆贄有言履非常之危不可以常道安解非常之纷不可以常理谕又曰动人以言所感已浅言又不切人谁肯怀正今日之谓上乃命余撰拟诏文进呈颁降又具劄子以谓艰难之际赋入狭而用度广内自朝廷外至州县监司宜省冗员以节浮费上命中书条具乃诏省台寺监官以繁简相兼复开封官旧制减学官员额罢提举常平司并归提刑司罢两浙福建市舶司并归转运司复幕职曹官旧制非万户县不置丞罢吏员三分之一又请以三省堂吏依祖宗法转官不得过朝请大夫初陈乞出官止为通判应前宰执子弟以恩数带贴职及侍御以上并罢宰执及见任宫观待阙未有差遣京朝官以上俸钱并减三分之一有旨从之是时四方溃兵为盗如祝靖薛广党忠阁瑾王在之徒皆招安赴行在凡十余万人余谓今日盗贼正当因其力而用之如光武用铜马绿林下江之属以定天下曹操亦用黄巾以破袁绍顾所以驾驭之者如何耳不移徙其部曲则易以叛去移徙之则彼必致疑正当以术制之使由而不知则可乃以此意奏上命御营司差官每招安到一头项即先号令有元系良民愿归业及有营房兵卒愿归营者给券及公据遣之遣去太半又择其羸弱不胜兵者放散独留强壮愿充行阵立功者以新法团结每一军差大小使臣充部队将及择有材略者为统制官以统之而其头领皆命以官於他统副下充准备将领及差遣之类於是无叛去者独淮南贼杜用山东李昱丁顺杨进皆拥衆数万不可招而拱州之黎驿单州之鱼台皆有溃兵数千人作过余奏上曰方今朝廷外有大敌而盗贼乘间窃发扰吾郡县其势不先静内寇则无以御外侮盗贼虽主於招安然不震耀威武使知所惧则彼无所忌惮势难速平宜分遣兵将讨殄数处则余者自服上以为然乃命御营都统制王渊率师讨杜用都巡检刘光世讨拱州叛兵统制官乔仲福讨李昱韩世忠讨鱼台贼不旬月间皆破之斩杜用李昱获甲马宝货不赀余悉平殄丁顺杨进乃就招抚司招安过河惟李孝忠者破襄阳扰京西湖北余建议遣范琼讨之范琼者在靖康间为统制官将兵河东颇宣力其後归京师权步军指挥使京城破渊圣幸敌营留不遣有阁门宣赞舍人吴革者私结禁卫欲劫金营迎渊圣归谋泄为琼及殿前都虞候左言诛之上即位琼不自安朝廷以其握兵为降诏言节义所以责士大夫至於武臣卒伍当阔略之以责後效琼尚反侧至是余奏遣之讨贼使离都城琼以朝廷委用之心乃安卒杀孝忠招安其余党以赴行在一日与执政奏事内殿上出绢背心一宣谕曰道君自燕山密遣使臣齎来领中有亲书八字曰便可即真来救父母余与执政皆泣涕奏曰此乃陛下受命於道君者宜藏之宗庙以示後世道君远幸沙漠所望於陛下者如此臣等敢不竭尽弩钝措置边事以副陛下圣孝思慕之意执政退余留身论及靖康间事上曰渊圣勤於政事省览章奏有至终夜不寝而卒有播迁之祸何也余奏曰渊圣在东宫十余年令德闻於天下及即大位忧勤恭俭虽古之贤主无以远过适当国步艰难之时勤俭有余而英明不足不能分别忠邪羣言纷至为小人之所惑故卒误大事人主之职但能知人而任之近君子而远小人虽不亲细务大功可成不然虽衡石程书卫士传餐亦无益也上以为然余因论靖康之初金人犯阙

中国所以应之者得策凡二道君内禅一也渊圣固守二也使其後更得一策中国可以无事而和与战两者皆失之遂致大故而夷狄之患至今为梗方金人初犯阙提兵不过六万人既薄城下累日攻击知都城坚而士卒奋励不可攻则遣使厚有所邀求而请和臣献策渊圣以谓金人之所邀求有可许有不可许者宜遣使者往来款曲与之商议俟吾勤王之师既集然後与之约其可与者坚执勿与则约易成而和可久当时不以为然一切许之其後果不能如约遂再入寇此失其所以和也勤王之师集於都城四面者三十余万臣献策渊圣以谓兵家忌分宜使节制归一用周亚夫困七国之策以重兵与之相临而分兵收复畿邑使无所得粮俟其困而击之一举可破当时不以为然置宣抚司尽以勤王之兵属之故姚平仲得先期举事而朝廷惩刼寨小衄不复议兵贼退又不肯邀击遂使金人有轻中国之心而中国之势日弱此失其所以战也夫机会之来间不容发一失机会悔不可追譬如医者治病证候既明而不投药遂有至於不可料理者矣今日机会尤不可失愿陛下以靖康为监审处而决断以应之庶几可以成功上曰靖康之初能守而金人再来遂不能守何也余奏曰靖康之初与靖康之末其势不同条目甚多臣请论其大者金人初入寇未知中国虚实亦无必犯京阙之意时中国失备无兵以御之故使得渡河以至城下而粘罕之兵亦失期不至及其再来两路并进遂有吞噬中原之意此其不同者一也靖康之初敌至城下不数日间勤王之兵已集及其再来贼已围城始以蜡书募天下兵遂不及事此其不同者二也靖康初敌寨于西北隅而行营司出兵屯于城外要害之地四方音问络绎不絶勤王之兵既集敌遂敛兵不敢复出其後再来朝廷自决水以渰浸京城西北弥漫数十里而东南不屯一兵使贼反得以据之故城中音问不传於外而外兵亦不得以进此其不同者三也渊圣即位之初将士奋励用命其後赏刑失当人心稍解体此其不同者四也金人围城之初城中措置有叙号令严肃昼夜抚循未尝少休闻其後无任其责者敌至造桥渡壕恬不加恤以十数人登城将士遂溃此其不同者五也臣在枢密院时措置起天下防秋之兵降诏书已累月及臣宣抚河北即诏减罢太半盖朝廷专恃和议以谓金人必不再来一切不为之备故靖康之末不能守者势不同而患祸生於所忽也翌日奏事因裒聚靖康初建议措置与金人约和用兵次第劄子及朝廷分置宣抚司指挥後在宣抚司论不当减罢防秋兵章疏进呈上皆命留中因宣谕曰宣抚司官属靖康间迫逐非辜可并与差遣乃条具进有旨曾任郎官监司人与知州军差遣曾任馆职以上人与通判差遣余并非一等选人与优便占射余因奏上曰靖康间虽号为通言路然台谏官如李光陈公辅余应求议论颡峭皆远贬其实塞之也乃纳劄子劝上以明恕尽人言以恭俭足国用以英果断大事上皆嘉纳与执政同进呈臣寮论宋齐愈事初齐愈为右司员外郎自围城中出诣行在自陈以病在告不与伪楚事除谏议大夫至是臣寮论其首建议请立张邦昌按揭甚明上以其欺罔且首建伪楚之议震怒命付御史台鞠治证验明白齐愈欵服衆颇为之救解上曰齐愈奸恶悖逆如此岂可不正典刑使邦昌之事成置朕何地衆乃不敢言有旨依法定断仍榜其罪於通衢又进呈御史台鞠治陈冲余大均洪刍王及之等公事皆在围城中诱置内人为妾及因抄割金银自盗入已上曰此何等时乃敢如此初四人者罪不测衆救解之有旨情重者长流海岛余编置岭南又进呈留守司鞠治承华夫人李氏公事初张邦昌退归府第出禁中李氏送之有语指斥乘輿上闻之命留守司同御药院於内东门推治李氏欵服且言邦昌居福宁殿李氏尝以养女陈氏侍邦昌寝其後邦昌之姊入禁中乃留其亲随人而易以陈氏归府第上震怒谓邦昌敢居宫禁寝殿奸私宫人可以见其情状余奏曰邦昌既敢僭窃位号此乃细故耳然上竟以此深罪邦昌有旨李氏决脊降配军营务下名为妻又宣

諭王時雍逼迫道君出郊之狀余奏曰人臣不能伏節死義而不顧君父一至於此雖犬彘有所不若天下所同憤嫉姑俟邊事就緒徐議再行遣未為晚也因納劄子乞減上供之數以寬州縣修茶鹽之法以通商賈剗東南官田募民給地仿弓箭刀弩手法養兵于農籍陝西保甲京東西弓箭社免支移折變而官教閱之又請於陝西河北東路京東西置制置使使以遠近相應援有旨皆付中書省條具進呈取旨其後遂置諸路制置使而余事以余罷政皆不果行

梁谿集卷一百七十六

<集部,別集類,南宋建炎至德佑,梁谿集>

卷一百七十七

钦定四库全书

梁谿集卷一百七十七 宋 李纲 撰建炎进退志总叙四

初余尝从容奏上曰朝廷外则经营措置河北河东两路以为藩篱葺治军马讨平盗贼内则修政事明赏刑皆渐就绪独车驾巡幸所诣未有定所中外人心未安夫中原者天下形势根本也一去中原则人心摇而形势倾矣臣尝建巡幸之策以关中为上襄阳次之建康为下今纵未能行上策犹当适襄邓示不去中原以系天下之心选任将帅屯列军马控扼要害以折金人之谋使今冬无虞车驾还阙天下之势遂定而近日外议纷纭皆谓陛下且幸东南果如所言臣恐中原非复我有车驾还阙无期而天下之势遂倾难复振矣上曰但欲迎奉元佑太后及津遣六宫往东南耳朕当与卿等独留中原训练将士益聚兵马虽都城可守虽金人可战余再拜赞上曰陛下英断如此虽汉之高祖光武唐之太宗不是过也因言履艰难之运者不宜怀安高祖光武太宗皆身将兵被甲胄冒矢石於马上得之今固不待如此但车驾不去中原则将士思奋人百其勇盗贼不敢觊觎两河易为经略虽少劳苦而後享安逸傥媮取一时目前之安如後患何中外未知陛下圣意乞降诏以告谕之上乃命余拟撰诏文颁降榜之两京读者皆感泣因措置迎奉隆佑太后津遣六宫以徽猷阁待制孟忠厚为提举一行事务步军指挥使郭仲荀统兵扈卫余令有司排办後年月上忽降手诏欲巡幸东南以避狄令三省枢密院条具合行事件以闻余留之因具劄子极论不可且言自古中兴之主起於西北则足以据中原而有东南汉光武唐肃宗是也起於东南则不足以复中原而有西北晋元帝是也盖天下之精兵健马皆出於西北而中兴之主拨乱定功以兵马为先一失西北则二者无自得之形格势禁非特失地利而已今翠华傥或南幸委中原而弃之岂惟金人将乘间以扰吾关辅盗贼且将蠭起跨州连邑朝廷号令不行精兵健马反以遗贼道路梗塞人心惊溃陛下虽欲还阙有不可得况治兵胜敌以归二圣哉惟南阳光武之所以兴有高山峻岭可事控扼有宽城平野可屯重兵西通关中可召将士南通荆湖巴蜀可取货财东达江淮可运粮饷北距三都可遣救援暂议驻蹕自冬徂春两河措置就绪即还汴都策无出於此者上乃收还所巡幸东南手诏令与执政商议翌日再具劄子援楚汉荥阳成皋间曹操袁绍官渡事论天下形势甚详又与执政议於上前余曰今乘舟顺流而适东南固甚安便但一去中原势难复还夫中原安则东南安失中原则东南岂能必其无事一失机会形势削弱将士之心离散变故不测且有後艰欲保一隅恐亦未易臣诚不敢任此责且陛下既已降诏独留中原人心悦服奈何诏墨未乾失大信於天下愿断自渊衷以定大计上乃许幸南阳令措置合行事件有旨以观文殿学士范致虚知邓州委以修治城池缮葺宫室官府朝廷降盐钞钱帛委转运使范之才等储峙粮草命发运司拨江湖纲运由襄江通漕命四川变转轻货陆路自陕西江路自归峡以入南阳以黄潜厚为提举一行事务以郎官陈袞李侔干办顿递以发运使李佑为随行转运使将以秋末冬初择日啓行而潜善伯彦阴以巡幸东南之说动上意其意颇传於外客或谓余曰士论汹汹咸谓密有建议者东幸已决南阳聊复尔耳盍且从其议乎不然事将变余曰天下大计在此一举国之安危存亡於是乎分成命已行傥或改易吾当以去就争之且上英睿必不为异议所惑不然吾可贪冒宠禄为保身计虚受天下之贵哉然自是虽未

尝有改议巡幸之命而上每批出改易已行指挥如批出买马祇令每州买百疋余奏上曰元降买马指挥不立额数祇令有马及格尺者依等第给价买之今若每州限以百疋即无马去处必须科配却成搔扰乃止又批出募兵改刺新军有害军政余奏上曰元降募兵指挥许改刺者祇谓溃散兵卒无营房可归者即非以见在营房兵卒许之改刺因以中书元批旨进呈上意乃悟又批出李擢已经渊圣责降宫观今又责之为太重余奏上曰李擢在围城中渊圣委令提举京城南壁实守陈州门一带金人造桥渡壕擢恬不省察故责降宫观其後竟自所造桥渡兵破城擢之罪大矣特城破之後渊圣不暇再行遣耳今以散官安置已为轻典犹以为重何以戒失守使後來者任责潜善左右之甚力上乃令降作分司又批出翁彦国吴昉搔扰东南并落职与宫观令学士院降诏慰抚初余未至行在彦国已除知江宁府委令修城及缮治宫室朝廷给盐钞十万贯彦国具劄子以为不足用余奏上曰崇观间赐臣寮一第动费百万今委彦国以修城又新经兵火之余令治宫室祇给钱十万贯诚为太寡有旨拨两浙淮南盐钱四十万贯付之为五十万且降指挥令其因陋就简不事华壮上一日忽宣谕彦国修城等搔扰余奏上曰创修宫室一新城池鸠工聚材计置塼灰工料浩大集事之初其势不得无扰莫若明降指挥令其掇移诸州神霄宫及常平司廨宇一切拆旧修盖城壁亦因旧增葺使彼有所执守则费用省而搔扰之患自息乃命尚书省劄下既而复批出责降且命降诏盖潜善以彦国於余为姻家故密啓之以为譖愬之端也既得上批札适同日得江宁府奏状彦国已死又吴昉无职名可落劄谓宫观太优将上取旨上曰彦国已死不须行遣乃令放罢吴昉委提刑司取勘仍降诏慰抚东南如此之类批出者颇多初余每因留身奏事从容论治体及有所规谏虽苦言逆耳上皆嘉纳至是奏陈当世急务拟进指挥多不降出余固知譖愬之言其入已深一日对内殿留身奏上曰臣以非材误蒙圣慈使待罪宰相当国家艰难之时付以天下之重臣夙夜黽勉虽久患痼疾亦不敢在假将理思竭驽钝以报称知遇之万一近日屡烦宸翰令改正已行事件臣逐一按据辩明幸蒙圣察又所进拟措置机务多未蒙降出顾臣孤拙寡与独荷陛下特達之知忌冒者多恐必陰有譖愬而离间臣者书言时则勿有间之而管仲亦以信用君子而必以小人参之为害霸夫君子小人若冰炭然势不两立治乱安危系其进退在人主有以察之而已因出劄子极论君子小人之理且言靖康间渊圣听用唐恪而恪奸邪舞智以御其君能得渊圣之心移易是非变乱白黑卒譖罢徐处仁吴敏而夺之相其後遂致祸故方陛下精励图治枕戈尝胆振起中兴之功誠不愿蹈覆车之辙也夫疑则当勿任任则当勿疑持狐疑之心者来谗贼之口愿致察於此上慰谕曰无此但朕思虑偶及之耳其余章疏见省览非晚降出余拜谢而退至八月五日告廷迁余银青光禄大夫尚书左仆射兼门下侍郎加食邑实封而除潜善右仆射兼中书侍郎既命两相则潜善显沮张所而罢传亮余以去就争之遂定进退虽知堕潜善策中盖势不得不然也初张所既受招抚使之命建言乞置司北京候措置就绪即渡河移司恩冀以所募兵内纳陷敌兵民复怀卫濬三州解邢洺磁相中山之围以图收复真定既有期矣所尚留京师招集将佐措置钱粮而河北转运使权北京留守张益谦奏招抚司搔扰不当置司北京且言所欲起北京屯戍兵给用器甲为非是缘置招抚司河北盗贼白昼杀人不若罢之专以其事委帅臣盖张愬久为河北都运与益谦善愬以余尝沮其执政故附潜善伯彦相与谋使益谦为此奏以沮张所而惑上意也余奏上曰张所画一乞置司北京候措置就绪日渡河今所尚留京师以招集将佐故未行不知益谦何以知其搔扰而言不当置司至於守兵器甲不可辍那当令招抚司具合用数申陈自朝廷给降可也朝廷以金人攻围河北民无所归聚为盗贼故置司招抚因其力而用之以

解河北之急岂缘置司乃有盗贼今京东京西羣盗啸聚攻掠州县岂亦招抚司所致耶方时艰危朝廷欲有所经略益谦小臣乃敢非理公然沮抑此必有使之者不惩之无以戒妄议而沮奸臣上乃令降旨招抚司依画一置司北京就緒日疾速渡河不得抽摘守兵具合用器甲申朝廷应副如招抚到河北兵民严行钤束无令作过张益谦令分析以闻尚书省既割下矣枢密院复以益谦申状将上取旨凡千余言痛诋招抚司令北京行下州县出榜後数日乃关过尚书省余始见之乃以枢密院画旨并尚书省元降指挥同将上进呈与伯彦懃争於上前余奏曰张益谦所奏皆细故情涉观望尚书省已得旨行下而枢密院又别取旨痛诋訾之此何理也不过欲与益谦相表里以细故而害大计沮抑张所耳朝廷以兵力不足而河北之事急故委张所以招抚因兵民盗贼之力以扞强敌而复故地今措置甫就緒行且成功而沮抑之如此州县将士知朝廷议论不同安肯協力弃事功於垂成良可惜也臣不知朝廷之於张所欲其成邪欲其败邪欲其成则不当沮抑之如此欲其败则不若罢去之无事挟私害公而不为国家虑也沮抑一张所有何所难致误国家之大计使河北兵民尽为金人之所得河北州县尽为金人之所有中原且弗能保将谁任其责靖康间惟朝廷议论不同无以公灭私之意遂及祸故今岂可复蹈覆车之辙耶伯彦懃无以对第云初不知尚书省已降指挥上乃令枢密院改正依前降指挥施行既不得逞即又为傅亮之事初王 傅亮既受命为经制使副即具画一申朝廷以谓河东州县多为金人所陷没至与陕西接连如河中府解州亦为所据与陕府相对以河为界今经制司所得兵才及万人皆乌合之衆其间多招安盗贼及溃散之兵未经训练拊循难以取胜乞於陕府置司训练措置召募陕西正兵弓箭手之在民间不出者及将家子弟不旬月间可得二万人【陕西正兵及弓箭手皆精兵以童贯总兵赏罚不明皆藏於民间不出每应点集者皆其家人也故 亮欲厚资给以募之皆一可以当百也】与正兵相为表里其胜可必且一面结连河东山寨豪杰度州县可复即复之可以渡河即乘机进讨以收复河阳河中解州沿河一带?险以扼其冲渐议深入以复泽潞太原愿当方面之寄有旨从之拨川纲之在陕西者使招募西兵又命陕西京西转运司悉力应副 亮行才十余日枢密院复取旨令留守宗泽节制即日过河亮申朝廷以与前议及元降指挥不同今欲令过河无不可者但河外皆金人界分本司措置全未就緒既过河後何地可为家计何处可以得粮乌合之衆使复为金人之所溃散何自可以得兵亮等不足惜第恐有误国事余将上进呈奏曰河东今日之势不同河北所失不过数郡其余皆为朝廷守王师渡河犹有驻泊得粮之处河东州县太半陷没沿河一带自解州河中至河阳怀卫皆为金人所据今经制司军旅未集遽违前议毆之渡河遂为孤军傥为金人所覆不知朝廷何所更得将佐士卒当此一道而经略之古者将帅不从中御愿且如前议尽将帅之智虑而责成俟其淹旷时月而无功则朝廷自有法以待之何必毆之若是之遽而潜善伯彦皆谓不使之亟渡河且失机会如亮等但欲逗遛耳余曰兵事不可遥度目下亦未见有机会可乘但当委任将帅使择利而动耳今不恤其措置未办集而毆之使渡河正所以为贼饵不见其利也且亮等受命而行才十余日申明朝廷前後所降指挥不同乃将帅之职岂可便以为逗遛如赵充国坚执屯田之议不闻宣帝以为罪也臣以谓不若只依前降指挥为便上以潜善伯彦执议圣意颇惑依违不决者累日余留身极论其理且言潜善伯彦始极力以沮张所赖圣鉴察之不得行其志又极力以沮傅亮盖招抚河北经制河东皆臣所建明而张所傅亮又臣所荐用力沮二人乃所以沮臣使不安其职臣每鉴靖康大臣不和之失凡事未尝不与潜善伯彦商议而後行不谓二人乃设心如此如傅亮事理明白愿陛下虚心以观之则情状自见上曰俟批出只令依元降指挥

於陝府置司至翌日批出乃云傅亮兵少不可渡河可罢经制司赴行在盖潜善留身密啓之也余留御批将上奏曰臣昨日论傅亮事已蒙宣谕俟批出依元降指挥继奉御批乃罢亮经制使不知圣意所谓上曰亮既以兵少不可渡河不如且已余奏曰臣论傅亮乞降指挥非谓不使之渡河缘亮昨乞於陝府置司与金人对垒募兵训练择利过河收复州县朝廷已从其请令行未半月遽改命使宗泽节制即令过河臣谓有不可者三事从中御不尽将帅之虑一也军旅未集驱乌合之衆渡河即成孤军必为金人之所溃二也军溃之後朝廷未有将佐士卒可以当河东一道之寄三也故臣以改命为非是当依前降指挥以责成功今乃缘臣争论之故并与经制司罢之此必潜善等以私害公陰有以荧惑圣听欲以沮臣使去耳臣荷陛下特達之知起自罪谪付以国柄方艰难之秋但知一意以为国家苟可以持危扶颠者知无不為庶几仰副委任之万一如以傅亮经制河东乃今日所当为之大者潜善等乃欲以非理沮罢之此而可沮则其他孰可为者今御批犹未施行愿陛下致察於此尚容臣得待罪宰相以图报称不然臣岂敢尸禄贪冒宠荣以虚负天下之责哉上曰如傅亮人材今岂难得余奏曰臣尝欵与亮语观其谋略智勇真可以为大将询之士大夫亦以为然今以为经制副使姑试之耳假以时月必有可观使亮如其所请临敌退挠而无成功臣愿受误国之罪今未尝用而遂罢之则不可古之御将帅者恐不如此昔高祖何尝自知韩信但以萧何荐之遂为大将设坛塲择日而拜之何之所以知信者亦以屡与之语而已使高祖不能用何之言而将韩信则何亦必不敢当相位今人材难得而将帅之材尤为难得偶得一二而朝廷所以辍那人兵应副钱粮器甲者种种办具非涉旬月不能遣而啓行未几遂以寸纸罢之待将帅之轻如此孰不解体此臣所以深为陛下惜也且潜善等所以必欲罢亮者意不在亮乃以沮臣陛下不察则臣亦何敢安职恐终无以助陛下致中兴之功上无语余以御批纳上前曰圣意必欲罢傅亮乞以御批降付潜善施行臣得乞骸骨归田里臣非敢轻为去就更望陛下留神熟思之使亮不罢则臣何敢决去因再拜榻前上犹慰谕谓不须如此余既退闻亮竟罢乃入表劄求去上遣御药宣押赴都堂治事余到堂复上马归再入第二表劄皆批答不允翌日遣御药宣押赴後殿起居随宰执奏事乞余留身上曰卿所争事小何须便为去就余奏曰人主之职在论一相宰相之职在荐人材方今人材以将帅为急恐不可谓之小事傥以为小臣以去就争之而天意必不可回臣亦安敢不必去因再拜榻前复奏曰臣以愚憊仰荷眷知初无左右先容之助龙飞之初首命为相潜善伯彦自以谓有攀附之功方虚位以召臣盖已切齿及臣至而议论伪楚建请料理河北河东两路车驾巡幸宜留中原皆与之不同而独蒙陛下嘉纳听从固宜为其媚嫉无所不至方潜善未相所以譖愬指摘臣者不过欲为相而已今既已相而犹沮抑不已以是为非变白为黑此不过欲臣去耳臣立於群枉之中独赖陛下察之得以尽其区区之愚如傅亮之事晓然无可疑者又不蒙圣察是臣荐进人材不足用议论国事不足采其失职大矣岂敢复任宰相哉臣请以世俗之事譬之今有疾病者衆医不能治而求之於草泽既至而为之察色诊脉曰病如此宜服某药则愈而左右衆医沮之使不得投药石则草泽之医亦将辞退岂敢任责又如大厦之将倾而命都料匠以修之必听其择材以易栋楹设木以事撑拄持危扶颠乃可复全而衆工沮之主人者不察既不使之得以易栋楹又撑拄之具悉拔弃之则都料匠亦将告去何则覆压之虞难任责也方朝廷承平无事之时宰相犹可尸禄备员以冒宠荣今艰难多故之秋当惜分陰人主以其相为不足任则当亟罢人臣自度不能胜其任则当亟去之臣自度终无以当陛下之委任而负天下之责望敢久居此以妨贤路哉且臣尝建议车驾巡幸不可以去中原潜善等必以此动摇圣意故力沮张所傅亮而去臣臣

东南人岂不愿奉陛下顺流东下为安便哉车驾巡幸实天下人心之所系中国形势之所在一去中原则後患有不可胜言者故不敢雷同衆说以误大事愿陛下以宗社为心以生灵为意以二圣未还为念?神於此勿以臣去而其议遂改也臣仰荷天地之德虽去左右岂敢一日忘陛下不胜犬马依恋激切之至因泣辞而退遂上第三表劄客或谓余曰公决於进退之义得矣顾谗者不止将有患祸不测奈何余曰大臣以道事君不可则止吾知尽事君之道不可则全吾进退之节而已患祸非所恤也畏患祸而不去彼独不能讽言者诋訾而逐之哉天下自有公议此不足虑翌日降麻告廷除观文殿大学士提举杭州洞霄宫加食邑实封时八月十八日也麻制中乃以余募兵买马劝民出财为罪又谓行遣伪命臣寮为报私怨纳御批除目为慢君命不责翁彦国为党茆姻戚争议傅亮渡河为沮格王师如此类十数事皆潜善密以付词臣余具表劄辞免不敢当观文殿大学士降诏不允是时尚未受左仆射之命有旨令阁门并赐两告不得已拜受陈谢即行以九月半抵镇江府闻辛道宗之兵变於秀州宿留不敢行者半月继闻其掠毗陵焚丹阳遂以客舟由外江归梁谿而言者再论麻制中所指以为罪者又言余倾家赀以犒叛卒为绋巾数千顶与之遣弟迓贼陰与之通朝廷不复?问其实有旨落职令鄂州居住谗谤如此自非上恩保全有以照见其无他虽欲处江湖之善地岂可得也闻命即由江东西以抵武昌适江上盗贼纷扰权寓居于属邑之崇阳僧舍中暇日阅建炎初备位宰司日记追思以迂拙甚陋之资荷上知遇付以国事当轴秉钧才七十有五日竟以谗罢曾无涓埃之补而罪衅之积有踰丘山尚窃廩禄饱食而逸居慙叹深矣然余既罢之後张所亦以罪去傅亮辞以母病不赴行在而归陕西招抚经制司皆废车驾遂东巡而两河郡县皆陷於贼金人以次年春扰京东西深入关辅残破尤甚此岂人力也哉因取进退之大槩次第而总叙之与夫制诰诏命书疏表劄编纂附着合为十卷目之曰建炎进退志庶几览者有所考焉至於臣寮之所建明四方之所陈请陟降人材改革政事自有史官书之此不复録建炎二年十月二十日具位李某叙

卷一百七十八

钦定四库全书

梁谿集卷一百七十八 宋 李纲 撰

建炎时政记序

臣某伏被尚书省劄子三省同奉圣旨令臣省记编録建炎元年五月一日以後时政记繕写成册进御以待制诏颁降史馆臣仰惟皇帝陛下躬上圣之资抚中兴之运方时多艰入继大统龙飞宋都为天地神明万物之主嗣位之五日即布大号考慎其相首及微臣特達之知非常之遇古无与比顾如臣者所以报称眷待之意宜何如哉然臣志广材疎学识荒浅徒有爱君忧国之心初无周身防患之术备位宰相才两月余功效无毫发可称罪戾有丘山之积奉身以退何补国家辜负明恩为罪大矣臣自去魏阙七更岁华荐致人言自取颠蹶伏蒙皇帝陛下矜怜孤迹始终保全天地之恩何以论报今者又奉诏旨俾追记往事编録成书将以付之太史氏顾臣自经忧患衰病交攻心志不寧动辄废失屡遭盗贼文籍散亡极意追思曾不能省记十之一二至於日侍清光亲承训勅则铭镂肺腑岂敢弭忘谨以省记到昨任宰相日所得圣语所行政事赏刑黜陟之大略着於篇至於日辰有不能省记则阙之庶几信以传信疑以传疑之意谨繕写成上下两册冒昧投进以尘乙夜之览宣付史馆备采择焉臣干冒天威无任惶惧战越之至臣某昧死顿首顿首谨序

建炎时政记上

【起建炎元年六月一日止十二日】

六月一日臣自资政殿大学士领开封府事蒙恩除尚书左仆射兼中书侍郎以是日到南京行在有旨宣召臣当晚赴内殿起居叙致谢恩讫力具奏陈材能浅薄不敢当除命乞改授其人以慰輿望上不允臣复奏曰臣未到行在数十里间御史中丞顔岐封示论臣章疏大意谓张邦昌为金人所喜更宜增重其礼臣为金人之所不喜宜置之闲地不当为相臣愚憊但知有赵氏不知有金人固宜为其所恶然岐之论臣谓材不足以任宰相则可谓为金人所恶不当为相则不可臣愚不知金人与赵氏为仇敌其所喜者为赵氏耶其所恶者为赵氏耶且为赵氏之臣而金人喜之此必有以得其心者而反可以为相自古卖国以与人者皆为忠臣矣今陛下断自渊衷特达用臣而外廷之论如此臣岂敢当此任愿乞身以归田里至於陛下命相於金人所喜所恶之间更望圣虑有以审处上宣谕曰岐尝有此言朕告之以如朕之立恐亦非金人之所喜者岐无辞而退此不足恤臣窃仰圣语英睿如此复奏曰陛下天纵圣智固不难察此然臣繇力薄材实不足以胜重任因再拜力辞上慰谕久之遣御药邵成章宣押赴都堂治事且命执政聚於都堂

六月二日有旨令臣立新班奏事对於内殿同执政奏事讫臣留身再具奏力辞除命上慰谕

不允臣感泣再拜曰臣愚陋无取不意陛下知臣之深也臣尝观唐明皇欲相姚崇崇以十事邀说皆中一时之病类多施行後世美之臣常慕其为人今臣亦窃不自揆敢以十事仰干天听俛蒙睿断施行乃敢受命其未合圣意者愿赐诘难使臣得尽其说上可之因出劄子奏陈其一曰议国是大略谓中国之御敌人能守而後可战能战而後可和而靖康之末皆失之今欲战则不足欲和则不可莫若自治专以守为策俟吾甲兵修士气振然後可以议大举其二曰议巡幸大略谓车驾当一到京师见宗庙慰都人之心权时之宜为巡幸之计以天下形势观之关中为上襄阳次之建康又次之宜诏有司预为之备其三曰议赦令大略谓祖宗登极赦令皆有常式前日赦书一切以张邦昌伪赦为法如赦恶逆选人循资责降罪废官尽复官职皆泛滥不可行谓当改正以法祖宗其四曰议僭逆大略谓张邦昌为国大臣不能临难死节而挟金人之势易姓建号身处宫禁南面以朝其後勤王之师集迫不得已乃始奉迎朝廷尊崇之为三公真王参与大政非是宜正典刑垂戒万世其五曰议伪命大略谓国家更大变故鲜伏节死义之士而奉敌旨受伪官屈膝於其廷者不可胜数昔肃宗平贼而污伪命者以六等定罪今宜仿之以励士风其六曰议战大略谓军政久废士气怯惰宜一新纪律信赏必罚以作其气其七曰议守大略谓敌情狡狴势须复来宜於沿河江淮措置控御以扼其冲其八曰议本政大略谓崇观以来政出多门纪纲紊乱宜一归之於中书则朝廷尊其九曰议久任大略谓靖康间进退大臣衆多而太速功效蔑着宜谨择而久任之以责成功其十曰议修德大略谓上新即大位宜益修德以感天人心致中兴之业得旨皆留榻上俟详观有当施行者降出是日降出议国是巡幸赦令战守五劄子余皆留中同日内降麻制皇叔祖庆远军承宣使知大宗正事仲宗可特授武胜军节度使依前知大宗正事加食邑五百户食实封二百户皇叔祖靖康军节度使知西京外宗正事仲是可特授检校少保依前靖康军节度使开府仪同三司嗣濮王加食邑一千户食实封三百户皇叔寧远军承宣使知南京外宗正事士可特授光山军节度使依前知南京外宗正事食邑五百户食实封二百户三省同奉圣旨宇文粹中落职提举亳州明道宫以江寧府军卒叛失守故也

六月三日臣同执政奏事进呈议国是劄子有旨付中书省遵守次进呈议巡幸劄子有旨催促留守司修治京城祇备车驾还阙谒欸宗庙委永兴军襄阳府江寧府守臣增葺城池量修宫室官府以备巡幸次进呈议赦令劄子金谓赦恶逆已行难追改有旨选人惟在职者循资谪降罪废官令刑部具元犯申朝廷等第叙复次进呈议战议守劄子有旨令三省枢密院讨论修举军政措置控御条件以闻奏事讫执政退臣留身奏曰臣愚瞽辄以管见十事仰黷天聪已蒙圣慈施行五事如议本政久任修德三事无可施行自应留中所有议张邦昌僭逆及受伪命臣寮二事皆今日刑政之大者乞早降处分上宣谕曰执政中有与卿议论不同者更俟欸曲商量臣奏曰邦昌僭逆之迹显然明白无可疑者天下皆谓邦昌处敌中岁余厚结敌人得其欢心攻破都城迁二圣东宫尽取亲王宗室以行邦昌盖与其谋此固不可知然邦昌当道君朝在政府者几十年渊圣即位首擢为相奉使敌人方国家祸难之时如能以死守节推明天下所以戴宋之义以感动其心敌人未必不悔祸而存赵氏邦昌方且自以为得计偃然当之正位号处宫禁者月余日敌骑既退四方勤王之师集邦昌擅降伪诏以止之又遣郎官分使赵野翁彦国等皆齎空名告数百道以行迨勤王之师日进邦昌知天下之不与也不得已乃议奉迎邦昌僭窃本末如此春秋之法人臣无将将而必诛况邦昌已僭窃罪宜如何陛下欲建中兴之业当自正朝廷始而尊崇僭逆之臣为三公真王参与国政何以示四方执

政中有议论不同者乞降旨宣召臣得与之廷辩如臣理屈岂敢复言上许之乃令小黄门径就幕次宣召黄潜善吕好问汪伯彦再对上语之故潜善力主之诘难数四乃屈服犹持在远不若在近之说臣曰邦昌当正典刑何远近之有借使在近当幽繫而反尊崇之如此何也潜善不能对上顾吕好问曰卿在城中知其详谓当如何好问曰邦昌僭窃位号人所共知既已自归惟陛下裁处又引德宗幸奉天不挟朱泚行後以为悔以附会潜善不若在近之说臣曰吕好问之言首鼠两端且援朱泚以为例非是方德宗之狩奉天朱泚盖未反也姜公辅以其得泾军心恐资以为变请挟以行德宗不听而其後果然今邦昌已僭逆岂可使之在朝廷使道路指目哉因泣拜曰臣不可与邦昌同列陛下必欲用邦昌第罢臣勿以为相无不可者上宣谕曰俟降出卿劄子来日将上取旨臣拜谢而退是晚劄子降出

六月四日臣同执政奏事进呈论张邦昌僭逆劄子三省枢密院同奉圣旨张邦昌僭逆理合诛夷原其初心出於迫胁可特与贷免责授昭化军节度副使潭州安置又进呈论受伪命臣寮劄子上宣谕曰国家颠覆士大夫不闻死节往往因以为利如王及之坐蕃衍宅门诟骂诸王余大均诱取宫嫔以为妾卿知之否臣奏曰自崇观以来朝廷不复敦尚名节故士大夫鲜廉寡耻不知君臣之义靖康之祸视两宫如路人然罕有能伏节死义者在内惟李若水在外惟霍安国死节显着余未有闻愿诏京畿诸路询访优加赠恤如王及之余大均朝廷见付御史台推鞠必得其实臣闻方金人欲废赵氏立张邦昌令吴玠莫俦传道意旨往返数四京师人谓之捷疾鬼王时雍徐秉哲奉金人旨追捕宗室戚里令居民结保不得容隐以衣袂联属以往若囚繫然其後迫道君东宫后妃亲王出郊皆臣子之所不忍言又受伪命皆为执政此四人者宜为罪首上以询吕好问而好问以为有之得旨皆散官安置余以次谪降内王及之余大均周懿文胡思陈冲等并令御史台疾速取勘俟案到日取旨李若水已赠官外霍安国特赠延康殿学士有死节者令诸路询访以闻又进呈御史中丞颜岐待罪章疏有旨除待制提举宫观执政退臣留身奏事上宣谕曰卿昨日内殿争张邦昌事内侍辈皆泣涕卿今可以受命矣臣拜谢曰陛下英睿天纵决断如此天下不胜幸甚臣虽愚陋敢不黾勉以图报称上宣谕曰屡语执政令置登闻检鼓院以通四方章奏至今犹未措置卿可便与施行臣退批旨置登闻检鼓院於行在便门之外差官吏权摄是日三省枢密院同奉圣旨察官职官今後依官制施行钱伯言除开封尹孙焄除应天尹权邦彦差知东平府吕颐浩差知扬州陈邦光差知广州唐愬差知荆南府王以宁差知鼎州六月五日臣同执政奏事进呈劄子大略谓河北河东两路国家之扞蔽河北西路三帅府二十余郡靖康末所失者真定怀卫濬一帅府三郡而已其余至今皆为朝廷坚守一路兵民有城郭者依城郭无城郭者依大河西山自相结集日以蜡书号吁朝廷乞师请援河东亦然但所失州郡视河北为多欲乞於两路置司措置因其人而用之将来以河外郡县悉议封建使自为守朝廷量力以助之则藩篱固而中原可安悦舍此而不为则两路之人且归怨於朝廷强壮狡狴者反为敌用将何以待之今日所当先务者莫急於此有旨河北置招抚使司河东置经制使司委官以择可任使副者具姓名以闻是日三省同奉圣旨以赵子崧守陈州阎孝忠守蔡州黄叔敖守襄阳府赵子栎守汝州李彦卿守汉阳军程千秋守江陵府公安县扞御有功子崧转两官孝忠转一官除直秘阁叔敖转一官除秘阁修撰子栎除宝文阁直学士彦卿除直秘阁千秋转一官通判江陵府王襄责授中大夫秘书少监分司北京襄阳府居住赵野责授中大夫秘书少监分司南京青州居住以言者论其任总管日逗遛不进故也

六月六日内降手诏朕以菲德获承宗祧以临士民之上属时多艰未知攸济栗栗危惧若将陨于深渊洪惟祖宗膺受天命覆育函夏百七十余载德隆恩普振古所无道君太上皇帝以忧勤而内禅孝慈渊圣皇帝以恭俭而纂图海内乂安苍生蒙福适金人之入寇挟诈谋以欸师待以不疑堕其奸计神都失金汤之险翠华有沙漠之行二圣既迁六宫皆从迨朕叔父弟昆宗室戚属悉被驱逼祸败之臻从古未有是用夙夜震悼於朕心念父兄幽辱於敌廷悯生灵重罹於兵革饮泣尝胆不遑寧居惟尔四方士民抱负忠义其伊恤朕躬以共济于艰难以致安于宗社载念行在将士适当隆暑暴露之久尤軫朕怀当特加犒设州县民户募师勤王调发之烦诚可嘉悯当厚与抚循赋敛之厚当议蠲减法令之弊当议改更溃兵为盗因间掳掠残破郡邑虽已降赦令当遣使招集许令自新赃吏为奸乘时掊克重困吾民罪不可贷当遣使按治寘於典宪靖康之间忠义敢言之士或至窜逐当悉召还今日以往智谋奇画之人如能献陈当悉擢用旁招俊乂窜黜奸回协成治功以笃中兴之烈於虞天下之士大夫未忘我之祖宗当同心以相扶持天下之军民不愿沦於仇敌当协力以相保守国势既昌天命益固庶几隣敌悔祸奉还銮舆则予一人以寧尔亦有无穷之闻不其韪欤故兹诏示想宜知悉是日三省同奉圣旨傅墨卿除礼部尚书郭三益除刑部尚书周武仲除吏部侍郎曾惇除礼部侍郎董耘除兵部侍郎许景衡胡安国并除给事中刘珣除中书舍人曾开复待制知潭州吴岩夫除光禄卿辛炳除左司员外郎李光除秘书少监翁彦深除太常少卿

六月七日三省同奉圣旨谪授凤州团练副使江州安置张所通直郎直秘阁通判河阳府事傅亮召赴行在议事以臣所荐欲委以河北河东路招抚经制司也是日三省同奉圣旨李回谪授朝奉大夫秘书少监分司南京袁州居住以言者论其防河退遁及尝受伪命故也

六月八日内降手诏朕惟祖宗创业守成垂二百年涵养士大夫至矣靖康变故仕於中都者曾无仗节死难之士而媮生取容何其衆也甚者乘时为奸靡所不至实为中国羞公议弗容姑取迹状尤显着者量加窜黜为臣子之戒夫节义正所以责学士大夫也至於武臣卒伍理当濶略以责後效惟王宗澣首引卫兵逃遁致都城失守不可不责其余姑务含容一切不问咨尔有衆其体至怀故兹诏谕各宜知悉是日三省同奉圣旨谢克家除述古殿直学士提举杭州洞霄宫季直罢太常少卿主管亳州明道宫莫砥除军器监陈公辅除吏部郎官程瑀除司封郎官余应求除考功郎官陶恺除度支郎官鲍辉除兵部郎官滕庾除都官郎官陈彦文孙默李积中王愈程迈并令乘通马发来赴行在洪刍罢谏议大夫张卿材罢刑部郎官胡思王及之余大均周懿文陈冲并先次放罢以御史台勘司有请也六月九日三省枢密院同奉圣旨李若水忠义无与比伦已推恩外可特赐諡刘韜能死节不为敌用与追复银青光禄大夫特赠资政殿大学士许翰杨时晁说之并令乘通马发来赴行在吴玠责授昭化军节度副使永州安置莫俦责授寧化军节度副使全州安置徐秉哲梅州安置王时雍高州安置

六月十一日三省枢密院同奉圣旨新政之初应干指挥内外官司各当体念国步艰难悉心奉尚虑流俗玩习将为虚文顾避怀奸推行灭裂或用事剥下背公自营肆为骚扰有害新政并仰监司互相体察犯人重寘典宪仍令御史台体访弹奏孙昭远差知河南府兼西道都总管俞向差知陕府并填见阙

六月十二日三省枢密院同奉圣旨史徽特落致仕除司农少卿吴给除左司郎官张公济除
驾部郎中郭求除河北东路提刑周格除京东西路提刑谢颀除京西北路提刑李西美除荆
湖北路提刑并填见阙

梁谿集卷一百七十八

<集部,别集类,南宋建炎至德佑,梁谿集>

卷一百七十九

钦定四库全书

梁谿集卷一百七十九 宋 李纲 撰建炎时政记中

【起建炎元年六月十三日止六月终】

六月十三日内降赦书一道门下朕绍隆丕绪寅御多方置大器以求安涉巨川而思济勤于邦以图天下之逸俭于家以资天下之丰懔乎负荷之难惕若继承之重膺受祖宗之贻燕昭格穹昊之颺临有开昌期诞生元嗣庚伏火见协长夏懋育之辰玉裕渊清稟璿源英秀之气实庙社无疆之福示本支有衍之符以奉二圣覆露之慈以系四海爱戴之望循考累朝之旧典咸推利物之深仁矧在多艰敢忘敷庆宜覃旷荡之泽式契荣怀之心可大赦天下应赦书到日昧爽以前罪人除犯劫杀谋杀故杀鬪杀并为己杀人者并十恶罪至死伪造符印放火官员犯入己赃将校军人公人犯枉法监主自盗赃不赦内枉法自盗罪至死情理轻者奏取指挥鬪杀罪至死情理轻者减一等刺配千里外牢城断讞録案闻奏其余罪无轻重已发觉未发觉已结正未结正咸赦除之应旧系籍及上书人朝廷累降指挥检举叙复至今经隔年月尚未结絶宜并给還元带官职赠諡碑额等已经给还而未足者并依元初指挥其未责降以前官职应得遗表或致仕恩泽者亦令吏部刑部条具申尚书省取旨应靖康元年边事後來文武官因病陈乞致仕朝廷不从所乞内有身亡之人特许依条陈乞致仕恩泽及陈乞致仕缘道路不通不曾被受致仕勅命者亦许所在州军保明特与依条推恩应士庶投献章疏见委官看详如有利害灼然可采令看详官先次保明申尚书省当议旌擢以为激劝勘会科举之弊至此极矣苟无变通则忠实异材之士何由而出可讲元佑诗赋经术兼收之制庶学者近正仍令礼部疾速条画闻奏缘已降指挥建炎二年正月九日鎖院省试今来日已逼近难以遽改可自後举依此施行应诸路解发材武人并锡庆院材武人昨有偶缘事故趣试不及之人窃虑遗材仰经礼兵部投状勘验诣实当议特与别行收试具合格姓名申尚书省取旨推恩应将士实有战功缘罪停废之人并特与牵复仍令所在官司发赴行在当议量材选用应诸路有材勇谋略之人衆所推伏或曾经战阵得功可以倚仗委本州具姓名保明解发赴行在御营使司当议量材録用每州三人应诸路勤王人兵有曾收复州县立功之人仰四道都总管及经制使等同结罪诣实保明闻奏虽不曾立功曾到京城下或元帅府已结局遣回而所辖人兵不曾逃散者候到本处仰本州具元发回及已到人数元管押人职位姓名并元借官职保明闻奏当议特与推恩应遣回勤王人兵所带器甲并於所到州县先次寄纳如因在路遗失军器赶趁队伍不及逃窜之人限赦到一月经所在陈首并与免罪发遣归元来去处依旧收管仍给沿路口券其因沿路失於机察致散漫劫掠良民者可责委随处统领等官将犯人便依军法务要整肃所过州县并先具统制等官职位牒报候将来见得沿路不曾作过令元发起发处具统制统领等官职位姓名保明申尚书省取旨推恩今日已後或失钤束部辖亦当重行黜责昨太原真定等处州郡缘金人攻围其官兵统制兵将官等有能竭节战守遂致陷歿之人可疾速契勘推恩厚抚家属内忠义显着者务加优异以为将士殉国用命之劝近缘军兴应召募民兵义兵统领之人多是掳掠良民强黥其面共肆刼夺念非本心理

宜优恤近虽已有放散归农指挥窃虑统领之人拘留未放并仰经所在官司陈诉给公据令各归业已前罪犯一切不问令州县多出文榜晓谕访闻昨因金人驱领及取过人口有逃遁回归及有失业逃避人往往被官兵等人不为辨验复为驱领随行甚可矜悯仰限赦到十日内将人口放令逐便限满不放并行军法仍仰统制主将等常切觉察应昨因京城失守死节守御战歿文武官已降指挥令本壁统制官保明特与推恩访问官司多是非理沮难逗遛行遣致死事之家不即沾恩可令所属疾速施行如违当行人重行停降勘会近降赦恩军人丁夫等逃亡及溃散官兵并百姓因金人所至失业啸聚人已立限首身尚虑有出首未尽之人并今赦到日已前逃亡军人等并限一月许令出首余依已降指挥应诸班直诸军亲从亲事官昨因京城失守踰城逃遁虽累降指挥立限许令自新尚恐惧罪未敢出首限赦书到一月内许於所在州军自陈仍仰逐州给在路口券牒送在京所属已前罪犯一切不问依旧收管如尚敢不首复罪如初及仰所属月具已未收管人数申枢密院应未招降强寇如愿往出战自効者限赦书到一月日内经所在州县或统制等官出首具首领人数姓名职位闻奏当议推恩令随统制官前去有能立到奇功当优与擢应缘金人并盗贼残破州军县镇逃避官吏等虽已降指挥立限许还职任窃虑限满未有还归之人可限今赦到半月内许归旧任职役其被杀官仰本路提刑司勘会诣实因依保明闻奏特与推恩应京城失守溃散使臣昨已降指挥立限赴部公参违限不赴者并特勒停如有似此未曾公参之人特与免罪许再限一月参部依条注拟如限满不赴公参复罪如初应歿於王事之人累降指挥令所属保明推恩官司循习殊不体国以诏旨为虚文致死事之家终不沾恩无以激励忠义自今仰本家自陈未经保明者令所属限三日保明已经保明到者限三日推恩如违人吏重行典宪仍令御史台弹劾以闻应陕西逐路昨因夏贼侵犯去处有立功并亡失将士近缘道路不通未经保明推赏者仰帅司限五日开具实立功并亡失将士等保明闻奏当议推恩不管漏落应昨缘军兴诸色人借支过官马除实因战鬪亡失与免赔偿并见差出许乘骑外其余合回纳者限一月於所在官司送纳如出限隐藏不纳许人告坐赃科罪应缘昨来军兴遗弃器甲头刃之类并令所在官司拘收如及千件以上令逐路宪司保明闻奏当议优与推恩或民间纳及百件以上亦令宪司相度等第支赐百日外不首纳依私有法其拘收到名数并令如法编拣排垛内断烂不堪者令宪司委官措置修整仍先具拘收修整到名数封桩处所申枢密院应因军兴前後民间劝借献助钱物虽已委逐州长贰责限依格书填告命给还尚虑其间阻节如有委实献纳钱物限外未经推恩给告之人许径诣尚书省陈诉如有照据文字当议依格书填给降勘会昨缘金人入寇应宫观寺院曾造发过乾粮应副军前不无骚扰陪费可在京委鸿胪寺在外委转运司保明实费之数闻奏当议特与给降度牒勘会近降赦恩昨缘金人拘留未还等人许支行请给窃虑经历官司及仓库不即勘给如敢稽违许经开封府陈诉根究重行断遣应宗室昨因取往军前今来却有回归者其已前积下应干请给等并与一并勘支应河北河东守臣亲属差往逐州干办淹留敌寨未归其家属在京或寄寓他郡阙人照管恐致失所许经所在官司自陈支赐银绢五十疋两其干办官回日陞擢应百姓昨缘投充敢勇效用因出战陷歿其家老小无人养赡仰本路监司多方存恤无令失所应出戍军兵家属仰所在州军常切存抚无致少有失所应诸州县有因溃散人兵及盗贼烧劫屋业之家特与放免今年夏料屋税内被杀或逃避止有妇人小儿贫乏不能自存者仰所属抄割依灾伤七分法赈给施行仍多方招诱逃避人户归业应诸处民户舍宅房廊寺观如近经兵火焚烧合行修盖往别州县计置竹木之类者於所属给据经由去处与免抽税仍不许官司拘截使用如违

许人户越诉勘会昨因金人取索人口开封府差捉事使臣火下等追捉访闻内有妇女多被使臣火下百端逼胁致畏避发遣愿归使臣火下等家藏住收养之人事同强掠可限一月许令犯人及本家人力女使经官陈首与被收藏人并放令逐便限满不首复罪如初隣人并地分巡察使臣火下不觉举减犯人罪三等不知情又减三等仍仰留守司御史台密行觉察应逃亡罪人见今监锢父母妻男骨肉收捉者除系凶恶不原赦贼人外余并放令逐便应犯罪合备赏并先以官钱代充而犯人委已贫乏无可催理见监勒犯人并干系人名下均摊填纳者并特与蠲放访闻诸路州军县镇酒务公库等多将酒醋抑配与人户及过往客旅僧道等为害甚大仰监司守臣常切觉察举劾官吏重行黜责应陂湖塘泺旧许人户采取元无收立课额後因官司措置刱立课利去处仰监司契勘悉行罢免依旧许民户采取如是系豪强占据仰所属州县严行禁止仍委监司常切觉察访闻京师物价未平致鰥寡孤独不能自存之人艰食除开封府见依法居养外窃虑所委官不切用心致惠泽不下仰留守司更切檢察如法居养如钱物不足具合用数申留守司支降应州县官职田访闻多系实无田土抑令人户输纳租课实为骚扰自今仰提刑司勘会诣实常切觉察不得因前妄有骚扰应诸路汉蕃弓箭手合该承袭之人因差使出外及别缘事故有失陈乞致出违日限者候赦书到日限百日经所属自陈许令依条承袭近降赦文神霄宫罢舍屋杂物钱粮田产拘收具数申尚书省及已降指挥江寧府神霄宫元系保寧寺镇江府元系龙游寺泗州元系普照寺洪州元系上蓝寺并舒州如元系投子山寺院并先次给还其余州军内有原系古寺改建者令本州开具申尚书省刱建去处依赦施行所有正殿圣像如元系佛像改塑即行改正若是刱塑即迎赴大庆观勘会合拘收舍屋等并谓旧有者其後來因缘取降特旨并增置到者并令转运司拘收应副省计及古寺系谓李唐以前古迹如泗州普照寺舒州投子山大名府大安寺之类仰州郡疾速遵依已降指挥施行无致违戾应昨缘军兴诸官司支借过某军阙额封桩钱物及收租钱废监省费钱死马肉赃钱不堪马价钱权住拨还候边事寧息日委提刑司具数申枢密院立限拨还行在百司已降指挥不以假故日逐供职访闻东京官司多不入局窃虑士人人民户合有整会事理不无阻节及勘会累有指挥应覃恩转官及叙复磨勘拟注之类并已前积压未了文字并令东京取会上钞等其曹部官司往往推注不为施行致使士民往回道路良为劳苦自今东京官司须管不分假故赴职检详累降指挥遵守行遣不管依前留滞如违许士民赴行在陈诉当议重行责罚应朝廷寬恤事件务实惠及民如所属不切奏行但为虚文致民户陈诉当议重寘典宪应义夫节妇孝子顺孙委所在长吏常切存恤事状显着者具名闻奏应五岳四渎名山大川历代圣帝明王忠臣烈士载於祀典者委所在长吏精洁致祭於戏飞龙乘时体黄离继明之治梦熊占寝应苍震一索之祥均布湛恩用饰多喜咨尔有衆咸悉至怀赦书日行五百里敢以赦前事言者以其罪罪之主者施行先是上登宝位赦书不曾该载河北河东两路及四方州县勤王之师至是得旨该载故於河北河东路及勤王之师指挥为详是日三省枢密院同奉圣旨唐重除本阁学士差知京兆府范致虚发来赴行在李复陞职一等差知秦州赵明诚发来赴行在郑骧除直秘阁差知同州

六月十四日内降勅书一道勅河北河东诸路州县守臣将帅忠义军民等朕惟祖宗德泽在民垂二百年天下义安靡有变故而宣和靖康以来国家多难金人内侮道君太上皇帝下哀痛之诏讲揖逊之礼比德尧舜古今鲜伦孝慈渊圣皇帝以恭俭之德爱受内禅海内欣戴日俟治康而朞岁之间戎马再侵堕敌奸计但以讲和一事终至宗社阽危既尽取玉帛女子公

私财力为之耗竭乃始刼迁二圣中宫泊皇族尊幼中外嫔戚以行敌人之祸振古未有朕以介弟受命摠师臣民推戴迫以大义入继大统重以父兄之辱饮泣尝胆疾首痛心愿与天下忠臣义士共济艰难而近者使臣来自朔部审闻两路守臣义不爱生誓以死守敌虽凭犬羊之衆敢肆攻围而能率励士民屡挫敌威其忠义军民等倡义结集动以万计邀擊其後功绩茂着朕甚嘉之夫河北河东国之屏蔽也朝廷岂忍轻弃靖康之间特以金人凭陵不得已割地赂之将以保全宗社止兵息民而金人不道攻破都城易姓改号刼銮輿以北迁则河北河东之地又何割哉已命遣师以为应援应两路州县守臣及忠义之士如能竭力扞御保有一方及纠集师徒力战破贼者至建炎二年当议酬其勲庸授以节钺其余官吏军兵第加优赏应税赋货财悉许移用官吏将佐悉许辟置朝廷更行量力应副为国藩屏以昭茂功庶几中原弭寧生灵休息敌人悔祸二圣有可还之期则予一人膺受多福尔亦有无穷之闻不其韪欤故兹诏示想宜知悉是日三省枢密院同奉圣旨河北西路河东路守臣各转两官有职名者进职余具职位姓名以闻又诏自今有能收复两路已陷州郡及救解危急保全一方功效显着者除本处节度观察团练防御使依方镇法又诏两路军民自今不得撰造事端以疑虑擅杀官吏等又命使臣齎夏药徧赐两河守臣将佐又命?货务印造见钱钞遣使齎送两路州郡又命降见钱钞三百万贯付河北东路陕西路漕司广籴应付两路又命起京东路夏税绢於大名府桩管川纲河内衣绢於永兴军桩管以待两路支俵皆上意也於是两路知天子德意人情翕然蜡书日至间有破贼捷报敌人围守诸郡者往往抽退

六月【阙】日三省同奉圣旨汪伯彦除知枢密院事黄潛善兼门下侍郎户部尚书张慤到行在令日下供职六月【阙】日臣同执政官奏事进呈臣寮章疏论受伪命臣寮多已行遣有未及者皆等第施行如十友之类令留守司询访姓名以闻其言颇及吕好问好问在假上章求去有旨除资政殿学士知宣州

六月【阙】日三省枢密院同奉圣旨沿河置巡察使自河阳抵滨沧凡六处各有地分以为斥候进呈臣寮章疏论靖康末折彦质为宣抚副使逃入川陕钱盖为制置使逃至湖北许高许亢总兵防河逃至江南不惩戒则後孰肯任责者有旨彦质责授散官昌化军安置盖落职降官分司高亢编管海外州军会南康军奏高亢寓其境上欲谋变知军李定通判韩璘以便宜诛之而待罪僉谓其擅杀为非是臣奏曰渊圣委高亢守河付以兵将甚衆贼将至而先走以铁骑五百自颍昌挈家趋江南沿路刼掠甚於盗贼朝廷不能正军法而一军垒守倖敢诛之必健吏也使後日受命扞贼者知退走而郡县之吏有敢诛之者其亦少知所戒是当赏上以臣言为然乃命各转一官以赏之是时开封尹王襄罢大名尹徐处仁薨东京及北京留守阙官有旨宗泽除延康殿学士知开封府兼东京留守杜充除待制知大名府兼北京留守以刘锡知沧州又命钱盖复官依旧为陕西经制使初盖在靖康间尝建议河外湟鄯之地於朝廷无毫髮利而岁费不资为中国患不若求青唐之後而立之使抚有其旧部以为藩臣有益麻党征者故王之子素为国人信服悦封立之必得其力至是用其策故遣盖为使齎告赐益麻党征措置湟鄯事因调发五路军马以赴行在

六月【阙】日臣同执政奏事进呈劄子一曰募兵二曰买马三曰募民出财以助兵费募兵劄子大略谓国家以兵为重方熙丰之时内外禁旅合九十五万人至崇观间阙额不补者几

半西讨夏人南平方寇北事幽燕所折閱者又三之一至靖康间金人再犯阙溃散逃亡者又不知其几何今行在禁旅单弱何以扞强敌而镇四方为今之计莫若取财於东南募兵於西北方河北之人为金人骚扰未有所归之时而关陕京东西流为盗贼强壮不能还业者甚衆乘此遣使四路优给例物以招募之新其军号勒以部伍得十数万人付之将帅以时教閱训练不年岁间皆成精兵於要害州郡别置营房屯戍使之更番入卫行在此最今日之急务也买马劄子大略谓金人专以铁骑取胜而中国马政不修骑兵鲜少乃以步军当其驰突宜乎溃散盖祖宗朝养马於监牧孳生蕃盛所在云布故军旅之用足至崇观间监牧废而为给地牧马有名而无实其後燕山陷没马之入於敌人者不可胜数金人初至阙河北京畿为之一空後破都城首下令括马而京师之马入於敌者万有余匹今行在骑兵不多独陕西京东西诸路尚有私马宜降指挥立格尺以善价买之可以济一时之乏民间养马必皆上户及僧道命官之家中下户自无马可养取之既不厉民而旬月间马遂可集此今日不得已之务也募民出财劄子大略谓国家罹寇难京师帑藏悉为金人所取外路州郡以调发勤王之师财用为之一空今又募兵买马招捉盗贼措置边事应副残破州郡振举百度以图中兴非常赋之所能供办又不可横赋科取於民如免夫钱天下至今咨怨惟上二等物力有余之家可行劝诱使斥其赢余以佐国用而以官告度牒之类偿之使朝廷军马精强措置边事就绪盗贼衰息彼乃得保其财产不然虽欲保家室不可得况财产哉宜命州县委曲谕以德意必有乐输从命者此又今日不得已之务也上命以劄子付中书省条具以闻次日将上得旨於陕西河北路募兵各三万人京东西路募兵各二万人合为十万许召募白身及於诸色厢军中拣选或招收溃散兵卒中改刺创置军号骁胜壮捷忠勇义捷龙武虎威折冲果毅定难静边凡十军每号四军二千五百人例物白身人全给依上禁军法余给半许用诸路阙额禁军钱常平司钱不足即自朝廷应副内京东西委两路提刑司河北委招抚司陕西委经制司召募每募及一军就本路差有材武大小使臣充将官部队将管押赴行在听候差使又命买马分为三等格尺以定价直除命官将校见养马不许括买外余并籍记赴官拣选及格尺中披带者即时给还价直每及百匹差官或将校一员管押赴行在隐寄妄冒有马不籍及无马而抑勒令置买者并科违制之罪委逐路提刑司总之又降诏晓谕州县劝诱能出财助国籍记姓名多寡申朝廷给降度牒偿之入财多者取旨推恩应劝诱到钱物并别项桩管听候指挥专充募兵买马缘边事支用有敢科配骚扰者命官窜责吏人决配凡募兵买马劝民出财奉行有叙并保明推赏六月【阙】日臣与执政官奏事进呈劄子议控御策大略谓唐之方镇当时实赖其力以定祸难第措置失宜而其後行姑息之政威柄浸移乃有尾大不掉之患祖宗革去前弊削弱州郡之权一切委以文吏非沿边诸路虽藩府亦屯兵不多无敢越法行事以处太平无事之时可也一旦敌骑长驱盗贼蠭起州郡莫有能抗之者遂至於手足不足以扞头目为今之计莫若稍仿方镇之制择人任之假以权柄减上供钱谷使之养兵而训练之大小相维远近相援庶几可以救今日之患夫方镇者节度使之兵也其次有观察团练防御今既以为阶官不可复改宜於沿河沿淮沿江诸路置帅府要郡次要郡使带总管钤辖都监以寓方镇之法许其便宜行事辟置僚属将佐以治兵不数年间必有可观今日控御之策无大於此盖谓帅府要郡之制可行但未可如方镇割隶州郡得旨京东西路京西南北路河北东路永兴军路淮南江南两浙东西路荆湖南北路皆置帅府要郡次要郡帅府为安抚使带马步军都总管要郡带兵马钤辖次要郡带兵马都监皆以武臣为之副改路分为副总管路钤辖为副钤辖州钤辖为副都监总管钤辖司许以便宜行军马事辟置寮属依帅臣法屯兵皆有

等差遇朝廷起兵则副总管为帅副钤辖都监各以兵从听其节制正官愿行者听转运使副一员随军一员留本路提点刑狱弹压本路盗贼遇有盗贼则量敌多寡出兵会合以相应援本路帅臣当职官措置兵马先就绪者当优议旌赏

六月【阙】日三省枢密院同奉圣旨责授凤州团练副使张所借通直郎直龙图阁除河北西路招抚使令阁门引见上殿

六月【阙】日臣同执政官奏事进呈臣寮劄子乞增置弓手人数每县置武尉一员及河北路置巡社差官总领得旨从之

六月【阙】日三省枢密院同奉圣旨三省枢密院同置赏功司三省委左右司郎官枢密院委都承旨检察置籍以受功状违限不施行者必罚受贿乞取者依军法许人告军士遇敌逃溃者斩因而为盗贼者诛其家属凡军政申明约束及更改法制者数十条皆用勅榜揭於通衢

六月【阙】日三省枢密院同奉圣旨温州观察使枢密都承旨王 除河东路经制使通直郎直秘阁傅亮除河东路经制副使皆令阁门引见上殿

六月【阙】日三省枢密院同奉圣旨差御营司都统制王渊统制官张俊将带所部军马捉杀陈州叛兵杜用都巡检使刘光世捉杀黎驿作过马忠下叛兵统制官乔仲福等捉杀山东贼李昱统制官韩世忠捉杀单州鱼台军贼先是金议於上前谓盗贼势须招抚因而用之然非朝廷威令已振则虽欲招抚因而用之势不可得今去行在不二百里间有此数处盗贼窃发多者至数万少者不下七八千若不遣将帅应时讨殄何以使四方羣盗恐惧听命有旨令召王渊等到都堂戒励令各占地分须管破荡仍谕以自上即位方此遣兵正当信赏必罚能立功者优议推赏败衄误事亦必行法之意诸将喜跃自奋不旬月间四处皆告捷王渊生擒杜用破其衆二万人乔仲福斩李昱首以献破其衆三万人黎驿鱼台贼皆七八千讨捕净尽王渊刘光世以功并建节余人等第进秩於是湖北羣盗阎瑾党忠薛广祝靖等皆赴行在丁顺杨进等皆河北巨盗赴招抚司自効其余皆赴东京留守宗泽纳款东京西与淮南州县渐得休息

梁谿集卷一百七十九

卷一百八十

钦定四库全书

梁谿集卷一百八十 宋 李纲 撰建炎时政记下

【起建炎元年七月五日止八月十八日终】

七月一日臣与执政奏事进呈劄子大略谓国家所以备御敌人者皆在边郡城池器械一切备具故敌未易攻今金人盗贼乃扰吾腹心而中原郡县积习承平之久城池堙颓并无器械何以御敌官吏军民多不能守而郡县遂以陷没者非特士气怯懦盖亦以御敌之具不备使然宜命诸路州郡以渐修葺城池缮治器械朝廷量行应副有能葺治备具者旌赏以劝得旨依奏应州郡欲修城池者申朝廷给降祠部应副

七月【阙】

日三省枢密院同奉圣旨张懋除同知枢密院事兼提举措置户部财用王綯除给事中

七月【阙】 日三省枢密院同奉圣旨差周望傅雱借太常少卿奉使往金人军前通问二圣起居上命臣拟撰表本其起居道君太上皇帝表本曰臣某言神京不守坐失金汤天旆啓行越在草莽凡居臣子之列均深痛愤之情臣某诚悲诚感顿首顿首恭惟道君太上皇帝陛下游神穆清宅心昭旷法尧舜之逊禅济国家之艰难方交两宫之欢永享四海之养隣邦犯顺戈戟暗於中原帝座移居銮輿幸於朔野神人感愤华夏悲摧而臣濫总帅权莫陪?御迫羣臣再三之恳请谓大宝不可以久虚勉狗羣情嗣守神器瞻行宫而靡及慕慈训以增怀辑睦师徒冀宗社之可保抚寧方夏伫车驾之言归谨遣通直郎试太常少卿臣周望奉表起居以闻臣无任瞻天望圣激切屏营之至臣某顿首顿首谨言其起居孝慈渊圣皇帝表本曰臣某言戎马荐兴环日畿而布列帝都不守致天步之艰难万国悼心三灵失色臣某诚悲诚感顿首顿首恭惟孝慈渊圣皇帝陛下法禹汤之恭俭体尧舜之聪明十载东宫令德闻於海?踰年南面仁政浹於寰区适当嗣位之初两致隣邦之寇割地增币以生灵屈已而讲和擐甲登埤为庙社忘身而固守金汤失险羽卫启行致翠华之蒙尘瞻紫微而移座华夏失庇神人畴依而臣叨总师徒莫陪羈勒迫羣臣之恳请嗣大宝以抚临仰遵勤俭之风庶格中和之治伤心北望缅怀异域而增悲整驾南还尚冀敌人之悔祸谨遣通直郎试太常少卿臣傅雱奉表起居以闻臣无任瞻天望圣激切屏营之至臣某顿首顿首谨言

七月【阙】 日三省同奉圣旨诸路发到米纲以三分之一留行在支遣二分拨入京师桩管先是汴河口决坏汴水不通纲运不至有旨差提举京城所陈良弼同都水使者荣蕤陈求道修治决水至是水通纲运渐至故有是命且令已卸空纲自京师船载六曹案沓及器甲等至行在

七月【阙】 日臣同执政官奏事进呈劄子大略谓承平之时虽无事当备官以张朝廷之容

艰难之际虽多故当省官以责事功之实至於禄廩亦当随宜裁节以济一时之急盖世方多难赋入狭而用度广非加裁节则何以为经久之制内自朝廷外至州县监司宜省冗员以节浮费有旨省台寺监以繁简相兼学官馆职之类比旧制减半开封府曹掾依旧改为推判官提举常平司并归提刑司两浙福建市舶司并归转运司以司録依旧为签书节度判官厅公事曹掾官依旧为节度观察军事推判官支使掌书记録事司户司理司法参军县万户以上置丞不满万户不置罢吏员三分之一堂吏依祖宗法转官止朝请大夫初陈乞出官止为通判应前宰执子弟以恩数带贴职及待制以上并罢宰执及见任宫观待阙未有差遣京朝官以上俸钱并权减三分之一候事定日取旨

七月【阙】

日三省同奉圣旨王圭除河北西路招抚司参谋官黄敦彦除河北西路转运判官

七月【阙】 日臣同执政官奏事上出绢背心宣示泣谕臣等曰道君太上皇帝自燕山府密遣使臣曹勋齎来背心领中有亲书八字曰便可即真来救父母羣臣皆泣奏曰此乃陛下受命於道君太上皇帝者宜藏之宗庙以示万世有旨从之

七月【阙】 日借通直郎直龙图阁河北西路招抚使张所上殿面赐章服遣行所具画一乞以京畿兵三千为卫於大名府置司一面遣官於河北西路告谕招抚山寨首领民兵候就绪日渡河先复濬卫怀州真定府次解中山府等处围乃以兵民给地养之如陕西五路弓箭手法仍乞缗钱百万以为半年之费得旨从之七月【阙】 日京师龙德等宫津送到诸色宝器等上命碎之於殿庭间卫士有持去者听之中外莫不悦服七月【阙】 日臣与执政官同进呈御史台鞫勘宋齐愈事初齐愈为右司员外郎自围城中出诣行在自陈以病在告不与伪楚事除谏议大夫既而臣寮论其首建议请立张邦昌以合金人之意按据甚明有旨送御史台鞫治证验明白齐愈欵服至是案上三省枢密院同奉圣旨依法定断仍榜其罪於通衢

七月【阙】 日王 傅亮上殿面赐 器甲战袍束带赐亮章服遣行河东路经制司画一陈乞降指挥陕西路转运司应副财用就五路旧西兵旧弓箭手将家子弟中募兵二万人并朝廷所付兵万人通成三万就陕府置司与金人河中府解州对垒一面遣人结约河东山寨豪杰民兵收复州县候兵集日乘机会过河得旨从之

七月【阙】 日臣同执政官进呈东京留守司鞫治华国靖恭夫人李氏公事初张邦昌既僭窃居福寧殿李氏奉之时以果实为献邦昌亦厚答之遂以养女陈氏侍邦昌寢其後邦昌欲退归府第因其姊入禁中乃留亲随人易陈氏以出邦昌出禁中李氏送至内东门有语指斥乘輿上闻之命留守司同御药院於内东门推治李氏欵服且言邦昌用乘輿服御及陈氏事上宣谕曰邦昌敢居宫禁寢殿奸私宫人可以见其情状有旨李氏决脊降配禁营务下名为妻

七月【阙】 日三省枢密院同奉圣旨近降指挥诸路州郡修葺城池缮治器械招募军兵积聚粮草增添弓手团结民社措置邮传缉捕盗贼建置帅府要郡推行军政皆系急切事务访

闻州郡玩习因循殊不留意仰自今旬具施行次第申尚书省枢密院弛慢不职官吏许监司劾奏以闻常切准备朝廷遣使按察诛赏

七月十四日臣同执政官奏事乞留身奏上曰朝廷近日外则经营措置河北河东两路以为藩篱葺治军马讨平盗贼内则修政事明赏刑皆渐就绪独车驾巡幸所诣未有定所中外人心未安上宣谕曰但欲迎奉元佑太后及津遣六宫往东南朕当与卿等独留中原训练将士益聚兵马虽都城可守虽金人可战臣再拜曰陛下英断如此虽汉之高祖光武唐之太宗不是过也中外未知圣意乞降诏以告谕之上从所请

七月十五日内降手诏朕惟祖宗都汴垂二百年天下乂安重熙累洽未尝少有变故承平之久超轶汉唐比年以来图虑弗臧祸生所忽金人一岁之间再至都城信其诈谋终堕其计尽取子女玉帛遂邀二圣銮舆六宫戚属悉拥以行敌人之祸振古未有四海臣子孰不痛心肆朕纂承永念先烈眷怀旧京?然出涕思欲整驾还京谒款宗庙以慰士大夫军民之心而兵火之余民物如故朕之父母兄弟宗族靡有留者顾瞻宫室何以为怀是用权时之宜法古巡狩驻蹕近甸号召军马以防金人秋高气寒再来内地朕将亲督六师以援京城及河北河东诸路与之决战已诏奉迎元佑太后津遣六宫及卫士家属置之东南朕与羣臣将士独留中原以为尔京城及万方百姓请命於皇天庶几天意昭答中国之势浸强归宅故都迎还二圣以称朕夙夜忧勤之意应在京屯兵聚粮修治楼櫓器具并令留守司京城所户部疾速措置施行咨尔士大夫军民体朕至怀无有疑虑故兹诏示想宜知悉

七月十六日三省枢密院同奉圣旨元佑太后以避家讳改称隆佑太后以徽猷阁待制孟忠厚为迎奉隆佑太后提举一行事务步军指挥使郭仲荀统兵扈卫司封员外郎杨迈沿路州县预行计置粮草济渡舟船七月十七日臣同执政官奏事进呈劄子大略谓巡幸之策关中为上襄邓次之建康为下今纵未能行上策犹当适襄邓以系天下之心夫襄邓西隣关陕可以召兵北近京畿可以遣援南通巴蜀可取货财东達江淮可运穀粟山川险固民物淳厚此诚天设以待临幸愿为今冬驻蹕之计得旨定义巡幸南阳以观文殿学士范致虚知邓州委以修治城池缮葺宫室官府朝廷降盐钞钱帛委转运使范之才等储峙粮草命发运司拨江湖纲运由襄江通漕命四川变转运轻货陆路自陕西江路自归峡以入南阳

七月十八日三省枢密院同奉圣旨差户部侍郎黄潜厚为巡幸提举一行事务膳郎员外郎陈充干办顿递行宫一行官吏将佐军兵安治去处虞部员外郎李俦干办相视桥道渡船并桩办粮草发运使李佑为随军转运使

七月十九日三省同奉圣旨委兵部郎官并太常寺官各一员候巡幸有日限三日计置合用舟船车乘等迎奉神主赴行在及据合用人数就太庙亲事官擡舁令殿前司差拨禁军三百人防护仍专委内侍官员充同共都大主管其合行事件并仰条具申尚书省

七月【阙】日臣同执政官奏事进呈内降御札募兵改刺新军有害军政臣奏曰元降募兵指挥许改刺者祇谓溃散西北兵卒无营房可归者并非以见在营房兵卒许之改刺因以中

书省元批旨进呈得旨依元降指挥施行

七月【阙】日三省同奉圣旨近降指挥诸路买马每州可祇令买百匹东南州军不产马处并免所有劝民出财助国推赏指挥更不施行上意恐致骚扰故也七月【阙】日三省枢密院同奉圣旨李擢为系渊圣皇帝已曾责降特免散官安置责授军器少监分司南京筠州居住

七月【阙】日三省同奉圣旨钱伯言除吏部侍郎黄次山除吏部郎官尹东珣除金部郎官周格改差两浙路提刑黄敦书除两浙路转运副使刘蒙除江东路转运使

七月【阙】日臣同执政官奏事讫留身奏事论及君子小人不可不辨上宣谕曰君子小人不难知但考其素行则知之臣奏曰陛下得知人之要中兴之业不难致天下幸甚

七月【阙】日三省同奉圣旨董耘除兵部尚书晁说之除待制兼侍读

七月二十七日内降手诏朕观古之为士者何其分义之明而忠厚之至也承平之时靡好爵享丰禄相与同安乐多事之际不择地不苟免相与同患难故人之好我至於示我周行王事靡盬至於不遑啓处而鹿鸣四牡之诗作先王之泽可谓盛矣祖宗涵养士类垂二百年教以礼乐风以诗书班爵以贵之制禄以富之於士无负而士之所以图报国家者不能无愧於古人日者二圣播迁宗社几至於颠覆而仗节死难者罕有所闻其故何哉肆朕纂承慨然思任羣材相与协济修政事攘戎狄以奉迎銮輿而士大夫奉公者少营私者多徇国者希谋身者衆乞去则必以东南为请召用则必以疾病为辞沿檄以自便者相望於道途避寇而去官者日形於奏牍甚者至假托亲疾不俟告下挈家而远遯夫礼义廉耻正所以责士大夫也所守如此朕何望焉岂朕初嗣大位所以训告者未至欤将士大夫狃於故习而未能遽革欤已诏甚失节者寘之极典其次投之远方为多士万世之戒其自今以往各恭乃职一乃心助予一人克复大业底绥四方以匹休於隆古敢有弗率弗迪尚蹈前态在内委御史台在外委监司弹劾以闻邦有常刑朕亦不敢赦故兹诏示想宜知悉

八月一日臣同执政官进呈御史台鞠治陈冲余大均洪刍王及之等公事皆在围城中诱置内人为妾及因抄割金银自盗入已上宣谕曰此何等时乃敢如此得旨余大均陈冲洪刍情犯深重各特贷命除名勒停长流沙门岛永不放还张卿材责授文州别驾雷州安置李彝责授茂州别驾新州安置王及之责授随州别驾南恩州安置周懿文责授陇州别驾英州安置胡思责授沂州别驾连州安置

八月二日臣同执政官奏事讫进呈劄子大略谓生於陵者安於陵生於水者安於水南方之人习水而善没其操舟若神而北人有惧舟楫而不敢登者水战之利正南人所宜应沿河沿淮沿江帅府要郡宜令造战船募水军凡习水而能操舟者皆籍记姓名平时许其自便有故则纠集而用之逐时教閲量行激赏必得其力有旨令诸路招置水军以楼船凌波为号差御营司干办官杨观复齎空名告往江浙募人造船余路委提刑司措置总领

八月三日内降白麻杨惟忠刘光世王渊并除节度使八月【阙】日三省同奉圣旨右司谏潘良贵除工部员外郎观察使龙神卫四厢都指挥使李庠除东京副留守八月五日内降白麻除臣尚书左仆射兼门下侍郎除黄潜善尚书右仆射兼中书侍郎

八月六日得旨御营使副按阅军马

八月七日臣同执政官奏事进呈河北西路转运副使权知大名府张益谦奏状言招抚司骚扰不当置司北京及欲起北京屯戍兵给用器甲为非是缘置招抚司河北盗贼白昼杀人不若罢之专以其事委帅司臣奏曰张所画一乞置司北京候措置就绪日渡河今尚留京师以招集将佐故未行不知益谦何以知其骚扰而言不当置司至於守兵器甲不可辍那当令招抚司具合用数申陈自朝廷给降可也朝廷以金人攻围河北民无所归集为盗贼故置司招抚因其力而用之以解河北之急岂缘置司乃有盗贼今京东京西羣盗啸聚攻掠州县岂亦招抚司所致耶方时艰危朝廷欲有所经略益谦小臣乃敢非理公然沮抑必有使之者不惩之无以戒妄议而沮奸臣上乃令降旨招抚司依画一置司北京就绪日疾速渡河不得抽摘守兵具合用器甲数申朝廷应副如招抚到河北兵民严行铃束无令作过张益谦令分析以闻

八月【阙】日三省同奉圣旨许翰除尚书右丞差内侍押赴都堂治事

八月【阙】日三省同奉圣旨范讷罢检校官节度使与承宣使淄州居住以言者论其为宣抚使及留守东京不职故也

八月十二日臣同执政官奏事进呈河东路经制使司奏状元降画一圣旨指挥许令於陕府置司候措置招集军马齐集日渡河续奉圣旨令听宗泽节制於阳武渡河伏乞明降指挥以凭遵守臣奏曰河东经制司所得兵不多自阳武渡河濬卫怀三州尽系金人所守便为生界难得粮饷万一溃散即朝廷别未有一项军马可以措置河东不若令依元降画一指挥且於陕府置司招集军马事体为便黄潜善谓逗遛不进致失机会臣奏曰河东经制司受命启行才方数日犹尚在京师恐难谓之逗遛今日事势亦未见机会可乘不若尽将帅之虑乃可责以成效用其言而绩用弗成朝廷自有典宪议久不决

八月十四日内降御批傅亮兵少不可渡河可罢经制副使发赴行在

八月十五日臣以疾不任事上表劄乞罢尚书左仆射除在外宫观差遣

八月十六日蒙恩差内侍宣押赴都堂治事上第二表劄

八月十七日蒙恩差内侍宣押赴内殿奏事上第三表劄

八月十八日内降麻制除臣观文殿大学士提举杭州洞霄宫当日罢任

梁谿集卷一百八十

<集部,别集类,南宋建炎至德佑,梁谿集>

年谱

钦定四库全书

梁谿集

年谱

元丰六年癸亥公生

七年甲子

八年乙丑

元佑元年丙寅

二年丁卯

三年戊辰

四年己巳

五年庚午

六年辛未

七年壬申

八年癸酉

绍圣元年甲戌

二年乙亥

三年丙子

四年丁丑

元符元年戊寅

二年己卯

三年庚辰

徽宗皇帝建中靖国元年辛巳

公年十九正月七日丁韩国夫人忧按龟山杨公所撰墓志云夫人姓吴氏括苍人奉议郎长兴府君之女名犯渊圣庙讳公庐毗陵锡山莹次书释氏妙法莲华经七卷置椁中手植松栢数十万

崇宁元年壬午

二年癸未

三年甲申

公年二十二补国学监生第一方先卫公之入上庠也名在第一而公继之每试必上列後公之叔弟经补入国子监亦以魁选时人荣之是岁夫人张氏来归夫人鄱阳人秘阁修撰赠少师根之女

四年乙酉

公年二十三举进士预贡

五年丙戌

公年二十四八月七日长子仪之生

大观元年丁亥

公年二十五十月三十日子宗之生閏十月公以父任朝请大夫守宗正少卿遇宗祀大礼奏补假将仕郎

二年戊子

公年二十六附试国学贡士复首送属闻期亲之丧友人贻书谓道路之传盖不的勉试春官以慰亲望公不可调将仕郎真州司法参军

三年己丑

公年二十七在真州

四年庚寅

公年二十八在真州

政和元年辛卯

公年二十九在真州二月二十六日子集之生

二年壬辰

公年三十中莫俦榜乙科胪传之日上顾问再三特旨升甲改合入官与学官差遣授承务郎相州教授以亲庭远易鎮江

三年癸巳

公年三十一在鎮江按揭告迎奉诗云薄宦便甘旨两载官南徐山川富佳致足以为亲娱则知卫公自邓帅得请祠宫就养子舍盖是年也

四年甲午

公年三十二召赴阙三省审察院除行国子正十二月对便殿除尚书考功员外郎

五年乙未

公年三十三谒告迎卫公於霅川有旨除卫公提举醴泉观以便就养九月还阙道除监察御史兼权殿中侍御史尝因职事进对时卫公亦以是日见上上顾公卿父子同日造朝缙绅荣事未几以论内侍建节及宰相任用堂候官从官入朝以笏击其下凡三事罢言职授尚书比部员外郎

六年丙申

公年三十四磨勘转承事郎尝因奏对有理财以义等五劄子

七年丁酉

公年三十五充礼部贡院参详官

八年戊戌

公年三十六四月再对五月除太常少卿八月出朝陵寝未还阙除起居郎十二月兼国史编修官

宣和元年己亥

公年三十七同知贡举六月京城之西大水渺漫如江湖漕运不通畿甸之间悉罹其患无敢言其灾异者公上章论列降一官监税再上章论六事再降一官与远小监当授承务郎监南劔州沙县税按奉迎録靖康元年春公知密院奉迎道君太上皇帝於南京道君曰相公顷为史官缘何事去公奏云顷缘论都城外积水以狂妄得罪上荷陛下保全道君曰当时宰执中有不喜公者公因奏曰臣昨论水灾偶有所见自古虽亡道之国水犹不冒其城郭天地之变各以类应为今日兵革攻围之兆道君以为然渊圣皇帝即位之初召对渊圣迎谓曰卿顷论水章疏朕在东宫见之至今犹能诵忆尝赋诗有秋来一凤向南飞之句按忠愍李公若水上公书云宣和初水危京城独阁下抗章敷奏天下杂然称曰此凤鸣朝阳之举也方公得罪时故谏议陈公瓘以书贺卫公曰积海有自可以百拜为壽而远莫能也按龟山杨公所撰卫公墓志云子某自左史论事得罪方远谪公诲之曰进退出处士夫之常汝勉自爱毋以吾老为念也是年有留别诸弟等诗道江南入闽境遂游武夷乘小舟泛九曲留山中赋诗几五十篇又广其意而为之赋十二月到任

二年庚子

公年三十八六月复承事郎十月复本等差遣按梁谿集有迷楼等九赋求仁堂等八记序五赞十三箴六铭四和归去来秋风二辞灾异等九论方城侯等三传题跋七杂着如清议说答宾劳释疑及书事等皆公在沙阳时所作也又有到沙阳至崇安朱令送示武夷图诗三百余篇是年公叔弟补太学上舍生季弟纶预乡选公有诗云吾家世儒业教子惟一经还来四十载父子三成名季弟亦乡选来年试春卿之句

三年辛丑

公年三十九磨勘转宣教郎是年卫公以方腊之乱自锡山避地海陵公泛大江归膝下有与宰执等论方寇书江上愁心梅花二赋自分水岭过江南至自海陵泛江归梁谿诗百余篇闰五月卫公还锡山感疾不起实二十七日也终中大夫右文殿修撰以公贵累赠太师追封卫国公八月合葬卫公於韩国莹次

四年壬寅

公年四十

五年癸卯

公年四十一八月服闋按冬至後三日诗序云自罹艰棘絕不复作今秋既御祥琴适友人胡俊明寄示鍾山酬唱因次韵和之自此渐理笔墨有次韵上元宰等数十篇有中隱堂上梁文

六年甲辰

公年四十二除知秀州八月九日子秀之生

七年乙巳

公年四十三未赴秀州间三月除太常少卿按梁谿诗集有自乙巳春赴太常召如京师等诗六月到闕是冬金人败盟分兵两道入寇公上封事又有刺血书劄子十二月二十四日渊圣皇帝受内禪公上封事二十八日召对二十九日除通直郎兵部侍郎再对进御寇用兵劄子

孝慈渊圣皇帝靖康元年丙午

公年四十四正月三日門下侍郎吳公敏為行營副使公為參謀官四日面除中大夫尚書右丞是日宰執有奉銮輿出狩之議公乞對力爭故有是命既又俾留守東京公再求對上乃許留五日除親征行營使方治都城四壁守具自五日至八日粗畢而戎馬已抵城下攻西水門公臨城扞御自夜達旦九日攻酸棗封丘門甚急公登城督戰激勵將士自卯至申殺敵數千人斬獲敵人首級皆耳有金環敵知城守有備乃退師十日敵遣使請和且乞遣大臣赴軍前議所以和上顧宰執未有對者公因請行上曰卿方治兵不可公曰所以和者得策即中國之勢遂安不然禍患未已十一日使人回自軍前道金人之意須犒師金銀絹彩馬駝騾驢之屬各以萬計求尊其國主為伯父乞親王宰相為質及割太原中山河間三鎮之地朝議欲悉從之公力爭以謂尊稱如其所欲固無害犒師金帛雖竭天下不足以充數當量與之三鎮國家屏蔽又系塞僖祖順宗翼祖陵寢所在子孫奈何與人至於遣質則宰相當往親王不當往宰執皆不以為然公自度不能勝衆說因再拜求去上慰諭曰卿第出治兵恐金人款我公遂出至城北壁復回則誓書已行矣自是金人益肆須索无所忌憚及勤王之師既集西兵將帥日至上始赫然有用兵意二十七日公與太常李公邦彥少宰吳公敏宣撫使種公師道都統制姚公平仲宣干折公彥質同對於福寧殿以二月六日出師二月一日夜姚平仲率步騎萬人以劫金人之寨欲生擒斡里雅布雖種宣撫在城中弗知也公時以疾給假卧行營司夜半上遣中使降親筆曰姚平仲已舉事決成大功卿可將行營司兵出封丘門為之應援公辭以疾且非素約兵不豫備斯須之間中使三至且取軍令狀以聞公不得已力疾會三軍將士二日旦出封丘門勒兵於班荆館天驪監分命諸將解范瑯王師古等圍敵騎出沒鏖戰斬獲甚衆是夜宿於城外姚平仲者一夕劫寨為敵所覺即遁去宰執台諫皆謂西兵勤王之師及行營司兵皆為金人所殲無復存者三日詔不得進兵斡離不遣使請再和遂罷公右丞行營使以蔡左丞懋代焉種亦罷宣撫公得止兵詔即振旅以入城聞罷命乃退處浴室院待罪蔡左丞計會行營司兵所失裁百餘人西兵及勤王之師折傷千餘人外余并如故朝廷乃知前所聞

之非是夕上降亲笔慰劳且令吴少宰宣谕将复用之意五日太学生陈东与诸生千余人诣阙上书明公与种不当罢军民闻之不期而集者数十万人上遣中使召公公固辞不敢行宣召者络绎而至既入对即复尚书右丞都大提举京城四壁守御使十日金人退师十四日除知枢密院事封开国伯有乞议不可割三鎮劄子三月道君回銮御批吴敏李纲等令一人来公请行十七日离国门十八日次陈留县秋口遇道君太上皇后船公拜谒有奏知接见道君太上皇后劄子具言已许居宁德宫之意二十日抵南都二十一日道君引对獎谕曰都城守御宗社再安相公之力为多公因出劄子乞早回銮輿不须诣亳社西都道君询戎骑攻围次第及朝廷更改等事公条具以对道君感悟内出玉带金鱼袋古象简以赐二十三日朝辞道君袖中出书付公宣谕曰公辅助皇帝扞敌守宗社有大功若能调和父子间使无疑阻当书青史垂名万世公先具劄子以所得道君圣语奏知上批答有知卿奏对忠义焕然之语二十五日还抵阙二十七日宰执进呈车驾出郊迎奉道君仪注执政议论不同公力争之言甚激烈再对遂有乞治伏阙之事者上及宰相皆愕然公乞身待罪上笑曰伏阙士庶以亿万计如何治朕所洞知卿不须如此公再拜辞出求去章十余上皆批答封还不允且降御笔有廼者敌在近郊士庶伏阙一朝仓卒衆数十万忠愤所激不谋同辞此岂人力也哉不悦者造言何所不可故卿不自安殊不知朕深谅卿之不预知等语既又召至内殿面加慰谕且曰戎马方退正赖卿協济艰难今遽欲舍朕何之前事不足介怀宜为朕少留公勉就职四月有乞用富郑公守御策乞益修边备措置塘泺水柜等劄子又条具备边御敌八事及条具调发防秋之兵二十四日以覃恩转太中大夫得旨撰起防秋兵等三诏及赐夏国与高丽通金国三书五月十九日除河北河东路宣抚使辞免凡八上上节出裴度传以赐二十三日受命六月十四日复五具劄子乞罢又有论宣抚职事四劄子二十五日戒行前期锡燕紫宸殿特赐玉束带牙简等又赐御筵於琼林苑且幸东华门临遣累降亲笔有朕之任卿坚如金石一应行事朝廷岂能预定可一切便宜行事及有李纲所至如朕亲行之语七月初抵河阳望拜陵寢有乞深考祖宗之法劄子进次怀州日肄习车战候防秋之兵集以谋大举而朝廷降旨凡诏书所起之兵悉罢之公两上疏力争不得而宣抚副使制置副使察防使至干当公事都统制等皆承受御前处分事得专达进退自如宣抚司徒有节制之名公乃力上章丐罢会奉使王公云曹公蒙自敌中回有许以租赋代割地之意乃诏宣抚司不得轻易进兵公前後丐罢表劄十余上许令赴阙九月初交宣抚职事与折公彥质十八日除观文殿学士知扬州公具劄子乞核寔宣抚司见在军兵财物既而言者果谓公专主战议丧师废财自落职提举亳州明道宫责授保静军节度副使建昌军安置再责宁江按靖康行纪序公十月抵无锡一宿湛岷两游惠山与昆弟啸咏闻有建昌军之责即日命驾过虎丘临劒池月夜步松江长桥与亲友为别渡钱塘江经严陵瀨自三衢入江南历上饶弋阳游龟峯寺道金溪抵建昌时十二月也是岁有靖康传信録二十卷奉迎録一卷

今上皇帝建炎元年丁未

公年四十五按靖康行纪序自建昌复闻有宁江之命即泛舟由临川如豫章邂逅故人长老怀宗同游翠岩寺观洪崖井复游玉隆万壽宫观许旌阳手植桧道龙虎山望仙岩次筠阳上高游九峯寺次宜春遂由萍乡醴陵以次长沙游道林岳麓寺观唐人篇翰时仲春之初也幽怀壮志时发於文词之间则如乘闲志之类是也又按湖海诗序云余旧喜赋诗自靖康谪官

以避谤辍不复作则知两年无诗公次长沙闻有渊圣皇帝召命复元官除资政殿大学士领开封府事即率湖南义旅以进时四月八日也由岳阳登舟沿江顺流而东五月初次繁昌传元帅府檄方审都城不守二圣播迁号恸几绝次太平州謁上登宝位赦书即上书论时事次宝应闻降麻告廷除正议大夫尚书右仆射兼中书侍郎进封开国侯次金果园赐燕且令龙图阁学士兼侍读董公耘传旨云尝遣从事郎刘默齎赐御书及复观文殿学士劄子御书有方今生民之命急於倒挂谅非不世之才何以協济事功阁下学穷天人忠贯金石是以尽复公旧官职泽被斯人功垂竹帛乃公素志之语六月一日对於殿内面辞新命上曰朕知卿忠义智略甚久在靖康间宣力为多时为同列所不容故使卿以非罪去国而国家祸故如此朕尝欲言於渊圣欲使夷狄畏服四方安宁非相卿不可今朕眇然一身托於士民之上赖卿左右扶持以济艰难此志已定卿其勿辞公顿首泣谢二日再对力辞上曰卿素以忠义自许岂可於国家艰难之时而自图安闲朕决意用卿非在今日社稷生灵赖卿以安卿其勿辞公因出十议以进皆当时急务度能从乃敢受命有旨付三省施行五日进汉唐三帝纪要錄六日受告兼充御营使以覃恩转正奉大夫进封开国公公既拜命之後竭力为上规画扞御金人奉迎銮輿之策且谓河北河东国家之屏蔽虽颇为敌所陷没然其兵民戴宋之心坚甚朝廷不议救援使人力屈而附贼为患非细於是荐张所招抚河北传亮经制河东又请车驾一至京师见宗庙慰安都人之心度未可居则巡幸南阳驻蹕示不弃中原而西通关陕可进兵马东达江淮可运粮饷南通岭蜀可取货财北援三都两河与敌争利天下形势莫便於此有旨遣使经画又劝上益募兵买马缮器械修军政择将帅置帅府要郡经略天下是时剧贼李昱扰山东杜用起淮南李孝忠乱襄阳皆遣将讨平之其余降者十余万才两月间威令大振无何诏欲巡幸东南公极论其不可上乃收还所降诏翌日再具劄子援楚汉荥阳成皋间曹操袁绍官渡事论天下形势甚详又与执政争於上前然南幸之议已定而公求去之意亦决矣八月五日迁银青光禄大夫尚书左仆射兼门下侍郎公未拜适有沮张所而罢傅亮者公争之不得乃入表劄去上曰卿所争事小何必便为去就公曰宰相之职在荐人材方今人材将帅为急恐不可谓之小事章三上降麻除观文殿大学士提举杭州洞霄宫时十八日也十月抵鎮江府闻有辛道宗下叛兵自秀州作过迤邐由苏常而来即雇客舟由大江以归未尝相遇时公季弟在无锡与知县郗渐商议说诱叛兵不曾焚掠邑室公是时方到鎮江初不与知言者乃谓公遣弟迎贼倾家赀犒设坐此落职鄂州居住公在相位才七十有五日既罢之後招抚经制司皆废车驾遂东巡两河郡县皆於敌金人以次年春扰京东西深入关辅残破尤甚凡募兵买马团结训练车战水军之类一切废罢中原盗贼蠭起跨州连邑莫能制御率如公之所料云是年有建炎进退志十卷迂论六卷绍兴四年得旨令编次建炎时政记二卷建炎制诰表劄集四卷

二年戊申

公年四十六在鄂州十月以谪降官不许同在一州移澧州会有上书讼公之冤者言者复有论列十一月责授单州团练副使移万安军安置公两被迁责皆次子宗之从行时着论语详说十卷易传内篇十卷外篇十二卷

三年己酉

公年四十七六月一日长子房下长孙震生按寄长子诗序云时在雷州解易适至震卦因名之曰震孙诗有洵雷名震因观易之句十一月次琼州三日而德音放还任便居住

四年庚戌

公年四十八自岭表访家鄱阳未几挈家邵武七月复银青光禄大夫复以盗作自邵武避地长乐按湖海集序云建炎改元之秋丐罢机政其冬谪居武昌明年移澧州又明年迁海外未尝不作诗则知自元年秋有宝劒联句至四年次韵叶梦授送家园梅花絶句等六百余篇是也又有乘桴浮於海十二赋记序各五题跋十自崇阳与许崧老及吴元中诸公书

绍兴元年辛亥

公年四十九三月除提举杭州洞霄宫九月复资政殿大学士是年有汀州均庆院转轮藏记福州天宁寺松风堂记瓯粤铭编次唐朝诸将传两卷且有序跋及温泉絶句至止戈堂诗二十余篇

二年壬子

公年五十正月十六日次子房下孙泰生二月八日除观文殿学士荆湖广南路宣抚使兼知潭州湖东路兵马钤辖续有旨荆东西依旧为荆湖南北路湖南依旧潭州置帅以公兼本路安抚使马步军都总管公力具辞有辩谤等奏状闰四月七日内侍抚问二十四日开司五月六日起行公始入湖南境即措置招捕群盗弹压曹成七万余人出界降步谅二万余衆又降王进破王俊及其余群盗以次讨定凡五万余境内遂安流移归业上章丐祠未报间以诸路带宣抚者并罢止带湖南安抚使

三年癸丑

公年五十一除提举西京嵩山崇福宫即由醴陵道江南访武夷如长乐时有宣抚荆广记二十卷及自蒙恩除宣抚至水口泛舟如长乐等诗十篇

四年甲寅

公年五十二七月十三日第三子房下孙升生十月金人窥伺承楚上亲总六师往临大江公具扞御三策以献十一月六日得旨以公所陈皆今日急务付三省密院措置施行降诏奨諭有忠贯神明虑先蓍蔡料敌於千里之外制胜於三策之间之语又具禀目与时相条具扞御事宜是年有桂斋上梁文及荔支後赋等

五年乙卯

公年五十三正月诏询边防利害公条具以闻二月复观文殿大学士七月降亲笔褒谕诏有首陈三策适投却敌之机继上六条大阐经邦之略精忠许国诚节表时虽在燕闲之中不忘开济之事等语公立碑具记以志之是并以三朝所赐宸翰摹勒上石十月六日除江南西路安抚制置大使兼知洪州公自湖外归迨今年有自天宁迁居东报国寺至次韵丹霞本老见示拂子诗百余篇

六年丙辰

公年五十四正月召赴行在二月三日兼本路营田大使二十四日到国门凡三对所进呈劄子凡二十事又有缴进靖康间奉迎録劄子三月六日送史馆公既陛辞因具劄子极论所以进兵者四月一日至洪州六月乙巳地震诏求直言公应诏奏陈八事七月二十日子申之生十月敌伪入寇有论击贼及奏陈防秋利害劄子降诏褒谕

七年丁巳

公年五十五正月以公赈济饥民招还流亡降诏褒谕公以防冬无虞疆场宁谧丐祠未报间会左司谏陈公辅乞出以靖康间士庶伏阙为人诬为鼓唱至今犹未辨雪为言公再上章丐祠谓臣当时遭谤尤甚虽尝蒙渊圣皇帝降诏宣示四方而仇怨至今以之藉口诏不允训辞有且伏阙之往事皆不根之浮辞屏邪议以用卿断由朕志守夙心而自信无恤人言之语车驾将幸建康有乞益修战守之备劄子二月报道君升遐宁德上僊有乞推广孝思益修军政劄子二十七日车驾进发有论建中兴之功举直言极谏之士乞不必远召将帅等劄子四月十六日以公典藩踰年民安盗息特转金紫光禄大夫五月二十二日长子房下孙晋生八月闻郿琼叛逆有论淮西军变劄子九月以到任以来赈济饥民招填军额建置营房修筑城池缮治器甲增修官府剏置官库催发钱粮招捕盗贼等事厘为六状缴申丐祠十三日有旨以公奏陈淮西事宜切中事机降诏褒谕时张公浚既罢相而言者引汉武诛王恢事以为比公以为非是遂具劄子奏陈利害又闻车驾有幸平江之意因并言其不可明堂恩加食邑公之子有未官者乃先以恩命奏补侄琳之驻蹕之谋既审有车驾不宜轻动劄子十一月除提举临安府洞霄宫闻除李端明光为代公贻书具言措置次第公在江西有制置江右録二十卷有赠罗伟政奉议至次韵徐显谟中冬教閲诗及题跋十数篇

八年戊午

公年五十六正月还次长乐是冬王公伦使金有论使事劄子是岁置义庄於邵武

九年己未

公年五十七二月除荆湖南路安抚大使兼知潭州凡三上章力以疾辞四月十三日依旧提举临安府洞霄宫公归自豫章诗文絶少仅有数篇公之仲弟维自吏部员外郎除芸阁持宪浙东以与公别久有请於朝乞因巡历来闽省公欸曲再旬实是年冬公有送行诗盖絶笔也

十年庚申

公年五十八正月十一日中使徐珣传宣抚问十五日公薨初公叔弟校书公博学多识公所以期待者甚远入馆未几不幸早世公悼恨不已适上元具祭抚几号恸仓卒感疾即薨於楞严精舍迁特进致仕特赠少师官其亲族十人奏补一子四孙外其五夫人请於朝授公之侄鼎之从侄昌之母舅吴彦举甥周伯骏外孙黄同寅从公素志也又命公弟自浙东宪移闽部以营丧事十二月十四日葬於福州怀安县桐口大家山之原後四年癸亥以长子仪之陞朝遇郊祀恩赠太保又三年丙寅再赠太傅

梁谿集年谱

行状上

钦定四库全书

梁谿集

行状上

曾祖僧护故赠少保曾祖母廖氏成国夫人龚氏茂国夫人卢氏昭国夫人

祖赓故赠太保祖母黄氏秦国夫人饶氏魏国夫人

父夔故任中大夫充右文殿修撰赠太师追封卫国公母吴氏韩国夫人

公讳纲字伯纪其先系出有唐有以宗室为建州刺史者卒官因家焉皇朝太平兴国四年析建州置邵武军故今为邵武人曾大父大父隐德不仕行义为乡闾所宗先卫公以进士起家为时名卿妣韩国夫人处州龙泉人贤淑懿范中外所仰事具龟山杨先生所撰墓志铭公形神俱清器识絶人自幼有大志举动必於规矩法度见者知其必将名世年十有四从先卫公官延安时夏人入寇围城甚急旧法边城被围乘城者以日计功僚属子弟皆登城冀赏公独不从然时时骑遶城上示无所畏寇退朝廷以言者谓滥赏报罢衆以是媿公将冠丁韩国夫人忧庐毗陵錫山莹次凡三年哀感闾里手植松柏数十万处画规摹他人莫拟父执见之谓人曰吾畏李君既冠补国子监生第一方先卫公之入上庠也名在第一而公继之每试必上列声称籍甚举进士未第以先卫公遇郊祀恩补假将仕郎附试贡士复首送属闻期亲之丧友人贻书谓道路之传盖不的勉试春官以慰亲望公不可调将仕郎真州司法参军政和二年上舍及第胪传之日徽庙顾问再三特旨升甲改令入官授承务郎充相州州学教授以亲庭远易鎮江四年召除行国子正十二月对便殿除尚书考功员外郎五年谒告迎先卫公於霅川有旨除先卫公提举醴泉观以便就养九月还阙道除监察御史兼权殿中侍御史既入台尝因职事进对先卫公亦以是日朝见徽庙顾公曰卿父子同日造朝搢绅荣事未几以论内侍建节及宰相任用堂候官从官入朝以笏击其下凡三事忤权贵罢言职公之在台才一月耳十一月除尚书比部员外郎六年转承事郎七年差充礼部贡院参详官八年四月复召对五月除太常少卿八月出朝陵寝未还阙除起居郎十二月差兼国史编修官宣和元年同知贡举六月京师大水徽庙降诏遣使所以忧劳者甚至而在位者乃寂不闻有发愤纳忠之人公独异之怀不自己奏疏论列谓变异不虚发必有感召之因灾害未易御必有消复之策臣有已见急切利害事须面奏乞许臣因侍立次直前奏事翌日宰执班退传旨阁门令公先退更不侍立公因奏便宜六事且上章待罪有旨所论不当送吏部与监当差遣继以待罪章上有旨更降一官与远小处监当授承务郎监南劔州沙县税务先是父友故赠谏议大夫了斋陈公瓘识公之幼每谓人曰李公有子了斋既以天下之重自任知无不言欲求天下奇士以此道付之方是时人皆以公为凤鸣朝阳了斋闻之以书至先卫公曰伯纪所言天下亦有非之者乎天下莫有非之者则其言也当矣使不当其可天下岂有不非之者乎积海有自可

以百拜为寿而远莫能也公既来沙阳目所居僧舍曰寓轩职事之余閱藏教於其间时了斋以书至且为公引狄梁公李文靖王文正前言往行继之以言曰巍巍梁公畴克与对文靖文正辅世无悔谁者嗣之愿公继 乎筌筏之外羸壮不同事趣舍不同业安敢以同我者为是而忘尽忠之告欤时故右文殿修撰罗公畴方家居尝以书至了斋道与公从游之适了斋报书曰吾侪老矣寓轩之人尝发妙旨於筌筏举世倾耳以需其再鼓今乃欲韬弦袖手以适吾侪羸歇之社若许其来而不拒则是私乎适已而以天下为非我事也其为一时名德推与爱重如此其後公两在庙堂所为所守天下想闻风采盖不负了斋所期矣二年六月复承事郎十月复本等差遣三年磨勘转宣教郎公归膝下五月先卫公感疾不起公哀慕不自胜八月合葬先卫公於韩国夫人之莹了斋方谪居山阳以文致祭其末云孟仲叔季咸遵海飭论水者谁其动也力不苟不许孰曰不然谁其为之严父之贤识者谓了斋所许与父子之间不遗余力矣丧既除六年差权发遣秀州未赴间七年三月除太常少卿六月到阙是冬金人败盟边报叠至朝廷震惧不复议战守惟日谋避狄之计岁暮戎马逼近始遣李邕奉使讲和降诏罪已召天下勤王之师且命皇太子为开封牧宰执日聚都堂茫然无策先是诏求直言有旨召侍从之臣聚议各具所见以闻公上封事大略以谓当今御戎之急务要须治其本原敌乃可制杜牧所谓上策莫如自治者诚为知言所谓治其本原者其说有五一曰正己以收人心二曰听言以收士用三曰蓄财谷以足军储四曰审号令以尊国势五曰施惠泽以弭民怨又陈扞敌之十策时建牧之命既下公素与故相吴公敏厚善敏时为给事中夜过其家谓敏曰事急矣建牧之议岂非欲委以留守之任乎东宫恭俭之德闻於天下以守宗社是也而建以为牧非也巨盗猖獗如此自非传以位号使招徕天下豪杰与之共守何以克济公从官以献纳论思为职曷不非时请对为上极言之敏曰监国可乎公曰不可唐肃宗灵武之事当时不建号不足以复邦而建号之议不出於明皇後世惜之上聪明仁慈悦感公言万有一能行此金人且将悔过退师宗社底宁岂徒城都之人获安天下之人皆将受赐非发忘身徇国心孰能任此敏翌日求对具道所以且曰陛下果能用臣言则宗社宁长圣寿无疆徽庙曰何以言之敏曰神霄万寿宫所谓长生大君陛下也必有青华帝君以助之其兆已见於此徽庙感悟叹息敏因言李纲之论盖与臣同有旨召公赴都堂稟议讫随宰执至文字库祇候引对实十二月二十三日公具劄子大略以谓皇太子监国特国家闲暇之时典礼如此今大敌入寇天下震动安危存亡在呼吸间而用平时典礼可乎名分不正而当大权稟命则不威专命则不孝何以号召天下率励豪杰期成功於万分之一哉胡不假皇太子以位号使为陛下保守宗社收将士心以死扞御如臣之计天下可保在此一举仍刺臂血书之其日徽庙御玉华阁先召宰执吴敏等对至日晡时内禅之议已决公不复得对二十四日孝慈渊圣皇帝即位诏有司讨论所以崇奉道君皇帝者公在太常条具以闻二十六日上实封言事大略以谓方今夷狄凭陵中国势弱奸邪充斥君子道消法度纪纲荡然无统陛下履位适当斯时得上应天心下顺人欲外攘夷狄使中国之势尊内诛奸邪使君子之道长以副道君皇帝所以付托之意二十八日召对延和殿渊圣迎谓公曰卿顷论水草疏朕在东宫见之至今犹能诵忆尝为赋诗有秋来一凤向南飞之句公叙谢讫因奏曰今金敌先声虽若可畏然闻有内禅之事势必退缩请和厚有所邀求於朝廷臣窃料之大概有五欲称尊号一也如契丹故事当法以大事小之义不足惜欲得归朝人二也当尽以与之以示大信不足惜欲增岁币三也当告以旧约以燕山云中归中国故岁币增於大辽者两倍今既背约自取之则岁弊当减国家敦示和好不校货财姑如元数可也欲求犒师之物四也当量力以与之欲求割地五也则祖宗之地

子孙当以死守不可以尺寸与人愿陛下留神於此数者执之坚无为浮议所摇可无後艰渊圣嘉纳二十九日除兵部侍郎靖康元年五月三日充行营司参谋官盖鞬里雅布之兵遂渡河是日闻报故也夜漏二鼓道君皇帝东幸宫闈相续以行侍从百官往往潜遁四日公待对班於延和殿下闻宰执奏事议欲奉銮舆出狩襄邓间公思之以为不可适遇知东上阁门事朱孝庄於殿庭间语之曰有急切事欲与宰执廷辨公能奏取旨乎孝庄曰宰执未退而从官求对前此无例公曰此何时而用例耶孝庄许诺即具奏得旨引对公因啓奏曰闻诸道路宰执欲奉陛下出狩以避狄果有之宗社危矣且道君皇帝以宗社之故传位陛下今舍之而去可乎渊圣默然太宰白时中曰都城岂可以守公曰天下城池岂有如都城者且宗庙社稷百官万民所在舍此欲将何之若能率励将士慰安民心与之固守岂有不可守之理渊圣顾宰执曰策将安出宰执默然公进曰今日之计莫若整饬军马扬声出战固结民心相与坚守以待勤王之师渊圣曰谁可将者公曰朝廷平日以高爵厚禄崇养大臣盖将用之於有事之日今白时中李邦彦等虽书生未必知兵然藉其位号抚驭将士以抗敌锋乃其职也时中怒甚厉声曰李纲莫能将兵出战否公曰陛下不以臣为庸懦僥使治兵愿以死报渊圣顾宰执曰执政有何阙赵野对曰尚书右丞阙渊圣曰李纲除右丞面赐袍带并笏公致谢且叙方时艰难不敢辞之意宰执犹以去计劝渊圣有旨命公为东京留守公为渊圣力陈所以不可去者且言唐明皇闻潼关失守即时幸蜀宗社朝廷碎於贼手累年然後仅能复之范祖禹谓其失在於不能坚守以待勤王之师今陛下初即大位中外欣戴四方之兵不日云集敌骑必不能久留舍此而去如龙脱於渊车驾朝发而都城夕乱虽臣等留守何补於事渊圣意颇回而内侍王孝竭从旁奏曰中宫国公已行陛下岂可留此渊圣色变降榻曰卿等毋留朕朕将亲往陕西起兵以复都城决不可留此公泣拜俯伏渊圣前以死邀之会燕越二王至亦以固守为然渊圣意稍定即取纸御书可回二字用宝俾中使追还中宫国公因顾公曰卿留朕治兵御寇专以委卿不得稍有疎虞公惶恐再拜受命是夕宿於尚书省而宰执宿於内东门司中夜渊圣遣中使令宰执供军令状诘旦决行五日公自尚书省趋朝道路纷纷复传有南狩之事太庙神主已出寓太常寺矣至祥曦殿则禁卫皆擐甲乘舆服御皆已陈列六宫襍被皆将升车矣公遑遽无策因厉声谓禁卫曰尔等愿以死守宗社乎愿扈从以巡幸乎禁卫皆呼曰愿以死守宗社不居此将安之公因拉殿帅王宗濬等入见曰陛下昨夕已许臣留今复戒行何也且六军父母妻子皆在都城岂肯舍去万有一中道散归陛下孰与为卫且戎骑已逼彼知乘舆之去未远健马疾追何以御之渊圣感悟始命辍行公谓宰执曰敢有异议者斩因出祥曦殿传旨宣示禁卫皆拜伏呼万岁其声震地复入劝渊圣御楼以见将士渊圣可之驾登宣德门宰执百官将士班楼前起居复降步辇劳问将士公与吴敏撰数十语叙金人犯顺欲危宗社决策固守各令勉励之意俾阁门官宣读每读一句将士声喏须臾六军皆感泣流涕於是固守之议始决是日以公为亲征行营使一切许以便宜从事自车驾御楼之後方治都城四壁守具以百步法分兵备御每壁用正兵万二千余人而保甲居民厢军之属不预焉凡防守之具无不毕备又团结马步军四万人为前後左右中军军八千人日肄习之以前军居东水门外护延丰仓仓有粟豆四十万石其後勤王之师集城外者赖以济以後军居宋门外占樊家冈使贼骑不敢近而左右中军居城中以备缓急自五日至八日治战守之具粗毕而戎马已抵城下是夕攻西水门公临城扞御斩获百余人自初夜防守达旦始保无虞翌日敌攻酸枣封丘门公虑城上兵卒不足用乞禁卫班直善射者千人以从传旨如所乞敌渡壕以云梯攻城公命班直乘城射之皆应弦而倒公登城督战激励将士人皆贾勇近者以手炮礮

木击之远者以神臂弓强弩射之又远者以牀子弩座炮及之而金人有乘楫渡壕而溺者有登梯而坠者有中矢石而踣者甚衆又募壮士数百人缒城而下烧云梯数十座斩获敌首十余级皆耳有金环渊圣遣中使劳问降御笔褒谕有公忠略之志朕记於心及公悉心扞御朕皆知之之语特给内库酒银绢等以颁将士人皆欢呼自卯至申末间杀敌数千人敌知城守有备不可以攻乃退师因遣使随李邺请和抵城下已昏坚欲入城公传令辄开门者斩竟俟明乃入实初十日也渊圣御崇政殿引使入对出斡里雅布书进呈道所以举师犯中国之意闻上内禅愿复讲和乞遣大臣赴军前议所以和者公因请行渊圣不许曰卿方治兵不可命李昺奉使郑望之高世则副之宰执退公留身问所以不遣之旨渊圣曰卿性刚不可以往公对曰今敌气方鋭吾大兵未集固不可以不和然所以和者得策则中国之势遂安不然祸患未已宗社安危在此一举臣恐李昺等柔懦而悞国事也因为渊圣反覆具道所以不可割地及过许金币之说渊圣颇以为然李昺是日至军中果辱命北面再拜膝行而前金人出事目一纸付昺等達朝廷昺唯唯不能措一辞金人笑之曰此乃一妇人女子尔自是有轻朝廷心十一日昺至自军前宰执同对於崇政殿进呈金人所须事目须金五百万两银五千万两绢彩一百万匹马駝驴骡之属各以万计尊其国主为伯父凡燕云之人在汉者悉归之割太原中山河间三鎮之地又以亲王宰相为质乃退师具道其语宰执震恐欲如其数悉许之公引前议力争以谓尊称及归朝官如其所欲固无害犒师金币所索太多当量与之太原河间中山国家屏蔽号为三鎮其实十余郡地塘泺险阻皆在焉割之何以立国又保塞翼顺僖三祖陵寢所在子孙奈何与人至於遣质即宰相当往亲王不当往为今日计莫若择使与之往返熟议道所以可不可者金帛之数令有司会计所有续具报宿留数日大兵四集彼以孤军入重地势不能久留虽所得不满意必求速归然後与之盟以重兵卫出之彼且不敢轻中国其和可久也宰执皆不以为然方谓都城破在朝夕肝脑且涂地尚何有三鎮而金币之数又不足较也渊圣为群议所惑凡争踰两时无一人助公言者公自度力不能胜衆说因再拜求去渊圣慰谕曰不须如此卿第出治兵益固城守恐金人款我此徐议可也公被旨不得不出复前进曰金人所须宰执欲一切许之不过欲脱一时之祸不知他日付之何人能为陛下了此愿更审处後悔恐无所及因出至城北壁复回尚冀可以力争而誓书已行矣所求悉皆与之今上皇帝方在康邸俾同少宰张邦昌为质於金人军中公无如之何则为之留三鎮诏书戒中书吏以辄发者斩庶几俟四方勤王之师集以为後图而宰执裒聚金银自乘輿服御宗庙供具六宫官府器皿皆竭取复索之於臣庶之家金仅及三十万两银仅及八百万两宰执以金银之数少惶恐再拜谢罪公独不谢於是王孝迪建议欲尽括在京官吏军民金银揭长榜於通衢立限输官限满不输者斩之许奴婢亲属及诸色人告都城大扰限既满得金二十余万两银四百余万两而民间藏蓄为之一空公奏渊圣曰收簇金银限满民力已竭复许告讐恐生内变外有大敌而民心又变不可不虑渊圣曰卿可往收榜归行营司移牒王孝迪照会人情乃安自十五日四方勤王之师渐有至者自数万人公为於四壁置统制官招集之至十七八日统制官马忠以京西募兵至遇金人於郑州南门外乘势击之杀获甚衆金人始惧游骑不敢旁出而自京城以南民始获奠居矣二十日种师道姚平仲以泾原秦凤兵至公奏渊圣曰勤王之师集者渐衆兵家忌分节制归一乃克有济愿令师道平仲等听臣节制而宰执间有密建白以为不可者於是别置宣抚司以师道签书枢密院事充河北河东京畿宣抚使以平仲为宣抚司都统制应西兵及四方勤王之师并隶宣抚司又拨前後军之在城外者属之而行营司所统者独左右中军而已渊圣屡申勅两司不得侵紊节制既分不相统一宣抚

司所欲行者托机密往往不复关报公私忧之自议和誓书既行之後金人益肆须索无所忌憚及勤王之师既集西兵将帅日至渊圣意方壮又闻金人抄掠城北屠戮如故而城外坟墓殍发掘殆尽始赫然有用兵之意公赞渊圣曰易以谦之上六称利用行师征邑国师之上六称开国承家小人勿用盖谦之极非利用行师不足以济功师之成非戒用小人不足以保治今陛下之於金人屈已讲好其谦极矣而金人贪婪无厌凶悖已甚其势非用师不可然功成之後愿陛下以用小人戒使金人有所惩创不敢有窥中国之心当数十年无夷狄之祸不然一日纵敌数世之患忧未艾也二十七日公与李邦彦吴敏种师道姚平仲折彦质同对於福宁殿议所以用兵者公奏渊圣曰金人之兵得其实数不过六万人又大半皆奚契丹渤海种类其精兵不过三万人吾勤王之师集城下者二十余万固已数倍之彼以孤军入重地正犹虎豹自投於檻穽中当以计取之不可以角一旦之力为今之策莫若扼河津絶粮道禁抄掠分兵以复畿北诸邑俟彼游骑出则击之以重兵临贼营坚壁勿战如周亚夫所以困七国者俟其刍粮乏人马疲然後以将帅檄取誓书复三鎮纵其归半渡而後击之此必胜之计也渊圣意深以为然衆议亦允期即分遣兵以二月六日举事约已定而姚平仲者古之子屡立战功在道君朝为童贯所抑未尝朝见至是渊圣以其骁勇屡召对内殿赐予甚厚平仲武人志得气满勇而寡谋谓大功可自有之先期於二月一日夜亲率步骑万人以劫金人之寨欲生擒所谓斡里雅布者取今上皇帝以归虽种师道宿城中弗知也公时以疾给假卧行营司夜半渊圣遣中使降亲笔曰平仲已举事决成大功卿可将行营司兵出封丘门为之应援公具劄子辞以疾且非素约兵不预备斯须之间中使三至责以军令不得已力疾分命诸将解范琼王师古等围斩获甚衆复犯中军公亲率将士以神臂弓射却之是夜宿於城外而平仲者一夕劫寨为敌所觉杀伤相当所折者不过千余人既不得所欲即恐惧遁去宰执台諫閤然谓西兵勤王之师及亲征行营司兵皆为金人所殲无复存者渊圣震恐有诏不得进兵而斡里雅布遣使以谓用兵特将帅所为不出上意请再和宰相李邦彦於渊圣前语使人曰用兵乃大臣李纲与姚平仲结约非朝廷意金议欲缚公以予之使人反以为不可遂罢公尚书右丞亲征行营使以蔡懋代总兵蔡懋计会行营司兵所失才百余人西兵及勤王之师折伤千余人外余并无故乃知朝廷前所闻之非是夕渊圣赐亲笔慰劳且令吴敏宣谕将复用之意公感泣谢恩方欲丐归田庐而太学生陈东与诸生千余人诣阙上书明公及师道之无罪不当罢军民闻之不期而集者数十万人填塞驰道街巷呼声震地舁登闻鼓於东华门击破之军民必欲见公及师道乃去於是渊圣遣中使召公及师道入对公闻命惶惧固辞不敢行而宣召络绎不得已入见渊圣於福宁殿阁子中公泣拜请死渊圣亦泣有旨复公尚书右丞充京城四壁守御使公固辞渊圣不允俾出东华门至右掖门一带安抚军民公禀圣旨宣谕乃稍散去再对於福宁殿渊圣命公复节制勤王之师先放遣民兵盖不复有用兵意也所留三鎮诏书公既罢乃遣宇文虚中齎诣金人军中是夕公宿於咸丰门以金人进兵门外治攻具故也先是蔡懋号令将士金人近城不得辄施放有引炮及发牀子弩者皆杖之将士愤怒公既登城令施放自便能中贼者厚赏之夜发霹雳炮以击贼军皆惊呼翌日薄城射却之乃退金人自平仲劫寨及封丘门接战之後颇有惧意既得三鎮之诏及肃王为质即不俟金币数足遣使告辞初十日遂退师十三日宰执对延和殿公奏渊圣曰澶渊之役虽与大辽盟约而退犹更遣重兵护送之盖恐其无所忌憚肆行抄掠故也金人退师今三日矣盍遣大兵用澶渊故事护送之宰执皆以为太早公固请之渊圣以公言为然可其请是日分遣将士以兵十余万数道并进且戒诸将度便利可击则击之金人厚载而归輜重既衆所掠妇女不可胜

计气骄甚击之决有可胜之理将士踊跃以行十四日除知枢密院事封开国伯食邑八百户食实封一百户十七日泽州奏尼堪既破忻代围太原陷威胜军入南北关陷隆德府遂次高平朝廷震惧恐其复渡河而南宰执咎公尽遣城下兵以追斡里雅布之师将无以支吾公曰斡里雅布之师既退自当遣兵护送尼堪之师虽来闻既和亦当自退决无他虞而执政中有密啓渊圣者悉追还诸将之兵诸将之兵及斡里雅布之师於邢赵间相去二十里金人闻大兵且至莫测多寡惧甚其行甚速而诸将得追诏即还公闻之於渊圣前力争得旨复遣而诸将之还已五程矣虽复再进犹与金人相及於滹沱河然将士知朝廷议论二三悉解体不复有邀击之意第遥护之而已於是金人复旁出抄掠及深祁恩冀间其去殊缓而尼堪之兵闻已和果退如公言乃命种师道为河东河北宣抚使驻滑州而以姚古为制置使总兵以援太原种师中为制置使总兵以援中山河间诸郡先是公乞力守三鎮不可割之议朝廷金议以租赋归之求保祖宗之地故也三月诏以道君回銮命门下侍郎赵野为奉迎使初恭谢行宫所以都城围闭止絶东南递角又止东南勤王之师又令纲运於所在卸纳泗州官吏以闻朝廷不以为然道路籍籍且言有他故道君还次南都欲诣亳州上清宫烧香及取便道如西都渊圣忧之每有御书至必及朝廷改革政事又批道君太上皇后当居禁中出入正门又批吴敏李纲令一人来莫晓圣意公奏渊圣曰所以欲臣及吴敏来无他欲知朝廷事耳吴敏不可去陛下左右臣愿前奉迎如蒙道君赐对臣且条陈自围城以来事宜以释两宫之疑决无他虑渊圣初不许公力请之乃听即令齎御书达道君行宫既次陈留县秋口遇道君太上皇后船公幄前奏事太上皇后曰朝廷欲令於何处居止公对曰朝廷见以撝景园为龙德宫奉道君太上皇后盖遵稟道君十二月二十三日圣旨指挥道君太上皇后曰已得旨令居禁中公对曰天下大义惟礼与情情欲其通而礼所以节文之以皇帝圣孝殿下圣慈母子之情岂复有间但稽之三从之义道君居龙德宫而殿下居禁中於典礼有所未安朝廷讨论但欲合於典礼以慰天下之望两宫安则天下安矣道君太上皇后曰朝廷须是措置令是则得公拜辞登岸复传教旨曰相公所论甚有理公以前语具劄子奏知且云道君太上皇后已有许居龙德宫意愿一切不示疑阻以昭圣孝抵南都道君御幄殿公升殿奏事具道帝圣孝思慕欲以天下养之意道君泣数行下曰皇帝仁孝天下所知且獎谕曰都城守御宗社再安相公之力为多公因出劄子乞道君早回銮輿不须诣亳社西都以慰天下之望道君慰劳再四因曰相公顷为史官缘何事去公对曰臣昨任左史得侍清光者几一年以狂妄论列都城水灾伏蒙圣恩宽斧钺之诛迄今感戴道君曰当时宰执中有不喜公者公愧谢因奏曰臣昨论水灾实偶有所见天地之变各以类应正为今日兵革攻围之兆灾异变故譬犹一人之身病在五臟则发於气色形於脉息善医者能知之所以圣人观变於天地而修其在我者故能制治保邦而无危乱之忧也道君以为然因询戎骑攻围都城守御次第公具以实对道君复曰敌既退师方渡河时何不邀击公曰朝廷以肃邸在金人军中故不许道君曰为宗社计岂复论此公於是窃叹道君天度之不可及也语既浹洽道君因宣谕行宫止递角等三事只缘都城已受围恐为金人所得知行宫所在非有他也公奏曰方艰危时两宫隔絶彼此不相知虽朝廷应副行宫事亦不容无不至者在圣度照之而已道君因询朝廷近事如追赠司马光及毁拆夹城等凡二十余事公逐一解释复奏曰皇帝小心仁孝惟恐一有不当道君太上皇帝意者每得御批诘问辄忧惧不进膳臣窃譬之人家尊长出而以家事付之子弟偶遇强盗刼掠须当随宜措置为尊长者正当以能保田园大计慰劳之不当问其细故今皇帝传位之初陛下巡幸适当大敌入寇为宗社计政事不得不小有变革今宗社无虞四方以宁陛下回銮臣以谓

宜有以大慰安皇帝之心者其他细故一切勿问可也道君感悟曰公言极是朕只缘性快问後即便无事因内出玉带金鱼袋古象简赐公曰行宫人得公来皆喜以此慰其意便可佩服公固辞不允因服之以谢宣谕曰本欲往亳州太清宫以道路阻水不果又欲居西洛以皇帝恳请之勤已降旨挥更不戒行公先归达此意慰安皇帝因袖中出书付公仍宣谕曰公辅助皇帝扞敌守宗社有大功若能调和父子间使无疑阻当书青史垂名万世公感泣再拜受命辞讫即行先具劄子以所得道君圣语奏知渊圣批答曰览卿来奏知奏对之语忠义焕然朕甚嘉之二十五日还抵阙下进呈道君御书具道所以问答之语渊圣嘉劳久之二十七日宰执进呈车驾出郊迎奉道君仪注耿南仲建议欲尽屏道君左右内侍出榜行宫门敢留者斩先遣人搜索然後车驾进见公以为不必如此示之以疑南仲曰或之者疑之也古人於疑有所不免公曰古人虽不免於疑然贵於有所决断故书有稽疑易曰以断天下之疑悦疑情不解如所谓窃鈇者则为患不细南仲纷纷不已公奏曰天下之理诚与疑明与闇而已诚则明明则愈诚自诚与明推之可至於尧舜疑则闇闇则愈疑自疑与闇推之其患至於有不可胜言耿南仲当以尧舜之道辅陛下而其人闇而多疑所言不足深采上笑之南仲怫然怒甚既退再召对於睿思殿南仲忽起奏曰臣适遇左司谏陈公辅於对班中公辅乃二月五日为李纲结士民伏阙者岂可处谏职乞送御史台根治上及宰相皆愕然公奏曰臣适与南仲辩论於延和殿实为国事非有私意而南仲衔臣之言故有此奏伏阙之事陛下素所鉴察臣不敢复有所辨今南仲之言如此臣岂敢留愿以公辅事送有司臣得乞身待罪上笑曰伏阙士庶以亿万计如何结约朕所洞知卿不须如此南仲犹不已公因再拜辞上而出不复归府入劄子求去章凡十余上皆批答封还不允道君皇帝以三日入国门公扈从朝於龙德宫讫复上章恳请求罢知枢密院事并缴进劄子以谓今日朝廷方祸乱救宁之初正当以别白是非为先庙堂之上是非不明何况天下若以南仲之言为是朝廷自当付之有司根治党与诚果有之臣首当在诛夷之列若以南仲之言为非则当明告中外洞然晓知使臣不受萋斐之谤臣之於此岂得不辨必若朝廷重惜大体欲两全之莫若与臣一宫祠使归田里上降手诏数百言不允有曰乃者敌在近郊士庶伏阙一朝仓猝衆数十万忠愤所激不谋同辞此岂人力也哉不悦者造言何所不可故卿不自安殊不知朕深谅卿之不预知也复令徐处仁吴敏谕旨又召至内殿面加慰谕且曰戎马方退正赖卿協济艰难前事不足介怀宜为朕少留辞意恳惻公不得已就职戎骑出境公具奏乞用富弼守御二策分兵控扼要害之地又乞修边备防秋仍用李邕措置塘泺水柜等事批答依奏又具劄子乞措置三鎮及诏在廷之臣集议择其所长而施行之於是条具所以备边御敌者凡八事其一谓以太原真定中山河间建为藩鎮又分滨棣德博建横海一道如诸鎮之制其二谓河北河东保甲宜专遣使团结训练令各置器甲官为收掌用印给之蠲免租赋以偿其直其三谓复祖宗监牧之制其四谓河北塘泺不复开濬又自安肃广信以抵西山益增广宜专遣使以督治之其五谓河北河东州县城池皆当筑城民有所恃而安其六谓河北河东州县经戎马残破蹂践去处宜优免租赋以振恤之其七谓宜复祖宗加擡粮草钞法一切以见缙走商贾而实塞下其八愿复祖宗解盐旧制渊圣俾宰执同议而其间所论异同公力争之不能得大抵自戎马既退道君还宫之後朝廷恬然遂以为无事防边御寇之策置而不问公切忧之惟兵事枢密院可以专行乃与同知枢密院事许翰议渊圣前以谓今秋敌必再至宜预诏天下起兵防秋为扞御之计条具将上得旨颁行然後关三省其间犹有以为不须如此者公又乞降旨在京许监察御史以上在外监司郡守帅臣各荐材武智略大小使臣枢密院籍记姓名量材録用渊圣从之二十四日以覃恩

转太中大夫吴敏建议欲置详议司检详祖宗法制及近年弊政当改革者次第施行之诏以公为提举官命既行为南仲沮止公奏渊圣曰陛下即大位於国家艰危之时宜一新政事朝廷玩愒未闻有所变革近欲置司讨论寻复罢之今边事方棘调度不给前日爵禄冒滥耗蠹邦财者宜稍裁抑以足国用渊圣以为然委公条具以闻公条上三十余事谓如节度使至遥郡刺史祖宗本以待勳臣今皆以戚里恩泽得之除边功外宜悉换授环卫官以抑其滥又三省堂吏祖宗时转官止於正郎崇观间始许转至中奉大夫今宜复祖宗之制余皆类此渊圣深然之降付三省已而揭榜通衢曰知枢密院事李纲陈请裁减下项又榜东华门曰守御使司给诸军卸甲钱多寡不均御前特再行等第支給而守御使司初未尝给卸甲钱也公闻之惊骇徐询所以乃执政间有密白渊圣以公得都城军民之心欲以此离散之公始忧惧不知死所矣方欲丐罢五月初会守御使司补进武副尉二人具状奏知渊圣批出有惟辟作福惟辟作威大臣专权浸不可长之语公惶惧於渊圣前辨明曰始亲征行营及守御使司得旨一切以便宜行事给空名文武告勅宣帖等三千余道自置司以来用过三十一道而已此二人乃齎御前蜡书至太原当时约以得回报即与补授故今以空名帖补乞奏闻乃遵上旨非专权也且叙孤危之踪为人所中伤者非一愿罢职任乞骸骨以归田里渊圣温颜慰谕以谓偶批及此非有他意公待罪丐去章十余上皆批答不允遣使宣押归府公翌日见渊圣曰人主之用人疑则当勿任任则当勿疑而大臣以道事君不可则止今陛下惑於人言於臣不能无疑又不令臣得去不知圣意何在渊圣安慰久之公自此多在告日欲去而未能会种师中歿於军前师道以病告归执政有密建议以公为宣抚使代师道者初尼堪之师至太原城下太原坚壁固守尼堪屯兵围之悉破诸县为鏖城法以困太原姚古进师复隆德府威胜军厄南北关累出兵互有胜负然未能解太原之围於是诏种师中由井陘道与姚古犄角应援太原师中进次平定军乘胜复寿阳榆次诸县不设备有轻金人之意又輜重犒赏之物悉留真定金人乘间冲突诸军以神臂弓射却之欲赏射者吏告不足而罢士皆愤怒相与散去师中为流矢所中死之师道驻滑州复以老病丐罢渊圣纳议者之说决意用公宣抚两路督将士解围一日召对谕所以欲遣行者公再拜力辞自陈书生不知兵在围城中不得已为陛下料理兵事实非所长今使为大帅恐不胜任且误国死不足以塞责渊圣不许即命尚书省出勅令面受公奏曰藉使臣不量力为陛下行亦须择日受勅今拜大将如召小儿可乎渊圣乃许别日受公退即移疾乞致任力陈不可为大帅且云此必有建议不容臣於朝者章十余上并批答不允且督令受命於是台諫相继上言公不当去朝廷渊圣皆以为大臣游说斥去之乃无敢言者或谓公曰公知上所以遣行之意乎此非为边事乃欲缘此以去公则都人无辞耳公坚卧不起谗者益得以行其说上且怒将有杜邮之赐奈何公感其言起受命渊圣録裴度传以赐公入劄子具道吴元济以区区环蔡之地抗唐室与金人强弱固不相侔而臣曾不足以望裴度万分之一且言寇攘外患有可扫除之理而小人在朝蠹害本根浸长难去其患有不可胜言者谓宜留神照察在於攘逐戎狄之先朝廷既正君子道长则所以扞御外患者有不难也今取裴度论元稹魏洪简章疏节其要语辄尘天听渊圣优诏宠答宣抚司得兵二万人分为五军时胜捷兵叛於河北遣左军往招抚之又遣右军属宣抚副使刘韜又以解潜为制置副使代姚古以折彦质为河东干当公事与潜治兵於隆德府宣抚司见兵实有万二千人所得银绢才二十万期以六月二十二日啓行而庶事未办集乞量展行期渊圣批曰迁延不行岂非拒命公惶惧入劄子辨所以未可行者且曰陛下前以臣为专权今以臣为拒命方遣大帅解重围而以专权拒命之人为之无乃不可乎愿并罢枢筦之任乞骸骨渊圣趣召数四

公入见具道所以为人中伤致上听不能无惑者祇以二月五日士庶伏阙事今奉命出使无缘复望清光渊圣惊曰卿只为朕巡边便可还阙公曰臣之行无有复还之理昔范仲淹自参知政事出安抚西边过郑州见吕夷简语颺出之意夷简曰参政岂复可还其後果然今臣以愚直不容於朝使臣既行之後无沮难无谤讒无钱粮不足之患则进而死敌臣之愿也万有一朝廷执议不坚臣自度不能有所为即须告陛下求代罢去陛下亦宜察臣孤忠以全君臣之义上颇感动乃以二十五日戒行前期锡燕於紫宸殿又赐御筵於琼林苑所以赐劳甚渥公犒军讫号令将士斩裨将焦安节以徇初安节隶姚古帐下在威胜军虚传戎马且至安节鼓扇衆情劝姚古退师至隆德又劝遁去於是两郡之人皆惊扰溃散而初无戎马至是从姚古还阙公召斩之人皆以为当翌日进师以七月初抵河阳入割子以畿邑汜水开西都河阳皆形胜之地城壁颓圯当亟修治今虽晚然并力为之尚可及也又因望拜诸陵具奏曰臣总师道出巩洛望拜陵寝潸然流涕恭惟祖宗创业守成垂二百年圣圣传授以至陛下适丁艰难之秋戎狄内侵中国势弱此诚陛下尝胆思报励精求治之日愿深考祖宗之法一一推行之进君子退小人无以利口善谗言为足信无以小有才未闻君子之大道为足使益固邦本以图中兴上以慰安九庙之灵下以为亿兆苍生之所依赖天下幸甚初公陛辞日为上道唐恪聂山之为人陛下信任之笃且误国故於此申言之上批答有铭记於怀之语留河阳十余日训练士卒修整器甲之属进次怀州自出师後禁士卒不得扰民有赶夺妇人钗子者立斩以徇拾遣弃物决脊黥配逃亡捕获皆斩以故军律严肃无敢犯者公尝谓步不胜骑骑不胜车於是造车千余两日肄习之俟防秋之兵集以谋大举而朝廷降旨凡诏书所起之兵悉罢减之公上疏力争大略以谓今河北戎马出没并边诸郡寨栅相连兵不少休太原之围未解而河东之势甚危秋高马肥决须深入宗社安危殆未可知故臣辄不自揆措画降诏团结防秋之兵不过十万人使一一皆到果能足用而无戎马渡河之警乎臣被旨出使去清光之日未几朝廷已尽改前日诏书所团结之兵罢去太半若谓太原之围戎马不多不攻自解则自春徂秋攻守半年曾不能得其实数姚种二帅以十万之师一日皆溃彼未尝有所伤衄不知何以必其兵之不多今河北河东州郡日告危急乞兵皆以三五万为言而半年以来未有一人一骑可以副其求者防秋之兵甫集又皆遣罢若必谓不须动天下之兵而自可无事则臣诚不足以任此责陛下胡不遣建议之人代臣坐致康平而为此扰扰也未报间再具奏曰近降指挥减罢防秋之兵臣所以深惜此事者一则河北防秋阙人恐有疎虞二则一岁之间再令起兵又再止之恐无以示四方大信夫以军法勒诸路起兵而以寸纸罢之臣恐後时有所号召无复应者矣竟不报渊圣日以御批促解太原之围而宣抚副使制置副使察访使干当公事都统制皆承受御前处分事得专达进退自如宣抚司虽有节制之名特文具耳公奏渊圣以节制不专恐误国事虽降指挥约束而承受专达自若也公极为渊圣论节制不专之弊又分路进兵贼以全力制吾孤军不若合大兵由一路进会范世雄以湖南兵至即荐为宣抚判官方欲会合亲率师以讨敌而朝廷之议变矣初戎骑既出境即遣王云曹曦使金人军中议以三鎮兵民不肯割地愿以租赋代割地之约至是遣回有许意其实以欺我师非诚言也朝廷信之耿南仲唐恪尤主其议意谓非归租赋则割地以赂之和议可以决成乃诏宣抚司不得轻易进兵而和议之使纷然於路矣既而徐处仁吴敏罢相而相唐恪许翰罢同知枢密院事而进用聂山陈过庭李回等吴敏复以内禅事责授散官安置涪州公窃叹曰事亡可为者矣因入表劄奏状乞罢初唐恪谋出公於外则处仁敏翰可以计去之数人者去则公亦不能留也至是皆如其策章数上犹降诏批答不允公具奏道所以材能不胜任者且得昏愤之

疾不罢决误国并叙曩日榻前之语於是渊圣命种师道以同知枢密院事巡边交割宣抚司职事召公赴阙且俾沿河巡视防守之具公连上章乞罢知枢密院事守本官致仕九月初交割宣抚司职事与折彦质公行至封丘县十八日除观文殿学士知扬州具奏辞免不敢当且上疏言所以力丐罢者非爱身怯敌之故特事有不可为者难以虚受其责始宣抚司得兵若干并防秋兵若干今屯驻某处皆不曾用始朝廷应副银绢钱若干又御前降到若干除支官兵食钱并犒赏外今皆桩留怀州及在京降赐库具有籍可考按也臣既罢去恐不知者谓臣丧师费财惟陛下遣使核实虽臣自以不材丐罢愿益择将帅抚驭士卒与之扞敌金人狡狴谋虑不浅和议未可专恃一失士卒心无与御侮则天下之势去矣臣自此不复与国论敢冒死以闻既而言者果谓公专主战议丧师费财於是自落职提举亳州明道宫责授保静军节度副使建昌军安置又以公上疏辩论谓退有後言再谪宁江

梁谿集行状上

行状中

钦定四库全书

梁谿集

行状中

建炎元年春行次长沙被闰十一月三日指挥复元官除资政殿大学士领开封府事时金人再犯阙前日以和议为然者举皆误国渊圣感悟故复召公然都城围闭道路阻絶久之方闻命即率湖南勤王之师入援王室传元帥府檄方审都城不守二圣播迁号恸几絕次太平州覩上登宝位赦书悲喜交集是时金陵为叛卒周德所据囚帥臣杀吏民焚舟船劫官府公即遣使臣齎文檄諭之令听稟节制勤王乃肯释甲然桀骜不以时登舟擅驱不当行士卒欲乘间遁去既次金陵因与权安抚使李弥逊谋诛其首恶四十六人而以其徒千余人令提举常平公王枋统之以行因奏表诣行在贺登极且辞领开封之命上书论时事次宝应闻降麻告廷除正议大夫尚书右仆射兼中书侍郎陇西郡开国侯加食邑七百户食实封三百户公荷上特達之知感极而继之以泣行次虹县始被受尚书省劄子有旨趣召盖行在前此不知公由江淮以来也次会亭上遣中使王嗣昌传宣抚问赐银合茶药次谷熟御史中丞顏岐遣人投文字封以御史台印乃论公不当为相章疏大意谓张邦昌为金人所喜虽已为三公郡王宜更加同平章事增重其礼公为金人所恶虽已命相宜及其未到罢之置之闲地前後凡五章皆不降出故岐封以示公欲公之留外而不进也公乃知命相盖出於渊衷独断而外庭所以沮之者无所不至益以感惧会复遣使趣召遂行有旨赐御筵於金果园龙图阁学士兼侍读董耘来传上旨云尝遣从事郎刘默齎御书由湖北迓卿书中有学穷天人忠贯金石方今生民之命急於倒挂谅非不世之才何以協济事功之语公感泣流涕遂如行在上遣使趣进对于内殿见上叙致不觉涕泗之横流上亦感动因奏曰金人不道专以诈谋取胜中国而朝廷不悟一切墮其计中自古夷狄之祸中国未有若此之甚赖天佑我宋大命未改故使陛下总师於外为天下臣民之所推戴兴衰拨乱持危扶颠内修政事外攘夷狄以还二圣以抚万邦皆责在陛下与宰相而考慎之际首及微臣自视阙然不足以仰副陛下知遇之意伏望追寢成命上曰朕知卿忠义智略甚久在靖康时宣力为多特为同列所不容故使卿以非罪去国而国家有祸故如此朕尝欲言於渊圣欲使夷狄畏服四方安宁非相卿不可今朕此志已定卿其勿辞公顿首泣谢且道董耘所传圣语荷知如此虽糜捐不足以报德然臣未到行在数十里间御史中丞顏岐封示论臣章疏谓臣为金人所恶不当为相如臣愚憊但知有赵氏不知有金人固宜为其所恶然岐之论臣谓材不足以任宰相则可谓爲金人之所恶不当为相则不可臣愚不知其所喜者为赵氏耶其所恶者为赵氏耶今陛下用臣断自渊衷而岐之论如此如臣迂疎自知不足以当重任但愿一望清光乞身以归田里至於陛下命相於金人所喜所恶之间更望圣虑有以审处於此上笑曰岐尝有此言朕告之以如朕之立恐亦非金人之所喜者岐无辞而退此不足恤公奏曰陛下天纵圣明固不难察此然臣材力絀薄实不足以胜任因出劄子再拜力辞上慰諭久之遣御药邵成章宣押赴都堂治事时六月一日也翌日有旨立新班奏事對於内殿同执政奏事乞力陈不敢当一相之任上曰卿素以忠义

自许岂可於国家艰危之时而自图安闲朕决意用卿非在今日社稷生灵赖卿以安卿其无辞公感泣再拜曰臣愚陋无取不意陛下知臣之深也然今日之事持危扶颠以创业为法而图中兴之功在陛下而不在臣昔管仲语齐公曰不能知人害霸也知而不能用人害霸也用而不能任害霸也任而不能信害霸也能信而又使小人参之害霸也夫知人能信任之而参以小人犹足以害霸况於为天下而欲建中兴之业乎方靖康之初渊圣皇帝慨然有图治之意而金人退师之後渐谓无事是非杂揉且和且战初无定议如臣者徒以愚直好论事为衆人不容於朝使总兵于外而又不使之得节制诸将自度不足以任责乞身以退而谗潜窜逐必欲杀之而後已赖渊圣察臣孤忠特保全之卒复召用然已无及矣不谓今日遭遇陛下龙飞初无左右先容之助徒采虚声首加识擢付以宰柄顾臣区区何足以仰副图任责成之意然靡不有初鲜克有终如臣孤立寡与更望圣慈察管仲害霸之言留神於君子小人之间使臣得以尽志毕虑图报涓埃虽死无憾昔唐明皇欲相姚崇崇以十事要说皆中一时之病类多施行後世美之臣尝慕其为人今臣亦敢以十事仰干天听陛下度其可行者愿赐施行臣亦敢受命其未合圣意者愿赐折难臣得以尽其说上可之公因出劄子奏陈一曰议国是大略谓中国之御夷狄能守而後可战能战而後可和而靖康之末皆失之今欲战则不足欲和则不可莫若自治专以守为策俟吾政事修士气振然後可议大举其二曰议巡幸大略谓车驾不可不一到京师见宗庙以慰都人之心度未可居则为巡幸之计以天下形势观之长安为上襄阳次之建康又次之皆当诏有司预为之备其三曰议赦令大略谓祖宗登极赦令皆有常式前日赦书一切以张邦昌伪赦为法如赦恶逆选人循资责降罪废官尽复官职皆泛滥不可行谓当改正以法祖宗其四曰议僭逆大略谓张邦昌爲国大臣不能临难死节而挟金人之势易姓建号其後不得已乃始奉迎朝廷尊崇之为三公郡王参与大政非是宜正典刑垂戒万世其五曰议伪命大略谓国家更大变故鲜仗节死义之士而奉敌旨受伪官以屈膝於其庭者不可胜数昔肃宗平敌而污伪命者以六等定罪今宜仿之以励士风其六曰议战大略谓军政久废士气怯惰宜一新纪律信赏必罚以作其气其七曰议守大略谓敌情狡狴须复来宜於沿河江淮措置控御以扼其冲其八曰议本政大略谓崇观以来政出多门纲纪紊乱宜一归之於中书则朝廷尊其九曰议久任大略谓靖康间进退大臣太速功效蔑着宜慎择而久任之以责成功其十曰议修德大略谓上初膺天命宜益修孝悌恭俭之德以副四海之望而致中兴翌日降出议国是巡幸赦令战守五劄子余皆留中次日与执政同奏事於内殿进呈议国是劄子上曰今日之策正当如此以次进呈四劄子奏事乞公留身奏上曰臣愚瞽辄以管见十事冒瀆天聪已蒙施行五事如议本政久任修德三事无可施行自应留中所有议张邦昌僭逆及受伪命臣寮二事皆今日刑政之大者乞早降处分上曰执政中有与卿议论不同者更俟欵曲商量公曰邦昌僭逆之罪显然明白无可疑者当道君朝邦昌在政府者几十年渊圣即位首擢为相奉使敌中方国家祸难之时如能以死守节推明天下所以戴宋之义以感动其心金人未必不悔过而存赵氏邦昌方自以为得计偃然当之正位号处宫禁者月有余日戎骑既退四方勤王之师集邦昌擅降伪诏以止之又遣郎官分使赵野翁彦国等皆齎空名告数百道以行迨彦国等囚其使而四方勤王之师日进邦昌知天下之不与已不得已乃请元佑太后垂帘听政而议奉迎邦昌僭逆本末如此而议者不同臣请备论而以春秋之法断之若都城之人则谓因邦昌立而得生且免取再科金银而德之若元帅府则谓邦昌不待征讨遣使奉迎而恕之若天下则谓邦昌建号易姓其奉迎特出於不得已而愤疾之都城德之元帅府恕之者私也天下愤疾之者公也春秋之法人臣无将将而必诛赵

盾不讨贼则书以弑君今邦昌已僭位号敌退而止勤王之师非特将与不讨敌而已其罪为如何昔刘盆子以宗室当汉室中衰为赤眉所立其後以十万衆降光武而光武祇待之以不死今邦昌以臣易君其罪大於盆子不得已以身自归朝廷既不正其罪而又尊崇之以为三公郡王参国政此何理也议者又谓邦昌能全都城之人与宗庙宫室不爲无功而陛下登极缘邦昌之奉迎臣皆以为不然譬之臣之室家偶遭寇盗主人之戚属悉为驱掠而其仆欲奄家室奴婢而有之幸主人者有子自外归迫於衆议不得而有乃欲遂以为功其可乎陛下之立乃天下臣民之所推戴邦昌何力之有臣於劄子中论之详矣方国家艰危陛下欲建中兴之业当先正朝廷而尊崇僭逆之臣以示四方其谁不解体又伪命臣僚一切置而不问何以厉天下士大夫之节执政中有议论不同者乞降旨宣召臣得与之廷辨如臣理屈岂复敢言上许之乃令小黄门宣召黄潜善吕好问汪伯彦再对上语之故而潜善主之甚力诘难数四乃屈服然犹持在远不若在近之说公曰邦昌当正典刑何远近之有借使在近当幽繫而反尊崇之如此何也潜善不能对上顾吕好问曰卿在城中知其详谓当如何好问曰邦昌僭窃位号人所共知既已自归惟陛下裁处又引德宗幸奉天不挟朱泚行後以为悔以附会潜善不若在近之说公曰吕好问援朱泚以为例非是方德宗之狩奉天朱泚盖未反也姜公辅以其得泾军心恐资以为变请挟以行德宗不听而其後果然今邦昌已僭逆岂可使之在朝廷使道路指目曰此亦一天子哉因泣拜曰臣不可与邦昌同列正当以笏击之陛下必欲用邦昌第罢臣勿以为相无不可者上颇感动而汪伯彦亦曰李某气直臣等不及上乃曰卿欲如何措置公曰邦昌之罪理当诛夷陛下以其尝自归贷其死而远窜之受伪命者等第谪降可也上曰俟降出卿劄子来日将上取旨翌日同执政进呈潜善犹左右之乃以散官安置潭州次进呈议伪劄子上曰国家顛覆士大夫不闻死节往往因以为例如王及之坐蕃衍宅门诟詈诸王余大均诱取宫嫔以为妾卿知之否公奏曰自崇观以来朝廷不复惇尚名节故士大夫鲜廉寡耻不知君臣之义靖康之祸视两宫播迁如路人然罕有能仗节死义者在内惟李若水在外惟霍安国死节显着余未有闻愿诏京畿诸路询访优加赠恤如王及之余大均朝廷见付御史台推鞠必得其实臣闻方金人欲废赵氏立张邦昌令吴玠莫俦传道意旨往返数四王时雍徐秉哲奉金人旨追捕宗室戚里令居民结保不得容隐以袂聯属以往若囚系然其後迫道君东君后妃亲王出郊皆臣子之所不忍言又受伪命皆为执政此四人者宜为罪首上以询吕好问而好问以为有之得旨皆散官广南远恶州军安置余以次谪降内王及之余大均胡偁陈中等以赋滥系御史台候结案日取旨李若水已赠官外霍安国赠延康殿学士有死节者令诸路询访以闻上曰卿昨日内殿争张邦昌事内侍辈皆泣涕卿今可以受命矣公拜谢曰自非陛下英睿天纵岂能决断如此天下不胜幸甚臣虽愚陋敢不黽勉自力以图报称因为上言今日国势比之创业为尤难正赖陛下刚健不息以至诚惻怛之意加之不爲群议所动摇先其大者急者而小者缓者徐图之信任而责成功臣乃得以竭尽愚虑以裨补万一复奏曰人主莫大於兼听广视使下情得以上通陛下即大位已踰月而检鼓院犹未置恐非所以通下情而急先务者上曰屡语执政犹未措置卿可即施行公因请置看详官两员於侍从职事官中选兼应士民上封事俟降出签拟可施行者将上取旨有旨兼充御营使以覃恩告廷转正奉大夫进封开国公加食邑一千户食实封四百户时六月六日也是日同执政对於内殿公奏上曰以今日国势而视靖康间其不逮远甚然而有可为者陛下英断於上而群臣辑睦於下庶几革靖康之风而中兴可图然今日之事须有规模而知先後缓急之序所谓规模者外御强敌内销盗贼修军政爱士风裕邦财宽民力改弊法省冗官诚号令

以感人心信赏罚以作士气择帅臣以任方面选监司郡守以奉行新政俟吾所以自治者政事已修然後可以议兴师而问罪金人迎还二圣此规模之大略也至於所当急而先者莫先於料理河北河东两路夫河北河东者国之屏蔽也料理稍就然後中原可保而东南可安今河东所失者忻代太原泽潞汾晋其余犹存也河北所失者不过真定怀卫潞四州而已其余中山河间庆源保塞雄霸深祁思冀邢洺磁相信安广信二十余郡皆为朝廷守两路士民兵将所以戴宋者其心甚坚皆推豪杰以为头领多者数万少者亦不下万人如此知名者已十数处朝廷不因此时置司遣使有以大慰抚之分兵以援其危急臣恐为金人所守粮尽力困坐受其弊两路军民虽怀忠义之心使救援之兵久而不至危急无告必且愤怨朝廷金人因得抚而用之皆精兵也莫若於河北置招抚司河东置经制司择有材略者为之使宣谕陛下德意所以不忍弃两河於夷狄之意朝廷应副钱粮告勅有功者即命以官其能保全一州收复一郡随其高下以为节度防御团练使如唐方镇之制使自为守非特絶其从敌之心又可资其力以御敌朝廷久远无北顾之忧此最今日之先务也金议亦颇以为然上曰谁可任此者公奏曰陛下悦采用臣策臣当询访其人续具奏既退询於士大夫间多谓张所可以招抚河北傅亮可以经制河东公亦颇闻其为人张所者山东人当靖康间为监察御史朝廷以金人再犯阙欲割弃河北既遣使矣铁骑薄城京师围闭所在围城中独上言乞以蜡书募河北兵渊圣许之蜡书至河北士民皆喜曰朝廷欲弃我於夷狄犹有以张察院欲救我而用之乎应募者凡十七万人故所之声满河北部勒既定会都城破谋弗果用上即位於南都所首至行在见上论列且条具应募首领姓名人数合措置事件以闻朝廷欲以为郎官奉使河北以董其事会所以察官上章论黄潜善及兄潜厚奸邪不可用恐害新政潜善引去上留之乃谪所凤州团练副使江州安置是时公未至行在也故衆谓招抚河北非所不可然公以所尝论潜善之故颇难之不得已一日过潜善阁子中相与款语曰前日议置河北招抚司搜访殊无人可以承当独以张所可用又以狂妄有言得罪能先国事後私怨为古人之所难不亦美乎潜善欣然许诺乃荐之於上且道潜善意上悦有旨借所通直郎直龙图阁充河北招抚使遣使臣齎劄子召对摹画称旨锡五品服内府赐缗钱百万以备募兵半年钱粮给空名告千余道以京畿兵千人为卫将佐官属听自辟置一切许以便宜从事有朝请郎王圭者真定府人真定府既破率衆数万保西山屡胜金人闻上登极自山寨间道来其所谋正与朝廷同能道河北事尤详有旨除直秘阁招抚司参谋官使佐所傅亮者陕西人以边功得官谙练兵事靖康初至京师上封事请以亲王为元帅治兵於河朔其冬复有荐者再召之亮至而都城已破率陕右京西勤王兵三万人者至城下屡立功统御将佐士卒如古人斩斩整一无敢犯令者上即位亮诣行在召对除通直郎直秘阁而亮之爲人气劲言直议论不能屈折执政不喜之除知滑州滑两经残破无城壁亮上疏自陈曰陛下复归东都则臣能守滑陛下未归则臣亦不能守也执政摘其语以为悖傲不逊降通判河阳府公至行在亮已行使人召之乃来与语连日观其智略气节真可以为大将者欲且试之乃荐於上以爲河东经制副使而以观察使王 为使 亦陕西人累立边功金谓在武臣中可用者上宣谕亮前疏中语公广上意而奏曰人臣论事言不激切不足以感动人主激切则近谤讪故昔之听言者必察其所以如果出於谤讪何所逃罪至於有所激而云则必恕之以来谗言如周昌之对高祖刘毅之答武帝皆人之所难堪者而二主恕之以其有所激故也亮之言如此但欲激陛下以归京师耳非有他故愿圣度有以含容之且人材难得而将帅之材为尤难如亮者今未见其比异日必能爲朝廷立大功气劲言直乃关陕气俗之常不足深责上乃许如所请并召对赐亮五品服与

兵万人告勅银绢与川纲之在陕西者诏京西陕西漕臣应副粮草余如张所已得旨而遣之初公建议以料理河北河东为所当先者适後宫降诞皇子率执政入贺公奏上曰皇子降诞考祖宗故事当肆赦陛下登宝位赦已旷荡独遗河北河东而不及勤王之师天下尚缺望夫两路爲朝廷坚守而赦令不及人皆谓已弃之何以慰忠臣义士之心而勤王之师虽不曾用在道路半年擐甲荷戈冒犯霜雪亦已劳矣疾病死亡者不可胜数恩恤不及後日复有急难何以使人愿因今赦该载德意上嘉纳故皇子赦於二者尤详又请降诏褒慰两路守臣将佐军民谕以朝廷措置救援不弃之意又诏自今有能收复两路已?州军及救解急危保全一方功效显著者并除本处节度观察防御团练依方镇法命使臣齎夏药徧赐两河守臣将佐命榷货务印造见钱钞遣使齎送两路州郡命降见钱钞三百万贯付河北东路陕西路漕司广余应副两路命起京东路夏税绢於大名府桩管川纲河东区衣绢於永兴军桩管以待两路支俵於是两路知天子德意人情翕然蜡书日至间有破敌捷报金人围守诸郡者往往抽退且山寨应招抚经制司募者甚衆而潛善建议令马忠将所部兵会雄州弓箭手李成所募兵凡五万人捣虚入界敌必释诸郡之围以自救公曰今日士怯兵弱恐未可深入莫若使之与张所協力先复瀋卫怀三州而真定可复潛善坚执其议上可之公不欲力争乃以忠为河北经制使而以张换副之换者陕西人质朴有谋而善战其材远胜於忠既使副忠又令与张所相应援而换亦以公之策为然公尝论京西河北为金人盗贼侵犯有能以死固守而保全一方者有贼未至而先遁遂失守者谓宜褒黜有旨各增降两官或与职名或落职有许高许亢者防河而逃遁会言者论列编管岭南至南康军且欲为变守倅以便宜诛之而待罪衆谓擅杀为非是公曰渊圣委高亢防河付以兵将甚衆敌将至而先走以铁骑五百自颍昌趋江南沿路刼掠甚於盗贼朝廷不能正军法而一军垒守倅敢诛之必健吏也使後日受命扞敌者知退走而郡县之吏有敢诛之者其亦少知所戒乎是当赏上以为然乃命各转一官时开封与留守阙官公以爲留守非宗泽不可力荐之泽至京师果能弹压抚循军民畏爱修治城池楼櫓不劳而办屡出师以挫贼锋虽嫉之者深竟不能易其任也是时除侍从卿监郎官管职以补班列之阙及召赴行在者多未至而行在官出自围城中者多求东南差遣上命公草诏以戒谕之其後许翰至公荐之於上谓翰外柔内刚学行纯美谋议明决宜在左右参决大政上亦喜其论事乃以爲尚书右丞初汴河上流为盜所决者数处闭塞久不合纲运不通命都水使者陈求道等措置凡二十余日而水复旧纲运沓来间拨入京师米价始平又於两京城外及沿汴至泗增巡检商价始通人情渐复旧命进奏院邸吏分番赴行在朝廷差除镂板传报外路增置马递铺命令始通纲运入京者还载诸部公案图籍赴行在官府始有稽考盖行在草创凡百皆逐一施行措置悉此类也又进呈三劄子一曰募兵二曰买马三曰募民出财以助兵费上皆以为然又议措置控御修举军政谓宜於沿河沿淮沿江诸路置帅府要郡次要郡使带总管钤轄都监以寓方鎮之法许其便宜行事辟置僚属将佐以治兵又命招置新军及御营司兵并依新法团结五人为伍伍长以牌书同伍四人姓名二十五人为甲甲正以牌书伍长五人姓名百人为队队将以牌书甲正四人姓名五百人为部部将以牌书队将正副十人姓名二千五百人为军统制官以牌书部将正副十人姓名有所呼召使令按牌以遣而逃亡死伤皆可周知三省枢密院同置赏功司置籍以受功状三日不检举施行者必罚受赂乞取者行军法许人告遇敌逃溃者斩因而为盗贼者诛其家属凡军政申明约束及更改法制者数十条皆勅榜通衢将士观者皆奋厉公又奏宜诏诸路州县以渐修葺城池缮治器械有旨依奏又奏步不足以胜骑而骑不足以胜车请以车制颁於京东西使制造而教閱之因

绘图进呈有旨令御营司制造閱习诸将皆以为可用乃颁降两路委提刑司总领之又奏於沿江沿淮州郡置造战船因其俗之所宜招募水军平居许其自便有故则纠集而用之逐时教閱量行激赏得旨如所请又詢访陕西山东及诸路武臣材略可用者以备将佐偏裨之用有旨皆召赴行在自六月初至是凡四十余日措置边防军政之类始渐就绪是时朝廷议遣使金国公奏上曰尧舜之道孝悌而已孝悌之至可以通於神明今陛下以上皇渊圣远狩沙漠食不甘味寢不安席思迎还两宫致天下养此孝悌之至而尧舜之用心也今日之事正当枕戈尝胆内修政事外攘夷狄使刑政修中国强则二圣不俟迎请而自归不然使冠盖相望卑辞厚礼朝迎暮请恐亦无益今所遣使但当奉表通问两宫致思慕之意可也上以为然命公草表并致书二敌人乃以周望傅雱皆借官为二圣通问使齎表及书以往又奏曰陛下当艰难时为臣民之所欣戴纂承大统宜降哀痛之诏以感动天下具言金人不道赖天下士民同心協力相与扶持保守以致中兴者按其所言次第行之无为虚文务施实惠上乃命公撰拟诏文进呈颁降又具劄子乞省冗员以节浮费上命中书条具乃诏省台寺监官以繁简相兼复开封府官旧制减学官员额罢提举常平司并归提刑司罢两浙福建市舶司并归转运司复幕职曹官旧制非万户县不置丞罢吏员三分之一又请以三省堂吏依祖宗法转官不得过朝请大夫初陈乞出官止爲通判应宰执子弟以恩数带贴职及待制以上并罢宰执及见任宫观待阙未有差遣京朝官以上俸钱并减三分之一有旨从之是时剧贼李昱扰山东杜用起淮南李孝忠乱襄阳皆遣将讨平之其余降者十余万一日论及靖康间事上曰渊圣勤於政事省览章奏有至於终夜不寐而卒有播迁之祸何也公奏曰渊圣在东宫令德闻於天下及即大位适当国步艰难之时勤俭有余而为小人之所惑故卒误大事人主之职但能知人虽不亲细务大功可成上以为然公因论靖康之初金人犯阙中国所以应之者得策凡二道君内禅一也渊圣固守二也使其後更得一策中国可以无事而和战两者皆失之遂致大故而夷狄之患至今为梗方金人初犯阙提兵不过六万人既薄城下累日攻击知都城坚而士卒奋励不可攻则遣使厚有所邀求而请和臣献策渊圣以谓金人之所邀求有可许者有不可许者宜遣使者往来款曲与之商议俟吾勤王之师既集然後与之约其可与者许之其不可与者坚执而勿许则约易成而和可久当时不以为然一切许之其後果不能如约遂再入寇此失其所以和也勤王之师集於都城四面者三十余万臣献策渊圣以谓兵家忌分宜使节制归一用周亚夫困七国之策以重兵与之相临而分兵收复畿邑使无所得粮俟其困而击之一举可破当时不以为然置宣抚司尽以勤王之兵属之故姚平仲得先期举事而朝廷惩刼寨小衄不复议兵敌退又不肯邀击遂使金人有轻中国之心而中国之势日弱此失其所以战也一失机会悔不可追今日机会尤不可失愿陛下以靖康为监审处而决断以应之庶可以成功上曰靖康之初能守而金人再来遂不能守何也公奏曰靖康之初与靖康之末其势不同条目甚多臣请论其大者金人初入寇未知中国虚实亦无必犯京阙之意特中国失备无兵以御之故使得渡河以至城下而尼堪之兵亦失期不至及其再来两路并进遂有吞噬中国之心此其不同者一也靖康之初敌至城下不数日间勤王之兵已集及其再来敌已围城始以蜡书募天下兵遂不及事此其不同者二也靖康初敌寨於西北隅而行营司出兵屯於城外要害之地四方音问络绎不絕勤王之兵既集敌遂敛兵不敢复出其後再来朝廷自决水以渰浸京城西北弥漫数十里而东南不屯一兵使敌反得以据之故城中音问不传於外而外兵亦不得以进此其不同者三也渊圣即位之初将士奋励用命其後赏刑失当人心稍解体此其不同者四也金人围城之初城中置措有叙号令严肃昼夜循抚未尝

少休闻其後无任责者敌至造桥渡壕恬不加恤以十万人登城将士遂溃此其不同者五也臣在枢密院时措置起天下防秋之兵降诏书已累月及臣宣抚河北即诏减罢太半盖朝廷专恃和议以谓金人必不再来一切不为之备故靖康之末不能守者势不同而患祸生於所忽也翌日奏事因裒聚靖康初建议措置与金人约和用兵次第劄子及朝廷分置宣抚司指挥後在宣抚司论不当减罢防秋之兵章疏进呈上皆命留中公因奏上曰靖康间虽号通言路然台谏官议论颺峭者皆远贬其实塞之也乃纳劄子劝上以明恕尽人言以恭俭足国用以英果断大事上皆嘉纳与执政同奏事因纳劄子乞减上供之数以寛州县修茶盐之法以通商贾劄东南官田募民给地仿弓箭刀弩手法养兵於农籍陕西保甲京东西弓箭社免支移折变而官教閱之又请於陕西河北东路京东西置制置使以远近相应援有旨皆付中书省条具进呈取旨其後遂置诸路制置使而余事以公罢政皆不果行初公尝从容奏上曰朝廷外则经营措置河北河东以为藩篱葺治军马讨平贼盗内则修政事明赏刑皆渐就绪独车驾巡幸所诣未有定所中外人心未安夫中原者天下形势根本一去中原则人心摇而形势倾矣臣尝建巡幸之策以关中为上襄阳次之建康为下今纵未能行上策犹当适襄邓间示不去中原以系天下之心近日外议纷纭皆谓陛下且幸东南果如所言臣恐中原非复我有车驾还阙无期而天下之势遂倾难复振矣上曰但欲迎奉元佑太后及津遣六宫往东南耳朕当与卿等独留中原训练将士益聚兵马虽都城可守虽金人可战公再拜赞上曰陛下英断如此乞降诏以告谕之乃命公拟撰诏文颁降榜之两京读者皆感泣後半月上忽降出手诏欲巡幸东南以避狄令三省枢密院条具合行事件以闻公极论其不可且言自古中兴之主起於西北则足以据中原而有东南起於东南则不足以复中原而有西北盖天下之精兵健马皆出於西北一委中原而弃之岂惟金人将乘间以扰关辅盗贼且将蠭起跨州连邑陛下虽欲还阙不可得况治兵胜敌以归二圣哉惟南阳光武之所以兴有高山峻岭可事控扼有寛城平野可屯重兵西通关中可召将士南通荆湖巴蜀可取财货东達江淮可运粮饷北距三都可遣救援暂议驻蹕自冬徂春两河措置就绪即还汴都策无出於此者上乃收还巡幸东南手诏令与宰执商议翌日再具劄子援楚汉荥阳成皋间曹操袁绍官渡事论天下形势於上前且曰今乘舟顺流而适东南固甚安便但中原安则东南安失中原则东南岂能必其无事一失机会虽欲保一隅恐亦未易臣诚不敢任此责且陛下既已降诏独留中原人心悦服奈何诏墨未乾失大信於天下愿断自渊衷以定大计上乃许幸南阳将以秋末冬初择日啓行而潜善伯彦陰以巡幸东南之计动上意其议颇传于外客或谓公曰士论汹汹咸谓密有建议者东幸已决南阳聊复尔耳盍且从其议乎不然事将变公曰天下大计在此一举国之安危存亡於是乎分成命已行悦或改易吾当以去就争之且上英睿必不为异议所惑不然吾可贪禄保身虚受天下之责哉然自是虽未尝有改议巡幸之命而初公每因留身奏事从容论治体及有所规谏虽苦言逆耳上皆嘉纳至是奏陈当世急务拟进指挥多不降出及每批出改易已行指挥颇多公知譖愬之言其入已深一日留身奏上曰臣近日屡烦宸翰改正已行事件臣逐一按据辨明幸蒙圣察又所进拟措置机务多未蒙降出顾臣孤拙寡与独荷陛下特達之知忌媚者多恐陰有譖愬而离间臣者夫君子小人势不两立治乱安危系其进退在人主有以察之而已因出劄子极论君子小人之理以谓臣昨日奏事论及人主之职在知人虽尧舜犹以为难诚能别白邪正使君子小人不至於混殽然後天下可为伏蒙宣论知人亦非难事但考其素行则知之窃仰圣训诚得知人之要且言疑则当勿任任则当勿疑持狐疑之心者来谗贼之口愿致察於此上慰谕曰无此但朕思虑偶及之耳其余章疏

见省览非晚降出公拜谢而退至八月五日告廷迁公银青光禄大夫尚书左仆射兼门下侍郎加食邑七百户食实封三百户而除潜善右仆射兼中书侍郎既命两相则潜善显沮张所而罢传亮公以去就争之遂定进退虽知堕潜善策中盖势不得不然也初张所既受招抚使之命建言乞置司北京候措置就绪即渡河移司恩冀以图收复而权北京留守张益谦奏招抚司搔扰不当置司北京故附潜善伯彦相与谋为此奏以沮张所而惑上意也公奏曰张所画一乞置司北京候措置就绪日渡河今所尚留京师以招集将佐故未行不知益谦何以知其搔扰而言不当置司方时艰危朝廷欲有所经略益谦小臣乃敢非理公然沮抑此必有以使之者上乃令降旨招抚司依画一置司北京就绪日疾速渡河张益谦令分析以闻既割下矣枢密院复以益谦申状将上取旨凡千余言痛诋招抚司後数日乃阅过尚书省公始见之乃以枢密院画旨并尚书省元降旨挥同将上进呈与伯彦鬬争於上前公奏曰张益谦所奏尚书省已得旨行下而枢密院又别取旨痛诋訾之不过欲与益谦相表里以细故而害大计沮抑张所耳沮抑张所有何所难致误国家之大计将谁任其责伯彦茫无所对第云初不知尚书省已降指挥上乃令枢密院改正依前降指挥施行既不得逞即又为傅亮之事初王傅亮既受命为经制使副即画一申朝廷以谓河东州县多为金人所没至於陕西接连如河中府解州亦为所据与陕府相对以河东为界今经制司所得兵才及万人皆乌合之衆其间多招安盗贼溃散之兵未经训练拊循难以取胜乞於陕西置司训练措置招募陕西正兵及将家子弟结连河东山寨豪杰度州县可复即复之可以渡河即乘机进讨收复有旨从之才十余日枢密院取旨令留守宗泽节制即日过河亮申今欲即令过河无不可者但河外皆金人界分本司措置全未就绪既过河後何地可为家计何处可以得粮乌合之衆使复为金人之所溃散何自可以得兵亮等不足惜第恐有误国事公将上进呈奏曰经制司军旅未集遽违前议不恤其措置未辨集而毆之使渡河正所以为贼饵不见其利也且亮等受命而行才十余日岂可使以为逗遛不若只依前降旨挥为使潜善伯彦执议圣意颇惑依违不决者累日公留身极论其理具言潜善伯彦始极力以沮张所赖圣鉴察之不得行其志又极力以沮傅亮盖招抚河北经制河东皆臣所建明而张所傅亮又臣所荐用力沮二人乃所以沮臣使不安其职臣每见靖康大臣不和之失凡事未尝不与潜善伯彦商议而後行不期二人乃误用心如此如傅亮事理明白愿陛下虚心以观之则情状自见上曰俟批出只令依元降旨挥於陕府置司至翌日批出乃云傅亮兵少不可渡河可罢经制司赴行在公留御批将上奏曰臣昨日论傅亮事已蒙宣谕俟批出依元降旨挥继奉御批乃罢亮经制使不知圣意所谓上曰亮既兵少不可渡河不如且已公奏曰臣论傅亮乞依元降旨挥非谓不使之渡河缘军旅未集驱乌合之衆渡河即成孤军必为金人所溃此必潜善等以私害公陰有以荧惑圣听欲以沮臣使去耳圣意必欲罢亮乞以御批降付潜善施行臣得乞骸骨归田里非敢轻为去就更望陛下留神熟思之使亮不罢则臣何敢决去因再拜榻前上犹慰谕谓不须如此公退闻亮竟罢乃入表劄求去上遣御药宣押赴都堂治事复入第二表劄皆批答不允翌日遣御药宣押赴後宫起居随宰执奏事讫公留身上曰卿所争事小何须便为去就公奏曰人主之职在论一相宰相之职在荐人材方今人材以将帅为急恐不可谓之小事傥以为小臣以去就争之而天意必不可回臣亦安敢不必去因再拜榻前复奏曰臣以愚憊仰荷睠知初无左右先容之助龙飞之初首命为相潜善伯彦自以谓有攀附之功方虚位以召臣盖以切齿及臣至而议论伪楚建请料理河北河东两路车驾巡幸宜留中原皆与之不同而独陛下嘉纳听从固宜为其媚嫉无所不至臣独立羣枉之中独赖陛下察之得以尽其区区之愚如傅亮之

事晓然无可疑者又不蒙圣察是臣荐进人材不足用议论国事不足采其失职大矣岂敢复任宰相哉方朝廷承平无事之时宰相犹可尸禄今艰难多故之秋当惜分陰臣自度终无以当陛下之委任而副天下之责望敢久居此以妨贤路哉且臣尝建议车驾巡幸不可以去中原潜善等必以此动摇圣意故力沮张所傅亮而去臣臣东南人岂不愿奉陛下顺流东下为安便哉顾车驾巡幸实天下人心之所系中国形势之所在一去中原则後患有不可胜言者故不敢雷同不说以误大事愿陛下以宗社为心以生灵为意以二圣未还为念留神於此勿以臣去而其议遂改也臣仰荷天地之德虽去左右岂敢一日忘陛下不胜犬马依恋激切之至因泣辞而退遂上第三表劄客或谓公曰公决於进退於义得矣顾谗者不止将有患祸不测奈何公曰大臣以道事君不可则止吾知尽事君之道不可则全吾进退之节而已患祸非所恤也畏患祸而不去彼独不能讽言者诋訾而逐之哉天下自有公议此不足虑翌日降麻告庭除观文殿大学士提举杭州洞霄宫加实邑七百户食实封三百户时八月十八日也以九月半抵镇江府闻辛道宗之兵变於秀州宿留不行者半月闻其掠毗陵焚丹阳遂以客舟由外江以归梁谿而言者又言公遣弟纶与贼通且倾家赀以犒贼为绯巾数千顶与之朝廷不复究问其实有旨落职令鄂州居住附会时宰者尽形於制词谗谤如此自非上恩保全有以照见其无他虽欲处江湖之善地岂可得而纶亦且死於非辜矣公荷上知遇付以国事当轴秉钧才七十有五日而罢既罢之後张所亦以罪去傅亮辞母病不赴行在而归陕西招抚经制司皆废车驾遂东幸而两河郡县皆?於贼金人以次年春扰京东西深入关辅残破尤甚凡募兵买马团结训练车战水军之类一切废罢中原盗贼蠭起跨州连邑朝廷不能制率如公之所料也二年十月有旨谪降官不许同在一州移公澧州居住会有上书讼公之冤者复有论列十一月责授单州团练副使移万安军安置三年行次琼州三日而德音放还任便居住四年自岭表访家鄱阳未几挈家还邵武七月复银青光禄大夫绍兴元年三月提举杭州洞霄宫九月复资政大学士

梁谿集行状中

行状下

钦定四库全书

梁谿集

行状下

绍兴二年二月八日除观文殿学士充荆湖广南路宣抚使兼知潭州公以忧患之余哀病日加不敢祇受具奏辞免且致书宰执力陈所以不敢当之意四月七日内侍于盖传宣抚问遣令视上道乃还公迫不得已祇受告命密院差任仕安兵三千人以二十四日假福州贡院开司五月六日啓行有旨就孟庾韩世忠下拨统制辛企宗郝晟两军及令见在湖南岳飞韩京吴锡吴全等军听受节制初荆湖自庚戌春为金人蹂践土贼如锤相雷进杨华邓装李冬至等各拥数万之衆残破州县保据巢穴东北流移之人相率渡江州县不能制御孔彦舟据潭州後为马友所逐李宏据岳州刘忠寨於江湖两界出没数路而曹成兵犯郴衡水道以及二广湖南安抚使向子諲为曹成虏置军中民不聊生韩世忠元留统制官董旼招曹成成虽受招而焚掠如故公是时总师由庐陵入本路界闻曹成将自邵入衡以趋江西而董旼所带亲兵才数百人势不足以弹压即驻泊衡阳先遣使臣齎榜约束令放散驱掠老幼及严戢其徒不得作过曹成至邵以公状申称放散三万余人尚有四万至衡率头守百余赴本司公参公召与语且以善言慰抚之戒以所至不得搔扰俟出境宁肃当为保奏成感泣听命一路遂以无事曹成既出境长沙报马友之党头首步谅等其衆二万余人自筠袁还犯本路焚掠醴陵攸县衡山屯泊於鱼集市放兵四出人情震动公乃留统制官韩京屯茶陵统领陈照屯安人统领汤尚之及将官白德屯衡州以备贼公乃亲率大军趋衡山有献策者谓自衡山至鱼集市三十余里隔湘江及茶陵江凡两涉水不若自白沙济师即一涉水白沙在衡州来路去衡山三十里去贼垒亦三十余里贼无斥堠必不虞官军之来可以得志公从其言乃约衡州备舟楫於白沙岸下驻衡山之次日遣统制官任仕安吴锡王俊率将佐军马还自白沙连夜渡江凌晨叩贼垒贼衆初不之觉仓卒出拒见官军徧满山谷戈甲旗帜鲜明知势不敌乃降尽得其輜重兵仗老小等并释器甲押赴本司公参先是贼遣四千余人出掠欲犯衡郴诸郡为陈照汤尚之等所遏公遣使臣齎榜谕以步谅等已降老小尽在本司存恤宜早自归亦令步谅遣人同往招之出掠之衆悉还听命凡得首领统制统领官十余人将佐五十余人使臣五百余人其衆万有九千余人应江湖间驱虏人并疾病老弱者并给公据放散择疆壮精鋭得七千余人分隶诸将既练汰放散讫即令精疆者每五百人为一部摆拽於湘江滩碛中公御中军帐具军容乘高以临之谕以尔等皆朝廷赤子失业至此良可矜悯今既归降并令与旧军相杂团结祇刺手背应新军所得财物輜重预行约束并不得毫髮侵动本司自以三万缗及所获牛畜等犒赏以故人情安帖自衡山趋长沙道中无散逸者其後措置招降并皆仿此入长沙交割潭州职事时湖南频年为盗贼所据州县官类多权摄乘时为奸公於视事日枷项巨猾付狱得入已赃凡三万六千缗具案上之其余州县权摄官以渐易置为民所诉讼者乃按治之於是望风引退者甚衆赃吏稍戢矣方入境之初趋见长老问民所疾苦皆谓所苦者无甚於盗贼与科须公既措置招捕羣盗而科须之弊一县至有十万缗者公即移檄州县

尽罢科率非奉使司旨挥而擅科率者以军法从事应日前科须之物并以正赋率折又荆湘间民户输纳税米率四硕始了纳一硕百姓贫困仍檄漕司行下州县除官耗外不许转增加升合以故流移归业民皆乐输是冬长沙颇稔得税米四十余万硕军储遂以足用方李宏之杀马友也王进王俊以五千余人遁去据七星寨在湘乡宁乡安化三县之间日肆焚掠一方为之骚然公抵长沙之次日命郝晟出师次七星寨进以衆三千约降俊以二千余人犯安化及破邵州新化以逼邵阳公遣吴錫以其麾下由径路趋邵阳以讨王俊錫率所部倍道兼程自潭五日而至邵王俊之衆去邵才数十里而錫兵至适雪作錫乘其不备纵兵掩击杀千余人擒俊余衆悉降自是湖南境内溃兵为盗者悉平民渐安居唯江西接境间有出没如刘超张成等多者数千人少者亦不下千数遂檄江西会合夹击且招且捕节次悉降拣汰放散外得精壮又数千人郴州土贼邓装彭铁大攸县土贼王顺等分遣韩京等讨杀以故境内悉平独湖北杨么者锤相余党以左道惑民据洞庭重湖之险北达荆南公安西及鼎澧东至岳阳南抵长沙之湘陰益阳周环千里出没作过有衆数万於是旋剏战舰命统领官李进屯湘陰為準屯益阳以备之吴錫屯桥口破其数寨么不敢犯先是长沙遭兵火官府之属尺椽无有市井萧然公留衡阳日先遣官造州宅便厅门庑堂屋之类既入城始及甲杖庠州官廨舍两狱仓库等又造营房六千余间民稍归业易草舍以瓦屋城市始就绪帅府制度日以备具时有统制官张忠彦者缘讨捕驻军广州胁制州县供亿以万计一路为之震扰屡欲为办拨隶孟庾韩世忠岳飞并不禀命至是拨隶公麾下遣使臣召之不报忠彦意乐为郡公因檄令权知岳阳忠彦果来即械送所司取旨诸路帅臣带宣抚者并罢公止带湖南路安抚使公尝建议以谓荆湖之地縣数千里南过二广北控襄汉东接江淮自昔号为上流诸葛亮谓之用武之国今朝廷保有东南制御西北荆湖诸郡如鼎沔岳鄂连荆南一带皆当屯宿重兵倚为形势使西川之号令可通襄汉之声援可接乃有恢复中原之渐盖公之志气其素所蓄积也丐祠得请乃以节次招降到溃兵盗贼人数及见管军马数自打造战船教习水战次第并见在金银钱物与江西广南未支拨到钱米之数逐一具奏即行二年四月得旨令省记编类建炎元年三月以後时政记公乃以昨任宰相日得圣语及所行政事赏行黜陟之大略着建炎时政记以进有旨宣付史馆是冬伪齐入寇侵犯淮甸邸报既传中外忧愤公具奏以今日扞御戎马事势陈为三策以献其大略曰今伪齐悉兵南下其境内必虚僥命信臣乘此机会捣颖昌以临畿甸电发霆击出其不意则伪齐必大震惧呼还丑类以自营救王师追蹙必有可胜之理非惟牵制南牧之兵亦有恢复中原之兆此上策也朝廷或以兹事体大则銮輿驻蹕江上势须号召上流之兵顺流而下旌旗金鼓千里相望以助声势则敌人虽衆岂敢南渡仍诏大将帅其全师进屯淮南要害之地设奇邀击絶其粮道贼必退遁保全东南徐议攻讨此中策也万一有借亲征之名为顺动之计委一二大将扞敌于後则臣恐车驾既远号令不行贼得乘间深入州县望风奔溃其为吾患有不可胜言者矣此最下策也往岁金人南渡利在侵掠既得子女玉帛而时方暑则势必还师今伪齐使之渡江而南必谋割据将何以为善後之计哉故今日为退避之计则不可朝廷措置得宜将士用命则安知此贼非送死於我顾一时机会所以应之者如何耳望降臣章与二三大臣熟议之有旨以公所陈皆今日之急务也已付三省枢密院施行降诏獎諭有卿忠贯神明虑先蓍蔡科敌於千里之外制胜於三策之语公既以三策奏陈时又报韩世忠统全军於淮楚间迎击贼兵连获胜捷有旨令遣台臣督刘光臣张俊纵兵渡河应援车驾已发进临江上抚劳诸军公又条奏宜备有四曰生兵曰海道曰上流曰四川至於保据淮南调和诸将增置警卫广备粮食措置战舰水军及措置杨么

凡十事以献庙堂五年春诏问凡今攻战之利守备之宜措置之方绥怀之略可悉条具来上公乃条对以献其略曰议者或谓戎马既退当遂用兵为大举之计臣切以为不然今朝廷以东南为根本傥不先为自固之计将何以能万全胜敌又况将士暴露之久财用调度之烦民力科取之困谓宜大为守备痛自料理使之苏息乃为得计议者又谓戎马既退当且保据一隅以苟目前之安臣又以为不然宜於防守既固军政既修之後即议攻讨乃为得计此二者守备攻战之序也至於守备之宜则当料理荆襄以为藩篱葺理淮南以为家计异时可省经费为无穷之利守备之宜莫大於是守备矣然後可以议攻战之利亦当分责於诸路大帅谓如淮东之帅则当责以收复京东路淮西之帅则当责以收复京西路荆襄之帅则当责以收复京西南北路川陕之帅则当责以收复陕西五路诸路剋捷因利乘便收京畿复故都至於临事制变不可预图愿勿失机会而已若夫措置之方则臣愿驻蹕建康绥怀之略则臣愿先为自强之计大槩近年所操之说有二闲暇则以和议为得计而以治兵为失策仓猝则以退避为爱君而以进御为误国衆口和之牢不可破今天啓宸衷亲临大敌逆臣悍敌数十万衆潜师宵遁则和议之与治兵退避之与进御其效槩可覩矣臣愿自今以往不复为退避之计可乎古者敌国善邻则有和亲仇讎之邦鲜复遣使今使輶往来邀我以必不敢为之谋於吾自治自强之计动辄相妨金人二十余年以此策破契丹困中国曾不知其害臣愿自今以往勿复遣和议之使可乎二说既定藩方協力将士用命虽强敌不足畏虽逆臣不足忧特在陛下方寸间耳臣昧死条上六事一曰信任辅弼二曰公选人才三曰变革士风四曰爱惜日力五曰务尽人事六曰寅畏天戒反覆论议几万言皆切中时病内变革士风尤为着明其略曰夫用兵之际似与士风初不相及然士风淳厚则议论正而是非明朝廷赏罚功罪当而人心服士风浇薄则议论不正而是非不明朝廷赏罚功罪不当而人心不服晋之士风尚虚浮而不事事时措置乖谬盗贼并起而有五戎乱华之祸本朝嘉佑治平以前士风何其淳厚也自数十年来非特不事事而已奔竞争进议论徇私邪说利口足以惑人主之听元佑大臣如司马光之流皆持正论而群枉嫉之指为奸党士风递相仿倣颠倒是非变乱白黑政事大坏以驯致靖康之变逮今数十年爱惜之情销尽然後朝廷始知元佑羣臣之忠褒赠官秩録用子孙然已何补於事曷若早变此风则忠臣无诛谪之冤国家有治安之实两受其利岂不美哉臣观近年士风尤薄不顾国体惟欲进身不核实事惟欲伤人大詈则大进小詈则小迁訛成风此非朝廷之福也陛下得一张浚付以重权使御强敌於关陕虽以忠许国事失机会不为无过言者痛丑诋诬以大恶岂不太甚欵浚有浴日之功足以结陛下之知有大臣之辩足以回陛下之听故得自洗濯复侍清光於帷幄之中然其所伤已多矣藉使遭谤困谗之臣无浚之功又无大臣之辨白而有下石以挤之者则何以自雪於君父冀察其不然哉夫朝廷设耳目及献纳论思之官以广视听因许之以风闻至於大故亦须核实使果如其言则诛责所加岂宜止从轻典使言而无实则诬人之罪伏谗蒐慝得以中害善良皆非所以修政也臣愿陛下降明诏以戒谕士大夫使体德意从忠厚变近年浇薄之风将见士风淳厚而中兴之业不难致矣末曰陛下视建炎以来其所措置是耶非耶以为是则何以不见其效以为非则安可复蹈其辙臣前所陈皆改辙之道非循旧迹所能为也择善而从斟酌而行则在陛下所谓善後之策何以加之闰二月复观文殿大学士再任提举西京嵩山崇福宫七月十七日蒙降亲笔手诏以公条具敌退事宜已施行外特赐褒谕有卿首陈三策适投却敌之机继上六条大阐兴邦之略意拳拳而曲折言凛凛而高明有发予衷如对卿语此乃卿精忠许国大节表时虽在燕闲之中不忘开济之事之语十月十六日除江南西路安抚制置大使兼知洪

州公两具辞免复赐亲笔勉公使行公辞尤力亦不允且得旨许赴行在奏事毕之官六年二月三日准告兼营田大使二十四日到国门翌日内殿引对上慰劳再四以已见利害并本路职事再对于内殿三月一日朝辞得旨引见上殿三对之间所进呈劄子凡十有六而论中兴及金人失信襄阳形胜与夫和战朋党五事皆利害之大者其详具奏疏有旨令申世景一军前去洪州驻劄听江西安抚制置大使司节制使唤先是公以靖康间道君渊圣所赐御书刻石因吕祉以示张浚浚以上闻至是因蒙宣谕欲见道君御书真蹟具奏以进外又以劄子缴进靖康间奉迎録曰臣靖康初任知枢密院事被渊圣皇帝旨迎奉道君太上皇帝於南京蒙道君赐对听纳其说罢幸亳社西洛旋归京师二圣重欢四海胥庆道君察臣之忠赐以御笔礼数优异渊圣察臣之忠赐以亲笔褒谕再三而靖康之末臣既去位羣枉当国与臣为仇颠倒是非变乱黑白孙覲因召试中书舍人作戒励诏显诋臣为指天画地睥睨两宫唐恪因令榜於朝堂士大夫信以为然罕有知其其实者衔冤抱愤顺受默闇不敢自明伏遇皇帝陛下盛德日跻大明旁烛凡臣子之忠於所事而为回邪之所诬蔽有迹可考者悉蒙昭雪君人之道孰先於此臣近尝以二圣所赐御笔刻之琬琰盖欲侈大其赐因自辨白以装成碑本托给事中臣祉以示右仆射臣浚遂获上闻伏蒙宣谕欲见道君御笔真蹟臣已恭依圣训具奏缴纳外有臣靖康间编修到奉迎録并臣进呈劄子二首徐处仁等表一道道君御制青词一首渊圣御笔宣谕一首缮写合成一轴谨具劄子缴进仰尘天听伏望圣慈特加睿察三月六日得旨送史馆是时朝廷锐意大举既遣相臣张浚视师川陕荆襄又降制命以韩世忠岳飞为京东京西路宣抚使上尝面谕公以十数年来训练士卒今方可用公既陛辞以行因极论所以进兵者具劄子以奏大略谓今日主兵者之失大略有四兵贵精不贵多多而不精反以为累阵贵分合合而不能分分而不能合皆非善置阵者是四者今日诸将之失愿陛下明诏之使知古人用兵之深意非小补也朝廷近来措置恢复有未尽善者五有宜预备者三有当善後者二何谓有未尽善者五善制国用者有生财之道有节用之法有救弊之说有核实之政有懋迁之术有阖辟之权审此六者则虽养兵之多何患乎财用之不足而朝廷初不留意於此唯务降官告给度牒卖户帖理积欠折帛博采预借和买名虽不同其取於民一也此未尽善者一也议者谓当因粮於敌臣以为敌人聚粮或有败北焚荡而去必不使为我有若欲取於伪地之民则官军抄掠甚於寇盗有违吊伐之义失民望而坚从贼之心非计之得此未尽善者二也金人专以铁骑胜中国而吾平时不务有可以制铁骑之术此未尽善者三也今朝廷与诸路之兵悉付诸将外重内轻缓急何以使之扞患而却敌哉此未尽善者四也臣於陛辞日窃闻麻制以韩世忠岳飞为京东京西路宣抚使圣意可谓断矣然兵家之事行诡道今吾军初未尝有其实而遽以先声临之其可乎此未尽善者五也何谓宜预备者三中军既行宿卫单薄肘腋之变不可不虞此行在不可不预备者一也江东西荆湖南北兵将尽行屯戍鲜少敌人或有乘间捣虚之作则将何以待之此上流不可不预备者二也海道去京东不远乘风而来一日千里苏秀明越全无水军则下流不可不预备者三也何谓当善後者二使王师克捷能复京东西地则当屯以何兵守以何将金人来援当何以待之两路之民怀戴宋之心坚甚万有一得其地而不能守得其民而不能保两路生灵虚就屠戮而使两河之民絶望於本朝则恢复之功难为力矣胜犹如此则所以图为善败之计者宜如何哉此当善後者二也二十三日至抚州金谿界交割本路安抚制置大使职事是时朝廷以本路旱灾饥民阙食御笔诏书令帅守监司多方劝诱积米之家以其食用之余尽数出粜济此流殍数月之苦公即条具画一措置事件具奏又延见父老询问疾苦乞将灾伤路分第三等以下人户四年积

欠特与蠲免又奏乞旋赐本钱十万贯以为营田之本有旨并依洪州月支官兵米五十余硕料钱六千余贯诸县及泛支在外而见在米止四硕余钱只五百余贯公具奏急阙得旨令都转运司应副一月朝廷以财用阙乏建议欲推行交子之法公因致书时宰以谓交子之法初若可行其後官司皆受其弊而卒至於不可行朝廷遂改为关子先是降诏以六月乙巳地震求直言公应奏陈八事时?吉盗贼为患数路有旨令公与连南夫张致远相度申枢密院公以谓?寇巢穴多在江西福建广东三路界首置立寨栅为三窟之计一处有兵则散往他处官军既退则又复团聚中间遣发军马不能穷讨正以节制不一之故若节制归一使其不能散逸且捕且招威令既行则穷寇别无他策必须自归然後结以恩信使之改过自新将为贼首徒党桀黠之人尽赴军前使用以除後患此最策之上者乞与江西路置都统制一员节制三路军马以招捕?贼至於盗贼衰息之後又须县令得人劳心抚字使作过桀黠之人既去良民得以复业安於田亩乃可以化盗区复为乐土然?之诸县多是烟瘴之地盗贼出没不常朝廷初无赏格士大夫之有材者多不愿就又难强之使行欲望朝廷优立赏格将来辟置知县到任半年盗贼消除良民复业选人特与改官京朝官与转行一官候任满日各再转一官其贼平定之後量与蠲免租税以前欠负并免催科庶几官吏尽心民庶安业复有承平之象得旨并依初洪州城池遭金人残破之後城壁摧毁壕堑堙塞兼地步阔远缓急难以防守尝有旨令逐路帅司督贵州郡点检城壁若城大难以因旧即随宜减蹙公恭依指挥相度裁减画图贴说缴申尚书省并乞修城用度既省处画有序不扰而辨城高池深民有所依是年王师与敌伪相持於淮泗几半年公具奏以谓自古用兵相持既久则非出奇不足以取胜愿速遣得力兵将自淮南前来蕲黄间约岳飞兵以为犄角以夹击之大功可成既而王师屡捷刘光世张俊杨沂中大破伪齐戎马於淮淝之上斩馘擒捕甚衆残党遁归淮北公又奏陈利害大略以谓切见间探所报伪齐乞兵於敌人头项颇多未闻有渡淮西南者其侵犯淮淝及光山六安等处作过只有李成孔彦舟叛将签军深虑贼情狡猾匿重兵於後而以签军来尝我师若一胜之後兵骄堕则为患有不可胜言者伏望降诏诸将益务淬砺以待大敌仍命朝廷按图以视诸路某路固实当设疑以欸贼兵某路空虚当增兵以御侵掠使江淮之间表里相资首尾相应旨以公奏陈防秋利害切中事机降诏獎谕公再陈已见劄子愿降哀痛之诏悯将士罹兵革之苦凡死於战陈先加封爵厚给赙赠收恤其家死者褒则生者劝矣然後明诏统师审定功状俟防冬解严庆赐并行其谁曰不然七年正月以公赈济饥民招还流亡降诏獎谕会左司谏陈公辅以靖康间士庶伏阙为人诬其鼓唱至今犹未辨白以此求去具奏乞宫观谓臣当时遭谤尤甚虽尝蒙渊圣皇帝特降诏书宣示四方而仇怨至今以之藉口臣以积年往事不敢复自辨明至使谏臣援以求去在臣愚分其何敢安降诏不允训辞有云且伏阙之往事皆不根之浮辞排邪议以用卿断由朕志守夙心而自信无恤人言及车驾将幸建康公具劄子乞益修战守之具沿淮汉修筑城垒二月报徽宗皇帝升遐宁德皇后上僊公既奉慰表又具劄子乞推广孝思益修军政二十七日车驾进发巡幸建康三月公遣本司干办公事韩岳奉表起居又具劄子论建中兴之功大槩曰愿陛下益广圣志扩而充之与神为谋日新其德勿以去冬骤胜而自怠勿以目前粗定而自安凡可以致中兴之治者无不为之凡可以害中兴之功者无不去之有所规画措置必以天下为度必以施於长久可传於後世为法则中兴不难致矣夫中兴之於用兵止是一事要以修政事信赏罚明是非别邪正招徕人材鼓作士气爱惜民力顺导衆心为先数者既备则士奋於朝农安於野谷粟充盈财用不匮将帅辑睦士卒乐战用兵其有不胜者哉继进论举直言极谏之士乞不必远召将帅二劄子四月十六

日有旨以公典藩踰年民安盜息寬朕忧顾宜有褒嘉可特转左金紫光禄大夫六月上遣中使传宣抚问赐夏药兼银合茶药先是?寇以守臣失於抚循致已受招安人蠭起为盜虽官军屡捷贼党甚衆公致书宰相以张翬材术正可任此所以荐之者甚力其後朝廷果命翬自鼎移守?州招安说諭并令放散徒党赴州公参与免罪犯八月诸路大旱江湖淮浙被害甚广公具劄子乞益修政事以救今日之弊大略以谓前年江湖闽浙尝苦大旱殍路相望陛下軫虑之深亲洒宸翰劝诱賑济其所存活不知其几千万人至诚动天报以休应曰雨而雨曰阳而阳岁大丰穰民以安乐自经一稔之後上下恬嬉不复勤恤民隐朝廷百色诛求上供不以实数而以虚额和采不以本钱而以关子丝蚕未生已督供输禾谷未秀已催装发州县困於转输文移急於星火官吏愁叹闾里怨咨感动天心旱灾复作然则陛下欲销弭灾异导迎吉祥不必他求但如前日之用心自然感召和气休应立臻继旱暵复为丰年矣夫今日之患欲民力寬则军食阙矣欲军储裕则民财匱矣二者如铁炭之低昂此首重则彼尾轻非有术以权之使斂不及民而军食足不可得而均也惟陛下留神邦本天下幸甚及探报酈琼叛逆拥淮西全军并都督行府庐州官吏兵民等尽归伪齐公具奏指陈朝廷措置失当者五深可痛惜者五及鉴前失以图将来者五凡十有五事且言天地之变不足为灾人不尽言国之大患侍从者献纳论思之官也台谏者耳目心腹之寄也今侍从台谏以言为职类皆毛举细故以塞责所论不过薄画资格守倖令承除授之失当至於国家大计系社稷之安危生灵之休戚者初未尝闻有一言及之陛下试察如淮西之变侍从台谏之臣亦有见危纳忠为陛下言之者乎大臣怀禄而不敢谏小臣畏罪而不敢言此最今日之可忧者仍具奏以论列淮西叛将事宜其言指陈朝廷措置失当但欲纳忠於国情迫言切必有抵忤难以复当帅守之寄乞降旨黜责或除一外任宫观九月又具奏乞外祠且以到任以来賑济饥民招填军额建置营房修筑城池缮治器甲增修官府廨盖仓库催发钱粮招捕盜贼并逐一躬亲措置处画事件厘为六状繳奏有旨以公奏陈淮西事宜切中事机降诏獎諭时张浚既罢相外议皆谓车驾将幸平江公以谓平江去建康不远徒有退避之名而言者引汉武诛王恢事以为比非是乃复奏陈利害大略曰臣切见张浚罢相言者引汉武诛王恢事以为比臣恐智谋之士卷舌而不谈兵忠义之士扼腕而无所发愤将士解体而不用命州郡望风而无坚城陛下将谁与立国哉伏望陛下坚圣心而勿动修军政以自强无为趣将献言者之所摇动古语曰临大难而不惧圣人之勇也夫张浚措置失当诚有罪矣然其区区徇国之心有可矜者愿少寬假以责来效又具奏乞宫祠十月被诏书不允准告以明堂赦恩加食邑五百户食实封三百户时建康移蹕之谋既审公具奏陈车驾不宜轻动利害大略曰臣闻自昔用兵以成大业者必先固人心作士气据地利而不肯先退尽人事而不肯先屈是以楚汉相距於荊阳成皋间高祖虽屡败不退尺寸之地既割鸿沟羽引而东遂有垓下之亡曹操袁绍战於官渡操虽兵弱粮乏荀彧止其退师既焚绍輜重绍引而归遂丧河北由是观之今日之事岂可因一叛将之故望风怯敌遽自退屈果出此谋六飞回驭之後人情动摇莫有固志士气销缩莫有鬪心我退彼进使戎马南渡得一邑则守一邑得一州则守一州得一路则守一路乱臣贼子黠吏奸氓从而附之虎踞鸱张虽欲如前日返驾还轅复立朝廷於荆棘瓦砾之中不可得也借使戎骑冲突不得已权宜避之犹为有说今幸疆场未有警急之报兵将无不利之失朝廷止可惩往事修军政审号令明赏刑益务固守而遽为此扰扰弃前功蹈後患以自趋於祸败岂不重可惜哉臣故曰车驾不宜轻动静以鎮之者也又具防冬画一事件奏请方欲俟报措置间而以论列淮西言及台谏遂犯台谏之怒竟以言者之故检会累乞宫观奏章提举临安府洞霄宫时未有

代者惩靖康之故且以本司积蓄财谷之数申奏既而除端明殿学士李光为代公贻书具言所以措置之意八年正月还次长乐是冬以王伦使事具劄子奏陈大略曰臣窃见朝廷遣王伦使金国奉迎梓宫往返屡矣今伦之归与敌使偕乃以江南诏諭为名不着国号而曰江南不云通问而曰诏諭此何礼也臣请试为陛下言之金人毁宗社逼二圣而陛下应天顺人光复旧业自我视彼则仇讎也自彼视我则腹心之疾也岂复有可和之理然而朝廷遣使通问冠盖相望於道卑词厚币无所爱惜者正以二圣在其域中为亲屈已不得已而然犹有说也至去年春两宫凶问既至遣使以迎梓宫亟往遄返初不得其要约今伦使事初以奉迎梓宫为指而敌使之来乃以江南诏諭为名循名责实已自乖戾则其所以罔朝廷而生後患者不待诘而可知臣在远方不足以知其曲折然以愚意料之敌此名以遣使其邀求大略有五必降诏书欲陛下屈体降礼以听受一也必有赦文欲朝廷宣布颁示郡县二也必立约束欲陛下奉藩称臣稟其号令三也必求岁赂广其数目使我坐困四也必求割地以江为界淮南荆襄四川尽欲得之五也此五者朝廷从其一则大事去矣金人变诈不测贪婪无厌纵使听其诏令奉藩称臣其志犹未已也必继有号召或使亲迎梓宫或使单车入觐或使移易将相或改革政事或竭取赋税或腴削土宇从之则无有纪极一不从则前功尽废反为兵端以谓权时之宜听其邀求可以无後悔者非愚则诬也使国家之势单弱果不足以自振不得已而为此固亦无可奈何今土宇之广犹半天下臣民之心戴宋不忘与有识者谋之尚足以有为岂可忘祖宗之大业生灵之属望弗虑弗图遽自屈服祈哀乞怜冀延旦暮之命哉臣愿陛下特留圣意且勿轻许深诏羣臣讲明利害可以久长之策择其善者而从之疏奏虽与衆论不合上不以为忤尝降玉音谓宰执曰大臣当如此矣九年二月除知潭州荆湖南路安抚大使公累具辞免悉降诏不允又具奏力辞曰臣迂疎无周身之术动致烦言今者罢自江西为日未久又蒙湔洗畀以帅权昔汉文帝闻季布贤召之既而罢归布曰陛下以一人誉召臣一人毁去臣臣恐天下有识者有以窥陛下也顾臣区区进退如双鳬只鴈之去来何足少多然数年之间亟奋亟蹶上累陛下知人任使之明实有系於国体有旨以公累具奏陈可依所请依旧提举临安府洞霄宫仍降诏示不欲重违之意十年正月十一日中使徐珣传宣抚问初公之叔弟经博学多识公所以期之者甚远不幸早世公悼恨不能自己适上元日具家饌致祭公抚几号恸不胜手足之痛仓卒感疾是日薨於叔弟之居除特进致仕特赠少师官其亲族十人命公之仲弟维自浙东提点刑狱移闽部以营葬事公命相日合得支赐银绢方时艰难国用正阙力辞不受至是给还及依条给赐赠以为葬事之费三省枢密院遣官致祭所以存恤者甚厚是年十二月十四日葬於福州怀安县桐口大家山之原十三年以长子仪之升朝遇郊祀恩赠太保十六年再赠太傅公娶鄱阳张氏故直龙图阁赠左金紫光禄大夫根之女故资政殿大学士会稽郡公黄公履之外孙累封越国夫人以长子进封鲁国太夫人後公十二年薨子男八人长曰仪之右奉议郎主管南外敦宗院後公九年卒次曰资之右宣教郎主管台州崇道观後公十一年卒次曰集之右通直郎新差充福建路提点刑狱司干办公事次曰润之早卒次曰望之早卒次曰茂之後公百余日卒次曰秀之右宣义郎新差充福建路转运司干办公事次曰申之女七人长蚤卒次适右宣教郎前福建路转运司主管文字黄?次曰住蚤卒次曰惠早卒次适右从政郎福建路安抚司准备差遣张坦次适进士范端贄次许嫁右承务郎监潭州南岳庙常衿孙男九人长曰震右承务郎监潭州南岳庙次曰泰右承务郎後公十年卒次曰升右承务郎次曰晋右承务郎次曰蒙次曰同次曰谦次曰需次曰颐孙女六人长适进士邹煜早卒次适右宣义郎通判温州军州事吕虚已次适进士张蒙次适右迪

功郎新德安府司户参军余永弼次许嫁将仕郎傅伯高余尚幼公资父事君移孝为忠一心不忘所以为天下国家者诚意所志是非利害焕然明白直道而行无毫髮自为心所为所言合於往古验於方来天下之人信之如蓍龟仰之如太山北斗名动夷貊况於华夏受知三朝以身之用舍为社稷生民安危其所论列无非天下大计勤勤恳恳古人所谓恸哭流涕长太息者其事未足道也自为御史一对而罢既为识者之所推与至以左史论暴水远谪闽峤故老前辈莫不为之咨嗟叹服固以任天下之重期之去国七年赐环未几戎骑果至宛若畴昔巨浸之环都城爰从庶僚建大策画长算外扞黠敌内释羣疑虽小人共朝所以摧沮败坏者无所不至然而卒全都城安宗社使黠敌引而北归惟渊圣能用公於仓卒之际故也道直则身危功高则谤多羣奸方以公去位为得计而国家之事有不可胜讳者矣呜呼此天耶其人耶圣主嗣兴公膺爰立之拜制书遐布懽喜一辞公所以为上处画者规模宏远矣同列害成少日竟罢谗言巧诋人为寒心惟圣主察其精忠每蹶辄起忠言嘉谟遇事愤发中心精微罔不展尽感激深切不复顾身其挺挺之节如此然且时被褒嘉之宠盖非公莫之能言非圣主莫之能用也与公深交间有见其奏议者必且为之涕下沾襟闲居无事一话一言未尝不在国家也迨将薨谢为纶论天下事且以比者奏疏为言怅然久之言犹在耳起奠叔兄一恸而絶呜呼痛心之极岂特为吾家也哉昔韩魏公称司马温公大忠大义充塞天地横絶古今但当与有志之士同有执鞭之愿使魏公尚在覩公之所为所守则其所称道将如何耶公於诸弟友爱既笃相知尤深尝有国土之称然而未始效世俗相推挽也绍兴七年郊祀恩当奏子公之子未官者三人乃以仲兄之子琳之名闻至叔兄不幸悼其无子欲以茂之为之嗣事有齟齬抱恨遽终呜呼痛哉可以兴百世之下矣而纶之不肖无状蒙公之所以爱怜者盖蔑以加未薨半月抱送幼子殆预识去期闻者惊叹方先卫公无恙时每欲於邵武置义庄以赙宗族有志未就公晚年乃决意成之远迩懽欣非独被惠者怀感也公平生交游皆一时名士其所荐进不可胜言故有闻其名称初未识面而既蒙引拔者矣然而与其进不保其往既而以怨报德负公盖多而公未始以此怠於待士也陈少阳平生未始识面其慕公之诚至为公死而公每以谓幽冥之间痛此良友若少阳与公真不媿古人矣若乃放意山林昆弟朋友把酒赋诗谈笑酬唱动盈卷轴每有奏议下笔数千言俄顷而就盖公平日以爱君忧国为心筹画计策胷中素定故遇事成章如是之易也晚於易尤有所得着易传内篇十卷外篇十二卷其言微妙有深长之味颇取卦变互体为说动有所稽异於今世君子之所辨释又着论语详说十卷所以发明圣賢之意甚备而文章歌诗奏议凡百有余卷其在政府帅阃纪一时之事则有靖康传信録奉迎録建炎时政记建炎进退志建炎制诏表劄集宣抚荆广记制置江右録惟公勲在王室德在生民至忠大节孝诚友爱罔不具备虽身或不用用或不久其光明杰出故已如此而薨谢有年未克铭诸幽宫是敢辄状公之行事有求於大君子惟其文辞鄙拙无叙次之能不足以发扬公之盛德不胜媿惧谨状绍兴二十六年六月右奉议郎通判洪州军州主管学事赐绯鱼袋弟纶状

梁谿集行状下